

# Bëngbe Bëtsa Cabëngaftaca Entsoye- buambna

Camsá New Testament

This Bible is copyrighted by Wycliffe Bible Translators (Wycliffe.org) and is printed with permission by the Digital Bible Society (dbs.org) for non-commercial use.

This Bible is available for free download in a variety of digital formats at [dbs.org/bibles](https://dbs.org/bibles).

San Mateo .....	4
San Marcos .....	45
San Lucas .....	70
San Juan .....	111
Hechos .....	142
Romanos .....	182
1 Corintios.....	204
2 Corintios.....	225
Gálatas .....	239
Efesios .....	248
Filipenses .....	256
Colosenses.....	261
1 Tesalonicenses .....	267
2 Tesalonicenses .....	271
1 Timoteo .....	274
2 Timoteo .....	281
Tito.....	285
Filemón .....	288
Hebreos.....	290
Santiago .....	308
1 San Pedro.....	314
2 San Pedro.....	320
1 San Juan .....	324
2 San Juan .....	330
3 San Juan .....	331
San Judas.....	332
Apocalipsis.....	334

# San Mateo

## Jesusbe bêts taitanga

**1** Quemënga imnamna Jesucristbe bêts taitanga: Jesucristna Rey David y Abrahábentšana entšá inamna.

<sup>26</sup> Abraham yojamna Isaacbe taitá; Isaacna Jacobëbe taitá y Jacob, Judá y chabe catsátangbe taitá. Judá, Fares y Zarabe taitá; y chatbe mamá Tamar yojamna; Fares Esrombe taitá y mua Arambe taitá. Aram Aminadabëbe taitá; Aminadab Naasonbe taitá y Naasón Salmonbe taitá. Salmón Boozbe taitá y muabe mamá Rahab yojamna; Booz Obedbe taitá y muabe mamá Rut yojamna; y Obedna Isaibe taitá. Isaí Rey Davidbe taitá; David Salomonbe taitá y muabe mamá yojamna chë Uríasbe shema inamná.

<sup>7-11</sup> Salomón Roboambe taitá; Roboam Abíasbe taitá y Abíasna Asabe taitá; Asa Josafatbe taitá; Josafat Jorambe taitá y Joramna Uzíasbe taitá. Uzías Jotambe taitá, Jotam Acazbe taitá y Acazna Ezequíasbe taitá. Ezequías Manasesbe taitá; Manasés Amonbe taitá y Amón Josíasbe taitá. Josíasna Jeconías y chabe catsátangbe taitá yojamna. Chë Babilonioca entšanga chë israelitënga tmo-jánishëche y choca imojanëtámena ora, Josías chë básenga yojánabamna.

<sup>12-16</sup> Ya Babilonioca ndutámenënga ora; Jeconías Salatielbe taitá; Salatiel Zorobabelbe taitá. Zorobabel Abiudbe taitá; Abiud Eliaquimbe taitá y Eliaquimna Azorbe taitá. Azor Sadocebe taitá; Sadoce Aquimbe taitá y Aquimna Eliudbe taitá. Eliud Eleazarbe taitá; Eleazar Matanbe taitá

y Matán Jacobëbe taitá.

Jacob Josebe taitá yojamna y Josena Mariybe boyá. María Jesusbe mamá, Jesús chë Bëngbe Bëtsabe Uámana Uabuayaná, chë Cristo ca uabainá.

<sup>17</sup> Chcasna, Abrahábentšana Davidbentscoñe bnët-sana canta bêts pamíllanga imojëftsemna. Davidbentšana y chë israelitënga Babilonioca imojanëta-menëntscuana inye bnëtsana canta bêts pamíllanga; y inye bnëtsana canta bêts pamíllanga chë Israeloca entšanga imojanëtamenentšana, chë Cristo tojanonýnantscoñe.

## Jesucristo tojanonýná

<sup>18</sup> Jesucristo jónýnanamna mëntšá tojanopasá: María tbojanšbuachená Joséftaca jobouamayama, pero cabá ndoñe cánýiñe ibontsiyena ora, tojanopasá Mariyna ngomamaná yojoquéda chë Uámana Espiritbe obenánaca. <sup>19</sup> José, Mariybe boyá, canye nyetsca soyënguiñe tšabá jamama bošá inamna. Cha ndoñe yontseboše entšangbe delante cha mal jaquédana; chíyecna tojanjuabó nye iytëcana Mariybentšana jtsojuánañana. <sup>20</sup> Y chca yojtsejuabnantscuana, mo otjenayoquécá canye Bëngbe Bëtsabe ángel tbojáninye y chana Josébioye tbojaniyana: “José, Davidbentšana entšá, ndoñe matenócochinýenana Maríaftaca jobouamayama, er chë bochántsebmna šešona chë Uámana Espiritbe obenánaca cha bochántsebmna. <sup>21</sup> María canye šešona bochántsebmna y cha Jesús ca cochjuabaye. Chca echantsabaina er cha chabe entšanga chëngbe bacna soyënguentšana echanjátsebacaye ca” —chë ángel tbojaniyana.

<sup>22</sup> Lempe chca tojanochnëngo, cachcá chaotsemna ntsámo Bëngbe Bëtsá chabe juabna oyebuambnáyëngbiajana tojanayancá. Chë oyebuambnáyá mëntšá tojánayana:

<sup>23</sup> Chë cabá boyabása nduabuátmá ngomamaná echanjoquéda

y canye šešona boyabásetema bochántsebmna, y cha mochanjuabaye Emanuel ca.(Emanuel endayana “Bëngbe Bëtsá béngaftaca ca”.)

<sup>24</sup> José chë otjénayentšana tojanofšená ora, tojanma ntsámo chë Bëngbe Bëtsabe ángel tbojanmandacá y Maríaftaca tojanobouamá. <sup>25</sup> Pero ndoñe cánýiñe ibontsaniyena, sinó nye chë šešonatema tojanonýná orscana. Chë šešonatema tojanonýná orna, José chábioye Jesús ca tbojanabaye.

## Reyes Magos Jesúsbioye tmojána

2 Herodes judiëngbe rey yojamna ora, canÿe pueblo Judeoca, Belén ca uabáinentše Jesús tojanonÿná. Chentsána, báseftanga, estrellënga uatsjëndayënga, magos ca uabáinënga, canÿe bëts puebloye Jerusalén ca uabáinoye tmojánashjajna. Chënga tmojánabo shinÿe bocanoye luarëngocana. <sup>2</sup>Jerusalenocna chënga, Heródesbioye tmojána y tmojanënoticiá: “¿Ndayentše yojtsemna chë judiëngbe rey jtsemnama tojonÿná cha ca? Bëngbe luarëngoca shinÿe bocanoye chabe onÿnana estrella fsënjinye y as muentše cha jaboadorama tifjabo ca.”

<sup>3</sup> Rey Herodes chca tojanuena ora, corente yojtsenócochinÿena, y nÿetsca chë Jerusalenentše oyenëngnaca. <sup>4</sup> Chentsána chë rey tojánachembo nÿetsca chë judiëngbe bachnangbe amëndayënga y chë judiëngbe ley abuátambayënga jenoyeunayëngama. Mëntšá tojanatjá: —¿Ndayentše chë Bëngbe Bëtsabe Uámana Uabuayaná, chë Cristo ca uabainá, jónÿnama ibomna ca?

<sup>5</sup> Chënga tmojanjuá: —Judeoca, Belén pueblentše ca. Bayté entsemna chë Bëngbe Bëtsabe juabna oyebuambnayá Miqueas mëntšá tojanábema:

<sup>6</sup> Y tšëngaftanga, Judeoca Belenentše oyenënga, canÿe mandayá tšëngaftangbentšana echanjabo. Cha nÿetsca chë Judeoca mándayëngbiama más uamaná echántsemna, y atšbe entšanga Israeloca echántsanÿena.

Chíyeca tšëngaftangbe pueblo ndoñe nÿe batsá uámana pueblo quenátsmëna ca.

<sup>7</sup> Chora Herodes iytecana chë maguënga tojánachembo y cuedádoca tojanatjá ntseco ora chë estrella tmojáninÿama. <sup>8</sup> Herodes chë soyënga yojtsetátšëmbo ora, Belenoye chë maguënga tojanichamó, y mëntšá tojanéyana: “Choye motsajna y tšabá chë šešona šmochjánguango. Chašmojinÿena ora, šmochjabëuenaye, as átšnaca chayobená jama chë šešona jadórama ca.”

<sup>9</sup> Rey Herodes chë soyënga tojánëyanentšana, chë maguënga tmojtsatanoñe. Chora cachiñe tmojtaninÿe chë chëngbe luarëngoca tmojáninÿe estrella y yojtsanebnatsana chë šešona yojtsemnéntscóñe. Chentsá juatsbuacá chë estrella yojójayiye. <sup>10</sup> Chë maguënga chë estrella tmojáninÿe orna, corente oyejuayënga imojtsemna. <sup>11</sup> Chë yebnoye tmojánamashjna ora, chë šešona tmojáninÿe chabe mamá Maríaftaca. Chorna, tmojanoshamentšé y chë šešonatema tmojanadorá. Chora chëngbe cajontëmënga tmojanëtsécaca y tmojanatštá castellano, incienso y canÿe botamana uanguëtše soye, mirra ca uabáiniye. <sup>12</sup> Chentsána, mo canÿe otjenayoquécá Bëngbe Bëtsá chë maguënga tojanabuayená rey Herodesbiajana ndoñe chamondesshëcuanama. As chënga chentsána inÿe benachëjana cachëngbe luarëngoye tmojésanshëcuaná.

## Egiptó luaroye tmojtsanachá

<sup>13</sup> Chë maguënga tmojtsatanoñe ora, otjénayoca José canÿe Bëngbe Bëtsabe ángelbioye tbojáninÿe y cha mëntšá tbojanianya: “Motsbaná, chë šešonatema y chabe mamá mesébiatše y Egiptoye motsachá. Herodes chë šešonatema bochanjánguango jtsóbama, chíyeca choca cochtsoquedañe atšbe chacbochjábuaenantscuana ca.”

<sup>14</sup> As José tojantsbaná, chë šešonatema y chabe mamá tojesanébiatše y ibeta Egiptó benache tojëftsanbocna. <sup>15</sup> Y choca imojtsanomñe Herodes tojanóbanëntscuana. Chca tojanopasá, cachcá chaotsemnama ntšamo Bëngbe Bëtsá chabe juabna oyebuambnayabianya tojanayancá. Chë oyebuambnayá mëntšá tojánayana: “Egiptocana atšbe uaqiñá sënjanchembo ca.”

## Herodes tojanmandá basetëmënga jtsëbáyama

<sup>16</sup> Chë maguënga tmojtsaningñema Herodes tojánatšëmbona ora, puerta tbojánetna, y tojanmandá lempe jtsëbáyama base boyabásetemënga uta uata bomnënga y cabá uta uata ndbomnënga, Belén y chë juachañe pueblënguentsënga. Uta uatama cha tojanjuabó, er uta uata yojtsemna chë maguënga chë estrella tmojáninÿama. <sup>17</sup> Ntšamo chë Bëngbe Bëtsabe juabna oyebuambnayá Jeremías tojanoyebuambacá, cachcá tojanochnëngo:

<sup>18</sup> Ramá ca uabaina pueblentše canÿe oyebuambnayana tmojanuena, ngmëncaca ošachiyana y becá tsetšanánaca oyebuambnayana.

Raquel yojamna chabe básengbiama ošachiyiñe, pero ndoñe yontseboše chamuatebiajuama, chabe básenga ya obanënga causa ca —cha tojanábema.

<sup>19</sup> José cabá Egiptoca yojtsomñe ora, Herodes tojanóbana. Chentsána, otjénayoca José canÿe Bëngbe Bëtsabe ángelbioye tbojáninÿe y cha mëntšá tbojanianya: <sup>20</sup> “Motsbaná, chë šešonatema y chabe mamá mesébiatše y Israeloye cochtá. Chë šešonatema jóbama bošënga ya obanënga montsemna ca.”

<sup>21</sup> As José tojantsbaná y chë šešonatema y chabe mamá Israel luaroye tojtésanébiatše. <sup>22</sup> Arquelao Judeoca yojanmánda chabe taitá Heródesbe cuentiñe, y José chca tojántatšëmbona orna, yojtsauatja choye jama. Pero otjénayoca Bëngbe Bëtsá Josébioye tbojanbuayená; chíyeca Josena Galilea ca uabaina luaroye tojána. <sup>23</sup> Choye tojánashjango ora, José tojána canÿe pueblo Nazaret ca uabáinoye chentše joyéanama. Chca tojanochnëngo cachcá chaotsemnama ntšamo chë Bëngbe Bëtsabe juabna oyebuambnayënga tmojanayancá. Chënga tmojánayana: “Nazaretocá ca Jesús mochantsábobaina ca.”

### Juan chë Ubayaná entsanga yojanabuayiyná

**3** Chë tempo, Juan chë Ubayaná, entsanga ndoye-na luaroye Judeoca tojánbocna, Bëngbe Bëtsabe soyëngama jábuayenama. <sup>2</sup> Mëntšá cha yojanëtsët-snaye: “Bëngbe Bëtsabe amëndayana ya echanjósh-jango. Ngménaca šmochtenójuaboye tšëngaftangbe bacna soyëngama y chca amana šmochtsajbaná y Bëngbe Bëtsabe benache šmochtishache ca.”

<sup>3</sup> Juan yojamna canya ndabiama chë Bëngbe Bëtsabe juabna oyebuambnayá Isaías mëntšá tojánayana:

Entsanga ndoyena luaroca canya enduáyebuache:

“Bëngbe Utabná echanjabo ca;

mo nda canye benache tojtseprontacá canye uámana entšá jashjanguama,

tšëngaftángnaca cachcá, Bëngbe Utabná jabama

ainaniñe tšabe juabnéngaca šmochtseprontana ca”

—cha tojánayana.

<sup>4</sup> Juanbe entšayá inauapormana camellbe stjénasheca y bobache yojanasnana. Cha inasaye chapulinatémënga y tjoca tjouangbe méloye. <sup>5</sup> Jerusalenoca entsanga, nyetsca Judea luarentša entsanga y chë Jordán ca uabaina béjaye béconana oyenënga imojánbocana Juan joyeunayama. <sup>6</sup> Bëngbe Bëtsábioye chëngbe bacna soyëngama jaimpáda chentšana, Juan chë Jordán béjayiñe chënga yojanëbáyana.

<sup>7</sup> Pero Juan tojáninye ba fariseunga y saduceunga cha chaubáyama tmojánama. Chënga imojamna chë judiëngbeñe uánatsanënga Bëngbe Bëtsá ndoñe corente ntseyeunanama; as chora tojanéyana: “¡Mëtšcuaye entsanga! ¿Nda tcmënjáuyana chë echanjósh-jango uabouana castigüentsana šmochjotsbocá ca?”

<sup>8</sup> Bëngbe Bëtsábeñe ndegombre ošbuáchiyënga šmochtsemna, as chca chaotsinýna chë bacna soyënga amana tšëngaftanga ndegombre šmojtšajbanama. <sup>9</sup> Y ndoñe šmattsejuabnaye cach tšëngaftangbiama jayanama: ‘Abrahámbentšana entsanga fsëndmëna ca’.

Er atše šcuayana, Bëngbe Bëtsá quem ndëtšbëngacnaca Abrahámbentšana entsanga nanjábiamana. <sup>10</sup> Chë tatsniá ya entsaprontana chë betiyeshënga tbëtëjengocana jtseshatëtsetšama. Ndaye betiye ndoñe tontseshajo, jtseshatëtšana y iñoye jtsatmetšana. Tšëngaftangftácnaca cachcá, tšabe soyënga ndoñe šmontsamëse, Bëngbe Bëtsá cmochanjácastigaye.

<sup>11</sup> “Ndegombre, atšna béjayeca cbondubáyana Bëngbe Bëtsabe benache chašmuatishachama. Pero chë atšbe ústonoye echanjabá, atšbiama más obenana bomná comna, y atše merecido taitstobuajoñe ni mo chabe shecochëtjonëshe jtsámabañama. Chë chabe benache aíñe chamojtishachëngbiama Bëngbe Bëtsá echanjama chë echanjabábeyeca, chë Uámana Espiritu chëngbe ainaniñe cháumashënguama. Pero chë benache ndoñe chamontishachëngbiama, Bëngbe Bëtsá echanjama chë echanjabábeyeca, corente castigánënga chamotsemnama, mo iñeshequécá. <sup>12</sup> Canye entšá chabe mëntšá cucuatšifne

jiyëbana, chabe trigo jtsóbobemana y chë ndoservena

shácuanënga jtsejashtsëtsana. Chabe trigo chë grano uaquëcnaye tsañe jtsabuájua, y chë ndoservena shácuanëngna iñoye jtsatmetšana. Cachcá, chë atšbe ústonoye echanjabana, chë tšabe entsanga echanjúbua, y chë bacna entsangna canye iñeshiñe echantsacastigaye, y chë iñe ndocna te queochátsfsana ca” —cha tojanéyana.

### Juan, Jesúsbioye tbojanabaye

<sup>13</sup> As Jesús, Galileocana tojána Jordán béjayoye, Juan yojtsemnoye, cha chabuábayama. <sup>14</sup> Pero Juan ndoñe yontseboše Jesús juabáyama, y mëntšá tbojaniana: —Atše šontsemna aca chašcuabaye, y ¿más atše aca cbochjuabaye ca?

<sup>15</sup> Chora Jesús tbojanjuá: —Morna chca chaotsemna. Entsemna lempe ntšamo Bëngbe Bëtsá tojamandacá jobedésana ca.

As Juan yojouena Jesús juabáyama. <sup>16</sup> Jesús ya uabainá yojtsemna ora, chë buyeshoicana tojtanshëbëbocna. Chorna Jesús tsbanánoye yojontješiyey tojáninye chë celoca atëfñiñe y chë Uámana Espiritu mo canye palomatemcá chábioye yojtsastjajuana.

<sup>17</sup> Chora celocana Bëngbe Bëtsá mëntšá tojánayana: “Mua atšbe bonshana uaqiñá endmëna. Chabiama corente sëntsoyejuá ca.”

### Jesús tojanobená Satanás jayénjanama

**4** Chentšana chë Uámana Espiritu entsanga ndoye-na luaroye Jesús tbojanánatse, as Satanás chauábama cha jisháchichiyama.

<sup>2</sup> Chentše canta bnëtsana te y canta bnëtsana ibeta ntjascá tbojanjëtana; chíyeca chora tbojaneshëntsena.

<sup>3</sup> As Satanás tbojanobobeconá y tbojaniana: —Aca ndegombre Bëngbe Bëtsabe Uaqiñá tcomnëse, momandá quem ndëtšbënga tandëse chaobiama ca.

<sup>4</sup> Pero Jesús tbojanjuá: —Bëngbe Bëtsabe uabemana palabrënguiñe mëntšá endayana: “Entšá nye tandëseca ndoñe vida ntsebomnana, sinó entšá endobena jtsiyenana lempe ntšamo Bëngbe Bëtsá tojayancá tojtseyeunanëse ca.”

<sup>5</sup> Chentšana Satanás, Jerusalén, chë uámana bëts pueblo ca uabáinoye Jesús tbojanánatse, y chë Bëngbe Bëtsabe bëts yebnentše chë más tsbanánoca tbojanatšá. <sup>6</sup> Chentše Satanás mëntšá tbojaniana: —Aca ndegombre Bëngbe Bëtsabe Uaqiñá tcomnëse, muentšana fshantsoye montsënja, er Bëngbe Bëtsabe uabemana palabrënguiñe endayana:

Bëngbe Bëtsá chabe angelënga echanjichamuá, chacmotsinýenama.

Chënga buacuatšëngaca cmochanjishache, shecuatše ndëtšbeñe ndocá chacondomama ca —cha tbojaniana.

<sup>7</sup> Chora Jesús tbojanjuá: —Cach Bëngbe Bëtsabe uabemana palabrënguiñe mëntšá endayana: “Ndoñe matsbošana acbe Bëtsá chë Utabná bacna soyëngama jacochënguama ca.”

<sup>8</sup> Cabana, Satanás tbojanánatse canye bêts tjoye y betesco nyetsca quem luarentša améndayëngbenache y chentša nyetsca uámana soyënga Jesúsbioye tbojaninÿinÿé. <sup>9</sup> As Satanás tbojaniana: —Aca chaco-joshëntsamentšé y chašcojadorase, lempe chë soyënga cbochjatštaye ca.

<sup>10</sup> Y Jesús tbojanjuá: —¡Satanás, átšbentšana mojuaná! Bëngbe Bëtsabe uabemana palabrënguiñe mëntšá endayana: “Bëngbe Bëtsá cochtsadorana y nye cha cochtseservena ca.”

<sup>11</sup> As Satanás cachcá tbojanonÿá. Cachora Bëngbe Bëtsábicana angelotëmënga tmojánabo Jesús jt-seservënama.

### Jesús tojanontšé Galileoca chabe trabajo jamana

<sup>12</sup> Juan chë Ubayaná cárceloye tmojanëtámiamá Jesús tojanuena ora, Galilea luaroye cha tojtaná.

<sup>13</sup> Pero ndoñe tonjanoquedá Nazaret pueblentše, sinó Capernaumoca, uafjajónaye tsachañe; choye tojána joyénanama, chë uámana bêts taitata Zabulón y Nef-talibe luariñe. <sup>14</sup> Chca tojanochnëngo, cachcá chaotsemnama ntšamo chë Bëngbe Bëtsabe juabna oye-buambnayá Isaías tojanayancá. Isaías tojánayana:

<sup>15</sup> Zabulón y Nefthalibe luare, Jordán bėjaye chenguánoica, uafjajónaye tsachañe;

Galilea luariñe, ndoñe judío entšanga oyenentše.

<sup>16</sup> Chë mo ibetiñe cuaftsiyencá imojoyena entšanga, Bëngbe Bëtsabe soyënga nduabuatma causa, tmojinÿe canya entšangbe juabnënga binÿnayá.

Chë chëngbe juabnënga binÿnayá entsebuashinÿinÿana chë Bëngbe Bëtsábioye nduabuatmëngbiama,

y chë causa chabiamá imomna mo obanëngcá, ndoñe binÿniñe jtsiyenëse ca —cha tojanábema.

<sup>17</sup> Cach orscana Jesús tojanontšé entšanga jábuayenama: “Bëngbe Bëtsabe améndayana ya echanjóshjango. Ngménaca šmochtenójuaboje tšëngaftangbe bacna soyëngama y chca amana šmochtsajbaná ca.”

### Jesús tojánachembo canta boyabásenga beonga ashebuánayënga cha chamuastama

<sup>18</sup> Canye te, Jesús chë Galilea uafjajónaye tsachajana yojsayey y ndeolpe uta boyabásata tojanÿe: canya yojamna Simón, chë Pedro cánaca uabainá, y chabe uabentsá Andrés. Chatna atarraiëshangá ibnetsashbuétsetšañe, er beonga ashebuánayata ibnamna.

<sup>19</sup> Jesús tojanéyana: “Atšeftaca mabata; atše cbochanjábiama Bëngbe Bëtsabiama entšanga anguayata, y morscana nye beonga ashebuánayata ya ndoñe quešochátsmëna ca.” <sup>20</sup> Cachora chatbe atarraiëshangá cachcá tbojésanaboshjuana y Jesús tmojanasto.

<sup>21</sup> Y más chcoye, Jesús inÿe uta catšátata tojánanÿe: Santiago y Juan, chë Zebedeobe uaquiñata. Chata ibojtsomñe canye barquëshañe, chatbe taitáftaca, chëngbe atarraiëshangá atapórmayíñe. Jesús tojá-

nachembo, <sup>22</sup> y cachora chë barquëshá tbojésanaboshjona, chë taitá cachentše imojéseboshjona y Jesús tmojanasto.

### Jesús ba entšanga yojanabuatambá y yojánashnaye

<sup>23</sup> Jesús nyets Galilea luarëjana yojánana, chentše judiëngbe enefjuana yebnënguenache abuatambaye. Chë tšabe noticiënga Bëngbe Bëtsabe améndayama entšanga yojanabuayiná y nyetsca šocanëngama y tsetšanëngama yojánashnaye. <sup>24</sup> Nyets Siria luarëjana entšanga cha imojtsebáyana. As entšanga nyetsca šocana bomnënga Jesúsbioye imojtsënachaye: šoquënga y tsetšanana bomnënga, bacna bayëjbe juabna uambayënga, ataque osháchichanënga y jama ndobenënga. Jesús nyetscanga yojánashnaye.

<sup>25</sup> Mallajta entšanga Galileocana, Decápolis luarocana, Jerusalenocana, Judeocana y chë Jordán bėjaye chenguanoicana Jesús imojústona.

### Ndayá Jesús tjoca tojanabuatambá

**5** Jesús chë mallajta entšanga tojánanÿe ora, bat-sjoye tojántsjua y tojanótbema. Chabe ústonënga tmojanobobeconá y <sup>2</sup> Jesús tojanontšé mëntšá jabuatambana:

#### Ndëmuanÿënga imomna chë ndegombre oyejuayana bomnënga

<sup>3</sup> “Puerte oyejuayënga mochántsemna chë Bëngbe Bëtsabe soyënga tša imuajaboto ca juabnayënga. Chca entšanga mochántsemna chë Bëngbe Bëtsabe améndayoca mochtsiyenënga.

<sup>4</sup> “Puerte oyejuayënga mochántsemna chë mondbëtsošachiyënga; chënga Bëngbe Bëtsá entsëjabuáchana ngménaca ndoñe chamondëtsemnama.

<sup>5</sup> “Puerte oyejuayënga mochántsemna chë uámanënga ndoñe mondbëtse nobiamnayënga, er chënga mo chëngbe otocana soy cá quem luare mochanjóyëngacñe.

<sup>6</sup> “Puerte oyejuayënga mochántsemna chë nyetsca soyënguiñe tšabá jamama bošënga. Chëngbe bošana entsemna mo chë oshëntsiyá y uajuendayabe bošancá. Chë nyetsca soyënguiñe tšabá jamama bošënga mochanjobenaye jëftsinÿana lempe ntšamo tmojtsebošcá.

<sup>7</sup> “Puerte oyejuayënga mochántsemna chë ínÿëngbiama ongmiayënga, er Bëngbe Bëtsá chëngbiama bochanjóngmia.

<sup>8</sup> “Puerte oyejuayënga mochántsemna chë nye tšabe juabnënga ainaniñe bomnënga; chënga Bëngbe Bëtsá mochanjinÿe.

<sup>9</sup> “Puerte oyejuayënga mochántsemna chë nyetscanga natjëmbana chamotsiyenama amënga, er chënga Bëngbe Bëtsabe básenga ca mochantsabaina.

<sup>10</sup> “Puerte oyejuayënga mochántsemna chë ínÿënga tmojama chamotsesufrínënga, ntšamo Bëngbe Bëtsá yobošcá bétsamama; chca entšanga mochántsemna chë Bëngbe Bëtsabe améndayoca mochtsiyenënga.

<sup>11</sup> “Puerte oyejuayënga tšëngaftanga šmochtsemna, entšanga chacmojoyánguango y chacmojtsécamena ora y nýetscna soyéngaca chacmojtsëbuayatsenaye ora, atšbe ústonënga bétsemnama. <sup>12</sup> Móyejuanga, puerte móyejuanga, tšëngaftanga celoca becá š-mochanjóyëngacñe. Er ntšamo entšanga tšëngaftanga cmécamena, cachcá chë Bëngbe Bëtsabe juabna oye-buambnayëngbioye, chë tšëngaftangbe natsana mon-janiyenëngbioye entšanga monjanécamena ca” —Jesús tojánayana.

#### Ošbuáchiyënga jtsemnana mo tamocá y binýnayënga quem luarentša entšangbiama

<sup>13</sup> “Tšëngaftanga, quem luarentša entšanga jtsë-jabuáchanëse šmojtsiyena, Bëngbe Bëtsabe soyënga chamotsetatšëmbuama, as chëngbiama š-mochántsemna mo chë mëntšena ndoñe chaondónbemama tcojatboto tamocá. Pero chë tamó fténana tojtsóbemëse, ndoñe ntsopodénana tempcá sanana cachiñe jtëtsmënana. Chca, ya tondayama ntsošervénana; chíyeca chë tamó tsáshenoye jtsëtšë-nana y entšanga jtsebotájayana.

<sup>14</sup> “Tšëngaftanga, ntšamo tšabá yomncá šmojt-siyenëse, as quem luarentša entšangbiama š-mochántsemna mo chë ibetiñe tojtsebínýna soycá. Canýe bëts pueblo batsjo juatsbuañe tomnëse, ndoñe ntsopodénana iytëmencá jtsemnana. <sup>15</sup> Canýe uajuinýanësha tcojuajuinýena ora, ndoñe cajonëshe taj-soye jtsabuájuaama, sinó tsbanánoca juajájuama, chca, nýetsca entšanga chë yebnentšë tmojtsemnëngbiama chaotsebínýnama. <sup>16</sup> Cachcá tšëngaftanga, entšangbe delante mo binýnayëngcá šmochtsemna, as chënga tšëngaftanga tšabe soyënga šmuamama chamuinýama, y chca, chënga chamuinýanyé chë Taitá, Bëngbe Bëtsá celoca endmëná, corente uamaná y obená bét-semnana ca” —Jesús tojánayana.

#### Chë Moisesbe leyama Jesús tojanabuatambá

<sup>17</sup> “Ndoñe šmattsejuabnaye, ntšamo Moisesbe leyíñe iuayancá y chë Bëngbe Bëtsabe juabna oyebuamb-nayënga tmojanayancá jabëtsepochochocama atše tijabo ca. Atše ndoñe chiyátabo chë soyënga jabëtse-pochocama, sinó jabábuayenama ndayá chë soyënga ndegombre bétsayanama. <sup>18</sup> Ndegombre šcuayana: Celoca y quem luare chaojftsemnëntscuana, ndocná queochatobenaye ni canýe punto, ni canýe letra chë leyënguentsana jtsejuánana, lempe ntšamo jochnënguama yomncá chaojtsemnëntscuana. <sup>19</sup> Chíyeca, nda nýe mo canýe mando chë leyënguiñe ndoñe tonjoye-uná cha, masque nýe base soye chë mando tojtsemna, y chë ínýenga cachcá tojtsabuatambá, cha Bëngbe Bëtsabe amëndayoca chë más nduamaná echántsemna. Pero ndëmuanýenga tmojtsama ntšamo Bëngbe Bëtsá tojamëndacá y chë ínýenga cachcá chamot-samama tmojtsabuátambase, chënga Bëngbe Bëtsabe amëndayoca uámanënga mochántsemna. <sup>20</sup> Chë soyëngamna mëntšá šcuayana: Tšëngaftanga chë ley

abuátambayënga y fariseúngbioye ndoñe š-montsayënjana, jtsamama ntšamo Bëngbe Bëtsá tcmojamëndacá, ndocna te Bëngbe Bëtsabe amënday-oye quešmochátamashjna.

#### Ndayá chë ínýengaftaca tbojetnama Jesús tojanabu-atambá

<sup>21</sup> “Tšëngaftanga šmojouena ntšamo Bëngbe Bëtsá tšëngaftangbe bëts taitanga tojanamëndacá: ‘Ndoñe catjóba ca. Chca ochjajnayá bontsemna jobuambayana chë entšangbiama tšabá o ndoñe tšabá tmonjamama endbayanabe delante, ndáyeca chca ca.’

<sup>22</sup> Pero atše šcuayana, nda cachabe catšátaftaca tbojetna, chánaca bontsemna jobuambayana chë entšangbiama tšabá o ndoñe tšabá tmonjamama endbayanabe delante, ndáyeca chca ca. Nda cachabe catšátbioye puerte tbojtsáboyënja, cha bontsemna chë Sanedrín ca uabaina mándayëngbe delante jobuambayana ndáyeca chca ca; y nda cachabe catšatbiama opjema ca tojayana, ntšamo cha bétsamama, cha bontsemna chë infiernoca íñeshoye jama.

<sup>23</sup> “Chíyeca, nderado ndayá Bëngbe Bëtsabe bëts yebnoye tcojuamba Bëngbe Bëtsá jëtschuayama y chora tcojenojuabó acbe catšata ácaftaca etonaná yojtsemna ca, <sup>24</sup> as chë tcojijyëbo soye chë altarentša natsanoica cochjésebošhona, cochtá y acbe catšátaftaca cochtenoyántsia. Chentšana cocayé altaroye cochjá y chë tcojuamba sóyeca Bëngbe Bëtsá cochjëtschuaye.

<sup>25</sup> “Nderado nda tcmojademandá y cabildoye jotsána-ma cmojtsemna, cabá choye ndáshjango ora, betesco cháftaca cochtenoyántsia. Chca ndóñese, chë demandayá mandádbioye cmochanjúshjango, chë mandado josticiëngbe cucuatšíñe cmochanjábošhona y chënga cárceloye cmochanjutame. <sup>26</sup> Ndegombre cbëyana: Chentšana ndoñe quecochtétsbocna lempe candesopagantscuana ca” —Jesús tojánayana.

#### Chë boyá o shémbioye ínýaftaca íngñayama Jesús tojanabuatambá

<sup>27</sup> “Tšëngaftanga šmojouena ntšamo Bëngbe Bëtsá tojanmandacá: ‘Acbe boyá o acbe shémbioye ínýaftaca ndoñe catjaíngña.’ <sup>28</sup> Pero atše cbëyana: Nderado canýe boyabása ndëmuanýe shembásabioye tbojinýe y tojajuabó ‘malaye cha ca’, chë boyabása chca tojajuabose, ainanoca ya chë ínýe shembásaftaca cachabe shémbioye tbojtseingñe.

<sup>29</sup> “Chíyeca, nderado acbe catšbioica bomínýeca bacna soye tcojinýe y cachca soye tcojamëse, más tšabá nántsemna chë bomínýe cochtsenobuchjatsëca y cochtsëtšëna. Nýets cuerpo jtsebomnana y lémpca infiernoye jama chacmotsëtšënamna, acbiama más tšabá nántsemna nýe canýe soye acbe cuerpentšana chacoperdé. <sup>30</sup> Nderado acbe catšbioica cucuatšëca bacna soye tcojamëse, más tšabá nántsemna chë cucuatšë cochtsenástjango y cochtsëtšëna. Nýets cuerpo jtsebomnana y lémpca infiernoye chacmotsëtšënamna, acbiama más tšabá nántsemna nýe canýe soye



acbe cuerpentšana chacoperdé ca" —Jesús tojánayana.

### Chë bouamnata enëtšanama Jesús tojanabuatambá

<sup>31</sup> "Mëntšánaca leyiñe enduábemana: 'Ndëmuanyë boyá chabe shémaftaca tbojtsenëtšena, chë boyá bontsemna chabe shema canyë tsbuanácha juiyiyana, ndayéchañe chaotsayana cha ya ndoñe chabe shema yontsemna ca.' <sup>32</sup> Pero atše cbéyana: Nda chabe shémaftaca tbojtsenëtšena y chca tojopasá ndoñe chë shema ínÿaftaca tbontseingñé causa, as chë boyá jt-samana cha chabotseingñema, chë shema ínÿaftaca tojtóbouamase. Y nda chë útšena shémaftaca tojtobouamá, chana canyë uabuatmá jtsebomnana, y chca, chë tsëm boyánaca canyë bacna soye jamana ca" —Jesús tojánayana.

### Chë entšanga júrayama Jesús tojanabuatambá

<sup>33</sup> "Tšëngaftanga šmojouena ntšamo tšëngaftangbe bëts taitángbioye tmojanëyancá: 'Nderado tcojayana: De Dios chë soye chanjama ca; ojal chë soye ndoñe catjama ca.' <sup>34</sup> Pero atše cbéyana: Tondayama šmattsejúrayer; ni celocama, er choca Bëngbe Bëtsabe tbe-maníñe endmëna. <sup>35</sup> Ni quem luarama, er Bëngbe Bëtsabiama mo tšenëtemcá endmëna, chiñe chabe shecuatšënga jacjayama; ni Jerusalenama, er chë pueblo endmëna Bëngbe Bëtsá chë Bëts Reybe bëts pueblo. <sup>36</sup> Ni tšëngaftangbe bestšašama cach ndoñe, er tšëngaftanga ndoñe quešmatobena ni mo canyë stjénashe ftsenguëshe o fjantsëshe jabemana. <sup>37</sup> Tšëngaftanga aíñe ca jayanama šmojtsebošëse, nÿe aíñe ca šmochjayana, y ndoñe casna nÿe ndoñe. Ndayá chentšana más šmojatichamo soye, Satanásbiocana jt-sóbocanana ca" —Jesús tojánayana.

### Chë entšanga mondbátenachnënguama Jesús tojanabuatambá

<sup>38</sup> "Tšëngaftanga šmojouena ntšamo tšëngaftangbe bëts taitángbioye tmojanëyancá: 'Nderado nda tcmojtsebuchjatsëca, ácnaca derecho contsebomna canyëbé cha jëtsbuchjatsëcama ca; y nderado nda canyë juat-saše tcmojtsášiye, ácnaca derecho contsebomna cánÿëše cha jtašiyama ca.' <sup>39</sup> Pero atše cbéyana: Ndoñe matsbošana chë ndayánaca tcmojaborlábioye jtach-nënguama; chamna, ndánaca catšbioica tcmojajueb-jantsetase, cochjomiye chë ínÿoica cachcá chacmoma-ma. <sup>40</sup> Nderado nda tcmojademandá y tojtseboše acbe shabuanguanëjua jtsabocñama, cha molesenciá acbe quëfsaiyanaca chauetsácñama. <sup>41</sup> Nderado nda tcmojuasmá y tcmojamandá bnëtsana cuadroca juyambama, inÿe bnëtsana cuadro cochjuyamba. <sup>42</sup> Nda ndaye soye tcmojotjañëse, cochjatštaye; y nda ndaye soye tcmojuatjase, cha ndoñe stëtsoye catjaquéda ca" —Jesús tojánayana.

### Chë uayayëngbiama bonshánana jtsebomnana

<sup>43</sup> "Tšëngaftanga šmojouena ntšamo tšëngaftangbe bëts taitángbioye tmojanëyancá: 'Acbe amigo cochtsebobonshana y acbe uayayá cochtsaboyënja ca.' <sup>44</sup> Pero atše cbéyana: Tšëngaftangbe uayayënga š-mochtsababuánÿeshana, y chë cmécamenëngbiama Bëngbe Bëtsá šmochtseimpadana. <sup>45</sup> Chca tšëngaftanga, chë Taitá, Bëngbe Bëtsá, chë celoca endmënabe básenga šmochántsemna; Bëngbe Bëtsá endbëtsama tšabe y bacna entšángbeñe chabe shinÿe chaotsebinÿ-nayama, y endbëtsama chë nÿetsca soyënguñe tšabá jamama bošënga y ndoñe chca entšángbeñe chauaftema. <sup>46</sup> Tšëngaftanga nÿe chë tšëngaftanga tcmojtsababuánÿeshanënga šmojttsababuánÿeshanëse, ¿Bëngbe Bëtsábiocana ndayá šmochjuacaná? Romocama crocénana entšángbioye atjanayëngnaca chca monduamana. <sup>47</sup> Y nÿe chë amiguëngbioye šmojt-sacheuanase, ¿ndaye bëts soye šmojtsama? Chë ndoñe judiëngnaca chca mondbëtsama. <sup>48</sup> Tšëngaftangbe Taitá, Bëngbe Bëtsá celoca endmëná, nÿetsca tšabe soyënga bomná y amá endmëna. Tšëngaftángnaca cachcá šmochtsemna ca" —Jesús tojánayana.

### Jesús tojanabuatambá ntšamo tšabe soyënga ínÿengbiama jamana

**6** "Cuedado šmochtsebomna ndoñe ntsamama entšángbeñe tšëngaftangbe tšabe soyënga, nÿe chënga chca chamuinÿama. Chca šmojamëse, tšëngaftangbe Taitá, Bëngbe Bëtsá, celoca endmëná ndocna uacanana soye quecmochtëtatšataye.

<sup>2</sup> "Chcasna, nderado nda caridá tcojábemëse, chca ndoñe šmatjama chë ntšamo šmojtsamama nÿetscanga chamotsetatšëmbuama, mo canyë trompetëfjua cuaftsajatëtancá, chë caridá šmojábemama chaotsótatšëmbuama; chca monduamana chë bacna entšanga chë ntšamo ndegombre tmojuabnacá ndinÿinÿ-nayënga, chë judiëngbe enefjuana yebnënguenache y tsáshenañe. Ndegombre cbéyana, chë chca amënga ya chëngbe uacanana soye tmojyëngacñe, ntšamo chënga tmojamama entšanga tšabá chëngbiama tmojtsoyebuambná ora. <sup>3</sup> Chcasna, nda caridá tcojábema ora, ndocná más chaondëtsetatšëmbo, mo chë uañicuayoica cucuatše ndoñe queondbatstatšëmbcá ndayá chë catšbioica cucuatše tojtsamama, <sup>4</sup> chca, acbe caridá iytëcana chaotsemnama. As, tšëngaftangbe Taitá, nda bominÿe endbëtsequëcjnaye chë iytëmencá tcojtsama soye, acbe uacanana soye cmochántatštaye ca" —Jesús tojánayana.

### Jesús tojanabuatambá ntšamo Bëngbe Bëtsáftaca jencuëntana

<sup>5</sup> "Bëngbe Bëtsáftaca šmojtsencuënta ora, ndoñe šmattsama chë bacna entšanga ntšamo ndegombre tmojuabnacá ndinÿinÿ-nayëngcá. Chënga corente jtso-gusetánana chë judiëngbe enefjuana yebnëngue-

nache tsanana y tsashená tséntsaca Bèngbe Bètsáftaca jtsencuéntayana, chca, nÿe entsánga chë soye chamuinÿama. Ndegombre šcuayana: chënga nÿe morscama ya montsábouacanana, chënga tšabá imojtsama ca entsánga tmojayana ora. <sup>6</sup> Pero aca Bèngbe Bètsáftaca jencuéntama orna, acbe tsoye cochtamáshëngo, bësháša cochtatame y cháftaca cochjencuénta. Chánaca chë iytemenentše ácaftaca echántsemna. Bèngbe Taitá lempe bominÿe endetsequëcñá, masque cánÿenga šmojtsemna ora šmojt-sama soyéngnaca. As Bèngbe Bètsá, chca cháftaca chacojtsencuénta ora, cachá acbe uacanana soye cmochántatštaye.

<sup>7</sup> “Bèngbe Bètsáftaca šmojtsencuénta ora, ndoñe nÿe cachcá ndoservena palabrénga ba soye šmattsichamo. Chca mondbétsama chë Bèngbe Bètsábioye ndu-abuátmënga. Chënga jtsejuabnayana becá chca tmojt-sichámësna, Bèngbe Bètsá chënga más yochjóyau-naye ca. <sup>8</sup> Ndoñe chëngcá šmattsemna. Cabá nduyana ora, Bèngbe Bètsá ya jtsetatšëmbuana ntšamo tšëngaftanga cmojtsëjbotcá. <sup>9</sup> Chamna tšëngaftanga méntšá cmontsétocana Bèngbe Bètsáftaca jencuéntana:

Bèngbe Taitá, celoca icotsomñe.

Acbe uabaina chë más uámana uabainana chaesomñe.

<sup>10</sup> Acbe améndayana chaóshjango.

Celoca yojtsemna ntšamo icobošcá; quem luarífnaca cachcá chaotsemna.

<sup>11</sup> Mënté šmiyatsatá cada te šnetsëjamoto tandëše.

<sup>12</sup> Bacna soyënga bënga fsënjama: šmotsaperdónaye; cachcá ntšamo chë bëngbiama bacna soyënga amënga fsëndbetsaperdonaycá.

<sup>13</sup> Bacna soyënga jamama šojocochëngo ora, šcochjujabuache chca ndenobuíyama.

Nÿetsca bacna soyënguentšana šmatsebacaye.

<sup>14</sup> “Chë tšëngaftangbiama bacna soyënga amënga šmojtsaperdónasna, Bèngbe Taitá chë celoca endëtsomñá, tšëngaftanga cmochanjáperdonaye. <sup>15</sup> Pero chë tšëngaftangbiama bacna soyënga amënga ndoñe šmotsaperdónasna, Bèngbe Taitá cachcá, tšëngaftanga ndoñe quecmochátaperdonaye ca” —Jesús tojánayana.

**Chë Bèngbe Bètsáftaca jencuéntama tondaye ntjascá**

<sup>16</sup> “Y nderado tšëngaftanga inÿe ora tondaye ntjascá šmojtsemna Bèngbe Bètsáftaca jencuéntama, juebëngménënga ndoñe šmattsemna, ntšamo chë bacna entsánga chë ndegombre tmojuabnacá ndinÿinÿ-nayënga mondbetsamcá, as chca, chënga imojtsayúnama entsánga chamuinÿama. Ndegombre šcuayana, chëngbe uacanana soye ya tmojóyëngacñe, chënga tmojayunáyeca entsánga tšabá chëngbiama tmojtsoyëbuambná ora. <sup>17</sup> Aca nderado tcojtsayúna ora, cochtsojuebjabebiye y aceitíyeca botamana cochtenochquëca, <sup>18</sup> as chca, entsánga ndoñe chamondëtsetatšëmbo aca tondaye ntjascá cojtsemnama. Nÿe acbe Taitá, lempe chë mo iytemencá yomna

soyëngama tatsëmbuá, chama echántsetatšëmbo. Y cha, chë iytemencá tcojama soye bominÿe endbetsequëcñayá, acbe uacanana soye cmochántatštaye ca” —Jesús tojánayana.

**Chë celoca bomnana**

<sup>19</sup> “Bomnana quem luarentše ndoñe šmattsëjuabaye. Muentšna chë mejojón y inÿe pochócaye soyënga lempe jtsendbiamana, chë atbëbanënga jtsamashj-nana y chë juabana soyënga jesatbëbana. <sup>20</sup> Más tšabá tšëngaftangbiama entsemna, mora quem luarentše tšabe soyënga šmojtsamamna, uacanana soyënga celoca chaotsójuabaye. Chentše ni chë mejojón, ni chë inÿe pochócaye soyënga acbe soyënga quemochat-spochóca, ni atbëbanënga quemochátamashjna jatbëbama. <sup>21</sup> Er chë ndayentše acbe bomnana tojtsemnentša soyëngama acbe ainánaca cochántsejuabnaye ca” —Jesús tojánayana.

**Chë cuerpama uajuinÿanësha**

<sup>22-23</sup> “Acbe bominÿe tšabá totsomñëse, mo canÿe uajuinÿanëshacá acbe cuerpama jtsemnana, chíyeca aca jtsobenana ntšamo tcojtsamcá chë bominÿyeca jtsonÿayana. Chë bominÿe ndoñe tšabá tontsemnësna, chë bominÿe tondaye ntsoebenana jamana, ntšamo tcojtsamcá chacobená jinÿama. Cachcá, acbe ainaniñe tšabe juabnënga tcojtsebomnëse, lempe ntšamo chacojtsamcá tšabá echántsemna. Y acbe ainaniñe ndocna tšabe juabnënga tcontsebomnësna, lempe ntšamo chacojtsamcá ndoñe tšabá queochátmëna. Y chca, aca cochantsiyena soyënga jtsamëse mo puerte ibetiñcá ca” —Jesús tojánayana.

**Chë Bèngbe Bètsabiama bonshánana o chë nÿe quem luarentša soyënga jtsebošana**

<sup>24</sup> “Ndocná ntsoebenana uta mandayata jtsaservë-nana: cánÿabioye bochantsáboÿënja y chë ínÿabioyna bochántsebobonshana, o cánÿabiama tšabá echántsetrabajaye y chë ínÿabiamna ndoñe tšabá. Ndoñe quecátobena Bèngbe Bètsá jtsebobonshánana, nÿe quem luarentša soyënga jtsebomnama yapa tcojtsebošëse ca” —Jesús tojánayana.

**Bèngbe Bètsá chabe básenga jtsanÿenana**

<sup>25</sup> “Chcasna atše šcuayana: Ndoñe šmattsenó-cochinÿena ndayá šmochjase o šmochjofšiye vida jtsebomnama, ni ndaye entsáyá šmochjuichëtjuama cach ndoñe. Ndegombre, vida chë sanama más enduámana y cuerpo chë entsáyama más. <sup>26</sup> Šmochjanÿe chë shloftšënga jtsongüefjnayana. Chënga tondaye ntjájena, ni jaja saná ntjâtbanana, ni chë grano uaquëcñaye yebnënguiñe quemnatsquëcñá; pero Bèngbe Bètsá, celoca endmëná, chënga saná jtsatšatnayana. ¡Y tšëngaftanga chë shloftšëtëmëngbiama puerte más šmonduámana! <sup>27</sup> Masque chca endmëna, canÿa masque tša tojtsenócochinÿena, ¿ntšamo nanjobenaye jamana

chë ntsachetšá vida yochtsebomntšana, canÿe hora vida más jabotiyana?

<sup>28</sup> “Y ndayá šmochjuíchëtjuama, ¿ndáyeca šmojtšenó-cochinÿena? Šmochjinÿe chë jajañe lirio uantšefjushangá jtsajuajnana: ndoñe ntsetrabájayana, ni ntshabiamnayana. <sup>29</sup> Pero atše cbéyana, ndegombre ni mo Rey Salomón nyetsca chabe bomnánaca nyetšá botamana mo chë lirio uantšefjushangacá quenjat-spormana. <sup>30</sup> Bëngbe Bëtsá tša botamana shácuana tojuama, y chë shácuana mënté jajoca jtsamnana, yéf-sana iñoca. Chca chë shácuana cha tojamése, ndegombre tšëngaftangbiámnaca Bëngbe Bëtsá echanjama entšayá chašmotsábomnama, jentšanga nÿe batšá Bëngbe Bëtsábeñe ošbuáchiyënga! <sup>31</sup> Ndoñe š-mattsenócochinÿena, mëntšá jtsichámese: ‘¿Ndayá mochjase?’ o ‘¿Ndayá mochjofšiyee?’ o ‘¿Ndayá mochtichëtjo ca?’ <sup>32</sup> Chë soyëngama, chë Bëngbe Bëtsábioye nduabuátmënga mondbëtsenocochinÿena, pero tšëngaftanga ndoñe. Tšëngaftangbe Taitá, Bëngbe Bëtsá, ndayá cmojtšéjbotama endétatšëmbo. <sup>33</sup> Chíyeca, tšëngaftangna natsana šmochjshëtseboše Bëngbe Bëtsá tšëngaftangbe ainaniñe chaotsemándama y lempe ntšamo cha tojamandacá šmochtsama. Chca šmojamése, Bëngbe Bëtsá lempe ntšamo cmojtšéjbotacá cmochanjátšataye. <sup>34</sup> Ndoñe matenócochinÿenana ndayá yëfse yochjochnënguama. Yëfse luare cochántsebomna chë soyënga jinÿyama y jama-ma. Cada tescama endbëtsemna yapa totcá soyënga jájandmanama ca” —Jesús tojánayana.

#### Ndoñe ntsichámuana chë ínÿyenga tšabá o ndoñe tšabá tmonjamama

**7** “Ndocá ínÿyengbiama šmattsichamo chë ndoñe tšabá tmontsamama. Chca, Bëngbe Bëtsá ndoñe queochátichamo tšëngaftanga ndoñe tšabá šmonjama ca. <sup>2</sup> Chë ntšamo tšëngaftanga ínÿyengbiama šmojt-sichamcá tšabá o ndoñe tšabá tmontsamama, cachcá Bëngbe Bëtsá tšëngaftangbiama chë ntšamo šmojamama echántichamo. Y ntšamo ínÿyengbioye chašmo-jábíama, uabouana o ndoñe jabuache soyënga, cachcá Bëngbe Bëtsá tšëngaftangbioye cmochanjábíama.

<sup>35</sup> “Nderado canÿa chabe bominiñe canÿe niñëfja tojtsebomñese, cha ndoñe ntsoebenana chabe catšata jauyanama: ‘Acbe bominiñentšana canÿe polvështema jtsebuchjátsécama šmolesenciá ca’. Natsana cha bontsemna cachabe bominiñentšana chë niñëfja jt-senobuchjátsécana tšabá jinÿyama jobenayama, chabe catšatbe bominiñentšana polvështema jtsebuchjátsécama. Cachcá entsemna acbiama, ¡bacna entšá chë ntšamo ndegombre tcojuabnacá ndinÿinÿayá!, chë tša bacna soye cojtsama ca acbe catšata tcojuayana ora, cach aca tša bëts bacna soyënga cojtsamama nt-jenojuaboycá; y chca, aca jamana canÿe bacna soye. Natsana cmontsemna chë cach aca ndoñe tšabe soyënga cojtsamama ngménaca jshatenójuaboyana y chca amana jtsajbanana, y chentšana cocayé cochantsobena acbe catšata juajabuáchana ntšamo tšabá yomncá chaotsamama.

<sup>6</sup> “Chë Bëngbe Bëtsabe soyëngama josértama ndé-boše entšanga ndoñe šmattsabuayiyana. Aíñese nántsemna mo chë Bëngbe Bëtsabe bëts yebnoca uát-šëmbona mëntšena quešënga cuafstëbuajocá; chorna chënga jobuértanana, jobotjajuana y jtsáshantsana. O mo chë uámana ndëtšëtëmënga cotšëngbioye cuafst-šëtšancá, chënga nÿe jtsebotájayana ca” —Jesús tojánayana.

#### Šmochjotjañe, šmochjánguango y šmochjachembo

<sup>7</sup> “Šmochjotjañe y Bëngbe Bëtsá cmochanjátšataye; šmochjánguango y šmochanjínÿena; šmochjachembo y bëšáša cmochanjébëtafjo. <sup>8</sup> Er ndánaca tojtsot-janañá, jójyëngacñana; y nda tojtsenguá cha, jónÿenana; y nda tojtsechembuanábioye jebiatëfjuana.

<sup>9</sup> “¿Ndëmuanyë boyabása tšëngaftanguentšá, canÿe tandëse chabe uaquiñá tbojtsotjanañe ora, canÿe ndëtšbé chábioye buanjatštaye? <sup>10</sup> ¿O canÿe mëtšcuaye buanjatštaye, beona tbojtsotjanañe ora? <sup>11</sup> Y chca, tšëngaftanga, bacna soye amënga, tšëngaftangbe basetëmënga tšabe soyënga jatšatayama šmojtsamanëse, ¡más tšëngaftangbe Taitá, Bëngbe Bëtsá celoca endmëná, chë tmojtsotjanañënga tšabe soyënga echanjátšataye!

<sup>12</sup> “Inÿyengaftaca šmochtsama ntšamo chë ínÿyenga tšëngaftangaftaca chamotsamama šmojtsebošcá. Chca endmëna ntšamo Moisesbe leyíñe y chë Bëngbe Bëtsabe juabna oyebuambnayëngbe buatëmbana soyënguiñe endayancá ca” —Jesús tojánayana.

#### Chë base utëntšá bëšáša

<sup>13</sup> “Chë base utëntšá bëšášajana šmochjámashjna. Chë utëntšá bëšášajana y chë paselo jójyënama benache, infiernoye cmochanjuánatse y banga chëjana mondámashjuana. <sup>14</sup> Chë tšabe vida binÿnoye jamna base utëntšá bëšášajana endmëna y ndoñe paselo jójyënama benache, y chiñe báseftanga mondbinÿena.

#### Chë Bëngbe Bëtsabe ndoñe ndegombre juabna oye-buambnayënga

<sup>15</sup> “Cuedado šmochtsebomna chë Bëngbe Bëtsabe ndoñe ndegombre juabna oyebuambnayëngbiama. Chëngna mo oveshëngcá tšëngaftangbioye mochanjabo, pero ndegombre chënga mondmëna mo tšátjaye tjañe quešëngcá. <sup>16</sup> Tšëngaftanga betiyënga jtsabuutmana ntšamo cada ona tojtseshajcá; cachcá tšëngaftanga chcanga šmochantsëbuatma, ndayá chënga mochtsamama. Uchmašëshe betiyentsana ndoñe uvas ntjuátabebiana, ni higuëbé cardo betiyentsana.

<sup>17</sup> Chca, nyetsca tšabe betiyiñe tšabe soye jashájonana; y chë ndoñe tšabeshiñna podesca soye. <sup>18</sup> Canÿe tšabe betiyiñe quenátopodena podesca soyënga jashájonana, ni canÿe ndoñe tšabe betiyiñe tšabe soyënga jashájonana. <sup>19</sup> Ndaye betiyë podesca shajuanëshe jt-seshatëtšana y iñoye jtsatmetšana. <sup>20</sup> As chca tšëngaftanga chënga šmochantsëbuatma, ndayá chënga mochtsamama ca” —Jesús tojánayana.

### Bëngbe Bëtsabe amëndayoye ndoñe nyetscanga jamashjñana

<sup>21</sup> “Ndoñe nyetscanga chë ‘¡Utabná! ¡Utabná ca!’ atše šmojtsatsëtsnanga, Bëngbe Bëtsabe amëndayoye quemochátamashjna. Nye ntšamo atšbe Taitá, celoca endmëná, tojtsebošcá amëngna aíñe. <sup>22</sup> Quem luare jopochócama te banga atše šmochanjauyana: ‘¡Bëngbe Utabná! ¡Bëngbe Utabná! Aca jótšëmbonëse, ácbeyne betsošbuáchema, bënga fsëndoyebuambná, y ácbeyeca bacna bayëjëngbe juabna entšángbentsana fsëndëtabocana, y ácbeyeca bëts soyënga fsëndama ca.’ <sup>23</sup> Chora atše chanjójuaye: ‘Ndocna te checbaishëbuátmana. Atšbentsana mojuánanga, bacna soye ama entsanga ca’ ” —Jesús tojánayana.

### Chë uta ucuatjoniñe

<sup>24</sup> “Chcasna, nda atše šojoyeuná y chë ntšamo sentsichamcá tojtsama, endmëna mo canye tšabá juabnaye boyabasacá. Chë boyabásana ndëtšbeñe chabe yebna yojajebo. <sup>25</sup> Uaftena yojuáshjango, chë béjayënga yojóftjajna, chë yebnoye puerte yojtsebinýi-aye, pero chë yebna ndoñe ntjuáshajayana, chë yebna ndëtšbeñe inajéboyeca. <sup>26</sup> Pero nda atšbe palabra tojouena y ntšamo sentsichamcá ndoñe tontsama, endmëna mo canye ndëjuabnaye boyabasacá. Chë boyabásana chabe yebna cascajuiñe yojajebo. <sup>27</sup> Uaftena yojuáshjango, chë béjayënga yojóftjajna, chë yebnoye puerte yojtsebinýiaye y chë yebna uabouancá yojtšashajaye ca’ ” —Jesús tojánayana.

<sup>28</sup> Jesús chë soyënga jóyebuambayama tojanpochocá ora, chë entsanga ojanánënga imojtsemna ntšamo cha tojánabuatambama. <sup>29</sup> Jesús tojanabuatambá nyets obenánaca, mo canya mando bomnacá y ndoñe nye mo chë ley abuatambayëngcá.

### Jesús, canya bacna nguayanánaca šocábioye tbojanshná

**8** Jesús tjoicana tojtantsmá ora, ba entsanga tmojanasto. <sup>2</sup> Chora canye boyabása bacna nguayanánaca šocá Jesúsbioye tojanobeconá, chabe delante yojshamentšiyey y tbojaniyana: —Utabná, aca tcojtsebošëse, catjobenaye atšbe šocana jtsebojuánana ca.

<sup>3</sup> As Jesús tojanacuenýanëjaná, chë boyabásabioye tbojánbojajo y tbojaniyana: —Aíñe, séntseboše. Šocana cbotsebojuaná ca.

Y cachora chabe šocana tbojtsanóbojuanañe. <sup>4</sup> Jesús chë shnanábioye tbojaniyana: —Mouena, ndocnábeñe cattsecuéntaye; nye chë Jerusalenoca báchnëbioye motsa, y cha cochjinýinýiye mora aca ya tšabá cojt-satsmënama. Bayá cochtsambaye, Bëngbe Bëtsá chama jëtschuayama, ntšamo Moisés tojëftsanmandacá, as chca nyetscanga chamotatsëmbona mora aca y ndoñe šocá contsemnama ca —Jesús tbojaniyana.

### Jesús canye Romano soldadëngbe amëndayabe bochichnayábioye tbojanshná

<sup>5</sup> Jesús Capernaumoye tojánamashëngo ora, canye Romano soldadëngbe amëndayá Jesúsbioye tojanobeconá canye pavorama jaimpádama. <sup>6</sup> Jesúsbioye tbojaniyana: —Utabná, atšbe bochichnayá yebnoca šocá entsemna, jama ndoñe quenátobena y jabuache tsetšanánaca entsobësná ca.

<sup>7</sup> Chora Jesús tbojanjuá: —Cha jáshnama chanjá ca.

<sup>8</sup> As chë soldadëngbe amëndayá tbojaniyana: —Señor, atše merecido taitatobuajoñe atšbe yebnentše chacuamashënguama; nye mayana y atšbe bochichnayá tšabá echántsatsmëna. <sup>9</sup> Atšbioye mán-dayënga atše sëndábamna y átšnaca soldadëngbe amëndayá sëndmëna. Atše canye soldado stjauyana “motsa ca”, cha cachora jana; y inya stjauyana “mabo ca”, cha cachora jabana; y nderado atšbe bochichnayá ndayánaca chaomama stjamánda, chánaca cachora chë soye jamana ca —cha tojánayana.

<sup>10</sup> Jesús chca tojanuena ora, tojanenjnana y chë ústonënga tojanéyana: —Ndegombre cbéyana, ni mo nyets Israelentše ni canya quem boyabasacá Bëngbe Bëtsábeñe nyetšá ošbuachiyá chiyátinýena. <sup>11</sup> Y šcuayana, shinýe bocanoicana y shinýe uenatjémbambanoicana bëtscá entsanga mochanjabo, y Abraham, Isaac y Jacob, chë judiëngbe tempsca uámana bëts taitángaftaca mochanjotbiama Bëngbe Bëtsabe amëndayoca, cánýiñe juasama. <sup>12</sup> Ba Israeloca entsanga, chë ndëmuanýengbiama Bëngbe Bëtsabe amëndayana natsana yochtsanmëna, chocana mochan-tëbuacana chë ndëbinýna luaroye, infiernoye. Chentše puerte mochanjenóbošachna y chë tsetšanama juat-sašënga mochantseoftéšjojnaye ca —Jesús tojánayana.

<sup>13</sup> Chora Jesús chë soldadëngbe amëndayábioye tbojaniyana: —Acbe yebnoye motsatá y chë ntšamo cojtsošbuachecá cachcá chaotsemna ca.

Cachora chë bochichnayá tšabá yojtsatsmëna.

### Jesús, Pédrëbe uambén mamábioye tbojanshná

<sup>14</sup> Chentšana Jesús, Pédrëbe yebnoye tojána. Chentše Pédrëbe uambén mamá šocá calentóraca yojtsejutsnájona. <sup>15</sup> Chora Jesús chë uambén mamabe cucuatše tojánbojajo y cachora chë calentora tbojtsanóbojuanañe. Chorna chë uambén mamá tojtantsbaná y tojanontsé chënga jobuácuedana.

### Jesús ba šoquënga tojanashná

<sup>16</sup> Chë te jaibétatama ora, Jesús yojtsemnoye banga bacna bayëjëngbe juabna uambaye entsanga tmojanënatse. Chora, nye canye Jesús jóyebuambayëse chë bacna bayëjënga imojtsaisebocana y nyetsca šoquënga tojanashná. <sup>17</sup> Chca Jesús tojanma, cachcá chaotsemnama ntšamo chë Bëngbe Bëtsabe juabna oyeambuambayá Isaías tojanayancá. Cha mëntšá tojánayana: “Cha bëngbe šocanënga tonjaftsanca y

bëngbe nyetsca tsetšanana chábeñe tonjanoquedá ca.”

### Chë Jesús juastama bošënga

<sup>18</sup> Jesús tojánanyë mallajta entsãnga chabe shéconana; as tojanmandá uafjónayë chenguana jama.

<sup>19</sup> Chorna, canyë ley abuatambayá Jesúsbioyë tbojanobobeconá y tbojaniyana: —Buatëmbayá, atšë séntseboše aca juastama, ndémoyë chacojtsá choyë ca.

<sup>20</sup> As Jesús tbojaniyana: —Chë zorrënga mondbomna cuevëshënga ndayentšë jtsiyenama y chë shloftšëngna uajajonëshangá, pero chë Bëngbe Bëtsá Entšá tbojanbemá ndoñe quenátsbomna ndayentšë jóchnama ca.

<sup>21</sup> Chora inya, cach uatsjendayënguentšá, Jesúsbioyë tbojaniyana: —Bëngbe Utabná, šmolesenciá atšbe taitá chjshesabotbontsañe ca.

<sup>22</sup> Chora Jesús tbojanjá: —Nyë šmasto. Chë Bëngbe Bëtsabiama mo obanëngcá, ntšamo Bëngbe Bëtsá yomandacá ndoñe tmontsama causa, chënga cachëngbe obanënga chamotsétebuantsañe ca.

### Jesús chë binýia y chë béjaye bonguana yojétsbema

<sup>23</sup> Chentšana Jesús canyë barquëshoyë tojánamashëngo y chabe uatsjédayënga imojtsetjëmbambayë. <sup>24</sup> Ndeolpe tša jabuache binýia chë uafjónayë béjayiñe yojóshjango; nyëtšá jabuachana yojtsemna, chë olëshënga barquëshá imojtsétsbotsana. Y Jesús chora inétsomañe. <sup>25</sup> As chabe uatsjédayënga tmojána Jesús jetsefšenama y tmojaniyana: —Bëngbe Utabná, šmatsebacá. Montsenatjëmbambana ca!

<sup>26</sup> Chora Jesús tojanéyana: —¿Ndáyeca tša šmojt-sauatja? ¿Tša batšatema šmojtsošbuaché, Bëngbe Bëtsá tšëngaftanga jujuabuáchama yobenama ca?

Chca tojanéyana y tojantsbaná. Chora tojanmandá chë binýia y chë býyeshe bonguana chaotsatsmënama, y lempe natjëmbana yojtsatsmëna. <sup>27</sup> Chabe uatsjédayënga ojanánënga imojtsemna y mëntšá imojtsichamo: “¿Nda quem boyabása yomna? Cha tonjayana y chë binýia y chë býyeshe tmonjoyeuná ca.”

### Chë Gadara luaroca entšata, bacna bayëjbe juabna uambayata

<sup>28</sup> Jesús uafjónayë chenguana tojánashjango, canyë luare Gadara ca uabáinentšë. Chorna chë utabuantsánëngbentšana útata, bayëjbe juabna uambayata, tbojánbocna y Jesúsbioyë tbojanobobéconata. Puerte tšatjayata ibnamna, chíyeca entsãnga ndoñe ntsoobenana chëjana jtsachñëjuanana; <sup>29</sup> y chora tbojanontšë chë bacna bayëjëngbeyeca mëntšá uayebuáchana: —¿Ndayá béngaftaca cojtseboše, Jesús, Bëngbe Bëtsabe Uaquiñá? ¿Moyë tcojabo bënga chafsufrima, chama cabá ndoñe chë tempo yontsemna ora ca?

<sup>30</sup> Chentšá béconana ba cotšënga imnajena y chënga imnétsosañe. <sup>31</sup> Y chë bayëjënga Jesús tmojanimpadá:

—Muentšana jésebocanama aca tcojamëse, cochjama bënga chë cotšëngbeñe fchayamashjnama ca.

<sup>32</sup> Y Jesús tojanéyana: —Motsajna ca.

Chora chë bayëjënga chë boyabásatbentšana tmojésanbocana y chë cotšëngbeñe tmojánamashjna; chora chë cotšënga batsjocana penëšëjana uafjónayoyë imojtsoshbuetšë y yojtsatajo.

<sup>33</sup> Chora chë cotšënga anýenënga tmojtsanacheta, y chë puebloyë tmojánashjajna ora, tmojanontšë lempe ntšamo yojochnëngcá jacuéntana y ntšamo chë bayëjbe juabna uambayátaftaca tojanopasámna.

<sup>34</sup> Chora nyetsca entsãnga chë pueblentšana tmojábocana y Jesús yojtsemnoyë tmojána. Chë entsãnga Jesús tmojáninýe ora, tmojanimpadá chë luarentšana chausebocnama.

### Jesús, canyë jama ndobenábioyë tbojanshná

<sup>9</sup> Chca tojanopasá chentšana, Jesús canyë barquëshoyë tojánamashëngo, uafjónayë chenguana tojána y cachabe puebloyë Capernaumoyë tojtashjango. <sup>2</sup> Chora, canyë jama ndobená, tjuashiñe jajoná, Jesús yojtsemnoyë básefta boyabásënga tmojanamba. Jesús tojáninýe chënga tša imojtsošbuáchema chë šocábioyë jáshnama cha bétsobenama; as chë šocábioyë tbojaniyana: “Sobreno, añemo matsca; acbe bacna soyënga tcbontseboperdoná ca.”

<sup>3</sup> Chca causa, báseftanga ley abuatambayënga chentšë imojtsemnënga imojtsejuabnayë: “Chca jayanëse, ndoñe tšabá quenátichamo Bëngbe Bëtsabiama; mo chábioyë cuafjoyenguangcá entsemna ca.”

<sup>4</sup> Pero Jesús yojtsetátšëmbo ntšamo chënga imojtsejuabnycá; chíyeca tojanéyana: “¿Ndáyeca nyëtšá bacna juabnënga ainaniñe šmojtsebmoma ca? <sup>5</sup> ¿Tšëngaftangbiama ndayá más paselo nántsemna tšëngaftangbe delante jayanama: ‘Acbe bacna soyënga tcbontseboperdoná’ o ‘Matëtsbaná y motsa ca’? <sup>6</sup> Atšë cbochanjñyanýiye ntšamo chë Bëngbe Bëtsá Entšá tbojanbemá quem luarentšë mando yobomnama, entsãnga bacna soyëngama jáperdonama ca” —Jesús tojanéyana.

As chë jama ndobenábioyë tbojaniyana: “Matëtsbaná, acbe tjuashe mesocñe y acbe yebnoyë mot-satoñe ca.”

<sup>7</sup> Chorna chë jama ndobená tojtantsbaná y cachabe yebnoyë yojtsatoñe. <sup>8</sup> Chca tmojáninýama chë entsãnga auatjanánënga imojtsemna y Bëngbe Bëtsá imojtsatschuanayë, cha chca obenana entsãnga tojánatšatama.

### Jesús, Matéobioyë tbojanchembo chabuastama

<sup>9</sup> Jesús chentšana tojtsanoñe y canyë entsábioyë tbojáninýe, Mateo ca uabainá, chë Romocama impuesto entsãngbioyë atjanayentšë inétsotbemañe. Chora Jesús tbojaniyana: “Šmasto ca.” As Mateo chentšana tojéftsantsbaná y tbojanasto.

<sup>10</sup> Jesús cach Mateobe yebnentšë yojtsesayë ora, banga Romocama impuesto entsãngbioyë atjanayën-

ga y ínÿenga bacna soye amënga tmojánashjajna y mesëshentše Jesús y chabe uatsjéndayëngaftaca imojtbiama. <sup>11</sup> Chë fariseunga chca tmojáninÿe ora, Jesusbe uatsjéndayëngbiöye tmojanatjá: —¿Ntšamo chca yojtsemna, tšëngaftangbe buatëmbayá chë impuesto atjanayënga y bacna soye amëngaftaca entsesá ca?

<sup>12</sup> Jesús chca tojanuena y chë fariseunga tojanéyana: —Chë salud bomnënga ashnayá ndoñe ntsëjabótana, pero chë šoquënga aíñe. <sup>13</sup> Šmochjá y ntšamo ndegombre iuayancá šmochjuatsjinÿe quem Bëngbe Bëtsabe uabemana palabrënguñe:

Atše sëntseboše tšëngaftanga lastemadënga chašmotsemna,

y ndoñe ñye bayënga chašmotsëbánaye Bëngbe Bëtsá jëtschuayama ca. Atše ndoñe chiyátabo chë Bëngbe Bëtsabe bominÿiñe tšabá amënga jabáchembuama, sinó chë bacna soye amënga imomna ca juabnayënga jabáchembuama ca —Jesús tojánayana.

### Jesús tmojantjá chë Bëngbe Bëtsáftaca jencuéntama tondaye saytescama

<sup>14</sup> Chentšana, Juan chë Ubayanabe ústonënga tmojanobeconá y Jesús tmojantjá: —Bënga y chë fariseunga fsënduamana ba soye tondaye ntjascá jtsemnana, Bëngbe Bëtsáftaca jencuéntama. ¿Ndáyeca acbe uatsjéndayënga ndoñe chca ca?

<sup>15</sup> As Jesús tojanéjua: —Chë casamentoye ófjanënga chë boyabása bouamná chëngaftaca tojtsemnëntscuana, chëngbiöye saná ndoñe ntsabuáshebenana y ngménaca ndoñe ntsemnëngana. Pero ora echanjobuache y chë boyabása bouamná chentšana mochantsánatseñe; chora cocayé chë ófjanënga tondaye más jasama quemochátsbomna. Ntšamo chë tojobouamá cha y chë ofjanëngaftaca endmëncá, cachcá endmëna atše y atšbe uatsjendayëngaftacnaca.

<sup>16</sup> “Ndocná canÿe uatanguá entsáyá base tsëm entsëjuaca jtarmëndana. Er chë tsëm entsëjúua jtsabëconana y chë uatanguá entsáyá más jtsatanécanana, y chca chë uátanëcniñe más bëtsiñe jtsabemana. <sup>17</sup> Y cach ndoñe chë tojtseshayana vínoye tanguá jasabenguñe ntjatuámayana. Tcojuafsuamasna, chë jasabenga jtseshëbëfjuana y chë vínoye jtsabuáshanana, y chë vínoye y chë jasabenga tondayama ntjatoservénana. Chíyeca comna, chë tojtshayana vínoyna tsëm jasabenguñe juafsuámana; y chca, chë jasabenga y chë vínoye jtsoservénana ca” —Jesús tojánayana.

### Jesús canÿe shembásabiöye tbojanshná y tojanma Jairëbe bembetema cháuatayenama

<sup>18</sup> Jesús entsänga yojtsëtsësnantscuana, chë judiëngbe enefjuana yebnentša canÿe mandayá tojánashjango y Jesusbe shecuatšentše yojshamentsiye. Chë mandayá tbojanianya: “Atšbe bembe tontsóbana. Diosmanda atšbe yebnoye mabo; cochjabojajo y cha echántayena ca.”

<sup>19</sup> Chentšana Jesús y chabe uatsjéndayënga chë mandayá tmojanasto. <sup>20,21</sup> Imojtsaye ora, canÿe shembása stëtšoicana Jesúsbiöye yojobeconá. Bñëtsana uta uatama oboftjajuanánaca cha inapadecena. Chë šocá Jesúsbiöye yojobeconá ora, yojtsejuabnaye: “Masque ñye mo chabe entsáyá sibiájua chaijuábojajo, salud chantinÿena ca.” Chentšana chë šocá Jesusbe entsáyá tojanábojajo.

<sup>22</sup> Tojanábojajo ora, Jesús tojanobuértana, chë shembásabiöye tbojáninÿe y tbojanianya: “Añemo matsca, shembása. Bëngbe Bëtsábeñe icošbuachéyeca, mora tšabá contsatmëna ca.” Y cach orscana cha tšabá yojtsatmëna.

<sup>23</sup> Chënga tmojtëtanontšë ayana y chora chë mandayábica chënga tmojánashjajna. Chentše Jesús tojáninÿe, ínÿengna chë veloriamá imojtsanflautaye y ínÿengna tša imojtsošachiye. <sup>24</sup> Chora Jesús tojanéyana: “Muentšana mobocnënga. Chë shembásetema cabá ndoñe obaná quenátsmëna; ñye endëtsomañe ca.”

Pero chë entsänga Jesúsbiöye ñye imojtsáfchaye.

<sup>25</sup> Pero Jesús pronto chënga chë yebnentšana tojanëbuacna. Chora Jesús tojánamashëngo chë shembásetema yojtsemnoye; cucuatše tbojanábuacue-shache y cachora chë shembásetema tojtantsbaná.

<sup>26</sup> Y ñyets chë luarëjana ndayá Jesús yojamama ñyetsca entsänga imojátatšëmbona.

### Jesús uta jtanata tojanashná

<sup>27</sup> Jesús chentšana tojéftsanbocna ora, uta jtanata tbojanasto y mëntšá ibojtsaiuéyebuache: —¿Davidbentšana Entšá, bëndata šmotsalastemá ca!

<sup>28</sup> Jesús chë yebnoye tojánamashëngo ora, chë jtanata tbojanóbobeconata. As Jesús tojanatjá: —¿Tsëndata šojtsošbuaché atše chca jamama chjobenaye ca?

Y tmojanjuá: —Arseñor. Aíñe ca.

<sup>29</sup> Chora Jesús tojánabuchbojajo y tojanéyana: —Ntšamo tsëndatbe ošbuáchiyana yomncá, cachcá chaotsemna ca.

<sup>30</sup> Y cachora jinÿama ibojtsobena. Jesús bëtscá chata mëntšá tojanamëndá: —Ndocná más quem soye chaondëtsetatšëmbo ca.

<sup>31</sup> Pero chata chentšana tbojéftsanbocna y cachora tbojanontšë ndayá Jesús chátaftaca tojanmama ñyets chë luarëjana jacúntana.

### Jesús, canÿe ndëbiábioye tbojanshná

<sup>32</sup> Chë jtanata ibojtsebocanëntscuana, básefta entsänga canÿe ndëbiá, bacna bayëjbe juabna uambayá, Jesúsbiöye tmojanamba. <sup>33</sup> Jesús chë bacna bayëja chábentšana tbojtanábocna y cachora chë ndëbiá tojtanontšë oyebuambnayana. Entšanga ojnánánënga imojtsichamo: “¡Ndocna te Israelentše chca bëts soye chemuáisinÿe ca!”

<sup>34</sup> Pero chë fariseunga imojtsichamo: “Cach bacna bayëjëngbe amëndayá, Satanás, muábioye obenana

tbojatštá chë bayëjënga entsángbentsána jtëbuacana ma ca.”

### Jesús entsangbiama tbojanongmé

<sup>35</sup> Jesús nyetsca pueblënguëjana y luarënguëjana yojtsachnëjuana y chë judiëngbe enefjuana yebnënguenache entsánga yojtsabuátambaye. Yojanabuayiyná chë tšabe noticiënga Bëngbe Bëtsabe amëndayama, y nyetsca šocanëngama y tsetšanama yojánashnaye. <sup>36</sup> Y chë entsánga tojánanyë ora, puerte tbojanongmé. Er chënga imojtsemna mo abujénya ndbomna oveshëngcá, puerte uamëntšayënga ba soyëngama padecena causa, y chaújabuachama ndocná ntsebomncá. <sup>37</sup> Chora chabe uatsjédayënga tojanéyana: “Canýe bëts jajañe bëtscá játbanama entsemna, pero peonga nyë báseftanga. Cachcá quem luarentše, bëtscá entsánga Bëngbe Bëtsábioye nduabuátmënga montsemna, y chëngbioye chabiamá abuayiyayënga nyë báseftanga. <sup>38</sup> Peonga tmojtsashbenëse chë nduífbioye jaimpádana ba peonga chauichamoma chë jaja saná játbanama. Cachcá, Bëngbe Bëtsábioye moimpadanga ba abuayiyayënga chauichamoma, quem entsánga chábioye chamúbuajama ca” —Jesús tojanéyana.

### Jesús chë bnëtsana uta uatsjédayënga tojanabacacá

**10** Chentšana Jesús tojánachembo chabe bnëtsana uta uatsjédayënga, y obenana tojanatšatá bacna bayëjëngbe juabna entsángbentsána jtabocnama y nyetsca šocanëngama y tsetšanama jashnayama.

<sup>2</sup> Chë bnëtsana uta uatsjédayënga mëntšá imojanabaina: chë natsaná Simón, Pedro cánaca uabainá y chabe uabentsá Andrés; Santiago y chabe uabentsá Juan, Zebedeobe uaquiñata; <sup>3</sup> Felipe y Bartolomé; Tomás y Mateo, chë Romocama impuesto entsángbioye atjanayá; Santiago, Alfeobe uaquiñá y Tadeo; <sup>4</sup> Simón, chë celote ca uabobainá y Judas Iscariote, chë uayayëngbe cucuatšíñe Jesúsbioye boshjuaná.

### Jesús, chabe bnëtsana uta uatsjédayënga tojanichamó, Bëngbe Bëtsabe amëndayama jábuayenama

<sup>5</sup> Jesús chë bnëtsana uta boyabásenga tojanichamó chë tšabe noticiënga entsánga jabuátambama, y mëntšá tojanabuayená: “Chë ndoñe judiëngbeñe ndoñe šmattsana y ndaye pueblentše Samaria luaroca ndoñe šmatjéftsamashjna. <sup>6</sup> Nyë Israeloca pueblëngoye šmochjá. Choca entsánga mo ótsena oveshëngcá montsemna, Bëngbe Bëtsábioye corente nduabatma causa. <sup>7</sup> Šmochjá y entsánga šmochjábuayenaye Bëngbe Bëtsabe amëndayana echanjóshjanguama. <sup>8</sup> Chë šoquënga šmochjášhnaye, šmochjama chë obanënga chámuatayenama, bacna nguayanánaca šoquënga šmochjášhnaye y bacna bayëjëngbe juabna entsángbentsána šmochtábocna. Chë obenana šmonjóyëngacñe tondaye ntjëtšajuacá; cachcá, chë soyën-

ga šmojtsamama tondaye entsánga šmattsayëngacaye.

<sup>9</sup> “Ndoñe šmattsambaye crocénana uasnanëchiñe.

<sup>10</sup> Ni shecnaja sanaca benachiñama, ni inýe entsáyá jt-senomódama, ni shecohëtjonëshënga, ni jatjonëfja, er chë tšabe trabajayá jtsomerecénana ntšamo tbojtsajabotcá jóyëngacñama.

<sup>11</sup> “Nderado canýe bëts pueblentše o base pueblentše chašmojášhjajna ora, šmochjáanguango canýe tšabe entsá, inýëngbioye ndaingñayá, y chabe yebnentše šmochtsoquedañe, inýe pueblöye já-tantscuana. <sup>12</sup> Canýe yebnoye chašmojámashjna ora, nyetsca chentša oyenënga mëntšá šmochjácheuaye: ‘Chë bëngbe ainaniñe tšabe ebionana tšëngaftangbe ainaniñe chaotsemna ca.’ <sup>13</sup> Chë yebnentša entsánga ainaniñe tšabe ebionana jtsebomnama mercedo tmojtsebuajonëse, chë tšëngaftangbe ainaniñe tšabe ebionana chëngaftaca chaotsemna. Ndoñesna, nyë cach tšëngaftangtaftaca chaotsemñe. <sup>14</sup> Y nderado canýe pueblentše o bëts pueblentše chë entsánga ndoñe tcmonjúbuaja y ndoñe tcmonjóyaunase, chentšana šmochjésebecana y chë shecuatšentša polvëshe šmochjésenstoto. Chca, chë entsánga mochántsetatšëmbo chënga tšëngaftangtaftaca ndoñe tšabá tmonjamama. <sup>15</sup> Ndegombre šcuayana, quem luare jopochócama te, chë ndoñe chacmonjúbuaja y ndoñe chacmonjoyauná entsánga Bëngbe Bëtsá puerte jabuache echantsacastígaye, y chë bacna entsánga Sodoma y Gomorra luaroquëngna ndoñe nyá nyetsá jabuache queochatacastígaye ca” —Jesús tojánayana.

### Ntšamo chë uatsjédayënga mochjansúfria

<sup>16</sup> “Šmochjouena. Atše cbontsachamná mo oveshënga cuenta tjañe quešëngbeñe. Chiyeca studio bomnënga mo mëtšcuayëngcá šmochtsemna y uamanënga mo palomatemëngcá. <sup>17</sup> Entsangbiama cuedado šmochtsebomna, chëngbe pueblentša amëndayëngbe cucuatšíñe tšëngaftanga cmochanjábashejuana y chëngbe enefjuana yebnënguenache cmochanjátsetšënyaye. <sup>18</sup> Atšbe ústonënga bëtsemnama, mandadëngbioye y reyëngbioye cmochanjunatse. Y chca, tšëngaftanga šmochanjobenaye chëngbeñe y chë ndoñe judiëngbeñe ntšamo atšbiamá šmotatšëmbcá jóyëbuambayama. <sup>19</sup> Pero chë mandadëngbe cucuatšíñe chacmojábashejuana ora, ntšamo o ndayá šmochjayanama ndoñe šmattsenócochinýena. Chca orna, Bëngbe Bëtsá tšëngaftanga cmochanjabuayená ntšamo o ndayá jóyëbuambayama. <sup>20</sup> Tšëngaftanga ndoñe chë oyëbuambayënga quešmochátsmëna, sinó chë tšëngaftangbe Taitá, Bëngbe Bëtsabe Espiritu, tšëngaftangbiajana echantsóyëbuambayaye.

<sup>21</sup> “Y canýe entsá cachabe catšátbioye uayayëngbe cucuatšíñe bochanjáboshjona chamotsóbama; y canýe taitá cachabe uaquiñábioynaca. Y chë básenga chëngbe bëtšétsangbe contra mochántsemna y uayayëngbe cucuatšíñe mochanjábashhejuana chamotšëbáyama. <sup>22</sup> Tšëngaftanga atšbe ústonënga bëtsemnama, nyetsca entsánga mochantsébuayënja; pero

nda nyets tempo átsbeñe ošbuachiyá chaotsomñá, atsbocaná echántsemna. <sup>23</sup> Canye pueblentše chacmo-jtsécamena ora, inye puebloye šmochtsacheta. Ndegombre cbéyana, Israelentša nyetsca pueblëngoye cabá nda ora, chë Bëngbe Bëtsá Entšá tbojanbemá ya quem luaroye echanjabáshjango.

<sup>24</sup> “Ni canye uatsjendayá chabe buatëmbayabiama más uamaná ntsemnana, ni chë oservená chabe nduiñbiama más uamaná. <sup>25</sup> Chë uatsjendayá ya cachabe buatëmbayacá jtsemnana tojashjáchése, ndayá más nanjátsboše. Cachcá endmëna chë oservenáftaca, cachabe nduiñcá tojtsemnëse. Atše sëndmëna mo canye yebnentša taitacá y tšëngaftangna mo cach yebnentša basengcá. Entšanga jtsichámuana atšna Beelzebú o chë bacna bayëjëngbe amëndayá tsmëna ca. ¿Ntšamo chënga tšëngaftanga cmocht-sëbobuatma ca?” —Jesús tojanéyana.

### Nda ndegombre cuantsebiauatja

<sup>26</sup> “Chíyeca entšangbiama ndoñe matauatjëngana. Chë yoiytëmena soyentšana tondaye ntjinýcá queochaisoquéda, y chë ndótatsëmbo soye, ntsotatsëmbo queochaisoquéda. <sup>27</sup> Chë mora cbontsëtsëtsná soyënga, chë entšangbiama mo ibetiñe cuaftsemncá soyënga, tšëngaftanga šmochjama entšanga botamana chama chamotsetatsëmbuama. Y chë iytëcana cbontsëtsëtsná soyënga nyetsca entšanga šmochtsabuayiyenaye, mo nda canye yebnentša tsbanánocana noticiënga tojtsayebuachcá. <sup>28</sup> Ndoñe matauatjëngana nye chë tšëngaftangbe cuerpo japochócama imobenëngbiama y ainana jtsepochócama ndoñe ntsoybenana. Más šmochtsebiauatja chë nda endobena tšëngaftangbe cuerpo y tšëngaftangbe ainana jtsepochócama, nyetsca tescama infiernoca.

<sup>29</sup> “Uta jaja shloftšëtëmata nye canye denario crocénánama mondbétsena. Masque chca, ni cányetema obanatema fshantsoye jotsatšana, tšëngaftangbe Taitá, Bëngbe Bëtsá ndoñe tontsebošëse. <sup>30</sup> Y tšëngaftangbiama, Bëngbe Bëtsá botamana jtsantješnana, y chca, cha lempe tšëngaftangbiama jtsetatsëmbuana, bueta stjënashënga tšëngaftangbe bestšasiñe yomnámna. <sup>31</sup> Chíyeca ndoñe matauatjëngana, tšëngaftanga ba jaja shloftšëtëmëngbiama corente más šmondúamana ca” —Jesús tojanayana.

### Ndabiama Jesucristo yochjayana chabe entšá yomna ca

<sup>32</sup> “Nda atšbe entšá yomna ca entšangbe delante tojayanabiama, átsnaca, atšbe Taitá, chë celoca endmënabe delante chanjayana cha atšbe entšá yomna ca.

<sup>33</sup> Pero nda entšangbe delante atšbe entšá ndoñe yondmëna ca tojayanabiama, átsnaca, atšbe Taitá, chë celoca endmënabe delante chanjayana cha atšbe entšá ndoñe yondmëna ca” —Jesús tojanéyana.

### Jesube causa, entšangbeñe más jtsentsjanayana

<sup>34</sup> “Ndoñe šmattsejuabnaye atše quem luaroye tijabo nyetsca entšanga natjëmbana chamotsiyenama. Atše chama ndoñe chiyátabo; atše sënjabo causa, entšanga más mochántsejtsjanaye. <sup>35</sup> Atše sënjabo chë uaquiñá cachabe taitabe contra chaotsemnana, chë bembe cachabe mamabe contra y chë bebinucá chabe uambén mamabe contra chaotsemnana. <sup>36</sup> Y chca, ba entšangbe uayayënga cachëngbe pamillanga mochántsemna.

<sup>37</sup> “Nda cachabe taitá o mamábioye atšbiama más tbojtsebobonshánëse, cha ndoñe ntsomerecénana atšbe entšá jtsemnana. Nda cachabe uaquiñá o bëmbebioye atšbiama más tbojtsebobonshánëse, cha cach ndoñe. <sup>38</sup> Y nda nyetsca chabe quem luare soyënga ndoñe tonjëseboshjona atše juastama, y atšbiama jasúfriama ndoñe tontseprontana y cruciñe jobanámna, cha ndoñe ntsomerecénana atšbe entšá jtsemnana. <sup>39</sup> Nda tojtsentšena quem luarentše bëtscá soyënga jtseboynama y atšbiama jasúfriama ndoñe tontseprontana, chë nyetsca tescama yomna tšabe vida echanjobuetše. Pero nda quem luarentša soyënga cachcá tojesonýa atše juastama, masque chaóbana, chë nyetsca tescama yomna tšabe vida echántseboynana ca” —Jesús tojanayana.

### Chë uacanana soyënga

<sup>40</sup> “Nda tšëngaftanga chacmojúbuaja, átsnaca cha šochanjofja; y nda atše chašojofja, chë nda šojichmóbioynaca cha bochanjofja. <sup>41</sup> Nda canye Bëngbe Bëtsabe juabna oyebuambnayábioye tbojoyeuná, cha chca bëtsemnana, chábioye Bëngbe Bëtsá canye uacanana soye bochantatšëtaye, mo cach Bëngbe Bëtsabe juabna oyebuambnayabe uacanana soyecá. Y nda canye nyetsca soyënguiñe tšabá amábioye tbojofja, cha chca uamanama, chábioye Bëngbe Bëtsá canye uacanana soye bochantatšëtaye, mo cach nyetsca soyënguiñe tšabá amabe uacanana soyecá. <sup>42</sup> Y ndánaca, tšëngaftanguentšá canye nduamanábioye masque nye mo base búyeshtema tbojuabatšëtá, atšbe ustoná bëtsemnayeca, ndegombre Bëngbe Bëtsá canye uacanana soye chábioye bochantatšëtaye ca” —Jesús tojanayana.

### Juan chë Ubayanabe ichmónënga

**11** Jesús tojanpochocá chabe bnëtsana uta uatsjendayënga jábuayenama, y chentšana tojtšanoñe chë luariñe pueblënguenache oyena entšanga Bëngbe Bëtsabe palabra jabuátambama y jábuayenama.

<sup>2</sup> Chë tempo Juan chë Ubayaná cárceloye tmojanëntame. Choca cha yojouena ndayá Jesús yojtsamama. Y as, Jesús yojtsemnoye, básefta chabe ústonënga tojanichamó, <sup>3</sup> mëntšá jatjayama: —¿Aca ndegombre cojtsemna chë jabama iboanmëná, chë Uámana Uabuayaná, o šojtsamna ínýabiama jatobátmama ca?



<sup>4</sup> Chca tmojantjá orna, Jesús tojanéjua: —Šmochjá y Juan šmochjauyana ntšamo šmoujouena y šmojinýca. <sup>5</sup> Cha šmochjacuénta: Chë jtanënga tšabá entsatëbinýna, chë coshetënga tšabá montsatana, chë bacna nguayanánaca šoquënga shnánënga montsatsmëna y chë tësmënga montsuenana, chë obanënga tmontayena y chë ndbomnjémëngbioye chë tšabe noticiënga montsabuyaiyná ca. <sup>6</sup> ¡Puerte oyejuayá chaotsemna chë nda atše bacna soye ndoñe stsama ca jtsejuabnayëse, átšbeñe ošbuáchiyana ndoñe tontsajbaná cha ca! —Jesús tojanéyana.

<sup>7</sup> Chënga tmojtsatanoñe ora, Jesús tojanontsé Juanbiam chë entsanga jáuyanana, mëntšá: “Juan jinýama šmojánbocana ora, ¿ndayá jinýama chë entsanga ndoyena luaroye šmojánbocana? ¿Canýe entsá ainaniñe tondaye añemo ndbomná, mo canýe šëše bínýiaca shatíyeynëščá? <sup>8</sup> Y ndoñese, ¿ndayá jinýama choye šmojánbocana? ¿Canýe boyabása uámana entsáyaca bopormaná? Ndoñe. Tšëngaftanga šmondëtatšëmbo chë boyabásënga uámana entsáyaca bopormánëngna chë mándayëngbe yebnënguiñe mondbët-siyenama. <sup>9</sup> Y asna, ¿ndayama choye šmojánbocana? ¿Canýe Bëngbe Bëtsabe juabna oyebuambnayá jinýama? Ndegombre, aíñe; y cbéyana, ndegombre cha canýe Bëngbe Bëtsabe juabna oyebuambnayabiam más bëtsá endmëna. <sup>10</sup> Cha, Juan, endmëna ndabiam Bëngbe Bëtsá chabe uabemana palabrënguiñe tojanayana mo chabe ichmonacá, mëntšá tojanayana ora:

Cristo, atšbe entsá natsana sënjichmó acbiam chaóyebuambama, entsanga jábuayenama aca jabama ainaniñe tšabe juabnéngaca chamotseprontánama ca. <sup>11</sup> Ndegombre cbéyana: Nýets tempo entsángbeñe, ndocná quenátsmëna Juan chë Ubayanabiam más bëtsá; masque chca, Bëngbe Bëtsabe amëndayoca chë más batšá uamaná, más bëtsá echántsemna ntšamo mora Juan yomnama.

<sup>12</sup> “Juan chë Ubyaná tojánabo orscana mëntsoñama, bëtscá entsanga tša mondboše Bëngbe Bëtsabe amëndayoye jamashënguama, y chë Bëngbe Bëtsabe amëndayama contra imomnëngna, chëngbe nýets añémoca montseboše chë mándayana jtsepochoćama. <sup>13</sup> Juan candabëntscuana, nýetsca Bëngbe Bëtsabe juabna oyebuambnayënga y Moisesbe Ley nýe Bëngbe Bëtsabe amëndayama tmonjanobuambá. <sup>14</sup> Y tšëngaftanga chë soyënga jóyëngacñama šmojtsebošëse, Juan entsemna chë Bëngbe Bëtsabe juabna oyebuambnayá Eliascá, chë jabama ibojamná. <sup>15</sup> Chë jouenama tmojtsobenënga, chamouena ca” —Jesús tojanayana.

<sup>16</sup> Mëntšánaca Jesús tojanayana: “¿Ndayacá morsca entsanga imomna? Chënga mondmëna mo chë plazëngoca mondbetsetbiámana basetemëngcá; chënga chëngbe enutëngbioye jtsayebuáchana <sup>17</sup> y mëntšá jtsichámuana: ‘Tšëngaftangbiam fsënjaflautá y ndoñe chešmatlantsá; ngmëna fsënjaversiá y ndoñe chešmatošachna ca.’ <sup>18</sup> Juan tonjánabo, y bëtscá entsángbeñe ndoñe quenjatamana ni jasanya, ni jof-

šiyana, y entsanga montsanichamo chana bacna bayëjbe juabna uambayá yojamna ca. <sup>19</sup> Morna, chë Bëngbe Bëtsá Entšá tbojanbemá tonjabo, y chana aíñe entsamana bëtscá entsángbeñe jtsedayana y jtsofšësnayana, y entsanga montsichamo chana yapa uasayá y vínoye tmoýa entsemna ca y Romocama impuesto entsángbioye atjanayënga y bacna soye amëngbe amigo ca. Pero Bëngbe Bëtsá endbëtsinýanýnaye cha nýets osertánana bomná yomnama, chë ndayá cha tojama ora ndayá chentšana tojóbočna soyëngaca ca” —Jesús tojanayana.

### Chë nduauenana entsanga

<sup>20</sup> Chentšana Jesús tojanontsé jucacánana chë entsanga, ndëmuanýënga imojoyena chë pueblënguñe ndayenache ba chabe bëtš soyënga tojanma, chënga bacna soyënga amana ndoñe tmontsanajbanama y Bëngbe Bëtsabe benache ndoñe tmontanishachama. Mëntšá yojsichamo: <sup>21</sup> “¡Tša lastema, Corazín pueblaca entsangbiam! ¡Tša lastema, Betsaida pueblaca entsangbiámna! Chë chentše sënjama bëtš soyënga, Tiro y Sidón bëtš pueblënguentše matënjochnguse, chentša bacna entsanga ya tempo ngmëna matmëntenojuabó chëngbe bacna soyëngama y Bëngbe Bëtsabe benache matmëntishache; y chca tmojamama chaotsótšëmbuama uajjësha entsayangaca matmëntopormanga y chëngbe bestšaíñe jatinyá matmëntenotbótoto. <sup>22</sup> Pero ndegombre cbéyana, ntšamo entsanga tmojamama, tšabá o ndoñe tšabá bëtsemnama jayanama chaojobuache ora, tšëngaftanga más bëtš castigo šmochántsebona, chë Tiro y Sidonoca bacna entsangbe castiguama. <sup>23</sup> Y tšëngaftanga, Capernaumoca entsanga, ¿šmojtsejuabná celóntscoca atsebánanënga šmochtsemna ca? ¡Chë uabouana infiernoye cmochantsésetjango! Chë muentše sënjama bëtš soyënga Sodomoca matënjochnguse, choca entsanga ya tempo ngmëna chëngbe bacna soyëngama matmëntenojuabó y Bëngbe Bëtsabe benache matmëntishache, y chë bëtš pueblo cabá cachcá mëntscuana mantsomñe. <sup>24</sup> Pero ndegombre cbéyana, quem luare jopochócamate, Bëngbe Bëtsá puerte jabuache cmochantsacastígaye, y chë Sodoma luaroca entsángbioye ndoñe nýetšá jabuache quemochatacastígaye ca” —Jesús tojanayana.

### “Atšbioye mabënga y šmochjóchna”

<sup>25</sup> Chë tempo, Jesús tojanayana: “Atše cbatschuá, Taita, celoca y quem luarentša Utabná. Aca, chë nýe batšá tatšëmbënga tcojanýanyé, chë tša tatšëmbënga y osertánëngbiam tcojaiytëme soyënga. <sup>26</sup> Aíñe, chama cbontsadorana, Taita, chca chaotsemnama tcojábošënayeca.

<sup>27</sup> “Atšbe Taitá lempe chca šonjatštá. Chë Uaquiñábioye ndocná corente quebnatábuatma; nýe chë Taitá aíñe. Y chë Taitábioye ndocná corente quebnatábuatma; nýe chë Uaquiñá aíñe, y ndábioye chë

Uaquiñá tojtseboše nda chë Taitá yomnama jinñanyiyama, chánaca chë Taitábioye bochantśabuatma.

<sup>28</sup> “Atśbioye mabënga nñetsca tšëngaftanga uamëntśnayënga y bëtsćá trabajo uangménënga, y atśe chanjama tšëngaftanga chaśmochnama. <sup>29</sup> Ntśamo canñe entśá, uacná yuguëšifne juabatsęcana juanat-sama, cachćá, tšëngaftanga atśe śmochjalesćencia jobnatsayama y jabuátambama. Atśbentśana śmochjuat-sjinñe: atśe uantado mēná sēndmēna y ndoñe quetsa-tamana yapa uamaná jatenobiamnayana. Y chca, tśabá jóchnama śmochantsobena y ainaniñe más añemo śmochántsebmna. <sup>30</sup> Mo canñe uacnaćá, ndoñe tishuta yuguëšeca o ndoñe uauta uasmanēshaca, paselo jama jobenayana, cachćá tšëngaftanga śmochántsemna atśe cbojtsabnatsana y cbojtsabuátambase; y chca, tšëngaftanga más oyejuayënga śmochántsemna y más paselo nñetsca soyënga jama echántsemna ca” —Jesús tojánayana.

### Jesúsbe uatsjédayënga ochñayté trigo tmojanátabebe

**12** Chë tempo, Jesús canñe ochñayté canñe jajajana yojsachñëjuana. Chabe uatsjédayëngna shéntseca imojtsemna, chíyeca tmojanontśé trigo juatabebiana y chë meshënga jasana. <sup>2</sup> Chë fariseunga chca tmojaninñe ora, Jesús tmojaniana: —Minñe, acbe uatsjédayënga canñe soye montsama y chë soye ochñayté jamama ndoñe quenátślesenciana ca.

<sup>3</sup> As Jesús tojanéyana: —¿Ndoñe śmēndualía y śmondétatśēmbo ndayá David y chabe enutënga tmojanmama, shéntseca imojtsemna ora? <sup>4</sup> Chca orna, David, Bëngbe Bëtsabe bëts yebnoye yojámashëngo y chë Bëngbe Bëtsá chentśe yojamnama inñinñayetandëšënga yojase. Chë tandëše nñe ndánaca jasama ndoñe yonjalesenciana, ni Davidbiana, ni chabe enutëngbiana. Nñe bachnangbiana belesenciana chë tandëše jasama. Masque David chca tojanma, Bëngbe Bëtsá chora ndoñe tonjánayana David canñe bacna soye tojanma ca. <sup>5</sup> ¿O ndoñe śmēndualía y śmondétatśēmbo, Moisesbe leyifne, chë bachnanga ochñayté Bëngbe Bëtsabe bëts yebnentśe jtsetrabájayana, pero ndoñe bacna soye ntsemnana chë bachnanga ochñayté ndoñe mondbóchnama? <sup>6</sup> Y atśe ścuayana: Muentśe canña entsemna, cha chë Bëngbe Bëtsabe bëts yebnentśa bachnangbiana más uamaná endmēna y chabe amēndayoca soyënga más entsámama chë bachnangbe mándayentśa soyëngama. <sup>7</sup> Bëngbe Bëtsabe uabemana palabrënguifne mēntśá endayana: Atśe sēntseboše tšëngaftanga lastemadënga chaśmotsemna,

y ndoñe nñe bayënga chaśmotsėbánaye Bëngbe Bëtsá jėtschuayama ca. Ntśamo chiñe entsayancá ndegombre cmojtsėsertánėse, tšëngaftanga ndoñe chëngbe contra śmattsichamo, chë ochñayté chca tmojtsamëngbiana. <sup>8</sup> Chë Bëngbe Bëtsá Entśá tbojanbemá, chë entśá ochñayté tojtsama sóynaca jtsemándayana ca —Jesús tojánayana.

### Chë buashana cucuatśe bomna entśá

<sup>9</sup> Chentśana Jesús tojtsanoñe y chentśa judiëngbe enefjuana yebnoye tojánamashëngo. <sup>10</sup> Chentśe yojtsemna canñe boyabása buashana buacuatśe bomná. Chë fariseunga imojtsenguaye ndayánaca, as chca chënga jtsebmnama ndaye sóyeca Jesús mal jaquédama. Chcasna, chora chënga Jesús tmojantjá: —¿Queojtśelesenciana canñe ochñayté śocá jáshnama ca?

<sup>11</sup> Y Jesús tojanéjua: —¿Nda tšëngaftanguentśá, canñe oveshá tbojtsebmna y nña chë ochñayté canñe fshantsentśe atëfñoye chë oveshá tojtsótsatśe, chora chë boyabása nanjá o ndoñe chë oveshá jatábocnama? <sup>12</sup> ¿Entśá oveshabiana puerte más uamaná endmēna! Chcasna, entśelesenciana chë ochñayté tśabe soye jamama ca —Jesús tojanéyana.

<sup>13</sup> Chora Jesús chë buashana buacuatśe bomnábioye tbojaniana: “Macuenñanėjaná ca.” Y chë boyabásana tojanacuenñanėjaná y chora chëtśa tśabá yojsatamna mo cach inñetśacá. <sup>14</sup> Pero chë fariseunga tmojėsanbocana ora, tmojanontśé juabnayana ntśamo jamėse Jesús jóbama.

### Ndayá chë Bëngbe Bëtsabe juabna oyebuambñayá Jesúsbiama tojánayana

<sup>15</sup> Jesús chë soye tojántatśēmbona ora, chentśana tojtsanoñe y ba entśanga tmojanasto. Nñetsca šoquënga tojanashná, <sup>16</sup> y tojanamēndá chabiana entśangbeñe ndoñe chamondėtsóyebuambñama. <sup>17</sup> Chca tojanamēndá, cachćá chaotsemnana ntśamo chë Bëngbe Bëtsabe juabna oyebuambñayá Isaías tojanayancá. Cha mēntśá tojánayana:

<sup>18</sup> Muentśe atśbe oservená entsemna. Atśe cha sēnjabocacá, atśbe bonshaná, y atśe corente chabiana sēntsoyejuá.

Atśe chanjama atśbe Espiritu chabe ainaniñe chaotsemnana y entśanga echanjabuayená, Bëngbe Bëtsá nñetsca luarënguentsana entśangbiana yochjayanama chënga tśabá o ndoñe tśabá tmonjamama.

<sup>19</sup> Cha ndoñe queochátayajuatsana, ni queochátśchembumbuana.

Chabe oyebuambñayana tsáshenañe ndocná queochatuena.

<sup>20</sup> Mo nda chë atcana šėše ndoñe más jatsndbemana, chë ndobenënga cha ndoñe queochátapochocaye. Mo nda chë quinñenėfjua nñe uabojátśena uajuinñenėfjua ndoñe ntsafsanana, chë Bëngbe Bëtsabeñe jtsošbuáchiyama imojtsebojátśangbe obatmanana chábeñe, cha ndoñe queochátabuajuanaye.

Cha nñets añémoca echanjėftsetrabája, entśanga chëngbe ainaniñe Bëngbe Bëtsabe ndegombre soyënga chamóyëngacñėntscuana.

<sup>21</sup> Y nÿetsca luarënguentsana entsanga chábeñe mochantsobátmana ca —cha tojánayana.

### Fariseunga tmojánayana Jesús Satanásbentsana obenana tojanóyëngacñe ca

<sup>22</sup> Chora, Jesús yojtsemnoye canÿe boyabása jtaná y ndëbiá tmojanánatse. Chana bacna bayëjbe juabna uambayá inamna; y Jesús chábioye tbojanshná, chabuatabínýnama y chabuatauénanama. <sup>23</sup> Y nÿetsca entsanga ojnánánënga imojtsichamo: “¿Mua yojtsemna chë Davídbentsana Uámana Entsá, chë Cristo ca?”

<sup>24</sup> Pero chë fariseunga chca tmojanuena ora, imojtsichamo: “Beelzebú, cach Satanás, chë bacna bayëjengbe amëndayá, quem boyabásabioye obenana tbojatstá chë bayëjenga chauatëbuacnama ca.”

<sup>25</sup> Y Jesús yojtsetátšëmbo ntšamo chënga imojtsejuabnayama; as tojanéyana: “Canÿe amëndayentše entsanga tmojtsenojatá y tmojtseányase, cachënga jenpochócana. Cachcá, canÿe bëts pueblentša entsanga o canÿe yebnentša pamíllanga tmojtsenojatá y ndoñe tmontsenëyeunanëse, chënga ndoñe tšabá nÿets tempo quemochátsmëna. <sup>26</sup> Cachcá, Satanás cachabe bayëjenga jtëbuacnama tojtsebošëse, chana tojtsenojatá y cachabe contra yojtsemna. Y chca, ¿ntšamo nantsobena chabe mándayana quem luarëntše jëftsebomnana? <sup>27</sup> Tšëngaftanga šmontsichamo atše Beelzebube obenánaca chë bayëjenga stsatëbuacana ca; pero chca ndegombre tojtsemnëse, ¿ndábeyeca tšëngaftangbe usetonënga obenana imojtsebomna chë bacna bayëjenga jtëbuacnama? Chíyecna, chënga montsinÿinýná ntšamo ndegombre yomnana y tšëngaftanga ndoñe ndegombre soye šmontsichámuama. <sup>28</sup> Y atšna, chë Bëngbe Bëtsabe Espíritbeyeca chë bayëjenga entsángbentsana sëndëtëbuacana; y chë soye entsinÿinýná Bëngbe Bëtsabe amëndayana tšëngaftangbioye tojóshjanguama.

<sup>29</sup> “¿Ntšamo nda nanjobenaye canÿe corente añemo bomna entsabe yebnoye jamashënguana y chabe soyënga jtsebocana, ndoñe natsana chábioye tconjshëtsebatsëquëse? Nÿe tcojshëtsebatsëquësna aíñe cuanjobenaye cha jefcana. Atše ya chca Satanásoftaca sënjama.

<sup>30</sup> “Nda ndoñe átšëftaca tontsemná, atšbe uayayá jtsemnana. Y nda átšëftaca ndoñe tontsetrabája, chana atšbe contra jtsetrabájayana.

<sup>31</sup> “Chíyecna cbéyana, Bëngbe Bëtsá entsanga echanjáperdonaye nÿetsca chëngbe bacna soyënga y chë Bëngbe Bëtsabiama puerte bacá oyebuambnayana, mo chábioye cuafjoyenguangcá; pero ndoñe queochá taperdonaye chë Uámana Espíritbiama puerte bacá ichámënga. <sup>32</sup> Bëngbe Bëtsá bochanjaperdóna chë Cha Entsá tbojanbemabiama ndoñe tšabá ichamuábioye; pero chë Uámana Espíritbiama ndoñe tšabá ichamuábioyna, ni quem luarentše, ni ndocna te queochatsperdóna ca” —Jesús tojánayana.

### Tšabe betiye o ndoñe tšabe betiye tondmënama, jtsotatšëmbuana ntšamo tojashajoncá

<sup>33</sup> “Canÿe betiye tšabá mobocuedanga y botamana echanjashájona; ndoñe tšabá matscuedánana y tšabe shajuana ndoñe queochátsbomna. Chë betiye tšabe betiye o ndoñe tšabe betiye tondmënama, jtsotatšëmbuana ntšamo chëshe tojashajoncá. <sup>34</sup> ¡Mëtšcuaye entsanga! ¿Ntšamo šmattsobena tšabe soyëngama jtsóyebuambnayana, cach tšëngaftanga bacna entsanga šmojtsemnëse? Er ndayá ainanoca becá tomnama entsá jtsóyebuambnayana. <sup>35</sup> Chë tšabe entsá, chë ainanoca tšabe juabnënga bomnentšana jtsóyebuambnayana, y chë bacna entsana chë ainanoca bacna juabnënga tobomnentšana jtsóyebuambnayana. <sup>36</sup> Y ndegombre cbéyana, chë entsangbiama tšabá o ndoñe tšabá tmonjamama jayanama tempo chaojobuache ora, ndaye ndoservena palabra šmojóyebuambama, Bëngbe Bëtsabe delante šmochanjayana ndáyeca chca ca. <sup>37</sup> Er ntšamo tcojtsóyebuambnama Bëngbe Bëtsá echanjayana tšabá o ndoñe tšabá tconjamama, y cmochanjauyana aíñe o ndoñe cmontsemna castiganá jtsemnana ca” —Jesús tojánayana.

### Chë bacna entsanga Jesús tmojanimpadá canÿe bëts soye chaoma, chabe obenana jinÿama

<sup>38</sup> Chentšana, básefta fariseunga y Moisesbe ley abuatambayënga Jesús tmojantjá: —Buatëmbayá, bënga fsëntseboše aca canÿe bëts soye chacoma, acbe obenana chašcuinÿanÿema ca.

<sup>39</sup> As Jesús tojanéjua: —Quem puerte bacna entsanga y ndošbuáchiyënga montseboše atše canÿe bëts soye chaima, atšbe obenana jinÿanÿiyama; pero chca soye ndoñe quemochátinÿe, sinó nÿe chë ndayá yomna mo chë Bëngbe Bëtsabe juabna oyebuambnayá Jonásoftaca tojanopasá soycá. <sup>40</sup> Ntšamo Jonás unga te y unga ibeta chë bëts beonbe uafsbioye yojtsemncá, cachcá chë Bëngbe Bëtsá Entsá tbojanbemá unga te y unga ibeta fshantse jashenoye echanjëftsemna. <sup>41</sup> Morsca entsanga tšabá o ndoñe tšabá tmonjamama Bëngbe Bëtsá yochjayana te, Nínive bëts puebloca entsanga mochanjotsaye y morsca entsangbiama mochanjayana ndoñe tšabá tmonjama ca; er chënga, Jonás yojtsabuayinÿe ora, tmojanoyeuná y chë tšabe benache tmojtanishache, y chë mora muentše entsemnana, Jonasbiama más uamaná endmëna. <sup>42</sup> Morsca entsanga tšabá o ndoñe tšabá tmonjamama Bëngbe Bëtsá yochjayana te, chë Sur luaroca reinánaca echanjotsaye y morsca entsangbiama echanjayana ndoñe tšabá tmonjama ca; er chana chë quem luare uajbana luarëngocana tojánabo Salomonbe osertanánaca palabrënga jouenama, y chë mora muentše entsemnana, Salomonbiama más uamaná endmëna ca —Jesús tojánayana.

### Ndayá inopása chë bacna entsángaftaca

<sup>43</sup> Jesús mentsánaca tojánayana: “Canÿe bacna bayë-jan canÿe entsábentšana tojësebozna ora, chë bayëjna bojojo luarënguenache jtsanana ndayentše jóchnama onguayíñe, y canÿe luare ndoñe tonjínÿena ora cha jenójuaboyana: <sup>44</sup> ‘Atšbe oyenoye, chë ndayentšana sënjëftseboznoye chanjesshécona ca’. Y choye tojtashjango orna, jinÿenana lempe tšabá cha jtesamashënguama, mo chentše ndocná tontsiyencá, tsjajniñe y lempe botamaniñe cuaftsemncá. <sup>45</sup> Chorna chë bayëj-na jana y inÿe canÿsëfta bayëjenga chabiamá más opëjenga jobiatšana y nÿetscanga choye jamashjnana chë boyabásabeñe joyéanama. Y chca, chë boyabása tempscama más bacna entsá jtsemnana, chora chë natsanama más bayëjenga abamna causa. Morsca puerte bacna entsángaftaca cachcá echanjochñengo ca” —Jesús tojánayana.

### Chë Jesusbe ndegombre pamíllanguentšënga

<sup>46</sup> Jesús cabá entsanga yojsëtsëtsnaye ora, chabe mamá y catsátanga tmojánashjajna y imojtseboše Jesúsëftaca jóyebuambayama. Nÿe shjoca imojtsemna; <sup>47</sup> asna, canÿe boyabása Jesúsbioye tbojanbuayená: —Acbe mamá y acbe catsátanga shjoca montsemna y montseboše ácaftaca jóyebuambayama ca.

<sup>48</sup> Pero Jesús chë jauenayama tojánabioye tbojanayana: —¿Nda atšbe mamá yomna, y ndëmuanÿenga atšbe catsátanga ca?

<sup>49</sup> Y cachora chabe cucuatše tojanatsbaná, chabe uatsjëndayënga tojanëñyanÿé y tojánayana: —Quemënga montsemna mo atšbe mamá y mo atšbe catsátangcá. <sup>50</sup> Er ndánaca, ntšamo atšbe Taitá, celoca endmëná yobošcá tojtsama, jtsemnana atšbe catsata, atšbe uabena y atšbe mamá, atšbe ndegombre pamíllanguentšá ca —Jesús tojánayana.

### Chë jenabe cuento

**13** Cach te, Jesús yebnentšana tojëftsanbozna y uafjajónaye tsachoca tojanótbema. <sup>2</sup> Mallajta entsanga choye tmojanobeconá; as Jesús, chë uafjajónayentše yojanamna canÿe barquëshoye tojánasëngo, tojanótbema; y chë entsangna tsachoca imojtsemna. <sup>3</sup> Chorna ba soyëngama cuentëngaca chënga tojanabuatambá.

Mëntšá tojanéyana: “Canÿe jená chë jénaye jaujqüëshama yojëftsebozna. <sup>4</sup> Yojsëjquëshaye orna, básefta jénaye benache juachañe yojuatquécjana, pero chë jaja shloftšënga imojástjajna y lempe imojtsósañe. <sup>5</sup> Inÿe meshëngna ndëtsbenguiñe yojuatquécjana, ndoñe yapa fshantse binÿentše. Chiña betscó yojuábocna, fshantse ndoñe jashenocana yonjanmëna causa, <sup>6</sup> pero shinÿe yojábocna ora, puerte yojojëñyána y yojsancta; y yojsábojo, bëtscá tbëtëjenga tondaye causa. <sup>7</sup> Inÿe meshëngna uchmëshangañe yojuatquécjana, y chë uchmëshangá yojuájua orna, lempe yojsatscué. <sup>8</sup> Y inÿe meshëngna, uanguanëshiñe yoju-

atquécjana y puerte botamana chiñe yojuashajo: inÿenache nÿe canÿe jénayentšana mo patse meshënga yojuashájona, inÿeñna mo chñënguana bnëtsana meshe y inÿeñna mo unga bnëtsana meshe.”

<sup>9</sup> Jesús chca jacuéntama tojanpochocá ora, mëntšá tojánayana: “Chë jouenama tmojtsobenënga, šmochjouena ca.”

### Ndayeca Jesús cuentëngaca yojánabuatambaye

<sup>10</sup> Chora chë uatsjëndayënga tmojanobeconá y Jesús tmojantjá: —¿Ndayeca entsanga cuentëngaca cojtsabuatambá ca?

<sup>11</sup> As Jesús tojanéjua: —Bëngbe Bëtsá tšëngaftanga cmontsinÿanÿná nÿetsca chë mo iytemencá yomna soyënga chabe amëndayama, pero chë inÿengbioyna ndoñe. <sup>12</sup> Nda tojtseboznábioye más jatštayana y chca cha corente bëtscá jtseboznana; pero chë tondaye tondbomnábioyna, chë batšatema tobomna sóynaca mochántsebozna. <sup>13</sup> Chíyeca atše cuentëngaca chënga sentsëtsëtsná. Chca, masque corente chamotsafšna, ndoñe chamondobená Bëngbe Bëtsabe soyënga jinÿama; y masque becá chë soyënga chamouena, ndoñe tšabá quemochátuenana, ni queochátësertana.

<sup>14</sup> Chcáyecna, chëngbeñe entsemna cachcá ntšamo chë Bëngbe Bëtsabe juabna oyebuambnayá Isaías tojanayancá:

Masque becá chamouena, ndoñe queochátësertana.

Masque puerte chamotsantješna, ndoñe quemochátinÿe

<sup>15</sup> Quem entsanga ndoñe quemátsboše botamana jajuaboyana;

chënga uamatsáchtönënga montsemna y chëngbe bomínÿnaca cachcá.

Chca ndóñesna, chënga muantsobena jinÿama, jouenama y ainaniñe josértama;

y chca, chënga bacna soyënga amana muantsajbaná y atšbe benache muantishache,

as atše chënga chayatsebacama ca —cha tojëftsanbema.

<sup>16</sup> “Tšëngaftangna oyejuayënga šmochanjoyena, er šmondobomna bominÿe y matscuasënga Bëngbe Bëtsabe soyënga jinÿama y jouenama. <sup>17</sup> Ndegombre cbéyana, banga Bëngbe Bëtsabe juabna oyebuambnayënga y nÿetsca soyënguiñe tšabá amënga tmonjånbošena chë tšëngaftanga šmontsonÿá soyënga jinÿama, y ndoñe chemátaninÿe; tmonjånbošena chë tšëngaftanga šmontsuenana soyënga jouenama, y ndoñe chemátanuena ca” —Jesús tojanéyana.

### Jesús chë jenabe cuentama tojanabuayená

<sup>18</sup> “Chcasna, oído šmochajajo; chë jenabe cuento mëntšá endayana: <sup>19</sup> Chë Bëngbe Bëtsabe amëndayama tmojouena y ndoñe tontsësertana entsanga mondmëna mo chë benache juachañe yojuatquécjana jenaycá; Satanás jabana Bëngbe Bëtsabe palabra chëngbe ainanentšana jabëtsabuajuanama, chënga chiñe ndoñe chamondëtsošbuáchemá. <sup>20</sup> Y chë ndët-

šbenguiñe yojuatquécjána jénaye entsemna mo chë aíñe Bëngbe Bëtsabe palabra tmojouena y Bëngbe Bëtsábeñe jtsošbuáchiyama oyejuayënga tmojtsemna entšangcá; <sup>21</sup> pero ndoñe nyets tempo chana jo-cochájuana, y chca, ndoñe bayté Bëngbe Bëtsáftaca ntjéftsemnëngana, ndoñe yapa tmontsašbuaché causa. Inyënga chëngbioye mochantsébuayënja y Bëngbe Bëtsábeñe betsošbuáchiyama mochanjasúfri-anga; chíyeca chënga Bëngbe Bëtsabe palabra cachcá mochanjesonýaye. <sup>22</sup> Chë uchméshangañe yojuatquécjána jénaye entsemna mo chë Bëngbe Bëtsabe palabra tmojouena entšangcá, pero quem luarentša soyëngaca oyejuayënga jtsemnana yapa mochántsenojuabnaye y mallajta crocénana y ba soyënga jtsebomnana mochántseboše. Chíyeca chënga Bëngbe Bëtsabe palabra jtsebnéjtjombana y ntšamo cha tojayancá ndoñe ntsamana. <sup>23</sup> Pero chë uanganëshiñe yojuatquécjána jénaye entsemna mo chë Bëngbe Bëtsabe palabra tmojouena y botamana jósertana entšangcá. Mo canye betiye puerte tšabá tojtseshajuancá, chënga bëtscá tšabe soyënga Bëngbe Bëtsabiama mochántsama. Inyënga inyëngbiama más bëtscá soyënga mochántsama, y chca, inyënga jtsemnana mo chë patse meshënga tojanshajo jenaycá, inyënga mo chë chnénguana bnëtsancá y inyëngna mo chë unga bnëtsana meshënga tojanshajo jenaycá ca” —Jesús tojanabuayená.

#### Chë tríguañe bacna shacuanama cuento

<sup>24</sup> Jesús mëntšánaca tojanacuntá: “Bëngbe Bëtsabe amëndayana endmëna mo chë tšabe jenaycá, canye boyabása chabe jajañe yojáje. <sup>25</sup> Pero nyetscanga imo-jtsomañe orna, chabe uayayá yojáshjango y chë trigo jeniñe bacna shácuana yojesejé y yojtsatoñe. <sup>26</sup> Y chë trigo yojuájua y ya yojtseshajuana orna, chë bacna shácuanaënaca yojuábocna. <sup>27</sup> As chë peonga imojá chë nduiño jauyanama: ‘Bacó, chë jajañe tšabe jénaye tconjanjé y as, ¿ndáyeca chë bacna shácuana chiñe tojuábocna ca?’ <sup>28</sup> Y chë nduiño yojáuyana: ‘Atšbe uayayá chca tojama ca.’ Chora chë peonga imojatjaye: ‘¿Quetseboše bënga fchayá chë bacna shácuana jetsejashtsëtsama ca?’ <sup>29</sup> Pero chë nduiño yojáuyana: ‘Ndoñe. Chë bacna shácuana šmojtsejashtsëtsana ora, chë trígnaca šmattsejashtse ca. <sup>30</sup> Más tšabana, cachcá mochjonýaye cánýiñe chaójuama, chë jaja saná játbanama tempo chaojobuáchëntscuana. Chora chë trabájayënga chanjichamuá y chanjámëndaye natsana chë bacna shácuana chamotsejashtsëtsa y chamot-sentsacuacjuá jtsejuinýiyama, y chentšana chë shajua-na chamuatbaná y atšbe grano uaquécjnaye yebniñe chamotsatsuamá ca’ ” —Jesús tojánayana.

#### Chë mostaztiye jenayama cuento

<sup>31</sup> Jesús mëntšánaca tojanacuntá: “Bëngbe Bëtsabe amëndayana endmëna mo canye mostaza betiye jenaycá, canye boyabása chabe jajañe yojáje. <sup>32</sup> Nde-gombre, nyetsca jenayëngama chë mostaza jénaye

chë más básetema endmëna, pero tojójua orna, chë jajañentše chë más bëts betiye jóbemana. Tša bëts betiye jtsemnana, chíyeca ba buacuashangá jtsabomnana y chë jaja shloftšënga jana y chiñe uajajonëtemëngá jauábopormana ca” —Jesús tojánayana.

#### Chë levadurama cuento

<sup>33</sup> Quem inye cuétnaca tojanéyana: “Bëngbe Bëtsabe amëndayana endmëna mo levadurcá; canye shembása chana jenájuabana unga medida arninyañe, nyetsana chauabochoama ca.”

#### Ndáyeca Jesús entšanga cuentëngaca yojanabuayináy

<sup>34</sup> Jesús nyetsca chë soyëngama lempe cuentëngaca entšanga jtsëtsëtsnayana, y cuentëngaca ndóñesna ndoñe yonjanoyebuambná. <sup>35</sup> Chca yojamna ndayá cachcá chaochnënguama ntšamo chë Bëngbe Bëtsabe juabna oyeambuambnayá tojanayancá, mëntšá:

Jabuátambamna cuentëngaca chanjóyebuambaye; chanjayana chë iytëmena soyëngama y chë entšanga ndoñe mondëtatšëmbo soyëngámncaca; Bëngbe Bëtsá quem luare tojanma orscana chë soyënga yomna ca —cha tojánayana.

#### Chë tríguañe bacna shácuana cuentama Jesús tojanabuayená

<sup>36</sup> Chentšana Jesús chë entšanga tojtanichamó y yebnoye tojtanamáshëngo. Chentšana chabe uatsjëndayënga tmojanimpadá ndayá chë bacna shacuanama cuento betsayancá chauabuayenama. <sup>37</sup> As Jesús tojanéyana: “Chë tšabe jénaye jená endmëna chë Bëngbe Bëtsá Entšá tbojanbemá, <sup>38</sup> y chë jajañna, quem luare. Chë tšabe jénaye entsemna chë Bëngbe Bëtsabe amëndayoye mochjámashjna entšanga, y chë bacna shácuana entsemna chë bacna bayëjëngbe amëndayabe entšanga, <sup>39</sup> y chë uayayá, chë bacna shácuana yojáje chana, Satanás. Chë jaja saná atbanayana entsemna chë quem luare jopochócama chaojobuache ora, y chë trabájayëngna chë angelotémënga. <sup>40</sup> Ntšamo chë bacna shácuana jtsejashtsëtsana y iñoye jtsatmëtsana jtsejuinýiyama, cachcá echántsemna quem luare jopochócama te. <sup>41</sup> Chorna, chë Bëngbe Bëtsá Entšá tbojanbemá chabe angelotémënga echanjichamuá chë inyënga bacna soye chamomama amënga y chë bacna soyënga amënga chabe amëndayentšana chamotsajuanayama. <sup>42</sup> Y chora chëngbioye chë uabouana íñeshoye mochantsésetjango y chentše puerte mochanjenóbošachna y chë tsetšanama juatsašënga mochantsenoftëšjojnaye. <sup>43</sup> Chora, chë ntšamo Bëngbe Bëtsá yomandacá amëngna corente mo shinýcá mochantsebuashinýinýana chëngbe Taitá, Bëngbe Bëtsabe amëndayoca. Chë jouenama tmojt-sobenënga, šmochjouena ca” —chora Jesús tojánayana.

### Chë fshantsiñe uaiytémëna bomnanama cuento

<sup>44</sup> “Bëngbe Bëtsabe amëndayana endmëna mo chë fshantsiñe uaiytémëna bomnancá. Canye boyabása chë bomnana yojuínÿena y chentšana iytëcana cachentse yojesatbontsá. Corente oyejuayá yojtá, nyetsca chabe bomna soyënga yojetsatobuiye y chentšana chë fshantse yojtobuámiñe ca” —Jesús tojánayana.

### Chë corente uámana fiantse ndëtšëtémama cuento

<sup>45</sup> “Mo canye entšá uámana fiantse ndëtšëtémënga obuamnañacánaca endmëna chë Bëngbe Bëtsabe amëndayana. <sup>46</sup> Chana, canye corente uámana ndëtšëtëma yojínÿena ora, yojtá y lempe chë inabomna soyënga yojetsatobuiye y chë ndëtšëtëma yojtobuámiñe ca” —Jesús tojánayana.

### Chë atarraiëshama cuento

<sup>47</sup> “Bëngbe Bëtsabe amëndayana endmëna mo canye atarraiëshacá, buyeshoye jutšenana y nyetsca beonga jashebuáyana. <sup>48</sup> Chë atarraiëshá jútjena tojtsamna orna, chë beonga ashebuánayënga jtsashëbjátsëcana, tsachoye juyambana y chentše juatbemana chë beonga jabocacayama; chë tsábënga sbarëquënguñe juat-suámana y chë ndoñe tsábënga jtsëtšanana.

<sup>49</sup> Cachcá echanjochnëngo quem luare jopochócama tempo chaojobuache ora. Chë angelotémënga mochanjábocana chë tsabe entšángbentšana bacna entšanga jaluárama, <sup>50</sup> y chë bacna entšangna chë uabouana íñeshoye mochántsatquëcjaye, y chentše puerte mochanjenóbošachna y chë tsetšanama juat-sašënga mochantsenoftésjojnaye ca” —Jesús tojana-cuntá.

### Anteo y tsëm uámana bomnana

<sup>51</sup> Chora chabe uatsjëndayënga Jesús tojanatjá: —¿Lempe chama quecmojtsésertana ca?

Y chënga tmojanjuá: —Arseñor, aíñe ca.

<sup>52</sup> As Jesús tojanéyana: —Canye ley abuatambayá jtsetatšëmbuana ndayá Bëngbe Bëtsá tempo Moisesbi-ajana yojanoyebuambná soyëngama. Ntšamo Bëngbe Bëtsabe amëndayana bëtsemnama cha tojtsatsjendá orna, mo canye yebnentša nduiñcá cha jtsemnana. Chë nduiñna chabe grano uaquëcjnaye yebnocana anteo y tsëm uámana bomnana juabocnana. Cachcá chë ley abuatambayá, Bëngbe Bëtsabe soyëngama jtsabuátambayana chë tempo Bëngbe Bëtsá tojanoyebuambá soyëngama y chë tsëm soyëngnaca Bëngbe Bëtsabe amëndayama ca —tojanéyana.

### Jesús Nazaretoca

<sup>53</sup> Jesús chë soyënga jacuëntama tojanpochocá ora, chentšana tojtsanoñe. <sup>54</sup> Y cachabe luaroye tojtashjango y chentša judiëngbe enefjuana yebnentše tojanontsé jabuátambama. Entšanga ojnánënga imo-

jsichamo: —¿Chë lempe yojtsetatšëmbcá ndémoca mua tojuatsjinÿe ca? ¿Ntšamo nantsobena chca bëts soyënga jamama ca? <sup>55</sup> ¿Mua ndoñe yondmëna chë calpinterbe uaquiñá y chabe mamá ndoñe María? ¿Mua ndoñe yondmëna Santiago, José, Simón y Júdas-be catšata, <sup>56</sup> y chabe uabëngana ndoñe muentše bëng-gaftaca mondoyena? ¿Ndayentšana lempe chca mua yojtsebomna ca? —chënga imojtsichamo.

<sup>57</sup> Y chë causa chë entšanga tmojanotjayaná y ndoñe imontseboše cha joyeunayana. Pero Jesús tojanéyana: —Nyetsquënachë canye Bëngbe Bëtsabe juabna oye-buambnayá bëtšá jabëmëngana, pero cachabe luar-entše, cachabe yebnentše ndoñe ca.

<sup>58</sup> Chíyeca chentše Jesús ndoñe tonjëftsanma ba bëts soyënga Bëngbe Bëtsabe obenánaca, chë entšanga chábeñe ndoñe montsanošbuaché causa.

### Ntšamo Juan chë Ubayaná tojanóbana

**14** Chë tempo, Rey Herodes, chë Galileoca mandayá tojanuena ntšamo nyetsca entšanga Jesu-cristbiana imojtsichamcá. <sup>2</sup> As cha chabe oservénënga tojanéyana: “Mua Juan chë Ubayaná ctsemna, obanënguentshana tojtayena, chíyeca chca obenana bëts soyënga jamama yojtsebomna ca.”

<sup>3</sup> Juan cabá ainá ora, Herodes tojanmandá cha chamishache, cadenëjuangaca chamobátsëca y chca cárceloye jutámiamá. Herodes chca tojanma Herodías-be causa, chabe catšata Felipe shema. <sup>4</sup> Juan Heródësbioye mëntšá ibnauácacana: “Ndoñe quenát-slesenciana aca acbe catšatbe shëmaftaca jobouamayama, acbe catšata cabá ainá yotsomñe ora ca.”

<sup>5</sup> Y chama Herodes yojtseboše Juan jóbana, pero entšangbiana yojtsauatja, er chënga imnajuabnaye Juan ndegombre Bëngbe Bëtsabe obenánaca yojanoyebuambná ca. <sup>6</sup> Pero Heródësbë cumpleño oboyejuaye ora, Herodíasbe bembe entšangbe delante tojanlantsá y Herodes puerte chama yojtsóyejuaye. <sup>7</sup> Chíyeca Herodes, jajúrase, tbojanšbuachená ndayánaca jatšëtayana, ntšamo tbojotjañcá. <sup>8</sup> Y Herodíasna lempe bémbëbioye ibojabuayená ntšamo Herodes jojuama. As chë bembe tbojanianyana: “Canye šcneniñe Juan chë Ubayanabe bestšaše šmatšëta ca.”

<sup>9</sup> Herodes chë soyama tbojanongmé, pero chë óf-janëngbe delante jajúrase tbojanšbuachená causa, yojamánda chca chaotsemnama. <sup>10</sup> Y as tojanmandá chë Juan yojanëtámenoca chabe bestšaše chamuetséstjanguama. <sup>11</sup> Chentšana, canye šcneniñe chë bestšaše tmojanamba y chë tobiaše tmojanëntšabuaché y chana, chabe mamábioye.

<sup>12</sup> Chentšana, Juanbe ústonënga tmojánashjajna, chabe cuerpo tmojésanocñe y tmojána jauát-bontsama. Y chora, Jesús yojtsemnoye chënga tmojána y chë soyëngama tmojançantá.

### Jesús shachna uaranga boyabásenga saná tojanacaredadó

<sup>13</sup> Jesús chca tojanuena ora, canye barquésshañe tojt-sanoñe canye bèn luaroye, entšanga ndoyena luaroye. Pero entšanga chama imojátatšëmbona y chë pueblënguentshana tmojánbocana shecuátšeca cha juastama. <sup>14</sup> Chentšana, chë barquéschoicana tojtanastjango ora, Jesús ba entšanga tojánanye, chë cha tmojánanguengnga. Chëngbiama tbojanongmë y chë entšanguentshana ba šoquënga tojanashná. <sup>15</sup> Ya jetiñe yojtsemna, chíyeca chë uatsjéndayënga Jesúsbioye tmojanobeconá y tmojanianyana: —Ya jetiñe entsemna y quem luariñe ndocná quenatiyena. Entšanga cuantichamuá, pueblotëmëngoye chamotsoñama, saná chamobuámiñama ca.

<sup>16</sup> As Jesús tojanéjua: —Ndoñe quenátsiyta chënga chamotsatoñama. Tšëngaftanga saná šmochjacaredá-daye ca.

<sup>17</sup> Y chënga tmojanjúá: —Muentše tondaye queft-sátsbomna; ñye shachna tandëse y uta beónata ca.

<sup>18</sup> As Jesús tojanéyana: —Chë soyënga moye miyëbo ca.

<sup>19</sup> Chentšana Jesús tojanmandá entšanga chamoshéntsjatbiama. Chorna, chë shachna tandëse y chë uta beónata tojanca, celoye tojanont-ješé y Bëngbe Bëtsábioye chama tbojtanchuá. Chora chë saná tojanjatá, chabe uatsjéndayënga tojanéjáy-taye, y chëngna ñyetsca entšanga tmojanacaredadó. <sup>20</sup> Ñyetsca entšanga tmojanse jtoshachaye ñyetsá y cabá chë ojamnëtmëngaca bnétsana uta sbarécua tmojanajutjé. <sup>21</sup> Chë tmojansënga imojamna mo shachna uaranga boyabásenga, shembásenga y básenga ntjacuntacá.

### Jesús béjaye juatsbuacá yojtsaye

<sup>22</sup> Chentšana, Jesús chabe uatsjéndayënga tojanamëndá chë barquéschoyë jtamashjnama y chë uafjajónaye chenguánoica chabe natsana jashjajna. Chëntscuana Jesús entšanga yojtichamuá. <sup>23</sup> Ñyetscanga tojtanichamó orna, Jesús canye tjoye tojántsjua canya jtsemnama, Bëngbe Bëtsáftaca jencuëntama. Yojaibétata ora, cha canya chentše yojtsemna, <sup>24</sup> y chë barquésšana tsachocana bënoca yojtsamna. Y chë olëshënga chë barquéssha yojtsájantšetaye, chë binýia chëngbe contra yojtsemna causa. <sup>25</sup> Ya binýanoyna, Jesús chëngbioye yojbeconá; béjaye juatsbuacá yojtsaye. <sup>26</sup> Chabe uatsjéndayënga chca cha tmojáninye orna, tša imojocochauatjaná y puerte auatjanánënga tmojanoyó: —¡Canyë añemëse entsemna ca!

<sup>27</sup> Pero chora Jesús tojanéyana: —¡Añemo šmochtsebomna, atše Jesús sëndmëna; ndoñe matauatjëngana ca!

<sup>28</sup> Chora Pedro, Jesúsbioye tbojanianyana: —Bëngbe Utabná, ndegombre aca tcojtsemnëse, momandá atše béjaye juatsbuacá ácbioye chayá ca.

<sup>29</sup> Y Jesús tbojanianyana: —Mabo ca.

Chora Pedro chë barquéschoicana tojánastjango y tojanontšë béjaye juatsbuacá Jesúsbioye jama. <sup>30</sup> Pero chë binýia tša jabuache yojtsemnama tojáninye ora, Pedro puerte yojtsauatja y tbojanontšë jtsenatjëm-bambana. Chíyeca cha jabuache tojanchembo: —¡Bëngbe Utabná, šmatsbocá ca!

<sup>31</sup> Y cachora Jesús tbojtano buácuëtëntsiye y tbojanianyana: —¡Tša batšatema ošbuachiyá! ¿Ndáyeca ndoñe bëtscá átšbeñe contsošbuaché ca?

<sup>32</sup> Chentšana chë barquéschoyë chata tbojtanamáshëngo y cachora chë binýia bonguana yojtsatsmëna. <sup>33</sup> Y chora, chë barquéschoyë imojtsemnënga Jesúsbe shecuatšëntše tmojanoshamentšë y tmojanianyana: —¡Aca ndegombre Bëngbe Bëtsabe Uaquíñá comna ca!

### Genesaret ca uabáinoica, Jesús ba šoquënga tojanashná

<sup>34</sup> Chë uafjajónaye tmojánenashbuachengo y canye luare Genesaret ca uabáinoye tmojánashajna.

<sup>35</sup> Chentšana entšanga Jesús tmojantëmbá ora, chë luar-entša ñyetsca entšanga chama tmojántatšëmbona. As chë entšanga chëngbe šoquënga Jesúsbioye tmojanënatse. <sup>36</sup> Y imojtseimpadana ñye mo chabe entšayá sibiájuanaca juabojajuama chë šoquënga chaualesenciama. Y ñyetscanga chabe entšayá sibiájua tmojanábojajënga, shnánënga imojtsatoquédaye.

### Ndáyeca canye entšá Bëngbe Bëtsabe delante ndoñe tšabia nántsemna

**15** Chora básefta fariseunga y judiëngbe ley abuá-tambayënga, Jerusalenocana tmojánabënga, Jesúsbioye tmojanobeconá y tmojanianyana: <sup>2</sup> —¿Ndáyeca acbe uatsjéndayënga ndoñe montsama chë ntšamo bëngbe bëtš taitanga monjanamancá ca? ¿Ndáyeca ndoñe ntsacuentšabiana ndayá jasama ora, ntšamo bënga chë judiënga fsënduamancá, Bëngbe Bëtsabe delante tšábënga jtsatsmënama ca?

<sup>3</sup> As Jesús tojanéjua: —¿Y ndáyeca tšëngaftanga ndoñe šmontsama ntšamo Bëngbe Bëtsá tojanmandacá, ñye cach tšëngaftangbe bëtšétsanga imnétsama soyënga jtsamama ca? <sup>4</sup> Bëngbe Bëtsá mëntšá tojanmandá: “Acbe bëtšétsata stëtšoye ndoñe catjáquedaye”, y “nda cachabe bëtšétsatbiama podësca tojóyebuabase, chana jóbanama jtsemnana ca.” <sup>5</sup> Pero tšëngaftanga šmondbétsichamo canye entšá canobena chabe taitá o chabe mamá jauyanana: “Lempe ntšamo sëndbomncá Bëngbe Bëtsá jaserviama entsemna, chíyeca tondaye quetsátsbomna aca juajabuáchama ca”; <sup>6</sup> y šmondbétsichamo ñye ndánaca chca tojayanëse, ya ndoñe ntsemnana chabe taitá o chabe mamá stëtšoye ndoñe ntjaquédana, ni ntjuajabuáchana ca. Y chca, tšëngaftangbiama tondaye ntsámanana ntšamo Bëngbe Bëtsá tojanmandacá, y aíñe šmontsama ntšamo tšëngaftangbe bëtšétsanga imojanamancá. <sup>7</sup> ¡Bacna entšanga, ntšamo ndegombre šmojuabnacá ndinýinýayënga! Ñye tšabá chë

Bëngbe Bëtsabe juabna oyebuambnayá Isaiás tšëngaftangbiama tojanoyebuambá, mëntšá tojánayana ora:

<sup>8</sup> Bëngbe Bëtsá tonjayana: “Quem entšanga mondbétsichamo Bëngbe Bëtsá tša tšabia yomna ca; chca nÿe uayásaca,

pero chëngbe ainanentše atšbiama ndocna tšabe juabnéngaca.

<sup>9</sup> Chënga nÿe bonamente mondbétsichamo: Bëngbe Bëtsá tša tšabia yomna ca;

chënga nÿe entšangbe mandënga jtsabuátambayana y Bëngbe Bëtsabe mandënga ndoñe ca” —cha tojánayana.

<sup>10</sup> Chentšana Jesús entšanga tojánachembo y tojanéyana: —Šmochjouena y chacmésertá. <sup>11</sup> Ndayá entšá tojtšesacá, ndoñe quebochátšbema Bëngbe Bëtsabe delante ndoñe tšabia. Inÿetšá comna: ndayá entšá tojtsejuabná y tojtsoyebuambnacá endobena cha jabemana Bëngbe Bëtsabe delante ndoñe tšabia ca.

<sup>12</sup> Chora chë uatsjédayënga Jesúsbiocyte tmojanobconá y tmojanayana: —¿Quéctsetatšëmbo, ntšamo tconjanayama chë fariseunga ndoñe tšabá chenatëuë-nana ca?

<sup>13</sup> As Jesús tojanéjua: —Ndaye betiye atšbe Taitá celocá ndoñe tonjájese, tbëtëjocana mochántsejashtse. Cachcá echanjama chë nÿe entšangbe buatëmbana soyéngaca. <sup>14</sup> Cachcá mónÿaye; chënga montsemna mo jtanënga inÿe jtanënga unachayëngcá. Y canÿe jtaná inÿe jtaná tbojtsánachase, nÿets útata canÿe tbuabentše bochanjetsótsatše ca —Jesús tojánayana.

<sup>15</sup> Chora Pedro, Jesúsbiocyte tbojanayana: —Ntšamo chë cuento bétsayanama šmabuayená ca.

<sup>16</sup> As Jesús tojanéjua: —¿Tšëngaftángnaca cabá ndoñe cmontsésertana ca? <sup>17</sup> ¿Cabá ndoñe cmontsésertana lempe ntšamo šmojascá uafsbioye jomashënguana y chentšana cuerpentšana jtabocnana?

<sup>18</sup> Pero ntšamo šmojtsoyebuambnacana lempe ainanocana jtsóbocanana y chë soye endobena tšëngaftangbioye Bëngbe Bëtsabe delante ndoñe tšáben-ga jábiamana. <sup>19</sup> Ainanocana jtsóbocanana bacna juabnënga: jenóbama, shema o boyábioye ínÿaftaca jáíngñama, shembása o boyabásaftaca bacna soye jamama, jatbëbama, jobostérama y ínÿabiama jtsayátse-nayama. <sup>20</sup> Chë soyënga cocayé jtsobenana entšábioye Bëngbe Bëtsabe delante ndoñe tšabia jabemama; pero chë ndoñe ntsacuentšabiana ndayá jasama ora, ndoñe ntsobenana Bëngbe Bëtsabe delante ndoñe tšabia jabemama ca —Jesús tojánayana.

**Canÿe shembása inÿe luarocana ashjanganó Jesús-beñe yojtsošbuaché**

<sup>21</sup> Jesús chentšana, Tiro y Sidón luarëngoye tojt-sanoñe. <sup>22</sup> Canÿe shembása Caná luarocá chentše inoyena; cha Jesúsbiocyte yojobeconá y mëntšá yojtšáyebuache: —¡Utahná, Rey Davídbentšana Entšá, šmotse-lastemá! ¡Atšbe bembe puerte entsesufrina, bacna bayëjbe juabna entsebomna causa ca!

<sup>23</sup> Jesús ndocá tbonjanjuá. As chabe uatsjédayënga tmojanobobconá y tmojanimpadá: —Chë shembása mëyana chaotsatoñe; bëngbe ústonoye yapa entsáyebuache ca.

<sup>24</sup> As Jesús tojánayana: —Bëngbe Bëtsá atše šonjich-mó jtsanÿenama nÿe chë entšanga, chë mo ótsëna oveshëngcá imomnënga Israeloquënga, y chë ndoñe judiëngna ndoñe ca.

<sup>25</sup> Pero chë shembása tojána, Jesusbe shecuatšentše tojanoshamentšé y tbojanayana: —¡Utahná! Diosman-da pavor šmotsebema. ¡Šmotsajabuache ca!

<sup>26</sup> Y Jesús tbojanjuá: —Chë judiënga mondmëna mo Bëngbe Bëtsabe basengcá y atše ácbioye tbojuajabuache y chëngbioye ndoñesna, nántsemna mo chë básengbe saná chënga cuaftsëbaquëcá y quešënga ft-sëbuajocá. Chca jamana ndoñe tšabá quenátšmëna ca.

<sup>27</sup> As cha tbojanjuá: —Arseñor. Pero chë quešëngnaca chëngbe nduiñëngbe mesëshentšana tmoj-tatquécjanatemënga mondbase, chë nduiñënga tmojt-sesá ora. Chcasna, Diosmanda šmotsajabuache ca.

<sup>28</sup> Chora Jesús tbojanayana: —¡Shembása, Bëngbe Bëtsabeñe tša ošbuachiyá comna! Ntšamo cojtsebošcá chca chaotsemna ca. Y cach orscana chabe bembe tšabá yojtšatsmëna.

### Jesús ba šoquënga tojanashná

<sup>29</sup> Jesús chentšana tojéftsanbocna y chë Galilea uafjajónaye tsachoye tojána. Chentšana, canÿe batsjoye tojántsjua y choca tojanótbema. <sup>30</sup> Mallajta entšanga Jesús yojtsemnentše tmojánashjaina, y coshetënga, jtanënga, tšabá jobónjuama ndobenënga, ndëbianga y ba šocana bomnënga imojtsënachaye. Jesusbe shecuatšentše tmojanéshejango y cha nÿetscanga tojanashná. <sup>31</sup> Y chca orna, chë entšanga tmojáninÿe: chë ndëbianga imojtsatoyebuambná, chë tšabá jobónjuama ndobenënga tšabá imojtsatsmëna, chë coshetënga tšabá imojtsatana y chë jtanëngna yojt-sëbinÿna; y chama chënga corente ojanánënga imojtsemna. Chora chënga tmojanontšé jëtschuayana chë Israelentša entšanga imojánadorana Bëngbe Bëtsá.

### Jesús canta uaranga boyabásënga saná tojanacaredadó

<sup>32</sup> Chentšana Jesús, chabe uatsjédayënga tojánachembo y tojanéyana: —Quem entšangbiama šontsengmena, er ya unga te chënga átšeftaca muentše montsemna y jasama tondaye quemátsbomna. Atše ndoñe quetsátsboše ntjascá cachëngbe yebnoye chënga jtichamuana, er benachiñe shëntsama nantsabuátëcja ca.

<sup>33</sup> As chabe uatsjédayënga tmojantjá: —¿Ntšamo muatjobenaye quem luarentše, ndocna entšá ndoyenentše, chëfta entšangbiama saná jinÿenama ca?

<sup>34</sup> Y Jesús tojanatjá: —¿Bueta tandëše šmojtsebomna ca?



Y chënga tmojanjuá: —Canýsëfta tandëse y básefta beonatémënga ca.

<sup>35</sup> Chora Jesús tojanamëndá nýetsca entsanga fshantsiñe chamotbiamama. <sup>36</sup> As chë canýsëfta tandëse y chë beonatémënga tojanca; Bëngbe Bët-sábíoye chama tbojtanchuá, chë saná tojanjatá y chabe uatsjédayënga tojanëjatá. Chentsana nýetsca entsángbiyoye tmojanacaredadó. <sup>37</sup> Nýetsca entsanga tmojanse jtoshachaye nýetsá. Y chentsana cabá canýsëfta bëts sbarécua tmojanajutjé chë tojanó-jamëtemëngaca. <sup>38</sup> Chë tmojansënga imojamna canta uaranga boyabásenga, shembásenga y básenga ntjancuntacá. <sup>39</sup> Chentsana Jesús, chë entsanga tojtanichamó, barqués হয়ে tojánamashëngo y Magadán luaroye tojtsanoñe.

### Chë fariseunga y saduceunga tmojánbošena Jesús chaoma canýe bëts soye

**16** Fariseunga y saduceunga tmojána Jesús jinýama, y jisháchichiyama imojtseimpadana canýe bëts soye chaoma, as jtsetatsëmbuama Jesusbe obenana ndegombre Bëngbe Bëtsábíocana tainóbocanama.

<sup>2</sup> Pero Jesús tojanéjua: “Tšëngaftanga jetiñoye šmondbétsichamo: ‘Yëfse tšabe te echántsemna, er celoca buánganiñe entsemna ca.’ <sup>3</sup> Y cachëse šmondbétsichamo: ‘Mënté echanjuafté, er celoca buánganiñe y ibetiñe entsemna ca.’ Tšëngaftanga celoye jontješiyëse, ntšamo chë tempo yochtsemnama tša tšabá jayanama šmojtsoebenëse, ¿ndáyeca ndoñe šmontsobena jtsetatsëmbuana ndaye bëts soye Bëngbe Bëtsá quem tempo cmojtsinýanýnama?

<sup>4</sup> Quem puerte bacna entsanga y ndošbuáchiyënga montseboše atše canýe bëts soye chaima, obenana jinýanýiyama; pero ndoñe chca quemochátinýe, sinó nýe chë ndayá yomna mo chë Bëngbe Bëtsabe juabna oyebuambnayá Jonásoftaca tojanopasá soycá ca” —Jesús tojánayana.

Chora Jesús tojésanabashejuana y chentsana tojtsanoñe.

### Jesús tojanabuayená chë fariseungbe buatëmbana soyëngama

<sup>5</sup> Chë uafjájónaye chenguanoicana chënga tmojtanabo ora, chë uatsjédayënga yojésebnëtjomba tandëse jesocñana. <sup>6</sup> Chora Jesús tojanéyana: —Šmochtsantješna; cuedado šmochtsebomna chë fariseunga y saduceungbe levadurama ca.

<sup>7</sup> Pero chë uatsjédayëngna imojtsenatsëtsnaye: —Chca entsichamo, bënga tandëse ndoñe tmonjesocñama ca.

<sup>8</sup> Jesús chë soye yojtsetátšëmbo; chíyeca mëntsá tojanéyana: —¿Ndáyeca tandëšama šmojtsenatsëtsná ca? ¡Tša batšatema ošbuáchiyana šmobomna! <sup>9</sup> ¿Cabá ndoñe cmontsésertana y ndoñe šmontsabouínýna chë shachna tandëšentsána shachna uaranga entsanga sënjanëjuatšema y bnëtsana uta sbarécua šmonjána-

jutjema? <sup>10</sup> ¿Y ndoñe šmontsabouínýna chë canýsëfta tandëšentsána canta uaranga entsanga sënjanëjuatšema y canýsëfta sbarécua šmonjánajutjema?

<sup>11</sup> ¿Ndáyeca ndoñe cmontsésertana atše tandëšama ndoñe sentsóyebuambnama? Cuedado šmochtsebomna fariseunga y saduceungbe levadurama ca —Jesús tojanéyana.

<sup>12</sup> As chora chë uatsjédayënga tojanësertá, Jesús ndoñe tonjánayana chë tandëšentsá levadurama cuedado jtsebomnana ca, sinó ndayá chë fariseunga y saduceungbe buatëmbana soyëngama.

### Pedro tojánayana, Jesús chë Cristo bëtsemnama

<sup>13</sup> Jesús, Cesarea de Filipino luaroye tojánashjango ora, chabe uatsjédayënga tojanatjá: —¿Nda ca entsanga imojtsichamo chë Bëngbe Bëtsá Entšá tbojanbemá yojtsemna ca?

<sup>14</sup> Chënga tmojanjuá: —Báseftanga montsichamo Juan chë Ubayaná ca, ínýengna Elías ca, ínýengna Jeremías y ínýengna tempsca inýe Bëngbe Bëtsabe juabna oyebuambnayá ca.

<sup>15</sup> As Jesús tojanatjá: —Y tšëngaftangna, ¿nda atše bëtsemnama ntšamo šmochjayana ca?

<sup>16</sup> Chora Simón Pedro tbojanjuá: —Acna chë Bëngbe Bëtsabe Uámana Uabuayaná condmëna, chë Bëngbe Bëtsá Ainabe Uaquiñá ca.

<sup>17</sup> Y Jesús tbojanayana: —Simón, Jonasbe uaquiñá, oyejuayá cochanjoyena. Ndocna quem luarentša entšá chë soye checmatinýinýe, sinó atšbe Taitá, celoca endmëná. <sup>18</sup> Y mëntsánaca cbëyana: Mora acna Pedro o chë ndëtsbecá contsemna, y chë ndëtsbeñe atšbe bëts yebna chanjajebo, y ni Satanás, chabe obenánaca entšá jóbanama, queochatobenaye jtsepochócama.

<sup>19</sup> Atše cbochanjátšetaye obenana, mo llavëfjácá, entsanga Bëngbe Bëtsabe amëndayoye jamashëngua-chamobenama. Bëngbe Bëtsáftaca chacojtsencuénta ora, canýe soye ndoñe chaondëtsemna ca chacojyanëse, Bëngbe Bëtsá cachcá echanjayana. Y cháf-taca chacojtsencuénta ora, canýe soye aíñe chaotsemna ca chacojyanëse, Bëngbe Bëtsá echanjayana aíñe chca chaotsemna ca —Jesús tbojanayana.

<sup>20</sup> Chentsana chabe uatsjédayënga tojanamëndá ndocnábeñe ntsecuëntayana cha, Jesús, chë Bëngbe Bëtsabe Uámana Uabuayaná, chë Cristo bëtsemnama.

### Jesús tojánayana cha ibojamna jóbanana y jtayenana ca

<sup>21</sup> Chorscana Jesús tojanontsé chabe uatsjédayënga jábuayenana cha ibojtsemna Jerusalenoye jama, y chocna chë bëtšëjemëngcá mándayënga, chë judiëngbe bachnangbe amëndayënga y chë ley abuá-tambayënga mochjanma cha puerte chaopadecema ca. Tojanéyana cha mochjanóba, pero unga tianoye yochtanayena ca. <sup>22</sup> Chora Pedro, Jesúsëftaca tojanolaré y tojanontsé mëntsá uatsëtsnayana: —¡Atšbe Utabná, Bëngbe Bëtsá ndoñe chaondëlesenciá chca

chaopasama! ¡Ndocna te quenausopodena chca ácaftaca jopásana ca!

<sup>23</sup> As Jesús tojanobuértana y Pédrëbioye tbojanianyana: —¡Satanás, átšbentšana mojuaná! ¡Aca contseboše atše canye bacna soye chašócochënguama! Pedro, acbe juabnënga Bëngbe Bëtsábiocana ndoñe quenatóbocana, sinó nÿe entsángbentšana ca.

<sup>24</sup> Chentšana Jesús chabe uatsjéndayënga tojanéyana: —Nda atšbe uatsjendayá jtsemnama tojtseboše, cháuyana nÿe Bëngbe Bëtsá yobena sempre chabe vidiñe jtsemándayana ca, chabe quem luar-entša soyënga cachcá chauesonýá atše juastama, y atšbiama jasúfriama chaotseprontana y cruciñe jobanámna. <sup>25</sup> Nda tojtsama quem luarentše bëtscá soyënga jtsebonnama y atšbiama jasúfriama ndoñe tontseprontana, chë nÿetsca tescama yomna tšabe vida echanjopérdia. Pero nda quem luarentša soyënga cachcá tojéftsonýá atše juastama, masque chaóbana, chë nÿetsca tescama yomna tšabe vida echántsebonna. <sup>26</sup> ¿Ndayama entša buanjósérvia nÿetsca quem luarentša soyënga jtsebonnama, chë nÿetsca tescama yomna tšabe vida tojtsoperdese? Ndegombre, canye entša chë nÿetsca tescama yomna tšabe vida tojtsoperdese, ndocna soye quenátsmëna cha chaobená joyiyama, chë nÿetsca tescama yomna tšabe vida jtsebonnama. <sup>27</sup> Chë Bëngbe Bëtsá Entša tbojanbemá, chabe Taitabe obenánaca y puerte buashinÿinÿaniñe echanjabo chabe angelotémëngaftaca, y chora cada cánÿabioye bochántatšetaye cachcá ntšamo cada ona tojéftsemcá. <sup>28</sup> Ndegombre šcuayana: Báseftanga muentše montsemnënga ndoñe quemochatóbana, Bëngbe Bëtsá Entša tbojanbemá amëndayacá jabana ntjéftsinýcá ca —Jesús tojánayana.

### Jesús inÿetšá tojanobinýná

**17** Chentšana chnënguana tianoye, Jesús tojéftsanëbiatše Pedro, Santiago y chabe catsata Juan, y inÿoye tojanënatse nÿe chënga, canye bëtstjoje. <sup>2</sup> Chentše, chëngbe delante inÿetšá cha tojanobinýná. Chabe jubiá shinýcá yojtsebuashinÿinÿana, y chabe uichëtjonéjuangana mo binÿiniñcá uafjantsëjuangá yojtsamna. <sup>3</sup> Chca orna, chabe uatsjéndayënga tmojaninÿe Moisés y Elías tbojanobinýná, Jesúseftaca encuéntaye.

<sup>4</sup> Chora Pedro, Jesúsbioye tbojanianyana: “Bëngbe Utabná, itša tšabá bëngbiama cuanmëna muentše jtsemnana ca! Tcojtsebošëse, unga tambotémënga atše chjapórma: cánÿetema acbiana, inÿetema Moisesbiana y inÿetemna Elíasbiana ca.”

<sup>5</sup> Pedro chca yojtsóyebuambnantscuana, canye buashinÿinÿana jantšetëshe nÿetscanga yojáutsbotse. Y chë jantšetëshoicana canye oyebuambnayana tmojanuena mëntšá: “Mua atšbe bonshana Uaquiñá endmëna, atše chabiana sëntsoyejuá. Cha šmochtseyeuana ca.”

<sup>6</sup> Y chë uatsjéndayënga chca tmojanuena ora, tmojanoshamentšë y jubiaca fshantsóntsoñe tmojanotsejbëna, puerte auatjanánënga. <sup>7</sup> Chora Jesús chabe uat-

sjéndayëngbioye tojanobeconá, tojánabojajo y tojanéyana: “Matëtsbananga; ndoñe matauatjëngana ca.”

<sup>8</sup> Y tsbanánoye tmojanontješë ora, Jesús nÿe canya tmojaninÿe, ndocná inÿa más.

<sup>9</sup> Chë tjocana imojtsatstsmaye ora, Jesús tojanamëndá: —Bëngbe Bëtsá Entša tbojanbemá obanënguentsana candétayenëntscuana, ndocnábeñe chë šmonjinÿe soyama šmattsecuéntaye ca.

<sup>10</sup> As chë uatsjéndayënga Jesús tmojantjá: —¿Ndáyecaca chë ley abuátambayënga mondbëtsichamo, canmëna Elías jabana chë Bëngbe Bëtsabe Uámana Uabayanabe natsana ca?

<sup>11</sup> Chora Jesús tojanéjua: —Ndegombre canya Eliascá natsana echanjabo y ntšamo jtsemnama yomncá, lempe echánjabatsma ca. <sup>12</sup> Pero atše cbëyana, canya mo Eliascá ya tonjabo, entshanga ndoñe chematanotëmbá y cháftaca entshanga tmonjanma lempe ntšamo tmojanbošencá. Y cachcá, chë Bëngbe Bëtsá Entša tbojanbemá entshange cucuatšifne echanjasúfria ca —Jesús tojánayana.

<sup>13</sup> Chora chë uatsjéndayënga tojanësertá, Juan chë Ubayanabiama Jesús chca yojtsëtsëtsnama.

### Jesús, canye bacna bayëja tbojanbojuaná

<sup>14</sup> Entshanga imojtsemnoye chënga tmojtanashjajna ora, canye boyabása tojanobeconá, Jesusbe natsanoica yojshamentšiyey y tbojanianyana: <sup>15</sup> —Utabná, atšbe uaquiñá motselastemá. Cha ataque bontsësháchichana y puerte entsesufrina, er cha inÿe ora iñoye jtseshajayana y inÿe orna, buyeshoye jtsoshbuetšana. <sup>16</sup> Acbe uatsjéndayëngbioye cha sënjuánatse y ndoñe chematobená jtsebošnama ca —cha tbojanianyana.

<sup>17</sup> As Jesús tojánayana: —¡Nÿetšá ndošbuáchiyënga y bacna entshanga ca! ¿Buetayté šojtsemna tšëngaftangaftaca jëftsemnana? ¿Buetayté uantado tšëngaftangaftaca chjëftsemna? Moye chë básetema mánatse ca.

<sup>18</sup> Chora Jesús, chë basetëmbeñe bacna bayëjbioye tbojanácacana y chábentšana cha tojésanbocna. Cach orscana chë básetema tšabá yojtsatsmëna.

<sup>19</sup> Chentšana, chë uatsjéndayënga luaroca Jesúseftaca tmojanoyebuambá y tmojanianyana: —¿Ndáyecaca bënga ndoñe fsënjobená chë bacna bayëja jtabocnama ca?

<sup>20</sup> Y Jesús tojanéyana: —Tšëngaftanga tša batšatema ošbuáchiyana bomna causa. Ndegombre šcuayana: tšëngaftanga batšatema ošbuáchiyana šmojtsebonnëse, masque nÿe mo canye mostaza betiye jenaycá, quem tjoje šmatjayana: “Muentšana mojuaná y choye motsa ca”, quem tjañe chca nanjama, y tšëngaftanga lempe jamama šmattsobena. <sup>21</sup> Pero chca bayëjënga jtëbuacnamna jobenayana nÿe Bëngbe Bëtsáftaca jencuéntase y chama tondaye ntjascá jtsemnëse ca —Jesús tojánayana.

Jesús cachiñe tojánayana cha ibojamna jóbanana y jtayenana ca

<sup>22</sup> Jesús y chabe uatsjédayënga cánÿiñe Galilea lu aroye imojétsaye ora, cha tojanéyana: “Chë Bëngbe Bëtsá Entśá tbojanbemá entsangbe cucuatsiñe mochanjáboshjona, <sup>23</sup> mochanjóba, pero unga tianoye echántayena ca.” Chë causa chë uatsjédayënga puerte ngménaca imojtsemna.

Chë Bëngbe Bëtsabe bëts yebnama impuesto jtsat-squécjnayama

<sup>24</sup> Jesús y chabe uatsjédayënga Capernaumoye tmojánashjajna ora, chë Bëngbe Bëtsabe bëts yebnama entsangbioye impuesto atjanayënga Pédrëbioye tmojána y tmojantjá: —¿Acbe buatëmbayá Bëngbe Bëtsabe bëts yebnama impuesto queonÿbetsatsquécjnaye ca?

<sup>25</sup> Y Pedro tojanéjua: —Aíñe, cha endbetsatsquécjnaye ca.

Chentsana, Pedro chë yebnoye tojánamashëngo ora, Jesús natsana mëntśá chábioye tbojanianyana: —Simón, ¿ntśamo catjajúaboye? ¿Quem luarentśa reyënga ndëmuanÿengbioye impuesto imnétsayëngacaye y crocé-nana imnétsatjanaye: cach luarentśe oyenëngbioye o chë inÿe luarocana ashjajnëngbioye ca?

<sup>26</sup> As Pedro tbojanjúa: —Chë inÿe luarocana ashjajnëngbioye ca.

Y Jesús tbojanianyana: —Chcasna, ndoñe queśnátsmëna chë atśbe Taitabe bëts yebnama impuesto jtsat-squécjnayana ca. <sup>27</sup> Pero ndocná mal chabonduínÿnanamna uafjajónayoye motsa, anzueléjua cochjútšena y chë natsana chaojuásjana beona cochjuábocna. Cochjuayetëfjoná y choye crocé-nana cochanjínÿena y chánaca echanjoshjache atśbiama y acbiama jëtsjájua-ma. Cochjëftsejatsëca y cochjatsboshjona ca —Jesús tbojanianyana.

¿Nda chë más uamaná yomna?

**18** Chentsana chë uatsjédayënga Jesúsbioye tmojanobeconá y tmojantjá: —¿Chë Bëngbe Bëtsábeyeca mandánëngbeñe nda chë más uamaná yomna ca?

<sup>2</sup> Chora Jesús canÿe basetëmbioye tbojanchembo y chëngbe tsëntsaca tbojanatsá. <sup>3</sup> Y tojánayana: —Ndegombre cbéyana, nda mo basetemcá ndoñe tontóbe-ma y ndoñe chacá Bëngbe Bëtsabe soyënga tonjóyëngacñe, cha ndocna te queochatobenaye Bëngbe Bëtsabe amëndayoye jamashënguama. <sup>4</sup> Chca, nda tojtsejuabná canÿe nduamaná yomna y quem basetemcá yomna ca, cha chë Bëngbe Bëtsabe amëndayoca chë más uamaná echántsemna. <sup>5</sup> Y nda átśbeñe osbuachiyá bëtsemnayeca, tbojofja canÿa mo quem basetëmbioycá, chana atśe jofjana ca —Jesús tojánayana.

Resjo yomna, nderado bacna soyënga cuanjama

<sup>6</sup> “Nda canÿe bássetema átśbeñe ośbuachiyábioye tbojaingñé bacna soye jamama, chabiama más tśabá nántsemna canÿe bëts nantsnëbé chamotseta-mošéntsăbua y chë mar béjaye shbuatsëntsoye chamotsashbuetśe chabotsenatjëmbama. <sup>7</sup> ¡Tśa lastema quem luarentśa entsangbiama, chë inÿenga bacna soye jamama chaócochënguama tmojtsamëngbiama! Nÿets tempo chca amënga mochanjëftsemna. Pero, ¡payajema chë inÿa bacna soye chaomama tojtsamá ca!

<sup>8</sup> “Chíyeca, acbe cucuátśeca o acbe shecuátśeca bacna soye tcojamëse, cochtsenástjango y bënnoye cochtsëtśena. Acbiama más tśabá nántsemna celoye jamashënguana chë nÿetsca tescama yomna tśabe vida jtsebomnama, cucuatśe ndbomná o cosheto, y ndoñe nÿets uta cucuátśeca o shecuátśeca chë nÿets tempo echanjesomñe íñeshoye chacmotsëtstjango. <sup>9</sup> Nderado acbe bomínÿeca bacna soye tcojinÿe y cachca soye tcojama, chë bominÿe cochtsenobuchjatsëca y bënnoye cochtsëtśena. Acbiama más tśabá nántsemna, celoye jamashënguana nÿe canÿe bomínÿeca, y ndoñe nÿets uta bomínÿeca infiernoye chacmotsëtstjango, chë bëts íñeshoye ca” —Jesús tojánayana.

Chë ótsëna oveshabiamma cuento

<sup>10</sup> Mëntśánaca Jesús tojánayana: “Ni mo cánÿabioye quem tsëm ośbuachiyënguentsana, chë mo basetemëngcá mondmënënga, mo nduamanacá śmattsonÿaye. Ndegombre cbéyana, chëngbe angelotëmënga celoca, sempre atśbe Taitá celocáftaca mondetsemna ca. <sup>11</sup> Er chë Bëngbe Bëtsá Entśá tbojanbemá tonjabo chë pochocánënga jtsemnama imojtsajnënga jabátsebacama.

<sup>12</sup> “¿Ntśamo tšëngaftanga śmatjajúaboye? Canÿe boyabása patse oveshënga tojtsabamna y ndeolpe canÿe chentśa oveshá tojtsotśe. ¿Chë boyabása ndoñe chë inÿe esconëfta bnétsana y esconëfta oveshënga tjoca cachcá nanjesénÿaye, jama chë ótsëna oveshá jetsenguanguama? <sup>13</sup> Y chë oveshá jetsinÿenama tojobenase, ndegombre chë boyabása más oyejuayá jtsemnana chë ótsëna oveshabiamma, y ndoñe nÿa chca chë inÿe esconëfta bnétsana y esconëfta oveshëngbiama chë ndoñe tmonjanotšëngbiama. <sup>14</sup> Cachcá, tšëngaftangbe Taitá, Bëngbe Bëtsá, chë celoca endmëná, ndoñe quenátsboşe ni canÿa quem basenguentsana mo otšenacá chaotsemna, bacna soyënga jtsamëse oyena causa ca” —Jesús tojánayana.

Ntśamo cuanjama inÿa japerdónama

<sup>15</sup> “Nderado acbe catśata, bacna soye tcmojaborlase, cochjá, cánÿata śochjencuënta y cochjama cha chauenójuaboma, ndegombre bacna soye tcmojaborlama. Cha chacmojóyeunasna, acbe catśata cachiñe tśabá ácaftaca echántsmëna. <sup>16</sup> Pero ndoñe tcmojóyeunasna, inÿe útata cochjáchembo chacmotjëm-

bambama, chca, chata chabouena ntšamo cochjauyanama y chamuayana ndegombre chca yomnama. <sup>17</sup> Y chata ndoñe tonjóyaunase, chentša Bëngbe Bëtsábeñe ošbuáchiyënga macuntá. Y chënga ndoñe tonjóyaunasna, cochjauyana cha yomna mo canya Bëngbe Bëtsábiyoye nduabuatomacá, mo canye ndoñe judiyá ca o canye bacna entšá mo canya Romocama impuesto entšángbiyoye atjanayacá yomna ca.

<sup>18</sup> "Ndegombre cbéyana: Tšëngaftanga Bëngbe Bëtsáftaca chašmojtscuënta ora, chašmojayana canye soye ndoñe chaondëtsemna ca, Bëngbe Bëtsá cachcá echanjayana. Y cháftaca chašmojtscuënta ora, chašmojayana canye soye aife chaotsemna ca, Bëngbe Bëtsá echanjayana aife chca chaotsemna ca.

<sup>19</sup> "Mëntšánaca cbéyana: Nderado útata tšëngaftanguentšana quem luarentše tbojenoyeuná Bëngbe Bëtsáftaca jencuëntama ndayánaca jótjañama, Bëngbe Bëtsá chë celoca endmëná pronto chë soye cmochanjátšataye. <sup>20</sup> Ndayentše útata o únganga tmojénefjna, átšbeñe ošbuáchiyënga bëtsemnama, chentše atše chëngbe tsëntsaca chántsemna ca" —Jesús tojánayana.

<sup>21</sup> As Pedro tojána y Jesúsbiyoye tbojantjá: —Bëngbe Utabná, ¿atšbe catšata bacna soye šojaborlase, bueta soye šojtsemna cha japerdónana? ¿Canysëfta soye ca?

<sup>22</sup> Y Jesús tbojanjúá: —Ndoñe nye canysëfta soyama quecbatatsëtsná, sinó canysëfta bnëtsana soye canysëfta ca.

### Ndayá inopása chë japerdónama ndëbošëngaftaca

<sup>23</sup> Mëntšánaca Jesús tojanéyana: "Cbochanjúyana ntšamo Bëngbe Bëtsabe amëndayana yomnana. Endmëna ntšamo canye réyefraca tojanopasacá. Cha yojábošena chabe oservénënga crocénana jtsëtjañana.

<sup>24</sup> Jtsëtjañama yojóntša orna, canye boyabása imojúanatse, chë réybiyoye mallajta crocénana ibnandebena.

<sup>25</sup> Chë oservená tondaye yonjábomna chë ndebénama jëtsjájuama; asna chë rey yojamánda cha chamotsiye nyets tempo nye ín'yabiama chaotsoservénama, chabe shema y chabe básengnaca, y lempe ntšamo yojanbomncánaca, y chca chë ndebénama jtopágama.

<sup>26</sup> Chora chë oservená chë reybe shecuatšëntše yojoshamentšiye y ibojtseimpáda: 'Taita, Diosmanda šmotsëuantajema. Atše lempe cbochanjëtšëntšabuachiye ca.' <sup>27</sup> Chë reyna chë boyabásabiama ibojóngmia; as chë ndebénana ibojtseperdóna y ibojëtsboshjona.

<sup>28</sup> "Chë oservenana chentšana yojésebozna y benachiñe nyë oservénáftaca ibojenbetše, cach mandabiama trabajayá. Chë nyë oservenana nye batšatema crocénana chábíoye ibnandebena. Chora chë oservená chë enutábíoye tamošajentšana ibojishache y ibojóntša jtsëtajuashbebiama y mëntšá ibojauyana: '¡Ndebénana šmatsëntšabuaché ca!' <sup>29</sup> Chora cha chë oservenabe shecuatšëntše yojoshamentšiye y ibojtseimpáda: 'Diosmanda šmotsëuantajema. Atše lempe cbochanjëtšëntšabuachiye ca.' <sup>30</sup> Pero chë oservená ndoñe yonjábosena, sinó yojama chë nyë oser-

venábíoye cárceloye chamotsëtámíama, chë ndebénana candëtsjájëntscuana. <sup>31</sup> Chë nyë oservénënga chca imojinyë ora, puerte yojóngmia y imojá lempe ntšamo yojopasacá chëngbe rey jacuëntama. <sup>32</sup> As chë rey yojamánda chë boyabása jobetšana, y ibojauyana: '¡Puerte bacna oservená! Šconjaimpadáyeca, nyets ndebénana tcbontseperdoná. <sup>33</sup> Acnaca cachcá cmondmëna chë cach aquëcá muentša trabájayabiama jóngmiana, ntšamo atše acbiama šonjongmecá ca.' <sup>34</sup> Y tša chë rey ibojtsetna; as yojamánda jabuache chamotsetsetšená nyets ndebénana candëtsjájantscuana ca" —Jesús tojanacuntá.

<sup>35</sup> Chora Jesús tojánayana: "Atšbe Taitá, celoca endmëná, cachcá tšëngaftangaftaca echanjama, tšëngaftangbe catšata ndoñe ndegombre nyets ainánaca šmonjaperdonase ca."

### Ndayá Jesús tojanabuatambá chë bouamnënga tmojtšëntšënama

**19** Chë soyënga tojánayanentšana, Jesús Galilea luarentšana tojtšanoñe y Judeoye tojánashjango, Jordán chenguánoica. <sup>2</sup> Ba entšanga tmojanasto y chentše šoquënga tojanashná.

<sup>3</sup> Básefta fariseunga Jesúsbiyoye tmojanobeconá y jisháchichiyama mëntšá tmojantjá: —¿Queojtselesenciana canye boyá nye ndayámnaca chabe shëmbíoye cachcá jesonýayama ca?

<sup>4</sup> As Jesús tojanéjua: —¿Tšëngaftanga ndoñe chë Bëngbe Bëtsabe uabemana palabrenguiñe šmëndualía, Bëngbe Bëtsá, chë entšanga tojanabiamá, quem luare jobojátšama ora "boyá y shema tojánabiamama"? <sup>5</sup> Y Bëngbe Bëtsá tojánayana: "Chíyeca boyabása chabe taitá y chabe mamá echanjésabashejuana, chabe shëmaftaca jenútanama, y chë útata mo canyacá bochántsemna ca." <sup>6</sup> Y chca, ya ndoñe útata quebochátšmëna, sinó mo nye canyacá. Chcasna, entšá ndoñe chaondëndbema ndayá Bëngbe Bëtsá mo canyiñcá tojëftsema soye ca —Jesús tojánayana.

<sup>7</sup> Chora chë fariseunga tmojaniyana: —¿As, ndáyeca Moisés tojanmandá, chë shëmbíoye canye uabemana tsbuanácha juiyiyana jtsenëtšënama y cachcá jesonýayana ca?

<sup>8</sup> Y Jesús tojanéyana: —Tšëngaftanga Bëngbe Bëtsabe mandënga jýëngacñama ndoñe quešmátsboše causa, Moisés tcmojanalesenciá shëmbíoye jesëtšënama. Pero quem luare jobojátšama orna, ndoñe chca quenjatsmëna. <sup>9</sup> Atše cbéyana, nda chabe shëmaftaca tbojtšëntšëna y chca tojopasá ndoñe chë shema chabe boyábíoye ín'yaftaca tbontseingñé causa, y chë boyá ín'yaftaca tojtóbouamasna, cha chë natsana shëmbíoye ín'yaftaca jtseingñayana ca —Jesús tojánayana.

<sup>10</sup> Chora chabe uatsjëndayënga tmojaniyana: —Chca chë boyá y shëmaftaca tojtsemnëna, ndoñe tšabá yontsemna jobouamayana ca.

<sup>11</sup> Y Jesús tojanéyana: —Nyetscanga ndoñe quemátobena chë palabrenga jýëngacñana, nye chë Bëngbe Bëtsá tojama jýëngacñama chamobenama, chëngna

aíñe. <sup>12</sup> Ba soyënga comna ndaye causa chë boy-abásenga ndoñe ntsoobenana jobouamayana. Inyënga jónyñana jobouamayama ndobenënga, ín'yëngbioye cach entšanga jábiamana jobouamayama ndobenënga y ín'yëngna, nyëts tempo nye Bëngbe Bëtsabe amëndayama oservena causa ca —tojanéyana.

### Jesús, basetémëngbiama Bëngbe Bëtsábioye tbojanimpadá

<sup>13</sup> Entšanga basetémënga Jesúsbioye tmojanënatse, cha chauabojauama y Bëngbe Bëtsábioye chëngbiama chaboimpadama. Pero chë uatsjédayëngna tmojanontsé chë basetémënga unachayënga jtsécácanana. <sup>14</sup> Chora Jesús tojanéyana: “Cachcá mónyaye chë basetémënga átšbioye chamuabo y ndoñe matéuyanana; er Bëngbe Bëtsabe amëndayana endmëna mo quem basetémëngcá imomnëngbiama ca.” <sup>15</sup> As chë basetémënga tojánabojajo, Bëngbe Bëtsá jaimpádash; y chentšana cha tojtsanoñe.

### Canye bomna bobontse Jesúsbioye tojána

<sup>16</sup> Chentšana, canye boyabása tojána Jesús jin'yama y mëntšá tbojantjá: —Buatëmbayá, ¿ndaye tšabe soye chjama chë nyëtsca tescama yomna tšabe vida jtsebomnama ca?

<sup>17</sup> Y Jesús tbojanjuá: —¿Ndáyeca chë tšabe soye ndayá bëtsemnama šcojtsetjaná ca? Tšabia nye canya endmëna: Bëngbe Bëtsá. Aca chë nyëtsca tescama yomna tšabe vida jtsebomnama tcojtsebošëse, mandënga cochtsobedecena ca.

<sup>18</sup> Chora chë bobontse tbojantjá: —¿Ndaye mandënga ca?

Y Jesús tbojanjuá: —“Ndoñe catjóba, acbe shema ín'yaftaca ndoñe cattseíngñaye, ndoñe catjatbëba, ndoñe catjuaboín'yena. <sup>19</sup> Acbe bëtsétsata stëtšoye ndoñe catjáquedaye y ndëmua entšánaca cochtsebobonshana ntšamo cach aca cuenobobonshancá ca” —Jesús tbojanijana.

<sup>20</sup> Chora chë bobontse tbojanjuá: —Atše lempe chca nyëts tempo sëndocumplina. ¿Ndayá más šojtsebuáshbena ca?

<sup>21</sup> As Jesús tbojanijana: —Aca lempe tšabá jamama tcojtsebošëse, motsa, acbe bomna soyënga cochjetsatobuiye y chë crocénana, ndbomnëjémënga cochjetsatayaye; chca, bëts uacanana soye celoca cochántsebomna. Chentšana cochjabo y šcochjuasto ca.

<sup>22</sup> Chë bobontse chca tojanuena ora, ngmëna yojtsatoñe, cha corente bomná bemna causa.

<sup>23</sup> Chora Jesús chabe uatsjédayënga tojanéyana: —Ndegombre cbéyana, puerte totcá entsemna canye bomnabiama Bëngbe Bëtsabe amëndayoye jamashënguama ca. <sup>24</sup> Chë bomnabiama cachiñe šcuatayana: Más paselo entsemna canye camello chë coshuffjentsá atëfjnëjana chauachnëngo, y ndoñe canye bomná Bëngbe Bëtsabe amëndayoye jamashënguana ca.

<sup>25</sup> Chabe uatsjédayënga chca tmojanuena ora, puerte ojanánënga imojtsemna y imojtsichamo: —As, ¿nda yochjobenaye atsbočaná jtsemnama ca?

<sup>26</sup> Jesús chënga tojanënyañe y tojanéyana: —Entšanga ndoñe quemátobena jamama canya atsbočaná chaotsemnama, pero Bëngbe Bëtsá aíñe, er cha nyëtsca soyënga jamama endobena ca.

<sup>27</sup> Chora Pedro tbojanijana: —Aca contsonyá, bënga lempe chë fsëndbomna soyënga fsënjésebošhona y ácaftaca fsëntsajna. As, ¿ndayá bënga fchjójyëngacñe ca?

<sup>28</sup> As Jesús tojanéyana: —Ndegombre cbéyana, nyëtsca quem luarentša soyëngama mo tsmëcá jtsemnama tempo chaojobuache ora, chë Bëngbe Bëtsá Entšá tbojanbemá chabe buashin'yñana bëts tšenëšiñe reycá echanjót'bema jtsemándayama; y tšëngaftanga, chë atše šmëstonëngna, chora bnëtsana uta uámána tbemaniñe šmochanjót'bema mo reyëngcá, chë Israeloca bnëtsana uta bëts pamillentsá entšangbiama jayanama tšabá o ndoñe tšabá tmonjamama.

<sup>29</sup> Y ndëmuan'yënga, atše jasërviamama tmojëftsebošhona cachëngbe yebna, catšátanga o uabëngana, befta o bebmá, básenga o fshantsënga, chë soyëngama patse soye más mochanjójyëngacñe y chë nyëtsca tescama yomna tšabe vídnaca. <sup>30</sup> Pero banga mora uámanënga imomnënga, nduámanënga mochántsemna; y banga mora nduámanënga imomnëngna, uámanënga mochántsemna ca —Jesús tojánayana.

### Chë trabájayëngbiama cuento

**20** Mëntšánaca Jesús tojánayana: “Bëngbe Bëtsabe amëndayana endmëna mo canye bëts jajañe nduiñcá. Chë nduiñna canye te cabá cachëse yojábocna peonga janguanguama, chabe uvas betiyënga jajañe chamotrabajama. <sup>2</sup> Chë nduiño peonga yoján'yena orna, imojenóyeunaye canye tescama canye denario crocénana jtëbuéñayama. As chora yojichamuá chë uvas betiyënga jajoye jatrabájama. <sup>3</sup> Mo base mošenana ora, chë nduiño cachiñe yojábocna y plazoca atsanënga ín'yënga yojanye, tondaye ntsamcá. <sup>4</sup> As yojáuyana: ‘Tšëngaftángnaca atšbe uvas betiyënga jajoye motsajna jatrabájama y ntšamo chašmojamcá cbochtëbuéñaye ca.’ Y chë entšanga imojá. <sup>5</sup> Nyëtsto ora y bëts mošenana ora, chë nduiño cachiñe yojábocna y cachiñe cachcá yojopása. <sup>6</sup> Mo la cinco ora, chë nduiño cachiñe yojábocna y chenache ín'yënga yoján'yena, tondaye ntsamcá. As yojátjaye: ‘¿Ndáyeca tšëngaftanga nyëts día ntjatrabajacá muentše šmot-somñe ca?’ <sup>7</sup> Y chënga imojojúá: ‘Ndocná bënga cheš-nataimpadá causa ca.’ As chë nduiño yojáuyana: ‘Tšëngaftángnaca atšbe uvas betiyënga jajoye motsajna jatrabájama y cbochtëbuéñaye ca.’

<sup>8</sup> “Y ya bien jetiñe yojtsemna orna, chë nduiño chabe caporálbioye ibojauyana: ‘Peonga metsachembo y cochtëbuéñaye. Chë ústonoye tmojášhajnënguentsana cochjabojátša y chë natsana tmojášhajnënga ústonoye ca.’ <sup>9</sup> Y chë mo la cinco ora imojášhajnënga imojobeconá, y cada ona canye denario crocë-

nana yojtáyentšbuachiye. <sup>10</sup> Chentšana, chë natsana jatrabájama imojáshjajnënga yojtsamna jobéconama y chënga imojétsejuabnaye más crocénana moch-janóyëngacñe ca. Pero chëngnaca cach canye denario crocénana yojtëbuénaye. <sup>11</sup> Chca imojóyëngacñe orna, chënga imojóntša chë nduiñbiana bacá ichámuana, <sup>12</sup> mëntšá: 'Quemënga chë ústonoye tmonjashjajnënga nye canye horatema tmonjatrabajá; ntšamo bënga š-contëbuenaca, cachcá chënga contëbuená y bëngna nyets día jabuache fsënjatrabajá y corente jënýá fsën-jauantá ca.'

<sup>13</sup> "Pero chë nduiño canya chca yojtsichamuábioye ibojojuá: 'Sobre, acbiana ndocna ndoñe tšabe soye chiyatsma. ¿Ndoñe canye denario crocénana canye tescama tbonjenoyeuná ca?' <sup>14</sup> Chcasna, acbe uacanana crocénana mesocñe y motsatoñe. Atše séntseboše chë ústonoye jatrabájama tojashjanguá jtabuénayana, cachcá ntšamo aca tchojtabuenacá. <sup>15</sup> Chca entsemna, er atše sëndobena atšbe crocénana nye ndayánaca jamana. ¿O aca envidia cojtsebomna, atše tšabia tsmënana ca?' " —cha yojayana.

<sup>16</sup> Chora Jesús tojánayana: "Y chca, chë nduámanënga imomnënga, uámanënga mochántsemna; y chë mora uámanënga imomnënga, nduámanënga mochántsemna ca."

### Jesús cachiñe tojánayana cha jóbanama y jtayenama

<sup>17</sup> Chënga Jerusalenoye imojtsaye ora, Jesús barie tojánachembo chabe bnëtsana uta uatsjëndayënga y tojanéyana: <sup>18</sup> "Tšëngaftanga šmontsonýá mora bënga Jerusalenoye montsajnama. Chocna chë Bëngbe Bëtsá Entšá tbojanbemá, chë bachnangbe amëndayënga y ley abuátambayëngbe cucuatšiče mochanjáboshjona, y chënga mochanjayana jóbanama cha ibojtsemna ca, <sup>19</sup> y chë ndoñe judiëngbe cucuatšiče mochanjáboshjona chënga chamotsáboyejuanama, chamotjantjama y chamocrucificama. Pero unga tianoye cha echántayena ca" —Jesús tojánayana.

### Chë Santiago y Juanbe mamabe impadana soye

<sup>20</sup> Chentšana, Zebedeobe uaquiñatbe mamá chabe uaquiñátaftaca Jesúsbioye tojanobeconá, chabe shecuatšentše yojoshamentšiče canye pavorama jaimpádama. <sup>21</sup> As Jesús tbojantjá: —¿Ndayá cojtseboše ca?

Y chë shembása tbojanijana: —Aca reycá chacojtsemándanda ora, cochjamándanda atšbe uaquiñata chabótbema canya acbe catšbioica y chë inya acbe uañicuayoica, ácaftaca chabotsemándama ca.

<sup>22</sup> Y Jesús tojanéjua: —Ntšamo šmontsotjanañama, tsëndata ndoñe quešnátstatšëmbo ca. Ntšamo atše chjasufriacá, ¿tsëndátnaca cachcá jasúfriama tašatjobenaye ca?

Y chata tbojanjuá: —Aíñe, fchanjobenaye ca.

<sup>23</sup> Chora Jesús tojanéjua: —Ndegombre, tsëndátnaca atšcá šochanjasúfria, pero atše ndoñe quetsátobena jamándana atšbe catšbioica o atšbe uañicuayoica

chašótbemama. Chë útentše entsemna ndë-muanýëngbiana atšbe Taitá tojaprontacá ca.

<sup>24</sup> Chë inye bnëtsana uatsjëndayënga chca tmojanuena ora, chë uta catšátaftaca tmojanotjayaná. <sup>25</sup> Chora Jesús chë uatsjëndayënga tojánachembo y tojanéyana: —Tšëngaftanga šmondëtatšëmbo, chë ndoñe judiëngbeñe chë reyënga lempe jtsemándayana nya mo nduiñënga cuaftsemncá; y chë bëtsëtsa entšangna chëngbe obenánaca jtsemándayana, ndayánaca jt-samëse, chë inye entšanga sempre chamotsayaunama. <sup>26</sup> Pero tšëngaftangbeñina ndoñe chca chaondëtsëmna. Inyetsá; masna, nda tšëngaftanguentše chë más uamaná jtsemnama tojtsebošá bontsemna chë inyënga jtsaservénana. <sup>27</sup> Y ndánaca tšëngaftanguentšá chë más uamaná jtsemnama tojtsebošá bontsemna jtsemnana mo nye inyabiama nyets tempo oservenacá. <sup>28</sup> Cachcá, chë Bëngbe Bëtsá Entšá tbojanbemá ndoñe chenátabo cha chamotseservénama, ndayá inyënga jabáserviama. Y mo nda inyënga játsebacama cuafjëtšajocá, cha echanjóbana, ba entšanga atsebácanënga chamotsemnama ca —Jesús tojánayana.

### Jesús uta jtanata tojanashná

<sup>29</sup> Chënga, Jericó bëts pueblentšana tmojánbocana ora, ba entšanga Jesús imojtséstona. <sup>30</sup> Uta jtanata benache juachañe ibnatbemana. Jesús chëjana yojtsach-nëjuanama chata tbojanuena ora, tbojanontšë uayebuáchana: —¡Utabná, Davídbentšana Entšá, š-motsalastemá ca!

<sup>31</sup> Entšanga chë jtanátbioye tmojtsanëcácana iyteca chabotsemnama, pero chatna más ibojtsáyebuache: —¡Utabná, Davídbentšana Entšá, šmotsalastemá ca!

<sup>32</sup> As Jesús yojotsaye, chë jtanata tojánachembo y tojanatjá: —¿Ndayá šojtseboše atše tsëndatbiana chjamama ca?

<sup>33</sup> Y chata tbojanjuá: —Utabná, bëndata chabu-atëbínýnama ca.

<sup>34</sup> Jesús chatbiana tbojanongmé y tojánabuchbojajo. Chachora chë jtanata tšabá yojtëbinýna y Jesús tmojanasto.

### Jesús Jerusalenoye tojánashjango

**21** Ya Jerusalenoca béconana imojtsemna y canye pueblo Betfagé ca uabáinoca tmojánashjango, canye tjashe Olivos ca uabáinentše. Chora Jesús uta chabe uatsjëndayata tojanichamó, <sup>2</sup> y mëntšá tojanéyana: "Tsëndatbe natsana entsemna base pueblotémoye motsata. Chachora canye burrá utsbuaná šochanjínýena y cháftaca canye burrotema echántsemna. Šochjuajafjoná y šochjuánatse. <sup>3</sup> Nderado nda ndayánaca chacmojáuyanëse, šochjauyana: 'Bëngbe Utabná bontsájaboto y chentšana camuentše echanjabáisabashejuana ca.' "

<sup>4</sup> Chca tojanopasá, cachcá chaotsemnama ntšamo chë Bëngbe Bëtsabe juabna oyebuambnayá tojanayancá. Cha mëntšá tojanábema:

<sup>5</sup> Jerusalén bëts pueblentše oyenënga méyana: “Minyënga, tšëngaftangbe Rey chentše tšëngaftangbiöye entsabó, ndoñe mo canya cachá bëtsá enobiamnayacá; canye búrrbeñe enjaquená; canye burrotémiñe, canye uatrabájaye bayabe šeshónbeñe ca.”

<sup>6</sup> Chora chë uatsjédayata tbojána y tbojanma ntšamo Jesús tojanamëndacá. <sup>7</sup> Chë uatsjédayatna chë burrá y chë burrotema tmojanënatse, entšayëjuangá chátbeñe tbojanátatse y chora Jesús chábeñe tojanenoyagé. <sup>8</sup> Bëtsá entšanga chëngbe entšayá chë benachëjana imojtsëtëtsatsana, y inyënga betiyeshënguñe buacuafjënga imojtsetcoye y chiñe imojtsequëcjná. <sup>9</sup> Y chë natsana imojtsajñënga y chë ústonoyënga mëntšá imojtsaiuáyebuache: “¡Rey Davidbentšana Entšá matschuanga ca! ¡Corente bendición bomná, chë Bëngbe Utabnabe obenánaca tojabá! ¡Bëngbe Bëtsá celocá matschuanga ca!”

<sup>10</sup> Jesús Jerusalenoye tojánamashëngo ora, nyetsca entšanga imojtsenbouenana y banga imojtsenotíciaye: —¿Nda mua yojtsemna ca?

<sup>11</sup> Y chë entšanga imojtsëjuana: —Chë Bëngbe Bëtsabe juabna oyeuambnayá Jesús, chë Galileoca pueblo Nazaretocá ca.

### Jesús, Bëngbe Bëtsabe bëts yebnentšana enënga y obuámnyënga tojtanëbuacna

<sup>12</sup> Chentšana Jesús, Bëngbe Bëtsabe bëts yebnoye tojánamashëngo y chë entšanga chentše imojtsena y imojtsobuámnañënga chentšana tojtanëbuacna. Chéntšnaca imojtsemna entšanga canye crocénana enënga, y chë crocénana nye Bëngbe Bëtsabe bëts yebnentšama inoservena. Chëngbe mesëshangá tojtšananásatajchquëca y chë palomatema enëngbe tšenëšëgnaca. <sup>13</sup> Y tojanéyana: “Bëngbe Bëtsabe uabemana palabrënguñe cha mëntšá tojánayana: ‘Atšbe bëts yebna echantsabaina átšeftaca encuëntaye yebna ca’; pero tšëngaftangna, atbëbanëngbe oyeñe chë yebna šmojtsebema ca” —Jesús tojanéyana.

<sup>14</sup> Chentšana, Jesús yojtsemnoye Bëngbe Bëtsabe bëts yebnentše, jtanënga y coshetënga tmojanobeconá, y cha tojanashná. <sup>15</sup> Chë bachnangbe más uámana amëndayënga y ley abuatambayënga, Jesús bëts soyënga yojtsamama tmojáninye ora, y chë basetëmënga Bëngbe Bëtsabe bëts yebnentše imojtsayebuáchama tmojanuena ora, tša tmojanotjáyana. Chë basetëmënga mëntšá imojtsáyebuache: “¡Chë Rey Davidbentšana Entšá matschuanga ca!” <sup>16</sup> As Jesús tmojaniana: —¿Ntšamo chë basetëmënga montsichamcá quequetsuenana ca?

Y Jesús tojanéjua: —Añe, sentsuenana. Pero, ¿tšëngaftanga Bëngbe Bëtsabe uabemana palabrënguñe chë soyama ndoñe šmëndualía? Chiñe mëntšá endayana:

Chë basetëmënga y ochóchaye šeshonatëmëngbe cantëngaca

aca tcojama entšanga chacmotsatschuanama ca.

<sup>17</sup> Chora Jesús chënga tojésanabashejuana y Jerusalenentšana Betania puebloye tojtsanoñe; y chentše chë ibeta tbojánbobinyna.

### Jesús tojánayana canye higo betiye ndoñe más chaondëshájona ca

<sup>18</sup> Chë te cachëse, Jesús cach bëts puebloye yojtésa ora, tbojánishëntsena. <sup>19</sup> Chora canye higo betiye benache juachaca yojinye; as choye yojobeconá, pero nye ena tsbuanáchënga chiñe yojinyna. As Jesús chë higo betiyoye tojánayana: “¡Ndocna te más chacondëshájona ca!” Y betsco chë higo betiye tojtsanbuashá.

<sup>20</sup> Chë uatsjédayënga chca tmojáninye ora, imojenjnaná y Jesús tmojantjá: —¿Ntšamo chca chë higo betiye canye ora tojtsebuashá ca?

<sup>21</sup> Y Jesús tojanéjua: —Ndegombre cbéyana, tšëngaftanga Bëngbe Bëtsabeñe ošbuáchiyana šmojtse-bomna y chabiamana ainaniñe ndoñe inyetsá šmonjät-sjuabnase, šmochantsobena jamama ndoñe nye ntšamo atše quem higo betiyeca sënjamcá, sinó quem tjoye, “muentšana mojuaná y uafajónayoye moshbuetše ca” šmojayanëse, chca jochnënguana. <sup>22</sup> Y Bëngbe Bëtsáftaca chašmojtscuënta ora, chábeñe jtsošbuáchiyëse, lempe ntšamo chašmojtjañcá šmochanjóyëngacñe ca —Jesús tojánayana.

### Jesusbe obenana

<sup>23</sup> Chca tojanopasá chentšana, Jesús Bëngbe Bëtsabe bëts yebnoye tojánamashëngo. Chentše yojtsabuá-tambantscuana, bachnangbe amëndayënga y judiëngbeñe bëtsëjemëngcá amëndayënga tmojanobeconá y tmojantjá: —¿Ndaye deréchoca chë contsama soyënga aca cojtsama ca? ¿Chca jtsamama nda mando tcmënjatštá ca?

<sup>24</sup> As Jesús mëntšá tojanéjua: —Atšnaca canye soye séntsebomna tšëngaftanga jatjayama, y quešmojuase, átšnaca cbochjáuyana ndaye deréchoca atše chca stsama. <sup>25</sup> ¿Nda Juan chë Ubayaná tbojanichmó entšanga jubáyama, Bëngbe Bëtsá o entšanga ca? —Jesús tojanéyana.

Chama chënga tmojanontsé mëntšá enatsët-snayana: “ ‘Bëngbe Bëtsá ca’ chamojuase, cha šochanjáuyana: ‘As, ¿ndáyeca chë tcmojanabuayená soyënguñe ndoñe šmonjanošbuaché ca?’ <sup>26</sup> Pero ndoñe quemúatobena jayanana ‘entšanga ca’; muentša entšangbiama bënga montsautja, er nyetscanga mondëjuabná Juan ndegombre Bëngbe Bëtsabe juabna oyeuambnayá yomna ca.” <sup>27</sup> Chcasna chënga Jesús tmojanjuá: —Bënga ndoñe queftsátstatšëmbo ca.

Y as Jesús tojanéyana: —Atše cach ndoñe quebochatéyana ndaye deréchoca chca stsama ca.

### Chë uta uaquiñátbiama cuento

<sup>28</sup> Chora Jesús entšanga tojanatjá: —¿Ntšamo tšëngaftanga quem soyama šmatjayana? Canye boyabása

uta uaquiñata yojánabamna, y cán̄yabioye ibojauyana: “Uaquiñá, mēnté motsa at̄sbe uvas betiyēnga jajoje jatrabájama ca.”<sup>29</sup> Chē uaquiñá ibojojuá: “¡Jama ndoñe quetsátsboše ca!” Pero botamana yojenójuaboje y pronto choye yojá.<sup>30</sup> Chent̄šana chē taitá chē in̄ye uaquiñábioye cachcá ibojauyana. As cha ibojojuá: “Arseñor, aíñe chanjá ca.” Pero ndoñe yonjá.<sup>31</sup> ¿Chē útatent̄šana ndēmuan̄yá tojanma nt̄samo chē taitá yojabošcá ca? —Jesús tojanatjá.

Y chēnga tmojanjuá: —Chē natsaná ca.

Chora Jesús tojanéyana: —Ndegombre cbéyana, chē Romocama ent̄sángbioye impuesto atjanayēnga y chē bacna vida bomna shembásenga, t̄sēngaftangbiama más montseprontana Bēngbe Bētsabe amēndayoye jamashēnguama.<sup>32</sup> Juan chē Ubayaná tonjánabo t̄sēngaftanga jábuayenama nt̄samo jtsiyenana cmamnama, nt̄samo Bēngbe Bētsá yobošcá, y t̄sēngaftanga chē tcmojanabuayená soyēnguiñe ndoñe chešmatanošbuaché; y chē cuenta, chē Romocama ent̄sángbioye impuesto atjanayēnga y bacna vida bomna shembásengna aíñe chábeñe montsanošbuaché. Y t̄sēngaftanga, masque nt̄samo chēnga Bēngbe Bētsábeñe imojtsošbuáchema lempe šmojin̄yēse, chē juabnayana ndoñe šmonjatrocá, chábeñe jtsošbuáchiyama ca —cha tojanéyana.

### Chē puerte bacna trabájayēngbiama cuento

<sup>33</sup> Mēnt̄sánaca Jesús tojanayana: “In̄ye cuento šmochjatuena chašmuatsjín̄yama: Can̄ye jajañe nduiño uvas betiyēnga yojáje y chē shéconana yojajétja. Chē uvasēšangá juantsétetjamna can̄ye base luare yojajutjo y can̄ye tsbanana jebna soye yojapórma chent̄še jtsaishan̄yama. Chent̄šana, in̄ye trabájayēnga chē jajañe yojárrendaye y chana in̄ye luaroye yojtsoñe.

<sup>34</sup> Chē uvasēšangá juashacama tempo yojobuache orna, chē jajañe nduiño básefta oservénēnga yojichamuá chē arrēndayēnga jáuyanama ntsachet̄sá chē nduiño ibojtsotocánama.<sup>35</sup> Pero chē arrēndayēngna chē oservénēnga imojishēche: in̄yēngbioyna imojtsajant̄setaye, in̄yēngbioye imojtsēbaye y chē in̄yēngbioyna ndēt̄sbēngaca imojtsatēchénganja.<sup>36</sup> As chē jajañe nduiño chē natsanama más ba oservénēnga yojichamuá. Pero chē arrēndayēngna, nt̄samo chē natsanēngaftaca imojamcá, cachcá chora imojama.

<sup>37</sup> “Cabana, chē jajañe nduiño cachabe uaquiñá ibojíchmua; as mēnt̄sá yojtsejuabnaye: ‘At̄sbe uaquiñá cocayé mochanjóyeunaye ca.’<sup>38</sup> Pero chē arrēndayēnga chē uaquiñá imojin̄ye orna, imojeniayana: ‘Mua chē fshantse nduiñbe uaquiñá entsemna. Lempe chabe soyēnga mua echanjóyēngacñe. Cuajna, motsóbanga y lempe chabe otocana soyēnga bēngbiama echanjóquéda ca.’<sup>39</sup> As chē uaquiñá imojishache, chē uvas betiyēnga jajañent̄šana imojtsábocna y imojtsóba.”

<sup>40</sup> Chca jacuéntama tojanpochocá orna, Jesús tojanayana: —Y morna, chē jajañe nduiño chaojabo ora, ¿nt̄samo šmojtsejuabná chē arrēndayēngaftaca cha yochjama ca?

<sup>41</sup> Y chēnga tmojanjuá: —Chē puerte bacna arrēndayēnga ni mo bat̄satema nt̄jalastemaycá echantsēbaye. Chē jajañe in̄yēnga echanjárrendaye y chē uvasēšangá juashacama tempo chaojobuache ora, nt̄samo chē nduiño chabojt̄sotocancá chēnga mochantiyiye ca.

<sup>42</sup> Chora Jesús tojanayana: —¿T̄sēngaftanga ndocna te Bēngbe Bētsabe uabemana palabra šmēndualía? Chiñe mēnt̄sá endayana:

Chē yebna jebuanēnga tmojt̄sanaboté ndēt̄sbé, mora chē más bēts uashacuanēšent̄se entsejájona. Chē soye Bēngbe Utabná, Bēngbe Bētsá chca tojama, y bēnga chama ojananēnga fsēntsemna ca.

<sup>43</sup> Nt̄samo chē nduiño chē arrēndayēnga chē fshantse echánt̄sabaca y in̄yēnga echantsat̄sataye y chēnga chabiama bētscá shajuana mochanjatbanacá, cachcá, Bēngbe Bētsabe amēndayana t̄sēngaftangbent̄šana mochantsejuána y in̄yēngbioye mochánt̄sat̄sataye. Chēnga Bēngbe Bētsabe soyēngama mochanjouena y chē soyēngama in̄yēngbioye mochanjabuayená, Bēngbe Bētsabe amēndayoye jamashēnguama.

<sup>44</sup> Ndánaca chē ndēt̄sbeñe chaojotsat̄sá, chēbē bochánt̄satcacaye; y chē ndēt̄sbé ndábeñnaca chaojót̄sat̄se, polvēshe bochánt̄sebema ca —Jesús tojanayana.

<sup>45</sup> Chē bachnangbe amēndayēnga y fariseunga, Jesús chē jabuátambama cuentēnga yojtsētsētsnama, tmojanenót̄atsēmbona chēngbiama chca yojtsóyebuambnama.<sup>46</sup> Chora chēnga tmojánbošena Jesús jishachana, pero ent̄sangbiama imojtsauatja; chēnga imojjanjuabná Jesús Bēngbe Bētsabe juabna oyebuambnayá yojamna ca.

### Chē casamento fiestama cuento

**22** Chent̄šana Jesús tojanont̄sé cachiñe cuentēngaca chēnga jabuátambana. Mēnt̄sá tojanayana: <sup>2</sup> “Cbochanjáuyana nt̄samo Bēngbe Bētsabe amēndayana yomnana. Endmēna mo nt̄samo can̄ye réyefteca tojanopasacá. Chē rey yojamánda can̄ye bēts fiesta jamama, chabe uaquiñabe casamentama. <sup>3</sup> Chora chē rey chabe oservénēnga yojichamuá chē ófjanēnga jobiat̄sama, pero chē ófjanēngna ndoñe imonjouena jama. <sup>4</sup> As chē rey in̄ye oservénēnga yojichamuá y mēnt̄sá yojámēndaye: ‘Chē ófjanēnga šmochjáuyana, ya saná stseboprontana ca. Sēnjamandá, at̄sbe uacnēnga y uamna bayēnga min̄yicánēnga jobáyama y lempe entseprontana; y chamuabo chē casamento fiestama ca.’

<sup>5</sup> Pero chē ófjanēnga ndoñe imonjouena. Can̄ya, cachabe fshantse inabomnoye yojtsoñe; in̄yana chabe obuám̄n̄ayíñe trabajuama yojtsoñe; <sup>6</sup> y in̄yēnga, chē reybe oservénēnga imojishēche, jabuache imojtsat̄setšenaye y imojtsēbaye. <sup>7</sup> Y chē rey chē soyama yojouena ora, corente ibojt̄setna. As chabe soldadēnga yojichamuá chē oservénēnga obánayēnga chamuet̄sēbáyama y chēngbe bēts pueblo jetsángbotjuama. <sup>8</sup> Chora chabe oservénēnga yojáuyana: ‘Lempe entseprontana chē casamento fiestama, pero chē ófjanēnga



ndoñe quenjatëmerecena moye jabama. <sup>9</sup> Motsajna tsashenangoye y ndëmuanýéngnaca chašmo-jánýenënga, chë casamento fiestama šmochjúbuaja ca.' <sup>10</sup> As chë oservénënga tsashenangoye imojábo-cana y nyetscanga imojánýenënga imojáchembo, cánýiñe tšabe y bacna entšanga, y chca, chë tsboc-nanoica jútjena yojtsemna entšángaca.

<sup>11</sup> "Chë ófjanënga jánýama chë rey yojámashëngo ora, chentše cánýabioye ibojinýe y chana ndoñe yontsemna ntšamo canýe casamento fiestama endbetsemncá uichëtjoná. <sup>12</sup> As chë rey ibojauyana: 'Sobreno, ntšamo canýe casamento fiestama endbetsemncá ndoñe quecatichëtjona. ¿Ntšamo chca moye tcojamáshëngo ca?' Pero chë boyabásana nýe iyteca yojtsemna. <sup>13</sup> As chë rey chë fiestentše ujuatšnayënga yojámëndaye: 'Shecuatše y cucuatše motsebatsëca y chë ndëbinýna luaroye, infiernoye motsábocna. Chentše puerte echanjenóbošachna y chë tsetšanama juatšasënga echantseoftëšjojnaye ca' —cha yojayana."

<sup>14</sup> Jesús chca jacuëntama tojanpochocá ora, mëntšá tojánayana: "Chë fiestama ófjanënga banga montsemna, pero chë bocacánënga choca jtsemnana nýe báseftanga. Er Bëngbe Bëtsá banga jáchembuana chabe amëndayoye jamashënguama, pero nýe báseftanga choca mochántsemna ca."

### Chë Romoca bëts mandadbiama impuesto jtsatsquécj-nayama

<sup>15</sup> Chentšana chë fariseunga tmojtsatanoñe y tmojanenoyeuná ntšamo Jesús tojayaniñe cha jisháchichiyana, as chca, mandadëngbeñe cha mal jaquédama. <sup>16</sup> Chama chënga tmojanichamó básefta cachëngbe usetonënga y ínýengna Heródesbe ústonënga, Jesús jauyanama: —Buatëmbayá, bënga fsëndétatsëmbo aca ndegombre soyënga cnetsabuátambama y contsabuatambá ndegombre tšabe vida jtsebomnana, ntšamo Bëngbe Bëtsá yomandacá, y ndoñe jatuenanana nýe ntšamo entšanga tmojatichamcá, er acbiama tondaye quenatámana nda más uamaná o nduamaná tomnana. <sup>17</sup> Chcasna, ¿ntšamo catjájuaboye? ¿Tšabá tayojtsemna, César, chë Romoca bëts mandadbiama, bënga impuesto jtsatsquécjnyana o ndoñe ca?

<sup>18</sup> Jesús yojtsetátšëmbo chëngbe bacna juabnëngama; chíyeca tojanéyana: —Bacna entšanga, ntšamo ndegombre šmojuabnacá ndinýinýnayënga. ¿Ndáyeca tšëngaftanga šmojtseboše chë sóyeca atšë jisháchichiyama? <sup>19</sup> Chë šmatsquécjnéna crocénana šminýinýé ca.

As canýe crocénana tmojanoyé. <sup>20</sup> Jesús tojanatjá: —¿Ndabe jubiá quem crocénaniñe yojtsemna, y ntšamo muentše entsabemancá nda chca iuabaina ca?

<sup>21</sup> Y chënga tmojanjuá: —Césarbe jubiá; cha chca enduabaina ca.

As Jesús tojanéyana: —Césarbioye šmochtoyiye cha ibotocana soye; y Bëngbe Bëtsana cha ibotocana soye ca.

<sup>22</sup> Chënga chca tmojanuena ora, ojanánënga imojtsemna. As chënga cachcá Jesús tmojanonýá y tmojtsatanoñe.

### Obanënga jtayenama Jesús tmojantjá

<sup>23</sup> Báseftanga judiëngbe amëndayënga, saduceos ca uabáinënga, imojanjuabná chë obanënga ndocna te ntayenana ca. Cach te, chë impuestama Jesús tojanoyebuambá te, básefta saduceunga tmojána y mëntšá tmojantjá: <sup>24</sup> —Buatëmbayá, Moisés tojánayana nderado canýe boyá tojóbana básenga ntjëtsabashejuancá, ana chabe uabentsá jtsemnana chë shëmaftaca jtobouamayana, chca, chabe uabochená obanabiama básenga jtsabamnama ca.

<sup>25</sup> Chcase, canýe béngbentše canýsëfta catsátanga monjamna. Chë natsaná tonjanobouamá y tontsanóbana. Básenga ndoñe quenjátabamna, chíyeca chë shemna chë uabentsáftaca tontanobouamá. <sup>26</sup> Y cháftaca cachcá tonjanopasá, chë inýe uabentsáftaca cachcá, y cachcá chë ínýengaftaca y chë ústonoca uabentsáftacnaca. <sup>27</sup> Y chentšana chë shembásanaca tontsanóbana. <sup>28</sup> Y morna, chë obanënga chamojtayena ora, ¿ndabe chë canýsëfta catsatanguentsábe shema chë shembása yochtsemna, nyetscanga cháftaca tmojanobouamase ca? —chënga tmojantjá.

<sup>29</sup> As Jesús tojanéjua: —Ntšamo tšëngaftanga šmonjayancá ndmëncá šmontsoyebuambná, Bëngbe Bëtsabe uabemana palabra, ni chabe obenanama ndoñe quecmátësertana causa. <sup>30</sup> Chë obanënga chamojtayena ora, ni boyabásenga, ni shembásenga quemochatóbouamnaye, y chca, chënga mochántsemna mo celoca angelotemëngcá. <sup>31</sup> Y chë obanënga jtayenamna, ¿ndoñe šmëndualía ntšamo cach Bëngbe Bëtsá chabe uabemana palabrënguiñe tojánayanama? Cha tonjánayana: <sup>32</sup> "Atšë sëndmëna Abraham, Isaac y Jacobëbe Bëtsá ca." Bëngbe Bëtsá chca jayanëse entsichamo cha ndoñe yondmëna obanëngbe Bëtsá, sinó aina entšangbe Bëtsá ca, er masque chënga tmojanóbana, chënga cabá Bëngbe Bëtsáftaca mondoyena ca —Jesús tojánayana.

<sup>33</sup> Chë entšanga chca tmojanuena ora, ojanánënga imojtsemna ntšamo Jesús yojtsabuátambama.

### Chë más bëts uámana mando

<sup>34</sup> Jesús chë saduceúngbioye iyteca tojánabiamama fariseunga tmojántatsëmbona ora, chënga tmojánenefjna, <sup>35</sup> y canýa chënguentšá, ley abuatambayá, Jesúsbioye jisháchichiyama tbojantjá: <sup>36</sup> —Buatëmbayá, ¿Moisesbe leyiñe ndayá chë más bëts uámana mando yomna ca?

<sup>37</sup> As Jesús tbojanjuá: —"Utabná Bëngbe Bëtsá cochtsebobonshana nyets acbe ainánaca, nyets espíritoca y nyets juábnaca." <sup>38</sup> Chë soye endmëna chë más bëts uámana mando y nyetsca mandëngama chë natsanoca entsemna. <sup>39</sup> Y quem inýe soye, chë natsana mandcá endenoparecena. Endayana: "Ndëmua entšánaca cochtsebobonshana, ntšamo cach aca

cuenobobonshancá ca.”<sup>40</sup> Chè uta mandentšana endóbocana lempe ntšamo Moisesbe leyíñe endayancá y ntšamo chë Bëngbe Bëtsabe juabna oye-buambnayënga mondbetsabuatambacá ca —Jesús tbojaniana.

### ¿Cristo, ndabe entšábentšana yomna?

<sup>41</sup> Chë fariseunga cabá cachentše imojtsemnëntscuana, <sup>42</sup> Jesús tojanatjá: —¿Ntšamo šmojtsejuabná chë Bëngbe Bëtsabe Uámana Uabuayanabiama, chë Cristo? ¿Ndábentšana cha iuabó ca?

Y chënga tmojanjú: —Davídbentšana ca.

<sup>43</sup> As Jesús tojanéyana: —¿Ntšamo chca nántsemna, cach David, chë Uámana Espíritbe mándoca, Crístbioye Utabná ca tbojtsabobuátmëse? David mëntšá tojánayana:

<sup>44</sup> Bëngbe Bëtsá, atšbe Utabná Crístbioye tbojaniana:

atšbe catšbioica mótbema,  
atšbe obenánaca acbe uayayënga acbe cucuatšíñe chamoquedama chjamëntscuana ca. <sup>45</sup> ¿Ntšámose Cristo, Davídbentšana Entšá nántsemna, cach David “Utabná ca” chábioye tbojtsabobuátmëse ca? —Jesús tojanatjá.

<sup>46</sup> Chora ndocná tonjanobená ni mo canye palabra jojuana. Y chë tescana ndocná yonjenñemua Jesús más jatstjanayama.

### Jesús chë fariseungbiama y ley abuátambayëngbiama tojánayana, chënga ndoñe tšabá montsama ca

**23** Chora Jesús, entšanga y chabe uatsjédayënga mëntšá tojanéyana: <sup>2</sup> “Chë fariseunga y chë ley abuátambayënga cmondbétsabuatambaye ntšamo Moisesbe leyënguñe iuayancá. <sup>3</sup> Chcasna, tšëngaftanga cmontsamna chënga joyaunayana y ntšamo tcmojauyancá, cachcá jtsamana. Pero ndoñe šmattsama ntšamo chënga mondbetsamcá, er chënga ndoñe ntsamana ntšamo mondbetsabuatambacá. <sup>4</sup> Mo canye entšá, couáybioye uauta uasmanésha juasmayana y cachá tondaye tontsasmancá, chënga entšanga jtsaméndayana bëtscá mandënga chamotsocumplínama, pero cachënga ni mo batšatema ntsamana chë mandënga jtsocumplínama. <sup>5</sup> Chënga lempe jtsamana nye entšanga chamotsénñyama. Chënga chë ínñengbiama más Bëngbe Bëtsá imobobonshana ca chamotsejuabnama, chënga monduamana tëntša sëndachëjënguñe juabemana ntšamo Bëngbe Bëtsabe uabemana palabrënguñe endayancá, y juentsaca y buacuatšíñe chëjënga jenábatsëcana y sibijana nya tëntša uasebtotonanëjuangá jtsichëtjonana. <sup>6</sup> Chënga jtsebošana chë fiestënguñe nya quëfseroca jtsetbiámana, y chë judiëngbe enefjuana yebnënguenache chë más uámana luarënguñe. <sup>7</sup> Chënga jtsebošana tsáshenañe entšanga nya respétoca chamotsacheuana, y ‘abuátambayënga ca’ chamotsachembuanámna chënga jtsebošana.

<sup>8</sup> “Pero tšëngaftangna ndoñe šmattseboše entšanga ‘abuátambayënga ca’ chacmotsachembuanama, er nýetsca tšëngaftanga mo catšatangcá šmondmëna, Bëngbe Bëtsabeñe betsošbuachéyeca, y nye canya endmëna tšëngaftangbe Buatëmbayá. <sup>9</sup> Tšëngaftanga ‘taitá ca’ chë ley abuátambayënga šmondbétsachembuana, pero tšëngaftanga ndocna quem luarentšá ‘taitá ca’ šmattsechembuana; tšëngaftanga nye canye Taitá šmondbomna, chë celoca endmëná. <sup>10</sup> Ndoñe šmattseboše entšanga ‘mándayënga ca’ chacmotsachembuanama; er nye canye Mandayá endmëna y cha Cristo endmëna. <sup>11</sup> Nda tšëngaftangbeñe chë más uamaná tojtsemná bontsemna chë ínñenga jtsaservënana. <sup>12</sup> Nda cachá bëtscá tojtsenobiamná, nduamaná mochántsebema; y nda cachá nduamaná tojtsenobiamnana, más bëtscá mochanjábema.

<sup>13</sup> “¡Tša lastema tšëngaftangbiama, bacna entšanga ntšamo ndegombre šmojuabnacá ndinñinñayënga fariseunga y ley abuátambayënga! Tšëngaftanga šmontsama entšangbiama puerta totcá chaotsemna Bëngbe Bëtsabe améndayoye jamashënguama, mo bëshásha cuaftsebiatamiancá. Pero ni cach tšëngaftanga choye quešmátamashjuana, ni ínñenga choye jamashënguama bošëngbioye chama quešmátalésenciana. <sup>14</sup> ¡Tša lastema tšëngaftangbiama, ntšamo ndegombre šmojuabnacá ndinñinñayënga fariseunga y ley abuátambayënga! Tšëngaftanga chë viudángbioye chë tmobomna soyënga jtsabacayana, y entšangbe delante tšabá chacmotsénñyama y chënga šmojt-saíngñayama ndoñe chamondëtsetatšëmbuamna, Bëngbe Bëtsáftaca tša jtsencuëntayana. Chë causa, Bëngbe Bëtsá tšëngaftanga más jabuache ínñengbiama cmochanjácastigaye.

<sup>15</sup> “¡Tša lastema tšëngaftangbiama, bacna entšanga ntšamo ndegombre šmojuabnacá ndinñinñayënga fariseunga y ley abuátambayënga! Tšëngaftanga ba luarënguenache jtsajnana canya tšëngaftangbe us-toná onguayíñe, y šmojinñena ora, tšëngaftanga jamana cha chaotsemna tšëngaftangbiama uta soye más merecido buajoná infiernoye chaotsama.

<sup>16</sup> “¡Tša lastema tšëngaftangbiama; tšëngaftanga šmondmëna mo jtanënga entšanga unachayëngcá! Tšëngaftanga šmondbétsichamo: ‘Nda ínñabioye tbojašbuachená ndayánaca jamama y tojayana chë Bëngbe Bëtsabe bët yebnama chca jamama ca, cha ndoñe ntsemnana chë tbojašbuachená soye jamama ca. Pero chë Bëngbe Bëtsabe bët yebnentša castellanama cha tojajurasna, aíñe jtsemnana chë tbojašbuachená soye jamama ca.’ <sup>17</sup> ¡Obëjëmënga y nduabínñënga! ¿Ndayá más uámana soye yomna, chë castellano o Bëngbe Bëtsabe bët yebna? Chë castellano Bëngbe Bëtsabiama joserviama jtsemnana, nye Bëngbe Bëtsabe bët yebnoca chë castellano tojtsemnayeca. <sup>18</sup> Tšëngaftanga mëntšánaca šmondbétsichamo: ‘Nda ínñabioye tbojašbuachená ndayánaca jamama y tojayana chë altarama chca jamama ca, cha ndoñe ntsemnana chë tbojašbuachená soye jamama ca. Pero chë Bëngbe Bëtsabiama altaroca tojtsejájona

soyëngama tojajurasna, aífie jtsemnana chë tbo-  
jašbuachená soye jamama ca.' <sup>19</sup> ¡Nduabínýnënga!  
¿Ndayá más uámana soye yomna, chë Bëngbe  
Bëtsabiama tmojacjá soyënga o chë altar? Chë tmo-  
jacjá soyënga Bëngbe Bëtsabiama josérviamá jtsem-  
nana, nýe chë altaroca chë soyënga tmojacjáyeca.  
<sup>20</sup> Nda chë altarama tojajurá, ndoñe nýe chë altarama  
ntsejúraryana. Lempe chë altar juatsboca tojtsemnám-  
naca cha jtsejúraryana. <sup>21</sup> Nda Bëngbe Bëtsabe bëts  
yebnama tojajurá, ndoñe nýe Bëngbe Bëtsabe bëts  
yebnama ntsejúraryana. Bëngbe Bëtsabiama cha jtse-  
júraryana, cha chë chentše oyená. <sup>22</sup> Y nda celocama to-  
jajurá, chentše reycá Bëngbe Bëtsabe tbemaniñama  
cha jtsejúraryana y cachora Bëngbe Bëtsabiámna,  
chentše yotbemanabiama.

<sup>23</sup> “¡Tša lastema tšëngaftangbiama, bacna entšanga  
ntšamo ndegombre šmojuabnacá ndinýinýnayënga  
fariseunga y ley abuátambayënga! Tšëngaftanga  
Bëngbe Bëtsabiama jtsequëcjnyana chë jajañentša  
sananga bnëtsanentšana canýe soye; chë binche  
matatémënga menta, anis y chë cominentša sanán-  
gnaca. Pero tšëngaftanga nýe batšá jtsamana chë  
leyentša más uámana soyënga, mo chë nýetsca  
entšanga cachca derechënga chamotsebomnama,  
ínýenga jtsalastemánana y chë tšabe soyënguiñe jt-  
siyenana, chca, entšanga tšëngaftangbeñe chamot-  
sošbuáchema. Chë soyënga cocayé cmontsamna jt-  
samama, chë inýe tšabe soyënga amana ntjajbanacá.  
<sup>24</sup> ¡Jtanënga entšanga unachayënga! Tšëngaftanga chë  
base soyënga jamama puerte jtsenócochinýenana,  
pero jtsebnétjombana uámana soyënga jamama,  
Bëngbe Bëtsá tojanmandá soyënga. Y chca, tšën-  
gaftanga šmontsemna mo canýe entšá ndayá to-  
jtsabuchetjca bayëfja jtsejuánama, ndoñe ntjasama,  
jasama ndoñe yondëlesenciana ca chë leyíñe iuayana  
causa. Pero šmondmëna mo entšangcá ndëmuanýen-  
ga camellbe mëntšena jasana, y chë leyíñe endayana  
chcana jasama ndoñe yondëlesenciana ca.

<sup>25</sup> “¡Tša lastema tšëngaftangbiama, bacna entšanga  
ntšamo ndegombre šmojuabnacá ndinýinýnayënga  
fariseunga y ley abuátambayënga! Tšëngaftanga š-  
mondmëna mo entšangcá ndëmuanýenga platillëjën-  
ga y tazëšënga shjoicajana jtsóbojabiana, pero tsoyna  
nýe cachcá jonýayana. Tšëngaftanga tša jtsentšénana  
entšangbiama mo tšabengcá jtsinýnama, pero tšën-  
gaftangbe ainantšë jútjena entsemna nýe jtsat-  
bëbanama y nýe bëtscá soyënga jésebomnama juab-  
néngaca. <sup>26</sup> ¡Nduabinyña fariseo! Cochjshetsajbaná  
ainaniñe bacna soyënga bomnana. Chamna nýe tšabe  
juabnénga chentše cochtsebomna, y lempe ntšamo  
chacojtsamcá y entšanga chamojtsonyacá tšabá  
echántsemna.

<sup>27</sup> “¡Tša lastema tšëngaftangbiama, bacna entšanga  
ntšamo ndegombre šmojuabnacá ndinýinýnayënga  
fariseunga y ley abuátambayënga! Tšëngaftanga š-  
mondmëna mo obanëngbe cuevëshënga botamana  
uafjantsenëshëngcá; shjoicajana puerte bota-  
manëshënga, pero tsoyna jútjena obanëngbe be-

tashëngaca y janjuana soyëngaca. <sup>28</sup> Tšëngaftanga  
chca šmondmëna: entšangbe delante tšëngaftanga  
jtsinýnana mo nýetsca soyënguiñe tšabá amëngcá,  
pero ndoñe chca quešmátsmëna. Tšëngaftangbe aina-  
nentšna chë bacna entšanga ntšamo ndegombre tmo-  
juabnacá ndinýinýnayëngcá y chë bacna soye  
amëngcá šmontsejuabná.

<sup>29</sup> “¡Tša lastema tšëngaftangbiama, bacna entšanga  
ntšamo ndegombre šmojuabnacá ndinýinýnayënga  
fariseunga y ley abuátambayënga! Tšëngaftanga jt-  
samana chë Bëngbe Bëtsabe juabna oyebuambnayën-  
ga tempsquënga bëtsétsa entšanga chamotsemnana,  
chëngbe cuevëshënga jtsatspórmayëse. Tšëngaftanga  
cachcá jtsamana chë nýetsca soyënguiñe tšabá amën-  
gaftaca, chë chëngbiama jtenójuaboyama pormániñe  
jtsatsbótamnyëse; <sup>30</sup> y chentšana šmondbëtsichamo:  
‘Bënga chë bëngbe bëtsëjémëngbe tempo mafts-  
janiyenëse, chëngbioye ndoñe matmëjanéjabuache  
chë Bëngbe Bëtsabe juabna oyebuambnayënga  
jobáyama ca.’ Pero mo chëngcá canýe buayenana  
sóyeca tmojabéngbioyna ndoñe ntsayaunanana.

<sup>31</sup> Pero ntšamo šmojtsamcá jtsamëse, tšëngaftanga š-  
montsinýanýná ndegombre chë Bëngbe Bëtsabe juab-  
na oyebuambnayëngbioye tmojanëbayëngbe  
entšanguentšana šmomnana. Y mora cach tšën-  
gaftangbe bëts taitangcá tšëngaftanga šmontsama.  
<sup>32</sup> ¡Mopochocanga jamama chë bacna soyënga, chë  
tšëngaftangbe bëts taitanga tmojanbojatsé jamama  
soyënga!

<sup>33</sup> “¡Mëtscuayënga, mëtscuaye entšanga! ¿Ndayá š-  
mochjama chë infiernoca uabouana castigüentšana  
jótsebocama? <sup>34</sup> Chíyeca atše tšëngaftangbioye chan-  
jichamuá Bëngbe Bëtsabe juabna oyebuambnayënga,  
tšabe soye tatšëmbënga y abuátambayënga. Pero  
tšëngaftangna, ínýengbioye šmochantsëbaye y š-  
mochanjácrucificaye; ínýengbioyna chë enefjuana yeb-  
nënguenache šmochanjátsetšenaye y nýetsca bëts  
pueblënguenache chënga šmochandúcamena.

<sup>35</sup> Chíyeca, tšëngaftangbiama nýets castigo  
echántsemna chë nýetsca soyënguiñe tšabá amënga  
tmojëftsóbanama; Abel, chë jóbanama chabotsemna-  
ma tondaye tonjanmá, tmojanóba orscana y Zacarías  
tmojanóbantscoñe. Zacarías, Berequíasbe uaqüñana,  
Bëngbe Bëtsabe bëts yebnentše tmojanóba, altar y  
chë entšanga Bëngbe Bëtsábioye imojánadorana luar-  
iñe. <sup>36</sup> Ndegombre cbéyana, lempe chë soyëngama  
castigo morsca entšangbiama echántsemna ca”  
—Jesús tojánayana.

### Jesús tojanošachna Jerusalenoca entšangbiama

<sup>37</sup> Mëntšánaca Jesús tojánayana: “¡Jerusalenentša  
entšanga, Jerusalenentša entšanga! Tšëngaftanga chë  
Bëngbe Bëtsabe juabna oyebuambnayënga jt-  
sëbáyana y chë Bëngbe Bëtsabe ichmónënga ndët-  
šbëngaca jtsatëchënganjana jtsëbáyama. Bueta soye  
atše sënjábošena tšëngaftanga átšbioye júbuajana,  
mo canýe tuamba chabe bolletotémënga chabe ju-  
atëngmiásha tajsoye cuaftajayecá, pero tšëngaftanga

ndoñe chešmátsbošena. <sup>38</sup> Y šmochjinýe, atše mora cachcá cbochanjeséñýaye, y chca, atšna enánanga cbochanjésabashejuana, mo canýe yebna cachcá tcojesonýa y énañe tcojeseboshjoncá. <sup>39</sup> Y atše cbéyana, ndegombre tšëngaftanga morscana atše ndoñe más quešmochátinýe; y atše šmochántinýe mēntšá chašmojtsichamo ora: ‘¡Corente bendición bomná, Bēngbe Utabnabe obenánaca tojabá ca!’ ”

**Jesús tojánayana chē Bēngbe Bētsabe bēts yebna lempe mochjánpochocama**

**24** Jesús Bēngbe Bētsabe bēts yebnentšana tojéft-sanbocna y ya yojtsaye. Chorna chē uatsjēndayēnga chábioye tmojanobeconá y tmojanontšē nýetsca chentšá bēts yebnēnga cha jinýinýiyana. <sup>2</sup> Chora Jesús tojanéyana: “Tšëngaftanga lempe šmontsonýá. Ndegombre šcuayana, quem Bēngbe Bētsabe bēts yebnentše ndoñe queochaisoquéda ni mo canýe ndētšbé inýe ndētšbé juatsboye. Lempe mochantsepochoá ca.”

**Ntšamo yochtsemna quem luare jopochócama tempo chaojtsobeco ora**

<sup>3</sup> Chentšana chēnga Olivos tjashoye tmojána. Jesús choca yojtsetbemana; as, chē uatsjēndayēnga tmojanobobeconá nýe chēngbiama jatjayama, mēntšá: —Šméyana. ¿Mocna ora chē soyēnga Bēngbe Bētsabe bēts yebnoca yochjochnēngo ca? ¿Ndayá yochjochnēngo bēnga jinýanýiyama aca jésabama ora ya yojtsemnama y quem luare jopochócama tempo yojtsobecua ma ca?

<sup>4</sup> As Jesús tojanjuá: —Cuedado šmochtsebmoma ndocná chacmondáingñema. <sup>5</sup> Banga mochanjabo y mochantsabíchamo chēnga atše imomna ca. Mochántsihomo: “Atše chē Cristo sēndmēna ca” y chca, ba entšángbioye mochanjáingñaye. <sup>6</sup> Tšëngaftanga šmochanjouena canýe luarentša entšanga inýe luaroca entšángaftaca imojtsentsjanama y nderado mochjentsjámna. Ndoñe matauatjēngana, er chca jochnēnguama endmēna; pero masque chcase, quem luare jopochócama cabá ndoñe queochátsmēna. <sup>7</sup> Canýe luarentša entšanga inýe luaroca entšángaftaca mochántsejtanaye, y canýe amēndayábentša entšanga inýe amēndayábioica entšángaftácnaca; y ba luarēnguiñe shēntsana echanjóshjango y chentša fshantsēnga echanjuangmēmana. <sup>8</sup> Masque chca jasúfriase, más chcoye cabá más mochanjatssúfria.

<sup>9</sup> “Chora, entšanga inýengbe cucuatšifne cmochanjábashejuana chacmatsetšenama y cmochantsēbaye; y atšbe ústonēnga bētsemnayeca nýetsca luarēnguentša entšanga cmochantsēbuayēnja. <sup>10</sup> Chē tempo, banga mora átšbeñe ošbuáchiyēnga, ošbuáchiyana mochantsajbaná y mochantsenáboyēnja y jóbanama inýengbe cucuatšifne mochántsenboshjuana. <sup>11</sup> Banga Bēngbe Bētsabe ndoñe ndegombre juabna oyebuambnayēnga mochanjábocana y ba entšanga

mochanjáingñaye. <sup>12</sup> Nýetšá bacna juabnēnga entšangbe ainaniñe echanjēsemna, y chē causa banga ndoñe quemochátenbobonshana. <sup>13</sup> Pero nda nýets tempo átšbeñe ošbuachiyá totsomñe, atsbocaná echántsemna. <sup>14</sup> Y quem tšabe noticiēnga Bēngbe Bētsabe amēndayama nýets quem luariñe entšángbioye mochántsabuyayinaye, chca, chē ndegombre soyēnga Bēngbe Bētsabiama chēnga chamotsetatšēmbuama. Chentšana cocayé quem luare jopochócama tempo echántsemna.

<sup>15</sup> “Chē Bēngbe Bētsabe juabna oyebuambnayá Daniel chē puerte uabouana soye tojéftsanabema chē pochócaye soyama. Tšëngaftanga chē puerte uabouana soye chē uámana ca uabaina luarentše chašmojinýe ora (nda tojtsalía, chabosertá), šmochántsetatšēmbó chē puerte ngmēnana tempo tojóshjanguama; <sup>16</sup> entšanga Judeoca chamojtsemnēnga, batsjabengoye chamotsacheta. <sup>17</sup> Y nda cachabe yebnentša tsbanánoca chaojtsemna, chaotsachá chocana ntjtastjangcá ndayá tsoicana jéftšabocnama. <sup>18</sup> Y nda jajoca chaojtsemna, yebnoye ndoñe chaondéta ni mo chabe quēšaiya jesácñama. <sup>19</sup> ¡Tša lastema chē tempo ngomámanēnga chamojtsemnēngbiama o ochóchaye šēsonga chamojtsabamnēngbiama! <sup>20</sup> Bēngbe Bētsá šmochtseimpadana chē tšëngaftanga jachetama, uafte-na tempo ora o canýe ochnayté ndoñe chaondētsemnama. <sup>21</sup> Chca, chora puerte ngmēnana echántsemna. Tša jabuache ngmenancá, quem luare jabojátšama orscana y mēntsoñama y más chcoye, cachcá ngmēnana ndoñe ntjamnana. <sup>22</sup> Chē puerte ngmēnana tempo yapa bēn ndoñe chaondētsemnama Bēngbe Bētsá ndoñe tonjalesenciase, ndocná quentatsbocá; pero chabe ubuáyanēnga cha corente endábabuanýeshanayeca, echanjama yapa bēn tempo ndoñe chaondētsemnama.

<sup>23</sup> “Chora nderado nda cmochanjáuyana: ‘Minýēnga, muentše chē Cristo entsemna’, o ‘Choca cha entsemna ca’, chē soyēngama ndoñe šmattsayaunana. <sup>24</sup> Chora mochanjábocana ndoñe ndegombre uámana ubuáyanēnga, chēnga Cristo imomna ca jtsichámēse, y Bēngbe Bētsabe ndoñe ndegombre juabna oyebuambnayēngnaca; y chēnga mochanjama bēts soyēnga chēngbe obenana jinýanýiyama, entšanga jáingñama, y tmojobenase, chē Bēngbe Bētsabe bocacánēngnaca. <sup>25</sup> Atše ya chama tcbonjabuayená chē tempo cabá ndóshjango ora. <sup>26</sup> Chíyeca, nderado chēnga chacmojáuyana: ‘Minýēnga, chentše chē Cristo entsemna, entšanga ndoyenoca ca’, choye ndoñe šmatjá; o chacmojáuyana: ‘Cha canýe tsoca entsemna ca’, chama ndoñe šmattsayaunana. <sup>27</sup> Er ntšamo chē tojatcuinýe ora, shinýe bocanoicana y shinýe ue-natjēmbambanēntšcoñe jabuashinýinýenancá y ba luarēnguenache entšanga jobenayana jinýama, cachcá, Bēngbe Bētsá Entšá tbojanbemá quem luaroye chaojésabo te, entšanga nýets luarentše mochanjobenaye cha jinýama. <sup>28</sup> Canýe obanabe cuerpo tojtsemnama chē gallinacēnga tmojátatšēmbona y cachora chē bēconana jojtana. Cachcá, chē castigo echántsemna

nña chama chë tempo chaojtsemna ora ca" —Jesús tojánayana.

### Bëngbe Bëtsá Entšá tbojanbemá quem luaroye echanjésabo

<sup>29</sup> Mëntsánaca Jesús tojánayana: "Chë puerte ngmé-nana tempo chaojochnëngüentsana, shinÿe ndoñe queochátsbuashinÿinÿana, juashcona ndoñe queochátsbinÿnaye, celocana estrellënga echanjatquécjana y quem luarentša tsbanánoca espíritënga obenana bomnënga echanjángmëmëmana. <sup>30</sup> Chora canÿe soye celoca echanjónÿna entsanga jinÿanÿiyama Bëngbe Bëtsá Entšá tbojanbemá ya iuaisaboma, y nÿets luarenache entsanga mochanjenóbošachna, y Bëngbe Bëtsá Entšá tbojanbemábioye mochanjinÿe celoca jantsetëshiñe echántsaboye, puerte obenánaca y corente buashinÿinÿaniñe. <sup>31</sup> Y canÿe trompetéñjua jabuache chaojuénana ora, cha chabe angelotëmënga echanjichamuá Bëngbe Bëtsabe ubuáyanënga júbuajama, nÿets luarëngocana, celoca cánÿoica juachocicana y chë ínÿoica juachóntscoñe.

<sup>32</sup> "Ntsámo higo betÿyeca endbëtsopasanama š-mochjuatsjinÿe: Tojtsaisabuacuana y tojtsaiséjotsana ora, chë tšabe tempo ya tojtsaisobecuama jtsotatsëmbuana. <sup>33</sup> Cachcá, lempe chë ndayama tšëngaftanga tcbonjauyancá chašmojinÿe ora, šmochántsetatsšëmbo Bëngbe Bëtsá Entšá tbojanbemá ya jésabama yojtsemnama. <sup>34</sup> Ndegombre cbéyana, lempe chca echanjochnëngo, morsca entsanga cabá ndóbana ora. <sup>35</sup> Celoca y quem luare echanjopochóca, pero atšbe palabra ndocna te queochaisopochóca.

<sup>36</sup> "Pero ndayté y ntseco ora Bëngbe Bëtsá Entšá tbojanbemá yochjésabama, ndocná quenátstatsšëmbo, ni chë celoca angelotëmënga, ni Bëngbe Bëtsabe Uaquiñá. Nÿe chë Taitá chama yotátšëmbo.

<sup>37</sup> "Ntsámo Noé yojétsiyena ora tojanopasacá, cachcá echanjopása chë Bëngbe Bëtsá Entšá tbojanbemá chaojésabo ora. <sup>38</sup> Noebe tempo, chë uabouana uaftena cabá nduáshjango ora, entsanga imnasaye, imnofšëšnaye y imnóbouamnaye; natjëm̃bana imojtsiyëñe, y chca imojtsomñe Noé chë barquëshoye tojánamashënguentscuana. <sup>39</sup> Chënga tondaye imonjántatsšëmbo, nÿe chë uabouana uaftena tojánashjango y nÿetscanga tojtsanéyamba ora cocayé. Cachcá echántsemna Bëngbe Bëtsá Entšá tbojanbemá chaojésabo ora; ya chaojochnëngo ora, entsanga chama mochanjátatsšëmbona. <sup>40</sup> Chora uta boyabásata jajoca bochantsemna; canÿa mochanjesbetše y chë ínÿana ndoñe. <sup>41</sup> Uta shembásata bochantsejanÿoye; canÿa mochanjesbetše y chë ínÿana ndoñe.

<sup>42</sup> "Chíyeca cuedado šmochtsebomna y yejuana š-mochtsantješna, er ndoñe quešmátstatsšëmbo ndayté tšëngaftangbe Utabná yochjésabama. <sup>43</sup> Pero quem soye tšabá chacmësertá: Chë yebnentša nduiño, ntseco ora ibeta atbëbaná yochjabama tojtsetatsšëmbëse, cha nantsefšna y ndocnábioye buanjaleséncia jushañe chaotsendbemama tsoye jtsamashënguama y jtsatbëbama. <sup>44</sup> Chíyeca, tšëngaftángnaca šmochtse-

prontana, er Bëngbe Bëtsá Entšá tbojanbemá echanjésabo, entsanga chama tondaye chamontsejuabná ora ca" —Jesús tojánayana.

### Chë tšabe oservená y chë ndoñe tšabe oservená

<sup>45</sup> "¿Nda yomna chë oservená ntšamo chë nduiño tojtsebošcá amá y nÿets juábna amá? Cha jtsemnana nda chë nduiño bochjéftseboshjona chë yebnentšënga chaotsanÿenama y jasama tojtsemna ora chaújuatšëma. <sup>46</sup> Chë nduiño tojtashjango ora, chë oservenábioye tbojinÿena ntšamo ibomncá jtsamëse, chë oservená puerte oyejuayá echántsemna. <sup>47</sup> Ndegombre cbéyana, chë nduiño chábioye bochanjaimpáda lempe chabe soyënga chabotsinÿeñama. <sup>48</sup> Pero chë oservená bacna entsá tomnësa, jajuboyana chë nduiño ndoñe betesco yochantabo ca, <sup>49</sup> y as, cha jóntšana chë inÿe oservenënga jtsajantsetayana, becá jtsesana y jtsetmuana inÿe tëmiëngaftaca. <sup>50</sup> Y chabe nduiño jtashjanguama ndoñe tontsejuabná te y ndoñe tontsetátšëmbo ora, cha echántashjango. <sup>51</sup> Chora chë nduiño jabuache bochantsecastíga, y ntšamo chë bacna entsanga ndayá ndegombre tmojuabnacá ndinÿinÿnayeñga jasúfriama entsamncá, cha echanjasúfria. Chora cha puerte echanjenóbošachna y chë tsetšana-ma juatsašënga echantsenoféšjojnaye ca" —Jesús tojánayana.

### Chë bnëtsana tobiašëngbiama cuento

**25** Mëntsánaca Jesús tojánayana: "Chë te chaojójshjango ora, Bëngbe Bëtsabe amëndayana echántsemna mo ntšamo canÿe casamento fiestentše tojanopasacá. Mëntsá yojopása: Bnëtsana tobiašënga chëngbe querosine uajuinÿanëshangá imojéftsájaca y imojábocana chë casamentero boyabása jajëbenguama. <sup>2</sup> Chë bnëtsana tobiašënguentsana, shachnënga sempre enójuabnayënga imnamna, y chë inÿe shachnëngna, ndenójuabnayënga. <sup>3</sup> Chë ndenójuabnayëngna chëngbe uajuinÿanëshangá imojéftsájaca, pero querosine ndoñe imonjuabuyamba chë uajuinÿanëshangañe cachiñe jtaftsuámama. <sup>4</sup> Pero chë sempre enójuabnayëngna chëngbe uajuinÿanëshangá imojéftsájaca y querosinënaca botellëšënguñe imojubuyamba. <sup>5</sup> Chë casamentero boyabásana ndoñe betesco yonjabo, chíyeca nÿetsca tobiašënga ocnayana yojubuache y imojtsomaná. <sup>6</sup> Mo tséntseto orna, chënga imojouena mëntsá uayebuáchana: '¡Chë casamentero boyabása ya endabó! ¡Jajëbenguama mobocana ca!' <sup>7</sup> Asna, nÿetsca tobiašënga imojotsbaná y imojóntša chë uajuinÿanëshangá juabopróntana. <sup>8</sup> Chorna, chë shachna ndenójuabnaye tobiašënga chë inÿe shachnënga sempre enójuabnayëngbioye imojáyana: 'Diosmanda tšëngaftangbe querosinentsana baseytema šmëbuatšatá, bëngbe uajuinÿanëshangá tojontsé jtsafsanana ca.' <sup>9</sup> Pero chë sempre enójuabnayëngna imojayana: 'Ndoñe. Tcbojubuatšatase, tšëngaftangbiama y bëngbiámna querosine echántsshabe. Más tšabá entsemna, chë querosine

mondbétsenoye chašma y tšëngaftangbiamama chaš-mauábuamiñe ca.'

<sup>10</sup> "Chorna, chë shachna ndenójuabnaye tobiašënga imojá chë querosine jauabuámiyama; pero chëntscuana chë casamentero boyabása yojáshjango y chë sempre enójuabnayënga cháftaca chë casamento fiestoye imojámashjna, y chentša bësháša imojtatame.

<sup>11</sup> Chentšana chë inye tobiašënga imojáshjajna y mëntšá imojtsichamo: '¡Taita, Taita, šmebëtafjo ca!'

<sup>12</sup> Pero chë casamentero boyabása yojóju: 'Ndegombre cbéyana, tšëngaftanga ndoñe quecbatëbuatma ca.'

<sup>13</sup> "Cachcá echántsemna Bëngbe Bëtsá Entšá tbojanbemá chaojésabo ora; chíyeca šmochtseprontana, tšëngaftanga ndoñe quešmátstatšëmbo ndayté, ni mocna ora chca yochjopásama ca" —Jesús tojánayana.

### Chë crocenánama cuento

<sup>14</sup> "Bëngbe Bëtsabe amëndayana endmëna mo ntšamo canye boyabásaftaca tojanopasacá. Cha ibojtsemna inye luaroye jtsoñama; as chabe oservënënga yojáchembo y yojaimpádaye chabe crocénana chamotsinýenama. <sup>15</sup> Cánýabioye ibojántšabuachiye shachna uaranga crocénana, ínýabioyna uta uaranga y ínýabioyna canye uaranga. Chca yojamna ntšamo cada ona ibojobiashjachcá. Y as chë boyabása yojtsoñe.

<sup>16</sup> Cachora chë shachna uaranga yojoyëngacñá yojátrato jabemama, y chca, inye shachna uaranga crocénana yojábotiye. <sup>17</sup> Chë uta uaranga yojoyëngacñá cachcá yojama y inye uta uaranga yojábotiye. <sup>18</sup> Pero chë canye uaranga yojoyëngacñana, yojá, fshantsiñe yojajutjo y chabe mandayabe crocénana chentše yojtseitëme.

<sup>19</sup> "Chentšana baytese chë oservënëngbe amëndayá yojtashjango y yojóntša chë crocenánama chënga jatjayana. <sup>20</sup> Natsana yojáshjango chë shachna uaranga yojoyëngacñá y chabe mandayábioye inye shachna uaranga crocénana ibojántšabuachiye y mëntšá ibojauyana: 'Taita, aca shachna uaranga šconjanoyé y muentše entsemna inye shachna uaranga sënjaboté ca.' <sup>21</sup> As chë mandayá ibojauyana: 'Tša tšabá, tšabe oservená y ntšamo tsbošcá amá. Aca quem base soyiñe lempe ntšamo tchojamandacá tcojámayeca, atše cbochanjaimpáda más bëtscá chašcotsinýeñama. Mamáshëngo y átšeftaca cochjóyejuaye ca.'

<sup>22</sup> Chentšana chë uta uaranga yojoyëngacñá yojáshjango y chë mandayábioye ibojauyana: 'Taita, aca uta uaranga šconjanoyé y muentše entsemna inye uta uaranga sënjaboté ca.' <sup>23</sup> As chë mandayá ibojauyana: 'Tša tšabá, tšabe oservená y ntšamo tsbošcá amá. Aca quem base soyiñe lempe ntšamo tchojamandacá tcojámayeca, atše cbochanjaimpáda más bëtscá chašcotsinýeñama. Mamáshëngo y átšeftaca cochjóyejuaye ca.'

<sup>24</sup> "Pero chë canye uaranga yojoyëngacñe oservená yojáshjango orna, chabe mandayábioye ibojauyana: 'Taita, atše sëndétatsëmbo aca canye tšátjaye entšá comnama; acna chë ndoñe tconjajé chentše saná

jocñana y chë ndoñe tconjuquëshe luarentše jobuátbanana. <sup>25</sup> Chama atše uatjana šjuábuache, chíyeca atše sënjá y fshantsiñe chë crocénana sënjetseitëme. Pero muentše acbe crocénana entsatsmëna ca.' <sup>26</sup> As chë mandayá ibojajuá: '¡Bacna oservená y oyënjayá! Chë ndayentše ndoñe tijajé chentše saná jocñana y chë ndoñe tijujquëshe luarentše jobuátbanana atše tsuamanama icojátatšëmbëse, <sup>27</sup> aca cmonjamna atšbe crocénana bancoca jetsobuájuana y atše matijtabo ora, atšbe crocénana matijtýëngacñe y chë chentšana tojoboté crocénanëna ca.' <sup>28</sup> Y as yojamënda: 'Chë uaranga motseboca y chë bnëtsana uaranga entsebomnábioye chana motsatšetá ca. <sup>29</sup> Er nda tojtsebomnábioye, más jatšetayana, y chca cha corente bëtscá jtsebomnana; pero tondaye tondbomnábioyna, chë batšatema tobomna sóynaca jtsebocana ca.'

<sup>30</sup> "Y chora cha yojayana: 'Quem ndoservena trabajayá shjoca ibetoye matábocna; choca puerte echanjenóbošachna y chë tsetšanama juatsašënga echantsenoftéšjojnaye ca' " —Jesús tojánéyana.

### Ntšamo chë quem luare jopochócama ora, nyetsca entšangbiamama mochjayana

<sup>31</sup> Mëntšánaca Jesús tojánayana: "Chë Bëngbe Bëtsá Entšá tbojanbemá chabe obenánaca, buash-inýinýaniñe y nyetsca chabe angelotëmëngaftaca chaojésabo ora, chë reybiama puerte buashinýinýana tbemaniñe echanjót'bema. <sup>32</sup> Chora nyets luarëngoca entšanga chabe natsanoica mochanjénefjna, y cha, entšanguentšana ínýenga echanjábacacaye, mo chë oveshënga abujéñya oveshënga chivëngbentšana endbetsabacacnycá. <sup>33</sup> Chë abujéñyana, oveshënga chabe catšbioica echanjáchembo y chivëngna chabe uañicuayoica. Bëngbe Bëtsá Entšá tbojanbemá cachcá echanjama: chë ubuáyanënga chabe catšbioica echanjúbuaja y chë bacna entšangna chabe uañicuayoica echanjatsaye.

<sup>34</sup> "Chorna chë Rey, Bëngbe Utabná, chabe catšbioica chamojtsemna entšanga echanjáuyana: 'Tšëngaftanga, Atšbe Taitá tšábeñe cmétabna, mabënga ca; atšbe amëndaye luare mo tšëngaftangbiamama otocana soycá mosháchiñënga; tšëngaftangbiamama endëprontana, Bëngbe Bëtsá quem luare tonjanma orscana. <sup>35</sup> Er atše šonjanishëntsana y tšëngaftanga saná šmonjancar-edadó; šonjanajuendá y tšëngaftanga šmonjanafšé; inye luarocana ashjangonacá sënjánana y posada šmonjanántšame. <sup>36</sup> Enašá sënjánana y entšayá šmonjanëtšetá jtichëtjuama; šocá sënjanájona y šmonjanatšetsaye; cárceloca sënjanëtámëna y jabëuatsëtsayama šmonjánabo ca.'

<sup>37</sup> "As chë Bëngbe Bëtsá chabe bominýiñe tšábënga tojábiamënga mochanjatjaye: 'Bëngbe Utabná, ¿ntseco shëntseca tcbënjáninýe y tcbënjanajuatšé? ¿Ntseco uajuendayá tcbënjáninýe y tcbënjanašé? <sup>38</sup> ¿O ntseco inye luarocana ashjangonacá tcbënjáninýe y posada tcbënjanašame, o enašá y entšayá jtichëtju-

ma tcbënjänëtsetá? <sup>39</sup> ¿O ntseco šocá o cárceloca utamená tcbënjäninÿe y jauatsëtsayama tifjána ca?

<sup>40</sup> “As chë Utabná echanjójuá: ‘Ndegombre cbéyana, lempe ntšamo chë atšbe catšátanguentšana chë más batšá uámanëngaftaca šmojamcá, cach átšeftaca šmonjanma ca.’

<sup>41</sup> “Chentšana chë Utabná chabe uañicuayoica chamojtsemna entšanga echanjáuyana: ‘Atšbentšana mojuánanga atšbe Bëtsabe uaboténënga. Infiernoye motsajna, chë ndocna te queochátsfsana ñëshoye; choca endëprontana Satanás y chabe ustonëngbiama.

<sup>42</sup> Er atše shëntseca sënjánana y tšëngaftanga saná ndoñe chešmatanaredadó; šonjanajuendá y ndoñe chešmatanafsé; <sup>43</sup> inÿe luarocana ashjangonacá sënjánana y ndoñe posada chešmatanántšame. Enašá sënjánana y ndoñe entšayá chešmatanëtšetá; šocá sënjanjájona y cárceloca sënjanëtámëna y ndoñe chešmatanatsëtsá ca.’

<sup>44</sup> “As chënga mochanjatjaye: ‘Bëngbe Utabná, ¿ntseco tcbënjäninÿe shëntseca o uajuendayá, o inÿe luarocana ashjangonacá, o enašá, o šocá o cárceloca utamená y ndoñe tcbënjänajabuache ca?’

<sup>45</sup> “Y chë Utabná echanjójuá: ‘Ndegombre cbéyana, tšëngaftanga ntšamo chë atšbe catšátanguentšana chë más batšá uámanëngaftaca, ndoñe šmonjanmcá, átšeftaca cach ndoñe chešmánama ca.’

<sup>46</sup> “Chëngna infiernoye nyetsca tescama mochantsësetjango, y chë Bëngbe Bëtsá chabe bominiñe tšábënga tojábiamëngna chë nyetsca tescama yomna tšabe vida mochántsebomna ca” —Jesús tojánayana.

#### Entšanga tmojanjuabó ntšamo jamëse Jesús jishachama

**26** Lempe chca tojánayanentšana, Jesús chabe uatsjëndayënga tojanéyana: <sup>2</sup> “Tšëngaftanga šmondétatšëmbo, uta te y chë Bashco fiesta echántsemna y Bëngbe Bëtsá Entšá tbojanbemá inÿengbe cucuatšinë mochanjáboshjona chamocrucificama ca.” Chë fiesta inamna jtenójuaboyama Bëngbe Bëtsá chë judiëngbe bëts taitanga Egiptocana tojánatsebacama.

<sup>3</sup> Chëntscuana, chë bachnangbe amëndayënga y chë judiëngbeñe bëtsëjemëngcá mándayënga tmojánenefjna, Caifás, chë bachnangbe más uámana amëndayabe bëts yebnentše. <sup>4</sup> Tmojanenojuabó y tmojanenoyeuná jtseíngñase Jesús jishachama, y jtsóbama. <sup>5</sup> Pero imojtsichamo: “Quem fiestëntscuana ndoñe, entšanga yapa muanjónťša enbouenanana ca.”

#### Canÿe shembása botamana uanguëtše bėjaye Jesusbe bestšašinë tbojanbuešcja

<sup>6</sup> Jesús Betania pueblentše yojtsemna, Simón chë bacna nguayanánaca šocá ca uabobuatmabe yebnentše. <sup>7</sup> Chëntscuana canÿe shembása Jesúsbioye tojanabeconá. Chë shembásana tojanamba canÿe alabastro jarrëtema, jútjena canÿe puerte uámana bota-

mana uanguëtše bėjayeca. Jesús mesëshentše yojtsemnëntscuana, chë shembása chabe bestšašinë chë botamana uanguëtše bėjaye tbojanbuešcja.

<sup>8</sup> Chë uatsjëndayënga chca tmojáninÿe orna, tmojanotjayaná y tmojanontšë ichámuana: —¿Ndáyeca nÿe bonamente chë soye chca yojtsemna ca? <sup>9</sup> Chamna, matmënjobenanga chë bėjaye becá crocenánama juiyana y chánaca ndbomnjëmënga matmënjújabuache ca.

<sup>10</sup> Jesús chë soye tojanuena; as tojanéyana: —¿Ndáyeca ndoñe cachcá quem shembása šmochanjonyaye ca? Ntšamo tonjamcá tšabá entsemna. <sup>11</sup> Er chë ndbomnjëmëngna nyets tempo tšëngaftangbeñe mochanjëftsemna, pero atše tšëngaftangaftaca ndoñe nyets tempo quichásemna. <sup>12</sup> Ntšamo chë shembása tojamcá, chë botamana uanguëtše bėjaye atšbe cuerpiñe jabuéšcjëse, cha šontsepróna atše juatbontsa tescama. <sup>13</sup> Ndegombre cbéyana, quem luariñe ndayéntšnaca Bëngbe Bëtsabe soyëngama chamojtšabuayiná chentše, ntšamo quem shembása tojamámnaca becá mochanjëftsóyebuambaye, chca, entšanga chabiama chamotsenójuabnama ca —Jesús tojanéyana.

#### Judas tojána bachnangbe amëndayëngbioye, Jesús chamuishachama

<sup>14</sup> Canÿa chë bnëtsana uta uatsjëndayënguentsá, Judas Iscariote ca uabainá, tojána bachnangbe amëndayëngaftaca jencuëntama. <sup>15</sup> Y tojanatjá: “¿Ntsachetšá šmatjtabuénaye y Jesús tšëngaftangbe cucuatšinë cbochjayentšbashejuana ca?”

As chëngna, unga bnëtsana ralbenga tmojtanabuená. <sup>16</sup> Y cach orscana Judas yojtsenguaye ntšámose y ntseco ora, Jesús chëngbe cucuatšinë jayentšbashejuanama.

#### Jesús chabe uatsjëndayëngaftaca Bashco saná tojanse

<sup>17</sup> Chë Bashco fiesta bojatsenté, chë levadúraca ndëpormana tandëse jasama fiestëntscuana, chë uatsjëndayënga Jesúsbioye tmojanobeconá y tmojantjá: —¿Ndëmoca aca cojtseboše bënga fchauptontama Bashco saná chacosama ca?

<sup>18</sup> Y Jesús tojanéyana: —Chë bëts puebløye motsajna canÿe bacobe yebnoye y cha šmochjauyana: “Buatëmbayá tonjayana: ‘Atšbe ora ya echanjobuache, y atše acbe yebnoye sëntšá, Bashco fiesta jamama atšbe uatsjëndayëngaftaca ca.’ ”

<sup>19</sup> As chë uatsjëndayënga tmojanma ntšamo Jesús tojanamëndacá y chë Bashco fiesta saná tmojanprontá.

<sup>20</sup> Y tojanibétata orna, Jesús chë bnëtsana uta uatsjëndayëngaftaca mesëshentše yojtsemna. <sup>21</sup> Y imojtsesantscuana, Jesús tojanéyana: —Ndegombre cbéyana, canÿa tšëngaftanguentsá uayayëngbe cucuatšinë šochanjáboshjona ca.

<sup>22</sup> Chora chë uatsjëndayënga puerte ngmënaca imojtsemna y tmojanontšë canÿánÿa Jesús jatjayama: —Bëngbe Utabná, ¿nderado atše cha chtsemna ca?

<sup>23</sup> As Jesús tojanéjua: —Canya nda chabe tandëse entsefchecuacná cach atse sëntsefchecuacná šcne-  
nentše, cha uayayëngbe cucuatšifne šochanjá-  
boshjona. <sup>24</sup> Ndegombre, Bëngbe Bëtsá Entšá tbo-  
janbemáftaca echanjopása ntšamo Bëngbe Bëtsabe  
uabemana palabrënguiñe chabiama iuayancá; pero,  
jtša lastema chë bochjáboshjonabiama! Más tšabá  
chabiama manjamna ndoñe ntjónynana ca.

<sup>25</sup> As Judas, chë boshjuaná, Jesúsbiöye tbojantjá:  
—Buatëmbayá, ¿nderado atše chtsemna ca?

Y Jesús tbojanjúá: —Ndegombre tcjayana ca.

<sup>26</sup> Imojtsesantscuana, Jesús tandëse tojanca, Bëngbe  
Bëtsábiöye chama tbojtanchuá, tojanjatá y chë uat-  
sjëndayënga tojanatšatá. Y mëntšá tojánayana:  
“Mocñënga, mosënga. Atšbe cuerpo entsemna ca.”

<sup>27</sup> Chentšana, canye coptema vínoyeca tojanaca,  
Bëngbe Bëtsábiöye tbojtanchuá y chë uatsjëndayënga  
tojanëfšasé. Y mëntšá tojánayana: “Nyetscanga quem  
coptëmentšana mofšënga. <sup>28</sup> Quem vínoye atšbe  
buiñe entsemna. Atšbe buiñe echanjuábuashana  
entšanga chamotsetatsëmbuama ntšamo Bëngbe Bët-  
sá entšanga tojanašebuachenacá aiñe yochjochnën-  
guama. Chë buiñe bëtská entšangbiama echan-  
juábuashana, chëngbe bacna soyëngama per-  
donánënga chamotsemnama. <sup>29</sup> Y ndegombre  
cbëyana, morscana atše ya ndoñe más chë  
uvasentšana obocniye quichaisofšiyë. Chë tsëm vínoye  
tšëngaftangaftaca chanjofšiyë, atšbe Taitabe amén-  
dayoca chamojtsemna ora ca” —Jesús tojánayana.

**Jesús tojánayana, chábiöye ndoñe bonjanabuátma ca  
Pedro yochjánayanama**

<sup>30</sup> Bëngbe Bëtsá jëtschuayama tmojancantá  
chentšana, Olivos tjashoye tmojëftsanbocana. <sup>31</sup> Choca  
Jesús tojanéyana: —Tšëngaftanga nyetscanga quem  
ibeta átšbeñe ošbuáchiyana šmochantsobuetše y š-  
mochántascheta, er Bëngbe Bëtsabe uabemana pal-  
abrënguiñe, cha mëntšá tojánayana: “Chë oveshëngbe  
abuajënyá chanjóba y chë oveshënga  
mochantsáshana ca.” Chca tšëngaftangaftaca echan-  
jopása, uayayënga chašmojishache ora. <sup>32</sup> Pero  
obanënguentšana chaitayenentšana, tšëngaftangbe  
natsana Galileoye chanjá ca —cha tojanéyana.

<sup>33</sup> Chora Pedro tbojanjúá: —Masque nyetscanga  
ácbëñe ošbuáchiyana chamotsobuetše y chamotsa-  
cheta, ntšamo ácaftaca yochjopása causa, atše ndocna  
te ca.

<sup>34</sup> As Jesús tbojanayana: —Ndegombre cbëyana, cam  
ibeta, ngallo cabá ndëcánta ora, aca unga soye  
cochanjayana ndoñe šconduabuatma ca.

<sup>35</sup> Pero Pedro tbojanayana: —Masque chašotsemna  
ácaftaca jóbánama, atše ndoñe quichátayana ndoñe  
cbonduabuatma ca.

Y nyetsca uatsjëndayëngnaca cachcá imojtsichamo.

**Getsemaní luarentše Jesús Bëngbe Bëtsáftaca tboja-  
nencuentá**

<sup>36</sup> Chentšana, Jesús chabe uatsjëndayëngaftaca  
canye luare Getsemaní ca uabáinoye tojána. Choca to-  
janéyana: “Muentše motbiama, chëntscuana atše  
choye chanjá Bëngbe Bëtsáftaca jencuëntama ca.”

<sup>37</sup> Y Pedro y chë Zebedeobe uta uaqiñata tojëft-  
sanëbiatše. Choca yojóntša puerte ngménaca y  
corente cochtsetšenaná jtsemnama. <sup>38</sup> Jesús to-  
janéyana: “Atšbe ainana puerte ngménaca entsemna,  
mo jobanamcá. Muentše moquedanga y átseftaca š-  
mochtsefšna ca.”

<sup>39</sup> Chora Jesús más natsanoye tojána, to-  
janoshamentšë y fshantsóntscoca yojotsejbéna, y  
mëntšá Bëngbe Bëtsáftaca tbojanencuentá: “Atšbe  
Taitá, jopódianëse moma atše japadésama ndoñe  
chašondëtsemnama. Pero ntšamo atše stsebošcá  
ndoñe chaondëtsemna, sinó ntšamo aca cojtsebošcá  
ca.”

<sup>40</sup> Chentšana, Jesús chabe unga uatsjëndayëngbiöye  
tojtanabo y chëngna imnétsomañe. Chca tojánayana  
ora, Pédrëbiöye tbojanayana: “¿Ni mo canye horatema  
tšëngaftanga šmonjobená átseftaca jtsefšnana ca?

<sup>41</sup> Šmochtsefšna y Bëngbe Bëtsáftaca šmochtsencuén-  
taye, chca, bacna soye jamama ndoñe chacmondó-  
cochënguama. Tšëngaftanga ndegombre šmontse-  
boše espíritoca Bëngbe Bëtsá joyeunayama, pero  
cuerpiñe añemo ndoñe quešmátsbomna ca” —Jesús  
tojanéyana.

<sup>42</sup> Uta soyama tojtesaná y mëntšá Bëngbe Bëtsáftaca  
tbojanencuentá: “Atšbe Taitá, atše japadésama ndoñe  
chašondëtsemnama jamama ndoñe jopódianëna,  
nye ntšamo aca cojtsebošcá chaotsemna ca.”

<sup>43</sup> Y tojtanabo ora, chë uatsjëndayënga cachiñe im-  
nétsomañe; yapa ocnaye causa nye imojtsefshétana.

<sup>44</sup> As Jesús cachcá yojëftsényaye, y ungama cachiñe to-  
jtesaná Bëngbe Bëtsáftaca jencuëntama, y cach pal-  
abrënga tojánayana.

<sup>45</sup> Chora chë uatsjëndayëngbiöye tojtanabo y to-  
janéyana: “¿Cabá šmotsomañe y šmotsochnañe ca? Ya  
ora tojjobuache, Bëngbe Bëtsá Entšá tbojanbemá bac-  
na soye amëngbe cucuatšifne mochanjáboshjona.

<sup>46</sup> Motsbananga, cuajna. Minyënga, chë boshjuaná ya  
entsebeconá ca.”

**Uayayënga Jesús tmojánishache**

<sup>47</sup> Jesús cabá yojtsóyebuambnantscuana, Judas,  
canye chë bnëtsana uta uatsjëndayënguentšá, tojá-  
nashjango, y cháftaca imojtsemna ba entšanga es-  
padéjangaca y ngarotbéngaca prontánënga. Chënga  
imojamna chë bachnangbe amëndayënga y chë  
judiëngbeñe bëtsëjemëngcá amëndayëngbe ich-  
mónënga. <sup>48</sup> Judas, chë boshjuaná, tojanjuabó ntšamo  
jamana entšanga jinyaníyama ndëmua Jesús bëtsem-  
nana. Chíyeca yojáuyana: “Nda chajiauámocho, cha  
echántsemna. Šmochjishache ca.” <sup>49</sup> Cachora Judas



Jesúsbioye tojanobeconá y tbojanчуá: —Buajtana, Buatëmbayá ca.

Y tbojtanámocho.

<sup>50</sup> Jesús tbojaniana: —Enutá, moma chë ndayá jabo-mama tcojabo ca.

Chorna, chë entšanga tmojanobeconá, Jesús tmo-jánishache y tmojanánatse.

<sup>51</sup> Chca orna, canye enutá Jesúseftaca yojtsemná, chabe espadéja tojanenoséngbotëntšena, y chë bach-nangbe más uámana amëndayabe oservenábioye canye matscuaše tbojtšanéstjango.

<sup>52</sup> As Jesús tbojaniana: “Espadéja matoséngbua-jonýá. Nda espadéjaca tbojóba chana, cach espadéja-ca echanjóbana. <sup>53</sup> ¿Aca ndoñe condétatšëmbo, atše atšbe Taitábioye stjaimpádase, cha cachora atšbiana nanjichamuá bnétsana utama más ejércitënga angelotëmënga? <sup>54</sup> Pero chcasna, ¿ndayá Bëngbe Bëtsabe uabemana palabrenguiñe endayancá ntšamo nanjochnëngo? Chiñe endayana ntšamo entsopasancá jochnënguama canmëna ca.”

<sup>55</sup> Cachora Jesús entšanga tojanatjá: “¿Ndáyeca šmo-jabo espadéjangaca y ngarotbéngaca atše jishachama, mo atše canye bacá uamana entšá cuaftsemncá ca? Atše cada te Bëngbe Bëtsabe bëts yebnocá tšëngaftangaftaca sënjántbemana abuatambaye, y choca ndoñe chešmátanishache. <sup>56</sup> Pero lempe quem soyënga chca entsopasana, cachcá chaotsemnama ntšamo Bëngbe Bëtsabe uabemana palabrenguiñe chë Bëngbe Bëtsabe juabna oyebuambnaye nga tmo-janayancá ca” —Jesús tojánayana.

Cachora nyetsca uatsjëndayënga tmojtšanëuatjaná y tmojtšanacheta, y Jesús chë uayayëngaftaca cachcá tmojesanonýá.

### Jesús tmojanánatse chë judiëngbe más uámana amëndayëngbioye

<sup>57</sup> Chë Jesús tmojánishachënga, tmojanánatse, Caifás chë bachnangbe más uámana amëndayabe yebnoye. Chentše chë ley abuatambayënga y chë judiëngbeñe bëtsëjemëngcá amëndayënga tmojánenefjna. <sup>58</sup> Pedro bënocana Jesús tbojanasto, chë bachnangbe más uámana amëndayabe chashjóntscoñe; choye tojánamashëngo y chë Bëngbe Bëtsabe bëts yebnocá josticiëngaftaca yojótbema, chca, jtsetatšëmbuama ntšamo yochjopásama.

<sup>59</sup> Chë bachnangbe amëndayënga, chë bëtsë-jemëngcá amëndayënga y ínýënga judiëngbe amëndayënga imojtsenguaye ndánaca masque uayátse-naye soye Jesusbe contra cháuyanama, as chënga jobenayama cha chaóbana ca jayanama, <sup>60</sup> pero ndoñe tmonjáninýëna, masque banga tmojánashjajna Jesusbe contra uayátse-naye soyënga jayanama. Cabana, útata tbojánashjango, <sup>61</sup> y chata tbojánayana: “Quem boyabása tonjayana canobena Bëngbe Bëtsabe bëts yebna jtsenásatajchcana y nye unga tese jtëtsjebuana ca.”

<sup>62</sup> As chë bachnangbe más uámana amëndayá to-jantsá y Jesúsbioye tbojtantjá: —¿Ndocá cochanjayana?

¿Ndayase yojtsemna chë acbe contra montsichamo soye ca?

<sup>63</sup> Pero Jesús nye iytëca yojtsemna. Chíyeca chë bach-nangbe más uámana amëndayá tbojaniana: —Bëngbe Bëtsá Ainabe mándoca cbomandá chašcuyana aca ndegombre chë Cristo, chë Bëngbe Bëtsabe Uaquiñá comna o ndoñe ca.

<sup>64</sup> Chora Jesús tbojanjuá: —Aca ndegombre yomncá tcjayana. Y quem sóynaca cbéyana: Tšëngaftanga š-mochanjinýë, atše, Bëngbe Bëtsá Entšá tbojanbemá, chë nyets obenana bomnabe catšbioica jtsetbem-anana y celoca jantšëshiñe jtsaboyana ca.

<sup>65</sup> Chora chë bachnangbe más uámana amëndayá chabe uichëtjonëjuangá yojtsenántšajatanëca, puerta ibojtsetna causa, y tojánayana: —¿Ntšamo quem boy-abása tonjoyebuambacá, Bëngbe Bëtsabiama entsem-na mo cha cuafjoyenguangcá, chë chabe Uaquiñá yomna ca cha tonjayana ora! ¿Ndayama más entšanga šochjátëjaboto Jesusbe contra chamuayanama?

<sup>66</sup> ¿Ntšamo šmatjayana ca? —cha tojanatjá.

As chë entšanga tmojanjuá: —Ndegombre cha bëts bacna soye entsebmna; jóbanama bontsemna ca.

<sup>67</sup> Chora tmojanontšë Jesús juebëbuashëtjnayana, jabuache jantšëtayana y ínýëngna imojtsejuëbjantšë-taye, <sup>68</sup> y imojtsatsëtsnaye: “Cristo, aca ndegombre Bëngbe Bëtsabe juabna oyebuambnaye tcomnëse, ¡momalisiá nda tcmënjajantšëta ca!”

### Pedro tojánayana Jesúsbioye ndoñe bonjanabuátma ca

<sup>69</sup> Chëntscuana Pédrëna shjoca yojtsemna, chashjoca yojtsetbemana. Chora, canye shembása chentša oservená tbojanobobeconá y tbojaniana: —Acnaca, Jesús chë Galileocáftaca conjánana ca.

<sup>70</sup> Pero Pédrëna, nyetscangbe delante tojánayana chábioye ndoñe bonjanabuátma ca, mëntšá jayanëse: —Ntšamo contsichamcá, ndoñe quešnátësertana ca.

<sup>71</sup> Chora Pedro bësoye yojábocna. Chentšna, inýë shembása oservená chábioye tbojáninýë y chë inýë entšanga tojanéyana: —Cha, Jesús chë Nazaretocáftaca enjánana ca.

<sup>72</sup> Pedro cachiñe tojánayana ndoñe bonjanabuátma ca, y mëntšá yojtsejúrayer: —¿Chë boyabása ndoñe quetsatabuatma ca!

<sup>73</sup> Chentšana, chë chentše imojtsemnënga Pédrëbioye tmojanobeconá y tmojaniana: —Ndegombre, ácnaca chë uatsjëndayënguentšá condmëna. Chë contsoyebuambnacá contsoyátëmbana ca.

<sup>74</sup> Chora Pedro tojanontšë ichámuana, Bëngbe Bëtsá chašotsecastigá ndoñe ndegombre soye stsichámëse ca; yojtsejúrayer y yojtsichamo: —¿Chë boyabása ndoñe quetsatabuatma ca!

Y cachora canye ngallo yojacánta. <sup>75</sup> Y Pedro yojenójuaboye ntšamo Jesús tbojanianama. Cha mëntšá tbojaniana: “Cabá ngallo ndécánta ora, aca unga soye cochanjayana ndoñe šconduabatma ca.” Y chentšana tojésanbocna y corente ngmënacá yojtsenóbošachna.

### Jesús, Pilátbioye tmojanánatse

**27** Tojanbinýna ora, nyetsca chë bachnangbe améndayënga y judiëngbeñe bëtsëjemëngcá améndayënga tmojánenefjna jenóyeunayama ntšamo jamëse Jesús chaóbanama. <sup>2</sup> As, Jesús tmojanëcúebatsëca y tmojanánatse, y chca, Pilato, chë Judeoca Romano mandadbe cucuatšifne tmojánboshjona.

### Ntšamo Judas tojanóbana

<sup>3</sup> Judas, chë boshjuaná, Jesús jóbanama ibojtsemnana tojanuena ora, puerte yojtseñócochinýena ntšamo tojánchjanguama, y chë unga bnétsana ralbenga chë bachnangbe améndayënga y bëtsëjemëngbioye tojtanamba, <sup>4</sup> y mëntšá tojanéyana: —Puerte bacna soye tijama. Atše canýe bacna soye ndbomná tšëngaftangbe cucuatšifne tijáboshjona chaóbanama ca.

Pero chënga tmojanjuá: —¿Chë soye ndayá bëngbiama? Cach aca cochátotatsëmbñe ca.

<sup>5</sup> As Judas chë ralbenga Bëngbe Bëtsabe bëts yebnentše yojesëtšana, y yojá y yojétsentšëyë.

<sup>6</sup> Chë bachnangbe améndayëngna chë ralbenga tmojtanatbaná y tmojánayana: —Quem crocenánama buiñe echanjuábuashana; ntšamo leyifne endayancá, bënga ndoñe quemuátobena chë Bëngbe Bëtsabiama soyënga quëcñayëtëmiñe chana jasegórana ca.

<sup>7</sup> Chcasna, chënga tmojanenoyeuná, chë crocenánacna chë Alfärerbe Luare ca uabaina fshantse jabuámiyana, y chca, canýe luare jtsebomnana ndayentšë chë inýe luarëngocana entšanga áshjajnënga jutabuantsama. <sup>8</sup> Chiyëca, chë fshantse mëntšcoñama Buiñe Luare ca iuabaina. <sup>9</sup> Chca, tojanochnëngo ntšamo Jeremías, chë Bëngbe Bëtsabe juabna oye-buambnayá, tempscá tojanayancá, ndayá yochjanchnënguama. Chana mëntšá tojánayana: “Y chë unga bnétsana ralbenga tmonjanca, ntsachetšá chë Israeloca entšanga cha tmojanamananacá, <sup>10</sup> y chánaca chë Alfärerbe Luare tmonjanbuamé, ntšamo Bëngbe Bëtsá šonjanmandacá ca.”

### Jesús Pilatbe delante

<sup>11</sup> Chentšana Jesús, chë mandado Pilátbioye tmojanánatse y cha mëntšá tbojantjá: —¿Aca chë judiëngbe rey cojtsemna ca?

Y Jesús tbojanjuá: —Aíñe, aca ndegombre yomncá tcjayana ca.

<sup>12</sup> Chë bachnangbe améndayënga y chë bëtsëjemënga Jesús mal imojtsequédantscuana, cha ndocá ntjojuana. <sup>13</sup> Chiyëca Pilato tbojantjá: —¿Ndoñe contsue-nana lempe ntšamo acbe contra montsichamcá ca?

<sup>14</sup> Pero Jesús ni canýe palabra ndoñe ntjojuana. Chë causa, chë mandado ndoñe yontsetátšëmbo ntšamo jajuaboyana.

### Jesús chaóbanana ca tmojánayana

<sup>15</sup> Bashco fiesta ora, chë mandado yojanamana canýe utamená jëtsboshjonana, nda entšanga tmo-

juabuayaná. <sup>16</sup> Chë tempo canýe uachuana utamená inamna, Jesús Barrabás ca uabainá. <sup>17</sup> Nyetsca entšanga chentšë imojtsemna ora, Pilato tojanatjá: “¿Tšëngaftanga nda šmojtseboše atšë chjëtsboshjonama, Jesús Barrabás o Jesús, chë Cristo ca monduabobuatmá ca?”

<sup>18</sup> Er chë mandado yojtsetátšëmbo, entšangna envidia causa Jesús chabe cucuatšifne tmojánboshjona-ma.

<sup>19</sup> Pilato chë tribunal ca uabáinentšë yojtsetbe-manëntscuana, chabe shema canýa tbojanichmó mëntšá cha jauyanama: “Chë nyetsca soyënguiñe tšabá ama entšábioye ndocá matsborlánana; chabe causa ibeta otjénayoca puerte sënjasufrí ca.”

<sup>20</sup> Pero chë bachnangbe améndayënga y chë bëtsëjemënga entšanga tmojanayëñaná, Barrabás jëtsboshjonama y Jesús chaóbanana ca chamuayanama.

<sup>21</sup> Chora chë mandado cachiñe tojanatjá: —¿Chë úatentšana nda šmojtseboše atšë chjëtsboshjonama ca?

Y chënga tmojánayana: —¡Barrabás ca!

<sup>22</sup> Pilato tojanatjá: —¿As, ndayá Jesús, chë Cristo ca uabobuatmáftaca atšë chjama ca?

Y nyetscanga tmojanjuá: —¡Motsecrucificá ca!

<sup>23</sup> Chora Pilato tojtëtanatjá: —¿Ndáyëca? ¿Ntšamo cha tojobuachjanguá ca?

Pero chënga cachiñe tmojanáyebuachena: —¡Motsecrucificá ca!

<sup>24</sup> Ndocá jamama yontsobenama y entšanga más jabuache enbouenanama tmojanontšëma Pilato tojáninýe ora, cha tojanmandá búyëshe juabuýëboñana y nyetscangbe delante yojtseñacuentšabiá. Mëntšá tojánayana: —Atšë ndocá chiyátayana, ni chiyatsma quem boyabása chaóbanama. Tšëngaftanga lempe šmonjanama ca.

<sup>25</sup> Chora nyetsca entšanga tmojanjuá: —¡Quemuá yochjóbanama, bënga y bëngbe básëngbiama castigo chaotsemna ca!

<sup>26</sup> As Pilato, Barrabás tbojtanboshjona; tojanmandá soldadënga Jesús jabuache chamotsetsetšënama y chentšana entšangbe cucuatšifne tbojánboshjona chamocrucificama.

<sup>27</sup> Chentšana, chë mandadbe soldadënga Jesús tmojanánatse chë mandadbe bëts yebnentšë chashjoye y choca nyetsca soldadënga chabe shëconana tmojanójoto. <sup>28</sup> Chorna, entšayá tmojtšanabotsca y shbuenda uafjatsenga entšayá mo reycá tmojanichëtjo. <sup>29</sup> Canýe coronësha tmojanapormá uchmašëfjangaca y tmojanabestšajó, y catšbioica cucuatšifne canýe niñëfja. Chorna, chabe shecuatšentšë imojtsofshëntsamëntšënyaye y imojtsáboyejuana. Mëntšá imojtsichamo: “¡Bayté judiëngbe Rey cochtsemna ca!”

<sup>30</sup> Chëngnaca imojtsanbuashëtjnaye y cach niñëfjaca bestšašentšë imojtsétsjanjnaye. <sup>31</sup> Y chca imnaft-sáboyejuanentšana, chë shbuenda uafjatsenga entšayá tmojtšanabotsca y cachabe entšayá tmojtanichëtjo, y chora, jacrucificama tmojanánatse.

### Jesús tmojanrucificá

<sup>32</sup> Chë entsānga chentsāna tmojánbocana ora, tmojánenbetše canye bacóftaca, Simón ca uabainá, Cirene pueblócá. As, cha tmojanmandá Jesusbe cruz chauetsocutsama.

<sup>33</sup> Canye luare Gólgota ca uabáinoca tmojánashjajna ora (hebreo biyañe chca endayana "Obanabe Bestšashe Luare ca"), <sup>34</sup> Jesúsbioye vínoye hiéloyeca enájuaabniye tmojanabuiyé chaofšema; pero yojaftántia y ndoñe yonjábošena chiye jofšiyama.

<sup>35</sup> Ya tmojanrucificá orna, chë soldadēnga Jesusbe entsāyamna, tsbanánoye tmojanétšena, chca, jtsetatšēmbuama ndabiama yochjanáquedama. <sup>36</sup> Y chora chēnga chentše tmojanotbiama Jesús jtsebojanýama. <sup>37</sup> Y chabe bestšashe juatsboicna canye uabemana soye tmojananjo. Chiñe yojetsayana ndáyeca cha tmojanrucificama, mēntšá: *MUA JESÚS ENDMĚNA, CHĚ JUDIĚNGBE REYca.*

<sup>38</sup> Utata bacna soye ochjajnayátnaca chēnga chentše tmojanarucificá, canya Jesusbe catšbioica y chë ínýana chabe uañicuayoica. <sup>39</sup> Y chējana imojtsachnějuana entsāngna, Jesús imojtsóyenguaye, imojtsobestšshanenaye <sup>40</sup> y imojtsatsaye: "¡Aca chë icobena Bēngbe Bētsabe bēts yebna jtsenásatajchcana y nýe unga tese jētsjebuana, cach aca mentsbocá! ¡Ndegombre Bēngbe Bētsabe Uaquiñá tcomnēse, chë cruzocana matastjango ca!"

<sup>41</sup> Chë bachnangbe amēndayēnga, ley abuátambayēnga y chë judiēngbeñe bētsējemēngcá mán-dayēnga cachcá imojtsóyenguaye. Mēntšá imojtsichamo: <sup>42</sup> "Cha ínýenga tojēftsatsēbacá, pero cachá jēntsbocama ndoñe quenátobena. Cha Israeloca entsāngbe Rey tojtsemnēse, chë cruzocana chauatastjango, y chca, bēnga chábeñe fchtsošbuachiye. <sup>43</sup> Cha tojayana Bēngbe Bētsabeñe puerte yojtsošbuaché ca. ¡Mora Bēngbe Bētsá chabuatsbocá, cha ndegombre muábioye tbobobonshánēse!, er cha tonjánayana Bēngbe Bētsabe Uaquiñá canmēna ca" —chēnga imojtsichamo.

<sup>44</sup> Y chë bacna soye ochjajnayata, Jesúseftaca ibojtserucificanátnaca cachcá ibojtsóyenguaye.

### Jesús tojanóbana

<sup>45</sup> Nýetsto orscana las tresēntscōñe, nýets quem luare yojtseibétata. <sup>46</sup> Chca orna, Jesús chabe biyañe tojanáyebuachena: "Elí, Elí, ¿lema sabactani ca?" (Chca endayana "Atšbe Bētsá, atšbe Bētsá, ¿ndáyeca cachcá šcojonýa ca?")

<sup>47</sup> Chca tmojanuena ora, báseftanga chentše imojtsemna entsānguentšana imojtsichamo: "Cha Elías, chë Bēngbe Bētsabe juabna oyebuambnayá, bontsechembuana ca."

<sup>48</sup> As chora, chentša canya tojēftsantójajo canye esponjēshe janguanguama, untja vínoyeca chēshe tojanfchecuacuá, canye niñēfjiñe tojananguēsētjo y Jesúsbioye tojanbeconá chaofšema. <sup>49</sup> Pero ínýengna

tmojánayana: "Cachcá mochjonýaye, er Elías tayochjabo jabátsbocama ca."

<sup>50</sup> Pero Jesús cachiñe jabuache tojanoyó y tojanóbana. <sup>51</sup> Y cachora, Bēngbe Bēngbe Bētsabe bēts yebnoca yojújonýana entsējua tsēntsaca yojtšená-jataye, tsbanánocana fshantsoye. Chējua bēñéjua inauamna y chë tsatsēntsaca inaujonýana. Fshantse yojuangmēmmana, ndētšbēnga yojtšashtētšana, <sup>52</sup> y chë cuevēshēnga obanēngaca yojtšētētfo y banga Bēngbe Bētsabe entsānga tmojtanayena. <sup>53</sup> Y chēnga, Jesús tojtanayentšana, chë cuevēshēnguentšana tmojánbocana, y Jerusalén, chë uámana bēts pueblo ca uabáinoye tmojánamashjna y ba entsāngbioye tmojánēbuacana.

<sup>54</sup> Chë soldadēngbe amēndayá y chë ínýengna, Jesús jtsebojanýama cháftaca tmojanuquedanga, chë fshantse yojuangmēmmanama tmojáninýe ora, y nýetsca chë yojtšēchnējuana soyēngama, puerte auatjanánēnga imojtsemna y tmojánayana: "¡Ndegombre quem boyabása Bēngbe Bētsabe Uaquiñá yomna ca!"

<sup>55</sup> Ba shembásēngnaca chentše imojtsemna y bēnocana imojtserreparana. Chēngna, Galileocana Jesús tmojanasto y cha imojanájabuachana. <sup>56</sup> Chë shembásēngbeñe imojtsemna María Magdalena; María, Santiago y Josebe mamá; y Zebedeobe uaquiñatbe mamá.

### Jesús tmojanatbontsá

<sup>57</sup> Ya yojtseibétatana ora, canye bomna boyabása, José ca uabainá, tojánashjango. Cha inamna Arimatea luarocá y Jesusbe ustoná. <sup>58</sup> José tojána Pilato jinýama, Jesusbe cuerpo jotjañama. As Pilato tojanmandá chë cuerpo chamontšabuáchema. <sup>59</sup> José chë cuerpo tojanca y canye nduatsēnga lino entsējuaca tbojanandmaná. <sup>60</sup> Y canye chabe tsēm cuevēshiñe tbojanajó. Tempo cha inamánda chë cuevēshna ndētšbēnguiñe chamopormama. Canye bēts ndētšbé tojansjoná y chë cuevēshoye amashjuanentše tojánachto; y chentšana José yojtšatoñe. <sup>61</sup> Pero María Magdalena y chë ínýe Mariyna chentše tbojtsanoquedañe y chë cuevēshe ndirichiñe tbojanótbema.

### Soldadēnga tmojána Jesús yojtšatbontsánentše jtsebojanýama

<sup>62</sup> Yēfsana, chë ochnayaté, chë bachnangbe amēndayēnga y chë fariseunga cányiñe tmojána Pilato jinýama. <sup>63</sup> Tmojanianya: —Taita, bēnga fsēntsejuabná ntšamo chë bostero cabá ainá ora tonjánayanama, chë unga tianoye cha jtayenama ca. <sup>64</sup> Chiyeca, momandá chë cuevēshe soldadēnga chamotsashanyá unga tentscuana. Chca, chabe uatsjēndayēnga ndoñe ibeta chamondabo chabe cuerpo jabétsatbēbama, y chentšana chēnga entsānga chamúyana, Jesús tojtayena ca. Y chca, chabiama quem ústonoye bostero soye, chë cachabiama tojánayana soyēngama puerte más bacá nántsemna ca —chēnga tmojanianya.

<sup>65</sup> As Pilato tojanéyana: —Tšëngaftanga cach tšëngaftangbiamna soldadënga šmondábamna. Motsajna y chë cuevëshe cuedádoca šmochtsashanýá, ntšamo šmondëtatšëmbcá ca.

<sup>66</sup> Chora chënga tmojána chë cuevëshe jtsashanýama; chë ndëtšbena, tsengájašeca imojuinýnaná, ntso-tatšëmbcá ndocná choye chaondámashënguama, y soldadënga chentše tmojëftsanabashejuana.

### Jesús tojtanayena

**28** Ochnayté chentšana, chë inýe semana bojatšenté yojtsebínýana ora, María Magdalena y chë inýe María tbojána cuevëshoye jarrepárama. <sup>2</sup> Ndeolpe fshantse tojanangmémana, er Bëngbe Bëtsabe canýe ángel celocana tojántasma, chë cuevëshoye tojanobeconá, chë atamiana ndëtšbé tojtsanjuaná y chiñe tojanótbema. <sup>3</sup> Chë ángelna mo canýe tcuinýejcá yojtsebuashinýinýana, y chabe uichëtjonëjuangá uafjantsëjuangá mo jantsetëshcá yojtsamna. <sup>4</sup> Chë soldadënga chca tmojáninýe ora, de auatja yojtsangmëmnye y mo obanëngcá imojtsemna.

<sup>5</sup> Chora chë ángel chë shembásatbioye tojanéyana: “Ndoñe batauatjana. Atše séntsetatšëmbo tšëngaftanga Jesús, chë tmonjancrucificá cha šmojtsenguama.

<sup>6</sup> Cha muentše ndoñe quenátsmëna; cha tontayena, ntšamo cachá tonjanayancá. Mabata y šochjinýe cha endétsesegoranentše. <sup>7</sup> Betsco motsata y chë uatsjëndayënga šochjáuyana: ‘Jesús tontayena y tšëngaftangbe natsana Galileoye echanjá; choca šmochanjinýe ca.’ ” Y chora cha tojánayana: “Chca šondmëna tšëngaftanga jauyanana ca.”

<sup>8</sup> Cachora chë shembásata chë cuevëshentšana tbojésanbocna, auatjanánata pero puerte oyejuayata, y tbojëftsanotjajo chë soye chë uatsjëndayëngbeñe jobuambayama. <sup>9</sup> Y ndeolpe Jesús chata tojánëbëbuacna y tojanacheuá. Chatna, chábioye tbojanobëconata, tbojtanadorata y chabe shecuatše shéconana imojtbojcuá. <sup>10</sup> Y Jesús tojanéyana: “Ndoñe batauatjana. Motsata atšbe uatsjëndayënga, atšbe catšátanga jáuyanama Galileoye chamotsá y choca atše šmochjinýe ca.”

### Ntšamo chë soldadënga tmojánayana ndayá tojanochnënguama

<sup>11</sup> Chë shembásata ibojtsayëntscuana, básefta soldadënga chë bëtš puebloye tmojána y ntšamo tojanopasacá lempe chë bachnangbe amëndayëngbeñe tmojanobuambá. <sup>12</sup> As chë bachnangbe amëndayënga, chë judiëngbeñe bëtšëjemëngcá mandayëngaftaca tmojánenefjna jenóyeunayama. Chëngna chë soldadëngbioye bëtscá crocénana tmojtanatšatá, <sup>13</sup> y mëntšá tmojanabuayená: “Tšëngaftanga šmochjayana, ibeta šmotsomáñëntscuana, Jesusbe uatsjëndayënga tmojabo y chabe cuerpo tmojabëtsatbëba ca. <sup>14</sup> Y chë mandado chë soyama chaojátatšëmbonëse, bënga lempe cháftaca fchjenóyeunaye, chca, tšëngaftangaftaca ndocá chaondopasama ca” —chënga tmojanéyana.

<sup>15</sup> As chë soldadënga chë crocénana tmojanóyëngacñe y tmojanma ntšamo chë mándayënga tmojanabuayenacá. Ba entšanga chë cuento tmojanuena y mëntscóñama judiënga cachcá mondbëtsichamo.

### Jesús chë uatsjëndayënga tojanichamó, Bëngbe Bëtsabe soyëngama nyëtsquénache jábuayenama

<sup>16</sup> Chentšana, chë bnëtsana canýe uatsjëndayënga Galileoye tmojána, chë ndëmua tjoye Jesús chënga tojanabuayená choye. <sup>17</sup> Y Jesús tmojáninýe ora, tmojtanadorá. Pero báseftangna imojétsejuabnaye nderado cha ndoñe Jesús yontsemna ca. <sup>18</sup> Jesús chëngbioye tojanobeconá y tojanéyana: “Bëngbe Bëtsá nyëts mando atše šonjatšetá celoca y quem luarentše. <sup>19</sup> Chcasna, motsajna, nyëts luarënguenache oyenënga atšbe uatsjëndayënga šmochjábiama. Entšanga šmochjubaye atšbe Taitá, atše chabe Uaquiñá y chë Uámana Espíritbe uabaina jayanëse, átšbeñe šmošbuachéyeca, <sup>20</sup> y šmochjabuatambá lempe ntšamo atše tchojamëndacá chënga chamóyeunama. Y ndegombre atše nyëts tempo tšëngaftangaftaca chanjëftsemna, quem luare jopochócantscuana ca” —Jesús tojanéyana.

# San Marcos

## Juan chë Ubayaná entsanga yojanabuayiyiná

**1** Mëntšá tojanoboatsé chë tšabe noticiënga Bëngbe Bëtsabe Uaquiñá Jesucristbiama.

<sup>2</sup> Ntšamo bayté entsemna, chë Bëngbe Bëtsabe juabna oyebuambnayá Isaías chabe librëšaňe yojëftsayancá, ntšamo Bëngbe Bëtsá chabe Uaquiñábioye ibojauyanama cha tojanábema ora:

Minýe, atšbe abuayiyiná acbe natsana sentsichamá,

chë aca jabama lempe echanjapróna cha.

<sup>3</sup> Entšanga ndoyena luaroca cha enduáyebuache mëntšá:

“Bëngbe Utabná echanjabo ca; mo nda canýe benache tojtseprontacá canýe uámana entšá jashjanguama, cachcá tšëngaftanga, cha jabama ainaniňe tšabe juabnéngaca šmochtseprontana ca” —cha tojanábema.

<sup>4</sup> Chcase, Bëngbe Bëtsá Juan tbojanichmó, y cha tojánbocna entsanga ndoyena luaroca, Bëngbe Bëtsabe soyëngama abuayiyinaye y entsanga ubáyana. Cha entsanga yojanëtsësnaye: “Tšëngaftangbe bacna soyëngama ngménaca šmochtenójuaboye, chca amana šochtsajbaná, y Bëngbe Bëtsabe benache šmochtishache. Chora cbochjúbaye, y Bëngbe Bëtsá tšëngaftangbe bacna soyëngama cmochanjáperdonaye ca.” <sup>5</sup> Nýets Judea luarocana chábioye entsanga imojánbocana, y Jerusalenentsana nýetsca entságnaca, y Bëngbe Bëtsábioye chëngbe bacna soyëngama jaimpáda chentsana, Juan Jordán ca uabaina béjayiňe chënga yojanébáyana.

<sup>6</sup> Juanbe entsáyá inauapormana camellbe stjënashca y bobache yojanasnana; chapulinatémënga y tjaňe méloye inasaye. <sup>7</sup> Y mëntšá entsanga yojanëtsësnaye: “Atšbe ústonoye inýa echanjabo, atšbiama más obenana bomná; chíyeca atše merecido taitatobuajoňe, ni mo jotsejbiyana chabe shecochëtjonëshentša corriëja jajafjonama. <sup>8</sup> Atšna búyeshca cbondëubáyana, pero chë echanjabábeyecna, Bëngbe Bëtsá bochanjíchmuá chë Uámana Espíritu tšëngaftangbe ainaniňe cháumashënguama ca.”

## Juan, Jesúsbioye tbojanabaye

<sup>9</sup> Chë tempo, Galilea luarocana Nazaret pueblentsana Jesús yojëftsebocna, y Juan yojtsemnoye tojána; y Jordán béjayiňe Jesúsbioye cha tbojanabaye.

<sup>10</sup> Bejajoicana yojtashëbëbocna orna, tojáninýe celoca

atëfjniňe, y chë Uámana Espíritu chábioye mo palomatemcá yojtsastjajuana. <sup>11</sup> Y celocana Bëngbe Bëtsá mëntšá tbojaniyana: “Acna atšbe bonshana Uaquiñá condmëna; acbiama corente sëntsoyejuá ca.”

## Jesús tojanobená Satanás jayénjanama

<sup>12</sup> Chentsana chë Uámana Espíritu Jesúsbioye entsanga ndoyena luaroye tbojanánatse. <sup>13</sup> Canta bnëtsana te chë entsanga ndoyena luaroca tbojanjëtana, y Satanasma yojanabó jisháchichiyama. Chë luar-entšë tšátjaye bayënga imnajena; chentsana, Bëngbe Bëtsabe angelënga cha imojtseservena.

## Jesús tojanontšë Galileoca chabe trabajo jamana

<sup>14</sup> Juan cárceloye tmojanëtámentšana, Jesús Galileoye tojesaná; y chiňe cha yojanabuayiyiná chë tšabe noticiënga Bëngbe Bëtsabiama. <sup>15</sup> Jesús entsanga yojanëtsësnaye: “Ora tocjobuache, Bëngbe Bëtsabe amëndayana echanjóshjango. Tšëngaftangbe bacna soyëngama ngménaca šmochtenójuaboye, y chca amana šmochtsajbaná y Bëngbe Bëtsabe benache šmochtishache; y ainaniňe chë tšabe noticiënga Bëngbe Bëtsabiama šmochjójyëngacňe ca.”

## Jesús tojánachembo canta boyabásenga beonga ashebuánayata cha chamuastama

<sup>16</sup> Galilea uafjajónaye tsachajana Jesús yojtsaye ora, cha tojánanye Simón y chabe uabentsá Andrés; chatna atarraiëshangá ibnetsashbuëtsetšaňe, er beonga ashebuánayata chata ibnamna. <sup>17</sup> Chora Jesús tojanéyana: “Atšeftaca mabata. Atšë cbochanjábiamá Bëngbe Bëtsabiama entsanga anguayata; y morscana, nýe beonga ashebuánayata ndoňe quešochátsmëna ca.”

<sup>18</sup> Y cachora chatbe atarraiëshangá cachcá tbojésanaboshjuana y Jesús tmojanasto.

<sup>19</sup> Más chcoye yojátaye orna, Jesús tojánanye Santiago y chabe uabentsá Juan, Zebedeobe uaquiñata; chatna barquëshañe ibnetsotbemaňe, chatbe atarraiëshangá atapórmayiňe. <sup>20</sup> Chora Jesús chë útata tojánachembo; as chatna, chatbe taitá Zebedeo chë barquëshañe tmojésanboshjona chabe peóngaftaca y Jesúseftaca tbojtsanoňe.

### Jesús, bacna bayějbe juabna cán̄yabioye tbojanbo- juaná

<sup>21</sup> Chentšana, Jesús y chabe uatsjéndayēnga Capernaum ca uabaina pueblaca tmojánashajna. Chē ochnayté, Jesús chē judiēngbe enefjuana yebnentše tojánamashēngo y yojóntša entsānga jabuátambama. <sup>22</sup> Entšānga imojtsenjanaye ntšamo Jesús yojtsabuatambacá, er chama mo can̄ye mando bomnacá yojtsóyebuambnaye, ndoñe n̄ye ntšamo Moisesbe ley abuatambayēnga imojanabuatambacá. <sup>23</sup> Chē pueblentše judiēngbe enefjuana yebnentše yojtsemna can̄ye entsá bacna bayēja uambayá, y chábeyeca chē boyabása yojóntša mēntšá uayebuáchana: <sup>24</sup> —¿Ndayama bēngbioye tēcjabo, Jesús Nazaretocá? ¿Tcojabo bēnga jabétsapochocama? Atše sēndétatšēmbō nda aca comnama, aca chē Bēngbe Bētsabe Uamaná ca.

<sup>25</sup> Chora Jesús chē bayějbioye tbojtsanácacana, y tbojaniana: —¡Iytēca móbema y chábentšana maisebocna ca!

<sup>26</sup> Chora chē bacna bayějna tojanma chē boyabása ataque chaboshachama, jabuache tojanoyó y chábentšana tojésanbocna. <sup>27</sup> Chama, n̄yetsca entsānga ojanánēnga imojtsemna, y mēntšá imojtsentjanaye: “¿Ndayá chca yojtsemna? ¿Can̄ye tsēm buatēmbana soye? ¡Quem boyabása mando bomnacá y obenacá entsabuatambá, y chca, chē bayējēnga cha jtsaméndayana y chēngnaca joyeunayana ca!”

<sup>28</sup> Y betesco n̄yets Galilea luarentša pueblēnguenache Jesusbiana yojtsótatšēmbō.

### Jesús, Simón Pédrēbe uambén mamábioye tbojanshná

<sup>29</sup> Chentšana, chē enefjuana yebnentšana tmojánbocana y Santiago y Juánoftaca Jesús tojána, Simón y Andresbe yebnoye. <sup>30</sup> Simonbe uambén mamá šocá inajóna, jabuache calentóraca, y Jesúsbioye chē šocabiana tmojaniana. <sup>31</sup> As chora, Jesús tojanobeconá, chē šocábioye tbojanábuacushache y tbojanatsbaná. Cachora chē calentora tbojtsanóbojuanañe; y cachora cha tojtantsbaná y tojanontsé chēnga jobuácuedana.

### Jesús ba šoquēnga tojanashná

<sup>32</sup> Chē te jetiñe, shin̄ye ya yojuenatjēmba ora, chē luarentša n̄yetsca šoquēnga y bacna bayējēnga uambayēnga Jesúsbioye tmojanēnatse; <sup>33</sup> y n̄yetsca entsānga bēšoye imojobeconá. <sup>34</sup> Jesús banga tojanashná, n̄yetsca šocana bomnēnga, y ba bacna bayējēnga entsānguentšana tojtanebuacna; y ndoñe tonjanalesenciá chē bayējēnga chamóyebuambama, er chēnga imnatátsēmbō cha chē Cristo bētsemnama.

### Chē judiēngbe enefjuana yebnēnguenache Bēngbe Bētsabe soyēngama Jesús yojanabuayiná

<sup>35</sup> Yēfsana cabá cachēse, cabá ibetcá, Jesús tojéftsantsbaná, chē pueblentšana tojéftsanbocna y entsānga ndoyena luaroye tojtsanoñe, choca Bēngbe Bētsáf-

taca jencuéntama. <sup>36</sup> Pero Simón y chabe enutēngna tmojána jetsenguanguama; <sup>37</sup> y tmojtsanin̄yena ora tmojaniana: —N̄yetscanga cmontsenguá ca.

<sup>38</sup> Y Jesús tojanéyana: —In̄yoye cuajna, cam béconana pueblēngoye, chíñnaca Bēngbe Bētsabe soyēngama entsānga chayábuayenama; er chama atše sēnjabo ca.

<sup>39</sup> Y chentšana, Jesús yojánana Bēngbe Bētsabiana entsānga abuayin̄yaye chē judiēngbe enefjuana yebnēnguenache, n̄yets Galileiñe, y entsāngbentšana bacna bayējēnga yojtēbuacana.

### Jesús, can̄ya bacna nguayanánaca šocábioye tbojanshná

<sup>40</sup> Chentšana, can̄ye boyabása bacna nguayanánaca šocá Jesúsbioye tojanobeconá; y joshamēntšase mēntšá tbojanimpadá: —Aca tcojtsebošēse, aca catjobenaye atšbe šocana jtsebojuánama ca.

<sup>41</sup> Jesús chabiana tbojanongmé; cucuátšeca tbojánbojajo y tbojaniana: —Aíñe sēntseboše. ¡Šocana cbotsebojuaná ca!

<sup>42</sup> Y cachora chē šocana tbojtsanóbojuanañe y tšabá yojtsatsmēna. <sup>43</sup> Chora Jesús chábioye tbojtanchimó, pero puerte mēntšá tbojanmandá: <sup>44</sup> —Mouena; ndocnábeñe quem soye cattsecuéntaye; n̄ye Jerusalenoca báchnēbioye motsa y cha cochjin̄yiniye aca mora ya tšabá cojtsatsmēnama. Chora cochjuátšēmbona ntšamo Moisés chabe leyiñe tojanmandacá, Bēngbe Bētsábioye chama jētschuayama, chca, n̄yetsca entsānga chamotatšēmbona mora ya tšabá cojtsatsmēnama ca.

<sup>45</sup> Pero chē boyabásana, chentšana tojéftsanbocna y cachora yojóntša n̄yetsquénache entsānga yapa acúntayana Jesús tbojanshnama. Chē causa, Jesús ndoñe yontsobena entsāngbe delante pueblēnguenache jtsanana, ndayá n̄ye chē pueblēnga béconana y n̄yetsca chē entsānga ndoyena luarēnguiñe yojánana; pero n̄yets luarēngocana chábioye entsānga imojánashjuana.

### Jesús, can̄ye jama ndobenábioye tbojanshná

**2** Chentšana, Jesús Capernaumoye tojtashjango; y entsānga imojátatšēmbona, Jesús yebnentše yojtsatsmēnama. <sup>2</sup> Mallajta entsānga chentše tmojanójo-to; chē causa chē yebnentše ya tondaye más luare entsāngbiana yontsemna, ni mo chē amashjuanentše, y Jesús Bēngbe Bētsabe soyēngama yojtsabuayin̄yaye. <sup>3</sup> Chora tojanopasá, canta boyabásēnga tmojánashjango, can̄ye entsá jama ndobená imojtsaismana. <sup>4</sup> Pero ndoñe tmonjanobená Jesús yojtsemnoye cha juambana, tša entsānga causa. Chcasna, chē canta boyabásēnga yebna tsbanánoca, Jesusbe tatsēt-soca batsá tmojánatēfjo y chējana chē jama ndobená tjuashiñe tmojanéstjango. <sup>5</sup> Jesús tojánin̄ye chēnga tša imojtsošbuaché chē šocá jáshnama cha yojanobenama; as chē jama ndobenábioye tbojaniana: “Sobreno, mouena; acbe bacna soyēnga tcbontsebojperdoná ca.”

<sup>6</sup> Chentše báseftanga judiëngbe ley abuatambayënga imnatbemana; chënga chora mëntšá imojtsejuabnaye: <sup>7</sup> “¿Ntšámoyeca quem boyabása chca yojtsichamo? Jesús ndoñe tšabá Bëngbe Bëtsabiama quenátichamo; mo chábioye cuafjoyenguangcá entsemna. Ndocna entšá quenátobena ínÿabioye bacna soyëngama japerdónana; nÿe Bëngbe Bëtsana aíñe ca.”

<sup>8</sup> Pero Jesús cachora lempe yojtsetátšëmbo ntšamo chënga ainanoca imojtsejuabnacá; as tojanéyana: “¿Ndáyeca chca tšëngaftanga ainaniñe šmojtsejuabná?

<sup>9</sup> ¿Tšëngaftangbiama ndayá más paselo nántsemna tšëngaftangbe delante chë jama ndobenábioye atše jauanana: ‘Acbe bacna soyënga tcbontseboperdoná’, o ‘Matëtsbaná, acbe tjuashe mesocñe y motsa ca?’ <sup>10</sup> Y chca, mora atše cbochanjínÿanÿiye Bëngbe Bëtsá Entšá tbojanbemá quem luariñe obenana yobomnama, entšanga bacna soyëngama jáperdonama ca” —Jesús tojánayana.

Y chë jama ndobenábioye tbojanayana: <sup>11</sup> “Atše cbëyana, matëtsbaná, acbe tjuashe mesocñe y acbe yebnoye motsatoñe ca.”

<sup>12</sup> Cachora chë jama ndobená tojtantsbaná, chabe tjuashe yojescñe, y entšangbiajana chentšana yojësebocna. Chama nÿetsca entšanga imojenjaná y Bëngbe Bëtsábioye imojtsatschuanaye, y mëntšá imojtsichamo: “Nÿa ndocna te tša bëts soye chemuáisinÿe ca.”

### Jesús, Levíbioye tbojanchembo chabuastama

<sup>13</sup> Chentšana, Jesús cachiñe chë uafjajónaye tsachoye tojesaná; ba entšanga chábioye imojobeconá, y Jesús yojtsabuátambaye. <sup>14</sup> Chentšana yojtsataye orna, Jesús tbojáninÿe Levíbioye, Alfeobe uaquiñá, yojtsanotbemañe, entšanga impuesto atjanayacá inétsotrabajañe. Chora Jesús tbojanayana: “Šmasto ca.”

Y Leví tojantsbaná y tbojanasto.

<sup>15</sup> Tojanopasá, Jesús Levibe yebnentše yojtsesaye, y banga Romocama entšanga impuesto atjanayënga y inÿe bacna entšanga, mesëshentše cánÿiñe imojtsetbiámama, Jesús y chabe uatsjëndayëngaftaca; er ba entšanga cha imojústona. <sup>16</sup> Chë fariseunga y chë ley abuatambayënga, chë entšangftaca Jesús yojtsesama tmojáninÿe ora, chabe uatsjëndayëngbioye tmojanatjá: —¿Ndáyeca tšëngaftangbe buatëmbayá, entšanga impuesto atjanayëngaftaca y bacna soye amëngaftaca yojtsesá ca?

<sup>17</sup> Jesús chca tojanuena; as mëntšá tojanéjua: —Chë salud tmotsobomñënga, ashnayá ndoñe ntsëjabótana, pero chë šoquëngna aíñe. Y atše ndoñe chiyátabo chë Bëngbe Bëtsabe bominiñe tšabá amënga jabáchembuama, ndayá chë bacna soye amënga imomna ca juabnayënga átšbioye jabáchembuama ca.

### Jesús tmojanatjá chë Bëngbe Bëtsáftaca jencuëntama tondaye saytescama

<sup>18</sup> Canÿe, Juan chë Ubayanabe ústonënga y chë fariseungbe usetonënga, Bëngbe Bëtsáftaca jencuëntama tondaye ntjascá imojtsemna ora, básefta entšanga Jesúsbioye tmojanobeconá y mëntšá tmojanayana: —Juanbe ústonënga y chë fariseungbe usetonënga monduamana tondaye ntjascá jtsemnana Bëngbe Bëtsáftaca jencuëntama. ¿Ndáyeca acbe uatsjëndayënga ndoñe chca ca?

<sup>19</sup> As Jesús tojanéjua: —Chë casamento fiestentše, chë ófjanënga saná ndoñe ntsabuáshebenana. ¿Ntšamo chca ndoñe nántsemna? Chë tojobouamá entšá chëngaftaca tojtsemnëntscuana, chë ófjanënga bëtscá jasana y cháftaca oyejuayënga jtsemnana. <sup>20</sup> Pero ora echanjobuache y chë boyabása chëngbentšana mochantsánatseñe; chora cocayé chë ófjanënga echántsamna tondaye ntjascá jtsemnana. Ntšamo chë tojobouamá boyabása y chë ofjanëngaftaca endmëncá, cachcá endmëna atše y atšbe uatsjëndayëngaftacnaca.

<sup>21</sup> “Ndocná, canÿe tanguá entšayá, base tsëm entšëjuaca jtarmëndana; chca tcojamëse, chë tsëm entšëjua jtsabéconana y chë tanguá entšayá más jtsatanécanana, y chca, chë uátanëcniñe más bëtsiñe jtsabemana. <sup>22</sup> Y cach ndoñe, chë tojtseshayana vínoye tanguá jasabenguiñe ntjataftsúamayana; er chë jasabenga jtseshébëfjuana y chë vínoye jtsabuáshanana, y chë vínoye y chë jasabenga tondayama ntjatoservénana. Chíyeca comna, chë tojtseshayana vínoyna tsëm jasabenguiñe juaftsúamana; chca, chë jasabenga y chë vínoye josérviana ca” —Jesús tojánayana.

### Jesúsbe uatsjëndayënga canÿe ochnayté trigo tmojanátabebe

<sup>23</sup> Canÿe ochnayté, Jesús canÿe jajajana yojtsaye; y chabe uatsjëndayënga chëjana imojtsachnéjuana ora, tmojanontšé trigo juatabebiana. <sup>24</sup> Chë fariseunga chca imojinÿe ora, Jesúsbioye tmojanayana: —Minÿe. ¿Ntšamo acbe uatsjëndayënga montsamcá, ndoñe quenátslesenciana ochnayté jtsamama ca?

<sup>25</sup> Pero cha tojanéjua: —¿Ndoñe šmëndualía y šmondétatšëmbo ntšamo Rey David y chabe enutënga tmojanmama shëntseca imojtsemna ora y jasama yojtsëjaboto ora? <sup>26</sup> Chca ora, Abiatar chë judiëngbe bachnangbe más uámama amëndayá inamna ora, David Bëngbe Bëtsabe yebnoye yojámashëngo, y chë luarëntše Bëngbe Bëtsá yojamnama inÿinÿnaye tandëšënga yojase; y chë cháftaca imojánajna entšangnaca yojátataye. Y chë tandëšna nÿe bachnangbiama belesenciana jasama. Masque David chca tojanma, Bëngbe Bëtsá ndoñe tonjánayana David canÿe bacna soye tojanma ca.

<sup>27</sup> Y Jesús más tojánayana: —Bëngbe Bëtsá ochnayté entšabiama tojama y entšá ndoñe tbonjánbema nÿe

chë ochnayté ndoñe chaondëtrabajama. <sup>28</sup> Chíyeca, Bëngbe Bëtsá Entšá tbojanbemá, ndayá entšá ochnayté tojtsama sóynaca jtsemándayana ca.

### Chë buashana cucuatše bomna entšá

**3** Chentšana, Jesús cachiñe chë judiëngbe enefjuana yebnoye tojésanamashëngo; y chentše canye boyabása yojtsemna, buashana cucuatše bomná.

<sup>2</sup> Chë fariseunga chiñe imojtserrondana jinýama nderado Jesús chë ochnayté chábioye tabuanjashnama, as chca chënga jtsebomnama ndaye sóyeca cha mal jaquédana. <sup>3</sup> Chora Jesús chë buashana cucuatše bomnábioye tbojaniana: —Chentše, entsangbe delante motsa ca.

<sup>4</sup> Y chë fariseunga tojanatjá: —¿Ndayá yojtselesenciana ochnayté jamama, tšabe soye o ndoñe tšabe soye? ¿Jatsbocama o jtsepochócama ca?

Pero chënga ndocá tmonjanjuá, nye iytëca imojbiama. <sup>5</sup> Chora Jesús rábiaca y ngménaca chë fariseunga tojanënyané, chënga ainaniñe josértama ndoñe montseboše causa; y chë buashana cucuatše bomnábioye tbojaniana: —Macuenyanëjaná ca.

As chë boyabása tojanacuenyanëjaná, y chora tšabá chëtša yojtsatamna cach inýetsacá. <sup>6</sup> Pero chë fariseungna, chentšana tmojésanbocana ora, Rey Heródesbe ustonëngaftaca tmojanenoyeuná Jesusbe contra, y tmojanontšë juabnayana ntšamo jamëse Jesús jóbama.

### Mallajta entsanga Jesúsbioye tmojanobeconá

<sup>7</sup> Chentšana, Jesús chabe uatsjëndayëngaftaca tojanoluare mar béjaye tsachoye, y Galileocana bëtsacá entsanga tmojanasto. <sup>8</sup> Inye entságnaca chábioye tmojanobeconá Judeocana, Jerusalenocana, Idumea ca uabaina luarocana, Jordán béjaye chenguanocana, Tiro y Sidón pueblëngocana. Chënga tmojanobeconá, Jesús tša bëts soyënga yojtsamama tmojanuena ora. <sup>9</sup> Jesús chabe uatsjëndayënga tojanéyana: “Motsajna y canye barquëshá atšbiama šmochjuapróna, tša entsanga ndoñe chašmondëtsatsëntšnama ca.” <sup>10</sup> Er cha banga tojanashná, y chë causa, nyetscanga šocana bomnënga chábioye tmojanajuatsëntšená cha jabojuama.

<sup>11</sup> Y chë bacna bayëjënga uambayëngna, Jesús tmojinýe ora, betscó chabe shecuatšentše imojtsofshëntsamëntšenaye, y chë bacna bayëjëngbeyeca mëntšá imojtsáyebuache: “¡Aca Bëngbe Bëtsabe Uaquiñá condmëna ca!”

<sup>12</sup> Pero Jesús puerte tojanamëndá, nda cha bëtsemnama entsangbe delante ndoñe chamondëtsichámua.

### Jesús chë bnëtsana uta uatsjëndayënga tojanabacacá

<sup>13</sup> Chentšana, Jesús canye batsjoye tojántsjua, y ndëmuanýënga tšabá tbojanínýanënga tojánachembo. Y chëngna chábioye tmojanobeconá. <sup>14</sup> Chora, chënguentšana bnëtsana útata tojanëbuáyana,

chamotsetjëmbambnama, y Bëngbe Bëtsabe soyëngama entsanga chámabuayenama; <sup>15</sup> y chënga obenana tojanatsatá entsángbentšana bacna bayëjënga jtëbuacanama. <sup>16</sup> Mënga mondëmëna chë bnëtsana uta bocacánënga: Simón, chë ndábioye Pedro ca Jesús tbojanabaye; <sup>17</sup> Santiago y chabe uabentsá Juan, Zebedeobe uaquiñata, chata tojanëbaye “boanerges ca”, y chca endayana “uajuesayabe uaquiñata ca”; <sup>18</sup> Andrés, Felipe, Bartolomé, Mateo, Tomás, Santiago, Alfeobe uaquiñá; Tadeo, Simón chë celote ca uabobainá; <sup>19</sup> y Judas Iscariote, chë chentšana ndoñe baytesna, Jesús uayayëngbe cucuatšiče bochjanboshjoná.

### Ley abuatambayënga tmojánayana, Jesús Satanásbentšana obenana tojanóyëngacñe ca

<sup>20</sup> Chentšana, Jesús yebnoye tojtanamáshëngo, y tša entsanga chentše tmojanójoto; chë causa, ni cha ni chabe uatsjëndayënga, ni mo jasama luare ndoñe imontsebomna. <sup>21</sup> Jesusbe pamillanga ntšamo cha yojtsepásama tmojántatšëmbona ora, tmojána cha jetsbetšama, er entsanga imojtsencuëntaye cha opá tojtšanóbema ca.

<sup>22</sup> Y chë ley abuatambayënga Jerusalenocana tmojánashjajnëngna Jesusbiamá mëntšá imojtsichamo: “Chabe ndegombre mandayá Beelzebú, cach Satanás yojtsemna. Cha, chë bacna bayëjënga amëndayá, Jesúsbioye obenana tbojatšëtá entsángbentšana bacna bayëjënga chauatëbuacnama ca.”

<sup>23</sup> Chënga chca imojtsichámuama, Jesús chënga tojánachembo, y cuentëngaca tojanontšë jáuyanana, jinýanýiyama chënga canye ndoñe ndegombre soyiñe imojtsemnama, mëntšá: “¿Ntšamo Satanás nantsobena cachá jtenábocnama ca? <sup>24</sup> Canye amëndayábentše entsanga tmojtsenojatá y tmojtsenáyase, chë amëndayana ndoñe ntjatotonana. <sup>25</sup> Cachcá, canye yebnentše pamillanga tmojtsenojatá y tmojtsenáyase, chë pamillanga ndoñe tšabá nyets tempo quemochátsmëna. <sup>26</sup> Y cachcá, Satanás y chábënga ndoñe tmontsenëyeunana y cachabe contra tojtsemnëse, chabe amëndayana ndoñe más queochátstotona; y cha ya ndoñe más chëngbe amëndayá queochátsmëna.

<sup>27</sup> “Ndocná quenátobena canye corente añemo bomna entsabe yebnoye jamashënguana y chabe soyënga jtsebocana, ndoñe natsana tconjshëtsebatsëquëse. Nye tcojshëtsebatsëquëse cocayé cuanjobenaye cha jefcana.

<sup>28</sup> “Ndegombre cbéyana, Bëngbe Bëtsá entsangbe nyetsca bacna soyënga echanjáperdonaye, y ntšamo Bëngbe Bëtsabiamá y inýengbiama ndoñe tšabá tmontsichamo soyëngnaca; <sup>29</sup> pero chë Uámana Espiritbiama ndoñe tšabá ichámëngna ndocna te queochátaperdonaye, er nyetsca tescama castigánënga jtsemnama chënga jtsamnana ca” —Jesús tojánayana.

<sup>30</sup> Jesús chca tojanéyana, er chënga imojtsichamo cha bacna bayëja ibojtsambá ca.



### Chë Jesusbe ndegombre pamíllanguentsënga

<sup>31</sup> Chëntscuana, Jesusbe mamá y catsátanga choye tmojánashjajna, pero nÿe shjoca imojtsemna; y canÿa tmojanichmó cha jachembuama. <sup>32</sup> Chë ba entsãnga chentse chabe shëconana imojtsetbiámanëngna, chora tmojaniana: —Acbe mamá, acbe catsátanga y uabénanga shjoca montsemna; aca cmontsenguá ca.

<sup>33</sup> Chora cha tojanéjua: —¿Nda atšbe mamá yomna, y ndëmuanyënga atšbe catsátanga ca?

<sup>34</sup> Chentsãna, chë chabe shëconanana tbiamanëngbioye jarrepárase, tojánayana: —Quemënga mondmëna atšbe mamá y atšbe catsátanga. <sup>35</sup> Er ndánaca, ntšamo Bëngbe Bëtsá yobošcá tojtsamá, jtsemnana atšbe catsata, atšbe uabena y atšbe mamá, atšbe ndegombre pamíllanguentsá ca.

### Chë jenabe cuento

**4** Chentsãna, uafjajónaye tsachoca Jesús tojtëtanontsé Bëngbe Bëtsabe soyëngama jabuátambama. Mallajta entsãnga tmojanobeconá causa, chë uafjajónayentse yojanamna canÿe barquëshoye Jesús tojánašëngo y tojanótbema; y chë entsãnga tsachoca imojtsemna. <sup>2</sup> Chora cuentëngaca ba soyëngama tojanabuatambá.

Mëntšá tojanéyana: <sup>3</sup> “Šmochjouena; canÿe jená chë jénaye jaujuquëshama yojéftsebozna. <sup>4</sup> Yojtsëjquëshaye orna, básefta jénaye benache juachañe yojuatquécjána; pero jaja shloftšënga imojástjajna y lempe imojtsósañe. <sup>5</sup> Inÿe meshëngna ndëtsbenguiñe yojuatquécjána, ndoñe yapa fshantse binÿnentse. Chiñna betscó yojuábocna, ndoñe yapa jashenocana fshantse yojanmëna causa; <sup>6</sup> pero yojuábocna orna, puerte yojojënyána y yojtsancta; y yojtsábojo yapa tbëtëjënga tondaye causa. <sup>7</sup> Inÿe meshëngna uchmëshangañe yojuatquécjána; chë uchmashá yojuájua ora, lempe yojtsatscué, y chca, chë jénayentsãna tondaye yonjuashájona. <sup>8</sup> Pero inÿe meshëngna, uanguaniñe yojuatquécjána, y bëtscá tšabe shajuanënga chiñe yojóbozna: ínÿenache, canÿe meshentsãna unga bnëtsãna meshënga yojóbozna; ínÿenachna, chnénguana bnëtsãna meshënga; y ínÿenachna patse meshënga ca” —cha tojánayana.

<sup>9</sup> Y chentsãna, Jesús más tojánayana: “Chë jouenama tmojtsobenënga, šmochjouena ca.”

### Ndáyeca Jesús cuentëngaca yojánabuatambaye

<sup>10</sup> Chentsãna, Jesús canÿa yojuquéda ora, chë chabe béconana imojtsemnënga chabe bnëtsãna uta uatšjëndayëngaftaca, tmojantjá ndayá chë cuento bëtseyanama. <sup>11</sup> As Jesús tojanéjua: “Bëngbe Bëtsá tšëngaftanga cmontsinÿanÿná nÿetsca chë mo iytemencá yomna soyënga chabe amëndayama, pero chë ínÿengbioye ndoñe; chë soyëngama chënga lempe cuentëngaca sentsëtsëtsná. <sup>12</sup> Chca, masque beca chamotsafšna, ndoñe chamondobená chë Bëngbe Bëtsabe soyënga jinÿama; y masque beca chë soyënga chamouena,

ndoñe queochátësertana, chënga Bëngbe Bëtsábioye ndoñe chamondëtobéconama, y cha ndoñe chaondáperdonama ca.”

### Jesús chë jenabe cuentama tojanabuayená

<sup>13</sup> Chentsãna, Jesús tojanéyana: “¿Quem cuentama ndoñe tcmónjósertase, ntšamo chcase nÿetsca cuentëngama cmochjóserta ca? <sup>14</sup> Chë jená endmëna chë tšabe noticiëngama abuayinyayá. <sup>15</sup> Básefta entsãnga mondmëna mo chë benache juachañe yojuatquécjána jenaycá. Chëngna Bëngbe Bëtsabiama soyënga jouenana; pero chora Satanás betscó jabana, chëngbe ainaniñe yojtsemna Bëngbe Bëtsabe palabra jabétsabuajuanama, chënga chiñe ndoñe chamondëtsošbuáchema. <sup>16</sup> Inÿe entsãnga mondmëna mo chë ndëtsbenguiñe yojuatquécjána jenaycá; chëngna Bëngbe Bëtsabe palabra jouenana y oyejuayënga jtsemnana; <sup>17</sup> pero ndoñe nÿets tempo chana jochájua; y chca, ndoñe bayté Bëngbe Bëtsáftaca ntjëftsemnëngana, ndoñe yapa tmontsašbuaché causa. Inÿenga mochantsëbuayënja, y Bëngbe Bëtsábeñe betsošbuáchiyama mochanjasúfrianga; chíyeca chënga Bëngbe Bëtsabe palabra cachcá mochanjesonÿaye. <sup>18</sup> Inÿenga mondmëna mo chë uchmëshangañe yojuatquécjána jenaycá. Chënga Bëngbe Bëtsabe palabra mochanjouena, <sup>19</sup> pero quem luarëntša soyëngaca oyejuayënga jtsemnana yapa mochántseboše, y nÿe bomnana jëftseboznama yapa mochanjésenojuabnaye. Chë soyama y inÿe ba soyëngama yapa enócochinÿena causa, Bëngbe Bëtsabe soyëngama echantsebnëtjomba, y ndoñe quemochátama ntšamo Bëngbe Bëtsá tojayancá. <sup>20</sup> Pero ínÿenga mondmëna mo chë uanguaniñe yojuatquécjána jenaycá. Chëngna Bëngbe Bëtsabe palabra botamana mochanjouena; nÿets ainánaca mochántseprontana chiñe jtsošbuáchiyama. Mo canÿe betiye beca tšabá tojtseshajuancá, chënga bëtscá tšabe soyënga Bëngbe Bëtsabiama mochántsama. Inÿenga ínÿengbiama más bëtscá soyënga mochanjama; y chca, ínÿenga mochántsemna mo chë unga bnëtsãna meshe tojanshajo jenaycá, ínÿenga mo chë chnénguana bnëtsancá, y ínÿengna mo chë patse meshënga tojanboté jenaycá ca” —Jesús tojánayana.

### Chë uajuinÿanáshama cuento

<sup>21</sup> Mëntšánaca Jesús tojánayana: “Ndocná juiyëbana canÿe uajuinÿanásha cajonëshe o jutsnésha tajsoye juajájuama. Ndoñe; uajuinÿanásha juiyëbana tsbanánoca juajájuama, lempe chaotsebinÿnama.

<sup>22</sup> Ndocna yojytëmena soye ntjinÿencá queochaisoquéda, y chë ndótatsëmbo soye ntsotatsëmbcá queochaisoquéda. <sup>23</sup> Chë jouenama tmojtsobenënga, šmochjouena ca.”

<sup>24</sup> Y mëntšánaca Jesús tojanéyana: “Tšabá šmochjájuaboye ntšamo šmojtsuenanama. Nÿe batšatema šmojouenëse, nÿe batšatema cmochanjósertaye; pero aíñe tšabá šmojouenëse, chama corente

cmochanjósertaye; y Bëngbe Bëtsá echanjama tšëngaftanga más soyëngama chacmósertama. <sup>25</sup> Er nda Bëngbe Bëtsabe soyëngama tšabá tbojosertá, Bëngbe Bëtsá echanjama cha más ba soyëngama chabosertama; pero nda chë soyëngama josértama ndoñe tontsebošá, chë nÿe batšá ibosertana soyëngama bochántsebnatjëmba ca” —cha tojánayana.

### Chë ojuajna jenayama cuento

<sup>26</sup> Jesús mëntšánaca tojanéyana: “Bëngbe Bëtsabe amëndayana endmëna mo ntšamo canÿe boyabása jénaye tojuatbontsá ora ehandbopasacá: <sup>27</sup> masque cha cada ibeta jtsojájuana y bnëté jotsbanama, ibeta o bnëté, chë jénayentšana juabocnana y juájuana, ntšamo chca yojtsájua jnama chë boyabása ntjatstatšëmbcá. <sup>28</sup> Chë fshantse cachabe ponto jamana ndayánaca chiñe chaójuama; natsana tsbuanachëtëma jóbocnana, chentšana chë espiga, y chentšana chë meshënga jashájonana. <sup>29</sup> Y chë meshënga ya tojtsebóchichna orna, játbana jacobnana, chë saná josháchiñama ora ya tojobuácheyeca ca” —Jesús tojánayana.

### Chë mostaziye jenayama cuento

<sup>30</sup> Jesús mëntšánaca tojanéyana: “¿Ndayacá Bëngbe Bëtsabe amëndayana yomna, o ndaye sóyeca nanjopódia chama jábuayenama? <sup>31</sup> Endmëna mo canÿe mostaza jénaye jajoca tcojajecá. Ndegombre, nÿetsca quem luarentša jenayëngama, mostaza jénaye chë más bāsetema endmëna; <sup>32</sup> pero tcojajé orna, jójuana, y jajañe chë más bëts betiye jóbemana, ba bëts buacuashëngaca; chíyeca chë jaja shloftšënga jana y chiñe uajajonëtemëngá jauábopormana ca.”

### Ndayeca Jesús cuentëngaca entšanga yojanabuayiyná

<sup>33</sup> Chca Jesús Bëngbe Bëtsabe soyëngama entšanga yojanabuautambá, ba cuentënguentšana, mo chë tmonjouena cuentcá, ntsachetšá chë entšanga josértama tmojobenacá. <sup>34</sup> Tondaye yonjanabuautambá ndoñe cuentëngaca ntsemëncá; pero chabe uatsjëndayëngna lempe yojanabuayiyná, cánÿenga tmojtsemna ora.

### Jesús chë binÿia y chë bėjaye bonguana yojëtsbema

<sup>35</sup> Cach te, yojtseibétatana ora, Jesús chabe uatsjëndayënga tojanéyana: “Uafjajónaye chenguana cuajna ca.”

<sup>36</sup> Chorna, chë entšanga jesabáshejuanëse, chë uatsjëndayënga Jesús tmojtsanánatseñe, cach yojánenjaquena barquëshañe; y inÿe entšángnaca inÿe barquëshañe tmojanasto. <sup>37</sup> Chentšana, chë uafjajónaye bėjayiñe tša jabuache binÿia yojóshjango; olëshënga chë barquëshá imojtsétsbotsana, y chë causa chë barquëshá yojóntša búyeshëca jtsobuajútjiana. <sup>38</sup> Y chëntscuana, barquëshá stëtšoica, tsëntšëñeñe Jesús yojtsomañe. Chora chë uatsjëndayënga tmojtsanfšëná y tmojaniana: —¡Buatëm-

bayá! ¿Tondayana cmontsentšamna bënga chašotsënatjëmbama ca?

<sup>39</sup> As Jesús tojantsbaná, chë binÿia tbojanácacana, y chë bëts uafjajónayoye tojánayana: —¡Natjëmbana cochtsemna! ¡Bonguana ca!

Y cachora chë binÿia yojëtstëcja, y lempe bonguana yojtsatsmëna. <sup>40</sup> Chora chabe uatsjëndayënga tojanéyana: —¿Ndayeca tša šmojtsauatja? ¿Bëngbe Bëtsá tšëngaftanga jujabuáchama yobenama cabá ndoñe šmontsošbuaché ca?

<sup>41</sup> Chama, chënga puerte auatjanánënga imojtsemna y mëntšá imojtsenatsëtsnaye: “¿Nda quem boyabása yomna? Cha tonjayana y chë binÿia y chë bėjaye tmonjoyeuná ca.”

### Chë Gerasa luaroca bacna bayëja uambayá

**5** Chentšana, uafjajónaye chenguánoica tmojánashjajna, Geraseno ca uabaina entšangbe luaroje. <sup>2</sup> Jesús barquëshoicana tojánastjango, y cachora, chë obanëngbe cuevëshënguentšana canÿe entšá, bacna bayëjbe juabna uambayá, tojánbocna y tbojanjébengo. <sup>3</sup> Chë boyabásana, obanëngbe cuevëshënguenache inoyena, y ndocná yonjobena cha jtsebátsëcana, ni mo cadenëjuangaca; <sup>4</sup> er ba soye cadenëjuangaca y inÿe soyëngaca cha nÿetsá tmojanbatšëca, pero cha nÿetsca soye yojtsátabebe y yojtsenájaca, y ndocná yonjobenaye cha bonguana chaotsemnana. <sup>5</sup> Nÿets tempo, bnëté y ibeta, obanëngbe cuevëshënguenache y tjañenache yojánana yoye, y ndëtšbéngaca enotsetsenaye. <sup>6</sup> Jesúsbioye bënocana tbojáninÿe ora, chábioye tojanójtjajo y chabe natsanoica yojoshëntsamentšiyey; <sup>7</sup> y mëntšá yojtsáyebuache: —¿Ndayá átšeftaca cojtseboše, Jesús, celoca Bëngbe Bëtsabe Uaquiñá? ¡Bëngbe Bëtsabe delante cboimpadá, ndoñe šcatjatssetšëná ca!

<sup>8</sup> Chca tbojaniana, er Jesús chábioye tbojaniana: —¡Bacna bayëjbe juabna, chábentšana maisebocna ca!

<sup>9</sup> Chentšana Jesús tbojantjá: —¿Ntšamo cabaina ca?

Y chë bacna bayëjëngbe juábnaca cha tbojanjuá: —Atšna Legión ca sënduabaina, bëtsçanga fsëndmëna causa ca.

<sup>10</sup> Y tša Jesús ibojtserruana chë luarentšana ndoñe chaondëtëbuacanama. <sup>11</sup> Chentša béconana ba cotšënga imnajena, batsjoca imnëtsosañe; <sup>12</sup> as chë bacna bayëjënga Jesúsbioye tmojanimpadá: —Chë cotšëngbioye šmichamó, chëngbeñe fchayamashjna ca.

<sup>13</sup> Y Jesús aíñe tojanalesenciá; as chë bacna bayëjënga chë entšábentšana tmojésanbocana y chë cotšëngbeñe tmojánamashjna. Cachora chë mo uta uaranga cotšënga batsjocana peñëšëjana uafjajónayoye imojtsoshbuetše y yojtsatajo.

<sup>14</sup> Chora, chë cotšënga anÿenënga tmojtsanacheta auatjanánënga, y tmojána chama jacuéntama chë puebloca y chabuenache; y entšanga tmojánabo ntšamo tojanopasacá jinÿyama. <sup>15</sup> Jesús yojtsemnoye chë entšanga tmojánashjajna ora, tmojáninÿe chë tempo bacna bayëjënga uambayá, inëtsofbemañe, entšayá uichëtjoná y chabe nÿets juábnaca. Y chë

entšanga chama imojtsëuatjaná. <sup>16</sup> Chë tmojáninýënga imojtsecuëntaye, ntšamo chë bayëjbe juabna uambayáftaca tojanopasama, y chë cotšëngaftaca ntšamo tojanopasámnaca. <sup>17</sup> Chora chë entšanga tmojanontšé Jesús impadánana chë luarentšana chaotsatoñama.

<sup>18</sup> Jesús chë barquëshoye tojtanášëngo ora, chë tempo bacna bayëjbe juabna uambayá tbojanimpadá chabolesenciá cháftaca jama ca. <sup>19</sup> Pero ndoñe tbojanlesenciá, sinó mëntšá tbojaniana: “Acbe yebnoye motsatoñe, acbe pamíllangbioye, y cochjácuntaye ndayá Bëngbe Utabná ácaftaca tojamama, y ntšamo cha ácbioye tcmojalastemama ca.”

<sup>20</sup> Chentšana, chë entšá yojtatoñe y tojanontšé Decápolis uabaina pueblënguenache jacúntana lempe ntšamo Jesús cháftaca tojanmá; y nyetscanga imojt-senjnanaye.

### Jesús canye shembásabioye tbojanshná y Jairëbe bembetëmbioye tbojtananayé

<sup>21</sup> Chentšana, Jesús cachiñe chë uafjajónaye chenguana tojesaná barquëshañe. Chocna ba entšanga tmojanobuashconá, y Jesús chë uafjajónaye tsachañe yojtsemna. <sup>22</sup> Chorna, tojánashjango chë judiëngbe enefjuana yebnentša canye mandayá, Jairo ca uabainá. Jesúsbioye tbojáninýe ora, chábentše tojanoshëntsamentšé, <sup>23</sup> y tša ibojtseimpadana, mëntšá: —Atšbe bembetema ya echantsóbana; Diosmanda mabo, acbe cucuatšënga chábeñe cochjájajua, salud chauatinýenama y cháuatayenama ca.

<sup>24</sup> As Jesús cháftaca tojána; pero bëtsá entšanga imojtsëstona, chábioye imojtsenatsëntšenaye. <sup>25</sup> Chë entšanguentše yojtseye canye shembása šocá; cha ya bnétsana uta uata oboftjajuanánaca inapadecena. <sup>26</sup> Cha puerte tojansufrí, ba ashnayëngbe cucuatšíñe, y lempe ntsachetšá inabomncá tojanpochocá jenóshnama; pero ndoñe ibontsatstécaçjana, nye más peor ibojtsobiamnaye. <sup>27</sup> Chë shembása yojouena ntšamo Jesús ba šoquënga tojánashnama, y as stëtšoicana entšangbe tsëntsajana yojobeconá, y Jesusbe entšayá yojauábojajo. <sup>28</sup> Cha chca tojanma, er yojtsejuabnaye: “Masque nye mo chabe entšayá sibiájua chaijuábojajo, y salud chantsatsbomna ca.” <sup>29</sup> Y cachora chë oboftjajuanana ibojtsobojuána; y chabe cuerpiñe ibojebiónana ya tšabá yojtatsmënema. <sup>30</sup> Chora Jesús yojasëntia chábentšana obenana yojóbocnama, mo ndábioye tbojashná orcá; as cha tojanobuértana entšangbeñe y tojanatjá: —¿Nda atšbe entšayá tojuabojajo ca?

<sup>31</sup> Chabe uatsjëndayënga tmojanjuá: —Aca con-tonýá chë entšanga cmontsatsëntšená, y cabá cochjátsnoticiaye nda entšayá tojuabojajo ca.

<sup>32</sup> Pero Jesús cátoye yojtserreparana jinýama nda tbojánbojajuama. <sup>33</sup> As chë shembása, chë ntšamo cháftaca yojopásama jtsetatšëmbëse, tojanobeconá ngmëmnyá y auatjananá, chabe natsanoica tojanoshëntsamentšé, y lempe ntšamo ndegombre cháftaca tojanopasacá Jesúsbioye tbojaniana. <sup>34</sup> Chora Jesús tbojaniana: —Bembe, Bëngbe Bëtsábeñe

icošbuachéyeca shnaná contsatmëna. Natjëmbana motsatoñe; acbe šocana tontsopochocá ca.

<sup>35</sup> Jesús cabá yojtsoyebuambnantscuana, báseftanga tmojánashjajna chë judiëngbe enefjuana yebnentša mandayabe yebnocana, y chë shembásetembe taitá tmojaniana: —Acbe bembe tontsóbana; ¿ndayama más Buatëmbayá chama cochjátebëyaboma ca?

<sup>36</sup> Y Jesús, ntšamo chënga imojtsichamcá ntjatuenancá chë judiëngbe enefjuana yebnentša mandayábioye tbojaniana: —Ndoñe matauatjana. Nye Bëngbe Bëtsábeñe cochtsošbuáchiye cha tšabá chaotsatmënema ca.

<sup>37</sup> Y Jesús ndoñe tonjanalesenciá Jairëbe yebnoye banga chamuastama; nye Pedro, Santiago y Juan, Santiagbe uabentsana, aifñe. <sup>38</sup> Chentšana, chë mandayabe yebnoye tmojánashjajna ora, Jesús tojánanye entšanga tša imojtsenbouenana, entšanga imojtsošachiye y puerte ngménaca imojtseyoye. <sup>39</sup> As chë yebnoye tojánamashëngo y chë entšanga tojanéyana: “¿Ndayama tša šmojtsebouenana y tša šmojtseendëntjana? Chë shembásetema ndoñe chenatóbana, nye endëtsomañe ca.”

<sup>40</sup> Pero entšanga nye imojtsáfchaye. As Jesús nyetsca entšanga shjoye tojtanébuacna, y tojéftsanëbiatše chë basetembe bëtsétsata y chabe enutënga; y chë shembásetema yojtsemnoye tojánamashëngo. <sup>41</sup> Chora Jesús tbojanábuacueshache y cachëngbe biyañe tbojaniana: “Talita, cum ca.” (Chca endayana “Shembásetema, matëtsbaná ca”).

<sup>42</sup> Cachora, chë bnétsana uta uata bomna shembásetema tojtantsbaná y yojtsoyena jama. Y chë entšanga chama imojtsenjnanaye. <sup>43</sup> Pero Jesús corente tojanamëndá ndocnábeñe chama ntsecuëntayana ca, y tojanamëndá chë bássetema saná chamuiyé chaosama.

### Jesús Nazaret puebloca

**6** Chentšana Jesús tojéftsanbocna y cachabe luaroje tojtashjango, y chabe uatsjëndayënga cháftaca tmojána. <sup>2</sup> Ochnayté tojanobuache ora, Jesús tojanontšé chë judiëngbe enefjuana yebnentše entšanga jabuátambana.

Chë ba entšanga cha jóyebuambayama tmojanu-enënga, imojenjaná y tmojánayana: “¿Ndémoca quem boyabása lempe chca tojuatsjinýe? ¿Ndaye osertánana mua tmojatšetá, y ntšámoyeca cha yojtsoyena chca bëts soyënga jtsamana ca? <sup>3</sup> ¿Mua ndoñe chë calpintero yondmëna, Mariybe uaquiñá, y chabe catšátanga ndoñe mondmëna Santiago, José, Judas y Simón; y chabe uabëngnaca muentše ndoñe bëngaftaca mondoyena ca?” —chënga imojtsichamo.

Chë causa chënga tmojanotjayaná, y ndoñe montseboše joyeunayana. <sup>4</sup> As Jesús tojanéyana: “Nyetsca luarënguenache canye Bëngbe Bëtsabe juabna oye- buambnayábioye bëtsá jabemana, pero ndoñe chca cachabe luarentše, ni cachabe pamíllangbenache, ni cachabe yebnentše ca.”

<sup>5</sup> Chë entsanga chentše chábeñe ndoñe montsanošbuaché causa, Jesús ndoñe tonjanobená ni canye bêts soye Bëngbe Bëtsabe obenánaca chentše jëftsemana; nye básipta šoquëngbeñe cucuatšënga tojanajó y tojanashná. <sup>6</sup> Jesús ojnananá yojtsemna cachábentša entsanga chábeñe ndoñe montsanošbuaché causa.

### Jesús, chabe uatsjédayënga tojanichamó Bëngbe Bëtsabe améndayama jábuayenama

Chentšana, chë chaboye base pueblënguenache Jesús yojánana, Bëngbe Bëtsabe soyëngama abuátambaye. <sup>7</sup> Y chë bnétsana uta uatsjédayënga Jesús tojánachembo, y utáta ínÿoye tojanichamó, entsángbentšana bacna bayëjënga jtëbuacnama obenana jatšatayëse; <sup>8</sup> y mëntšá yojáuyana: “Benachiñama tondaye šmattsambaye, nye canye jatjonëfja; ndoñe šmattsambaye saná, ni shecnaja, ni crocénana uasnanëchiñe. <sup>9</sup> Nduámanëshe šmochjesóshecohëtjo, y nye canyájua šmochjesíchëtjo ca.”

<sup>10</sup> Mëntšánaca tojanéyana: “Posada chacmojúyentsame yebnentše šmochtsoquedañe inÿe puebloye játantscuana. <sup>11</sup> Canye luaroye chašmojáshajna y ndocná posada chacmonjúyentsame, y joyeunayama ndoñe chamontsebošëse, chentšana šmochjésebecana, y shecuatšentša polvëshe šmochjésenstoto, chca, chëngbioye jinÿanÿiyama chënga ndoñe tšabá tšëngaftangaftaca tmonjamama ca.”

<sup>12</sup> Chentšana, chë uatsjédayënga tmojëftsanbocana y entsanga imojánabuayinayë, chë tšabe benache chámuatishachama, bacna soyënga amana jtšajbanase. <sup>13</sup> Entšángbentšana ba bacna bayëjënga tmojtanebuacna, y ba šoquënga aceitíyeca tmojananétojo y tmojanashná.

### Ntšamo Juan chë Ubayaná tojanóbana

<sup>14</sup> Rey Herodes Jesusbiamá yojátatšëmbona, er nyet-squénache nyetsca entsanga chabiamá imojtsóyebuambnaye. Entšanga Jesusbiamá imojtsichamo: “Juan chë Ubayaná obanënguentšana tojtayena, chíyeca cha chca obenana yojtsebomna ca.”

<sup>15</sup> Inÿengna imojtsichamo: “Cha entsemna chë Bëngbe Bëtsabe juabna oyebuambnayá Elías ca.”

Y inÿengna: “Muana canya Bëngbe Bëtsabe juabna oyebuambnayá, mo chë tempsquëngcá ca.”

<sup>16</sup> Heródesna ntšamo entsanga Jesusbiamá imojtsichamcá tojanuena ora, tojánayana: “Mua Juan entsemna, chë atše sënjanmandá bestšaše chamot-sëstjanguamá, mora obanënguentšana tojtayena ca.”

<sup>17</sup> Juan cabá ainá ora, Herodes tojanmandá cha chamishache, cadenëjuangaca chamobátsëca y chca cárceloye jutámiamá. Herodes chca tojanma Herodíasbe causa, chabe uabentsá Felipe shema. Herodes chë shémaftaca tojanobouamá, Felipe cabá ainá ora. <sup>18</sup> Y chama, Heródesbioye Juan ibojánbuayinayë: “Ndoñe quenátslesenciana acbe uabentsabe shema acbe shema chaotsemnana ca.”

<sup>19</sup> Chë causa, Herodías Juánbioye puerte ibojuáya, y yojánboše jtsóbama; pero ndoñe yontsobena, <sup>20</sup> er Herodes yojántatšëmbo, Juan canye nyetsca soyënguiñe tšabá amá, nye Bëngbe Bëtsábioye sempre oservená inamnana. Chama cha yojánauatja y ndoñe yonjanaleséncia cha chamóbama. Y Juan Bëngbe Bëtsabe soyëngama Heródesbioye tbojtsebuayiná ora, ntšamo jajuaboyana ndoñe yontsetátšëmbo, pero masque chca, oyejuayá Juánbioye ibnayeunana.

<sup>21</sup> Pero Herodías tojáninÿena mocna ora Juan chamóbama. Heródesbe cumpleañ oboyejuaye ora, bëtscá saná tmojanprontá, y Herodes yojúbuaja chabe améndayënga, soldadëngbe améndayënga y Galileoca uámana entsanga. <sup>22</sup> Chora, chë oboyejuaye luaroye Herodíasbe bembe tojánamashëngo, tojanlantsá, y Herodes y nyetsca ófjanënga chama tša imojtsóyëjuaye. As chë rey, chë tobiášbioye tbojanianya: —Ndayánaca šmotjañe y atše cbochjätšëta ca.

<sup>23</sup> Y jajúrase, mëntšá tbojanšbuachená: —Ntšamo chašcojotjañcá cbochjätšëta, masque atšbe améndayëntša bomnantšana tséntsafinaca ca.

<sup>24</sup> Chentšana, chë tobiáše yojëftsebecna y chabe mamábioye ibojatjaye: —¿Ndayá chjotjañe ca?

Y chabe mamá ibojuá: —Juan chë Ubayanabe bestšaše ca.

<sup>25</sup> Cachora chë tobiáše betscó chë rey yojtsemnoye tojtanamashëngo, y tbojanianya: —Atše séntseboše, cam ora Juan chë Ubayanabe bestšaše canye šcnenëšifne chašcuatšëta ca.

<sup>26</sup> Herodes chama corente tbojanongmé, pero chë entsangbe delante y jajúrase tbojanšbuachená causa, ndoñe yonjobenaye ntšamo tbojaniancá jebëbuetamenana. <sup>27</sup> Cachora chë rey canye soldado ibojíchnua, Juanbe bestšaše chauyëbama. <sup>28</sup> As chë soldado cárceloye tojána, Juánbioye bestšaše tbojtsanëstjango, y canye šcnenëšifne tojanamba. Chë tobiášbioye tbojanëntšabuaché, y chana, chabe mamábioye.

<sup>29</sup> Juanbe ústonënga chama imojátatšëmbona ora, choye tmojánashajna, chabe cuerpo tmojésanocñe y jauátbontsama tmojána.

### Jesús shachna uaranga boyabásënga saná tojanacaredadó

<sup>30</sup> Chë Jesús tojánichamonga chábioye tmojtashajna ora, lempe ntšamo tmojanmama y tmojanabu-atambama cha tmojançantá. <sup>31</sup> Chora Jesús tojanéyana: “Cuajna ínÿoye, entsanga ndoyena luaroye, batšatema jóchnama ca.” Cha chca tojánayana, er tša entsanga imojtsaye y imojtsabëbana; ni mo jasama ndoñe luare imontsebomna.

<sup>32</sup> As cánÿënga barquëshañe tmojtsanoñe, entsanga ndëbínÿnoye. <sup>33</sup> Pero chënga imojtsoñama entsanga tmojánanÿe, y ndëmuanÿënga imojamnama imojtsetátšëmbo; chcasna, chë entsanga shecuátšëca betscó tmojána, nyetsca pueblënguentšana, y chëngbe natsana choye tmojánashajna. <sup>34</sup> Chentšana, chë barquëshoicana tojánastjango ora, Jesús ba entsanga tojánanÿe; chëngbiamá tbojanongmé, er

imojtsemna mo abujénya ndbomna oveshëngcá; y tojanontsé ba soyëngama jabuátambana.

<sup>35</sup> Ya jetiñe yojtsemna orna, chabe uatsjédayënga tmojanobobconá y tmojaniana: —Ya jetiñe entsemna, y quem luariñe ndocná quenatiyena. <sup>36</sup> Entšanga cuantichamuá, pueblotémëngoye y inye luarëngoye chamotsoñama, ndayánaca jasama chamobuámiñama ca.

<sup>37</sup> Y Jesús tojanéyana: —Tšëngaftanga saná chëngbiyoe šmochjacaredádaye ca.

Chora chënga tmojaniana: —Crocénana queftsátsbomna, uta patse denario nyetšá, chëfta entšangbiama saná jabuámiyama ca.

<sup>38</sup> As Jesús tojanéyana: —¿Bueta tandëše šmojtsebomna? Marrepáanga ca.

Ya imojtsetátsëmbo ora, tmojaniana: —Shachna tandëše y uta beónata fsëntsebomna ca.

<sup>39</sup> Chora Jesús entšanga tojanamëndá ínÿoca chamoshëntsajtbiama. <sup>40</sup> As chënga tmojanotbiama patse patsënga y shachna bnëtsátsanënga. <sup>41</sup> Chora Jesús chë shachna tandëše y chë uta beónata tojanca, y celoye jontješiyëše, Bëngbe Bëtsábiyoe chama tbojtanchuá. Chentšana chë tandëšënga tojanjatá y chabe uatsjédayënga tojanayentšbuaché chë entšanga jatšatayama. Y chë uta beónatnaca nyetscanga tojanéjáyaye. <sup>42</sup> Nyetscanga tmojanse jtoshachaye nyetšá. <sup>43</sup> Y chentšana, chë tandëše y chë beonentšana ojamnëtmënga tmojanatbaná, y bnëtsana uta sbarécula tmojanajutjé. <sup>44</sup> Chë saná tmojansënga imojamna shachna uaranga boyabásënga, shembásënga y básënga ntjacuntacá.

### Jesús béjaye juatsbuacá yojtseye

<sup>45</sup> Chentšana, Jesús chabe uatsjédayënga tojanamëndá chë barquëshoye jtašjnana, chë uafjajónaye chengwana jangana y chabe natsana Betsaida ca uabaina pueblota jashajnana. Chënga imojtsebo-canëntscuana, Jesús chë entšanga yojtichamuá.

<sup>46</sup> Nyetscanga tojtanadiošoftá ora, tjoye cha tojtanoñe Bëngbe Bëtsáftaca jencuëntama.

<sup>47</sup> Yojtseibétatana ora, chë barquëshu uafjajónaye tsëntsaca yojtšamna, y Jesús, canya fshantsoca.

<sup>48</sup> Jesús tojáninye chëngbiama totcá yojtsemna, chë barquëshaca natsanoye jtsayana, er binÿia chëngbe contra yojtsemna. Ya binÿana ora, chëngbiyoe yojobconá, béjaye juatsbuacá yojtseye, y ya chëngbiayana nye ndericho jachnënguama yojtsemna. <sup>49</sup> Y chënga, chë béjaye juatsbuacá cha yojtšayama tmojáninye ora, tmojanjuabó cha canye añemëse yojtsemna ca, y tmojanontsé yoyana; <sup>50</sup> er nyetscanga chca tmojáninye y cochauatjanánënga imojtsemna. Pero Jesús cachora tojanéyana: “¡Añemo šmochtsebomna; atše Jesús sëndmëna; ndoñe matauatjëngana ca!”

<sup>51</sup> Chorna, chënga imojtsemna barquëshoye cha tojánášëngo, y chë jabuache binÿia tojanéjbana, y nyetscanga puerte auatjanánënga y ojanánënga imojtsemna. <sup>52</sup> Chënga tmojáninye chëfta entšanga tandëše jujátayana, pero chëngbe ainanoca cabá

ndoñe imontsobena josértana, Jesús lempe jamama obená bëtsemnama.

### Genesaret ca uabáinoca Jesús ba šoquënga tojanashná

<sup>53</sup> Chë uafjajónaye tmojánenashbuachengo ora, Genesaret ca uabaina luaroye tmojánashjajna, y chë uafjajónaye tsachoca chë barquëshu tmojanétsbua.

<sup>54</sup> Chë barquëshoicana tmojánastjajna y cachora entšanga Jesús tmojantëmbá. <sup>55</sup> Chiyeca, chë luariñe yebnënguenache betesco chënga tmojána, y tmojanontsé chë šoquënga tjuashënguiñe juyambana, chë ndëmoye tmojanuena Jesús yojtsemna luaroye. <sup>56</sup> Y ndayentše cha tojámashëngüentše, pueblënguñe, bëtš pueblënguñe y base pueblotémënguñinaca, chë šoquënga benachoye imojtsëbuacana, y Jesús corente imojtseimpadana chë šoquënga chaualesenciá, nye mo chabe entšayá sibuájua juabojajuana. Y nyetscanga tmojuábojajënga tšabá imojtsatsmëna.

### Ndayeca canye entšá Bëngbe Bëtsabe delante ndoñe tšabia nántsemna

**7** Chentšana, fariseunga Jesúsbiyoe tmojanobconá y báseftanga ley abuátambayëngnaca, Jerusalenocana áshjajnënga. <sup>2</sup> Chënga tmojáninye básefta Jesusbe uatsjédayënga, cabá ndase ora, ndoñe montsacuentšabiá ntšamo chë judiënga imojanamancá. <sup>3</sup> Er chë fariseunga y nyetsca judiënga imojanamana jtsacuentšabiana ba soye, ndayá jasama ora, ntšamo chëngbe bëtš taitanga imojanamancá. Chënga imojanjuabná, chca jtsamëse Bëngbe Bëtsabe delante tšábënga jtsatsmënama ca. <sup>4</sup> Chë sananga enocana tmojtashjango ora, ba soye ndoñe tmonsacuentšabese, tondaye ntjasana; y ba soyëngnaca imojánama, pero nye chëngbe bëtš taitanga chca jamana imojanamánayeca, mo chë béjayeca juabáyana tazëšënga, matbajënga, calderëshënga y jutsnëshangá. <sup>5</sup> Chë causa, chë fariseunga y chë ley abuátambayënga Jesús tmojantjá: —¿Ndayeca acbe uatsjédayënga ndoñe montsama ntšamo bëngbe bëtš taitanga monjanamancá, y montsesá ntsacuentšabiase, ndoñe ntšamo bënga judiënga fsënduamancá, Bëngbe Bëtsabe delante tšabá jtsatsmënama ca?

<sup>6</sup> Chora Jesús tojanéyana: —Nye tšabá chë Bëngbe Bëtsabe juabna oyebuambnayá Isaías tšëngaftangbiama tojánayana, bacna entšanga chë ntšamo ndegombre šmojuabnacá ndinÿinÿayënga ca, mëntšá enduabemanentše:

Quem entšanga mondbëtsichamo Bëngbe Bëtsá tša tšabia yomna ca; chca nye uayášaca, pero chëngbe ainanentše ndocna tšabe juabnéngaca.

<sup>7</sup> Pero chënga nye bonamente mondbëtsichamo Bëngbe Bëtsá tša tšabia yomna ca;

chënga nye entšangbe mandënga jtsabuátambayana, y Bëngbe Bëtsabe mandënga ndoñe ca —cha tojánayana. <sup>8</sup> Chora Jesús tojanéyana: —Ntšamo

Bëngbe Bëtsá tojanmandacá stëtšoye tšëngaftanga š-mojtsequedá, nÿe ntšamo entsãnga monduamancá jt-samama ca.

<sup>9</sup> Y mëntšánaca tojanéyana: “Tšëngaftanga ntšamo Bëngbe Bëtsá tojanmandacá stëtšoye jtsequédana, nÿe ntšamo tšëngaftangbe anteunga imojanamancá jtsamama. Tšëngaftanga jtsejuabnayana tšabá šmojt-sama ca chca šmojtsama ora. <sup>10</sup> Moisés tonjánayana: ‘Acbe bëtsétsata ndoñe stëtšoye catjáquedaye’, y ‘nda chabe bëtsétsatbiama ndoñe tšabá tonjoyebuambá chana, jóbana jtsemnana ca.’ <sup>11</sup> Pero tšëngaftanga šmondbétsichamo, canÿe entsá yobena chabe taitá o chabe mamá jáuyanana: ‘Lempe séndbomna soyënga corbán entsemna, chíyeca ndoñe quetsátobena juajabuáchana ca’ (corbán endayana “Bëngbe Bëtsabiama uátšëmbona soyënga ca”). <sup>12</sup> Tšëngaftanga šmondbétsichamo, nda chca tojayanëse, ya ndoñe obligaciõnaca ntsemnana chabe taitá o mamabiama ndayánaca jamama ca. <sup>13</sup> Chca, tšëngaftanga šmontsama entsãnga Bëngbe Bëtsabe palabra stëtšoye chamoquedama, mo tondaye tontsamancá, chë cuenta jtsamama ntšamo anteunga imojanamancá, ntšamo entsãngbeñe temp-scana y méntscõnama yochñëjuancá. Y ba soyënga tšëngaftanga cachcá šmontsama ca” —Jesús tojánayana.

<sup>14</sup> Chora Jesús, cachiñe entsãnga tojtanchembo y tojanéyana: “Nÿetscanga šmochjouena y chacmësertá.

<sup>15</sup> Ndayá entsá tojtsesacá, ndoñe ntjábemana ndoñe tšabia Bëngbe Bëtsabe delante. Inÿetsá comna: ntšamo entsá tojtsejuabná y tojtsoyebuambnacá endobena jabemana ndoñe tšabia Bëngbe Bëtsabe delante. <sup>16</sup> Chë jouenama tmojtsobenënga, šmochjouena ca” —cha tojánayana.

<sup>17</sup> Jesús entsãnga tojéftsanabashejuana y yebnoye tojtanamáshëngo ora, chabe uatsjéndayënga tmojantjá ntšamo cha tojánayanama. <sup>18</sup> As cha tojanéyana: “¿Tšëngaftángnaca cabá ndoñe cmontsésertana ca? ¿Cabá ndoñe cmontsésertana, lempe ntšamo entsá tojascá ndoñe ntsoyebenana chábioye jabemana ndoñe tšabia Bëngbe Bëtsabe delante; <sup>19</sup> er ainanoye ndoñe ntjómashënguana, sinó uafsbioye, y chentšana cuerpentšana jtabocnana ca?”

Y chca, Jesús tojánayana nÿetsca sananga tšabá jasama yomna ca y chë saná ndoñe ntjamana canÿe entsá bacna soye chaotsamama ca. <sup>20</sup> Y mëntšánaca tojánayana: “Ntšamo chë entsá tojtsejuabná y tojtsoyebuambnacá, chë soye cocayé endobena entsá jabemana ndoñe tšabia Bëngbe Bëtsabe delante. <sup>21</sup> Er ainanocana jtsóbocanana bacna juabnënga: shembásaftaca o boyabásaftaca bacna soye jamama, jatbëbama, jóbama, <sup>22</sup> bacna juabnënga boyá o shëmbioye ínÿaftaca jáingñama, jtsatbomnayama, nÿetsca bacna soyënga jamama, ínÿenga jáingñama, nÿe cachá jenomándama ntsoyebená jtsiyenama, ínÿabioye jtsántšabošama, ínÿabiama jtsayátseñayama, jtsenáb-otamnayama y nÿe opënga jtsobiamnayama.

<sup>23</sup> Nÿetsca quem bacna soyënga entsãbe ainanocana

jóbocnana, y cha jabemana ndoñe tšabia Bëngbe Bëtsabe delante ca” —cha tojánayana.

### Canÿe shembása inÿe luarocana ashjangoná Jesús-beñe yojtsošbuaché

<sup>24</sup> Jesús chentšana, Tiro ca uabaina luaroye tojt-sanoñe, y canÿe yebnentše tojánamashëngo. Cha yojt-seboše ndocná chama chaondétsetatšëmbuama; pero ndoñe yonjobenaye iytemenana jatsmënana. <sup>25</sup> Y betesco, canÿe shembása, canÿe bembe bacna bayëjbe juabna uambayá ibnabomná, Jesusbiama oyebuamb-nayana yojouena ora, chábioye tojánabo y chabe she-cuatšentše tojanoshëntsamentšé. <sup>26</sup> Chë shembása ndoñe yonjamna judiá, sinó Sirofenicia luarocá. Tojánabo y Jesúsbioye tbojanimpadá chabe bembetëmbentšana bacna bayëja chabuatábocnama. <sup>27</sup> Pero Jesús tbojaniana: —Atše šondmëna natsana judío entsãngbiama chë soyënga jamana; chentšana cocayé chanjobenaye chca inÿe entsãngbiama jamana. Atše acbiama, canÿe ndoñe judiá, soyënga stjãmëse, nántsemna mo chë básengbe saná quešënga cuaft-sëbuajocá ca.

<sup>28</sup> Y cha tbojanjuá: —Arseñor, chca jtsemnana. Pero chë quešëgnaca mondbase chë básenga tmojtsesá ora tmojatquécjanatemënga. Chcasna, Diosmanda átšnaca šmotsajabuache ca.

<sup>29</sup> As Jesús tbojaniana: —Tšabá tcjayana; chcasna, acbe yebnoye motsatoñe. Chë bacna bayëja acbe bembetëmbentšana tonjësebozna ca.

<sup>30</sup> Chentšana, chë shembása chabe yebnoye tojtaná, y tojáninÿena chë bembetema jutsnéshentše yojtso-jájoñe, y chë bacna bayëja ya ndoñe chábeñe yontsemna.

### Jesús, canÿe boyabása tësmá y ndëbiábioye tbojansh-ná

<sup>31</sup> Tiro pueblentšana Jesús tojéftsanbocna, y Sidón y Decápolis luarentša pueblënguëjana jachnënguse, Galilea uafjajónayoye tojánashjango. <sup>32</sup> Cha chentše yojtsemna ora, chábioye tmojanánatse canÿe entsá tësmá y ndëbiá, y tmojanimpadá chabe cucuatšënga chë šocábeñe chaojájoma, chaboshnama. <sup>33</sup> Chorna Jesús entsãngbentšana luaroye tbojanánatse, cánÿata. Chora chë šocabe matscuašoye ntšabuafjënga yojajué, cucuatšinë yojabuashëtjo, y chë šocabe bichtaja yojábojajo. <sup>34</sup> Chentšana, Jesús celoye tojanontjësé, jabuache yojáshachna, y hebreo palabriñe tbojaniana: “¡Efata ca!” (Chca endayana “¡Chacmotsaue-nana ca!”)

<sup>35</sup> Cachora, chë boyabásabe matscuaše tšabá yojtsatsmëna y tšabá yojtsuenana; chë bichtaja tšabá yojtóbema y tšabá yojtsóyebuambnaye. <sup>36</sup> Y Jesús chë entsãnga tojanamëndá chama ndocnábeñe ntsecuëntayana. Pero masque tša chama yojtsamëndaye, entsãnga más chabiama imojtsencuëntaye. <sup>37</sup> Chama chë entsãnga puerte imojtsenjanaye, y mëntšá imojtsichamo: “¡Lempe tšabá entsama! Chë tësmënga

chamouenama, y chë ndëbianga chamóyebuambama entsama ca."

### Jesús canta uaranga entsānga saná tojanacaredadó

**8** Chë tempo, ba entsānga Jesúsbioye cachiñe tmojanobeconá, y jasama tondaye imontsebmoma. As Jesús chabe uatsjéndayēnga tojánachembo y tojanéyana: <sup>2</sup>—Quem entsāngbiamā šontsengmena, er ya unga te átšeftaca montsemna y mora jasama tondaye quemátsbmoma. <sup>3</sup>Cachēngbe yebnoye tondaye ntjascá stichamuase, shēntsama benachējana nantsabuātēcja; y báseftanga bēn luarocana tmojabo ca.

<sup>4</sup>As chabe uatsjéndayēnga tmojanianyana: —¿Ntšamo nda nanjobenaye quem luarentše, ndocna entsā ndoyenentše, chēfta entsāngbiamā saná jinýenama ca?

<sup>5</sup>Chora cha tojanatjá: —¿Bueta tandēše šmojtsebmoma ca?

Y chēnga tmojanjuá: —Canýséftaše ca.

<sup>6</sup>Chentsāna, Jesús tojanamēndá entsānga chamoshéntsjatbiamama. Chorna, chë canýséfta tandēše tojanca y Bēngbe Bētsábioye chama tbojtanchuá. Chentsāna tojanatjá, chabe uatsjéndayēnga tojanējatá, y chēngna chë entsāngbioye. <sup>7</sup>Básefta beonatémēngnaca imnabomna; as Jesús, Bēngbe Bētsábioye chama tbojtanchuá y chabe uatsjéndayēnga tojanamēndá entsānga jujátayama. <sup>8</sup>Nýetscanga tmojanse jtoshachaye nýetšá. Chentsāna cabá canýséfta bēts sbarécua tmojanajutjé chë ojamnētémēngaca.

<sup>9</sup>Chë tmojansēnga imojamna mo canta uaranga nýetšá. Chentsāna Jesús chë entsānga tojtanadiošoftá.

<sup>10</sup>Chora Jesús barquēshañe tojánenojayiye chabe uatsjéndayēngaftaca, y tmojtsanoñe Dalmanuta ca uabaina luaroye.

### Chë fariseunga tmojánbošena, Jesús chaoma canýe bēts soye, chabe ndegombre obenana jinýama

<sup>11</sup>Chentsāna, fariseunga tmojánabo y tmojanontšé Jesúseftaca enatsētsnayana. Y jisháchichiyama, imojtseimpadana canýe bēts soye chaoma, as jtsetatšēmbuama Jesusbe obenana Bēngbe Bētsábioyana ndegombre tainóbocanama. <sup>12</sup>Y Jesús ngménaca, jabuache yojáshachnēse, mēntšá tojánayana: "¿Ndáye-ca tšēngaftanga, chë mora oyenēnga, šmojtseboše canýe bēts soye chaimama tšēngaftanga atšbe obenana jinýanýiyama ca? Ndegombre cbēyana, quem entsānga ndocna chca soye quemochátinye ca."

<sup>13</sup>Chorna chë entsānga cachcá tojesanēnyá, chë barquēshoye yojtamáshēngo, y uafjajónaye chenguana yojtsoñe.

### Jesús tojanabuayená fariseungbe buatēmbana soyēngama

<sup>14</sup>Chë uatsjéndayēnga yojésebnētjomba ndaye soye jasama jesocñama, y chë barquēshoye nýe canýe tandēše imojtsebmoma. <sup>15</sup>Jesús tojanéyana: —Šmocht-

santješna; cuedado šmochtsebmoma fariseunga y Heródesbe levadurama ca.

<sup>16</sup>Chora chë uatsjéndayēnga tmojanontšé enatsētsnayana: —Chca entsichamo, bēnga tandēše ndoñe tmonjesocñama ca.

<sup>17</sup>Jesús yojtsetátšēmba, chabe uatsjéndayēnga imojtsejuabnaye chana tandēšama yojtsētsētsnaye ca; pero ndegombre chana yojtsóyebuambnaye ndayá ntšamo fariseunga y Herodes bacna soyēnga jtsamēse imojoyenama. Chcasna, mēntšá tojanéyana: —¿Ndáye-ca tandēšama šmojtsoyebuambná? ¿Cabá ndoñe cmontsēsertana, ni šmontsetátšēmba? ¿Ainanoca ndoñe šmontseboše chacmēsertama? <sup>18</sup>Bominýe šmondobomna, pero ndoñe quešmátobena jinýana; jouenama šmondobena, y ndoñe quešmátuēnana, y ndayá tijamama ndoñe quešmatsjuabná. <sup>19</sup>Chë shachna uaranga entsānga shachna tandēšentšana sēnjanējatá chentsāna, ¿bueta sbarécua chë ojamnētémēngaca šmēnjanajutjé ca? —cha tojanatjá.

Y chēnga tmojanjuá: —Bnétsana utácua ca.

<sup>20</sup>—Y chë canýséfta tandēšentšana canta uaranga entsānga sēnjanējatá chentsāna, ¿bueta bēts sbarécua chë ojamnētémēngaca šmēnjanajutjé ca?

Y chēnga tmojanjuá: —Canýséftácua ca.

<sup>21</sup>As Jesús tojanéyana: —¿Y cabá ndoñe cmontsēsertana ca?

### Jesús canýe jtanábioye tbojanshná, Betsaida puebloca

<sup>22</sup>Chentsāna tmojánashajna Betsaida puebloca; y chora, entsānga canýe boyabása jtaná Jesúsbioye tmojanánatse, y tmojanimpadá cha jabojuana chabotse-shnama. <sup>23</sup>As, chë jtanábioye tbojanábuacuēshache, y chë pueblo chaboye tbojanánatse. Chorna, yebuáye-ca ibojabuchanētjo, y chábeñe cucuatšēnga yojajájua, y tbojantjá nderado ndayá jinýama tajojtsanobena ca.

<sup>24</sup>As chë jtaná yojontješiye y tojánayana: —Boyabásēnga sēntsēnyá; mo betiyēngcá montsemna, pero montsobonjná ca.

<sup>25</sup>Chora Jesús, chë jtanabe fšñēbeñe cachiñe cucuatšēnga yojajájua. Y chë boyabása yojtsobena lempe tšabá jinýama; ya shnaná yojtoquēda. Y yojtsobena nýetsca soyēnga botamana jinýana. <sup>26</sup>Chentsāna, Jesús cachabe yebnoye tbojtanichmó y mēntšá tbojanianyana: —Chë puebloye ndoñe catjétsamashēngo ca.

### Pedro tojánayana, Jesús chë Cristo bētsemnama

<sup>27</sup>Chentsāna, Jesús tojánbocna chabe uatsjéndayēngaftaca Cesarea de Filipo luaroca pueblēngoye, y benachiñe chabe uatsjéndayēnga tojanatjá: —¿Nda atše bētsemnama ca entsānga imojtsichamo ca?

<sup>28</sup>Y chēnga tmojanianyana: —Inýenga montsichamo Juan chë Ubayaná ca, ínýengna Elías ca, y ínýengna, canýe Bēngbe Bētsabe juabna oyebuambnayá ca.

<sup>29</sup>As Jesús tojanatjá: —Y tšēngaftangna, ¿nda atše bētsemnama ntšamo šmochjayana ca?

Y Pedro tbojanjuá: —Acna chë Cristo condmëna, chë Bëngbe Bëtsabe Uámana Uabuayana ca.

<sup>30</sup> Chentšana Jesús corente chënga tojanamëndá, chë nda cha yojamnama ndocnábeñe ntsecuëntayana.

### Jesús tojánayana cha ibojamna jóbanana y jtsayenana ca

<sup>31</sup> Y Jesús tojanontsé chabe uatsjédayënga jabuátambana, cha, chë Bëngbe Bëtsá Entsó tbojanbemá, ibojamna puerte jasúfriana ca; chë judiëngbeñe bëtsëjemëngcá amëndayëngbiama, chë judiëngbe más uámana bachnangbe amëndayënga y ley abuátambayëngbiama uabotená jtsemnana ca. Entsanga mochjanóba, pero unga tianoye yochtanayena ca.

<sup>32</sup> Nyetscanga catafjosertaycá chama yojtsóyebuambnaye. As Pedro, Jesúsbioye luaroye tbojanánatse, y tojanontsé jtsáuyanana. <sup>33</sup> Pero Jesús yojobuértana, chabe uatsjédayënga tojanënyanýé, y Pédrëbioye mëntšá tbojtsanbochembo: “¡Satanás, átsbentšana mojuaná! Pedro, acbe juabnënga Bëngbe Bëtsábio-cana ndoñe quenatóbocana, sinó nye entsángbentšana ca.”

<sup>34</sup> Chentšana, Jesús chabe uatsjédayënga y chë inýe entsanga tojánachembo chamouenama, y tojanéyana: “Nda atšbe uatsjendayá jtsemnana tojtseboše, cháuyana nye Bëngbe Bëtsá yobena sempre chabe vidiñe jtsemándayana ca, chabe quem luarentša soyënga cachcá chauesonýá atše juastama, y atšbiama jasúfriama chaotseprontana y cruciñe jobanámnaca. <sup>35</sup> Nda tojtsama quem luarentše bëtscá soyënga jtsebomnama y atšbiama jasúfriama ndoñe tontseprontana, chë nyetsca tescama yomna tšabe vida echanjopérdia. Pero nda quem luarentša soyënga cachcá tojëftsonýá atše juastama, y chë tšabe noticiënga atšbiama abuátambaye causa, masque chaóbana, chë nyetsca tescama yomna tšabe vida echántsebomna. <sup>36</sup> ¿Ndayama entsá buanjoservia nyetsca quem luarentša soyënga jtsebomnana, chë nyetsca tescama yomna tšabe vida tojtsoperdese? <sup>37</sup> Er canýe entsá chë nyetsca tescama yomna tšabe vida tojtsoperdese, ndocna soye quenátmëna cha chaobená joyiyama, chë nyetsca tescama yomna tšabe vida jtsebomnama. <sup>38</sup> Chcasna, nda mora atšbiama y atšbe buayenana soyëngama tojtsëuatja entsángbeñe, chënga chë Bëngbe Bëtsabiama nduauenanënga y bacna soye amënga, chë Bëngbe Bëtsá Entsó tbojanbemánaca chabiama echantsëuatja, chabe Taitabe bëts obenánaca y chabe angelëngaftaca chaojésabo ora ca” —cha tojanéyana.

**9** Mëntšánaca Jesús tojanéyana: “Ndegombre cbéyana, báseftanga muentše montsemnënga ndoñe quemochatóbana, Bëngbe Bëtsá entsángbeñe chabe obenánaca jabomándama jabana ntjëftsinýcá ca.”

### Jesús inýetsá tojanobinýná

<sup>2</sup> Chentšana chnénguana tianoye, Jesús tojëftsanëbitše Pedro, Santiago y Juan, y inýoye tojanënatse nye chënga, canýe bëts tjoye. Y chëngbe delante Jesús inýetsá tojanobinýná; <sup>3</sup> chabe uichëtjonëjuangá tša yojtsabuashinýinýana; corente uafjantsëjuangá yojtsamna; nýa chca juafjantsama ndocná quem luarentše quentatobenaye. <sup>4</sup> Chca orna, chë uatsjédayënga tmojáninýe, Moisés y Elías tbojanobinýná Jesúseftaca encuëntaye.

<sup>5</sup> Chora Pedro, Jesúsbioye tbojanianya: “¡Buatëmbayá, tša tšabá bëngbiama cuanmëna muentše jtsemnana ca! Mora fchanjapórma unga tambotëmënga: cánýetema acbiama, inýetema Moisesbiama y inýetema Elíasbiama ca.”

<sup>6</sup> Chca tojánayana, chë uatsjédayënga yapa auatjanánënga imojtsemna causa, y Pedro ndoñe yontsetátšëmbo ntšamo jayanana. <sup>7</sup> Chora canýe jantšetëshe yojóbema, y chëngbioye yojáutsbotse; y chë jantšetëshoicana canýe oyebuambnayana tojanóbocna, mëntšá: “Mua atšbe bonshana Uaquifá endmëna; cha šmochtseyeunana ca.”

<sup>8</sup> Y ndeolpe, chëngbe shéconana tmojanrrepará ora, ya ndocná más tmonjáninýe; nye Jesús canýa chëngaftaca yojtsemna.

<sup>9</sup> Chë tjocana imojtsatstsmaye ora, Jesús chë uatsjédayënga tojanamëndá: —Bëngbe Bëtsá Entsó tbojanbemá obanënguentšana candétayenëntscuana, chë mënté tjoca šmonjinýe soyama ndocnábeñe šmattsecuëntaye ca.

<sup>10</sup> Chë uatsjédayënga aíñe chca tmojanuena; pero chënga imojtsentjanaye ndayá cha yojtsentšáyana, cha yochtanayena ca cha tojánayana ora. <sup>11</sup> Y Jesúsbioye imojtsetjanaye: —¿Ndáyeca chë ley abuátambayënga mondbétsichamo, canmëna Bëngbe Bëtsabe Uámana Uabuayanabe natsana Elías jabana ca?

<sup>12</sup> As cha tojanéjua: —Ndegombre, canýa Eliascá natsana echanjabo, y ntšamo jtsemnana yomncá lempe echánjabatsma. Pero ntšamo Bëngbe Bëtsabe uabemana palabrënguiñe endayancana, Bëngbe Bëtsá Entsó tbojanbemá puerte caochjasúfria, y inýenga puerte camochtsáboyënja ca. <sup>13</sup> Ndegombre cbéyana, canýa Eliascá ya tonjabo, y cháftaca entsanga tmonjanma lempe ntšamo tmojabošencá, ntšamo chaochnëngua Bëngbe Bëtsabe uabemana palabrënguiñe endayancá.

### Jesús, canýe basa bayëjbe juabna uambayábioye tbojanshná

<sup>14</sup> Chentšana, chënga tmojtaná chë inýe uatsjédayëngbioye. Chora, Jesús tojáninýe ba entsanga chë uatsjédayëngbe shéconana imojtsemnana, y básefta ley abuátambayëngna chëngaftaca imojtsenatsëtnaye. <sup>15</sup> Nyetsca entsanga cha tmojáninýe ora, imojnjaná y tmojanótjajo cha jachuyama. <sup>16</sup> Chora



Jesús chënga tojanatjá: —¿Ndayama chëngaftaca šme-natsëtsná ca?

<sup>17</sup> Y canya entsanguentsá tbojanjuá: —Buatëmbayá, muentše ácbioye sënjuánatse atšbe uaqiñá; bacna bayëjbe juabna entsambá, y chë causa, jóyebuambayama ndoñe quenátobena. <sup>18</sup> Nye ndayétsnaca cha tojtsemnentše, chë bayëja chábioye jishachana y jtse-najuáchesënjana; chentše uayoicana shashiye jtsabocanana, jtsenoftëšfjojnayana y obanacá jtsatsjájonana. Acbe uatsjëndayënga sënjaimpadá chë bacna bayëja chamuatábcnana, pero ndoñe chematobená ca —cha tbojaniana.

<sup>19</sup> As Jesús tojánayana: —¿Nyetšá ndošbuáchiyënga ca! ¿Buetayté šojtsemna tšëngaftangaftaca jëftsemnana? ¿Buetayté uantado tšëngaftangaftaca chjëftsemna? ¿Moye chë básetema mánatse ca!

<sup>20</sup> Chora chë básetema chábioye tmojanánatse; y chë bayëja Jesúsbioye tbojáninye ora, tojanma chë basa ataque chaboshachama, y chë basa fshantsoye yojashajaye, yojtsojanduounaye y uayoicana shashiye yojtsábocana. <sup>21</sup> As Jesús chë básabe taitábioye tbojan-tjá: —¿Buetayté chca yojtsepása ca?

Y cha tbojanjuá: —Bássetema orscana chca; <sup>22</sup> ba soye, chë bayëja chábioye iñoye jtsatmetšana y buyeshoye jtashbuetšana, jtsóbama. Chiyeca, nderado ndayá chabiana jamama tcojtsobenëse, bënga šmot-salastemá y šmotsëjabuache ca.

<sup>23</sup> Chora Jesús tbojaniana: —¿Ndáyeca “ndayá jama-tcojtsobenëse ca” šcauyana? Nda Bëngbe Bët-sábeñe tojtsošbuáchebiana lempe endopodena ca.

<sup>24</sup> Y cachora chë básabe taitá tojanáyebuachena: —Añe, Bëngbe Bët-sábeñe sëntsošbuaché; Diosman-da, ¡más jtošbuáchiyama šmajabuache ca!

<sup>25</sup> Y bëtsá entsanga imojtsótotoma Jesús tojáninye ora, chë bacna bayëja tbojtsanbochembo mëntšá: —¿Bacna bayëja, chë bássetema tësmá y ndëbiá bi-amnayá; chábentšana maisebocna y ndocna te más chábeñe catjésamashëngo ca!

<sup>26</sup> Y chë bayëja chábentšana yojésebocna, yojtseyoye y chë básabioye jabuache ibojeshatiyiyé; y chë básana mo obanacá tojanoquedá, y chë causa banga imojtsichamo cha obaná yojtsemna ca. <sup>27</sup> Pero Jesús tbojanábuacushache y tbojtansbaná; y chë básana yojtëtsaye.

<sup>28</sup> Chentšana, Jesús canye yebnoye tojánamashëngo, y chabe uatsjëndayëngna luaroca cha tmojantjá: —¿Ndáyeca bënga ndoñe fsënjobená chë bayëja jtabocnana ca?

<sup>29</sup> Y Jesús tojanéjua: —Chca bayëjënga jtëbuacanama jobenayana nye Bëngbe Bët-sáftaca jencuëntase, chabuájabuachama jaimpádase ca.

### Jesús cachiñe tojánayana cha ibojamna jóbanana y jtayenana ca

<sup>30</sup> Chentšana tmojëftsanbocna ora, Galilea luarëjana imojtsajna; y Jesús yojtseboše chama ndocná chaondëtsetatšëmbuama, <sup>31</sup> er cha chabe uatsjëndayënga yojtsabuátambaye. Mëntšá cachabiana yo-

janëtsëtsnaye: “Bëngbe Bët-sá Entšá tbojanbemá entsangbe cucuatšine mochanjáboshjona; mochanjó-ba, pero chentšana unga tianoye echántayena ca.”

<sup>32</sup> Pero chënga ndoñe yontsósertana ntšamo Jesús yojtsanëtsëtsnacá, y chama jatstjanayamna chënga imojtsauatja.

### ¿Nda chë más uamaná yomna?

<sup>33</sup> Chora Capernaum puebloye chënga tmojánashjaj-na; y cach yebnentše imojtsemna ora, Jesús chë uat-sjëndayënga tojanatjá: “¿Ndayama benachiñe šmabáyenatsëtsnaye ca?” <sup>34</sup> Chëngna nye iytëca tmo-janobiama, er benachëjana chënga imnayénatsët-snaye, chënguentsá nda chë más uamaná bëtsemna-ma. <sup>35</sup> As Jesús tojanótbema, chabe bnëtsana uta uat-sjëndayënga tojánachembo y tojanéyana: “Ndánaca nyëtscangbiana chë más uamaná jtsemnana tojtse-bošëse, cha chë más nduamaná chaóbema y nyëtscanga chaotsaserverna ca.” <sup>36</sup> Chora Jesús canye bássetema tbojánishache, chëngbe tsëntsaca tbojanat-sá, tbojantbá y chënga tojanéyana: <sup>37</sup> “Ndánaca, át-šbeñe ošbuachiyá bëtsemnayeca, tbojofja canya mo quem basetemcá, chana atše jofjana; y nda atše šojof-ja, chora cha nye atše ndoñe ntjofjana, sinó chë šojich-mó chábioynaca jofjana ca.”

### Nda ndoñe bëngbe contra tontsemná, bëngaftaca jtsemnana

<sup>38</sup> Juan, Jesúsbioye tbojaniana: —Buatëmbayá, bënga fsënjinye canye boyabása, y cha aca jótšëmbonëse, bacna bayëjbe juabna entsángbentšana endëtëbua-cana; pero cha bëngaftaca ndoñe quenátsmëna causa, chama fsënjesauyaná ca.

<sup>39</sup> As Jesús tbojanjuá: —Ndoñe šmatjuauyaná; er ndocná quenátobena canye bëts soye jamana Bëngbe Bët-sabe obenánaca, atše jótšëmbonëse, y chentšana atšbe contra jatóyebuambnayana. <sup>40</sup> Ndegombre, nda ndoñe bëngbe contra tontsemná, bëngaftaca jtsemnana. <sup>41</sup> Y ndánaca, masque nye býeshtema tšëngaftanga tcmojubuatšatá, tšëngaftanga átšbënga bëtsemnayeca, chábioye Bëngbe Bët-sá canye uacanana soye bochantatšëta, cha chë tšabe soye tojamama ca.

### Resjo yomna, nderado bacna soyënga cuanjama

<sup>42</sup> Chentšana Jesús tojánayana: “Canya átšbeñe oš-buachiyábioye mo quem basetemcá, nda tbojaingñé atše ustonama chaotsajbanama, más tšabá chabiana nántsemna canye bëts nantsnëbé chamotseta-mošëntšbua y mar bëjayoye asentoye chamotsash-buetše chabotsenatjëmbama. <sup>43</sup> Nderado acbe cucuatšëca bacna soye tcojama, más tšabá nántsemna chë cucuatšë chacotsenacuéstjango. Acbiana más tšabá endmëna celoye jamashënguana nyëtscatescama vi-da jtsebomnana, nye canye cucuatšë bomná, y ndoñe nyëtš útätšëca infiernoye chacmotocá jama, chë ndoc-na te yochanjáfsana iñeshoye; <sup>44</sup> choca útšëngna

puerte nÿetsca tescama mochanjasúfria. Chéngbioye mochtsasaye mamanga ndocna te quemochatóbana, y chë íñeshe ndocna te queochátsfsana.

<sup>45</sup> “Nderado acbe shecuátšeca bacna soye tcojama, acbiama más tšabá nántsemna chë shecuatšë chacotsenashecuástjango. Acbiama más tšabá endmëna cosheto celoye jamashënguana nÿetsca tescama vida jtsebomnama, y ndoñe nÿets útatsëca infiernoye chacmotsëtšëna; <sup>46</sup> choca útšenënga puerte nÿetsca tescama mochanjasúfria. Chéngbioye mochtsasaye mamanga ndocna te quemochatóbana, y chë íñeshe ndocna te queochátsfsana.

<sup>47</sup> “Nderado acbe bomínÿeca bacna soye tcojinÿe y cachca soye tcojama, más tšabá nántsemna chë bomínÿe chacotsenobuchjátsëca. Acbiama más tšabá endmëna Bëngbe Bëtsabe amëndayoye jamashënguana nÿe canÿe bomínÿe bomná, y ndoñe nÿets útabeca infiernoye chacmotsëtšëna; <sup>48</sup> choca útšenënga puerte nÿetsca tescama mochanjasúfria. Chéngbioye mochtsasaye mamanga ndocna te quemochatóbana, y chë íñeshe ndocna te queochátsfsana.

<sup>49</sup> “Tamó tšabe soye endmëncá, Bëngbe Bëtsá echanjama nÿetsca tšëngaftangbiama tšábënga chašmotsemnama, chë átšbeñe betsošbuáchema šmojtsepadecena ora šmojauantase. <sup>50</sup> Tamó tšabe soye endmëna. Pero chë tamó fténana tojtsóbemëse, ndoñe quešmátobena jamana cachiñe chabe tempsca sanana chaotsatsbomnama, ni saná jatamuama. Mo tšabe tamocá entšangbiama šmochtsemna, chéngbeñe jtsiyenëse ntšamo Bëngbe Bëtsá yobošcá, y nÿetscángaftaca natjémbana šmochtsiyena ca” —cha tojánayana.

#### Ndayá Jesús tojanabatambá bouamnënga tmojt-senëtšënama

**10** Chentšana, Jesús chë luarentšana tojéftsanbocna y tojána Judea luaroye y Jordán chenguana. Entšanga cachiñe chábioye tmojánabo, y cha chënga yojtsabuátambaye, chë ntšamo jamana yojanamancá. <sup>2</sup> Básefta fariseunga chábioye tmojanobconá, y jisháchichiyama mëntšá imojtsetjanaye: —¿Queojtselesenciana canÿe boyá chabe shémbioye cachcá jesonÿayama ca?

<sup>3</sup> Chora cha tojanéjua: —¿Ntšamo Moisés chë soyëngama tcmënjanamëndaye ca?

<sup>4</sup> Y chënga tmojánayana: —Moisés tojanalesencia chë boyá chabe shémbioye chabuiyé canÿe tsbuanáchá, ndayéchañe chaotsayana cha ya ndoñe chabe shema yontsemna ca, y chora cachcá chabe shema chabuesonÿá ca.

<sup>5</sup> Chora Jesús tojanéyana: —Tšëngaftanga Bëngbe Bëtsabe mandënga ainaniñe jýëngacñama ndoñe quešmátsboše causa, Moisés chca tšëngaftanga tcmojéftsanamëndá. <sup>6</sup> Pero quem luare jobojátsama orna, “Bëngbe Bëtsá canÿe boyabása y canÿe shembása tonjánabiama. <sup>7</sup> Chiyeca, chë boyabása chabe taitá y chabe mamá echanjésabashejuana, chabe shémaftaca jenútanama, <sup>8</sup> y chë útatna mo canÿacá bochántsem-

na.” Y chca, ya ndoñe útata quebochátsmëna, sinó nÿe mo canÿacá. <sup>9</sup> Chcasna, entšá ndoñe chaondënbema ndayá Bëngbe Bëtsá mo canÿiñcá tojéftsema soye ca —cha tojánayana.

<sup>10</sup> Ya cach yebnoca imojtsatsmëna ora, chabe uatsjéndayënga cach soyama imojtëstjaye. <sup>11</sup> Y Jesús tojanéyana: “Nda chabe shémbioye cachcá tbojesonÿá y ínÿaftaca tojtóbouamase, cha chë natsana shémbioye inÿe shembásaftaca jtseíngñayana; chana canÿe uabu-atmá jtsebomnana. <sup>12</sup> Y chë shema chabe boyábioye cachcá tbojesonÿá, y ínÿaftaca tojtóbouamase, chánaca chë natsana boyábioye ínÿaftaca jtseíngñayana; canÿe uabu-atmá jtsebomnana ca” —Jesús tojánayana.

#### Jesús, basetémëngbiama Bëngbe Bëtsábioye tbojanimpadá

<sup>13</sup> Entšanga, basetémënga Jesúsbioye tmojanënatse, chauabájajuama y Bëngbe Bëtsábioye chëngbiama chaboimpadama; pero chabe uatsjéndayëngna tmojanontšë chë basetémënga unachayënga jtsëcácanana. <sup>14</sup> Jesús chca tojáninÿe ora, tbojánëtna y chë uatsjéndayënga tojanéyana: “Cachcá mónÿaye chë basetémënga átšbioye chamuabo y ndoñe matéuyanana; er Bëngbe Bëtsabe amëndayana endmëna chë mo quem basetémëngcá imomnëngbiama. <sup>15</sup> Ndegombre cbéyana, nda Bëngbe Bëtsabe soyënga ndoñe tonjýëngacñe mo canÿe basetemcá jtsošbuáchiyëse, cha ndoñe queochatobenaye Bëngbe Bëtsabe amëndayoye jamashënguama ca.”

<sup>16</sup> Y chë basetémënga tojanchebá, y chéngbeñe cucuatšënga jajájuase, Bëngbe Bëtsábioye tbojanimpadá tšabe bendicionënga chéngbeñe chaotsemnama.

#### Canÿe bomna entšá Jesúsbioye tojána

<sup>17</sup> Jesús jama tojtëtanontšë ora, canÿe boyabása chábioye tojanótjajo, chabe shecuatšëntšë tojanoshëntsamentšë, y mëntšá tbojantjá: —Tšabe Buatëmbayá, ¿ndayá šojtsemna jamana chë nÿetsca tescama yomna tšabe vida jtsebomnama ca?

<sup>18</sup> Y Jesús tbojanjuá: —¿Ndáyeca “tšabia ca” šcajauyana? Tšabia nÿe canÿa endmëna: Bëngbe Bëtsá.

<sup>19</sup> Aca icotátšëmbo Bëngbe Bëtsá tojanmandacá: “Ndoñe catjóba, acbe shema ínÿaftaca ndoñe cattseíngñaye, ndoñe catjatbëba, ndoñe catjuaboínÿena, ínÿengbioye ndoñe catjáingñaye ndayánaca jabacama, y acbe bëtšëtsata ndoñe stëtšoye catjáquedaye ca.”

<sup>20</sup> Chora chë boyabása tbojanjuá: —Buatëmbayá, atšë lempe chë mandënga básëtema orscana sëndocumplina ca.

<sup>21</sup> Jesús bonshanánaca tbojanonÿinÿe y mëntšá tbojanianyana: —Canÿe soye cmontsebuáshbena jamana: Motsa, lempe ntšamo icobomncá cochjetsatobuiye, y chë crocénana, ndbomnëjëmënga cochtsatšataye; chca, celoca canÿe bëtš bomnana cochántsebomna. Chentšana, cochjabo y šcochjuasto ca.

<sup>22</sup> Pero chë bobóntsbiöye inÿetšá ibojtsínÿnana Jesús chca tbojanianama; y puerte ngménaca yojtá, cha puerte bomná inamna causa.

<sup>23</sup> Chora Jesús cátoye tojanrrepará y chabe uatsjéndayënga tojanéyana: —¡Puerte totcá entsemna bomnëngbiana Bëngbe Bëtsabe amëndayoye jamashënguama ca!

<sup>24</sup> Chca imojouena ora, chë uatsjéndayënga ojnánánënga imojtsemna, pero Jesús cachiñe tojanoyebuambá y mëntšá tojanéyana: —Atšbe básënga; ¡puerte totcá entsemna Bëngbe Bëtsabe amëndayoye jamashënguama! <sup>25</sup> Ndegombre, más paselo endmëna chë coshufjentšá atëfjnëjana canÿe camello chauachnëngo, y ndoñe canÿe bomná Bëngbe Bëtsabe amëndayoye jamashënguana ca.

<sup>26</sup> Pero chë uatsjéndayënga nÿe más imojtsenjnanaye y imojtsentjanaye: —¿As, nda yochjobenaye atsbočaná jtsemnana ca?

<sup>27</sup> Chora Jesús tojanëñyané y tojanéyana: —Entšanga ndoñe quemátobena jamana canÿa atsbočaná chaotsemnana, pero Bëngbe Bëtsá aiñe; er Bëngbe Bëtsá lempe jamama endobena ca.

<sup>28</sup> Chora Pedro tbojanianama: —Aca contsonÿá, bënga lempe chë fsëndbomna soyënga fsënjéseboshjona y ácaftaca fsëntsjajna ca.

<sup>29</sup> As Jesús tojánayana: —Ndegombre cbéyana, ndánaca átšbioye jaserviama y chë tšabe noticiënga jábuayenama, tojëseboshjona chabe yebna, catsátanga o uabénanga, bebmá o befta, o básënga, o fshantsënga, <sup>30</sup> cha mora quem luarentše echanjóyëngacñe chama patse soye más yebnënga, catsátanga, uabénanga, bebmanga, básënga y fshantsënga, masque puerte chaosufrima ínÿënga mochántsama; y chë inÿe luarocna, chë nÿetsca tescama yomna tšabe vida echanjónÿena. <sup>31</sup> Pero banga, mora uámanënga imomnënga, nduámanënga mochántsemna; y banga, mora nduámanënga imomnëngna, uámanënga mochántsemna ca —Jesús tojánayana.

### Jesús cachiñe tojánayana cha jóbanama y jtayenama

<sup>32</sup> Chentšana Jerusalenoye imojtsaye, y Jesús yojtseb-natsana. Chë uatsjéndayënga puerte ojnánánënga imojtsemna, Jesús ndauatjácá choye yojtsayama; y inÿe becá entšanga ústonoye imojtsajñëngna, imojtsayáuatja. Jesús cachiñe chabe bnëtsana uta uatsjéndayënga barie tojánachembo y tojanontšé jáuyanana ntšamo cháftaca jopásama yojtsemnana. <sup>33</sup> Mëntšá tojanéyana: “Tšëngaftanga šmontsonÿá, Jerusalenoye bënga mora montsajnama. Chocna, chë Bëngbe Bëtsá Entšá tbojanbemá, chë bachnangbe amëndayënga y ley abuátambayëngbe cucuatšiče mochanjáboshjona, y chënga mochanjayana cha chaóbana ca; y ndoñe judiëngbe cucuatšiče mochanjáboshjona. <sup>34</sup> Chënga mochantsáboyejuana, mochántsebuashëtoto, mochántsetjanja y mochanjóba, pero chentšana unga tianoye cha echántayena ca.”

### Santiago y Juan, Jesús tmojanimpadá canÿe pavor cháuabiamama

<sup>35</sup> Chora, Santiago y Juan, Zebedeobe uaquiñata, Jesúsbiöye tbojanobconá y tmojanianama: —Buatëmbayá, bëndata fsëntseboše pavor chašcuabiamama ntšamo chacbojaimpadacá ca.

<sup>36</sup> Y Jesús tojanatjá: —¿Ndayá šojtseboše atše tsëndatbiama chjamama ca?

<sup>37</sup> Y chata tbojanianama: —Aca reycá chacojtsemánda ora, cochjaleséncia bëndata fchayobená jótbemana, canÿa acbe catsbioica y inÿa acbe uañicuayoica ca.

<sup>38</sup> As Jesús tojanéjua: —Ntšamo šmontsotjanañama tsëndata ndoñe quešnástatšëmbo. ¿Ntšamo atše chaitsesufrincá, tsëndátnaca cachcá jasúfriama tašatjobenaye? ¿Y entšanga puerte bacá chacmojt-sëbuatsená ora, tašochjauáanta, ntšamo atše chjauantacá ca?

<sup>39</sup> Y chata tbojanianama: —Aíñe fchanjobenaye ca.

Y Jesús tojanéyana: —Ndegombre tsëndátnaca atšcá šochanjasúfria, y atšbe causa cmochántsamna bëtscá soyëngama jasúfria. <sup>40</sup> Pero atše ndoñe quetsátobena jamándana nda atšbe catsbioica y atšbe uañicuayoica chaótbemama. Chë útentše entsemna ndëmuanÿëngbiana atšbe Taitá tojaprontacá ca.

<sup>41</sup> Chë inÿe bnëtsana uatsjéndayënga chca tmojanuena ora, tmojanontšé Santiago y Juánoftaca jotjáyanana. <sup>42</sup> Pero Jesús nÿetsca uatsjéndayënga tojánachembo y tojanéyana: “Tšëngaftanga šmondëtatšëmbo, quem luarentša amëndayënga lempe jtsemándayana, nÿa mo nduiñënga cuaftsemncá; y chë bëtsëtsa entšanga chëngbe obenánaca jtsemándayana, ntšámna jtsamëse, chë inÿe entšanga sempre chamotsayaunanama. <sup>43</sup> Pero tšëngaftangbeñe ndoñe chca chaondëtsemna. Inÿetšá; masna, nda tšëngaftangbeñe chë más uamaná jtsemnana tojtseboše, cha bontsemna chë ínÿënga jtsaservénana; <sup>44</sup> y ndánaca tšëngaftanguentšá chë más uamaná jtsemnana tojtsebošá, bontsemna jtsemnana nÿetscangbiana, mo nÿe ínÿabiama nÿets tempo oservenacá. <sup>45</sup> Cachcá, Bëngbe Bëtsá Entšá tbojanbemá ndoñe chenátabo cha chamotseservénama, ndayá ínÿënga jabáserviama. Y mo nda, ínÿënga játsebacama cuafjopagacá, cha echanjóba ba entšanga atsebácanënga chamotsemnana ca” —cha tojánayana.

### Jesús canÿe jtanábioye tbojanshná

<sup>46</sup> Chentšana, Jesús y chabe uatsjéndayënga Jericó uabaina pueblöye tmojánashjajna. Y Jesús chabe uatsjéndayëngaftaca y bëtscá entsángaftaca Jericó pueblentšana yojtsaisebocana ora, Timeobe uaquiñá, Bartimeo ca uabainá, canÿe jtaná lemošna otjanañá, benache juachañe yojtsetbemana. <sup>47</sup> Y Jesús Nazaretocá chëjana yojtsachñëjuanama cha yojátatšëmbona ora, tojanontšé mëntšá uayebuáchana: —¡Jesús, Davidbentšana Entšá, šmotselastemá ca!

<sup>48</sup> Chorna, banga chë jtaná imojtsáacacana iytëca chaóbemama. Pero cha más yojtsáyebuache: —¡Davidbentšana Entšá, šmotselastemá ca!

<sup>49</sup> Chora Jesús tojantsá y chë ínÿenga tojanéyana: —Chë jtaná mochembo ca.

As chë jtaná tmojanchembo, y mëntšá tmojanianyana: —¡Añemo cochtsebmoma; motsbaná! Jesús cmontsechembuana ca.

<sup>50</sup> Y chë jtaná, quefsaiya jtsenátsejquëse, yojontsënja y betesco Jesúsbioye yojobeconá. <sup>51</sup> Chora, Jesús chë jtanábioye tbojantjá: —¿Ndayá cojtseboše atše acbiama chjamama ca?

Y chë jtaná tbojanjúá: —¡Buatëmbayá, šmolelenciá atše chašuatabinÿnama ca!

<sup>52</sup> As Jesús tbojanianyana: —Motsatoñe. Tšabá jtsatsmënema Bëngbe Bëtsábeñe icošbuachéyeca, tšabá contsatsmëna ca.

Y cachora cha tšabá ibojtabinÿna, y Jesúsbioye benachëjana ibojtséstona.

### Jesús Jerusalenoye tojánashjango

**11** Ya Jerusalenoye imojtsebeconá ora, Betfagé y Betania pueblënga béconana, Olivos ca uabaina tjashe juachañe, Jesús uta chabe uatsjédayata tojanichamó, <sup>2</sup> y mëntšá tojanéyana: “Tsëndatbe natsana entsemna base pueblotémoye motsata. Chašojáshjango y cachora šochanjínÿena canÿe burrotema utsbuaná; chábeñe cabá ndocná tonjenojayé. Šochjuajafjoná y šochjuánatse. <sup>3</sup> Nderado nda, ¿ndáyeca šmojtsanachá ca? chacmojátjase, šochjojúá: ‘Bëngbe Utabná bontsájaboto y chora bochantabáiseboshjona ca.’”

<sup>4</sup> As chata tbojána, y tbojáninÿena chë burrotema tsáshenañe, canÿe bësháñe utsbuaná, y imojjuajafjoná.

<sup>5</sup> Y básefta entšanga chiñe imojtsemnënga, chátbioye tmojanéyana: “¿Ndayá šojtsama? ¿Ndayeca chë burrotema šojtsajafjóna ca?”

<sup>6</sup> As chata tbojanjúá ntšamo Jesús tojanéyancá; y chë entšanga tmojanalesenciá chë burrotema chamuánat sama. <sup>7</sup> Chentšana, chë burrotema Jesúsbioye tmojanánatse; chë burrotémbeñe chatbe entšayá tbojaná jatse, y Jesús chábeñe tojanenojayé. <sup>8</sup> Bëts cá entšanga chëngbe entšayá chë benachëjana imojtsanëtétsat sana, y ínÿengna chë jajoca imojuatëtsetše buacuashangá chiñe imojuacjaye. <sup>9</sup> Y chë natsana imojtsajnënga y chë ústonoyënga mëntšá imojtsaiuáye buache: “¡Bëngbe Bëtsá matschuanga! ¡Corente bendición bomná, chë Bëngbe Utabnabe obenánaca tojabá! <sup>10</sup> ¡Tša tšabá chë echanjóshjango amëndayana, bëngbe bëts taitá David yojéftsemánda orcá! ¡Bëngbe Bëtsá celocá matschuanga ca!”

<sup>11</sup> Jesús Jerusalenoye tojánashjango, y Bëngbe Bëtsabe bëts yebnoye tojánamashëngo. Chabe shëconana lempe yojéftserrepárase, y ya yojtseibétatana causa, chabe bnëtsana uta uatsjédayëngaftaca tojéftsanbocna, Betania puebloye.

### Jesús tojánayana canÿe betiye ndoñe más chaondëshájona ca

<sup>12</sup> Yëfsana, Betaniocana Jerusalenoye chënga imojtészajna ora, Jesús tbojánishëntsena. <sup>13</sup> Bënocana canÿe higo betiye yojinÿe; as tojána jontješiyama tainashajo o ndoñe. Pero nÿe tsbuanáchënga chiñe yojínÿena, chora ndoñe shajo tempo bétsemna causa. <sup>14</sup> As Jesús chë higo betiyoye tojánayana: “¡Ndocna te más chacondëshájona entšanga chamosama ca!”

Y chabe uatsjédayënga imojouena ntšamo cha tojanayancá.

### Jesús, Bëngbe Bëtsabe bëts yebnentšana enënga y obuámnayënga tojtanëbuacna

<sup>15</sup> Jerusalenoye tmojánashjajnentšana, Jesús Bëngbe Bëtsabe bëts yebnoye tojánamashëngo, y tojanontsé chentšana jtëbuacnana chë chentše imojtsena y imojtsobuámnayënga. Chéntšnaca imojtsemna entšanga canÿe crocénana enënga, y chë crocénana nÿe Bëngbe Bëtsabe bëts yebnentšama inoservena. Chë entšanga crocénana atrocayëngbe mesëshangá tojtsanenásatajchquëca, y chë palomatëmënga enëngbe tšenëšëngnaca; <sup>16</sup> y ndoñe tonjanalesenciá ndocná Bëngbe Bëtsabe bëts yebnëjana chë soyënga chaotsëchnëjuanama. <sup>17</sup> Y tojanontsé entšanga mëntšá jabuátambana: “Ndegombre, Bëngbe Bëtsabe uabemana palabrënguiñe cha mëntšá tojánayana: ‘Atšbe bëts yebna echantsabaina nÿetsca luarentša entšangbiamama átšeftaca encuéntaye yebna ca’; pero tšëngaftangna atbëbanëngbe oyeniñe chë yebna šmojtsebema ca” —Jesús tojanéyana.

<sup>18</sup> Chë bachnangbe más uámana amëndayënga y chë ley abuátambayënga tmojántatšëmbona ntšamo yojochnënguama; as tmojanontsé enójuabnyana ntšamo jobenayana cha jóbana, cha imojtsebiauatja causa, er nÿetsca entšanga imojtsenjananaye ntšamo cha yojanabuátambama. <sup>19</sup> Pero yojtseibétatana ora, Jesús chabe uatsjédayëngaftaca chë bëts pueblentšana yojesóbocñe.

### Chë higo betiye tojtsanbuashá

<sup>20</sup> Yëfsana cachëse, cachëjana imojtészachnëjuana ora, tmojáninÿe chë higo betiye parejo tbëtëjëngaca yojtsebuashá. <sup>21</sup> Chora Pedro yojenójuaboye ntšamo yojopásama; as Jesúsbioye tbojanianyana: —¡Buatëmbayá, minÿe; chë tconjayana ndocna te más tšabe betiye chaotsemnana betiye tojtsebuashá ca!

<sup>22</sup> Y Jesús tbojanianyana: —Bëngbe Bëtsábeñe šmochtsošbuáchiye. <sup>23</sup> Ndegombre cbëyana, nderado nda quem tjoye tojayana, “¡chentšana mojuaná y bëts uafjajónayoye motsëshbuetše ca!” y chca tojayana ainaniñe inÿetšá juabna ntjatsbomncá, y ainaniñe puerte tojtsošbuaché ntšamo tojayancá añe yochjochnënguama, ndegombre chca echanjochnëngo. <sup>24</sup> Chíyeca cbochanjúyana, lempe ntšamo Bëngbe Bëtsáftaca chašmojtsencuénta ora chašmojtsotjanaña-

ma, ainaniñe corente šmochtsejuabnaye ya šmojóyëngacñe ca, y ndegombre chca šmochántsebmna. <sup>25</sup> Y Bëngbe Bëtsáftaca chašmojtsencuënta ora, š-mochjenójuaboje nderado nda ndaye bacna soye tšëngaftangbiama tojamama, y cháftaca cabá etonánënga šmojtsebnëse, šmochtseperdóna; chca, Bëngbe Bëtsá, celoca endmëná, tšëngaftangbe bacna soyëngama chacmotsaperdonama. <sup>26</sup> Pero inya ndoñe šmonjaperdonasna, Bëngbe Taitá, celoca endmëná, cach ndoñe tšëngaftanga quecmochátaperdonaye ca —cha tojánayana.

### Jesusbe obenana

<sup>27</sup> Chca tojanopasá chentšana, Jerusalemoye chënga tmojesaná. Jesús Bëngbe Bëtsabe bëts yebnëjana yojt-sobuertanëntscuana, chábioye tmojanobeconá bachnangbe amëndayënga, ley abuátambayënga y chë judiëngbeñe bëtsëjemëngcá amëndayënga, <sup>28</sup> y mëntšá tmojantjá: —¿Ndaye deréchoca chë contsama soyënga aca cojtsama ca? ¿Chca jtsamama nda obenana tcmënjatšetá ca?

<sup>29</sup> As Jesús tojanéyana: —Atšnaca séntsebmna canye soye tšëngaftanga jatjayama. Chašmojojuase, átšnaca cbochjáuyana ndaye deréchoca atše chca stsama. <sup>30</sup> ¿Nda Juan chë Ubayaná tbojanichmó entšanga jubáyama, Bëngbe Bëtsá o entšanga? Šmëyana ca.

<sup>31</sup> Chora chënga tmojanontšé mëntšá enatsët-snayana: “‘Bëngbe Bëtsá ca’ chamojojuase, cha šochanjáuyana: ‘As ¿ndáyeca chë cha tcmojanabuayená soyënguiñe ndoñe šmonjanošbuaché ca?’ <sup>32</sup> Pero ndoñe quemuátobena jayanana ‘entšanga ca.’” Chca tmojánayana, er chënga entšangbiama imojánauatja, er nyetscanga imojanjuabná, Juan ndegombre Bëngbe Bëtsabe juabna oyebuambnayá yojamnama. <sup>33</sup> Chcasna, chënga tmojanjuá: —Bënga ndoñe queftsátstatšëmbo ca.

Y Jesús tojanéyana: —As atše cach ndoñe quebochatéyana ndaye deréchoca atše chca stsama ca.

### Chë puerte bacna trabájayëngbiama cuento

**12** Chora Jesús tojanontšé cuentëngaca jabuátambana. Mëntšá tojanéyana: “Canye entšá bëtská uvas betiyënga yojáje, y chë shéconana yojajëtja. Chë uvasëšangá juantsëtëtjamna canye base luare yojajutjo; y canye tsbanana jebna soye yojapórma chiñe jtsashanýama. Chentšana, inye trabájayënga chë jajañe yojúyentšame, y chana inye luaroye yojtsoñe. <sup>2</sup> Chë uvasëšangá juashacama tempo yojobuache orna, chë jajañe nduiño canye oservená ibojíchmua chë arrëndayënga jáuyanama ntsachetšá chë nduiño ibojtso-tocánama. <sup>3</sup> Pero chëngna, cha imojishache, imojtsejantšetaye, y tondaye ntajatacá imojtichmuá. <sup>4</sup> Chentšana, chë nduiño inye oservená ibojíchmua; pero chana, bestšaše imojtselšia y podesca imojtsóyenguango. <sup>5</sup> Chentšana inya ibojatichmuá, y chana

chë arrëndayënga imojtsóba. Y bángnaca yojichamuá; pero chëngna, inyëngna imojtsajantšetaye y inyëngna imojtsëbaye.

<sup>6</sup> “Chë nduiño cabá canya ibojtsábojamna jíchmua-ma: cachabe bonshana uaquiñá. Cabana, cha ibojíchmua y mëntšá yojtsejuabnaye: ‘Atšbe uaquiñá cocayé mochanjóyeunaye ca.’ <sup>7</sup> Pero chë arrëndayënga cha imojinýe ora, imojeniyana: ‘Mua chë fshantse nduiñbe uaquiñá entsemna. Lempe chabe soyënga mua echanjóyëngacñe. Cuajna, motsóbanga, y lempe chabe otocana soyënga bëngbiama echanjoquéda ca.’ <sup>8</sup> Chcasna, cha imojishache, imojtsóba y chë uvas betiyënga jajañentšana más chcoye imojetsëtšena ca” —Jesús tojancuentá.

<sup>9</sup> Jesús chca jacuëntama tojanpochocá ora, tojánayana: “Y asna, ¿ndayá chë fshantse nduiño yochjama ca? Cha co echanjá y chë trabájayënga echanjetsëbaye, y inye trabájayënga chë uvas betiyënga jajañe echanjárrendaye.

<sup>10</sup> “¿Tšëngaftanga ndocna te Bëngbe Bëtsabe uabemana palabra šmëndualía? Chiñe mëntšá endayana: Chë yebna jebuanënga tmojtsanaboté ndëtšbé, mora chë más bëts uashacuanëšentše entsejájona.

<sup>11</sup> Chë soye Bëngbe Utabná, Bëngbe Bëtsá chca tojamama, y bënga chama ojanánënga fsëntsemna ca.”

<sup>12</sup> Chora, chë bachnangbe amëndayënga y chë bëtsëjemëngcá mándayënga tmojánbošena Jesús jishachana, er chënga tmojanenótatšëmbona cha chca tojancuentá jinýanýiyama chënga mo chë puerte bacna trabájayëngcá imojanmënama. Pero entšangbiama imojtsauatja, chíyeca cachcá tmojanonýa y chentšana imojtsóñenga.

### Chë Romoca bëts mandadbiama impuesto jtsatsquécj-nayama

<sup>13</sup> Chentšana chënga, básipta fariseunga y Heródesbe ústonënga Jesúsbioye tmojanichamó, ndayá cha tojaniñe jisháchichiyama, as chca jtsebmnama ndaye sóyeca mandadëngbeñe cha mal jaquédana. <sup>14</sup> Chënga tmojána y Jesús tmojanianya: —Buatëmbayá, bënga fsëndétatšëmbo aca ndegombre soyënga cnetsabuátambama, y ndoñe jatuenanana nye ntšamo entšanga tmojatichamcá, er acbiama tondaye quenatámana nda más uamaná o nduamaná tomnana; y contsabuatambá ndegombre tšabe vida jtsebmnama, ntšamo Bëngbe Bëtsá yomandacá. Chcasna, ¿tšabá tanántsemana, César, chë Romoca bëts mandadbiama bënga impuesto jtsatsquécj-nayana? ¿Fchtsatsquécjnaye o ndoñe ca? —chënga tmojantjá.

<sup>15</sup> Jesús yojtsetátšëmbo, chënga bacna entšanga ntšamo ndegombre tmojuabnacá ndinýinýayënga imojamnama; chíyeca tojanéyana: —¿Ndáyeca tšëngaftanga šmojtseboše chë sóyeca atše jisháchichiyama? Canye denario crocénana šmiyëboñe, atše chayobená jinýama ca.

<sup>16</sup> As canye crocénana tmojanoyé y Jesús tojanéyana: —¿Ndabe jubíá quem crocénaniñe yojtsemna, y ntšamo muentše entsabemancá nda chca iuabaina ca?

Y chënga tmojanjuá: —Césarbe jubíá; cha chca endu-abaina ca.

<sup>17</sup> Chora Jesús tojanéyana: —Chcasna, César š-mochtoyiye cha ibotocana soye; y Bëngbe Bëtsana cha ibotocana soye ca.

Y nÿetscanga chama imojenjaná.

### Obanënga jtayenama Jesús tmojantjá

<sup>18</sup> Chentšana, báseftanga saduceo ca uabaina entšanga tmojána Jesús jinÿama. Chënga imojanjuabná obanënga ndocna te ntayenana ca. Chíyeca, Jesús mëntšá tmojaniana: <sup>19</sup> —Buatëmbayá, Moisés tojëft-sanabema, nderado canÿe boyá tojóbana y básenga ndoñe tonjëftsabáshejuanësna, canmëna chë uabentsá chë shémaftaca jtobouamayana, chca, chabe uabochená obanabiamá básenga jtsabamnama ca.

<sup>20</sup> Y chcase, canÿe, canÿsëfta catšátanga monjamna. Chë natsaná tonjanobouamá y tontsanóbana básenga ntjëftsabashejuancá. <sup>21</sup> Chentšana, chë ústona uabentsá chë shémaftaca tonjanobouamá, pero chana tontsanóbana, básenga ntjëftsabashejuancá; chë inÿe uabentsáftaca cachcá tonjanopasá. <sup>22</sup> Chca, nÿetsca canÿsëfta catšátangaftaca cha tonjanobouamá, pero ndocná básenga ntjëftsabáshejuanana. Y chentšana chë shembásanaca tontsanóbana. <sup>23</sup> Y morna, chë obanënga chamojtayena ora, ¿ndabe chë canÿsëfta catšatanguentšabe shema chë shembása yochtsemna, nÿetscanga cháftaca tmojanobouamase ca? —chënga tmojantjá.

<sup>24</sup> As Jesús tojanéyana: —Ntšamo Bëngbe Bëtsabe uabemana palabrënguifne endayancá ndoñe tcmönjosertá, ni Bëngbe Bëtsabe obenanama. Chíyeca ntšamo ndoñe yondmëncá šmontsichamo. <sup>25</sup> Er obanënga chamojtayena ora, ni boyabásenga ni shembásenga quemochatóbouamnaye, y chca, chënga mochántsemna mo celoca angelotemëngcá. <sup>26</sup> Y chë obanënga jtayenama, ¿Moisesbe librëšañe ndoñe šmëndualía ntšamo Bëngbe Bëtsá tbojanianama, chë betiyetema yojsángbototjuana ora? Bëngbe Bëtsá mëntšá tbojaniana: “Atše sëndmëna Abraham, Isaac y Jacobëbe Bëtsá ca.” <sup>27</sup> Bëngbe Bëtsá chca tojánayana ora, entsichamo cha ndoñe yondmëna obanëngbe Bëtsá, sinó aina entšangbe Bëtsá ca, er masque chënga tmojanóbana, chënga cabá Bëngbe Bëtsáftaca mondoyena. Tšëngaftanga canÿe ndoñe ndegombre soyifne šmontsemna ca —tojanéyana.

### Chë más bëts uámana mando

<sup>28</sup> Chentše yojtsemna canÿe ley abuatambayá. Cha vojouena ntšamo Jesús y chënga imojtsenatsët-snayana, y yojtsetátšëmbo Jesús tšabá tojanéjuama. As, tojanobeconá y Jesúsbioye tbojantjá: —¿Ndayá chë más bëts uámana mando yomna ca?

<sup>29</sup> Y Jesús tbojanjuá: —Chë más uámana mando mëntšá endmëna: “Israeloquënga šmochjouena, Utabná, Bëngbe Bëtsá endmëna, y nÿe canÿe Bëngbe Utabná endmëna, ndocná más. <sup>30</sup> Utabná Bëngbe Bëtsá

cochtsebobonshana nÿets acbe ainánaca, nÿets espíritoca, nÿets juábnaca y nÿets añémoca.” <sup>31</sup> Y chentšana quem inÿe mándnaca: “Ndëmua entšánaca cochtsebobonshana, ntšamo cach aca cuenobobonshancá.” Ndocna mando quem uta mandama más quenatámana ca —Jesús tojánayana.

<sup>32</sup> Chora, chë ley abuatambayá Jesúsbioye tbojaniana: —Buatëmbayá, puerte tšabá tcjayana. Ndegombre yomncá contsichamo, nÿe canÿe Utabná endmëna y ndocná más. <sup>33</sup> Y cha jtsebobonshánana nÿets ainánaca, juábnaca y añémoca, y ndëmua entšánaca jtsebobonshánana cachá cuenobobonshancá, puerte cuámana. Cach nÿetsá ndoñe quenatámana bayënga jtsébánayana, ni chë uátšëmbona soyënga Bëngbe Bëtsá jëtschuayama ca.

<sup>34</sup> Cha nÿets juábnaca tbojanjuama Jesús tojáninÿe ora, tbojaniana: —Batšatema cmontsebuáshbena jtseprontánama, Bëngbe Bëtsá chacolesseniama acbe ainanentše jtsemándayama ca.

Y chentšana, ya ndocná yonjenñëmua Jesús más jatstjanayama.

### ¿Cristo ndabe entšábentšana yomna?

<sup>35</sup> Jesús Bëngbe Bëtsabe bëts yebnentše yojsabuátambaye ora, tojánayana: “¿Ndáyeca chë ley abuatambayënga mondbétsichamo chë Uámana Uabuayaná Davidbentšana iuabó ca? <sup>36</sup> Cach David, chë Uámana Espíritbe mándoca mëntšá tojánayana:

Bëngbe Bëtsá, atšbe Utabná Crístitbioye tbojaniana: atšbe catšbioica mótbema, atšbe obenánaca, acbe uayayënga acbe cucuatšifne chamoquedama chjamëntscuana ca. <sup>37</sup> ¿Ntšámose Cristo Davidbentšana Entšá nántsemna, cach David ‘Utabná ca’ chábioye tbojtsabobuátmëse ca?” —cha tojanéyana.

Y chë bëtscá entšanga, oyejuayënga imojtsuenana.

### Jesús chë ley abuatambayëngbiama tojánayana, chënga ndoñe tšabá montsama ca

<sup>38</sup> Mëntšánaca Jesús chënga yojsabuátambaye: “Cuedado šmochtsebojna y ndoñe šmattsama chë ley abuatambayëngcá. Chënga jtsogusetánana bënëna entšayangaca jtsajnana y jtsebošana tsáshenafne entšanga nÿa respétoca chamotsacheuanama. <sup>39</sup> Chë judiëngbe enefjuana yebnënguenache, chë más uámana luarënguifne jtsetbiámanana, y chë fiestënguenache nÿa quëfseroca. <sup>40</sup> Pero chënga, viudángbioye chë tmobomna soyënga jtsabacayana, y entšangbe delante tšabá chamotsënyama, y chëngbioye imojtsaíngñama ndoñe chaondëtsótatšëmbuamna, Bëngbe Bëtsáftaca tša jtsencuëntayana. Chë causa, Bëngbe Bëtsá ínÿengbiama más chënga echanjácastigaye ca” —Jesús tojánayana.

### Jesús yojtšënyaye chë crocénana quëcnayënga

<sup>41</sup> Jesús jabuátambama tojanpochocá ora, tojanótbe-ma Bëngbe Bëtsabe bëts yebnentše, chë crocénana

quëcjnaye tema ndirichiñe; y chë crocénana quëcjnaye nga yojsénýaye. Bëtsca bomnëngna becá crocénana imojtsequëcjnaye. <sup>42</sup> Chora, canýe viudá ndbomnëjnaca yojobeconá y nýe uta crocénana chëtémiñe yojaftsesegóra. <sup>43</sup> Chora Jesús chabe uatsjédayënga tojánachembo chamobéconama, y mëntšá tojanéyana: “Ndegombre cbéyana, quem viudá ndbomnëjema, Bëngbe Bëtsabiama nýetscangbiama más tonjëftsesegorá. <sup>44</sup> Chë bomnëngna chë yojsóyentšjamentšana tmonjëftsesegorá, y cabá bomnana imotsóbomñe; y chë viudana tonjëftsesegorá lempe ntsachetšá yobomncá; masque tša ndbomnëjema, chë vida jtsebomnana lempe ntsachetšá yobomncá tonjëftsesegorá ca.”

### Jesús tojánayana chë Bëngbe Bëtsabe bëts yebna lempe mochjápochocama

**13** Jesús Bëngbe Bëtsabe bëts yebnentšana tojëftsanbocna ora, canýe chabe uatsjendayá tbojaniyana: —Buatëmbayá, minýe, jtša bëts ndëtšbenga, y tša botamana bëts yebnënga ca!

<sup>2</sup> Chora Jesús tbojaniyana: —Tšabá cochjinýe tša botamana bëts yebnënga. Pero muentše ndoñe queochaisoquéda ni mo canýe ndëtšbé inýebé juatsboye. Lempe mochantsepochóca ca.

### Ntšamo yochtsemna quem luare jopochócama te chaojtsobeco ora

<sup>3</sup> Chentšana, Olivos tjashoye chënga tmojána. Bëngbe Bëtsabe bëts yebnentšana ndirichiñe yojamna; y Jesús tojanótbema ora, Pedro, Santiago, Juan y Andrés iytécana tmojantjá, <sup>4</sup> ntšamo cha tojanayancá ntseco yochjanopásama, y chca jopásama ya tojtsobecuama entšanga chamotsetatšëmbuama, ndayá Bëngbe Bëtsá yochjanma ca.

<sup>5</sup> Chora Jesús tojanéjua: “Cuedado šmochtsebomna ndocná chacmondáingñema. <sup>6</sup> Banga mochanjabo y mochantsabíchamo chënga Jesús imomna ca. Mochántsihomo: ‘Atše chë Cristo sëndmëna ca’, y chca, ba entšanga mochanjáingñaye.

<sup>7</sup> “Entšanga tmojtsentsjanama y nderado mochjentsjámna tšëngaftanga chašmojouena ora, ndoñe šmattsauatja; er chca chaohnënguama entsemna, pero masque chca, chora chë quem luare jopochócama tempo cabá ndoñe queochátsmëna.

<sup>8</sup> Canýe luarentšana entšanga inýe luaroca entšangaftaca mochántsejantjanaye, y canýe amëndayábentšana entšanga inýe amëndayábioca entšangaftácnaca; ba luarënguenache fshantse echanjuangmëmëna y bëts shëntsana echanjóshjango. Masque chca jasúfriase, más chcoye cabá más mochanjatssúfria.

<sup>9</sup> “Pero tšëngaftangna cach tšëngaftangbiama šmochtsantješna; entšanga cmochanjíshëche y amëndayëngbe cucuatšíñe cmochanjábashejuana, judiëngbe enefjuana yebnënguenache cmochanjátsetšënye. Atšbe ústonënga bëtsemna causa, mandéngbioye y reyëngbioye cmochanjatse, choca,

chëngbe delante ntšamo atšbiama šmotatšëmbcá chašmuayanama. <sup>10</sup> Er entseyta, quem luare cabá ndopochóca ora, Bëngbe Bëtsabe tšabe noticiënga nýetsca luarënguentšana entšangbioye chaóshjanguama. <sup>11</sup> Y inýengbe cucuatšíñe jabáshejuana chacmojtsënachá ora, ndoñe šmattsenócochinýena ntšamo chora šmochjayana. Chora šmochjayana ntšamo Bëngbe Bëtsá yochjamcá tšëngaftanga chašmuayanama, er tšëngaftanga canýenga ndoñe chora quešmochátoyebuambnaye, ndayá chë Uámana Espiritu tšëngaftangbiayana echantsóyebuambnaye.

<sup>12</sup> “Canýe catšata cachabe catšata inýengbe cucuatšíñe bochanjáboshjona chamotsóbama, y bëtsétsanga cachëngbe básenga mochanjábashhejuana chamotšëbáyama; y chë básengna chëngbe bëtsétsangbe contra mochántsemna y chamotšëbáyama mochanjábashhejuana. <sup>13</sup> Atšbe ústonënga bëtsemna causa, nýetsca luarënguentšana entšanga cmochantsébuayënja; pero nda nýets tempo átšbeñe ošbuachiyá totsomñe, atsbocaná echántsemna.

<sup>14</sup> “Chë Bëngbe Bëtsabe juabna oyeambuabnayá Daniel, chë puerte uabouana soye quem luare jopochócama tojëftsanabema. Chë puerte uabouana soye, chca jtsemnama inýoca tšëngaftanga chašmojinýe ora (nda tojtsalía, chabosertá), šmochántsetatšëmbo chë puerte ngmënana tempo tojóshjanguama; chorna, chë Judeoca chamojtsemna entšanga, batsjabengoye chamotsacheta; <sup>15</sup> chama, nda cachabe yebnentšana tsbanánoca chaojtsemna, chocana ndoñe chaondétastjango, ni chaondétamashëngo tsoicana ndayá jesábocnama; <sup>16</sup> y nda jajoca chaojtsemna, yebnoye ndoñe chaondéta ni mo chabe quëfsaíya jesácñama. <sup>17</sup> ¡Tša lastema chë tempo ngomámanënga o ochóchaye šësonga chamojtsabamna shembásengbiama! <sup>18</sup> Bëngbe Bëtsá šmochtseimpadana chë ngmënana tempo ndoñe chaondóshjango uaftena tempo ora, <sup>19</sup> er chora puerte ngmenancá echántsemna. Tša jabuache ngmenancá, quem luare jobojátšama orscana y méntscóñama y más chcoye, cachcá ngmënana ndoñe ntjamnana. <sup>20</sup> Chë puerte ngmënana tempo, yapa bën ndoñe chaondétsemnama Bëngbe Bëtsá ndoñe tonjalesenciase, ndocná quentatsbocá; pero cha, chabe ubuáyanënga, chabe bocacánënga corente endábabuanýeshanayeca, echanjama yapa bën tempo ndoñe chaondétsemnama.

<sup>21</sup> “Chora nderado nda chacmojáuyana: ‘Minýe, muentše chë Cristo entsemna’, o ‘Choca cha entsemna ca’, chë soyëngama ndoñe šmattsayaunana. <sup>22</sup> Er mochanjábocana ndoñe ndegombre uámana ubuáyanënga, chënga Cristo imomna ca jtsichámëse, y Bëngbe Bëtsabe ndoñe ndegombre juabna oyeambuambnayëngnaca; y chënga mochanjama bëts soyënga chëngbe obenana jinýanýiyama, entšanga jáingñama, y tmojobenase, chë Bëngbe Bëtsabe bocacánëngnaca. <sup>23</sup> ¡Cuedado šmochtsebomna! Cabá chca ndochnëngo ora, lempe tcbonjabuayená ca” —Jesús tojanéyana.

### Bëngbe Bëtsá Entśá tbojanbemá quem luaroye echan-jésabo

<sup>24</sup> Mëntśánaca Jesús tojanéyana: “Pero chë tempo, entśanga puerte chamojasufrí chentśana, shinýe ndoñe queochátsbuashinýinýana, juashcona ndoñe queochátsbinýnaye, <sup>25</sup> celocana estrellënga echan-jatquécjana, y quem luarentśa tsbanánoca espíritënga obenana bomnënga echanjángmëmëmana. <sup>26</sup> Y chora, entśanga mochanjinýe, Bëngbe Bëtsá Entśá tbojanbemá jantsetëshiñe echántsaboye, corente obenánaca y corente buashinýinýaniñe. <sup>27</sup> Chora cha chabe angelënga echanjámëndaye chë Bëngbe Bëtsabe ubuáyanënga júbuajama, nyets luarëngocana, quem fshantsoca cányoica juachoicana, celoca ínyoica juachóntscoñe.

<sup>28</sup> “Chë higo betiyama šmochjuatsjinýe: Tsëm buacuafjënga tojtsebomna ora y tojtsaiséjotsana, jtso-tatšëmbuana chë tšabe tempo ya tojtsaisobecuama. <sup>29</sup> Cachcá, chë soyënga ndayama tsëngaftanga tcbon-jauyancá chašmojinýe ora, šmochántsetatšëmbo Bëngbe Bëtsá Entśá tbojanbemá ya jésabama yojtsemnama. <sup>30</sup> Ndegombre cbéyana, lempe chca echanjochnëngo, morsca entśanga cabá ndóbana ora. <sup>31</sup> Celoca y quem luare echanjopochóca, pero atšbe palabra ndocna te queochaisopochóca.

<sup>32</sup> “Pero Bëngbe Bëtsá Entśá tbojanbemá ndayté y ntseco ora yochjésabama, ndocná quenátstatšëmbo, ni chë celoca angelënga, ni Bëngbe Bëtsabe Uaquiñá. Nýe chë Taitá chama yotátšëmbo.

<sup>33</sup> “Chíyeca, cuedado šmochtsebomna y yejuana š-mochtsantješna, er ndoñe quešmátstatšëmbo mocna ora yochtsemna Bëngbe Bëtsá Entśá tbojanbemá jésabama tempo. <sup>34</sup> Echántsemna mo canýe entśacá; chana inýe luaroye ya jëftsebocnama ora, chabe oservénënga jëftsamëndana chabe yebna chamotsinýenama. Cada ona canýe trabajo jëftsebóniyana, y chë shanýá jëftsemándana botamana chaotsantješnama. <sup>35</sup> Chcasna, cuedado šmochtsebomna, šmochtsantješna, er ntśamo chë trabajayëngcá chë yebna nduiño ntseco jtashjanguama, ndoñe ntsetatšëmbuana, mo nderado jétatana, tséntseto ora, bínýanoye o cachëse, tsëngaftanga cachcá, Bëngbe Bëtsá Entśá tbojanbemá ntseco jésabama ndoñe quešmátstatšëmbo; <sup>36</sup> ndoñe cuedado šmontsebomnëse, nderado cha nýe ndeolpe nántashjango, tsëngaftanga ndëprontánënga šmojtsemna ora, mo ftsomañe cuenta. <sup>37</sup> Chíyeca, ntśamo tsëngaftanga cbochanjauyancá, nyetscanga chanjáyana: ¡Puerte cuedado šmochtsebomna ca!” —Jesús tojánayana.

Entśanga imojtsejuabnaye ntśamo jamëse Jesús jishachama

**14** Bashco fiestama uta te yojetsájamna, chë Bëngbe Bëtsá Egiptocana judiëngbe bëts taitanga tojánatsebacama jtenójuaboyama fiesta, chë levadúraca ndëpormana tandëse sayora. Chë judiëngbe

bachnangbe amëndayënga y chë ley abuátambayënga imojtsenguaye ntśamo Jesús jishachana jtseíngñase, y jtsóbama. <sup>2</sup> Báseftanga imojtsichamo: “Quem fiestëntscuana ndoñe, er nderado entśanga yapa muanjóntśa enbouenanana ca.”

Canýe shembása botamana uanguëtse béjaye Jesusbe bestšašiñe tbojanbueščja

<sup>3</sup> Jesús Betanioca yojtsemna, Simón chë bacna nguayanánaca šocá ca uabobuatmabe yebnentse; mesëshentse Jesús yojtsemna ora, canýe shembása tojánashjango. Chë shembása yojúshjango canýe alabastro jarrëtema jútjena canýe becá uámana y botamana uanguëtse béjayeca, ena nardana uanguëtšiyë; chana chë jarrëtema yojátsba y chë béjaye Jesusbe bestšašiñe tbojanbueščja. <sup>4</sup> Chca tmojáninýe ora, báseftanga chentse imojtsemnënga tmojanotjayaná y mëntśá imojtsenatsëtsnaye: —¿Ndáyeca nýe bonamente chë soye yojtsemna ca? <sup>5</sup> Chamna, matmënjobenanga chë béjaye unga patse denario crocenánama juiyana, y chánaca ndbomnëjëmënga matmënjújabuache ca.

Y chë shembásabiama podesca imojtsichamo.

<sup>6</sup> Chora Jesús tojanéyana: —¿Ndáyeca quem shembása ndoñe cachcá šmochanjonýaye ca? ¡Ndocá matatsana! Atšbiama tšabe soye tonjama. <sup>7</sup> Er ndbomnëjëmënga nyets tempo tsëngaftangbeñe mochanjëftsemna, ndayténaca šmojábošena ora, šmatjobenaye tšabe soye chëngbiama jamana; er atšë tsëngaftangftaca ndoñe nyets tempo quichásemna. <sup>8</sup> Quem shembása lempe ntśamo tojobenacá atšbiama tonjama. Chca tonjama ora, atšbe cuerpo tonjaprontá atšë juatbontsa tescama, cabá ndoñe obaná sëntsemna ora. <sup>9</sup> Ndegombre cbéyana, quem luaroca ndayéntśnaca Bëngbe Bëtsabe tšabe noticiënga chamojtsabuayinýa chentse, ntśamo quem shembása tojamámnaca becá mochanjëftsóyebuambaye, chca, entśanga chabiama chamotsenójuabnama ca —cha tojanéyana.

Judas tojána bachnangbe amëndayëngbioye, Jesús chamuishachama

<sup>10</sup> Chentśana, Judas Iscariote, canýe chë bnétsana uta uatsjendayënguentsá, tojána chë bachnangbe amëndayëngaftaca jencuëntama, Jesús chëngbe cucuatšifne jaboshjonama. <sup>11</sup> Chca tmojanuena ora, chënga imojóyejuaye y tmojanšbuachená crocénana jtabuénayana. Y cach orscana Judas yojtsenguaye ntśamo jamana y ndëmua ora, Jesús chëngbe cucuatšifne jaboshjonana.

Jesús chabe uatsjendayëngaftaca Bashco saná tojanse

<sup>12</sup> Chë Bashco fiesta bojatšenté, chë levadúraca ndëpormana tandëse sayté, chë uatsjendayënga Jesús tmojantjá: —¿Ndémoca cojtseboše bënga fchajprontama, Bashco saná chacosama ca?



Chca te chë judiënga imojanamana, Bëngbe Bëtsá jëtschuayamna canÿe oveshá jóbana chora jasama, chë Egiptocana chëngbe bëts taitanga Bëngbe Bëtsá tojánatsebacama jtenójuaboyama.

<sup>13</sup> As Jesús uta chabe uatsjédayata tojanichamó y mëntšá tojanéyana: —Chë bëts puebloye motsata. Chašojáshjango ora, canÿe bacó cmochanjóbiatše, matbajiñe búyeshe echantsabuyambaye; cha šochjuasto y šochtserreparana ndëmanÿe yebnentše yochjámarshënguama; <sup>14</sup> y chë yebna nduíño šochjauyana: “Buatëmbayá tonjanya: ¿Ndayentše chë tsañe yojtsemna, Bashco saná atše atšbe uatsjédayëngaftaca jasama ca?” <sup>15</sup> As cha cmochanjínÿanÿiye canÿe bëts tsañe, tsbanana pisoca, lempe prontániñe; chentše šochjaprónta bënga mochjasama ca.

<sup>16</sup> As chë uatsjédayata tbojána y tbojáninÿena lempe ntšamo Jesús tojanéyancá; y chentše chë Bashco saná tbojanprontata.

<sup>17</sup> Tojanibétata ora, Jesús chë yebnoca tojánashjango, chabe bnëtsana uta uatsjédayëngaftaca. <sup>18</sup> Y mesëshentše imojtseye ora, Jesús tojanéyana: —Ndegombre cbëyana, canÿa tšëngaftanguentšá, átšeftaca entsesá cha, uayayëngbe cucuatšifñe šochanjáboshjona ca.

<sup>19</sup> Chorna chë uatsjédayënga ngménaca imojtsemna, y tmojanontšé canÿánÿa cha jatjanya: —¿Atše chtsemna ca?

<sup>20</sup> Y Jesús tojanéjua: —Canÿa chë bnëtsana utatentšá entsemna. Chabe tandëše cach atše sëntsefchecuacná šcnenentše cha entsefchecuacná. <sup>21</sup> Ndegombre, Bëngbe Bëtsá Entšá tbojanbemáftaca echanjopása ntšamo chabiamana Bëngbe Bëtsabe uabemana palabrënguiñe endayancá. Pero, jtša lastema chë bochjá-boshjonabiama! Chabiamana más tšabá manjamna ndoñe ntjónÿnana ca —Jesús tojánayana.

<sup>22</sup> Imojtseantscuana, tandëše tojanca, Bëngbe Bëtsábioye chama tbojtanchuá, tojanjataye y chabe uatsjédayënga tojanëjatá, y mëntšá tojánayana: “Mocñënga, mosënga, atšbe cuerpo entsemna ca.”

<sup>23</sup> Chentšana, canÿe coptema vínoyeca tojanaca, Bëngbe Bëtsábioye tbojtanchuá, chabe uatsjédayënga tojanëfšasé, y nÿetscanga tmojanofšé. <sup>24</sup> Mëntšá tojánayana: “Quem vínoye atšbe buiñe entsemna. Atšbe buiñe echanjuábuashana entšanga chamotsetatšëmbuama ntšamo Bëngbe Bëtsá entšanga tojašëbuachenacá ndegombre yochjochnënguama. Chë buiñe bëtscá entšangbe tšabiama echanjuábuashana. <sup>25</sup> Y ndegombre cbëyana, morscana ya ndoñe más chë uvasëšentšana obocniye quichaisofšiyë. Chë tsëm vínoye tšëngaftangaftaca chanjofšiyë, Bëngbe Bëtsabe amëndayoca chamojtsemna ora ca” —tojánayana.

**Jesús tojánayana, chábioye ndoñe bonjanabuátma ca Pedro yochjánayanama**

<sup>26</sup> Bëngbe Bëtsábioye jëtschuayama tmojancantá chentšana, Olivos tjashoye tmojëftsanbocana. <sup>27</sup> Jesús tojanéyana: —Nÿetsca tšëngaftanga quem ibeta átšbeñe ošbuáchiyana šmochantsobuetše y š-

mochántšacheta, er Bëngbe Bëtsabe uabemana palabrënguiñe, cha mëntšá tojánayana: “Chë oveshënga abuañëña chanjóba y chë oveshënga mochantsáshana ca.” Chca tšëngaftangaftaca echanjopása, uayayënga chašmojishache ora. <sup>28</sup> Pero obanënguentsana chaitayenentšana, tšëngaftangbe natsana Galileoye chanjá ca —cha tojanéyana.

<sup>29</sup> Chora Pedro tbojanayana: —Masque nÿetscanga ábeñe ošbuáchiyana chamotsobuetše y chamotsacheta, atše nÿa ndocna te ca.

<sup>30</sup> Chora Jesús tbojanayana: —Ndegombre cbëyana, cam ibeta, ngallo cabá uta soye ndëcánta ora, aca unga soye cochanjayana ndoñe šconduabuatma ca.

<sup>31</sup> Pero Pedro más yojtsichamo: —Masque chašotsemna ácaftaca jóbana, atše ndoñe quichátayana ndoñe cbonuabuatma ca.

Y nÿetscanga cachcá imojtsichamo.

**Getsemaní luarentše Jesús, Bëngbe Bëtsáftaca tbojanencuentá**

<sup>32</sup> Chentšana, canÿe luare Getsemaní ca uabáinoye tmojána. Chocna Jesús tojanéyana: “Muentše motbiama, chëntscuana atše choye chanjá, Bëngbe Bëtsáftaca jencuéntama ca.”

<sup>33</sup> Y tojëftsanëbiatše Pedro, Santiago y Juan. Choca cha yojóntša puerte ngménaca jtsemnama y corente cochtsetšenaná. <sup>34</sup> Chëngbioye tojanéyana: “Atšbe ainana puerte ngménaca entsemna, mo jobanamcá. Muentše moquedanga y šmochtsefšna ca.”

<sup>35</sup> Chentšana, Jesús más natsanoye tojána, tojanoshëntsamentšé y fshantsóntscoca tojanotsejbëna y Bëngbe Bëtsábioye tbojanimpadá, jopódianëse, chë tša japadësa ora ndoñe chaondóshjanguama.

<sup>36</sup> Mëntšá yojtsichamo: “Atšbe Taitá, aca lempe jama-condobena; tojopodese, cochjama atše japadësama ndoñe chašondëtsemnama. Pero ntšamo atše stsebošcá ndoñe chaondëtsemna, sinó ntšamo aca cojtsebošcá ca.”

<sup>37</sup> Chentšana, chabe unga uatsjédayëngbioye tojtanabo, y chëngna imnëtsomañe. Chca tojánanÿena ora, Pédrëbioye tbojanayana: “Simón, ¿cotsomañe? ¿Ni mo nÿe canÿe hora jtsefšnama ndoñe tconjobená? <sup>38</sup> Šmochtsefšna y Bëngbe Bëtsáftaca šmochtsencuëntaye, bacna soye jamama ndoñe chacmondócochënguama. Tšëngaftanga ndegombre šmontseboše espíritoca Bëngbe Bëtsá joyeunayana, pero cuerpiñe ndoñe añemo quešmátsbomna ca.”

<sup>39</sup> Jesús cachiñe tojesaná y Bëngbe Bëtsáftaca tbojanencuentá, cach palabrënga jayanëse. <sup>40</sup> Yojtabo orna, chë uatsjédayënga cachiñe imnëtsomañe; chënga imojtsefshëtana ocnyaya causa, y ndoñe imontsobena ntšamo jojuana.

<sup>41</sup> Chentšana, tojtesaná y tojtanabo ora tojanéyana: “¿Cabá šmotsomañe y šmotsochnañe? Nÿe nÿetšá; hora tojjobuache, Bëngbe Bëtsá Entšá tbojanbemá bacna soye amëngbe cucuatšifñe mochanjáboshjona.

<sup>42</sup> Motsbananga, cuajna. Minÿënga, atše boshjuaná ya entsebeconá ca.”

### Uayayënga Jesús tmojánishache

<sup>43</sup> Jesús cabá yojtsóyebuambnantscuana, Judas, canÿe chë bnétsana uta uatsjendayënguentsá, tojánashjango y cháftaca ba entsãnga espadéjangaca y ngarotbéngaca prontánënga. Chënga imojamna chë bachnangbe amëndayënga, ley abuátambayënga y judiëngbeñe bëtsëjemëngcá mándayëngbe ichmónënga. <sup>44</sup> Judas, chë boshjuaná, tojanjuabó ntšamo jamana entsãnga jinÿanyiyama ndëmua Jesús bëtsemnana. Chiyeca, yojáuyana: “Nda chajiauámocho, cha echántsemna; šmochjishache y cuedádoca šmochjuánatse ca.” <sup>45</sup> Chcasna, Judas Jesúsbioye tojanobeconá y tbojanianana: “¡Buatëmbayá ca!”

Y tbojanámocho. <sup>46</sup> Chora chë entsãnga tmojánishache y tmojanánatse.

<sup>47</sup> Pero canÿa chentše Jesúseftaca yojtsemná, chabe espadëja yojenosëngboténtšena, y chë bachnangbe más uámana amëndayabe oservená canÿe matscuasë tbojtsanéstjango.

<sup>48</sup> Y Jesús chë entsãnga tojanatjá: “¿Ndáyeca šmojabo espadéjangaca y ngarotbéngaca atše jishachama, mo atše canÿe bacá uamana entsá cuaftsemncá ca? <sup>49</sup> Atše cada te tšëngaftangbeñe sëndétsemna Bëngbe Bëtsabe bëts yebnoca abuátambaye, y ndocna te choca chešmánishache. Pero tšëngaftanga chca átšeftaca šmontsama, cachcá ntšamo Bëngbe Bëtsabe uabemana palabrenguiñe endayancá chaotsemnana ca” —tojánayana.

<sup>50</sup> Chorna, nÿetsca uatsjëndayënga tmojtsanëuatjaná y tmojtsanacheta, y Jesús cachcá chë uayayëngaftaca tmojesanonÿá. <sup>51</sup> Canÿe bobontse Jesúsbioye ibojtsés-tona, nÿe canÿe uafjantse entséjua uichëtjoná. Cha chë entsãnga tmojánishache, <sup>52</sup> pero chëngbe cucuatšifne chë entséjua jesáboshjonëse, chë bobontsna enasá yojtsachá.

### Jesús tmojanánatse chë judiëngbe uámana amëndayëngbioye

<sup>53</sup> Chentšana, Jesús tmojanánatse chë bachnangbe más uámana amëndayábioye; y chocna, nÿetsca chë bachnangbe amëndayënga, bëtsëjemëngcá amëndayënga y ley abuátambayënga tmojánenefjna. <sup>54</sup> Pedro bënocana Jesús tbojanasto, chë bachnangbe más uámana amëndayabe yebnentša chashjónscoñe; y chentše tojanoquedá. Chë Bëngbe Bëtsabe bëts yebnoca josticiëngaftaca yojtsetbemana; iñe juachaca yojtšëbonena.

<sup>55</sup> Chë bachnangbe amëndayënga y chë judiëngbe uámana mándayënga imojtsenguaye canÿa, nda ndayánaca Jesusbe contra cháuyana, as jobenayama cha chaóbana ca jayanama; pero ndoñe montsaninÿana. <sup>56</sup> Er masque banga Jesusbe contra uayátse-naye soyënga imojtsichamo, nÿetscanga ndoñe cachca soye montsanichamo.

<sup>57</sup> Báseftanga imojtsaye y mëntšá Jesusbe contra, ndoñe ndegombre betsemncá tmojánayana: <sup>58</sup> “Bënga

cha fsënjoyeuná mëntšá: ‘Atše quem Bëngbe Bëtsabe bëts yebna, entsãngbe pormana yebna, chantse-pochóca; y unga tese inÿe Bëngbe Bëtsabe bëts yebna, entsãngbeyeca ndëpormana yebna chanjëtsejeboca.’ ”

<sup>59</sup> Pero masque chca imojtsichamo, nÿetscanga ndoñe cachca soye montsanichamo.

<sup>60</sup> Chorna, chë bachnangbe más uámana amëndayá yojtsbaná, nÿetscangbe tsëntsaca yojotsaye, y Jesúsbioye tbojantjá: —¿Ndocá cochanjayana? ¿Ndayase yojtsemna chë acbe contra montsichamo soye ca?

<sup>61</sup> Pero cha nÿe iytëca yojtsemna y ndocá ibontsëjuanana. Chë bachnangbe más uámana amëndayá cachiñe tbojtëtantjá, mëntšá: —¿Aca chë Cristo icomna, Bëngbe Bëtsá chë nda fsëndadoranabe Uaquiñá ca?

<sup>62</sup> Y Jesús tbojanjuá: —Arseñor, atše cha sëndmëna; y tšëngaftanga šmochanjinÿe, atše, Bëngbe Bëtsá Entšá tbojanbemá, chë nÿets obenana bomnabe catšbioica chantsetbemana, y celoca jantšëtëshiñe chántsaboje ca.

<sup>63</sup> Chora, chë bachnangbe más uámana amëndayá chabe uichëtjonëjuangá yojtsenántšajatanëca, puerte ibojtsetna causa, y tojánayana: —¿Ndayama más entsãnga šochjátëjajoboto Jesusbe contra chamuayanama ca? <sup>64</sup> Tšëngaftanga šmonjouena ntšamo chë entsá entsichamcá, y chca Bëngbe Bëtsabiama entsemna mo cha cuafjoyenguangcá, chë chabe Uaquiñá yomna ca cha tonjayana ora. ¿Ntšamo tšëngaftanga šmatjayana ca? —cha tojanéyana.

Y nÿetscanga tmojánayana, cha ndegombre bacna soye yojtsebomna y jóbanama ibojtsemna ca.

<sup>65</sup> Chorna báseftanga tmojanontšé Jesús buashëtjanayana; jubiá imojútsbotse, imojtsejantšëta y imojtsetjanaye: “¡Momalisiá nda tcmënjantšëta ca!” Y chë Bëngbe Bëtsabe bëts yebnoca josticiëngna imojtsajuebantšëta.

### Pedro tojánayana Jesúsbioye ndoñe bonjanabuátma ca

<sup>66</sup> Pédrëna, tsmanoca yojtsemna chashjoca. Chora, canÿe shembása, chë bachnangbe más uámana amëndayabe oservená yojáshjango; <sup>67</sup> y Pédrëbioye tbojáninÿe ora, cha iñe juachaca yojtsanšbonena, yejuana ibojonÿinÿiye y tbojanianana: —Acnaca, Jesús Nazaretocáftaca conjánana ca.

<sup>68</sup> Pero Pedro tojánayana chábioye ndoñe bonjanabuátma ca; y mëntšá tojánayana: —Ndayama cojt-sichámuama ndoñe quetsátstatšëmbo, ni quešnátësertana ca.

Y shjoye, amashjuanóntscóñe yojábocna; y chora canÿe ngallo yojacánta. <sup>69</sup> Chë oservená cachiñe Pédrëbioye tbojáninÿe y tojanontšé chë inÿenga jauanana: —Muánaca Jesusbe uatsjendayënguentsá entsemna ca.

<sup>70</sup> Pero chana cachiñe tojánayana Jesúsbioye ndoñe bonjanabuátma ca. Chentšana, chë chentše imojtsemnënga Pedro tmojätaniyana: —Ndegombre aca

chënguentšá contsemna; ácnaca Galileocá contsemna ca.

<sup>71</sup> Pero Pedro tojanontšé ichámuana: —¡Bëngbe Bët-sá chašotsecastigá ndoñe ndegombre soye stsichámese ca! —y yojóntša júrayana— ¡Atše chë entšá ndoñe quetsatabuatma, ndabiama tšëngaftanga šmotsatsëtsná ca!

<sup>72</sup> Y cachora chë ngallo uta soyama yojacánta, y Pedro yojenójuaboje ntšamo Jesús tbojaniyanama: “Ngallo cabá uta soye ndëcánta ora, aca unga soye cochanjayana ndoñe šconduabuatma ca.” Y tojanontšé enóbošachiyana.

### Jesús Pilátbioye tmojanánatse

**15** Tojanbinýna ora, chë bachnangbe amëndayënga, chë judiëngbeñe bëtšëjemëngcá amëndayënga y ley abuátambayënga cánýentše tmojánenefjna, nyetsca chë luarentša más uámana mandayëngaftaca, jenóyeunayama ntšamo jamëse Jesús jóbama. Jesús tmojanëcuébatsëca y tmojanánatse, y Pilato, chë Judeoca mandadbe cucuatšifne tmojánboshjona.

<sup>2</sup> Pilato Jesúsbioye tbojantjá: —¿Aca chë judiëngbe rey cojtsemna ca?

Y Jesús tbojanjuá: —Aíñe, aca ndegombre yomncá tcjayana ca.

<sup>3</sup> Chë bachnangbe amëndayënga bëtscá soyënga Jesusbe contra imojtsichamo; <sup>4</sup> chíyeca Pilato cachiñe Jesúsbioye tbojantjá: —¿Ndocá šcochanjojuá ca? Minýe; bëtscá soyënga acbe contra montsichamo ca.

<sup>5</sup> Pero Jesús ndoñe más tbonjanjuá; chë causa, Pilato ndoñe yontsetátšëmbo ntšamo jajuaboyana.

### Jesús chaóbana ca tmojánayana

<sup>6</sup> Cada Bashco fiesta ora, Pilato yojanamana canýe utamená jëtsboshjonana, ndánaca entšanga tmojuabuayaná. <sup>7</sup> Chë tempo yojamna canýa Barrabás ca uabainá; cárceloye inautámena chabe enutëngaftaca. Chëngna entšanga tmojtsanëbaye, mandadëngbe entšángaftaca imojentsjaná ora. <sup>8</sup> Chora, entšanga tmojánashjajna y tmojanontšé Pilátbioye jauyanana, ntšamo Bashco fiesta ora jamama yojanamancá chao-mama. <sup>9</sup> Y Pilato tojanéjua: —¿Tšëngaftanga šmojtseboše tšëngaftangbe rey atše chjëtsboshjona ca?

<sup>10</sup> Chca tojánayana, er Pilato yojtsetátšëmbo, chë bachnangbe amëndayëngna envidia causa Jesús chabe cucuatšifne tmojánboshjonama. <sup>11</sup> Pero chë bachnangbe amëndayëngna entšanga tmojanañemó chamuenbouénanama, Pilato jauyanama chëngbiama Barrabás chabuatsboshjona ca. <sup>12</sup> Y Pilato tojanatjá: —¿Y ntšamo chjama chë “judiëngbe Rey ca” šmonduabobuatmáftaca ca?

<sup>13</sup> Y chënga tmojanáyebuachena: —¡Motsecrucificá ca!

<sup>14</sup> Y Pilato entšanga tojanéyana: —¿Ndáyeca? ¿Ntšamo cha tojobuachjanguá ca?

Pero chëngna más añémoca tmojtétanayebuachena: —¡Motsecrucificá ca!

<sup>15</sup> As Pilato, entšángaftaca tšabá joquédama yojtsebošeyecna, Barrabás tbojtanboshjona. Yojámëndaye soldadënga jabuache Jesús chamotsetšënama; y chentšana soldadëngbe cucuatšifne tbojánboshjona, chamocrucificama.

<sup>16</sup> Chentšana, chë soldadënga Jesús tmojanánatse chë mandadbe bëtš yebnentša chashjoye, y nyetsca soldadënga tmojánachembo chamobéconama.

<sup>17</sup> Shbuenda uafjatsenga uinýna entšayá mo reycá tmojanichëtjo; canýe coronësha tmojanapormá uchmašëfjangaca y tmojanabestšajó. <sup>18</sup> Y chentšana tmojanontšé jachuyana: “¡Bayté judiëngbe Rey cochtsemna ca!”

<sup>19</sup> Canýe niñëfjaca Jesús bestšašifne imojtsëtsjanj-naye, imojtsebuashëtjnaye, y chabe delante imojtsofshëntsamëntšënyaye. <sup>20</sup> Y chca imnaftsáboyejuanentšana, chë shbuenda uafjatsenga entšayá tmojtsanabotsca y cachabe entšayá tmojtanichëtjo, y pueblo chaboye tmojanánatse jacrucificama.

### Jesús tmojanancrucificá

<sup>21</sup> Chora, canýe entšá chëjana yojsatashjajuana, Simón ca uabainá, Cirene pueblócá, Alejandro y Rufbe taitá; jajocana yojsatachnëjuana; y chë soldadëngna imojuatária Jesusbe cruz jëftsocutsayama.

<sup>22</sup> Jesús tmojanánatse Gólgota ca uabaina luaroye (hebreo biyañe endayana “Obanabe Bestšashe Luare ca”); <sup>23</sup> y tmojanabuiyé vínoye mírraca enájuañiye, pero Jesús ndoñe yonjuáyëngacñe. <sup>24</sup> Y chentšana tmojanancrucificá; y chabe entšayangamna, tsbanánoye tmojanétsëna jinýama ndayá cada ona yochjëftsanácñama.

<sup>25</sup> Cachëse, base mošenana ora Jesús tmojanancrucificá. <sup>26</sup> Y chabe bestšaše juatsboicna canýe uabemana soye tmojananjo. Chiñe yojétsayana ndáyeca cha tmojanancrucificama, mëntšá: *MUA CHË JUDIËNGBE REY ENDMËNA*ca.

<sup>27</sup> Y cháftaca útata bacna soye ochjajnayátnaca tmojanancrucificá, canýa chabe catšbioica, y ínýana chabe uañicuayoica. <sup>28</sup> Chca cháftaca tmojanma, chaochnënguama ntšamo Bëngbe Bëtšabe uabemana palabren-guiñe chabiama iuayancá, mëntšá: “Y chábioye tmonjánínye mo chë puerte bacna soye amënguentšá canýa cuaftsemncá ca.”

<sup>29</sup> Y chëjana imojtsachnëjuana entšanga, Jesús imojtsóyenguaye, imojtsobestšfshanenaye y imojtsatsaye: “¡Aca chë Bëngbe Bëtšabe bëtš yebna cochtšanenasatajchca y nye unga tese cochtanjëbo, <sup>30</sup> cach aca mentsbocá y cruzocana matastjango ca!”

<sup>31</sup> Cachcá chë bachnangbe amëndayënga y chë ley abuátambayënga imojtsáboyejuana, y chënga imojtsenatsëtsnaye: “Cha ínýenga tojëftsatsebacá, pero cachá jëntsbecama ndoñe quenátobena. <sup>32</sup> ¡Chë Cristo, chë Israeloca Rey! ¡Cruzocana chauatastjango, bënga jinýama y chábeñe chaftsošbuachema ca!”

Y cháftaca ibojtsecrucificanátnaca ibojtsóyenguaye.

### Jesús tojanóbana

<sup>33</sup> Njyetsto orscana y las treséntscoñe, njyets quem luare yojtseibétata. <sup>34</sup> Chca orna, Jesús chabe biyañe tojanáye buachena: "Eloi, Eloi, ¿lema sabactani ca?" (Chca endayana "Atsbe Bëtsá, atsbe Bëtsá, ¿ndáyeca cachcá šcojonýa ca?")

<sup>35</sup> Chca tmojanuena ora, báseftanga chentše imojtsemnënga imojtsichamo: "Mouenënga, chë Bëngbe Bëtsabe juabna oyebuambnyá Elías bontsechembuana ca."

<sup>36</sup> As chora, canya tojanótjajo, untja vínoyeca canye esponjëshe tojanfchecuacuá, canye niñëfjiñe tojananguësëtjo y Jesús bioyetojanbeconá chaofšema; y tojanayana: "Cachcá mochjonýaye, er Elías tayochjabo jabátëstjanguama ca."

<sup>37</sup> Pero Jesusna, jabuache tojanoyó y tojanóbana. <sup>38</sup> Y chë Bëngbe Bëtsabe bëts yebnoca yojújonýana entšëjua tsëntsaca yojtsenájataye, tsbanánocana fshantsoye. Chëjua bënëjua inauamna y chë tsat-sëntsaca inaujonýana. <sup>39</sup> Chë romano soldadëngbe amëndayá, Jesusbe ndirichiñe yojtsemna; y ntšamo cha tojanobancá tbojáninýe ora, tojánayana: "¡Ndegombre quem boyabása Bëngbe Bëtsabe Uaquíñá yomna ca!"

<sup>40</sup> Básefta shembásengnaca chentše imojtsemna, bënocana imojtserreparana; chënguentše imojtsemna María Magdalena; María, Santiago chë más basa y Josebe mamá; y Salomé. <sup>41</sup> Chë shembásengna Jesús tmojanasto y tmojanájabuache cha Galileoca yojamna ora; y inýe ba shembásengnaca chentše imojtsemna, chë cháftaca Jerusalenoye tmojánanga.

### Jesús tmojanatbontsá

<sup>42</sup> Chë yëfsana ochnayté yojtsémnyayeca, cach te yojánamna saná japróntana chë yëfsana jasama. Ya yojtseibétatana ora, <sup>43</sup> Pilato yojtsemnoye tojána canye boyabása, José ca uabainá, Arimatea pueblócá; cha inamna canye chë luarentša uámana mandayënguentšá. Cha Bëngbe Bëtsábeñe yojtsošbuáchiye y yojanobátmana chabe amëndayana chaóshjanguama. Ndauatjá Pilátbioyetojanbe cuerpo tbojanotjañe. <sup>44</sup> Pilato yojenjnaná Jesús tša betscó yojóbanama; as tojanmandá chë soldadëngbe amëndayá chamuachembo, jatjayama Jesús ya bën obaná tayojëtsemnama. <sup>45</sup> Chë soldadëngbe amëndayana Pilátbioyetojanbe cuerpo Jesús ya obaná yojtsemna ca; y as chora, José bioyetojanlesenciá Jesusbe cuerpo chabotsámabañama. <sup>46</sup> Chora, José canye uafjantse lino entšëjua tojanabuamé, Jesusbe cuerpo cruzocana tbojanéštjango, chë lino entšëjuaca tbojanandmaná, y canye cuevëshiñe ndëtšbeñe pormánëshiñe tbojanajó; chentšana canye ndëtšbé tojansjoná, y chë cuevëshoye amashjuanentše tojánachtó. <sup>47</sup> María Magdalena y María, chë José y Santiagbe mamá, tbojáninýe ndayentše Jesusbe cuerpo tbojanjájoma.

### Jesús tojtanayena

**16** Ochnayté tojanopasá ora, María Magdalena, María Santiagbe mamá, y Salomé, botamana uanguëtše bėjaye tmojanabuamé, chíyeca jama Jesusbe cuerpo janëtjuama; <sup>2</sup> y tmenguse, chë semana bojatšëntena, cabá cachëse, shinýe yojábocna ora, chë cuevëshoye tmojána. <sup>3</sup> Imojtsaye ora imojtsayénatsët-snaye: "¿Chë cuevëshoye amashjuanentša ndëtšbé nda bochtsabuajuána ca?"

<sup>4</sup> Pero imojontješiyetojanbe cuerpo Jesús chë cuevëshoye amashjuanentša bëts ndëtšbé, chentšana juanániñe.

<sup>5</sup> As chënga choyetojanbe cuerpo Jesús y choyetojanbe cuerpo Jesús inýe canye bobontse bën uafjantse entšëjua uichëtjoná, chë cuevëshentša catšbioica inëtsothemañe; y chë shembásengna imojouatjaná. <sup>6</sup> Pero chë bobontse tojanéyana: "Ndoñe matauatjëngana; tsëngaftanga šmondënguá Jesús Nazaretocá, chë tmonjancrucificá cha. Cha ya tontayena; muentše ndoñe quenátsmëna. Minýënga cha enjëtsejajonentše. <sup>7</sup> Motsajna, y Pedro y chë inýe uatsjëndayënga šmochjáuyana: 'Jesús tsëngaftangbe natsana Galileoye echanjá. Choca cha šmochanjinýe, ntšamo cachá tcmojanëyancá ca.'"

<sup>8</sup> As chë shembásengna betscó chë cuevëshentšana tmojésanbocana, er puertetojanbe cuerpo Jesús auatjanánënga imojtsemna y ngmëmnyayënga imojtsemna; y chë causa, chë soyama ndocná tmonjanianyana.

### Jesús, María Magdalénbioyetojanbe cuerpo Jesús tbojánëbëbocna

<sup>9</sup> Jesús tojtanayenentšana, chë semana bojatšënté, Jesús natsana María Magdalénbioyetojanbe cuerpo Jesús. Tempo Jesús chá bentšana canýsëfta bacna bayëjënga tojtanébuacana. <sup>10</sup> Cha Jesús bioyetojanbe cuerpo Jesús ainá tbojáninýentšana, tojána Jesúsëftaca imojánajnënga chama jaúnayama; chëngna ngmënaca y šachënaca imojtsemna. <sup>11</sup> Pero chënga tmojanjuabó nderado mo ndoñe ndegombre yontsemna ca, chë Jesús ainá yojtsemna ca, y María Magdalena chá bioyetojanbe cuerpo Jesús tbojáninýe ca tmojanuena ora.

### Uta ustonata Jesús bioyetojanbe cuerpo Jesús tbojáninýe

<sup>12</sup> Chentšana, uta ustonátbioyetojanbe cuerpo Jesús básefta yebnënga yojamna luaroyetojanbe cuerpo Jesús ibojétsaye ora, Jesús tojánëbëbuacna, mo inýa cuaftsemncá. <sup>13</sup> Chora chata tbojésanshëcna chë inýënga chama jacúntama; pero chëngna cach ndoñe ndegombre ca tmojanjuabó.

### Jesús chë uatsjëndayënga tojanichamó, Bëngbe Bëtsabe soyëngama njyetsquénache jábuayenama

<sup>14</sup> Cabana, Jesús chë bnëtsana canye uatsjëndayënga tojánëbëbuacna, chënga imojtsesaye ora; y tojanëcácana chë cha ainá yojtsemnama ndoñe ndegombre yontsemna ca tmojánjuaboma y njyets ainánaca chábeñe ndoñe montsanošbuachema, er cha ainá tmojáninýënga chama tmojanacuntá ora, chca ndoñe

ndegombre yontsemna ca chë uatsjéndayënga tmojá-nayana.

<sup>15</sup> Chentšana Jesús tojanéyana: “Nÿets luarëngoye motsajna, y nÿetsca entšanga chë tšabe noticiëngama šmochtsabuayinyaye. <sup>16</sup> Nda chiñe chaojtsošbuaché y tšëngaftanga chašmojuabaye, cha atsbočaná echántsemna; pero nda ndoñe tontsošbuaché, cha nÿets tempo castiganá echántsemna. <sup>17</sup> Chë átšbeñe ošbuáchiyënga ndegombre soyënga imojtsabuayiyana, entšanga mëntšá mochántsetatšëmbo: atše jót-šëmbonëse, átšbeñe betsošbuachéyeca, entšáng-bentšana bacna bayëjëngbe juabna mochantábocna; tempo chënga ndmabiyañe mochantsóyebuambnaye. <sup>18</sup> Masque nderado cucuatšiče mëtšcuayënga tmojjishache o veneno tmojofšënga, ndocá quemochat-spása; y šoquëngbeñe cucuatšënga chamojacjá ora,

chënga shnánënga mochántsatšmëna ca” —Jesús tojanéyana.

### Jesús Bëngbe Bëtsábioye tojtaná

<sup>19</sup> Bëngbe Utabná Jesús jóyebuambayama tojan-pochocá chentšana, celoye cha tmojtanatsbaná, y uámana luarentše, Bëngbe Bëtsabe catšbioica yojtótbe-ma jtsemándayama. <sup>20</sup> Y chë uatsjéndayëngna tmoján-bocana y Bëngbe Bëtsabe soyëngama nÿetsquénache entšanga tmojanabuayená. Cach Bëngbe Utabná chënga yojanëjabuáchana, y yojánama entšanga chamotsetatšëmbuama chë buayenana soye ndegombre Bëngbe Bëtsabe soyënga bëtsemnama, chë uatsjéndayënga bëtš soyënga jamama obenana chamot-sebomnama cha jtsamëse.

# San Lucas

## Jabojátšama

**1** Ba entsanga Jesusbe historia tmojuábema, ntšamo bēngbeñe ndegombre tojopasacá. <sup>2</sup> Chē historia juabemamna, chēnga tmojanuena ntšamo Jesusbe uatsjédayēnga y inye entsanga chabiama imnencuentaycá. Chē entsangna tmojáninye y tmojanuena ndayá Jesús tojanmama y ntšamo tojanayancá, y chentšana chabe tšabe noticiēnga entsāngbioye tmojanabuayená. <sup>3</sup> As, átsnaca sēnjontsé cuedádoca juanotíciana lempe ntšamo Jesusbiamama imojtsichamcá, tojanobojatšentšana méntscōñe. Mora šontsinýana tšabá yojtsemna acbiama juabemana ntšamo ndegombre yomncá, uámana taitá Teófilo, chē tijuanocticiá soyēngama, ntšamo ndegombre bēngbeñe tojopasacá. <sup>4</sup> Ba soyēnga Jesusbiamama tmojabuátēmbanga, y atše séntseboše aca chacotsetátšēmo, ntšamo tcojouencá ndegombre yomnama.

## Canye ángel tojanabuayená Juan chē Ubayaná jónýnama

<sup>5</sup> Herodes Judea luaroca rey inamna ora, yojamna canye judiēngbe bachna, Zacarías ca uabainá. Cha yojamna Abíasbe bachnanguentša pamillo. Chabe shema, Isabel ca yojanabaina, y chana Aarónbentšana entsá inamna (Aarón, chē más uámana bachnangbe natsana amēndayá). <sup>6</sup> Chatna tšabá amata ibnamna Bēngbe Bētsabe bominýiñe, y ntšamo Bēngbe Bētsá yomandacá ibojoyena; y chca, ndocná yonjanobena jayanana chata ndoñe tšabá ibonjánama ca. <sup>7</sup> Bāsenga tondaye ibonjánabamna, Isabel šešona jtsebomnama ndobena causa, y chatna ya bētsanánata ibojtsemna.

<sup>8-9</sup> Chē bachnanga Bēngbe Bētsabe bēts yebnentše tmojtsoservena ora, sempre imojanamana jabocacayana, nda tšabá tbojtsonýená, Bēngbe Bētsábioye atschuanaye luaroye cháuama incienso jajuinýiyama. Canye, Zacaríasbe entsanga Bēngbe Bētsabe bēts yebnoca, Bēngbe Bētsábentše imojtsoservena orna, Zacaríasbioye tšabá ibojonýena; y chca, cha ibojotóca jana incienso jajuinýiyana. <sup>10</sup> Zacarías, incienso yojtsejuinýnantscuana, ba entsanga shjoca imojtsemna, Bēngbe Bētsáftaca encuēntaye. <sup>11</sup> Nye ndeolpe, Bēngbe Utabnabe canye ángel tojanonýná chē incienso jajuinýiyama altarentša catšbioica. <sup>12</sup> Zacarías chábioye tbojáninye ora, tojanenýnaná y corente uatjana tbojanábuache.

<sup>13</sup> Chora chē ángel tbojanianya: —Zacarías, ndoñe matauatjana. Bēngbe Bētsá tonjouena ntšamo tcon-

jaimpadacá. Acbe shema Isabel canye šešona bochántsebmna, boyabásetema, y chana Juan ca cochjuabaye. <sup>14</sup> Chama aca corente oyejuayá cochántsemna, y bētscá entsanga mochanjóyejuaye acbe uaquiñá tojonýnama. <sup>15</sup> Er cha, Bēngbe Bētsabiamama canye uámana entsá echántsemna. Ndocna te queochaisofsiye vínoye, ni jabuáchiye. Chē Uámana Espiritu chabe ainaniñe echantsemándaye, cha cabá ndonýna orscana. <sup>16</sup> Banga Israeloca entsanga, ntšamo cha chaojayanama mochanjontsé joyeunayana Bēngbe Bētsá, chēngbe Utabná. <sup>17</sup> Cha echanjáhshango chē Bēngbe Bētsabe Uámana Uabuayanabe natsana, y echántsebmna obenana y canye espíritu ntšamo chē Bēngbe Bētsabe juabna oyebuambnayá Elías inabomncá. Chabe natsana echanjáhshango, bētsétsanga chēngbe básengaftaca ndoñe chamondétsentsjanama, y chē nduauenanēnga cachiñe chamot-satsjuabnama ntšamo chē Bēngbe Bētsabe bominýiñe tšabá amēnga mondbetsejuabnaya. Y chca, entsanga cha echantsapróntaye Bēngbe Utabná jabama orscama ca —chē ángel tbojanianya.

<sup>18</sup> As Zacarías chē ángelbioye tbojantjá: —¿Ntšamo atše stjobenaye jtsetatšēmbuana chē šcontsatsá soye ndegombre bētsemnama? Er atše ya bētsējema séntsemna y atšbe shémnaca cachcá ca.

<sup>19</sup> Chora chē ángel tbojanjuá: —Zacarías, atše ángel Gabriel sēndmēna; atše Bēngbe Bētsábioica sēndoservena. Cha šonjichmó chē tšabe noticiēnga aca jauanama y juenayama. <sup>20</sup> Morna, chē cbontsatsá soyiñe ndoñe quecatošbuaché causa, ndēbiá cochanjoquéda, y ntšamo cbontsatsacá chaojopasá ora, chama tempo chaojtsemna ora, chora jóyebuambayama cochantobenaye ca.

<sup>21</sup> Chē ángel Zacaríaseftaca yojtsóyebuambnantscuana, entsanga shjoca Zacaríasbiamama imojtsobátmana, y méntšá imojtsejuabnaye: “¿Ndáyeca tša bēn Bēngbe Bētsabe bēts yebnentše ibojtsobiamná ca?” <sup>22</sup> Zacarías tojtanbocna ora, ndoñe yontsobena chē entsāngaftaca jóyebuambayana. Chēnga tmojánatšēmbona, chē Bēngbe Bētsábioye atschuanayentše Zacarías mo otjenayoquécá Bēngbe Bētsábioica canye soye tojáninýama, er chēngbioye jatšēmbombonana yojáuyana, ndēbiá yojoquéda causa.

<sup>23</sup> Chabe tempo, chē Bēngbe Bētsabe bēts yebnentše jtsetrabájayama tojanpochocá ora, Zacarías cachabe yebnoye tojtaná. <sup>24</sup> Chentšana baseftaytese, chabe shema Isabel ngomamaná yojoquéda, y chē causa, chē shema shachna ishinye cach tsoca yebnentše totanoquedá. <sup>25</sup> Cha méntšá yojtsichamo: “Bēngbe

Utabná mora atšbiamá tojtenojuabó, entšángbentše atšbe ngménana jtsebojuánama, básenga tondaye béntsabamna causa ca.”

### Canye ángel tojanabuayená Jesús jónynama

<sup>26</sup> Isabel chnénguana ishinye ngomamaná yojtsemna ora, Bèngbe Bètsá, ángel Gabriel tbojanichmó Galilea luaroye, Nazaret ca uabaina puebloye, <sup>27</sup> canye shembása María ca uabainá jauatsètsayama. Mariyna cabá boyabása nduabuatmá inamna, pero Joséftaca jobouamayama tbojanšbuachená. Y Josena, rey Davidbentšana entšá inamna. <sup>28</sup> Chè ángel Mariýbioye tojana y mēntšá tbojanchuá: —¡Mouena. Bèngbe Bètsá tšabe bendición acbiamá tonjama! ¡Bèngbe Utabná ácaftaca entsemna ca!

<sup>29</sup> Chca tojanuena ora, María yojenjnaná chē soyama, y yojtsejuabnaye ndáyeca chē ángel chca tbojanchuama.

<sup>30</sup> Chora chē ángel tbojaniana: —María, ndoñe matauatjana, Bèngbe Bètsá entsama tšabe bendiciónēga chacotsebomnama. <sup>31</sup> Aca ngomamaná cochánjoquéda y canye šešona boyabásetema cochántsebomna, y chana Jesús ca cochjuabayē. <sup>32</sup> Cha puerte echantsámana, y entšangna Bèngbe Bètsabe Uaquiñá ca chábioye mochantsábobuatma. Y Bèngbe Bètsá chē Utabná, chábioye canye rey bochanjábema, ntšamo David yojamncá, <sup>33</sup> y Jacóbēbentšana entšanga nyetsca tescama echantsamēdaye, y chabe mán-dayana ndocna te queochaisopochóca ca —chē ángel tbojaniana.

<sup>34</sup> Chentšana María chē ángelbioye tbojantjá: —¿Ntšamo chca yochjopása, cabá ndoñe boyá sēntsebomnēse ca?

<sup>35</sup> Y chē ángel tbojanjuá: —Chē Uámana Espiritu echanjabo nyets ábeñe, y Bèngbe Bètsabe obenánaca ngomamaná cochánjoquéda. Chabe obenana mo jantsetēshcá cmochanjaboušbotse; chíyeca chē echanjónyna šešona Uamaná echántsemna, y chábioye Bèngbe Bètsabe Uaquiñá ca mochantsábobuatma. <sup>36</sup> Mouena, Isabel, acbe primá, canye šešona cochántsebomna, masque ya bētsananá cha entsemna; chē “šešona ndbomná ca” monjanabobuatmá, mora ya chnénguana ishinye ngomamaná entsemna, <sup>37</sup> er Bèngbe Bètsá lempe jamama endobena ca —cha tojánayana.

<sup>38</sup> Chora María chē ángelbioye tbojaniana: —Bèngbe Bètsabe oservená atše sēntsemna. Bèngbe Bètsá átšeftaca chaoma ntšamo šcojauyancá ca.

Y chentšana chē ángel tojtsatanoñe.

### María tojána Isabel jabuáchama

<sup>39</sup> Chentšana, María tojanoprontá y tojanochēmo canye puebloye, Judeoca tjañenache luariñe. <sup>40</sup> Chocna cha, Zacaríasbe yebnentše tojánamashēngo y Isabelbioye tbojanchuá. <sup>41</sup> Isabel ntšamo María tbojanchuama tojanuena ora, Isabelbe šešona chabe uafsbioye tojanobonjó, y chē Uámana Espiritu Isabelbeñe tojá-

namashēngo chabe ainaniñe jtsemándayama.

<sup>42</sup> Chcasna, Isabel jabuache tojánayana: —¡Bèngbe Bètsá acbiamá más tšabe bendiciónēga entsama nyetsca shembásengbiamá, y chē cochántsebomna šešonbiámnaca cachcá! <sup>43</sup> Atše mercedo taitsatobuajoñe, atšbe Utabnabe mamá chašubobuáchama; <sup>44</sup> er atše sēnjouena ntšamo šconjachuá, y cachora atšbe šešona oyejuayá atšbe uafsbioye tonjobonjó. <sup>45</sup> ¡Aca Bèngbe Bètsábeñe tcojošbuaché; cojtsetátšēmo Bèngbe Bètsá ntšamo tcmojašbuachenacá yochjama- má; chíyeca puerte oyejuayá cochántsemna ca!

<sup>46</sup> Chora María tojánayana:

“Nyets ainánaca Bèngbe Utabná chantsadorana, <sup>47</sup> y Bèngbe Bètsá, atšbe Atsbocayabiamá corente chanjóyejuaye.

<sup>48</sup> Bèngbe Bètsá atšbiamá tojtenojuabó, atše chabe oservénjema.

Er morscana muentša entšanga nyetscanga puerte oyejuayá ca šmochantsábobuatma.

<sup>49</sup> Bèngbe Bètsá, chē nyets obenana bomná, chabe obenánaca bēts soyēnga atšbiamá tonjama.

¡Bèngbe Bètsá puerte Uamaná ca entsabaina!

<sup>50</sup> ¡Morsca entšanga y más chcoyēnga, chábioye yeanēngbiamá, cha sempre cochántse ngmena!

<sup>51</sup> Cha, chabe obenánaca bēts soyēnga tojama, y chē nye cachēnga bētsétsanga enobiamnayēngbe juabna tojtsepochohá;

<sup>52</sup> reyēngbioye chēngbe mándayentšana tojtsatsatše; pero chē nye cachēnga bētsétsanga ndenobiamnayēngbioye, uámanēnga tojábiamá.

<sup>53</sup> Chē shēntseca imomnéngbioye, chamosama bētsá cha tojatsatá,

pero chē bomnéngbioyna tondaye tonjatsatá.

<sup>54</sup> Cha tojanéjabuache chabe entšanga Israeloca, chabe oservénēnga,

y ndoñe tbonjánebnatjēmba jtsalastemánana,

<sup>55</sup> nyetsca tescama chē Abraham y chábentšana entšángbioye,

ntšamo bēngbe bēts taitanga Bèngbe Bètsá tojanašebuachenacá ca” —cha tojánayana.

<sup>56</sup> Mariyna unga ishinye Isabelaftaca tojanoquedá, y chentšana cachabe yebnoye tojtaná.

### Juan chē Ubayaná tojanonyná

<sup>57</sup> Isabel jtsešócanama tojanóntšabuache ora, canye šešona boyabásetema tojanonyná. <sup>58</sup> Isabelbe juachañe oyenēnga y chabe pamíllanga tmojántatšēmbona ntšamo Bèngbe Bètsá chábioye ibojalastemama, y chama corente Isabelaftaca tmojanoyeuanga. <sup>59</sup> Chē šešona posuftayté yojtsebomna ora, tmojánashjango y chētēmbioye chē más delicadēntše base bobachtēma tmojantētše, ntšamo chē judiēnga imojanamancá. Chēnga imojētseboše chē šešónbioye Zacarías ca juabáyana, cach beftcá; <sup>60</sup> pero chabe mamá tojanéyana: —Ndoñe. Quem šešona echantsabaina Juan ca.

<sup>61</sup> As chēnga Isabelbioye tmojaniana: —Acbe pamíllangbeñe ndocná chca quenatabaina ca.

<sup>62</sup> Chora chënga jatsëmbombonana Zacaríasbioye tmojanjtá, ntšamo chë šešona chaotsabainama cha yojtseboše ca. <sup>63</sup> Zacaríasna jatsëmbombonana canye tablëbé tojanëyá y chiñe tojanábema: “Cha entsabaina Juan ca”. Y chë causa, nyetscanga ojnánënga imojtsemna. <sup>64</sup> Y cachora Zacarías jóyebuambayama yojtobenaye, y yojontsé Bëngbe Bëtsábioye jëtschuayana. <sup>65</sup> Chë juachañe oyenënga nyetscanga tmojanëuatjaná, y Judeoca nyetsca chë tjañenache luariñe entsanga chë soyëngama imojtsencuëntaye. <sup>66</sup> Nyetscanga chë soyëngama tmojantatsëmbona ora, chëngnaca corente chama imojtsejuabnaye y mëntšá imojtsichamo: “¿Chë básetema, bëtsá ora nda yochtsemna ca?” Y ndegombre, Bëngbe Bëtsabe obenana cháftaca yojtsemna.

### Zacarías, Bëngbe Bëtsábioye jëtschuayama

<sup>67</sup> Chë Uámana Espiritu tbojanmandá ora, Zacarías, chë basetembe taitá, Bëngbe Bëtsabe mándoca jtsóyebuambnayëse, mëntšá tojánayana:

<sup>68</sup> “¿Chë Utabná, chë Israeloca entsangbe Bëtsá matschuanga,

er cha tonjabo chabe entsanga jabújabuachama y jabátsebacama!

<sup>69</sup> Cha bochanjíchmuá canye atsebacayá puerte obenana bomná,

y cha echántsemna Bëngbe Bëtsabe oservená Davidbentsana entsá;

<sup>70</sup> ntšamo Bëngbe Bëtsá bayté entsemna, chë chabe juabna oyebuambnayëngbiajana,

chë chábenga imomnëngbiajana bënga šojanašebuachenacá, mëntšá:

<sup>71</sup> Cha canya bochjanichmuá bëngbe uayayënga y nyetsca uaboyënjëngbiama bënga jabátsebacama;

<sup>72</sup> bëngbe bëtsétsangbioye jálastemama,

y jenójuaboyama y jamama chabe uámana trato,

<sup>73</sup> ntšamo Bëngbe Bëtsá, bëts taitá Abrahámbioye tbojanšbuachenacá.

<sup>74</sup> Cha tbojanšbuachená bëngbe uayayëngbiama bënga jabátsebacama,

chca, bënga ndauatjca Bëngbe Bëtsá jasérviamá,

<sup>75</sup> y chabe entsangcá, nyetsca soyënguiñe tsábá

amënga, Bëngbe Bëtsabe delante nyetsca te bëngbe vidënguiñe jëftsiyenama.

<sup>76-77</sup> Y aca, atšbe básetemna, Bëngbe Bëtsabe juabna oyebuambnayá ca cmochantsábobuatma,

entsángbioye Bëngbe Bëtsabe soyëngama cochtsabuayiyama,

Bëngbe Utabná cabá ndáshjango ora, bacna soyëngama amana chamuajbanama;

as Bëngbe Bëtsá chëngbe bacna soyënga echanjáperdonaye, y Bëngbe Utabná jabama mochantso-próntaye.

<sup>78-79</sup> Bëngbe Bëtsá bënga puerte šualastemánayeca, canya bëngbe juabnënga binynayá bochanjíchmuá, bënga chë bacna soyënga causa mo ibetiñcá y obanëngbe luarentšcá vida bomnéngbioye jabátsebacama,

y jabuátambama ntšamo natjëmbana jtsiyenana ca” —cha tojánayana.

<sup>80</sup> Chë básetema yojontsé jobóchana y chabe espíritu-naca puerte. Bayté, entsanga ndoyena luarënguenache cha yojëftsiyena, Bëngbe Bëtsá Israeloca entsángbioye cha tojáninñanñentscuana. Chentšana, chamuábuatmanamna tojanontsé Israeloca entsángbeñe jóyebuambayana.

### Jesucristo tojanonýná

**2** Chë tempo yojamna canye Romoca bëts mandado, Augusto ca uabainá; y cha, chë natsanama tojanmandá nyetsca entsanga chamuenábemama. <sup>2</sup> Chë soye tojanochñëngo Cirenio ca uabainá Siroca mandado yojamna ora. <sup>3</sup> Chamna, nyetscanga tojanotocá jtangana jenábemëngama, cada ona ndémoca chëngbe bëts taitanga imojëftsiyena puebloye.

<sup>4</sup> As, Josénaca Galilea luarentšana Nazaretocana yojëftsebozna y Judeoye, Belén puebloye, tojtaná. Tempo, Josebe bëts taitá rey David, Belenoca inoyena. Y José, Davidbentsana entsá inámnayecna, choye jenábemama tojtaná. <sup>5</sup> Maríaftaca tojána jenábemama, y muana tbojanšbuachená Joséftaca jobouamayama. María ngomamaná yojtsemna, <sup>6</sup> y Belenoca ibojtsemnëntscuana, chë ora tbojanóntšabuache jtsešocanama. <sup>7</sup> Y chentše María ibojtsebomna chabe natsana šešona, canye boyabássetema. Posadoca tondaye luare yontsemna causna, chata nye uacnëngbe átana tambuentše tbojanoquedá. Y Jesús tojanonýná orna, María tbojtanëntsacjuá y canye bachetémiñe tbojanjajó.

### Chë angelotëmënga y chë oveshënga abujéñyanga

<sup>8</sup> Belén béconana, chë ibeta, oveshënga abujéñyanga shëntsjoa cachëngbe oveshëngaftaca imojtsemna. <sup>9</sup> Nye ndeolpe, Bëngbe Bëtsábiocana canye ángel tojanebëbuacna, y Bëngbe Bëtsábentsana corente yojtsebuashinýnyana chëngbe shëconániñe. Chama chënga puerte imojocochauatjaná.

<sup>10</sup> Chora chë ángel tojanéyana: “Ndoñe matauatjëngana. Sënjabo tsabe soyënga tonjopasama jábuayenama, nyetscanga chamóyejuama. <sup>11</sup> Mora chë David tonjanonýná pueblentše canye šešona tonjonýná. Cha tsëngaftangbe atsebacayá echántsemna y tsëngaftangbe entsángbiámnaca. Cha endmëna chë Bëngbe Bëtsabe Uámana Uabuayaná, Cristo ca uabainá, y Bëngbe Utabná. <sup>12</sup> Ndegombre chca entsemnama mëntšá šmochanjátatsëmbona: canye šešona ntsacjuaná y uacnëngbe bachetémiñe jajoná šmochanjínýena ca” —cha tojanéyana.

<sup>13</sup> Cachora, celocana mallajta angelënga chë natsana ángelbentše tmojánbocana y Bëngbe Bëtsábioye mëntšá imojtsatschuanaye:

<sup>14</sup> “¿Bëngbe Bëtsá, celoca entsemná matschuanga!

Bëngbe Bëtsábioye yeunanëngbiama, Bëngbe Bëtsá corente entsoyejuá; quem luariñe chëngbeñe puerte tsábá chaotsemna ca.”



<sup>15</sup> Chentšana chë angelënga celoye tmojésanshëcua-na. Y chora chë oveshënga abujénýanga tmojanontsé-jeniyana: “Belenoye cuajna, chë quem tojopasá soye jinýama. Ndegombre, Bëngbe Bëtsá chë soye šo-janýanýe ca.”

<sup>16</sup> As betesco tmojána y tmojánanýena María, José y chë šešonatema bachetémiñe jajoná. <sup>17</sup> Chë šešona tmojáninýe ora, chënga tmojanacuntá Jesusbe bëtset-sata y chë ínýengbioye, ntšamo chë šešonbiama chë ángel tojanëyancá. <sup>18</sup> Nyetscanga chë tmojanuenënga tmojanenjaná ndayá chë oveshënga abujénýanga imojtsacúntama. <sup>19</sup> Pero Mariyna nýe cachabe ainanoca quem soyëngama más bën inétsenojuab-nañe.

<sup>20</sup> Chentšana, chë oveshënga abujénýanga tmoj-taná Bëngbe Bëtsá atschuanaye, ndayá tmojáninýama y tmojanuena. Nýetsá tojanopasá lempe ntšamo chë ángel tojanëyancá.

### Bëngbe Bëtsabe bët yebnoye Jesús tmojanamba

<sup>21</sup> Posufta te tojánashjache ora, chë basetëmbioye chë más delicadentse base bobachtema tmojantëtse, Bëngbe Bëtsabe entšá bëtsemnama chaotsinýama, ntšamo judiënga imojanamancá; y Jesús ca tmojan-abaye, ntšamo chë ángel tbojaniancá, María cabá ndoñe ngomamaná yontsemna ora.

<sup>22</sup> Y chë tempo tojanóshjango, ndaye ora José y María yojtsamna jamana ntšamo Moisesbe leyiñe iuayancá, ndayá jamama yojanmëncá, canýe shembása Bëngbe Bëtsabe delante tšabia jtsatsmënama, canýe šešona tbojtsebomnentšana. Asna, Jerusalenoye tbojánata y chë bášetema tmojanamba, Bëngbe Bëtsabe bët yebnoca jinýinýiyama, <sup>23</sup> ntšamo chë Bëngbe Utabná Moisésbioye tbojanianýe leyënguñe iuayancá, mëntšá: “Canýe yebnentse chë natsana šešona boyabása tojtsemnëna, Bëngbe Bëtsábioye cha jinýinýiyana chábioye chabotseservënama ca.” Chcasna, chë bášetema Bëngbe Bëtsabe bët yebnoye tmojanamba. <sup>24</sup> Y tmojanamba janshana uta shloftse, Bëngbe Bëtsá jëtschuayama, ntšamo Bëngbe Utabnabe leyiñe yomandancá. Chiñe mëntšá endayana: “Chë natsana šešona chaojónýa ora, boyabášetema tojtsemnëne, janshana šmochjuamba uta fchetnatémata o uta šešona palomatémata, Bëngbe Bëtsá jëtschuayama ca.”

<sup>25</sup> Jerusalenoca inamna canýe bacó, Simeón ca uabainá; cha inamna nýetsca soyënguñe tšabá amá, y yojaniyena ntšamo Bëngbe Bëtsá yomandacá. Cha yojanobátmana chë tempo ndaye ora, Bëngbe Bëtsá bochjanichmuá canýa Israeloca entšanga cháuatsebaca. Y chë Uámana Espiritu chabe ainaniñe yojtsemna; <sup>26</sup> chíyeca, cabá lempe chca ndopása ora, cha yojtsetátšëmbo cha ndoñe yochjanóbanama, chë Bëngbe Bëtsabe Uámana Uabuayaná ntjéftsinýcá. <sup>27</sup> Chë Uámana Espiritu tbojanmandáyeca, Simeón Bëngbe Bëtsabe bët yebnoye tojána; y Jesusbe bëtset-sata chë bášetema tmojanamba ora, ntšamo Moisesbe leyiñe iuayancá chabiamama jamama ora, <sup>28</sup> Simeón tbojanocut-

sá y Bëngbe Bëtsábioye tbojtanchuá. Cha mëntšá tojánayana:

<sup>29</sup> “Bëngbe Utabná, mora šmolesenciá, atše acbe os-ervená natjëmbana jóbanana, er ya tconjama ntšamo šconjanšbuachenacá;

<sup>30</sup> atše chë entšangbe Atsebacayá sënjinýe.

<sup>31</sup> Aca cha tcojichmó nýets luarenache entšangbiama.

<sup>32</sup> Cha chë ndoñe judiëngbe juabnënga binýnayá echántsemna; y chábeyeca, nýets quem luarentse mochanjátatšëm-bona, chë acbe entšangbiama, Israeloquëngbiama ca” —cha tojánayana.

<sup>33</sup> José y María ibojenjanata ntšamo Simeón Jesus-biama yojtsichámuama. <sup>34-35</sup> Chentšana, Simeón Bëngbe Bëtsábioye tbojanimpadá tšabe bendicionënga chata chabotsebomnama chaomama; y María, chë Jesusbe mamábioye tbojanianca: “Quem soyënga corente mochanjacochtsetšenaná, mo ainana espadéjaca cuafjenëchnëngcá. Cha Israeloca banga echanjápochocaye y banga echanjátsebacaye; y chca, ntšamo banga ainaniñe imojuabnacá echantsótatšëm-bo. Israeloca banga quem bášetema mochantšabote-na y chabe palabrëngnaca ca” —cha tbojanianca.

<sup>36</sup> Chëntšnaca yojtsemna canýe shembása Bëngbe Bëtsabe juabna oyebuambnayá, Ana ca uabainá; cha yojamna Fanuelbe bembe y Aserbe pamillentsá; ya bëtšanana cha inamna. Nýe canýsëfta uata cha yojéftsebouamna; <sup>37</sup> y chabe boyá tojanóbanentsana, cha posufta bnëtsana y canta uata viudá inamna. Ndocna te Bëngbe Bëtsabe bët yebnentšana yonjábocana, y chentse tojanoquedá bnëté y ibeta, Bëngbe Bëtsáftaca encuëntaye y cha atschuanaye; y chama, ba soye yojanamana tondaye ntjascá jtsemnana. <sup>38</sup> Simeón, María y Josébioye yojtsëtsësnaye ora, Ana chëngbioye yojobeconá, y chë Atsebacayá tojanonýnama Bëngbe Bëtsábioye tbojtanchuá chentšana, Jerusalenoca entšangbioye, chë canýe atsebacayá Israeloca entšangbiama imojanobatmanëngbioye tojanéyana, chana Jesús yojétssemna ca.

### Jesús Nazaret puebloca

<sup>39</sup> José y María lempe ntšamo chë Utabnabe leyënguñe iuayancá tbojanma ora, Galilea luaroye tbojtana-ta, cachëngbe pueblöye, Nazaretoye. <sup>40</sup> Y chë bášetema yojtsobóchaye, y más añemo yojtsejacana y más osertánana yojtsebomna. Y Bëngbe Bëtsá yojána-ma cha bëtscá tšabe bendicionënga chaotsebomna-ma.

### Jesús Bëngbe Bëtsabe bët yebnoca

<sup>41</sup> Chabe bëtset-sata ibojanamana cada uata Jerusalenoye jana Bashco fiestama, chë Bëngbe Bëtsá chë judiëngbe bët taitangbioye Egiptocana tojánatsebaca jtenójuaboyama fiesta. <sup>42</sup> Jesús bnëtsana uta uata tojánashjache ora, Jerusalenoye tmojána, ntšamo imojanamancá. <sup>43</sup> Chë fiesta tojanopochocá chentšana, chabe bëtset-sata yebnoye ibojtsataye, y chata ntsetat-

šëmbcá, Jesusna Jerusalenoca yojtsoquedañe. <sup>44</sup> Chata ibojétsejuabnaye Jesús chë inye entšángaftaca yojtsataboye ca; chcasna, canye te nyetšá benachëjana tbojánata ora, tbojanontšé chabe pamíllangbeñe y ubuatmëngbeñe jtsenguanguana, <sup>45</sup> pero ndoñe ibonjobenaye jtsinÿenana. As, chata chora Jerusalenoye tbojésanshëcona choca cha jetsenguanguama.

<sup>46</sup> Unga tianoye chata tbojanobená Bëngbe Bëtsabe bëts yebnentše cha jetsinÿenana. Chana chë Moisesbe ley abuátambayëngbe tsëntsaca inétsotbemañe, chëngbioye inayaunana, inatjanaye. <sup>47</sup> Nyetsca ouenanënga imojtsenjanaye Jesús tša osertaná inamna, y tša tšabá jojuama cha yojtsobenama. <sup>48</sup> Chabe bëtsëtsata chca tbojáninye ora, chátnaca ibojenjaná. Chora, chabe mamá tbojaninyana: —Uaquiñá, ¿ndáyeca chca bëndátaftaca tcojama? Taitá y atše corente enócochinÿenata cbondënguá ca.

<sup>49</sup> As Jesús tojanéyana: —¿Ndáyeca atše šmonguá? ¿Ndoñe šondétatšëmbo atše šomna atšbe Taitabe yebnentše jtsemnana ca?

<sup>50</sup> Pero chë bëtsëtsata ndoñe tonjanësertá ntšamo cha tojanëyancá.

<sup>51</sup> Chentšana Jesús chë bëtsëtsataftaca Nazaretoye tojtaná y chata yojtsayaunana. Y chabe mamana nye cachabe ainanoca chë soyëngama más bën inétsenajuabnañe. <sup>52</sup> Jesús yojtsobóchaye y más juabna yojtsebomna; y Bëngbe Bëtsá y nyetsca entšanga corente oyejuayënga chabiama imojtsemna.

### Juan chë Ubayaná entšanga yojanabuayiyiná

**3** Bnétsana shachna uatama Tiberio César Romoca bëts mandado yojamna ora, Poncio Pilato yojamna Judeoca mandado, Heródesna Galileoca rey, chabe catšata Felipe Iturea y Traconitoca rey, y Lisániasna Abilinioca rey. <sup>2</sup> Anás y Caifás chë bachnangbe más uamana amëndayata ibojamna. Cach tempo, canye luare entšanga ndoyenentše Bëngbe Bëtsá tbojanatsëtsá Juánbioye; Juan, Zacaríasbe uaquiñá. <sup>3</sup> As Juan nyetsca luarëngëjana Jordán béjaye béconana tojánachnëngo, entšanga mëntšá utsëtsnaye: “Tšëngaftangbe bacna soyëngama ngmënacá šmochtenójuaboye, chca amana šmochtsajbaná y Bëngbe Bëtsabe benache šmochtishache. Chora cbochjúbaye, y Bëngbe Bëtsá tšëngaftangbe bacna soyëngama cmochanjáperdonaye ca.” <sup>4</sup> Chë soye tojanopasá, cachcá ntšamo chë Bëngbe Bëtsabe juabna oyebuambnayá Isaías chabe librëšañe yojëftsabemcá. Cha mëntšá tojanábema:

Entšanga ndoyena luaroca canya enduáyebuache: “Bëngbe Utabná echanjabo ca; mo nda canye benache tojtseprontacá canye uamana entšá jashjanguama,

cachcá, tšëngaftángnaca, Bëngbe Utabná jabama ainanentše tšabe juabnëngaca šmochtseprontana.

<sup>5</sup> Nyetsca jachañe echantojútjia, y tjañe y batsjabenga mochantenájachibiaye.

Chë scundma benachënga ndirichëjënga echántsmëna, y chë bacá mana benachënga mochantenájachibiaye.

Mo chë chca tmojtsamëngcá, canye benache japróntana canye rey cháúashjanguama, tšëngaftángnaca bëtscá šmochtseprontana tšëngaftangbe ainaniñe, Bëngbe Utabná jabama.

<sup>6</sup> Y nyetsca entšanga mochanjinÿe chë Atsebacayá Bëngbe Bëtsábentšana jabana ca” —cha tojanábema.

<sup>7</sup> Chë entšanga Juan chaubáyama imojánbocana ora, Juan yojanëtsëtsnaye: “¡Mëtšcuaye entšanga! ¿Nda tcmënjáuyana chë echanjóshjango uabouana castigüentšana šmochjotsbocá ca? <sup>8</sup> Bëngbe Bëtsábeñe ndegombre ošbuáchiyënga šmochtsemna, as chca chaotsinÿna, tšëngaftanga chë bacna soyënga amana ndegombre šmojtsajbanama. Y ndoñe šmattsejuabnaye cach tšëngaftangbiama jayanama: ‘Bëngna Abrahámbentšana entšanga, Bëngbe Bëtsabe entšanga fsëndmëna ca’. Er atše chanjayana, Bëngbe Bëtsá quem ndëtšbéngacnaca Abrahámbentšana entšanga nanjábiamá. <sup>9</sup> Tatšniá ya entsaprontana chë betiyeshënga tbëtëjëngocana jtseshatëtsetšama. Ndaye betiye ndoñe tonjashájona, jtseshatëtšana y iñoye jtsatmetšana; tšëngaftangaftácnaca cachcá, tšabe soyënga ndoñe šmontsamëse, Bëngbe Bëtsá cmochanjácastigaye ca” —cha yojanëtsëtsnaye.

<sup>10</sup> —¿Y as, ndayá jamama šojtsamna ca? —chora chë entšanga tmojantjá.

<sup>11</sup> Y Juan tojanéjua: —Chë uta quëfsaíya uabomná bontsemna canÿiyá jutštayana chë tondaye tonduabomná. Saná bomná bontsemna juajatayana chë tondaye saná tondbomnábioye ca.

<sup>12</sup> Romocama entšángbioye impuesto atjanayëngnaca jenábayama tmojánabo. Chënga Juánbioye tmojantjá: —Buatëmbayá, ¿ndayá jamama šojtsamna ca?

<sup>13</sup> Y Juan tojanéyana: —Nye ntšamo chë leyiñe yomandancá entšángbioye crocénana šmochtsayëngacaye ca.

<sup>14</sup> Básefta soldadëngnaca chábioye tmojantjá: —¿Ndayá jamama šojtsamna ca?

Y Juan tojanéyana: —Ndocnábioye tondaye šmatjáboca, ni jauátjanase, ni nye ndayámnaca bonamente jobuáchëse; y nye ntsachetšá šmacaná crocénanaca oyejuayënga šmochtsomñe ca.

<sup>15</sup> Entšanga chë Bëngbe Bëtsabe Uámana Uabuayanabiama imojtsobátmana, y chëngna Juanbiama imojétsejuabnaye nderado cha chë Bëngbe Bëtsabe Uámana Uabuayaná nanjamna ca; <sup>16</sup> pero Juan tojanéyana: “Ndegombre, atše béjayeca cbondubáyana. Pero chë echanjabá atšbiama corente más obenana endbomna, y atše merecido taitatobuajoñe ni mo jotsejbiyana chabe shecochëtjonëshentša corriëja jajafjonama. Chë Bëngbe Bëtsabe benache chamojtishachëngbiama, Bëngbe Bëtsá echanjama chë echanjabábeyeca, chë Uámana Espiritu chëngbe ainaniñe cháúamashënguama. Pero chë ndoñe chamontishachëngbiama, Bëngbe Bëtsá echanjama chë echanjabábeyeca, chëng corente castigánënga chamotsemnana, mo iñeshequécá. <sup>17</sup> Canye entšá chabe mëntšá cucuatšiiñe jiyëbana, chabe trigo jtsóbobemama, y chë ndoserve-

na shácuanënga jtsejashtsëtsana. Chabe trigo chë grano uaquëcnaye tsañe jtsabuájuana, y chë ndoservena shácuanëngna íñeshoye jtsatmetšana. Cachcá, chë átšbentšana echanjabá, chë tšabe entšanga echanjúbuaja, y chë bacna entšangna íñeshiñe echantsacastígaye, y chë iñe ndocna te queochátsfsana ca” —cha tojanéyana.

<sup>18</sup> Chca y inye palabréngaca Juan chë tšabe noti-ciëngama yojanabuayiyá. <sup>19</sup> Tempo, Juan Heródesbioye tbojanácacana, cha tojanobouamama cachabe catšata Filipbe shémaftaca, Felipe cabá oyena ora; chana Herodías ca uabainá. Chama Juan tbojanácacana y nýetsca bacna soyënga Herodes tojanmám-naca. <sup>20</sup> Pero Herodes Juánbioye joyeunaye luariñna, cabá inye más bëts bacna soye tojátanma: Juánbioye cárceloye tbojtsanëtame.

### Juan, Jesúsbioye tbojanabaye

<sup>21</sup> Pero Herodes Juánbioye cabá ndutame ora, Juan ba entšanga tojanëbaye, y Jesúsna tojánabo jenábayama. Ibojtsabayanëntscuana, Jesús Bëngbe Bëtsáftaca ibojtsencuëntaye; y chora celoca yojotëfjo, <sup>22</sup> y chë Uámana Espíritu mo canye palomatemcá Jesúsbioye yojtsastjajuana; y celocana Bëngbe Bëtsá tbojaniyana: “Acna atšbe bonshana Uaquíñá condmëna. Acbiama corente sëntsoyejuá ca.”

### Jesúsbe bëts taitanga

<sup>23-38</sup> Jesús unga bnëtsana uata yojtsebojna, entšáng-beñe Bëngbe Bëtsabe soyëngama jóyebuambayama yojontsé ora. Entšanga imojanjuabná Jesús Josebe uaquíñá yojamna ca.

José yojamna Elibe uaquíñá.

Elí Matatbe uaquíñá

y Matatna Levibe uaquíñá.

Leví yojamna Melquibe uaquíñá,

Melqui Janabe uaquíñá

y Jana Josebe uaquíñá.

José yojamna Matatíasbe uaquíñá,

Matatíasna Amosbe uaquíñá.

Amós Nahumbe uaquíñá,

Nahúm Eslibe uaquíñá

y Esli yojamna Nagaiibe uaquíñá.

Nagai yojamna Maatbe uaquíñá,

Maatna Matatíasbe uaquíñá.

Matatías Semeibe uaquíñá,

Semei Josecbe uaquíñá

y Josec yojamna Judabe uaquíñá.

Judá yojamna Joananbe uaquíñá

y Joanán Resabe uaquíñá.

Resa Zorobabelbe uaquíñá,

Zorobabel Salatielbe uaquíñá,

y Salatielna Neribe uaquíñá yojamna.

Neri yojamna Melquibe uaquíñá,

Melqui Adibe uaquíñá.

Adi Cosambe uaquíñá,

Cosam Elmadambe uaquíñá,

y Elmadamna yojamna Erbe uaquíñá.

Er yojamna Jesusbe uaquíñá

y Jesús Eliezerbe uaquíñá.

Eliezer Jorimbe uaquíñá

y Jorimna Matatbe uaquíñá.

Matat yojamna Levibe uaquíñá,

Leví Simeonbe uaquíñá

y Simeón Judabe uaquíñá.

Judá Josebe uaquíñá,

José Jonambe uaquíñá,

y Jonamna yojamna Eliaquimbe uaquíñá.

Eliaquim yojamna Meleabe uaquíñá,

Melea Menabe uaquíñá.

Mena Matatbe uaquíñá,

y Matata yojamna Natanbe uaquíñá.

Natán yojamna Davidbe uaquíñá,

David Isaíbe uaquíñá

y Isaína Obedbe uaquíñá.

Obed Boozbe uaquíñá,

Booz Salabe uaquíñá

y Sala yojamna Naasonbe uaquíñá.

Naasón yojamna Aminadabëbe uaquíñá,

Aminadab Adminbe uaquíñá

y Admin Arnibe uaquíñá.

Arni Esrombe uaquíñá,

Esrom Fáresbe uaquíñá

y Fáresna yojamna Judabe uaquíñá.

Judá yojamna Jacobëbe uaquíñá,

Jacob Isaacbe uaquíñá

y Isaacna Abrahambe uaquíñá.

Abraham Tarebe uaquíñá

y Taré yojamna Nacorbe uaquíñá.

Nacor yojamna Serugbe uaquíñá,

Serug Ragaube uaquíñá

y Ragauna Pelegbe uaquíñá.

Peleg Heberbe uaquíñá,

y Heber yojamna Salabe uaquíñá.

Sala yojamna Cainanbe uaquíñá,

Cainán Arfaxadbe uaquíñá

y Arfaxadna Sembe uaquíñá.

Sem Noebe uaquíñá

y Noé yojamna Lamecbe uaquíñá.

Lamec yojamna Matusalenbe uaquíñá,

Matusalén Enocbe uaquíñá

y Enocna Jaredbe uaquíñá.

Jared Mahalaleelbe uaquíñá,

y Mahalaleelna yojamna Cainanbe uaquíñá.

Cainán yojamna Enosbe uaquíñá,

Enós Setbe uaquíñá,

Set Adanbe uaquíñá

y Adán Bëngbe Bëtsabe uaquíñá.

### Jesús tojanobená Satanás jayénjanama

**4** Juan, Jesúsbioye tbojanabáyentšana, chë Uámana Espíritu Jesusbe ainaniñe yojtsemándaye. Jesús Jordán bejajoicana tojtaná y chë Uámana Espíritna entšanga ndoyena luaroye tbojanánatse. <sup>2</sup> Chentse canta bnëtsana te tbojanjëtana, y Satanasma yojanabó

Jesús jisháchichiyama. Chë canta bnétsana tentscuana Jesús tondaye tonjanse, y cabana ibojeshéntsena.

<sup>3</sup> Chora Satanás tojésanabo y tbojanianana: —Aca ndegombre Bëngbe Bëtsabe Uaquiñá tcomñése, momandá quem ndëtšbenga tandëše chaobiama ca.

<sup>4</sup> As Jesús tbojanjuá: —Bëngbe Bëtsabe uabemana palabrënguife mëntšá endayana: “Entšá nÿe tandëšeca ndoñe vida ntsebomnana ca.”

<sup>5</sup> Chentšana, Satanás canÿe bëts tjoye tbojanánatse y betesco nÿetsca quem luarentša amëndayëngbenache tbojaninÿinÿé. <sup>6</sup> Chora Satanás tbojanianana: —Atše nÿets obenana cbochjätsetaye y lempe quem amëndayëngbenache yobinÿna soyëgnaca. Atše lempe chca sënjýëngacñe y sentsobena jatsetayama nda stsebošábioye. <sup>7</sup> Aca chacojoshëntsamentšé y chašcojadorase, lempe nÿetšá acbiama echántsemna ca.

<sup>8</sup> Chora Jesús tbojanjuá: —Bëngbe Bëtsabe uabemana palabrënguife mëntšá endayana: “Acbe Bëtsá, chë Utabná cochtsadorana y nÿe cha cochtseservena ca.”

<sup>9</sup> Chentšana, Satanás Jerusaleñoye tbojanánatse y Bëngbe Bëtsabe bëts yebnentše chë más tsbanánoca tbojanatsá, y tbojanianana: —Aca ndegombre Bëngbe Bëtsabe Uaquiñá tcomñése, muentsana fshantsoye montsënja, <sup>10</sup> er Bëngbe Bëtsabe uabemana palabrënguife endayana:

Bëngbe Bëtsá chabe angelënga echanjichamuá, chacmotsinÿenama.

<sup>11</sup> Chënga buacuatsëngaca cmochanjishache, shecutšë ndocá ndëtšbeñe chacondomama ca —cha tbojanianana.

<sup>12</sup> Chora Jesús tbojanjuá: —Bëngbe Bëtsabe uabemana palabrënguife mëntšá endayana: “Ndoñe matsbošana acbe Bëtsá chë Utabná bacna soyëngama jacochënguama ca.”

<sup>13</sup> Cabana, Satanás tojanajbaná bošana Jesúsbioye bacna soyëngama jacochënguama, y bënama Jesús-bentšana tojtsanojuánañe.

### Jesús tojanontšé Galileoca chabe trabajo jamana

<sup>14</sup> Chentšana, Jesús Galileoye tojesaná chë Uámana Espiritbe obenánaca, y nÿetsca entšanga chë luariñe chabiamana imojtsencuëntaye. <sup>15</sup> Jesús yojtsabuátambaye chë judiëngbe enefjuana yebnënguenache, y nÿetscanga cha imojtsatschuanaye.

### Jesús Nazaret puebloca

<sup>16</sup> Chentšana Jesús Nazaretoye tojtashjango, chë pueblentše cha tojanoboché, y ochnayté, ntšamo cha yojanamancá, chë judiëngbe enefjuana yebnentše tojnamashëngo. Y chocna tojantsbaná Bëngbe Bëtsabe palabra jualiama. <sup>17</sup> Chë Bëngbe Bëtsabe juabna oyebuambnayá Isaiásbe librëša tmojaninÿé chaualiama. Chë librëša yojutëfjona orna, tojáninÿena mëntšá uábemanentše:

<sup>18</sup> “Chë Utabnabe Espiritu átšeftaca entsemna,

er atše uabuayaná stsemna chë Bëngbe Bëtsabe tšabe noticiënga chë ndbomnéngbeñe jóyebuambayama.

Cha šonjichmó jábuayenama, chë utámenënga chentšana ya chamuáisebocanama;

jamama chë jtanënga chamobenama tšabá jubinÿnana;

jamama chë inÿengbe causa imosufrinënga, tempcá cachcá tšabá chamotsatsmënana;

<sup>19</sup> y entšanga jáuyanama ndëmua ora chë Utabná chabe entšanga yochjatsebacaye ca.”

<sup>20</sup> Jesús jualiama tojanpochocá y chora chë uajabuachanábioye chëša tbojtaniyé y tojtánótbema. Nÿetsca entšanga chë enefjuana yebnentše imojtsemnënga Jesúsbioye imojtsobuáuatja. <sup>21</sup> Chora Jesús tojanontšé mëntšá jayanana: —Camënté tšëngaftangbeñe tonjopasá ntšamo quem librëšañe iuabemancá ca.

<sup>22</sup> Nÿetscanga Jesusbiamana tšabá imojtsencuëntaye y ojanánënga imojtsemna tša botamana cha yojtsóyebuambnana. Y chënga imojtsentjanaye: —¿Quem boyabása ndoñe Josebe uaquiñá yondmëna ca?

<sup>23</sup> Jesús yojtsetátšëmbo ntšamo cha tojánayaniñe chënga ndoñe tmonjanóšbuachema. As tojánéyana: —Ndegombre tšëngaftanga ntšamo entšanga mondëntšayancá atše šmochanjauyana: “Ashnayá, cach aca menoshná ca”. Y tšëngaftanga šmojtsejuabná atše jauyanama: “Bënga fsënjouena chë bëts soyënga Bëngbe Bëtsabe obenánaca Capernaumoca tcojamama. Ntšamo contschamcá ndegombre tojtsemnëse, cach acbe pueblëntšnaca cachcá moma ca”.

<sup>24</sup> Y cachora Jesús más tojanoyebuambá, mëntšá: “Ndegombre cbéyana, ni canÿe Bëngbe Bëtsabe juabna oyebuambnayábioye cachabe pueblentše tšabá quematonjá. <sup>25</sup> Ndegombre cbéyana, Elías, chë Bëngbe Bëtsabe juabna oyebuambnayá, Israeloca inamna ora, ba viudanga chentše imojamna. Chë tempo, unga uata y tséntsane nÿetšá ndoñe tonjanafte y bëts shëntsana chë luariñe yojtsebinÿna. <sup>26</sup> Pero Bëngbe Bëtsá, Elíasbioye ndoñe tbojanichmó ni mo canÿe Israelentša viudábioye, y aíñe tbojanichmó inÿoye, Sarepta ca uabáinoye, Sidón béconana, canÿe chentša viudábioye. <sup>27</sup> Eliseo, chë Bëngbe Bëtsabe juabna oyebuambnayá, Israeloca inamna ora, chentše banga imojamna bacna nguayanánaca šoquënga, y ni mo canÿa chentša šocábioye tbojnanshná, pero aíñe canÿe šocábioye, Naamán ca uabainá, cach bacna nguayanánaca, Siriocá ca” —cha tojánayana.

<sup>28</sup> Chë judiëngbe enefjuana yebnentše imojtsemna entšanga chca tmojanuena ora, puerte tojánëtëna.

<sup>29</sup> As, chora chënga tmojantsbaná, chë pueblëntšana Jesús imojtábocna y más tsjuanoye canÿe peñëšëjana imojuanatse. Chënga imojanajebna cach peñëšëñe, y chë entšanga imojtseboše Jesús chocana jtsajuat-sëntšana. <sup>30</sup> Pero Jesusna chëngbe tsëntsajana tojánachnëngo y inÿoye tojtsanoñe.

### Jesús, bayëjbe juabna cányabioye tbojanbojuaná

<sup>31</sup> Chentšana, Jesús cach Galileoye tojesaná, Capernaum puebloye, y choca tojanontsé, chë ochnayté, chë judiëngbe enefjuana yebnentse entsanga jabuátambana. <sup>32</sup> Entsanga imojtsenjnanaye ntšamo Jesús yojsabuátambama, er chamna mo canye mando bomnacá yojsóyebuambnaye.

<sup>33</sup> Chë enefjuana yebnentse, canye boyabása bacna bayëja uambayá yojtsemna, y chabe causa chë boyabása tojanontsé mentsá uayebuáchana: <sup>34</sup> —¡Cachcá šmonyá! ¿Ndayama bëngbioye təcjabo, Jesús Nazaretocá? ¿Tcojabo bënga jabétsapochocama? Atse sëndé-tatšëmbo nda aca comnama, aca chë Bëngbe Bëtsabe Uamaná ca.

<sup>35</sup> Chora Jesús chë bacna bayëjbioye tbojtsanácacana y tbojaniana: —¡Iytëca móbema y chábentšana maisebocna ca!

As chora chë bayëja entsanguentse chë boyabásabioye tbojanshajayé, y ndocá ntjëftsemcá chábentšana yojësebocna. <sup>36</sup> Chë soyama nyetsca entsanga imojénjananaye y mentsá imojtsenatsët-snaye: “¡Tša chca palabrënga! ¡Quem entsá mandayacá y obenacá chë bayëjënga entsamënda, y chënga montsaisebocana ca!”

<sup>37</sup> Y Galileoca nyetsca pueblënguiñe Jesusbiamá yojt-sótatšëmbo.

### Jesús, Simón Pédrëbe uambén mamábioye tbojanshná

<sup>38</sup> Chentšana, Jesús chë judiëngbe enefjuana yebnentšana tojëftsanbocna y Simonbe yebnentse tojánamashëngo. Simonbe uambén mamá šocá inajájona jabuache calentóracá, y chë chentse imojtsemna entsanga chabiamá Jesúsbioye tmojanimpadá. <sup>39</sup> Chora Jesús chë šocábioye yojtsejbéna y tojánayana: “¡Calentora mojuaná ca!” Y chë calentora tbojtsanóbojuanañe. Y cachora, cha tojtantsbaná y tojanontsé chënga jobuácuedana.

### Jesús ba šoquënga tojanashná

<sup>40</sup> Shinye yojuenatjëmba ora, banga inye y inye šocana bomnënga Jesúsbioye tmojanënatse, y cha nyetsca šoquëngbeñe cucuatšënga tojanajó y tojanashná. <sup>41</sup> Chora, ba šoquëngbentšana bacna bayëjënga imojtsaisebocana y mentsá imojtsanchembumbuana: “¡Aca chë Bëngbe Bëtsabe Uaquiñá condmëna ca!” Pero Jesusna yojtšécácana y ndoñe tonjanalesenciá chamóyebuambama, er chë bayëjënga imnatátšëmbo cha chë Cristo bëtsemnama.

### Chë judiëngbe enefjuana yebnënguenache, Bëngbe Bëtsabe soyëngama Jesús entsanga yojanabuayiyiná

<sup>42</sup> Yëfsana tojanbinýna ora, Jesús chë pueblentšana tojëftsanbocna, y canye luaroye, entsanga ndoyenoye tojtsanoñe. Pero entsanga tmojána cha jetsenguan-guama, y cha yojtsemnoye tmojánashajna. Chënga imojétseboše Jesús cach pueblentse chaotsoquedáña-

ma, <sup>43</sup> pero Jesús tojanéyana: “Atse šontsemna chë tšabe noticiënga Bëngbe Bëtsabe amëndayama inye pueblënguenáchnaca jábuayenana. Chama Bëngbe Bëtsá šonjichmó ca.”

<sup>44</sup> Y chentšana, Jesús yojánana Bëngbe Bëtsabiamá entsángbioye abuayiyenaye, chë judiëngbe enefjuana yebnënguenache Judeoca.

### Canye te mallajta beonga ashebuánaye te

**5** Canye te, Jesús, Genesaret ca uabaina uafjónaye tsachañe yojtsemna ora, ba entsanga tmojá-nashajna, y chënga tša imojtsenajuatsëntsnaye Bëngbe Bëtsabe palabra jouenama. <sup>2</sup> Jesús, chë uafjónaye tsachañe bécoñe tojáninye uta ena barquëshá; chë beonga ashebuánayëngna barquëshanguentšana tmojëftsanbocna atarraiëshangá jetsáboshabiamá. <sup>3</sup> Jesús canye barquësháñe tojánamashëngo; chësha Simónbeshá inauamna. Chora Simónbioye mentsá tbojaniana: “Quem tsacháñentšana chcoye mëyamba ca.”

<sup>4</sup> Tojanótbema ora, Jesús chë barquëshoicana tojanontsé entsanga jabuátambama. Jabuátambama tojanpochocá orna, Simónbioye tbojaniana: —Shbuatsëntsoye barquëshá mëyamba y tšëngaftangbe atarraiëshangá šmochjushbuetše, beonga jashebuáyama ca.

<sup>5</sup> Pero Simón tbojanjuá: —Buatëmbayá, nyets ibeta fsëndanguá y tondaye chibiátashebuaye. Pero aca chca tcjayánayecna, cachiñe atarraiëshá chantëtëshbuetše ca.

<sup>6</sup> Tmojanëshbuetše orna, bëtscá beonga tmojánishëche y chëngbe atarraiëshangá tojanontsé jtsatanécanana. <sup>7</sup> As, chë inye barquësháñe imojtsemna enutëngbioye tmojánëfjatsšëmbo, jabújabuachama chamuábama. Chora chënga tmojánabo, y nyets uta barquëshá beóngaca tmojanajutjé. Tša chëftanga causa, tojanontsé chë uta barquëshá jtsenatjëmbambana. <sup>8</sup> Simón Pedro chca tojáninye ora, Jesús bëntse tojanoshëntsamentse y tbojaniana: —¡Bëngbe Utaná, atse bacna soye amá sëndmëna, chíyeca átšbentšana mojuaná ca!

<sup>9</sup> Chë tša beonga jashebuáyama Jesús tojanmama, Simón y chë cháftaca imojtsemnënga imojouatjaná.

<sup>10</sup> Santiago y Juan, chë Zebedeobe uaquiñata y Simonbe enutata, chátnaca auatjanánata ibojtsemna. Chora Jesús Simónbioye tbojaniana: —Ndoñe matauatjana. Morscana, entsanga Bëngbe Bëtsabiamá cochántsanguaye, y nye beonga ashebuanayá ndoñe quecochátsmëna ca.

<sup>11</sup> As chora chë barquëshangá tsachoye tmojtanéyamba y lempe jéseboshjonëse, Jesús tmojanasto.

### Jesús, canya bacna nguayanánaca šocábioye tbojanshná

<sup>12</sup> Jesús canye pueblentse yojtsemna ora, chentse tojánashjango canye entsá bacna nguayanánaca šocá. Chë šocá Jesúsbioye tojáninye ora, tojanoshënts-

mentšé y jubiaca fshantsóntscoñe yojotsejbéna y tbojanimpadá: —Bèngbe Utabná, aca tcojtsebošése, aca catjobenaye atšbe šocana jtsebojuánana ca.

<sup>13</sup> As Jesús cucuátšeca tbojánbojajo y tbojaniana: —Aíñe, séntseboše. ¡Šocana cbotsebojuaná ca!

Y cachora chë šocana tbojtsanóbojuanañe. <sup>14</sup> Chora Jesús tbojanmandá: —Ndocnábeñe chë soye cattse-cuéntaye; nýe Jerusalenoca báchnëbioye motsa, y cha cochjinýinyíye aca mora ya tšabá cojtsatsmënema; y chora cochjuátšëmbona ntšamo Moisés chabe leyíñe tojanmandacá, Bèngbe Bëtsábioye chama jëtschuayama, chca, nýetsca entšanga chamotatšëmbona mora ya tšabá cojtsatsmënema ca.

<sup>15</sup> Pero ndayá Jesús yojtsamama más entšanga imojátatšëmbona, y ba entšanga imojtsótoyo chábioye joyeunayama y chëngbe šocanëngama chauashnama.

<sup>16</sup> Pero Jesús yojanamana jtsoñana entšanga ndoyena luarëngoye y choca Bèngbe Bëtsáftaca ibnëncuentaye.

### Jesús, canýe jama ndobenábioye tbojanshná

<sup>17</sup> Canýe te, Jesús yojtsabatambá ora, chentše básefta fariseunga y ley abuátambayënga imojtsetbiámana, Galileoca nýetsca pueblënguentsana áshjajnënga, Judeoquënga y Jerusalenoquënga. Y chora Jesús šoquënga yojtsashnaye, Bèngbe Bëtsabe obenánaca.

<sup>18</sup> Chora tojanopasá, básefta boyabásenga canýe šocá, jama ndobená, tjuashiñe choye imojuamba. Chënga imojétseboše tsoye cha juambana, Jesús yojtsemnoye, <sup>19</sup> pero jamashjnama ndoñe tmonjanobená, tša entšanga causa. Chcasna, gradasëšënguëjana chë yebnentša tsbanánoye tmojánasëngo y batšá tejëshe tmojtsanjuaná. Chorna, chë atëfjnëjana chë šocá tjuashiñe tmojanéstjango, entšangbe tsëntsaca, Jesus-be natsanoica. <sup>20</sup> Jesús tojáninýe cha chë šocá jáshnama bétsobenama chënga puerte imojtsošbuáchema. As, chë jama ndobenábioye tbojaniana: “Bacó, acbe bacna soyënga tcbontsebojperdoná ca.”

<sup>21</sup> Chora chë ley abuátambayënga y chë fariseunga mëntšá tmojanontšé juabnayana: “Quem boyabása ndoñe tšabá Bèngbe Bëtsabiama quenátichamo; mo chábioye cuafjoyenguangcá entsemna. Ndocna entšá quenátobena bacna soyëngama inýa japerdonana; nýe Bèngbe Bëtsá aíñe ca.”

<sup>22</sup> Pero Jesús yojtsetátšëmbo ntšamo chënga imojtsejuabnayama; as tojanéyana: “¿Ndáyeca tšëngaftangbe ainaniñe chca šmojtsejuabná? <sup>23</sup> ¿Tšëngaftangbiama ndayá más paselo nántsemna tšëngaftangbe delante jayanama: ‘Acbe bacna soyënga tcbontsebojperdoná’, o jayanana: ‘Matëtsbaná y motsa ca?’ <sup>24</sup> Y chca, morna atše cbochanjínýanyíye, chë Bèngbe Bëtsá Entšá tbojanbemá quem luariñe obenana yobomnama, entšanga bacna soyëngama jáperdonama ca” —Jesús tojánayana.

As Jesús chë jama ndobenábioye tbojaniana: “Atše cbëyana, matëtsbaná, tjuashe mesocñe y acbe yebnoye motsatoñe ca.”

<sup>25</sup> Cachora chë jama ndobená tojtantsbaná entšangbe delante, chë cha inajáona tjuashe yoje-

socñe y Bèngbe Bëtsábioye atschuanaye chentšana yojtsatoñe. <sup>26</sup> Chama nýetsca entšanga imojénjanaye y Bèngbe Bëtsá imojtsatschuanaye. Y corente auatjanánënga imojtsichamo: “Mënté bëts soyënga tmonjinýe ca.”

### Jesús, Levíbioye tbojanchembo chabuastama

<sup>27</sup> Chca yojochnëngüentsana, Jesús chentšana tojéftsanbocna y canýe entšábioye tbojáninýe, Leví ca uabainá, chë entšangbioye impuesto Romocama atjanayentše inétsotbemañe. Chora Jesús tbojaniana: “Šmasto ca.”

<sup>28</sup> Y Leví lempe tojésanboshjona, tojantsbaná y Jesús tbojanasto.

<sup>29</sup> Chentšana, Levina bëts fiesta chabe yebnentše Jesusbiama yojama. Y chë fiestentše imojtsemna banga impuesto atjanayënga; y inýe entšangnaca mesëshentše imojtsetbiámana. <sup>30</sup> Chora, chë fariseunga y chë ley abuátambayënga tmojanontšé chë Jesus-be uatsjëndayëngbiama podësca oyebuambnayana; y chëngbioye mëntšá tmojanéyana: —¿Ndáyeca tšëngaftanga impuesto atjanayëngaftaca y bacna soye amëngaftaca šmojttesá y šmojtsofšëšná ca?

<sup>31</sup> Y Jesús tojanéjua: —Salud bomnënga ashnayá ndoñe ntsëjabótana, pero šoquëngna aíñe. <sup>32</sup> Y atše ndoñe chiyátabo chë Bèngbe Bëtsabe bominyíñe tšabá amënga jabáchembuama, sinó chë bacna soye amënga imomna ca juabnayënga Bèngbe Bëtsábioye jabáchembuama ca.

### Jesús tmojantjá chë Bèngbe Bëtsáftaca jencuëntama tondaye saytescama

<sup>33</sup> Chora chënga Jesúsbioye tmojaniana: —Juan chë Ubayanabe uatsjëndayënga y chë fariseungbe use-tonënga monduamana ba soye Bèngbe Bëtsáftaca jtsencuëntayana, y chama ba soye tondaye ntjascá jtsemnana; pero acbe uatsjëndayënga nýe nýets tempo jesosañana y jesofšëšñañana ca.

<sup>34-35</sup> Chora Jesús tojanéjua: —Chë boyabása bouamná chë ofjanëngaftaca tojtsemnëntscuana, chëngbioye saná ndoñe ntsabuáshebenana. ¿Ntšamo chca ndoñe nántsemna? Chë tojobouamá cha chëngaftaca tojtsemnëntscuana, chë ófjanënga bëtscá jasana y cháftaca oyejuayënga jtsemnana. Pero ora echanjóshjango y chë boyabása chëngbentsana mochantsánatseñe; chora cocayé chë ófjanënga echántsamna tondaye ntjascá jtsemnana. Ntšamo chë tojobouamá cha y chë ofjanëngaftaca endmëncá, cachcá endmëna atše, atšbe uatsjëndayëngaftacnaca ca —cha tojanéjua.

<sup>36</sup> Jesús mëntšánaca tojanacuntá jabuátambama: “Ndocná queonýbatatëtse basájua tsëm entšayañe, tanguá entšayá jtarmëndama. Chca tcojamëse, chë tsëm entšayá jtsandbemana, y chë tcojuatëtse entšéjua chë tanguájuañe ndoñe tšabá ntsinýnana.

<sup>37</sup> Y cach ndoñe, chë tojtseshayana vínoye tanguá jasabenguíñe ntjafaftsúamayana. Tcojuafsuamasna, chë jasabënga jtseshëbëfjuana y chë vínoye

itsabuáshanana; y chca, chë vínoye y chë jasabenga tondayama ntjatoservénana. <sup>38</sup> Chíyeca co, chë tojtshayana vínoyna tsëm jasabenguiñe juaftsúamana. <sup>39</sup> Ndocná, chë bóchena vínoye tojatëmo y chentšana játsbošana chë tojtshayana vínoye jatofsiyana; cha jayanana: ‘Chë bóchena vínoye tša tšabeye ca.’

### Jesusbe uatsjéndayënga ochnayté trigo tmojanátabebe

**6** Canye ochnayté, Jesús canye jajajana yojtsaye; chabe uatsjéndayënga trigo imojtsaiuatabnaye, imojtsaiúshenëcaye, y imojtsaiuasaye. <sup>2</sup> Chë causa, básefta fariseunga tmojanatjaye: —¿Ndáyeca šmojt-sama chë ochnayté jamama ndoñe quenátslesenciana soye ca?

<sup>3</sup> Y Jesús tojanéjua: —¿Ndoñe šmëndualía y šmondétatšëmbo, ntšamo rey David y chabe enutënga tmojanmama shéntseca imojtsemna ora y jasama yojtsëjaboto ora? <sup>4</sup> Chca orna, David Bëngbe Bëtsabe bëts yebnentse yojámashëngo y chë Bëngbe Bëtsá chentse yojamnama inýinynaye tandëšënga yojase, y chë cháftaca imojánajna entšángnaca yojátsataye. Y chë tandëšna nýe bachnanga belesenciana jasama. Masque David chca yojama, Bëngbe Bëtsá chora ndoñe tonjánayana David canye bacna soye tojanma ca —Jesús tojanéjua.

<sup>5</sup> Y Jesús más tojanéyana: “Chë Bëngbe Bëtsá Entšá tbojanbemá, chë entšá ochnayté tojtsama sóynaca jtsemándayana ca.”

### Chë buashana cucuatše bomna entšá

<sup>6</sup> Inye ochnayté, chë judiëngbe enefjuana yebnoye Jesús tojánamashëngo y tojanontsé jabuátambana. Y chentse yojtsemna canye entšá, catšbioica cucuatše buashanëtse bomná; <sup>7</sup> y chë ley abuátambayënga y fariseunga chiñe imojtserrondana jinýama nderado Jesús chë ochnayté chábioye tabuanjashna, as chca chënga jtsebomnama ndaye sóyeca Jesús mal jaquédana. <sup>8</sup> Pero Jesús chëngbe juabna yojtsetátšëmbo; asna chë buashana cucuatše bomna boyabásabioye tbojanayana: “¡Motsbaná y chentse tsëntsaca motsa ca!” Y chë entšá yojtsbaná y entšangbe tsëntsaca yojotsaye. <sup>9</sup> Chora Jesús chë inýengbioye tojanéyana: “¿Ndayá yojtselesenciana ochnayté jamana, canye tšabe soye o canye ndoñe tšabe soye? ¿Jatsbocana o jtsepochécana ca?”

<sup>10</sup> Y nyetscanga chabe chabuajana imojtsemnënga tojanënyanýe, y chë buashana cucuatše bomnábioye tbojanayana: “Macuenýanëjaná ca.” Y chë boyabása tojanacuenýanëjaná, y tšabá chëtša yojtsatamna. <sup>11</sup> Pero chë inýengna puerte tmojanotjayaná, y tmojanontsé enatsëtsnayana ndayá muanjobenaye Jesusbe contra jamana ca.

### Jesús chë bnëtsana uta uatsjéndayënga tojanabacacá

<sup>12</sup> Chë tempo, Jesús tjoye tojána Bëngbe Bëtsáftaca jencuéntama; y nyets ibeta cháftaca tbojanencuentá.

<sup>13</sup> Tojanbinýna ora, chabe ústonënga tojánachembo, y chënguentšana tojanëbuáyana bnëtsana uta uatsjéndayënga, chë ndëmuanýënga “chabe ichmónënga cá-naca” tojanébobaye. <sup>14</sup> Chënga imojamna: Simón, chë Pedro cá-naca Jesús tbojanabobayá; Andrés, Simonbe catšata; Santiago y Juan, Felipe y Bartolomé, <sup>15</sup> Mateo y Tomás, Santiago, Alfeobe uaquiñá; Simón, chë celote ca uabobainá; <sup>16</sup> Judas, Santiagbe uaquiñá; y Judas Iscariote, chë más chcoye, Jesús uayayëngbe cucuatšifne bochjanboshjoná.

### Jesús ba entšanga yojanabuatambá y yojánashnaye

<sup>17</sup> Chentšana, Jesús chëngaftaca chë tjocana tojtantsmá y canye jachañe tojanoquedá ba chabe ustonëngaftaca y ba inye entšángaftaca. Ba entšanga choye tmojánabo Judeocana, Jerusalenocana y Tiro y Sidón, chë mar béjaye béconana pueblënguentšana, Jesúsbioye oído jabuájua y chëngbe šocanëngama chauashnama. <sup>18</sup> Y chábeyeca chë bacna bayëjbe juabna uambayënga tšabá imojtsatsmëna. <sup>19</sup> Nyetsca entšanga tša imojtseboše y ndayánaca imojtsama Jesús jabojuama, er chábentšana bëts obenana yojtsóbocana y nyetscanga yojtsashnaye.

### Chë ndegombre oyejuayana bomnënga y ndëmuanýëngbiama tša lastema yochtsemna

<sup>20</sup> Jesús chabe uatsjéndayëngbioye tojanontješé y tojanéyana: “Puerte oyejuayënga tšëngaftanga, chë quem luarentša soyënga ndbomnënga, er Bëngbe Bëtsabe amëndayentša soyënga tšëngaftangbiama entsemna ca.

<sup>21</sup> “Puerte oyejuayënga tšëngaftanga chë mora oshtënsiyënga, er becá šmochantóshachaye ca.

“Puerte oyejuayënga tšëngaftanga chë mora šmošachenga, er chentšana šmochántsaténbiajuaye ca.

<sup>22</sup> “Puerte oyejuayënga šmochtsemna, entšanga chacmojtšëbuayënja ora, chacmojtsatëbuacana ora, chacmojtšëyanguá ora, y tšëngaftanga ndoñe tšabá šmontsama ca chënga chamojtsichamo ora, tšëngaftanga atšbe ústonënga bëtsemnama. <sup>23</sup> Chë te puerte šmochjóyejuaye, er celoca canye bëts uacanánana šmochántsebomna. Chëngbe bëts taitanga, cachcá chë Bëngbe Bëtsabe juabna oyebuambnayëngaftaca tmonjanma ca.

<sup>24</sup> “Pero jtša lastema tšëngaftanga bomnëngbiama, er mora oyejuayënga jtsemnama ya bëtscá šmojóyëngacñe ca!

<sup>25</sup> “¡Tša lastema tšëngaftanga chë mora shachanëngbiama, er shëntsana šmochántsebomna ca!

“¡Tša lastema tšëngaftanga chë mora oyejuayëngbiama, er ngménama šmochanjenóbošachna ca!

<sup>26</sup> “¡Tša lastema tšëngaftangbiama nyetsca entšanga tšabá chamojtsoyebuambná ora; er cachcá chëngbe bëts taitanga monjánama chë Bëngbe Bëtsabe ndoñe ndegombre juabna oyebuambnayëngaftaca ca!”

—Jesús tojanéyana.

### Chë uayayëngbiama bonshánana jtsebomnana

<sup>27</sup> “Pero tsëngaftanga, átsbioye ouenanënga cbéyana: Tsëngaftangbe uayayënga š-mochtsababuánÿeshana; chë tcmojtsébuayënjëngbiama tšabe soyënga šmochtsama; <sup>28</sup> chë tsëngaftangbiama bacna soyënga bošëngbiama, Bëngbe Bëtsá š-mochtseimpadana tšabe bendicionënga chamóyëngacñama; chë tcmojóyanguanguëngbiama, Bëngbe Bëtsá šmochtseimpadana. <sup>29</sup> Nderado ndánaca cánÿoica tcmojajuebjantšetase, cochjomiye chë ínÿoica cachcá chacmomama; nderado ndánaca quëfsaíya tcmojuábocana, cachcá cochjonÿaye acbe shabuanguanéjuanaca chauetsácñama. <sup>30</sup> Ndánaca chacmojtjañábioyna, jatšetayana; y nda ndayánaca chacmojefcábioyna, ndoñe catjontšínÿena chacmatoyema. <sup>31</sup> Inÿengaftaca šmochtsama, ntšamo chë ínÿyënga tsëngaftangaftaca chamotsamama šmojtsebošcá.

<sup>32</sup> “Tsëngaftanga, ñye chë tcmojtsababuánÿeshanënga šmojttsababuánÿeshanëse, ¿ndaye tšabe soye chca šmattsama?; er chë bacna entságnaca chca mondbétsama. <sup>33</sup> O nderado, ñye chë tsëngaftangbiama tšabe soyënga tmojttsamëngbiama tšabe soyënga š-mojtsamëse, ¿ndaye tšabe soye chca šmattsama?; er bacna entságnaca chca mondbétsama. <sup>34</sup> O ñye chë cmochtëchenanguama šmojtsejuabnángbioye šmojúyentšamëse, ¿ndaye tšabe soye chca šmattsama?; er chë bacna entságnaca mondbetsenántšamiana, chëngbentšana cachcá jtóyëngacñama jtsobátmanëse. <sup>35</sup> Pero tsëngaftangna cmontsamna chë uayayënga jtsababuánÿeshanana; y tšabe soyënga chëngbiama jtsamana y júyentšamiana, chëngbentšana ndayánaca jtóyëngacñama ntjatobatmancá. Chca, tsëngaftanga uacanánana cuenta canÿe bëts soye šmochanjóyëngacñe, y celoca endmëna Bëngbe Bëtsabe básënga š-mochántsemna; Bëngbe Bëtsá chë ndochuanayëngaftaca y bacna entsangaftácnaca tšabia comna. <sup>36</sup> Inÿëngbiama lastemadënga šmochtsemna, ntšamo tsëngaftangbe Taitá yomncá ca” —Jesús tojánayana.

### Ndoñe ntsichámuana chë ínÿyënga tšabá o ndoñe tšabá tmonjamama

<sup>37</sup> “Ndocá ínÿëngbiama šmattsichamo chë ndoñe tšabá tmontsamama, y Bëngbe Bëtsá ndoñe queochátichamo tsëngaftanga ndoñe tšabá šmonjama ca. Inÿëngbiama ndoñe šmattsichamo ndoñe tšabá tmonjama ca, y Bëngbe Bëtsá ndoñe queochátichamo tsëngaftanga ndoñe tšabá šmonjama ca. Inÿyënga šmochjáperdonaye y Bëngbe Bëtsá cmochanjáperdonaye. <sup>38</sup> Inÿëngbioye šmochjatšataye y Bëngbe Bëtsá cmochántatšataye. Mo nda canÿe biaco medidiñe bëtscá tojajutjé, uashëshe y cmojtiyecá, Bëngbe Bëtsá cachcá cmochántatšataye. Ntšamo tsëngaftanga ínÿëngbioye chašmojábiama, uabouana o ndoñe jabuache soyënga, Bëngbe Bëtsá cachcá tsëngaftangbioye cmochanjábiama ca” —Jesús tojánayana.

<sup>39</sup> Jesús quem cuétnaca tojánayana jabuátambama: “¿Canÿe jtaná nantsobena inÿe jtaná jtsanachayama? ¿Chca ndoñe ñyets útata ndaye tbuabentše buanjót-satše? <sup>40</sup> Chë uatsjendayá ndoñe ntsemnana chë bu-atëmbayabiama más bëtscá. Pero chabe uatsjëndayana chaojapochocá ora, cach buatëmbayacá jtsemnana.

<sup>41-42</sup> “Canÿa chabe bominiñe canÿe niñëfja tojtsebomnëse, cha ndoñe ntsoobenana chabe catšátbioye jauyanana: ‘Acbe bominiñentšana canÿe polvështema jtsebuchjátsëcama šmolesenciá ca’. Natsana cha bontsemna cachabe bominiñentšana chë niñëfja jt-senobuchjátsëcana, tšabá jinÿyama jobenayama, chabe catšatbe bominiñentšana chë polvotema jtsebuchjátsëcama. ¡Cachcá entsemna acbiama, bacna entsá chë ntšamo ndegombre tcojuabnacá ndinÿinÿayá! Chë tša bacna soye cojtsama ca acbe catšátbioye tcojauyana ora, cach aca tša bëtsc bacna soyënga cojtsamama ntjenajuaboycá; y chca, aca jamana canÿe bacna soye. Natsana cmontsemna chë cach aca ndoñe tšabe soyënga cojtsamama ngmëncá jshatenójuaboyana y chca amana jshétsajbanana, y chentšana cocayé cochantsobena acbe catšata juajabuáchana ntšamo tšabá yomncá chaotsamama ca” —Jesús tojánayana.

### Tšabe betiye o ndoñe tšabe betiye tondmënama, jtso-tatšëmbuana ntšamo tojashajoncá

<sup>43</sup> “Ndoñe queonÿbatsmëna, chë canÿe tšabe betiye iñe podesca soye jashájonana; ni canÿe ndoñe tšabe betiye iñe tšabe soye jashájonana. <sup>44</sup> Betiyënga jtsabuamana ntšamo cada betiye tojtseshajcá. Uchmašëshentšana quenátopodena higuëbë jocñana; ni uvašëša, shëshëntša betiyentšana. <sup>45</sup> Chë tšabe entšana, chabe ainanoca tšabe juabnënga bomnentšana jtsóyebuambnayana; y chë bacna entšana, chabe ainanoca ndoñe tšabe juabnënga bomnentšana jtsóyebuambnayana. Er ndayá becá ainanoca tomnama entsá jtsóyebuambnayana ca” —Jesús tojánayana.

### Chë uta ucuatjoniñe

<sup>46</sup> “¿Ndáyeca tsëngaftanga atšë šmnëtsatsaye, ‘Utabná, Utabná ca’, y ntšamo atšë stsichamcá ndoñe ntsamana? <sup>47</sup> Cbochanjáuyana ndacá yomna nda átšbioye tojabo, atšbe palabra tojouena y ntšamo stsichamcá tojtsama: <sup>48</sup> Cha endmëna mo canÿe entsacá, nda canÿe yebna jajebuamna becá fshantse jashenoye yojajutjo y ndëtšbenguiñe yojúcuatjoye. Béjayënga yojtsóftjajna ora, chë yebnëjana yojobuachnëngo, pero ndoñe yonjobenaye juashajayana, er chë ndëtšbenguiñe jabuache yojaúcuatjona. <sup>49</sup> Pero nda atšbe palabra tojouena y ntšamo stsichamcá ndoñe tontsama, endmëna mo canÿe entsacá, nda canÿe yebna yojajebno ñye fshantsiñe, tondayiñe ntjuatjoycá. Béjaye yojóftjango y jabuache chë yebnoye yojobuá ora, chë yebna yojtsáshajaye y lempe yojtsopochóca ca” —Jesús tojánayana.



### Jesús canye Romano soldadengbe amëndayabe bochichnayábioye tbojanshná

7 Entšángbioye chca jáuyanana tojanpochocá ora, Jesús Capernaum puebloye tojána. <sup>2</sup> Chentše yojyena canye romano soldadengbe amëndayá. Cha ibnabomna canye bochichnayá puerte bonshaná, y chora cha šocá yojtsemna, ya jtsóbanama. <sup>3</sup> Jesús ba šoquéngbioye yojáshnama encuéntayana chë amëndayá yojouena ora, báseftanga bëtšëjemëngcá amëndayënga cha tojanichamó, chauábama Jesús jaimpádama y chabe bochichnayábioye chabotseshnáñama. <sup>4</sup> Chënga Jesúsbioye tmojánashjango y tša imojtseimpadana, mëntšá: “Quem soldadengbe amëndayá mercedo entsebuájona chacotsájabuachama; <sup>5</sup> er cha bëngbe luarentša entšángbioye corente endábabuanýeshana, y cachá chë bëngbe enefjuana posada šonjayentšjeboca.”

<sup>6</sup> Jesús chéngaftaca tojána. Pero chë mandayabe yebnoye imojtsebeconá ora, chë soldadengbe amëndayá básefta amiguënga yojichamuá, Jesúsbioye mëntšá chamuauyanama: “Atšbe Utabná, ndoñe yapa matenócochinýenana átšbioye jabama. Atše mercedo taitatobuajoñe aca atšbe yebnoye chacuamashënguama; <sup>7</sup> chíyeca ni mo añemo chiyatentšetá jama aca jajébenguama. Morna nye cochjayana y atšbe bochichnayá tšabá echántsatsmëna. <sup>8</sup> Er atše sëndábamna átšbioye mándayënga y átšnaca soldadengbe amëndayá sëndmëna. Atše canye soldadbioye stjauyana ‘motsa ca’, cha cachora jana; y ínñabioye stjauyana ‘mabo ca’, cha cachora jabana; y nderado atšbe bochichnayábioye ndayánaca chaomama stjamánda, chánaca cachora chë soye jamana ca” —cha yojáuyana.

<sup>9</sup> Jesús chca tojanuena ora, chë mándayabiama yojenjnaná, y jobuértanëse chë ba entšanga cha ustónëngbioye tojanéyana: “Ndegombre cbéyana, ni mo nyets Israelentše, ni canya quem boyabasacá tša osbuachiyá chiyátinýena ca.”

<sup>10</sup> Y chë ichmónënga yebnoye tmojtaná orna, tmojáninýena chë bochichnayá ya tšabá yojtsatsmëna.

### Jesús tojanma canye viudabe uaquiñá cháuatayenama

<sup>11</sup> Chca tojanopasá chentšana, Jesús yojétsaye Naín ca uabaina puebloye, y cháftaca chabe uatsjëndayënga y ba entšanga imojtsaye. <sup>12</sup> Chë pueblo amashjuanoye yojtsebeconá orna, entšanga chë pueblentšana canye obaná imojtsábocana jauátbontsama; chë obaná canye viudabe uaquiñá inamna y nye cha uaquiñá. Bëtscá entšanga chë obanabe mamá imojtsetjëmbambnaye. <sup>13</sup> Bëngbe Utabná chë viudábioye tbojáninýe ora, chabiama tbojanongmé y tbojanianyana: “Ndoñe matošachena ca.”

<sup>14</sup> Y jobéconase, chë ataúše tojánbojajo, y chë obaná atambayënga tmojantsá. Y Jesús chë obanábioye tbojanianyana: “Bobontse, atše cbéyana: ¡Matëtsbaná ca!”

<sup>15</sup> Chora chë obaná tojtantsbaná y tojanontšë oyebuambnayana; y chabe mamábioye Jesús chë bobontse tbojtanánatse. <sup>16</sup> Nyetsca entšanga tša uatjana yojubuache chca tmojáninýe ora, y Bëngbe Bëtšá imojtsatschuanaye, mëntšá jayanëse: “Bëngbentše canye Bëngbe Bëtšabe juabna oyebuambnayá cuatënjonýná ca.” Y mëntšánaca: “Bëngbe Bëtšá tojabo chabe entšanga jabújabuachama ca.”

<sup>17</sup> Y nyets Judea luarëjana y chë chábuañe luarenache entšanga imojátatšëmbona ndayá Jesús tojanmama.

### Juan chë Ubayanabe ichmónënga

<sup>18</sup> Juan, lempe ntšamo Jesús yojtsamama yojátatšëmbona; er chabe ústonënga chama tmojanchembo, <sup>19</sup> y Jesúsbioye yojichamuá jatjayama cha tayoamna chë Cristo, chë jabama ibojanmëná, chë Uámana Uabuayaná, o ínñabiama jatobátmama tajojétsamna ca. <sup>20</sup> As chë Juanbe ichmónënga Jesúsbioye tmojanobeconá y tmojanianyana: —Juan chë Ubayaná šonjichamo jatjayama, aca ndegombre cojtsemna chë Cristo, chë jabama ibojanmëná, o šojtsamna ínñabiama jatobátmama ca.

<sup>21</sup> Chë ichmónata tbojánashjango ora, Jesús banga yojtsashnaye, šocanëngama y tsetšanëngama; bacna bayëjbe juabna uambayënga tšabá imojtsatsmëna, y jtanënga tšabá yojtsatëbinýna. <sup>22</sup> Chora Jesús mëntšá tojanéjua: —Motsata y Juánbioye šochjauyana ntšamo šojinýe y šojouencá: Chë jtanënga tšabá entsatëbinýna, chë coshetënga tšabá montsatana, chë bacna nguayanánaca šoquënga shnánënga montsatsmëna, chë tësmënga montsuenana, chë obanënga tmontayena, y chë ndbomnjëmëngbioye chë tšabe noticiënga montsabuaiyná. <sup>23</sup> ¡Puerte oyejuayá chaotsemna, nda atše ndoñe bacna soye stsama ca jtsejuabnaye, átšbeñe ošbuáchiyana ndoñe tontsajbaná cha ca! —Jesús tojanéyana.

<sup>24</sup> Chë Juanbe ichmónata chentšana tbojésanbocnentšana, Jesús tojanontšë Juanbiama entšanga jáuyanana, mëntšá: “Juan jinýama šmojánbocna ora, ¿ndayá jinýama šmojánbocana entšanga ndoyena luaroje? ¿Canye entšá ainaniñe tondaye añemo ndbomná, mo canye šëše bínýiaca shatiyeynëščá? <sup>25</sup> Y ndóñese, ¿ndayá jinýama choye šmojánbocana? ¿Canye boyabása uámana entšayaca bopormaná? Ndoñe. Tšëngaftanga šmondétatšëmbo chë uámana entšayaca bopormánënga y chë bëtscá bomnánaca nye tondayama ntsecochinýencá vida bomnëngna, reyëngbe yebnënguiñe mondbétsiyenama. <sup>26</sup> Asna, ¿ndayá jinýama choye šmojánbocana? ¿Canya Bëngbe Bëtšabe juabna oyebuambnayá? Ndegombre; y cbéyana, canya Bëngbe Bëtšabe juabna oyebuambnabiama más bëtšá. <sup>27</sup> Cha, Juan, endmëna ndabiama Bëngbe Bëtšá chabe uabemana palabrënguiñe tojanayana mo chabe ichmonacá, mëntšá tojánayana ora:

Cristo, atšbe entšá natsana sënjichmó acbiama chaóyebuambama,

entšanga jábuayenama aca jabama ainaniñe tšabe juabnégaca chamotseprontánama ca. <sup>28</sup> Ndegombre cbéyana: Nýets tempo entšángbeñe, ndocná quenátsmëna Juan chë Ubayanabiama más bëtšá; masque chca, Bëngbe Bëtšabe améndayoca chë más batšá uamaná, cha más bëtšá echántsemna ntšamo mora Juan yomnama ca” —Jesús tojánayana.

<sup>29</sup> “Nýetsca entšanga chca Juárezbioye tmojanóyenuanga y chë Romocama entšángbioye impuesto atjanayéngnaca, nýets ainánaca tmojánayana Bëngbe Bëtšá nýetsca soyënguñe tšabá amá yomna ca; er tmojánenabaye ntšamo jubáyama Juan yojanamancá. <sup>30</sup> Pero chë fariseunga y ley abuátambayënga, ntšamo jubáyama Juan yojanamancá jóyëngacñama ndoñe tmojanbošëna ora, tmojtšanaboté ndayá Bëngbe Bëtšá chëngbiamama jamama yojanjuabnacá.”

<sup>31</sup> Jesús mëntšánaca tojánayana: “Cbochanjáuyana ndayacá morsca entšanga imomna, y ndayëngcá chënga imomna. <sup>32</sup> Chënga mondmëna mo chë plazëngoca mondbetsetbiámama basetemëngcá; chëngna mëntšá jabuache jtsenatsayana: ‘Tšëngaftangbiamama fsënjaflautá y ndoñe chešmatslantsá; ngmënacá fsënjaversiá y ndoñe chešmatenóbošachna ca.’ <sup>33</sup> Juan chë Ubayaná tonjánabo y ndoñe quenjatamama bëtšcá entšángbeñe jtsemnana, ni tandëse jasana, ni vínoye jofšiyana; y tšëngaftanga š-montsichamo chana bacna bayëjbe juabna uambayá inamna ca. <sup>34</sup> Morna, chë Bëngbe Bëtšá Entšá tbojanbemá tonjabo y chana aíñe entsamana bëtšcá entšángbeñe jtseyayana y jtsofšëšnayana, y tšëngaftanga chabiamama šmontsichamo: ‘Chana yapa uasayá y vínoye tmoyá entsemna y Romocama entšángbioye impuesto atjanayënga y bacna soyënga amëngbe amigo ca’. <sup>35</sup> Pero Bëngbe Bëtšá endbëtsinýinýnaye cha nýets osertánana bomná yomnama, chë ndayá cha tojama ora ndayá chentšana inobocna soyëngaca ca” —cha tojánayana.

### Jesús, chë fariseo Simonbe yebnentšë

<sup>36</sup> Canýe fariseo Jesúsbioye tbojanofja saná juašama, y Jesús chabe yebnoye tojána y mesëshentšë yojótbema. <sup>37</sup> Chë pueblentšë yojamna canýe shembása, bacna vida bomná. Jesús chë fariseobe yebnentšë yojtsesama chë shembása yojátatšëmbona; as cha chë yebnoye tojánashjango y tojanamba canýe alabastro botellëše, jútjena canýe botamana uanguëtšë béjayeca. <sup>38</sup> Jesusbe shecuatšentšë yojoshëntsamentšiyë, šachénaca; shëchbuiyeca chabe shecuatšënga yojtsefcheacuacná y cachabe stjënashaca ibojtsatšshéchojuaye. Chabe shecuatšënga yojtonguëtšentšiyë y chë botamana uanguëtšë béjaye ibojtashëcbuëšcacia. <sup>39</sup> Chë fariseo Jesúsbioye ofjaná chca tojáninýe ora, mëntšá Jesusbiamama yojtsejuabnaye: “Cha ndegombre canýe Bëngbe Bëtšabe juabna oyebuambnayá tojtsemnëse, nantsetátšëmbo nda y mocna shembása yomna chë bontsebana shembása: canýe bacna vida bomna shembása ca.” <sup>40</sup> As Jesús chë

fariséobioye tbojanayana: —Simón, cuentado palabra šmotsoyeuná ca.

Y chë fariseo tbojanjuá: —Arseñor, Buatëmbayá ca.

<sup>41</sup> Y Jesús tojánayana: —Canýe entšá crocénana uyentšamianá, uta ndebénata yojánabamna. Canýa shachna patse denario crocénana ibojandebena, y chë ínýana, shachna bnëtsana. <sup>42</sup> Pero chë útata tondaye ibontsebomna ndayentšana cha jëtsëntšabuáchiyama; as chë uyentšamianá nýets útata chë ndebénana yojtsaperdónaye.

Chora chë fariséobioye tbojanayana: —Mora šmëyana, ¿chë útatentšana nda más chë uyentšami-anábioye buantsebobonshana ca?

<sup>43</sup> Y Simón tbojanjuá: —Atšë šontsinýana chë más bëtšcá ndebená ca.

Y Jesús tbojanayana: —Ndegombre, ntšamo endmëncá tcjayana ca.

<sup>44</sup> Jesús, chë shembásabioye jontješiyëse, Simónbioye tbojanayana: —Minýe quem shembása. Atšë acbe yebnoye sënjamashëngo y aca búyeshe ndoñe chešcatabuátšëtá atšbe shecuatšëngama. Y quem shembásana, cachabe shëchbuiyeca šontseshecjabebé y chabe stjënashaca šontseshecbojó. <sup>45</sup> Ndoñe chešcatámocho, pero cha tonjamashëngo orscana ndoñe ntjájbanana atšbe shecuatšënga onguëtšentšiyaye.

<sup>46</sup> “Aca bestšašiyë aceitiye ndoñe chešcatsbuešcja, y chana aíñe botamana uanguëtšë béjaye šonjashecbuešcja. <sup>47</sup> Chcasna atšë cbéyana, cha šonjinýanyé atšbiamama corente bonshánana yojtsebomna, er atšë chabe bëtšcá bacna soyënga sëntseboperdoná; pero nda nýe básefta bacna soyëngama stjaperdóna chana, nýe batšatema bonshánana jtsebomnana ca.”

<sup>48</sup> Y chora Jesús chë shembásabioye tbojanayana: “Acbe bacna soyëngama perdonaná contsemna ca.”

<sup>49</sup> Chora chë ofjanënga chentšë imnatbiámanëngna tmojanontšë enatsëtsnayana: “¿Nda quem entšá yojtsemna, chë bacna soyëngámncaca entšángbioye jt-saperdónayana ca?”

<sup>50</sup> Y Jesús más chë shembásabioye tbojanayana: “Aca átšbeñe icošbuachéyeca, atsbočaná cochántsemna; natjëmbana motsatoñe ca.”

### Chë Jesúsbioye imojanájabuachana shembásënga

**8** Chca tojanopasá chentšana, Jesús bëtš y base publënguëjana yojánana, tšabe noticiënga Bëngbe Bëtšabe améndayama entšanga abuátambaye y abuayinýaye. Chë bnëtsana uta uatsjëndayëngna cháftaca imojtsajna. <sup>2</sup> Básefta shembásëngnaca imojtsetjëmbambnaye; chëngbentšana Jesús bacna bayëjënga tojtanëbuacna y šocanëngama tojanashná. Chënga imojamna, María chë Magdalena ca uabobainá, ndábentšana Jesús canýsëfta bacna bayëjënga tojtanëbuacna; <sup>3</sup> Juana, Cuzbe shema (Cuza yojamna rey Heródesbe canýe uajabuachaná); Susana y inýe shembásënga; chëngna chë imojánbomna soyëngaca chëngbioye imojanájabuachana.

### Chë jenabe cuento

<sup>4</sup> Ba pueblënguentsana mallajta entsanga tmojánbocana Jesús jinýama. Ba entsanga jouenama tmojanobeconá ora, Jesús mëntšá tojanacuntá: <sup>5</sup> “Canýe, canýe jená jénaye jaujquëshama yojéftsebozna. Yojtsëjquëshaye orna, básefta jénaye benache juachañe yojuatquécjana; chiñna entsanga imojtsebotájaye, y jaja shloftšënga imojástjajna y imojtsósañe. <sup>6</sup> Inýe meshëngna ndëtsbenguiñe yojuatquécjana. Yojuábocna orna, betscó yojtsábojo, chë fshantsiñe ndoñe yapa búyeshe yonjamna causa. <sup>7</sup> Inýe meshëngna uchmëshangañe yojuatquécjana y chë uchmëshangá lempe yojtsatscué, chë jénayeca cánýiñe yojuábocna ora. <sup>8</sup> Inýe meshëngna, uanguaniñe yojuatquécjana. Yojuájua orna, bëtscá yojuashájona; canýe jénayentsana nýa mo patse meshënga yojuashájona.” Jesús chca jacuéntama tojanpochocá ora, tojanáyebuachena: “Chë jouenama tmojtsoebenënga, šmochjouena ca.”

### Ndáyeca Jesús cuenténgaca yojánabuatambaye

<sup>9</sup> As chora chabe uatsjéndayënga tmojantjá: —¿Ntšamo chë cuento yojtsayana ca?

<sup>10</sup> Y Jesús tojanéyana: —Bëngbe Bëtsá tšëngaftanga cmontsinýanýná nýetsca chë mo iytëmencá yomna soyënga chabe amëndayama, pero chë ínýengbioyna ndoñe; chë soyëngama chënga lempe cuenténgaca sentsëtsëtsná. Chca, masque corente chamotsafšna, ndoñe chamondobená Bëngbe Bëtsabe soyënga jinýama; y masque becá quem soyënga chamouena, ndoñe queochátësertana ca.

### Jesús chë jenabe cuentama tojanabuayená

<sup>11</sup> “Chë cuento mëntšá endayana: Chë jénaye Bëngbe Bëtsabe palabra entsemna. <sup>12</sup> Chë benache juachañe yojuatquécjana básefta jénaye endayana chë básefta entsanga Bëngbe Bëtsabiama soyënga tmojouenënga; pero chora Satanás betscó jabana chënga Bëngbe Bëtsabe palabra jabétsabuajuanama, chca, chënga ndoñe chamondëtsošbuáchema y bacna soyënguentsana ndatsebácanënga chamotsemnama. <sup>13</sup> Inýe entsanga mondmëna mo chë ndëtsbenguiñe yojuatquécjana jenaycá. Chë entsangna Bëngbe Bëtsabe palabra jouenana y oyejuayënga jtsemnana. Pero ndoñe nýets tempo chana jocochájuana; y chca, ndoñe baytë Bëngbe Bëtsáftaca ntjëftsemnëngana, cha ndoñe yapa tmontsašbuaché causa. Inýenga mochantsëbuayënja y Bëngbe Bëtsabeñe betsošbuáchiyama mochanjasúfrianga; chë causa, Bëngbe Bëtsabe palabra cachcá chënga mochanjesonýaye. <sup>14</sup> Inýe entsanga mondmëna mo chë uchmëshangañe yojuatquécjana jenaycá. Chëngna Bëngbe Bëtsabe palabra jouenana, pero quem luar-entša soyéngaca oyejuayënga jtsemnama yapa jesenójuabnayana, y mallajta crocénana y ba soyënga jtsebomnama yapa jésebošana; chama y ba soyëngama

yapa enócochinýena causa, Bëngbe Bëtsabe soyëngama echantsebnëtjomba y ndoñe quemochátama ntšamo Bëngbe Bëtsá tojayancá. <sup>15</sup> Inýe entsangna mondmëna mo chë uanguaniñe yojuatquécjana jenaycá. Chëngna Bëngbe Bëtsabe palabra botamana mochanjouena; tšabe ainánaca Bëngbe Bëtsabe palabriñe jtsošbuáchiyama jtseprontánëngana. Mo canýe betiye puerte tšabá tojtseshajuancá, chënga bëtscá tšabe soyënga Bëngbe Bëtsabiama mochántsama. Chca mochántsama, Bëngbe Bëtsabeñe jtsošbuáchiyëse y nýetsca soyënguiñe puerte uantadënga jtsemnëse ca” —Jesús tojanabuayená.

### Chë uajuinýanëshama cuento

<sup>16</sup> “Ndocná canýe uajuinýanëshama juajuinýenana, chentšana ndaye sóyeca chësha jtsëstama o jutsnëshatajsoye jtsajájua; juajuinýenana ndayá tsbanánoca juajájua, chë luarentše amashjuanëngbiama chaotsebinýnama. <sup>17</sup> Er ndocna yoyitëmëna soye, ntjinýcá queochaisoquëda, y chë entsangbiama ndótatšëmbo soye, ntsotatšëmbcá queochaisoquëda.

<sup>18</sup> “Chcasna, botamana šmochjouena, er nda Bëngbe Bëtsabe soyëngama tšabá tbojosertá, Bëngbe Bëtsá echanjama cha más ba soyëngama chabosertama; pero nda chë soyëngama ndoñe tontsebošá, chë nýe batšá ibosertana soyëngama bochantsebnatjëmba ca” —Jesús tojánayana.

### Chë Jesusbe ndegombre pamíllanguentsënga

<sup>19</sup> Chora, chabe mamá y chabe catšátanga chë Jesús yojtsemnentše tmojánashjajna, pero ndoñe imontsobena chábioye jobéconana, yapa entsanga causa. <sup>20</sup> As canýa Jesúsbioye mëntšá tbojanayana: —Acbe mamá y acbe catšátanga shjoca montsemna y montseboše aca jinýama ca.

<sup>21</sup> As Jesús tojánayana: —Chë Bëngbe Bëtsabe palabra tmojouenënga y ntšamo tmojouencá tmojt-samënga jtsemnana atšbe mamá y atšbe catšátanga, atšbe ndegombre pamíllanguentsënga ca.

### Jesús chë binýia y chë béjaye bonguana yojétsbema

<sup>22</sup> Canýe te, Jesús chabe uatsjéndayëngaftaca canýe barquëshoye tojánamashëngo y chënga tojanéyana: “Uafjónaye chenguana cuajna ca.”

As tmojána; <sup>23</sup> y imojtsenachnëjuanëntscuana Jesús yojtsomaná. Ndeolpe, chë béjayiñe corente jabuache binýia yojóshjango y yojontsé béjaye chë barquëshoye jtsobuajútjiana. Y chca, chëngbiama puerte resjo yojtsemna. <sup>24</sup> Chora chë uatsjéndayënga tmojána Jesús jetsefšenama y mëntšá tmojanayana: —¡Buatëmbayá! ¡Buatëmbayá! ¡Montsenatjëmbambana ca!

Chora Jesús tojantsbaná y chë binýia y chë bëts olëshëngoye tojanmandá: “Bonguana šochtsemna ca.” Y chë binýiayana tojanéjbana y lempe bonguana yojtsatsmëna.

<sup>25</sup> Chentšana Jesús chabe uatsjéndayënga tojanéyana: —¿Bëngbe Bëtsá tšëngaftanga ju-

jabuáchama yobenama, cabá ndoñe šmontsošbuaché ca?

Y chënga auatjanánënga y ojnánánënga mëntšá imojtsenatsëtsnaye: —¿Nda quem boyabása yomna? ¡Cha tojamandá ora, masque chë binÿia y chë béjay-naca joyeunayana ca!

### Chë Gerasa luaroca bacna bayëja uambayá

<sup>26</sup> Chentšana Gerasa ca uabaina luaroye tmojánash-jajna, Galilea ndirichiñe. <sup>27</sup> Jesús fshantsoye tojánast-jango ora, chë pueblcana canÿe entšá chábioye to-jánabo. Cha ya bayté bayëjbe juabna yojtsebomna, ndocna entšáyá yonjanichëtjona; y yebniñe ndoñe yonjaniyena, sinó obanëngbe cuevëshënguenache. <sup>28</sup> Chë entšá, Jesúsbioye tbojáninÿe ora, chabe nat-sanoica yojoshëntsamentšiyë y mëntšá yojtsáye-buache: —¿Ndayá átšeftaca cojtseboše, Jesús chë celo-ca Bëngbe Bëtsabe Uaquiñá? ¡Diosmanda ndoñe šcat-jatsetšená ca!

<sup>29</sup> Chca tbojaniyana, er Jesús tojanmandá chë bacna bayëjbe juabna chábentšana chauesebocnama. Ba soye chë bayëja yojánama chë entšá ndoñe tšabá chaotsemnama. Chë entšanga imojuamana cucuat-šentšana y shecuatšentšana cha jtsëtsbuayana bonguana chaotsemnama, pero chana jtsatabebiana, y chë bacna bayëjbe mándoca entšanga ndoyena lu-arëngoye yojánachana. <sup>30</sup> Jesús chë boyabásabioye tbojantjá: —¿Ntšamo cabaina ca?

Y cha tbojanjuá: —Atše sënduabaina Legión ca.

Cha chca tojánayana, er chábeñe ba bacna bayëjën-ga tmojánamashjna. <sup>31</sup> Y chë bayëjënga Jesús tmojan-impadá, chë corente uabouana tboye ndoñe chaondíchamuama. <sup>32</sup> Chentša béconana ba cotšënga imnajena, tjoca imnëtsošañe; as chë bayëjënga Jesús tmojanimpadá chë cotšëngbeñe jamashjnama chualesenciama, y Jesús aíñe chca tojanalesenciá. <sup>33</sup> As chë bayëjënga chë entšábentšana tmojésanbo-cana y chë cotšëngbeñe tmojánamashjna; y chentšana, chë cotšënga batsjocana peñëšëjana uafja-jónayoye imojtsoshbuetše y yojtsatajo.

<sup>34</sup> Chë cotšënga anÿenënga chca yojopásama tmo-jáninÿe ora, chentšana tmojtsanacheta y tmojána chë soye jacuéntama chë pueblca y chiñe luarenache.

<sup>35</sup> Entšanga tmojánbocana ndayá tojanopasacá jinÿa-ma, y Jesús yojtsemnoye tmojánashjajna ora, tmoján-inÿe chë entšá chë ndábentšana bayëjënga tmojtan-bocna, Jesusbe shecuatšentše yojtsótbemañe, entšáyá uichëtjoná y chabe nÿets juábnaca. Y chë entšanga chama corente imojouatjaná. <sup>36</sup> Ntšamo yojopasacá tmojáninÿëngna entšángbioye tmojanacuntá ntšamo chca chë bacna bayëjbe juabna uambayá chora ya tšabá yojtsatsmëmana. <sup>37</sup> Chentšana, nÿetscanga chë Gerasa luarentše oyenënga Jesúsbioye imojtseim-padana chë luarentšana inÿoye chaotsoñama, er chënga corente imojtsauatja. As Jesús chë barquëshoye toj-tanamáshëngo y chentšana tojtsanoñe. <sup>38</sup> Chë entšá chë ndábentšana bacna bayëjënga tmojtanbocana, Jesúsbioye tbojanimpadá cháftaca jama chabolesen-

ciama; pero cha ndoñe tbonjanlesenciá. Jesús tbojan-mandá chauatoquedama y mëntšá tbojaniyana:

<sup>39</sup> “Acbe yebnoye motsatoñe y cochjácuntaye lempe ntšamo Bëngbe Bëtsá acbiama tojamcá ca.”

Chentšana chë boyabása yojtsatoñe, y nÿets pueblë-jana tojanacuntá ntšamo Jesús chabiamama tojanmcá

### Jesús canÿe shembásabioye tbojanshná y tojanma Jairëbe bembetema cháuatayenama

<sup>40</sup> Jesús chë uafjajónaye chenguánoica tojtanashjan-go ora, nÿetsca entšanga oyejuayënga tmojtanofja, er nÿetscanga chabiamama imojanobátmana. <sup>41</sup> Chora tojá-nashjango canÿe entšá, Jairo ca uabainá. Cha inamna chë pueblentše chë judiëngbe enefjuana yebnentša mandayá. Jesusbe shecuatšentše yojoshëntsamentšiyë y ibojtseimpadana chabe yebnoye cháuama; <sup>42</sup> er chë nÿe canÿe bembe cha ibnabomná, bnëtsana uta uata bomná, chora ya jóbanama yojtsemna.

Y Jesús yojtsayëntscuana, chë entšanga chábioye imojtsojuatsëntšenaye. <sup>43</sup> Chë entšanguentše yojtsaye canÿe shembása, oboftjajuanánaca šocá; cha ya bnët-sana uta uata chca inapadecena. Lempe ntšamo yo-janbomncá ashnayëngbioye atóbocayíñe yojtsepochó-ca, y ndocná yonjobenaye cha jáshnana. <sup>44</sup> Chë shem-básana stëtšoicana Jesúsbioye yojobeconá y chabe entšáyá sibuájua tojanábojajo. Y cachora chë oboftja-juanana ibojtsobojuána. <sup>45</sup> Chora Jesús tojanatjá: —¿Nda šjabojajo ca?

Nÿetscanga imojtsichamo ndoñe ca; as Pedro tojáj-nayana: —Buatëmbayá, entšanga cmontsatsëntšená y cmontsayájuatsëntšenaye ca.

<sup>46</sup> Pero Jesús cachiñe tojánayana: —Pronto nda šo-jábojajo, er atše sënjasenté obenana átšbentšana jóbocnana, mo nda stjashna orcá ca.

<sup>47</sup> Chë shembása tojáninÿe Jesús yojtsetátšëmbo cha tbojánbojajuama. As chora, ngmëmnyá tojána y Je-susbe shecuatšentše yojoshëntsamentšiyë; y nÿetscangbe delante tojanobuambá, ndáyeca tboján-bojajuama, y ntšamo cachora tšabá tojtanoquedama. <sup>48</sup> Chora Jesús tbojaniyana: —Bembe. Bëngbe Bët-sábeñe icošbuachéyeca shnaná contsatsmëna. Natjëmbana motsatoñe ca.

<sup>49</sup> Jesús cabá yojtsóyebuambnantscuana, chë judiëngbe enefjuana yebnentša mandayábocana canÿa tojánashjango, y chë mandayábioye tbo-janiyana: —Acbe bembe ya tontsóbana; ndoñe más chë Buatëmbayábioye matébëyabomana ca.

<sup>50</sup> Pero Jesús chë soye tojanuena; as chë man-dayábioye tbojaniyana: —Ndoñe matauatjana. Nÿe Bëngbe Bëtsábeñe cochtsošbuáchiye y acbe bembe tšabá echántatsmëna ca.

<sup>51</sup> Chë yebnoye tmojánashjajna ora, Jesús ndoñe ton-janalesenciá banga choye jamashjnama, nÿe Pedro, Juan y Santiago y chë shembásetembe bëtsëtsatna aíñe. <sup>52</sup> Nÿetscanga imojtsenóbošachiye y ngmënaca imojtsóyebuambnaye, pero Jesús tojanéyana: “Ndoñe matenóbošachengana. Cha ndoñe chenatóbana; cha nÿe endëtsomañe ca.”

<sup>53</sup> Chë entsanga Jesúsbiöye nÿe imojtsáfchaye, er chënga imojtsetátšëmbo chë shembásetema obaná yojtsemnana. <sup>54</sup> Chora Jesús chábíoye tbojanábuacueshache y jabuache tbojaníyana: “¡Shembásetema, matëtsbaná ca!”

<sup>55</sup> Y cha tojtanayena y cachora tojtantsbaná; y Jesús tojanamëndá chë shembásetema saná chamuajuatšé, chaosama. <sup>56</sup> Chë shembásetembe bëtsétsata puerte ojnánata ibojtsemna; y Jesús tojanamëndá, ndayá tojanopasama ndocnábeñe ntsecuéntayana.

### Jesús, chabe uatsjédayënga tojanichamó, Bëngbe Bëtsabe améndayama jábuayenama

**9** Chentšana, Jesús chabe bnëtsana uta uatsjédayënga tojánachembo, y mando y obenana tojanatšatá bacna bayëjënga entsángbentsana jtëbuacanama y šocanëngama jashnayama. <sup>2</sup> Tojanichamó Bëngbe Bëtsabe améndayama jábuayenama y entsángbiöye jashnayama. <sup>3</sup> Y mëntšá tojanéyana: “Benachiñama tondaye šmattsambaye: ni jatjonëfja, ni shecnaja, ni saná, ni crocénana; ni inÿe entséjua jenotrócama cach ndoñe. <sup>4</sup> Canÿe yebnentše posada chacmojúyentsame ora, chentše šmochjoquéda inÿe pueblöye játantscuana. <sup>5</sup> Nderado ndayentše posada ndoñe chacmonjuyentsame, chentšana šmochjésebo-cana y shecuatšentša polvëshe šmochjésentoto, chca, chëngbiöye jinÿanÿiyama chënga ndoñe tšabá tšëngaftangataca tmonjamama ca” —Jesús tojanabuayená.

<sup>6</sup> Asna chë uatsjédayënga tmojëftsanbocana y tmojána, nÿetsca chë base pueblotëmënguenache chë tšabe noticiënga abuayinyaye y entsanga šocanëngama áshnaye.

### Herodes y Jesús

<sup>7</sup> Jesusbiam y ntšamo yojtšanopasánama rey Herodes tojántatšëmbona; y ndoñe yontsetátšëmbo ntšamo jtsejuabnayana, er báseftanga imojtsanichamo Juan chë Ubayaná obanënguentsana tojtanayena ca, <sup>8</sup> inÿënga imojtsanichamo chë Bëngbe Bëtsabe juabna oyebuambnayá Elías cachiñe tojانبocna ca, y inÿëngna canÿa chë tempo imojanmëna Bëngbe Bëtsabe juabna oyebuambnayënguentsá obanënguentsana tojtanayena ca. <sup>9</sup> Pero Heródesna tojánayana: “Cach atše sënjanmandá Juanbe bestšaše chamotséstjanguama. ¿As, nda cha nántsemna, chë ndabiam chca soyënga jtsóyebuambnayana sentsuenana ca?”

Chíyeca Herodes yojtseguaye ntšamo jamëse Jesús jinÿama.

### Jesús shachna uaranga boyabásenga saná tojanacaredadó

<sup>10</sup> Chë Jesús tojánichamonga chábíoye tmojtanashjango ora, lempe ntšamo chënga tmojanmama tmojancuentá. Y Jesús, nÿe chënga jëftsëbiatšese inÿoye tojtanoñe, Betsaida ca uabaina pueblöye. <sup>11</sup> Pero chë

entsanga chë soye tmojántatšëmbona, y as tmojanasto; y Jesusna tšabá chënga tojanëbuaja, y Bëngbe Bëtsabe améndayama yojtseštsenaye, y chë šoquënga imojtsemnëngbiöye tojanashná.

<sup>12</sup> Ya jetiñe yojtsoyamná orna, chë bnëtsana uta uatsjédayënga Jesúsbiöye tmojanobeconá y mëntšá tmojaníyana: —Chë entsanga cuantichamuá, jóchnama y saná jonguangoñama chamotsama chë béconana pueblotëmënguenache y luarënguenache; er quem luariñe ndocná quenatíyena ca.

<sup>13</sup> Jesús chora tojanéyana: —Tšëngaftanga saná chëngbiöye šmochjacaredádaye ca.

Pero chënga tmojanjuá: —Nÿe shachna tandëse y uta beónata fsëntsebomna; nÿetscangbiama saná jabuámíyama nderado nda tojasna, aíñe cuanjacaredádaye ca.

<sup>14</sup> Er mo shachna uaranga boyabásenga imnamna. Pero Jesusna chabe uatsjédayënga tojanéyana: —Mamëndá nÿetscanga chamotbiamama shachna bnëtsátsanënga ca.

<sup>15</sup> As chënga chca tmojanma y nÿetsca entsanga tmojanotbiama. <sup>16</sup> Chora, Jesús chë shachna tandëse y chë uta beónata tojanca, y celoye tojanontješé, Bëngbe Bëtsábíoye chama tbojtanchuá, tojanjatá y chabe uatsjédayënga tojanantregá entsángbiöye chamuatšatama. <sup>17</sup> Nÿetsca entsanga tmojanse jtoshachaye nÿetšá, y cabá bnëtsana uta sbarëco tmojanajutjé chë ojamnëtmëngaca.

### Pedro tojánayana, Jesús chë Cristo bëtsemnana

<sup>18</sup> Canÿe te, Jesús canÿa Bëngbe Bëtsáftaca ibojtsencuëntaye ora, chabe uatsjédayënga cháftaca imojtsemna. Chora tojanatjá: —¿Nda atše bëtsemnana entsanga imojtsichamo ca?

<sup>19</sup> Y chënga tmojanjuá: —Báseftanga montsichamo Juan ca, inÿëngna Elías ca, y inÿëngna canÿe Bëngbe Bëtsabe juabna oyebuambnayá tempscá mora tojtayena ca.

<sup>20</sup> As Jesús tojanatjá: —Y tšëngaftangna, ¿nda atše bëtsemnana ntšamo šmochjayana ca?

Y Pedro tbojanjuá: —Acna chë Cristo condmëna, chë Bëngbe Bëtsabe Uámana Uabuayaná ca.

### Jesús tojánayana cha ibojamna jóbanana y jtayenana

<sup>21</sup> Pero Jesús corente chënga tojanamëndá ndocnábeñe chama ntsecuéntayana. <sup>22</sup> Y mëntšá cachabiam tojánayana: —Chë Bëngbe Bëtsá Entšá tbojanbemá bontsemna puerte jasúfriana, chë judiëngbeñe bëtsëjemëngcá améndayëngbiama, chë judiëngbe bachnangbe más uámana améndayëngbiama y ley abuatambayëngbiama uabotená jtsemnana. Entšanga mochanjóba, pero unga tianoye cha echántayena ca.

<sup>23</sup> Chentšana nÿetsca entsanga tojanéyana: “Nda atšbe uatsjédayá jtsemnana tojtseboše, cháuyana nÿe Bëngbe Bëtsá yobena sempre chabe vidiñe jtsemándayama, chabe quem luarentša soyënga cachcá chauesonÿá atše juastama, y cada te chaotseprontana

átšbeyeca jasúfriama, y cruciñe jobanámnaca. <sup>24</sup> Nda tojtsama quem luarentše bētsca soyēnga jtsebmoma y atšbiama jasúfriama ndoñe tontseprontana, chē nyetsca tescama yomna tšabe vida echanjobuetše. Pero nda quem luarentša soyēnga cachcá tojēftsonyá atše juastama, masque chaóbana, chē nyetsca tescama yomna tšabe vida echántsebmoma. <sup>25</sup> Er ¿ndayama entšá buanjóservia nyetsca quem luarentša soyēnga jtsebmomana, cha pochocaná jtsemnama tojtsá y chē nyetsca tescama yomna tšabe vida tojtsoperdese? <sup>26</sup> Er ndēmuanye entšá, atšbiama o atšbe buayenana soyēngama tojtsēuatja, chē Bēngbe Bētsá Entšá tbojanbemánaca chabiama echantsēuatja, cha chabe bēts buashinñinñaniñe chaojésabo ora, chabe Taitabe bēts obenánaca y chabe angelotémēngaftaca adoraná. <sup>27</sup> Ndegombre cbéyana, báseftanga muentše montsemnēnga quemochatóbana, Bēngbe Bētsá chabe obenánaca entšangbeñe jabomándama jabana ntjēftsinyá ca” —cha tojánayana.

### Jesús inyetšá tojanobinñá

<sup>28</sup> Mēntšá tojanopasá: Chca palabrēnga tojanoyebuambá chentšana posuftaytese, Jesús tojēftsanēbiatše Pedro, Santiago y Juan, y canye tjoye tojántsjua, Bēngbe Bētsáftaca jencuéntama. <sup>29</sup> Bēngbe Bētsáftaca ibojtsencuéntantscuana, chabe jubíá inyetšá yojtsinñana, y chabe uichētjonējuangá tša uafjantsējuangá yojtsamna y tša yojtsabuashinñinñana. <sup>30</sup> Chora uta boyabásata tbojanonñá, Jesúseftaca ibojtsencuéntaye. Chata ibojamna Moisés y Elías; <sup>31</sup> corente buashinñinñaniñe ibojtsemna, y chēnga imojtsencuéntaye ntšamo Jesús Jerusalenoca jasúfriana y jóbana. <sup>32</sup> Masque Pedro y chabe enutata tša ocnayēnga imojtsemna, nye imojtsefšna y tmojáninñe Jesusbe juachañe tša yojtsebuashinñinñana y chē uta boyabásata cháftaca ibojtsemna. <sup>33</sup> Chē uta boyabásata Jesúsbentšana ibojoluára ora, Pedro, Jesúsbioye tbojaniana: “Buatēmbayá, itša tšabá bēngbiama cuanmēna muentše jtsemnana ca! Mora fchanjapórma unga tambotémēnga: cányetema acbiama, inyetema Moisesbiama y inyetemna Elíasbiama ca.”

Pero Pedro ndoñe yontsetátšēmo ntšamo yojt-sichámuama. <sup>34</sup> Y chca yojtsóyebuambnantscuana, canye jantšetēshe yojóbema, y chēngbioye yojáutsbotse, y chēnga chē tsoye imojtsemnama tmojáninñe ora, chē uatsjéndayēnga chama imojtsauatja. <sup>35</sup> Chora chē jantšetēshoicana canye oyebuambnayana tojanóbocna, mēntšá: “Mua atšbe Uaquiñá endmēna, atšbe uabuayaná; cha šmochtseyeunana ca.”

<sup>36</sup> Chē oyebuambnayana tmojanuenentšana, tmojáninñe Jesús canya yojtsemna. Chē uatsjéndayēnga iytēca imojtsemna, y chē tempo ndocnábioye chama imonjuenaye.

### Jesús, canye basa bacna bayējbe juabna uambayábioye tbojanshná

<sup>37</sup> Yēfsana, chē tjocana tmojtantsmá ora, ba entšana tmojánbocana Jesús jajēbenguama. <sup>38</sup> Chora, chē entšanguentšana canye boyabása tojanontšé mēntšá uayebuáchana: —Buatēmbayá, Diosmanda atšbe uaquiñá minye. Nye cha atšbe uaquiñá endmēna; <sup>39</sup> y mora, bayējbe juabna chábioye bontsēsháchichana, y nye ndeolpe jóntšana yoyana, ataque joshachana y uayoicana shashiye jtsabocanana. Y chábentšana chē bayēja ndoñe betesco ntjēsebocnana, y cuerpiñe corente maltrataná jeseboshjonana. <sup>40</sup> Acbe uatsjéndayēnga sēnjaimpadá chē bayēja chábentšana chamu-atábocnama, pero ndoñe chematobená ca.

<sup>41</sup> As Jesús tojánayana: —iNyetsá ndošbuáchiyēnga y bacna entšanga! ¿Buetayté šojtsemna tšēngaftangaftaca jēftsemnana y jtsēuantánana ca?

Chora chē boyabásabioye tbojaniana: —Moye chē uaquiñá mánatse ca.

<sup>42</sup> Chē basa yojtsebeconá ora, chē bacna bayēja chábioye tbojanshajayé y inye ataque tbojanēshache. Pero Jesús chē bayējbioye tbojanácacana, chē basetēmbioye tbojanshná y chabe taitábioye tbojtantēntregá. <sup>43</sup> Y nyetscanga puerte ojanánēnga imojtsemna, Bēngbe Bētsá tša obenana bomná inamnana.

### Jesús cachiñe tojánayana cha ibojamna jóbana y jtayenana ca

Nyetsca entšanga, ndayá Jesús yojtsamama ojanánēnga imojtsemnēntscuana, chabe uatsjéndayēnga cha tojanéyana: <sup>44</sup> “Quem soye tšabá šmochjouena y ndoñe chacmondébnētjomba: Chē Bēngbe Bētsá Entšá tbojanbemá entšangbe cucuatšine mochanjáboshjona ca.”

<sup>45</sup> Pero chēnga ndoñe yontsósertana ntšamo Jesús yojtsētsētsnacá, er Bēngbe Bētsá ndoñe tonjanalesenciá chama chaósertama; y imojtsauatja Jesús jaimpádana chama chauabuayenama.

### ¿Nda chē más uamaná yomna?

<sup>46</sup> Chē tempo, chē uatsjéndayēnga tmojanontšé enatsētsnayana, nda chē más uamaná bētsemnana.

<sup>47</sup> Jesús yojtsetátšēmo ntšamo chēnga imojtsejuabnayama; asna, canye bássetema tbojánishache, chabe juachaca tbojántbema, <sup>48</sup> y chēngbioye tojanéyana: “Nda átšbeñe ošbuachiyá bētsemnana, quem basetēmbioye tbojofja, chana atše jofjana; y nda atše šojofja, chana chē nda šojichmó chábioynaca jofjana. Chiyeca, tšēngaftanguentše chē más nduamaná, cha chē más uamaná entsemna ca.”

### Nda bēngbe contra ndoñe tontsemná, bēngaftaca jtsemnana

<sup>49</sup> Juan, Jesúsbioye tbojaniana: —Buatēmbayá, bēnga fsēnjinñe canye boyabása y cha aca jótšēmbonēse,

entsángbentšana bacna bayějbe juabna endëtëbua-cana; pero cha béngaftaca ndoñe quenátsmëna causa, chama fsënjesauyaná ca.

<sup>50</sup> As Jesús tbojanjuá: —Ndoñe šmatjuauyaná; er nda bēngbe contra ndoñe tontsemná, béngaftaca jtsemnana ca.

### Santiago y Juánbioye Jesús tojanëcácana

<sup>51</sup> Jesús celoye jtama yojtsobeco ora, nyets añémoca cha yojtsejuabnaye Jerusalenoye jama. <sup>52</sup> Natsana báseftanga tojanichamó, y chēnga tmojána canye base pueblotémoye Samaria luaroca, posada chabiama janguangoñama; <sup>53</sup> pero chē luarentša entsānga ndoñe tmonjánbošena posada juantsāmiana, er tmojántatšëmbona cha Jerusalenoye yojétsayama, chē chēngbe uayayēngbe uámana puebloye. <sup>54</sup> Chabe uatšjédayata, Santiago y Juan, chē soye tbojáninye ora, Jesús tmojaniana: “Bēngbe Utabná, ¿quectseboše bēndata fchaimandá celocana íñeshe chaótsatše y quem entsānga chaotsapochócaye ca?”

<sup>55</sup> Pero Jesús yojobuértana y chátbioye tojtsanëcácana, chca juabna bomna causa. <sup>56</sup> Chentšana chēnga inye pueblotémoye tmojtsanoñe.

### Chē Jesús juastama bošēnga

<sup>57</sup> Benachējana imojtsajna ora, canye boyabása Jesúsbioye tbojaniana: —Atšbe Utabná, atše sēntseboše aca juastana ndémoye chacojtsá choye ca.

<sup>58</sup> Y Jesús tbojanjuá: —Chē zorrēnga cuevēshēnga mondbomna ndayentše jtsiyenama y chē shloftšētémēngna uajajonēshangá; pero chē Bēngbe Bētsá Entšá tbojanbemá ndoñe quenátsbomna ndayentše jóchnama ca.

<sup>59</sup> Jesús inye entsábioye tbojaniana: —Šmasto ca.

Pero cha tbojanjuá: —Atšbe Utabná, šmolesenciá atšbe taitá chjshesabotbontsañe ca.

<sup>60</sup> As Jesús tbojaniana: —Chē Bēngbe Bētsabiama mo obanēngcá imomnēnga, ntšamo Bēngbe Bētsá yomandacá ndoñe tmontsama causa, chēnga cachēngbe obanēnga chamotsétebuantsañe. Acna, motsa y Bēngbe Bētsabe amēndayama entsānga cochjabuayená ca.

<sup>61</sup> Inyana Jesúsbioye tbojaniana: —Atšbe Utabná, atše sēntseboše aca juastama, pero šmolesenciá natsana atšbe pamíllangbiama jaisodiósoftama ca.

<sup>62</sup> As Jesús tbojaniana: —Nda cachabe soyēngama tbojtsengmena, Bēngbe Bētsabe amēndayocama ndoñe ntoservénana; er cha jtsemnana mo canye arayacá, chē tojtsetrabája ora, stētsoye tojtsaisantješná ca.

### Jesús canysēfta bnétsana y uta entsānga tojanichamó Bēngbe Bētsabe soyēngama jábuayenama

**10** Chē soyēnga chentšana, Bēngbe Utabná Jesús inye canysēfta bnétsana y úatnaca tojanabacacá, y utáta chabe natsana tojanichamó, chē cha ibotsemna jama pueblēngoye y luarēngoye.

<sup>2</sup> Mēntšá chēnga tojanéyana: “Canye bēts jajañe bētscá játbanama entsemna, pero peonga báseftanga; chíyeca, chentša nduíñbioye jaimpádana ba peonga chauichamó chē jaja saná játbanama. Cachcá, quem luarentše bētscá entsānga montsemna Bēngbe Bētsábioye nduabuátmēnga, y chēngbioye chabiama abuayinayēnga nye báseftanga. Chíyeca, Bēngbe Bētsá moimpadanga ba abuayinayēnga chauichamó quem entsānga chábioye júbuajama. <sup>3</sup> Motsajna; š-mochjinye, atše tšēngaftanga cbontsichamná mo oveshēnga cuenta, tjañe quešēngbeñe. <sup>4</sup> Ndoñe š-mattsambaye shecnaja, ni crocénana šmattsaiuábuenana, ni shecochētjonēshe; y nda chacmojacheuá ora, ndoñe yapa bēn chentše šmatjáisenobiamnaye.

<sup>5</sup> “Ndaye yebnentše chašmojámarshjna ora, natsana šmochjayana: ‘Lempe tšabá quem yebnentše chaotsomñe ca’. <sup>6</sup> Y chē yebnentše chca juabna bomna entsānga tmomnēsna, chē tšabiana ndegombre chentše echántsemna; pero ndóñese, chca tšabiana chentše ndoñe queochátsmēna. <sup>7</sup> Canye yebnentše š-mochjoquéda, y šmochjase y šmochjofšiyē ntšamo chentše chacmojacaredadaycá; er chē trabajayá mercedo jtsebuájonana chca juácanama. Canye pueblentše nye inye y inye yebnēnguenache ndoñe matajnana.

<sup>8</sup> “Ndaye pueblentše chašmojámarshjna y tšabá chacmojúbuajentše, šmochjase ntšamo chentše chacmojacaredadaycá; <sup>9</sup> chentša šoquēnga šmochjashnaye y šmochjáuyana: ‘Bēngbe Bētsabe amēndayana tšēngaftangbeñe entsemna ca’. <sup>10</sup> Pero canye pueblentše chašmojáshjango y ndoñe chacmonjúbuaja, chentša tsashenangoye šmochjábocana y mēntšá šmochjayana: <sup>11</sup> ‘¡Chē tšēngaftangbe pueblentša polvēshe, chē bēngbe shecuatšēnguiñe tojuanjēshe, camuentše fšcuesenstētoná, chca, tšēngaftanga chašmotsetatšēmbuama ndoñe tšabá šmonjamama! Pero masque chca, šmochtsetatšēmbo chē Bēngbe Bētsabe amēndayana tšēngaftangbeñe entsemnama ca.’ <sup>12</sup> Ndegombre cbéyana, quem luare jopochócama te, chē luarentša entsāngbioye Bēngbe Bētsá puerte jabuache echantsacastígaye, y Sodoma puebloca bacna entsāngbioye ndoñe nya nyetšá jabuache ca” —Jesús tojánayana.

### Chē nduauenana entsānga

<sup>13</sup> “¡Tša lastema Corazín puebloca entsāngbiama! ¡Tša lastema Betsaida puebloca entsāngbiama! Er chē muentše Bēngbe Bētsabe obenánaca sēnjama soyēnga, chē bēts pueblēnga Tiro y Sidonoca chca matēnjochnēnguse, chentša bacna entsānga ya tempo chēngbe bacna soyēngama ngménaca matmēntenójuabonga y Bēngbe Bētsabe benache matmēntishache, y chca tmojamama chaotsótatšēmbuama, uajojēsha entsāyangaca matmēntopormanga y jatinyashiñe matmēnjotbiama. <sup>14</sup> Pero ntšamo entsānga tmojamama, tšabá o ndoñe tšabá bētsemnama jayanama chaojobuache ora, tšēngaftanga más bēts castigo šmochántsebmoma, chē Tiro y Sidonoca bacna entsāngbe castiguama. <sup>15</sup> Y tšēngaftanga, Capernaum

pueblentša entsānga, ¿celóntscoca atsebánanēnga š-mochtsemna ca šmojtsejuabnanga? ¡Chē uabouana in-fierno ye cmochantséssetjango!

<sup>16</sup> “Nda tšēngaftanga tcmojoyauná, chana atše joyeunayana; y nda tšēngaftanga tcmojtsēbaté, chana atše jtsabotena; y nda atše šojtsaboté, chana chē nda šojichmó chábioye jtsabotena.”

### Chē canýsēfta bnétsana y uta entsānga tmojtānashajna

<sup>17</sup> Chē canýsēfta bnétsana y útatna Jesús yojtsemnoye tmojtānashajna, puerte oyejuayēnga; y chábioye mēntšá tmojaniyana: —¡Bēngbe Utabná, aca jótšēmbonēse, chē bacna bayējēngnaca šonjoyauná ca!

<sup>18</sup> Y Jesús tojanéyana: —Ndegombre. Y tšēngaftanga Satanásbioye chca šmontseyējaná ora, entsemna mo Satanás celocana canýe tcuinýcá jtsotsatšana stjinyá.

<sup>19</sup> Atšna obenana tcbonjatsatá mētscuayēnga y alacranēngbeñe chašmotsajnama, y bēngbe uayayá Satanasbe nyets obenana jáyējanama, tšēngaftanga ndocá ntjapasacá. <sup>20</sup> Pero móyejuanga, ndoñe chē bacna bayējēnga chacmóyaunama obenana šmojtsebonnama, sinó tšēngaftangbe uabaina celoca ya yojtsábe-manama, er tšēngaftanga chē nyetsca tescama yomna tšabe vida šmochántsebonna ca —cha tojanéyana.

### Jesús puerte tojanoyejuá

<sup>21</sup> Chora Jesús, chē Uámana Espíritbeyeca, corente oyejuayá tojánayana: “Atše cbatschuá, Taita, celoca y quem luarentša Utabná. Aca, chē nye batšá tatsēm-bēnga tconjanýanyé, chē tša tatsēm-bēnga y os-ertánēngbiama tcojaiytēme soyēnga. Aíñe, chama cbontsadorana, Taita, aca chca chaotsemnama tcojábosenayeca.

<sup>22</sup> “Atšbe Taitá lempe chca šonjatšetá. Chē Uaquiñábioye ndocná corente quebnatábuatma; nye chē Taitá aíñe. Y chē Taitábioye ndocná corente quebnatábuatma; nye chē Uaquiñá aíñe, y ndémuanýēngbioye chē Uaquiñá tojtseboše nda chē Taitá yomnama jinýanyiyama, chēngnaca chē Taitábioye mochantsábuatma ca.”

<sup>23</sup> Chentšana, Jesús chabe uatsjédayēngbioye tojanobuértana y nye chēngbioye tojanéyana: “¡Puerte oyejuayēnga chē ntšamo tšēngaftanga šmontsonýacá jinýama tmojtsobenēnga! <sup>24</sup> Er atše cbéyana, banga Bēngbe Bētsabe juabna oyebuambnayēnga y reyēnga tmojánbošena chē tšēngaftanga šmontsonýá soyēnga jinýana, pero ndoñe tmonjáninye; y tmojánbošena chē šmontsuenana soyēnga jouenana, pero ndoñe tmonjanuena ca” —cha tojánayana.

### Chē Samarioca tšabe entsábiamma cuento

<sup>25</sup> Canýe judiēngbe ley abuatambayá yojontšé Jesúseftaca jóyebuambayama, y jisháchichiyamna mēntšá tbojantjá: —Buatēmbayá, ¿ndayá šojtsemna jamana chē nyetsca tescama yomna tšabe vida jtsebonnama ca?

<sup>26</sup> Y Jesús tbojanjuá: —¿Ntšamo leyiñe iuábemana? ¿Ndayá chiñe condbétsaliaye ca?

<sup>27</sup> Chē ley abuatambayá tbojanjuá: —“Chē Utabná Bēngbe Bētsá cochtsebobonshana nyets ainánaca, nyets espírituca, nyets añémoca y nyets juábnaca”; y “ndēmua entsánaca cochtsebobonshana, ntšamo cachaca cuenobobonshancá ca.”

<sup>28</sup> Chora Jesús tbojaniyana: —Tšabá šconjojuá. Chca cochtsama y chē nyetsca tescama yomna tšabe vida cochántsebonna ca.

<sup>29</sup> Pero chē ley abuatambayá tšabá jenoquédamna Jesúsbioye tbojantjá: —Y ¿ndase chē ndēmua entsánaca yomna ca?

<sup>30</sup> As Jesús tbojanjuá: —Canýe, Jerusalenocana Jericó benache canýe entsá yojtsetsmá, y básefta salteadorēnga imojébēbocna. Lempe imojtsefca, chē entsáyánaca; imojtsejantšetaye y chentšana imojtsatóñēnga, y chē entsá batšá obaná imojéseboshjona.

<sup>31</sup> Ndeolpe, chē benachējana canýe judiēngbe bachna yojtsachnějuana. Chē entsábioye ibojinye ora, nye chabuacá yojtsēchnēnguañe. <sup>32</sup> Cachcá, canýe Levita, chē canýe Bēngbe Bētsabe bēts yebnoca trabajayá chējana yojtsachnějuana; y chē entsábioye ibojinye orna, nye chabuacá yojtsēchnēnguañe.

<sup>33</sup> “Chorna, cach benachējana canýe samaritano inábioye. Chē entsábioye ibojinye orna, ibojóngmia.

<sup>34</sup> Chábioye vojbeconá, aceitiye y vinoyeca ibojáshna, y lisianēnguiñe entséjuaca ibojuantsacjuá. Chabe couayiñe ibojétsenjajiyē, canýe yebnoye posada uyentsámianoye ibojuánatse, y chentše chábioye ibojétsinyena. <sup>35</sup> Yēfsana, chē samaritano uta denario crocénana yojenóbojatsēca, chē mo uta tesca trabajuama crocénana nyetsá, y chē posada nduíñbioye ibojesabuenaye, y mēntšá ibojauyana: ‘Quem boyabása cochtsinyena, y nderado más crocénana muabiama chacojenábojafjonasna, mējana chaitísachnějuana ora, cbochjabáisabuenaye ca.’ <sup>36</sup> Y chcasna, ¿chē unganguentšana nda cmojtsinyana chē entsábiamma yojtsejuabnaye cha cachacá entsá inamnama ca?”

<sup>37</sup> Y chē ley abuatambayá tbojanjuá: —Chē entsábiamma tbojanongmé cha ca.

Y Jesús tbojaniyana: —Asna, motsa y cachcá cochjama ca.

### Jesús, María y Martbe yebnentše

<sup>38</sup> Chentšana, Jesús benachējana yojtsaye y canýe base pueblotémoye tojétsanamashēngo; y canýe shembása Marta ca uabainá, chabe yebnentše tbojanofja. <sup>39</sup> Martna canýe quenata ibnabomna, María ca uabainá. Cha Jesusbe shecuatšentše yojótbema chabe palabra jouenama; <sup>40</sup> y chēntscuana Marta ba soyēnga yojtsama. Cha Jesúsbioye tojanobeconá y tbojaniyana: —Utabná, ¿tundayana cmontsentšamna, atšbe quenata nye canýa chašonýá lempe jamama ca? Mēyana chašúajabuache ca.

<sup>41</sup> Chora Jesús tbojanjuá: —Marta, Marta, bētscá soyēngama contsenócochinýena y contsenomantšná; <sup>42</sup> pero nye canýe soye endmēna chē yoiyta soye jama-



ma. María chca jamama tojobuáyana, chë más tšabe soye, y ndocná queochatsma cha chaotsajbanama ca.

### Ntšamo Bëngbe Bëtsáftaca cuanjencuénta

**11** Canye, Jesús Bëngbe Bëtsáftaca ibojtsencuéntaye canye luarentše. Tojanpochocá orna, canya chabe uatsjendayënguentsá tbojaniana: —Bëngbe Utabná, Bëngbe Bëtsáftaca jencuéntama šmabuutam-bá, ntšamo Juan chabe uatsjendayëngaftaca tojanmcá ca.

<sup>2</sup> Y Jesús tojanéyana: —Bëngbe Bëtsáftaca chašmojtsencuénta ora, šmochjayana:

Bëngbe Taitá, acbe uabaina chë más uámana uabainana chauesomñe.

Acbe amëndayana chaóshjango.

<sup>3</sup> Mënté šmiyatšatá, cada te šnetsëjamoto tandëše.

<sup>4</sup> Bacna soyënga fsënjama: šmotsaperdónaye; er bëngnaca nyetscanga chë bëngbiama bacna soyënga amëngbioye fsëndbetsaperdónaye.

Bacna soyënga jamama šojocochëngo ora, šcochjajuache chca ndenobuíyama.

<sup>5</sup> Jesús mëntsánaca tojanéyana: “Nderado aca acbe bacóbioye tsëntseto ora tcojá y tcojauyana: ‘Bacó, Diosmanda unga tandëše šmotsemná, <sup>6</sup> er canye atšbe amigo yebnoca tonjáshjango y tondaye quetsásbomna cha jonánjama ca.’ <sup>7</sup> Ndegombre, cha tsocana tcmojojuá: ‘Ndoñe šmatébeyabomana. Bëšáša ya entsatámena y atše y atšbe básenga ya fsëntsocjá; ndoñe quetsátobena mora jotsbanana y chë tandëše jámnana ca.’ <sup>8</sup> Ndegombre, chë bacó ndoñe tonjotsbaná chë tandëše jámnama, cháftaca šuenatsëtsnámase, cha pronto jotsbanana chca uébëyabomana ndoñe tconjajbaná causa, y lempe ntšamo cmojtsajabotcá cha cmochanjoyiye. <sup>9</sup> Chcasna, atše cbéyana: Šmochjotjañe y Bëngbe Bëtsá cmochanjátšataye; šmochjánguango y šmochanjínýena; šmochjachembo y cmochanjébëtafjo. <sup>10</sup> Er ndánaca ndayá tojtsotjanañá, jýöngacñana; y tojtsenguá cha, jónýenana; y nda tojtschembuanábioye jebiatëfjuana ca.

<sup>11</sup> “¿Nda tšëngaftanguentsána nantsobena, taitá tojtssemnëse, cachabe uaquiñábioye canye mëtscuaye jatšayana, beona tbojtsotjanañe ora; <sup>12</sup> o canye alacránashe joyiyana, shëmnëbé tbojtsotjanañe ora? <sup>13</sup> Y chca, tšëngaftanga, bacna soyënga amënga, tšëngaftangbe basetemëngbioye tšabe soyënga jatšatayama šmojtsamanëse, imás chë celoca Taitá, chë Uámana Espiritu echanjátšataye, chca tmojtsotjanañëngbioye ca!” —Jesús tojánayana.

### Fariseunga tmojánayana Jesús Satanásbentsána obenana tojanóyëngacñe ca

<sup>14</sup> Jesús canye entsábentsána canye bacna bayëja tbojtanábocna. Chë bayëja ndëbiá chë entsábioye tbojtanábocna, y chábensána tojésanbocna ora, chë ndëbiá tojtanontsé oyebuambnayana. Y chë entsanga chama imojenjaná; <sup>15</sup> pero báseftanga imojtsichamo: “Beelzebú, cach Satanás, chë bacna bayëjengbe amën-

dayá, quem boyabásabioye obenana tbojatšetá chë bayëjenga chauatëbuacnama ca.”

<sup>16</sup> Y ínýenga, Jesús jisháchichiyamna tmojanimpadá canye bëts soye chaoma, jinýanýiyama cha celoca obenana inabomna o ndoñe. <sup>17</sup> Pero Jesús yojtsetátšëmbo ntšamo chëngbe juabna bëtsemnana. As tojanéyana: “Canye amëndayábentše entsanga tmojtsenojatá y tmojtsenáyase, cachënga jtsenpochócana; y canye yebnentše oyenënga tmojtsenojatá y tmojtsenáyase, chë pamíllanga tšabá nyets tempo ndoñe quemochásmëna. <sup>18</sup> Cachcá, Satanás tojtsenojatá y cachabe contra tojtssemnëse, ¿ntšamo nantsobena chabe mándayana quem luarentše jëftsebomnana? Chca sëntsichamo, er tšëngaftanga šmotsichamo Beelzebube obenánaca chë bayëjenga stsatëbuacana ca; <sup>19</sup> pero chca ndegombre tojtssemnëse, ¿ndábeyeca tšëngaftangbe usetonënga obenana imojtsbomna chë bacna bayëjenga jtëbuacnama? Chiýecna, cachënga montsinýinýná ntšamo ndegombre yomnana, y tšëngaftanga ndoñe ndegombre soye šmotsichamuama. <sup>20</sup> Y atšna, Bëngbe Bëtsabe obenánaca entsángbentsána chë bayëjenga sëndëtëbuacana; y chë soye entsinýinýná, Bëngbe Bëtsabe amëndayana tšëngaftangbioye tojóshjanguama.

<sup>21</sup> “Canye corente añemo bomna entsá, bëtscá ármangaca chabe yebna tojtsinýenëse, chë tsoca tomna soyënga ndoñe ntjotšana. <sup>22</sup> Pero inya chabiama más añemo bomná tojabo y tbojabetseyëñaná, chë cha yojanašbuaché armangá jtsabocana y chë tobomna sóynaca; y ntšamo chë inya tojtsebošcá chë soyëngaca jamana.

<sup>23</sup> “Nda ndoñe átšeftaca tontsemná, atšbe uayayá jtsemnana. Y nda átšeftaca ndoñe tontsetrabája, chana atšbe contra jtsetrabájayana ca” —Jesús tojánayana.

### Ndayá inopása chë bacna entsángaftaca

<sup>24</sup> “Canye bacna bayëja canye entsábentsána tojésobocna ora, bojojo luarënguenache chë bayëja jtsanana, ndayentše jóchnama onguayiñe. Ndoñe tonjínýena ora, jenójuaboyana: ‘Atšbe oyenoye, chë ndayentsána sënjëftsebocnoye chanjesshécona ca.’

<sup>25</sup> Y choye tojtashjango ora, jinýenana lempe tšabá cha jtesamashënguama, mo tsjajniñe y prontániñe cuaftsemncá. <sup>26</sup> Chora chë bayëja jana y inye canýsëfta bayëjenga, chabiama más opëjenga jobiatšana, nyetscanga choye jamashjnama, chë boyabásabeñe joyéanama. Y chca, chë boyabása tempscama más bacna entsá jtoquédana, chora chë natsanama más bayëjenga abamna causa ca” —Jesús tojánayana.

### Chë ndegombre oyejuayana

<sup>27</sup> Jesús chë soyënga yojtsichamëntscuana, entsanguentše canye shembása yojuayebuáchena: —¡Puerte oyejuayá chë quem luaroye tcmojúshjango y tcmojëftseboché shembása ca!

<sup>28</sup> As Jesús tbojaniana: —Más oyejuayana bomnëngna, chë Bëngbe Bëtsabe palabra tmojouena y chca tmojtsamënga ca.

**Chë bacna entsanga Jesús tmojanimpadá canye bëts soye chaoma, chabe obenana jinÿama**

<sup>29</sup> Entsanga más imojtsójoye Jesús yojtsemnentse, y Jesús tojanontsé jáuyanana: “Morsca entsanga puerte bacna entsanga; chënga montsotjanañe atse canye bëts soye chaima atšbe obenana jinÿama, pero ndoñe chca quemochátinÿe, sinó nÿe chë ndayá yomna mo chë Jonásoftaca tojanopasá soyca. <sup>30</sup> Er chca, ntšamo Jonás Nínive puebloca entsanga canye bëts soye tojaninÿanÿé Bëngbe Bëtsá obená yomnama chamotsetatšëmbuama, chë Bëngbe Bëtsá Entšá tbojanbemánaca entsinÿanÿná morsca entsángbioye, Bëngbe Bëtsabe amëndayana tojóshjanguama.

<sup>31</sup> Bëngbe Bëtsá ntšamo morsca entsanga tmojanma yochjayana te, chë Sur luaroca reiná echanjotsaye y morsca entsangbiama echanjayana ndoñe tšabá tmonjama ca; er chana chë quem luare iuajbana luarëngocana tojánabo Salomonbe osertanánaca palabrënga jouenama, y chë mora muentše entsemnana, Salomonbiama más uamaná endmëna. <sup>32</sup> Chë entsanga tšabá o ndoñe tšabá tmonjamama jayanama te, chë Nínive bëts puebloca entsángnaca mochanjotsaye y mochanjayana morsca entsanga ndoñe tšabá tmonjama ca; er chënga, Jonás yojtsabuayinÿaye ora, tmojanoyeuná y chë tšabe benache tmojtanishache, y chë mora muentše entsemnana, Jonasbiama más uamaná endmëna ca” —Jesús tojánayana.

**Chë cuerpama uajuinÿanësha**

<sup>33</sup> “Ndocná canye uajuinÿanësha juajuinÿenana, canye iytëmena luaroye juajájuama, ni canye cajonëshe tajsoye, sinó canye tsbanana luaroca juajájuama, chca, chë luaroye amashjuanëngbiama chaotsebinÿnama. <sup>34</sup> Acbe bominÿe tšabá totsomñëse, acbe cuerpama mo canye uajuinÿanëshacá jtsemnana; chíyeca aca jtsobenana, ntšamo tcojtsamcá chë bominÿeca jtsonÿayana. Chë bominÿe ndoñe tšabá tontsemnësa, chë bominÿe tondaye ntsoobenana jama, ntšamo tcojtsamcá chacobená jinÿama. Cachcá, acbe ainaniñe tšabe juabnënga tcojtsebomnëse, lempe ntšamo chacojtsamcá tšabá echántsemna. Y acbe ainaniñe ndocna tšabe juabnënga tcontsebomnësa, lempe ntšamo chacojtsamcá ndoñe tšabá queochátsmëna. <sup>35</sup> Cuedado šmochtsebomna, tšëngaftangbe ainaniñe nÿe tšabe juabnënga chaotsemnama, chca, lempe ntšamo chašmojtsamcá tšabá chaotsemnama, y bacna juabnënga ndoñe chaondëtsemnama. <sup>36</sup> Chcasna, lempe ntšamo šmojtsamcá tšabá tojtsemnëse y ndocna bacna sóyesna, tšëngaftanga bëtscá tšabe soyënga šmochántsama; y chca, tšëngaftanga šmochántsemna mo canye uajuinÿanësha puerte tšabá tojtsebinÿnacá ca” —Jesús tojánayana.

**Jesús chë fariseungbiama y ley abuátambayëngbiama tojánayana, chënga ndoñe tšabá montsama ca**

<sup>37</sup> Jesús chca jayanama tojanpochocá ora, chábioye canye fariseo tbojanofja chabe yebnoye jauasama. As Jesús tojánamashëngo y mesëshentše tojanótbema. <sup>38</sup> Chë fariseo tojanëuatjaná, Jesús ntsacuentšabiacá jasama yojontsé causa, ndoñe ntšamo chë judiënga imojanamancá, Bëngbe Bëtsabe delante tšábënga jtsatsmënama. <sup>39</sup> Pero Bëngbe Utabná tbojaniana: “Tšëngaftanga fariseunga šmondmëna mo entsangcá ndëmuanyënga chë tazëšënga y šcnenënga shjoicajana jtsóbojabiana, pero tsoyna nÿe cachcá jonÿayana. Tšëngaftanga becá jtsamana entsangbiama mo tšabëngcá jtsinÿnama; pero tšëngaftangbe ainanentše jútjena entsemna nÿe jtsatbëbanama y bacna soyënga jtsamama juabnëngaca. <sup>40</sup> ¡Juabna ndbomnënga! Tšëngaftanga ndoñe šmondétatšëmbo, chë tšëngaftangbentšana entsanga ndayá jinÿama imobencá tojamá, chë tšëngaftangbe tsoye yomna soyëngnaca tojama; y chíyeca, chabiama cachcá enduámana ndayá tšëngaftangbe ainanoye yomna soyënga, y chë entsangbe delante šmojama soyënga. <sup>41</sup> Tšëngaftanga cmontsamna, chë soyënguiñe ndayá ainaniñe yomnentšana ínÿengbioye jatšatayana, y chca, lempe ntšamo chašmojtsamcá Bëngbe Bëtsabe delante tšabá echántsemna ca.

<sup>42</sup> “¡Tša lastema tšëngaftangbiama fariseunga! Tšëngaftanga Bëngbe Bëtsabiama jtsequëcnayana chë jañentša sananga bnëtsanentšana canye soye nÿetsá, y chë binche matatëmënguentsana menta, ruda y nÿetsca binche matatëmënguentsánënaca; pero nÿe batšá jtsamana chë nÿetscanga cachca derechënga chamotsebomnama y cha jtsebobonshánama. Quem soyënga cocayé cmontsamna jtsamana, chë inÿe tšabe soyënga ntjajbanacá ca.

<sup>43</sup> “¡Tša lastema tšëngaftangbiama fariseunga! Tšëngaftanga tša jtsebošana chë judiëngbe enefjuana yebnënguenache chë más uámana luarënga jtsebomnama, y benachiñe nÿa puerte respétoca entsanga chacmotsacheuanayama ca.

<sup>44</sup> “¡Tša lastema tšëngaftangbiama! Šmondmëna mo obanënga uatbontsaniñcá, ndoñe ntsinÿnana, y entsanga ntsetatšëmbcá chiñe jtsebotájayana. Chca šmondmëna, er tšëngaftangbe ainana entsemna jútjena bacna juabnëngaca, pero entsangbiama ndoñe chca quešmátinÿna ca.”

<sup>45</sup> Jesús chca tojánayana ora, canye ley abuatambayá tbojaniana: —Buatëmbayá, chca palabrenga contsoyebuambná ora, bëngbiámnaca ndoñe tšabá quecátichamo ca.

<sup>46</sup> Pero Jesús tojánayana: —¡Tša lastema tšëngaftangbiámnaca, chë ley abuátambayënga! Mo canye entšá, couáybioye canye uauta uasmanësha tbojuasmá, y chësha ndoñe yapa chaondëtsautama tondaye tontsamcá, tšëngaftanga entsángbioye jtsamëndayana bëtscá mandënga chamotsocumplínama, pero

cach tšëngaftanga ni mo batsatémnaca jtsamana chë mandënga jtsocumplínama ca.

<sup>47</sup> “¡Tša lastema tšëngaftangbiama! Tšëngaftanga jtsamana chë Bëngbe Bëtsabe juabna oyebuambnayënga tempsquënga bëtsëtsa entšanga chamotsemnana, chëngbe cuevëshënga jtsatspórmayëse; pero chë mo chëngcá, canÿe buayenana sóyeca tmojabëngbioye ndoñe ntsayaunanana. Y chë tempsquënga chca oyebuambnayëngbioye tšëngaftangbe bëts taitanga tmojtsanëbaye. <sup>48</sup> Chca jtsamëse, tšëngaftanga š-montsinÿanÿná, ntšamo chë bëts taitanga tmojanmcá tšabá yomna ca tšëngaftanga šmojtsejuabnama, er chënga chë oyebuambnayëngbioye tmojtsanëbaye y tšëngaftangna chëngbe cuevëshënga jtsatspórmayana.

<sup>49</sup> “Chíyeca, Bëngbe Bëtsá chabe bëts osertanánaca tojánayana: ‘Atše chëngbioye chanjichamuá atšbe juabna oyebuambnayënga y atšbiama abuayiyayënga, y báseftangbioye mochantsëbaye y ínÿengbioyna mochantsécamiye ca.’ <sup>50</sup> Y chca, nÿets castigo morsca entšangbeñe echantsemna, nÿetsca Bëngbe Bëtsabe juabna oyebuambnayënga tmojóbanama, Bëngbe Bëtsá quem luare tojanma orscana; <sup>51</sup> Abélbioye tbojanóba orscana, Zacarías tmojanóbantscoñe. Zacaríasna Bëngbe Bëtsabe bëts yebnentše tmojanóba, altar y chë entšanga Bëngbe Bëtsábioye imojánadorana luaríne. Chcasna, Bëngbe Bëtsá echanjama chë oyebuambnayënga tmojanóbanama, morsca entšangbeñe nÿets castigo chaotsemnana ca.

<sup>52</sup> “¡Tša lastema tšëngaftangbiama, chë ley abuátambayënga! Tšëngaftanga jtsamana, Bëngbe Bëtsabe soyëngama jtsetatšëmbuama entšangbiama yapa totcá chaotsemnana. Cach tšëngaftanga ndoñe quešmatobena chë soyëngama tšabá jtsetatšëmbuana, y chama jtsetatšëmbuama tmojtsebošëngbioyna ndoñe quešmatalesénciaye ca” —Jesús tojánayana.

<sup>53</sup> Jesús chë soyënga tojánayanama, chë ley abuátambayënga y fariseunga puerte tojánetëna, y cha chentšana yojtsaisebocana ora, tmojanontsé chábioye becá tjanayana, y imojtsama ba soyëngama chaóyebuambama, <sup>54</sup> chca, jisháchichiyama jtsebošëse, cachá ntšamo tojayana sóyeca chënga jtsebomnana ndáyeca chábioye mal jaquédana.

**Jesús, chë bacna entšanga ntšamo ndegombre tmojuabnacá ndinÿinÿayëngbiama tojanabuatambá**

**12** Chëntscuana, ba uaranga entšanga chentše tmojanójoto; tša entšanga causa, nÿetscanga imojtsenatséntšenaye. Chora Jesús tojanontsé jóyebuambayama, y natsana chabe uatsjëndayëngbioye tojanëyana: “Chë fariseungbe buatëmbana soyëngama cuedado šmochtsebomna, chënga mondmëna bacna entšanga, ntšamo ndegombre tmojuabnacá ndinÿinÿayënga. Ntšamo chë levadura jamana nÿetsana chauábochema, cachcá chëngbe buatëmbana soyëngaca, chë fariseunga montsobena jamana bëtscá entšanga ntšamo ndoñe tšabá tontsemncá chamotsemama. <sup>2</sup> Er ndocna yoityëmena soye, ntjinÿcá

queochaisoquéda; y chë ndótatšëmbo soye, ntsotatšëmbcá queochaisoquéda. <sup>3</sup> Chíyeca, chë mora nÿe tšëngaftangbiama šmojtsichamo soyënga, chë entšangbiama mo ibetiñcá cuaftsemna soyënga, entšanga chama botamana mochanjátatšëmbona. Y chë iytëcana šmojtsichamo soyënga, nÿetsca entšangbioye mochántسابuayiyayë, mo nda canÿe yebnentša tsbanánocana noticiënga tojtsayebuachcá ca” —cha tojanëyana.

### Nda ndegombre cuantsebiauatja

<sup>4</sup> “Tšëngaftanga, atšbe amiguënga, cbochjáuyana: Ndoñe matauatjëngana nÿe chë tšëngaftangbe cuerpo japochócama imobenëngbiama, pero chentšana más jamana ndoñe ntsobenana. <sup>5</sup> Cbochanjabuayená ndábioye cmojtsamna jtsebiauatjana: šmochtsebiauatja chë nda vida jtsabuajuánama y chentšana infiernoye jtsichámuama obenana endbomnábioye; chábioye cocayé šmochtsebiauatja ca.

<sup>6</sup> “¿Shachna jaja shloftšëtëmënga ndoñe nÿe uta denario crocenánama mondbëtsena? Pero masque chca, Bëngbe Bëtsá chëngbiama sempre jesenójuabnayanana. <sup>7</sup> Y tšëngaftangbiama Bëngbe Bëtsá lempe endétatšëmbo, y bueta stjënëjënga tšëngaftangbe bestšašíne yomnámna. As ndoñe matauatjëngana; tšëngaftanga ba jaja shloftšëngbiama corente más šmonduámna ca” —Jesús tojánayana.

### Ndabiama Jesucristo yochjayana chabe entšá yomna ca

<sup>8</sup> “Atše cbëyana, nda atšbe entšá yomna ca entšangbe delante tojayanabiama, chë Bëngbe Bëtsá Entšá tbojanbemánaca, Bëngbe Bëtsabe angelëngbe delante echanjayana chë entšá chabia yomna ca; <sup>9</sup> pero nda entšangbe delante, atšbe entšá ndoñe yondmëna ca tojayanabiama, chë Bëngbe Bëtsá Entšá tbojanbemá, Bëngbe Bëtsabe angelëngbe delante echanjayana, cha chabe entšá ndoñe yondmëna ca.

<sup>10</sup> “Bëngbe Bëtsá bochanjaperdóna, nda chë Bëngbe Bëtsá Entšá tbojanbemabiama ndoñe tšabá tontsichamuábioye, pero chë Uámana Espíritbiama ndoñe tšabá tontsichamuábioyna ndoñe.

<sup>11</sup> “Tšëngaftanga chë judiëngbe enefjuana yebnëngoye, ntšamo entšanga bëtsamama ichámëngbioye y mandadëngbioye chacmojunatse ora, ndoñe šmattsenócochinÿena ntšamo o ndáyeca šmochjenëuyanama, o ndayá šmochjayanama; <sup>12</sup> er chë Uámana Espíritu cmochanjabuayená ntšamo jayanama tojtsemncá, jóyebuambayama chacmojtsamna ora ca” —Jesús tojánayana.

### Entšabiama resjo yomna, nÿe yapa bomnana jesejuabayana

<sup>13</sup> Chentšana, canÿa entšanguentšá Jesúsbioye tbojanayana: —Buatëmbayá, atšbe catšata momandá chë átšbioye otocana soyënga chašuatoyé ca.

<sup>14</sup> Y Jesús tbojaniana: —Bacó, ¿nda atše šojábema tséndatbe ujanayá ca?

<sup>15</sup> Y entsángbiye tojanéyana: —Šmochjinýe y cueda-do šmochtsebomna chë nýe yapa soyënga jtsebomna-ma bošama; er masque bëtscá soyënga chašmot-sóbomñe, chca ndoñe quešmochátstatšëmbo aíñe tšabe vida taišmochjónýenama ca.

<sup>16</sup> Y chora mëntšá tojanacuntá: “Inamna canýe bomna entsá, y chabe fshantsënguiñe tša jaja saná yojt-sopodena. <sup>17</sup> Chë bomná chora mëntšá yojtsejuab-naye, ¿y morna, ntšamo chjama? er ndoñe quetsát-somna ndayentše atšbe jaja saná jtsobocjayama ca.” <sup>18</sup> Y mëntšá yojeniyana: ‘Chë grano uaquëcjnaye yeb-nënga chantsendbiama, y inýe más bëtš yebnënga chanjëtšjebo, y chiñe nyetsca atšbe jaja saná chantsóbocjaye y nyetsca atšbe soyëngnaca. <sup>19</sup> Y chora atšbe chjeniyana: Bacó, bëtscá soyënga contsebocjana, ba uatama cmochanjuáshjache. Morna, cochjóchna, cochjase, cochjatëmo, cochjóboyejuaye ca.’ <sup>20</sup> Pero Bëngbe Bëtsá chábíoye ibojauyana: ‘Obëjema, cach quem ibeta cochanjóbana; y asna, chë contsebocjana soye, ¿ndabiama yochtsemna ca?’ ”

<sup>21</sup> Y Jesús chora tojánayana: “Chca endbopása chë nýe chabíama bomnana tojtsejuabá y bëtscá Bëngbe Bëtsabe soyënga ndoñe tonjëftsashjacháftaca ca.”

### Bëngbe Bëtsá chabe básenga jtsanýenana

<sup>22</sup> Chentšana, Jesús chabe uatsjëndayënga to-janéyana: “Quem soye cbéyana: Ndoñe šmattsenó-cochinýena ndayá šmochjase o šmochjofšiyë vida jtse-bomnama, ni ndaye entsáyá šmochjuíchëtjuama cach ndoñe. <sup>23</sup> Ndegombre, vida chë sanama más enduá-mana y cuerpo chë entsáyama más. <sup>24</sup> Chë ftsenga shloftšënga šmochjanýe: tondaye ntjájena, ni jaja saná ntjátbanana, ni grano uaquëcjnaye yebnënga ntse-bomnana; pero Bëngbe Bëtsá chënga saná jtsatsat-nayana. ¡Y tšëngaftanga chë ftsenga shloftšëngbiama puerte más šmonduámana! <sup>25</sup> Masque chca endmëna, masque canýa tša tojesenócochinýena, ¿ntšamo nan-jobenaye jamana, chë ntsachetšá vida yochtsebom-mentšana canýe hora vida más jabotiyana? <sup>26</sup> Chcasna, nýe chë base soye jamama ndoñe šmontsobenëse, ¿ndayama chë inýe soyëngama šmochjatenócochinýe-na?

<sup>27</sup> “Šmochjuinýe chë lirio uantšëfjushangá jtsajuaj-nana: ndoñe ntsetrabájayana, ni ntseshabiamnayana. Pero atšbe cbéyana, ndegombre ni mo rey Salomón, nyetsca chabe bomnánaca, chë lirio uantšë-fjushangacá nyetšá botamana quenjatspormana.

<sup>28</sup> Bëngbe Bëtsá tša botamana shácuana tojuama, y chë shácuana mënté jajoca jtsamnana y yëfsana iñoca. Cha chë shácuana chca tojamëse, ndegombre tšëngaftangbiámna Bëngbe Bëtsá echanjama entsáyá chašmotsábomnama, ¡entsánga Bëngbe Bëtsábeñe nýe batšá ošbuáchiyënga! <sup>29</sup> Chíyeca, ndoñe š-mattsenócochinýena ndayá jasama o jofšiyama onguayíñe; <sup>30</sup> er chë soyëngama quem luarentša entsánga mondbëtšenocochinýena, pero tšëngaftan-

ga ndoñe. Tšëngaftangna canýe Taitá šmondobomna, y cha endétatšëmbo ndayá cmëjabótama. <sup>31</sup> Más tša-bana, tšëngaftanga šmochtseboše Bëngbe Bëtsá tšëngaftangbe ainaniñe chaotsemándama, y chë cmojtsë-jaboto soyënga nýe šmochanjóyëngacñe ca” —Jesús tojánayana.

### Chë celoca bomnana

<sup>32</sup> “Ndoñe matauatjëngana atšbe ústonënga, atšbe básefta oveshënga, er Bëngbe Bëtsá tšabá tbonjuíný-nana chabe amëndayana tšëngaftanga jatšatayama.

<sup>33</sup> Lempe ntšamo šmochbomncá šmochtsatobuiye y chë ujabotëngbiye šmochtsatšataye. Mo ndotanguánaye shecnajiñe crocénana cuafjacjacá, celoca tšabe soyënga šmochjobuajo. Choca ndocna te queochaisopochó-ca, atbëbanënga choye ndoñe quemochátamashjna jatbëbama, y mejojón ndoñe queochatspochóca; <sup>34</sup> er chë ndayentše tšëngaftangbe bomnana tojtsem-mentša soyëngama, ainánaca tšëngaftanga š-mochántsejuabnaye ca” —Jesús tojánayana.

### Bëngbe Utabná yochjésabama jtseprontánana

<sup>35</sup> “Mo chë oservëngë, chë entsáyá uichëtjonënga y uajuinýananëshangaca chëngbe nduiño yochtash-janguama cuafstobatmancá, tšëngaftanga šmochtse-prontana Bëngbe Utabná yochjésabama. <sup>36</sup> Chca, tšëngaftanga šmochántsemna mo chë oservëngë, tšabe entsáyaca bopormánënga y uajuinýananëshangaca chëngbe amëndayá casamentocana yochtashjangua-ma cuafstobatmancá; y chca, chë nduiño tojabochem-bo ora, cachora chë oservëngë jtebiatëfjuama.

<sup>37</sup> Puerte oyejuayënga chë oservëngë, chë nduiño tojtashjango ora tmojtsefšnënga. Ndegombre cbéyana, chora chë mandayá sëndorëche echantás-naye, mesëshentše chë oservëngë echanjábtiama, y saná echanjuuatšiyë. <sup>38</sup> Puerte oyejuayënga chënga, chë tmojtsefšnënga cha tojtashjango ora, masque tséntseto ora o bínýanoye. <sup>39</sup> Quem soye tšabá chacmësertá: chë yebnentša nduiño, ntseco ora at-bëbaná yochjabama tojtsetatšëmbëse, cha ndoñe nanjaleséncia ndocná jushañe chaondbemama, chë yebnoye jtsamashënguama y jtsatbëbama. <sup>40</sup> Tšëngaftangnaca šmochtseprontana, er chë Bëngbe Bëtsá Entšá tbojanbemá echanjésabo, entsánga chama ton-daye tmontsejuabná ora ca” —Jesús tojánayana.

### Chë tšabe oservená y chë bacna oservená

<sup>41</sup> Pedro, Jesúsbiye tbojaniana: —Utabná, ¿chë tconjayana cuento nýe bëngbiama o nyetscangbiama yochtsemna ca?

<sup>42</sup> Y Bëngbe Utabná tbojanjá: —¿Nda yomna chë os-ervená, ntšamo chë nduiño tojtsebošcá amá y nyets juábnaca amá? Cha jtsemnana nda chë nduiño bochjëtsebošhona chë yebnentšënga chaotsanýena-ma, y jasama tojtsemna ora chaújuatšëma. <sup>43</sup> Puerte oyejuayá chë oservená, chë nduiño tojtashjango ora, cha tbojínýena jtsamëse ntšamo tbojtsemncá. <sup>44</sup> Nde-

gombre cbéyana, chë nduiño chábioye bochanjaimpáda nyetsca chabe soyënga chabotsinyëñama. <sup>45</sup> Pero chë oservená, chabe nduiño betesco ndoñe yochantabo ca tojtsejuabná, y tojontsé chë inye oservenënga, boyabásenga y shembásenga jtsajantsetayana, becá jt-sesana, jofšiyana y jtsótmenana, <sup>46</sup> cha ndoñe tontsejuabná te y tontsetátšëmbo ora, chabe nduiño echántashjango y puerte jabuache bochantsecastiga, y echanjama cha jasúfriama chabotsemnana, mo chë Bëngbe Bëtsábeñe ndošbuáchiyënga mochanjasufriacá.

<sup>47</sup> “Chë oservená, nda tojtsetátšëmbo ndayá chë nduiño tojtsebošama, pero ndoñe tontseprontana y ndoñe tontsobedecena, cha ba soye mochántsetjanja. <sup>48</sup> Y chë oservená, ntsetatšëmbcá ntšámnaca tojabuachjuanguá, y chë causa chamotsetjanjama tbojtsemnëna, chana más batšá mochántsetjanja. Nda bëtscá soyënga tmojatštábioye jauyanana, bëtscá soyënga chaoma ca; y nda bëts trabajo tmojabonyébioyna jauyanana, más bëts trabajo chaoma ca.”

### Jesube causa, entšángbeñe más jtsentsjanayana

<sup>49</sup> “Atše sënjabo quem luariñe jabojuinýiyama, y itša sëntseboše malaye ya ctsangbototjuana! <sup>50</sup> Atše šontsemna puerte jasúfriana, y ipuerte ngménaca sëntsobátmana chca chaotsemnana! <sup>51</sup> ¿Tšëngaftanga šmojtsejuabná atše tijabo quem luarentše entšanga natjëmbana chamotsiyenama? Ndegombre ndoñe chca queochásmëna; atše sënjabo causa, entšanga más mochántsetsjanaye. <sup>52</sup> Er mëntescana, canye yebnentše, shachnënga ndoñe quemochátenëyunana, únganga útatbe contra y útata úngangbe contra mochántsemna. <sup>53</sup> Taitá uaquiñabe contra echántsemna, y uaquiñá taitabe contra; bebmá, bembëbe contra, y bembe bebmabe contra; uambén mamá, bebin-cuabe contra, y bebinuá uambén mamabe contra ca” —cha tojánayana.

### Ndaye tempo yochtsemnana ntšamo inétsotatšëmbo

<sup>54</sup> Mëntšánaca Jesús entšanga tojanéyana: “Tšëngaftanga, chë jantšetëshënga shinye uenatjëmbambanoicana tojóbcocnana šmojinýe ora šmondbét-sichamo ‘echanjuafté ca’, y ndegombre chca jopásana. <sup>55</sup> Y tsmanoicana tojtsebinýia orna, tšëngaftanga šmondbét-sichamo ‘echanjójënyana ca’, y ndegombre chca jopásana. <sup>56</sup> ¡Bacna entšanga, chë ntšamo ndegombre šmojuabnacá ndinýinýayënga! Ntšamo quem luarentše yochtsemnana, ndayá celoca šmojinýyama tša tšabá šmojtsetatšëmbëse, ¿ndáyeca ndoñe šmontsobena jtsetatšëmbuana ndaye bëts soye quem tempo Bëngbe Bëtsá cmojtsinýanýnana ca?” —Jesús tojánayana.

### Chë uayayáftaca natjëmbana jtenbemana

<sup>57</sup> “¿Ndayeca cach tšëngaftanga ndoñe šmond-báyana ndayá tšabá bëtsemnana? <sup>58</sup> Nderado nda tc-

mojtse demandá y cabildoye jotsánama cmojtsemna, cabá choye ndáshjango ora, betesco cháftaca cochtenoyántsia. Chca ndóñese, chë demandayá mandádbioye cmochanjúshjango, chë mandadna josticiëngbe cucuatšifne cmochanjáboshjona, y chënga cárceloye cmochanjutame. <sup>59</sup> Ndegombre cbéyana, chentšana ndoñe quecochtétsbocna, nyets ndebénana candesopagantscuana ca” —Jesús tojánayana.

### Bëngbe Bëtsabe benache jtishachana

**13** Cach ora, báseftanga tmojána Jesús jinýama, y tmojançantá ndayá chë mandado Pilato tojanmama; chana básefta Galileoca boyabásenga tojt-sanëbaye, y chëngbe buiñe yojenajuabó chë Bëngbe Bëtsábioye jëtschuayama tmojanóba bayëngbe buiñeca.

<sup>2</sup> Y Jesús chënga tojanéyana: “¿Tšëngaftanga šmojtsejuabná, chë Galileoca entšanga chca tmojapasá, chë luarentša inye boyabásengbiama chënga más bacna soye amënga imojamna causa ca? <sup>3</sup> Ndegombre cbéyana, ndoñe. Y cach tšëngaftanga, bacna soyënga amama ndoñe šmontsajbaná y Bëngbe Bëtsabe benache ndoñe šmontishachëse, tšëngaftángnaca šmochanjóbana. <sup>4</sup> O, ¿tšëngaftanga šmnétsejuabnaye, chë Jerusalenentša bnétsana posufta entšanga tmojanóbanënga, chë Jerusalenoca binche uafjájónaye Siloé béconana tsbanana jebna soye tojtšanáshajaye ora, chënga imojamna chë inýyanga Jerusalenentše oyenëngbiama más bacna soyënga amënga ca? <sup>5</sup> Ndegombre cbéyana, ndoñe. Y cach tšëngaftanga, bacna soyënga amama ndoñe šmontsajbaná y Bëngbe Bëtsabe benache ndoñe šmontishachëse, tšëngaftángnaca šmochanjóbana ca” —Jesús tojanéyana.

### Chë ndëshajona higo betiyama cuento

<sup>6</sup> Jesús mëntšá tojanacuntá jabuátambama: “Canyë entšá jajoca canye higo betiye inabomna, y yojá nderado nantseshájonama, pero tondaye yonjínýena.

<sup>7</sup> Chcasna, chë jajañe bojanýábioye cha ibojauyana: ‘Mouena, ya unga uata tsabó quem higo betiyoye jaborrepárama, nderado nantseshájonama, pero ndocna te tondaye chiyátinýena; chiyeca, motsetëtše. ¿Ndayama quem jajañe yochjátsjena ca?’ <sup>8</sup> Pero chë jajañe inýená ibojauyana: ‘Bacó, inye uata cachcá monýá, fshantse chanjáboplojua y uanganëshe chanjaboutboto. <sup>9</sup> Nderado chca jamëse, nanjashájona; y ndóñesna, chora cocayé cuantsetëtše ca.’”

### Jesús canye ochnayté, canye tséštjona shembásabioye tbojanshná

<sup>10</sup> Canye, canye ochnayté Jesús yojontsé entšanga jabuátambana, chë judiëngbe enefjuana yebnentše, <sup>11</sup> y chentše yojtsemna canye shembása; cha ya bnétsana posufta uata yojtsešoca. Canye bacna bayëja chábeñe tojánamashëngo y chca tseštjoná tbojtsanbema, y tondayama yontsobena jtondirichana. <sup>12</sup> Jesús chábioye tbojáninýe ora, tbojanchembo y mëntšá tbo-

janiyana: “Batá, mora ya ndoñe šocá quecátsmëna ca.”

<sup>13</sup> Chora Jesús chabe cucuatšënga chábeñe tojanjájó, y cachora chë shembása yojtondirícha, y tojanontšë Bëngbe Bëtsábioye jëtschuayama. <sup>14</sup> Pero chë enefjuana yebnentša mándayana tbojánetna, Jesús chë shembása ochnayté tbojanshnama, y entšanga tojanéyana: —Chnénguana te comna jatrabájama; chora šmochjabo jenóshnama; ochnaytese ndoñe ca.

<sup>15</sup> Y Bëngbe Utabná tbojanjuá: —¡Bacna entšanga, ntšamo ndegombre šmojuabnacá ndinýinýnayënga! ¿Tšëngaftanguentšá ndocná chë ochnayté chabe uacná o chabe burrotema buanjuajafjoná, juanatsama béjaye chaofšema? <sup>16</sup> Chcasna, quem shembása, canýa Abrahám bentšana entšá, y Satanasbe causa bnëtsana posufta uata šocá yojtsemna, ¿ndoñe tšabá yondmëna canýe ochnayté chë bayëja jtsebojuánana ca?

<sup>17</sup> Jesús chca tojánayana ora, chabe uayayënga imojtsëuatja, y nýetsca entšanga imojtsóyejuaye Jesús tša bëts soyënga yojtsamama.

### Chë mostaziye jenayama cuento

<sup>18</sup> Jesús mëntšánaca tojánayana: “¿Ndayacá Bëngbe Bëtsabe amëndayana yomna, o ndaye sóyeca nanjopódia chama jábuayenana ca? <sup>19</sup> Endmëna mo canýe mostaza jénaye, canýe entšá jajañe tojajecá; chiyna jójuana y canýe bëts betiye jóbemana; tša bëtsashe jóbemana, chíyeca chë jaja shloftšënga chë buacuashënguñe uajajonëtemëngá jauábopormana ca.”

### Chë levadurama cuento

<sup>20</sup> Mëntšánaca Jesús tojánayana: “¿Ndaye sóyeca chjobenaye Bëngbe Bëtsabe amëndayama jábuayenama ca? <sup>21</sup> Endmëna mo levadurcá; canýe shembása chana jenájuabana unga medida arninýañe, nýetsana chauabochama ca.”

### Chë base utëntšá bëšáša

<sup>22</sup> Jerusalenoye benache, Jesús entšanga yojtsabuá-tambaye bëts pueblënguñe y base pueblotémënguñe. <sup>23</sup> Canýa chábioye tbojantjá: —Bëngbe Utabná, ¿nyë báseftanga imomna chë atsebácanënga mochtsemnënga ca?

Y Jesús tbojanjuá: <sup>24</sup> —Puerte šmochtsentšena chë base utëntšá bëšásajana jamashjnama; er ndegombre cbéyana, banga mochántseboše chëjana jamashjnama, pero ndoñe quemochatobenaye. <sup>25</sup> Chë yebnentša nduiño chaojtsbaná y chë bëšáša chaojtatá-mentšana, tšëngaftanga chë shjoca chašmojtsemnënga, šmochántsechembuana, mëntšá jtsichámëse: “Utabná, šmëbëtafjo ca.” Pero cha cmochanjáuyana, “Atše ndoñe quetsátstatšëmbo ndëmoquënga tšëngaftanga šmomnama ca.” <sup>26</sup> Chora tšëngaftanga šmochanjontšë ichámuana: “Acaftaca cánýiñe fsënjase y fsënjofšë, y aca bëngbe tsáshenañe tconjabuatambá ca.” <sup>27</sup> Pero cha cmochanjójuaye: “Ya tconjabúyana,

ndëmoquënga šmomnama ndoñe tstátšëmbo ca. ¡Atšbentšana mojuánanga, bacna soyënga amënga ca!

<sup>28</sup> “Chora chentšë puerte šmochanjenóbošachna y tsetšanama juatsašënga šmochantsenoftšëjónaye, Abraham, Isaac, Jacob y nýetscanga Bëngbe Bëtsabe juabna oyebuambnayënga Bëngbe Bëtsabe amëndayoca imojtsemnama chašmojinýe ora, y tšëngaftanga chentšana cmochtëbuacanama. <sup>29</sup> Y shinýe bocanoicana y uenatjëmbambanoicana, tsmanoicana y tsjuanoicana entšanga mochanjabo y juasama mochanjotbiama Bëngbe Bëtsabe amëndayentšë. <sup>30</sup> Y banga mora nduámanënga imomnënga, chora uámanënga mochántsemna; y banga mora uámanënga imomnënga, chora nduámanënga mochántsemna ca” —Jesús tojánayana.

### Jesús tbojanongmé Jerusalenentša entšangbiama

<sup>31</sup> Jesús chë soyënga tojanéyana ora, básefta fariseunga tmojánashjajna y tmojanijana: —Muentšana motsatoñe; Herodes entseboše aca jtsóbama ca.

<sup>32</sup> Y Jesús tojanéjua: —Motsajna y šmochjauyana chë corente studio bomná, mo tjañe mesetcá: “Minýe, mënté y yëfse entšángbentšana bacna bayëjenga sëndëtëbuacana y šoquënga sëndáshnaye, y baseftaytesna chanjapochóca ca.” <sup>33</sup> Pero atše šontsemna mënté y yëfse jtsayana, y baseftaytesna Jerusalenoye jana, er ndoñe tšabá ntsemnana canýa Bëngbe Bëtsabe juabna oyebuambnayá Jerusalenentša chábuañe chaóbana ca.

<sup>34</sup> “¡Jerusalenentša entšanga, Jerusalenentša entšanga, tšëngaftanga chë Bëngbe Bëtsabe juabna oyebuambnayënga jtsëbáyana, y chë Bëngbe Bëtsabe ichmónëngbioye ndëtšbéngaca jtsatëchénganjana jtsëbáyama! ¡Bueta soye atše sënjábosena tšëngaftanga átšbioye júbuajama, mo canýe tuamba chabe bolletotémënga juatëngmiáša tajsoye cuaftajayecá, pero tšëngaftanga ndoñe chešmátsbošena! <sup>35</sup> Y šmochjinýe, mora atše cachcá cbochanjesënyaye, y chca, atšna enánanga cbochanjésabashejuana, mo canýe yebna cachcá tcojesonyá y éaña tcojeseboshjoncá. Y ndegombre, tšëngaftanga morscana ndoñe más atše quešmochátinýe; y atše šmochántinýe, chë: “Corente bendición bomná, Bëngbe Utabnabe obenánaca tojabá ca! chašmojtsichamo ora ca” —Jesús tojánayana.

### Jesús, canýe uafshachanánaca šocábioye tbojanshná

**14** Canýe ochnayté, Jesús tojána jasama fariseungbe canýe amëndayabe yebnoye; y chë fariseunga yejuana imojtserreparana, er ndayá Jesús nanjama. <sup>2</sup> Chéntšnaca, chabe delante yojtsemna canýe entšá uafshachanánaca šocá. <sup>3</sup> As Jesús chë ley abuatambayënga y fariseunga tojanatjá: “¿Quenlesenciana canýe ochnayté canýe šocá jáshnama o ndoñe ca?”

<sup>4</sup> Chëngna ndocá tmonjanjuá. As Jesús chë šocábioye tbojánishache, tbojanshná y tbojanijana chaotsatoñe ca. <sup>5</sup> Y chë fariseunga tojanéyana: “¿Nda tšën-

gaftanguentšá, nderado chabe uaquiñá o uacná canye tboye tojtsótsatše, cachora ndoñe nanjá jetsejásēca-ma, masque ochnayté totsomñese ca?"

<sup>6</sup> Y chēnga ndocá tmonjanobená cha jojuana.

### Chē casamentoye ófjanēnga

<sup>7</sup> Jesús tojáninye ntšamo chē ófjanēnga quēfseroye imojtsachñējuana jotbiamama; as mēntšá chēnga tojanabuayená: <sup>8</sup> "Canye casamentama nda chacmojojfa ora, quēfseroca ndoñe catjót'bema, er nderado inye ofjaná acbiamá más uamaná ústonoye nandaboye; <sup>9</sup> y nderado chē tsēndatbe ofjjaná nanjabo y cmatjauyana: 'Mua chentše chaótbema, maluaré ca', y chora cmatjotóca ouatjentše chafjoca jana jatótbemana. <sup>10</sup> Chamna, nda chacmojojfa ora, chafjoca cochjót'bema, chca, chē ofjjaná chaojabo ora chacmēyana: 'Taita, quēfseroye motsēchnēngoñe ca'. Y chca, aca chē chentše tmojtsetbiámanēngbiamá uamaná cochántsemna. <sup>11</sup> Er nda cachá bētsá tojtsenobiamná, nduamaná mochántsebema; y nda cachá nduamaná tojtsenobiamná, aíñe bētsá mochanjábema ca."

<sup>12</sup> Y chē tbojanofja entšábioynaca Jesús mēntšá tbojanianyana: "Fiesta chacojama o sananga chacojtsebomna ora, ndoñe cattsebuájajana acbe amiguēnga, catsátanga, ni pamíllanga, ni acbe juachañe oyeñēnga bomnēnga; er chēngnaca, fiesta chamojtsebomna ora, aca cmochantētofja, y chca ya acbe uacanana soye cochántsebomna. <sup>13</sup> Chamna, canye fiesta chacojama ora, cochjúbuaja ndbomñejēmēnga, jama ndobenēnga, coshetēnga y jtanēnga, <sup>14</sup> y aca corente oyejuayá cochántsemna; er chēnga ndoñe quemochatobenaye cachá aca jtētofjana, pero acna acbe uacanana soye cochántsebomna, chē Bēngbe Bētsabe bominyiñe tšábēnga imomnēnga chamojtayena ora ca" —cha tbojanianyana.

### Chē bēts sanama cuento

<sup>15</sup> Chca tojanuena ora, canya chē mesēshentše tbe-maná tojánayana: —¡Puerte oyejuayá echántsemna Bēngbe Bētsabe amēndayoca juasama chaojtsemná ca!

<sup>16</sup> Chora Jesús tbojanianyana: —Canye bacó canye bēts saná yojapróna y ba entšanga yojúbuaja. <sup>17</sup> Juasama ya yojobuache ora, canye oservená ibojíchmua chē ófjanēnga jáuyanama chamotsajna, ya lempe yojtseprontana ca. <sup>18</sup> Pero chorna nyetscanga imojontsé jtsoyátšēmbuana. Canya yojayana: "Cabá mora canye fshantse sēnjobuámiñe, y šontsemna jana jarrepárama. Chcasna, aslēpaye šmotsepacenciá ca." <sup>19</sup> Inya yojayana: "Bnétsana toronga sēnjobuámiñe, y šontsemna jana jányama, jaárama taimochjosérvia. Chcasna, aslēpaye šmotsepacenciá ca." <sup>20</sup> Y inya yojayana: "Cabá mora sēntsobouamá, y chē causa, ndoñe quichatobenaye jama ca." <sup>21</sup> Chora chē oservená yojesshécona y lempe chabe nduíñbioye ibojauenaye. Chē nduíño tša ibojtsetna, y chē oservenábioyē ibojauyana: "Cam ora motsa tsashenangoye y benachēngoye, y moye

cochjunatse ndbomñejēmēnga, jama ndobenēnga, jtanēnga y coshetēnga ca." <sup>22</sup> Chentša bēnéntscose, chē oservená chē nduíñbioye ibojauyana: "Bacó, ya sēnjama ntšamo šconjamandacá, y cabá inyēngbiamá luare entsemna ca." <sup>23</sup> As chē nduíño ibojauyana: "Motsa benachēngoye y betiyetemēngaca jetjaniñēngoye, y entšanga cochjautáriaye moye chamuábama, atšbe yebna chaojtjiamá; <sup>24</sup> er ndegombre cbéyana, chē natsana sēnjobuajēnguentšá ndocná atšbe saná queochatsse ca."

### Ntšamo yomna Cristbe ustoná jtsemnama

<sup>25</sup> Mallajta entšanga Jesús imojtséstona; as cha tojanobuértana y tojanéyana: <sup>26</sup> "Nderado nda átšbioye tojabo, y ntšamo chabe taitá, chabe mamá, chabe she-ma, chabe básēnga, chabe catsátanga y uabēnanga tuababuányeshanama, y ntšamo cachá tuenobobonshánama, atše ndoñe más corente šontsebobonshánese, cha ndoñe ntso-benana atšbe uatsjendayá jtsemnama. <sup>27</sup> Y nda, atšbiama ndoñe tontseprontana jasúfriama y cruciñe jobanámna, y nyetsca chabe quem luare soyēnga ndoñe tonjésebošhona atše juas-tama, cha ndoñe ntso-benana atšbe uatsjendayá jtsemnama.

<sup>28</sup> "Nderado nda tšēngaftanguentšá tojtsejuabná canye tsbanana jebna soye japórmama, ¿cha natsana ndoñe nanjót'bema jinýama ntsachetšá crocénana chentše yochjuába, y japochócama nyetšá crocénana tajojtsebomnama? <sup>29</sup> Chca ndóñese, nderado chē uajatsana ucuatjoniñe tojapormá y lempe jajebuama ndoñe tonjobenase, nyetscanga chca tmojinýēnga, muantsáfchaye y mēntšá muantsichamo: <sup>30</sup> 'Quemējema jajebuama tonjontsé, y japochócama ndoñe chentatobená ca.'

<sup>31</sup> "O ¿ndaye rey inye réyefraca jéntsajama tbojotocase, natsana ndoñe nanjót'bema jajuaboyama, nderado nanjobenaye bnétsana uaranga soldadēngaftaca chē inyabioye jayénjanana, chē inya uta bnétsana uaranga soldadēngaftaca tojtsabose? <sup>32</sup> Y ndóñesna, chē inye rey cabá bēnoca tojtsemna ora, básefta entšanga echanjichamuá, cha jauyanama más tšabá yomna ndoñe jatentsjanayana ca.

<sup>33</sup> "Chcasna, ndánaca tšēngaftanguentšá, lempe ntšamo tobomncá ndoñe cachá tonjesonýá, cha ndoñe ntso-benana atšbe uatsjendayá jtsemnama ca" —Jesús tojánayana.

### Chē tamó ftēnana tojtsebocna ora

<sup>34</sup> "Tamó tšabe soye endmēna; pero chē tamó ftēnana tojtsóbemese, tšēngaftanga ndoñe quešmátobena jamana tempcá sanana cachíñe chaotsatsmēnana, ni saná jatamuama. Chē ftēna tamó tondayama ntso-servénana, cachá, chē atšbe uatsjendayēnga jtsemnama tmojtsebošēnga, pero lempe jésebošhona ndoñe tmontseboše, cach ndoñe chama ntso-servénana. <sup>35</sup> Chē ftēna tamó ndoñe ntso-servénana ni fshantsama, ni uanguanēshama. Nye jtsētše-

nana. Chë jouenama tmojtsobenënga, šmochjouena ca" —Jesús tojánayana.

### Chë ótšena oveshábiamá cuento

**15** Nýetsca chë Romocama impuesto entsángbioye atjanayënga y inýe bacna soyënga amënga, Jesúsbioye imojánajna chabe palabra jouenama; <sup>2</sup> y chë fariseunga y ley abuatambayënga chama Jesusbiama podésca imojtsoyebuambná, mëntšá: —Mua bacna soyënga amëngaftaca entsenuta y chëngaftaca entsesá ca.

<sup>3</sup> As Jesús mëntšá tojanacuntá, chënga jabuatambama: <sup>4</sup> —¿Nda tsëngaftanguentsá, canýe patse oveshënga tojtsabamna, y canýa tbojtsobuétšëse, chë inýe esconëfta bnëtsana y esconëfta oveshënga shëntsjañe ndoñe cachcá nanjesënyaye, y nanjá chë otšená jetsenguanguama candëtsónýeñëntsescuana? <sup>5</sup> Y tbojtsinýena ora, oyejuayá chë oveshá jesotantsájua; <sup>6</sup> y yebnoye tojtashjango orna, chabe amiguënga y juachañe oyenënga jáchembuana y mëntšá jáuyanana: "Atšeftaca móyejuanga, er chë sëntsano buetše oveshá sëntsinyëna ca." <sup>7</sup> Atšë cbéyana, cachcá, celócnaca más oyejuayana jtsebínýnana, canýe bacna soyënga amá tšabe benache tojtishachabiamá, y ndoñe nýa yapa, esconëfta bnëtsana y esconëfta tšabe soyënga amëngbiama, chë ndoñe yondujaboto bacna soyënga amana jtsajbanana ca.

### Chë crocénana tojtsónýena shembásabiamá cuento

<sup>8</sup> "O mëntšá, ¿ndëmua shembása, bnëtsana uámana crocénana tojtsebmoma y cánýana tojtsobuétšëse, chora ndoñe canýe uajuinýanëshana nanjuajuinýená, y cuédádoca chë yebna nantsetsjajo y botamana chë crocénana nantsenguango candëtsónýeñëntsescuana? <sup>9</sup> Y tojtsinýena ora, chabe amiguënga y juachañe oye-na shembásenga jáchembuana, y mëntšá jáuyanana: 'Atšeftaca móyejuanga, er chë sëntsano buetše crocénana sëntsinyëna ca.' <sup>10</sup> Atšë cbéyana, cachcá, chë Bëngbe Bëtsabe angelotémëngbeñe oyejuayana jtsebínýnana, nýe canýe bacna soyënga amá chë tšabe benache tojtishachabiamá ca" —Jesús tojánayana.

### Chë uaquiñá bacna benachiñe ayá

<sup>11</sup> Jesús mëntšánaca tojanacuntá: "Canýe entsá uta uaquiñata yojánabamna; <sup>12</sup> y canýe, chë ngomënche uaquiñá chabe taitábioye ibojauyana: 'Taita, atšbe otocana soyënga šmatatšetá ca.' As chë befta lempe chë uta uaquiñata yojtëjáyate.

<sup>13</sup> "Chentsána baseftaytesna, chë más bobontse uaquiñá lempe ntšamo ibojobuachcá yojtsatobuiye y chë crocénana bën luaroye yojtsoñe, y choca, cha nýe ntšamo ibojocochëngcá, mocá yojenobuiye, y chca, lempe yojtsepochóca. <sup>14</sup> Lempe crocénana yojtsoshañe orna, bëts shëntsana chë luarentše yojóshjango, y chë causa cha ibojotóca shëntseca jtsejé-tanana. <sup>15</sup> As, cha yojá trabajo jonguangoñama y yojinýena chë luarentša canýe entsábentše; chana,

chabe jajoje ibojíchmua cotšënga jtsanýenama. <sup>16</sup> Chë bobontsna yojtseboše chë cotšbe saná jtsesana, pero ndocná tondaye ibonjanájuatšnye.

<sup>17</sup> "Cabana, botamana yojinýe ntšamo yojtsepasacá, y mëntšá yojenójuaboje: '¡Bueta trabájayënga atšbe taitabe yebnentše bëtscá saná mondëtsóbomñe, y atšbe muentše shëntsama chanjóbana ca! <sup>18</sup> Chantá atšbe taitabe yebnoye y mëntšá cha chanjauyana: Taita, šmotseperdoná. Atšë tijama ndayá Bëngbe Bëtsá ndoñe yondbošcá, y ntšamo aca ndoñe condbošcá. <sup>19</sup> Mora ya mercedo taitsatobuajoñe acbe uaquiñá jtsabáinama; nýe canýe acbe trabajayacá Diosmanda šmatofja ca.' <sup>20</sup> Chca jëftsenójuaboješe, yojontšë cachabe yebnoye jtana.

"Cabá bënoca yojtsemna ora, chabe taitá chábioye ibojinýe, y chabe uaquiñabiamá ibojóngmia, y jajében-guama betsco yojá; ibojajebengo, ibojtotsejcuá y tša yojtsóyejuayayama chë uaquiñábioye ibojtámochó.

<sup>21</sup> Chora chë uaquiñá ibojauyana: 'Taita, šmotseperdoná. Atšë tijama ndayá Bëngbe Bëtsá ndoñe yondbošcá, y ntšamo aca ndoñe condbošcá; mora ya mercedo taitsatobuajoñe acbe uaquiñá jtsabáinama ca.'

<sup>22</sup> Pero chë Taitana chabe oservénënga yojámëndaye: 'Betsco chë más tšabe entsáyá mauaca y matsporman-ga, montšabuechëtjo y matsshecochëtjo. <sup>23</sup> Mora chë más minýica uacná šmochjuánatse y šmochjáshbua. ¡Mochjase y mochjóboyejuaye ca! <sup>24</sup> Quem atšbe uaquiñá mo obanacá endánmëna y mora bënga montsetátšëmbo cha ainá yotsomñama. Quem atšbe uaquiñá mo otšenacá endánmëna y mora tmontsinýena ca.' Y chentsána imojontšë joboyejuayama.

<sup>25</sup> "Chë yebnoca fiesta yojtsemnëntsescuana, chë mayor uaquiñana jajoca inétsomñe. Yebnoye yojtsataye y ya béconana yojtsemna orna, cha yojouena imojtsabuastoye y imojtselántsaye. <sup>26</sup> As chora cha canýe oservenábioye ibojachembo y mëntšá ibojatjaye: '¿Ndayá bëngbe yebnentše yojtsopasana ca?'

<sup>27</sup> "As chë oservená ibojajuá: 'Acbe uabentsá tontashjango y chama acbe taitá šonjutarié chë más minýica uacná jáshbuama, cha tšabá tojtashjanguama ca.'

<sup>28</sup> Pero chë uabóchena catsatna corente ibojtsetna y ndoñe yontseboše tsoye jtamashënguana. As cach befta yojábocna chë catsátbioye jaimpádama chauata-mashënguama. <sup>29</sup> Chora cha chë taitábioye ibojauyana: 'Taita, aca condëtatšëmbo bueta uata cbetsajabuáchanama, nýets tempo cbetseyeunanama, pero ndocna te ni mo canýe chivotema chešcaisatštá atšbe amiguëngaftaca joboyejuayama. <sup>30</sup> Y masna, acbe uaquiñá chë bacna vida bomna shembásengaftaca acbe crocénana pochocayá tojtashjango ora, chë más minýica uacná chabiamá tcojášshbua ca' —chë uaquiñá ibojauyana.

<sup>31</sup> "Chora chë befta ibojajuá: 'Atšbe uaquiñá, aca sempre átšeftaca condëtssemna y lempe ntšamo atšbe tsbomncá acbiámnaca endmëna. <sup>32</sup> Pero mora tšabá entsemna joboyejuayama y joyejuayëngama; er acbe uabentsá mo obanacá endánmëna, y mora bënga



montsetátšëmbo cha ainá yotsomñama; mo otšenacá endánmëna, y mora tmontsinýena ca.'"

### Chë nduíñbe ndoñe tšabe uajabuachanábiama cuento

**16** Jesús mëntšánaca chabe uatsjéndayënga tojanacuntá: "Inamna canýe bomna entsá, y cha ibnabomna canýe uajabuachaná chabe soyënga chaotsinýenama; y chë nduíño imojuenaye chë uajabuachaná chabe soyëngaca ndoñe tšabá yontsamama. <sup>2</sup> Asna, chë nduíño ibojachembo y mëntšá ibojauyana: '¿Ntšamo acbiama šmotsatsëtsnacá ndegombre yojtsemna ca? Mora cuenta šmatatštá ntšamo atšbe soyëngaca tcojamama, er morscana ya ndoñe atšbe soyënga inýená quecochátsmëna ca.' <sup>3</sup> Chë uajabuachaná yojontsé jenójuaboyana, y mëntšá yojenyana: '¿Y mora ntšamo chtsemana, chë nduíño atšbe trabajuentsana šojtabocna ora? Ndoñe añemo quetsátsbomna fshantse jatrabájama, y lemošna jótjañamna sentsëuatja. <sup>4</sup> Ya sëntsetatšëmbo ndayá chjama, chca, atšbe trabajuentsana chašojtábocna ora, atšbe jtsabamnama ndëmuanýenga chëngbe yebnentšë chašmofjama ca.'

<sup>5</sup> "Chentšana, canýánýa chë chabe nduíñbioye ndebënga yojáchembo. Cánýabioye ibojatjaye: '¿Ntsachetšá atšbe nduíño icondebena ca?' <sup>6</sup> Y cha ibojójuá: 'Canýe patse barrilëshangá aceitiye ca.' As cha ibojauyana: 'Muentšë acbe recibécha entsamna; mora mótbema y inýácha nýe shachna bnëtsana barrilëshangama matapormá ca.' <sup>7</sup> Chentšana inýabioye ibojatjaye: 'Y acna, ¿Ntsachetšá icondebena ca?' Y cha ibojójuá: 'Canýe patse medida trigo ca.' As cha ibojauyana: 'Muentšë acbe recibécha entsamna; chiñe nýe posufta bnëtsanama mábema ca.' <sup>8</sup> Chentšana, chë nduíño tšabá yojayana chë ndoñe tšabá ama mayordombiama, cha stúdioca yojamama. Chë nýe quem luarama enójuabnaye entsanga, cachëngbe soyëngaca puerte studio bomnënga mondmëna; y chë entsangbe juabnënga binýnayábenga ndoñe nýa yapa ca.

<sup>9</sup> "Atšbe cbabuayená, quem luarentšë, chë bacna soyënga amëngbe luarentša bomnánaca amiguënga šmochjábiamá, inýenga jtsëjabuáchanëse. Chca, chë bomnana tojtsopochocá ora chašmotsabamna ndëmuanýenga chë nýetsca tescama oyenoye chacmúbuajama ca.

<sup>10</sup> "Nda básefta soyënguiñe lempe tšabá tojama, bëtscá soyënguiñnaca lempe tšabá echanjama; y nda básefta soyënguiñe ndoñe tšabá tonjama, bëtscá soyënguiñnaca cach ndoñe tšabá queochatsma.

<sup>11</sup> Chcasna, quem luarentšë, chë bacna soyënga amëngbe luarentša bomnánaca ndoñe tšabá šmonjamëse, ¿nda chë ndegombre bomnana, chë Bëngbe Bëtsabe soyënga cmochjábanýiye? <sup>12</sup> Y chë ndoñe tšëngaftangbe sóyeca ndoñe tšabá šmonjamëse, ¿nda cmochjantšabuáchiye ndayá tšëngaftangbiama yomncá ca?

<sup>13</sup> "Ndocná ntsobenana uta mandayata jtsaservënana; er cánýabioye bochantšáboyënja y chë inýabioy-

na bochantšebobonshana, o cánýabiamá tšabá echántsetrabajaye, y chë inýabiamna ndoñe tšabá. Ndoñe quecátobena Bëngbe Bëtsá jtsebomnshánana, nýe quem luarentša soyënga jtsebomnana tcojtsebošëse ca" —Jesús tojánayana.

<sup>14</sup> Chë fariseunga, becá crocénana jtsebomnana bošënga imnamna, lempe chca chënga tmojanuena, y Jesúsbioye imojtsáboyejuana. <sup>15</sup> As Jesús tojanéyana: "Tšëngaftanga entsangbe delante mo tšábenga cuaftsemncá jtse nobiamnayana, pero Bëngbe Bëtsá endëtatšëmbo ndayá tšëngaftangbe ainaniñe yomnama; er ndayá entsanga más tojtsebošcá, Bëngbe Bëtsá jtšáboýënjana ca.

### Moisesbe ley y Bëngbe Bëtsabe amëndayana

<sup>16</sup> "Moisesbe ley y chë Bëngbe Bëtsabe juabna oye buambnaye tšëngaftanga cmonjanabuayiná, Juan chë Ubayaná quem luaroye tonjánabëntscuana. Cha tonjánabo orscana montsabuyiná chë tšabe noticiënga Bëngbe Bëtsabe amëndayocama, y nýetscanga tša montsebošë choye jamashënguama ca.

<sup>17</sup> "Más paselo endmëna, celoca y quem luare chaopochocá, y ndoñe chë ntšamo leyiñe iuayancá, chë ndayá jopásama yomnama, ni mo canýe punto ndoñe chca chaondëtsemnama ca" —Jesús tojánayana.

### Ndayá Jesús tojanabuatambá chë bouamnënga tmojt-senëtšënama

<sup>18</sup> "Nda chabe shëmbioye cachcá tbojesonýa y inýaftaca tojtóbouamase, cha chë natsana shëmbioye inýaftaca jtseingñayana; y nda chë útšëna shembásafata tojobouamá chana, canýe uabuamá jtsebomnana, y chca, chana canýe bacna soye jtsamana ca" —Jesús tojánayana.

### Chë bomná y chë ndbomnjëma Lázaro

<sup>19</sup> "Canýe bomna entsá inamna; cha yojanamana uámana y botamana shbuenda uafjatsenga y lino entsayangá jtchëtjuana, y cada te bëtš fiestënga yojánama. <sup>20</sup> Canýe ndbomnjëmnaca inamna, Lázaro ca uabainá, bacna nguayanánaca šocá; y cha yojanamana chë bomnabe bëshásentšë fshantsiñe jótbemana.

<sup>21</sup> Quem ndbomnjëma yojtsebošë chë bomná yojt-sesayentsana yojatquëcjana sanángaca jtoshachayana; y chë quešënga imnaboye chabe nguaye cuerpo jajáfjuama. <sup>22</sup> Canýe te Lázaro yojt-sóbana, y Bëngbe Bëtsabe angelënga Abrahámioye cha imojtamba, chë nýetscanga oyejuayënga mondmëna luaroye. Chë bomnánaca yojóbana y imojuátbontsa.

<sup>23</sup> "Chë bomná infiernoca puerte ngméniñe yojt-sesufrina ora, tsbanánoye yojontjësiye y bënoca Abraham ibojinýe, y Lázaro cháftaca yojtsemna. <sup>24</sup> As chë bomná yojuayebuáchena: '¡Taita Abraham, šmolastemá! Lázaro michmó chabe ntšabuafja chaofcheacuacú y atšbe bichtaja

chauabofchecuacuaye, er quem íñeshoca tša séntsesufrina ca.' <sup>25</sup> Pero Abraham ibojauyana: 'Uaquíñá, menojuabó, aca fshantsoca vida conjánbomna ora, lempe ntšamo icojaboščá tconjanóyèngacñe, y Lázaro chë cuenta tondaye quenjátsbomna; pero mor-na, cha tšabá y oyejuayá entsemna, y aca jabuache ngménana contsebomna. <sup>26</sup> Y inýe soye, canýe bëts tũañe entsemna tšëngaftangbiocana mëntscoñe; chca, chë tšëngaftangbioye muentšana jenachnëngua-tmojtsebošënga ndoñe chamondëtsobena, ni chocana bëngbioye cach ndoñe ca.'

<sup>27</sup> "Y chë bomná ibojauyana: 'Masque chca, Taita Abraham, Diosmanda Lázaro michmó atšbe taitabe yebnoye; <sup>28</sup> choca sëndábamna shachna catšátanga; as chaúyana ntšamo moca atšbe stsepasana y ntšamo jamëse chënga ndoñe chaondëtsamna quem ng-ménënga luaroye jabama ca.' <sup>29</sup> Chora Abraham ibojauyana: 'Chënga ya mondbomna ndayá Moisés y chë Bëngbe Bëtsabe juabna oyebuambnayënga tmojtse-sanábema soyënga; ichëngbioye chamoyauná ca!' <sup>30</sup> Chë bomná ibojujá: 'Ndoñe, Taita Abraham; nderado obanënguentšana canýa chëngbioye tojase, añe chë tšabe benache muantishache ca.' <sup>31</sup> Pero Abraham ibojauyana: 'Chënga ni mo Moisés, ni chë Bëngbe Bëtsabe juabna oyebuambnayëngbioye ndoñe tmon-jóyaunase, Bëngbe Bëtsabeñe ndoñe quemochatošbuáchiye, masque canýe obaná chau-atayenëse, chëngbioye jábuayenama ca' " —Jesús to-jancuentá.

### Resjo yomna, nderado bacna soyënga cuanjama

**17** Jesús chabe uatsjéndayënga tojanéyana: "Sempre echanjëftsemna juabnënga bacna soyënga jamama; pero, itša lastema chë entsabiama ndabe causa inýënga bacna soyënga tmojama! <sup>2</sup> Más tšabá chabiamá nántsemna canýe nantsnëbé chamotseta-mošëntšbua y mar béjayoye chamotsashbuetše, y ndoñe chë canýa Bëngbe Bëtsabeñe ošbuachiyá bacna soye chaomama juanatsana. <sup>3</sup> Cuedado šmochtsebomna.

"Acbe catšata bacna soye tojamëse, cochjuácacana; y yochtsajbaná ca cha tojayanëse, cochtseperdóna.

<sup>4</sup> Masque nýe canýe te, canýsëfta soye ntšámnaca tcmojaborlá, y canýsëfta soye 'chca ndoñe más quebochatsbórla ca' tcmojauyanëse, aca cmontsemna cha jtseperdónana ca" —Jesús tojánayana.

### Bëngbe Bëtsabeñe jtsošbuáchiyëse, corente obenana jtsebomnana

<sup>5</sup> Chë uatsjéndayënga Bëngbe Utabnábioye tmojaniyana: —Ošbuáchiyana šmababuát ca.

<sup>6</sup> Y chë Utabná tojanéjua: —Tšëngaftanga os-buáchiyana, batšatema masque nýe mo mostaza jenaycá šmojtsebomnëse, quem sicomoro betiyoye šmatjauyana: "quemuentšana mojashtse y mar béjayoca mojó ca", y quem betiye chca nanjama ca.

### Chë oservená ndayá ibomna jamana

<sup>7</sup> "Nderado canýa tšëngaftanguentšá canýe bochich-nayá tbojtsebomna, cha jajocana tojtashjango jajañe arayocana o uacnënga anýenocana, ¿chábioye boch-jauyana: 'Matabo y mabose ca?' <sup>8</sup> Ndoñe, chamna mëntšá bochanjauyana: 'Jetiñe juasama cochjuábua, y moprontá atšbe jaserviama atšbe candëse y candof-šentscuana; y chentšana aca cochjase y cochjofsiye ca.' <sup>9</sup> Y chë bochichnayábioye ndoñe quebochtëtschuaye ndayá tbojuatariecá cha tojamama. <sup>10</sup> Tšëngaftán-gnaca cachcá, lempe ntšamo Bëngbe Bëtsá tcmojutariécá chašmojama ora, cmontsamna jayanana: 'Nduámana oservënga fsëndmëna; er nýe ntšamo jamama šuamncá tifjama ca' " —Jesús tojánayana.

### Jesús, bnëtsanënga bacna nguayanánaca šoquënga tojanashná

<sup>11</sup> Jerusalemoye benache, Jesús tojánachnëngo Samaria y Galilea luarëjana. <sup>12</sup> Y canýe pueplotémoye tojánashjango ora, bnëtsana boyabásenga bacna nguayanánaca šoquënga chábioye tmojána; chábentšana bënoca chënga tmojanoquedá, <sup>13</sup> y mëntšá imojtsáyebuache: —¡Jesús, Buatëmbayá, š-motsalastemá ca!

<sup>14</sup> Jesús chënga tojánanye ora, tojanéyana: —Jerusalenoca bachnángbioye motsajna, y chënga š-mochjínyanýiye tšëngaftanga mora ndëšoquënga š-mojtsemnana ca.

Y tojanopasá, chë bnëtsanënga cabá imojët-sayëntscuana, ya shnánënga imojtoquédaye. <sup>15</sup> Canýa chënguentšá, shnaná yojtsemnana tojáninýe ora, yojesshëcona Bëngbe Bëtsábioye jabuache atschuanaye; <sup>16</sup> y Jesusbe delante yojoshëntsamentšiyé, jubiaca fshantsóntscoñe yojotsejbéna, y chábioye ibojtsatschuanaye; y chë boyabásana Samarioca entšá in-amna.

<sup>17</sup> Chora Jesús tbojaniyana: —Bnëtsanënga mondmëna chë shnánënga tmontoquedanga. ¿Ndayentšë chë inýe esconëftanga imojtsemna? <sup>18</sup> ¿Nýe quem boy-abása, inýe luarocana ashjanganó, tojesshëcona Bëngbe Bëtsá jëtschuayama? ¿Ndáyeca chë inýënga ndoñe ca?

<sup>19</sup> Y chë entšábioye tbojaniyana: —Matëtsbaná y motsatoñe; Bëngbe Bëtsabeñe aca icošbuachéyeca shnaná contsatmëna ca.

### Ntšamo Bëngbe Bëtsabe amëndayana yochjóshjango

<sup>20</sup> Canýe, chë fariseunga Jesús tmojantjá, mocna ora chë Bëngbe Bëtsabe amëndayana yochjanóshjangua-ma; y cha tojanéjua: "Bëngbe Bëtsabe amëndayana chaojóshjango ora, tšëngaftanga ndoñe quešmochatobenaye chca jinýana. <sup>21</sup> Chora ndoñe quemochátichamo 'Muentše entsemna' o 'Choca entsemna ca'; er Bëngbe Bëtsabe amëndayana ya tšëngaftangbeñe entsemna ca" —cha tojánayana.

<sup>22</sup> Jesús chabe uatsjédayënga tojanéyana: “Canÿe tempo echanjóshjango, y chora tšëngaftanga š-mochántseboše canÿe te jtsebomnana, ntšamo chë Bëngbe Bëtsá Entšá tbojanbemá tšëngaftangbeñe enjëftsemna orcá; pero chora ndoñe chca queochatóshjango. <sup>23</sup> Chora báseftanga mochántsihamo: ‘Muentše entsemna’ o ‘Choca entsemna ca’; pero choye ndoñe š-matjá, ni šmatjúseto. <sup>24</sup> Er chë tojatcuinÿe ora, ntšamo celoca catoica juachoica tojabuashinÿinÿenacá, chca echántsemna chë Bëngbe Bëtsá Entšá tbojanbemá quem luaroye chaojésabo te. <sup>25</sup> Pero natsana cha bontsemna puerte jasúfria, y morsca entšangbiama uabotená jtsemnana.

<sup>26</sup> “Ntšamo Noé yojaniyena ora tojanopasacá, cachcá echanjopása chë Bëngbe Bëtsá Entšá tbojanbemá quem luaroye chaojésabo ora. <sup>27</sup> Chë tempo, entšanga imnasaye, imnofšëšnaye, imnóbouamnaye; natjém-bana imojtsiyëñe, y chca, natjém-bana imojtsomñe, Noé chë barquëshoye tojanamashënguëntscuana; pero chora uabouana uaftena tojánashjango y chë entšanga tojtsanapochocá. <sup>28</sup> Cachcá ntšamo Lot yojaniyena ora tojanopasacá: entšanga imnasaye, imnof-šëšnaye, imnóbouamnaye, imojtsena, sananga imnaja y imnajuana; <sup>29</sup> pero Lot Sodoma bëts pueblentsana tojëftsanapochocna ora, Bëngbe Bëtsá tojanma celocana íñeshe y azufre chauaftema, y chentša entšanga tojtsanapochocá. <sup>30</sup> Cachcá echántsemna chë Bëngbe Bëtsá Entšá tbojanbemá chaojtonÿná ora.

<sup>31</sup> “Chë tena, nda cachabe yebnentša tsbanánoca chaojtsemna, y chabe soyënga cach tsoca tojtsebom-nëse, chocana ndoñe chaondétastjango chë soyënga jesabobocnama; y nda jajoca chaojtsemna, yebnoye ndoñe chaondéta. <sup>32</sup> Menójuabonga ntšamo Lotbe shémaftaca tojanopasama. <sup>33</sup> Nda tojtsentšena quem luarentše bëtscá jtsebomnana y atšbiama jasúfria ndoñe tontseprontana, chë nyetsca tescama yomna tšabe vida echanjobuetše. Pero nda quem luarentša soyënga cachcá tojonÿá atše juastama, masque chaóbana, chë nyetsca tescama yomna tšabe vida echántsebomna.

<sup>34</sup> “Atše cbéyana, chë ibeta, chë Bëngbe Bëtsá Entšá tbojanbemá chaojtonÿná ora, útata canÿe jutsnéshañe bochántsemna; canÿa mochanjesbetše y chë ínÿana ndoñe. <sup>35</sup> Uta shembásata cánÿiñe bochántsejanÿoye; canÿa mochanjesbetše y chë ínÿana ndoñe. <sup>36</sup> Uta boyabásata jajoca bochántsetrabajaye; canÿa mochanjesbetše y chë ínÿana ndoñe ca” —cha tojanéyana.

<sup>37</sup> Chora chë uatsjédayënga Jesús tmojantjá: —Utabná, ¿ndémoca chca yochjopása ca?

Y cha tojanjuá: —Chë obanabe cuerpo tojtsemnentše chë gallinacënga jojtana ca.

### Chë viudá y chë mandadbiama cuento

**18** Jesús mëntšá tojanacuntá, entšanga jabuátambama, Bëngbe Bëtsáftaca nyets tempo jtscuëntayana yomnama, ainaniñe añemo jtsebomnana ndocna te ntjajbanacá. <sup>2</sup> Mëntšá tojánayana: “Canÿe pueblentše canÿe mandado inamna; chana ni Bëngbe

Bëtsábioye ndoñe bonjánebiauata, ni entšanga yonjánayana. <sup>3</sup> Chë pueblentše canÿe viudánaca inamna; chana canÿe demanda yojánbomna. As chë mandádbioye yojobeconá y mëntšá ibojauyana: ‘Dios-manda atšbe uayayá motsecastigá ndayá šojaborlama ca.’ <sup>4</sup> Bayté chë mandado ndoñe yonjábosena chë viudábioye joyeunayama; pero chentšana cha yojenójuaboye: ‘Masque Bëngbe Bëtsá ndoñe quetsátebiauatja, ni entšanga ndoñe quetsátayaunana, <sup>5</sup> pero quem viudá cada ora endabó causa, aíñe chanjeyunaye, chabe uayayá chanjacastigá; ndóñesna cada te nandaboye y cabana ya šochanjanamëntša ca.’”

<sup>6</sup> Chentšana Bëngbe Utabná tojánayana: “Šmonjouena ntšamo chë ndoñe tšabá ama mandado yojayancá. <sup>7</sup> Y chca, ¿Bëngbe Bëtsá chabe bocacánënga ndoñe yochanjátsebacaye? Chënga mora ínÿengbe causa montsufrina y cada te Bëngbe Bëtsá mondbëtseim-padana chaújabuachama. ¿Más chamuatobatmá ca yochjáuyana? <sup>8</sup> Atše cbéyana, Bëngbe Bëtsá betscotšëngaftanga cmochanjátsebacaye, tšëngaftanga chë ínÿengbe causa mora šmojtseufrinënga. Pero chë Bëngbe Bëtsá Entšá tbojanbemá chaojésabo ora, ¿cabá Bëngbe Bëtsábeñe ošbuáchiyënga quem luarentše entšanga yochjánÿena ca?” —Jesús tojánayana.

### Chë fariseo y chë Romocama impuesto atjanayabiama cuento

<sup>9</sup> Báseftanga imojtsanjuabná chënga tšabe entšanga inamna ca, pero chë ínÿengbioye imojtsëbuayëña; chíyeca Jesús mëntšá tojanacuntá jabuátambama:

<sup>10</sup> “Uta boyabásata Bëngbe Bëtsabe bëts yebnoye tbojána Bëngbe Bëtsáftaca jencuëntama: canÿa yojamna fariseo, y chë ínÿana, canÿe Romocama entšangbioye impuesto atjanayá. <sup>11</sup> Chocna chë fariseo, tsanana Bëngbe Bëtsábioye mëntšá ibojtsecuëntaye: ‘Bëngbe Bëtsá, cbontsatschuaná atše chë ínÿengcá ndoñe quetsatsmënama: atbëbanënga, puerte bacna soye amënga y shëmbioye ínÿaftaca íngñayënga; y ni quem Romocama impuesto atjanayacá ndoñe quetsatsmënama. <sup>12</sup> Atše sënduamana, ácaftaca jencuëntamna, canÿe semaniñe uta soye tondaye ntjascá jtsemnana; y lempe stjonÿenentšana, bnëtsanentšana canÿe soye acbiama sëndëquëcñá ca.’ <sup>13</sup> Pero chë Romocama impuesto atjanayana, bënoca yojtsemna, ni celoye ntjon-tješiyá, yojtsenócochjantšetaye y mëntšá yojtsichamo: ‘¡Atšbe Bëtsá, šmotselastemá, atšajema bacna soye amá tsmëna causa ca!’”

<sup>14</sup> Chentšana Jesús tojánayana: “Atše cbéyana, quem Romocama impuesto atjanayá chabe yebnoye tojtaná chabe bacna soyëngama perdonaná, pero chë fariseo ndoñe. Er nda cachá bëtsá tojtsenobiamná, nduamaná mochántsebema; y nda cachá nduamaná tojtsenobiamná, aíñe bëtsá mochanjábema.”

### Jesús, basetémengbiama Bëngbe Bëtsábioye tbojan-impadá

<sup>15</sup> Entšanga imojanamana Jesúsbioye basetémenga junatsana chauabájajuama, y Bëngbe Bëtsábioye chëngbiama chaboimpadama; pero chë uatsjédayënga chca tmojaninýe ora, tmojanontsé chë basetémenga unachayënga jtsécácanana. <sup>16</sup> Pero Jesusna chë basetémenga tojánachembo, y mëntšá tojánayana: “Cachcá mónýaye chë basetémenga átšbioye chamuabo, y ndoñe matéuyanana; er Bëngbe Bëtsabe amëndayana endmëna chë mo quem basetemëngcá imomnëngbiama. <sup>17</sup> Ndegombre cbéyana, nda Bëngbe Bëtsabe soyënga ndoñe tonjóyëngacñe mo canýe basetemcá jtošbuáchiyëse, cha ndoñe queochatobeyaye Bëngbe Bëtsabe amëndayoye jamashënguama ca.”

### Canýe bomna entšá Jesúsbioye tojána

<sup>18</sup> Canýe mandayá Jesúsbioye tbojantjá: —Tšabe Bu-atëmbayá, ¿ndayá šojtsemna jamana chë nyetsca tescama yomna tšabe vida jtsebomnama ca?

<sup>19</sup> Y Jesús tbojanjuá: —¿Ndáyeca šcjauyana “tšabia ca”? Tšabia nýe canýa endmëna: Bëngbe Bëtsá. <sup>20</sup> Aca condétatšëmbo ntšamo Bëngbe Bëtsá tojanmandacá: “Acbe shema ínýaftaca ndoñe cattseíngñaye, inýa ndoñe catjóba, ndoñe catjatbëba, ndoñe catjuaboínýena y acbe bëtsétsata ndoñe stëtsoye catjáquedaye ca.”

<sup>21</sup> Chora chë boyabása tbojanjuá: —Atše lempe chca bāsetema orscana sēndocumplina ca.

<sup>22</sup> Jesús chca tojanuena ora, tbojanijana: —Cabá canýe soye cmontsebuáshbena jamana: lempe ntšamo icobomncá cochjetsatobuiye, y chë crocénana, ndbomnëjémënga cochtsatšataye; chca, celoca canýe bëts bomnana cochántsebomna. Chentšana, cochjabo y šcochjuasto ca.

<sup>23</sup> Chë entšá chca tojanuena ora, puerte ngménaca yojtsemna, er cha corente bomná inamna. <sup>24</sup> Chca ngmená tbojaninýe ora, Jesús tojánayana: —¡Yapa totcá bomnëngbiama entsemna Bëngbe Bëtsabe amëndayoye jamashënguama! <sup>25</sup> Ndegombre, más paselo endmëna canýe camello chë coshufjentsá atëfjnëjana chauachnëngo, y ndoñe canýe bomná Bëngbe Bëtsabe amëndayoye jamashënguana ca.

<sup>26</sup> Chora, chë chca imojouenënga tmojánayana: —¿As nda yochjobenaye atsboaná jtsemnana ca?

<sup>27</sup> Y Jesús tojanéjua: —Ndayá entšanga ndoñe mondobena jamana, Bëngbe Bëtsá aíñe endobena jamana ca.

<sup>28</sup> Chora Pedro, Jesúsbioye tbojanijana: —Bëngbe Utabná, aca contsonýá, bënga lempe chë fsëndbomna soyënga fsënjéshoshjona, y ácaftaca fsëntsajna ca.

<sup>29</sup> Jesús chora tojanéyana: —Ndegombre cbéyana, ndánaca Bëngbe Bëtsábioye jasérviana, chabe amëndayama jtsabuayiyayëse, cachcá tojéftshoshjona chabe yebna, shema, catsátanga, bëtsétsanga o básenga, <sup>30</sup> cha mora quem luarentše chë soyëngama

más echanjóyëngacñe, y chë inýe luarocna, chë nyetsca tescama yomna tšabe vida ca.

### Jesús cachiñe tojánayana cha jóbanama y jtayenama

<sup>31</sup> Jesús chabe bnétsana uta uatsjédayënga barie tojánachembo, y mëntšá tojanéyana: “Šmontsetátšëmbo mora Jerusalenoje bënga montsajnama, y choca lempe echanjochnëngo ntšamo chë Bëngbe Bëtsabe juabna oyebuambnayënga, chë Bëngbe Bëtsá Entšá tbojanbemabiama tmojanabemcá; <sup>32</sup> er choca cha chë ndoñe judiëngbe cucuatšifne mochanjáboshjona, y mochantšáboyejuana, mochanjóyenguango, mochantsebuashëttoj; <sup>33</sup> y chamojátjanjentsana, mochanjóba, pero unga tianoye cha echántayena ca.”

<sup>34</sup> Chë uatsjédayënga tondaye tonjanësertá, ni montsetátšëmbo ndayá bëtsemnana ntšamo Jesús yojtsëtsësnacá, er chëngbiama yojamna josértama ndopodena soyënga.

### Jesús, Jericó puebloca canýe jtanábioye tbojanshná

<sup>35</sup> Tojanopasá, Jesús Jericó puebloje yojtsebëconaye ora, canýe jtaná benache juachañe inatbemana, lemošna otjanañe. <sup>36</sup> Entšanga chëjana imojtsach-nëjuanama tojanuena ora, yojanotícia ndayá yojtsopasana ca, <sup>37</sup> y chë entšanga tmojanijana, —Jesús Nazaretocá entsebeconá ca.

<sup>38</sup> As cha yojontsé uayebuáchana: —¡Jesús, Davíd-bentšana Entšá, šmotselastemá ca!

<sup>39</sup> Chë natsana imojtsajnénga chë jtaná imojtsácanana, iytëca chaóbbemama; pero cha más yojtsáye-buache: —¡Davídbentšana Entšá, šmotselastemá ca!

<sup>40</sup> As Jesús tojantsá y tojanmandá cha chamobetšama. Cha ya bécoñe yojtsemna ora, Jesús tbojantjá:

<sup>41</sup> —¿Ndayá cojtseboše atše acbiama chjamama ca?

Y chë jtaná tbojanjuá: —Atšbe Utabná, atše séntseboše chašuatábínýnama ca.

<sup>42</sup> Chora Jesús tbojanijana: —Matinýe, Bëngbe Bëtsábeñe betsošbuachéyeca shnaná contsatmëna ca.

<sup>43</sup> Y cachora cha tšabá ibojtabinýna, y Jesúsbioye ibojtséstona, Bëngbe Bëtsá atschuanaye. Y nyetsca entšanga, chca tmojaninýe ora, Bëngbe Bëtsá imojtsatschuanaye.

### Jesús y Zaqueo

**19** Jesús Jericó puebloca tojánashjango ora, chë pueblëjana cha yojtsachnéjuana. <sup>23</sup> Chora, canýe bomna entšá, chë Romocama entšanga impuesto atjanayëngbe amëndayá, Zaqueo ca uabainá, yojtseboše Jesús jinýama. Pero ndoñe yontsobena jinýama, bëtscá entšanga causa y cha becuca inamna causa.

<sup>4</sup> Chcasna, cha betesco natsanoye tojaftsanótjajo y canýe sicomoro betiyeshoye tojánašëngo, chca, Jesús chëjana tojtsachnéjuana ora, jinýama jobenayama.

<sup>5</sup> Jesús chë betiyeshoye tojánashjango ora, tsbanánoye tojanontješé y Zaqueobioye tbojaninýe. As Jesús tbojanijana: “Betsco chocana matastjango, Zaqueo, er mënté chanjá acbe yebnoye jatema ca.”

<sup>6</sup> Chora Zaqueo betesco tojtanastjango y chentšana puerte oyejuayá Jesúsbioye tbojanofja. <sup>7</sup> Entšanga chca tmojaninye ora, tmojanontsé Jesusbe contra mēntšá ichámuana: “Jesús tonjá canye bacna soyēnga amabe yebnentše jatema ca.”

<sup>8</sup> Chora Zaqueo tojantsá, Bēngbe Utabná Jesús-bentše, y mēntšá tbojaniyana: —Mouena, atšbe Utabná, atšbe bomna soyēnguentšana tséntsane ndbom-nějémēnga chanjátšataye y nda más crocénana tijéft-seyēngacá, chē ntsachetšá tijéftsefcama canta soye más chantoyiye ca.

<sup>9</sup> As Jesús tbojaniyana: —Mēnté, aca acbe bacna soyēnguentšana atsbočaná contsemna, er Zaqueo, ácnaca Abrahám-bentšana entšá condmēna. <sup>10</sup> Er chē Bēngbe Bētsá Entšá tbojanbemá tojabo chē pochocánēnga jtsemnama imojtsajnēnga jabétsanguanguama y jabátsebacama ca.

### Chē crocénanama cuento

<sup>11</sup> Entšanga chē soyēnga imojtsuenana, y Jesús inye soye tojanacuntá jabuátambama, er cha ya Jerusalén béconana yojtsemna, y entšanga imojtsejuabnaye chē Bēngbe Bētsabe amēndayana ya yochjanóshjango ca.

<sup>12</sup> Jesús tojanéyana: “Canye luarentša uámana entšá inye bēn luaroye yojá, cachabe luarentša rey chamobemama y chentšana cachábioye jtama. <sup>13</sup> Cabá nda ora, chabe bnétsana oservénēnga yojáchembo y bētsá crocénana cada cánýabioye yojéft-sayentšbuachiye, y mēntšá yojéftseyana: ‘Quem crocénanaca trato šmochjábema atše candētabēntscuana ca.’ <sup>14</sup> Pero cachabe luarentša entšanga cha imojuáya, as chēngna básefta entšanga imojichamuá chē inye bēn luaroca mēntšá chamuayanama: ‘bēnga ndoñe queftsátsboše cha bēngbe rey chaotsemnama ca.’

<sup>15</sup> “Pero pronto chē luarentša rey cha imojábema. Y chē luaroye yojtá orna yojamánda chē crocénana yojéftsayentšbuáchenga chamobéconama, jtsetatšēmbuama ntsachetšá cada ona chē crocénanaca yojongánama. <sup>16</sup> Chē natsaná yojáshjango y yojayana: ‘Taita, acbe crocénana bnétsana soye más tonjoboté ca.’ <sup>17</sup> Y chē rey ibojojuá: ‘Tša tšabá, tšabe oservená. Aca quem base soyiñe ntšamo tchojamandacá tšabá tcojámayeca, bnétsana pueblentša mandado chacotsemnama cbojayé ca.’ <sup>18</sup> Chentšana inya yojáshjango y yojayana: ‘Taita, acbe crocénana shachna soye más tonjoboté ca.’ <sup>19</sup> Y chē rey ibojauyana: ‘Acnaca shachna pueblentša mandado cochántsemna ca.’

<sup>20</sup> “Chorna inya yojobeconá y mēntšá yojayana: ‘Taita, muentše acbe crocénana entsatsmēna; canye pañueléjuañe bonguana sēntsejajo. <sup>21</sup> Atše acbiama uatjana šonjuábuache, er aca canye tšátjaye entšá condmēna; aca chē ndoñe condbuajonentšana jocñana y chē ndoñe tconjajé luarentšana jaja saná jobjuátbanana ca.’ <sup>22</sup> As chē rey ibojauyana: ‘Bacna oservená, cach acbe palabrēngaca chanjínyaníyie aca ndoñe tšabá tconjamama. Atše chē ndoñe sēndbuajonentšana jocñana y chē ndoñe sēnjajé luarentšana jobjuátbanana tsuamanama icojátatšēmbēse,

<sup>23</sup> ¿ndáyeca ndoñe tconjá chē crocénana bancoca jet-sobuájua, y atše camoye matijtabo ora, maštoyé chē crocénana y chē chentšana tojoboté crocénanēnaca ca?’ <sup>24</sup> Y chē chentše imojtsemna entšanga yojáuyana: ‘Chē crocénana motseboca y chē bnétsana soye más tojabotébioye chana motsatšeta ca.’ <sup>25</sup> As chēnga imojojuá: ‘¡Pero cha ya bnétsana soye más entsebomna ca!’ <sup>26</sup> Y chē rey yojójuá: ‘Atše cbéyana, nda tojtsebomnábioye, más mochanjátšetaye; pero nda tondaye tondbomnábioye, chē tojtsejuabná batšatema yobomna sóynaca mochántseboca ca.’ <sup>27</sup> Y chē atše uayayēnga, chē chēngbe rey atše chaitsemnama ndoñe monjánbošēngna, moye mēnatse y atšbe delante šmochtsébaye ca’ ” —cha chora yojayana.

### Jesús Jerusalenoye tojánashjango

<sup>28-29</sup> Chca tojéftsanayana chentšana, Jerusalenoye yojétsaye ora, Jesús tojánashjango canye tjšashoye, Olivos ca uabáiniñe, Betania y Betfagé pueblēnga béconana.

Chora, uta chabe uatsjēndayata tojanichamó, <sup>30</sup> mēntšá jáuyanēse: “Tsēndatbe natsana entsemna base pueblotémoye motsata. Chašojáshjango ora, canye burrotema utsbuaná šochanjínýena. Chábeñe cabá ndocná tonjenojayé. Šochjuajafjoná y šochjuá-natse. <sup>31</sup> Y nderado nda ndáyeca šojtsajafjná ca chac-mojátjasna, šochjauyana: ‘Bēngbe Utabná bontsá-jaboto ca.’ ”

<sup>32</sup> Chē uatsjēndayata tbojána y lempe ntšamo Jesús tojanéyancá tbojaninye. <sup>33</sup> Y chē burrotema imojtsajafjná orna, chē burrotema nduiñēnga tmojanéyana: —¿Ndáyeca chē burrotema šojtsajafjná ca?

<sup>34</sup> Chora chata tbojánayana: —Bēngbe Utabná bontsajabótoyeca ca.

<sup>35</sup> Chentšana Jesúsbioye chē burrotema tmojanánatse, y chē burrotémbeñe chatbe entšayá tbojanánatse, y chábeñe Jesús tmojanenjayé. <sup>36</sup> Y cha yojtsach-néjuana ora, entšanga chēngbe entšayá benachējana imojtsētétsatsana.

<sup>37</sup> Olivos tjšashe tšmanoye yojtsebeconá ora, chē bētsá entšanga, Jesúsbeñe ošbuáchiyēnga, tmojanontsé uayebuáchana y Bēngbe Bētsá oyejuayēnga jētschuayana, Bēngbe Bētsabe obenánaca bēts soyēnga Jesús tojanmama. <sup>38</sup> Chēnga mēntšá imojtsichamo: “¡Corente bendición bomná chaotsemna, chē Bēngbe Utabnabe obenánaca tojabo Rey ca! ¡Celoca tšabá entsemna! ¡Bēngbe Bētsá matschuanga ca!”

<sup>39</sup> Chē entšanguentše básefta fariseunga imojtsemnēnga, Jesús tmojaniyana: —Buatēmbayá, acbe ústonēnga mēcácana chca ndoñe chamondétsáye-buachama ca.

<sup>40</sup> Pero Jesús mēntšá tojanéjua: —Ndegombre cbéyana, mēnga iytēca tmojobiamēse, chē ndētšben-ga muanjuayebuáchena ca.

<sup>41</sup> Jesús Jerusalén béconana tojánashjango, y chē bēts pueblo tojáninye ora, chentša entšangbiama tojánenobošachna. <sup>42</sup> Y mēntšá tojánayana: “¡Malaye šmēntsetátšēmbó, nýe mo mēnténaca, ndayá yojtseita tšēngaftangbeñe lempe tšabá chaotsomñama! Pero

mora chë soye tšëngaftangbe bominyama entsëitëmena. <sup>43</sup> Er Jerusalenoca bacna tenga echanjóshjango; chora uayayënga chentša shëconánëjana canye tapiëse mochantsepórma, mochantsejëtja y nyetsca juachoicana mochanjontsé tšëngaftanga jtsatsejana, <sup>44</sup> y lempe mochantsepochóca. Muentša oyenënga mochantsëbaye, y ni mo canye ndëtšbé inyëbé juatsboca quemochaiseboshjona, chë Bëngbe Bëtsá tšëngaftanga jätsebacama tojabo ora, ndoñe chešmatoye-uná causa ca” —Jesús tojánayana.

### Jesús, Bëngbe Bëtsabe bëts yebnentšana enënga y obuámnyënga tojtanébuacna

<sup>45</sup> Chentšana, Bëngbe Bëtsabe bëts yebnoye Jesús tojánamashëngo y tojanontsé chë chentše imojtšenënga chentšana jtëbuacnana, <sup>46</sup> y tojanéyana: “Bëngbe Bëtsá chabe uabemana palabrenguiñe tojayana: ‘Atšbe bëts yebna echántsemna átseftaca encuëntaye yebna ca’, pero tšëngaftangna, atbëbanëngbe oyeñiñe chë yebna šmojtsebema ca.”

<sup>47</sup> Y cada te, Bëngbe Bëtsabe bëts yebnentše Jesús entsänga yojtsabuátambaye; y bachnangbe amëndayënga, ley abuátambayënga y chë pueblentša mandayëngnaca imojtsenguaye ntšamo jamëse cha jóbana. <sup>48</sup> Pero ndoñe tmonjáninyena ntšamo, er nyetsca entsänga corente imojtseyeyunana ntšamo cha yojtsoyebuambnacá.

### Jesúsbe obenana

**20** Canye te, Bëngbe Bëtsabe bëts yebnentše Jesús yojtsabuátambaye, y chë tšabe noticiëngama yojtsabuayiyá ora, tmojánashjajna bachnangbe amëndayënga, ley abuátambayënga, judiëngbeñe bëtšëmëngcá mandayëngaftaca cányiñe; <sup>2</sup> y Jesús tmojaniana: —Šméyana; ¿ndaye deréchoca chë contsama soyënga aca cojtsama ca? o ¿chca jtsamama nda obenana tcmënjatšetá ca?

<sup>3</sup> Chora Jesús tojanéjua: —Atšnaca canye soye séntsebmoma tšëngaftanga jatjayama. Šmochjojuanga. <sup>4</sup> ¿Nda Juan chë Ubayaná tbojanichmó entsänga jubáyama, Bëngbe Bëtsá o entsänga ca?

<sup>5</sup> Chora chënga tmojanontsé enatsëtsnayana: “Bëngbe Bëtsá ca’ chamojojuase, cha šochanjáuyana: ‘As ¿ndáyeca chábeñe ndoñe šmonjanošbuaché ca?’ <sup>6</sup> Y ndoñe quemuátobena jayanana ‘entsänga ca’; entsänga ndëtšbéngaca buattsëbaye, er nyetscanga becá mondëjuabná Juan ndegombre Bëngbe Bëtsabe juabna oyebuambnyá yojamnama.” <sup>7</sup> Chcasna, chënga tmojanjuá ndoñe monjántatšëmbo nda Juan tbojanichmó entsänga jubáyama ca.

<sup>8</sup> Y Jesús tojanéyana: —Asna atše cach ndoñe quechochatéyana ndaye deréchoca chca stsama ca.

### Chë puerte bacna trabájayëngbiama cuento

<sup>9</sup> Chentšana Jesús tojanontsé entsänga jáuyanana, y quem cuëntoca tojanabuatambá: “Canye entsá uvas betiyënga yojáye y chë fshantse inye trabájayënga yo-

júyentsäme, y baytescama bën luaroye yojtsoñe.

<sup>10</sup> Chë uvasëšangá juashacama tempo yojobuache orna, chë jajañe nduiño canye oservená ibojíchmuá chë trabájayënga jáuyanama ntsachetšá cha ibojtsotocánama. Pero chëngna cha imojtsejantšetaye, y tondaye ntoyiyá imojtichmuá. <sup>11</sup> Chentšana inya ibojíchmuá; pero chë trabájayënga cha imojtsejantšetaye, imojtsóyenguango, y tondaye ntoyiyá imojtichmuá. <sup>12</sup> Chë nduiño inya ibojatichmuá; pero chánaca chënga imojtsejantšetaye, imojtselšia, y chentšana imojtábocna.

<sup>13</sup> “Chora chë nduiño yojeniyana: ‘¿Y mora ntšamo chjama ca? Cach atšbe bonshana uaquiñá chanjíchmuá; nderádose cha aíñe mochanjóyeyunaye ca.’ <sup>14</sup> Pero chë trabájayënga, chë uaquiñá imojinye orna imojeniyana: ‘Mua chë fshantse nduiñbe uaquiñá entsemna. Lempe chabe soyënga mua echanjóyëngacñe; motsóbanga y nyetsca chabe otocana soyënga bëngbiama echanjoquëda ca.’ <sup>15</sup> Chcasna, chë uvas jajañentsana cha imojtsábocna y imojtsóba.”

Chora Jesús tojanatjá: —Y asna, ¿ntšamo šmojtsejuabná, ndayá chë jajañe nduiño chë trabájayëngaftaca yochjama ca? <sup>16</sup> Cha co echanjá y chë trabájayënga echanjtsëbaye, y chë uvas betiyënga jajañe inye trabájayënga echanjárrendaye ca.

Chë entsänga chca tmojanuena ora, tmojánayana: —¿Bëngaftaca ndocna te chca chaondopasá ca!

<sup>17</sup> Pero Jesús tojanënyanýe y tojánayana: —As ¿ndayama Bëngbe Bëtsabe uabemana palabrenguiñe iuayana?:

Chë yebna jebuanënga tmojtsanaboté ndëtšbé, mora chë más bëts uashacuanëšentše entsejájona ca. <sup>18</sup> Ndánaca chë ndëtšbeñe chaojotsatšá, chëbé bochántsatcacaye; y chë ndëtšbé ndábeñnaca chaojótatše, polvëshe bochántsebmoma ca —Jesús tojánayana.

<sup>19</sup> Chë bachnangbe amëndayënga y ley abuátambayënga tmojanenótatšëmbona Jesús chca tojanacuntá jinýanýiyama, chënga mo chë puerte bacna trabájayëngcá imojamnama; asna tmojánbošena cachora jishachana, pero entsangbiama imojtsauatja.

### Chë Romoca bëts mandadbiama impuesto jtsatsquécj-nayama

<sup>20</sup> Chentšana chënga báseftanga tmojanichamó, mo ndegombre tšabe entsänga cuaftsemncá chamobi-amëse, Jesús jisháchichiyama, nderado ndayá cha tojajaniñe; y chca chënga jobenayama cha jishachana y chëngbe mandádbioye juanatsama. <sup>21</sup> As chënga tmojantjá: —Buatëmbayá, bënga fsëntsetatšëmbo ntšamo aca cojtsoyebuambná y cojtsabuatambacá ndegombre tšabá yomnama, ntšamo ndegombre Bëngbe Bëtsá yobošcá, y acbiama tondaye quenatámana nda más uamaná o nduamaná tomnana. Aca contsabuatambá ndegombre tšabe vida jtsebmomnama, ntšamo Bëngbe Bëtsá yomandacá. <sup>22</sup> Chcasna, šméyana, ¿tšabá tayojssemna bënga, César, chë Romoca bëts mandadbiama, impuesto jtsatsquécj-nayana o ndoñe ca?

<sup>23</sup> Jesús yojtsetátšëmbo, ntšamo cha tojayaniñe jisháchichiyama chënga imojtsebošama; as tojanéyana: <sup>24</sup> —Chë šmatsquëcjiná crocénana šminýinýenga ca; ¿ndabe jubíá chë crocenániñe yojtsemna, y ntšamo muentše entsabemancá nda chca iuabaina ca?

Y chënga tmojanjuá: —Césarbe jubíá; cha chca enduabaina ca.

<sup>25</sup> Y Jesús tojanéyana: —César šmochttoyie cha ibotocana soye; y Bëngbe Bëtsana cha ibotocana soye ca.

<sup>26</sup> Y chca, chë ichmónënga ndoñe imonjobenaye jisháchichiyana, ndayá cha entšangbe delante tojayaniñe. Masna, ntšamo tojanéjuama, ojnánënga iytëca imojbiama.

### Obanënga jtayenama Jesús tmojantjá

<sup>27</sup> Chentšana, báseftanga saduceo ca uabaina entšanga tmojána Jesús jinýama. Chënga imojanjuabná obanënga ndocna te ntayenana ca. Jesús mëntšá tmojantjá: <sup>28</sup> —Buatëmbayá, Moisés bëngbe leyënguñe tojëftsababema, nderado canýe boyá tojtsóbana y básenga ndoñe tonjëftsabáshejuanësna, canmëna chë uabentsá chë shémaftaca jtobouamayana, chca, chë chabe uabochená obanabiama básenga jtsabamnama ca. <sup>29</sup> Chcase, canýe bëngbentše canýsëfta catsátanga monjamna. Chë natsaná tonjanobouamá y tontsanóbana, básenga ntjëftsabashejuancá;

<sup>30</sup> chentšana chë inýa chë shémaftaca tonjanobouamá, y cachcá tonjanopasá. <sup>31</sup> Chë inýe uabentsá chora cháftaca tonjanobouamá, pero tontsanóbana básenga ntjëftsabashejuancá; y cachcá, chë inýe uabentsëgnaca cháftaca tmonjanobouamá, pero nyetscanga tmonjanóbana básenga ntjëftsabashejuancá. <sup>32</sup> Cabana, chë shembásanaca tontsanóbana. <sup>33</sup> Y chcasna, chë obanënga chamojtayena ora, ¿ndabe chë canýsëfta catsatanguentšabe shema chë shembása yochtsemna, nyetscanga cháftaca tmojanobouamase ca? —chënga tmojantjá.

<sup>34</sup> Chora Jesús tojanéjua: —Quem luarentše boyabásenga y shembásenga mondbétsobouamnaye; <sup>35</sup> pero chë echanjóshjango luaroye jama y obanënguentsána jtayenama merecido jtsebuájona ma chamojobenangna, masque boyabásenga o shembásenga, ya ndoñe quemochatóbouamnaye, <sup>36</sup> ni queochátopodena chënga chamóbanama, y chca, chënga mochántsemna mo angelëngcá, y Bëngbe Bëtsabe básenga mochántsemna, obanënguentsána mochtayénayeca. <sup>37</sup> Y Moisésnaca, chë yojtsángbototjuana betiyetëmama tojanábementše, bënga šontsinýanýná chë obanënga imnátayenama; chentše Bëngbe Bëtsá tojánayana cha yomna Abraham, Isaac y Jacobëbe Bëtsá ca. <sup>38</sup> Bëngbe Bëtsá chca tojánayana ora, entsichamo cha ndoñe yondmëna obanëngbe Bëtsá, sinó aina entšangbe Bëtsá ca, er masque chënga tmojanóbana, chënga cabá Bëngbe Bëtsáftaca mondayena ca —Jesús tojánayana.

<sup>39</sup> Chora básefta ley abuátambayënga Jesús tmojanayana: —Buatëmbayá, tšabá tcjayana ca.

<sup>40</sup> Y ya ndoñe más montsenñëmua inýe soyëngama jststjanayana.

### ¿Cristo ndabe entsábentšana yomna?

<sup>41</sup> Jesús tojanatjá: “¿Ndáyeca tšëngaftanga šmnëtsichamo chë Uámana Uabuayaná, chë Cristo, Rey Davidbentšana iuabó ca? <sup>42</sup> Er cach David, chabe li-brëšañe Salmos ca uabainëšañe, tojánayana:

Bëngbe Bëtsá, atšbe Utabná Crístbioye tbojanayana: ‘Atšbe catsábioica mótbema,

<sup>43</sup> atšbe obenánaca, acbe uayayënga acbe cucuatšifne chamoquedama chjamëntscuana ca.’ <sup>44</sup> ¿Ntšámose, Cristo, Davidbentšana nántsemna, cach David ‘Utabná ca’ chábioye tbojtsabobuátmëse ca?” —cha tojanatjá.

### Jesús chë ley abuátambayëngbiama tojánayana chënga ndoñe tšabá montsama ca

<sup>45</sup> Nyetsca entšanga imojtsuenana, y Jesús chabe uatsjëndayënga tojanéyana: <sup>46</sup> “Cuedado šmochtse-bomna, y ndoñe šmattsama chë ley abuatambayëngcá; chënga jtsogusetánana bënëna entšayangaca jtsajnana, y jtsebošana tsáshenañe entšanga becá respétoca chamotsacheuanayama. Chënga chë judiëngbe enefjuana yebnënguenache chë más uámana luarënguñe jtsetbiámanana, y fiestënguñe nýa quëfseroca. <sup>47</sup> Pero chë viudángbioye chë tmobomna soyënga jtsabacayana; y entšangbe delante tšabá chacmotsënyama y chënga imojtsaíngñama ndoñe chaondëtsótatšëmbuamna, Bëngbe Bëtsáftaca tša jtsencuëntayana. Chë causa, Bëngbe Bëtsá inýengbiama más chënga echanjácastigaye ca” —Jesús tojánayana.

### Jesús yojtsënyaye chë crocénana quëcjayënga

**21** Bëngbe Bëtsabe bëts yebnentše, Jesús yojtsënyaye chë bomnënga crocénana jtsequëcjayana chë crocénana quëcjayëtëmiñe; <sup>2</sup> y canýe viudá ndbomnjëmnaca tbojáninýe, uta crocénana chëtëmiñe yojaftsesegóra. <sup>3</sup> Chora Jesús tojánayana: “Ndegombre cbéyana, quem viudá ndbomnjëjema, Bëngbe Bëtsabiama nyetscangbiama más becá tonjëftseseGORÁ; <sup>4</sup> er nyetscanga tmonjëftseseGORÁ chë yojtsóyentsjamentsána, pero chana, masque tša ndbomnjëjema, cha vida jtsebomnama lempe ntsachetšá yobomncá tonjëftseseGORÁ ca.”

### Jesús tojánayana Bëngbe Bëtsabe bëts yebna lempe mochjánpochocama

<sup>5</sup> Báseftanga imojtsichamo chë Bëngbe Bëtsabe bëts yebnama, tša yojtsebotamanana puerta uámana ndëtšbëngaca y chë entšanga imojanamana juambana Bëngbe Bëtsábioye uátšëmbona soyëngaca ca. As Jesús tojánayana: <sup>6</sup> —Canýe tempo echanjóshjango, y lempe ntšamo mora muentše šmontsonýacá tondaye

queochatoquéda, ni mo canye ndëtšbé inyebé juatsboye. Lempe mochantsepochoća ca.

**Ntšamo yochtsemna quem luare jopochócama te chaojtsobeco ora**

<sup>7</sup> Chora chënga tmojantjá: —Buatëmbayá, ¿ntseco chca yochjopása? ¿Y ndayá Bëngbe Bëtsá yochjama, chca jopásama yojtsobecuama entšanga chamotsetatšëmbuama ca?

<sup>8</sup> Y Jesús tojánayana: —Cuedado šmochtsebomna ndocná chacmondáingñema. Er banga mochanjabo y mochantsabíchamo chënga atše imomna ca. Mochántsichamo: “Atše chë Cristo sëndmëna”, y “Mora chë tempo entsemna ca”. Pero ndoñe šmatjóyaunaye. <sup>9</sup> Y tšëngaftanga, entšanga imojtsentsjanama y entšanga mandadëngbe contra imojtsemnana chašmojtsuenana ora, ndoñe šmattsauatja, er entseyta natsana chë soyënga chaochnëngo; pero masque chca, chë quem luare jopochócama tempo cabá ndoñe queochátsmëna ca.

<sup>10</sup> Y mëntšánaca Jesús tojanéyana: “Canye luarentša entšanga, inye luaroca entšangaftaca mochántsentsjanaye; y canye amëndayábentša entšanga, inye amëndayábioca entšangaftácnaca. <sup>11</sup> Ba luarënguifhe jabuache echanjuangmëmëmana, bëts shëntsana, y entšanga pochócaye šocanënga echanjóshjango; y celoca echántsemna puerte uabouana soyënga y bëts soyënga, entšanga jinyanjyama quem luare ya yocht-sopochócama.

<sup>12</sup> “Pero cabá ndoñe chca chaondochnëngo ora, tšëngaftanga cmochanjíshëche y chašmosufrima mochántsama; bënga judiëngbe enefjuana yebnëngoye cmochanjunatse játssetšenama y cárceloynaca cmochanjáutame, y reyënga y mandadëngbióynaca cmochanjunatse, atšbe ústonënga bëtsemna causa.

<sup>13</sup> Chca šmochanjapása, ntšamo atšbiama šmotatšëmbcá chënga chašméyanama. <sup>14</sup> Natsana ndoñe šmatjátsjuabnaye jenéuyanama ntšamo chora jóyebuambayana, <sup>15</sup> er atše chanjama puerte tšabá y oser-tanánaca tšëngaftanga chašmóyebuambama; y chca, tšëngaftangbe uayayënga ndoñe quemochatobenaye jayanana ndoñe tšabá šmontsichamo ca, y ndocá jajuama quemochatobenaye. <sup>16</sup> Pero uayayëngbe cucu-atšifhe cmochanjábashejuana cach tšëngaftangbe bët-sétsanga, catsátanga, pamíllanga y amiguënga; y tšëngaftanguentšana báseftanga cmochantsëbaye.

<sup>17</sup> Y nyetsca entšanga cmochantsëbuayënja, atšbe ústonënga bëtsemna causa. <sup>18</sup> Pero tšëngaftangbe bestšašentsana ni mo canye stjënëja quecmochátabajajo. <sup>19</sup> Tšëngaftanga nyets tempo átšbeñe ošbuáchiyënga chašmojtsemnëse, chë nyetsca tescama yomna tšabe vida šmochántsebomna ca.

<sup>20</sup> “Jerusalén nyets shëconana soldadënga chašmojanjye ora, šmochtsetátšëmbo Jerusalén jopochócama tojobuáchama. <sup>21</sup> Chorna, chë Judeoca oyenënga batsjabengoye chamotsacheta; Jerusalenentše chamojtsemnënga, chentšana chamuaisebocana; y chë jajenache chamojtsemnënga, Jerusalenoye ndoñe cha-

mondësamashjna. <sup>22</sup> Er chora echántsemna chë entšangbe jabuache castigo; lempe ntšamo Bëngbe Bëtsabe uabemana palabrenguifhe endayancá chora echanjochnëngo. <sup>23</sup> ¡Tša lastema chë tempo shembásenga ngomámanëngbiama o ochóchaye básenga chamojtsabamnëngbiama! Er chora corente ngmë-nana quem luarentše echántsemna, y quem luarentša entšangbiama chë uabouana castigo. <sup>24</sup> Inyënga espadéjaca mochanjóbana, y inyëngbioye nyetsca luarënguëjana utámenënga mochanjunatse; y chë ndoñe judiëngna, Jerusalenoca entšangbioye mochántsatsëjaye y mochantsëbaye, chca chaotsemnana Bëngbe Bëtsá tojalesenciantscuana ca” —Jesús tojánayana.

**Bëngbe Bëtsá Entšá tbojanbemá quem luaroye echanjésabo**

<sup>25</sup> Mëntšánaca Jesús tojánayana: “Chora bëts soyënga echantsinýna shinýifhe, juashconiñe y estrellënguifhe; y quem luarentša entšanga tša mochántsauatja, ndayá jamama ntsetatšëmbcá, chë mar béjaye y olëshënga corente echantsefshauenana causa.

<sup>26</sup> Entšanga echantsabuatëcja tša auatja causa y ndayá quem luariñe yochjopásama enócochinýena causa; er chë quem luarentša tsbanánoca espíritënga obenana bomnënga echanjángmëmëmana. <sup>27</sup> Y chora entšanga mochanjinýe, chë Bëngbe Bëtsá Entšá tbojanbemá jantšeteshiñe echántsaboye, puerte obenánaca y corente buashinýinýaniñe. <sup>28</sup> Chë soyënga jochnënguama chaojoboatšë ora, añemo šmochjentsetaye y bestšaše játsbanase šmochjarrepára, er chora echántsemna chë tšëngaftangbe atsebacayana ca” —Jesús tojánayana.

<sup>29</sup> Mëntšánaca Jesús tojanéyana jabuátambama: “Šmochjinýe canye higo betiye o ndaye inye betíynaca.

<sup>30</sup> Tojtsaiséjotsanama šmojinýe ora, jtsatšëmbuana chë tšabe tempo ya yojtsaisobecuama. <sup>31</sup> Cachcá, chë soyënga yojtsëchnëjuanama chašmojinýe ora, šmochtsetátšëmbo chë Bëngbe Bëtsabe amëndayana ya yojtsobecuama.

<sup>32</sup> “Ndegombre cbéyana, lempe chca echanjochnëngo, morsca entšanga cabá ndóbana ora. <sup>33</sup> Celoca y quem luare echanjopochóca, pero atšbe palabra ndocna te queochaisopochóca.

<sup>34-35</sup> “Cuedado šmochtsebomna y ndoñe šmatjalesencia tšëngaftangbe ainana bacna juabnéngaca chaotsemnana, jenomándama ntsobencá mocá enobuena causa, tmoye causa y nye quem luarentša soyëngama enócochinýena causa; y tšëngaftanga prontánënga šmochtsemna, nye ndeolpe chë te chaojobuache ora; y tšëngaftanga ndëprontánënga ndoñe chašmondëtsemna, mo tšëngaftangbiama canye uachmaniñe cuaftsemncá. Er nyetsca quem luarentša entšangbiama chca echántsemna. <sup>36</sup> Cuedado šmochtsebomna y yejuana šmochtsantješna; nye ntseco órnaca Bëngbe Bëtsáftaca šmochtsencuentaye, chca, chë echanjopása soyëngama jótsbocama chašmobenama, y chë



Bëngbe Bëtsá Entšá tbojanbemabe delante jashjan-guama ca” —Jesús tojanéyana.

<sup>37</sup> Jesús, bnété Bëngbe Bëtsabe bëts yebnentše yo-jánabuatambaye, y ibetna, Olivos uabaina tjšashoye yo-jánaye joquédama. <sup>38</sup> Y nýetsca entsanga cabá cachëse Bëngbe Bëtsabe bëts yebnoye imojánajna Jesús joyeu-nayama.

### Entšanga tmojanjuabó ntšamo jamëse Jesúsbioye jishachama

**22** Ya yojétsobeco Bashco fiesta, chë levadúraca ndëpormana tandëse saye fiesta, chë Bëngbe Bëtsá Egiptocana judiëngbe bëts taitanga tojánatseba-cama jtenójuaboyama. <sup>2</sup> Chë bachnangbe amëndayënga y ley abuátambayënga imojtsenguaye ntšamo jamëse Jesús jóbana, pero entsangbiama imojtsauatja.

<sup>3</sup> Chora Satanás, Judas chë Iscariote ca uabobu-atmabe ainaniñe bacna juabnënga tojanajó. Chánaca yojamna chë bnétsana uta uatsjendayënguentsá; <sup>4</sup> y tojána, chë bachnangbe amëndayënga y Bëngbe Bëtsabe bëts yebnocca soldadëngbe amëndayëngaftaca jencuéntama, ntšamo Jesús chëngbe cucuatsiñe jayentšbáshejuanama. <sup>5</sup> As chënga imojóyejuaye, y Judas tmojanšbuachená crocénana chama jtatsetayana. <sup>6</sup> Y Júdasna aífne ca tojánayana; y cach orscana cha yo-jtsenguaye ntšamo jamana y ndëmua ora Jesús chëngbioye jayentšbáshejuanama, ndocna entsanga ora.

### Jesús chabe uatsjéndayëngaftaca Bashco saná tojanse

<sup>7</sup> Chë Bashco fiesta ora tojanóshjango, chë levadúraca ndëpormana tandëse sayté; chë te yojamna, Bëngbe Bëtsá jëtschuayamna canýe oveshá jóbana chora jasama. <sup>8</sup> As Jesús, Pedro y Juánbioye tojanéyana: —Motsata y saná šochjapróna Bashco fiestama bënga mochjasama ca.

<sup>9</sup> Chora chata tbojantjá: —¿Ndémoca cojtseboše chë saná fchjapróntama ca?

<sup>10</sup> Y Jesús tojanéjua: —Jerusalenentše chašojá-mashëngo ora, canýe bacó cmochanjóbiatše, matbajiñe búyeshe echantsabuyambaye. Cha šochjuasto, y šochtsonýaye ndëmuanýe yebnentše cha yochjá-mashënguama; <sup>11</sup> y chentša nduiño šochjauyana: “Chë Buatëmbayá šonjichamó aca jauyanama: ‘¿Ndayentše chë tsañe yojtsemna, Bashco saná atše atšbe uatsjéndayëngaftaca jasama ca?’ ” <sup>12</sup> As cha cmochanjínýanyíye canýe bëts tsañe, tsbanana pisoca; ya lempe echántseprontana, y chentše, Bashco fiestama saná šochjapróna ca.

<sup>13</sup> As chë útata tbojána, y tbojáninýena lempe ntšamo Jesús tojanéyancá, y chentše chë Bashco saná tbojanprontata.

<sup>14</sup> Jasama tojanobuache ora, Jesús mesëshentše tojanótbema chabe uatsjéndayëngaftaca, chë cachënga más chcoye chabe ichmónënga ca uabáinënga. <sup>15</sup> Chora Jesús tojanéyana: “Tša sëndánboše quem Bashco saná tšëngaftangaftaca jasama, atše cabá ndoñe chandësufrí ora. <sup>16</sup> Muentšana ndoñe más quemëntša

saná quicháisesse, Bëngbe Bëtsabe amëndayana candóshjanguëntscuana. Chora echantsótatšëmbo ntšamo quem fiesta ndegombre iuayancá ca.”

<sup>17</sup> Chorna canýe coptema vínoyeca tojanaca, Bëngbe Bëtsábioye tbojtanchuá y mëntšá tojánayana: “Quem coptema vínoye menáfšënga; y cbëyana, <sup>18</sup> chë uvas betiyentša shajuanentšana obocniye ndoñe más quichaisofšiye, Bëngbe Bëtsabe amëndayana candóshjanguëntscuana ca.”

<sup>19</sup> Chentšana, tandëse tojanca y Bëngbe Bëtsábioye tbojtanchuá; tojanjatá, tojanatšatá y mëntšá tojánayana: “Quem soye, atšbe cuerpo entsemna, y chanjóbana tšëngaftangbe tšabiama. Ntšamo mora bënga montsamcá šmochtsama, atšbiama jtenójuaboyama ca.”

<sup>20</sup> Tmojansentšana, chë coptémaca tojanma cachcá ntšamo chë tandëseca tojanmcá y mëntšá tojánayana: “Quem coptema vínoye entsemna chë Bëngbe Bëtsabe tsëm trato entsángaftaca. Atšbe buiñe echanjuábuashana, tšëngaftanga chašmotsetatšëmbuama ntšamo Bëngbe Bëtsá entsanga tojanašebuachenacá ndegombre yochjochnënguama. Chë buiñe tšëngaftangbe tšabiama echanjuábuashana. <sup>21</sup> Pero chë uayayëngbe cucuatsiñe šochjaboshjoná, mesëshentše átšeftaca entsemna. <sup>22</sup> Ndegombre, chë Bëngbe Bëtsá Entšá tbojanbemáftaca echanjopása, ntšamo Bëngbe Bëtsá chabiama tojanjuabocá. ¡Pero tša lastema chë bochjáboshjonabiama ca!” —Jesús tojánayana.

<sup>23</sup> Chorna chë uatsjéndayënga tmojanontsé entjanayana, chënguentsá nda chë boshjuaná bëtsemnana.

### Nda chë más uamaná yomna

<sup>24</sup> Chë uatsjéndayënga imojtsenatsëtsnaye chënguentsá nda chë más uamaná bëtsemnana. <sup>25</sup> As Jesús tojanéyana: “Chë ndoñe judiëngbeñe, chë reyënga chëngbe entsángbioye nýe ntšámnaca jtsamëndayana, y chentša amëndayënga jtsamana, entsanga chëngbioye tšabe soye amënga ca chamotsëbobuátmama. <sup>26</sup> Pero tšëngaftangbeñe ndoñe chca chaondëtsemna; chamna, tšëngaftangbeñe chë más uamaná mo chë más basacá chaóbema, y chë mandayá mo chë oservenacá. <sup>27</sup> Er, ¿ndase chë más uamaná yomna, chë mesëshentše jasama tojotbemá o chë uajuatš-nayá? Ndegombre co chë mesëshentše tojotbemá; pero atšna tšëngaftangbeñe sëntsemna mo chë oservenacá.

<sup>28</sup> “Atšbe padecëniñe tšëngaftanga sempre átšeftaca šmondëtsemna. <sup>29</sup> Chíyeca, atšbe bariëna, canýe amëndayana cbochanjátšataye, ntšamo atšbe taitá canýe amëndayana šojatštacá; <sup>30</sup> chca, atšbe amëndayoca mesëshentše átšeftaca šmochanjase y šmochanjofšiye, y uámana tbemaniñe mo reyëngcá šmochanjotbiama, chë Israeloca bnétsana uta pamíllanga entsangbiama chašmuayanama tšabá o ndoñe tšabá chënga tmonjamama ca” —Jesús tojánayana.

### Jesús tojánayana, chábioye ndoñe bonjanabuátma ca Pedro yochjánayanama

<sup>31</sup> Jesús mēntśánaca tojánayana: —Simón, Simón; cochtsetátśēmbo, Satanás obenana tonjotjañe tśēngaftangaftaca n̄ye ntśám̄naca jamama, mo chē trigo matēnga tcojtsashatiyeynacá; <sup>32</sup> pero atśna Bēngbe Bētsá sēnjaimpadá, átśbeñe ośbuáchiyana ndoñe chacmondētsebuáshbenama. Y aca, n̄yets os-  
buáchiyana átśbeñe chacojtsatsbomna ora, chē in̄ye ośbuáchiyēnga cochjújabuache átśbeñe sempre chamotsośbuáchemaca.

<sup>33</sup> Chora Simón tbojaniyana: —Bēngbe Utabná, atśe sēntseprontana ácaftaca cárceloye jámnaca y jobanámnaca ca.

<sup>34</sup> Y Jesús tbojaniyana: —Pedro, atśe cbēyana, cam ibeta bín̄yanoye, ngallo cabá ndécánta ora, aca unga soye cochanjayana ndoñe šconduabuatma ca.

#### Chē más jabuache ora yojtsobeco

<sup>35</sup> Chentśana Jesús tojanatjá: —¿Chē ni shecnájaca, ni crocenánaca, ni shecchētjonésheca tcbonjanichamó ora, nderado ndayá tcmojanabuáshebena ca?

Y chēnga tmojanjuá: —Tondaye ca.

<sup>36</sup> Chora tojanéyana: —Mora ndoñe chca; shecnaja tobomná, chēja chauesocñe y crocenánama shecnébēnaca; y nda ndoñe espadēja tondbomna, chabe quēf-saíya chaotsatábuiye y can̄ye espadēja chauatobuámiñe. <sup>37</sup> Er cbēyana, entseyta átśeftaca chaopasá, ntśamo Bēngbe Bētsabe uabemana palabrēnguiñe atśbiama iuayancá, mēntśá: “Y chábioye tmonjánin̄ye mo chē puerte bacna soye amēnguentsá can̄ya cuaftsemncá ca.” Y lempe ntśamo atśbiama iuabemancá, mora ya echanjochnēngo ca —Jesús tojanéyana.

<sup>38</sup> As chēnga tmojaniyana: —Bēngbe Utabná, muentše uta espadēja entsemna ca.

Y japochócamna cha tojánayana: —N̄ye n̄yetsá ponto ca.

#### Getsemaní luarentše, Jesús Bēngbe Bētsáftaca tbojanencuentá

<sup>39</sup> Chentśana, Jesús tojánbocna y ntśamo yojanamancá Olivos tjashoye tojána, y chabe uatsjēdayēnga tmojanasto. <sup>40</sup> Choca tmojánashjajna ora, Jesús tojanéyana: “Bēngbe Bētsá moimpadanga, bacna soye jamama ndoñe chacmondócochēnguama ca.”

<sup>41</sup> Y chē uatsjēdayēngbentśana yojoluára, mo can̄ye ndētśbé jutšenéntscoca n̄yetsá, y yojoshēntsa-mentśiye Bēngbe Bētsáftaca jencuéntama. <sup>42</sup> Jesús mēntśá tojánayana: “Taita, aca tcojtsebošēse, moma atśe ndoñe chašondētsemna chca jasúfriana. Pero ntśamo atśe stsebošcá ndoñe chaondētsemna, sinó ntśamo aca cojtsebošcá ca.”

<sup>43</sup> Chca orna celocana can̄ye ángel tbojánēbēbocna, añemo chaotsebomnama juajabuáchama. <sup>44</sup> Jesús tśa ngmēniñe yojtsemna, y Bēngbe Bētsáftaca más ibo-

jtsencuéntaye. Y chabe bosese yojtsemna mo fshantsiñe buiñe cuaftsebuastētjuancá.

<sup>45</sup> Bēngbe Bētsáftaca jencuéntama tojanpochocá ora, tojtantsbaná y chabe uatsjēdayēnga imojtsemnoye tojána; y chēnga imnētsomañe, tśa ngmēnaca imojtsemna causa. <sup>46</sup> Chora tojanéyana: “¿Ndáyeca šmotso-  
mañe? Motsbananga y Bēngbe Bētsá šmochtseim-  
padana, bacna soye jamama ndoñe chacmondó-  
cochēnguama ca.”

#### Uayayēnga Jesús tmojánishache

<sup>47</sup> Jesús cabá yojtsóyebuambnantscuana, ba entśanga chentše tmojánashjajna. Chē Judas ca uabainá, can̄ya chē bnētsana uta uatsjēdayēnguentsá, chē entśangbe natsana yojtsaye. Cha yojobeconá Jesús juamóchama; <sup>48</sup> pero Jesús tbojaniyana: “Judas, ¿can̄ye juamochēse chē Bēngbe Bētsá Entśá tbojanbemá uayayēngbe cucuatśiñe cochjaboshjona ca?”

<sup>49</sup> Chē Jesúsēftaca imojtsemnēnga tmojánin̄ye ntśamo chora yochjanopásama; as tmojaniyana: —Bēngbe Utabná, ¿espadējaca fšcotsatsejaye ca?

<sup>50</sup> Y can̄ya chēnguentsá, chē bachnangbe más uámana amēndayabe bochichnayábioye catśbioica matscuaše tbojtsantētse, y tbojtsanēstjango. <sup>51</sup> Chora Jesús tojanéyana: —Cachcá mon̄yá; n̄ye n̄yetsá ponto ca.

Y chē bochichnayábioye chē matscuaše tbojánbojajo y tbojanshná. <sup>52</sup> Chentśana, chē bachnangbe amēndayēnga, chē Bēngbe Bētsabe bēts yebnentśa soldadēngbe amēndayēnga y chē judiēngbeñe bētsē-jemēngcá amēndayēnga, chē cha juanatsama tmojánabēnga, Jesús tojanéyana: “¿Ndáyeca espadējangaca y ngarotbēngaca šmojabo atśe jishachama, mo atśe can̄ye bacá uamana entśá cuaftsemncá ca? <sup>53</sup> Atśe cada te tśēngaftangaftaca sēnjamna Bēngbe Bētsabe bēts yebnentše, y ni chešmátanbojajo. Pero ora tocjobuache tśēngaftanga chca chašmomama, y Satanás ntśamo yojtsebošcá tśēngaftangbeñe echantsemándaye ca” —Jesús tojanéyana.

#### Pedro tojánayana Jesúsbioye ndoñe bonjanabuátma ca

<sup>54</sup> Chentśana Jesús tmojánishache, y chē bachnangbe más uámana amēndayabe yebnoye tmojanánatse. Y Pedro bēnocana ibojtséstona. <sup>55</sup> Choca, chashja tsēntsaca, can̄ye íñeshe tmojanangbotjó y entśanga chē shēconana imojtsetbiámana; y Pédrēnaca chentše chēngaftaca yojótbema. <sup>56</sup> Chora, can̄ye shembása chentśa oservená, Pédrēbioye tbojánin̄ye chē iñe juachaca yojtsetbemana; tbojanon̄yin̄yé y tojánayana: —Muánaca cháftaca endánmēna ca.

<sup>57</sup> Pero Pedro ndoñe ca tojánayana, y chē shembás-  
abioye mēntśá tbojaniyana: —Sobrená, atśe cha  
ndoñe quetsatabuatma ca.

<sup>58</sup> Ndoñe yapa bēn y in̄ya chábioye tbojatanin̄ye y tbojaniyana: —Acnaca chē uatsjēdayēnguentsá condmēna ca.

Pero Pedro tbojanjuá: —Bacó, atše ndoñe quetsátsmèna ca.

<sup>59</sup> Chentša benéntscosna, inya más yojátayana: —Ndegombre, muánaca cháftaca enjánana; muánaca Galileocá entsemna ca.

<sup>60</sup> Y Pedro tojánayana: —Bacó, ndayama cojtsichámuama ndoñe quetsátstatšëmbo ca.

Cachora, y Pedro cabá yojtsóyebuambnantscuana, canye ngallo yojacánta. <sup>61</sup> Chora Bèngbe Utabná yojobuértana y Pédrèbioye tbojanonýinýé; y Pedro chora yojenójuaboye ntšamo Bèngbe Utabná tbojanianama: “Cam ibeta bínýanoye, ngallo cabá ndécánta ora, aca unga soye cochanjayana ndoñe šconduabatma ca.” <sup>62</sup> As Pedro shjoye tojánbocna, y corente ngmè-naca yojtsenóbošachna.

### Jesús imojtsáboyejuana

<sup>63</sup> Chè Jesús imojtsebojanýa entšanga cha imojtsáboyejuana y imojtsejantšetaye; <sup>64</sup> y jtsabuchèntsaquase, imojtsetjanaye: “¡Momalisiá, nda tcmènjajantšetá ca!” <sup>65</sup> Y imojtsóyenguaye, nye mocá soyènga jtsatsètsnayese.

### Jesús, chë judièngbe uámana mándayèngbe delante

<sup>66</sup> Tojanbinýna ora, chë bètsèjemèngcá améndayènga, bachnangbe améndayènga y ley abuátambayènga tmojanenefjna, y chéngbioye Jesús tmojanánatse. Choca tmojantjá: <sup>67</sup> —Šméyana, ¿aca Bèngbe Bètsabe Uámana Uabuayaná, chë Cristo comna ca?

Y Jesús tojanéjua: —Aíñe ca tbojáuyanese, tsèngaftanga chama átšbeñe ndoñe queš-mochatošbuáchiye. <sup>68</sup> Y nderado tbojájatjasna, tsèngaftanga ndoñe quešmochatojuá ca. <sup>69</sup> Pero cam orscana, chë Bèngbe Bètsá Entšá tbojanbemá, chë Bèngbe Bètsá nyets obenana bomnabe catšbioica echántatsbemana ca.

<sup>70</sup> Chora nyetscanga tmojantjá: —¿As, aca chë Bèngbe Bètsabe Uaquiñá comna ca?

Y Jesús tojanéjua: —Cach tsèngaftanga chca š-montsichamo; atše cha sèndmèna ca.

<sup>71</sup> As chora chénga tmojánayana: —¿Ndayama más entšanga šochjátèjaboto Jesusbe contra chamuayana-ma? Er cach bènga chabe uayášentšana chca tmonjouena ca.

### Jesús, Pilatbe delante

**23** Nyetsca mándayènga tmojëftsantsbaná, y Pilátbioye, chë Judeoca mandádbioye Jesús tmojanánatse. <sup>2</sup> Y chentše tmojanontšé cha mal jaquédana, mèntšá: —Bènga fsènjínýena mua entsabuatambá bacna soyènga, quem luarentša entšangbe améndayèngbioye ndètsayaunanama. Cha entsichamo bènga ndoñe šontsamna Césarbiama impuesto jtsat-squécjnyana ca; y entsichamo cha yomna chë Cristo, chë Bèngbe Bètsabe Uámana Uabuayaná, mo canye reycá ca.

<sup>3</sup> Chora Pilato Jesúsbioye mèntšá tbojantjá: —¿Aca chë judièngbe Rey cojtsemna ca?

Y Jesús tbojanjuá: —Aíñe, aca ndegombre yomncá tcjayana ca.

<sup>4</sup> As Pilato, chë bachnangbe améndayènga y entšanga tojanéyana: —Atše ni mo canye soye chiyátinýena, quem boyabása castiganá chaotsemnama jayanama ca.

<sup>5</sup> Pero chénga más tmojanáyebuachena: —Nyets Israel luarèjana entsabuatambá, Galilea entšangbe améndayèngbe contra jtsemnama. Galilea luaroca chca tonjabojatšé y mora moca Judeócnaca cachcá entsama ca.

### Jesús Rey Heródesbe delante

<sup>6</sup> As Pilato, Galilea luarama yojouena ora, tojanatjá Jesús Galileocá tajojamnama. <sup>7</sup> Y Jesús aíñe Galileoca yojamnama cha tojántatšëmbona ora, Rey Heródesbioye cha tbojanichmó. Herodes inamna Galileoca mandado y chora Jerusalenentše cha yojtsemna.

<sup>8</sup> Herodes Jesúsbioye tbojáninýe ora, corente tojanoyejuá. Chana tempscana inaboše Jesús jinýama. Cha ba soyènga Jesusbiama tojanuena, y yojtseboše jinýama Jesús jamana canye bèts soye, Bèngbe Bètsabe obenánaca. <sup>9</sup> Heródesna ba soyènga tbojantjá, pero cha ndocá tbonjanjuá. <sup>10</sup> Y chéntšnaca, chë bachnangbe améndayènga y judièngbe ley abuátambayènga imojtsemna, y Jesús corente mal imojtsequédaye.

<sup>11</sup> Chora, Herodes y chabe soldadènga Jesúsbioye corente imojtsáboyènja, y jtsaboyejuanamna, botamana entšayangá tmojanichètjo, mo canye reycá; chentšana cachiñe Pilátbioye tmojesanichmó. <sup>12</sup> Cach te Herodes y Pilato tbojtananatsètsaye; tempna chata ibojenáyata.

### Jesusbiama chaóbana ca tmojánayana

<sup>13</sup> Chentšana Pilato, chë bachnangbe améndayènga, chë pueblentša améndayènga y nyetsca entšanga tojánachembo, <sup>14</sup> y mèntšá tojanéyana: —Tsèngaftanga quem entšá átšbioye šmojuánatse, mo bacna soye entšangbeñe abuatambayacá, mandadènga ndètsayaunanama ca; tsèngaftangbe delante lempe sènjatjá, tsèngaftanga ba soyènga muabiama šmonjayana, pero atšna ni mo canye soye chiyátinýena, quem boyabása castiganá jtsemnama ibojtsemna ca jayanama. <sup>15</sup> Herodes cach ndoñe, chíyeca cachiñe bèngbioye cha tbojesichmó. Quem boyabása ni mo canye ndoñe tonjobuachjanguá jóbanama chabotsemnama. <sup>16</sup> Chcasna, jabuache chamotsecastigá y chentšana chanjètsboshjona ca —cha tojánayana.

<sup>17</sup> Yojamna canye utamená jètsboshjonana, ntšamo Bashco fiesta ora jamana imojanamancá. <sup>18</sup> Pero chora entšanga cánýiñe tmojanáyebuachena: —¡Jesús chaóbana! ¡Barrabás matsboshjona ca!

<sup>19</sup> Barrabás inautámena, mandadèngbioye ndètsayaunanama chë bèts pueblentše entšanga tojánenautanama y entšá óbanaye causa. <sup>20</sup> Pilato cachiñe

tojánayana Jesúsbioye jëtsboshjonama yojtsanboše ca; <sup>21</sup> pero entšangna más tmojtétanayebuachena: —¡Motsecrucificá! ¡Motsecrucificá ca!

<sup>22</sup> Pilato ya unga soyama tojtétanayana: —¿Ntšamo bacna soye mua tojobuachjanguá ca? Ni mo canye bacna soye chiyátinýena, mua jóbana chabotsemnana. Chcasna, chanjacastíga y chora chanjétsboshjona ca.

<sup>23</sup> Pero chëngna más imojtsechembumbuana Jesús chamotsecrucificama. Cabana, chë bachnangbe amëndayënga y chë entšangbe jabuache chembumbuanánaca, Pilato tmojanëyëñjaná Jesús chamóbama. <sup>24</sup> As Pilato tojanmandá ntšamo chë entšanga imojtsotjanañcá chaotsemnana; <sup>25</sup> as chora Pilato, Barrabásbioye cachcá tbojtanboshjona, chë nda inautámena mandadëngbioye ndëtsayaunanama entšangbioye tojánautanama y entšá óbanaye causa. Y Jesusna entšangbe cucuatšínë tbojánboshjona, ntšamo chënga tmojtsebošcá chamomama.

### Jesús tmojanrucificá

<sup>26</sup> As jacrucificama Jesús tmojanánatse. Chora jajocana inátaboye canye boyabása, Simón ca uabainá, Cirene luarocá; y cha Jesusbe cruz tmojancutsá, Jesusbe ústonoye chaotsambama.

<sup>27</sup> Y banga chë pueblentša entšanga imojtséstona; y chë shembásenga imojtsëstonëngna imojtsayošachiye y ngménaca imojtsanioye, Jesús chca yojtsepásama.

<sup>28</sup> As Jesús chëngbioye tojanobuértana y tojanéyana: “Jerusalenentša shembásenga, atšbiama ndoñe matošachena; cach tšëngaftangbiama y tšëngaftangbe básengbiama šmochjenóbošachna.

<sup>29</sup> Canye te echanjóshjango y chë te š-mochántsi chamo: ‘Tša tšabá chë shembásenga šešona ndbomnëngbiama, chë quem luaroye šešonga ndoñe tmonjëftsëshejajnëngbiama, y chë šešonga ndoñe tmonjëftsabachengbiama ca.’ <sup>30</sup> Chora entšanga jetsóitanama mochántseboše y mochanjontšë ichámuana: ‘¡Tjashënga šmotsëtebuantsá y batsjabenga šmot-saitame ca!’ <sup>31</sup> Atšë, chë ndocna bacna soye amá, chíyeca puerte obená, chca šmojaborlase, ¿ntšamo mochjama chë ndegombre bacna soye amëngaftaca, chíyeca ndobenënga? O mëntšá, ¿chë nguëfshna betíyeca chca tmojtsamëse, ntšamo chë tojtsebuashá betíyeca mochjama ca?” —cha tojanéyana.

<sup>32</sup> Jesúsëftaca cruciñë jóbana, útata bëts bacna soyënga ochjajnayátnaca imojtsënachaye. <sup>33</sup> Chë “Obanabe Bestšashe ca” uabaina luaroye tmojánashjana ora, Jesús tmojanrucificá y chë bëts bacna soyënga ochjajnayátnaca, canya chabe catšbioica y chë ínýana chabe uañicuayoica. <sup>34</sup> Chora Jesús mëntšá tojánayana: “Taita, mëngbe bacna soye motsaperdónaye, er ntšamo montsamama chënga ndoñe quemátstatšëmbo ca.”

Chë soldadënga Jesusbe entšayamna, tsbanánoye tmojanétsëna, chënga jtenájatayama. <sup>35</sup> Entšanga chentšë imojtsemnënga chca imojtsonýaye, y chë pueblentša mandayëngnaca Jesús imojtsáboyejuana y

mëntšá imojtsenatsëtsnaye: “Inyëngna aíñë tojëftsatsebacá; mora cachá chauentsbocá, cha ndegombre Cristo, chë Bëngbe Bëtsabe Uámana Uabuayaná tomnëse ca.”

<sup>36</sup> Soldadëngnaca Jesús imojtsáboyejuana; tmojanobeconá y untja vínoye imojtsefšëšnaye, <sup>37</sup> y mëntšá imojtsatsaye: “¡Chë judiëngbe Rey tcomnëna, cach aca mentsbocá ca!”

<sup>38</sup> Jesusbe bestšashe juatsboicna canye uabemana soye tmojananjo; chiñë mëntšá yojtsanábemana: *MUA CHË JUDIËNGBE REY ENDMËNA*ca.

<sup>39</sup> Canye bëts bacna soyënga ochjajnayá yojtsecrucificaná, Jesúsbioye mëntšá tbojanóyenguango: —Chë Bëngbe Bëtsabe Uámana Uabuayaná tcomnëna, mentsbocá y bëndátnaca šmatsebocá ca.

<sup>40</sup> Pero chë inye bëts bacna soyënga ochjajnayana mëntšá tbojanácacana: —¿Ni mo Bëngbe Bëtsá ndoñe condërrespetana? Bëndátnaca bontsamna chacá jóbana. <sup>41</sup> Ndegombre bëndata muentšë bontsemna bëts bacna soyënga ochjajnayaye causa, y chíyeca chca jasúfriama bontsamna. Pero quem boyabása ni mo canye bacna soye ndoñe tonjobuachjanguá ca.

<sup>42</sup> Y chorna, quem bëts bacna soyënga ochjajnayá Jesúsbioye tbojanayana: —Jesús, atšbiama cocht-enójuaboje aca reycá jabomándama chacojtabo ora ca.

<sup>43</sup> Y Jesús tbojanjá: —Ndegombre cbëyana, mëntë átšëftaca celoca, chë nyetscanga oyejuayënga mond-betsemnoca, aca cochantsatsmëna ca.

### Jesús tojanóbana

<sup>44</sup> Nyetsto orscana las tresëntscoñë nyets quem luare yojtseibétata. <sup>45</sup> Y shinýe yojtsajbaná binýnayana, y Bëngbe Bëtsabe bëts yebnentšë yojújonýana entšëjua tsëntsaca yojtsenájataye. Chëjua bënëjua inauamna y chë tsatsëntsaca inaújonýana. <sup>46</sup> As Jesús tojanáyebuachena: “Taita, atšbe espíritu acbe cucuatšínë šcoboshjona ca.”

Y chca jayanama tojanpochocá ora, tojanóbana.

<sup>47</sup> Chë romano soldadëngbe amëndayá chca tojáninye ora, Bëngbe Bëtsábioye tbojtanadorá, mëntšá jayanëse: “Ndegombre, quem boyabása ainaniñë tšabe juabnënga bomná inamna ca.”

<sup>48</sup> Nyetsca entšanga chë soye jinýama tmojánabënga, chca tojanopasama tmojáninye ora, tmojanontšë jtangana enocochjantšëta, ngménama. <sup>49</sup> Pero Jesusbe nyetsca ubuátmënga y chë shembásenga Galileocana tmojanastëngna, chaboca tmojanoquedá chë soyënga onýayiñë.

### Jesús tmojanatbontsá

<sup>50</sup> Yojanmëna canye boyabása, José ca uabainá, canye Judeoca pueblócá, Arimatea ca uabaina; cha inamna canya chë pueblentša uámana amëndayënguentšá y canye tšabe entšá y nyetsca soyënguñë tšabá amá. <sup>51</sup> Chánaca yojanobátmána chë Bëngbe Bëtsabe amëndayana chaóshjanguama, y ton-

daye tbojanogustá ntšamo chë inye améndayënga tmojanjuabó y Jesúseftaca tmojanmcá. <sup>52</sup> Cha Pilát-bioye tojána y Jesusbe cuerpo tbojanotjañe. <sup>53</sup> José chë cruzocana Jesusbe cuerpo tbojtanéstjango, canye lino entšéjuaca tbojanandmaná y canye cuevēshiñe, peñēshiñe pormániñe, tbojanajó. Chentše cabá ndocná mondējajo. <sup>54</sup> Yēfsana ochnayté bétsemnayecna, cach te yojanotocana saná japróntana chë yēfsana jasama; y chë ochnayté ya yojtsebínñana.

<sup>55</sup> Chë shembásenga, Galileocana Jesús tmojantjembambanga, tmojána y chë cuevēshe tmojáninñe, y tmojanrepará ntšamo Jesusbe cuerpo tmojanajoma. <sup>56</sup> Yebnoye tmojtaná orna, tmojanprontá botamana uanguētše béjayënga y soyënga chë cuerpiñe janētjuama.

Chë ochnaytena chënga tmojanochná, ntšamo Moisesbe leyíñe yojanmandancá.

### Jesús tojtanyena

**24** Y tmengo, chë inye semana bojatséntena, cabá cachëse, Jesús tmojanatbontsá cuevēshoye chë shembásenga tmojána, y tmojanamba chë tmojanprontá botamana uanguētše soyënga. <sup>2</sup> Pero choye tmojánashajna orna, tmojáninñena chë cuevēshoye amashjuantēsa ndētšbé chentšana juanániñe, <sup>3</sup> y choye tmojánamashjna ora, Bëngbe Utabná Jesusbe cuerpo ndoñe tmonjáninñena. <sup>4</sup> Chë shembásengna ndoñe imontsetátšëmbo ntšamo jajuaboyana chë soyama; chora, uta boyabásata, uabuashinñinñana entšayá uichétjonata chentše tbojabántsaye. <sup>5</sup> Y chë shembásenga tmojanéuatjanama y fshantsoye imojtsatsejbénama, chata tbojanéyana: “¿Ndáyeca obanéngbentše chë vida totsobomñá šmojtsenguá ca?” <sup>6</sup> Muentše cha ndocná quenátsmëna, er cha ya ton-tayena. Menójuabonga ndayá cha tmojanéyanama, cha cabá Galileoca enjamna ora. Cha tonjánayana: <sup>7</sup> “Chë Bëngbe Bëtsá Entšá tbojanbemá bontsemna bacna soye amëngbe cucuatšíñe chamoboshjonama, chamocrucificama y unga tianoye cháuatayenama ca” —chata tbojánayana.

<sup>8</sup> Chora chë shembásenga Jesusbe palabrëngama imojtenójuaboye, <sup>9</sup> y chë cuevēshentšana tmojtaná ora, chë tšabe noticiënga chë bnétsana canye uatsjëndayënga y inye entšángbioye tmojanacuntá. <sup>10</sup> Chë uatsjëndayëngbioye chca cuentayëngna imojamna María Magdalena, Juana, y María, chë Santiagbe mamá, y chë inye shembásenga chëngaftaca imojamnënga. <sup>11</sup> Pero chë uatsjëndayëngna mëntšá chë shembásengbiamá imojétsejuabnaye: “Chënga montsoyebuambná mo corente juabna ndbomnëngcá ca.” Y chca, chënga chë soyíñe ndoñe montsanošbuaché.

<sup>12</sup> Pero chentšana, Pedro tojéftsantsbaná y ochamanana chë Jesús tmojanajó cuevēshoye tojána. Y choca yojtsemna ora, yojotsejbéna tsoye jontješiyama, pero nñe ena entšéjuangá yojuinñe, chë Jesús tmojanbochmëjuangá. As Pedro ojnananá yebnoye yojtá, chca tojanopasama.

### Chë Emaús puebloye benachiñe

<sup>13</sup> Cach te, uta uatsjëndayata Emaús puebloye ibojtsayë. Emaús yojamna Jerusalenocana bnétsana canye kilómetroca. <sup>14</sup> Chata ibojtsayencuëntaye lempe ntšamo tojanopasama. <sup>15</sup> Y tojanopasá, ibojtsencuëntaye y ibojtsenatsëtsnayëntscuana, cach Jesús tojanobconá y chátaftaca cánñiñe yojtsayë; <sup>16</sup> masque imojtsonñyaye, ndoñe ibontsobena cha jótëmbana. <sup>17</sup> Jesús tojanéyana: —¿Ndayama benachiñe šuabanencuëntaye ca?

As chata ngmëñaca ibojotsayë, <sup>18</sup> y canya, Cleofás ca uabainá, tbojanayana: —¿Nñe aca cojtsemna, inye luarocana ashjanganá Jerusalenentše oyená, ndayá chentše quem diënga yopasánama ndëtatsëmbuá ca?

<sup>19</sup> Chora cha tojanéyana: —¿Ndaye soyënga ca?

Y chata tbojanayana: —Chë Jesús Nazaretocáftaca tonjopasá soyëngama. Cha enjamna canye Bëngbe Bëtsabe juabna oyebuambnayá, puerte obenana bomná ndayá jamama y jayanama, Bëngbe Bëtsabe delantë y nyetsca entšangbe delante. <sup>20</sup> Y ntšamo, chë bachnangbe améndayënga y chentša mandadënga inyengbe cucuatšíñe tmonjáboshjona, jóbanama ibojtsemna ca entšanga chamuayanama y chamocrucificama. <sup>21</sup> Bënga chabiamá fsëñjanobátmana, Césarbe cucuatšëntšana Israeloca entšangbe atsebacyá chaotsemnana; pero morna ya unga te entsemna chca tonjopasá. <sup>22</sup> Y mora ndayá, bésefta shembásenga bëngbe enutënga ójnanana soyënga šonjáuyana. Chënga cabá cachëse chë Jesusbe cuerpo tmonjanajó cuevēshoye tmonjá, <sup>23</sup> y chabe cuerpo ndoñe tmonjínñena; as chora chënga bëngbioye tmontabo y montsabíchamo angelënga tmojéftsanyë y chënga catmëñjayana cha ainá yojtsatsmëna ca. <sup>24</sup> Bëngbentšana baseftángnaca chentšana chë cuevēshoye tmonjá, y tmojínñena ntšamo chë shembásenga tmonjayancá, pero Jesús ndoñe tmonjéftsinyë ca —chata ibojtsichamo.

<sup>25</sup> As Jesús chata tojanéyana: —¿Tša juabna ndbomnënga y tša uenana jošbuáchiyama, chë Bëngbe Bëtsabe juabna oyebuambnayënga tmojánayana soyëngama! <sup>26</sup> ¿Mo ndoñe yonjamna chë Uámána Uabuayaná chë soyënga chaosufrima, y chentšana nyetsca entšanga corente cha chamuatschuama ca?

<sup>27</sup> Chentšana Jesús tojanontšé chata jábuayenana, lempe ntšamo chabiamá yojanoyebuambnacá chë Bëngbe Bëtsabe uabemana palabrënguiñe; yojontšé Moisesbe librëšangañe y chë Bëngbe Bëtsabe juabna oyebuambnayëngbe librëšangáñnaca.

<sup>28</sup> Chë ibojétsayë puebloye imojtsebeconá ora, Jesús tojanma mo más chcoye cuaftsacá. <sup>29</sup> Pero chatna tmojanatarié chentše chaotsoquedáñama, mëntšá jauyanëse: —Bëndátaftaca motsoquedáñe; ya jetiñe entsemna y ya echanjaibétata ca.

As Jesús chátaftaca tojtsanoquedáñe. <sup>30</sup> Chentšana tojanopasá, juasama mesëshentše imojtsetbiámána ora, Jesús chë tandëse tojanca, Bëngbe Bëtsábioye tbojtanchuá, chë tandëse tojanjatá, y chata tojanat-

šatá. <sup>31</sup> As, chora chë uatsjéndayata ibojobenaye Jesús jótëmbana; pero chana nÿe ndeolpe yojuenatjëmba. <sup>32</sup> Chora chata ibojtsenatsëtsnaye: “Chë benachiñe Bëngbe Bëtsabe uabemana palabrëngama šond-abuayiná ora, ndegombre bëngbe ainaniñe más bontseboše cha más chašotsabuayiyname, ¿ndoñe chca ca?”

<sup>33</sup> As, cachora tbojëftsantsbanata y Jerusalenoye tbojtanata; choca tmojáninÿena chë bnëtsana canÿe uatsjéndayënga cánÿentše imojtsemna y chëngbe enutëngnaca; <sup>34</sup> y mëntšá imojtsichamo: —;Ndegombre Bëngbe Utabná tojtayena; Simónbioye tbojébëbocna ca!

<sup>35</sup> As chata tbojanontšé jacúntana, ntšamo benachiñe tbojanpasacá, y ntšamo Jesúsbioye imojótëmba, chë tandëše tojanjatá ora.

### Jesús chabe uatsjéndayënga tojánebebuacna

<sup>36</sup> Chë uatsjéndayënga chë soyëngama cabá imojtsencuëntantscuana, Jesús chëngbe tsëntsaca tojabántsaye y mëntšá tojanéyana: “Chë atšbe ainaniñe tšabe ebionana tšëngaftangftaca chaotsemna ca.”

<sup>37</sup> Pero chënga tša auatjanánënga imojtsemna, y canÿe añemëse imojétsonÿaye ca imojtsejuabnaye.

<sup>38</sup> Pero Jesús tojanéyana: “¿Ndáyeca auatjanánënga šmojtsemna? y ¿ndáyeca tšëngaftangbe ainaniñe chca šmojtsejuabná ca? <sup>39</sup> Atšbe cucuatšënga y atšbe shecuatšënga minÿënga; šmobjajo y šmochanjinye. Cach atše sëntsemna. Canÿe añemësna, ni mëntšena ni betašënga ntsebomnana; pero tšëngaftanga šmontsonÿá, atšna aíñe ca” —tojanéyana.

<sup>40</sup> Chca yojtsichámëse, chabe cucuatšënga y chabe shecuatšënga tojaninÿanÿé. <sup>41</sup> Y chënga cabá ndoñe montsanošbuaché, chca noticiama corente imojtsóyejuama y tša ojnánënga imojtsemna causa; as Jesús tojanatjá: “¿Muentše ndayá jasama quešmëbomna ca?”

<sup>42</sup> As canÿe tabena buana beonbiana tmojanoyé;

<sup>43</sup> Jesús tojanocñe y chëngbentše tojanse. <sup>44</sup> Chentšana Jesús tojanéyana: “Quem palabrënga entsemna ntšamo cabá tšëngaftangftaca sënjamna ora tcbonjanëyancá: Entsemna, lempe chaopasá ntšamo atšbiama iuabemancá, Moisesbe leyënguiñe, chë Bëngbe Bëtsabe juabna oyebuambnayëngbe uabemana libréšangañe y Salmos librëšañnaca ca.”

<sup>45</sup> Y chora chë uatsjéndayënga, Jesúsbeyeca tmojanobená chë Bëngbe Bëtsabe uabemana palabrëngama josértana. <sup>46</sup> Chentšana Jesús tojanéyana: “Ntšamo atšbiama iuabemancana yomna, chë Bëngbe Bëtsá Entšá tbojanbemá chaosufrí y unga tianoye chauatayena ca. <sup>47</sup> Y morna atšbe uabaina jayanëse, átšbeñe betsošbuáchema, nÿets quem luarentše šmochjónša entšanga atšbiama jábuayenama, bacna soyënga amana chamuajbanama, as chca, Bëngbe Bëtsá chëngbe bacna soyëngama cháuperdonama; chë soyënga Jerusalenentše chaobjatšé. <sup>48</sup> Tšëngaftanga atšbiama soyënga šmonjinÿe y šmondétatšëmbo. <sup>49</sup> Atšbe Taitabe šbuachenaná, tšëngaftangbiama chanjíchmu. Pero morna camuentše Jerusalenentše moquedanga, Bëngbe Bëtsabe obenana chašmóyëngacñëntsacuana ca” —cha tojanéyana.

### Jesús celoye tojtantsjuá

<sup>50</sup> Chentšana, Jesús chabe uatsjéndayënga ínÿoye tojanënatse, Betania pueblo béconana. Y chabe buacuatšënga játsbanase, Bëngbe Bëtsá tbojanimpadá chë uatsjéndayënga tšabe bendicionënga chamóyëngacñama. <sup>51</sup> Chca yojtsamëntsacuana, cha chëngbentšana tojanoluaré y tojanontšé celoye játsjuana.

<sup>52</sup> Chë uatsjéndayëngna, Jesús tmojtanadorá chentšana, Jerusalenoye oyejuayënga tmojtaná; <sup>53</sup> y cada te, Bëngbe Bëtsabe bëts yebnoye imojánajna, Bëngbe Bëtsá jëtschuayama.

# San Juan

## Cristo, chë Bëngbe Bëtsabe Uámana Oyebuambnayana ca Uabainá

**1** Quem luare ndobojátša ora, Cristo, chë Bëngbe Bëtsabe Uámana Oyebuambnayana ya yojtsemna; chora cha, chë chca uabainá, Bëngbe Bëtsáftaca yojtsanmëna, y cachá Bëngbe Bëtsá inamna. <sup>2</sup> Ndegombre cha, chë tempšana Bëngbe Bëtsáftaca yojtsanmëna. <sup>3</sup> Cháftaca, Bëngbe Bëtsá lempe tojanma; cháftaca ndóñesna, lempe ntšamo mora yomncá, Bëngbe Bëtsá tondaye matëjanma. <sup>4</sup> Cachábeñe nyets vida inamna, y quem vídaca tojánabo quem luar-entša entsangbe juabnënga jabuábinynayama. <sup>5</sup> Cha tonjánabo moye, chë entsangbe juabnënga ndoñe binyniñe yonjamnoye, chiñe jabobinynayama. Cha sempre chca yobínyna, y Satanás chë entsangbe juabnënga ndoñe binyniñe chaondëtsemnama amá, ndoñe yondobena chë binynayabe obenana jtsejuánana.

<sup>6</sup> Inamna canye boyabása, Juan ca uabainá; y Bëngbe Bëtsá tbojanichmó, <sup>7</sup> binynayabiama chaóyebuambama; entsangbeñe binynayabiama cháuyanama, chca, ntšamo Juan chë binynayabiama tojayana soyéngaca, nyetscanga Jesúsbeñe chamotsošbuáchema. <sup>8</sup> Juan ndoñe yonjamna chë binynayá. Cha inamna canye ichmoná, chë nda binynayá yomnabiama entsangbeñe chauabáyanama. <sup>9</sup> Chë ndegombrá quem luaroye tonjánabo chë entsangbe juabnënga jabuábinynayama.

<sup>10</sup> Chë Bëngbe Bëtsabe Uámana Oyebuambnayana quem luariñe yojtsanmëna; masque cháftaca Bëngbe Bëtsá quem luare tojanma, nda cha yojamnama muentša oyenënga ndoñe monjántatšëmbo.

<sup>11</sup> Cachabe luare entsangbiyoe tonjánabo, y entsanga ndoñe tmonjánbošena cha jofjana. <sup>12</sup> Nyetscanga, ndëmuanyënga cha tmojanébuaja y chábeñe tmojtsošbuáchenga, cha derecho tonjanatšatá jtsobenama Bëngbe Bëtsabe básenga ca jtsabáinama. <sup>13</sup> Quem osbuáchiyëngna, chca jtsemnama ndoñe tmonjanobená entsangbe buiñentšana tmojanonynayeca, o ndaye entsabe juabnentšana. Nye Bëngbe Bëtsábeyeca chca chabe básenga imojtsabaina.

<sup>14</sup> Cha, chë Bëngbe Bëtsabe Uámana Oyebuambnayana, entsá tojanóbema, y quem luare béngaftaca yojéftsiyena. Cha yomna chë Bëngbe Bëtsabe nye canye Uaquiñá; chíyeca bënga tifjáninye chabe bëts obenana y chabe tšabe juabna, chë Bëngbe Bëtsábentšana tojanóyëngacñana. Cha corente jtsababuányëshanëse šojánanyëna y yojéftsiyena

ntšamo ndegombre inamncá. <sup>15</sup> Juan mëntšá chabiamayojanáyebuache: “Chabiamayojanáyebuambná, chë ndabiamayojanáye buache, chë ndabiamayojanáye buache, chë átšbentšana jabamana atšbiama más uamaná endmëna, er atše cabá ndonyna orna, cha ya yojtsemna ca.”

<sup>16</sup> Cha tša tšabe ainana bómnyeca, bënga nyetscanga mallajta tšabe bendicionënga tmojóyëngacñe.

<sup>17</sup> Moisesbiajana tifjanóyëngacñe chë Bëngbe Bëtsá tojanmandá soyënga. Pero Jesucristbeyeca, Bëngbe Bëtsá tšabe bendicionënga bëngbiama tojama y chë ndegombre soyënga bënga tmojëftsashjache. <sup>18</sup> Ndocná, ndocna te Bëngbe Bëtsábioye tbonjinnye. Chë nye canye Uaquiñá ibobomná, cach Bëngbe Bëtsá yomna; y cha, Bëngbe Bëtsá chë Taitáftaca cányiñe mo canyacá yomna. Mua, chë Uaquiñá, bëngbiama tojama, Bëngbe Bëtsá juabuátmanama chaotsopodënama.

## Juan chë Ubayaná Jesucristbiama tojanabuayená

<sup>19</sup> Canye te, Jerusalenoca judiënga tmojanichamó básefta chëngbe bachnanga y levitënga, chë Bëngbe Bëtsabe bëts yebnoca trabájayënga, Juan yojtsemnoye, cha nda bëtsemnama chamuatjayama. <sup>20</sup> Chorna, Juan chëngbeñe ndegombre tojanobuambá: —Atše, chë Bëngbe Bëtsabe Uámana Uabuayaná ndoñe quetsátsmëna ca.

<sup>21</sup> As chora, cachiñe tmojantjá: —As, ¿ndase cojtsemna? ¿Chë Bëngbe Bëtsabe juabna oyebuambnayá Elías ca?

Y Juan tojanéjua: —Atše cha ndoñe quetsátsmëna ca.

Chora chënga tmojantjá: —As, ¿chë Bëngbe Bëtsabe juabna jabóyebuambayama jabamá ca?

Y Juan tojanéjua: —Ndoñe ca.

<sup>22</sup> Chora chënga tmojaniana: —Asna, ¿aca ndase cojtsemna? Bënga šontsamna nda aca cojtsemnama jtsetatšëmbuana, as chë šonjadespachenga jacúntama. ¿Ndayá cojtsobena cach acbiama jayanama ca?

<sup>23</sup> Y Juan mëntšá tojanéjua: —Atše séntsemna chë ndabiamayojanáye buache Bëngbe Bëtsabe juabna oyebuambnayá Isaías mëntšá tojanábema: “Entsanga ndoyenoca canye abuayiyayá echántsemna, y entsanga mëntšá echántsabuyayayé: Bëngbe Utabná echanjabo ca. Mo nda canye benache tojtseprontacá, tšëngaftán-gnaca cachcá, cha jabama tšabe juabnéngaca šmochtseprontana ca.”

<sup>24</sup> Chorna, báseftanga chë fariseungbe ichmónënguentšana, <sup>25</sup> Juan tmojantjá: —Chë Bëngbe Bëtsabe Uámana Uabuayaná, Cristo ca uabainá,

ndoñe tcontsemnésna, ni Elías, ni chë Bëngbe Bëtsabe juabna jabóyebuambayama jabamá ndóñesna, ¿ndáyeca entsanga cojtsëbayana ca?

<sup>26</sup> Chora Juan tojanéjua: —Atsna, béjayeca entsanga sëndëubáyana. Pero tsëngaftangbeñe canya entsemna; cha ndoñe quešmatábuatma; <sup>27</sup> y cha atšbe ústonoye echanjáshjango. Atše merecido taitsatobuajoñe, ni mo jotsejbiyama, chabe shecochëtjonëshentša corriëja jajafjonama ca.

<sup>28</sup> Chca tojanopasá, canye pueblo Betania ca uabáinentše, Jordán béjaye chenguana. Cach béjayiñe, Juan entsanga yojanëbáyana.

### Jesús chë Bëngbe Bëtsabe Oveshatema ca uabainá

<sup>29</sup> Yëfsana, Juan yojtsemnoye Jesús yojtsebéconaye, y chë cháftaca imojtsemna entsanga tojanéyana: “Š-mochjinýe. Chë nda Bëngbe Bëtsá tbojichmó y iytanana Oveshatemcá entsobiamná cha, entsashjauana ca. Cha jóbanëse, quem luarentša entsanga bacna soyëngama perdonánënga mochántsemna. <sup>30</sup> Atše chabiamna cbonjutsësná, mëntšá sënjanayana ora: ‘Atšbe ústonoye canya echanjáshjango. Cha atšbiamna más uamaná endmëna, er atše cabá ndonýna ora, cha ya yojtsemna ca.’ <sup>31</sup> Tempna, cach atše ndoñe quetsjántantatsëmbo nda cha bëtsemnana. Pero atsna ínýenga béjayeca ubáyana sëndabó, Israeloca entsanga quem boyabása chamuábuatmanama ca” —Juan tojanéyana.

<sup>32</sup> Chentšana Juan mëntšánaca tojanobuambá: “Chabiamna mëntšá bominye sënjanajó: chë Uámana Espiritu, mo canye palomatemcá, celocana tonjánastjango y quem boyabásabe juatsbuañe tonjanototóna. <sup>33</sup> Atše cabá ndoñe quetsjántantatsëmbo nda cha bëtsemnana, pero chë béjayeca jubáyama šonjanichmó cha, mëntšá šonjanayana: ‘Nda chacojinýe, chë Uámana Espiritu jastjanguana y chabe juatsbuañe jototonana, chábeyeca atše chanjíchmu chë Uámana Espiritu entsangbe ainaniñe cháumashënguama ca.’ <sup>34</sup> Y morna, atše aiñe chca tijinýe, y ndegombre tsëngaftanga cbéyana, cha chë Bëngbe Bëtsabe Uaquiñá entsemna ca” —cha tojanéyana.

### Chë Jesusbe natsana ústonënga

<sup>35</sup> Yëfsana, Juan chabe uatsjëndayënguentsana útataftaca cachoca yojtésemna. <sup>36</sup> Jesús yojtsachnëjuanama, Juan tbojáninýe ora, tojanéyana: “Šochjinýe. Mua entsemna nda Bëngbe Bëtsá tbojichmó y iytanana Oveshatemcá entsobiamná cha ca.”

<sup>37</sup> Chora chë Juanbe uta uatsjëndayata, chca tbojanuena ora, Jesús tmojanasto. <sup>38</sup> Jesús tojesanontjese y tojánanye chata imojtësëstonama. As, tojanatjá: —¿Ndayá šojtsenguá ca?

Y chata tbojanayana: —¿Rabí, ndayentše icyoyena ca? (Rabí endayana “Buatëmbayá ca”.)

<sup>39</sup> Chora Jesús tojanéjua: —Mabo y šochjinýe ca.

As chata tbojána y tbojáninýe ndayentše cha yojtsemnana. Y chentše cháftaca tojéftsanajëtana, ya jetiñe mo las cuatro ora yojtsemna causa.

<sup>40</sup> Chë Jesusbiamna oyebuambayana Juánbioye tbojanóyeunata y Jesús tbojanasto útatentšana canýana Andrés ca yojanabaina; cha yojamna Simón Pédrëbe catšata. <sup>41</sup> Andrés, cabá ndocna inýe soye ndëma ora, tojána chabe catšata Simón janguanguama. Y tbojáninýena ora, Simónbioye tbojanayana: “Chë Bëngbe Bëtsabe Uámana Uabuayaná, Cristo, fsënjínýena ca.”

<sup>42</sup> Chentšana Andrés, Simónbioye tbojanánatse Jesús yojtsemnoye. Jesús, Simónbioye tbojáninýe ora, tbojanayana: “Aca condmëna Simón, Jonasbe uaquiñá, pero Cefas ca cochantsabaina ca.” (Chcana endayana “Pedro o ndëtšbé ca”.)

### Jesús, Felipe y Natanael tojánachembo chamuastama

<sup>43</sup> Yëfsana, Jesús tojanjuabó Galilea luaroye jama. Benachiñe Felípbioye tbojáninýena y tbojanayana: “Šmastoca.”

<sup>44</sup> Chë boyabása Felipe, Betsaida pueblócá inamna. Andrés y Pédrëna cach pueblócata ibnamna.

<sup>45</sup> Chentšana Felipe tojána Natanael janguanguama; y tbojanayana: —Chë ndabiamna leyënga librëšangañe Moisés tojanábema cha fsënjínýena ca. Cachabiamna, Bëngbe Bëtsabe juabna oyebuambayëngnaca tmojanábema. Cha Jesús entsemna, Josebe uaquiñá, chë Nazaretocá ca.

<sup>46</sup> Chora Natanael tbojanayana: —¿Ndaye tsabe soye Nazaretocana nanjopódia jóbocnama ca?

Y Felipe tbojanjuá: —Mabo y cochjinýe ca.

<sup>47</sup> Natanael yojtsebéconama, Jesús tbojáninýe ora tojánayana: —Moye canye entsá entsabó; cha ndegombre endomerecena Israelbentšana entsá jtsemnana. Cha tsabe entsá endmëna; ndocnábioye quebnat-síngña ca.

<sup>48</sup> Chora Natanael Jesúsbioye tbojantjá: —¿Ntšamo atše šcuabuatma ca?

Y Jesús tbojanjuá: —Felipe cabá aca ndëchembo ora, atše tcbonjinýe, chë higo betiye tchetšoye condësomñe ora ca.

<sup>49</sup> As, Natanael tbojanayana: —Buatëmbayá, ¡aca chë Bëngbe Bëtsabe Uaquiñá comna! ¡Aca, chë Israeloca entsangbe Rey ca!

<sup>50</sup> Chora Jesús tbojanjuá: —¿Aca átšbeñe cojtsošbuaché, nýe chë higo betiye tchetšoye tcbonjinýe ca tcbouyanama? Ndegombre, chë soyama más bëts soyënga cochanjinýe ca.

<sup>51</sup> Chentšana Jesús tojanéyana: —Ndegombre šcuayana: Tsëngaftanga šmochanjinýe celoca atëfjniñe, y Bëngbe Bëtsabe angelotëmënga jtsetsjuajana y jtsastjajuanana Bëngbe Bëtsá Entšá tbojanbemabe tatsëtsoca.

### Canye casamento Galilea luaroca, Caná pueblentše

**2** Chentšana unga tianoye, canye casamento inamna, canye pueblentše Caná ca uabáinentše, Galileoca. Chë oboyejuayoca Jesusbe mamá yojtsemna. <sup>2</sup> Jesús y chabe uatsjëndayëngnaca chë casamento ca ófjanënga imojtsemna. <sup>3</sup> Chë oboyejuayentše,



vínoye yojtsopochóca y Jesusbe mamá tbojanianya: —Ya tondaye vínoye quemátsbomna ca.

<sup>4</sup> As, Jesús tbojanjuá: —Mama, ¿ndáyeca chca atše š-cojtsatsá? Atšbe ora cabá ndoñe ntjoshjanguana ca.

<sup>5</sup> Chentšana, chabe mamá, chentša oservénenga tojanéyana: —Lempe šmochjama, ntšamo cha chacmo-jauyancá ca.

<sup>6</sup> Chocna, chnénguana ndětšbé matbaja inamna. Chca matbajénguentša bėjayeca, judienga imojanmana jtsacuéntšabiana cabá ndése ora, ntšamo tem-po entšanga imojanamancá, Bèngbe Bètsabe delante tšábenga jtsatsmënema. Cada matbajiñe, mo shachna o canýsëfta bnëtsanájuá bėjaye yojanába.

<sup>7</sup> Chora Jesús chë oservénenga tojanamëndá: “Quem matbajénga bėjayeca mobuajutetjé ca.” Y chënga, chora lempe tmojanbuajutetjé.

<sup>8</sup> Y Jesús tojanéyana: “Morna, báseye mobuatsjo y chë fiesta otocanábioye mabuyamba ca.” Y chënga chca tmojanma.

<sup>9</sup> Chora, chë fiesta otocaná, chë bėjaye Jesús vínoye tojanbemiye tojanftantiá, ndémocana yojóboचना ntsetatšëmbcá. Pero chë oservénëngna añe imojtsetatšëmbo ndémocana, er cachënga chë bėjaye tmojanbuatsjo. As, chë fiesta otocanana, chë bobontse bouamnábioye tbojanchembo, <sup>10</sup> y tbojanianya: “Nýetscanga monduamana natsana chë más uámana vínoye jushebëcana, y chë ófjanënga becá tmojatëmo ora, chë más batšá uámaniye. Pero acna, chë más uámana vínoye morscama tcojtsabofjájó ca.”

<sup>11</sup> Ntšamo Jesús tojanmcá Caná pueblentše, Galileoca, yojamna chabe natsana bëtš soye Bèngbe Bètsabe obenánaca. Y chca, chabe bëtš obenana y uámanana cha tojaninýanyé; y as, chabe uatsjéndayënga chábeñe imojtsošbuaché.

<sup>12</sup> Chca tojanopasá chentšana, Jesús canýe pueblo, Capernaum ca uabáinoye tojtsanoñe. Chorna, chabe mamá, chabe catšátanga y chabe uatsjéndayënga cha tmojantjëmbambá, y choca baseftatescama tmojanoquedá.

### Jesús Bèngbe Bètsabe bëtš yebnentšana bacna entšanga tojtanébuacna

<sup>13</sup> Ya canýe judiëngbe bëtš fiesta, chë Bashco fiesta yojétsobeco, chë ntšamo Bèngbe Bètsá chëngbe bëtš taitanga Egiptocana tojánatsebacama jtenójuaboyama. Chë fiestama Jesús Jerusalenoye tojána.

<sup>14</sup> Jerusalenoca, Bèngbe Bètsabe bëtš yebnentše, Jesús tojánanyena uacnénga, oveshënga y paloma enënga, y entšángbioye crocénana atrócayënga, chëngbe luarënguenache imojtsetbiámana. <sup>15</sup> Jesús chca tojánanye ora, biajënga tojanaca, tjanjanëja tojanobopormá, y Bèngbe Bètsabe bëtš yebnentšana nýetscanga tojtanébuacna, chëngbe oveshënga y uacnéngaca. Chentšana Jesús, Bèngbe Bètsabe bëtš yebnentšama yojanoservena crocénana atrocayëngbe crocénana tojtsanëjquësheshe, y chë mesëshangá tojtsanenásatajchquëca. <sup>16</sup> Chë paloma enëngna Jesús tojanéyana: —¡Quem soyënga lempe muentšana matábocana!

¡Ndoñe matsbuamnana ni mátenana atšbe Bètsabe yebnentše, mo canýentše jiyama luarentše cuaftsemncá ca!

<sup>17</sup> Y as, chabe uatsjéndayënga tmojanenojuabó ntšamo Bèngbe Bètsabe uabemana palabrenguiñe iuayanama: “Bèngbe Bètsabe yebna jtseboguianama juabna, nýets átšbeñe entsemna ca.”

<sup>18</sup> Chora, judienga Jesús tmojantjá: —¿Ndaye bëtš soye cochjama bënga chašcuinýanyëma, aca ndaye deréchoca bëngaftaca chca cojtsobenama ca?

<sup>19</sup> As Jesús tojanéyana: —Quem Bèngbe Bètsabe yebna menásatajchca, y atše unga tese chtëtšbaná ca.

<sup>20</sup> Chora chë judienga tmojanianya: —Canta bnëtšana chnénguana uatiñe, quem Bèngbe Bètsabe yebna tmojanjebo. ¿Y aca, nýe unga tese lempe cochtët-sjebo ca?

<sup>21</sup> Pero Bèngbe Bètsabe yebna, ndayama chora cha chca tojánayana, cachabe cuerpo yojtsemna, ndoñe chë jebna soye. <sup>22</sup> Chama, Jesús obanënguentšana tojtanyena ora, chabe uatsjéndayënga tmojanenojuabó ntšamo muentše cha tojanéyanama. Chca ora, Bèngbe Bètsabe uabemana palabrenguiñe y Jesús chora tojánayana palabrenguiñe más chënga imojtsošbuaché.

### Jesús nýetsca entšangbe juabna iuábuatma

<sup>23</sup> Jesús Jerusalenoca chë Bashco fiestama yojtsemnëntscuana, entšanga tmojáninýe Jesús jamana bëtš soyënga Bèngbe Bètsabe obenánaca. Chíyeca, ba entšanga chábeñe imojtsošbuaché. <sup>24</sup> Pero Jesús chëngbeñe ndoñe yontsošbuaché, cha nýetscanga yojanébuatma causa. <sup>25</sup> Y Jesús ndoñe bonjanájaboto chë entšangbe soyëngama chabotsebuayinama, er cachá entšangbe ainaniñe nýetsca juabnénga yojanábuatma.

### Jesús y Nicodemo

**3** Inamna canýe boyabása Nicodemo ca uabainá. Cha yojamna fariseunguentšá y judiëngbe canýe amëndayá. <sup>2</sup> Chana ibeta Jesúsbioye tojána y tbojanianya: —Buatëmbayá, bënga fsëntsetatšëmbo aca canýe buatëmbayá comnama, Bèngbe Bètsabe ichmoná. Ndocná quenátobena jamana quem bëtš soyënga, aca contsama soyënga, Bèngbe Bètsá cháftaca ndoñe tontsemnëse. Chíyeca bënga chca fsëntsetatšëmbo ca —cha tbojanianya.

<sup>3</sup> Chora Jesús tbojanjuá: —Ndegombre cbëyana, nda ndoñe cachiñe tontonýná, cha ndoñe quenátobena Bèngbe Bètsabe amëndayana jinýama ca.

<sup>4</sup> Y Nicodemo tbojantjá: —¿Ntšamo, canýe entšá ya bëtšá tojtsemna ora, nantsobena cachiñe jtónýnama ca? Ndegombre, cha ndoñe ntsobenana cachabe mamabe cuerpiñe jtamashënguana cachiñe jtónýnama ca.

<sup>5</sup> Chora Jesús tbojanjuá: —Ndegombre cbëyana, bėjayeca y chë Uámana Espíritbeyeca ntjonýnacá, ndocná quenátobena Bèngbe Bètsabe amëndayoye jamashënguama. <sup>6</sup> Nda bëtšétsabentšana tojonýná cha,

quem luarentša entsangcá jtsemnana; pero chë Uámana Espíritbeyeca tojonýná chana, jtsemnana canýa chë Uámana Espíritu ainaniñe bomná. <sup>7</sup> Ndoñe matenjanana ntšamo tbonjauyanama: “Nýetscanga entsamna cachiñe jtónýnama”. <sup>8</sup> Chë binýia ndëmujana tojtseboše jtsemnana, chëjana jtsanana. Masque entsanga, chë binýiyama jtsuenanana, ndoñe ntsetatšëmbuana ndëmocana yobama y ndëmoye yojtso-ma. Cachcá, tšëngaftanga ndoñe quešmátstatšëmbo ntšamo entsanga chë Uámana Espíritbeyeca tmojt-sónýnama; pero tšëngaftanga šmontsetátšëmbo aíñe chca yomnama ca —Jesús tbojaniana.

<sup>9</sup> Chora Nicodemo tbojantjá: —¿Ntšamo chca nántsemna ca?

<sup>10</sup> Y Jesús tbojanjúá: —Aca, canýe Israeloca abuatambayá, ¿chë soyëngama ndoñe condétatšëmbo ca?

<sup>11</sup> Ndegombre cbëyana, bëngna chë fststátšëmbo soyëngama fsëntsoyebuambná, y chë tifjinýe soyëngama ndegombre bëtsemnama fsëntsichamo. Pero tšëngaftanga, chë cbontsëtsësná soyënguñe ndoñe quešmatošbuaché. <sup>12</sup> Atše, quem luarentša soyëngama sënjoyebuambá y tšëngaftanga átšbeñe ndoñe chešmatošbuaché. Y as, ¿ntšamo átšbeñe šmochtsošbuáchiye, celoca soyëngama cbojtsëtsësnase?

<sup>13</sup> “Ndocná, nýe cachábeyeca Bëngbe Bëtsábioye tonjátsjua. Nýe chë celocana tojabá aíñe, chë Bëngbe Bëtsá Entšá tbojanbemá. <sup>14</sup> Y chcase, ntšamo Moisés entsanga ndoyenoca bronze mëtšcuaye tsbanánoca tbojananguësëjtjá, šoquënga tšabá chamotsatsmënama; cachcá entsemna, Bëngbe Bëtsá Entšá tbojanbemá entsanga chamuatsbanama; <sup>15</sup> chca, nýetscanga chábeñe tmojtsošbuáchenga, chë nýetsca tescama yomna tšabe vida chamotsebomnama ca” —Jesús Nicodémioye tbojaniana.

#### Ntsachetšá Bëngbe Bëtsá entsanga iuababuánýeshana

<sup>16</sup> Mëntšánaca Jesús tojánayana: —Bëngbe Bëtsá quem luare entsangbioye tša yojánababuanýeshanayeca, chë nýe canýe Uaquiñá ibobomná, bëngbioye tbojichmó, nýetsca chábeñe ošbuáchiyënga ndoñe chamondóbanama, y aíñe chë nýetsca tescama yomna tšabe vida chamotsebomnama. <sup>17</sup> Er Bëngbe Bëtsá chabe Uaquiñá quem luaroye ndoñe tbonjichmó quem luare entsangbiamna jabáyanama ntšamo tmojamama castigánënga chaotsamnama ca, sinó, entsanga chábeyeca atsebácanënga chamotsemnama.

<sup>18</sup> “Nda Bëngbe Bëtsabe Uaquiñábeñe tojtsošbuáchebiamna, Bëngbe Bëtsá ndoñe queochátayana ntšamo cha tojamama, castigáná chaotsemna ca. Pero chë Uaquiñábeñe ndoñe tontsošbuáchebiamna, mora Bëngbe Bëtsá ya tojayana, ntšamo tojamama cha castigáná chaotsemna ca, chë Bëngbe Bëtsá nýe canýe Uaquiñá ibobomnábeñe ndoñe yontsošbuaché causa. <sup>19</sup> Chca, chë ndoñe tmontsošbuáchengbiamna cha ya tojayana, ntšamo tmojamama castigánënga chamotsemna ca; er chë entsangbe juabnënga binýayá quem luaroye tojabo,

pero ba entsanga tmojábošena jtsomñana, chë entsangbiamna bacna juabnëngaca chamotsebomnama amáftaca. Chënga sempre bacna soyënga jtsamana; chíyeca chënga jtsebošana cháftaca jtsomñana. <sup>20</sup> Chë bacna soyënga tojtsamá ndoñe ntsebošana, chë binýayá chabe bacna soyënga chabuñinýema, ni chabe bacna soyëngama chabuá-cacanama. Chíyeca, chë bacna soyënga jtsamëse oyená, chë binýayábioye jtsáboyënjana, y chë binýayábioye ndoñe ntjabana. <sup>21</sup> Pero nda sempre tojtsiyena ntšamo ndegombre yomncá jtsamëse, chana aíñe chë binýayábioye jabana, chë binýayá chabiamna chabuñinýema, chë tojama soyëngna, ntšamo Bëngbe Bëtsá tojtseboščá tojamama ca” —Jesús tojánayana.

#### Juan chë Ubayaná cachiñe Jesucristbiamna tojanabuayaná

<sup>22</sup> Chca tojanopasá chentšana, Jesús chabe uatsjëndayëngaftaca básefta Judeoca pueblëngoye tojt-sanoñe. Chiñe, baseftatescama chë uatsjëndayëngaftaca tojanoquedá, entsanga ubáyana. <sup>23</sup> Cach tempo, Juanënaca entsanga yojanëbáyana Enonoca, Salim béconana, er choca bëtscá béjaye inabinýna. Ba entsanga choye imojtsaye, y Juan chënga yojanëbáyana. <sup>24</sup> Chca tojanopasá, chë Heródesbe soldadënga Juan cabá ndutame ora.

<sup>25</sup> Chë tempo, básefta Juanbe ústonënga tmojanontšé inýe judíoftaca enatsëtsnayana ntšamo tempo judiënga chë jtsacuéntšabiamna imojanámanama.

<sup>26</sup> Chora, chënga Juánbioye tmojánabo y tmojaniana: —Buatëmbayá, chë Jordán chenguánoica ácaftaca enjamná, ndabiamna tša tšabá conjanoyebuambná, mora entsanga entsëbayana y nýetscanga cha montsëstona ca.

<sup>27</sup> As Juan tojanéyana: —Ndocná quenátobena tondaye ntsebomnana, Bëngbe Bëtsá ndoñe tbonjatsetase. <sup>28</sup> Cach tšëngaftanga tšabá šmonjanuena y šmontsobena ndegombre yomnama jayanana, atše ndoñe chë Bëngbe Bëtsabe Uámana Uabuayaná tsjanmëna ca sënjánayanama; sinó, Bëngbe Bëtsá atše šojanichmó chë Uabuayanabe natsana, chabiamna entsanga jabábuayenama. <sup>29</sup> Chë tobiaše tojt-sobouamá ora, chë bobontse chábioye jtsebomnana; y chabe amigna, chabiamna jtsobátmanana y chë bobontse bouamnabe oyebuambnayana jtsuenanana; y chca tojtsuenana ora, tša oyejuayá cha jtsemnana. Cachcá, ntšamo chë Uabuayaná yojtsamama y yojtsóyebuambnama sëntsuenana ora, átšnaca corente oyejuayá sëntsemna. <sup>30</sup> Cha bontsemna más uamaná jtsemnana, pero atše šontsemna más nduamaná jtsemnana ca —Juan tojanéyana.

#### Ntšamo yomna chë celocana tojabá

<sup>31</sup> Mëntšánaca Juan tojánayana: “Chë tsbanánocana tojabá, nýetsca entsangbiamna más uamaná endmëna. Chë quem luare oyená quem luare entsangcá jtsem-

nana y quem luarentša soyëngama jtsóyebuambnayanana, pero chë celocana tojabana, nyetsca entsangbiana más uamaná endmëna. <sup>32</sup> Cachá ntšamo tojinÿe y tojouencá entsoyebuambná, pero chë entsichamo soyënguiñe ndocná quenatošbuaché. <sup>33</sup> Nda ntšamo cha tojtsóyebuambnañe tojtsóšbuaché y chca tojt-sama, jtsinÿanÿanayana Bëngbe Bëtsá ndegombre soyënga inetsichámuama. <sup>34</sup> Chcasna, Bëngbe Bëtsabe ichmonana, jtsóyebuambnayanana ntšamo Bëngbe Bëtsá tojtsichamcá. Bëngbe Bëtsana chë ichmonábioye tbojichmó chë Uámana Espíritu, nyets tempo corente chabotsájabuachanama, ntšamo cach Bëngbe Bëtsá tojtsichamo y cachcá chaotsichámuama. <sup>35</sup> Chë Taitá Uaquiñábioye bondbobonshana, y chë Uaquiñábioye obenana tbojatšetá nyetsca soyënguiñe jtsemándayama. <sup>36</sup> Nda chë Uaquiñábeñe tojtsóšbuaché, chë nyetsca tescama yomna tšabe vida echántsebmna; y nda chë Uaquiñábioye ndoñe tbontsašbuaché, chana chë vida ndoñe queochátsbmna, y chë Bëngbe Bëtsabe uabouana castigo nyetsca tescama chábeñe echántsemna ca” —cha tojánayana.

### Jesús y chë Samaria luaroca shembása

**4** Chë fariseunga tmojanuena Jesús, Juanbiana más ústonënga yojtsabamnama, y más entsanga yojtsëbáyanama. <sup>2</sup> Pero ndegombre, cach Jesús ndocnábioye bonÿanábayana, sinó chabe uatsjëndayënga. <sup>3</sup> Bëngbe Utabná Jesús, ntšamo chë fariseunga tmojanuena tojántatšëmbona ora, Judea luarocana tojéftsanbocna y Galileoye tojtaná.

<sup>4</sup> Choye jtamna ibojamna Samaria luarëjana jachnënguana. <sup>5</sup> Samariocna, canÿe pueblo Sicar ca uabáinoye Jesús tojánashjango. Chë pueblo yojamna, chë Jacob chabe uaquiñá Josébioye tbojéftsanlargá fshantse béconana. <sup>6</sup> Choca yojamna cánÿentše atëfjóniñe, býeshe jobuatsjuama, Jacobëbe atëfjóniñe ca uabáinoñe. Mo nyetsto ora, chentše Jesús yojtsemna, aniñe uamëntšnáyá, chë atëfjóniñe batsjaca yojótbema. <sup>7-8</sup> Chabe uatsjëndayëngna chë pueblöye tmojána saná jobuámiñama. Chora, canÿe shembása Samariocá, chë atëfjónoye tojánashjango, býeshe jauafcama; as Jesús tbojaniyana: —Býeshetema šmabuatsšetá ca.

<sup>9</sup> Y chë shembása tbojanjuá: —Aca canÿe judío condmëna y atšna canÿe samaritaná. ¿Ntšamo cojtsobena atše býeshe juabuátjañama ca? (Cha chca tojánayana, er canjanopasana, judiëngna samaritanëngaftaca ndoñe monjanenatsëtsná.)

<sup>10</sup> Chora Jesús tbojanjuá: —Aca mo cojtsetátšëmbo nye ntšamo Bëngbe Bëtsá aca jatšetayama yojtsebošcá, y nda chë býeshe cmojtsábuatjanañama, acna más cha catjuábuatjañe, y chana béjaye vida bomniye cmatjuabuátšetaye ca.

<sup>11</sup> Y chë shembása tbojaniyana: —Señor, tondaye quecátsbmna nye mo ndayecnaca býeshe jabuat-sjuama, y chë atëfjóniñe corente tboca endmëna; y as, ¿ndayentšana cochjobenaye béjaye vida bomniye atše juabuatsjetayama? <sup>12</sup> Bëngbe tempsca bëts taitá Jacob,

quem atëfjóniñe bëngbiana tojéftsanboshjona. Cachá, chabe básenga y chabe bayënga muentšana býeshe tmojéftsanofšé; y ¿aca chabiana más bëtsá comna ca? —chë shembása yojtsichamo.

<sup>13</sup> As Jesús tbojanjuá: —Nyetscanga chë quem býeshentšana tmojofšenga, chënga cachiñe echantëtëjuendaye. <sup>14</sup> Pero chë chanjuabuátšetaye býeshentšana tojofšé chana ndocna te cachiñe quebochétajuendaye. Cha chanjuabuátšetaye býeshna, chábeñe echántsemna mo cánÿentše béjaytema obocaniñcá, chë nyetsca tescama yomna tšabe vida jtsëbmnama ca —cha tbojaniyana.

<sup>15</sup> Chora chë shembása tbojaniyana: —Señor, chca býeshe šmabuatsšetá, as atše ndoñe cachiñe chašondetsajuendama, ni býeshe juafcama moye jtsaboyama ndoñe chašondëtsemnama ca.

<sup>16</sup> As Jesús tbojaniyana: —Motsa acbe boyá jachembuama y cochjésabo ca.

<sup>17</sup> Chora chë shembása tbojanjuá: —Boyá ndoñe quetsátsbmna ca.

As Jesús tbojaniyana: —Tšabá tcjayana boyá ndoñe condbmna ca. <sup>18</sup> Er, aca shachna boyanga conjánabamna, y chë mora contsebmna, acbe boyá ndoñe quenátsmëna. Ntšamo tconjayancá ndegombre entsemna ca.

<sup>19</sup> Chë shembása chca tojanuena ora, Jesúsbioye tbojaniyana: —Señor, mora atše séntsetatšëmbo, aca canÿa Bëngbe Bëtsabe juabna oyebuambnáyá comnama. <sup>20</sup> Bëngbe tempsca bëts taitanga quem tjoca Bëngbe Bëtsá monjánadorana; pero tšëngaftanga, judiënga šmondbétsichamo, bënga Bëngbe Bëtsá jadóramna, Jerusalenoca chë luare canmëna ca.

<sup>21</sup> Chora Jesús tbojanjuá: —Shembása, šmoyeuná; canÿe tempo echanjóshjango y chora tšëngaftanga ndoñe quecmochátamna Bëngbe Bëtsá jadóramna, ni quem tjöye jabana, ni Jerusalenoye jana. <sup>22</sup> Tšëngaftanga samaritanënga ndoñe quešmatábuatma nda šmet-sadoránama; pero bënga aíñe fsënduábuatma, er chë atsebacayá judiënguentšana endabó. <sup>23</sup> Pero ora entsoshjajuana, ya chë tempo tojjobuache, ndaye ora chë Bëngbe Bëtsá chë Taitá ndegombre atschuanayënga, chë Espíritbeyeca y ndegombre juabnéngaca chábioye mochántsadorana. Er chë Taitá entseboše chë chábioye adórayënga chca chamotsamama.

<sup>24</sup> Bëngbe Bëtsá, Espíritu endmëna; y chë chábioye adórayënga entsamna, chë Uámana Espíritbeyeca y ndegombre juabnéngaca cha jtsadoránana ca —Jesús tbojaniyana.

<sup>25</sup> Chora chë shembása tbojaniyana: —Atše sëndëtatšëmbo, canmëna chë Bëngbe Bëtsabe Uámana Uabuayaná, chë Cristo jabana ca; y cha chaojášjango orna, cha nyetsca soyëngama cašochjabuayená ca.

<sup>26</sup> As Jesús tbojaniyana: —Atše, chë ácaftaca entsoyebuambná cha, cha entsemna ca.

<sup>27</sup> Chëntscuana, Jesusbe uatsjëndayënga tmojtanashjajna, y tmojtsanëuatjaná, Jesús canÿe shembásaftaca yojtsoyebuambná causa. Pero ndocná Jesús tbojan-

tjá: ¿Ndayá cháftaca cojtseboše? o ¿Ndayeca cháftaca cojtsoyebuambná ca?

<sup>28</sup> Chorna, chë shembása chabe uafcanëja tojésanboshjona, y chë puebloye betesco tojtaná. Chocna, entšanga tojanéyana: <sup>29</sup> “Mabënga canye boyabása jinýama ca. Cha atše šonjauyana lempe ntšamo tijamcá. ¿Chë boyabása, chë Cristo tanántsemna ca?” —cha yojtšichamo.

<sup>30</sup> As chë entšanga chë pueblócana tmojánbocana y Jesús yojtsemnoye tmojánashjajna. <sup>31</sup> Chca yojt-sopasánëntscuana, chë uatsjéndayënga Jesúsbioye imojtseimpadana: —Buatëmbayá, batšatema mose ca.

<sup>32</sup> Pero cha tojanéyana: —Atše canye soye jasama séntsebmoma. Tšëngaftanga chë soyama ndoñe quešmátstatšëmbo ca.

<sup>33</sup> Chora chë uatsjéndayënga tmojanontšé entjanayana: —¿Nderado nda jasama chabiana tojiyëbo ca?

<sup>34</sup> Y Jesús tojanéyana: —Chë šonjichmó cha ntšamo yojtsebošcá jamana, y chabe trabajo japochócana, chë soyënga mo sanacá atšbiana entsemna. <sup>35</sup> Tšëngaftanga šmondbétsichamo: “Cabá canta ishinýe entsashbena jaja saná chaotsebínýama ca”; pero atše cbéyana: Minýënga tša entšanga moye montsabëbana; chënga montsemna mo jajañe saná játbanama tojtseprontancá. <sup>36</sup> Tšëngaftanga š-montsemna mo chë saná atbanayëngcá. Chëngna jajañe jtsetrabájayana, y chëngbe uacanánana jt-sësháchiñana. Cachcá, tšëngaftanga cmontsamna atšbiana entšanga júbuajana, chë nyetsca tescama yomna tšabe vida chamotsebmomna. Chë jaja saná átbanaye ora, jenënga y chë atbanayënga cánýiñe oyejuayënga jtsemnana. Cachcá, chë entšanga átšbeñe chamojtsošbuaché ora, nyetscanga, chë atšbiana obuájajanënga y chë atšbiana trabájayëngnaca cánýiñe oyejuayënga mochántsemna. <sup>37</sup> Quem entšangbe ichámuana, canye ndegombre soye endmëna: “Chë jená canya jtsemnana, y atbanayana inýa ca.” <sup>38</sup> Atše tšëngaftanga cbonjichamó canye soye játbanama, y tšëngaftanga tondaye chešmatsma chca chaotsebínýama. Inýënga chiñe bëtscá tmonjëftsetrabája, y tšëngaftangna, chëngbe trabajënguentsana šmojolograñe ca —Jesús tojánayana.

<sup>39</sup> Bëtscá entšanga, Samarioca pueblentšënga Jesúsbeñe imojtsanošbuaché, ntšamo chë shembása tojanéyanama. Chë shembása tojanéyana: “Lempe ntšamo atše tijamcá cha šonjauyana ca.” <sup>40</sup> As chë samaritanënga, Jesús yojtsemnentše tmojánashjajna ora, tmojanimpadá chëngaftaca chaotsoquedáñama. Y as Jesús, uta te chentše tbojëftsanjëtana. <sup>41</sup> Y más entšanga, cach ntšamo Jesús yojtšanëtsëtnacá tmonjanuena ora, chábeñe imojtsanošbuaché.

<sup>42</sup> Y chë shembása chë entšanga tmojanianana: “Mora cocayé fsëntsošbuaché, ndoñe nýe ntšamo aca šcojájuyanama, sinó cach bënga chábioye oído fsënjabujóyeca; y mora fsëntsetatšëmbo ndegombre cha yojtsemna chë quem luare entšangbiana Atsebacayá ca.”

## Jesús, canye mandado uajabuachanabe básabioye tbojanshná

<sup>43</sup> Uta te chentšana, Jesús Samariocana tojáisambocna y Galileoye tojtaná. <sup>44</sup> Cach Jesús mëntšá tojánayana: “Canya Bëngbe Bëtsabe juabna oyebuambnayá, cachabe luarentše oyenënga ndoñe bëtscá ntjabemëngana ca.” <sup>45</sup> Galileoca oyenënga Jerusalenoye tmojána, y tmojáninýe nyetsca bëtscá soyënga ntšamo Jesús Bashco fiesta ora choca tojanmcá. Chíyeca, Jesús Galileoye tojtanashjango ora, chënga tšabá tmojtanofja.

<sup>46</sup> Galileocna, Jesús cachiñe Caná puebloye tojésanashjango, chë béjayeca vínoye cha tojánbementše. Choca yojtsemna canye mandadbe uajabuachaná, y chabe uaquiñana Capernaum puebloca šocá yojtsejájona. <sup>47</sup> Jesús Judeocana Galileoye tojánashjanguama, chë uajabuachaná tojanuena ora, Jesúsbioye tojána y ibojtseimpadana chabe yebnoye cháuama, chabe uaquiñá chabuetseshnáñama, er ya jtsóbanama yojtsemna ca. <sup>48</sup> As Jesús tbojanianana: —Tšëngaftanga, Bëngbe Bëtsabe obenana jinýanýiyama bëtscá soyënga atše jamama ndoñe šmonjinýëse, átšbeñe ndocna te ntsošbuáchiyana ca.

<sup>49</sup> Chora, chë mandadbe uajabuachaná Jesúsbioye tbojanianana: —Taita, betesco mabo, atšbe uaquiñá cabá ndóbana ora ca.

<sup>50</sup> As Jesús tbojanianana: —Acbe yebnoye motsatá. Acbe uaquiñá ainá endëtsomñe ca.

Chë boyabásana tojanošbuaché ntšamo Jesús tbojaniancá y tojtaná. <sup>51</sup> Cha yojtstaye orna, chabe oservënënga tmojánbocana jajëbenguama y tmojanianana: —Acbe uaquiñá tšabá entsatsemna ca.

<sup>52</sup> As cha tojanatjá: —¿Ntseco orscana tbenjatëcja ca?

Y chënga tmojanjuá: —Tonjopasá yëfse, mošenana orscana chë calentora tbonjábosana ca.

<sup>53</sup> Chora chë taitá tojanenojuabó, cachca ora Jesús tbojanianana: “Acbe uaquiñá ainá endëtsomñe ca”. Y cha y nyetscanga chabe yebnentše oyenënga Jesúsbeñe imojtsanošbuaché.

<sup>54</sup> Ntšamo Jesús chora, chë uajabuachanabe uaquiñabiana tojanmcá, Judeocana Galileoye yojtstaye orna, yojamna chabe utama chca bëtscá soye jama, Bëngbe Bëtsabe obenana jinýanýiyama, Galilea luaroca.

## Jesús canye jama ndobenábioye tbojanshná

**5** Baseftayté chentšana, chë judiënga canye oboyejuaye te imojtsebmoma ora, Jesús Jerusalenoye tojána. <sup>2</sup> Choca, chë Oveshëngbe amashjuana ca uabáinentše yojamna canye binche uafjájonaye, entšangbe pormániñe. Chë béjayna judiëngbe biyañe Betzata ca inauabaina. Chë béjaye juachañe shachna amashjuana otsbojebniñe inamna. <sup>3</sup> Chiñna ba šoquënga jtanënga, coshetënga y jama ndobenënga imojtsecjana; chë béjaye chamobonjoma imojtsobátmana. <sup>4</sup> (Nderado nderado, Bëngbe Bëtsabioca canye ángel yojanamana

jastjanguana chë béjaye jabónjuama. Chca ora, chë béjayoye natsana tojamashënguá, chabe šocanama tšabá jtsatsmënama.)<sup>5</sup> Chë šoquënguiñe canye boyabása inamna, unga bnétsana y posufta uatama jama ndobená.<sup>6</sup> Jesús chë jajanábíoye tbojáninye ora y ba uatama chca yojamna tojántatšëmbona ora, tbojantjá: —¿Quecojtseboše tšabá jtsatsmënama ca?

<sup>7</sup> Y chë šocá tbojanjuá: —Taita, ndocná quetsátsbomna nda chašúajabuache béjayoye jamashënguama, chë béjaye tojtsobonjná ora. Y atše béjayoye jamashënguama stseboše ora, inya atšbe natsana jtsamashënguana ca.

<sup>8</sup> Y Jesús tbojanijana: —Matëtsbaná, acbe tjuashe mesocñe y matontšé jóyenana ca.

<sup>9</sup> Cach ora chë boyabása tšabá yojtsatsmëna, chabe tjuashe tojésanocñe y tojanontšé jtsanana. Chca tojanopasá ora, chë ochnayté inamna.<sup>10</sup> Chíyeca, chë tbojanshnábíoye chë judiënga tmojanijana: —Mëntena ochnayté. Mënté ndoñe quenátopodena aca tjuashe jtsecutsnana ca.

<sup>11</sup> Y chë boyabása tojanéyana: —Chë šonjashná cha mëntšá šonjauyana: “Acbe tjuashe mesocñe y montšé jóyenana ca”.

<sup>12</sup> As chënga tmojantjá: —¿Nda yojtsemna chë “acbe tjuashe mesocñe y montšé jóyenana ca” tcmojauyaná ca?

<sup>13</sup> Pero chë shnaná ndoñe yontsetátšëmbo nda tbojanshnama. Chocna bëtscá entšanga imojtsemna; chcasna, Jesús chëngbe tsëntsajana tojanenatjëmbo.

<sup>14</sup> Chentšana, Jesús Bëngbe Bëtsabe bëts yebnentše chë boyabásabíoye tbojáninýena y tbojanijana: —Mouena; mora aca ya ndoñe šocá quecátsmëna; bacna soyënga ndoñe cachiñe cattsama. Aíñese, acbiama puerte mal echanjopása ca.

<sup>15</sup> Chë boyabása tojtsanoñe y chë judiënga tojanéyana: —Chë šonjashná cha Jesús entsemna ca.

<sup>16</sup> Chë causa, chë judiënga imojtsenguaye ntšamo Jesús ndayánaca jabórlana, cha ochnayté chë soyënga tojanmama.<sup>17</sup> Pero Jesús tojanéyana: “Atšbe Taitá nyets tempo tšabe soyënga endbëtsama; cachcá, átsnaca tšabe soyënga sëntsama ca.”

<sup>18</sup> Jesús tojanma ntšamo ochnayté ndoñe yonjanapodencá, y Bëngbe Bëtsabíama tojánayana “Atšbe Taitá ca”. Mëntšá Jesús yojtsanobiamná cach Bëngbe Bëtsacá. Chama, chë judiënga más imojtseboše Jesús jóbama.

### Bëngbe Bëtsabe Uaquiñabe obenana

<sup>19</sup> Chentšana Jesús tojanéyana: “Ndegombre šcuayana: Bëngbe Bëtsabe Uaquiñá, nye cachabe cuenta tondaye quenátobena jamana. Cha jtsonýayana ntšamo chabe Taitá tojtsamcá. Ntšamo chë Taitá tojtsamcá, chë Uaquiñánaca jtsamana.<sup>20</sup> Er Bëngbe Taitá chabe Uaquiñábíoye bondbobonshana, y lempe ntšamo cha tojtsamcá chábíoye bondinýinýná; y más bëts soyënga bochanjinýinýiye, chë soyëngama tšëngaftanga chašmenjanama.<sup>21</sup> Chë Taitá endama obanënga chámuatayenama y tšabe vida chamotse-

bomnama; cachcá, chë Uaquiñá entsama tšabe vida chamotsebomnama, ndëmuanýenga cha tojtsebošcá.

<sup>22</sup> Chë Taitá ndocnabíama jatichámuana tšabá o ndoñe tšabá yontsama ca. Chabe Uaquiñábíoye nyets obenana tbonjatšetá nyetscangbíama jayanama tšabá o ndoñe tšabá tmontsamama.<sup>23</sup> Chca, chënga chamuinýinýe Bëngbe Bëtsabe Uaquiñá puerte uamaná yomnama, ntšamo Bëngbe Bëtsá puerte uamaná yomnama nyetscanga mondbetsinýinýaycá. Nda chë Uaquiñábíoye ndoñe más uamaná tbontsebi-amná, cach ndoñe más uamana ntsebiamnayana chë Taitábíoye, nda chë Uaquiñá tbojichmóbiyoe.

<sup>24</sup> “Ndegombre šcuayana: Nda ntšamo atše sëntsichamcá šojoyeuná, y chë muentšë šonjichmó chábeñe tojtsošbuaché, chë nyetsca tescama yomna tšabe vida jtsebomnana. Chabíama chë Uaquiñá ndoñe queochátayana castiganá chaotsemna ca. Chca, Bëngbe Bëtsabíama cha ya ndoñe más mo obanacá queochátsmëna, chábeñe ndošbuáchiye causa; y ya ndoñe nyetsca tescama castiganá queochátsmëna. Y aíñe, chë nyetsca tescama yomna tšabe vida echántsebomna.

<sup>25</sup> “Ndegombre šcuayana: Chë jobuáchama te ya tojjobuache. Chë te, chë Bëngbe Bëtsabíama mo obanëngcá imomnënga mochanjouena Bëngbe Bëtsabe Uaquiñá jtsóyebuambnayana. Nda chca tšabá chašojoyeuná cha, tšabe vida echántsebomna.<sup>26</sup> Er ntšamo Bëngbe Taitá obenana endbomncá, cachá jamama entšanga vida chamotsebomnama, chabe Uaquiñábíoyenaca obenana tbojatšetá entšanga vida chamotsebomnama jamama.<sup>27</sup> Chë Uaquiñá endmëna nda Bëngbe Bëtsá Entšá tbojánbema; chíyeca chë Taitá chábíoye obenana tbojatšetá nyetscangbíama jayanama tšabá o ndoñe tšabá tmontsamama.

<sup>28</sup> Chama ndoñe matenjnanana. Er canye tempo echanjobuache, y chora chë Uaquiñá obanënga echántsachembuana; chënga mochanjouena y cach ora, chëngbe oyenocana mochanjésebocana.<sup>29</sup> Tšabe soyënga tmojëftsemënga, obanënguentšana mochántayena, chë nyetsca tescama yomna tšabe vida jtsebomnama. Pero bacna soyënga tmojëftsemëngna obanënguentšana mochántayena nyetsca tescama castiganënga jtsemnama ca” —Jesús tojanéyana.

### Jesús, ndegombre Bëngbe Bëtsabe ichmoná inamna

<sup>30</sup> Mëntšánaca Jesús cachatbíama tojánayana: “Nye átšbeyeca tondaye quetsátobena jamama. Chë Taitá šontsemánda ntšamo nyetscangbíama jayanama tšabá o ndoñe tšabá tmontsamama. Nye chca atše sëntsobena chë soye jamama. Ndoñe quetsátsboše jamana nye ntšamo cach atše stsebošcá; pero sempre sëndbëtseboše jamama, ntšamo Taitá, chë šonjichmó cha tojtsebošcá. Chíyeca atše nyetscangbíama sëntsichamo tšabá o ndoñe tšabá tmontsamama; y ntšamo nyetscangbíama sëntsichamcá, ndegombre endmëna.

<sup>31</sup> “Ntšamo cach atšbíama tijayanama, ndegombre entsemna ca stsichámëse, ntšamo stsichamcá,

nÿetscangbiama tondaye ntsámanana.<sup>32</sup> Pero inÿa entsemna. Cha endétatšëmbo y entsichamo ntšamo ndegombre atšbiamá yomncá; y séntsetatšëmbo ntšamo cha atšbiamá yojsichamcá, nÿetscangbiama aíñe yojsámanama.<sup>33</sup> Tšëngaftanga ínÿenga šmojanichamó atšbiamá Juan jatjayama; y ntšamo cha tcmojuayancá ndegombre endmëna.<sup>34</sup> Masque chë soyënga cha tcmojuáyana, ndoñe quešnatájaboto ndocna entšá atšbiamá chaotsichamo 'cha aíñe chca endmëna ca'. Atše quem soyënga séntichamo ndayá nÿe tšëngaftanga atsebácanënga chašmotsemnama.<sup>35</sup> Juan enjamna mo canÿe uajuinÿanësha tojt-sajuinÿana y tojtsabuashinÿinÿancá. Tšëngaftanga chabe buashinÿinÿanana šmonjinÿe, y šmonjábošena rato cháftaca oyejuayënga jtsemnama.<sup>36</sup> Pero chë atše sënjama soyëngacna más entsinÿinÿena ntšamo atšbiamá ndegombre yomncá, chë ntšamo Juan atšbiamá tojánayana. Ndayá atšbe Taitá šojabonÿé jama, ntšamo atše séntsamcá, entsinÿinÿiná ndegombre chë Taitá šojichmoma.<sup>37</sup> Atšbe Taitá, chë šojichmó chá naca entsichamo ntšamo atšbiamá ndegombre yomncá, masque ndocna te chabe oyebuambnayana chešmatuena, ni ntšamo cha yomncá chešmátinÿe.<sup>38</sup> Pero tšëngaftangbe ainanoye chabe palabra ndoñe tonjómashëngo, cha tbojichmóbeñe tšëngaftanga ndoñe quešmatošbuaché causa.<sup>39</sup> Tšëngaftanga, Bëngbe Bëtsabe palabra tša jtsatsjédayana, er šmondobátmana, chca jtsamëse chë nÿetsca tescama yomna tšabe vida jónÿenama. Y Bëngbe Bëtsabe uabemana palabrënguñe atšbiamá endayana ntšamo ndegombre yomncá;<sup>40</sup> pero masque chca, tšëngaftanga ndoñe quešmátsošboše atše jtséstonana, y chca, tšabe vida jtsebomnama.

<sup>41</sup> "Atše ndoñe quetsátsošboše entsanga yapa tšabá atšbiamá chamotsichámuama.<sup>42</sup> Y inÿe soye, atše puerte cbondëbuatma, y sëndétatšëmbo tšëngaftanga Bëngbe Bëtsá ndoñe šmondobonshánama.<sup>43</sup> Atšna atšbe Taitabe cuenta sënjabo, y tšëngaftanga ndoñe quešmátsošboše atše jofjana. Pero inÿa, cachabe cuenta tojabábioye cocayé aíñe šmatjofja.<sup>44</sup> Tšëngaftanga corente jésebošana, ínÿenga tšëngaftangbiama tšabá chamotsichámuama, y ínÿengbiama tšabá jtsichámuama; pero ndoñe ntsebošana chë nÿe canÿe Bëngbe Bëtsá tšëngaftangbiama cachcá chaotsichámuama. Chca šmojtsamëse, ¿ntšamo šmochtsobena Bëngbe Bëtsábeñe jtsošbuáchiyana?<sup>45</sup> Ndoñe šmattsejuabnaye, atšbe Taitabe delante tšëngaftangbe contra atše chjayana ca ntšamo tšëngaftanga šmojtsamama. Tšëngaftanga tša jtsobátmanana atsebácanënga jtsemnama, chë ntšamo Moisesbe leyiñe endayancá šmojtsamama; pero ndegombre, ntšamo cha tojayancá, cach tšëngaftangbe contra entsemna.<sup>46</sup> Tšëngaftanga, chë Moisés tojétsanabema soyiñe šmojtsosbuachese, átšbeñnaca šmattsošbuáchiyé, er cha atšbiamá tojanábema.<sup>47</sup> Pero chë tojanábema soyiñe tšëngaftanga ndoñe šmontsošbuachesna, ¿ntšamo šmochjobenaye chë atše séntichamo soyënguñe jtsošbuáchiyana ca?" —Jesús tojanéyana.

### Jesús shachna uaranga boyabásenga saná tojanacaredadó

**6** Chë soyënga tojanopasá chentšana, Jesús chabe uatsjédayëngaftaca tojána Galilea uafjajónaye chenguana. Chë uafjajónayna Tiberias cánaca inauabaina.<sup>2</sup> Ba entsanga imojtséstona, er chënga tmojaninÿe cha bëts soyënga jtsamana, šoquënga jtsashnayëse.<sup>3</sup> As Jesús tjoye tojántsjua, y choca chabe uatsjédayëngaftaca tojanótbema.<sup>4</sup> Ya judiëngbe canÿe fiesta, chë Bashco fiesta, yojetsobeco.

<sup>5</sup> Jesús tojanótbema ora, tojanontješé y tojánanÿe ba entsanga chábioye imojetsebéconaye. As Felípbioye tbojaniana: —¿Ndayentše saná cuanjabuámiye nÿetsca quem entsanga chamosama ca?

<sup>6</sup> Jesús chca tbojaniana, ana Felípbioye jinÿama ntšamo cha tabuanjojuama; er cach Jesús tšabá inatátšëmbo ndayá jamama.<sup>7</sup> Y Felipe tbojanjá: —Ni mo uta patse denario crocenánaca nanjopódia tandëse jabuámiyama, nÿetsca entsanga nÿe mo batšatëmnaca chamuëtsesama ca.

<sup>8</sup> Chorna, Jesusbe canÿe uatsjédayá, Andrés ca uabainá, Simón Pédrëbe catšata, Jesúsbioye tbojaniana:<sup>9</sup> —Muentše entsemna canÿe básistema y cha shachna cebada tandëse y uta beónata entsebomna. Pero, ¿ndayase nÿe nÿetsatema chëfta entsangbiama ca?

<sup>10</sup> As Jesús tojánayana: —Entsanga méyana chamotbiama ca.

Becá shácuana chë luariñe inamna, y nÿetsca entsanga chiñe tmojanoshéntsjatbiama. Chë entsanguentše shachna uaranga boyabásenga imojtsemna.<sup>11</sup> Chora Jesús, chë tandëse chabe cucuatšíñe tojanca, y Bëngbe Bëtsábioye chë tandëšama tbojtanchuá; y chabe uatsjédayënga tojanëjatá, y chë uatsjédayëngna nÿetsca entsanga imojtsetbiámanënga tmojanatšatá. Cachcá Jesús chë beónaca tojanma, y ntšamo entsanga imojanbošcá tmojanatšatá.<sup>12</sup> Nÿetscanga tmojanse y tmojtanoshachá ora, Jesús chabe uatsjédayënga tojanéyana: —Chë ojanëtemënga šmochtsatbananga, tondaye nÿe cachcá ntjéftsonÿayama ca.

<sup>13</sup> As chënga tmojanatbaná, y chë tmojanse shachna cebada tandëšentšana tojanójamëtemëngaca, bnëtšana uta sbarécua tmojanajutjé.<sup>14</sup> Chë entsanga quem bëts soye Jesús jamama tmojaninÿe ora tmojánayana: "Ndegombre quem boyabása, chë quem luaroye jabama Bëngbe Bëtsabe juabna jabóyebuambayama cha entsemna ca."

<sup>15</sup> Jesús yojtsetátšëmbo entsanga chëngbe rey jabemama imojetsebošama. Chiyeca cach tjoye tojt-saisanoñe canÿa jtsomñama.

### Jesús béjaye juatsbuacá yojsaye

<sup>16</sup> Tojanibétata ora, Jesusbe uatsjédayënga chë uafjajónayoye tmojantsmá;<sup>17</sup> barquëshañe tmojtanenojayé, y tmojanontsé jenashbuachënguana, chca, Ca-

pernaumoca jenbocnama. Ya ibeta yojtsemna, y Jesús cabá ndoñe chéngbiöye ntashjanguana. <sup>18</sup> Chca imojt-senashbuachñejuana orna, chë béjayiñe jabuache binñia tojanóshjango y bëts olëshenga chë bar-quëshoye yojtsóantsetaye. <sup>19</sup> Shachna o chnénguana kilómetro chénga tmojána ora, tmojáninñe Jesús chéngbiöye yojtsebéconaye, béjaye juatsbuacá yojt-saye. Chénga chca tmojáninñe ora tša tmojanocochau-atjaná, <sup>20</sup> pero Jesús tojanéyana: “Atše sëndmëna; ndoñe matauatjèngana ca.”

<sup>21</sup> Chora chë uatsjédayènga oyejuayènga imojtse-boše Jesús chë barquëshoye jofjana, y ndoñe bënëntscose ya chë imojtsaye luaroye tmojánashjajna.

### Entsanga Jesús tmojánguango

<sup>22</sup> Yëfsana, nyetsca entsanga, chë uafjónaye chenguánoica tmojanocodanga tmojáninñe, chë inñe yëfsana chë nñe canñe barquësho yojuamnëshañe Jesus-be uatsjédayènga tmojtsanoñama, y Jesús chéngafta-ca ndoñe tonjánama. <sup>23</sup> Pero chëntscuana, Tiberias pueblentsana inñe barquëshangá tojanáshjajna canñe luarentše, chë Bëngbe Utabná Jesús chabe Taitábioye tbojtanchuá chentsana, entsanga saná tmojanse luare béconana. <sup>24</sup> Asna, ni Jesús ni chabe uatsjédayènga chentše ndoñe montsemnama chë entsanga tmoján-inñe ora, chë barquëshangañe tmojtanenoyayé y Capernaumoye tmojána Jesús jetsenguanguama.

### Jesús, chë nyetsca tescama yomna tšabe vida jtsebom-nama tandëse

<sup>25</sup> Chë uafjónaye chenguánoye tmojánashjajna ora, Jesús tmojáninñe y mëntšá tmojantjá: —¿Buatëm-bayá, ntseco ora muentše tcojášhango ca?

<sup>26</sup> Y Jesús tojanéyana: —Ndegombre cbéyana, tšëngaftanga ndoñe atše quešmatsnguá, chë bëts soyènga tijamama, sinó nñe chë jtoshachaye nyetsá tandëse š-mojasama. <sup>27</sup> Ndoñe matenángmenana chë nñe ndoñe bën y jopochócana sanama; chë ndmopochócaye saná, chë nyetsca tescama yomna tšabe vida jtsebom-nama saná šmochjánguango. Chë saná, Bëngbe Bëtsá Entšá tbojanbemá cmochanjátšataye, er Bëngbe Bëtsá chë Taitá tonjinñanýé, tšabe soyéngaca, cha chábioye tbojuábuayanama ca —tojánayana.

<sup>28</sup> Chora chë entsanga tmojantjá: —¿Ndayá fchjama ntšamo Bëngbe Bëtsá yojtsebošcá chaotsemnama ca?

<sup>29</sup> Chca tmojantjá ora, Jesús tojanéyana: —Chë Taitá entseboše tšëngaftanga chabe ichmonábeñe chaš-motsošbuáchemca ca.

<sup>30</sup> Chora chénga tmojanianya: —¿Ndaye tšabe soye cochjama acbe obenana bënga jinñanñiyama ca? Chë soye chaftsjinñe, ábeñe fchantsošbuáchiye. ¿Bëngbiana taicochjama ca? <sup>31</sup> Bëngbe tempsca bëts taitanga entsanga ndoyenoca maná ca uabaina saná tmojanse. Bëngbe Bëtsabe uabemana palabrènguifne mëntšá endayana: “Cha celoca tandëse tonjanatšatá chamosama ca” —chénga tmojánayana.

<sup>32</sup> Chora Jesús tojanéyana: —Ndegombre cbéyana, Moisés chénga ndoñe chë celoca tandëse tonjanatšatá; Bëngbe Bëtsá Bëngbe Taitá chéngbiöye tojanatšatá chë maná ca uabaina tandëse; y cha endmëna nda celocana chë ndocna te ndmopochócaye tandëse ndegombre cmondatsatná. <sup>33</sup> Er Bëngbe Bëtsábocana tandëse entsemna chë celocana tojastjanguá; y cha quem luare entšangbiana entsama chë nyetsca tescama yomna tšabe vida chamotsebomnama ca —cha tojanéyana.

<sup>34</sup> Chora chénga tmojanimpadá: —Taita, chë tandëse sempre šcochtsatšatnaye ca.

<sup>35</sup> Y Jesús tojanéyana: —Atše sëndmëna entsanga chë nyetsca tescama yomna tšabe vida jtsebomnama tandëse. Nda atše chašojtséstona, sempre oyejuayá echanjéftsemna y Bëngbe Bëtsabe soyènga nyets tempo echanjesóbonñe, mo nda nyets tempo saná totsobomñicá, y ndocna te tbontsishèntsancá. <sup>36</sup> Pero ntšamo ya tcbonjauyancá, tšëngaftanga atše šmonjinñe y cabá ndoñe átšbeñe quešmatošbuaché. <sup>37</sup> Nda atšbe Taitá atšbiana tbojabocacá, cha atše šochantséstona; y nda átšbioye šojtséstona, átšbentsana quichtétábocna. <sup>38</sup> Er atšna celocana sënjabo chë šojichmó cha ntšamo yojtsebošcá jamama, y ndoñe nñe ntšamo atše stsebošcá. <sup>39</sup> Y chë šojichmó cha entseboše, ni mo canña chë atšbiana tojabacacá chentsana, atše chailesenciá pochocaná chaotsemnama; y quem luare jopochócama tena, nyetscanga atšbiana tojabacacangbiana chámuatayenama atše chaimama. <sup>40</sup> Er atšbe Taitá entseboše, nda chabe Uaquiñábioye tbojinñe y chábeñe tojtsošbuaché, chë nyetsca tescama yomna tšabe vida chaotsebomna, y quem luare jopochócama tena, cha cháuatayenama atše chaimama ca —Jesús tojanéyana.

<sup>41</sup> “Atše séntsemna chë celocana tojóshjango tandëse ca” Jesús tojanéyana causa, chë judiènga tmojanontšé chabiana podescá ichámuana. <sup>42</sup> Chénga mëntšá imojtsichamo: —¿Mua ndoñe Jesús yondmëna, chë Josebe uaquiñá? Chabe bëtsétsata bënga tmotsábuatmñe. ¿Ntšamo cha mora yochjátichamo celocana tojástjango ca?

<sup>43</sup> As Jesús tojanéyana: —Atšbiana ndoñe podescá matichámuana. <sup>44</sup> Ndocná quenátobena atše juastana, chë Taitá, chë šojichmó cha, ainaniñe chca chaotsebošama ndoñe tbonjuajabuáchese; y atše chanjama cha cháuatayenama quem luare jopochócama te.

<sup>45</sup> Chë tempsquènga Bëngbe Bëtsabe juabna oye-buambnayènga mëntšá tmojanábema: “Cach Bëngbe Bëtsá nyetscanga echanjabuatambá ca.” Chcasna, nda atšbe Taitábioye tbojoyeuná, y ntšamo chë Taitá tbojabuatèmbacá tojuatsjinñe, cha atše šochanjuasto.

<sup>46</sup> “Ndocná atšbe Taitá tbojinñe. Nñe chë Bëngbe Bëtsábocana tojabá aifne. <sup>47</sup> Ndegombre šcuayana: Nda átšbeñe tojtsošbuaché, chë nyetsca tescama yomna tšabe vida echántsebomna. <sup>48</sup> Atše sëndmëna entsanga chë nyetsca tescama yomna tšabe vida chamotsebomnama tandëse. <sup>49</sup> Masque tšëngaftangbe bëts taitanga, entsanga ndoyenoca chë

maná ca uabaina saná tmojanse, pronto tmojanóbana. <sup>50</sup> Pero atše séntsoyebuambná ndayá chë celocana tojóshjango tandëšama. Nda chë tandëše tojase, ndoñe queochatóbana. <sup>51</sup> Atše séntsemna entšanga chë nyetsca tescama yomna tšabe vida jtse-bomnama tandëše, chë celocana tojóshjanguëše. Nda quem tandëše tojase, nyetsca tescama nye ainá echanjesomñe. Chë chanjátšataye tandëšna, cach atšbe cuerpo entsemna. Chca chanjama quem luare entšanga chë nyetsca tescama yomna tšabe vida chamotsebomnama ca” —Jesús tojánayana.

<sup>52</sup> Chora chë judiënga tmojanontšé enatsëtsnayana: —¿Ntšamo cha yochjobenaye cachabe cuerpo jatšatayana bënga jasama ca?

<sup>53</sup> As Jesús tojanéyana: —Ndegombre šcuayana: Tšëngaftanga Bëngbe Bëtsá Entšá tbojanbemabe cuerpo ndoñe šmonjase y chabe buiñe ndoñe šmonjofšese, ndegombre tšabe vida ndoñe quešmocháts-bomna. <sup>54</sup> Nda atšbe cuerpo tojase y atšbe buiñe tojofšé, chë nyetsca tescama yomna tšabe vida echántse-bomna, y quem luare jopochócama te atše chanjama cha cháuatayenama. <sup>55</sup> Atšbe cuerpo ndegombre saná endmëna, y atšbe buiñe ndegombre ofšëšnayiye.

<sup>56</sup> Nda atšbe cuerpo tojase y atšbe buiñe tojofšé, átšeftaca cányiñe mo canýaca echántsemna, y átšnacá cháftaca. <sup>57</sup> Atšbe Taitá, chë šojichmó cha, vida end-bomna, y atšbe chábeyeca vida sëndbomna; cachcá, nda atšbe cuerpo tojase, chana átšbeyeca vida jtse-bomnana. <sup>58</sup> Chë ndaye soyama atše séntsoyebuambná, atšbe cuerpo y atšbe buiñe, entsemna chë celocana tojóshjango tandëše. Masque tšëngaftangbe bëts taitanga chë maná ca uabaina tandëše tmojanse, pronto tmojanóbana; pero quem tandëše ndoñe cachcá quenátsmëna. Nda quem tandëše tojase, nye nyets tempo vida echanjesóbomñe ca —Jesús tojánayana.

<sup>59</sup> Chë soyëngna Jesús tonjanabuatambá Capernaum pueblentše, chë judiëngbe enefjuana yebnentše.

### Chë nyetsca tescama yomna tšabe vida jtsebomnana palabrenga

<sup>60</sup> Chca tmojanuena ora, banga Jesusbe ústonënga imojtsichamo: —Ntšamo cha entsichamcá yapa totcá entsemna mo ndegombre cuaftsemncá joyeunayama. ¿Nda buanjóyeunaye ca?

<sup>61</sup> Jesús yojtsetátšëmbo chënga ndoñe tšabá imontsichámuama; as, chënga tojanatjá: —¿Ntšamo cbontsëtsëtsnacá ndoñe tšabá cmontsëuenana ca? <sup>62</sup> Y chcasna, Bëngbe Bëtsá Entšá tbojanbemá, chë cha tempo inamna luaroye tojëtstsuama šmojinýëse, ¿ntšamo šmattsejuabnaye? <sup>63</sup> Bëngbe Bëtsabe Espiritu entsama entšanga chë tšabe vida chamotsebomnama. Chë cuerpo ndoñe uámana soye quenátsmëna; chë tcbonjáuyana soyënguiñe entsemna chë Uámana Espiritbe uajabuáchenana y chë tšabe vida. <sup>64</sup> Pero masque chca entsemna, tšëngaftangbentšana banga átšbeñe ndoñe quešmatošbuaché ca —Jesús tojánayana.

Er Bëngbe Bëtsabe soyëngama entšanga jábuayenama Jesús tojanbojatsé orscana, cha inatátšëmbo ndëmuanýenga chábeñe ndoñe mochanjanošbuáchiye, y nda chë uayayëngbe cucuatšifne yochjëftsayentšbashejuanana. <sup>65</sup> Y Jesús yojtëtóntša oye-buambnayana: —Chíyeca, atše tšëngaftanga tcbonjáuyana: “nda atše juastama ainaniñe chaotsebošama atšbe Taitá ndoñe tbonjuájabuache, cha ndoñe quešochatasto ca”.

<sup>66</sup> Chë causa, chentšana, ba chabe ústonënga cachcá tmojesanonýá, y cháftaca ya ndoñe imontsajna.

<sup>67</sup> Chora Jesús, chë bnëtsana uta uatsjëndayënga tojanéyana: —¿Y tšëngaftangnaca, jtsoñama y atšbe jéseboshjonama šmojtseboše ca?

<sup>68</sup> Chora Simón Pedro tbojanjúá: —Bëngbe Utabná Jesús, ¿chcasna ndábioye fchjanga ca? Nye aca šcontsëtsëtsná chë nyetsca tescama yomna tšabe vida jtsebomnama palabrenga. <sup>69</sup> Acbeñe fsëntsošbuaché, y mora fsëntsetatšëmbo aca chë Bëngbe Bëtsabe Uamaná comnama ca.

<sup>70</sup> Chora Jesús tojanéyana: —Atše tcbonjabacacá, chë bnëtsana útata; pero canya tšëngaftanguentšana, mo Satanasbe canye trabajayacá entsemna ca.

<sup>71</sup> Judas Iscariote, chë Simonbe uaqiñabiama chca Jesús tojánayana. Er chana masque canya chabe bnëtsana uta uatsjëndayënguentsá inamna, Jesús uayayëngbe cucuatšifne yochjáftsayentšbashejuana.

### Jesusbe catšátanga chábeñe ndoñe montsanošbuaché

**7** Chë soyënguentsana, Jesús Galilea luarëjana yojánana. Chë tempo, judiënga imojtsanjuabnaye ntšamo jamëse cha jóbama. Chíyeca, Jesús ndoñe yontseboše Judeoye jama. <sup>2</sup> Chora, judiëngbe canye bëts fiesta semana yojtsobeco. Quem fiestënguentscuana, chë judiënga imojanamana tambënguñe jtsiyenana. <sup>3</sup> As chora Jesusbe catšátanga tmojanianya: —Muentše ndoñe catjoquéda; Judeoye motsa, choca condbomna ústonënga, ntšamo contsamcá chócna chaminýama. <sup>4</sup> Er nda tojtseboše chamot-sábuatmama, chabe soyënga ndoñe iytecana ntsamana. Aca bëts soyënga Bëngbe Bëtsabe obenánaca contsamëna, motsa y nyetscangbe delante chca cochjama ca —chënga tmojanianya.

<sup>5</sup> Er ni mo cach Jesusbe catšátanga chábeñe ndoñe montsanošbuaché. Chíyeca chënga chca tmojanianya.

<sup>6</sup> Chora Jesús tojanéjua: —Atšbe ora cabá ndoñe quentóshjango, pero tšëngaftangbiamá mocna órnaca tšabá endëtsomñe. <sup>7</sup> Chë nye quem luarama enójuabnaye entšanga ndoñe quemátobena tšëngaftanga jt-sëbuayënjana, pero átšbioyna aíñe, er atše puerte tšabá sentsinýanýná ntšamo chënga imojtsamcá ndoñe tšabá yontsemnama. <sup>8</sup> Tšëngaftanga chë fiesta-ma šmochjá. Atšbe ora cabá ndoñe quentóshjango. Chíyeca atše choye ndoñe quicháta ca —cha tojánayana.

<sup>9</sup> Jesús chë soyënga tojanéyana y cach Galileoca tojt-sanoquedañe.



### Chê tambênguiñe jtsiyenama fiesta

<sup>10</sup> Chabe catšátanga chë fiestoye tmojána chentsána, Jesúsna tojána, masque ndoñe entsángbeñe, sinó mo iytécana cuenta. <sup>11</sup> Chë fiestocna, judiënga Jesús imojtsenguaye y imojtsichamo: —¿Ndayentšë chë boyabása yojtsemna ca?

<sup>12</sup> Entšángbeñe ba soyënga chabiama iytécana imojtsichamo. Inyënga chabiama imojtsichamo: “Cha tsabia endmëna ca”; pero inyëngna: “Cha entsanga entsaíngña ca”.

<sup>13</sup> Pero ndocná Jesusbiama beca añémoca yontsoyebuambná, chë judiëngbe amëndayëngbiama imojtsauatja causa.

<sup>14</sup> Chë fiesta semana tséntsañe yojtsó ora, Jesús Bëngbe Bëtsabe bëts yebnentšë tojánamashëngo, y tojanontšë jabuátambana. <sup>15</sup> Chentšë chë judiënga, ntšamo Jesús tojanabuatambacá tmojanuena ora, ojanánënga imojtsichamo: —Bëtsá ntjuatsjinýca, ¿ntšamo nyetsá nantsetátšëmbo ca?

<sup>16</sup> As Jesús tojanéjua: —Atšbe buatëmbayana ndoñe nye átšbentsána quenatóbocana, ndayá chë šonjichmó chábentsána. <sup>17</sup> Nda tojtseboše jamama ntšamo chë šojichmó cha yojtsebošcá, cha echántsetatšëmbo atšbe buatëmbayana Bëngbe Bëtsábocana yóbocana o nye átšbentsána. <sup>18</sup> Nda nye cachabe juábnaca tojtsoyebuambná, jtsebošana entsanga más bëtsá chamobemama; pero nda bëtsá tojtsama, chë tbojichmóbiyoye entsanga más bëtsá chamobemama, cha cocayé ntšamo ndegombre yomncá jtsóyebuambnayana, y ndocnábiyoye ntseíngñayana.

<sup>19</sup> “Ndegombre, Moisés tšëngaftangbiama ley tojëftsanaboshjona. Pero masque chca, tšëngaftanguentšá ndocná quenátama ntšamo cha tojëftsanmandacá. Y ¿ndáyeca šmojtseboše atšë jóbama ca?” —Jesús tojanatjá.

<sup>20</sup> Chora entsanga tmojanjúá: —¿Ndegombre aca bacna bayëjbe juabna contsambá! ¿Nda yojtseboše aca jóbama ca?

<sup>21</sup> Chora Jesús tojanéyana: —Nyetsca tšëngaftanga ojanánënga atšë šmontsonýá, atšë canye ochnayté canye entšá tijashnama. <sup>22</sup> Pero, Moisés tcmontanamëndá bássetema base bobachtema chë más delicadentšë jatëtšana, chaotsinýnama (ndoñe nye Moisésbeyeca chca, sinó Moisesbiama más tempca bëts taitanga chca jamama imojanamánayeca); y tšëngaftanga canye bássetema base bobachtema chë más delicadentšë jatëtšana, masque chë te canye ochnayté totsomñëse. <sup>23</sup> Y mora, ntšamo Moisés tcmojëftsanamëndacá ndoñe cachcá ntjonýayama, canye bássetema chca jatëtšana masque ochnayté; as, ¿ndáyeca atšë šmojtsayaná, atšë ochnayté canye entšabe nyets cuerpo tijashnama? <sup>24</sup> Nye batšá jinýëse, inyëngbiama ndoñe matichámëngana tsábá o ndoñe tsábá tmonjama ca. Ntšamo chë soyënga ndegombre bëtsemnama natsana lempe tsábá jshëtsetatšëmbëse, šmochjayana tsábá o ndoñe tsábá tmonjama ca —Jesús tojanayana.

### Jesús tojánayana ndémocana cha tojánabama

<sup>25</sup> Chora báseftanga Jerusalenoca oyenënga tmojanontšë ichámuana: —¿Mua ndoñe yontsemna chë jóbama montsenguá cha ca? <sup>26</sup> Masque ba entsángbe delante entsoyebuambná, ndocná chábioyoye ndocá ntjauyanana. ¿Nderado mo chë bëngbe amëndayënga imojtsejuabná cha chë Cristo, chë Uámana Uabuayaná yojtsemna ca? <sup>27</sup> Pero bënga mondétatšëmbo ndémocá quem boyabása yomnana; y chë cuenta, chë Cristo chaojabo ora, ndocná queochátstatšëmbo ndémocana cha yochjabama ca —chënga imojtsichamo.

<sup>28</sup> Chca tojanuena ora, Bëngbe Bëtsabe bëts yebnentšë Jesús yojtsabuátambayëntscuana, cha jabuache tojánayana: —¿Tšëngaftanga šmojtsejuabná atšë ndegombre šmabuata, y ndémocana tijabama šmojtsetatšëmbo ca! Pero nye atšbe cuenta, ndoñe chiyátabo, ndayá canya šojichmóyeca, nda ntšamo ndegombre yomncá nyetsca soyëngama endbëtsoyebuambnaye; y tšëngaftanga cha ndoñe quešmatábutma. <sup>29</sup> Atšna aíñe cha sënduábutma, er atšë chábentsána sënjabo y cha quem luaroye šonjichmó ca —Jesús tojánayana.

<sup>30</sup> Jesús chca tojánayana ora, chënga tmojánbošena cha jishachama, pero ndocná tbonjánishache, er cha chca japásama cabá ndoñe ora tonjanóshjango.

<sup>31</sup> Banga chentšë Jesúsbeñe imojtsanošbuaché y tmojánayana: “Chë Uámana Uabuayaná chaojabo ora, ¿quem boyabásabiama más tsábe soyënga yochjama ca?”

### Chë fariseunga tmojánbošena Jesús jishachama

<sup>32</sup> Chë fariseunga tmojántatšëmbona ntšamo entsanga Jesusbiama iytécana imojtsencuëntaye. As, chënga y chë bachnangbe amëndayënga tmojanichamó báseftanga Bëngbe Bëtsabe bëts yebnocajosticiënga, Jesús chamuishachama. <sup>33</sup> Chora Jesús tojánayana: “Muentšana nye baseftayté tšëngaftangaftaca chanjëftsemna; chentšana, chë šojichmó chábioyoye chanjëtpadësa. <sup>34</sup> Chora tšëngaftanga atšë šmochántseguaye, pero ndoñe quešmochátinýena; y ndayentšë chántsemnoca ndoñe quešmochatobenaye jashjanguama ca.”

<sup>35</sup> Chora chë judiënga tmojanontšë entjanayana: “¿Ndémoye quem boyabása yochjá, y bënga ndoñe mochanjobenaye jinýenama ca? ¿Inye fshantsëngoye, judiënga tmojuashanëngbiyoye yochjá, y choca chë ndoñe judiënga yochjabuatambá? <sup>36</sup> ¿Ntšamo yojtsentšáyana cha šonjauyancá, chë ‘tšëngaftanga atšë šmochántseguaye, pero ndoñe quešmochátinýena; y ndayentšë chántsemnoca ndoñe quešmochatobenaye jashjanguama ca?’ —chënga imojtsichamo.

### Béjayënga vida bomniye

<sup>37</sup> Chë fiesta jopochócama te yojamna chë más uámana te. Chë te, Jesús entsángbentšë tojantsá y jabuache tojánayana: “¿Nda tbojtsajuendá, átšbiyoye

chauabo y chaofsé! <sup>38</sup> Ntšamo Bëngbe Bëtsabe uabemana palabrënguifne endayancá: 'Nda átšbeñe tojtsošbuaché, cha echántsemna mo ndabe ainanentšana vida bomna béjayënga tojtsobocancá.' Chca echántsemna átšbeñe ošbuáchiyëngbiama ca" —cha tojánayana.

<sup>39</sup> Chë sóyeca, Jesús yojtseboše jayanana, chábeñe ošbuáchiyënga chë Uámana Espíritu mochjanóyëngacñe ca; er chë Uámana Espíritu cabá ndoñe tonjábabo, Jesús corente bëtsá yojamnama cabá ndoñe tmonjaninýinýé causa.

### Nýetsca entšanga ndoñe cachcá Jesusbiamia imontsejuabnaye

<sup>40</sup> Chca tmojanuena ora, ínýenga imojtsichamo: —Quem boyabása ndegombre chë Bëngbe Bëtsabe juabna oyebuambnayá entsemna, chë Cristbe natsana jabamá ca.

<sup>41</sup> Inýenga imojtsichamo: —Ndegombre cha chë Cristo, chë Uámana Uabuayaná entsemna ca.

Pero ínýengna: —Ndoñe, er chë Cristo Galileocana ndoñe queochátabo. <sup>42</sup> Ndegombre, Bëngbe Bëtsabe uabemana palabrënguifne endayana, chë Cristna rey Davídbentšana entšá canmëna, y Belenocana caochjabo ca, cach puebllocana ndayentšá David inamna ca —chënga imojtsichamo.

<sup>43</sup> Y chca, ínýengna Jesusbe pavor imojtsemna, y ínýengna chabe contra. <sup>44</sup> Inýenga imojtseboše Jesús jishachama, pero ndocná tbonjánishache.

### Chë amëndayënga Jesúsbeñe ndoñe montsanošbuaché

<sup>45</sup> Chë fariseunga y bachnangbe amëndayënga imojtsemnoye chë Bëngbe Bëtsabe bëts yebnoca josticiënga tmojtashajjna ora, tmojanatjá: —¿Ndáyeca ndoñe Jesús šmonjuánatse ca?

<sup>46</sup> Chora chë josticiënga tmojanéjua: —Ndocná quenatoyebuambná ntšamo chë boyabása tonjoyebuambacá ca.

<sup>47</sup> Chora chë fariseunga tmojanéyana: —¿Tšëngaftán gnaca šmojalesenciá cha chacmaingñema ca?

<sup>48</sup> ¿Nderado bëngbe amëndayënguentsá o bënga fariseunguentšá nýe mo canýa chábeñe tajojtsošbuaché? <sup>49</sup> Pero quem entšanga, ntšamo leyiñe iuayancá nduabuátmënga, bacna soyëngaca sempre mochanjéftsemna ca —chënga imojtsichamo.

<sup>50</sup> Chora Nicodemo, canýa fariseunguentšá, chë Jesúsëftaca jencuéntama ibeta tojána cha, tojánayana: <sup>51</sup> —Ntšamo bëngbe leyiñe endayancá, bënga ndoñe quemuátobena jayanana canýe entšá castiganá jtsemnama ibojtsemna ca, cha cabá ntjoyeunaycá, ndayá cha tojamama jtsetatšëmbuama ca.

<sup>52</sup> Chora chënga Nicodemo tmojanjuá: —¿Acnaca chábeñe cojtsošbuaché y mo canýe Galileoca entšacá cojtsejuabná ca? Bëngbe Bëtsabe uabemana palabrënguifne cochjuatsjinýe, y cochanjinýe ni canýa

Bëngbe Bëtsabe juabna oyebuambnayá Galileocana yochjabo ca.

### Chë shema boyábioye ínÿaftaca ingñayá

<sup>53</sup> Fariseunga y bachnangbe amëndayënga chë josticiëngbioye tmojanëcácanentšana, cada ona cachabe yebnoye imojtsatóñënga.

**8** Pero Jesusna canýe tjoye, Olivos ca uabáinoye tojtsanoñe. <sup>2</sup> Y chë yëfsana cachëse, Jesús cachiñe Bëngbe Bëtsabe bëts yebnoye tojesaná. Nýetsca entšanga tmojanobeconá jouenama, y Jesús tojanótbema y tojanontsé jabuátambama.

<sup>3</sup> Chorna, báseftanga ley abuátambayënga y fariseunga tmonjánashajjna, y canýe shembása tmojanëshjango. Chana tmojaninýena chabe boyábioye ínÿaftaca ibnetsoíngñañentscuana; nýetscangbe tsëntsaca tmojanatsá, <sup>4</sup> y Jesús tmojanianana: —Buatëmbayá, quemuá fsënjínýena chabe boyábioye ínÿaftaca bondëtsoíngñañentscuana. <sup>5</sup> Leyiñe Moisés šonjanamëndá mëntšá uamana shembásengna ndëtšbéngaca jt-sëbáyama. ¿Aca ntšamo catjayana ca?

<sup>6</sup> Jesús chca tmojanianana ana jisháchichiyama, chca chënga jtsebomnama ndáyeca chabe contra jayanana. Pero Jesús nýe fshantsoye yojotsejbéna y yojóntša ntšabuáfjaca fshantsiñe juabemama. <sup>7</sup> Chënga nýe imojtsetjanaye causa, Jesús tojantsbaná y tojanéyana: —Nda tšëngaftanguentsá tondaye bacna soyënga tondbomná, chaobojatšë ndëtšbeca jatëchënjama ca.

<sup>8</sup> Chentšana Jesús cachiñe fshantsoye yojtotsejbéna, y yojtëtóntša fshantsiñe jtëtabemama. <sup>9</sup> Chca tmojanuena ora, entšanga tmojanontsé canýánýa chentšana jésebocanana; natsana chë más bëtsanánënga y chë ínýengna ústonoye. Canýa Jesús tonjanoquedá y chë shembásanaca. <sup>10</sup> As, Jesús tojtantsá y tbojantjá: —¿Shembása, ndayentšë chë acbe contra ichámënga imojtsemna? ¿Ndocná acbiama tonjayana castiganá chacotsemna ca?

<sup>11</sup> Ndoñe, Taita, ndocná ca —chë shembása tbojanjuá.

Chora Jesús tbojanianana: —Atšë cach ndoñe acbiama quichátayana castiganá chacotsemna ca. Morna, mot-satoñe, pero ndoñe más bacna soye cattsama ca.

### Jesús yomna quem luarentša entšangbe juabna binýenayá

<sup>12</sup> Jesús cachiñe Bëngbe Bëtsabe bëts yebnentšë yojtsabuátambaye, y entšanga mëntšá tojanéyana: —Atšë sëndbínýna quem luare entšangbe juabnënga. Nda atšë chašojtséstoná, cha echantsiyena atšë chë binýenayáftaca; y ndoñe mo ibetiñcá queochátaye, y chca, tšabe vida echántsebomna ca.

<sup>13</sup> Chora chë fariseunga Jesús tmojanianana: —Aca nýe cach acbiama chca contsoyebuambná; chcana, chë ntšamo contsichamcá tondaye quenatámana ca.

<sup>14</sup> As chora Jesús tojanéjua: —Ntšamo cach atšbiamia sentsichamcá aíñe entsámana, masque nýe atšë stsichamo ntšamo atšbiamia ndegombre yomncá. Er

atše sëndétatšëmbo ndémocana tijabo y ndémoye tst-sá. Pero tšëngaftanga ndoñe chca quešmátstatšëmbo. <sup>15</sup> Tšëngaftanga šmondbétsichamo ínÿengbiamá tšabá o ndoñe tšabá tmontsamama, chca, ñye ntšamo entšanga mondbetsejuabnycá. Pero atšna ndocnabiamá chca quetsátichamo. <sup>16</sup> Atše ndoñe ñye canÿa quetsátsmëna ínÿabiamá jayanama tšabá o ndoñe tšabá tontsamama; ndayá atšbe Taitá, chë šonjichmó cha, átšeftaca chca jayanana. Chíyeca, atše ínÿabiamá tšabá o ndoñe tšabá tonjama ca stsichamo ora, ntšamo stsichamcá ndegombre jtsemnana. <sup>17</sup> Tšëngaftangbe leyiñe enduábemana, uta entšata ndayám-naca cachcá tbojayanëse, ntšamo chata tbojayancá puerte jtsámanana ca. <sup>18</sup> Y morna, atše séntsichamo chë ntšamo cach atšbiamá ndegombre yomncá, y atšbe Taitá, chë šonjichmó chánaca entsichamo ntšamo atšbiamá ndegombre yomncá ca —Jesús tojánayana.

<sup>19</sup> Chora chënga tmojantjá: —¿Ndayentše acbe Taitá yojtsemna ca?

Y Jesús tojanéyua: —Tšëngaftanga ndoñe quešmatábuatma ni atše ni atšbe Taitá. Atše šmojtsábuatmëna, atšbe Taitánaca šmattsábuatma ca.

<sup>20</sup> Bëngbe Bëtsabe bëts yebnoca, chë crocénana jac-jayama luarentše yojtsabuátambaye ora, Jesús chca tojánayana. Pero masque cha chentše yojtsemna, ndocná tbonjánishache, er chca japásama cabá ndoñe ora tonjanóshjango.

**“Chë chanjá luaroye, tšëngaftanga ndoñe quešmátobena jama”**

<sup>21</sup> Chora Jesús yojtëtóntša oyebuambnayana: —Atše chantá, y chora tšëngaftanga atše šmochántseguaye. Masque chca, šmochanjóbana tšëngaftangbe bacna soyëngama ndëperdonánënga. Chë chanjá luaroye, tšëngaftanga ndoñe quešmátobena jama ca —Jesús tojánayana.

<sup>22</sup> Chora chë judiënga tmojanontsé enatsëtsnayana: —¿Mo nderado yojtsejuabná jtsenóitanama, y chíyeca yojtsichamo chë cha yochjá luaroye bënga ndoñe montsobena jama ca?

<sup>23</sup> Chora Jesús tojanéyana: —Tšëngaftanga quem luaroquënga šmondmëna; atšna tsbananocá, celocá sëndmëna. Tšëngaftanga ñye quem luarama enójuabnayënga šmondmëna, pero atše ndoñe. <sup>24</sup> Chíyeca atšbe chca tbonjáuyana, chë “tšëngaftangbe bacna soyëngama ndëperdonánënga šmochanjóbana ca”. Er, nda atše ndegombre bëtsemnana ndoñe chašmontsošbuachese, tšëngaftangbe bacna soyëngama ndëperdonánënga šmochanjóbana ca.

<sup>25</sup> Chora chënga tmojantjá: —¿As aca ndase cmëna ca?

Y Jesús tojanéyana: —Entšanga jabuátambama sënjanbojatšé orscana chama tbonjáuyana. <sup>26</sup> Atše ba soyënga séntsebomna tšëngaftangbiamá jayanama, tšëngaftangbe contra jayanama; pero chë šonjichmó cha ñyetsca soyëngama ndegombre endbétsichamo, y atšna ntšamo chábentšana tjouencá, cachcá quem luare oyenënga séntsëtsëtsná ca —cha tojanéyana.

<sup>27</sup> Pero chënga ndoñe tonjanësertá Jesús cachabe Taitabiamá chca tojanéyanama. <sup>28</sup> As Jesús tojanéyana: —Bëngbe Bëtsá Entšá tbojanbemá chašmojatsbaná ora, šmochántsetatšëmbo nda sëndmëná atše bëtsemnana. Cachcá, tšëngaftanga šmochántsetatšëmbo, ñye cach atšbe juábnaca atše tondaye jamama sëndobenama. Ñye ndayá atšbe Taitá šojabuatëmbacá atše sëndoyebuambná. <sup>29</sup> Y chë šonjichmó cha ndoñe ñye canÿa quešnátsboshjuana. Chca endmëna, er atše sempre sëndbétsama ntšamo cha oyejuayá jabemama tojtsemncá ca —Jesús tojánayana.

<sup>30</sup> Jesús chca tojánayana ora, banga chábeñe imojtsanošbuaché.

**Bëngbe Bëtsabe básenga y chë ñye bacna soye jt-samama vida bomnënga**

<sup>31</sup> Chora Jesús, chë chábeñe imojtsošbuaché judiënga tojanéyana: —Ntšamo cbontsëtsëtsnacá tšëngaftanga sempre šmojtsamëse, ndegombre atšbe uatšjëndayënga šmochántsemna. <sup>32</sup> Ntšamo ndegombre yomncá šmochántsetatšëmbo; y ntšamo ndegombre yomncá jtsetatšëmbëse, atsebácanënga šmochántsemna ca.

<sup>33</sup> Chora chënga tmojanjúá: —Bëngna Abrahám-bentšana entšanga fsëndmëna, y ndocná ndocna te chešnáishëche ñye chabiamá ñyets tempo jtsoservënama. As, ¿ndáyeca šcojtsëtsëtsná bënga atsebácanënga fchtsemna ca?

<sup>34</sup> Chora Jesús tojanéyana: —Ndegombre šcuayana: Nda bacna soyënga tojtsama, cha ñye bacna soyënga jamama juabnéngaca mandaná jëftsemnana. <sup>35</sup> Canÿe oservená ndoñe ñyets tempo chë pamillentsá ntjëftsemnana, ntšamo canÿe uaqiñá sempre chë pamillentsá jesomñancá. <sup>36</sup> Y chca, Bëngbe Bëtsabe Uaqiñá chacmojátsebacase, tšëngaftanga ndegombre atsebácanënga šmochántsemna bacna soyënga juabnënguentšana. <sup>37</sup> Atše sëndétatšëmbo tšëngaftangna Abrahám-bentšana entšanga šmomnana; pero tšëngaftanga šmontseboše atše jóbama, ntšamo atše cbontsëtsëtsnacá ainaniñe jójëngacñama ndoñe quešmátsoše causa. <sup>38</sup> Ntšamo atšbe Taitábica tijinÿcá, cach soyëngama atše sëntsoyebuambná. Tšëngaftangnaca, cachcá ntšamo tšëngaftangbe taitábentšana šmojouencá šmontsamá ca —tojanéyana.

<sup>39</sup> Chora chënga tmojanjúá: —Bëngbe uámana bëts taitá, Abraham endmëna ca.

As Jesús tojanéyana: —Tšëngaftanga Abrahambe básenga ca jtsabáinama mercedo šmojtsebuajónëse, chë ntšamo Abraham tojëftsema y cachcá tšëngaftanga šmattsama. <sup>40</sup> Atšna ntšamo ndegombre yomncá sëndoyebuambná, ntšamo Bëngbe Bëtsábentšana tsouenancá. Pero mora tšëngaftanga šmontseboše atšbe jóbama; Abraham ndocna te chca chenaisobuachjanguá. <sup>41</sup> Tšëngaftangna, ntšamo tšëngaftangbe taitá tojëftsemcá y cachcá jtsamana ca —Jesús tojánayana.

Chora chënga tmojaniana: —Bënga nÿe enaquécana básenga ndoñe queftsátsmëna. Chë nÿe canÿe taitá fsëndbomná, Bëngbe Bëtsá endmëna ca.

<sup>42</sup> Chora Jesús tojanéjua: —Bëngbe Bëtsá ndegombre tšëngaftangbe taitá tojtsemnëse, tšëngaftangna atšë šmattsebobonshana. Er atšna, Bëngbe Bëtsá bio-cana sënjabo y muentšë séntsemna. Nÿe atšbe ponto ndoñe chiyátabo; Bëngbe Bëtsá šonjichmó. <sup>43</sup> ¿Ndáye-ca tšëngaftanga ndoñe šmontsobena atšbe palabren-ga josértana? Co, ntšamo cbontsëtsësnacá joyeunayama ndoñe quešmátsboše causa chca. <sup>44</sup> Tšëngaftangbe taitá Satanás endmëna. Tšëngaftangna chabe entšanga šmondmëna; chíyeca, tšëngaftanga šmontseboše jamama cachcá ntšamo cha tojtsebošcá. Quem luare jobojátšama orscana, Satanás entšá obanayá endmëna. Satanabe juabnoca, ndocna tšabe soyënga ni ndegombre soyënga ntsebinÿnana. Chíyeca, ndocna te cha ntšamo ndegombre yomncá ntsamana. Cha canÿe bostero endmëna, y chábensana nÿetsca bostero soyënga jtsóbocanana. Chíyeca, cha tojtsebošero ora, nÿe ntšamo cachá yomnama jtsichámuana. <sup>45</sup> Atšna sempre ntšamo ndegombre yomncá cbondutsëtsná; chíyeca, chë séntichamo soyiñe tšëngaftanga ndoñe quešmatošbuaché. <sup>46</sup> ¿Nda tšëngaftanguentsá nanjobenaye jinÿanÿiyana atšë ndaye bacna soye tijamama? Y atšë, nÿe ntšamo ndegombre yomncá stsihámëse, ¿ndáye-ca chë tijayaniñe ndoñe šmontsošbuaché? <sup>47</sup> Nda Bëngbe Bëtsabe entšá tomna, ntšamo Bëngbe Bëtsá tojtsichamcá jtsuenanana. Pero tšëngaftangna ndoñe Bëngbe Bëtsabe entšanga quešmátsmëna. Chíyeca, ntšamo Bëngbe Bëtsá entsichamcá ndoñe quešmátsboše jouenama ca —Jesús tojanéyana.

#### Cristo Abrahambiana más natsana ya yojtsemna

<sup>48</sup> Chora chë judiënga tmojaniana: —Ajá, bënga co ndegombre ftsichamo, aca nÿe samaritano y bacna bayëjbe juabna uambayá comna ca ftsichamo ora ca.

<sup>49</sup> Y Jesús tojanéjua: —Atšë ni mo canÿe bayëjbe juabna quetsatambá. Ntšamo atšë séntsamcá, endmëna jinÿanÿiyama atšbe Taitá Bëngbe Bëtsá uamaná yomnama; pero tšëngaftangna, atšë chca tsmënama ndoñe quešmatinÿinÿná. <sup>50</sup> Atšë ndoñe quetsátsboše inÿenga atšë más uamaná chašmobemama. Pero inÿa endmëna; cha aíñe endboše atšë bëtsá bëtsemnama chaminÿanÿema. Y chánaca endmëna chë inÿengbiama tšabá o ndoñe tšabá tmontsamama endbet-sichamuá. <sup>51</sup> Ndegombre šcuayana, nda ntšamo atšë séntichamcá tojouena y chca tojama, ndocna te queochatóbana ca —Jesús tojánayana.

<sup>52</sup> Chora chë judiënga tmojaniana: —Mora cocayé fséntsetatšëmbo aca ndegombre bacna bayëjbe juabna uambayá comnama. Abraham tojanóbana, y cachcá, nÿetscanga Bëngbe Bëtsabe juabna oye-buambnayëngnaca. ¿Y mora aca cochjátichamo, “Nda ntšamo atšë séntichamcá tojouena y chca tojama, cha ndocna te queochatóbana ca”? <sup>53</sup> ¿O aca, bëngbe bëts taitá Abrahambiana más bëtsá comna? Cha to-

janóbana, y Bëngbe Bëtsabe juabna oye-buambnayëngnaca. ¿Ndase cojátsmëna ca aca cojatsjuabná ca? —chënga imojtsichamo.

<sup>54</sup> Chora Jesús tojanéjua: —Atšë nÿe cach atšë más bëtsá stsenobiamnasna, chë soye tondaye nantsámana. Pero chë más bëtsá šojtsebiamná cha, atšbe Taitá endmëna, cach ndabiama tšëngaftanga šmond-bëtsichamo tšëngaftangbe Bëtsá canmëna ca. <sup>55</sup> Pero tšëngaftanga cha ndoñe quešmatábuatma; atšë aíñe. Y atšë, “cha ndoñe quetsatabuatma ca” stsihámëse, átšnaca cach tšëngaftangcá canÿe bostero stsemna. Pero ndegombre atšë cha sënduábuatma, y ntšamo cha tojtsichamcá, atšë sëndouenana y cachcá sëndbët-sama. <sup>56</sup> Tšëngaftangbe uámana bëts taitá Abraham, chë atšë jabama te jinÿama yojtsejuabnaye ora, puerte oyejuayá yojtsemna. Y pronto tojétsaninÿe, y puerte tojanoyejuá ca —Jesús tojánayana.

<sup>57</sup> Chora chë judiënga tmojaniana: —Aca cabá ndoñe shachna bnëtsana uata quecátsbomna; y as, ¿ntšamo cochjátichamo, Abraham tcojéftsinye ca?

<sup>58</sup> Chora Jesús tojanéjua: —Ndegombre cbëyana, Abraham cabá ndoñe ainá quenjatsmëna ora, atšë ya sënjetsemna ca.

<sup>59</sup> Jesús chca tojanéjua ora, chënga ndëtšbenga tmojanájaca cha jtsatëchénganjama. Pero Jesusna oitanánana, Bëngbe Bëtsabe bëts yebnentšana tojésanbocna.

#### Jesús tojanma, canÿe boyabása jtaná onÿnaná chabuabínÿnama

**9** Canÿe luarëjana yojtsachnëjuana ora, Jesús canÿe boyabásabioye tbojáninÿe. Chë boyabásana jtaná inónÿna. <sup>2</sup> Chë uatsjëndayënga Jesús tmojantjá: —Bu-atëmbayá, ¿ndáye-ca quem boyabása jtaná inónÿna? ¿Camuá bacna soyënga tojamama, o chabe bëtsët-sangbe bacna soyënga causa ca?

<sup>3</sup> Chora Jesús tojanéjua: —Ni cachabe bacna soyëngama, y ni chabe bëtsët-sangbe bacna soyënga causa. Chca endmëna ndayá entšanga jinÿanÿiyama ntšamo Bëngbe Bëtsá yobencá. <sup>4</sup> Cabá yojtsësháchena ora, šontsamna jamana ntšamo chë šonjichmó cha yojtsebošcá. Ndoñe usháchena tempo echanjóshjango; chora ndocná tondaye jamama queochatobenaye. <sup>5</sup> Quem luariñe chjëftsemnëntscuana, atšë quem luare entšangbe juabnënga binÿnayá chanjëftsemna ca —tojanéyana.

<sup>6</sup> Chca tojánayanentšana, Jesús fshantsiñe tojanbuashëtjo, y chë yebuáyeca batšá ngüiche tojábema, y chë jtaná chë ngüicheca tbojanbuchanëtjo. <sup>7</sup> Chora chë jtaná tbojaniana: —Motsa y metsobúchjabebiye, chë binche uafjajónaye entšangbe pormániñe, Siloé ca uabáiniyoca ca. (Siloé, judiëngbe biyañe endayana “Ichmoná ca”).

Y chë jtaná tojána; choca yojetsobúchjabebiye, y yebnoye tojtaná ora, ya ibojtsabinÿna. <sup>8</sup> Chë juachañe oyenënga y chë jtaná tempo lemošna otjanañana tmojánínyënga, imojtsentjanaye: —¿Mua ndoñe yondmëna chë enjanamana jótbemana lemošna jótjañama ca?

<sup>9</sup> Inyenga imojtsichamo: —Cha entsemna ca.

Y inyengna: —Cha ndoñe quenátsmëna, pero chacá entsábona ca.

Y cach shnaná yojtsichamo: —Atše cha sëndmëna ca.

<sup>10</sup> As chë entsánga tmojantjá: —¿Ntšamo chca mora cmojtsabinýna ca?

<sup>11</sup> Y cha tojanéjua: —Chë boyabása, Jesús ca uabainá, ngüiche yebuáyeca tonjábema, šonjabuchanëtjo y šonjauyana: “Motsa y Siloé uafjajónayiñe metsobúchjabebiyé ca”. Chcasna, atše sënjá, sënjetsobúchjabebiyé y cachora šontsabinýna ca.

<sup>12</sup> Chora chënga tmojantjá: —¿Ndayentše cha yojtsemna ca?

Y chana: —Atše ndoñe quetsátstatšëmbo ca —tojanéjua.

### Chë jtana shnanábioye fariseunga imojtsetjanaye

<sup>13</sup> Chora chë entsánga, chë jtaná inamná fariseungbioye tmojanánatse. <sup>14</sup> Chë Jesús batsá yebuáyeca ngüiche tojábema, y chë jtaná tojanma te, canýe ochnayté inamna. <sup>15</sup> As chë fariseunga chë boyabása tmojantjá: —¿Ntšámoyeca mora cmojtsabinýna ca?

Chora cha tojanéjua: —Cha ngüiche yebuáyeca tonjábema y šonjabuchanëtjo. Sënjetsobúchjabebiyé, y cachora šonjuabinýna ca.

<sup>16</sup> As chora básefta fariseunga imojtsichamo: —Chë jtaná chabotsabinýnama tojamá ndoñe tonjochná, y ochnayté tojatrabajá. Chíyeca cha Bëngbe Bëtsabe entsá ndoñe quenátsmëna ca.

Inyenga imojtsichamo: —Cha canýe bacna soyënga amá tojtsemnëse, ¿ntšamo nantsobena canýe bëts soye Bëngbe Bëtsabe obenánaca jamama ca?

Y chca, inyenga Jesusbe pavor imojtsemna, y inyengna chabe contra. <sup>17</sup> Chama chënga cachiñe chë jtaná inamná tmojtëtantjá: —Er aca mora chacmotsabinýnama cha tojamëse, ¿chabiamama ntšamo catjajana ca?

Chora cha tojanéjua: —Chana canýa Bëngbe Bëtsabe juabna oyebuambnayá entsemna ca.

<sup>18</sup> Pero chë judiënga ndoñe montsanošbuaché, cha chë jtaná inamnama y chora ibojtsabinýnama. As chënga, inyenga tmojanichamó chë boyabásabe bëtsétsata jobiatšama. <sup>19</sup> Chë bëtsétsata tbojánashjango ora, chë judiënga tmojanatjá: —¿Quem boyabása tsëndatbe uaqiñá yomna ca? ¿Ndegombre tašojtsichamo cha jtaná inonýnama? Chcase, ¿ntšamo mora cha ibojtsabinýna ca?

<sup>20</sup> Chora chë bëtsétsata tmojanéjua: —Aíñe fsëndëtatšëmbo cha bëndatbe uaqiñá endmënama y jtaná tonjanonýnama. <sup>21</sup> Pero ndoñe queftsátstatšëmbo ntšámoyeca mora chca ibojtsabinýnama, ni bëndatbe uaqiñá chabotsabinýnama nda tojamama cach ndoñe. Cachá motjanga. Ya bëtsá entsemna, y cachá entsobena tšëngaftanga razón jatšatayama ca —chata tbojánayana.

<sup>22</sup> Tempo, chë judiënga imojenóeyunaye, chëngbe enefjuana yebnënguentsána jtëbuacanana chë Jesús ndegombre chë Uámana Uabuayaná, chë Cristo yo-

jamna ca tmojayanënga. Chë bëtsétsatna chama ibojtsauatja; <sup>23</sup> chíyeca tmojanéyana: “Cha ya bëtsá entsemna. Cachá motjanga ca”.

<sup>24</sup> As cachiñe chë judiënga chë jtaná inamná tmojanchembo y tmojanianyana: —Bëngbe Bëtsabe delante cach acbiama ndegombre mobuambá. Bënga fsëndëtatšëmbo chë boyabása canýe bacna soyënga amá yomnama ca.

<sup>25</sup> Chora cha tojanéjua: —Cha canýe bacna soyënga amá o ndoñe tondmënama, atše ndoñe quetsátstatšëmbo. Atše nýe mëntsá sëntsetatšëmbo: Atše jtaná sënjanmëna, pero mora šontsabinýna ca.

<sup>26</sup> Chora chënga cachiñe tmojatantjá: —¿Ntšamo tcmënjama? ¿Ntšamo cha tënjama chacmotsabinýnama ca?

<sup>27</sup> Y cha tojanéjua: —Ya tcbonjáuyana y ndoñe chešmatoyeuná. ¿Ndayeca cachiñe šmojtseboše jatuenama? ¿Tšëngaftángnaca šmojtseboše chabe ústonënga jtsemnama ca?

<sup>28</sup> Chora chënga cha tmojtsanóyenguango y tmojanianyana: —Acna canýe chabe ustoná cojtsemna, pero bënga ndoñe; bëngna Moisesbe ústonënga fsëndmëna. <sup>29</sup> Bënga fsëndëtatšëmbo, Bëngbe Bëtsá Moisésbioye tbojanatsétsama, pero chë boyabásabiamama ndoñe queftsátstatšëmbo ni mo ndëmocana cha tojabama ca —chënga imojtsichamo.

<sup>30</sup> Chora chë boyabása tojanéjua: —¿Ntšamo chca nántsemna! Tšëngaftanga ndoñe šmontsetátšëmbo ndëmocana cha tojabama; pero chašubínýnama cha tonjama. <sup>31</sup> Bënga tšabá mondëtatšëmbo, bacna soyënga amënga Bëngbe Bëtsá ndoñe queondbátayaunanama. Chana, nýe chábioye adorayá y ntšamo cha tojtsebošcá amábioye joyeunayana. <sup>32</sup> Quem luare jobojátšama orscana ndocna te quenaisótatšëmbo canýe jtaná onýnanabiamama ndánaca cha chabotsabinýnama tojéftsemama. <sup>33</sup> Quem boyabása, Bëngbe Bëtsabe ichmoná chabe soyënga jamama ndoñe tontsemnëse, tondaye nantsobena jamama ca —chë entsá tojánayana.

<sup>34</sup> As chë fariseunga tmojanianyana: —¿Ndayá! Aca tcojanonýná orscana, corente bacna soyënga amá tcomnëse, ¿ntšamo mora bënga šcochjatabuatambaye ca?

Y chora chë judiëngbe enefjuana yebnentsána cha tmojtanábocna.

### Chë Bëngbe Bëtsabe soyëngama mo jtanëngcá imonënga

<sup>35</sup> Chë jtaná tmojtanábocnama Jesús tojanuena ora, tojána cha janguanguama. Tbojáninýena ora tbojanianyana: —¿Aca Bëngbe Bëtsá Entšá tbojanbemábeñe quecojtsošbuaché ca?

<sup>36</sup> Y cha tbojanjúá: —¿Taita, nda cha yojtsemna, as atše chábeñe jtsošbuáchiyama ca?

<sup>37</sup> As Jesús tbojanianyana: —Aca ya tconjinýe; chë ácafatac entsoyebuambná cha entsemna ca.

<sup>38</sup> Chora, chë boyabása Jesús bentše tojanoshamentšé jëtschuayama y tbojanianyana: —Atšbe Utabná, aíñe sëntsošbuaché ca.

<sup>39</sup> Chora Jesús chë entsanga tojanéyana: —Atse quem luaroye tijabo ndayá entsanga jinñanñiyama ntšamo cachënga Bëngbe Bëtsabe soyëngama imojuabnama. Chë Bëngbe Bëtsabe soyëngama ndosertánënga, chë soyënga atse chanjínñanñiye ora, mo jtanëna shnanëngcá mochántsemna; y chë Bëngbe Bëtsabe soyëngama corente imotátšëmbo ca juabnayëngna chanjínñanñiye, nÿe batšá Bëngbe Bëtsabe soyëngama imotatsëmbuama. Y chca, chënga, masna mo jtanëngcá mochántsemna y ndoñe mo chë jinñyama obenëngcá.

<sup>40</sup> Básefta fariseunga Jesúseftaca imojtsemnënga chca tmojanuena ora, cha tmojaniana: —Ndegombre bënga ndoñe mo jtanëngcá queftsátsmëna ca.

<sup>41</sup> Chora Jesús tojanéjua: —Tšëngaftanga Bëngbe Bëtsabe soyëngama ndëtatšëmbënga šmojtsemna ca, y ndegombre chë soyëngama ndoñe cmontsësertana ca šmojobuambase, ndayá šmojtsamcá Bëngbe Bëtsá mo bacna soyënga cuenta ndoñe queochátönÿaye. Pero tšëngaftanga corente Bëngbe Bëtsabe soyëngama cmojtsësertana ca šmojtsichámësna, Bëngbe Bëtsá ndoñe queochatobenaye tšëngaftangbe bacna soyëngama jáperdonana ca —Jesús tojanéyana.

### Chë oveshënga abujénÿa y chabe oveshënga

**10** As Jesús tojanéyana: “Ndegombre šcuayana: Nda chë oveshëngbe luaroye bëšáshajana ndoñe tonjámashëngo, pero aiñe inñajana tojtsamáshëngo, chana canÿe atbëbaná y abacayá jtsemnana. <sup>2</sup> Pero chë bëšáshajana tojamashënguana, chë oveshënga anÿená jtsemnana. <sup>3</sup> Chë bëšásha ebtafjuaná, chë bëšásha jebëtafjuana, y chë oveshënga abujénÿa ntšamo cada ona tmabaincá chë oveshënga jáchembuana. Y chë oveshënga jtsetatšëmbuana chëngbe abujénÿa yojtsachembuana; y chë luarentšana cha jubuacnana. <sup>4</sup> Nÿetsca oveshënga tmojábocana ora, chë abujénÿa chënga jtsebënat-sanana, y chë oveshënga jtséstonana, er chabe oye-buambnayana chënga joyátëmbana. <sup>5</sup> Pero chë tmonduabuatmábioyna chë oveshënga ndoñe ntjuastana; nÿe chábentšana jtsachetëngana, chë oveshënga chabe oye-buambnayana ndoñe ntjoyátëmbana causa ca” —Jesús tojánayana.

<sup>6</sup> Jesús entsanga chca tonjanacuntá, pero chënga ndoñe ntjosértana ntšamo yojtsentšayancá.

### Jesús, chë oveshënga tšabe abujénÿa

<sup>7</sup> As Jesús cachiñe tojanéyana: “Ndegombre cbéyana: Atse sëndmëna chë bëšásha oveshënga mondbët-samashjuanëjana. <sup>8</sup> Nÿetscanga chë atšbe natsana tmojánabënga, atbëbanënga y abacayënga imnamna, pero chë oveshënga ndoñe chëngbioye ntjóyanayana. <sup>9</sup> Atse chë bëšásha sëndmëna. Nda quem bëšáshajana tojamashënguá, atsbočaná echántsemna. Canÿe oveshá jamashënguana y jabocnana, y shácuana jónÿenana. Cachcá, chë quemëjana tojamashënguá, lempe echanjónÿena.

<sup>10</sup> “Chë atbëbaná jabana nÿe jatbëbama, jóbama y lempe jtsepochócama; pero atšna, entsanga vida chamotsebomnana y átšeftaca bëtscá tšabe vida chamotsebomnana tijabo.

<sup>11</sup> “Atse sëndmëna chë oveshënga tšabe abujénÿa. Chë oveshënga tšabe abujénÿa sempre jtseprontánana chëngbiamana jóbana, chabe oveshënga ababuánÿeshanayeca. <sup>12</sup> Pero nda nÿe crocenánama totrabája y chë oveshënga ndoñe chábënga tmontsemna, cha nderado tojinÿe canÿe tjañe queše chë oveshëngbioye tojtsobécocnana, cachora nÿe cachcá jesénÿayana y jtsachana. Chë tjañe queše oveshënga jtsacamiyana, y chë oveshëngna nÿe cátoye jtsachetana. <sup>13</sup> Cha jtsemnana nÿe crocenánama trabajayá; chabiamana nÿe chë uacanánana más uámana soye jtsemnana, y chë oveshëngbiamana tondayana ntsentšamnana; chíyeca cha jtsachana.

<sup>14</sup> “Atse sëndmëna chë oveshënga tšabe abujénÿa. Atse chënga sëndëubuatma, y chëngnaca atse šmonduábuatma. <sup>15</sup> Cachcá, chë Taitá Bëngbe Bëtsá atse šonduábuatma y atse chábioye. Atse sempre sëndëtseprontana jóbana, atšbe oveshënga sëndababuanÿeshánayeca. <sup>16</sup> Atse inÿe oveshënga sëndábamna, pero chënga ndoñe quem luariñe oveshënga quemátsmëna. Atse šontsemna chëngnaca moye junatsana. Chëngnaca atšbe oye-buambnayana mochanjouena, y muentša oveshëngaftaca cánÿiñe mochántsemna, y atšna nÿetsca chë oveshëngbiamana chë abujénÿa chántsemna.

<sup>17</sup> “Atse siempre sëndëtseprontana jóbana, chora jtayenama. Chíyeca chë Taitá šondbobonshana.

<sup>18</sup> Ndocná atšbe vida quešochatsbojuána, pero chënga sëndababuanÿeshánayeca siempre sëndëtseprontana jóbana, cach atse chca sëndbošeyeca. Derecho sëndëtsóbomñe chëngbiamana jóbana, y chora jtayenama. Chca endmëna ntšamo atšbe Taitá šonjamandacá ca” —Jesús tojánayana.

<sup>19</sup> Chë soyënga chë judiënga tmojanuena ora, cachiñe banga Jesusbe contra y inÿengna Jesusbe pavor imojtsemna. <sup>20</sup> Banga imojtsichamo: —Chana bacna bayëjbe juabna uambayá y corente juicio ndbomná entsemna. Y as ¿ndáyeca cha mochjátsyeunana ca?

<sup>21</sup> Pero inÿengna imojtsanichamo: —Ndocna bacna bayëjbe juabna uambayá ntso-benana chca jóyebuambayama. ¿Canÿe bayëja nantsobena jamama canÿe jtaná chabotsabinñyama ca?

### Chë judiënga ndoñe imontsošbuáchiye Jesús Bëngbe Bëtsabe Uaquiñá bëtsemnana

<sup>22</sup> Canÿe uaftena tempo inamna, y Jerusalenentše canÿe fiesta imojtsebomna. Chë fiesta inamna cada uata, Bëngbe Bëtsabe bëts yebna tempo cachiñe tmojtanjebuama entsanga jtenójuaboyama. <sup>23</sup> Jesús Bëngbe Bëtsabe bëts yebnoca yojétsana, canÿe amashjuana otsbojebniñe, Salomonbe Amashjuana ca uabáinentše. <sup>24</sup> Chora, chë judiënga tmojanóbobuash-cona, y tmojantjá: —¿Buetayentscuana bënga fchjëftsemna acbiamana ndegombre soye ntsetatšëmbcá? Aca

chë Cristo cojtsemnëse, chama lempe tšabá š-manÿanÿé ca.

<sup>25</sup> As Jesús tojanéjua: —Ya tcbonjáuyana y tšëngaftanga átsbeñe ndoñe ntsošbuáchiyana. Chë atšë sëndama soyënga, atšbe Taitá Bëngbe Bëtsabe obenánaca, cmontsinÿanÿná nda atšë bëtsemnana. <sup>26</sup> Pero tšëngaftanga átsbeñe ndoñe quešmatošbuaché, er tšëngaftanga atšë ndoñe quešmatéstoná, ntšamo chë ovehënga chë tšabe abujénÿa mondbetsëstoncá. <sup>27</sup> Chë atšë šmondústonënga, atšë šmondbóyeunaye y šmondbëuasto. Atšë chënga sëndëubuatma. <sup>28</sup> Atšë chanjama, quem entšanga chë nÿetsca tescama yomna tšabe vida chamotsebomnama; chënga ndocna te pochocánënga quemochátsmëna, y ndocná quenátobena átsbentšana chënga jefcana. <sup>29</sup> Atšbe Taitá Bëngbe Bëtsá, chë entšanga atšë chašmuastama tojamá, nÿetscangbiana más bëtšá endmëna, chíyeca ndocná quenátobena chábensana chënga jefcana. <sup>30</sup> Chë Taitá y atšë canÿa fsëndmëna ca —Jesús tojánayana.

<sup>31</sup> Chora, chë judiënga cachiñe ndëtšbënga tmojanájaca Jesús jtsatëchénganajama. <sup>32</sup> Pero Jesús tojanéyana: —Atšë tšëngaftangbeñe, ba bëtš soyënga sënjama atšbe Taitá Bëngbe Bëtsabe obenánaca. ¿Ndëmua chentša soyama atšë šmochtsatëchénganajaca?

<sup>33</sup> Chora chë judiënga tmojanjuá: —Ni canÿe quem bëtš soyëngama bënga queftsátsboše aca jtsatëchénganajama. Aca Bëngbe Bëtsabiana ndoñe tšabá quecátichamo; mo chábioye cuafjoyenguangcá entsemna. Aca nÿe canÿe entšá condmëna, pero acna contsichamo cach aca Bëngbe Bëtsá comna ca; chíyeca bënga fsëntseboše ndëtšbéngaca aca jtsatëchénganajama ca —chënga tmojanijana.

<sup>34</sup> Chora Jesús tojanéyana: —Bëngbe Bëtsabe uabemana palabrenguiñe mëntšá endayana: “Atšë sënjayana tšëngaftanga diosënga šmomna ca.” <sup>35</sup> Bëngbe Bëtsá chca tojánayana chë chabe palábraca y cha chamotseservénama tojánamandangiama; ndocná quenátobena jinÿanÿiyana ni mo canÿe soye Bëngbe Bëtsabe uabemana palabrenguiñe, ndoñe ndegombre soye yomnama. <sup>36</sup> Y atšbiana, Bëngbe Bëtsabiacá uabuayaná y quem luare ichmoná, ¿ntšamo tšëngaftanga šmojtsoyobena jayanama, “aca Bëngbe Bëtsabiana ndoñe tšabá quecátichamo ca”, chë Bëngbe Bëtsabe Uaquiñá sëndmëna ca atšë tijayana-ma? <sup>37</sup> Ntšamo atšbe Taitá endamcá atšë ndoñe sëntsamëse, tšëngaftanga átsbeñe ndoñe š-mattsošbuáchiye. <sup>38</sup> Pero, ntšamo atšbe Taitá endamcá atšë aiñe stsamëse, masque ndoñe átsbeñe š-montsošbuaché, nÿe chë Taitabe obenánaca soyënga tijamama šmochtssošbuáchiye. As, canÿe ora chašmotsetátšëmbo y chacmësertá, chë Taitá átsbeñe yomnama y atšë chábeñe tsmënama ca —Jesús tojanéyana.

<sup>39</sup> Chora chënga cachiñe tmojánbošena Jesús jishachama, pero cha chëngbentšana tojanotsbocá.

<sup>40</sup> Chentšana, Jesús Jordán bėjaye chenguana toje-saná y choca tojtsanoquedañe. Chentše Juan tempo

entšanga yojanëbáyana. <sup>41</sup> Ba entšanga tmojána Jesús jinÿama, y mëntšá imojtsichamo: “Ndegombre, masque Juan ni mo canÿe bëtš soye Bëngbe Bëtsabe obenánaca tonjëftsema, lempe ntšamo quem boyabásabiana tonjanoyebuambacá, ndegombre yojamna ca.” <sup>42</sup> Y chentše, ba entšanga Jesúsbeñe imojtsanošbuaché.

### Lázaro tojanóbana

**11** Inamna canÿe boyabása šocá, Lázaro ca uabainá. Cha inoyena canÿe pueblo Betania ca uabáinentše, Marta y Mariáftaca, chabe uabénata. <sup>2</sup> Quem María inamna nda Bëngbe Utabná Jesusbe shecuatšifne botamana uanguëtšiyé tbojanáshecbuešcja, y chabe stjënashaca tbojtanshechojó cha. <sup>3</sup> Chë uta uabénatna ínÿenga tmojanichamó Jesús jauenayama: —Bëngbe Utabná, chë aca condbobonshaná šocá entsemna ca.

<sup>4</sup> Jesús chca tojanuena ora, tojánayana: —Quem šocana ndoñe quenátsmëna Lázaro chaóbanama. Pero aiñe entsemna Bëngbe Bëtsabe obenana entšanga jinÿanÿiyama, y Bëngbe Bëtsabe Uaquiñá chamuatschuama ca.

<sup>5</sup> Jesús corente yojánababuanÿeshana Marta, María y chatbe uaftše Lázaro. <sup>6</sup> Masque chcasna, Lázaro šocá yojtsemna ca Jesús tmojanijana ora, cabá uta te más cha yojétsemna luarentše tojtsanoquedañe.

<sup>7</sup> Chentšana, chabe uatsjéndayënga tojanéyana: —Judeoye cachiñe cuajna ca.

<sup>8</sup> As chë uatsjéndayënga tmojanijana: —Buatëmbayá, baseftayté entsemna chë luaroca judiënga cmonjanbuachetá ndëtšbéngaca jtsóbama; y mora, ¿cabá choye jtésama cojtseboše ca?

<sup>9-10</sup> Chora Jesús tojanéyana: —Bnëtsana uta hora bnëté endmëna. Nda bnëté tojtsana, ndoñe ntjójéstjiana, binÿniñe bëtsemnayeca. Cachcá átšeftaca endmëna, tondaye quenátopodena átšeftaca jopásana, atšë jóbanama cabá ndoñe tonjobuache ora. Pero ibeta tojtsanëse, cha jtsojéstjiana, ndoñe binÿniñe causa. Cachcá, bënga šontsamna yojtsësháchenëntscuana jatrabájana. Atšbe jóbanama tempo chaojóshjango ora, ya ndoñe queochátëshachena jatrabájama ca —tojánayana.

<sup>11</sup> Chentšana tojanéyana: —Bëngbe amigo Lázaro tojtsomaná, pero atšë choye chanjá jetsefšenama ca.

<sup>12</sup> Chora chë uatsjéndayënga tmojanjuá: —Bëngbe Utabná, tojtsomanase yojtsayana chana tšabá yochtsatsmëna ca.

<sup>13</sup> Pero Jesús yojtsanëtsëtsná ndayá Lázaro tojtsanóbana ca, y chabe uatsjéndayëngna imojtsejubanaye Lázaro ndegombre yojtsomáñama. <sup>14</sup> As Jesús tšabá tojanéyana: —Lázaro tontsóbana. <sup>15</sup> Atšë sëntsoyejuá choca atšë ndoñe tsmënama, tšëngaftangbe tšabiana chaotsemnama; chca, tšëngaftanga más átsbeñe chašmotsošbuáchemá. Pero cuajna cha jinÿama ca.

<sup>16</sup> Chora Tomás, chë Gemelo ca uabobainá, chë inye uatsjédayënga tojanéyana: “Béngnaca cuajna, cháftaca mochjóbana ca.”

### Jesús iuama entšanga chámuatayenama y chë nyetsca tescama yomna tšabe vida chamotsebomnama

<sup>17</sup> Jesús chë béconana tojánashjango ora, tojántatšëmbona Lázaro ya canta te uatbontsána yojtsemnama. <sup>18</sup> Betania pueblo yojamna Jerusalén béconana, mo unga kilómetroca. <sup>19</sup> Ba judiënga tmojána Marta y María jautsëtsayama y jatjëmbambayama ndoñe tša ngmënaca chabondëtsemnama, chatbe uaftše tojanóbana causa. <sup>20</sup> Jesús yojtsashjauanama Marta tojántatšëmbona ora, tojánbocna cha jajébuguama, pero María cach yebnentše tojanoquedá.

<sup>21</sup> Chora Marta Jesúsbioye tbojaniyana: —Bëngbe Utabná, aca muentše macmënëse, atšbe uaftše ndoñe matënjóbana. <sup>22</sup> Pero atše sëntsetatšëmbo, masque ndayánaca mora Bëngbe Bëtsá chacojotjañe, y cha lempe chca cmochjätsetaye ca.

<sup>23</sup> Y Jesús tbojanjuá: —Acbe uaftše echántayena ca.

<sup>24</sup> Chora Marta tbojaniyana: —Aíñe, atše sëndétatšëmbo cha yochtayenama, pero quem luare jopochócama te, nyetsca obanënga mochtayena ora ca.

<sup>25</sup> As Jesús tbojaniyana: —Atše sëndmëna chë entšanga chámuatayenama y chë nyetsca tescama yomna tšabe vida chamotsebomnama endamá. Nda átšbeñe tojtsošbuaché, masque chaóbana, echántayena. <sup>26</sup> Y nda cabá ainá totsomñe y átšbeñe tojtsošbuaché, ndocna te queochatóbana. ¿Chë cbontsatšá soyiñe quecojtsošbuaché ca? —Jesús tbojantjá.

<sup>27</sup> Chora Marta tbojaniyana: —Aíñe, Bëngbe Utabná, atše ábeñe sëntsošbuaché, aca chë Cristo, chë Bëngbe Bëtsabe Uaquiñá y chë quem luaroye jabamá comnama ca.

### Jesús, Lázaro yojtsátbontsana cuevëshentše yojenóbošachna

<sup>28</sup> Chca tojánayanentšana, Marta tojtaná chabe quenata María jachembuama, y iytëcana tbojaniyana: “Butëmbayá tonjášhango y entseboše aca jinýama ca.”

<sup>29</sup> María chca tojanuena y cachora tojéftsanbocna y tojána Jesús jinýama. <sup>30</sup> Jesús cabá ndoñe chë pueblöye tonjánamashëngo; yojésemna Marta tbojanjébengo luarentše. <sup>31</sup> Chë yebnentše imojtsemna judiënga, María tša ngmënaca ndoñe chaondëtsemnama tjëmbambayënga, tmojánbocana María juastama; er chë tojéftsantsbaná y tojéftsanbocna ora, chë judiënga imojtsejuabnaye, Lázaro yojtsátbontsana luaroye María yojtsaye, choca jošachnama ca.

<sup>32</sup> Jesús yojtsemnentše María tojánashjango ora, chábertše tojanoshamentšé y tbojaniyana: —Bëngbe Utabná, aca muentše macmënëse, atšbe uaftše ndoñe matënjóbana ca.

<sup>33</sup> María y cháftaca tmojánashjajna judiënga, nyetscanga imojtseñošošachiye; y Jesús chca tojáníñe ora, corente tbojancochtsetšena y puerte ngmë-

naca yojtsemna. <sup>34</sup> Chora Jesús tojanatjá: —¿Ndayentše cha šmojuatbontsá ca?

Y chënga tmojanjuá: —Bëngbe Utabná, mabo y cochjinýe ca.

<sup>35</sup> Chora Jesús tojánenobošachna. <sup>36</sup> As chë judiënga tmojánayana: —¡Minýënga, tša ibnabobonshana ca!

<sup>37</sup> Pero inye judiënga imojtsichamo: —Chë jtaná chabuabínýnama tojamá, ¿tondaye tonjobená jama, Lázaro ndoñe chaondóbanama ca?

### Lázaro tojtanayena

<sup>38</sup> Jesús, cachiñe puerte cochtsetšenaná, chë uatbontsánöye tojanobeconá. Chë luarna cuevëshe inamna, y amashjuantše canýe bëts ndëtšbeca yojtsatámena. <sup>39</sup> Chora Jesús tojanéyana: —Chë ndëtšbé mojuánanga ca.

Chora Marta, chë obanabe uabena tbojaniyana: —Bëngbe Utabná, mora ya bacá yojtsonguëtšé, er ya canta te entsemna cha tontsóbana ca.

<sup>40</sup> Y Jesús tbojanjuá: —Ndegombre, ya tcbonjauyana, aíñe átšbeñe tcojtsošbuáchese, cochjinýe Bëngbe Bëtsá puerte obená y bëtsá bëtsemnama ca.

<sup>41</sup> Chora chë ndëtšbé tmojanjuaná; Jesús celoye yojntješiyey Bëngbe Bëtsábioye tbojaniyana: “Taita, cbatschuá atšbe opresido tcojouenama. <sup>42</sup> Atše sëndétatšëmbo aca sempre šcondbëtseyeunanama; atše chca tcbonjauyana, muentše montsemna entšangbe tšabiamá, chca, aca atše šcojichmoma, chënga chamotsošbuáchema ca.”

<sup>43</sup> Chca tojánayanentšana, jabuache tojánayana: “¡Lázaro, chentšana matsbocna ca!”

<sup>44</sup> Y cachora chë obaná tojtanbocna, cucuatšënga y shecuatšënga entšëjuaca batsëcná, y chabe jubiá base entšëjuaca uamochëcjuaná. As Jesús tojanéyana: “Motsejafjoná y jama chaotsobena ca.”

### Chë judiëngbe amëndayënga tmojanenöyëuná Jesúsbioye jóbama

<sup>45</sup> Chë soyëngama, banga chë judiënguentšana, María jatjëmbambayama tmojánanga, y ntšamo Jesús tojanmcá tmojáníñyënga, Jesúsbeñe imojtsošbuaché.

<sup>46</sup> Pero inye judiënga fariseúngbioye tmojána, ntšamo Jesús tojanmama chënga jacúntama. <sup>47</sup> As, chë fariseunga y chë bachnangbe amëndayënga tmojánenefjna inye judiëngbe amëndayëngaftaca, y tmojánayana: —¿Ndayá mochjobenaye cháftaca jamama? Quem boyabása bëts soyënga entsama.

<sup>48</sup> Nýe cachcá chamojonyase, nyetsca entšanga chábeñe mochantsošbuáchiye; chë romanëngbe amëndayënga mochanjabo y lempe mochantsepochoá, Bëngbe Bëtsabe bëts yebna y bëngbe luare Israel ca —chënga imojtsichamo.

<sup>49</sup> Pero canya chënguentšá, Caifás ca uabainá, chë uata chë bachnangbe más uámana amëndayá inamná, tojanéyana: —Tšëngaftanga tondaye quešmátstatšëmbo. <sup>50</sup> Y ndoñe quešmatsjuabná, tšëngaftangbiama más tšabá yojtsemna nýe canýe boyabása Israelo-



ca entsangbiama chaóbana, y ndoñe nyets bəngbe luare chamotsepocho cá ca —cha tojanéyana.

<sup>51</sup> Pero Caifás chë soye nye cachabe juábna nadoñe chca tonjánayana. Cha, chë uata chë bachnangbe más uámana améndayá inámnayeca, Bəngbe Bətsabe Espiritbe obenánaca tojánayana Jesús ibojamna Israeloca entsangbiama jóbana ca. <sup>52</sup> Y ndoñe nye Israeloca entsangbiama, sinó chë inye luarənguiñe Bəngbe Bətsabe básenga tmojanáshanənga chamuatábama, as chca, nyetscanga nye canye luarentša entsanga chamotsemnama. <sup>53</sup> Chcasna, cach tescana judiəngbe améndayənga tmojanenoyeuná Jesús jóbama.

<sup>54</sup> Chiyeca Jesús entsángbeñe, Judea luariñe ya ndoñe yontsana. Chë luarentšana tojéftsanbocna y canye luaroye tojtsanoñe, entsanga ndoyeniñe béconana, canye pueblo Efraín ca uabáinoe. Y chentše chabe uatsjəndayəngaftaca tojtsanoquedañe.

<sup>55</sup> Judiəngbe Bashco fiestama batšá yojsájama, y ba entsanga pueblənguentšana Jerusalemoye imojtsajna, soyənga choca jamama ntšamo tempo inamncá, chca, Bəngbe Bətsabe bominyama tšábenga jtsemnama, chë Bashco fiesta cabá ndobuache ora. <sup>56</sup> Chocna, judiənga Jesús imojtsenguaye, y Bəngbe Bətsabe bəts yebnentše imojtsentjanaye: “¿Ntšamo šmojtsejuabná, cha tayochjabo o ndoñe quem fiestama ca?”

<sup>57</sup> Chë fariseunga y chë bachnangbe améndayənga tmojanmandá, nderado nda Jesús ndayentše tojtsemnama tojtsatšəmbəсна, chaobuambá ca, as Jesús jishachama.

### María, botamana uanguətsiye Jesúsbeñe tbojanáshecbuešcja

**12** Chnénguana te chë Bashco fiestama yojsájama ora, Jesús Betania puebloye tojtana. Lázaro, chë Jesús tbojtanayená cha, choca inoyena. <sup>2</sup> Chentšana bəts saná Jesusbiama tmojanábua. Marta tojanəjuatšé, y Lázaro yojtsemna chë Jesúsəftaca juasama meséshañe imojtsetbiámanənguentše. <sup>3</sup> As María canye jarrətema tojanaca; chiñe yojanaftsuamna canye botamana uanguətsiye, bətsca uamaniye, ena nárdoca pormániye. Chë uanguətsiye, María, Jesusbe shecuatšənguiñe tbojanáshecbuešcja, y cachabe stjə-nashaca tbojtanshecbójó. Chora, chë yebnentše ena nardiyana yojtsonguətsiye.

<sup>4</sup> Chora, canya Jesusbe uatsjəndayənguentšá, Judas Iscariote, chë Jesús uayayəngbe cucuatšiniñe yochjanayentšbashejuaná, tojánayana: <sup>5</sup> —Quem botamana uanguətsiye unga patse denario crocénana enduámana. ¿Ndáyeca ndoñe šmonjuiye y ndbomnəjémənga chë crocénana mašməntsatsatá ca?

<sup>6</sup> Pero Judas chca tojánayana, chë ndbomnəjéməngbeñe ntsejuabnycá, sinó cha atbėbaná inamna causa. Judas chəngbe crocénana shecnəšiñe yojánatbėna, y ba soye, chë shecnəšoye imojanatsuáma crocənəntšana cha yojánatbėbana.

<sup>7</sup> As Jesús tbojanjuá: —Cachcá monyá. María méntscoñe chë botamana uanguətsiye iuabofjájona, cha jobenayama átšbeñe jabuəšcjama, er ndoñe bən y

atše šmochanjaitəme. <sup>8</sup> Chë ndbomnəjéməngna tšəngaftangbeñe sempre mochanjesomñe, pero atše ndoñe ca —tojánayana.

### Judiənga tmojanenoyeuná Lázaro jóbama

<sup>9</sup> Ba judiənga tmojántatšəmbona Jesús Betanioca yojtsemnama, y choye tmojána, ndoñe nye Jesús jinýama, sinó Lázarnaca, chë Jesús tbojtanayená cha. <sup>10</sup> As chë bachnangbe améndayənga tmojanenoyeuná Lázarnaca jóbama. <sup>11</sup> Chabe causa, ba judiənga chəngbioye cachcá tmojesanənyə y Jesúsbeñe imojtsošbuaché.

### Jesús Jerusalemoye tojánashjango

<sup>12</sup> Chë yəfsana, mallajta entsanga, Jerusalemoca fiestama tmojánashjainənga, tmojántatšəmbona Jesús choye yochjánashjanguama. <sup>13</sup> As chəngna palma betiye buacuafjənga tmojanatətsetše, y Jesús jajəbenguama tmojánbocana, y məntšá imojtsáyebuache: “¡Bəngbe Bətsá matschuanga! ¡Corente bendición bomná chë Bəngbe Utabnabe obenánaca tojabá! ¡Corente bendición bomná chë Israeloquəngbe Rey ca!”

<sup>14</sup> Jesús canye burrotema tbojáninyəna y chábeñe tojanenoyayé. Ntšamo Bəngbe Bətsabe uabemana palabrənguiñe iuayancá, cachcá tojanopasá. Chiñe məntšá endayana Jerusalemoca entsangbiama:

<sup>15</sup> Sión bəts puebloca oyenənga, ndoñe matauatjəngana.

Minyənga, tšəngaftangbe Rey burrotəmiñe enjaquená entsabó ca. <sup>16</sup> Chca orna, Jesusbe uatsjəndayənga chë soyəngama ndoñe tonjanəsertá; pero chentšana, Jesús corente bətsá yomnama Bəngbe Bətsá tojaninyənyé ora, chë uatsjəndayənga chama tmojanenoyabó, lempe ntšamo Bəngbe Bətsabe uabemana palabrənguiñe iuayancá y cachcá Jesúsəftaca tojanopasama.

<sup>17</sup> Chë Jesúsəftaca imojtsemna entsanga, Lázarbioye uatbontsánoye tbojanchembo ora y chentšana tbojtanayená ora, ntšamo tmojáninyəna chora imojtsecuəntaye. <sup>18</sup> Chiyeca, ba entsanga tmojánbocana Jesús jajəbenguama, chë bəts soye Bəngbe Bətsabe obenánaca cha tojanmama tmojanuənyeyeca. <sup>19</sup> Pero chë fariseunga imojtsenatsətsnaye: “Tšəngaftanga šmontsonyá bənga tondaye jamama quemuátobenama y más, ¡nyetscanga cha montsəstona ca!”

### Básefta Grecia luaroca entsanga Jesús tmojánguango

<sup>20</sup> Bashco fiestama, chë Bəngbe Bətsá jadórama Jerusalemoye tmojánangbeñe, básefta griego entsəngnaca imojtsemna. <sup>21</sup> Chəngna, Felipe chë Galilea luarocá, chë Betsaida pueblócábioye, tmojanobeconá y tmojanimpadá: “Señor, bənga fsəntseboše Jesús jinýama ca.”

<sup>22</sup> Chora Felipe tojána Andrés jauyanama, y chë útatna Jesúsbioye tbojána, chë grieguəngbiama jauenayama. <sup>23</sup> Jesús chata tojanéyana: “Chë Bəngbe Bətsá

Entšá tbojanbemá corente bêtsá yomnama jinÿanÿiyama te ya tojjobuache. <sup>24</sup> Ndegombre šcuayana: Canÿe trigo jénaye ndoñe fshantsiñe tmonjuatbontsá y ndoñe tonjóbanese, ñe cach canÿe trigo jénaye jesomñana. Pero tmojuatbontsá y tojóbanase, bêtsá jashájonana. <sup>25</sup> Cachcá, nda ñe cachá tojtsenóbobonshana, cha chabe vida echanjéftsobuetše. Pero nda ñe cachá ndoñe tontsenóbobonshana y ntšamo atše stsemadacá, quem luariñe vida tojtsebomñentscuana cha tojtsamese, chë ñyetsca tescama yomna tšabe vida echántsebomna. <sup>26</sup> Nda ntšamo stsemadacá jamama tojtseboše, atše chašotséstona. Chca, ndayentše atše chaitsemna, chánaca, chë atše oservená, chentše chaotsemna. Atše šojtseservénabiama, atšbe Taitá Bëngbe Bêtsá echanjínÿanÿiye bêtsá yomnama ca” —Jesús tojánayana.

### Jesús tojánayana cha yochjanóbanama

<sup>27</sup> Y más Jesús tojánayana: “¡Mora tša cochtsetšenana séntsemna! ¿Atše chjayana: ‘Taita, chë átseftaca echanjopása soyënga šmotsebojuaná ca?’ Ndoñe; er más chama atše quem luaroye tijabo. <sup>28</sup> Taita, šminÿanÿé aca puerte bêtsá y obená comnama ca.”

Y cachora, celocana canÿe oyeuambnayana tojanóbozna mentsá: “Ya tbonjinÿanÿé atše puerte bêtsá y obená tsmënama, y mora cachiñe cachcá chanjama ca.”

<sup>29</sup> Entšanga chca tmojanuena ora, ínÿenga imojtsichamo ñe tojanjuésase ca; pero ínÿengna imojtsichamo: —Canÿe ángel chábioye tbonjuatsésá ca.

<sup>30</sup> Chora Jesús tojanéyana: —Ntšamo šmonjouencá, atšbiama ndoñe quenátsmëna, sinó tšëngaftangbiama. <sup>31</sup> Mora chë tempo entsemna, chë quem luare entšanga tmojéftsema bacna soyënga jinÿanÿiyama y chëngbe castiguama jayanama. Y mora, chë ñyetsca bacna soyënga mandayá, quem luarentšana mochantábocna. <sup>32</sup> Pero atše fshantSOCana atsbananá chaitsemna ora, ñyetsca entšanga átšbioye chanjúbuaja ca —Jesús tojánayana.

<sup>33</sup> Chca cha yojttsichamo, ana jinÿanÿiyama ntšamo jóbanama ibojamnama. <sup>34</sup> Chora chë entšanga tmojanjuá: —Bëngbe Bêtsabe uabemana palabrénguiñe endayana, y chíyeca bënga fsëndétatšëmbo chë Cristo ñyetsca tescama vida yochtsebomna ca. As, ¿ndáyeca cojtsichamo, Bëngbe Bêtsá Entšá tbojanbemá chamuatsbanama yojtsemna ca? ¿Nda yojtsemna Bëngbe Bêtsá Entšá tbojanbemá ca? —chënga imojtsichamo.

<sup>35</sup> Y Jesús tojanéyana: —Ñe baseftatescama chë entšangbe juabñënga binÿnayá tšëngaftangbeñe entsemna. Chë binÿnayá cabá tšëngaftangbeñe yojtsemñentscuana, cháftaca šmochtsajna. Chca, mo ibetiñcá ndoñe quešmochátajna. Nda ndoñe binÿniñe tojtsana, cha ndoñe ntsetatšëmbuana ndëmuajana yojtsana. <sup>36</sup> Chë binÿnayá cabá tšëngaftangftaca endësemñentscuana, chábëñe šmochtsošbuáchiye; as, tšëngaftangbe juabñënga binÿniñe echántsemna ca —Jesús tojánayana.

Chë soyënga tojánayanentšana, Jesús tojtsanoñe y entšangbiama yojetsóitana.

### Ndáyeca chë judiënga Jesúsbeñe ndoñe montsanošbuaché

<sup>37</sup> Masque Jesús, judiëngbe delante ba bëts soyënga Bëngbe Bêtsabe obenánaca tojéftsema, chënga ndoñe chábëñe ntsošbuáchiyana, <sup>38</sup> ntšamo Bëngbe Bêtsabe juabna oyeuambnayá Isaías tojanabemcá, cachcá chaotsemnama. Isaías mentsá tojánayana:

Bëngbe Utabná, ¿nda bëngbe buayenana soyiñe yojtsošbuaché?

Y ¿nda tbojosertá, acbe obenana tcojinÿinÿé ora ca? <sup>39</sup> Chíyeca chënga ndoñe montsobena Jesúsbeñe jtsosbuáchiyama, er Isaías mentsánaca tojéftsanabema:

<sup>40</sup> Bëngbe Bêtsá tojama chënga chabe soyëngama ndoñe botamana chamondëtsejuabnama y chabe soyënga ainaniñe ndoñe chamondóyëngacñama,

as ndoñe chaondëtsësertánama ca.

Y Bëngbe Bêtsá entsichamo: “Chca entsemna, chënga atšbe benache ndoñe chamondishachama, y atše ndoñe ntjätsebacama;

y chca, chënga mochántsemna mo ndëshnana entšangcá ca.” <sup>41</sup> Isaías chca tojánayana, er tojáninÿe Jesús puerte bêtsá y obená yojamnama, y chca chë uabemaniñe Jesusbiama yojanoyeuambná.

<sup>42</sup> Pero masque chca iuábemanese, ba judiënga imojtsanošbuaché, y banga judiëngbe amëndayëngnaca Jesúsbeñe imojtsanošbuaché. Pero chëngna, Jesúsbeñe imojtsosbuáchemo entšangbeñe ndoñe montsichamo. Chca imojánama chë fariseungbiama auatja causa, chë judiëngbe enefjuana yebnënguentšana ndoñe chamondëtëbuacnama.

<sup>43</sup> Chëngbiama más yojanámana, entšanga chëngbiama chamotsichamo tša uámanënga imojamna ca, y ndoñe, Bëngbe Bêtsá chca chaotsamama.

### Jesube palabréngaca yochtsótatšëmbo entšanga tšabá o ndoñe tšabá tmonjamama

<sup>44</sup> Chora Jesús mentsá jabuache tojánayana: “Nda átšbeñe tojtsošbuaché, ndoñe ñe átšbeñe ntsošbuáchiyana; chë nda šojichmó chábëñnaca cha jtsosbuáchiyana. <sup>45</sup> Cachca, nda atše šojtsonÿá, chë šojichmó chábioynaca cha jtsónÿayana. <sup>46</sup> Atše quem luaroye tijabo entšangbe juabñënga jabobínÿnama, chca, nda átšbeñe tojtsošbuaché, mo ibetiñcá ndoñe chaondëtsemnama. <sup>47</sup> Pero nda atšbe soyëngama tojouena, pero ntšamo sénttsichamcá ndoñe tontsama, atše chabiama ndocá quichátayana tšabá o ndoñe tšabá tonjama ca. Atše ndoñe chiyátabo, ntšamo quem luarentša entšanga tmojamama tšabá o ndoñe tšabá yontsemna ca jatichámuama; quem luaroye sënjabo ndayá chënga jabátsebacama. <sup>48</sup> Nda atše šojtsaboté y atšbe palabréngama ndoñe šonjoyeuná, ya entsebomna nda chabiama yochjayana bëts castigo jtssebomnama ibojtsemna ca. Atše tijanoyeuambá pal-

abréngaca, quem luare jopochócama te chabiam a chca echántsayana. <sup>49</sup> Er atše ndoñe n̄ye atšbe juáb-naca quetsatoyebuambná. Chè Taitá, chè šonjichmó cha, šonjamandá ntšamo jayanana y ndayá jabuátambana. <sup>50</sup> Atše sèndétatšëmbo, atšbe Taitá tojamandá orna, cha jamándana entšanga chè n̄yetsca tescama yomna tšabe vida chamotsebomnama. Chíyeca, ndayá sèntsichamcá, endmèna ntšamo atšbe Taitá Bèngbe Bètsá šojamandacá ca” —Jesús tojánayana.

### Jesús chabe uatsjéndayènga tojanashecjabebé

**13** Bashco fiesta cabá ndobuache ora, Jesús yojtsetátšëmbo chabe tempo tojanóshjanguama, quem luarentšana jèftsebocnama y chabe Taitábioye jtama. Ntšamo Jesús chábenga yojanababuan̄yeshancá, chè quem luare imojamnènga, chórna yojtseboše chè bèts bonshánana puerte más jin̄yan̄iyana.

<sup>2</sup> Pero Satanás, Júdasbe ainaniñe bacna juabnènga tojanajó, uayayèngbe cucuatšife Jesús jayentšbáshejuanama. Judas Iscariote, Simonbe uaquiñá. <sup>3</sup> Jesús yojtsetátšëmbo chabe Taitá Bèngbe Bètsá n̄yets obenana tbojánatsetama. Cachcá, Jesús yojtsetátšëmbo, Bèngbe Bètsábicocana cha tojánabama y cachábioye jtama ibojtsemnama. <sup>4</sup> Chcasna, chè ibeta jasama tmojanpochocá ora, meséshentšana tojantsbaná, chabe juatsboye uichètjoníya tojanenátsejca y can̄ye tualléjua tojanenasná. <sup>5</sup> Chentšana, can̄ye bachešife búyeshe tojanbuešcja y tojanontšé chabe uatsjéndayènga jushecjabebiyana y jtéshechojuana cha yojtsasnana tualléjuaca.

<sup>6</sup> Pero, Simón Pedro tbojanobuache ora, Jesúsbioye tbojaniana: —Atšbe Utabná, ¿aca šochjuashecjabí ca?

<sup>7</sup> Chora Jesús tbojanjuá: —Atše séntsama soye mora ndoñe quecmátésertana; pero más chcoye aíñe cmochanjosérta ca.

<sup>8</sup> As Pedro tbojaniana: —¡Ndocna te šcatjuashecjabí ca!

Pero Jesús tbojaniana: —Ndoñe chacbonjuáshecjabese, atšbia ndoñe quecochátsmèna ca.

<sup>9</sup> Y Simón Pedro tbojaniana: —¡Atšbe Utabná, as n̄ye atšbe shecuatšènga ndoñe, ndayá atšbe cucuatšènga y bestšášnaca ca!

<sup>10</sup> Pero Jesús tbojanjuá: —Nda bebená tojtsemna, n̄ye shecuatše jtsashecjabiam a jtsajabótana, ndoñe n̄yetšá cachiñe. Nda tojtsobebé, ndoñe tsengá ntsemnana. Cachcá, mo bebénènga cuenta tšèngaftanga šmontsemna; pero can̄ya muentše entsemna, y cha mo bebenacá ndoñe quenátsmèna.

<sup>11</sup> Jesús yojtsetátšëmbo nda chè uayayèngbe cucuatšife boshjuaná yochtsanmènama, chíyeca tojánayana: “Tšèngaftanguentšá can̄ya entsemna, cha mo bebenacá ndoñe quenátsmèna ca”.

<sup>12</sup> Jushecjabebiyama tojanpochocá ora, chabe juatsboye uichètjoníya tojaníchètjo, y meséshentše tojtantótbema. Chora tojanéyana: —¿Chè tcbonjábiam a soyama quecmojtsésertana ca? <sup>13</sup> Tšèngaftanga atše šmondobuayana Buatèmbayá y Bèngbe Utabná ca;

tšabá chca šmontsichamo, er atše ndegombre chca sèndmèna. <sup>14</sup> Atše, tšèngaftangbe Buatèmbayá y Utabná, tcbonjushecjabebé; chcasna, tšèngaftángnaca cmontsamna jenáshecjabebiyana. <sup>15</sup> Ntšamo quem sóyeca tcbonjan̄yan̄yecá, tšèngaftanga cachcá šmochtsama. <sup>16</sup> Ndegombre šcuayana, chè oservená chabe nduiñbiam a ndoñe más uamaná ntsemnana. Cachcá, chè ichmoná chè tbojichmobiam a ndoñe más uamaná quenátsmèna. <sup>17</sup> Quem soyènga chašmojuatsjin̄ye y chca chašmojamèse, tšèngaftanga puerte oyejuayènga vida šmochanjéftsebomna.

<sup>18</sup> “Atše sèndétatšëmbo chè tijábacangbiam a, chíyeca atše n̄yetscangbiam a ndoñe chca quetsatoyebuambná. Y ntšamo Bèngbe Bètsabe uabemana palabrènguiñe endayancá cachcá chaotsemnama, chè ‘can̄ya átšeftaca tandèse tonjasá, atšbe contra echántsemna ca’, cachcá echanjopása. <sup>19</sup> Mora, cabá ndoñe chca tonjopasá ora, lempe chè soyènga séntsichamo. As, chca chaojopasá ora, átšbeñe šmochantsošbuáchiye, y as šmochántsetatšëmbo atše tsmèna chè nda sèndmèná. <sup>20</sup> Ndegombre šcuayana: Nda atše tijichmóbioye tbojofja, cha atše šochanjofja; y nda atše šojofja, cha chè nda šojichmóbioye bochanjofja ca” —Jesús tojánayana.

### Jesús tojánayana uayayèngbe cucuatšife Judas bochjáboshjonama

<sup>21</sup> Chè soyènga tojánayanentšana, Jesús corente cochtsetšenaná yojtsemna, y tojánayana: —Ndegombre šcuayana, can̄ya tšèngaftanguentšá uayayèngbe cucuatšife šochanjáboshjona ca.

<sup>22</sup> Chora, chabe uatsjéndayènga tmojanontšé enon̄jin̄nayana, y ndoñe montsetátšëmbo ndabiam a Jesús chca tojánayanama. <sup>23</sup> Can̄ye uatsjendayá, chè Jesús puerte ibnabobonshaná, Jesusbe juachaca inatbemana. <sup>24</sup> As, Simón Pedro chábioye tbojánefjatšëmbo, ndabiam a Jesús chca tojánayanama Jesúsbioye chabotjama. <sup>25</sup> Chè puerte bonshana uatsjendayá, Jesúsbioye batšatema más tojanosjoná y tbojanjtá: —Bèngbe Utabná, ¿nda cha yojtsemna ca?

<sup>26</sup> Chora Jesús tbojanjuá: —Atše can̄ye base tandètema chanjafchécuacuaye y ndábioye chajoyé, cha entsemna ca.

As Jesús can̄ye base tandètema tojanfchecuacuá, y Judas, Simón Iscariotebe uaquiñábioye, tbojanoyé.

<sup>27</sup> Tandèse tojanóyèngacñe y cach ora, Satanás Júdasbe ainaniñe bacna juabnènga tbojáncochèngo. As Jesús tbojaniana: “Chè cochanjama soye, cam ora moma ca.”

<sup>28</sup> Pero ni can̄ya chè jasama imojtsetbiam anènguentsá tbojanésertá, ndayama Júdasbioye chca tbojanianama. <sup>29</sup> Judas inamna chèngbe crocènan a shecnèšife uambayá; chíyeca ín̄yenga tmojanjuabó Jesús chca ibojtsatsaye, ana ndayá yojtseita soye chè fiestama chauabuámíyama, o ndbomnèjémènga ndayánaca chauatšatama ca.

<sup>30</sup> Júdasna chë base tandëtema tojanóyëngacñe, y cachora chentšana tojëftsanbocna. Chora ya ibeta yojsemna.

### Chë tsëm mando

<sup>31</sup> Judas tojëftsanbocnentšana, Jesús tojánayana: —Ora tocjebuache, Bëngbe Bëtsá Entšá tbojanbemá corente bëtsá y obená yomnama jinñanñiyama; y mua echanjínñanñiyie Bëngbe Bëtsá corente bëtsá y obená yomnama. <sup>32</sup> Cha echanjínñanñiyie Bëngbe Bëtsá chca yomnama, chíyeca Bëngbe Bëtsánaca echanjínñanñiyie corente bëtsá y obená yomnama, y mora entsemna chë ndaye ora Bëngbe Bëtsá chca chabiamá yochjínñanñiyie. <sup>33</sup> Atšbe básenga, baseftatescama tšëngaftangaftaca séntsemna. Chora šmochántsen-guaye, pero ntšamo judiënga sënjauyancá, mora cachá tšëngaftanga cbëyana: Chë chanjá luaroye, tšëngaftanga ndoñe quešmátobena jama ca. <sup>34</sup> Canñe tsëm soye cbetsamëndá: Nñetscanga šmochtsenbobonshana. Ntšamo atšë tšëngaftanga cbondábabuanñeshana, cachá tšëngaftanga šmochtsenbobonshana. <sup>35</sup> Tšëngaftanga šmojtsebobonshánëse, nñetsca entšanga mochántsetatšëmbo, tšëngaftanga atšbe uatsjëndayënga šmomnama ca —Jesús tojánayana.

### Jesús tojánayana, chábioye ndoñe bonjanabuátma ca Pedro yochjánayanama

<sup>36</sup> Chora Simón Pedro tbonjantjá: —Bëngbe Utabná, ¿ndëmoye cochjá ca?

As Jesús tbojanjuá: —Atšë sëntsá luaroye, mora aca ndoñe quecátobena atšë juastana, pero más chcoye añe šcochanjuasto ca.

<sup>37</sup> As Pedro tbojanayana: —Atšbe Utabná, ¿ndáyeca ndoñe sëntsobena mora aca juastama? ¿Atšë séntseprontana acbiamá jóbanama ca!

<sup>38</sup> Chora Jesús tbojanayana: —¿Ndegombre cojtseprontana atšbiamá jóbanama? Ndegombre cbëyana, cabá ngallo ndëcánta ora, aca unga soye atšbiamá cochanjayana: “Cha ndoñe quetsatabuatma ca”.

### Jesús beyeca entšanga jobenayana Bëngbe Bëtsábioye jama

**14** Mëntšánaca Jesús tojánayana: —Ndoñe ainana tsetšanënga matsmënaná. Tšëngaftanga Bëngbe Bëtsábeñe šmondošbuaché; átšbeñnaca šmochtsosbuáchiye. <sup>2</sup> Atšbe Taitá Bëngbe Bëtsá endmënoca, ba luarënga joyënanama endmëna. Ndoñe chca tontsemnëse, atšë chca matchënjáuyana. Morna, cha endmënoye atšë chanjá tšëngaftangbiama canñe luare joyënanama jabuáprontama. <sup>3</sup> Atšë chajá y chë luare chacbojabuaprontá ora, cachiñe moye chanjésabo, tšëngaftanga átšeftaca junatsama. As, atšë chaitsemnoye, tšëngaftangnaca chašmotsá joyënanama. <sup>4</sup> Atšë chanjá choye ntšamo jama y jashjanguama ya šmontsetátšëmbo ca —Jesús tojánayana.

<sup>5</sup> Chora Tomás Jesúsbioye tbojanayana: —Bëngbe Utabná, ndëmoye cochjama ndoñe queftsátstatšëmbo. As, ¿ntšamo bënga fchtsetátšëmbo ntšamo choye jama ca?

<sup>6</sup> Chca tbojanayana ora, Jesús tbojanjuá: —Atšë sëndmëna benachá; chëjana tcojtsase, pronto jashjanguana. Atšë sëndmëna ntšamo ndegombre yomncá sempre oyebuambnayá, y entšanga chë nñetsca tescama yomna tšabe vida chamotsebomnama endamá. Nñe átšbeyeca endopodena ndayëjana jama, y atšbe Taitá Bëngbe Bëtsábioca jashjanguama. <sup>7</sup> Tšëngaftanga atšë šmojtšabuatmëse, atšbe Taitánaca šmattsábuatma. Morscana ya cha šmontsábuatma y cha šmontsonñá ca —tbojanayana.

<sup>8</sup> Pero Felipe tbojanayana: —Atšbe Utabná, nñe chë Taitá šmanñanñé, ndayama más ca.

<sup>9</sup> Chora Jesús tbojanayana: —Chëfta te tšëngaftangaftaca séntsemna, y ¿cabá ndoñe atšë šcontsábuatma, Felipe? Nda atšë šojinñe, chë Taitá Bëngbe Bëtsábioynaca jinñana. As, ¿ntšamo atšë šcojtsatsá, chë Taitá šmanñanñé ca? <sup>10</sup> ¿Ndoñe condošbuaché, atšbe Taitá átšbeñe y átšnaca chábeñe nñe canñacá ftsmënama? Chë cbontsëtsëtsná soyënga, ndoñe nñe atšbe juábnaca chca quetsatoyebuambná. Atšbe Taitá, chë átšbeñe vida endbomná jtsamana lempe ntšamo stsamcá. <sup>11</sup> Muiñe šmochtsosbuáchiye: Atšbe Taitá átšbeñe endmëna, y átšnaca chábeñe mo nñe canñacá sëndmëna. Chama ndoñe šmontsosbuachese, as nñe chë tijama soyëngámnaca átšbeñe šmochtsosbuáchiye. <sup>12</sup> Ndegombre šcuayana, nda átšbeñe tojtsošbuaché, ntšamo atšë tijamcá y cachá cha echántsama. Atšbe Taitá entsemnoye atšë chanjá, chíyeca, chë átšbeñe ošbuachiyá, chama más bëts soyënga echanjama. <sup>13</sup> Tšëngaftanga ndaye sóynaca Bëngbe Bëtsábioye šmojtjañe, y chca šmojama atšë jótšëmbonëse, átšbeñe šmošbuachéyeca, lempe šmochanjóyëngacñe; chca, chë Uaquiñá echanjínñanñiyie chë Taitá corente bëtsá y obená yomnama. <sup>14</sup> Tšëngaftanga ndaye sóynaca atšë šmojtjañe, y chca šmojama atšë jótšëmbonëse, átšbeñe šmošbuachéyeca, atšë chë soye chanjama ca —Jesús tojánayana.

### Jesús tojanašebuachená chë Uámana Espiritu jíchmuama

<sup>15</sup> Mëntšánaca Jesús tojánayana: “Tšëngaftanga atšë šmojtsebobonshánëse, ntšamo cbontsamëndacá cachá šmochanjama. <sup>16</sup> Chca chašmojamëse, atšbe Taitá Bëngbe Bëtsá tšëngaftangbiama chanjaimpáda, tšëngaftanga jabújabuachama y jabáñemuayama inña cha chabuichmoma, chë Uajabuachaná nñetsca tescama tšëngaftangaftaca chauëtsemnama. <sup>17</sup> Cha, chë Uámana Espiritu endmëna chë nñetsca soyënguifne ntšamo ndegombre yomncá oyebuambnayá. Chë nñe quem luarama enójuabnaye entšanga, chë átšbeñe ndošbuáchiyënga ndoñe quematonñá, ni quematábuatma. Chíyeca chënga ndoñe quemátobena cha jóyëngacñana. Pero tšëngaftanga añe cha šmontsábuatma.

Cha tšëngaftangaftaca entsemna, y tšëngaftangbe ainaniñe sempre echanjéftsiyena.

<sup>18</sup> “Atše ndoñe quebocháisabashejuana, mo uaj-chonga cuenta chašmotsemnama. Tšëngaftangbiyoye chanjésabo. <sup>19</sup> Muentšana baseftaytese, chë nye quem luarama enójuabnaye entšanga ndoñe más queš-mochátonyaye; pero tšëngaftangna aíñe, atše cachiñe šmochántinye. Atše ainá chántsemna, chíyeca tšëngaftanga átšeftaca tšabe vida šmochántsebomna. <sup>20</sup> Chë Uámana Espiritu tšëngaftangbe ainaniñe chaš-mojóyëngacñe ora, tšëngaftanga šmochántsetatšëmbo, atše atšbe Taitábeñe nye canyácá tsmënama; cachcá, tšëngaftanga šmochántsetatšëmbo, tšëngaftanga átšeftaca cachcá nye canyácá šmomnana y átšnaca tšëngaftangaftaca. <sup>21</sup> Nda totátšëmbo ntšamo atše tijamandacá y sempre chca tojtsama, cha ndegombre šojtsebobonshana. Nda átšbiyoye šojtsebobonshana, chábíoye atšbe Taitánaca bochántsebobonshana, chábíoye atšbe Taitánaca bochántsebobonshana, y nda atše tsmënama cha chanjínýinýiye ca” —Jesús tojánayana.

<sup>22</sup> Chora, inye Judas, ndoñe Judas chë Iscariote, Jesús-bíoye tbojaníyana: —Bëngbe Utabná, ¿ntšamo chca yojtsemna, nye bënga šcochjínýanýiye ntšamo cachaca comnana, y nyetsca quem luarentšëngbiyoye ndoñe ca?

<sup>23</sup> Chora Jesús tbojanjá: —Nda atše šojtsebobonshana, ntšamo atše sëntsoyebuambnacá echanjama. Atšbe Taitánaca chábíoye bochántsebobonshana, y bëndata chábíoye fchanjabo y chábeñe vida fchantsebomna. <sup>24</sup> Nda ndoñe šontsebobonshana, ndoñe queochátama ntšamo sëntsoyebuambnacá. Ntšamo sëntsoyebuambnacá ndoñe nye atšbe juábnaca quenátsmëna, sinó chë Taitá, chë šonjichmó chabe juábnaca.

<sup>25</sup> “Atše cabá tšëngaftangaftaca sëntsemnëntscuana, lempe quem soyëngama sëntsoyebuambná. <sup>26</sup> Chë Uajabuachaná, chë Uámana Espiritu, atšbe impadanánaca atšbe Taitá bochanjíchmua. Cha lempe cmochántsbuatambaye, y echanjama nyetsca chë tcbonjáuyana soyëngama chašmuatenójuaboma.

<sup>27</sup> “Chë atšbe ainaniñe puerte tšabe ebionana tšëngaftangbiyoye šcuéteboshjona, cbetsatsatá. Chë nye quem luarama enójuabnaye entšanga cmondbétsatsatnaye soyëngcá ndoñe quenátsmëna, chë atše cbontsatsatná ainaniñe puerte tšabe ebionana. Ainana tsetsanënga ndoñe matsmënana, ni matauatjëngana. <sup>28</sup> Ya šmonjouena ntšamo tcbonjáuyancá: ‘chanjá y tšëngaftangbiyoye chanjésabo’. Tšëngaftanga atše šmojtsebobonshánëse, šmattsóyejuaye atše chë Taitábíoye jama šojtsemnama, er chë Taitá atšbiyama más bëtsá endmëna. <sup>29</sup> Quem soyënga tcbonjáuyana, cabá ndoñe chca tonjopasá ora; as, chca chaojopasá ora, chiñe jenójuaboyëse átšbeñe chašmot-sošbuáchema.

<sup>30</sup> “Chë quem luarentša bacna soyënga mandayá endabó; chíyeca atše ya ndoñe bëtscá tšëngaftangaftaca quichaisóyebuambaye. Pero cha tondaye quenátobena atše jabórlana. <sup>31</sup> Masque cha chca end-

mëna, chca entsemna, atše chë Taitábíoye tsbobonshánama quem luarentša entšanga chamotsetatšëmbuama. Ntšamo atšbe Taitá šojamandacá, atše cachcá tsámama chamotsetatšëmbuama.

“Motsbananga. Muentšana cuajna ca” —Jesús tojanéyana.

### Jesús yomna mo chë tšabe uvas betiyácá

**15** Mëntšánaca Jesús tojánayana: “Atše sëndmëna mo chë tšabe uvas betiyácá, y atšbe Taitá Bëngbe Bëtsá chë tšabe uvas betiyoye inyenacá. <sup>2</sup> Chë inyená, chë uvas betiyentša buacuafjënga ndëshajuanëfjënga jtsebuácuetëtsetšana; pero chë uvas betiyentša buacuafjënga shajuanëfjënga jtsobolímpiana, bëtscá chaotseshájuanama. Nda ndoñe tontsama ntšamo Bëngbe Bëtsá tojtsebošcá, jtsemnana mo chë ndëshajuana buacuafjëngcá; y chë causa, chë Taitá chábíoye corente bochantsecastíga. <sup>3</sup> Tšëngaftanga šmonjouena ntšamo tijayancá; bëtscá chca šmontsama. Chíyeca mora tšëngaftanga šmontsemna mo chë limpiana y shajuana buacuafjëngcá. <sup>4</sup> Atšeftaca cánýiñe mo canyácá šmochtsemna y atše tšëngaftangaftácna. Chë buacuafja uvas betiyentšana juanánëfja ndoñe ntsobenana nye cachabe ponto jashájonana. Cachcá, tšëngaftanga átšeftaca ndoñe cánýiñe mo canyácá šmontsemnëse, ndoñe šmattsobena Bëngbe Bëtsabiamna bëtscá soyënga jamama.

<sup>5</sup> “Atše chë tšabe uvas betiyácá sëndmëna y tšëngaftanga chë buacuafjëngcá. Nda átšeftaca cánýiñe mo canyácá tojtsemna y atše cháftacnaca, cha Bëngbe Bëtsabiamna bëtscá soyënga echanjama, mo canyë buacuafja becá tojtseshajuancá. Er, tšëngaftanga atšbe uajabuáchenana ndoñe šmontsebomnëse, átšeftaca cánýiñe mo canyácá ndoñe šmontsemna causa, tondaye šmattsobena jamama. <sup>6</sup> Canýa átšeftaca cánýiñe mo canyácá ndoñe tontsemnëse, cha jtsemnana mo canyë buacuafjënga buacuafja, utšenëfja y buashánëfjácá. Chca buacuafjënga, entšanga jtsatbanana, íñeshoye jtsëtšenana y chentše jtsejuinýiyana. Cachcá, nda ndoñe átšeftaca cánýiñe mo canyácá tontsemna, ndoservená jtsemnana y luaroca cha mochantsesegóra.

<sup>7</sup> “Tšëngaftanga átšeftaca cánýiñe mo canyácá šmojtsemna y ntšamo atše tijayancá šmojtsamëse, lempe ntšamo šmojtsebošcá šmochjotjañe, y lempe šmochanjóyëngacñe. <sup>8</sup> Chë shajuana buacuafjëngcá tšëngaftanga chašmojtsemna ora, šmochanjínýanýiye atšbe Taitá corente bëtsá y obená yomnama. Y chca, tšëngaftanga atšbe ndegombre uatsjëndayënga šmochántsemna. <sup>9</sup> Ntšamo chë Taitá šondbobonshancá, átšnaca cachcá tšëngaftanga cbondábabuanýeshana. Chíyeca, šmochtsiyena atšbe bonshánama jtsejuabnayëse. <sup>10</sup> Atše sëndama ntšamo atšbe Taitá šondëmandacá. Chíyeca atše sëndoyena chabe bonshánama jtsejuabnayëse. Cachcá tšëngaftángnaca, ntšamo atše cbontsamëndacá šmojtsamëse, atšbe bonshánama jtsejuabnayëse šmochantsiyena.

<sup>11</sup> “Atše chca cbontsëtsëtsná, chë atše sëntsebmoma oyejuayana tšëngaftángnaca chašmotsebmoma, y tšëngaftanga puerte chašmotsóyejuama. <sup>12</sup> Mëntsá cbetsamëndá: Ntšamo atše cbondababuanýeshancá, cachcá šmochtsenbobonshana. <sup>13</sup> Chë chabe amiguëngbiama tojóbanabiama, ndocna quenátobena chabiama más bonshánana jtsebmoma. <sup>14</sup> Ntšamo atše tijamandacá tšëngaftanga šmojtsamëse, atšbe amiguënga šmochántsemna. <sup>15</sup> Chë oservená ndoñe ntsetatšëmbuana ndayá chabe nduiño tojtsamama. Chíyeca atše tšëngaftanga oservénënga ca ndoñe quecbatëtsëtsná. Morscana mëntsá cbontsëtsëtsná: ‘Tšëngaftangna atšbe amiguënga šmontsemna ca’, er lempe ntšamo atšbe Taitábentšana tijuatsjinýcá, tšëngaftanga tcbonjinýanýé. <sup>16</sup> Tšëngaftanga ndoñe atše chešmatábuayana, pero atše aíñe tšëngaftanga tcbonjabacá y tcbonjubaýana, Bëngbe Bëtsabe trabajo jamama; y chca, mo canýe betiye sempre tojtseshajua y chë shajuana ndocna te tonsopochocacá, tšëngaftanga chašmotsemnana. Chca, lempe ntšamo atšbe Taitá šmojtjañcá, y chca šmojama atše jótšëmbonëse, átšbeñe šmošbuachéyeca, cha lempe cmochanjátšataye. <sup>17</sup> Mëntsá atše cbetsamëndá: Šmochtsenbobonshana ca” —Jesús tojanéyana.

#### Jesús y chabe entšanga, chë nýe quem luarama enójuabnayëngbiama uaboyëñjanënga

<sup>18</sup> Mëntsánaca Jesús tojánayana: “Pero chë nýe quem luarama enójuabnaye entšanga tcmojsëbuayënjëse, šmochjenójuaboje, natsana chënga atše šmonjanáboyëñjama. <sup>19</sup> Tšëngaftanga, chë nýe quem luarama enójuabnaye entšanguentšana šmojtsemnëse, chënga cmattsababuánýeshana cachëngbengbioycá. Pero tšëngaftanga ndoñe chë nýe quem luarama enójuabnaye entšanguentšana quešmátsmëna, y atšna, chë quem luare oyenënguentsana tšëngaftanga tcbonjabacá. Chíyeca chë nýe quem luarama enójuabnaye entšanga tšëngaftanga cmontsëbuayëñja. <sup>20</sup> Šmochjenójuaboje ntšamo tcbonjáuyanama: ‘Chë oservená chabe nduiñbiama ndoñe más uamaná quenátsmëna ca’. Chënga monjánama atše chaisufrima; tšëngaftángnaca chašmotsesufrínama mochántsama. Entšanga ntšamo atše tijayanentšana ntsachetšá tmojtsamcá, cachcá chënga mochántsama ntšamo tšëngaftanga chašmojtsëtsëtsná chentšana. <sup>21</sup> Chë chacmojtsëbuayëñjënga, chë šojichmó cha ndoñe quematábuatma. Chíyeca chënga lempe chca cmochanjáborlaye, atšbe causa. <sup>22</sup> “Atše ndoñe matijabo y chënga ndoñe matijáuyanëse, ndegombre ndoñe bacna soye mattsebmoma. Pero mora, chëngbe bacna soyëngama chënga ndoñe quemátobena jayanana, ‘¡Chca fsëñjama ntsetatšëmbcá ca!’ <sup>23</sup> Nda atše šojtsáboyëñja, atšbe Taitábioynaca jtsáboyëñjana. <sup>24</sup> Atše chë bëts soyënga Bëngbe Bëtsabe obenánaca chëngbeñe ndoñe matijamëse, ndegombre chënga ndoñe bacna soyënga mattsebmoma. Pero mora, masque ntšamo sënjamcá tmonjinýëse, chënga atše šmontsáboyëñja y atšbe

Taitábioynaca. <sup>25</sup> Chca chënga montsama, ntšamo chëngbe leyënguiñe enduabemancá cachcá chaopasama. Chiñe mëntsá endayana: ‘Nýe tondayama chënga šmonjanáboyëñja ca.’

<sup>26</sup> “Atše, atšbe Taitábentšana chë Uajabuachaná y añemuayá tšëngaftangbioje chanjíchmua. Cha chë Uámana Espíritu endmëna, chë nýetsca soyënguiñe ntšamo ndegombre yomncá oyebuambnayá. Cha endmëna chë Taitábentšana ichmoná; y cha lempe atšbe tšabe soyënga cmochantsëtsëtsnaye. <sup>27</sup> Chorscana, tšëngaftángnaca atšbiama entšanga šmochantsëtsëtsnaye, er tšëngaftanga átšeftaca šmondëtsemna, entšanga jábuayenama atše sënjanbojatsë orscana ca” —Jesús tojánayana.

**16** Mëntsánaca Jesús tojánayana: “Atše quem soyënga cbontsëtsëtsná, tšëngaftanga átšbeñe ošbuáchiyana ndoñe chašmondájbanama, atšbe causa chašmojtsesufrina ora. <sup>2</sup> Chëngna, chë judiëngbe enëñjua yebnënguentsana cmochantëbuacana. Chca tempo chaojobuache ora, chë tšëngaftanga chacmojt-sëbáyënga mëntsá mochántsejuabnaye: ‘Bënga tšabá tmonjama ca. Ntšamo Bëngbe Bëtsá yojtsebošcá, cachcá bënga tmonjama ca.’ <sup>3</sup> Chënga, chë Taitá Bëngbe Bëtsá ndoñe quematábuatma, y átšbioje cach ndoñe. Chíyeca, chca cmochanjáborlaye. <sup>4</sup> Atše chca tšëngaftanga cbontsëtsëtsná, ntšamo tcbonjáuyanama chašmuenójuaboma, chca tempo chaojobuache ora ca” —Jesús tojánayana.

#### Ndayá chë Uámana Espíritu inétsama

Mëntsánaca tojánayana: “Entšanga jábuayenama sënjanbojatsë orscana, chë echanjopása soyëngama ndoñe quecbënjatanëtsëtsná, er atše tšëngaftangaftaca sënjetsemna. <sup>5</sup> Pero morna, chë šojichmó cha yomnoye chantá; y tšëngaftanguentšá ndocná šochanjatjaye, ‘¿ndémoye cojtsá ca?’ <sup>6</sup> Mora, tšëngaftangbe ainana ngmëna entsemna, atše chca tcbonjáuyana causa. <sup>7</sup> Pero ndegombre šcuayana: Atše chanjá y chca tšëngaftangbe tšabiama echántsemna. Atše ndoñe quetsjase, chë Uajabuachaná y añemuayá ndoñe tšëngaftangbioje queochátabo. Pero aíñe chanjá, y chora cha tšëngaftangbioje chanjíchmua. <sup>8</sup> Cha chaojáhshjango ora, echanjama quem luarentša entšanga corente chamotsetátšëmbo ndayá ndegombre yomna bacna soyënga jtsamana, ndayá ndegombre yomna chë Bëngbe Bëtsabe bominiñe tšabia jtsemnana, y ndayá yomna chë Bëngbe Bëtsá entšangbiama jayanana tšabá o ndoñe tšabá tmonjamama. <sup>9</sup> Entšanga átšbeñe ndoñe quematošbuaché. Chíyeca chë Uajabuachaná echanjama chënga corente chamotsetátšëmbo ndayá ndegombre yomna chë bacna soyënga jtsamana. <sup>10</sup> Chë Taitábioje chanjá y atše ndoñe más quešmochátinýe. Chíyeca chë Uajabuachaná echanjama chënga corente chamotsetátšëmbo ndayá ndegombre yomna Bëngbe Bëtsabe bominiñe tšabia jtsemnana. <sup>11</sup> Quem luarentša bacna soyënga mándayabiama Bëngbe Bëtsá ya tonjayana, ntšamo cha tojamama ndoñe tšabá yontsemna ca y nýetsca tescama casti-

ganá chaotsemna ca. Chíyeca chë Uajabuachaná echanjama entšanga corente chamotsetátšëmbo, ndayá ndegombre yomna chë Bëngbe Bëtsá entšangbiamá jayanana tšabá o ndoñe tšabá tmonjamama.

<sup>12</sup> “Atše cabá ba soyënga séntsebomna tšëngaftanga jáuyanama. Masque chcasna, mora tšëngaftanga ndoñe quešmatobena chë soyëngama josértana.

<sup>13</sup> Pero chë Uámana Espíritu, chë nyetsca soyënguñe ntšamo ndegombre yomncá oyeuambnayá, chaojáhjango ora, lempe ntšamo ndegombre yomncá cmochanjabuatambá. Cha ndoñe nye cachabe juáb-naca queochátoyebuambnaye. Ntšamo chë Taitá chábioye tbojayancá, tšëngaftanga cachcá cmochanjáuyana, y cha cmochanjáuyenaye ntšamo yochjopásama. <sup>14</sup> Atšbe soyënguentsána cha echanjójyëngacñe, y cach soyëngama cmochanjabuatambá. Chcase cha cmochanjínñanyie atše bëtsá y obená bëtsemnama. <sup>15</sup> Lempe ntšamo chë Taitá endbomncá, atšbe soyëngnaca endmëna. Chíyeca atše tbonjáuyana, chë Uámana Espíritu atšbe soyënguentsána yochjójyëngacñe y cach soyëngama cmochjabuatambá ca.”

<sup>16</sup> “Baseftayté y atše ndoñe más quešmochátinye. Inye baseftayté y cachiñe šmochantétinye ca” —Jesús tojanéyana.

**“Tšëngaftangbe ngménana, oyejuayana echanjóbema”**

<sup>17</sup> Chora Jesusbe básefta uatsjëndayënga imojtsentjanaye: —¿Ntšamo yojtsentsáyana, chë “baseftayté y atše ndoñe más quešmochátinye, y inye baseftayté y cachiñe atše šmochantétinye, er atše chë Taitábioye chanjá ca”? <sup>18</sup> ¿Ntšamo yojtsentsáyana, chë “baseftayté ca”? Ndoñe quemuátstatšëmbo ntšamo yojtsentsáyana ca —chënga imojtsichamo.

<sup>19</sup> Jesús yojtsetátšëmbo chënga chca jatjayama imojtsebošama, y tojanéyana: —Atše tbonjáuyana: “Baseftayté y atše ya ndoñe más quešmochátinye, y inye baseftayté y cachiñe atše šmochantétinye ca.” ¿Chë soyëngama šmojt-sentjaná ntšamo stsentšáyana?

<sup>20</sup> Ndegombre šcuayana: Tšëngaftanga šmochanjenóbošachna y puerte ngménënga šmochántsemna, pero chë nye quem luarama enójuabnaye entšanga corente oyejuayënga mochántsemna. Masque tša ngménënga šmochántsemna, chentsána tšëngaftangbe ngménana, oyejuayana echanjóbema. <sup>21</sup> Canye shembása tbojontšabuache šešona jónñyama ora, tša ngménaca cha jésemnana, puerte tbojtsetsetše causa. Chë šešona ya tojonñná ora, cha ndoñe ntsenójuabnayana chë tša ibuántsetšama. Canye šešona quem luaroye cháuashjanguama chë shembása tojámayeca, chora cha tšabá y oyejuayá jtsemnana. <sup>22</sup> Ndegombre, tšëngaftangnaca cachcá, chora tša ngménaca šmochántsemna. Pero atše tšëngaftangbiöye chajjésabo ora, atše šmochantétinye y corente oyejuayënga šmochántsmëna. Y ndocná queochatobenaye chë oyejuayana jabuajuánana.

<sup>23</sup> “Chë te chaojóshjango ora, tšëngaftanga ndocá atše quešmochatstjaye. Ndegombre šcuayana, lempe

ntšamo atšbe Taitá šmojtjañcá, y chca šmojama atše jótšëmbonëse, átšbeñe šmošbuachéyeca, cha lempe cmochanjátšataye. <sup>24</sup> Mëntscoñama, atšbe Taitá ton-daye chešmatotjañe atše jótšëmbonëse. Cha motjañënga y šmochanjójyëngacñe, y chca, bëtscá oyejuayana šmochántsebomna ca” —Jesús tojanéyana.

**Jesucristo, quem luarentše mandayábioye yënjayanáy**

<sup>25</sup> Mëntšánaca Jesús tojánayana: “Chë soyëngama lempe cuentëngaca tšëngaftanga tbonjáuyana; pero tempo echanjobuache, chora atše ya ndoñe más cuentëngaca quechochátëtsësnaye; chë cuentna, puerte botamana lempe atšbe Taitabiamá cbochanjáuyana.

<sup>26</sup> Chë tena, atše jótšëmbonëse, átšbeñe šmošbuachéyeca, atšbe Taitábioye šmochanjotjañe. Y atše cbéyana; chca, chë te ndoñe quešochatájaboto tšëngaftangbiamá atšbe Taitá jatsimpadánana. <sup>27</sup> Atše ndoñe quichatsimpadana, er cach Taitá tšëngaftanga cmondábabuanyëshana. Tšëngaftanga atše šmond-bobonshánama, y Bëngbe Bëtsábíocana atše tijabama šmojtsošbuáchema, chë Taitá cmondábabuanyëshana.

<sup>28</sup> Atše chë Taitábíocana sënjabocna y quem luaroye sënjabo. Pero mora quem luare chanjéftsebošjona atšbe Taitábioye jtama ca” —Jesús tojánayana.

<sup>29</sup> Chora chabe uatsjëndayënga tmojanianya: —Mora ya ndoñe cuentëngaca quecatoyebuambná, chíyeca lempe paselo josértama bëngbiamá entsemna. <sup>30</sup> Mora fsëntsetatšëmbo aca nyetsca soyëngama cotatšëmbuama, y ndoñe quenátsiyta ndocná aca chacmátstjanama, er aca chëngbe juabnënga jtsabuatomana, chënga cabá aca ndëtjaye ora. Chíyeca bënga fsëntsošbuaché aca Bëngbe Bëtsábíocana tcojabama ca —chënga tmojanianya.

<sup>31</sup> As Jesús tojanéyana: —¿Mora chiñe šmojtsošbuaché ca? <sup>32</sup> Ya tempo toçjobuache y cam ora entsemna, tšëngaftanga nyetsquénache šmochanjuáshana y atše nye canya šmochanjésebošjona. Pero atše ndoñe nye canya quichátsmëna, chë Taitá átšeftaca entsëmnayeca. <sup>33</sup> Atše lempe quem soyënga cbontsëtsësná, tšëngaftangbe ainaniñe tšabe ebionana chašmotsebomnama, átšeftaca cánñiñe mo canyacá jtsemnëse. Quem luarentše šmochanjasuf-rina; pero añemo šmochtsebomna, atše ya chë quem luarentša mandayá sënjayëñaná ca —Jesús tojánayana.

**Jesús chabe uatsjëndayëngbiamá Bëngbe Bëtsábíöye tbojanimpadá**

**17** Jesús chë soyënga tojánayanentšana, celoye tojanontješé y Bëngbe Bëtsábíöye tbojanianya: “Taita, atšbe te ya toçjobuache. Minñanyé, atše acbe Uaquiñá, corente bëtscá y obená bëtsemnama. As, atše acbe Uaquiñá, aca corente bëtscá y obená comnama chainñanyëma. <sup>2</sup> Mora aca nyets obenana šconjatšetá nyetsca entšangbeñe, nyetscanga chë atšbiamá tcojábacacanga chë nyetsca tescama yomna tšabe vida chamotsebomnama atše chaimama. <sup>3</sup> Chë nyetsca

tescama yomna tšabe vida jtsebomnana endmëna aca, chë nÿe canÿe y ndegombre Bëngbe Bëtsá jtsabu-atmana, y atše Jesucristo, acbe ichmoná.

<sup>4</sup>“Lempe ntšamo šconjamandacá atše sënjapochocá, y chca quem luariñe sënjama aca corente bëtsá y obená comnama jinÿanÿiyama. <sup>5</sup>Taita, quem luare cabá ndoñe quenjatsmëna ora, aca tconjaninÿanÿé atše corente bëtsá y obená ácaftaca bëtsemnama. Mora moma atše cachcá ácaftaca chaitsemnama.

<sup>6</sup>“Aca quem luarentša entšanguentšana quem boyabásenga tconjabacacá y atšbiana šconjinÿinÿyé. Atše chënga sënjanÿanÿé ntšamo ndegombre aca comnama. Chënga acbe entšanga mondmëna; y acna, chë atšbiana chënga šconjinÿinÿiyá. Chënga acbe palabra tmonjouena y tšabá tconjoyeuná. <sup>7</sup>Chíyeca chënga mondéatšëmbo, lempe ntšamo atše tsbomncá ácbëtšana tijóyëngacñama. <sup>8</sup>Atše chënga sënjáuyana ntšamo aca šcojauyancá, y chënga montsošbuaché chë atše sënjauyaniñe. Chíyeca, chënga ndegombre mondéatšëmbo atše acbiocana tijabama, y montsošbuaché aca chë atše šcojichmó cha comnama.

<sup>9</sup>“Atše chëngbiana cbontseimpadana. Chë nÿe quem luarama enójuabnaye entšangbiana ndoñe quecbátsimpadana, pero aíñe chë atšbiana šconjinÿinÿiyëngbiana, er chënga acbe entšanga mondmëna. <sup>10</sup>Lempe ntšamo atše tsbomncá, acbiámna endmëna; y cachcá, lempe ntšamo cobomncá, atšbiámna endmëna. Acbengbe vidëngaca aca tconjinÿanÿé atše corente bëtsá y obená bëtsemnama.

<sup>11</sup>“Atše ndoñe quem luarentše quešocháisetotona, pero chënga aíñe cabá camuentše mochanjéftsemna. Atše chantá ácaftaca jtsatsmënama. Uámana Taitá, chë atšbiana šconjinÿinÿiyënga acbe obenánaca cochsanÿena. Chca ntšamo bëndata mo canÿacá bondmëna, chëngnaca cachcá chamotsemnama. <sup>12</sup>Atše chëngaftaca séntsemnëntscuana, chënga séntsanÿena, aca šconjatšetá obenánaca. Atše chënga sëndánÿena, y ni canÿa queochátsmëna infiernoca pochocaná, nÿe chë infiernoca pochocaná jtsemnama ibomná chana aíñe, ntšamo acbe uabemana palabrenÿe endayancá, cachcá chaotsemnama.

<sup>13</sup>“Morna chë aca condmënoye chantá; pero atše cabá quem luariñe séntsemnëntscuana chca chënga séntsëtsëtsná, chca, chë atše séntsebomna puerte bëtscá oyejuayana chëngnaca chamotsebomnama. <sup>14</sup>Atše chënga sënjáuyana ntšamo aca šconjauyancá. Ntšamo atše ndoñe quetsátsmëna chë nÿe quem luarama enójuabnaye entšanguentšá, cachcá, chënga cach ndoñe quemátsmëna. Chíyeca, chë nÿe quem luarama enójuabnaye entšanga chënga montsëbuayënja. <sup>15</sup>Atše ndoñe quecbátsimpadana, chënga quem luarentšana chacúbuacanama; pero aíñe, nÿetsca bacna soyënguentshana chacuatsebacama. <sup>16</sup>Ntšamo atše ndoñe quetsátsmëna chë nÿe quem luarama enójuabnaye entšanguentšá, cachcá, chënga cach ndoñe quemátsmëna. <sup>17</sup>Cochjama chënga acbe entšanga chamuëtsemnama, y chca, nÿe acbiana vida chamotsebomna. Chca cochjama, ntšamo ndegombre

yomncá chënga imoyenama. Ntšamo aca condbet-sichamcá, ndegombre endmëna. <sup>18</sup>Ntšamo aca quem luaroye šconjanichmocá, cachcá átšnaca chënga séntsachamná, quem luare entšanga jábuayenama. <sup>19</sup>Chëngbiana atše cachiñe mëntšá cbëyana: Atše nÿe acbiana sëndmëna. Y chca, chëngnaca, ntšamo acbiana ndegombre yomncá jtsóyebuambnayëse acbe entšanga chamotsemna, y chca, nÿe acbiana vida chamuëtsebomna, ntšamo ndegombre yomncá chënga imoyenama.

<sup>20</sup>“Pero nÿe chëngbiana ndoñe quecbátsimpadana, sinó chë átšbeñe mochtsošbuáchiyëngbiamnaca, chë atšbiana šconjinÿinÿiyënga, chëngbioye atšbiana ínÿenga chamojtsabuayiná ora; <sup>21</sup>as chënga nÿetscanga cánÿiñe mo canÿacá chamotsemnama. Ntšamo aca, Taita, átšeftaca cánÿiñe mo canÿacá bondmëna y átšnaca ácaftaca, cachcá chëngnaca cánÿiñe mo canÿacá bëndátaftaca chamotsemnama cbontseimpadana. Y chca, quem luarentša nÿetsca entšanga, atše šcojichmoma chamotsošbuáchemo. <sup>22</sup>Ntšamo chë obenana y uámanana šconjatšetacá, cachcá átšnaca chënga sënjatšetá. As, ntšamo bëndata cánÿiñe mo canÿacá bondmëna, chëngnaca cachcá cánÿiñe mo canÿacá chamotsemnama. <sup>23</sup>Atše chëngbe ainaniñe séntsemna, y aca átšeftaca cánÿiñe mo canÿacá bondmëna; as, chëngnaca nÿetsca soyënguñe cánÿiñe mo canÿacá chamotsemnama. Y chca, quem luarentša entšanga chamotsetátšëmbo aca šcojichmoma, y chamotsetátšëmbo ntšamo atše šcondbobonshancá, chëngnaca cachcá condábabuanÿeshanama.

<sup>24</sup>“Taita, atšbiana chënga šconjinÿinÿiye. Atše mëntšá séntseboše: chë atše chántsemnoca, chëngnaca chamotsemna, y chentše, chë šconjatšetá obenana y uámanana chënga chámuinÿe. Quem luare cabá ndoñe quenjatsmëna orscana, šconjانبobonshana; chíyeca, cachora tconjaninÿanÿé atše corente bëtsá y obená bëtsemnama. <sup>25</sup>Taita, nÿetsca soyënguñe tšabá amá, masque chë nÿe quem luarama enójuabnaye entšanga ndoñe quecmatábuatma, atše aíñe cbonduábuatma, y quem boyabásenga montsetátšëmbo, aca comna chë šcojichmó cha. <sup>26</sup>Atše chënga sënjinÿanÿé ntšamo ndegombre aca comnama, y más chanjínÿanÿiye; chca, ntšamo šcondbobonshancá, chëngnaca cachcá chamotsenbobonshánama y atše chëngbe ainaniñe chaitsemnama ca” —Jesús tojánayana.

### Uayayënga Jesús tmojánishache

**18** Chë soyënga Jesús tojëftsanayanentšana, chabe uatsjëndayëngaftaca tojëftsanbocna, chë binche béjaye Cedrón ca uabáiniye chenguana jama. Chentše inamna canÿe tjashetema; y Jesús chabe uatsjëndayëngaftaca choye tojánamengo. <sup>2</sup>Y Judas, chë Jesús uayayëngbe cucuatšifne boshjuaná, tšabá chë luare yojanábuatma, er Jesús y chabe uatsjëndayënga ba soye chentše imojánenefjuana. <sup>3</sup>Chora Judas tojánashjan-go, y cháftaca ba soldadënga y básefta Bëngbe



Bëtsabe bëts yebnoca josticiënga; chënga imojamna chë bachnangbe amëndayënga y fariseungbe ich-mónënga; nyëtscanga uajuinÿanëshangaca, lam-parëshangaca y espadëjangaca uajátënga.

<sup>4</sup> Jesusna yojtsetátšëmbo lempe ntšamo cha yochjan-pásama; chíyeca, natsanoye tojánbocna y chë entsànga tojanéyana: —¿Nda šmojtsenguá ca?

<sup>5</sup> Y chënga tmojanjuá: —Jesús, chë Nazaretocá fsëtsenguá ca.

As Jesús tojanéjua: —Atše cha sëndmëna ca.

Y Judas, chë boshjuaná, chánaca chë entsàngaftaca yojtsemna. <sup>6</sup> Jesús tojanéyana: “Atše cha sëndmëna ca”, y cachora chë entsànga tmojtantostëtšánanga y fshantsoye tmojánshajaye.

<sup>7</sup> Chora Jesús cachiñe tojanatjá: —¿Nda šmojtsenguá ca?

Y chënga tmojanjuá: —Jesús, chë Nazaretocá ca.

<sup>8</sup> As Jesús tojanéyana: —Ya tcbonjáuyana: “Atše cha sëndmëna ca.” Atše šmojtsenguasna, mënga cachá š-mochjónÿaye chamotsóñengama ca.

<sup>9</sup> Chca tojanopasá, ana ntšamo Jesús tojanayancá cachá chaotsemnama, chë “Atšbe Taitá Bëngbe Bëtsá, chë šconjínÿinÿiye entsanguentsana ni canÿa pochocaná queochátsmëna ca”.

<sup>10</sup> Simón Pedro canÿe espadëja inasëngbuájonÿana; asna, tojanenosëngbotëtšena y chë bachnangbe más uámana amëndayabe canÿe oservenábioye catšbioica matscuaše tbojtsanéstjango. Chë oservená Malco ca inauabaina. <sup>11</sup> As Jesús, Pédrëbioye tbojanianana: “Acbe espadëja matosëngbuajonÿá. Ntšamo atšbe Taitá Bëngbe Bëtsá tojanmandacá, chë atše puerte ngmë-nana jtsebomnama, ¿ndoñe chca chaondëtsemna ca?”

### Jesús, Anasbe yebnoca

<sup>12</sup> Chentšana chë soldadënga, chëngbe amëndayá y Bëngbe Bëtsabe bëts yebnoca josticiënga Jesús tmo-jánishache y tmojanëcuébatšëca. <sup>13</sup> Natsanëna, Anás, Caifasbe uambén taitábioye Jesús tmojanánatse. Caifás chë uata inamna chë bachnangbe más uámana amëndayá. <sup>14</sup> Caifás yojamna nda judiënga tojanéyana: “Tšëngaftangbiama más tšabá entsemna canÿe boy-abása Israeloca entsangbiama chaóbana ca.”

### Pedro tojánayana Jesúsbioye ndoñe bonjanabuátma ca

<sup>15</sup> Simón Pedro y inÿe uatsjendayá Anasbe yebnoye Jesús imojtsëstona. Chë inÿe uatsjendayábioyna, chë bachnangbe más uámana amëndayá ibnauábuatma; chíyeca, cha tojanobená Jesúseftaca chabe chashjóntscoñe jashjanguana. <sup>16</sup> Pero Pédrëna nÿe shjoca, amashjuanentše tojanoquedá. Chcasna, chë inÿe uatsjendayá tojánbocna y chë bëšáša ebtajuaana shembásaftaca tojanoyebuambá. Chora Pedro tbo-janémarshëngo. <sup>17</sup> As chë shembása Pédrëbioye tbo-janiana: —¿Acnaca ndoñe chë boyabásabe uatsjen-dayá condmëna ca?

Y Pedro tbojanjuá: —Ndoñe; atše cha ndoñe quetsa-tabuatma ca.

<sup>18</sup> Tša yojtsesësna causna, chë oservënënga y chë josticiënga shjoca tmojanniñe y chentše imo-jtóšboniye. Y Pédrënaca chëngaftaca yojtsešbonena.

### Ntšamo chë bachnangbe más uámana pasado amëndayá, Jesúsbioye tbojantjá

<sup>19</sup> Chora, chë bachnangbe más uámana pasado amëndayá tojanontšë Jesús jatjayama chabe uatsjën-dayëngbiama y ndayá cha entsànga yojánabuata-mbamnaca. <sup>20</sup> Y Jesús tbojanjuá: —Atše nyëtsca entsangbe delante sënjoyebuambá. Sempre chë entsangbe enefjuana yebnënguenache sëndabuata-mbá, y Bëngbe Bëtsabe bëts yebnócnaca, nyëtsca judiënga mondbétsenefjuanentše; y chca, iytëmencá tondaye chiyatoyebuambá. <sup>21</sup> ¿Ndáyeca chca šcojtsë-janá? Atšbe palabra tmojouenënga májtjaye, as chënga chacmëyana ntšamo atše tijáuyanama. Chënga mondetátšëmbo ntšamo atše tijayancá ca —Jesús tbo-janjuá.

<sup>22</sup> Jesús chë soyënga tojánayana ora, canÿe josticio chentše yojtsemná, Jesúsbioye tbojanjuebjantšetá y tbojaniana: —¿Chca chë bachnangbe más uámana amëndayá cuanjojuá ca?

<sup>23</sup> Y Jesús tbojanjuá: —Ndoñe tšabá tijayanësna, šmëyana ndayentše chë podesca palabra yojtsemna; y tšabá tijóyebuambasna, ¿ndáyeca šcojajuebjantšetá ca?

<sup>24</sup> Chentšana, Anás tojanmandá, chë bachnangbe más uámana amëndayá Caifasbe yebnoye, Jesús bat-sëcná chamuánatsama.

### Pedro cachiñe tojánayana Jesúsbioye ndoñe bonjanabuátma ca

<sup>25</sup> Chëntscuana, Pedro yojtsešbonena, tsanana chë inÿe juachaca. Chora chë entsànga tmojantjá: —¿Aca ndoñe chabe uatsjendayënguentšá condmëna ca?

Y Pedro ndoñe ca tojánayana: —Atše ndoñe quet-sátsmëna ca —cha tojánayana.

<sup>26</sup> Chora, chë bachnangbe más uámana amëndayabe canÿe oservená Pédrëbioye tbojaniana: —¿Atše ndoñe cháftaca chë tjashetémoca tcbonjinÿe ca?

Chë oservená inamna chë Pedro tbojtsanmatstët-šabe pamillo.

<sup>27</sup> Y Pédrëna cachiñe ndoñe ca tojánayana, y cachora canÿe ngallo yojacánta.

### Jesús Pilatbe delante

<sup>28</sup> Chentšana, Caifasbe yebnentšana Jesús tmojaná-natse chë romano mandadbe yebnoye. Ya yojtse-binÿana, y chë bëts yebnoye chë judiënga ndoñe tmonjánamashjna, er chënga imojtseboše chë Bashco saná jasama. Judiënga ndoñe imonjobena Bashco saná jasana, chca tempo canÿe ndoñe judiëbe yeb-noye nda tojámashënguse. <sup>29</sup> Chíyeca Pilato tojánboc-

na y chënga tojanéyana: —¿Ndayá quem boyabásabe contra šmochjayana ca?

<sup>30</sup> Chora chë entsanga tmojanjuá: —Bacá uamaná ndoñe tontsemnëse, ndoñe matifjuánatse ca.

<sup>31</sup> As Pilato tojanéyana: —Tšëngaftanga matánatse, y ntšamo cach tšëngaftangbe leyiñe iuayancá muabiamma šmochjayana tšabá o ndoñe tšabá tonjamama ca.

Y chë judiënga tmojanjuá: —Bënga derecho queft-sátsbomna ndocná jóbama ca.

<sup>32</sup> Chca tojanopasá, ana ntšamo Jesús cachá jóbana tojanayancá cachcá chaotsemnama. <sup>33</sup> As Pilato cach yebnoye tojtanamáshëngo, Jesús tbojanchembo y tbojantjá: —¿Aca chë judiëngbe Rey cojtsemna ca?

<sup>34</sup> Y Jesús tbojanjuá: —¿Ntšamo šconjatjacá, cach aca chca cojtsejuabnáyeca chca yojtsemna o ínÿenga atšbiama tcmojacuentáyeca ca?

<sup>35</sup> Chora Pilato tbojanijana: —¿Mo atše judío quetsmëna? Cach ácbioca entsanga y chë bachnangbe amëndayënga muentše tcmojúshjango. ¿Ndayá tcojama ca?

<sup>36</sup> Chora Jesús tbojanjuá: —Atšbe jamándama luare ndoñe quem luarentše quenátsmëna. Aíñe tojtsemnësna, atšbe ústonënga muantsatsejaye atše chë judiëngbe cucuatšifne ndoñe chašmondoboshjonama. Pero atšbe jamándama luare ndoñe quem luarentše quenátsmëna ca —Jesús tbojanjuá.

<sup>37</sup> As Pilato tbojanijana: —¿As aca rey cojtsemna ca?

Y Jesús tbojanjuá: —Tšabá tcjajana; atše rey sëndmëna. Chama atše tijonÿná y quem luaroye tijabo; y atše sënjabo ndegombre soyëngama jabóyebuambayama. Y chca soyënga jtsamëse tmoyenënga, atše jtseyeunanana ca.

<sup>38</sup> Chora Pilato tbojanijana: —¿Y ndayase chë ndegombre soye yomna ca?

### Jesusbiamma tmojánayana chaóbana ca

Chca tbojantjá chentšana, Pilato cachiñe tojánbocna judiëngaftaca jóyebuambayama, y tojanéyana: —Atše ni mo canÿe soye chiyátinÿena, quem boyabása castigáná chaotsemna ca jayanama. <sup>39</sup> Pero tšëngaftanga šmondétatšëmbo, Bashco fiestama atše canÿe utamená cachcá jëtsboshjonama. ¿Šmojtseboše chë judiëngbe Rey chjëtsboshjona ca?

<sup>40</sup> Chorna nÿetsca entsanga cachiñe tmojanáyebuachena: —¿Ndoñe, cha ndoñe! ¡Barrabás matsboshjona ca!

Barrabasna canÿe bacá uamana entsá inamna.

**19** Chora Pilato, Jesús tbojanánatse y tojanmandá chamotsetjanjama. <sup>2</sup> Y canÿe coronésha uchmašéfjangaca chë soldadënga tmojanapormá y Jesús tmojanabestšajó; y canÿe shbuenda uafjatsenga entsáyá mo reycá tmojanichëtjo. <sup>3</sup> Chorna chënga imojsóbobecocnaye y jtsafchayama imojsatsétsnaye: “¡Bayté judiëngbe Rey cochtsemna ca!” Y imojtsejuebantšetaye.

<sup>4</sup> Pilato cachiñe tojánbocna y entsanga tojanéyana: —Šmochjouena; cha chanjuábocna, chë boyabása castigáná chaotsemna ca jayanama atše ni mo canÿe

soye ndoñe sënjinÿenama chašmotsetatšëmbuama ca.

<sup>5</sup> As Jesús tojánbocna chë uchmašéfjangaca coronésha uabestšajoná y chë shbuenda uafjatsenga entsáyá mo reycá uichëtjoná. Y Pilato tojanéyana: —¿Muentše chë boyabása entsemna ca!

<sup>6</sup> Chë bachnangbe amëndayënga y chëngbe josticiënga cha tmojáninÿe ora, tmojanontšé uayebuáchana: —¿Motsecrucificá! ¡Motsecrucificá ca!

Chora Pilato tojanéyana: —Cach tšëngaftanga mánatse y šmochjacrucificá; atše ni mo canÿe soye chiyátinÿena quem boyabása castigáná chaotsemna ca jayanama ca.

<sup>7</sup> Chora chë judiënga tmojanjuá: —Bënga canÿe ley fsëndbomna, ntšamo chiñe endayancana, quem boyabása jóbana bontsemna, Bëngbe Bëtsabe Uaquiñá entsenobiamná causa ca.

<sup>8</sup> Pilato chca tojanuena ora, más yojtsauatja.

<sup>9</sup> Cachiñe chabe yebnoye tojtanamáshëngo y Jesús tbojantjá: —¿Ndëmocá aca cmëna ca?

Pero Jesús ndocá tbojanjuá. <sup>10</sup> Chora Pilato tbojanijana: —¿Ndoñe šcochanjojuá ca? ¿Ndoñe condétatšëmbo, aca jacrucificama o jëtsboshjonama atše tsobenama ca?

<sup>11</sup> As Jesús tbojanjuá: —Acbe obenana Bëngbe Bëtsá ndoñe macmënjánatšetase, tondaye cattsobena átšeftaca jamama; chíyeca, acbe cucuatšifne šonjaboshjoná, acbiamma más bëts bacna soye tonjama ca.

<sup>12</sup> Cach orscana Pilato yojtsenguaye ntšamo jamana, jobenayama Jesús jëtsboshjonama; pero chë judiënga imotsáyebuache: —¿Chacojëtsboshjonësna, Césarbe amigo ndoñe condmëna! ¡Nda rey tojtse nobiamná chana, Césarbe uayayá jtsemnana ca!

<sup>13</sup> Pilato chë soyënga tojanuena ora, chashjoye Jesús tbojanábocna. Pilato tojanótbema chabe puententše tribunaloca. Chë tribunaloca chashjañna hebreo biyañe Gabata ca inauabaina, y endayana “ndëtšbëngaca pormániñe ca”. <sup>14</sup> Bashco fiestama canÿe te yojtsájama, y mo nÿetsto ora yojtsemna. Chora Pilato chë judiënga tojanéyana: —¿Muentše tšëngaftangbe rey entsemna ca!

<sup>15</sup> Pero chënga tmojanáyebuachena: —¿Chaóbana! ¡Chaóbana! ¡Motsecrucificá ca!

As Pilato tojanatjá: —¿Tšëngaftangbe rey atše chjacrucificá ca?

Y chë bachnangbe amëndayënga tmojanjuá: —Bëngbe rey nÿe César endmëna, ndocná más ca.

<sup>16</sup> Chentšana Pilato, chëngbe cucuatšifne Jesús tbojánboshjona chamocrucificama y chë judiënga cha tmojanánatse.

### Jesús tmojanrucificá

<sup>17</sup> Jesús tojánbocna chabe cruz tantšajónana y tmojanánatse canÿe luaroye, “Obanabe Bestšashe ca” uabáinoye (hebreo biyañe Gólgota ca inauabaina).

<sup>18</sup> Chentše cha tmojanrucificá y inÿe útatnaca cátoica tmojanrucificá; Jesusna tsëntsaca. <sup>19</sup> Pilato tojanmandá canÿe uabemana soye chë cruciñe chamuanjuama. Chiñe yojetsábemana: *JESÚS NAZARETOCÁ*,

*JUDIËNGBE REY*ca. <sup>20</sup> Y ba judiënga chë uabemana soye tmojanalía, er chë Jesús tmojanrucificá luare Jerusalenó béconana inamna, hebreo, latín y griego biyañe yojetsábemana. <sup>21</sup> Chca juabemama tojanmandáyeca, chë bachnangbe amëndayënga Pilato tmojanianya: —Ndoñe matabiamnana “Judiëngbe Rey” sinó ntšamo cachá tojayancá, “Judiëngbe Rey atše sëndmëna ca”.

<sup>22</sup> Pero Pilato tojanéjua: —Ntšamo tijuábema cachcá chaotsábemana ca.

<sup>23</sup> Chë soldadënga Jesús tmojanrucificá chentšana, chabe entšayangá tmojanájaca y cántañe tmojanajatá, nyetsca canta soldadëngbiama. Chabe cmešëjúua tmojanaca; chëjuana yojanamna nduajonanéjúua, nyetšëjúua uabianánëjúua. <sup>24</sup> As chë soldadënga tmojanenianya: “Ndoñe matjuátanëca; más tšabana tsbanánoye mochjútšëna, ndabiama yochjuáquedama chaotsotatšëmbuama ca.”

Chca tojanopasá ana ntšamo Bëngbe Bëtsabe uabemana palabrenguiñe endayancá cachcá chaotsemnama, chë “Atšbe entšayangá tmojatenájataye; atšbe cmešëjuamna tsbanánoye tmojanétšëna, ndabiama jauquédama jtsotatšëmbuama ca.” Y lempe chca chë soldadënga tmojanma.

<sup>25</sup> Jesusbe cruz juachaca imojtsemna chabe mamá; chë mamabe quenata María, Cleofasbe shema; y María Magdalena. <sup>26</sup> Jesús chabe mamábioye tbojáninÿe, y chabe juachacna chë Jesusbe bonshana uatsjendayá yojtsemna. Chora chabe mamá tbojanianya: “Mama, chentše acbe uaquiñá entsemna ca.”

<sup>27</sup> Y chë bonshana uatsjendayá tbojanianya: “Chentše acbe mamá entsemna ca.”

Cach orscana, chë uatsjendayá chabe yebnentše Jesusbe mamábioye tbojanofja.

### Jesús tojanóbana

<sup>28</sup> Jesús yojtsetátšëmbo ya lempe tojanchnënguama, chíyeca chentšana y ntšamo Bëngbe Bëtsabe uabemana palabrenguiñe endayancá cachcá chaotsemnama, tojánayana: “Sontsajuendá ca.”

<sup>29</sup> Chentše inamna canÿe matbaja buajútjena untja vínoyeca. As, chë soldadënga canÿe esponjëshe chë vínoyeca tmojanfchecuacuá, canÿe hisopo niñëfjiñe tmojananguësëtjo y játsbanase, Jesusbe uayásoye tmojanbeconá. <sup>30</sup> Chë untja vínoye Jesús tojanofšë ora, tojánayana: “Ya lempe tojochnëngo ca.”

Tojanotsejbé y tojanóbana.

### Canÿe soldado chabe lanzésaca costillaca Jesúsbioye tbojanashacuá

<sup>31</sup> Bashco fiestama canÿe te yojtšámama, y chë judiënga ndoñe imontseboše chë crucificánënga cachentše chë ochnáyte chamotsemnama, chë te puerte uámana te bëtsemnayeca. As Pilato tmojanimpadá chë crucificánënga shecuatšënga jetsatcacayama y chë cuerpënga chentšana jtsejuánama chaomandama. <sup>32</sup> As chë soldadënga tmojánana y shecuatšënga

imojtsatcacaye, natsana canÿa y chentšana chë inÿa, Jesúsëftaca yojtsecrucificaná. <sup>33</sup> Pero Jesúsbioye tmojanobeconá ora, ya obaná tmojáninÿe; chíyeca chabe shecuatšënga ndoñe tmojanatcacá. <sup>34</sup> Masque chca, canÿe soldado Jesúsbioye costillaca canÿe lanzésaca tbojanashacuá. Y cachora buiñe y búyeshe chentšana tonjanóbocna. <sup>35</sup> Chë mëntšá cuentayá chentše enjamna y tonjáninÿe, y ndegombre entsichamo; cha endëtatšëmbo ndegombre yojtšichámuama, chca, tšëngaftángnaca chiñe chašmotsošbuáchemá. <sup>36</sup> Chë soyënga chca tojanopasá, ntšamo Bëngbe Bëtsabe uabemana palabrenguiñe endayancá cachcá chaotsemnama. Chiñe endayana: “Ni mo canÿe betaše cha quemochatsëntšátca ca.” <sup>37</sup> Y ínÿoca, Bëngbe Bëtsabe uabemana palabrenguiñe endayana: “Chë tmojenachentšá bominÿe mochanjabuájua ca.”

### Jesús tmojanatbontsá

<sup>38</sup> Chë soyënga tojanopasá chentšana, José Arimateocá, Pilátbioye tbojanimpadá Jesusbe cuerpo jesocñama chabolesenciamá. José inamna Jesusbe canÿe ustoná, masque nÿe iytëcana, chë judiëngbiama auatja causa. Pilato aíñe tbojanlesenciá; as José tojánana y Jesusbe cuerpo yojtšámamañe. <sup>39</sup> Nicodemo, chë ibeta Jesúsbioye tbojanbuachá, chánaca tojánashjango y tojanëyamba unga bnëtsana kilo mirra y áloe enájuañana. <sup>40</sup> As José y Nicodemo Jesusbe cuerpo tbojanca y tmojanandmaná chë botamana uanguëtšë soyëngaca unëtjona entšëjuangaca. Judiënga chca imnauamana, obaná juatbontsama ora. <sup>41</sup> Jesús tmojanrucificá luar-entše canÿe base jajañe inamna, y chiñe canÿe tsëm cuevëshe, entšangbe pormánëshe, obanëngbiama; chëshiñe cabá ndocna obaná mondëjajo. <sup>42</sup> Asna, nÿe chentše Jesusbe cuerpo tmojansegorá, chë Bashco fiestama canÿe te yojtšámama causa, y chë cuevëshe chë béconana inámnyeca.

### Jesús tojtanayena

<sup>20</sup> Chë inÿe semana bojatšenté, cabá cachëse, cabá ndëbinÿna ora, María Magdalena chë cuevëshoye tojánana y tojáninÿe ínÿoca yojtsemna chë cuevëshoye amashjuanentša ndëtšbé. <sup>2</sup> Asna, tojëftsanótjajo y tojánana chë Simón Pedro y chë inÿe uatsjendayá, ndábioye Jesús tša ibnabobonshana ibojtsemnoye. Chora tojánëyana: “Bëngbe Utabnabe cuerpo chë cuevëshentšana tmojtsámamañe y ndayentše tmotsejájoma ndoñe queftsátstatšëmbo ca.”

<sup>3</sup> Chora Pedro y chë inÿe uatsjendayá chentšana tojëftsanbocna y chë cuevëshoye tbojánana. <sup>4</sup> Nyets úta-ibojtsëchamana, pero chë inÿe uatsjendayá Pédrëbiama más betscó tojanótjajo y natsana chë cuevëshoye tojánashjango. <sup>5</sup> Tojanotsejbé y chë chentše tmojanacjá entšëjuangá tojáninÿe, pero choye ndoñe tonjánamashëngo. <sup>6</sup> Chentšana, Simón Pedro chabe ústonoye tojánashjango y chë cuevëshoye tojánamashëngo, y tojáninÿe chë chentše tmojanacjá entšëjuangá. <sup>7</sup> Y chë Jesús juabestšëntsacjuama to-

janaservé entšéjuana ndoñe chë inýajuangaca yontsamna, sinó inýoca botamana uandmanánëjua. <sup>8</sup> Chora chë inýe uatsjendayá, chë cuevēshoye natsana tojanashjanguá, choye tojánamashëngo. Tojáninýe y Jesús tojtanayenama yojtanošbuaché. <sup>9</sup> Chëntscoñe chë útata cabá ndoñe yontsósertana ntšamo Bëngbe Bëtsabe uabemana palabrenguiñe endayancá, chë Jesús obanënguentšana jtayenama ibojamnama. <sup>10</sup> Chentšana chë uatsjéndayata chatbe oyenoye tbojtaná.

### Jesús, María Magdalénbiyoye tbojánebëbocna

<sup>11</sup> Pero María chentše tojanoquedá, chë cuevēshe juachaca šachénaca; yojtsošachentscuana tojanotsejbé cuevēshoye jarrepárama. <sup>12</sup> Y tojáninýe uta angelotémata uafjantséjua uichétjonata, Jesusbe cuerpo yojëftsejajóntše ibojtsetbemana. Canya tsëntšénëshoica y chë inýana matsësoica. <sup>13</sup> Chora chata tmojanianyana: —Shembása, ¿ndayama cošaché ca?

As cha tojanjuá: —Atšbe Utabná tmojtsámabañe, y ndayentše tmojtsejájoma ndoñe quetsátstatšëmbo ca.

<sup>14</sup> Chca tojánayana ora, tojanostëtšantješé y tojáninýe chentše Jesús yojtsemna, pero María ndoñe yontsetátšëmbo cha Jesús bëtsemnama. <sup>15</sup> Chora Jesús tbojanianyana: —Shembása ¿ndayama cošaché? ¿Nda congua ca?

María yojtsejuabnaye chë boyabásana yojtsemna chentša base jajañe uaishanyá ca; chíyeca tbojantjá: —Bacó, aca tcojuambësna, šmëyana ndayentše cojtsejajó, as atše cha jesocñama ca.

<sup>16</sup> As Jesús tbojanianyana: —¡María ca!

Chora María chábíoye tojanontješé y tbojanianyana: —¡Rabuni ca! (hebreo biyañe chca endayana “Buatëmbayá ca”.)

<sup>17</sup> Chora Jesús tbojanianyana: —Ndoñe šcatábojajo, er atše cabá ndoñe atšbe Taitábíoye quetstëtstsjua. Pero motsa atšbe catsátangbiyoye y cochjáuyana, atše stset-sjuá atše y tsëngaftangbe Bëtsábíoye, atše y tsëngaftangbe Taitábíoye ca.

<sup>18</sup> As María Magdalena tojána y Jesusbe uatsjéndayënga tojanéyana cha chë Utabnábiyoye tbojáninýe ca y cha chë palabrenga tojánayana ca.

### Jesús chabe uatsjéndayënga tojánebëbuacna

<sup>19</sup> Tojanibétata ora, cach semana bojatsënté, chë uatsjéndayënga tmojánenefjna canye luarentše, pero lempe tmojtanatame, chë judiëngbiama auatja causa. Chora Jesús tojánamashëngo, chëngbe tsëntsaca tojantsá y mëntšá tojanacheuá: “Chë atšbe ainaniñe tšabe ebionana tsëngaftangftaca chaotsema ca.”

<sup>20</sup> Y chca tojanéyana ora, chabe cucuatšënga y costillaca tojaninýanýé. Chora chë uatsjéndayënga oyejuayënga imojtsemna, chëngbe Utabná tmojáninýama. <sup>21</sup> As Jesús cachiñe tojanéyana: “Chë atšbe ainaniñe tšabe ebionana tsëngaftangftaca chaotsem-

na. Ntšamo atšbe Taitá Bëngbe Bëtsá šojichmocá, átš-naca cachcá tsëngaftanga cbontšachamná ca.”

<sup>22</sup> Chca tojánayana ora, chëngbiyoye tojangouo y tojanéyana: “Chë Uámana Espiritu šmochjójyëngacñe.

<sup>23</sup> Ndëmuanýenga chëngbe bacna soyëngama chašmojáperdonanga, perdonánënga mochántsmëna; y ndoñe chašmonjáperdonasna, ndëperdonánënga mochántsemna ca.”

### Tomás, Bëngbe Utabnábiyoye ainá tbojáninýe

<sup>24</sup> Pero Tomás, chë Gemelo ca uabobainá, canya chë bnëtsana uta uatsjéndayënguentšá, chë uatsjéndayëngaftaca ndoñe yontsemna, Jesús tojánashjango ora.

<sup>25</sup> Chíyeca, “bënga chë Utabná fsënjinye ca”, chë inýe uatsjéndayënga tmojanianyana ora, Tomás tojanéjua: “Atše chabe cucuatšine chë uajabonjana uinýniñe ndoñe sënjinýe, y chiñe atšbe ntšabuafja ndoñe sënja-jué y atšbe cucuatše chabe costillaca ndoñe, ndoñe quichátošbuachiye ca.”

<sup>26</sup> Canye semana tojanochnëngo ora, chë uatsjéndayënga cachiñe canye luarentše tmojánenefjna. Y Tomásna chëngaftaca yojtsemna. Masque chentše atámeniñe yojtsemna, Jesús tojánamashëngo, chëngbe tsëntsaca tojantsá y tojanéyana: —Atšbe ainaniñe tšabe ebionana tsëngaftangftaca chaotsema ca.

<sup>27</sup> Chora Tomásbiyoye tbojanianyana: —Acbe ntšabuafja muentše mojué y atšbe cucuatše minýe; acbe cucuatše miyëbo y atšbe costillaca mojué. Y ndošbuachiyá ndoñe matsmënana, sinó atše tijtayanama cochtsošbuachiye ca.

<sup>28</sup> As Tomás tbojanianyana: —¡Atšbe Utabná y atšbe Bëtsá ca!

<sup>29</sup> Chora Jesús tbojanianyana: —Tomás, nýe šconjinyeyeca cojtsošbuaché. ¡Bëngbe Bëtsá chaoma puerte oyejuayënga chamotsemna chë nýe ntjinýcá tmojošbuachenga ca!

### Ndayama quem librëša tmojanábema

<sup>30</sup> Jesús, chabe uatsjéndayëngbe delante inýe bëtsoyënga Bëngbe Bëtsabe obenánaca tonjëftsema, pero quem librëšañe ndoñe quenatábemana. <sup>31</sup> Y quem librëšañe soyëngna, entsábemana tsëngaftanga chašmotsošbuáchemna, Jesús, chë Cristo y Bëngbe Bëtsabe Uaquiñá bëtsemnama; y chcase, chábeñe chašmojtsošbuachese, chábeyeca chë nýetsca tesca-ma yomna tšabe vida chašmotsebmomna.

Jesús, canýsëfta chabe uatsjéndayënga tojánebëbuacna

**21** Chca tojanopasá chentšana, Jesús inýe soye chabe uatsjéndayënga tojánebëbuacna, Tiberias mar bėjaye tsachañe. Chora mëntšá tojanopasá: <sup>2</sup> Cánýentše imojtsemna Simón Pedro; Tomás, chë Gemelo ca uabobainá; Natanael, chë Galilea luarocá, Caná pueblócá; Zebedeobe uaqiñata y Jesusbe inýe

uta uatsjéndayata. <sup>3</sup> Simón Pedro chënga tojanéyana: —Sëntsá beonga jashebuáyama ca.

As chënga tmojanjuá: —Bëngnaca ácaftaca fchanjá ca.

As tmojána y canÿe barquëshoye tmojánamashjna; pero chë ibeta tondaye tmonjáninÿena. <sup>4</sup> Ya yojtsebínÿana orna, Jesús chë tsachoca yojtsemna, pero chë uatsjéndayënga ndoñe imontsetátšëmbo cha Jesús yojamnama. <sup>5</sup> Chora Jesús tojanatjá: —Básenga, ¿tondaye šmonjashbuá ca?

Y chënga tmojanjuá: —Tondaye ca.

<sup>6</sup> As Jesús tojanéyana: —Barquëshaca catšbioica chë atarraíëshaca métsëna y beonga šmochanjáshebuaye ca.

As chënga chca tmojanma, y chora chësha jtabocnama ndoñe imontsobena, nÿetšá beonga tmojánishëche causa. <sup>7</sup> As chë Jesusbe bonshana uatsjéndayá, Pédrëbioye tbojaniana: “¡Bëngbe Utabná entsemna ca!”

Simón Pedro chca soye tojanuena y cachora entsáyá tojaníchëtjo, er nduichëtjoná yojtsemna, y chë béjayoye tojanoshbuetše. <sup>8</sup> Chë inÿe uatsjéndayëngna chë barquëshañe tmojána, y chë atarraíëshaca jútjena beóngaca imojtsásjaye, er chë tsachocama bécoñe imojtsemna, nÿe canÿe patse metroca. <sup>9</sup> Fshantsoye tmojánastajjna ora, chënga tmojáninÿena canÿe chebániñe pormániñe, y chentsna canÿe beona y tandëšnaca yojtsegorana. <sup>10</sup> Chora Jesús tojanéyana: “Chë šmonjáshebuaye beonguentšana báseftanga miyëbo ca.”

<sup>11</sup> Simón Pedro chë barquëshoye tojánamashëngo, y chë atarraíëshaca jútjena bëts beóngaca, uasjojónana tsachóntscoñe tojanëyamba. Mo canÿe patse y shachna bnëtsana y unga beóngaca; pero masque nÿetšá beonga, chë atarraíëshaca ndoñe ntjuatanëcanana. <sup>12</sup> Chora Jesús tojanéyana: “Mabënga, šmochjase ca.”

Chë uatsjéndayënguentšana ni canÿa yontsenñëmua cha jatjayama nda cha yojamnama, er nÿetscanga imojtsetátšëmbo cha chë Utabná bëtsemnama. <sup>13</sup> Chora Jesús tojanobeconá, chë tandëše tojanca y chënga tojanatšatá, y chë beónacnaca cachcá tojanma.

<sup>14</sup> Chóracna, Jesús ya unga soyama chabe uatsjéndayënga yojtsanebëbuacana, obanënguentšana tojtanyenentšana.

### Jesús, Simón Pédroftaca tojanoyebuambá

<sup>15</sup> Jasama tmojanpochocá ora, Jesús, Simón Pédrëbioye tbojantjá: —Simón, Juanbe uaquiñá, ¿quemëngbiama más quešcbobonshana ca?

Y Pedro tbojanjuá: —Atšbe Utabná, aíñe. Aca condétatšëmbo atše aíñe cbondbobonshánama ca.

As Jesús tbojaniana: —Atšbe entsanga, mo oveshëngcá imomnënga, cochtsanÿena ca.

<sup>16</sup> Chora cachiñe tbojantjá: —Simón, Juanbe uaquiñá, ¿quešcbobonshana ca?

Y Pedro tbojanjuá: —Atšbe Utabná, aíñe. Aca condétatšëmbo atše aíñe cbondbobonshánama ca.

As Jesús tbojaniana: —Atšbe entsanga, mo oveshëngcá imomnënga, cochtsanÿena ca.

<sup>17</sup> Y unga soyama tbojtëtantjá: —Simón, Juanbe uaquiñá, ¿quešcbobonshana ca?

Pedro puerte tbojanongmé, ya unga soyama “quešcbobonshana ca” tbojantjá causa; y tbojanjuá: —Atšbe Utabná, aca lempe condétatšëmbo. Aca condétatšëmbo atše aíñe cbondbobonshánama ca.

As Jesús tbojaniana: —Atšbe entsanga, mo oveshëngcá imomnënga, cochtsanÿena. <sup>18</sup> Ndegombre cbëyana: Más bobontse conjamna ora, conjanamana cach aca jtichëtjuana y ndëmoye jama cojtseboše choye jtsoñana; pero tanguá chacojtsemna orna, buacuatšënga cochanjatsbaná, y inÿa cmochantichëtjo y ndëmoye jama ndoñe chacontseboše choye cmochanjuánatse ca —Jesús tbojaniana.

<sup>19</sup> Chca tojánayana, ana jtsotatšëmbuama ntšamo Pedro jóbana ibojamnama, y chë chca jóbaneše, Bëngbe Bëtsá corente bëtsá y obená bëtsemnama Pedro yochjáninÿanÿiyama. Y chca tojánayanentšana, Pédrëbioye tbojaniana: —Šmasto ca.

### Jesusbe bonshana uatsjendayá

<sup>20</sup> Pedro tojesanenostëtšantješë y tojáninÿe, Jesusbe bonshana uatsjendayá ústonoye yojtsaye. Cha enjamna chë monjansá ora, Jesús cabá ndóbana ora, chë Jesúsbioye más tonjanosjoná y tbojantjá: “Bëngbe Utabná, ¿nda chë boshjuaná yochtsemna ca?” <sup>21</sup> Pedro chábioye tbojáninÿe ora, Jesúsbioye tbojantjá: —Atšbe Utabná, y cháftaca, ¿ntšamo yochjopása ca?

<sup>22</sup> Chora Jesús tbojanjuá: —Atše quem luaroye jesabámëntscuana cha ainá chausomñama atše stsebošëse, ¿aca ndayá chama cmajtátsëntšamna? Acna nÿe šmasto ca.

<sup>23</sup> Chiyeca, chentsana, Jesucristbeñe ošbuáchiyëngbenache nÿetscanga imojánichamo, chë uatsjendayá ndoñe yochanjanóbana ca. Pero Jesusna ndoñe chca tonjánayana, sinó “atše quem luaroye jesabámëntscuana cha ainá chausomñama atše stsebošëse, ¿aca ndayá chama cmajtátsëntšamna? ca”.

<sup>24</sup> Mua endmëna chë uatsjendayá; cha entsichamo quem soyënga ndegombre yojamnama, y camuá quem librëšañe lempe tonjuábema. Y bënga mondétatšëmbo cha ndegombre soye endóyebuambnama.

<sup>25</sup> Jesús inÿe ba soyënga tonjëftsema; tša bëtscá soyënga endmëna, nderado lempe cada canÿe soye tcojuábema y librëšangá tcojuapormá, atše sëntsejuabná, nÿetsca chëšangá quem luarentše ndoñe nanjuába.

# Hechos

Jesús tojanašebuachená chë Uámana Espiritu jíchmua-  
ma

**1** Teófilo, atšbe natsana librésaŋe tconjuábobema lempe ntšamo Jesús tojanmama y tojánabuatom-bama, chca tojanbojatsé orscana, <sup>2</sup> y Bëngbe Bëtsá celoye tbojtansbanantscuana. Cabá celoye ndëta orna, chë chabe ichmonëngcá tojanabacacá boyabásengna Jesús tojéftsanamëndá, chë Uámana Espiritbiajana, ndayá jamama yojánamnama. <sup>3</sup> Jesús cruciŋe tojanóbana y tojtanyenentsana, ba soye chë ichmónënga yojánebëbuacana, chca, chënga jinŋanŋiyama cha ndegombre tojtanyenama. Canta bnëtsana tentscuana cha yojánebëbuacana y Bëngbe Bëtsabe amëndayama chënga yojanabuatomambá.

<sup>4</sup> Canŋe, Jesús chabe ichmónëngaftaca yojétsemna ora, mëntsá tojanamëndá: —Jerusalenentsana ndoŋe šmatjábocana. Camuentše šmochjobátma, ntšamo atšbe Taitá tconjánašebuachenacá chaóshjan-guëntscuana, ndayama atše tconjáuyana. <sup>5</sup> Ndegombre, Juan entšanga béjayeca tonjanëbaye; pero ndoŋe baytesna, Bëngbe Bëtsá chë Uámana Espiritu bochanjíchmua, tšëngaftangbe ainaniŋe jtsemándayama cháuamashënguama ca.

## Jesús celoye tojtantsjuá

<sup>6</sup> Canŋe, chë ichmónënga Jesúseftaca cánŋiŋe imojtsemna ora, chënga tmojtantjá: —¿César y chë Romoquëngbe amëndayentsana tašcochjatsebacá, y mora bënga, Israeloca entšanga, canŋe Rey quemochtsatsbomna ca?

<sup>7</sup> As Jesús tojanéyana: —Tšëngaftanga ndoŋe quecmátamna chë soyëngama jtsetatsëmbuana. Nŋe atšbe Taitá aŋe; y cha, chabe obenánaca echanjamán-da mocna ora y ndayté chca chaopasama. <sup>8</sup> Chë Uámana Espiritu tšëngaftangbe ainaniŋe jtsemándayama chaojabo ora, tšëngaftanga obenana šmochanjóyëngacŋe. Chentsana, ntšamo atšbiana šmotatsëmbcá, chë tconjabuatambá soyënga, entšanga šmochjáuyana Jerusalenentše, nŋets Judea luariŋe, Samarioca y quem luarentša nŋets luarënguenách-naca ca.

<sup>9</sup> Chë soyënga tojánayanentsana y chabe uatsjëndayënga imojtsonŋaye ora, Bëngbe Bëtsá, Jesúsbiolye tbojtansbaná y canŋe jantšëtëshe chábioye ibojútsbotse y ndoŋe más tmonjanobená cha jinŋama.

<sup>10</sup> Jesús celoye yojtsetsjuama chënga bën imojtser-reparánëntscuana, nŋe ndeolpe, uta boyabásata uaf-

jantse entšayaca bopormánata chëngbe juachaca tbojabántsaye, <sup>11</sup> y chëngbioye tmojanéyana: “Galileoca entšanga, ¿ndáyeca celoye šmojtsantješana? Jesús, chë tšëngaftangftaca enjamná celoye tontá y ntšamo mora šmonjinŋcá cha celoye jtama, cachcá quem luaroŋe cha echanjésabo ca.”

## Júdasbe cuenta Matías tmojanábuayana

<sup>12</sup> Jesusbe ichmónënga chë Olivos tjashocana Jerusalenoye tmojtaná. Chë tjocana Jerusalenóntscoŋna bécoŋe inamna, ndayëntscoca canŋe ochnayté jama yojanlesenciana nŋetsá. <sup>13</sup> Jerusalenoye tmojtanshajna orna, chë yebnentša tsbanánoca tsoye tmojtanášëngo. Chentše yojánatana Pedro, Juan, Santiago, Andrés, Felipe, Tomás, Bartolomé, Mateo, Santiago chë Alfeobe uaqiŋá, Simón chë Celote ca uabobainá, y Judas, chë Santiagbe uaqiŋá. <sup>14</sup> Chënga sempre imojanamana jteneŋnana Bëngbe Bëtsáftaca jencuëntama básefta shembásengftaca, María Jesusbe mamá y Jesusbe catšátangftaca.

<sup>15</sup> Chë tempo tmojáneneŋna canŋe patse y uta bnët-sana Jesucristbeŋe ošbuáchiyënga, y canŋe, Pedro tojantsá y tojanéyana: <sup>16</sup> “Jesucristbeyeca atšbe catšátanga, endánëyta ntšamo Bëngbe Bëtsabe uabemana palabrënguiŋe iuabemancá chaochnënguama, y tempo, David chë Uámana Espiritbeyeca chiŋe tojanábema ntšamo Júdaseftaca yochjanopásama; chcasna, Judas uayayënga tojanënatse Jesús chamuishachama.

<sup>17</sup> Júdasnaca bëngbe enutá enjamna y Jesús chábioynaca tbonjanábuayana bëngcá chabe trabajuiŋe jt-soservénama. <sup>18</sup> Tšëngaftanga šmondétatsëmbo, chë Judas bacna soye tojanmama tmojtansbuená crocénacna fshantse tmojánbuamema. Chentsana cha tojtansanótsatše y chabe bestšaše tsëntsaca tbojtsanashtëtšena y chabe uafsbentsana nŋetsca chabe chunchul-lëjuangá tojtsanáshana. <sup>19</sup> Jerusalenentše oyenënga chë soyama tmojántatsëmbona ora, chë fshantse chëngbe biyaŋe Acéldama ca tmojanabaye. Acéldama endayana ‘Buiŋe Luare ca’. <sup>20</sup> Salmos librésaŋe, Jesucristo uayayëngbe cucuatšifŋe boshjuanabiama mëntsá enduábemana:

Chabe yebna énaŋe chaotsemna y ndocná chentše chaondëtsiyena ca. Y mëntsánaca endayana:

Chabe cuenta inŋa chabe trabajo chaoma ca.

<sup>21</sup> “Chcasna, mora muentše montsemna taitanga bëngaftaca mondenutënga, Bëngbe Utabná Jesús bëngaftaca enjamnëntscuana, <sup>22</sup> Juan Jesúsbiolye tbon-

janabaye orscana y Bëngbe Bëtsá Jesúsbiöye béngbentšana celoye tbontanatsbanantscuana. Y mora šontsamna canya mënguentsá juabuáyanama, Jesús tojtanayenama entšángbiöye béngaftaca jábuayenama ca.”

<sup>23</sup> As chora útata tmojanabocacá: José, nda Barsabás ca imojanábobuatma y ínÿengna Justo ca; y chentšana Matías. <sup>24</sup> Chora Bëngbe Bëtsáftaca mëntšá tmojanencuentá: “Bëngbe Utabná, aca nyetscangbe ainana icuabuatma; chcasna, šminÿanÿé nda quem úatentšana cochjuábuayanana, <sup>25</sup> canÿe ichmonacá Júdasbe cuenta chaotrabajama. Judas ya ndoñe canÿe ichmoná quenátsmëna, bacna soye tojama causa, y cha mora yojtsemna chë ndayentše jtsemnama ibomna luaroca ca” —chënga tmojánayana.

<sup>26</sup> Y nda chë ichmoná yochtsemnama jtsotatšëmbuamna tsbanánoye tmojanétsena y Matías tbojanobuache; as cach orscana, Jesucristbeñe osbuáchiyënga chabiamá imojanjuabná mo canÿe Jesusbe uestonacá, cachcá ntšamo chë bnétsana canÿe uatšjëndayëngbiamá chënga imojanjuabnacá.

### Chë Uámana Espíritu ošbuachiyëngbeñe tojánamashëngo

**2** Pentecostés ca uabaina fiesta tojanobuache ora, chë jaja sananga tmojanobuátbanama fiesta te, Jesucristbeñe ošbuáchiyënga nyetscanga cánÿiñe canÿe luarentše imojtsemna. <sup>2</sup> Ndeolpe, celocana mo canÿe jabuache binÿiécá yojtsaishauenana y chca, tša jabuache shauenanana tojanóshjango nyets yebnentše, chënga imojtsetbiámanentše. <sup>3</sup> Y chora bichtajënga mo iñeshcá yojónÿna y canÿánÿabeñe yojójtaye. <sup>4</sup> Chca chë Uámana Espíritu tojánamashëngo chëngbe ainaniñe jtsemándayama; chora nyetscanga tmojanontšë inÿetšá biyangana, chënga tempo ndmabiyañe, ntšamo chë Uámana Espíritu yojtsamcá chënga inÿetšá chamotsebiyama.

<sup>5</sup> Chë tempo Jerusalemntše imojtsemna ba judiënga, Bëngbe Bëtsá puerte adórayënga, nyets luarëngocana áshjajnënga; chënga tmojánabo Bëngbe Bëtsá jëtschuayama. <sup>6</sup> Entšanga chë shauenanana tmojanuena ora, tmojanójoto y ndoñe imontsetátšëmbo ntšamo jtsejuabnayana ndayá yojtsopasánama, er chë inÿe luarocana áshjajnënga imojtsuenana chë Jesucristbeñe ošbuáchiyënga inÿetšá biyangana jtsóyebuambnayana, ntšamo cada ona chënga imojanbiyacá. <sup>7</sup> Chë soyëngama entšanga puerte imojenjaná y mëntšá imojtsenatsëtsnaye: “Chë chca montsóyebuambnanga Galileoquënga mondmëna. <sup>8</sup> Chcase, ¿ntšámoyeca bënga imojtsobena chënga joyaunayana cach bënga mondëbiyacá ca? <sup>9</sup> Muentše montsemna Partioquënga, Medioquënga, Elam, Mesopotamia y Judeoquënga, Capadocia, Ponto y Asia luaroquëngnaca, <sup>10</sup> Frigioquënga, Panfilia, Egiptó y Libia, chë Cirene béconana luaroquënga. Báseftangna Romoquënga montsemna; <sup>11</sup> chëngbeñe nderado judiënga camuentše onÿnánënga, pero ínÿengna ndoñe, y chënga Bëngbe Bëtsá mondbëtsatschuanaye cach

ntšamo chë judiënga monduamancá. Inÿengna Creto-cana y Arabiocánënaca tmojabo. ¡Y bënga montsobena chë Galileoca judiënga joyaunayana Bëngbe Bëtsá bëts soyënga tojamama cach bënga mondëbiyacá ca!” —chë entšanga imojtsichamo.

<sup>12</sup> Chë causa nyetscanga imojtsenjanaye y ntšamo jtsejuabnayama ntsetatšëmbcá imojtsemna y imojtsentjanaye: “¿Ndayá chë soye yojtsayana ca?”

<sup>13</sup> Pero ínÿengna, chë soyëngama chëngbiöye imojtsëbayajuana y imojtsichamo: “Chënga tëmiënga montsemna ca.”

### Ntšamo Pedro chora tojanoyebuambá

<sup>14</sup> Chentšana, Pedro tojantsá chë inÿe bnétsana canÿe ichmónëngaftaca y jabuache tojanontšë chë entšanga jáuyanana, mëntšá: “Atšbe entšanga judiënga y nyetscanga Jerusalemntše oyenënga, tšabá šmochjouena. Ntšamo tojopasama cbochanjábuayenaye, as chacmésertama. <sup>15</sup> Tšëngaftanga šmontsejuabná atše y atšbe enutënga tëmiënga fstsemna ca, pero ndegombre, tëmiënga ndoñe queft-sátsmëna; cabá cachëse, base mošenana ora tcsomñe. <sup>16</sup> Pero ntšamo entsopasánama, Bëngbe Bëtsabe juabna oyebuambnayá Joel mëntšá tojanábema:

<sup>17</sup> Bëngbe Bëtsá mëntšá tojánayana: ‘Quem luare jopochócama te chaojtsobeco ora, chë soyënga echanjochnëngo.

Atše chanjama, atšbe Espíritu nyetscangbe ainaniñe cháuamashënguama.

Chentšana, tšëngaftangbe uaquiñënga y bembangá atšbe soyëngama entšanga mochantsëtsëtsnaye; tšëngaftangbe bobontsëngna, atše chanjama soyënga mochantsonÿaye mo otjenayoquécá; y tšëngaftangbe bëtsëjëmëngna atšbe soyënga mochantsotjénaye.

<sup>18</sup> Chca ora, atše chanjama nyetsca atšbe oservëngbiamá, boyabásenga y shembásenga, chëngbe ainaniñe atšbe Espíritu cháuamashënguama, as chënga atšbe soyëngama entšanga mochantsëtsëtsnaye.

<sup>19</sup> Atše chanjama bëts soyënga celoca; y quem luariñe echántsemna buiñe, iñeshe y ngona mo jantšetëshcá, atšbe obenana jinÿanÿiyama.

<sup>20</sup> Cabá chë puerte uámana te, chë Bëngbe Utabná bëts soyënga jamama ndobuache ora, shinÿe ndoñe queochátsbuashinÿinÿana y juashcona buánganëtema mo buiñcá echántsemna.

<sup>21</sup> Y as, ndánaca Bëngbe Utabná tbojtsotšëmbuaná, cha bochanjatsbocá. ‘Chca Joel tempo tojanábema ca’ —Pedro tojánayana.

<sup>22</sup> Chora Pedro tojatanéyana: “Israeloquënga, šmochjouena ntšamo cbochanjauyancá: Bëngbe Bëtsá ndegombre tcmojaninÿanÿé, Jesúsbiöye chabe trabajo biamnayá cha tbojánbemama. Chë soye Bëngbe Bëtsá tcmojaninÿanÿé, Jesús chë Nazaretocáftaca cha tojanma bëts soyëngaca y ójnanana soyëngaca, Bëngbe Bëtsabe obenana jinÿanÿiyama. Cach tšën-

gaftanga chë soyëngama šmondétatšëmbo, Bëngbe Bëtsabe obenánaca chë soyënga tšëngaftangbeñe Jesús tonjánmayeca. <sup>23</sup> Ndegombre tšëngaftangbe cucuatšíñe Jesús tmonjانبoshjona, pero cabá ndëboshjona ora, Bëngbe Bëtsá tojanjuabó ntšamo jopásana yojamnama; y ntšamo tšëngaftanga cháftaca šmochjanmámna cha inatátšëmbo. Tšëngaftangna Jesús šmonjanishache y šmonjanma cha chamóbama y chamocrucificama, bacna entšangbe cucuatšíñe. <sup>24</sup> Pero Bëngbe Bëtsá tojama cha cháuatayenama; y chë obanëngbe luarentšana tbojatsbocá, er ndoñe yonjopodena cha obaná chaoquedama ca” —cha tojánayana.

<sup>25</sup> Chora Pedro tojatanéyana: “Rey David tempo Jesusbiam mëntšá tojéftsanabema, ntšamo cha Bëngbe Bëtsábioye tbojanianama:

Atšbe Utabná, aca sempre átšeftaca condbétsemna, y sempre átšeftaca conboquedá atšbe juabuáchama,

chíyeca ndocná queochatobenaye atšbe jauátjanama.

<sup>26</sup> Chíyeca atšbe corente oyejuayá séntsemna, y atšbe uayášaca cbontsatschuaná.

Atšbe masque chanjóbana, tšabá sëndétatšëmbo aca atšbe Bëtsá, atšbe chaitayenama cochjamama.

<sup>27</sup> Aca, Bëngbe Bëtsá, obanëngbe luarentše ndoñe quešochátšboshjona, y ndoñe queochatslésencia acbe uámana oservenabe cuerpo chaotsopochocama.

<sup>28</sup> Aca chë tšabe benache šconjaninjiné, ntšamo tšabe vida jtsebonnama.

Aca átšeftaca condbétsemnama, atšbe puerte oyejuayá séntsemna ca —David tojéftsanabema ca.”

<sup>29</sup> Chentšana Pedro tojatanéyana: “Baconga y batanga, šontsemna ndegombre tšëngaftanga jábuayenana tšabá chacmésertama. Bëngbe tempsca bëts taitá David tojanóbana y tmojanatbontsá, y bënga montsemna cha tmojanatbontsá luare béconana.

<sup>30</sup> Cach David canye Bëngbe Bëtsabe juabna oyebuambnaya inamna. Cha tšabá inatátšëmbo Bëngbe Bëtsá bëtscá tbojanšbuáchenama, Davidbe entšanguentšana canya, Cristo, cach Davidcá rey jabemama. <sup>31</sup> David inatátšëmbo chë Uámana Uabuayaná, chë Cristo, cháuatayenama Bëngbe Bëtsá yochjanmama. Chama cha tojánayana y tojéftsanabema, obanëngbe luarentše Cristo ndoñe ntjéftseboshjonana y Bëngbe Bëtsá ndoñe ntjalesénciana chabe cuerpo chaotsopochocama ca. <sup>32</sup> Bëngbe Bëtsá tojama Jesús cháuatayenama y bënga cha fsënjinye. Chíyeca bënga fséntsetatšëmbo chca ndegombre bétsemnama.

<sup>33</sup> Bëngbe Bëtsá, Jesús celoye tbontanatsbaná chabe catšbioica jtsatsmënama jtsemándayama, y Bëngbe Bëtsá chë Uámana Espiritu Jesúsbioye tbojanëntsabuaché ntšamo chë Taitá tbojanšbuachenacá. Ntšamo tšëngaftanga šmontsonyá y šmontsuenancá entsemna, Jesucristoftaca chë Uámana Espiritu bëngbe ainaniñe cháumashënguama Bëngbe Bëtsá tojámayeca. <sup>34</sup> David ndoñe Jesuscá celoye tonjána, pero mëntšá tojéftsanábema:

Bëngbe Bëtsá atšbe Utabná Crístbioye tbojanianama: ‘Atšbe catšbioica cochtsetbemana, <sup>35</sup> acbe uayayënga acbe cucuatšíñe chamoquedama atšbe obenánaca chjamëntscuana ca.’”

<sup>36</sup> Chora Pedro tojatanéyana: “Tšëngaftanga nyets Israeloquënga šmochtsetátšëmbo, atšbe ndegombre cach Jesusbiam sentsóyebuambnama. Cha tšëngaftanga šmonjancrucificá, pero Bëngbe Bëtsá chábioye tbojanábema Bëngbe Utabná y chabe Uámana Uabuayaná, chë Cristo ca.”

<sup>37</sup> Chë soyënga tmojanuena ora, entšanga cochtsetšënanënga imojtsemna, y Pedro y chë inye ichmónëngbioye tmojanéyana: —Baconga, ¿ndayá mora jamama šojtsamna ca?

<sup>38</sup> As Pedro tojanéjua: —Ngménaca šmochtenójuaboye bacna soyënga šmojtsamama, chca amana šmochtsajbaná y Bëngbe Bëtsabe benache šmochtishache. Chca chašojama ora, cbochanjubaye mo chábeñe ošbuachiyëngcá, Jesucristo atšbe jótšëmbonëse. Chcase, Bëngbe Bëtsá tšëngaftangbe bacna soyëngama cmochanjáperdonaye y echanjama chë Uámana Espiritu tšëngaftangbe ainaniñe jtsemándayama cháumashënguama. <sup>39</sup> Bëngbe Bëtsá chë soyënga tcmojanašebuachená tšëngaftangbiam, tšëngaftangbe básëngbiam y nyets chë bën luarënguenache imomna entšangbiam, nyetscanga chë Bëngbe Utabná Bëngbe Bëtsá chábioye jabama chaojubuáyanënga ca.

<sup>40</sup> Inye palabrëngnaca Pedro tojatanéyana y bëtscá tojanabuayená mëntšá: “¡Bëngbe Bëtsá chë Israeloca bacna entšanga echanjácastigaye. Chašmótsbocamna, chëngbentšana šmochtsojuánañe ca!”

<sup>41</sup> Ba entšanga imojtsanošbuaché ntšamo Pedro tojanéyanama y tmojanenabayey. Cach te mo unga uaranga entšanga nyetsá tmojanoboté, Jesucristbeñe ošbuáchiyënga jtsemnama. <sup>42</sup> Chënga corente imojtseboše jtsamama chë Jesusbe ichmónënga imojtsabuatambá soyënga. Tšabá yojtsacohebiona nyetscanga cányiñe jtsemnama y imojanamana mo chë Jesucristbeñe ošbuachiyëngcá cányiñe jtsesayana y cányiñe Bëngbe Bëtsáftaca jtsencuéntayana.

#### Ntšamo chë natsana Crístbeñe ošbuáchiyënga vida imnabomna

<sup>43</sup> Nyetscanga imojtsenjanayey, chë ichmónënga bëtš soyënga y inye soyënga chabe obenana jinyanñiyama chamomama Bëngbe Bëtsá tojánmayeca. <sup>44</sup> Nyetsca chë Jesucristbeñe ošbuáchiyënga sempre cányiñe mo canyacá imojtsemna y nyetsca chëngbe bomna soyënga nyetscangbiam yojtsemna. <sup>45</sup> Chënga imojanamana fshantsënga jtsatobuíyana y chë imojánbomna soyëngnaca, y chë crocénana jujátayana ntšamo chë inyënga tojtsëjbotcá. <sup>46</sup> Cada te imojanamana Bëngbe Bëtsabe bëtš yebnentše jënefnana cha jëtschuayama, y yebnënguenache cányiñe imojtsesaye oyejuayënga y ndoñe ojëndayënga. <sup>47</sup> Chënga imojanamana Bëngbe Bëtsá jtsatschuanayana, y nyetsca entšanga imojtsejuabnaye chë Jesu-



crístbeñe ošbuáchiyëngbiamá tšabe entsánga imojamna ca. Y cada te Bëngbe Bëtsá yojt sama más ošbuáchiyënga chamóbotema, chë ndëmuanyënga cha yojt satsebacayënga.

### Pedro canye coshétbioye tbojanshná

**3** Canye te, Pedro y Juan Bëngbe Bëtsabe bëts yebnoye tbojánata bëts mošenana ora. Chca ora entsánga imojanamana Bëngbe Bëtsáftaca jtsencuén-tayana. <sup>2</sup> Bëngbe Bëtsabe bëts yebnentse canye cosheto yojtsemna; tojanonýná orscana chca šocá in-amna. Entšanga imojanamana cada te cha juanatsana canye luaroye, Bëngbe Bëtsabe bëts yebnoca, Botamana Amashjuana ca uabáinoye, chë tmojtsach-nëjuanënga lemošna chaótejañama. <sup>3</sup> Pedro y Juan Bëngbe Bëtsabe bëts yebnoye jamashënguama chë cosheto tojánanyë ora, canye lemošna chátbioye yojótejañe. <sup>4</sup> Chatna chë šocá imojtsonýaye, y Pedro tbojaniyana: “Šcochtsënyäye ca.”

<sup>5</sup> As cha yojtšënyäye y yojtsejuabnaye ndayá chjójyëngacñe ca. <sup>6</sup> Chora Pedro tbojaniyana: “Quetsátsbomna ni crocénana, ni castellano aca jatšetayama, pero atše chanjama Jesucristbe obenánaca ndayá acbiama jama atše stobencá: Jesús chë Nazaretocá obenana endbomna; chíyeca atše cbëyana chabe mándoca, matëtsbaná y cochtsana ca.”

<sup>7</sup> Pedro chca tbojaniyana ora, tbojanábuacueshache catšbióicatše y tbojtanatsbaná, y cachora chë cosheto shecuatšifne y shëmiabeñe añemo yojtšatsbomna. <sup>8</sup> As chë cosheto, canye jontšënjëse tšabá tojtantsá y tojanontšë tšabá jtsanana, y Bëngbe Bëtsabe bëts yebnoye Juan y Pédroftaca tojánamashëngo; yojt sayontšënjnaye y Bëngbe Bëtsá ibojtsatschuanaye, tbojanshnama. <sup>9</sup> Chë Bëngbe Bëtsabe bëts yebnentšë imojtsemnënga nyetscanga cha tmojáninýe tšabá jtsanana y Bëngbe Bëtsá jtsatschuanayana. <sup>10</sup> Chënga imnatátšëmbo cha chë cosheto yojamnama, chë nda yojanamana Bëngbe Bëtsabe bëts yebnoca, chë Botamana Amashjuanentšë jót bemana, entsánga lemošna jotejañama. Cha tšabá yojtšatsmënamna entsánga ojanánënga imojtsemna.

### Ntšamo Pedro tojanoyebuambá Salomonbe Amashjuana ca uabáinentšë

<sup>11</sup> Chë cosheto ya shnaná ora, ndoñe yontseboše Juan y Pédrëbentšana joluáрана. As, nyetsca entsánga ojanánënga tmojanótjajo chë amashjuana otsbojebniñe, Salomonbe Amashjuana ca uabáinoye, chë Juan, Pedro y chë cosheto shnaná imojtsemnoye. <sup>12</sup> Pedro chë entsánga tojánanyë ora, tojanéyana: “Taitanga y mamanga, Israeloquënga, ¿ndáyeca chë soyëngama ojanánënga šmojtsemna? ¿Ndáyeca nýe šcojt-sëbuátuja? ¿Šmojtsejuabná nýe bëndatbe obenánaca quem boyabása tifjashná ca? ¿O šmojtsejuabná quem boyabása tifjashná bëndata Bëngbe Bëtsá puerte tšabá ftsadoránayeca? <sup>13</sup> Bëngbe Bëtsá, ndábeñe Abraham, Isaac y Jacob imojanošbuaché y ndábeñe

bëngbe bëts taitanga imojanošbuaché, cha tonjinýanýe chabe oservená Jesús chë más uamaná yomnama. Cha tšëngaftanga chë mándayëngbe cucuatšifne šmonjánboshjona chamóbama. Pilato enjëtseboše Jesús jëtsboshjonama, pero tšëngaftanga Pilatbe delante šmonjánayana chca ndoñe šmontsanboše ca, y chíyeca Pilato ndoñe tbontanboshjona. <sup>14</sup> Jesús uamaná y nyetsca soyënguiñe tšabá amá enjamna, pero tšëngaftangna cha šmontsanaboté y Pilato šmonjanimpadá chabe cuenta canye boyabása, entšá obanayá, chabuatsboshjonama. <sup>15</sup> Y chca, chë ndegombre tšabe vida chašmotse bomnama amábioye tšëngaftanga šmonjanóba. Pero Bëngbe Bëtsá tojanma cha cháuatayenama y bënga chë soye fsënjáninýe y chama fsëndëtatšëmbo. <sup>16</sup> Jesús puerte obená endmënayeca, quem cosheto añémoca entsatsmëna. Ntšamo šmonjinýe y šmonjatatšëmboncá ndegombre tonjopasá Jesúsbeñe betsošbuáchemá. Chë Jesúsbeñe jtsošbuáchiyana tonjama cha tšabá tšëngaftangbeñe chaotsatsmënama.

<sup>17</sup> “Taitanga y mamanga, atše sëndëtatšëmbo tšëngaftangbe causa y tšëngaftangbe amëndayëngbe causa Jesús tojanóbanama. Pero tšëngaftanga chca šmojanma, ndayá šmojétsamama ntsetatšëmbo.”

<sup>18</sup> Tempo, Bëngbe Bëtsá chë chabe juabna oyebuambnayënga tojanamëndá entsánga jábuayenama, chë Bëngbe Bëtsabe Uámana Uabuayaná puerte ngmënaná yochtsanbomnama. Morna, ntšamo Bëngbe Bëtsá tojanayancá ya tonjochnëngo. <sup>19</sup> Chcasna, ngmënaná menójuabonga bacna soyënga šmojtsamama, chca amana šmochtsajbaná y Bëngbe Bëtsabe benache šmochtishache, chca, tšëngaftangbe bacna soyënga cha chacmabuajuánama. Chca chašmojamëse, Bëngbe Bëtsá echanjama tšëngaftangbe ainaniñe oyejuayana chašmotsóbomñama, <sup>20</sup> y tšëngaftangbioye bochanjíchmuá Jesús, chë tempo chabe Uámana Uabuayaná Bëngbe Bëtsá tbojanbemá.

<sup>21</sup> Canye te echanjóshjango, Bëngbe Bëtsá lempe tsmëmáca jëtsbemama. Chë tentscuana Jesús bontsemna celoca joquédana. Chca echanjochnëngo ntšamo Bëngbe Bëtsá chabe juabna oyebuambnayëngbiajana entsánga tojanabuayenacá. <sup>22</sup> Moisés bëngbe bëts taitanga tojanabuayená: ‘Chë Utabná Bëngbe Bëtsá canye chabe juabna oyebuambnayá ntšamo atše sëndmëncá, cmochanjayentšíchmuá. Cha tšëngaftangbentšana echanjábocna y tšëngaftanga cmontsamna ntšamo chacmojtšëtsëtsnacá cha jtseye-unanana. <sup>23</sup> Ndánaca chábioye ndoñe chabonjoyeuná, cha bontsemna chë Bëngbe Bëtsabe entsángbentšana luaroca jtsemnama y chamotsepochochocama ca’ —cha tojánayana.

<sup>24</sup> “Y nyetsca chë Bëngbe Bëtsabe juabna oyebuambnayëngnaca Samuel orscana, entsánga tmojanabuayená ndayá quem tempo yochjanchnëngmuá, ntšamo mora montsonýacá. <sup>25</sup> Chabe juabna oyebuambnayëngaftaca Bëngbe Bëtsá tojanašebuachená bëts soyënga tšëngaftangbiama, y tšëngaftangbe bëts taitángaftaca canye trato tojánbema; chë soyënga

cabá tšëngaftangbiama entsemna. Bëngbe Bëtsá Abrahámbyoye mëntšá tbojanianyana: 'Chë ácbentšana entšángbeyeca tšabe bendicionënga chanjama nyetsca quem luarentša entšangbiama ca.'<sup>26</sup> Bëngbe Bëtsá tojama chabe oservená cháuatayenama y nat-sana tšëngaftangbioye tbojanichmó, bacna soyënga amana chašmotsajbanama. Y chca, Bëngbe Bëtsá jamama tšëngaftangbeñe tšabe bendicionënga chaotsemnama ca" —Pedro tojánayana.

#### Pedro y Juan Jerusalenentša mandadëngbe delante

**4** Pedro y Juan cabá entšanga imojtsëtsësnaye; chorna chë chata ibojtsemnoye tmojánashjajna judiëngbe bachnanga, Bëngbe Bëtsabe bëts yebnentšá soldadëngbe amëndayá y saduceo ca uabaina judiëngbe amëndayënga.<sup>2</sup> Chatna entšángbioye imojtsabuátambaye Jesús tojtanayenama y chë soye yojánayana obanënga ndegombre mochtayena ca. Chë causa, chë tmojánashjajna amëndayënga tojánëtëna.<sup>3</sup> As, Pedro y Juan tmojánishëche y ya jetiñe yojtsemna causa, cárceloye tojanëtame yëfsanëntscuana.<sup>4</sup> Masque chca, banga entšanguentšana, ntšamo Pedro y Juan tbojanayancá tmojanuenënga, aíñe Jesucristbeñe imojtsošbuáchiye. Chë tentscuana shachna uaranga Jesucristbeñe ošbuáchiyënga imojtsemna, nye boyabásenga jacuëntase.

<sup>5</sup> Yëfsana, chë judiëngbe amëndayënga, judiëngbeñe bëtsëjemëngcá amëndayënga y ley abuátambayënga Jerusalenentše tmojánenefjna.<sup>6</sup> Chéntšnaca imojtsemna, chë bachnangbe más uámana amëndayá Anás ca uabainá, Caifás, Juan, Alejandro y chë bachnangbe más uámana amëndayëngbe nyetsca pamillangnaca.<sup>7</sup> Chora chënga tmojanmandá Pedro y Juan junatsama, y chëngbe tsëntsaca tojanatsá y mëntšá tmojanatjá: —¿Ndabe obenánaca chë soyënga šojtsama, o, nda derecho tcmënjatšatá chë soyënga chašotsamama ca?

<sup>8</sup> As Pedro, chë Uámana Espiritu chabe ainaniñe corente jtsemándayëse, mëntšá tojanéjua: —Israeloca mándayënga y bëtsëjemënga,<sup>9</sup> mënté šconjatjá chë jama ndobenáftaca tšabe soye tifjamama y ntšamo cha mora jama yojtsatobenama.<sup>10</sup> Chcasna, ntšamo tojopasama cbochanjabuayená, chca, tšëngaftanga y nyetsca Israeloca entšanga chë soyënga chašmotsetatšëmbuama. Quem boyabása, chë tšëngaftangbe tsëntsaca entsemná, Jesucristo chë Nazaretocabe bëts obenánaca chca tšabá entsatsmëna. Y Jesús endmëna nda tšëngaftanga šmonjancrucificá y ndabiama Bëngbe Bëtsá tojanma cháuatayenama.<sup>11</sup> Jesusbiama Bëngbe Bëtsabe uabemana palabrenguiñe mëntšá endayana: "Chë yebna jebuanënga tmontsanaboté ndëtšbé, mora chë más bëts uashacuanëšentše entsejájona ca". Tšëngaftanga šmondmëna mo chë yebna jebuanëngcá, er Jesúsbiyoye šmontsanaboté y mora cha chë más uamaná entsemna.<sup>12</sup> Nye cha yobena tšëngaftanga játsebacama. Bëngbe Bëtsá ndocna inye entšábiyoye tbonjatšetá chabe obenana chca jamama; chíyeca quem luarentše ndocná más quenátobena

bënga játsebacama. Nye Jesucristbe obenánaca aíñe ca —Pedro tojánayana.

<sup>13</sup> Chënga imojenjaná Pedro y Juan tša añémoca ibojtsóyebuambnama tmojáninye ora, y chata tempo nduatsjínyenata y librëša nduabuatmata bëtsemnama tmojántatšëmbona ora. Chca chë mándayënga tmojántatšëmbona chata Jesúseftaca bayté ibojamnama.<sup>14</sup> Y entšanga imojtsonyaye chë tmojanšná cha chentše chátaftaca yojtsemnama; chë causa, chënga ndocá más tmonjanobená chatbe contra jatichámua-na.<sup>15</sup> As chora tmojanamëndá chentšana chábuaisebocnama y chentše tmojanoqueangna chë soyama imojtsenatsëtsnaye.<sup>16</sup> Chënga imojtsentjanaye: "¿Ndayá chátaftaca mochjama ca? Jerusalenentše oyenënga montsetátšëmbo chata chë bëts soye Bëngbe Bëtsabe obenánaca tbojamama; chë causa, bënga ndoñe quemuátobena jayanana chata chca ndoñe tbonjama ca.<sup>17</sup> Pero entšanga chama ndoñe más chamondëtsencuëntamna, chata mochjáuyana: 'Ndoñe más entšángbeñe Jesús šmattsebáyana; y ndoñe chašmonjouenëse, jabuache castigo šochántse-bomna ca.' "

<sup>18</sup> As chë mándayënga cachiñe chata tmojánachembo y tmojanamëndá ndoñe más Jesús jtsebáyana, ni chabiama entšángbeñe jtsabuátambayana.<sup>19</sup> Pero Pedro y Juan tbojánayana: "¿Ntšamo tšëngaftanga šmatjayana ntšamo fchanjayanama ca? Ndegombre, Bëngbe Bëtsabe bominýiñe ndoñe tšabá quenátsmëna tšëngaftangbiyoye aíñe joyaunayana y chábioye ndoñe.<sup>20</sup> Er bënga queftsátobena jtsajbanana oyebuambnayana chë tifjinye y tifjouena soyëngama ca."

<sup>21</sup> Chë mándayëngna chátbiyoye tojtsanautatjá, pero chentšana tmojtanabáshejuana. Nyetsca entšanga Bëngbe Bëtsá imojtsatschuanaye ntšamo tojanopasama; chíyeca, chë mándayënga ndoñe tmonjanobená tondaye ntjinyenana ntšamo chata jácastigama.<sup>22</sup> Chë boyabása, ndáftaca chata chë bëts soye Bëngbe Bëtsabe obenánaca tbojanma, inabomna cantabnëtsana uatama más.

#### Jesucristbeñe ošbuáchiyënga Bëngbe Bëtsá tmojanimpadá más añemo chauatšatama

<sup>23</sup> Pedro y Juan ya tmojtanabáshejuana ora, tbojánata chë inye ošbuáchiyëngaftaca jateninyenama y lempe ntšamo chë bachnangbe amëndayënga y bëtsëjemëngcá mándayënga chátbiyoye tmojanëyancá, chëngbiyoye tmojanacuntá.<sup>24</sup> Chënga chca tmojanuenentšana, nyetscanga cánýiñe tmojanontšë Bëngbe Bëtsáftaca mëntšá jencuëntama: "Bëngbe Utabná, aca chë nda tojama celoca, fshantse, nyetsca béjayënga y lempe ntšamo chenache yomncá,<sup>25</sup> chë Uámana Espiritbiajana tcojánayana y acbe oservená David, ntšamo tcojanayancá tojanábema, mëntšá:

¿Ndayeca entšanga yapa imojtsetšátjaye ca?  
¿Ndayeca imojtsejuabná nye bonamentiamama soyëngajamana?

<sup>26</sup> Quem luarentša reyënga y amëndayënga imoprontanënga,

nÿetscanga tmojenoyeuná Bèngbe Bètsá y chabe Uámana Uabuayaná chë Cristbe contra jtsemnama ca —cha tojanábema.

<sup>27</sup> “Ndegombre chca tonjopasá. Rey Herodes y Poncio Pilato, quem bèts pueblentše, ndoñe judiëngaftaca y israelitëngaftaca tmonjánenefjna, jenóyeunayama ntšamo jamana, Jesús chë acbe uámana oservená y chë Uámana Uabuayaná tcojabemábioye jóbama.

<sup>28</sup> Tempo, Bèngbe Bètsá, acbe obenánaca y ntšamo icnabošcá tcojanmandá ntšamo mora chaotsemnama, y chënga chca Jesúseftaca tmonjama. <sup>29</sup> Morna Bèngbe Bètsá, mouena ntšamo chënga montsichamo, bënga jasúfriama cašojtsamna ca; chcasna, cochjama bënga fchayobená Jesusbe tšabe noticiënga bèts añémoca entšángbeñe jtsóyeuambnayama, <sup>30</sup> y cochjama acbe obenánaca šoquënga tšabá chamotsatsmënama y cochjama bënga fchayobená bèts soyënga jamama, Jesús chë uámana oservenabe obenánaca y cha jótšëmbonëse ca” —chënga tmojánayana.

<sup>31</sup> Bèngbe Bètsáftaca jencuëntama tmojanpochocá orna, chë tmojánenefjntentše tojanangmëmana; y nÿetscangbe ainaniñe chë Uámana Espíritu tojanontšé más jtsemándayana, y chënga tmojanontšé más añémoca Bèngbe Bètsabe soyëngama entšanga jábuayenama.

### Nÿetsca bomna soyënga nÿetscangbiama yojtsemna

<sup>32</sup> Jesucristbeñe ošbuáchiyënga, nÿetscanga canÿe juabna imojtsebomna y ainaniñe cach canÿe ebionana. Ndocná ntjatichamuana chabe soyënga nÿe chabiamna yojtsemna ca, pero aïñe imojtsichamo, “atše séndbomna soyënga nÿetscangbiama entsemna ca”.

<sup>33</sup> Chë Jesusbe ichmónëngna puerte obenánaca mëntšá imojtsichamo: “Fsëjñiyë y fsëntsetatšëmbo Bèngbe Utabná Jesús obanënguentshana tojtayenama ca.” Y Bèngbe Bètsá yojtsama chë ichmónënga bètscá tšabe bendicionënga chamotsebomnama. <sup>34</sup> Jesucristbeñe ošbuáchiyëngbeñe ndocná yonjamna ndayánaca uajabotá, er nÿetscanga fshantse o yebna bomnënga imojanamana jtsatobuïyana, y chë crocénana <sup>35</sup> chë ichmónëngbioye jayentšbuáchiyana, ntšamo tojtsëjajabotá nÿetscanga jujátayama. <sup>36</sup> Chca tojanma canÿa Bèngbe Bètsabe bèts yebnoca trabajayá, José ca uabainá; cha chë ichmónënga imojanábobuatma Bernabé ca (y chca iuayana “Añemuayá ca”). Bernabé yojamna Chipre luarocá. <sup>37</sup> Chana, fshantse yojtsatobuïye, y chë crocénana Jesusbe ichmónëngbioye yojayentšbuachiye, chë uajabótëngbiama chaoservema.

### Ntšamo Ananías y Safíraftaca tojanopasá

**5** Inamna canÿe bacó, Ananías ca uabainá, y chabe shemna, Safira ca. Chatna canÿe fshantse tbojániiye. <sup>2</sup> Ananías y Safirna tbojanenóyeunata; chcasna, batšá crocénana cachatbiama tbojanobuajó y chë tojanójama crocénana ichmónëngbioye Ananías tojanamba, pero tojanéyana chana canjamna nÿets crocénana ntsachetšá chë fshantsama tbo-

janosháchiñe ca. <sup>3</sup> As Pedro tbojaniiyana: “Ananías, ¿ndáyeca tcojalesenciá Satanás acbe ainaniñe bacna juabnënga chacmócochënguama, Uámana Espíritu chë crocénanama jabuambayama ca? Acna chë fshantsama tcojtabuená crocénanentšana cach acbiama batšá tcontábojama. <sup>4</sup> Cabá ntsatobuïye ora, chë fshantse ábeshe endánmëna y tcojtsatobuïyentshana chë crocénana acbiana y chánaca condánobena ntšamo tcojtsebošcá jamama. ¿Ndáyeca acbe ainaniñe tcojajuabó chë crocénanama chca jostóterama? Chca jamëse, ndoñe nÿe entšángbioye quecatabuambná, sinó Bèngbe Bètsánaca ca” —Pedro tbojaniiyana.

<sup>5</sup> Ananías chë palabrenga tojanuena ora, obaná tojánshajaye. Y nÿetscanga chama tmojántatšëmbonënga corente imojtsauatja. <sup>6</sup> Chentšana, básefta bobontšënga tmojánashjajna y Ananíasbe cuerpo entšëjuaca tmojanandmaná y jauábtontsama tmojanamba.

<sup>7</sup> Mo unga horëntscose, Ananíasbe shema Safira tojánashjango, pero ndoñe yontsetatšëmbo ntšamo chabe boyáftaca tojanopasama. <sup>8</sup> Chora Pedro tbojan-tjá: —Ndegombre šmëyana, ¿chë šmonjayana nÿetsnama chë fshantse šmojiye ca?

As chë shema tbojanjuá: —Aïñe, nÿetsnama fsëjñiye ca.

<sup>9</sup> Pedro tbojaniiyana: —¿Ndáyeca tsëndata šojenoyeuná Bèngbe Utabnabe Espíritu jabuambayama, y cabá castigo jtsebomnama ndoñe šontsobatmana ca? Acbe boyá jauábtontsama tmonjuambënga muentše bëšoca montsemna y mora ácnaca cmochanjuamba ca.

<sup>10</sup> Cachora Safira Pédrëbe shecuatšentše obaná tojánshajaye. Chë bobontšënga tmojtanamáshjna ora, obaná Safira tmojáninÿena; asna, chentšana tmojanamba y cachabe boyabe juachaca tmojanatbontsá.

<sup>11</sup> Y nÿetsca Jesucristbeñe ošbuáchiyënga chentše imojtsemnënga y nÿetscanga chë soye tmojántatšëmbonënga, corente imojtsauatja.

### Ba bèts soyënga chë ichmónënga tmojanma, Bèngbe Bètsabe obenana jinÿanÿiyama

<sup>12</sup> Chë Jesucristbe ichmónëngaftaca ba bèts soyënga entšángbeñe yojtsebinÿna Bèngbe Bètsabe obenana jinÿanÿiyama; y nÿetsca Jesucristbeñe ošbuáchiyënga imojanamana Bèngbe Bètsabe bèts yebnoca jénefnana, Salomonbe Amashjuana otsbojebnentše. <sup>13</sup> Chë inÿyënga, chë Jesucristbeñe ndošbuáchiyëngna, imojtsauatja Jesucristbeñe ošbuáchiyëngaftaca jtsenutana; pero entšangna chë ošbuáchiyëngbiama tšabá imojtsencuëntaye. <sup>14</sup> Bèngbe Utabnábeñe ošbuáchiyënga más imojtsóbotena, bètscá boyabásënga y shembásëngnaca. <sup>15</sup> Tša bèts soyënga chë ichmónëngaftaca yojtsebinÿna; chíyeca entšanga imojanamana jutšnëshangañe y tjuashënguñe tsáshenoye šoquënga jubuacnana, chca, Pedro chëjana tojtsachnëjuana ora, nÿe mo chabe sómbrenaca chëngbe cuerpëjana chaohnënguama, shnánënga jtsatsmënama.

<sup>16</sup> Jerusalén chábuañe pueblënguentshana ba entšanga

imojanamana jabana, y šoquënga y bacna bayëjbe juabna uambayënga imojtsëyabó; y nyetscanga shnánënga imojtsatsmëna.

### Bëngbe Bëtsá tojanma Pedro y chë inÿe ichmónënga cárcelocana natjëmbana chámuaisebocnama

<sup>17</sup> Chë ichmónënga tša tšabá imojtsamama, chë judío bachnangbe más uámana amëndayá y chabe ústonënga, chë saduceunga, puerte envidia imojtsebomna. <sup>18</sup> As chë ichmónëngbioye tmojánishëche y chë bëts pueblentša cárceloye tojtsanëtame. <sup>19</sup> Pero ibetna, Bëngbe Utabná canÿe ángel tbojanichmó y chë utámenentša bëšašangá cha tojánatëfjo, chënga tojtanébuacna y mëntšá tojanéyana: <sup>20</sup> “Motsajna, Bëngbe Bëtsabe bëts yebnentše šmochjámashjna, y entšanga šmochjabuayená ntšamo cuanjama chë nyetsca tescama yomna tšabe vida jtsebomnama, Jesucristoftaca cánÿiñe mo canÿacá jtsemnëse ca.”

<sup>21</sup> Ntšamo tmojanuencá, yëfsana cabá cachëse Bëngbe Bëtsabe bëts yebnoye tmojána y tmojanontšë entšanga jabuátambana.

Chëntscuana, chë bachnangbe más uámana amëndayá y chabe ústonënga, chë Israeloca bëtsëjemëngcá mándayënga y inÿe chentša amëndayënga tmojánachembo jénefnama y jenóyeunayama; as chora chënga tmojanmandá chë utámenocana chë ichmónënga jobiatšama. <sup>22</sup> Pero chë soldadënga chë utámenoye tmojánashjajna ora, chënga chentše ndoñe tmonjánanÿena. Chcasna, chënga tmojtaná chë mándayënga chca jaúnayama. <sup>23</sup> Y tmojánayana: “Chë utámenoca fsënjínÿena lempe tšabá endëtsëtámeñe y soldadëngna nyetsca bëšašangá monduabojanÿanga; pero fsënjatëfjo y tsoye fsënjámashjna orna ndocná chibiátinÿena ca.”

<sup>24</sup> Chë bachnangbe amëndayënga y chë Bëngbe Bëtsabe bëts yebnentša soldadëngbe amëndayá chca tmojanuena ora, yojtsëtëmnana y imojtsentjanaye ndayá chentšana yochjanopásama. <sup>25</sup> Chorna, chënga imojtsemnentše canÿe boyabása tojánashjango y mëntšá tojanéyana: “Chë šmojutámiënga mora Bëngbe Bëtsabe bëts yebnoca montsemna, entšanga montsabatambá ca.”

<sup>26</sup> Chë soldadëngbe amëndayá tojána soldadëngaca, chë Jesusbe ichmónënga junatsama; pero ñe tšabá tmojanënatse, er chënga entšangbiama imojtsauatja, nderado cachëngbioye ndëtšbéngaca muantsëbaye.

<sup>27</sup> Chëngbioca tmojanëshejajna ora, mandayëngbioye tmojanënatse; chora chë bachnangbe más uámana amëndayá mëntšá tojanéyana: <sup>28</sup> —Bënga jabuachana tcbontsëuyaná y tbonjáuyana ndoñe šmontselesenciana jtsóyeuambnayama chë boyabása Jesús tojánayana yojtsemna jabuátambama soyëngama ca. Masque chcasna, mora tšëngaftanga nyetsca chë Jerusalenentša oyenënga chabe soyëngama šmojtubatambá y šmojtseboše, cha tojánóbanama castigo bëngbeñe chaotsemnana ca.

<sup>29</sup> Chorna, Pedro y chë inÿe ichmónënga tmojánayana: —Bënga šontsamna natsana Bëngbe Bëtsá

joyeunayana y chentšana entšangbioye. <sup>30</sup> Chë Taitá, nda bëngbe bëts taitanga monjánadorana, cha tojama Jesús cháuatayenama, chë nda tšëngaftanga šmonjanóba canÿe cruciñe juajabonjëse. <sup>31</sup> Bëngbe Bëtsá tbontatsbaná y chabe catšbioica tbojëtstbema, jt-samëndayama, y tbojábema entšangbe Unachayá y Atsebacayá, chca, Israeloca entšanga ngmënaca chamuenójuaboma bacna soyënga imojtsamama y chca amana chamotsajbanama, y chëngbe bacna soyëngama perdonánënga chamotsemnana. <sup>32</sup> Bënga fsëntsichamo ndayá bënga ndegombre tifjinÿe Bëngbe Bëtsá chca jtsamana ca; chë Uámana Espíritnaca chë soyëngama endbëtsoyebuambnaye. Bëngbe Bëtsá endbëtsama chë Uámana Espíritu cháuamashëngo chë tmojtseyeunanëngbe ainaniñe jtsemándayama ca —chënga tmojánayana.

<sup>33</sup> Chë mándayënga chca tmojanuena ora, puerte tmojanotjayaná y tmojánbošena chë ichmónënga jt-sëbáyama. <sup>34</sup> Pero chë mándayënguentše yojtsemna canÿe fariseo, Gamaliel ca uabainá. Chana canÿe ley abuatambayá inamna y entšanga puerte imnar-respetana. As cha tojantsá y tojanmandá chë ichmónënga ratotema chentšana jubuacnama.

<sup>35</sup> Chentšana chë inÿe mándayënga tojanéyana: “Israeloca taitanga, puerte cuedado šmochtsebomna ntšamo quem boyabásengaftaca šmochjamama.

<sup>36</sup> Quem soyama šmochjenójuaboye: Ndoñe bayté quenátsmëna, Teudas tonjánbocna y cha enjánichamo canÿe uámana entšá canjamna ca, y mo canta patse entšanga cha tmojanasto. Pero chora ínÿyënga cha tmontsanóba y chabe ústonënga tmontsanáshana, y chca lempe tontsanopochocá. <sup>37</sup> Chentšana, chë entšanga jenábemama enjamna ora, Judas chë Galileocá tonjánbocna y tonjanma báseftanga cha chamuastama; pero chánaca ínÿyënga tmontsanóba y nyetsca chabe ústonënga tmontsanáshana. <sup>38</sup> Chíyeca atše cbéyana, quem boyabásenga matabáshejuana y ndocá matorlánana. Ntšamo chënga montsamancá, ñe entšangbe juabna y ñe chëngbe trabajo tojtsemnëse, betesco echanjopochóca. <sup>39</sup> Pero chca Bëngbe Bëtsabe soye tomnëse, tšëngaftanga ndoñe quešmochatobenaye jáyëñjanama. Cuedado šmochtsebomna, nderado mo Bëngbe Bëtsabe uayayënga šmuatjanenobiama ca” —cha tojanéyana.

Y as chënga Gamaliel tmojanoyeuná. <sup>40</sup> Chcasna, chë ichmónëngbioye tmojánachembo, tmojtsanachebuán-ganja y tmojanéyana Jesusbe uabáinaca entšangbeñe ndoñe chamondëtsoyebuambná ca; y chentšana tmojt-anabáshejuana. <sup>41</sup> Chora chë ichmónënga chë amëndayëngbentšana puerte oyejuayënga tmojésanbocna, er Bëngbe Bëtsá tojanalesenciá jasúfriama, chënga Jesusbiama oservénënga bëtsemnayeca. <sup>42</sup> Chentšana, chënga cada te imojanabuatambá y Jesús, chë Uámana Uabuayaná, chë Cristo bëtsemnana entšangbioye imojanabuayiná, Bëngbe Bëtsabe bëts yebnentše y yebnënguenáchnaca.

### Chë ichmónëngbiama ujabuáchanënga tmojanëbuáyana

6 Chë tempo, Jesucristbeñe ošbuáchiyënga betscó imojtsóbotena. Chora chë Jesucristbeñe osbuáchiyëngbentše, chë judiënga griego biyanga batsá imojtsetsátjaye y chë judiënga hebreo biyangbiama mëntšá tmojánayana: “Chë griego biyangbe viudángbioye ndoñe cachcá quemnatëjabuáchana ntšamo chë hebreo biyangbe viudángbioye cada te montsëjabuachancá ca.”

<sup>2</sup> Asna, chë bnëtsana uta ichmónënga nyetsca chë Jesucristbeñe ošbuáchiyënga tmojanëbuaja y tmojanéyana: “Ndoñe tšabá quenátsmëna, bënga jtsajbanana Bëngbe Bëtsabe palabra oyebuambnayana nÿe chë viudanga jtsanÿenama chë tojtsëjaboto soyënguiñe. <sup>3</sup> Chcasna, baconga y batanga, tšëngaftanguentšana canÿsëftanga mëbuáyana, tšabá mandbomngcá šmëbuátmënga, chamotsemna osertánënga y chë Uámana Espiritu chëngbe ainaniñe chaotsemánda, as chënga chë ujabótënga jtsëjabuáchanama trabajo fchanjábanÿiye. <sup>4</sup> Y bëngna šontsamna nyets tempo Bëngbe Bëtsáftaca jtsencuëntayana y Bëngbe Bëtsabe palabra entsanga jtsabuayiyayana ca” —chënga tmojánayana.

<sup>5</sup> Nyetscanga tojanogusetá ntšamo chë ichmónënga tmojanayancá; as, Esteban tmojanábuayana; canÿe boyabása puerte ošbuachiyá cha inamna y chë Uámana Espiritu chabe ainaniñe yojanmánda. Chentšana tmojanëbuáyana Felipe, Prócoro, Nicanor, Timón, Parmenas y Nicolás (cha inamna ndoñe judío entsá, Antioquía bëts pueblócá, y cha yojanamana Bëngbe Bëtsá jtsadoránana mo cach judiëngcá). <sup>6</sup> Chentšana chënga tmojanënatse Jesucristbe ichmónënga imojtsemnoye; chocna, chë Jesusbe ichmónënga Bëngbe Bëtsá tmojanimpadá chë ichmónëngbe trabajënguiñe chë ubuáyanënga chaújabuachama, chëngbe cucuatšënga chëngbe bestšašentše jajájuase.

<sup>7</sup> Más banga Bëngbe Bëtsabe palabra imojtsuenana, y chca, Jesucristbeñe ošbuáchiyënga más imojtsóbotena, y Jerusalenentše más ošbuáchiyënga betscó imojtsóbotena. Y ba judiëngbe bachnángnaca tmojanontšë Jesucristbeñe jtsošbuáchiyana, ntšamo chë ínÿenga imojtsanošbuachecá.

### Esteban tmojánishache

<sup>8</sup> Esteban, Bëngbe Bëtsabe obenana y chábentšana tšabe bendicionënga yojtsebomnëse, entsángbeñe bëts soyënga yojtsama. <sup>9</sup> Báseftanga “Ya Cachcá Atabashejuana Oservénënga ca” uabainëngna tmojanontšë Estébanoftaca enatsëtsnayana. Chënga imojamna judiënga Cirenoquënga, Alejandriokuënga, Ciliacia y Asioquëngnaca, y chëngbe enefjuana luare yojanabaina “Ya Cachcá Atabashejuana Oservénëngbe Yebna ca”. <sup>10</sup> Pero chë Uámana Espiritu tojanma Esteban chaóyebuambama bëts cá osertanacá, y chíyeca chënga ndoñe imontsobena ntšamo cha jojuana. <sup>11</sup> As

chënga báseftanga tmojanëbuénaye Estébanbe contra podesca soye chamuayanama, mëntšá: “Cha fsënjoyeuná Moisesbiama y Bëngbe Bëtsabiama ndoñe tšabá jtsóyebuambnayana, mo cuafjoyanguangcá ca.”

<sup>12</sup> Chcase chënga tmojanma entsanga, bëtsëjemëngcá mándayënga y ley abuatambayënga Estébanbe contra chamóntša enbouenanana; y as, Esteban tmojanotbá y chë mándayënga imojtsemnoye imojúichëmo. <sup>13</sup> Y tmojanënatse básefta entsanga, uayátsenaye soyënga y podesca soyënga Estébanbe contra chamuayanama; as chënga mëntšá tmojánayana: “Mua bacna soyënga entsichamo chë Bëngbe Bëtsá jtsadoránama bëts yebnama y Moisesbe leyëngama. <sup>14</sup> Y fsënjoyeuná cha jayanana, Jesús Nazaretocá Bëngbe Bëtsabe bëts yebna caochtsepochoa y caochjama bënga nÿe chabe mandéngaca mandánënga chamotsiyenama y ndoñe ntšamo Moisés bëngbe bëts taitanga tojëftsanabu-atambacá ca.”

<sup>15</sup> Chë mándayënga y nyetscanga chentše imojëtsetbiamanënga Esteban tmojanonÿinÿé ora, tmojáninÿe chabe jubiá yojtsebuashinÿinÿana mo canÿe ángelbe jubiacá.

### Ntšamo Esteban tojanenëuyaná

7 Chora chë bachnangbe más uámana amëndayá, Estébanbioye tbojantjá: —¿Ntšamo acbiama montsichamcá ndegombre yojtsemna ca?

<sup>2</sup> As Esteban tojanéjua: —Taitanga y baconga, mouenënga. Bëngbe Bëtsá, chë corente uamaná endmëná, Abrahámbioye tbojánëbëbocna, cha Mesopotamioca yojaniyena ora; tbojánëbëbocna, Harán bëts puebloca joyénanama cabá nda ora, <sup>3</sup> y Bëngbe Bëtsá tbojaniyana: “Metseboshjona acbe fshantse y acbe pamíllanga y cbochanjinÿinÿiye luaro ye cochjá ca.” <sup>4</sup> As Abraham chabe luare Caldea tojëftsanboshjona y tojána Haránoca joyénanama. Chabe taitá tojanóbanentšana, Bëngbe Bëtsá Abrahámbioye chë luaroye tbojanánatse, chë mora tšëngaftanga šmontsiyenentše. <sup>5</sup> Pero quem luariñe ni mo base fshantse ndoñe tbonjëftsanatsetá, ni mo ndayentše jtsiyenama. Pero aíñe Abrahámbioye tbojanšbuachená chë fshantse jatsetayama, chabiama y chabe básengbiama, Abraham tojóbanentšana. Chca tbojanšbuachená ora, Abraham ni canÿe šëšona bonjánbomna. <sup>6</sup> Y Bëngbe Bëtsá mëntšá tbojaniyana: “Chë ácbentšana entsanga, ínÿengbe luaroca áshjajnënga mochántsemna, y choca oyenënga chëngbe oservénënga chëngbioye mochanjábiana y canta patse uatëntscuana jabuache mochanjasufrina ca.” <sup>7</sup> Y mëntšánaca tbojaniyana: “Pero atše chanjácastigaye chca oservénënga chacmojábiana luarentša entsanga; y as, chentšana chë ácbentšana entsanga mochanjésebocana y mora bontsemna luaroye mochanjésabo y muentše atše šmochántsadórana ca.” <sup>8</sup> Bëngbe Bëtsá Abrahámbioye tbojanšbuachená nÿe cha y chabe básengbe Taitá cha jtsemnama y jamama tšabe bendicionënga chëngbeñe chaotsemnama, y chama, chaotsinÿnamna tbojanmandá chabe šëšona, boy-

abásetema tojonýná ora, base bobachtema chë más delicadentse jatëtšana. Chíyeca, chabe uaquiñá Isaac tojanonýná ora, posufta tianoye Abraham base bobachtema chë más delicadentse tbojantëtse. Isaac cachcá tojanma chabe uaquiñá Jacóboftaca y Jacob cachcá tojanma chë chabe bnétsana uta uaquiñéngaftaca. Chënga monjamna chë Israeloca bnétsana uta bëts pamíllangbe taitanga.

<sup>9</sup>“Quem uaquiñénga bëngbe bëts taitanga monjamna. Chëngna, chëngbe uabentsá Josébioye envidia imnabomna y tmojtsatanobuiye, Egiptoye canye oservenacá chamotsánatseñama. Pero Bëngbe Bëtsá Josébioye nyets tempo ibnauájabuachana, <sup>10</sup> chíyeca nyetsca chabe ngmenënguentsána tbojanatsbocá y Bëngbe Bëtsá tojanma cha chaotsetatšëmbuama tšabá jóyebuambayama chë Egiptoca réybentše, Faraón ca uabainá. Bëngbe Bëtsá tojanma chë Faraón chaoyeuá ntšamo José yojamnama; chíyeca Faraón Josébioye tbojánbema Egiptoca mandado y chabe yebnënguentsë oyenëngbiámnaca.

<sup>11</sup>“Chë tempo, Egiptó y Canaán luariñe bëts shëntsana tojanóshjango y puerta ngménana yojtsemna y bëngbe bëts taitanga ndoñe imontsobena saná jónýenama. <sup>12</sup> Pero Jacob tojántatšëmbona Egiptoca saná yojtsemnama; asna, chabe uaquiñénga, chë bëngbe bëts taitanga choye tojanichamó. Chora yojamna chë natsanama chënga Egiptoye jama. <sup>13</sup> Uta soyama chënga tmojtesaná ora, José chabe catsátanga tojanéyana: ‘Atše José sëndmëna, tsëngaftangbe uabentsá ca.’ Chca chë Faraón Josebe pamíllangbiama tojántatšëmbona. <sup>14</sup> Chentsána, José tojanmandá chabe taitá Jacob y nyetsca pamíllanga Egiptoye chamotsama. Canýsëfta bnétsana shachnénga imojamna chë Egiptoye tmojánanga. <sup>15</sup> Chcasna, Jacob Egiptoye tojána choca joyéanama. Choca cha tojanóbana y chë inye bëngbe bëts taitángnaca. <sup>16</sup> Jacob y chabe básenga, ntšamo imojtsobancá, chëngbe cuerpo Siquem bëts puebloye imojtsatambaye y tmojanëtebuantsá, Abraham tojëftsambuamé cuevëshënguñe. Abraham canye crocenánama Hamorbe uaquiñéngbioye, chëshënga yojtëyentsbuamiñe Siquem puebloca.

<sup>17</sup>“Ntšamo Bëngbe Bëtsá Abrahámbioye tbojanšbuachenacá jamama yojtsobeco ora, Egiptoca corente tmojanoboté Israeloca entsánga y banga chënga imojtsemna. <sup>18</sup> Cabana, Egiptoca inye rey tojanoyayé y cha Josébioye ndoñe tbonjanabuátmana. <sup>19</sup> Chë reyna, bëngbe entsánga, chë bëngbe bëts taitángbioye tojanaingñé y tojanma chënga puerta chamosufrima; tojanamëndá, chë tmojtsónýna šësonatémënga cachcá jtsénýayana chamotsóbana. <sup>20</sup> Chë tempo canye básetema tojanonýná y cha Moisés ca tmojanabaye. Bëngbe Bëtsá Moisesbiama oyejuayá yojtsemna y chabe bëtsétsata cach yebnentše tmojanboché unga ishinyëntscuana. <sup>21</sup> Cachcá jonýayama yojtsamna orna, Faraonbe bembe tbojanocñe y mo cachabe uaquiñá cuenta tbojanboché. <sup>22</sup> Chca, chë Egiptoquënga imnatátšëmbo soyënga

Moisés tmojanbuatëmbá y canye uámana entsá tojánbocna jóyebuambayama y ndayánaca jamama.

<sup>23</sup>“Canta bnétsana uata tojánashjache ora, tojanenujabó jama jtsetatšëmbuama ntšamo chë Israeloquënga, chabe entsánga imojtsemnama. <sup>24</sup> Canye, Moisés tojáninye canye Egiptocá canye Israelocábioye ibojtsetantsetaye ora; as Moisés tbojanoboguiyaná y chë Egiptocábioye tbojtsanóba. <sup>25</sup> Moisés yojtsanjuabnaye chë Israeloquënga yojtsósertana, Bëngbe Bëtsá yochjanma cach Moisesbe obenánaca chë Egiptoca mandentsána chëngbioye játsebacama ca. Pero chë Israeloquënga ndoñe yontsésertana. <sup>26</sup> Yëfsana, Moisés tojánanyena útata, cach Israelocata, ibojtsentsjanaye; chora cha betscó tojána jetséuyanama y tojanéyana: ‘Tsëndata catsáta šondmëna, ¿ndáyeca šojtsentsjanata ca?’ <sup>27</sup> As, chë inyábioye ibojtsentsjanayá Moisésbioye tbojtsanajuatsëntše y tbojaniana: ‘¿Nda bëngbeñe tcmënjajayé mandado y chë tšabá o ndoñe tšabá fstsamama chacuayanama ca?’ <sup>28</sup> ¿Cojtseboše átšnaca jóbama, ntšamo tonjopasá yëfse chë Egiptocábioye tconjobacá ca?’ <sup>29</sup> Moisés chca tojanuena ora, Madián luaroye tojtsanachá y choca yojoyena inye luarocana ashjanganocá. Chentše uta uaquiñata yojéftsabamna.

<sup>30</sup>“Chentsána canta bnétsana uatëse, entsánga ndoyena luariñe, Sinaí tjañe béconana, canye ángel tbojánëbëbocna zarzëscha yojtsángbototjuanentše. <sup>31</sup> Moisés yojenjnaná ndayá yojtsonýama y tšabá jinýama tojanobeconá ora, tojanuena Bëngbe Bëtsá mëntšá ibojtsatsétsnaye: <sup>32</sup> ‘Atše acbe bëts taitangbe Bëtsá sëndmëna, Abraham, Isaac y Jacobëbe Bëtsá ca.’ Moisés chama tojanëuatjaná, ibojtsengmëmnyaye y añemo ndoñe yontsebmoma choye jontješiyama. <sup>33</sup> As Bëngbe Utabná tbojaniana: ‘Motsenóshecbotsca, er aca contsemnentše nye atšbiama luare endmëna, er átšnaca chentše séntsemna. <sup>34</sup> Ndegombre sënjinýe ntšamo atšbe entsánga Egiptoca montsesufrina y sënjouena chëngbe oyaboyuayana, y atše sënjabo chënga jabátsebacama. Chcasna, mabouena, Egiptoye cbochanjíchmuca ca’ —Bëngbe Bëtsá tbojaniana.”

<sup>35</sup> Chentsána Esteban tojanéyana: “Quem Moisés entsánga tmojtsanaboté y tmojaniana: ‘¿Nda bëngbeñe tcmënjajayé mandado y chë tšabá o ndoñe tšabá fstsamama chacuayanama ca?’ Masque chca, Bëngbe Bëtsá mo mandayacá y atsebacayacá tbojesanichmó, chë zarzëshentše tojanobinýná ángeloftaca. <sup>36</sup> As Moisés, bëngbe bëts taitanga Egiptocana tojésanëbuacna y bëts soyënga tojanma, y inye soyënga Bëngbe Bëtsabe obenana jinýanyiyama Egiptentše, chë Buángana ca uabaina mar béjayentše y entsánga ndoyena luarentše, canta bnétsana uatëntscuana.

<sup>37</sup> Cach Moisés Israeloca entsánga mëntšá tojanéyana: ‘Bëngbe Bëtsá tsëngaftanguentsána canya bochanjábema atšcá Bëngbe Bëtsabe juabna oyebuambnyá ca.’ <sup>38</sup> Moisés Israeloca entsángaftaca yojéftsemna chë entsánga ndoyena luaroca. Choca chë entsánga tmojánenefjna Sinaí tjañe béconana. Chentsána canye ángel Moisésoftaca tojanoyebuambá, bëngbe bëts taitángbioye chë buayenana soye Moisés chaóye-

buambama, chë entsãnga tšabe vida jónyënama pal-abrënga; y Moisés chca tojanma, bëngnaca chë pal-abrënga jouenama jobenayama.

<sup>39</sup> “Pero bëngbe bëts taitanga ndoñe tmonjánbošëna joyeunayama, masna nÿe tmojtšanaboté y Egiptoye jeshéconama imojtsaiseboše. <sup>40</sup> Moisés cabá chë tja tsjuanoca chë ángeloftaca yojtsemna ora, chëngbe bachnangbe más uámana amëndayá Aarónbioye mëntšá tmojaniana: ‘Bëngbe Bëtsabe cuenta š-mayentšpormá canÿe buashinÿinÿana soye jadórama, bënga chašúnatsama. Er bënga quemátstatšëmbo ndayá yojtsopasana Moisés, chë Egiptocana šonjëft-sëbuacnáftaca ca.’ <sup>41</sup> As tmojanma canÿe buashinÿinÿana soye mo canÿe uacnabecá y cha jadórama ba bayënga tmojanëbaye, y tmojanóboyējuanga cachënga chë soye tmojanpormáyeca. <sup>42</sup> Chë causa, Bëngbe Bëtsá chëngbentšana tojtšanojuánañe y cachcá tojesanëñyaye chëngbe bacna soyënga causa, estrellatëmënga chamotsadoránama. Chca jochnënguama, Bëngbe Bëtsabe juabna oyebuambayëngbe librésañe mëntšá endayana, ntšamo Bëngbe Bëtsá tojanayancá:

Israeloca entsãnga,  
¿Atše jëtschuayama bayënga chešmëñjanëbaye y chë soyënga chešmëñjanátšëmbona,  
chë canta bnëtsana uata entsãnga ndoyena luarentše tšëngaftanga šmonjëftsemna ora?

<sup>43</sup> Atše jadóra cuentna, chë Molocbiama jebna soye š-monjanacutná y cha šmonjánadorana,  
y chë Refánbe estréllacnaca cachcá šmonjánama.

Chë soyënga mo Bëngbe Bëtsá cuenta šmonjánbomna y cach tšëngaftanga šmonjanobopormá jadórama. Mora chë causa atše chanjama, Babilonientšana más chcoye tšëngaftanga chacmotsénatsama ca” —chiñe endayana.

<sup>44</sup> “Bëngbe tempsca bëts taitanga entsãnga ndoyena luaroca, chë jatsjacama opodena yebna imnabomna; chë yebnentše Bëngbe Bëtsá chëngaftaca tojanoyebuambá. Inajebna ntšamo Bëngbe Bëtsá Moisésbioye tbojanmandacá, y cha tojanma ntšamo chaojebuama Bëngbe Bëtsá tbojaninÿinÿecá. <sup>45</sup> Bëngbe bëts taitangna chëngbe taitángbentšana chë jatsjacama opodena yebna chëngbiama tmojanóyëngacñe, y chënga chë Canaán luaroye Josuéftaca, chë inÿe luaroquëngaftaca jéntsjava tmojána ora, chë jebna soye tmojanamba y chocna, Bëngbe Bëtsábeyeca chentša entsãngbioye Israeloquëngbentšana tmojtanëbuacna; y chë jebna soyna chë tmojanayëñjaná luarentše tojanoquedá, rey David yojëftsiyenëntscuana. <sup>46</sup> David tšabá mandbomná inamna, chíyeca Bëngbe Bëtsá cháftaca puerta yotsóyejuaye. David chábioye lesencia tbojanotjañe jajebuama, Bëngbe Bëtsá chë Jacob tbojanadorá cha, chentše chaotsiyenama. <sup>47</sup> Pero Salomón inamna nda chë Bëngbe Bëtsabe bëts yebna tojanjebuá. <sup>48</sup> Masque chë celoca Bëngbe Bëtsá, entsãngbe jebna yebniñe ndoñe quenatiyena. Ntšamo Bëngbe Bëtsabe juabna oyebuambnayá tojanabemcá, ndayá Bëngbe Bëtsá tojanayancá:

<sup>49</sup> “Celoca endmëna chë luare ndayentšana atše tsmánda,  
y quem luare endmëna nÿe mo canÿe tšenëtemcá ndayentše atšbe shecuatšënga chjacjaye.

As, ¿ntšamo atšbiama jebna yebna šmochjajebo ca? —chë Utabná jayanana—;

‘o ¿ndaye yebnentše atše jóchnama chjobenaye,  
<sup>50</sup> ndegombre cach atše nÿetsca chë soyënga tijamëse ca?’ ”

<sup>51</sup> Esteban mëntšánaca tojanéyana: “Tšëngaftanga nÿets tempo josértama ndëbošënga šmondmëna; šmondmëna ainana mo chë Bëngbe Bëtsábeñe ndošbuáchiyëngbe ainancá, y Bëngbe Bëtsabe soyëngama nduauenanënga šmondmëna. Tšëngaftanga ndocna te quešmátsboše chë Uámana Espiritu joyeunayana. Ntšamo tšëngaftangbe bëts taitanga monjaniiyencá, tšëngaftángnaca cachcá.

<sup>52</sup> ¿Bëngbe Bëtsabe juabna oyebuamb-nayënguentšana, ndábioye tšëngaftangbe bëts taitanga ndoñe monjanacmena? Chë Bëngbe Bëtsá tojanichamó entsãnga chënga tmojtšanëbaye, y mëngna entsãngbioye imojanabuayinÿá Cristo, chë ntšamo Bëngbe Bëtsá yobošcá amá yochjánabama. Pero morna, uayayëngbe cucuatšine cha šmojá-boshjona y šmojóba. <sup>53</sup> Bëngbe Bëtsabe mandënga angeléngaftaca tšëngaftanga šmonjanóyëngacñe, pero chë soyënga ndoñe quešmátsyeunana ca” —cha tojanéyana.

#### Esteban ndëtšbéngaca tmojanóba

<sup>54</sup> Chentša mándayënga chca tmojanuena ora, Estébanoftaca tmojanotjayaná y tmojanenaftëšbonzentsé, rábiaca imojtsemnana. <sup>55</sup> Pero chë Uámana Espiritu Estébanbe ainaniñe corente yojtsemándaye. Celoye yojontješiyey y Bëngbe Bëtsabe buashinÿinÿanana yojinÿe, y Jesús, Bëngbe Bëtsabe catšbioica yojtsatsana. <sup>56</sup> As, Esteban tojánayana: “¡Mouenënga, sëntsonÿá celoca entsatëfjna y Bëngbe Bëtsá Entšá tbojanbemá Bëngbe Bëtsabe catšbioica entsemna jtsamëndayama ca!”

<sup>57</sup> Chora chënga jabuache imojtseyoye, imojtsenamatsachto ndoñe más ntsuenanama y Estébanbioye tmojanontšënja. <sup>58</sup> Chentšana, chënga chë pueblentšana tmojtšanábocna y ndëtšbéngaca tmojtšanatëchënganja. Chë Estébanbioye mal tmojanquedangna entsãyangá tmojtšanenátsejca y canÿe bobontse, Saulo ca uabainá, tmojesanábonyiñe chaotsinÿenama.

<sup>59</sup> Ndëtšbéngaca imojtsenanantscuana, Esteban Bëngbe Bëtsáftaca ibojtsencuëntaye y mëntšá tojánayana: “Bëngbe Utabná Jesús, atšbe espiritu šmóyëngaca ca.”

<sup>60</sup> Chentšana Esteban tojanoshamentšé y jabuache tojánayana: “¡Bëngbe Utabná, chëngbe bacna soye motsaperdoná ca!” Y chca tojánayana ora, tojanóbana.

**8** Saulo chentše yojtsemna y tšabá imojtsama ca yojtsejuabnaye, Esteban tmojanóbama.

### Saulo yojánama chë Crístbeñe ošbuáchiyënga chamot-sesufrínama

Cach te, ínÿenga tmojanontsé Jesucristbeñe osbuáchiyënga Jerusalenentše ucamenana y jtsamana puerte chamotsesufrínama; chcasna, chënga tmojt-sanacheta y Samarioye y Judeoye tmojanáshana. Nÿe chë Jesucristbe ichmónënga ndócnoye tmojánacheta. <sup>2</sup> Básefta boyabásenga, Bëngbe Bëtsá adórayëngna, Esteban tmojanamba jauábtontsama y chabiama puerte tmojánenobošachna. <sup>3</sup> Chëntscuana, Saulo yojt-sentsena Jesucristbeñe ošbuáchiyënga jtsapochóca-ma y yebnënguenache yojánamashjuana boyabásenga y shembásenga sjojónana ubuacana jutámia.

### Felipe Samaria luaroca tšabe noticiëngama yojanabuayiyá

<sup>4</sup> Y Jesucristbeñe ošbuáchiyënga tmojanáshanëngna nÿetsquénache imojánabuayiyayeye Jesusbe tšabe noticiënga. <sup>5</sup> Chca, Felipe Samarioye tojána y tojanontsé chë Bëngbe Bëtsabe Uámana Uabuayaná, Crístbiama, chentša entsanga jábuayenama. <sup>6</sup> Entšanga imojánenefjuana Felipe joyeunayama y tmojáninÿe bëts soyënga cha jtsamana, Bëngbe Bëtsabe obenana jinÿanÿiyama. Chënga nÿetscanga ntšamo Felipe yojtsichamcá tšabá imojtseyeunana. <sup>7</sup> Banga bayëjbe juabna uambayënga tšabá imojtsatsmëna y chë bacna bayëjënga jabuache jtsaiyoyëse chëngbentsana imojtsaisebocana; y banga jama ndobenënga y coshetënga tšabá imojtsatsmëna. <sup>8</sup> Chë soyama chë pueblentša oyenënga corente imojtsóyejuaye.

<sup>9</sup> Pero canÿe pueblentše Samarioca inamna canÿe boyabása, Simón ca uabainá; cha tempo inamna canÿe bocjuaná y chë Samarioca entsanga chabe soyëngama imojánenjanayeye. Cha yojánichamo cha canÿe uámana entšá canjamna ca. <sup>10</sup> Y chábioye corente imnayeunana nÿetscanga, uámanënga y nduámanëngnaca. Entšanga imojánichamo: “Mua entsemna chë Bëngbe Bëtsabe bëts obenana inÿanÿnayá ca.”

<sup>11</sup> Y ndegombre chënga corente imnayeunana, er cha chë bocjuanana soyëngaca bayté chë entsanga ingñëngna y ojnánënga yojtsabamna. <sup>12</sup> Pero chë luarentša entsangna, Felipe tmojanoyeuná chë cha yojtsëtsëtná tšabe noticiënga Bëngbe Bëtsabe amëndayama y chë Jesucristbiama tšabe soyënga. Chorna chënga Jesucristbeñe imojtsošbuáchiye, y boyabásenga y shembásenga tmojánenabayeye. <sup>13</sup> Y cach Simónë-naca Jesucristbeñe yojtsošbuáchiye y tojanenábaye, y chentšana cada te Felipeftaca cha yojtsanmëna. Cha tojáninÿe Felipe chë bëts soyënga Bëngbe Bëtsabe obenánaca jamana, y chama ojnananá yojtsemna.

<sup>14</sup> Chë Jerusalenoca imojtsemna ichmónënga tmoján-tatšëmbona Samarioca entsanga Bëngbe Bëtsabe palabra tmojanóyeunama; as, chora Pedro y Juan choye tmojanichamó. <sup>15</sup> Pedro y Juan Samarioye tbojánashjango ora, chentše Jesucristbeñe ošbuáchiyëngbiama Bëngbe Bëtsá tmojanimpadá, as chë Uámana Espiritu

chëngbeñe cháumashënguama jtsemándayama. <sup>16</sup> Er cabá ni mo cánÿabeñe chë Uámana Espiritu tonjána-mashëngo; chënga tmojánenabayeye Bëngbe Utabná Jesús jótšëmbonëse, chábeñe ošbuáchiyënga jtsemnana imojtsebóšeyeca. <sup>17</sup> As Pedro y Juan chëngbe bestšašifne cucuatšënga tbojancjá, y chca, chë Uámana Espiritu tojánamashëngo chëngbe ainaniñe jtsemándayama.

<sup>18</sup> Simón tojáninÿe, chë ichmónënga entsángbeñe cucuatšënga tmojacjá ora, chë Uámana Espiritu chëngbeñe jamashënguana. As chora Simón chë ichmónënga tojanéyana: —Quem crocénana mosháchiñe, <sup>19</sup> y átsnaca chë obenana šmatšetá, y ndábeñnaca cucuatšënga chajajajó ora, chábeñnaca chë Uámana Espiritu cháumashëngo ca.

<sup>20</sup> As Pedro tbojaniana: —¡Acbe crocénana infiernoye chaotsá y ácnaca, chë Bëngbe Bëtsabe tšetana soye crocénaca jobuámiñama yopodena ca tcojajuabó causa! <sup>21</sup> Ndegombre, aca bëngaftaca ndoñe quecátsmëna, ni bëngbe trabajo acbiama quenátsmëna, Bëngbe Bëtsabe delante acbe ainaniñe tšabe juabnënga ndoñe quecátbomna causa. <sup>22</sup> Ngménaca cochjenójuaboye quem bacna soye tcojamama y chca amana cochtsajbaná y Bëngbe Bëtsá cochjaimpáda, aca chca tcojajuaboma nderádose cmatjaperdóna.

<sup>23</sup> Atše séntsetatšëmbo, acbe ainaniñe tša bacna juabnënga ínÿengbiama yojtsemnama; y bacna soyënga amana jtsajbanama ndoñe quecátobena causa, aca mo canÿe ntsacjuanacá contsemna ca —Pedro tbojaniana.

<sup>24</sup> As chora Simón tojanéyana: —Bëngbe Utabná atšbiama šochjaimpáda, ntšamo šmonjauyancá ndoñe chandëpasama ca.

<sup>25</sup> Pedro y Juan, ntšamo Bëngbe Utabná Jesucristbiama tbojaninÿcá y ibnatatšëmbcá entsanga imojtsëtsët-snayeye. Chentšana, Jerusalenoye tbojésanata y tbojánachnëngo ba Samarioca pueblënguëjana, tšabe noticiënga entsanga abuayiyayeye.

### Felipe y chë Etiopía luaroca reinabe uajabuachaná

<sup>26</sup> Chentšana, Bëngbe Utabnabe canÿe ángel Felípbioye tbojaniana: “Moprontá y tsmána luarëngoye motsa, Jerusalenentšana Gaza ca uabaina bëts puebloye benachëjana ca.” Chë benachna entsanga ndoyena luarëjana yojanachnëngona. <sup>27</sup> As Felipe yojëtsëtsbaná y tojána. Benachiñe tbojáneninÿena canÿa Etiopía luarocáftaca. Etiopía luaroca canÿe reiná inamna y chë boyabásana chabe uajabuachaná y chabe crocénana bojanÿá inamna. Chana Jerusalenoye tojánabo Bëngbe Bëtsá jadórama. <sup>28</sup> Chora Etiopía luaroye yojtsataye, chabe cochëshañe inayésenotbemañe, y chë Bëngbe Bëtsabe juabna oyebuambnayá Isaíasbe uabemana librëša yojtsaiualíaye.

<sup>29</sup> Chora chë Uámana Espiritu Felípbioye tbojaniana: “Mobeconá y chë cochësha juachaca cochtsayeye ca.”

<sup>30</sup> As Felipe betscó yojobeconá. Chora yojouena chë Etiopía luarocá, Isaíasbe uabemana librëša yojt-



saiualíaye; as tbojantjá: —¿Chë contsalía soye quecmo-  
jtsosertana ca?

<sup>31</sup> Y chë Etiopía luarocá tbojanjuá: —¿Ntšamo  
šochjosérta, ndocná šonjabuayenase ca?

Y Felípbioye tbojanijana: —Diosmanda, atšbe  
cochëshoye másëngo y atšbe juachaca mabótbema  
ca.

<sup>32</sup> Isaíasbe uabemana librésañe mëntšá yojtšalíaye:  
Cha tmojanánatse mo canye oveshá jóbama cuafju-  
natscá;

y chë mo canye oveshá tmojtsëtsbotjná ora, cha iytë-  
ca jtsemnana,

chánaca cachcá, chacá tondaye chenátanayana.

<sup>33</sup> Entšanga tmonjanma cha puerta chaosufrima,  
mo cha canye nduamaná cuaftsemncá y ntšamo  
ndoñe betsomerecencá cháftaca tmonjanma.

Ndocná nanjobenaye chabe básengbiamá jacuén-  
tana,

quem luarentša chabe vida tmontsanbojuaná causa  
ca.

<sup>34</sup> Chora chë Etiopía luaroca uajabuachaná Felípbioye  
tbojanijana: —Diosmanda, šmobuayená, ¿ndabiamá  
Bëngbe Bëtsabe juabna oyebuambnayá chca yojt-  
sichamo, cachabiamá o ín'yabiamá ca?

<sup>35</sup> As Felipe tojanontšé, chë Isaíasbe librésañe yojt-  
sayana sóyeca, Jesusbe tšabe noticiënga jábuayena-  
ma.

<sup>36</sup> Chentša bënëse, canye bėjaye obëjniñe juachañe  
ibojtsachñējuana. Chora chë uajabuachaná tojá-  
nayana: —Muentše bėjaye entsemna. ¿Ndáyeca ndoñe  
nanjopódia atšbe muentše uabainá jtsemnana ca?  
Diosmanda, šmabaye ca.

<sup>37</sup> As Felipe tbojanijana: —Jesucristbeñe nyets acbe  
ainánaca tcojtsošbuáchese, aíñe echanjopódia  
juabáyama ca.

Y chë boyabása tbojanjuá: —Aíñe, sëntsošbuaché Je-  
sucristo Bëngbe Bëtsabe Uaquiñá yomnama ca.

<sup>38</sup> As chë Etiopiocá tojanmandá chë cochëshá chauá-  
totonama. Chentšana, nyets útata chë bėjayoye tbo-  
janashëbëbuástjango y Felipe, chë Etiopiocá ua-  
jabuachanábioye tbojanabaye.

<sup>39</sup> Chë bėjayentsana tbojtanbocna ora, chë Uámana  
Espíritu Felipe ibojtsánatseñe y chë uajabuachaná ya  
ndoñe más Felípbioye ibontsonyaye, pero corente oye-  
juayá yojtšatoñe. <sup>40</sup> Felipe tojántatšëmbona Azoto bëts  
pueblocá yojtsemnana, y chentšana tojána nyetsca  
pueblënguenache chë tšabe noticiënga abuayinyaye,  
Cesarea puebloye jashjanguëntscuana.

### Ntšamo Saulo Crístbeñe ošbuachiyá tojanóbema

**9** Saulo chëntscuana cabá Bëngbe Utabnábeñe os-  
buáchiyënga yojanautatjná jtsëbáyama. Chama  
cha tojána chë bachnangbe más uámana amën-  
dayábioye, <sup>2</sup> uabemana tsbuanachangá jauátjañama,  
as chëchangaca jobenayama chë Damascoca  
judiëngbe enefjuana yebnëngoye jama, y chocna, chë  
Jesucristo tojanin'yanyé Benache ustoniñe, boyabásen-  
ga o shembásenga toján'yenëse, jótabayama y

Jerusalenoye junatsama. Y chca jamama tojánbocna.

<sup>3</sup> Pero ya Damasco béconana yojtšaye orna, nye nde-  
olpe chabe juachañe celocana canye bëts tcuinye to-  
janbuashin'yinyëna. <sup>4</sup> Chora Saulo fshantsoye tojánsha-  
jaye y canye oyebuambnayana tojanuena, mëntšá:  
—Saulo, Saulo, ¿ndáyeca chca šcojtsacmena ca?

<sup>5</sup> As Saulo tbojantjá: —¿Nda comna, Bëngbe Utabná  
ca?

Y chë oyebuambnayana tbojanjuá: —Atšbe sëndmëna  
Jesús y aca condama atšbe entšanga chamotsesufrína-  
ma. <sup>6</sup> Pero matëtsbaná y Damascoye mamáshëngo;  
chentše canya cmochanjabuayená ndayá jamama  
cmojtsemnana ca.

<sup>7</sup> Chë Sáuloftaca imojánajna boyabásenga tša auat-  
janánënga imojtsemna y chíyeca ndoñe imontsobena  
jóyebuambayana; er nye chë oyebuambnayana tmo-  
januena, pero ndocná tmonjánin'yë. <sup>8</sup> As Saulo  
fshantsentsana tojtantsbaná y tojtanobuchatéfjona  
ora, tondaye yontsobena jin'yana. Chcasna, chë ín'yen-  
ga tmojëftsanobuacuetëntšé y chca, Damascoye tmo-  
janánatse. <sup>9</sup> Chentše yojëftsemna unga te, jin'yama  
ntsobencá, ni ntjascá y tondaye ntjofšiyá.

<sup>10</sup> Damascoca Jesucristbeñe canye ošbuachiyá inoye-  
na, Ananías ca uabainá. Cha Bëngbe Utabnábioye mo  
otjenayoquécá tbojánin'yë y Bëngbe Bëtsá tbo-  
janijana: —Ananías ca.

As cha tbojanjuá: —Bëngbe Utabná, ¿ndayá chjama  
ca?

<sup>11</sup> Y Bëngbe Utabná tbojanijana: —Moprontá y mot-  
sa chë “Ndericho tsáshenañe ca” uabáinoye, y Júdasbe  
yebnentše cochjanotícia canye boyabásabiamá, Saulo  
ca uabainábiamá, Tarso pueblócá; cha mora Bëngbe  
Bëtsáftaca bentsencuénta. <sup>12</sup> Saulo ya tonjin'yë mo ot-  
jenayoquécá, canye entšá Ananías ca uabainá  
entsamashjuana y chabe cucuatšënga chabe best-  
šašiniñe entsejájua, chca, cha chabuatabin'ynama ca.

<sup>13</sup> Ananías chca tojanuena ora, tojánayana: —Bëngbe  
Utabná, banga ba soyënga chabiamá šmonjacuentá;  
Jerusalenoca tša bacá acbe entšanga imomnënga to-  
jáborye. <sup>14</sup> Y mora entsebmna mando chë bach-  
nangbe amëndayéngbentsana, muentše aca otšëm-  
buanënga jótabayama ca.

<sup>15</sup> As Bëngbe Utabná tbojanijana: —Motsa, er atšbe  
cha sënjuábuayana atšbiamá chaotrabajama; chaóye-  
buambama ndoñe judiëngbeñe, reyëngbeñe y Israelo-  
ca entšángbeñnaca, y chca, chënga atšbiamá chamo-  
tatšëmbonama. <sup>16</sup> Atšbe cha chanjin'yinye ntsachetšá  
ibojtsemna átšbeyeca jasúfriama ca.

<sup>17</sup> As Ananías tojána Saulo yojtšanmëna yebnoye. To-  
jánamashëngo ora, Saulëbe bestšašiniñe chabe cucuat-  
šënga tojanjajó y tbojanijana: “Jesucristbeyeca atšbe  
catsata, Saulo, Bëngbe Utabná Jesús, chë benachëjana  
conjanabó ora cmonjanebëbocná, šonjichmó aca chac-  
matabin'ynama y chë Uámana Espiritu acbe ainaniñe  
jtsemándayama cháumashënguama ca.”

<sup>18</sup> Cachora, Sálulëbe bominyentsana mo beonbe  
bobachëshëngcá tojantquécjana, y chca, ibojtsatabin'y-  
na; chora tojantsbaná y tojanenábaye. <sup>19</sup> Chentšana,

Saulo tojanse y añemo yojtsatsbomna y baseftayté chë Jesucristbeñe ošbuáchiyëngaftaca tbojántotona, Damascoca.

### Damascoco puebloca Saulo entšanga yojanabuayiyná

<sup>20</sup> Saulo cachorscana tojanontšé jábuayenama judiëngbe enefjuana yebnënguenache, Jesús Bëngbe Bëtsabe Uaquiñá bëtsemnama. <sup>21</sup> Chë imojtsuenanënga nyetscanga imojtsenjnanaye y mëntšá imojtsichamo: “Mua entsemna chë Jerusalenoca Jesúsbioye otšëmbuanënga endanëbanayá, y mora camuá Damascocoye tojabo, Jesucristbeñe ošbuáchiyënga jabótabayama y chë bachnangbe amëndayëngbe cucuatšife jabáshejuanama.”

<sup>22</sup> Pero Saulo cada ora más añémoca yojtsoyebuambnaye y puerte tšabá yojaninñanñá Jesús Bëngbe Bëtsabe Uámana Uabuayaná bëtsemnama. Chiyeca chë Damascoca judiënga ndoñe imontsobena ntšamo cha jojuana.

### Ntšamo Saulo judiëngbentšana tojtsanachá

<sup>23</sup> Bayté tojanochnëngo ora, judiënga tmojanenoyenuná ntšamo jamëse Saulo jóbama, <sup>24</sup> pero Saulo chë soye tojántatšëmbona. Bnëté y ibeta, chë bëtspueblentša bëšašanguenache chënga chabiama imojjananñá, jtsóbama; <sup>25</sup> pero chë Jesucristbeñe ošbuáchiyënga, ibeta, cha canye bëtspbarëcuñe tmojtsanatsuamá, y chë pueblentša shéconana tapiëšëjana tmojtsanëštjango. Chca cha tojanotsbocá.

### Saulo Jerusalenoca

<sup>26</sup> Saulo Jerusalenoye tojánashjango ora, yojtsebošë chë Jesucristbe ichmónëngaftaca jenútanama, pero nyetscanga imojtsebiauatja y ndoñe imontsošbuaché Saulo Jesucristbe ustoná yojtsemnama. <sup>27</sup> Chcasna, Bernabé Sálulëbioye tbojëtsanbetše y chë Jesucristbe ichmónëngbioye tbojanánatse, y tojanacuntá Saulo benachiñe Bëngbe Utabnábioye tbojáninñama, ntšamo Bëngbe Utabná tbojanianama y ntšamo cha Damascoca tša añémoca Jesusbiama entšanga tojánabuayenama. <sup>28</sup> As Saulo Jerusalenentše tojanototoná y chë Jesucristbe ichmónëngaftaca yojánana. Bëngbe Utabnabiama bëtspañémoca entšanga yojanabuayiyná y <sup>29</sup> yojanoyebuambná y imojjanenatsëtná chë griego biyá judiëngaftaca; pero chëngna imojtsenëyeunana Saulo jtsóbama. <sup>30</sup> Jesucristbeñe ošbuáchiyënga chca tmojántatšëmbona ora, Saulo Cesarea luaroye tmojanánatse, y chentšana Tarso puebloye tmojanichmó.

<sup>31</sup> Y chca, Jesucristbeñe ošbuáchiyënga Judeoca, Galilea y Samaria luarentše chora ya ndoñe más montsansufrina y natjëmbana imojtsemna, y nyetscanga más ošbuáchiyana imojtsebomna. Ntšamo Bëngbe Bëtsá yojanbošcá, imojtsaniyena cha jtsatschuanayëse; y chë Uámana Espíritbe uajabuáchenanaca, Jesucristbeñe ošbuáchiyënga más tmojanoboté.

### Pedro Enéasbioye tbojanshná

<sup>32</sup> Pedro yojánabuache nyetsca chë Jesucristbeñe ošbuáchiyëngbenache. Y chca, Lida puebloca Bëngbe Bëtsabe entšanga jabuachámna tojána. <sup>33</sup> Lida pueblentše canya tbojáninñena, Eneas ca uabainá. Chajama ndobená inamna y posufta uata jutsnéshañe chca inajájona. <sup>34</sup> Pedro tbojanianama: “Eneas, Jesucristo tcmonejashná. Matëtsbaná y acbe tjuashe motsejacaná ca.” Y cachora chë jama ndobená tojtantsbaná.

<sup>35</sup> Nyetscanga chë Lida pueblentše y Saronoca oyenënga chë entšá shnaná tmojáninñe. Y as, chënga bacna soyënga amana tmojtsanajbaná y cach orscana tmojanontšé Bëngbe Utabnábeñe ošbuáchiyana.

### Pedro tojanma Dorcas cháuatayenama

<sup>36</sup> Chë tempo, Jope puebloca yojanienama canye shembása Jesucristbeñe ošbuachiyá, Tabita ca uabainá, o griego biyañna Dorcas ca. Cha nyets tempo tšabe soyënga yojánama y yojanamana chë tojtšëjabetënga jujabuáchana. <sup>37</sup> Pero chora, šocana tbojanshache y tojtsanóbana. Tmojtsanbebé chentšana, canye tsoye tsbanana tsañoca chabe cuerpo tmojtanajajó. <sup>38</sup> Jope inamna Lida béconana, y Lidentše Pedro yojtsemna; y chë Jope pueblentše Jesucristbeñe ošbuáchiyënga tmojántatšëmbona Pedro choca yojtsemnama. Asna, uta boyabásata tmojanichamó Pedro jauyanama: “Diosmanda, betscoco Jope puebloye mabo ca.”

<sup>39</sup> As Pedro tojëtsantsbaná y chë uta boyabásaftaca tojána. Choye tmojánashjajna ora, tmojanánatse chë Dórcasbe cuerpo yojtsemnoye, tsbanánoca; chorna, nyetsca viudanga šachénaca Pédrëbioye tmojanóbobuashcona y imojtsinñinñanaye chë Dorcas yojuananá entšayangá y cmešëjuangá, cabá chëngaftaca yojëftsemna ora. <sup>40</sup> Pedro tojanmandá nyetscanga chentšana chamotsebocanama; chora Pedro yoJoshëntsamentšiyey Bëngbe Bëtsáftaca ibojencuentá. Chentšana, Pedro chë obanábioye tbojanonñinñey y tbojanianama: “Tabita, matëtsbaná ca.”

As Dorcas tojtanobuchatéfjona y Pédrëbioye tbojáninñe ora, tojanótbema. <sup>41</sup> Chora Pedro tbojanábuacue-shache y tbojtansbaná. As Pedro tojánachembo nyetsca chë Jesucristbeñe ošbuáchiyënga, chë viudanga y chë inñyënga, y Dorcas ainá tojtaninñanñey. <sup>42</sup> Chë soye nyets Jope pueblentše tojanótatšëmbona y banga Bëngbe Utabnábeñe imojtsošbuáchiye. <sup>43</sup> Y Pedro bayté Jope pueblentše tojanoquedá, Simón chë bobáchëshiñe trabajayabe yebnentše.

### Pedro y Cornelio

**10** Cesarea pueblentše inamna canye boyabása Cornelio ca uabainá; cha inamna chë Italiano ca uabaina soldadëngbe amëndayá. <sup>2</sup> Cornelio Bëngbe Bëtsábioye ibnarrespetana y nyetsca chabe yebnentša oyenëngaftaca Bëngbe Bëtsá puerte imojánadorana. Becá crocénana inaquëcjnaye chë judiënga ndbom-

nějémenga jujabuáchama y sempre Bëngbe Bëtsáftaca ibnécuentaye.

<sup>3</sup> Canye te, mo bëts mošenana ora, cha botamana tojaninye mo otjenayoquécá, mëntšá: Bëngbe Bëtsabe canye ángel Cornelio yojtsemnoye yojtsamashjuana y tbojanianyana: —¡Cornelio ca!

<sup>4</sup> Cornelio chë ángelbioye ibojtsonyaye y auatjananá tbojanianyana: —Taita, ¿ndayá yojtsemna ca?

Y chë ángel tbojanianyana: —Bëngbe Bëtsá condbétseimpadanama y chë ujabótënga condbétsëjabuachanama, Bëngbe Bëtsá ácaftaca entsoyejuá y lempe cmochanjóyeunaye. <sup>5</sup> Chcasna, mora básefta boyabásenga Jope bëts puebloye michamó y Simón, chë Pedro ca monduabobuatmá, moye chamuánatse. <sup>6</sup> Cha posada entsebomna inye Simónbentše, chë bobáchëshiñe trabajayabe yebnentše. Chabe yebna mar béjaye tsachañe endmëna. Cha cmochanjauyana ndayá jamama cmojtsemna ca.

<sup>7</sup> Chë Cornéliëbioye ibojuatsëtsaye ángel tojtstanoñe ora, Cornelio chabe oservenënguentshana útata tojánachembo y canye soldádnaca, chabe uajabuachaná, Bëngbe Bëtsá adoryá; <sup>8</sup> lempe ntšamo yojopasacá chënga tojanacuntá y chentšana Jope puebloye tojanichamó.

<sup>9</sup> Yëfsana mo nyetsto ora, chënga benachiñe Jope béconana imojtsajnëntscuana, Pedro yebnentša tsabanánoye tojánashëngo, Bëngbe Bëtsáftaca jencuëntama. <sup>10</sup> Becá tbojánishëntsena y jasama yojtseboše; pero imojtsebopróntantscuana, Pedro mo otjenayoquécá mëntšá tojáninye: <sup>11</sup> Celoca yojtsatëfjna y mo canye bëts entšayëjuacá yojtsabá y nyets canta sibi-entšana yojtsëjonyana. <sup>12</sup> Chë entšayëjuañe imojtsemna nyetscna bayënga, ósjojnaye bayënga y nyetscna shloftšëngnaca. <sup>13</sup> Y tojanuena canye oyebuambnayanana mëntšá: —Motsbaná, Pedro; mobaye y quem bayënga mose ca.

<sup>14</sup> Chora Pedro tojánayana: —Ndoñe, atšbe Utabná. Atše ndocna te chiyáisese Moisesbe leyiñe ndoñe yondëlesenciana jasama bayënga y chë jasama ndoñe tšabá imomna bayënga ca.

<sup>15</sup> Y cachiñe tojtëtanuena chë oyebuambnayanana mëntšá: —Bëngbe Bëtsá tojalesenciá y canye bayá tšabá jasama yomna ca tojayanëse, aca ndoñe matsjuabnana chë bayá jasama ndoñe tšabá yontsemna ca.

<sup>16</sup> Chë soye unga soyama chca tojanopasá chentšana, chë entšayëjua celoye tojtanátsjua. <sup>17</sup> Pero Pedro ndoñe yontsetátšëmbo ntšamo tojaninyéca ndayá chabiama yojtsayanama. Chëntscuana, chë Cornéliëbe ichmónënga noticiánana Simónbe yebnoca tmojánashjajna y shjoca bëšoca imojtsobátmana.

<sup>18</sup> Tmojanchembo ora, tmojanënoticiá Simón, chë Pedro ca uabobainá, chentše taibojatanama.

<sup>19</sup> Pedro, ndayá tojáninyama chabosertama yojtsenójuabnantscuana, chë Uámana Espiritu tbojanianyana: “Mouena, muentše mora unga boyabásenga cmontsenguá. <sup>20</sup> Motsbaná, mocana matastjango y ya-

pa ntjatenojubnaycá chëngaftaca cochjá, er atše chënga sënjichamó ca”.

<sup>21</sup> As Pedro tojtanastjango y chë tmojánashjajnyë tojanéyana: —Atše sëndmëna chë šmontsenguá cha. ¿Ndáyeca moye šmojabo ca?

<sup>22</sup> Chora chënga tmojanjuá: —Cornelio šonjichamó. Cha endmëna chë soldadëngbe amëndayá, canye tšabá mándbomna entšá y Bëngbe Bëtsábioye adoryá, y nyetsca judiënga chabiama tšabá mondbétssoyebuambnaye. Bëngbe Bëtsabe canye ángel chábioye tbojabuayená ntšamo jamana aca chábioye chacotsama, as chë ndayá cha jauyanama cojtsebomncá cha jouenama ca.

<sup>23</sup> As chënga tojanëmashengo y posada tojanéyentsame. Yëfsana Pedro chë unga boyabásengaftaca tojána. Básefta Jesucristbeñe ošbuáchiyënga Jope pueblentšënga Pedro tmojantjëmbambá.

<sup>24</sup> Chë inye yëfsana Cesarea puebloye tmojánashjajna. Chentše Cornelio Pédrëbiamá yojtsobatmana, y Cornelio tojanébuaja pamíllanga y tšabe amiguëngnaca chentše imojtsemna. <sup>25</sup> Pedro tojánashjango ora, Cornelio tojánbocna jajëbenguama y chabe shecuatšentše yojoshëntsamentšiyë cha jadórama. <sup>26</sup> Pero Pédrëna tbojtanatsbaná y mëntšá tbojanianyana: —Matëtsbaná, atše cach aquécá nye canye entšá sëndmëna ca.

<sup>27</sup> Pedro Cornélioftaca encuëntaye chë yebnentše tojánamashëngo y ba entšanga tojánanyëna, chentše tmojanótotënga. <sup>28</sup> Chora Pedro tojanéyana: —Cach tšëngaftanga šmondétatšëmbo chë judiëngbe leyënguñe endayana ndoñe yondopodena canye judío ndoñe judío entšángaftaca jenútanama y ni mo chëngbe yebnënguenache jábuachama ca. Pero Bëngbe Bëtsá šonjininyé atše ndocna te šondmëna inyabiama jatsjuabnayanana cháftaca jenútanama ndoñe tšabá yondmëna ca. <sup>29</sup> Chiyëca, šmonjobetše ora, ndocá ntjatichamcá nye sënjabo ca.

Chora tojanatjá: —¿Ndáyeca šmojobetše ca?

<sup>30</sup> As Cornelio tojánayana: —Canta te entsemna, camëntša ora, muentše sëndánmëna Bëngbe Bëtsáftaca encuëntaye y ndeolpe sënjinnye atšbe delante canye boyabása uabuashininyëna entšayaca bopormaná. <sup>31</sup> Cha šonjauyana: “Cornelio, Bëngbe Bëtsá condbétseimpadanama y chë ujabótënga condbétsëjabuachanama, Bëngbe Bëtsá ácaftaca entsoyejuá y lempe cmochanjóyeunaye ca. <sup>32</sup> Básefta boyabásenga Jope bëts puebloye michamó y Simón chë Pedro ca monduabobuatmá moye chamuánatse ca. Cha posada entsebomna inye Simónbentše, chë bobáchëshiñe trabajayabe yebnentše, y chabe yebna mar béjaye tsachañe endmëna. Cha cmochanjauyana ndayá jama-ma cmojtsemna ca.” <sup>33</sup> Chcasna, cachora sënjichamó aca jobetšama, y aslëpaye jabama tcojóyaunama. Y as morna, nyetscanga Bëngbe Utabnabe delante fsëntseprontana jouenama lempe ntšamo Bëngbe Bëtsá tcmojamandacá ca —cha tojánayana.

### Ntšamo Pedro tojanoyebuambá Cornéliëbe yebnentše

<sup>34</sup> Pedro chora tojanontšé mēntšá jóyebuambayama: —Mora atše šontsosertana, ndegombre Bēngbe Bētsabiama nyetscanga cachcá uámanēnga imomnama. <sup>35</sup> Nyets luarēnguenache Bēngbe Bētsá júbuajana cha tmojtsatschuaná y tšabe soyēnga tmojtsamēnga. <sup>36</sup> Tšēngaftanga šmondétatšēmo, Bēngbe Bētsá Israeloca entšanga tojánabuayenama, tšabe noticiēnga jtsóyebuambnayēse, chēnga nyetscanga ainaniñe tšabe ebionana chamotsebomnama, Jesucristbeyeca; y cha endmēna nyetsca entsangbe Utabná. <sup>37</sup> Tšēngaftanga šmondétatšēmo ntšamo nyets Judeoca tonjanopasama. Chē soye Galilea luaroca tojanobojatšé, Juan entšanga yojanabuayiná orscana, chēnga bacna soyēnga amana chamotsajbanama y chamuenábayama. <sup>38</sup> Šmondétatšēmo ntšamo Bēngbe Bētsá, Jesús Nazaretocábioye tbojanábuayanama y tojanma chē Uámana Espiritu chabe ainaniñe cháumashēnguama, y tojanma Jesús corente obená chaotsemnama; y šmondétatšēmo ntšamo Jesús enjánana entsangbiama tšabe soyēnga amiñe y nyetscanga chē Satanás yojánama chamosufrimēnga áshnaye, er Bēngbe Bētsá cháftaca yojtsemna.

<sup>39</sup> “Bēnga fsenjāninye y fsēndétatšēmo lempe ntšamo Jesús tojanmcá Jerusalenoca y nyets Judea luariñe; y cha tmonjanóba, canye cruciñe jacrucifcase. <sup>40</sup> Pero Bēngbe Bētsá tonjanma unga tianoye cha cháuatayenama y bēngbeñe chaonynama. <sup>41</sup> Cha nyetsca entsangbe delante ndoñe chenátanbocna, pero aīñe bēngbeñe, chē tempo Bēngbe Bētsá šonjēbuáyanēnga, Jesús tojtānyenama chamuinýama. Y tojtānyenentsana bēnga cháftaca fsenjānse y fsenjānofsé. <sup>42</sup> Cha šonjichamó entsanga jábuayenama y jayanama ndegombre cha yomna chē Bēngbe Bētsabe uabuayaná, chē nda obanēngbiama y ainēngbiama yochjayana tšabá o ndoñe tšabá tmonjamama. <sup>43</sup> Bēngbe Bētsabe juabna oyebuambnayēnga nyetscanga cach Jesusbiama tmojánayana, nda Jesús-beñe tojtsošbuaché, chábioye Bēngbe Bētsá chabe bacna soyēngama bochanjaperdóna, Jesusbe obenánaca ca.”

### Ndoñe judiēnga chē Uámana Espiritu tmojanóyēngacñe

<sup>44</sup> Pedro chē palabrenga cabá yojtsóyebuambnanscuana, chē Uámana Espiritu tojánamashēngo nyetsca chē imojtsuenanēngbe ainaniñe jtsemándayama. <sup>45</sup> Chē judiēnga Jesucristbeñe ošbuáchiyēnga Pédroftaca tmojánabēnga imojenjaná, chē Uámana Espiritu ndoñe judiēngbeñnaca cháumashēnguama Bēngbe Bētsá tojanmama. <sup>46</sup> Chēnga imojtsuenana chēnga inyetsá jtsebiayangana, chēnga tempo ndmabiyañe y jtsichámuana Bēngbe Bētsá bēts soyēnga tojanmama.

<sup>47</sup> Chora Pedro tojánayana: “Pero mēngna chē Uámana Espiritu tmonjóyēngacñe ntšamo bēnga tmon-

joyēngacñecá. Chcasna, ndocná queochatobenaye jamana chēnga uabáinēnga ndoñe chamondétsemnama ca.” <sup>48</sup> As Pedro tojanamēndá chēnga jubáyama, Jesucristo jótšēmbonēse. Chentšana chēnga tmojanimpadá baseftayté chēngaftaca chaoquedama.

### Ntšamo Pedro chē Jerusalenoca imojánenefjuana ošbuachiyēngbioye tojanéyana

**11** Jesucristbe ichmónēnga y chē Judeoca Jesucristbeñe ošbuáchiyēnga tmojánatšēmbona, chē ndoñe judiēngnaca Bēngbe Bētsabe palabriñe imojtsošbuáchemama. <sup>2</sup> Pero Pedro Jerusalenoye tojesaná ora, báseftanga chabiama ndoñe tšabá tmonjánayana. Chēnga imojamna chē juabnayēnga, chē ndoñe judiēnga ošbuáchiyēnga boyabásēnga canjánamna chē más delicadentše base bobachtema tētšenēnga jtsemnama ca, ntšamo chē judiēnga imojanamancá, as chēnga jobenayama chē judiēnga ošbuáchiyēngaftaca jenútanama ca. <sup>3</sup> As Pedro tmojantjá: —¿Ndáyeca tcojá chē ndoñe judiēnga jábuachama y chēngaftaca tcojase ca?

<sup>4</sup> Chora Pedro lempe chēnga tojanacuntá ntšamo chē ndoñe judiēngbioye cha tojána orscana tonjanopasama. Cha tojanéyana: <sup>5</sup> —Atše Jope puebloca sēnjamna y Bēngbe Bētsáftaca sēnjencuēnta ora, mo otjenayoquécá sēnjāninye celocana mo canye bēts entšējuacá átšbioye enjétsabeconaye y nyets canta sibiocana enjétsējonýana. <sup>6</sup> Y botamana sēnjanrrepará ndayá chē tsoye bētsemnama y sēnjāninye choye monjētsemna uamna y tjoca bayēnga, ósjojnaye bayēnga y nyetscna shloftšēngnaca. <sup>7</sup> Y sēnjanuena canye oyebuambnayana mēntšá: “Motsbaná, Pedro; mobaye y quem bayēnga mose ca.” <sup>8</sup> Chora atše sēnjānyana: “Bēngbe Utabná, ndoñe; atše ndocna te chiyáise chē Moisesbe leyíñe ndoñe yondēlesenciana jasama bayēnga y jasama ndoñe tšabá imomnēnga ca.” <sup>9</sup> Chentšana cachiñe sēntētānuena chē celocana oyebuambnayana mēntšá: “Bēngbe Bētsá tojalesenciá y canye bayá tšabá jasama yomna ca tojānyēse, ndoñe matsjuabnana chē bayá jasama ndoñe tšabá yontsemna ca.” <sup>10</sup> Chē soye unga soyama chca tonjanopasá y chentšana chē entšējua celoye tontanátsjua. <sup>11</sup> Y cachora unga boyabásēnga Cesarea puebloca ichmónēnga, chē posada sēndbomnentše tmonjánashajna, atše janguanguama. <sup>12</sup> Y chē Uámana Espiritu šonjanmandá atše yapa ntjatenojubnycá chēngaftaca jama; y quem chnēnguana Jesucristbeñe ošbuachiyēngnaca átšeftaca tmonjána. Nyetscanga canye entšá Cornelio ca uabainabe yebnoye fsēnjānamashjna; <sup>13</sup> y chana bēnga šonjanacuntá ntšamo tojáninye, cachabe yebnentše canye ángel ibojtsebiatsana y mēntšá tbojanianyana: “Básefta boyabásēnga Jope bēts puebloye michamó y moye chamuánatse Simón, chē Pedro ca monduabobuatmá, <sup>14</sup> y cha cmochanjabuayená ntšamo aca y acbe yebnentša oyenēnga šmochjotsbocá ca.” <sup>15</sup> As, atše jóyebuambayama sēnjanbojatšé orna, chē Uámana Espiritu tonjánamashēngo chēngbe ainaniñe jtsemán-

dayama, ntšamo Bëngbeñe natsana tonjana-mashëngcá.

<sup>16</sup> “Chora sënjanenujubó ntšamo Bëngbe Utabná tonjánayanama: ‘Ndegombre, Juan entšanga béjayeca tonjanëbaye; pero Bëngbe Bëtsá chë Uámana Espiritu bochanjíchmuá, tšëngaftangbe ainaniñe jtsemándayama cháuamashënguama ca.’ <sup>17</sup> Chcasna, chëngnaca Bëngbe Bëtsá chë Uámana Espiritu tonjatsatá, ntšamo bënga, chë Utabná Jesucristbeñe ošbuáchiyënga, šonjanatsatácá. Y chca, atše ndoñe quetsátsmëna canye tša uamaná, Bëngbe Bëtsá jauyanama ntšamo cha yobošcá ndoñe chaondëtsemna ca.”

<sup>18</sup> Jerusalenoca Jesucristbeñe ošbuáchiyënga chë soyënga tmojanuena ora, ndocá más tmonjantjá y Bëngbe Bëtsá tmojtanchuá, mëntšá: —¡Asna, Bëngbe Bëtsá chë ndoñe judiëngnaca tojalesenciá chëngbe bacna soyëngama ngmënaca chamuatenojuaboma y chca amana chamotsajbanama, chë nyetsca tescama yomna tšabe vida chamotsebomnana ca!

### Ntšamo Antioquía pueblaca tojanobojatšé, entšanga Jesucristbeñe ošbuáchiyana

<sup>19</sup> Esteban tmojanóba chentšana, tmojanontšé chë Jesucristbeñe inye ošbuachiyëngnaca jatëcamiyama. As chentšana báseftanga yojtsumna bën luarëngoye jtsachetëngana Fenicioye, Chipre y Antioquía luarëngoye, y chenache chënga Jesucristbe soyëngama imojanoyebuambná, pero nye judiëngbiama. <sup>20</sup> Pero báseftanga imojamna Chipre y Cirene luaroquënga, y chënga Antioquía bëts pueblöye tmojánashjajna orna, chë ndoñe judiëngbeñnaca tmojanoyebuambá, Jesús, chë Utabnabe soyëngama jabuayenase. <sup>21</sup> Bëngbe Utabnabe obenana chëngaftaca yojtsemna, y chca, ba entšanga tmojanajbaná bacna soyënga amana y tmojanontšé Bëngbe Utabnábeñe jtsošbuáchiyana.

<sup>22</sup> Jerusalenoca Jesucristbeñe ošbuáchiyënga chë soye tmojantatšëmbona ora, Antioquía luaroye Bernabé tmojanichmó. <sup>23</sup> Bernabé choye tojánashjango orna, tojáninye ntšamo Bëngbe Bëtsá tšabe bendicionënga chëngbeñe tojanmama y chama corente tojanoyejuá. Nyetscanga tojanabuayená chamotsiyena nyets ainánaca Bëngbe Utabnábeñe jtsošbuáchiyëse. <sup>24</sup> Bernabé inamna canye entšá tšabe soyënga amá, chë Uámana Espiritu chabe ainaniñe yojtsemándaye y bëtscá ošbuachiyá inamna. Y banga tmojanontšé Bëngbe Utabnábeñe jtsošbuáchiyana.

<sup>25</sup> Chentšana, Bernabé Tarso pueblöye tojána Saulo janguanguama, <sup>26</sup> y tbojáninyena ora, Antioquía luaroye tbojëftsanbetše. Antioquía luarentšna canye uata nyetšá Jesucristbeñe ošbuáchiyëngaftaca cányiñe ibojëftsemna y ba entšanga tmojanabuatambá. Antioquioca inamna chë ndayentšë natsanama Jesucristbeñe ošbuáchiyënga Cristbe ústonënga ca imojtsëbuatma.

<sup>27</sup> Chë tempo, básefta Bëngbe Bëtsabe juabna oye-buambnayënga Jerusalenocana Antioquía luaroye tmojána. <sup>28</sup> Chënguentshana canya Agabo ca uabainá tojantsá y chë Uámana Espiritbeyeca tojánayana,

mëntšá: “Nyets luariñe entšanga oyeniñe bëts shëntsana echanjóshjango ca.” Y ndegombre chca tojanopasá, Claudio Romoca bëts mandado inamna ora. <sup>29</sup> Chcasna, chë Antioquía bëts pueblentšá Jesucristbeñe ošbuáchiyënga imojenóyeunaye ntsachetšá crocënanënaca juíchmuana, ntšamo cada ona tojobenacá, Judeoca Jesucristbeñe ošbuáchiyënga jubuáchama. <sup>30</sup> Chca tmojanma, y Bernabé y Sáuloftaca chë crocënanana tmojanichmó chë Judeoca Jesucristbeñe ošbuáchiyënguentsë bëtsëjemëngcá amëndayëngbioye.

### Santiago tmojanóba; Pedro tmojanëtame

**12** Chë tempo, rey Herodes básefta Jesucristbeñe ošbuáchiyënga tojánishëche jutámia y jätsetšënama. <sup>2</sup> Tojanmandá espadéjaca chamóbama Santiago, Juanbe catsata; <sup>3</sup> y Herodes tojantatšëmbona judiënga chë soye tojanogúsetama; as, cha tojanmandá Pédrëngaca chamutámia. Chca tojanopasá chë lewadúraca ndëpormana tandëse sayté, Bashco fiesta ora. <sup>4</sup> Pedro tmojánishache orna, Herodes tojanmandá chamutámia, y chë cárceloca soldadënga cantátanga tmojanenajatá cántentšë cha chamotsebojanýama. Herodes yojetsejuabnaye, Bashco fiesta tojochnëngo ora Pedro juabocnama, entšangbe delante jayanama cha chaóbanama. <sup>5</sup> Chcasna, Pedro yojtsëtámena y chë soldadëngna corente imojtsebojanýa. Pero Jesucristbeñe ošbuáchiyëngna bëtscá Bëngbe Bëtsá imojtseimpadana Pédrëbiama.

### Bëngbe Bëtsá tojanma Pedro natjëmbana cárcelocana cháuaisebocnama

<sup>6</sup> Canye te yojtsájamna Herodes entšangbe delante Pedro juabocnama. Chë te ibetna, Pedro yojtsumañe y cátaoica canye soldado yojtsemna; uta cadenëjuaca yojtsabatsëcna y inye soldadëngna bëšócana chë utámeniñe imojtsebojanýa. <sup>7</sup> Ndeolpe, Bëngbe Utabnabe canye ángel tojánbocna, y lempe chë utámeniñe yojtsebuashinýinýana. Chora chë ángel tëchañe Pédrëbioye tbojánbojajo, tbojanfšená y tbojaniyana: “Betsco motsbaná ca.” Y cachora chë cadenëjuangá Pédrëbe buacuatšënguentshana tojanatquécjana, <sup>8</sup> y chë ángel tbojaniyana: “Matichëtjo y matóshecochëtjo ca.” Pedro tojanma ntšamo chë ángel tbojaniancá, y chora chë ángel tbojätaniyana: “Mataquëfsayé y šmas-to ca.”

<sup>9</sup> Pedro utámenocana chë ángel ibojtsëstona, pero ndoñe yontsetátšëmbo aífne ndegombre o ndoñe bentsemna chë ángel yojtsumna cha chocana cháuaisebocnama; masna, ibojtsinýana mo canye otjénayoca cuaftsemncá ca. <sup>10</sup> Y ütëntšë chë soldadënga imojtsebojanýajana chata tbojánachnëngo y yeréša bëšásoye tbojánashjango, chë ndayéša yojanamna tsáshenoye jabocnama; y chë bëšášana nye cachabe ponto yo-jotëfjo. Chentšana tbojëftsanbocna ora, canye tsáshenëjana ibojtsaye, y nye ndeolpe chë ángel Pédrëbentšana yojtsojuánañe.

<sup>11</sup> Nya chora Pedro tbojanosertá y tojánayana: “Mora tšabá šjosertá, ndegombre Bëngbe Utabná chabe ángel tbojichmó atše jatsbocama Heródesbe cucuatšentšana y lempe ntšamo judiënga átšeftaca jamama imojuabnámna ca.”

<sup>12</sup> Pedro chë soyama juicio tojanca ora, tojána María, Juanbe mamabe yebnoye; Juan, Marcos ca imojanábobaina. Y chë yebnentše banga cánýiñe imojtsemna, Bëngbe Bëtsáftaca encuéntaye. <sup>13</sup> Pedro chë tsashenoica bëshášoca tojanchembo ora, canýe oservená, Rode ca uabainá, tojánbocna jarrepárama.

<sup>14</sup> Chë oservená Pédrëbioye tbojanoyatëmbá ora, corente oyejuayá yojtsemna y cha, jebiatëfjo cuentna, cach tsoye tojesaná chë tšabe noticia jaúnayama, Pedro bëshoca yojtsemna ca. <sup>15</sup> Chë tsoca imojtsemnënga chora tmojanianya: “¿Opá chectsebocna ca?”

Pero chë oservená yojtsichamo ndegombre ca. Y chënga tmojanianya: “¡Chabe ángel ctsemna ca!”

<sup>16</sup> Chëntscuana Pedro cabá yojtsechambuana; tmojánëbiatëfjo y tmojáninýe ora, chënga puerte imojenjananá. <sup>17</sup> Pero Pedro tojánëfjatsëmbo iyëca chamobia-mama y tojanacuntá ntšamo Bëngbe Utabná utámenocana tbojánatsbocama. Chentšana tojanéyana: “Ntšamo tonjopasama Santiago y chë Jesucristbeñe inýe ošbuáchiyënga šmochjaúnaye ca.”

Chora Pedro chë yebnentšana tojtáisebocna y inýoye yojáta.

<sup>18</sup> Tojanbinýna ora, chë soldadënga puerte imojóntša enbouenanana, ntšamo Pédroftaca tojanopasama ndoñe imontsetátšëmbo causa. <sup>19</sup> As Herodes tojanmandá Pedro chamotsenguanguama; pero jtsinýenama ndoñe imonjobenaye orna, Herodes chë soldadënga tojanatjá ndayá Pédroftaca tojanopasana y chentšana tojanmandá chë cha imojanbojanýá soldadënga jtsëbáyama. Chë soyënga tojanochnëngo chentšana, Herodes Judea luarentšana tojéftsanbocna y Cesarea luaroye tojtsanoñe, y choca tojt-sanoquedañe.

### Herodes tojanóbana

<sup>20</sup> Herodes corente yojtsetšátjaye Tiro y Sidonoquëngaftaca; as chënga tmojanenoyeuná Heródesbioye jama. Canýe uámana uajabuachaná, Blasto ca uabainábioye tmojanayeuamaná, y chana tojanašebuachená Herodes jauyanama ndoñe más entjayánanënga chamondëtsemnama, er Tiro y Sidonoca entšanga vida imnabomna Heródesbe luaroca sanángaca. <sup>21</sup> Chcasna, rey Herodes inýe tescama tojánachembo. Chë tena, jóyebuambayama Herodes uámana entšayaca yojtopórma y yojótbema chabe mándaye tbemanentše; chentšana tojanonguamé. <sup>22</sup> Chora entšanga tmojanontšë mëntšá uayebuáchana: “¡Chë entsoyebuambná cha entšá ndoñe quenátsmëna! ¡Chana canýe dios entsemna ca!” <sup>23</sup> Cachora, Bëngbe Bëtsabe canýe ángel tojanma Herodes šocana chaboshachama, chabe cuenta Bëngbe Bëtsá chamuatschuama entšanga ndoñe yonjáuyana causa. Herodes tojanóbana mamángaca sasná.

<sup>24</sup> Pero chë tempo más bëtscá entšanga Bëngbe Bëtsabe palabra imojtsuenana y Jesucristbeñe imojtsošbuáchiye.

<sup>25</sup> Bernabé y Saulo chatbe trabajo tbojéftsanma ora, Jerusalenocana Antioquía luaroye tbojésanata y Juan, chë Marcos ca uabobuatmá, chátaftaca tmojéftsanbetše.

### Bernabé y Saulo tbojanbojatsë Bëngbe Bëtsabe trabajo jamama

**13** Antioquía luaroca Jesucristbeñe ošbuáchiyënguentše imojtsemna Bëngbe Bëtsabe juabna oyebuambnayënga y ošbuachiyëngbioye abuá-tambayënga. Chënga imojanabaina Bernabé, Simón (chë Šibetá ca uabobuatmá), Lucio Cirenocá, Manaén (nda tojanoboché cánýiñe Herodes, chë Galileoca réyefraca) y Saulo. <sup>2</sup> Canýe te, Bëngbe Utabná imojtsatschuanaye y chama tondaye ntjascá imojtsemna ora, chë Uámana Espiritu tojánayana: “Mora šmochjaleséncia Bernabé y Saulo tšëngaftangbentšana chabuëtsebocnama; chatna canýe trabajuama sënjabacacá ca.”

<sup>3</sup> Bëngbe Bëtsá jëtschuayama tondaye ntjascá imojtsemnëntscuana y cháftaca imojtsencuéntantscuana, chëngbe cucuatšënga chatbe bestšaše juatsboica tmojanjá, chatbe trabajuñe chaújabuachama Bëngbe Bëtsá jtseimpadánëse. Y chentšana chátbioye tmojtanadiošoftá.

### Bernabé y Saulo Chipre luaroca

<sup>4</sup> As Bernabé y Saulo, chë Uámana Espiritbeyeca ichmónata, Seleucia ca uabáinoye tbojánata y chentšana bejaycá, Chipre luaroye. <sup>5</sup> Salamina bëtš puebloye tbojánashjango ora, tbojanontšë Bëngbe Bëtsabe palabrama entšanga jábuayenama, chentša judiëngbe enefjuana yebnënguenache. Juan Marcos mo chatbe uajabuachanacá ibojtsebomna.

<sup>6</sup> Nýets chë luarëjana tmojánachnëngo orna, Pafos puebloye tmojánashjajna; y chentše tmojáninýena canýe judío tatšëmbuá, Barjesús ca uabainá. Cha yojánichamo cha canjamna canýe Bëngbe Bëtsabe juabna oyebuambnayá ca, pero ndoñe chca yonjamna. <sup>7</sup> Chë tatšëmbuá inatrabájaye chë Chipre luaroca mandabiama, Sergio Paulo ca uabainá; y chë mandadna corente osertaná inamna. Cha yojtseboše Bëngbe Bëtsabe palabra jouenama; as tojanmandá Bernabé y Saulo jobiatšana. <sup>8</sup> Pero chë tatšëmbuá, grieguñe Elimas ca uabainá, Saulo y Bernabebe contra yojtsemna y yojtsama chë mandado ndoñe chaondëtsošbuáchema, ntšamo chë Jesucristbeñe ošbuáchiyënga imojanošbuachecá. <sup>9</sup> Chora, Saulo chë Pablo ca imojanábobuatmabe ainaniñe chë Uámana Espiritu corente yojtsemándaye; as chë tatšëmbuábioye yejua-na ibojonýinýiye, <sup>10</sup> y tbojanianya: “¡Abuambnayá, puerte bacna entšá, Satanasbe uaquiñá y tšabe soyënga ndoñe chaondëtsebínýnama trabajayá! Bëngbe Utabnabe nýetsca ndegombre soyëngama aca con-

tsichamo uayátsenaye soyënga yojtsemna ca. <sup>11</sup> Mora, Bëngbe Bëtsá cmochanjacastíga, jitaná cochanjoquéda y baseftayté jinýama quecochatobenaye ca.”

Cachora Elimas mo ibetiñcá yojoquéda y ibojt-songuaye canýa buacuetëntšnana chabuánatsama, jitaná yojtsemna causa. <sup>12</sup> Chë mandado chca tojáninýe ora, Jesucristbeñe yojtsošbuaché y yojenjaná Bëngbe Utabnabe soyënga tojanatsjínýama.

### Pablo y Bernabé Antioquía pueblentše, Pisidia luaroca

<sup>13</sup> Pablo y chabe enutënga, Páfosocana, bejaycá Perge puebløye tmojátananga, Panfilia luaroca. Pero Juan tojésanabashejuana y Jerusalenoye tojésanshë-cona. <sup>14</sup> Pergentšana Antioquía puebløye tbojátanata; chë pueblo inamna Pisidia luare béconana. Chentšana, ochnayté, chë judiëngbe enefjuana yebnoye tbojánamashëngo y tbojanótbema. <sup>15</sup> Moisesbe leyíne y Bëngbe Bëtsabe juabna oyebuambnayëngbe uabemana librësangañe tmojanalía orna, chë enefjuana yebnentša mándayënga canýa tmojanichmó chënga jáuyanama: —Israeloquënga, bënga fsëntseboše entšanga chašmabuayená, nderado ndayá jayanama šmojtsebomñese, muentša entšanga añemo chamotsebomnana ca.

<sup>16</sup> As Pablo tojantsá y entšángbioye cucuátšeca tojánefjatsšëmbo iyteca chamobiamama, y tojánayana: —Šmochjouena Israeloquënga y ndoñe judiënga Bëngbe Bëtsá adórayënga. <sup>17</sup> Israeloca entšanga mon-dadorana Bëtsá, Bëngbe Bëtsá, bëngbe bëts taitanga tojanëbuáyana, y tojanma chënga corente bëtscanga chamotsemnana, chënga Egiptoca inýe luarocana ashjajnëngcá imojoyena ora. Y chentšana, cachabe obenánaca chë luarocana chënga tojésanëbuacana. <sup>18</sup> Canta bnëtsana uata nýetsá, Bëngbe Bëtsá entšanga ndoyena luaroca chënga yojanëuantana, <sup>19</sup> y cha tojanma chë Canaán luaroca canýsëntentša entšanga chamopochocama y bëngbe bëts taitanga chëngbe fshantsënga nduiñënga tojánabiamama. <sup>20</sup> Chë tempo, chë Bëngbe Bëtsá Abrahámbioye quem fshantse jatšeyayama tbojansbuachená orscana, y chë tempo, chë bëngbe bëts taitanga chë fshantse tmojanóyëngacñëntscuana, canta patse y shachna bnëtsana uata tojanochnëngo.

“Chentšana, Bëngbe Bëtsá chëngbiamama mandadënga tojánabiamama, Bëngbe Bëtsabe juabna oyebuambnaya Samuel chëngbe mandayá yojéftsemna tempëntscuana. <sup>21</sup> Chentšana, Israeloquënga Samuel tmojanimpadá canýe rey chabojayé chaotsamëndama; as Bëngbe Bëtsá Saúlbioye chëngbe rey tbojánbema, canta bnëtsana uatëscama. Saúl inamna Cisbe uaquiñá y Benjaminbe bëts pamillanguentšá. <sup>22</sup> Más chcoyna, Bëngbe Bëtsá Saúlbioye chë mándayentšana tbojtsanjuaná, y chentšana Davídbioye mo chëngbe reycá tbojánbema. Chabiamama Bëngbe Bëtsá tojánayana: ‘Atše sëndétatsšëmbo, David, Isaíbe uaquiñá, canýe tšabe entšá yomnana y chama atše sëndoyejuá, y cha sempre endëprontana ntšamo atše stsebošcá jtsamama ca.’ <sup>23</sup> Davídbentšana canýe entšá

Jesús enjamna, nda Bëngbe Bëtsá tbojanichmó Israeloca entšanga jabátsebacama, ntšamo cach Bëngbe Bëtsá chëngbe bëts taitanga tojanašebuachenacá.

<sup>24</sup> Cabá Jesús ndébozna ora, Juan nýetsca Israeloquënga tojanabuayená bacna soyënga amana chamot-sajbanama y chamuenábayama. <sup>25</sup> Juanbe trabajo jopochócama yojtsobeco ora, cha tojánayana: ‘¿Nda atše tsmënama tšëngaftanga šmojuabná ca? Chë tšëngaftanga šmontsejuabná atše tsmëna ca cha, atše ndoñe quetsátsmëna. Pero átšbentšana echanjabo canýa, y atše merecido taitatobuajoñe ni mo jotsejbiyama chabe shecochëtjonëshentša corriëja jajafjonama ca.’

<sup>26</sup> “Chcase morna, Abrahámbentšana entšanga y ndoñe judiënga Bëngbe Bëtsá adórayënga; bëngbiamama entsemna quem buayenana soye, chë Bëngbe Bëtsá entšanga játsëbacana. <sup>27</sup> Masque cada ochnayté, Bëngbe Bëtsabe juabna oyebuambnayëngbe uabemana palabra monjanalía chëngbe enefjuana yebnentše, Jerusalenentša oyenënga y chentša mándayënga ndoñe quenjátanësertana nda Jesús bëtsemnana, y chë tmojtsalía soyëngama cach ndoñe. Y chca, chënga Jesús chamóbama tmojánboshjona ora, chë chca amënga tmojanma ntšamo Bëngbe Bëtsabe juabna oyebuambnayëngbe librësangañe iuabemancá. <sup>28</sup> Y masque ndocna bacna soye tmojáninýena Jesús jóbanama chabotsemnana, Pilato tmojanimpadá chaomandá chábioye jóbama. <sup>29</sup> Chentšana, lempe ntšamo Bëngbe Bëtsabe uabemana palabren-guiñe iuayancá Jesúseftaca tojanochnëngo ora, chabe ústonënga chë cruzocana tmojtánëstjango y tmojanatbontsá. <sup>30</sup> Pero Bëngbe Bëtsá tojanma Jesús cháuatayenama. <sup>31</sup> Chë Galileocana Jerusalenoye cháftaca tmojánanga, baytentscuana Jesús yojánebëbuacana; y morna, lempe ntšamo Jesusbiamama tmojaninýcá, chënga entšángbeñe montsoyeuambná.

<sup>32</sup> “Y chca, mora bënga chë tšabe noticiënga cbontsëtsëtsná. Ntšamo Bëngbe Bëtsá bëngbe bëts taitanga tojanašebuachenacá, <sup>33</sup> cha tonjama, bënga chë chëngbe entšanguentšëngbiamama, chca chaotsemnana. Y Bëngbe Bëtsá chca tojama, Jesús cháuatayenama cha jamëse. Rey David, Bëngbe Bëtsabe uabemana palabren-guiñe, segundo salmentše mëntšá tojanábema, ntšamo Bëngbe Bëtsá Jesúsbioye tbojanianama:

Aca atšbe uaquiñá condmëna.

Mënté entšanga sënjinýanyé aca atšbe Uaquiñá comnana ca. <sup>34</sup> Y tempo Bëngbe Bëtsá chabe uabemana palabren-guiñe tojaninýanyé cachá jamama Jesús cháuatayenama y ndoñe cachiñe chaondóbanama, mëntšá tojánayana ora:

Chë ndegombre soyënga y chë tšabe bendicionënga ntšamo David sënjanšbuachenacá,

tšëngaftanga cbochanjátšataye ca. <sup>35</sup> Inýoca Bëngbe Bëtsabe uabemana palabren-guiñe, Salmos librësá uabiamnaya, mëntšá tojanábema ntšamo Jesús Bëngbe Bëtsábioye tbojanianama:

Aca ndoñe quecochatsleséncia atšbe cuerpo,

chë acbe Uámana oservenabe cuerpo chaot-sopochocama ca. <sup>36</sup> David, chabe tempo imojoyenëng-biama tojanma, ndayá cha chaomama Bëngbe Bëtsá tojanjuabocá. Cha tojanóbana y tmojanatbontsá chë chabe bëts taitángbioye tmojanëtabuantsá luarentse, y chabe cuerpo tojanopochocá. <sup>37</sup> Pero chë Bëngbe Bëtsá tojanma chauatayenamabe cuerpna, ndoñe tonjanopochocá.

<sup>38-39</sup> “Asna, baconga y batanga, atše séntseboše tšëngaftanga quem soye chašmotsetátšëmbo: Ndayá Jesús tojanmama, entšanga chëngbe bacna soyëngama perdonánënga montsemna. Jesúsbeyeca, nyetsca chábëñe tmojtsošbuáchenga, bacna soyëngama perdonánënga mochántsemna. Ntšamo Moisesbe leyíñe iuayancá tmojanmama, chënga ndoñe tmonjanobená chca perdonánënga jtsemnana; nye Jesúsbeñe jtsošbuáchiyëse chënga perdonánënga jtsemnana.

<sup>40</sup> Cuedado šmochtsebomna, ntšamo Bëngbe Bëtsabe juabdo oyeubuabnyënga tmojanayancá, tšëngaftangaftaca ndoñe chaondochnënguama. <sup>41</sup> Bëngbe Bëtsá mëntšá tojánayana:

Šmochjouena. Tšëngaftanga chë ntšamo atše tijayancá šmojtsábotenga,

ojnanánënga šmochántsemna y šmochanjóbana.

Tšëngaftanga cabá vida šmobomnëntscuana, atše bëts soyënga chanjëftsema,

y masque ndánaca chë soyëngama chacmojtsacúnta, tšëngaftanga chiñe ndoñe quešmochatošbuáchiyeca” —Pablo tojanoyebuambá.

<sup>42</sup> Pablo y chabe enutënga chë judiëngbe enefjuana yebnentsana tmojëftsanbocna ora, chë ndoñe judiënga chëngbioye tmojanaimpadá, chë inye ochnaytescama chë soyëngama más jábuayenama. <sup>43</sup> Chentše chë te jénefnama tempo tojanopochocá ora, ba judiënga y ndoñe judiënga, chë Bëngbe Bëtsábioye imojánadorana mo chë judiëngcá, Pablo y Bernabé tmojanéseto. Y chatna chënga tmojanabuayená nyets tempo chamotsejuabnama, Bëngbe Bëtsá chëngbiama tšabe soyënga yojtsamama.

<sup>44</sup> Chë inye semana, chë ochnaytena, nya mo nyetsca chë pueblentse oyenënga tmojanobeconá Bëngbe Bëtsabe palabra jouenama. <sup>45</sup> Pero ba entšanga choye jouenama tmojánama chë judiënga tmojáninye ora, tmojanotjyaná, ba entšanga Pablo imojtseyeunana; as chënga tmojanontsé mocá ichámuana ndayá cha yojtsóyebuabnama, y chábioye oyenguayana.

<sup>46</sup> As Pablo y Bernabé más añémoca mëntšá tbojánayana: “Endánëyta, natsana tšëngaftanga, chë judiënga šmomnënga, Bëngbe Bëtsabe palabra jshabuayenana. Pero tšëngaftangna chë palabra šmotsaboté, y šmontsejuabná tšëngaftangbiama ndoñe tšabá yontsemna chë nyetsca tescama yomna tšabe vida jtsebomnana ca; chë causa, bënga fchantsoñe chë ndoñe judiëngbeñe Bëngbe Bëtsabe palabra jóyebuambayama. <sup>47</sup> Er Bëngbe Bëtsá chama šjanichamó, mëntšá jauyanëse:

Aca tcbonjuábuayana chë ndoñe judiëngbioye tšabe noticiënga jábuayenama, chaósertama.

Y chca, aca chëngbiama cochántsemna mo canye binynayacá.

Chca, ácbeyeca nyets luarënguenache entšanga atše chanjatsebacá ca.”

<sup>48</sup> Chë ndoñe judiënga chca tmojanuena ora, puerte imojtsóyējuaye y tmojanontsé mëntšá ichámuana: “Bëngbe Utabnabe palabra tšabá bëngbiama entsemna ca.” Y chora, chë nyetsca tescama yomna tšabe vida jtsebomnana Bëngbe Bëtsá tempo tojánabacacanga, tmojanontsé Jesúsbeñe jtsošbuáchiyana. <sup>49</sup> Y chca, nyets chë luariñe más entšanga Bëngbe Bëtsabe palabra imojtsuenana. <sup>50</sup> Pero chë judiënga tmojanoyebuambá, shembásengaftaca Bëngbe Bëtsá adórayënga y uámanënga, y chë pueblentša uámana taitángaftaca, jamama Pablo y Bernabé chabosufrija y chë luarentšana jtëbuacnama. <sup>51</sup> As, Pablo y Bernabé tbojésanshecstëtonata, judiënga jinyaníyama chënga ndoñe tšabá tmojanmama; y chentšana, Iconio puebloye tbojtsanoñe. <sup>52</sup> Pero Jesucristbeñe osbuáchiyënga corente oyejuayënga imojtsemna, y chë Uámana Espiritu chëngbe ainaniñe corente yojtsemándaye.

#### Pablo y Bernabé Iconio puebloca

**14** Iconioca, Pablo y Bernabé cányiñe tbojánamashëngo chë judiëngbe enefjuana yebnentsë y corente obenánaca Bëngbe Bëtsabe palabra tbojanoyebuambá. Chíyeca, ba judiënga y ndoñe judiënga Jesucristbeñe imojtsošbuaché. <sup>2</sup> Pero chë judiënga Jesucristbeñe ndošbuáchiyënga, chë ndoñe judiëngbioye tmojanayëñaná, Pablo y Bernabebiama podescac chamotsejuabnama. <sup>3</sup> Chíyeca, Pablo y Bernabé bayté chentše tbojanototoná y ndauatjcá Bëngbe Utabná Jesucristbiama tbojanoyebuambá. Bëngbe Utabná obenana chata tojanatsatá bëts soyënga jtsamama, y chë soyëngaca Bëngbe Utabná entšanga tojaninyanýé, ndayá chë ichmónata ibojtsoyebuambnacá ndegombre bëtsemnana, chë Bëngbe Bëtsá nyetscanga iuababuányëshanana. <sup>4</sup> Pero nyetsca chë pueblentša entšanga ndoñe cachcá imontsejuabnaye; inyënga chë judiëngaftaca imojtsemna, y inyëngna chë Jesucristbe ichmonátaftaca. <sup>5</sup> As, chë judiënga y ndoñe judiënga chentša mandayëngaftaca tmojanenoyeuná chata jtsatsetšenama y ndëtšbëngaca jtsébáyama. <sup>6</sup> Pero Pablo y Bernabé chama tbojántatšëmbona orna, tbojtsanëchañe Listra y Derbe puebloye, Licaonia luaroca, y choca chábuañe luarëngoye; <sup>7</sup> y chë luarënguenáchnaca, chata Jesucristbe tšabe noticiënga entšanga tmojanabuayená.

#### Listra puebloca, ndëtšbëngaca Pablo tmojtsanatëchénganja jtsóbama

<sup>8</sup> Listra puebloca inamna canye boyabása jama ndobená. Ndocna te yondobena jana, chca cosheto inónýna causa. Chë boyabásana yojtsetbemana <sup>9</sup> ouenana ntšamo Pablo yojtsichamcá. Y Pablo chábioye tbojanonýinyé ora, tojántatšëmbona chë šocá tša yojt-



sošbuáchema, shnaná jtsatsmënema; <sup>10</sup> as Pablo, juayebuácheneşe tbojanianyana: “¡Motsbaná y acbe she-cuatšéngaca tšabá motsa ca!”

Chora chë boyabása, canýe jontsënýese tojantsá y yojóntša anana. <sup>11</sup> As chë entsánga, ndayá Pablo tojan-mcá tmojáninýe ora, tmojanontšé uayebuáchana chë Licaonia luarentša biyañe, mëntšá: “¡Bëngbe diosënga bëngbioye tbojátsma mo entsátca ca!”

<sup>12</sup> Bernabé imojtsábobuatma Zeus ca, mo chë chëngbe diosënga amëndayacá; y Páblëna Hermes ca, mo chë inýe diosëngbiam a oyebuambnayacá.

Páblëbioye chca imojtsábobuatma, er cha más yot-soyebuambná. <sup>13</sup> Zeusbiam a chentša bachna inabomna canýe yebna chë pueblo chaboca, chábioye jadóra-ma. Chë bachna, uacnënga tojanënatse y uantšë-fjushangá tojanëyamba chë Zeus jadóra-ma yebnentša amashjuanoýe; y cha y chë entsánga imojtseboşe chë uacnënga jashebuáyana y jajuinýiyana, chca, chë ich-monátbioye jadóra-ma.

<sup>14</sup> Bernabé y Pablo chama tbojántatsëmbona ora, entsáyá tbojtsanenántšajatanëca, entsánga jinýanýiyama, ntšamo chënga imojtsamcá chata tondaye yonjó-gusetama, y tbojëtsanotjajo entsangbe tsëntsajana y mëntšá ibojtsaychembumbuana: <sup>15</sup> “Baconga y batanga, ¿ndáyeca chca šmojtsama ca? Bëndata cach tsëngaftangá entsata fsëndmëna. Muentše bëndata fsëntsemna nýe jábuayenama Bëngbe Utabná Jesucristbe tšabe noticiënga, tsëngaftanga chë quem ndoservena soyënga, vida ndbomna soyënga adórayana chašmotsajbanama, y Bëngbe Bëtsá Ainabe benache chašmatishachama. Ndegombre, cha tojanma celoca, fshantse, nyetsca béjayënga y lempe ntšamo chenache yobinýncá. <sup>16</sup> Masque tempo, Bëngbe Bëtsá entsánga tojanalesenciá cada ona chamma ntšamo tojtsejuabnacá, tšabá cachëngbiam a yojtsëmnyayeca, <sup>17</sup> Bëngbe Bëtsá ndocna te ntjájbanana tsëngaftanga jtsinýanýayana, cachá tojama tšabe soyëngaca, mocna Bëtsá cha yomnana. Cha endama tsëngaftangbiam a chauaftema y chë matënga botamana chaoshájonama, y becá saná cmondatsatná; y cha endama tsëngaftangbe ainaniñe corente oyejuayana chašmotsebomnama ca” —chata tbojánayana.

<sup>18</sup> Masque chë soyënga tbojánayana, nýe batsatema más bën y ya ndoñe matbëjanobenata chë entsánga jtséuyanana uacnënga jashebuáyama, chca, chátbioye jadóra-ma.

<sup>19</sup> Chca ora, básefta judiënga tmojánashjajna Pisidioca, Antioquíocana y Iconiocana, y chentša entsángbioye tmojanayëñaná, Jesucristbe ichmonatbe contra chamotsemnama. Chcasna, Pablo ndëtšbéngaca imojtséñanaye y chabe cuerpo chë pueblo chaboýe tmojtsansjojó, er chënga imojtsejuabnaye Pablo ya obaná yojtsemna ca. <sup>20</sup> Pero Jesucristbeñe ošbuáchiyënga Pablo tmojanóbobuashcona orna, cha tojtantsbaná y cachiñe chë puebloye tojtesaná; y chë yëfsana, Bernabéftaca Derbe puebloye tojána.

<sup>21</sup> Derbe puebloca Jesucristbe tšabe noticiënga entsánga tmojanabuayená, y chca, entsánga Jesucristbeñe imojtsošbuáchiye. Chentšana chata tbojësanshë-cona Listra, Iconio y Pisidioca Antioquiye. <sup>22</sup> Chë luarënguenache chata ibojánana chë Jesucristbe us-tonëngbioye atañëmuaye, cada te chábeñe más chamotsošbuáchema. Y entsángbioye tmojanéyana: “Bëngbe Bëtsabe amëndayoye jamashënguamna, bënga šontsamna quem luarentše bëtsca jëftsepadeccëna ca.” <sup>23</sup> Nyetsca ošbuachiyëngcá enefjuanë-nache, bëtsëjemëngcá mándayënga tmojanabacacá, chentša Jesucristbeñe ošbuáchiyënguentsána, cachënga chentša ošbuachiyëngbioye jtsamëndayama. Bëngbe Bëtsá jëtschuayama tondaye ntjascá imojtsemna y cháftaca imojtsencuënta ora, cha tmojanimpadá, chë ošbuáchiyënga Bëngbe Utabnabe cucuatšëñe chamotsemnama, ndábeñe chënga imojtsošbuaché.

### Pablo y Bernabé, Sirioca Antioquía puebloye tbojtanta

<sup>24</sup> Pisidia luarëjana tbojánachnëngo ora, Panfilia luaroye tbojánashjango. <sup>25</sup> Perge pueblentše Jesucristbe tšabe noticiënga entsángbioye tmojanabuayená, y chentšana Atalia puebloye tbojánata. <sup>26</sup> Chentšana, Bernabé y Pablo, bejaycá tbojtanata Sirioca Antioquía puebloye. Chentša entsánga Bëngbe Bëtsá tmojanimpadá chata chabe cucuatšëñe chabotsemnama, chë trabajuiñe chaotsanýenama; y chorna, chë trabajo ya tbojanpochocá. <sup>27</sup> Choye tbojtanashjango ora, nyetsca Jesucristbeñe ošbuachiyëngbioye tmojánachembo, y tmojanacuntá ntšamo Bëngbe Bëtsá tšabe soyënga chátaftaca tojanmama, y ntšamo Bëngbe Bëtsá tojaninýanýe, chë ndoñe judiëngnaca chamotsobenama Jesucristbeñe jtsosbuáchiyama. <sup>28</sup> Y Pablo y Bernabé bayté chentše tbojanototoná Jesucristbeñe ošbuáchiyëngaftaca.

### Ichmónënga y bëtsëjemëngcá mándayënga Jerusalemoca tmojánenefjna jencuëntama

**15** Chë tempo, báseftanga Judeocana áshjajnënga tmojanontšé, Antioquía pueblentše, chentša Jesucristbeñe ošbuáchiyënga mëntšá jabuátambana: “Base bobachtema chë más delicadentše ndoñe šmonjenotëtšëse, ntšamo Moisesbe leyíñe endayancá, ndoñe quenátopodena tsëngaftanga atsebácanënga jtsemnama ca.” <sup>2</sup> Chiyeca, Pablo y Bernabé jabuachana chca buatëmbayëngaftaca imojánenatsëtsnaye. Cabana, tmojanëbuáyana Pablo, Bernabé y inýënga Jerusalemoye chamotsama, choca chë Jesucristbe ichmónëngaftaca y chë chentše Jesucristbeñe ošbuachiyëngbeñe bëtsëjemëngcá mándayëngaftaca chama chamencuentama.

<sup>3</sup> Chcasna, chë Antioquioca imojánenefjuana Jesucristbeñe ošbuáchiyënga Jerusalemoye chënga tmojanichamó. Fenicia y Samaria luarëjana imojtsachnëjuana ora, chënga tmojanacuntá ntšamo chë ndoñe

judiënga chëngbe tempsca soyënguiñe ošbuáchiyana tmojtšanajbanama y chora Bëngbe Bëtsábeñe imojtsošbuáchema. Jesucristbeñe chentša ošbuáchiyënga chca tmojanuena ora, puerte oyejuayënga imojtsemna.

<sup>4</sup> Pablo y chë ínÿenga Jerusalenoye tmojánashjajna ora, chentša Jesucristbeñe ošbuáchiyënga, Jesucristbe ichmónënga y bëtsëjemëngcá mándayënga chëngbioye tmojanëbuaja. Chentšana, Pablo y Bernabé tbojanacuntá lempe ntšamo Bëngbe Bëtsá chátaftaca yojamcá. <sup>5</sup> Pero básefta fariseunga, chora ya Jesucristbeñe ošbuáchiyënga, tmojantsá y mëntšá tmojánayana: “Chë ndoñe judiënga entsamna chë más delicadentše base bobachtema tëtšenënga jtsemnana, bënga judiëngcá; y tšëngaftanga cmontsamna chënga jáuyanana, ntšamo Moisesbe leyënguiñe iuayancá chamotsamama ca.”

<sup>6</sup> As, chë Jesucristbe ichmónënga y bëtsëjemëngcá mándayënga tmojánenefjna jencuëntama, chë ndoñe judiënga aíñe o ndoñe yonjánamnama chë más delicadentše base bobachtema tëtšenënga jtsemnana, ntšamo chë judiënga imojanamancá. <sup>7</sup> Bën y bëtscá chënga tmojanencuentá chentšana, Pedro tojantsbaná y mëntšá tojanéyana: “Jesucristbeyeca catšátanga, tšëngaftanga šmondétatšëmbo, ya bayté entsemna Bëngbe Bëtsá tšëngaftangbentšana atše šonjanábuayana, Jesucristbe tšabe notiënga chë ndoñe judiënga jábuayenama, chca, chënga Bëngbe Utabnábeñe chamotsošbuáchema. <sup>8</sup> Bëngbe Bëtsá jtsetatšëmbuana lempe ntšamo entšanga tmojtsejuabnacá. Y cha šonjaninÿanyé, chë ndoñe judiëngnaca imnobe na chabe entšanga jtsemnana, chábeñe tmojtsošbuáchese, chë Uámana Espíritu chëngbe ainaniñe cháumashënguama cha tojanma ora, ntšamo cha bëngbe ainaniñe tojanmá. <sup>9</sup> Y chca, Bëngbe Bëtsabiamanÿetscanga cachcá monduámana, judiënga y ndoñe judiëngnaca; y cha tojama chë ndoñe judiëngnaca chëngbe bacna soyëngama perdonánënga chamotsemnana y ainaniñe tšabe juabna chamotsebomnama, Bëngbe Bëtsabe palabriñe jtsošbuáchiyëse. <sup>10</sup> Y mora, ¿ndáyeca tšëngaftanga ndoñe šmontseboše ntšamo Bëngbe Bëtsá tojamcá? Pero tšëngaftanga šmontseboše, chë ndoñe judiënga Jesucristbeñe ošbuáchiyënga lempe chë leyentša mandënga chamotsocumplínama, mo nda ínÿabioye uauta uasmanésha cuaftsasmëmnacá; pero lempe chë mandënga, ni bëngbe bëts taitanga ni bënga ntsobenana jocúmpliana. <sup>11</sup> Y chca ndoñe chaondëtsemna. Bënga mondošbuaché bënga atsebácanënga imomnama Bëngbe Utabná Jesús chabe tšabe juabna šojaninÿanyéyeca, y Bëngbe Bëtsá cachcá chë ndoñe judiëngnaca tojatsebacá ca” —cha tojanéyana.

<sup>12</sup> Chorna, chentše imojtsemna entšanga nÿetscanga iyteca tmojanobiamana, y tmojanuena Bernabé y Pablo jtsóyebuambnayana, chë bëts soyëngama, Bëngbe Bëtsabe obenana entšanga jinÿanyiyama, y inÿe soyëngama chabe obenánaca, ntšamo chë ndoñe judiëngbeñe Bëngbe Bëtsá chátaftaca tojanmá.

<sup>13</sup> Chë útata jóyebuambayama tbojanpochocá ora, Santiago mëntšá tojánayana: “Jesucristbeyeca catšátanga, šmochjouena: <sup>14</sup> Simón šonjabuayená ntšamo Bëngbe Bëtsá natsana tojaninÿanyé, chë ndoñe judiëngnaca cha iuanÿenama, y chíyeca cha chënguentšana banga tojubuáyana chabe entšanga chamotsemnana. <sup>15</sup> Ntšamo Simón šonjabuayenacá entsemna cachcá ntšamo chë Bëngbe Bëtsabe juabna oyebuambnayënga tmojanayancá, ntšamo yochjanopásama y ntšamo Bëngbe Bëtsabe uabemana palabrënguiñe endayancá, mëntšá:

<sup>16</sup> Chentšana atše chanjésabo y chë Rey Davidbe pamíllanga cachiñe uámanënga chantabiamana; mo nda canÿe uáshajayena yebna tojëtsejebcá, atše, Davidbe pamíllanga cachiñe uámanënga chantabiamana;

<sup>17</sup> chca, chë inÿe entšanga chamonguango ndayá jamana atše, tšëngaftangbe Utabná, más chašmotsábuatmama, nÿetsca ndoñe judiënga, chë atšbe entšanga chamotsemnana atše tijábacacanga.

<sup>18</sup> Chca atše, tšëngaftangbe Utabná séntsiçhamo, nda ya bayté entsemna tonjanma entšanga chë soyënga chamotsetatšëmbuama ca —chiñe endayana.”

<sup>19</sup> Chentšana Santiago mëntšá tojanéyana: “Chíyeca atše sëntsejuabná, bënga ndoñe šontsamna chë ndoñe judiëngbiamana jamana más totcá chaotsemnana Jesucristo jtséstonama. <sup>20</sup> Chamna, šontsamna chënga juabuábiamana y jáuyanana ndoñe chamondëtsešá, sananga chë ndaye soyënga entšanga tmojuabná diosënga yomna ca jadórana tmojuiyëbana; bacna soyënga shembásenga o boyabásengaftaca ndoñe chamondëtsešama y ndoñe chamondëtsešá tsešana bayëngbe mëntšena, y buiñe cach ndoñe ca. <sup>21</sup> Er chë natsana tempënga orscana, nÿetsca pueblënguenache mondmëna chë Moisés tojëftsanayana soyënga entšangbioye abuayinÿayënga; y chabe leyënga, nÿetsca ochnayté mondbetsaláye chë bënga judiëngbe enefjuana yebnënguenache ca” —cha tojanéyana

### Chë Jerusalenoca ichmónënga y bëtsëjemëngcá mándayënga canÿe tsbuanácha tmojanichmó chë ndoñe judiëngbiamana

<sup>22</sup> Chentšana, chë Jesucristbe ichmónënga y bëtsëjemëngcá mándayënga, nÿetsca chë Jesucristbeñe ošbuáchiyëngaftaca tmojanenoyeuná chënguentšana báseftanga jabacacayama, Pablo y Bernabéftaca Antioquía puebloye jíçhamuama. Chcasna, tmojanëbuáyana Judas, chë Barsabás ca uabobuatmá, y Silas; chata ibnamna uámanata chë Jesucristbeñe ošbuáchiyënguentše. <sup>23</sup> Y chëngaftaca canÿe tsbuanácha tmojanichmó, y chiñe mëntšá yojëtseyana: Bënga chë Jesucristbe ichmónënga y chë bëtsëjemëngcá mándayënga, cach tšëngaftangcá Jesucristbeñe ošbuáchiyënga, fsëntseboše Bëngbe Bëtsá salú-

doca chacmotsábouamna, tšëngaftanga chë ndoñe judiënga, Jesucristbeñe ošbuáchiyënga, Antioquia puebloca y Siria y Cilicia luarëngoca oyenënga. <sup>24</sup> Bënga fsëntsetatšëmbo bëngbentsšana báseftanga choye tmojángama, bënga ntjamëndacá, y fsëntsetatšëmbo mocna soyënga cmojtsabuátambama y chë causa, tšëngaftanga ndoñe šmontsetatšëmbo ntšamo jtsejuabnayana ndayá jamama yomnana, Jesucristbe canye ndegombre ustoná jtsemnama. <sup>25</sup> Chcasna, bënga fsënjenoyeuná y šonjúnynana tšabá yojtsemna báseftanga bënguentsšana jabacacayana tšëngaftangbioye jontješiyama chamotsama, y Pablo y Bernabé, chë Jesucristbeyeca bëngbe bonshana catšátataftaca, choye chamotsama. <sup>26</sup> Chë útatna ba soye tbojotsbocá vida jáshbiamana, Bëngbe Utabná Jesucristbiamana oservëniñe. <sup>27</sup> Chátaftaca Judas y Silas fsënjichamó; y chatna cach tšëngaftangaftaca bochanjóyebuambaye ntšamo quem tsbuanáchañe yojtsábemana. <sup>28</sup> Chë Uámana Espiritu y bënga cachá fsëntsejuabná, bënga ndoñe šontsamna tšëngaftanga jamëndana bëtsá jabuache mandënga Moisesbe leyënguiñe chašmot-socumplínama. Nye quem uámana soyënga chiñe añe cmontsamna jtsobedecénana: <sup>29</sup> Ndoñe šmattsesaye mëntsena, chë ndaye soyënga entšanga tmojuabná diosënga yomna ca jadórama tmojóba bayëngbiana; ndoñe šmatjofsiye buiñe, ni šmatjase tsešana bayëngbe mëntsena; y shembásenga y boyabásengaftaca bacna soyënga ndoñe šmattsama. Chë soyënga ntšamcá, tšabá šmochanjama. Bëngbe Bëtsá salúdoca chacmotsábouamna ca —chiñe yojétsayana.

<sup>30</sup> Chcasna, chë quem Jerusalenocana ichmónënga tmojésanodiošoftanentsšana, Antioquia pueblöye tmojána; y chocna, nyetsca chë Jesucristbeñe osbuachiyëngbioye tmojanébuaja y chë tsbuanácha tmojanayentšbuaché <sup>31</sup> Chë Antioquia pueblentsha Jesucristbeñe ošbuáchiyënga ntšamo chë tsbuanáchañe yojtsábemancá tmojanalía ora, bëts añemo tmojtanca y corente imojtsóyejuaye. <sup>32</sup> Judas y Silas Bëngbe Bëtsabe juabna oyebuambnayata ibnamna; as, chát-naca chë chentša Jesucristbeñe ošbuachiyëngbioye ba soyënga tmojanéyana, chënga añemo chamotsatsbomnama y Jesucristbeñe corente chamot-sošbuáchemana. <sup>33</sup> Chentšana baseftaytese, chentša Jesucristbeñe ošbuáchiyënga chëngbioye tmojtana-diošoftá, chë ndëmuanyënga tmojanichamóngbioye jtama. <sup>34</sup> Pero Sílasna tšabá ibojtsinýana cachentše más jëftsajëtanama. <sup>35</sup> Pablo y Bernabé baseftayshinýe Antioquia pueblentshe tbojanototoná y ba inýengaftaca Bëngbe Utabná Jesucristbe tšabe noticiënga entšanga tmojanabuatambá y tmojanabuayená.

**Pablo cachiñe inye luarëngoye tojána, Bëngbe Bëtsabe trabajo jamama**

<sup>36</sup> Chentšana baseftaytese, Pablo Bernabébioye tbojanianya: “Bëngbe Utabnabe palabra tbojanabuayená luarëngoye bochjésa, choca Jesucristbeñe os-

buáchiyënga jábuachama y jányama ntšamo imojtsemnama ca.”

<sup>37</sup> Bernabé yojtseboše, Juan chë Marcos ca uabobuatmábioye chátaftaca jëftsbešsama. <sup>38</sup> Pero Páblëna ndoñe tšabá ibontsinýana cha jëftsbeššana, er Juan chátbentsšana tojtsanojuánañe Panfilia luarocana, y ndoñe tonjanatjëmbambá, Bëngbe Bëtsabe trabajo japochócantscuana. <sup>39</sup> Y chë palabrama tondaye tbojanenóyeunata causna, Pablo y Bernabé cachá tbojesanenonýaye. Y chca, Bernabé, Marcos tbojéftsanbetše, y bejaycá Chipre luaroye tbojánata; <sup>40</sup> y Páblëna, Silas tbojanábuayana jëftsbešsama. Chë Antioquia pueblentsha Jesucristbeñe ošbuáchiyënga Bëngbe Bëtsá tmojanimpadá Pablo y Silas Bëngbe Utabnabe cucuatšifne chabotsemnama, chatbe trabajuifne chaot-sanýenama. Chentšana, Pablo Sílasëftaca tbojánbocna y <sup>41</sup> Siria, Cilicia luarënguëjana tojánachnëngo entšanga añemo atšatnaye, chë luarenache enefjuana osbuáchiyënga Jesucristbeñe más chamotsošbuáchemana.

**Pablo Timotébioye tbojáninýena**

**16** Chentšana Pablo tojánashjango Derbe y Listra luaroye, y chentše tbojáninýena canye Jesucristbeñe ošbuachiyá, Timoteo ca uabainá; cha inamna canye judiá Jesucristbeñe ošbuachiyabe uaqiñá y chabe taitana griego entšá inamna. <sup>2</sup> Chë Listra y Iconioca Jesucristbeñe ošbuáchiyënga Timoteobiamana tšabá imojanoyebuambná. <sup>3</sup> Pablo tojánbošena Timoteo jëftsbešsama; pero cabá ndetsbetše orna, Pablo base bobachtema chë más delicadentše tbojantëtše, ntšamo judiënga imojanamancá. Cha chca tojanma, jobenayama chë judiënga imojoyena luarëngoye cháftaca jama, er nyetsca judiënga imnatátšëmbo Timoteobe taitá griego inamnama. <sup>4</sup> Chë ibojtsachnëjuana pueblënguenache chata ibojtsana Jesucristbeñe osbuachiyëngbioye abuayinayey, ntšamo Jerusalenoca Jesusbe ichmónënga y bëtsëjemëngcá mándayënga tmojanamëndacá, ndayá chë Jesucristbeñe osbuáchiyënga ndoñe judiënga jamama yojtsamncá. <sup>5</sup> Nyets luarenache enefjuana ošbuáchiyënga, Jesucristbeñe más imojtsošbuáchiye, y cada te Jesucristbeñe ošbuáchiyënga más imojtsóbotena.

**Pablo mo otjenayoquécá canye Macedonioca entšábioye tbojáninýe**

<sup>6</sup> Chë Uámana Espiritu, Pablo y Sílasbioye tojaninýané, chata ndoñe yontsanamna Asia luaroca Bëngbe Bëtsabe palabra entšanga jábuayenana; asna, tbojánachnëngo Frigia y Galacia luarëjana. <sup>7</sup> Y Misia luaroca enajébanoye tbojánashjango ora, tmojanjuabó tsjuana jana, Bitinia luaroye; pero chë Uámana Espiritu tojanabuayená choye ndoñe chabondëtsama. <sup>8</sup> Misia luarëjana tmojánachnëngo ora, Troas luaroye chënga tmojána. <sup>9</sup> Chë te ibeta, Pablo mo otjenayoquécá tojáninýe canye Macedonioca boyabása ibojtsebiatsana y mëntsá ibojtseimpadana: “Diosmanda Macedoniöye mabo y šmabëjabuache ca.” <sup>10</sup> Pablo chca tojáninýe y

cachora lempe tmonjanprontá Macedoniroye jama. At-  
šnaca, chë quem soyënga uabiamnayá, chënga sënjët-  
satjëmbambnaye. Bënga fsënjëtsejuabnaye ndegom-  
bre Bëngbe Bëtsá šojtsanachembuana choye jama ca,  
Jesucristbe tšabe noticiënga choca entšanga  
jábuayenama.

### Pablo y Silas Filipos pueblaca

<sup>11</sup> As, Troasentšana bejaycá fsënjána Samotracia lu-  
aroye, y yëfsana Neápolis pueblroye, <sup>12</sup> y chentšana Filí-  
posoye. Filipos enjamna canye uámana bëts pueblo  
Macedonioca y bëtscá romanënga oyenife. Chë luar-  
entše baseftayté fsënjanouedanga. <sup>13</sup> Canye  
ochnaytena, chë pueblentšana fsënjëtšsanbocna y chë  
fshájaye tsachoye fsënjána. Fsënjanuena chentše can-  
jamna canye luare Bëngbe Bëtsáftaca jencuéntama ca,  
y fsënjána janguanguama. Fsënjáninyena ora, chentše  
fsënjantobiama y Bëngbe Bëtsabe palabra fsënjanye-  
buambá chentše tmojanójoto shembásengbiama.

<sup>14</sup> Enjamna canye shembása, Lidia ca uabainá, Tiatira  
pueblócá, y cha enjamna uámana uabuángana uafjat-  
senga entšayá uená. Cha inamna Bëngbe Bëtsábioye  
adorayá y chentše Páblëbioye ibotseyeunana. Bëngbe  
Bëtsá tojanma cha chabosertá lempe ntšamo Pablo  
yojtsoyebuambnacá, Jesucristbeñe chaot-  
sošbuáchema. <sup>15</sup> Cha y chabe yebnentše oyenënga  
tmonjánenabayora, Lidia mëntšá šonjanaimpadá:  
“Tšëngaftanga šmonjayana atše Jesucristbeñe nde-  
gombre stsošbuaché ca; chcasna, mabënga yebnoye,  
átšbentše chašmoquedama ca.”

Y šonjanëtaríe bënga chentše joquédama.

<sup>16</sup> Canye te, chë Bëngbe Bëtsáftaca encuëntaye lu-  
aroye fsënjëtšajna orna, šonjanëbiatše canye tobiáše,  
oservená, bacna bayëjbe juabna uambayá; chë causa  
cha malisiayá inamna. Chabe nduiñënga becá crocë-  
nana imojanójacañe, chë tobiáše yojanmalisiaye  
soyëngama. <sup>17</sup> Chë tobiáše tonjanontšé Pablo y bënga  
usetonana y mëntšá enjëtšaychembumbuana: “¡Quem  
boyabásenga montsemna chë celoca Bëngbe Bëtsabe  
oservënënga y tšëngaftanga cmontsabuyayiná  
ntšamo Bëngbe Bëtsá yobena tšëngaftanga játsebaca-  
ma ca!”

<sup>18</sup> Y bayté chca enjanchembumbuana; chë causa,  
Pablo bonjëtsetana y cabana, tonjanobuértana y chë  
bacna bayëjbioye mëntšá tbonjanianyana: “¡Jesucristbe  
obenánaca y cha jótšëmbonëse, cbontsemánda chë  
tobiášbentšana chacuaisebocnama ca!”

Y cachora chë bacna bayëja chë tobiášbentšana to-  
jésanbocna.

<sup>19</sup> Pero, chë bayëjbe juabna chábentšana tojésanboc-  
nama y chëngbiama más crocënanana jabemama chora  
chë tobiáše ndoñe yontsobenama, chë tobiáše  
nduiñënga tmojáninye ora, Pablo y Sílasbioye tmo-  
jánishëche y tmojtšanasjojyoye plazoye, mandayëng-  
bioye.

<sup>20</sup> Chë mandayëngbioye tmojanënatse ora, chënga  
mëntšá imojtsichamo: “Quem boyabásata judío entša-  
ta bondmëna, y muatbe causa bëngbe pueblentša

entšanga montsenbouenana, <sup>21</sup> y bontsabuatambá  
soyënga jamama ntšamo chë judiënga imuamancá y  
bëngbe leyënguiñe chë soyënga jamama ndoñe  
quenátšlesenciana. Bënga ndoñe quešnátamna ni  
joudenana, ni jamana chë soyënga, romanënga bët-  
semnayeca ca” —chënga imojtsichamo.

<sup>22</sup> Chora chë entšanga tmojanontšé uayebuáchana;  
as, chë mándayënga tmojanamëndá chata entšayá jt-  
sëtsejquëcana y niñëfjéngaca jtsachebuánganjana.  
<sup>23</sup> Jabuache tmojanachebuánganjentšana, cárceloye  
tmojanautame y chë utámenënga shanyá tmojan-  
mandá yejuana chaotsabuajënyama. <sup>24</sup> Chca tmojan-  
mandá ora, chë utamianá chata tojanënatse chë más  
tsoye utámenoye y shecuatšentšana tsbuanëšifne to-  
janatsebuá.

<sup>25</sup> Pero tsëntseto orna, Pablo y Silas ibnëtsocantañe  
Bëngbe Bëtsá jëtšchuyama, y cháftaca ibnëncuen-  
taye; y chë inye utámenëngna chca imojtsuenana.

<sup>26</sup> Ndeolpe, corente jabuache yojtšëbánjua y chë utá-  
mena yebna fshantsocana yojtšábonjnaye. Cachora,  
nyetsca chë utámenentša bëšašangá tojantëfjo y  
nyetsca utámenënga chë cadenëjuangá yojtšayentš-  
jafjona. <sup>27</sup> Pero chë utámenënga shanyá tojanofšená y  
chë utámenentša bëšašangá yojtšatëfjnama tojáninye  
ora, cha tojanjuabó nyetsca utámenënga tmojtšana-  
cheta ca; chë causa, chabe espadëja yojenosëng-  
botëntšena jtsenóitanama. <sup>28</sup> Pero Pablo tboján-  
bochembo: —¡Acbe cuerpo ndocá matenábomana;  
nyetscanga camuentše fsëndëtsomñe ca!

<sup>29</sup> Asna, chë utámenentša shanyá canye ua-  
juinýanësha tojanëyá y chë utámenoye ochamanana  
tojánamashëngo y auatja causa ngmëmnyayá Pablo y  
Sílasbe shecuatšentše yoJoshëntsamentšiyey.

<sup>30</sup> Chentšana tojtänëbuacna y tojanëyana: —Señórata,  
¿ndayá šojtsemna jamama atše atsbočaná jtsemnama  
ca?

<sup>31</sup> Y chata tbojanjuá: —Bëngbe Utabná Jesúsbeñe  
cochtsošbuáchiye, y chca, Bëngbe Bëtsá aca cmochan-  
jatsbocá y acbe yebnentše oyenëngnaca ca.

<sup>32</sup> Y cha y nyetscanga chë yebnentše imojtsemnënga,  
Bëngbe Utabnabe palabra tmojanabuayená. <sup>33</sup> Cach  
ora chë ibeta, chë utamianá chata tojanënatse chë  
lisianënguiñe jetsajabiama. Chentšana, cha y chabe  
pamíllanga tmojánenabayora. <sup>34</sup> Chentšana, chë utami-  
aná chata tojanënatse chabe yebnoye y saná to-  
janacaredadó. Cha y nyetscanga chë yebnentše  
oyenënga oyejuayënga imojtsemna, Bëngbe Bët-  
sábeñe imojtsošbuáchema.

<sup>35</sup> Yëfsana cachëse, chë mandayëngna soldadënga  
tmojanichamó, chë utamianá jamándama Pablo y Silas  
chauatabáshejuanama. <sup>36</sup> Chë utamianá Páblëbioye  
tbojanianyana: —Chë mándayënga šmonjamandá tsën-  
data jtabáshejuanama. Chcasna, šontsobena natjëm-  
bana jtsatoñana ca.

<sup>37</sup> Pero Pablo chë soldadënga tojanëyana: —Bëndát-  
naca fsëndmëna mo Romoca onýnanatcá derecho  
bomnata y šonjáchebuanganja entšangbe delante,  
bacna soyënga aíñe o ndoñe tatifjamama cabá nd-

inÿanÿiye ora, y cárceloje šmonjautame. ¿Y mora imojtseboše iytēcana jtabáshejuanama? Chca ndocna te chaondétsemna; cach mándayēnga chamuabo jabátēbuacnama ca —cha tojánayana.

<sup>38</sup> Chentšana, chē soldadēngna chē mandayēngbeñe tmojanobuambá ntšamo Pablo y Silas tbojanayancá; chca chēnga tmojántatšēmbona chatna mo Romoca onÿnanatcá derecho bomnata ibnamnama; chē causa, chē mándayēnga puerte imojtsauatja. <sup>39</sup> Chcasna, cach mándayēnga tmojána chata perdón jatétejañama; chentšana tmojtanebuacna y tmojanēyana: “Diosmanda, muentšana inÿe luaroye motsoñata ca.” <sup>40</sup> As chata chē utámenentšana tbojéftsanbocna y Lídiēbe yebnoye tbojéftsanata. Chentšana, Jesucristbeñe osbuáchiyēngaftaca tmojáneneñfna y chata tbojánayana soyēngaca chēngbioye tmojanañemó. Y chentšana, chata inÿoye tbojtsanoñe.

### Tesalónica puebloca, Pablo y Sílasbioye ndoñe tšabá tmonjanēbuaja

**17** Pablo y Silas inÿe luaroye ibojtsaye ora, Anfípolis y Apolonia bēts pueblēnguējana tbojánachnēngo y canÿe bēts pueblo, Tesalónica ca uabáinoye tbojánashjango. Chentše, chē judiēnga canÿe yebna imnabomna chēnga jéneñfnama. <sup>2</sup> Páblēna, ntšamo enjanamancá, cada ochnayté chē jéneñfnama yebnoye yojánaye, unga semanēntscuana, y chentše chē judiēngaftaca yojanoyebuambná y imojánētsētsnaye. Bēngbe Bētsabe uabemana palabreñguēñe iuayana soyēngaca, <sup>3</sup> chēnga yojanabuayiná y ndegombre yojaninÿanÿná, Bēngbe Bētsabe Uámana Uabuayaná jóbanama y chentšana jtayenama ibojamnama. Y mēntšá yojanētsētsná: “Chē Cristo, Jesús endmēna, ndabiama atše cbontsabuyayiná ca.”

<sup>4</sup> Judiēnguentšana bāseftanga chiñe imojtsošbuáchiye y Pablo y Silas tmojanéseto más jouenama. Ba grieguēnga, Bēngbe Bētsá adórayēnga, Jesucristbeñe imojtsošbuáchiye y ba uámana shembásēngna. <sup>5</sup> Pero chē judiēnga ndošbuáchiyēnga chca tmojáninÿe ora, puerte envidia imojtsebomna. Asna, chēnga tmojánachembo banga, tondaye amēnga y bacna entšanga, y chēnga tmojanenutaná jamama nÿetsca chē pueblentša entšanga chamotsenbouénanama; y canÿe entšá, Jasón ca uabainabe yebna chēnga tmojtsanabuache, Pablo y Silas jtsanguanguama, chentšana jesēbuacnama y entšangbe cucuatšīñe jabáshejuanama. <sup>6</sup> Pero chentše ndocná tmonjáninÿena; as chē entšanga Jasón imojtsesjojoye y chentša mándayēnga imojétsemnoye tmojanánatse y Jesucristbeñe inÿe ošbuachiyēngna choye tmojanēnatse, y mēntšá imojtsáyebuache: “¡Chē boyabásata, chē ndēmanÿata ibojtsama nÿetsca luarentša entšanga chamuenbouénanama, quem luaróynaca tbojabo, <sup>7</sup> y Jasón chabe yebnentše chata tojúbuaja ca! ¡Chēnga montsama ntšamo chē Romoca bēts mandadbe mandēnguiñe ndoñe quenatslesenciancá, er chēnga montsichamo inÿe rey canmēna, Jesús ca, y cha, César

chē Romoca mandadbe cuenta nÿetscángbeñe yojtsemánda ca!” —chēnga imojtsáyebuache.

<sup>8</sup> Chē entšanga y chē pueblentša mándayēnga chca tmojanuena ora, corente imojenbouénana. <sup>9</sup> Pero Jasón y chē inÿyēnga, cháftaca imojtsemnēnga, crocénana tmojtanjajó, y as tmojtanabáshejuana.

### Pablo y Silas Berea Puebloca

<sup>10</sup> Ya ibeta yojtsemna orna, chē Jesucristbeñe osbuáchiyēnga tmojanma cachora Pablo y Silas Berea bēts puebloje chabuétsebocnama. Y chata choye tbojánashjango ora, chē judiēngbe enefjuana luaroye tbojánata. <sup>11</sup> Chentša judiēnga imojamna más tšabe ainana bomnēnga chē Tesalonicoca judiēngbiama; chcasna, oyejuayēnga chē buayenana soye Jesucristbiama tmojanóyēngacñe, y cada te Bēngbe Bētsabe uabemana palabra imojanalía, jtsatšēmbuama, ntšamo Pablo y Silas ibojtsētsētsnacá añe o ndoñe ndegombre yojtsemnama. <sup>12</sup> Y chca, ba chentša judiēnga chatbe palábraca Jesucristbeñe imojtsošbuáchiye, y Grecia luaroca ba uámana shembásēnga y boyabásēngna. <sup>13</sup> Pero, Pablo Bereoca chē Bēngbe Bētsabe buayenana soyama entšanga yojtsabuayinama chē Tesalonicoca judiēnga tmojántatšēmbona ora, chēnga choye tmojána y tmojanma chentša entšanga chamuenbouénanama. <sup>14</sup> Chcasna, banga Jesucristbeñe ošbuáchiyēnga tmojanma cachora Pablo chentšana chauétsebocnama y bējaye tsa choye chaotsoñama; chēntscuana, Silas y Timoteo Bereoca tbojanoquedá. <sup>15</sup> Pablo tmojantjēmbambá entšangna, Atenas ca uabaina bēts pueblóntscóñe cháftaca tmojána. Chentšana, Pablo chēnga tojanabuayená chamuaishéconama Silas y Timoteo jaúnayama betesco jtsayana, Pábloftaca jateninÿenama.

### Pablo Atenas puebloca

<sup>16</sup> Pablo Atenas bēts puebloca Silas y Timoteo yojtsēbatmanēntscuana, puerte tbojanongmé, er cha tojáninÿe chentša entšanga imojtsadorana bētscá cachēngbe pormana soyēnga, ndayama chēnga imojanjuabná diosēnga yojamna ca. <sup>17</sup> Chiyeca, chē judiēngbe enefjuana yebnentše, judiēnga y ndoñe judiēnga Bēngbe Bētsá adorayēngaftaca imojánenatsētsnaye, y cada te chentša plazoca chē ndēmanÿēnga chentše imojanashjauanēngaftácnaca. <sup>18</sup> Y bāseftanga, ntšamo jtsejuabnayama entšanga abuatambayēnga, epicureunga y estoiquēnga ca uabainēngna Pábloftaca imojánenatsētsnaye. Inÿyēnga imojtsichamo: “¿Ndayama quem bostero yojtsoyebuambná ca?” Y inÿyēnga: “Chana inÿe luarēngoca entšangbe diosēngbiama muentše entsabóyebuambnaye ca.”

Chēnga chca imojtsichamo, er Páblēna Jesusbiama y chē obanēnga jtayenama yojanoyebuambná. <sup>19</sup> Asna, chentša entšanga cha tmojanánatse canÿe luaroye, entšanga jéneñfnama y oyeambuambnaye joyaunayama luare, Areópago ca uabáinoye. Chentše imojanamana uámanēnga jéneñfmana, nderado ndabiama

jayanama tšabá o ndoñe tšabá tonjamama. Chora Pablo tmojantjá: —¿Chè aca contsabuatambá soyënga ndayá bétsayanana bënga quefstsobena jtsetatšëmbuama ca? <sup>20</sup> Aca tsëm soyënga šcontsëtsëtsná y bënga fsëntseboše jtsetatšëmbuana ndayá chè soyënga bétsayanana.

<sup>21</sup> Er nyëtscanga Atenasentša oyenënga y inye luarëngocana áshjajnëngna, corente yojanogúsetana chè tojtsopasana tsëm soyëngama jtsuenanana y jtsencuëntayana.

<sup>22</sup> As Pablo tojantsá chëngbe tsëntsaca chè Areópago ca uabáinentše y tojánayana: —Atenasentša entšanga: ntšamo bominye sënjajacá, atše séntsetatšëmbo tšëngaftanga ba diosënga puerte šmayaunana y šmadoránama. <sup>23</sup> Atše sëndánrreparana tšëngaftangbe diosënga šmétsadorana luarënguenache y sënjínjena canye altar y chentše mëntšá iuábemana: “Chè Bëtsá nduabuatmabiama ca”. Y morna, chè Bëtsá chè nda ntsabuatmcá šmadoránabiama, atše cbontsabuaiyná.

<sup>24</sup> “Chè Bëtsá quem luare y lempe ntšamo chentše yomncá tojanma; cha endmëna quem luarentše y celoca Utabná, y cha ndoñe quenatiyena cha jadórana entšangbe jebna yebnënguiñe, <sup>25</sup> ni quebnatájaboto ndocná chabiama tondaye chaondétsama, er cha endmëna nda inétsama bënga vida chamotsebomnana y jtseshachnayama chamotsobenama, y cha nyëtsca soyënga šnetsatšatnaye.

<sup>26</sup> “Cha nye canye boyabásabentšana nyëts luarënguentša entšanga tojánabiama, nyëts quem luarentše chamotsiyenama; y cha quem soyënga cabá ndëma ora, tojanjuabó mocna ora y ndayentše entšanga chamuetsiyenama; <sup>27</sup> chca, Bëngbe Bëtsá chamonguanguama, masque chabiama ndoñe corente tmontsetatšëmbo, y chamuinyëna y chábeñe chamotsošbuáchema; pero ndegombre, Bëngbe Bëtsá bëngbentše cada cánÿabentšana ndoñe bënoca quenátsmëna. <sup>28</sup> Ntšamo canya tojanayancá: ‘Bënga Bëngbe Bëtsáftaca cánÿiñe mo canÿacá mondmëna; chábeyeca bënga vida mondbomna, jobónjuama mondobena y ainënga mondmëna ca’. Ntšamo tšëngaftanguentša báseftanga bëts soyëngama uabi-amnayëngnaca tmojanayancá: ‘Bënga nyëtscanga Bëngbe Bëtsabe básenga mondmëna ca’. <sup>29</sup> Y chcasna, Bëngbe Bëtsabe pamíllanga bënga tmomnëse, ndoñe quešnátamna jtsejuabnayana Bëngbe Bëtsá yomna mo cach entšangbe castellano, midio o chè ndëtšbeca pormana soyëngcá ca, er chè soyëngna nye ntšamo entšanga tmojajuabocá y tmojtsobencá japórmana.

<sup>30</sup> Pero Bëngbe Bëtsá tojanjuabó ndoñe ntjatonÿayana chè entšangbe tempsca ndosertánana, y morna, nyëtsca luarënguentša entšanga entsaménda, ndaye bacna soyënga tmojtsamama ngménaca chamuenujuabó, chca amama chamotsajbaná y Bëngbe Bëtsabe benache chamuatishache ca. <sup>31</sup> Bëngbe Bëtsá canye te tojuinÿaná, y chè tena, ndocnábioye ínÿabiama más tšabá ntjatonÿaycá, cha echanjayana entšanga tšabá o ndoñe tšabá tmonjamama; lempe chca cha echanjama canya cachá tbojabocacá entšáftaca, Jesús; y chca

yochtsemnamna, Bëngbe Bëtsá entšanga tojinÿanyé, chè bocacaná Jesús cháuatayenama cachá tojánmayeca ca” —Pablo tojánayana.

<sup>32</sup> Chè obanënga mochtayenama ichámuana chè entšanga tmojanuena ora, báseftanga Pablo imojtsáboyejuana, y ínÿengna mëntšá imojtsichamo: —Bënga fsëntseboše chè contsichamo soyënga más chcoye cachiñe jatuenama ca.

<sup>33</sup> As Pablo chëngbentšana tojésanbocna. <sup>34</sup> Pero báseftanga añe Jesucristbeñe imojtsošbuáchiye y Pablo tmojanasto más jatuenama; chënguentše imojjamna Dionisio, canya chè Areopagoca tbiamanënguentšá; canye shembásanaca, Dámaris ca uabaina, y ínÿengna.

### Pablo Corinto puebloca

**18** Chè soyënga tojanochnëngüentšana, Pablo Atenasentšana Corinto bëts pueblöye tojána.

<sup>2</sup> Chocna, canye judío Ponto luaroca onÿnanáftaca tbojáneninÿena, Aquila ca uabainá. Cha y chabe shema Priscila, cabá chora cuenta Italia luarocana tbojánabo, nyëtsca judiënga Romocana chamuáisebocanama choca bëts mandado Claudio tojanmandá causa. Pablo tojána chata jautsëtsayama, <sup>3</sup> y ntšamo chata jamama Páblënaca jamama inatátšëmboyecna, chátaftaca yojtsoquedañe y cánÿiñe chënga imnatrabájaye; chënga imnatátšëmbo mo tambotemëngcá entšëjuaca japórmana. <sup>4</sup> Y nyëtsca ochnayté, Pablo yojanamana chentša judío entšangbe enefjuana yebnoye jana, Bëngbe Bëtsabe soyëngama jóyebuambayama, y puerte yojtsentšena judiënga y ndoñe judiënga chamotsošbuáchema, ntšamo cha yojtsanëtsëtsnacá ndegombre bëtsemnana.

<sup>5</sup> Silas y Timoteo Macedoniocana choye tbojánashjango ora, Pablo nyëts tempo Bëngbe Bëtsabe soyëngama entšanga yojtsabuayinaye y puerte tšabá chè judiënga yojaninÿanyñá, Jesús ndegombre Bëngbe Bëtsabe Uámana Uabuayaná bëtsemnana. <sup>6</sup> Pero chè judiënga Páblëbe contra imojtsemna y tmojanontsé podescá chabiama ichámuana. Asna, Pablo chabe uichëtjonyangá yojtsenántšasjayaye, chënga jinÿanyiyama chënga ndoñe tšabá tmonjánhjangua, y tojanéyana: “Tšëngaftanga ndatsebácanënga chašmojóbanëse, cach tšëngaftanga šmochtsótatšëmbñe; atšna ndoñe. Mëntescana chè ndoñe judiënga jábuayenama chantsoñe ca.”

<sup>7</sup> Chorna, chè judiëngbe enefjuana yebnentšana tojétsanbocna y canye boyabása, Ticio Justo ca uabainábioye tojtsanoñe. Cha Bëngbe Bëtsábioye ibojánadorana y chè enefjuana yebnentša juachaca inoyena. <sup>8</sup> Y Crispo, canye chè enefjuana yebnentša mandayá, Bëngbe Utabná Jesucristbeñe yojtsošbuáchiye y nyëtsca chabe pamíllangnaca; y banga chè Corintëtsëngnaca Jesucristbeñe imojtsošbuáchiye, Pablo yojtsoyebuambná ora; y chënga tmojánenabaye. <sup>9</sup> Canye ibeta, Bëngbe Bëtsá Páblëbioye mo canye otjenayoquécá tbojanianana: “Ndoñe matauatjana; nye cochtsana atšbe soyëngama oyeuambnaye y ndoñe

iytēca cattsemana. <sup>10</sup> Er atše ácaftaca séntsemna y ndocná quecmochásbojajo ntšámnaca jáborlama; atše bētsca entsānga quem pueblentše sēndābamna ca.” <sup>11</sup> Chcasna, Pablo Corintentše canye uata y chnēnguana shinye tojanototóna, Bēngbe Bētsabe palabra entsānga abuátambaye.

<sup>12</sup> Pero, Galión chē Acaya luarentša mandado inamna orna, chē judiēnga imojenóyeunaye Páblēbe contra; cha tmojánishache y chē tribunaloye tmojanánatse.

<sup>13</sup> Chocna, chē mandado tmojanianya: —Mua entsānga entsētsētsná y entsama chēnga Bēngbe Bētsá chamotsadorana, pero ndoñe ntšamo bēngbe leyēnguīñe endayancá ca.

<sup>14</sup> Pablo jóyebuambayama uatajanóntša orna, Galión chē judiēnga tojanéyana: —Quem entsá nderado inyābioye matbēnjóba o ndayánaca chca matēnjobuachjanguá, as cocayé atše matijótbema tšēngaftanga judiēnga yejuana joyaunayama; <sup>15</sup> pero ntšamo šmotsichamcá entsemna nye buatēmbana soyēngama, nye tšēngaftanga šmēbuatma entsāngbiana y cach tšēngaftangbe leyēngama; chcasna, cach tšēngaftanga cmontsamna jenóyeunayana y jamana ntšamo chašmojenoyeunacá. Atše quem base soyēngama ndoñe quetsátsboše ngoberna jtsemnana ca.

<sup>16</sup> As Galión tojanamēndá chē tribunal luarentšana chē judiēnga jtēbuacnama. <sup>17</sup> Chorna, chē entsānga tmojánishache chē judiēngbe enefjuana yebnentša mandayá, Sóstenes ca uabainá, y Galionbe delante imojtsejantšetaye. Pero Galión chē soye tondayana ibontsentšamna.

### Pablo Antioquiye tojtaná y chentšana cachiñe inye luarēngoye tojána, Bēngbe Bētsabe trabajo jamama

<sup>18</sup> Pablo cabá bayté Corintentše tbojántotona. Chentšana, Jesucristbeñe ošbuachiyēngbentšana tojesanodiošoftá y bejaycá Siria luaroye tojána, Priscila y Aquilaftaca. Cabá Sirioye nda ora, Cencrea puebloca nyets stjēnashe yojtsenátstbotje, Bēngbe Bētsábioye jinjinyiyama canye soye tbojansbuáchenama. <sup>19</sup> Efeso puebloye tmojánashjajna ora, Páblēna Priscila y Aquila tojésanabashejuana. Chentšana, cha tojána chē chentša judiēngbe enefjuana yebnoye y chentše chē judiēngaftaca yojanoyebuambná y imojānenatsētsnaye. <sup>20</sup> Báseftanga Pablo tmojanimpadá inye baseftayté chentše chauesomñama, pero chana ndoñe tonjanoyauná; <sup>21</sup> chentšana, chēngbentšana tojesanodiošoftá, mēntšá jēftšēyanēse: “Nderádose cachiñe chantésabo tšēngaftanga jabábuachama, Bēngbe Bētsá šojalesenciase ca.”

Chora, Pablo bejaycá Efesocana tojēftsanbocna.

<sup>22</sup> Cesarea puebloye tojánashjango ora, tojána jacheuayama Jesucristbeñe ošbuachiyēnga Jerusalenoca; y chentšana Antioquiye tojána. <sup>23</sup> Chentše baseftayté yojēftsemna; y chentšana, Pablo tojesaná Galacia y Frigia luarēnguenache, Jesucristbeñe ošbuachiyēnga añemo atšatnaye.

### Apolos, Efeso puebloca Bēngbe Bētsabe soyēngama yojanabuayiyná

<sup>24</sup> Cach tempo, Efesoye tojánashjango canye judío, Apolos ca uabainá, Alejandría bēts pueblócá; cha puerte obená inamna jonguamiyama y corente inatátšēmbó Bēngbe Bētsabe uabemana palabrēngama.

<sup>25</sup> Bētsca tojánatsjinye chē Bēngbe Utabná tojaninyānyé benachama; añémoca yojanoyebuambná y Jesusbe soyēngama botamana yojanabuatambá, masque cha nye ntšamo Juan entsānga tojánabuatambama y tojanēbáyama inatátšēmbó. <sup>26</sup> Ndauatjca Apolos tojanontšé jóyebuambayama chē judiēngbe enefjuana yebnentše. Pero Priscila y Aquila cha imojóyeunaye ora, barie tmojanchembo y más botamana tmojanbuayená, ntšamo Bēngbe Bētsabe injinyēna benache bētsemnama. <sup>27</sup> Apolos Acaya luaroye jama yojtseboše orna, Jesucristbeñe ošbuachiyēnga bētsca tmojanañemó y choca Jesucristbeñe ošbuachiyēngbiana canye tsbuanácha tmojanichmó, chca, Apolos choca tšabá chamofjama. Acaya luaroye tojánashjango ora, Jesucristbeñe ošbuachiyēnga bētsca tojanéjabuache. Bēngbe Bētsá chēngbe tšabiana yojanjuabnáyeca, chēnga Jesucristbeñe corente imojtsošbuachiye. <sup>28</sup> Entšangbe delante chē judiēngaftaca jabuachana imojānenatsētsnaye y nyetscanga tojaninyānyé, ntšamo ndoñe tšabá inamncá chē judiēnga imnatatšēmbuama; y Bēngbe Bētsabe uabemana palabrēngaca chēnga tojaninyānyé, Jesús Bēngbe Bētsabe Uámana Uabuayaná bētsemnama.

### Pablo Efeso puebloca

**19** Apolos Corintoca yojtsemnēntscuana, Páblēna chē tjañe luarēnguējana tojánachnēngo y Efesoye tojánashjango; chentše básefta ošbuachiyēnga tojánanyēna, pero chēngna nye ntšamo Juan chē Ubayaná tojanabuatambacá imnatátšēmbó. <sup>2</sup> Pablo chēnga tojanatjá: —¿Uámana Espiritu chenjánabo tšēngaftangbe ainaniñe jtsemándayama, Jesucristbeñe ošbuachiyēnga šmojanóbiana ora ca?

Chora chēnga tmojanjuá: —Ni mo queftsátstatšēmbó chē Uámana Espiritu yomnama ca.

<sup>3</sup> Y Pablo tojanéyana: —As, ¿ntšamo šmojánenabaye ca?

Y chēnga tmojanjuá: —Fsēnjānenabaye ntšamo Juan entsānga yojanēbayancá ca.

<sup>4</sup> As Pablo tojanéyana: —Juan tojanēbaye chē bacna soyēnga amama ngménaca tmojanenajuabó, chca amana tmojanajbaná y chē Bēngbe Bētsabe benache tmojánishachēnga, y entsānga yojanētsētsná chē chábentšana yochjanashjanguábeñe chamotsošbuaché ca; y cha Jesús endmēna ca —Pablo tojánayana.

<sup>5</sup> Chca tmojanuena ora, chēnga tmojánenabaye Bēngbe Utabná Jesús jótšēmbonēse, chábeñe imojtsošbuáchema. <sup>6</sup> Pablo chēngbe bestšašīñe chabe cuatšēnga tojanajjó ora, Uámana Espiritu chēngbe

ainaniñe tojánamashëngo jtsemándayama; tmojanontsé inyetsá biyangana, chënga tempo ndmabiyañe, y Bëngbe Bëtsabe juabna imojtsoyebuambná. <sup>7</sup> Chentše imojtsemna bnëtsana uta entsãnga.

<sup>8</sup> Unga shinÿentscuana Pablo yojánaye chë judiëngbe enefjuana yebnoye y ndauatjá Jesucristbe soyëngama yojanoyebuambná; entsãngaftaca imojãnenatsëtsnaye y entsãnga yojanëtsëtsná Bëngbe Bëtsabe amëndayama, chënga chábeñe chamotsošbuáchema. <sup>9</sup> Pero ba nduauenanënga ndoñe imontsošbuaché y Bëngbe Utabná tojaninÿanÿé Benachama entsãngbeñe bacna soyënga imojtsichamo. Chcasna, Pablo chëngbentšana tojtsanojuánañe y ñye chë Jesucristbeñe ošbuáchiyënga tojanëbuaja canÿe scueloye, canÿe entsá Tirano ca uabainabe yebnoye. Chentše cada te chë ouenanëngaftaca yojanoyebuambná, <sup>10</sup> y chca yojánama uta uatëntscuana; y chca, ñyetscanga Asia luaroca oyenënga Bëngbe Utabnabe palabra tmojanuena, judiënga y ndoñe judiëngnaca. <sup>11</sup> Y Bëngbe Bëtsá puerte bëts soyënga Pábloftaca yojtsama. <sup>12</sup> Tša bëts soyënga tojanma; chíyeca, ñyetsca chë Pablo tojuabojajo entsáyá y pañuelëjuangá, entsãnga imojanamana šoquëngbioye juyambana, y chca tmojama orna, chë šocanënga jueñatjëmbana y chë bacna bayëjënga entsãngbentšana jësebocanana.

<sup>13</sup> Pero básefta judiënga tsáshenañe bacna bayëjënga entsãngbentšana imojtanëbuacana. Chë judiënga imojtseboše chë bayëjënga jtëbuacnana, Bëngbe Utabná Jesús jótšëmbonëse. As, chë bacna bayëjëngbioye mëntšá imojtsëtsësnaye: “Bëngbe Utabná Jesús, Pablo bondbetsebayaná jótšëmbonëse y chabe obená naca cbontsaménda muabentšana chašmuaisebocnana ca.”

<sup>14</sup> Chca imojánama chë judío Esceva ca uabainabe canÿsëfta uaquiñënga. Esceva inamna bachnangbe amëndayá. <sup>15</sup> Pero canÿe, Escévëbe uaquiñënga chca tmojánayana orna, chë bacna bayëja mëntšá tojanëjua: “Atše Jesús sënduábuatma y sëndëtatšëmbo nda Pablo yomnana; pero tsëngaftanga, ¿ndëmuanyënga šmomna ca?”

<sup>16</sup> As, cachora chë bacna bayëjbe juabna uambayá chëngbioye tojanontsënja y tša añemo bomná bëtsemnayeca chënga tojtsanayëñaná, jabuache jtsajantsetayëse; chë causa, chënga chë yebnentšana tmojtsanacheta enašënga y lisiánënga. <sup>17</sup> Ñyetscanga Efesoca oyenënga, judiënga y ndoñe judiënga, chca tmojántatšëmbona y corente imojtsanauatja. Y chca, Bëngbe Utabná Jesús entsãnga más imojtsatschuanaye.

<sup>18</sup> Jesucristbeñe imojtsošbuachiyënguentšana, banga imojánashjauana y entsãngbe delante imojtsecompšaye, tempo bacna soyënga tmojanmama; <sup>19</sup> banga, chë bocjuanana soyënga jamama imojanëtsënënga, chëngbe bocjuanana librëšangá tmojaninÿebo y entsãnga imojtsantješna ora, chëšangá imojtsajuinÿiye. Tmojanjuabó ntsachetšá chë librëšangá

betsámanama y tojanóbocna shachna bnëtsana uaranga crocénana ñyetsá. <sup>20</sup> Y chca, Bëngbe Utabnabe palabra más ba entsãnga imojtsuenana y chiñe imojtsošbuáchiye y Bëngbe Bëtsá chabe obenana entsãngbeñe yojtsinÿinÿnaye.

<sup>21</sup> Chca tojanochnëngüentšana, Pablo tojanjuabó Macedonia y Acaya luarënguëjana jachnënguse, Jerusalenoye jésama. Y yojtsejuabnaye cha ibojtsemna Jerusalenentšana Romoye jama ca. <sup>22</sup> Asna, chabe uajabuachanënguentšana útata, Timoteo y Erasto, Macedoniye cha tojanichamó. Chëntscuana Pablo baseftayté más Asia luarentše tbojanjëtana.

### Efesoca entsãnga tmojánenbouenana

<sup>23</sup> Chë tempo, Efesoca entsãnga corente tmojánenbouenana, chë Bëngbe Utabná yojtsinÿanÿná Benache imojtsisháchichanëngbe causa. <sup>24</sup> Chë entsãnga chca tmojanma, er canÿe entsá mídioca soyënga pormayá, Demetrio ca uabainá, chënga tojanayëñaná chca jamama. Cha yojanamana binche soyetëmënga japórmana y chëtëmënga yojáninÿna mo chë Efeso puebloquëngbe diosá Artemisa jadórana bëts yebncá. Demétrioftaca imojantrabájangna bëts cá crocénana imojanójacañe chë soyetëmënga eniñe. <sup>25</sup> Demetrio tojanëbuaja cháftaca imojantrabájanga y ínÿenga cach mídioca soyënga pórmayënga, y mëntšá tojanëyana: “Baconga, tsëngaftanga šmondëtatšëmbo, bënga bëts cá crocénana jtsebomnamna quem trabajuëntšana chca jopódiana. <sup>26</sup> Pero tsëngaftanga šmontsonÿá y šmontsuenana ntšamo chë Pablo ca uabainá yojtsichamcá. Cha entsichamo, chë entsãngbe pormana soyënga ndoñe yontsemna jtsadoránana ca; y chca ba entsãnga tojabuayená y chënga aíñe montseyeunana. Chë soyna ndoñe ñye muentše Efesentše chca quenátopasana; ñyets Asia luaríñnaca chca entsopasana. <sup>27</sup> Resjo entsemna; chca causa, entsãnga bëngbe trabajuama ndoñe tsábá quemochátichamo y chë uámana Artemisa jadórana bëts yebnama mochántichamo uámana yebna ndoñe yondmëna ca. Y chca, Artemisbe obenana entsãnga mochantsábotena y Artemisa ndoñe bañe quemochátabatma, nda Asientše y ñyets luaríñnaca mondadorana ca.”

<sup>28</sup> Chca tmojanuena ora, chca pórmayënga puerte tojanëtëna y tmojanáyebuachena: “¡Efesoquëngbe Artemisa corente bëtsá endmëna ca!”

<sup>29</sup> Y chca, ñyetsca chë pueblentša entsãnga tmojánenbouenana. Tmojanotabá Gayo y Aristarquëbioye, Macedonioca boyabásata, Páblëbe tjëmbambnayata; y sjoñonana tmojanënatse chëngbe enefjuana yebnóntscoñe. <sup>30</sup> Pablo tojánbošena choye jamashënguama chë entsãngaftaca jóyebuambayama, pero Jesucristbeñe ošbuáchiyënga ndoñe tmonjanlesenciá.

<sup>31</sup> Chë Asioca mándayëngbentše báseftanga imnamna Páblëbe amiguënga, y chënga Páblëbioye palabra tmojanafja chë jénefnama yebnoye ndoñe chaondámashënguama.



<sup>32</sup> Chëntscuana, entšanga imojtsejotonocna, ínÿenga imojtsechembumbuana canÿe soye y ínÿengna inÿe soye, chënga corente imojtsembouenana causa, y banga chentše imojtsemnënga ndoñe imontsetátšëmbo ndayama choye tmojanobéconama. <sup>33</sup> Pero básefta judiënga, canÿe entšá, Alejandro ca uabainá, chë entšangbe natsanoye tmojanajuatsëntše, y báseftanga cha tmojanbuayená ntšamo yojtsoapasánama. Asna, Alejandro tojánefjatšëmbo cucuátšeca iytëca chamobiamama, er cha yojtseboše entšangbe delante chë judiënga jobuauyanama. <sup>34</sup> Pero, Alejandro judío bennama chë entšanga tmojántatšëmbona ora, nÿetscanga tmojanáyebuachena uta horëntscuana, mëntšá: “¡Efesoquëngbe Artemisa corente bëtsá endmëna ca!”

<sup>35</sup> Chë pueblentša mándayëngbe uajabuachaná, entšanga iytëca jábiamama tojanobená ora, tojanéyana: “Efesoquënga, nÿets luariñe endótatšëmbo, quem pueblentše oyenënga iuamna jtsinÿenana chë Artemisa jadórama bëts yebna y chë cha jadórama celocana otsatšena ndëtšbé. <sup>36</sup> Ndocná quenátobena chama jayanama ndoñe ndegombre yondmëna ca. Chcasna, natjëmbana motsomñënga y tondaye matamëngana corente tšabá ntjshajuaboycá. <sup>37</sup> Tšëngaftanga quem boyabásenga moye šmojunatse, masque Artemisbe yebnentše tondaye tmonjatbëba y bëngbe Artemisbiamama ndoñe podesca tmonjoyebuambá. <sup>38</sup> Demetrio y cháftaca šmotrabájanga, nderado ndabiamama ndaye demanda šmojtsebomnësna, cabil-doca endatëfjna y chentše mándayënga montsemna chë demandënga jouenama, y chëngbentše cada ona šmochjëftsendemánda. <sup>39</sup> Y tšëngaftanga inÿe soye šmojtseguasna, cmontsamna ntšamo bëngbe leyënguñe yomandancá, nÿetsca quem pueblentše oyenëngaftaca jenóyeunayana. <sup>40</sup> Ndayá mënté tojopasá causa, resjo entsemna bëngbiamama chamuayana, ntšamo leyënguñe yomncá bënga ndoñe montsama ca; y bënga ndoñe quemuátobena ndayá jojuana, ndáyeca quem enbouenanana tojopasá ca šojátjayëse ca” —cha tojanéyana. <sup>41</sup> Y chca jayanëse, chë entšanga tojtanichamó.

#### Pablo, Macedonia y Grecia luaroye tojána

**20** Chë enbouenanana tojanochnëngo ora, Pablo chë Jesucristbeñe ošbuachiyëngbiyoye tojanébuaja jábuayenama, añemo chamotsatsbomnana; tojesanodiošoftá y Macedoniyye tojëftsanbocna. <sup>2</sup> Chë luarënguëjana cha tojánachnëngo Jesucristbeñe ošbuachiyënga becá añemo atatsatnaye, ba chabe palabrëngaca; chentšana, Grecia luaroye tojánashjango, <sup>3</sup> y chentše unga ishinye tojanoquedá. Barquëshañe Sirioye játama Pablo yojtseprontana orna, tojántatšëmbona chë judiënga cha jtsóbama tmojanenóyeunama. Asna, tojanenojuabó jeshhëconama, cach Macedonia luarëjana jésachnënguse. <sup>4</sup> Pablo quem boyabásenga tmojantjëmbambá: Sópater, chë Bereocá, Pirrbe uaqiñá; Aristarco y Segundo, Tesalónicocata; Gayo, Derbe pueblócá; Timoteo; y Tíquico y Trófimnaca, Asia luarocata. <sup>5</sup> Chënga tmon-

janonatsé y šonjanëbatma Troasoca. <sup>6</sup> Chë levadúraca ndëpormana tandëse saye fiestentšana, Filíposentšana barquëshañe fsënjëftsanbocna y shachna tianoye, Troasoca chë tmonjanonatsenga fsëntanishëche, y chentše canÿe semana fsënjanoquedanga.

#### Ntšamo tojanopasá Troas puebloca

<sup>7</sup> Chë inÿe semana jobojátšama te, fsënjánenefjna Jesucristbeñe ošbuachiyëngcá tandëse jajátayama, cányiñe jasama; y Pablo entšanga enjëtsëtsësnaye. Cha bonjamna yëfsana chentšana jëftsebocnana; chë causa, más bën chëngaftaca tonjanoyebuambá, tsëntsetëntscuana. <sup>8</sup> Fsënjamna canÿe tsoye tsbanana tsañoca y chentše ba uajuinÿanëshangá enjanamna; <sup>9</sup> y canÿe bobontse, Eutico ca uabainá, ventanentše enjántbemana. Pablo bën enjanoyebuambná causa, chë bobontse ocnayana tbojanábuache. Cabana, corente tojtсанomaná ora, chë unga tsañocana tontsanótsatše y obaná chora tmontanatsbaná. <sup>10</sup> As, Pablo tonjánastjango, chë bobóntsbioyey tbonjanotsbuajó y tbonjanotsejcuá. Y chë entšanga tonjanéyana: “Ndoñe nÿetsá matauatjëngana; ainá cha entsatsmëna ca.”

<sup>11</sup> Chentšana Pablo cach tsbanánoye tonjesaná y tandëse tonjanjatá, jtenójuaboyama ndayá Jesús jóbanëse tojanmama. Chora Pablo chë entšangaftaca tonjanse y tontëtanontsé oyeuambnayana, jabinÿnëntscuana. Chora Pablo chentšana tontsanoñe. <sup>12</sup> Y chë otsatšena bobontsna ainá imojtsatánatseñe, y chama chë entšanga corente oyejuayënga imojtsemna.

#### Pablo Troasentšana Mileto puebluyoye tojána

<sup>13</sup> Bëngna fsënjanonatsé y barquëshañe fsënjána Aso pueblóntscóñe, chentšana Pablo jtesbetšama, ntšamo fsënjanenoyeunacá, er Pablo tonjánbošena fshantscá choye jana. <sup>14</sup> Asoca Pábloftaca fsëntaneninÿena ora, bëngaftaca barquëshañe cha tonjána Mitilene puebluyoye. <sup>15</sup> Chentšana fsënjëftsanbocna y yëfsana Quío luarëjana fsënjánachnëngo, y chë inÿe yëfsana Samos luaroye fsënjánashjajna. Chentšana fsënjána y yëfsana Mileto puebluyoye fsënjánashjajna.

<sup>16</sup> Chca tonjanochnëngo er Pablo ndoñe chenátanbošena Efesoye jama, Asia luariñe ndoñe yapa ndëtsemnana. Chca tojánbošena er cha enjëtsëboše betesco Jerusalenoca jtsatsmënanana, tojopodesna chë judiëngbe fiesta, Pentecostés ca uabaina fiestama.

#### Ntšamo Pablo chë Efesoca ošbuachiyëngbeñe bëtsëjemëngcá mándayënga tojanéyana

<sup>17</sup> Miletocana Pablo tonjanmandá chë Efesoca ošbuachiyëngbeñe bëtsëjemëngcá mándayënga jobiatšana. <sup>18</sup> Chënga tmonjánashjajna ora, Pablo tonjanéyana: “Tšëngaftanga šmondëtatšëmbo ntšamo atše quem Asia luaroye sënjabánashjango orscana tšëngaftangbeñe snetsamana. <sup>19</sup> Nÿets tempo Bëngbe Utabná sëndëserveda y cach atše uamaná ndoñe quetsatenobiamná. Corente shëchbuiyey tijëftsoyperdé

y ba soyënguiñe tijasufri, chë judiënga atše jóbama mondboše causa. <sup>20</sup> Y lempe ntšamo tšëngaftangbe tšabiamama yomncá tconjabuayená; tondaye ntjatsbuetamencá. Nÿetscangbe delante sënjabuatambá y tšëngaftangbe yebnënguenáchnaca. <sup>21</sup> Judiënga y ndoñe judiënga Bëngbe Bëtsabe soyëngama sënjabuayená, bacna soyënga amama ngménaca chamuenójuaboma y chca amana chamotsajbanama, Bëngbe Bëtsabe benache chamuishachama y Bëngbe Utabná Jesúsbeñe chamotsošbuáchema. <sup>22</sup> Y mora Jerusalenoye chanjá; Uámana Espiritu chca šontsemánda y ndayá choca chjapásamna ndoñe quetsátstatšëmbo. <sup>23</sup> Nÿe mëntšá aífne sëndétatšëmbo: Nÿetsca bëts pueblënguenache ndayëjana atše chandbëtsana, Uámana Espiritu šondbëtsebuayiyenaye entšanga cašmochjutame y puerte chaisufrima camochjama ca. <sup>24</sup> Atšbe vida cach atšbiama ndoñe yapa quenatamana, chaitsaina o chayóbana. Pero atšbiama iuámanana endmëna ndayá atše jobenayana atšbe trabajo jëftseepochócana, ndayá Bëngbe Utabná Jesús šojanmandá jamama, chë tšabe noticiënga Bëngbe Bëtsá entšángaftaca tšabia yomnama jábuayenama.

<sup>25</sup> “Y mora atše ndegombre séntsetatšëmbo, tšëngaftangbentšana, chë ndëmuanÿengbentše Bëngbe Bëtsabe amëndayama sënjabuayená, ndocná atše más quešmochátinÿe. <sup>26</sup> Chíyeca, atše ndegombre mënté cbetséyana: Atše tondaye quetsátstatšëmbo nderado nda ndatsbocaná chaojóbanabiamama, <sup>27</sup> er atše ntšamo Bëngbe Bëtsá jamama yojuabnacá lempe tconjabuayená, tondaye ntsebuetamencá. <sup>28</sup> Chcasna, cach tšëngaftangbiamama šmochtsantješna y nÿetscanga muentše Jesucristbeñe ošbuachiyëngbiámna. Chëngbeñe mo chëngbe abujënyangcá Uámana Espiritu tconjajayé, Bëngbe Bëtsabe entšanga chašmotsanÿenama, chënga Bëngbe Bëtsá chábenga tojábiamama, chabe Uaquiñabe buiñe juabuáshanëse y jóbanañe, mo bëtscá cuafjopagacá. <sup>29</sup> Atše séntsetatšëmbo, atše chaitsoñe orna, banga mochanjabo y chënga mochántsemna mo corente tšátjaye tjañe quešëngcá, Jesucristbeñe ošbuachiyënga chábeñe ošbuachiyana chamotsajbanama chënga jamama. <sup>30</sup> Y tšëngaftangbentšánëna báseftanga mochanjábocana y entšángbioye uayátsenaye soyënga mochanjabuatambá, chca, báseftanga Jesucristbeñe ošbuachiyënga chë inÿengbentšana chamotsolurema y nÿe chë abuátambayëngbioye chamotsésetonama. <sup>31</sup> Chcasna, sempre šmochtsantješna; ndoñe chacmondëbnëtjomba, atše unga uatëntscuana, bnëtë y ibeta, tšëngaftanga cada ona cbondétsabuayiyenama y chama atše puerte tijasufri.

<sup>32</sup> “Y morna, Jesucristbeyeca catšátanga, Bëngbe Bëtsabe cucuatšinë cbëtsabashejuana y ntšamo tšëngaftangbiamama chabe tšabe juabna yomnama palabrëngaca, tšabá chašmuesomñe. Cha endobena jamama tšëngaftangbe ainaniñe más chašmotsošbuáchema, y endobena tšabe soyënga tšëngaftanga jatšatayama, ndayá jatšatayama tojanašebuachenacá mo tšëngaftangcá entšángbioye, ndë-

muanÿenga cha tojáchembo chabe entšanga chamotsemnana. <sup>33</sup> Atše ndocnabe crocénana, o castellano o entšayá atšbiama quetsatántšaboše; <sup>34</sup> más inÿetšá, y tšëngaftanga lempe šmondétatšëmbo, atše cach atšbe cucuatšëca tijëftsetrabajama, atšbiama y átšëftaca imojamnëngbiamama opresido enjamna soyënga jananguama. <sup>35</sup> Atše nÿets tempo sëndinÿanÿná entšá chca ibomnama, chë jabuache jatrabájana y chë ujabótënga jujabuáchana, quem Bëngbe Utabná Jesusbe palabrëngama sempre jtsejuabnaye: ‘Canÿe entšá más oyejuayá jtsemnana ndayánaca inÿabioye tbojtsatšëtná ora, y inÿabioye tbojtseyëngacá ora ndoñe nÿa nÿetšá ca’ ” —Pablo tonjanoyebuambá.

<sup>36</sup> Pablo chë soyënga tonjánayanentšana, tonjanohamentšë y nÿetscanga chentše monjëtsemnëngaftaca Bëngbe Bëtsá tmonjanótšëmbona.

<sup>37</sup> Nÿetscanga tmonjánenobošachna y Pablo tmontanotsejcuá y tmontanámochi. <sup>38</sup> Y entšanga corente ngménaca monjëtsemna, chënga ndocna te más cha mochántinÿe ca Pablo tojanëyana causa. Chentšana, chënga chë barquëshana enjetsamnëntscoñe cha tmontanjëmambá.

#### Pablo Jerusalenoye tojána

**21** Chë Jesucristbeñe ošbuachiyënga fsënjëftsanabashejuana ora, barquëshañe fsënjanenoyayé y ndericho Cos luaroye fsënjána; chë yëfsana Rodasoye y chentšana Pátara pueblöye. <sup>2</sup> Pátara pueblentše canÿe barquëshana fsënjáninÿena, Fenicioye enjëtšaye; asna, chëshañe fsënjanenoyayé y chentšana fsënjëftsanbocna. <sup>3</sup> Fsëntsana chnejuana ora, fsënjáninÿe Chipre luare; Chipre bëngbe uañicuayoica tonjanoquedá y bëngna Sirioye fsënjëtsaye. Tiro pueblentše chë barquëshentša uasmanëshangá jëftšaboshjonama yojámnyeca, chë pueblöye bënga fsënjëftsanamashjna. <sup>4</sup> Chentšna, Jesucristbeñe ošbuachiyënga fsënjánanÿena y canÿsëfta te chëngaftaca fsënjanoquedá. Chënga Pablo tmonjanianama cha ndoñe ibonjamna Jerusalenoye jtsayana ca, er chë Uámana Espiritu tojanabuayená ndayá choca cháftaca jopásama. <sup>5</sup> Chë canÿsëfta te tonjanochnëngo ora, chentšana fsënjëftsanbocna y nÿetscanga parejo chëngbe shëmangaftaca y básengaftaca šonjanatjëmbambá chë pueblo chabóntscoñe; y chentše, chë chënyañe fsënjanoshamentšë y Bëngbe Bëtsá fsënjanimpadá. <sup>6</sup> Chentšana, fsënjesanodiošoftá y chë barquëshoye fsëntanášëngo; chentšana chë ošbuachiyënga cachëngbe yebnëngoye tmontaná.

<sup>7</sup> Tirenšana fsënjëftsanbocna y Tolemaida pueblöye fsënjánashajna; y chentše tonjanopochocá bëngbiamama bejaycá chë te ayana. Tolemaidentše Jesucristbeñe ošbuachiyënga fsënjanacheuá y chëngaftaca canÿe te fsënjanoquedanga. <sup>8</sup> Yëfsana, bënga chentšana fsënjëftsanbocna y Cesarea luaroye fsënjánashajna. Chocna, bënga fsënjána Felipe chë Jesucristbiamama tšabe noticiënga abuayiyenayabe yebnoye y cháftaca fsënjanoquedanga. Felipe enjamna canÿa chë Jesucristbeñe ichmónëngbioye ujabuachanënguentšá, Jerusalenoca

ubuáyanënga. <sup>9</sup> Felipe enjánabamna canta ndébouamna bemianga y chënga monjamna Bëngbe Bëtsabe juabna oyebuambnayënga. <sup>10</sup> Ya bayté chentše fsënjëtsemna orna, Judeocana tonjánashjango canya Bëngbe Bëtsabe juabna oyebuambnayá, Agabo ca uabainá.

<sup>11</sup> Agabo béngbioye tonjánashjango ora, Páblëbe uasnanëja tonjanca y cucuatšënga y shecuatšënga cachá tonjanenabatsëca y mëntšá tonjánayana: “Uámana Espíritu entsichamo, Jerusalenoca quem uasnanëja nduíñbioye chë judiënga mëntšá camochjama y ndoñe judiëngbe cucuatšíñe camochjáboshjona ca.”

<sup>12</sup> Chca fsënjauena ora, bënga y chentša entsãnga Pablo fsënjanimpadá Jerusalenoye ndoñe chaondët-sama. <sup>13</sup> Chora Pablo tonjánayana: —¿Ndáyeca šmojtsošaché y šmojtsama atšbe ainaniñe puerte ngmë-nana chaotsemnama ca? Atše sëntseprontana y ndoñe nyë chašmobatsëcama; Jerusalenoca jobanámnaca sëntseprontana, Bëngbe Utabná Jesusbiana ca —cha tonjánayana.

<sup>14</sup> Jáyëñjanama ndoñe chibiatanobená ora, ndoñe más chibiatanimpadá; nyë mëntšá fsënjaniyana: —Ntšamo Bëngbe Utabná yojtsebošcá chaotsemna ca.

<sup>15</sup> Chë soyënga tonjanochnëngüentšana, fsënjano prontá y Jerusalenoye fsënjána. <sup>16</sup> Cesareoca, básefta Jesucristbeñe ošbuáchiyënga choye šonjanatjëmbambá y chocna, chënga šonjanënatse canye Chipre luaroca entsábe yebnoye, Mnasón ca uabainá, ndábentše bënga joquédama. Mnasón tempscana inamna Jesucristbeñe ošbuachiyá.

#### Pablo tojána Santiago jauatsëtsayama

<sup>17</sup> Jerusalenoye fsënjánashjajna orna, chentša Jesucristbeñe ošbuáchiyënga oyejuayënga šonjanébuaja.

<sup>18</sup> Yëfsana, Pablo bëngaftaca tonjána Santiago jábuachama, y chentše, nyetsca chë ošbuachiyëngbeñe bëtsëjemëngcá mandayëngnaca monjëtsemna.

<sup>19</sup> Pablo tonjanacheuá y chentšana tonjanacuntá lempe ntšamo Bëngbe Bëtsá Páblëbe trabájoca chë ndoñe judiëngbeñe tojanmama.

<sup>20</sup> Chca tmonjanuena ora, Bëngbe Bëtsá tmon-tanchuá y Pablo mëntšá tmonjaniyana: “Morna, Jesucristbeyeca bëngbe catšata, contsonyá ntšamo ba uaranga judiënga Jesucristbeñe imojtsošbuáchema, y chënga nyetscanga montsantješna nyetsca Jesucristbeñe ošbuáchiyënga chë Moisesbe leyentša nyetsca mandënga chamotsocumplínama. <sup>21</sup> Y entsãnga chëngbioye noticia tmojatsatá, aca chë inye luarënguenache imoyena judiënga cojtsabuatambá, Moisés tojanmandá soyënga ndoñe ntseyeunanama y basetëmënga base bobachtema chë más delicadentše ndoñe ntjatëtšama, ntšamo bënga judiënga fsënduamancá, y ntšamo bënga fsëndëtatšëmbcá ndoñe chamondëtsamana ca. <sup>22</sup> Y morna, ¿ntšamo chë soyëngama cochtsemmana? Ndegombre, chënga mochanjätatšëmbona aca moye tcojabama. <sup>23</sup> Chcasna, ntšamo cbochanjabuayenacá cochjama: Bëngbentše canta boyabásenga montsemna y chënga entsamna Bëngbe Bëtsabiana canye šbuachenana soye jamama. <sup>24</sup> Acaf-

taca cochjunatse, chëngaftaca cochtsemna y chëngcá cochtsama Bëngbe Bëtsabe delante tšábenga jtsatsmënama ntšamo chamojtsama ora, y ntsachetšá jëtsjájuaama chaojtsamncá, aca cochjëtšájua, as chënga chamobená nyets stjënashë jtsenátšbotjiamo, jinyanñiyama, ntšamo Bëngbe Bëtsábioye tmojatsabuachenacá ya tmojamama. Y chca, nyetsca judiënga mochanjinñe ndoñe ndegombre yontsemna chë ntšamo chëngbioye acbiana tmojacuntacá; masna, chënga mochanjätatšëmbona aca ndegombre ntšamo Moisesbe leyíñe yomandancá icuamama. <sup>25</sup> Y chë ndoñe judiënga Jesucristbeñe imojtsošbuachengbi-amna, bënga ya fsënjubuábiana y fsënjáuyana ndayá jtsocumplínama chënga yojtsamnama, mëntšá: ‘Ndoñe chamondëtsesá mëntšëna, chë entsãnga tmojtsabuabná diosënga imomna soyënga jadórama tmojijëbana; ni buiñe, ni tšešana bayëngbe mëntšëna; y ndoñe chamondëtsama bacna soyënga shembásenga y boyabásengaftaca ca’ —chënga tmojánayana.

#### Bëngbe Bëtsabe bëts yebnentše judiënga Pablo tmojánishache

<sup>26</sup> As Pablo, yëfsana chë cántanga tonjanënatse y chëngaftaca tonjanma soyënga Bëngbe Bëtsabe delante tšábenga jtsatsmënama. Chentšana, Pablo Bëngbe Bëtsabe bëts yebnoye tonjánamashëngo chë bachnanga júnayama, ndaytëntscóñe yojamna chë cantangbiana soyënga jtsamama, Bëngbe Bëtsabe delante tšábenga jtsatsmënama, y jayanama ndayté chëngbiana yojtsemna ndaye ora cada ona ibojtsemna ndayánaca Bëngbe Bëtsabe bëts yebnoye juambana, Bëngbe Bëtsabiana juatšëmbonama.

<sup>27</sup> Chënga tmojanenoyeuná y tmojánayana canyësëfta tentscuana chca jamana ca. Chë canyësëfta te ya jochnënguama yojtsemna orna, básefta judiënga Asioguënga Pablo tmojáninñe Bëngbe Bëtsabe bëts yebnoca y tmojanma entsãnga chamuenbouënanama. Y cha tmojánishache, <sup>28</sup> mëntšá jtsayebuáchëse: “¡Israe-loca entsãnga, šmabëtsëjabuache ca! Quem boyabása entsemna chë nyets luarënguenache iuana abuátambaye soyënga bëngbe entsangbe contra, y ntšamo bëngbe leyënguiñe endayanama contra, y quem Bëngbe Bëtsabe bëts yebnama ndoñe tšabá yontsoyebuambná. Y cabana quem Bëngbe Bëtsabe bëts yebnoye grieguënga tojúmashëngo, y chca cha tonjama chë Bëngbe Bëtsabe bëts yebna Bëngbe Bëtsabe bom-inñiñe ndoñe tšabá chaondëtsemnama ca” —chënga imojtsichamo.

<sup>29</sup> Chca imojtsichamo, er entsãnga Pablo tmojáninñe chë bëts pueblentše Trófimo Efesocáftaca; y imojëtsejuabnaye chábioye Bëngbe Bëtsabe bëts yebnoye Pablo tbojanánatse ca.

<sup>30</sup> Nyetsca chë pueblentša entsãnga tmojánenbouenana, y ochamanana chë Pablo yojtsemnoye tmojánashjajna. Pablo tmojánishache y Bëngbe Bëtsabe bëts yebnentšana shjoye tmojtsansjojó, y cachora chentša bëšašangá tmojtanatame. <sup>31</sup> Jtsóbama ya imojtsebuachéta ora, chë Romoca soldadëngbe mandayá

tojanatšëmbona nÿetsca chë bëts pueblentša entsãnga imojtsenbouenanama. <sup>32</sup> Asna, chë mandayá chabe soldadënga y inÿe chentša amëndayënga tojanachembo y cánÿiñe chë entsãnga imojtsemnoye tmojëf-sanójtjajo. Entšãnga, chë mandayá y chë soldadëngbioye tmojánanÿe ora, tmojtsanajbaná Pablo jantšë-tayana.

<sup>33</sup> Chorna, chë soldadëngbe amëndayá tojanobecóná, Páblëbioye tbojánishache y tojanmandá uta cadenëjuaca cha chamotsebátsécama y tojanatjá: “¿Nda mua yomna y ndayá tojama ca?” <sup>34</sup> Pero chë entsãngbeñe, inÿenga canÿe soye imojtsáyebuache y inÿengna inÿe soye; y chca, ntšamo ndegombre tojanopasama jtsetatšëmbuama chë mandayá ndoñe tonjanobená; chcasna, cha tojanmandá Pablo chë soldadëngbe oyenoye chamuánatsama. <sup>35</sup> Chë soldadëngbe oyenoca grádasbengoye tmojánashjajna ora, chë soldadënga tojanotocá Pablo cutsnana juambama, chë entsãnga tša rábiaca imojtsemna causa, <sup>36</sup> er chënga ústonoye imojétsaye y “¡Chaóbana ca!” imojtsaiuáye-buache.

### Ntšamo Pablo entsãngbe delante tojanenëuyaná

<sup>37</sup> Chë soldadëngbe oyenoye ya jamashënguama imojtsemna orna, Pablo chë soldadëngbe amëndayábioye tbojantjá: —¿Tašcatjalesencia ratotema ácaftaca jóyebuambayama ca?

Y chë mandayá tbojanjuá: —¡Aca icobena griego biyañe jóyebuambayama! <sup>38</sup> As, ¿aca ndoñe condmëna chë Egiptocá, chë ndoñe bayté quenátsmëna entsãnga yojanëtsësná chë mándayëngbe contra chamotsemnama y chë canta uaranga podesca uamana entsãnga puñálaca uajaténgaftaca, entsãnga ndoyena luaroye tojanbocná ca?

<sup>39</sup> Chora Pablo tbojanjuá: —Atšë judío sëndmëna, Tarso pueblota onÿnaná, canÿe uámana pueblentšë Cilicia luaroca; Diosmanda šmolesenciá entsãnga jáuyanama ca.

<sup>40</sup> As, chë soldadëngbe amëndayá chca tbojanlesenciá. Páblëna chë gradasbenguiñe tojantsá y cucuatšë tojanatsbaná entsãnga iytëca chamobiamama. Nÿetscanga iytëca imojtsemna orna, Pablo hebreo biyañe mëntšá entsãnga tojanéyana:

**22** “Baconga y taitanga, mora šmochjouena atšë jenéuyanama ntšamo chjayancá ca.”

<sup>2</sup> Pablo cachëngbe biyañe, hebreo biyañe yojtsóyebuambnama entsãnga tmojanuena ora, más iytëca tmojanobiamama. As Pablo tojanéyana: <sup>3</sup> “Atšë judío sëndmëna. Tarso pueblentšë, Cilicia luaroca sënjanonÿná, pero muentšë Jerusalenentšë sënjanoboché y sëndëtatšëmbo soyëngna Gamaliélbeyeca chca botamana sënjanatsjinÿe. Cha corente tšabá šonjanbuatëmbá bëngbe bëts taitangbe leyënga; nÿets atšë ainánaca Bëngbe Bëtsá sëndëserveda, ntšamo nÿetsca tšëngaftanga mora šmontsamancá. <sup>4</sup> Atšë sënjánama chë Jesucristo tojaninÿanÿé Benache ústonënga chamosufrima y chamóbanama; boyabásenga y shembásenga sënjanëtabaye y cárceloye sënja-

nautame. <sup>5</sup> Chë judío bachnangbe más uámana amëndayá, nÿetsca chë judiëngbeñe bëtsëjemëngcá mándayënga y inÿe muentšã mándayënga mondobena jayanana ntšamo sentsichamcá ndegombre yomnama. Chënga uabemana tsbuanachangá šmonjanijé, bëngbe catšátanga judiënga chamotsetatšëmbuama atšë mando stsanbomnama, Jesucristbeñe osbuáchiyënga jótabayama; y Damascoye sënjána chocha Jesucristbeñe osbuáchiyënga jótabayama, moye Jerusalenoye junatsama jacastígayama.”

### Pablo tojanacuntá ntšamo Jesucristbeñe osbuachiyá tojanóbema

<sup>6</sup> “Pero canÿe te benachiñe Damasco béconana sënjétsaye orna, mo nÿetsto ora, nÿe ndeolpe atšë juachañe canÿe bëts tcuinÿe celocana tonjanbuashinÿinÿena. <sup>7</sup> Y fshantsoye sënjétseshajaye y canÿe oyebuambnayana sënjanuena mëntšá: ‘Saulo, Saulo, ¿ndáyeca šcojtsacmena ca?’ <sup>8</sup> Atšë sënjantjá: ‘¿Nda comna, Bëngbe Utabná ca?’ Y chë oyebuambnayana šonjanjuá: ‘Atšë sëndmëna Jesús Nazaretocá, y aca condama atšë entsãnga chamotsesufrínama ca.’ <sup>9</sup> Chë átšëftaca monjánajnënga chë bëts tcuinÿe tmojáninÿe y tmojanouatjananga, pero chë oyebuambnayana ndoñe tmonjanuena. <sup>10</sup> Chora atšë sënjantjá: ‘¿Bëngbe Utabná, ndayá jamama šojtsemna ca?’ Y cha šonjanijana: ‘Matëtsbaná y mëtëtontšé Damascoye jama. Chentšë canÿa cmochanjabuayená ndayá jamama cmojtsemnama ca.’ <sup>11</sup> Chë tcuinÿe yapa tonjanbuashinÿinÿena causa, atšë jtaná sënjanouquedá. Chcasna, chë inÿenga šmontanobuacuetëntšé y chca, Damascoye sënjánashjango.

<sup>12</sup> “Chentšë enjamna canÿe bacó Ananías ca uabainá; cha inoyena ntšamo Bëngbe Bëtsá yobošcá y yojánama ntšamo bëngbe leyënguiñe iuayancá, y nÿetsca chentšã judiënga monjanamana chabiamama tšabá jt-sóyebuambnayana. <sup>13</sup> Cha tonjánabo atšë jinÿama y tonjánashjango ora, šonjanijana: ‘Jesucristbeyeca atšë catšata, Saulo, chacmotsatabinÿna ca.’ Cachora y cha sënjáninÿe.

<sup>14</sup> “Chentšãna cha tonjánayana: ‘Bëngbe bëts taitangbe Bëtsá aca tcmojuábuayana, ntšamo cha acbiamama yobošcá chacotsetatšëmbuama, chë nÿetsca soyënguiñe Tšabá Amá chacuinÿama y cachabe uayášentšãna chacóyeunama. <sup>15</sup> Bëngbe Bëtsá chca tojama, aca chë chabe buayenana soyëngama entsãngbeñe chacóyebuambama, y chamna nÿets luarentšã entsãngbeñe cochjacuénta, ntšamo tcojinÿe y tcojouencá. <sup>16</sup> Y mora, inÿoñe más matobátmanana! Motsbaná y cochjenábaye Jesucristo jótšëmbonëse, chca, acbe bacna soyëngama perdonaná chacotsemnama ca’ ” —cha šonjanijana.

### Pablo tojanacuntá ntšamo chë ndoñe judiëngbioye tmojánichmoma

<sup>17</sup> “Jerusalenoye sëntaná ora, Bëngbe Bëtsabe bëts yebnoye sënjána cháftaca jencuéntama, y ndeolpe at-

še mo otjenayoquécá sënjanouquedá. <sup>18</sup> Chca orna, Bëngbe Utabná sënjaninÿe y cha mëntšá šonjaniyana: ‘Betsco motsa y cam ora Jerusalenentšana métsebocna; quemuentšana entšanga ndoñe quecmochatóyeyunaye ntšamo atšbiama condétatšëmbo y contsëtsëtšnacá ca.’ <sup>19</sup> Atše sënjanjuá: ‘Bëngbe Utabná, chënga mondétatšëmbo atše sënjánana nÿetsca chëngbe enefjuana yebnënguenache y chë ácbeñe ošbuáchiyënga sënjanëtámiana y sënjánatsetšenaye; <sup>20</sup> y acbiama ndegombre oyebuambnayá Esteban tmonjanóba ora, átšnacá chentše sënjamna y tšabá imojtsama ca chama sënjetsejuabnaye, y cabá chë monjanóbanangbe entšayëjuangá atše chora sënjanabojanÿá ca’ —atše sënjanjuá. <sup>21</sup> Pero chca sënjánayana ora, Bëngbe Utabná šonjaniyana: ‘Motsa; atše bën lurëngoye, ndoñe judiëngbioye cbochanjíchmuca ca.’”

### Pablo y chë soldadëngbe amëndayá

<sup>22</sup> Chë entšanga chëntscoñe tmojanuena; pero chë ndoñe judiëngbiama tojanoyebuambá orna, chënga tmojanontšë uayebuáchana: “¡Ndoñe tšabá quenátšmëna cha vídaca chaotsemnama! ¡Motsóba ca!” <sup>23</sup> Y chënga más imojtsáyebuache; puerte rábiaca chëngbe uichëtjonëjuangá tsbanánoye imojtsëbëntaye y tsbanánoye polvëshe imojtsëtšana; <sup>24</sup> chë causa, chë mandayá tojánayana chë soldadëngbe oyenoye Pablo chamotsëmashëngo ca, y tojanmandá chamotsetjanja chaobuambama ndáyeca entšanga chca chabe contra imojtsáyebuache. <sup>25</sup> Pero jtsetjanjama ya tmojanbatsëca orna, chentše imojtsemna soldadëngbe amëndayábioye Pablo tbojantjá: —¿Tšëngaftanga šmobena canÿe entšá derecho bomná mo canÿa Romoca onÿnanacá jatjanjana, ndegombre tšabá o ndoñe tšabá tonjamama cabá ndayana ora ca? <sup>26</sup> Chë básefta soldadëngbe mandayá chë soye tojanuena ora, tojána y nÿetsca soldadëngbe amëndayábioye chama ibojuenaye, mëntšá: —¿Ndayá cochjama? Chë entšá derecho bomna mo canÿa Romoca onÿnanacá canmëna ca.

<sup>27</sup> As chë amëndayá tojána Pablo yojtsemnoye y tbojaniyana: —Šmëyana, ¿aca derecho bomná mo canÿa Romoca onÿnanacá comna ca?

Y cha tbojanjuá: —Arseñor ca.

<sup>28</sup> Chora chë amëndayá tojánayana: —Atše becá crocénana sënjetsjajó mo canÿa Romoca onÿnanacá derecho jtsebomnama ca.

As Pablo tbojanjuá: —Y atšna derecho bomná mo canÿa Romoca onÿnanacá sëndmëna atše tijanonÿná orscana, er atšbe taitá chca derecho bomná inamna ca.

<sup>29</sup> Chcasna, chë jatjanjama imojtseprontanënga, Páblëbentšana tmojanouaná; y chë mandayánaca tojanouaná y yojtsauatja, Pablo derecho bomná mo canÿa Romoca onÿnanacá yojamnama tojántatšëmbona ora, er cha tojanmandá Pablo chamotsebátsëca-ma.

### Pablo, Jerusalenentša uámana mándayëngbe delante

<sup>30</sup> Chë soldadëngbe amëndayá yojtseboše ndegombre jtsetatšëmbuama ndaye soyama judiënga Páblëbe contra imojtsichámuama; asna, yëfsana tojanmandá cadenëjuangá jtsajafjonana y chë bachnangbe amëndayënga y nÿetsca chë judiëngbe amëndayënga chamobéconama. Chentšana, Pablo tbojanábocna y chëngbe delante tbojanatsá.

**23** Chora Pablo, nÿetsca chë mandayëngbioye tojanënyanÿe y tojanéyana: —Taitanga, atše mëntétscoñe tsiyena jtsamëse ntšamo Bëngbe Bëtsá yobošcá y chabe delante atšbe ainana natjëmbana endëtsomñe ca.

<sup>2</sup> As, Ananías, chë bachnangbe más uámana amëndayá, tojanmandá Páblëbe béconana imojtsemnënga cha chamotsáyejantšetama. <sup>3</sup> Pero chora Pablo Ananíasbioye tbojanjuá: —¡Bëngbe Bëtsá ácnaca cmochanjëtsjantšetá, bacna entšá, ntšamo ndegombre tcojuabnacá ndinÿinÿayá! Aca chentše contsetbëmana tšabá o ndoñe tšabá tijamama jayanama, ntšamo Moisesbe leyíñe yomandancá; as, ¿ndáyeca cojtsemánda chašmojantšetama? Chca chë leyíñe ndoñe quenátšlesenciana ca.

<sup>4</sup> As, chabe béconana imojtsemna entšanga tmojánayana: —¿Chca chë Bëngbe Bëtsabe bachnangbe más uámana amëndayábioye cochjóyenguango ca?

<sup>5</sup> Chora Pablo tojánayana: —Taitanga, atše ndoñe quetsátstatšëmbo cha chë bachnangbe más uámana amëndayá yomnama. Er Bëngbe Bëtsabe uabemana palabrenguiñe mëntšá endayana: “Entšangbe mandayabe contra ndoñe catjayana ca.”

<sup>6</sup> Pablo tojáninÿe chë mándayënguentše báseftanga saduceunga y inÿengna fariseunga imojtsemnama; as, mëntšá tojanáyebuachena: —Taitanga, atše fariseo sëndmëna; atšbe bëtšétsanga fariseunga mondëmëna. Atše, jtsošbuáchiyëse chë obanënga mochtayenama tsobátmana causa, atše ndoñe tšabá séntsama ca tšëngaftanga šmochjayana ca.

<sup>7</sup> Pablo chca tojánayana ora, chë fariseunga y saduceunga tmojanontšë enatsëtsnayana, y chë causa nÿetsca entšanga ndoñe cachcá imontsejuabnaye. <sup>8</sup> Er chë saduceunga jtsichámuana chë obanënga ndoñe ntayenana ca, y ni angelënga, ni espíritënga ndoñe mondëmëna ca; pero chë fariseunga aíñe chë soyënguiñe jtsošbuáchiyana. <sup>9</sup> Y nÿetscanga tša imojtsáyebuache; asna, básefta fariseunga ley abuatambayënga tmojantsbaná y jabuachana mëntšá imojtsáyebuache: “Quem boyabása ndocna bacna soye tonjama. Nderado mo Bëngbe Bëtsabe canÿe ángel o espíritu muábioye ndegombre tbojayana ca.”

<sup>10</sup> Entšanga más imojtsáyebuache y chë soldadëngbe amëndayá yojtsauatja nderado entšanga Pablo muantsatcacaye; as, cha tojanmandá soldadënga chamua Pablo chë entšangbentšana jaisábocnama y chë soldadëngbe oyenoye cachiñe jesánatsama.

<sup>11</sup> Yëfsana ibeta, Bëngbe Utabná Páblëbioye tbojanëbëbocna y tbojaniyana: “Pablo, ainaniñe añemo

cochtsebmna. Ntšamo aca atšbiamna condétatšëmbo y muentše Jerusalenentše condoyebuambnacá, cachcá cmontsemna Romoca jamama ca.”

### Judiënga tmojanenoyeuná Pablo jtsóbama

<sup>12</sup> Chë inye yëfsana, judiënguentšana báseftanga tmojanenoyeuná Pablo jtsóbama, y tmojanjurá ton-daye ntjasana, ni ntjofšiyana, cha jóbantscuana.

<sup>13</sup> Chca jamama tmojanjuabó entsanga imojamna canta bnétsanëngama más. <sup>14</sup> Chënga tmojána chë bachnangbe amëndayënga y judiëngbeñe bëtsëjemëngcá mandayëngbioye y mëntšá tmojánayana: “Bënga Bëngbe Bëtsá mëntšá fsënjašbuachená y bacna soyënga bëngbeñe chaotsemna chca ndoñe fsënjocumplise: Tondaye ntjasana, ni ntjofšiyana, Pablo jóbantscuana.

<sup>15</sup> Morna, tsëngaftanga y chë inye muentša mandayëngftaca chë soldadëngbe amëndayá šmochjaimpáda Pablo moye chabuánatsama; y šmochjauyana chca yojtsemna ana chë ndayá yojtsopasánama más botamana cha jatjayama ca; y bëngna fchtseprontana cha jtsóbama, cabá moye ndáshjango ora ca.”

<sup>16</sup> Pero, Páblëbe uabenbe uaquiñá chë soye tojántatšëmbona; asna, tojána chë soldadëngbe oyenoye, chama Pablo jauenayama. <sup>17</sup> Chorna, Pablo canye básefta soldadëngbe mandayábioye tbojanchembo y tbojaniyana: “Diosmanda quem basa mánatse chë nyetsca soldadëngbe amëndayábioye; canye soye entsebmna chábioye juenayama ca.”

<sup>18</sup> As, cha chë bobontse tbojëftsanbetše, chë nyetsca soldadëngbe amëndayábioye tbojanánatse y tbojaniyana: “Chë utamená Pablo šonjachembo y šonjaimpadá quem bobontse ácbioye juanatsana; mua caojtsebmna canye soye aca jauyanama ca.”

<sup>19</sup> Chë soldadëngbe amëndayá chë bobóntsbioye tbojëftsanobuácuëntšiyë, luaroye tbojanánatse y tbojantjá: —¿Ndayá cojtsebmna atše jauyanama ca?

<sup>20</sup> As chë bobontse tbojaniyana: —Judiënga tmojenoyeuná taitá jaimpádama, yëfse chëngbe amëndayëngbioye Pablo chacuánatsama, y chënga cmochanjauyana chca yojtsemna ana chë ndayá yojtsopasánama más botamana cha jatjayama ca. <sup>21</sup> Pero ndoñe catjóyaunaye; chënguentšana canta bnétsanëngama más entsanga iytëmenënga Pablëbiamna montsanýá. Chënga tmojajurá, bacna soye chëngbeñe chaotsemna ndoñe tmonjocumplise, tondaye ntjasana, ni ntjofšiyana, Pablo jóbantscuana. Mora chënga montseprontana y montsobátmana ntšamo aca chë soyama cochjáuyanama ca —chë bobontse tbojaniyana.

<sup>22</sup> Chentšana, chë soldadëngbe amëndayá chë bobóntsbioye tbojanmandá, ndayá ibojuenayama ndocnábeñe ntsecuëntayana, y chentšana tbojtanichmó.

### Pablo tmojanánatse Félix, chë Cesareoca mandádbioye

<sup>23</sup> Chentšana, chë soldadëngbe amëndayá tojánachembo útata chë inye soldadëngbioye mán-dayënguentšana, y tojanamëndá chamoprontama uta patse soldadënga, inye canyëšfta bnétsanënga couayënguiñe y inye uta patse lanzëšangaca, Cesarea puebloye ibeta, las nueve ora jabocanama; <sup>24</sup> y tojanamëndá couayënga chamoprontá Pablo chauenójayema. Y tojanmandá tsabá y ndocá ntjapasacá Pablo chamuánatsama, Félix chë Cesareoca mandádbioye.

<sup>25</sup> Y canye tsbuanácha chëngaftaca tojanichmó y chëchañe mëntšá yojtsábemana:

<sup>26</sup> Claudio Lisias, chë bëts uámana mandado Felixbiamna: Salud bomná chacotsomñe.

<sup>27</sup> Judiënga quem boyabása tmojishache y montseboše jtsóbama; pero cha mo canya Romoca onýnanacá derecho bomná yomnama sënjátatšëmbona ora, atšbe soldadëngftaca sënjá y chëngbe cucuatšëntšana cha sënjatsbocá. <sup>28</sup> Atše sëntseboše jtsetatšëmbuana ndaye soyama chënga chabe contra imojtsichámua-ma; as, cha sënjuánatse nyetsca chë judiëngbe amëndayënga montsemnoye; <sup>29</sup> y chentšana, atše sënjátatšëmbona chënga chabe contra imojtsichamo ana cachëngbe leyentša soyëngama, pero cha tondaye tonjobuachjanguá, cha jóbama bënga chašotsamnama, ni mo cárceloye jutámiamna. <sup>30</sup> Pero atše sënjátatšëmbona chë judiënga tmojenoyeuná cha jtsóbama; chíyeca, cam ora cha ácbioye sentsichamná, y chabe contra ichámëngna sënjúuyana, ndayá muabe contra jayanama imojtsebmncá acbe delante chamuayana ca.

<sup>31</sup> Chentšana, chë soldadënga tmojanma ntšamo tmojanamëndacá, ibeta Pablo tmojëftsanbetše y Antípatris puebloye tmojanánatse. <sup>32</sup> Yëfsana, chë shecuátšeca tmojána soldadëngna cach soldadëngbe oyenoye tmojésanshëcuana, y chë couayiñe enjaquenënga Pábloftaca tmojána. <sup>33</sup> Cesareoye chënga tmojánashjajna ora, chë tsbuanácha chë mandádbioye tmojanantšabuaché, y Páblënaca chabe cucuatšíñe tmojánboshjona. <sup>34</sup> As chë mandado chë tsbuanácha tojanalía; chentšana, cha tojanënoticiá ndaye luarocá Pablo inamnama, y Cilicia luarocá cha inamnama cha tojántatšëmbona ora, <sup>35</sup> tbojaniyana: “Acbe contra ichámënga chamobeconá ora, ácbioye oído chochjabuájua ca.”

Chentšana, cha tojanmandá Rey Heródesbe bëts yebnoca Pablo chamotsebojanýama.

### Ntšamo Pablo chë mandado Félixbe delante tojanenëuyaná

**24** Shachna tianoye, Ananías, chë bachnangbe más uámana amëndayá, Cesareoye tojána báseftangaftaca chë judiëngbeñe bëtsëjemëngcá mándayënguentšana y canya entsanga obuauyayáfta-

ca, Tértulo ca uabainá; y chë mandádbioye chënga tmojána Páblëbe contra jayanama.

<sup>2</sup> Pablo tmojanábocna ora, Tértulo tojanontsé chabe contra jayanama y Félixbioye tbojaniana: "Aslëpaye, taita mandado, ácbeyeca bënga natjémbana fsëndoyena y aca puerte obiashjáchá cómnayeca ba tšabe soyënga quem luarentša entsangbiama yojtsebinýna. <sup>3</sup> Nýets tempo y nýetsquénache chë soyënga fsëndóyëngacañe, bëts uámana mandado, y bënga chama corente cbondetsechuaná. <sup>4</sup> Pero ndoñe yapa bën jatenbiamnayamna, Diosmanda ratotema šmotsoyauná. <sup>5</sup> Bënga fsëntsetatšëmbo quem boyabása entsanguentše entsemna mo bacna shacuancá, nýets luarënguenache yojtsana y yojtsama chë judiënga nýetscanga cachca soye ndoñe chamondëtsejuabnama, y cha yojtsemna chë Nazaretocabe ustonëngbe uanatsaná. <sup>6</sup> Y tonjábošena jamama Bëngbe Bëtsabe bëts yebna, Bëngbe Bëtsabe bominiñe ndoñe tšabá chaondëtsemnama; chíyeca bënga cha fsënjotbá. Bënga fsënjábošena chabiana jayanana tšabá o ndoñe tšabá tonjamama, ntšamo bëngbe leyënguiñe endayancá; <sup>7</sup> pero chë soldadëngbe amëndayá Lisias tonjontremeté y jabuachana bëngbe cucuatšëntšana tbojtsánatseñe, <sup>8</sup> y tonjayana chë chabe contra ichámëngna caojtsamna ácbioye chama jabana ca. Cach taitá chacojatjá ora, ndegombre soyënga cochántsetatšëmbo ndáyeca bënga muabe contra fstichámuama ca" —cha tojánayana.

<sup>9</sup> Y chë judiënga chentše imojétsemnëngna imojt-sanichamo añe chca tojanopasá y lempe ndegombre yojtsemna ca.

<sup>10</sup> Chentšana, chë mandado Páblëbioye tbojánëfjatšëmbo chaóyebuambama; as Pablo tojánayana: "Atše sëndétatšëmbo aca ba uatama comna muentša entsangbiama tšabá o ndoñe tšabá tmonjamama ichamuá; chcasna, tondayama ntsauatjácá y puerte oyejuayá acbe delante šcuenëuyaná. <sup>11</sup> Ntšamo cach aca jtsetatšëmbuama contsobencá, cabá bnétsana uta te entsemna atše Jerusaleñoje sënjá, Bëngbe Bëtsá jadórama. <sup>12</sup> Y quemënga ndoñe chešmátinýena nderado ndáftaca jabuachana enatsëtsnayañe, ni entsanga chamuenbouénanama amiñe, Bëngbe Bëtsabe bëts yebnocá, ni chëngbe enefjuana yebnënguenache, ni inýe luarënguenache chë bëts pueblentše. <sup>13</sup> Quem entsanga tondaye quemátsbomna ntšamo jayanama, atšbe contra montsichamo soyënga ndegombre yojtsemna ca. <sup>14</sup> Pero ndegombre endmëna y chanjayana, atše bëngbe taitangbe Bëtsá sëndëserveda, jtsiyenëse ntšamo Bëngbe Bëtsá šonjaninýanýe benache yomncá; y quem entsanga montsichamo, básefta soyënga ntšamo bënga quem Tsëm Benache ústonënga fstsošbuachecá, ndoñe ndegombre yondmëna ca. Pero atšna nýetsca chë Moisesbe leyiñe y Bëngbe Bëtsabe juabna oyebuambnayëngbe uabemana libřëšanguentša soyënguiñe sëndošbuaché; <sup>15</sup> y atše cach chëngcá, puerte jtsošbuáchiyëse Bëngbe Bëtsábeñe sëndobátmana cha yochjama chë mochjóbanënga chámuatayenama, nýetsca entsanga,

lempe tšabá amënga y chë ndoñe tšabá amëngnaca.

<sup>16</sup> Chíyeca, atše nýets tempo puerte tšabá sëndama, tondayama ntjatenócochinýenama y atšbe ainana natjémbana chaotsomñama, Bëngbe Bëtsabe delante y entsangbe delántnaca.

<sup>17</sup> "Básefta uatama inýe luarënguenache atše sëndánana; ndoñe bayté quenátsmëna cach atšbe luaroye sëntashjango, chentša ndbomnjëmënga jujabuáchama ndayánaca jatšatayama y bayënga jobáyama, Bëngbe Bëtsá jëtschuayama. <sup>18</sup> Atše sënjamá soyënga Bëngbe Bëtsabe delante tšabá jtsatsmënama; chentšana, básefta Asioca judiënga Bëngbe Bëtsabe bëts yebnentše šmonjínýena, pero ndoñe chešmátinýena ni ba entsángaftaca, ni enbouenaniñe. <sup>19</sup> Chë šmonjinýenënga entsamna ácbioye jabana y acbe delante atšbe contra chamuayana, nderado ndayá tmojtsebomnëse. <sup>20</sup> O ndóñesna, cach quemënga, muentše montsemnënga chamuayana, chë judiëngbe amëndayëngbioye atše šmonjuánatse ora, atše ndayá tijobuáchjanguama chešmënjínýena, atše castiganá jtsemnama šojtsemna ca chënga chamuayanama; <sup>21</sup> o nderado nántsemna chë atše chëngbentše sëntsemna ora, mëntšá tijuáebuachenama: 'Atše chë obanënga mochtayenama puerte jtsošbuáchiyëse sëndobátmana causa, tšëngaftanga atšbe contra šmochjayana ca.' "

<sup>22</sup> Félix bëtská inatátšëmbo Bëngbe Utabná tojaninýinýe Benache ústonënga imojanošbuaché soyëngama; as, Pablo chca yojtsoyebuambná ora, cha tojanmandá ndoñe más chë soyama chë te jatóyebuambnayanana, y chë entsanga tojanéyana: "Chë soldadëngbe amëndayá Lisias chaojášhango ora, chanjayana ntšamo quem tšëngaftangbe sóyeca jamama ca."

<sup>23</sup> Y chentša soldadëngbe amëndayábioye tbojanmandá Pablo jtsebojanýama, pero nýe utamená ndoñe chaondëtsemna ca; y tojanmandá, Páblëbe amiguënga jalesénciayana ntšamo tmojtsebošcá cha chamuauájabuachama.

<sup>24</sup> Chentšana baseftaytese, chë mandado Félix Cesareoye tojtashjango, chabe shema Drusíaftaca, canýe judiá. Chorna, cha tojanmandá Pablo jachembuana y tojanuena ntšamo Pablo yojtsichamo, ntšamo canýa nanjobenaye Jesucristbeñe ošbuachiyá jtsemnama. <sup>25</sup> Pero, nýetsca soyënguiñe tšabá jtsamama, cachá jenomándama jtsoobenama y ntšamo tmojamama nýetsca entsangbiama Bëngbe Bëtsá yochjayana Pablo tojanoyebuambá ora, Félix tojanëuatjaná y Páblëbioye tbojaniana: "Mora, mata; luare quétstsebmoma ora, cbochjachembo ca."

<sup>26</sup> Jëtsboshjonama Pablo crocénana chabuatabuenámna Félix inobátmana; y chca, ba soye ibojanófjajana cháftaca jencuëntama. <sup>27</sup> Y chca uta uata tojanochnëngo; chentšana, Félix ya ndoñe más chë mandado yontsemna y chabe cuentna Porcio Festo mandadcá tmojántbema. Félix yojtseboše chë judiëngbe delante tšabá joquédama, chíyeca utamená Pablo tbojéftsanboshjona.

### Pablo Festbe delante

**25** Festo chë luaroye tojánashjango y unga tianoye, Cesarea pueblentsana Jerusalenoye cha tojána. <sup>2</sup> Chocna, chë bachnangbe amëndayënga y chë más uámana judiënga Féstbioye tmojána Páblëbe contra jayanama. <sup>3</sup> Y tmojanimpadá, mo chëngbiama canýe bëts pavor cuenta, cha chaomandá Pablo Jerusalenoye chamuánatsama. Chëngna imojétsejuabnaye Pablo benachiñe chamotsóbama. <sup>4</sup> Pero Festo tojanéyana, Páblëna Cesareoca utamená yojtsemna y baseftaytese cha choye jtama ca. <sup>5</sup> Y tojanéyana: “Chamna, tšëngaftangbe amëndayënga átšeftaca Cesareoye chamua y chë boyabása ndaye bëts soye tojobuáchjanguase, choca chabe contra šmochjayana ca.”

<sup>6</sup> Festo Jerusalenentše posufta o bnétsana te más chëngaftaca tbojétsanjétana y chentšana Cesareoye tojtana. Yëfsana, cha tojanótbema chabe puestentše tribunaloca y tojanmandá Pablo choye chamuánatsama. <sup>7</sup> Pablo choye tojánashjango ora, Jerusalenocana tmojánashjajna judiënga tmojanobobeconá y ba uabouana soyënga chabe contra imojtsichamo, pero ni canýe chë soyëngama tmonjanobená jinýanýiyana chca ndegombre bétsemnama.

<sup>8</sup> Y Pablo, cachá jenéuyanama mëntšá yojtsichamo: —Atše tondaye chiyatobuachjanguá, ni judiëngbe leyëngama, ni Bëngbe Bëtsabe bëts yebnama, ni Romoca bëts mandadbe contra ca.

<sup>9</sup> Festo yojtseboše chë judiëngaftaca tšabá joquédama; as Páblëbioye tbojantjá: —¿Tacatjábošena Jerusalenoye jama, choca atše quem acbe soyama jayanama ca?

<sup>10</sup> As Pablo tojánayana: —Atše séntsemna chë Romoca bëts mandado tojichamó amëndayëngbe delante y chënga entsamna jayanama atše tšabá o ndoñe tšabá sënjamama. Ntšamo ndegombre contsetatsëmbcá, judiëngbe contra atše ndocna bacna soye chiyatsma.

<sup>11</sup> Nderado atše ndaye bëts soye tjobuachjanguá y chama atše jóbanama šojtsemnëse, atše tondaye quichátayana atše ndoñe chayóbanama; pero atšbe contra montsichamo soyëngama tondaye ndegombre tontsemnëse, ndocná queochatobenaye chëngbe cucuatšíñe atše jaboshjonana. Chíyeca, Diosmanda chë Romoca bëts mandado cháuyana tšabá o ndoñe tšabá sënjama ca —Pablo tojánayana.

<sup>12</sup> As Festo, chë soyama chabe buayiynayënga tojanatjá y chentšana tojánayana: —Chë Romoca bëts mandado quem soyama cháuyanama tcojábóšenëna, chábioye cochjá ca.

**Festo, Rey Agrípaftaca tbojanencuentá ntšamo Páblöftaca jamama**

<sup>13</sup> Chentšana baseftayté tojanochnëngo ora, Rey Agripa y Berenice Cesareoye tbojána, Festo jauatsët-sayama. <sup>14</sup> Bayté chata chentše tojanajétana; y chca, Festo chë réybioye tbojancuentá Páblëbe soyama. Cha

mëntšá tbojanianya: —Muentše endmëna canýe entšá, Pablo ca uabainá; Félix utamená tbonjéftse-boshjona, atše mandadca sënjontšë ora. <sup>15</sup> Jerusalenocana sëndánmëna ora, chë bachnangbe amëndayënga y chë judiëngbeñe bëtsëjemëngcá mándayënga Páblëbe contra demanda tmonjajajó y šmonjaimpadá cha jóbanama ibojtsemna ca atše jayanama. <sup>16</sup> Y atše sënjáuyana: “Chë romanënga ndoñe quematamana ndocnabiama jayanana cha jóbanama ibojtsemna ca, chabe contra ichámënga chabe delante ndoñe tmontsemnëse, chca, chama jenéuyanama cha chaobenama ca.” <sup>17</sup> Chíyeca, chënga moye tmonjabo ora, ndoñe yapa bën ntjatenobiamnaycá cach yëfsana atšbe puestentše tribunaloca séntótbema y sënjamandá chë boyabása jobetšana. <sup>18</sup> Pero chabe contra ichámënga, ntšamo atše sëndanjuabnacá chënga mochjayanamna ni mo canýe bëts soye chabe contra chemátayana, chënga jóyebuambayama tonjóyentsbuache ora. <sup>19</sup> Chënga chabe contra montsichamo, nýe cachëngbe Dios ntšamo jadórama yomnana y canýa Jesús ca uabainábiamama; cha tojanóbana, pero Pablo entsichamo cha ainá yotsomñe ca.

<sup>20</sup> “Chora atše ndoñe quetstétsetatsëmbo ntšamo chë soyiñe jamana; asna, Pablo sënjantjá Jerusalenoye jama tayojéteboše ca, choca atše jayanama tšabá o ndoñe tšabá cha tonjanmama. <sup>21</sup> Pero cha šonjaimpadá camuentše jaboshjonana, cach Romoca bëts uámana mandado chë soyama tojayanentscuana ca. Chcasna, atše sënjamandá cha chamotsebojanýama, chë mandádbioye jíchmuama atše jobenayentscuana ca” —Festo tbojancuentá.

<sup>22</sup> Chca tbojanencuentá ora, Agripa Féstbioye tbojanianya: —Atšnaca séntseboše chë boyabása joyeunayama ca.

Y Festo tbojanjuá: —Cach yëfse oído chábioye cochanjabuájua ca.

<sup>23</sup> Chë yëfsana, Agripa y Berenice corente uachua-mentše chë tribunaloye tbojánamashjna y chátaftaca tmojánamashjna chë soldadëngbe amëndayënga y chë pueblentsa uámana taitanga. Chentšana Festo tojanmandá Pablo jobetšana; <sup>24</sup> y chora cha tojánayana: “Rey Agripa y nyetsca taitanga béngaftaca šmojtsemnënga: Chentše entsemna chë boyabása. Nyetsca judiënga chabe contra átšbentše montsabíchamo, Jerusalenoca y quem Cesarea puebléntsna, y nýa jt-sayebuáchëse tša šmontseimpadana cha chaóbanama; <sup>25</sup> pero atše séntsejuabná quem boyabása tondaye tonjama, jóbanama chabotsemnama ca. Y más, cachá šonjaimpadá chë Romoca bëts uámana mandado César chabe soyama cháuyanama; chcasna, chca chanjama, chábioye cha chanjíchmu. <sup>26</sup> Pero atše, atšbe bëts uámana mandádbioye quem boyabásabiamama juábobemama ndocna serto soye quetsátsbomna causa, tšëngaftangbe delante cha tijatsá, y masna, acbe delante, bëts rey Agripa; chca, lempe chacojatjá chentšana, ndayá juabemama atše chaitsebomnama. <sup>27</sup> Er atše séntsejuabná ndoñe corente juabnayabe



soye yomna, canÿe utamená jíchmuana y ndayama chabe contra tmojtsichámuama ndoñe lempe ntjuabemana ca” —cha tojánayana.

**Pablo tojanontsé rey Agripbe delante jóyebuambayama**

**26** Chentšana, Agripa Páblëbioye tbojanianana: —Jóyebuambayama contselesenciana, cach aca chacuenéuyanama ca.

As Pablo, chë réybioye jachuyama cucuatše tojanatsbaná y jenéuyanama tojanontsé méntšá jayanama: <sup>2</sup>—Atše ndegombre sëntsoyejuá mora chjobenaye acbe delante jóyebuambayama, uámana rey Agripa, chca, atše jenéuyanama nyetsca soyëngama ntšamo judiënga atšbe contra montsichámuama; <sup>3</sup> y más sëntsoyejuá, taitá conduábuatmama lempe ntšamo judiënga monduamancá y condétatšëmbo chë judiënga ndayama imuenoboyebuambnama. Chcasna, Diosmanda uantádoca šmotsoyeuná.

**Pablo tojanacuntá ntšamo cha tempo inamnana**

<sup>4</sup>“Nyetsca judiënga mondétatšëmbo ntšamo atše tempšana chëngbeñe tsiyenama, bobontse sënjamna orscana, atše sënjanonÿná luarentše y Jerusalemëntše.

<sup>5</sup> Chëngnaca mondétatšëmbo y montsobena jayanana, chënga tmojtsebošëse, chca ndegombre yomnama; atše nyets tempo fariseucá vida sëndbomna, y chë fariseunga mondoyena más soyënga jtsamëse chë judiëngbe leyëngaca chë inÿe judiëngbiama. <sup>6</sup> Y mora, ntšamo Bëngbe Bëtsá bëngbe bëts taitanga tojanašebuachenacá, chë obanënga jtayenama cha yochjamama puerte jtsošbuáchiyëse atše obatmana causa, šmojuánatse atšbe contra jayanama.

<sup>7</sup> Bëngbe bnëtsana uta Israeloca bëts pamíllanga mondobátmana chë šbuachenana soye chëngbiama chaóshjanguama y chíyeca, cada te bnëté y ibeta chënga Bëngbe Bëtsá mondadorana y mondëservena. Y atše cach soyama obatmana causa, bëts rey Agripa, judiënga mora atšbe contra montsabíchamo.

<sup>8</sup> ¿Ndáyeca tšëngaftanga judiënga šmojtsichamo, chë obanënga chámuatayenama Bëngbe Bëtsá yochjamama jtsošbuáchiyama ndoñe šmontsobena ca?

**Pablo tojanacuntá, ntšamo tempo cha Jesucristbeñe ošbuáchiyënga yojanaborlánama**

<sup>9</sup>“Y cach átšnaca sënjanjuabná atše šojamna lempe ntšamo stjobenacá jamana, Jesús chë Nazaretocábeñe ošbuáchiyënga corente chamosufrima, <sup>10</sup> y chca Jerusalemëntše atše sënjanma. Chë bachnangbe amëndayënga mando šmonjanatšetá, y chca, banga Jesucristbeñe ošbuáchiyënga cárceloye sënjanëtame; y jtsëbáyama ca chëngbiama montsaníchamo ora, átšnaca aíñe chca chamoma ca sënjáníchamo. <sup>11</sup> Y ba soye, chë judiëngbe enefjuana yebnënguenache jabuache chënga sënjanatsetšená, chënga Jesucristo ústonana chamotsajbanama, y chëngaftaca tša eto-

naná sënjëtsemna causa, chë inÿe luarëngoca bëts puelënguenáchnaca chënga sënjanécamena.”

**Pablo tojanacuntá ntšamo cha Jesucristbeñe ošbuáchiyá tojanóbema**

<sup>12</sup>“Y cachcá jamama canÿe te Damascoye sënjëtseye; chë bachnangbe amëndayënga uabemanëchangá šmonjanëntšabuaché chca jamama y, cachënga choye šmonjaníchmó. <sup>13</sup> Pero, uámana rey, chë benachëjana mo nyetsto ora, sënjáninÿe canÿe bëts tcuinÿe celocana, shinÿama corente más enjëtsebinÿnaye, y atše y chë átšeftaca ajnëngbe shéconana corente enjëtsebuashinÿinÿana. <sup>14</sup> Nyetscanga fsënjánshajaye y atše sënjanuena canÿe oyebuambnayana, hebreo biyañe, méntšá šonjëtsetsaye: ‘Saulo, Saulo, ¿ndáyeca chca šcojtsacmena ca? Cach aca bacá contsenabomá, atšbe entšanga chamosufrima tcojtsama ora, mo uacná ngmëche niñëfjiñe cha tojtsosacunjá orcá, cachá jenótsetšenana ca.’ <sup>15</sup> As atše sënjánayana: ‘¿Nda comna, Bëngbe Utabná ca?’ Y chë Utabná šonjanjuá: ‘Atše sëndmëna Jesús, y aca condama atšbe entšanga chamosufrima ca. <sup>16</sup> Pero matëtšbaná y matëtšá. Atše cbonjébëbocna jinÿinÿiyama aca tbojuábuayanama atše šcochjaserviama, y chacotsetatšëmbuama y entšanga chacuacuntama, mora tconjinÿe soyama y más chcoye atšbiama cbochanjinÿinÿiye soyëngám-naca. <sup>17</sup> Atše chanjama judiënga y ndoñe judiënga tondaye chacmondëborlama; y morna, ndoñe judiëngbioye cbontsichamná, <sup>18</sup> chënga atšbe soyëngama josértama aca chacomama. Chca, chënga bacna juabnënga ndoñe chamondëtsebmoma, mo ibetiñe cuaftsemnëngcá, sinó mo binÿniñcá chamotsemna átšeftaca, atše chë entšangbe juabnënga binÿnayá. Satanasbe cucuatšíñe ndoñe chamondëtsemnana, sinó Bëngbe Bëtsabe obenánaca chamotsiyenama; chënga átšbeñe chamotsošbuáchema, y chca, chëngbe bacna soyëngama perdonánënga chamotsemnana y chënga chamotsebmoma canÿe luare entšangaftaca, chë ndëmuanÿengbioye Bëngbe Bëtsá tšabe entšanga y chabe entšanga tojábiama, chënga átšbeñe betsošbuáchiyama ca’ ” —cha šonjanianana.

**Pablo tojanma ntšamo chë mo otjenayoquëcá tojaninÿcá**

<sup>19</sup>“Chcasna, bëts rey Agripa, atše sënjanma chë mo otjenayoquëcá sënjáninÿe ora ntšamo Cristo šonjaniancá; <sup>20</sup> y natsana, Damascoca entšanga chë tšabe noticiëngama sënjanabuayená; chentšana, Jerusalemnoquënga y nyetsca chë Judea luaroquënga y ndoñe judiëngnaca; chënga sënjánaimpadana bacna soyënga amama ngmënaca chamuatenójuaboma, chca amana chamuajbaná y Bëngbe Bëtsabe benache chámuatishachama, y soyënga chamotsama jinÿinÿiyama chca ndegombre tmojanmama. <sup>21</sup> Chca sënjánama causa, judiënga Bëngbe Bëtsabe bëts yebnoca šmonjanishache y tmonjánbošëna atše jtsóbana. <sup>22</sup> Pero Bëngbe Bëtsá sempre šonduájabuachana, y

chca, cada te mentscoñama, nyetscanga Bëngbe Bëtsabiama sëndabuayiyá, uámanëngbioye y nduámanëngbioynaca; nye ntšamo Moisés y Bëngbe Bëtsabe juabna oyebuambnayënga tmojanayancá, ntšamo yochjopásama atše sëndoyebuambná; inyetšá ndoñe. <sup>23</sup> Chënga tmonjánayana: 'Bëngbe Bëtsabe Uámana Uabuayaná, Cristo jóbanama bontsemna; pero chaojóbanentšana, cha chë natsaná echántsemna obanënguentšana jtayenama, y cha judiëngbioye y ndoñe judiëngbioye echanjabuayená, y chca, chënga mochántsetatšëmbo nyetscanga chábeñe tmojtsošbuáchenga atsebácanënga mochtsemnama ca.'"

### Pablo tojanma rey Agrípbioye jáyëñjanama, Jesucrist-beñe ošbuachiyá chaóbemama

<sup>24</sup> Pablo, cachá jenéuyanama chë soyënga tojánayana ora, Festo mëntšá tojánayebuachena: —¡Pablo, opá cojtsóbema! Yapa ualíaye causa, opá tcojtsóbema ca.

<sup>25</sup> Pero Pablo tbojanjuá: —Opá ndoñe quetsátsmëna, bëts uámana Festo; inyetšá entsemna; atše sëntsoyebuambná nyets juábnaca, y ndegombre soyënga.

<sup>26</sup> Chentše rey Agripa entsuenana, y cha puerte tšabá chë soyëngama endétatšëmbo, chíyeca, tondayama ntjatauatjá, atše chabe delante sëntsoyebuambná; atše corente sëndétatšëmbo chánaca chë soyëngama yotatšëmbuama, er ndayá Jesús tojanmcá, ndoñe tonjopasá ndaye iytëmena chaboje. <sup>27</sup> Bëts rey Agripa, ¿Bëngbe Bëtsabe juabna oyebuambnayënga tmojánayana soyënguiñe aca quecošbuaché? Atše sëntsetatšëmbo aíñe chiñe cošbuáchema ca —Pablo tbojanayana.

<sup>28</sup> Chora Agripa tbojanjuá: —Batsatema más y mašcjayëñjaná Jesucristbe ustoná atše jóbemama ca.

<sup>29</sup> As Pablo tojánayana: —Nye batsatema más o bëtscama más, atše Bëngbe Bëtsá sëntseimpadana, ndoñe nye bëndatbe barie, sinó nyetscanga chë mora šmojtsuenanënga, atšcá Cristbe ústonënga chašmobiamama, pero utámenënga ndoñe chamondëtsemna, ntšamo mora atše sëntsemncá ca.

<sup>30</sup> Chorna, chë rey, chë mandado, Berenice y chë chëngaftaca imojantbiámanënga tmojantsbaná, <sup>31</sup> y luaroye tmojána chë soyama jencuëntama. Mëntšá imojtsichamo: —Quem boyabása ndocna bacna soye tonjama jóbanama chabotsemnama, ni mo utamená jtsemnama ndoñe quebnátsmëna ca.

<sup>32</sup> Y Agripa Féstbioye tbojanayana: —Chë Romoca bëts mandado, quem chabe soyama cháuyanama cachá ndoñe matëñjabošenëse, bënga matmëñjobená quem boyabása jëtšboshjonama ca.

### Roma bëts puebloye Pablo tmojanichmó

<sup>27</sup> Italia ca uabaina luaroye Pablo jíchmuama tmojanenoyeuná ora, atše, quem librëša uabi-amnayá, cháftaca sënjána. Chora Pablo y chë inye utámenënga Julio ca uabainabe cucuatšíñe tmonjánabashejuana. Julio enjamna canya chë Romoca bëts

mandadbe soldadënguentša mandayá. <sup>2</sup> Asna, fsënjánašëngo canye Adramitio puebloca barcuíñe; ya chë Asioca bëts pueblëngoye juama enjëtsemna. Cesarea pueblentšana fsënjánbocna y Aristárncaca bëngaftaca enjëtsemna; cha enjamna Tesalónica bëts pueblócá, Macedonia luaroca.

<sup>3</sup> Chë inye yëfsana, Sidón puebloye fsënjánashjajna. Chentše Julio, tšabá mandbomná Pábloftaca enjëtsemna; tbonjanlesenciá chabe amiguëngbioye chauabuáchama, chënga chamofjama y chamóbocuedama. <sup>4</sup> Sidonocana fsënjëftsanbocnentšana, bëngbe contra corente enjëtsebinýiaye. Chíyeca, Chipre fshantsënga catšbioicajana, ndoñe yapa quentëtsebinýiayëjana bënga fsënjána. <sup>5</sup> Cilicia y Panfilia luarënga béconana mar bejaycá fsënjánachnëngo, y Mira bëts puebloye fsënjánashjajna, Licia luaroca.

<sup>6</sup> Chë soldadëngbe amëndayá, canye Alejandría puebloca barco chentše tonjáninýena, Italia luaroye yojëtseye; asna, šonjanamëndá chë barcuíñe jenójayiyana. <sup>7</sup> Baseftaytentscuana uenana fsënjánana y pordonto fsëñjanobená Gnido pueblentša ndirichiñe jashjanguana. Cabá bëngbe contra enjëtsebinýiaye causa, Salmón luarëjana fsënjánachnëjna, Creta fshantsënga béconana, ndoñe yapa quentëtsebinýiayëjana. <sup>8</sup> Y chca, pordonto bejaycá fsënjánana, fshantsënga béconana; chentšana, canye pueblo, Tšabe Puertënga ca uabáinentše fsënjánashjajna, Lasea ca uabaina pueblo béconana.

<sup>9</sup> Chca, bayté tonjanochnëngo y chora chë bejaycá jama puerte resjo enjëtsemna, er ya chë judiënga bayënga jobáyama te tonjanochnëngo, Bëngbe Bëtsá chëngbe bacna soyëngama cháuperdonama, y chora chë uaftena tempo joshjanguama ya enjëtsobeco.

<sup>10</sup> Chíyeca Pablo chë entšanga mëntšá tonjanabuayená: "Baconga, atše šontsinýana mora puerte resjo entsemna bejaycá játama, y ndoñe tšabá queochátsmëna, ni chë uasmanëshangama, ni chë barcuama y bëngbiama cach ndoñe, mo nderado muanjanóbana ca."

<sup>11</sup> Pero chë soldadëngbe amëndayá Páblëbioye ndoñe ntjoyeunayana; más, chë barcuentša mandayá y chë barco nduíñbioye aíñe. <sup>12</sup> Ndoñe tšabá yonjamna, chë barco chora enjëtsemnentše chë uaftena tempëntscuana jëftsemnana; chë causa, nya mo nyetscanga tmonjanenoyeuná cachiñe bejaycá chentšana játama, nderado cuanjobenaye Fenice puebloye jashjanguama y chentše jëftsemnama chë uaftena tempo tojopochocantscuana. Chë pueblo Creta luaroca enjamna; y choye jamashëngumna enjamna shinýe endbet-senatjëmbambana juachoica tsjuanoicajana y tsmanoicajana.

### Mar béjayiñe puerte uaftena y binýia tojanóshjango

<sup>13</sup> Chentšana tonjanontšé tsmanoicana batšá binýiayana, chíyeca chë entšanga tmonjanjuabó ya yojtsanopodena jtëtóntšana jama ca. As, chentšana fsënjëftsanbocna y bejaycá fsënjána, Creta fshantsënga

beconañjana. <sup>14</sup> Pero baseftayté chentšana, chë fshantsëngocana tonjanontsé corente jabuache binÿi-ayana y chë barquëshoye enjëtsohjajuana. Chë binÿia yojanabaina Nordeste binÿia ca. <sup>15</sup> Chë barcna nÿe chë bínÿiëbe ponto tonjanontsé uayana; chë binÿia enjët-sobayëjana jama ndoñe quentétsopodena causa, šon-janotocá nÿe ntšamo tojtsebinÿiacá chašúyambama. <sup>16</sup> Chentšana fsënjánachnëjna Cauda ca uabaina stët-šoicajana, base fshantsënga mar béjayoca; chiñe ya ndoñe tša jabuache quentétsëbinÿiaye y pordonto fsënjanobená buyeshoicana jtabocnana chë barco en-janasjá canouše, ndoñe chaondëtsóndbemama. <sup>17</sup> Ya chë barquëshoye fsëntanëšëngo orna, chë entšanga lazëjangaca chë barquësha tmontsanabatsécaca, más uamorochésa chaotsamna. Pero chënga monjët-sauatja nderado chë barco chë Sirte ca uabaina casca-juente nanjetsánjua; asna, chë barcuentsa ancla tmonjanashëbëútsëna, chë barco ndoñe betscó chaondëtsábonjnama, y ntšamo enjetsanbinÿiaycá fsënjánana. <sup>18</sup> Chë inÿe yëfsana y chë binÿiayana cabá jabuache enjëtsemna causa, chënga tmonjanontsé chë barcuentsa uasmanëšhangá jtsëshbuëtsetšana; <sup>19</sup> y unga tianoye béngnaca šonjanotocá, cach bëngbe cucuátšëca, chë barcuentsa soyënga buyeshoye jtsët-šanana. <sup>20</sup> Baytentscuana bënga ndoñe chibi-atanobená jinÿana ni shinÿe, ni estrellatëmënga, tša tonjëtseibetata causa; y tša jabuache enjëtsebinÿiaye causa, bënga ya ndoñe quefstëtsanobatmana chentšana jótsbocana.

<sup>21</sup> Ya bayté enjëtsemna y chëntscuana tondaye saná ntjascá fsënjëtsemna. Chentšana, Pablo bëngbe tsëntsaca tonjantsá y tonjánayana: “Baconga, tšabá manjamna atše mašmënjanoeyuná y Creta luarocana ndoñe matmënjëtfsanbocna; chca mora ndoñe mal mamojtsepasá y ndoñe nÿa nÿetsá matmënjobuetše. <sup>22</sup> Pero mora ngmënacá ndoñe matsmëngënga; masque chë barco echantsenatjëmba, tšën-gaftanguentsá ndocná queochatóbana. <sup>23</sup> Ibeta canÿe ángel šonjébëbocna; Bëngbe Bëtsá, ndabia atše sënd-mëna y nda sëndësverena, cha tbojichmó; <sup>24</sup> y chë ángel mëntsá šonjauyana: ‘Pablo, ndoñe matauatjana; entseyta aca chë Romoca bëtš mandádbioye chacot-sama, y aca Bëngbe Bëtsábia cómnayeca, nÿetsca quem barcuñe ajnënga jobanámentsšana cha echan-jatsebacá ca.’ <sup>25</sup> Chcasna, baconga, ndoñe matauatjën-gana, er atše Bëngbe Bëtsábeñe corente sëntsošbuaché y lempe ntšamo chë ángel šon-jauyancá echanjóbcna. <sup>26</sup> Pero mora entseyta canÿe fshantse mar béjayiñe chašúshejanguama ca” —cha tonjanéyana.

<sup>27</sup> Canÿe ibeta, uta semana fsënjánana chentšana chë Adriático ca uabaina mar béjayiñe fsënjëtsemna, y nÿe ínÿoye y ínÿoye chë binÿia šonjëtšëyambaye. Y mo tsëntseto yojëtsemna orna, chë barcuentsa trabá-jayënga tmojanjuabó ya fshantse béconana imojëtsemna ca. <sup>28</sup> As chënga tmonjanmedidá ntsachetšá chë búyeshe buatjoye inamnama y tonjanóbocna un-ga bnëtsana y chnënguana metro; más chcoye cachiñe

tmonjanmedidá y uta bnëtsana canÿsëfta metro ton-janóbocna. <sup>29</sup> Chënga monjëtšauatja nderado bëtš ndëtšbéngaca nanjetsántšëtjama; asna, chë barco stëtšoicajana canta ancla buyeshoye tmon-janashëbëútsëna, chë barco ndoñe más chaondët-sábonjnama, y tša monjëtseboše betscó chaobínÿna-ma. <sup>30</sup> Chëntscuana, chë barcuentsa trabájayënga tmo-jánbošëna chentšana jtsachetana; chamna, chënga tmojanontsé chë canouše buyeshoye justjanguana, pero chca imojëtšama, mo chë anclënga chë barco natsanoica cuaftsëstjauancá. <sup>31</sup> Pero Pablo chë soye tojáninÿe, y chë soldadëngbe amëndayábioye y chë soldadëngbioye tonjanéná y mëntsá tonjanéyana: “Chë barcuentsa trabájayënga cach quem barcuentsë ndoñe chamonjoquedase, tšëngaftanga ndoñe queš-mochatobenaye muentšana jótsbocama ca.”

<sup>32</sup> As, chë soldadënga tmonjánana y chë canoušëtsa lazëjënga tmontsantëtsetše y buyeshoye chëse tmontsantsatše.

<sup>33</sup> Enjëtsebinÿyana ora, Pablo nÿetscanga tonjanaim-padá ndayánaca chamosëngama, mëntsá jáuyanëse: “Ya uta semana entsemna y tšëngaftanga ni mo batšatema chešmatamaná, y tondaye chešmatsbmuanan-ga. <sup>34</sup> Diosmanda, masque nÿe mo batšatëmnaca š-mochjase. Chca cmontsamna jamana ndoñe chaš-mondóbanama, er ndocná ndocá queochatspása ca.”

<sup>35</sup> Pablo, chca tonjánayanentsšana, canÿe tandëse tonjanca y nÿetscangbe delante Bëngbe Bëtsábioye tbontanchuá. Chorna, tonjanjatá y tonjanontsé jasama. <sup>36</sup> Chentšana nÿetscanga tmonjanenñemó y chëngnaca tmonjanse. <sup>37</sup> (Chë barcuentsë nÿetscanga fsënjamna uta patse y canÿsëfta bnëtsana y chnënguanënga.) <sup>38</sup> Ntšamo imnabošcá tmonjansentsšana, buyeshoye trigo tmontsanashaná, chca, chë barco ndoñe yapa chaondëtsautama.

### Chë barco tojtšanenatjëmba

<sup>39</sup> Ya tonjanbinÿyana ora, chë barcuentsa trabájayënga ndoñe quemëntëtsetatšëmbo ndaye fshantse chentše bëtsemnama, pero tmonjáninÿe chë fshantsentše canÿe luare jachañe, chë béjaye chë luaroye omashjuanentše, y chiñe canÿe chëñyañe enjamna; as chënga tmonjanjuabó jarrepárana nderado cuanjobe-naye chëjana chë barco chë fshantsoye juyambana. <sup>40</sup> Asna, chë anclëntša lazëjënga tmontsantëtsetše y chë anclënga buyeshoye tmontsanboshjuana, y chë timón, chë barco juyambama oservena soyentša ua-batsëcnëjëngnaca tmontsanjafjoná. Chorna, chë barcuentsa natsanoica niñëšifne entšëjua tsbanánoye tmontanëšëngo, y chë binÿia tonjanma chë barco chaontsé chë chëñÿoye juabëconama. <sup>41</sup> Pero chë barco canÿe luaroye tonjánashjango, y chentše chë béjaye catatoicajana enjetsobuá y chë barco cánÿentše, bëtscá cascajo buyeshiñe binÿnentše tontsananjó. Chë barcuentsa natsanoica lado chë cascajuñe entsana-juena, ndócnoye juabónjuama ntsopodencá, y chë stëtšoica lado puerte entsanashatiyíná y lempe

entsanandbiamná, yapa binýia causa y búyeshe chentše enjétojantšetaye causa.

<sup>42</sup> Chora, chë soldadënga tmonjanjuabó chë utámenënga jtsëbáyana, jachbabëse chënga ndoñe chamondétsachetama. <sup>43</sup> Pero chë soldadëngbe amëndayá inaboše Pablo jatsbocama, y chíyeca chë soldadëngbioye ndoñe chenatanalesenciá chca jamana; y tojanmandá nyetscanga chë jachbabama obenënga natsana chë buyeshoye joshbuetšana tsachoye chamuashjanguama, <sup>44</sup> y chë ínýengna tablëshënguñe o chë barcuentsa pedazënguñe chamoshbuetšama. Y chca, nyetscanga fsënjanošená tšabá y ndocá ntjapasacá fshantsoye jashjanguama.

### Pablo Malta luaroca

**28** Ya nyetscanga fshantsoca tšabá fsënjétsemna ora; fsënjántatšëmbona chë luare Malta ca yojanabaina. <sup>2</sup> Chë luarentša entsanga béngaftaca corente tšabá mándbomnënga monjésemna; canye íñeshe tmonjanangbotjó y šonjanébuaja choca bënga jatóšboniyama, er tša enjétsaftena y yapa enjétsesëna. <sup>3</sup> Pablo tojanatbaná básefta buashana chamesëfjënga y chë íñeshoye enjétseshacjnaye ora, canye mëtšcuaye tojánbocna y enjestsachaye, chentše yapa obonyaye causa, y Páblëbe cucuatšifne tontsanonjýá. <sup>4</sup> Chë luarentša entsanga, chë mëtšcuaye Páblëbe cucuatšifne yojtsajonýanama tmonjáninye ora, monjétsenatsëtsnaye: “Quem boyabása ndegombre inýa obanayá cuanmëna; mar béjayoca jobanámentšana tojotsbocá, pero chca uamana causa, diosá Justicia ndoñe quebnatslesencia cha vida chaotsebomnama ca.”

<sup>5</sup> Pero Pablo tontsanenacuestëtoná y íñeshoye chë mëtšcuaye tbontsantsatše y Pablo ndocá chenatanpasá. <sup>6</sup> Chë entsanga imojétsejuabnaye chábioye bochtsacuefshachá y nýe ndeolpe obaná yochjashajaye ca. Pero bën tonjanochnëngo y ndocá chenátanopasama chënga tmonjáninye ora, ya ndoñe cachcá quemëntëtsanjuabnaye y tmonjanontsé ichámuana Pablo canye dios inamna ca.

<sup>7</sup> Chentša béconana inamna chë luarentša mandayabe fshantsënga. Cha šonjanébuaja y corente tšabá šonjanacuedá, unga tentscuana. Chë taitana Publio ca inauabaina. <sup>8</sup> Chë tempo, Públiëbe taitá šocá jutsnéshañe inajájona, calentóracá y buíñeca buamachnëjuanánaca. Pablo tonjána cha jinýama y tonjánamashëngo; Bëngbe Bëtsábioye tbonjanimpadá y chë šocábeñe chabe cucuatšënga tonjanajó, y chca, cha shnaná enjétsatsmëna. <sup>9</sup> Chca tonjanopasá chentšana, chë luarentša inýe šoquënga Páblëbioye monjánajna y cha enjánashnaye. <sup>10</sup> Bëtscá tšabe soyënga chentše bëngbiama tmonjanma, y cachiñe játama ya chë barcuñe fsëntanenojayenga orna, lempe ntšamo bejaycá jama šonjanëjabotcá chënga šonjanatšatá.

### Pablo Romoye tojánashjango

<sup>11</sup> Chë fshantsentše mar béjayoca unga ishinýe fsënjéftsemna, y chentšana canye Alejandriocana yojanabá barcuñe fsënjanojayé; chë barco nyets uaftena tempo chë luarentše yojéftsamna y enjanabaina Cástor y Pólux ca, mo chë romanëngbe uta diosata catšatcá. <sup>12</sup> Chentšana, Siracusa bëts puebloye fsënjánashajna y chentše unga te fsënjéftsemna; <sup>13</sup> y chentšana fshantse béconana bejaycá fsënjána, Regio puebloye jashjanguentscuana. Yëfsana, tsmanoicana tsjuanoye enjétsëbinýiaye, y chca, chë inýe yëfsana Puteoli puebloye fsënjánashajna. <sup>14</sup> Chentše básefta Jesucristbeñe ošbuáchiyënga fsënjánanyëna, y šonjanébuaja chëngaftaca canye semana chentše jéftsajëtanama; y chentšana Romoye fsënjéftsanbocna. <sup>15</sup> Romoca Jesucristbeñe ošbuáchiyënga ya imojétsetatšëmbo bënga choye fchjanashajnama; chcasna, chënga tmonjánbocna bënga jajébenguama canye luare Foro del Apio y Unga Tabernënga ca uabainóntscóñe. Pablo chënga tonjánanyë ora, Bëngbe Bëtsá tbontanchuá y puerte añémoca enjésemna. <sup>16</sup> Romoye fsënjánashajna ora, soldadëngbe amëndayá Páblëbioye tbonjalesenciá cányabe yebnentše chaotsiyenama, y tonjanmandá canye soldado chabotsebojanýama.

### Ndayá Pablo Romoca tojanma

<sup>17</sup> Choye fsënjánashajnentšana unga tianoye, Pablo tonjanmandá chentše imnoyena judiënga más uámanënga chamobéconama; y nyetscanga ya tmonjánenefjna ora, cha tojanéyana: —Catšátanga judiënga, masque atše tondaye chiyatsma bënga judiënga mondbétsama soyëngama contra, ni bëngbe bëts taitanga imojanamana soyëngama contra, judiënga Jerusalemoca šmonjanishache y romanëngbe cucuatšifne šmonjánboshjona. <sup>18</sup> Chë romanënga lempe šmonjantjá chentšana, monjétsëboše atše jëtsboshjonana, er ndocna bacna soye chemátaninyëna atše jóbanama chašotsemnama. <sup>19</sup> Pero chë judiënga ndoñe quemtëtseboše atše chašmuatsboshjonama; chíyeca, šonjanotocá jáimpadana cach Romoca bëts uámana mandado cháuyana atše tšabá o ndoñe tianmama, masque atše tondaye quetsátsbomna, cach atšbe luarentša entsanga, judiëngbe contra jayanama. <sup>20</sup> Chíyeca, atše tcbonjúbuaja jányama y jáuyanama, er ndayama chë Israeloca entsanga puerte jtsošbuáchiyëse mondobátmanama, chë obanënga mochtayenama, atše mora utamená séntsemna ca —tojanéyana.

<sup>21</sup> Chora chënga tmojaniana: —Bënga ni mo canye tsbuanácha Judeocana fchiyatáyëngaca acbiama noticiëngaca, y ni canye catšata judío, chocana moye ashjajnënguentsá, ndocna bacna soye acbiama chešnatacuntá. <sup>22</sup> Bënga fsëntseboše jouenana ntšamo aca cojuabnama, er ntšamo Jesucristbe ustonëngbiama fstsetatšëmbcá, entsemna ana nyets luarenache chëngbe contra entsanga imojtsichamo ca.

<sup>23</sup> Asna, canÿe tescama Pablo tmojaniyana chca chaotsemnama; y chë tena, ba entšanga chë Pablo posada inabomnoye tmojanobeconá. Y cachëscana tojanjétanëntscuana, Pablo entšanga yojanëtsëtsná Bëngbe Bëtsabe amëndayama, ndayama cha ininÿe y inatátšëmbo; y yojtsentšena chënga jáyënjanama Jesúsbeñe chamotsošbuáchema, Moisesbe leyënguentša soyëngaca y Bëngbe Bëtsabe juabna oyebuambnayëngbe uabemana librëšangañe soyëngaca. <sup>24</sup> Báseftanga aíñe imojtsošbuáchiye ntšamo Pablo yojtsanëtsëtsnacá ndegombre bëtsemnama, pero ínÿengna ndoñe. <sup>25</sup> Nÿetscanga ndoñe cachcá montsanjuabnaye causa, tmojanontšé chentšana jésebocanana. As Pablo tojanéyana: “Nÿets razónaca chë Uámana Espiritu tšëngaftangbe taitanga tojanéyana, Bëngbe Bëtsabe juabna oyebuambnayá Isaíasbiajana, mëntšá:

<sup>26</sup> Motsa chë entšanga jauyanama:

‘Bëtscá šmochantsuenana, pero tondaye quemochátësertana;

tša šmochantsafšna, pero tondaye quemochátinÿe.

<sup>27</sup> Muentša entšanga ainánaca josértama ndoñe quemátsboše causa,

chënga nduauenanënga montsemna y nduabinÿnëgnaca;

chënga bomínÿeca ndoñe chamondobená jinÿama, ni chëngbe matscuašeca jouenama, ni chëngbe ainánaca josértama ndoñe chamondobená,

chca, atšbe benache ndoñe chamondishachama, atše ndoñe ntjätsebacama ca.’” <sup>28</sup> Pablo chora mëntšá tojanéyana: “Ndegombre šmochtsetátšëmbo,

cach quem Bëngbe Bëtsabe buayenana soyënga entšanga bacna soyënguentšana jätsebacama, chë ndoñe judiëngbioye mochanjábuayenaye, y ndegombre chënga cocayé aíñe mochanjóyeunaye ca.”

<sup>29</sup> (Pablo chca tojánayana ora, chë judiënga chentšana imojésebocana y tša imojtsenatsëtsnaye.)

<sup>30</sup> Pablo uta uata chentšë tonjanoquedá canÿe uántšamena yebnentšë; y nÿetscanga cha jauatsëtsayama monjánajnënga cha enjanëbuájajana.

<sup>31</sup> Nÿetscangbe delante puerte añémoca entšanga enjanabuayiná Bëngbe Bëtsabe amëndayama, y enjanabuatambá soyënga Bëngbe Utabná Jesucristbiam, y ndocna Romoca mandayá quebënjatanauyá chca jtsamama.

# Romanos

## Pablo Romoca ošbuáchiyënga jacheuayama

**1** Atše Pablo, Jesucristbe oservená, quem ts-buanácha sentsabiamná. Bëngbe Bëtsá šon-janchembo Jesucristbe ichmoná jtsemnama, y šonjan-bocacá chabe tšabe noticiëngama entsanga chayábuayenama.

<sup>2</sup> Ya bayté entsemna, Bëngbe Bëtsá chabe juabna oyeuambnayëngaftaca chë tšabe noticiënga entsanga tojanašebuachená, y chënga chca tmojëftsanábe-ma Bëngbe Bëtsabe uabemana palabrenguiñe. <sup>3-4</sup> Chë tšabe noticiëngna, chabe Uaquiñá Bëngbe Utabná Jesucristbiamna jtsóyeuambnayana. Entšá quetsomñe-cana, tojanonýná canye rey Davídbentša entsábentšana; pero chabe espíritu sempre uamanáyecna, Bëngbe Bëtsá chabe obenánaca entsanga tojaninýanýé Jesucristo chabe Uaquiñá bëtsemnama. Cha chca tojaninýanýé chë Uaquiñá cháuatayenama cha tojanma ora.

<sup>5</sup> Chábeyeca, Bëngbe Bëtsá atše canye bëts soyama šojanábuayana, Jesucristbe ichmoná jtsemnama, chabe soyëngama entsanga jábuayenama, y nyets luarënguenache Jesucristbeñe ošbuáchiyënga chamotsemnama, y chca, ntšamo cha yomandacá chënga chamotseyeunanama. <sup>6-7</sup> Tšëngaftángnaca chëngbeñe šmontsemna, tšëngaftanga chë Romoca šmoyenënga, ndëmuanýënga Bëngbe Bëtsá tcmojáchembo Jesucristbenga chašmotsemnama. Atše tšëngaftangbiama sentsabiamná, tšëngaftanga Bëngbe Bëtsabe bonshánënga y chabe entsanga chašmotsemnama chëmbonënga. Atše sentsaimpadana Bëngbe Bëtsá Bëngbe Taitá y Bëngbe Utabná Jesucristo, chaboma tšëngaftangbeñe tšabe bendicionënga chaotsemnama, y chaboma tšëngaftanga ainaniñe tšabe ebionana chašmotsebomnama.

## Pablo tša inaboše Roma bëts puebloye jama

<sup>8</sup> Jabojátšamna, Bëngbe Bëtsá, Jesucristbiajana šcuatschuá, cada ona tšëngaftanguentsabiama, er nyets quem luariñe entsanga tša monjesoyebuambná tšëngaftanga Jesucristbeñe bëtscá šmojtsošbuáchemma.

<sup>9</sup> Bëngbe Bëtsá, nda nyets ainánaca sëndëserveda, tšabe noticiënga chabe Uaquiñabiama abuayinayañe, endétatšëmbo atše nyets tempo Bëngbe Bëtsáftaca stsencuënta ora, tšëngaftangbiama sëndëtseimpadanama; <sup>10</sup> y mora Bëngbe Bëtsá sëntseimpadana, nýa mora y cha tojtsebošëse, chašolesenciá jama tšëngaftanga jautsëtsayama. <sup>11</sup> Er atše tša sënjëseboše

tšëngaftanga jányama, chca, atše chayobená jamama chë Uámana Espíritbentšana yóbocana tšabe soyënga tšëngaftanga chašmotsebomnama; y chca, tšëngaftanga ainaniñe bëts añemo chašmotsebomnama, y Jesucristbeñe corente chašmotsošbuáchemma; <sup>12</sup> o más tšabá jayanamna, tšëngaftanga y átšeftaca mochjenájabuache ainaniñe bëts añemo jtsebomnama, tšëngaftanga y átšnaca Jesucristbeñe tša imošbuachéyeca.

<sup>13</sup> Y morna, Jesucristbeyeca catšátanga, sëntseboše tšëngaftanga chašmotsetátšëmbo atše ba soye jama tijájuaboma, tšëngaftanga jautsëtsayama, pero méntsoñama ndoñe tsjobenaye. Atše sëntseboše ndayá chayobená jamana inýënga tšëngaftangbioca Jesucristbeñe chamotsošbuáchemma, ntšamo inýëngbeñe ndoñe judiëngbeñe tonjopasacá. <sup>14</sup> Atše Jesucristbiamna canye oservená sëndmëna, y chíyeca nyetscángaftaca obligaciónaca sëntsemna, chë publënguiñe oyenëngaftaca y bën tjoye oyenëngaftaca, chë uatsjinýenëngaftaca y ndoñe chcangaftácnaca. <sup>15</sup> Chíyeca atše tša sëntseboše tšëngaftanga chë Romoca šmoyenëngnaca chë tšabe noticiënga jábuayenama.

## Chë tšabe noticiënga Bëngbe Bëtsabe obenana jtsinýanýayana

<sup>16</sup> Atše ndoñe quetsátëuatja chë tšabe noticiënga jtsabuayinayama, er chë noticiënga jtsinýanýayana Bëngbe Bëtsabe obenana; y chë obenánaca, nyetscanga Jesucristbeñe ošbuáchiyënga jtsobenana atsebácanënga jtsemnama, natsana chë judiënga chca ošbuáchiyënga, pero chë ndoñe judiëngnaca. <sup>17</sup> Er chë tšabe noticiënga jtsinýanýayana ntšamo Bëngbe Bëtsá inétsama entsanga chabe bominyiñe tšábënga chamotsemnama. Y entsanga chabe bominyiñe tšábënga jábiamana, chënga Jesucristbeñe tmojtsošbuáchemma. Ntšamo Bëngbe Bëtsabe uabemana palabrenguiñe endayanca: "Nyë ndabiama Bëngbe Bëtsá tojama chabe bominyiñe tšabia chaotsemnama, cha Bëngbe Bëtsábeñe betsošbuáchemma, cha ndegombre chë nyetsca tescama yomna tšabe vida echántsebomna ca."

## Bëngbe Bëtsabe delante nyetscanga culpa bomnënga mondmëna

<sup>18</sup> Bëngbe Bëtsá celocana tojinýanýé, chë uabouana castigo, tša tbojetnama entsangbiama chaotsemnama, ainaniñe bacna juabnënga bomnëngbiama y chë bacna soyënga amëngbiama y ndëmuanýëngbiama,

masque Bëngbe Bëtsabe ndegombre soyënga jtsotat-šëmbñana, tša bacna soyënga tmojtsama causa, ndoñe ntjalesénciana cachënga jtsiyenama ntšamo ndegombre yomncá. <sup>19</sup> Bëngbe Bëtsá echanjácastigaye, er ntšamo entšanga imobencá Bëngbe Bëtsabiamatsetatšëmbuama soye, chëngaftaca sempre endétsemna. Y chca endmëna, Bëngbe Bëtsá chë soye tojinñanyëyeca. <sup>20</sup> Bëngbe Bëtsá quem luare tojanma orscana, entšanga mondetsobena botamana josértana, Bëngbe Bëtsabe obenana ndocna te yochjëft-sopochócama y cha ndegombre Bëngbe Bëtsá yomnama. Chë soyënga Bëngbe Bëtsabiamatsetatšëmbuama quemátobena jinñana; nÿe jtsetatšëmbuamna aíñe. Entšanga mondobena chë soyënga Bëngbe Bëtsabiamatsetatšëmbuana, cachá tojanma soyëngaca. Chcasna, chënga ndoñe quemátobena jayanana bacna soye tmojama, cha nduabatma causa ca. <sup>21</sup> Chënga Bëngbe Bëtsabiamatsetatšëmbuama, pero ndoñe ntsebošana chábioye jadórana, “aca ndegombre Bëngbe Bëtsá condmëna ca” jtsichámëse, ni cha ntsatschuanayana. Pero, ntšamo chënga tmojtsejuabnacá tondaye ntsámanana; ndoservena juabnéngaca y bacna juabnéngaca montsiyena, y chca, chënga montsiyena, jtsamëse ntšamo cachëngbe juabnénga yomncá, mo ibetiñe cuafstajncá. <sup>22</sup> Chënga jtsichámua corente osertánënga imomna ca, pero ndegombrna juabna ndobomnénga mondmëna. <sup>23</sup> Chënga ndoñe ntsadoránana Bëngbe Bëtsá, chë ndocna te yochjëft-sobaná; chë cuenta, soyënga tmojobopormá mo entšangcá, y chëngna aíñe jóbana; o soyënga shloftšëngcá o bayëngcá, o osojnáyëngcá, y chënga diosënga imomna ca jtsejuabnayëse jtsadoránana.

<sup>24</sup> Chiyeca, Bëngbe Bëtsá cachcá tojónya, cachëngbe ainaniñe puerte bacna juabnéngaca mandánënga chamotsiyenama, y chca, bacna soyëngnaca ínÿengaftaca imojtsama; chë soyëngamna jtsëuatjana chënga entsamna. <sup>25</sup> Chënga chca jtsemnana, er ndoñe tmonjábosëna Bëngbe Bëtsabe ndegombre soyënguiñe jtsosbuáchiyana, pero chë ndoñe ndegombre soyënguiñe cocayé jtsosbuáchiyana; chënga jtsadoránana y jtseservénana, Bëngbe Bëtsá quem luarentse tojama soyënga; pero ndoñe ntsadoránana, ni ntseservénana cach Bëngbe Bëtsá, chë nÿetsca chë soyënga tojanmá. Entšanga nÿets tempo cha chamotsatschuaná. Chca chaotsemna.

<sup>26</sup> Entšanga chca ndoñe tšabá tmonjámayeca, Bëngbe Bëtsá cachcá tojónya, chënga ínÿengaftaca bacna soyënga jtsamama chamotsebošama; chë soyëngamna jtsëuatjana chënga entsamna. Y chca, chë shembásëngnaca tmojtsajbaná boyabásëngaftaca jtsamana ntšamo tšabá yomncá, inÿe shembásëngaftaca bacna soyënga jtsamama. <sup>27</sup> Cachcá, boyabásënga tmojtsajbaná shembásëngaftaca jtsamana ntšamo tšabá yomncá; y tša imojtseboše inÿe boyabásëngaftaca bacna soyënga jtsamama. Chënga chë inÿe boyabásëngaftaca bacna soyënga imojtsama causa, entsamna jtsëuatjana, y chë soyëngama castigánënga mochántsemna, cachëngbe cuerpënguiñe

jasúfriase, ntšamo chëngbe bacna soyëngama yojtsëmerecencá.

<sup>28</sup> Chënga ndoñe tmonjábosëna jtsiyenana jtsejuabnayëse, ntšamo entšanga Bëngbe Bëtsabiamatsetatšëmbcá ndegombre bëtsemnama. Chiyeca Bëngbe Bëtsá cachcá tojónya, cachëngbe ndbëmana juábnaca chamotsiyenama; y chca, chënga ba soyënga jtsamana, jamama ndoñe yontsamncá. <sup>29</sup> Chënga nÿetscna bacna soye jtsamana: ainaniñe nÿetscna bacna juabna jtsebomnana, nÿe cachëngbiama bëtscá soyënga jtsebomnana tša jésebošana, y ínÿengbioye ntšámncá jáborlama jtsebošana; chënga nÿe játsbošana inÿa tojtsebomna soyënga jtsebomnana, ínÿenga jtsëbánayana. Mondmëna penzentserënga, ínÿenga áingñayënga, puerte bacna soyënga ínÿengbiama bošënga, y uayátsenayënga. <sup>30</sup> Chënga ínÿengbiama podesca jtsóyebuambnayana, Bëngbe Bëtsá jtsáyayana, ínÿenga jtsóyanguayana, nÿe cachëngbe soyënga más iuámana ca jésejuabnayana, tša jtsenábotamnayana, jésejuabnayana ntšamo muanjobenaye más bacna soyënga jamana; chëngbe bëtšétsangbioye ndoñe ntsayaunanana. <sup>31</sup> Chënga ndoñe ntsebošana chë tšabe soyëngama chaósertama, tondayama palabra ndobomnénga, ndocnábioye ntsebobonshánana y ndocnabiamatjóngmiana. <sup>32</sup> Y chënga corente mondtatšëmbu chca soyënga amëngbiama, Bëngbe Bëtsá chabe leyíñe tojayana jóbana yojtsëmerecena ca; pero masque chca, chënga nÿets tempo chca jtsamana, y oyejuayënga jtsénayana ínÿenga cachcá tmojtsama ora.

**Bëngbe Bëtsá echanjama chë ndoñe tšabe soye amënga bëtscastigo chamotsebomnana**

**2** Chcasna tšëngaftanga, chë ínÿenga ndoñe tšabá montsama ca šmojtsichámënga, ndoñe quešmatobena jayanana ndáyeca chca cach tšëngaftanga šmojmama soyëngama. Tšëngaftanga chca ínÿengbiama šmojtsichamo ora, jtsinñanyayana cach tšëngaftangnaca ndoñe tšabá šmonjamama, y castigánënga jtsemnana cmontsamna, er tšëngaftanga cachëngcá šmojtsiyena. <sup>2</sup> Bënga mondtatšëmbu, Bëngbe Bëtsá ntšamo ndegombre yomncá inétsamama, chë chca amëngbiama ndoñe tšabá tmonjama ca y castigánënga jtsemnana yojtsamna ca cha tojayana ora. <sup>3</sup> Y tšëngaftanga, chë ínÿenga ndoñe tšabá montsama ca šmojtsichámënga, y cachca soyënga šmojtsama, ¿šmojtsajuabná Bëngbe Bëtsabe castigüentšana šmochjotsbocá ca? <sup>4</sup> Bëngbe Bëtsá tšëngaftangbiama corente tšabe juabna endbomna; mora ndoñe quecmátacastigaye, y tšëngaftangftacna puerte uantado nÿe chca endétsemna. ¿Chama tšëngaftanga cha šmojtsábotena? ¿Ndoñe šmondátšëmbu Bëngbe Bëtsá chca corente jtsababuánÿeshanëse cmojtsénya, tšëngaftanga juabna chašmotrocama y chabe benache chašmuishachama cha yobóseyeca? <sup>5</sup> Er tšëngaftanga ndoñe quešmátsboše chacmotsësertánama, y bacna soyënga amama jtsajbanama ndoñe quešmátsboše causa, šmontsama más bëtscastigo chašmotsebom-

nama, chë ndayté Bëngbe Bëtsá ntšamo entsanga tmojamcá tšabá o ndoñe tšabá bétsemnama yochjayana ora; chë te, Bëngbe Bëtsá echanjamánda chë ndoñe tšabe soye amënga bëtš castigo chamotsebomnama, y chë tšabe soye amëngna, uacanana soye; y chca echanjama ntšamo ndegombre yomncá, y echanjínñanñiye cha tša tbojetna, entsanga ndoñe tšabá tmonjamama. <sup>6</sup> Chca, chë te, ntšamo cada ona tojéftsemama, Bëngbe Bëtsábentšana echanjójyëngacñe. <sup>7</sup> Ndëmuanñyënga nyets tempo tšabá jtsamëse imoyena, y chca imonguá Bëngbe Bëtsá más uámanënga chauabiama, cha chëngbiama tšabá chaotsoyebuambná y tšabe vida jtsebomnama chaoma; chë te chëngbiama Bëngbe Bëtsá echanjama, chë nyetsca tescama yomna tšabe vida chamotsebomnama. <sup>8</sup> Inñyënga imoyena, nyë cachëngbe juabnéngaca cachënga tšabá jtsomñiama; y ntšamo ndegombre tšabá yomncá tmojtsaboté, ntšamo ndoñe tšabá yomncá jtsamama. Y Bëngbe Bëtsá chë te, ndoñe tšabá tmonjéftsobuachjanguamna puerte etonaná echanjayana nyetsca tescama castigánënga jtsemnana chënga yojtsamna ca. <sup>9</sup> Bëngbe Bëtsá echanjama, chca amëngna puerte chamosufrima y lastemcá chëngbiama chaotsemnana, er yapa tsetšénana chëngbiama echanjéftsemna; chca echántsemna chë chcángbeñe judiënga imomnëngbiama natsana, y ndoñe judiëngbiámna. <sup>10</sup> Pero chë te, Bëngbe Bëtsá echanjama, ntšamo tšabá yomncá amëngna puerte uámanënga chamotsemnana, chëngbiama corente tšabá echanjójyëbuambaye, y echanjama chënga cháftaca tšabá tempcá chamotsatsmënama; y chca echántsemna chë chcángbeñe judiënga imomnëngbiama natsana, pero ndoñe judiëngbiámna.

<sup>11</sup> Er Bëngbe Bëtsabiama nyetscanga cachcá monduámana. <sup>12</sup> Chë Moisesbe ley ndoñe monduábomnënga, bacna soye tmojamamna castigo mochántsebomna, masque leyënga ndoñe tmonduábomnëse, ndayá yojtsamna jamama chaúyanama; y chë Moisesbe leyënga imuabomnëngbiamna, bacna soye tmojamama, Bëngbe Bëtsá echanjayana chënga ndoñe tšabá tmonjama ca y castigo chamotsebomna ca, chë leyënguiñe iuayana soyëngaca. <sup>13</sup> Chca endmëna, er Bëngbe Bëtsá ndoñe queonñbatsma entsanga chabe bominiñiñe tšábënga chamotsemnana, nyë ntšamo chë leyiñe iuayancá tmojtsuenanama, sinó ntšamo leyënguiñe iuayancá, ndayá jamama yojtsamncá tmojtsamëse. <sup>14</sup> Chë ndoñe judiënga chca leyënga ndoñe quematábomna, pero chëngbe ainanentša juabnénga tojtsëtsësná ndayánaca jamana, y ndayá chamotsamama ntšamo chë leyënguiñe tomandancá chënga tmojamëse, chënga jtsinñanñayana tšabá imotátšëmbo ndayá aíñe o ndoñe inétsamna jamama, masque leyënga ndoñe tmonduábomnëse, ndayá yojtsamna jamama chaúyanama. <sup>15</sup> Ntšamo tmojtsiyencá chënga jtsinñanñayana, ndayá leyiñe yomandánama chënga ainaniñe cachcá imojuabnama. Ntšamo chënga ainaniñe imotátšëmbo y imojuabnacá ndayá cachënga tmojamama, jtsinñanñayana chënga ntšamo chë ley-

iñe yomandánama cachcá imojuabnama. Inñe ora, chëngbe juabnénga echantsëtsësnaye aíñe o ndoñe tšabá tmonjama ca; y ndayté, Bëngbe Bëtsá nyetscangbiama ntšamo tmojamama yochjayana ora, cachëngbe ainaniñe tmojajuabó soyëngaca, cha echanjínñanñiye ndayá tšabá o ndoñe tšabá tmonjamama. <sup>16</sup> Chë te, Bëngbe Bëtsá nyetscangbiama echanjayana chëngbe juabnéngama y ntšamo tmojamama, ndayá entsanga tempo ndoñe tmonjáninñyama; cha chca echanjama Jesucrístoftaca; y chë atše sëndabuayinñá tšabe noticiënga entsichamo ndegombre chca yochtsemnama.

### Judiënga y Moisesbe ley

<sup>17</sup> Y mora tšëngaftangbiama, chë judiënga šmomna ca ichámënga, y tša šmojtsejuabná Moisesbe léyeca tšëngaftanga tšabe vida jtsebomnama, y jtsenábotamnyana Bëngbe Bëtsabe ubuáyana entsanga šmomna ca; <sup>18</sup> tšëngaftanga chë ntšamo Bëngbe Bëtsá yobošcá tšëngaftanga chašmotsamama tatsëmbënga, y chë leyentšana šmojuatsjinñe jobocacayana ndayá más tšabá jamama tojtsamncá. <sup>19</sup> Tšëngaftanga tša jësejuabnayana, šmobena inñyënga chë ntšamo tšëngaftanga cmësertancá ndosertánënga jujabuáchama ca, mo jtanënga unachayënga cuaftsemnëngcá, o mo chë ndoñe binñiñcá oyenëngbe juabnénga binñyayëngcá; <sup>20</sup> tšëngaftanga jtsejuabnayana chë ntšamo tšabá yomncá ndosertánëngbiama abuayinñayënga šmomna ca, y mo chë basengcá tondaye nduatšjñyëngbiama abuátambayënga ca. Tšëngaftanga tša jësejuabnayana chë ley šmobomnama, lempe šmotátšëmbo ca y ntšamo šmojtsichamcá ndegombre yojtsemna ca. <sup>21</sup> Y chcasna, tšëngaftanga chë inñyënga abuátambayënga, ¿ndáyeca ndoñe cach tšëngaftanga šmondëtsánatsana? Tšëngaftanga inñyëngbioye jtsabuayinñayana ndoñe chamondëtsatbëbanama; as, ¿ndáyeca cach tšëngaftanga šmnëtsatbëbana? <sup>22</sup> Tšëngaftanga jtsichámuana, acbe shema o boyábioye ndoñe inñyáftaca cattseíngñaye ca; as, ¿ndáyeca tšëngaftanga cachcá šmnëtsama? Tšëngaftanga jtsáboyënjana soyënga chë ndayama inñyënga tmojtsichamo diosënga yomna ca y jtsadóraryana; as, ¿ndáyeca chë soyënga chënga jadórama yebnënguentšana uámana soyënga šmnëtsatbëbana? <sup>23</sup> Tšëngaftanga tša jtsenábotamnyana chë ley šmobomnama; as, ¿ndáyeca šmonñbëtsama inñyënga Bëngbe Bëtsabiama podesca chamotsóyëbuambnama, tšëngaftanga chë leyentšá mandënga jobedësama ndocna te ntsebošana causa? <sup>24</sup> Chama, Bëngbe Bëtsabe uabemana palabrenguiñe mëntšá endayana: “Tšëngaftanga judiëngbe causa, ndoñe judiëngbeñe Bëngbe Bëtsabiama ndoñe tšabá quematoyebuambná ca.”

<sup>25</sup> Tšëngaftanga ntšamo leyiñe yomandancá šmojtsamëse, Bëngbe Bëtsábënga šmomnama jinñanñiyama, chë más delicadentše base bobachtema tëtšëñënga jtsemnana tšabá nántsemna; pero ntšamo chiñe tomandancá ndoñe šmontsamëse, chca tëtšëñënga jtsemnana, tondayama ntoservëñana, y chca, tšën-



gaftanga jtsemnana mo chë más delicadentše base bobachtema ndëtëtšenëngcá. <sup>26</sup> Y chë ndoñe judiënga chë más delicadentše base bobachtema tëtšenënga, judiëngcá ndoñe quemátsmëna; pero chënga ntšamo leyiñe yomandancá tmojtsamëse, ndegombre Bëngbe Bëtsá chënga echanjúbuaja mo cachabe entšangcá. <sup>27</sup> Y chca, tšëngaftanga judiëngbiama Bëngbe Bëtsá echanjayana ndoñe tšabá šmonjama ca, ntšamo leyiñe yomandancá ndoñe šmontsama causa. Cha chca echanjama, er bëtscá ndoñe judiënga mondmëna y chënga ntšamo leyiñe yomandancá mondocumplina, pero chënga ndoñe quemátsmëna tšëngaftangcá tëtšenënga, jtsinýnama Bëngbe Bëtsábënga šmomnana. Tšëngaftanga, masque Bëngbe Bëtsabe uabemana ley šmonduábomna y chë más delicadentše base bobachtema tëtšenënga šmondmëna, cabá ndoñe šmontsama ntšamo leyiñe iuayancá, ndayá jamama cmojtsamnama.

<sup>28</sup> Chcasna, nda chë más delicadentše base bobachtema tmojatëtše ora, chábioye chë soye ndoñe ntjábemana canýe ndegombre judío. Y canýe entšá ndoñe Bëngbe Bëtsábia ntsemnana nýe ínýenga chë más delicadentše base bobachtema tmojatëtšama. <sup>29</sup> Y canýe entšá ndegombre judío jtsemnana, ntšamo chabe ainaniñe tomncá, cha Bëngbe Bëtsabe entšá yomnama tojtsinýanýnase. Y chca, canýe ndegombre judío, Bëngbe Bëtsabe entšá yomnama chaotsinýnamna ndoñe quenátsmëna chë más delicadentše base bobachtema jtsetëtšenana, sinó ntšamo Bëngbe Bëtsá tojamcá chabe ainaniñe chaotsebínýnama. Bëngbe Bëtsabe Espíritu jamana entšá chca ainana chaotsebomnana, ndayá inétsinýanýnaye cha canýe ndegombre judío yomnama; y chë uabemana ley ndoñe quenátobena chca jamana. Bëngbe Bëtsá endmëna chë tšabe soye entšabiama ichamuá; entšanga ndoñe.

**3** Chcase, ndánaca šuatjatjaye, as ¿Bëngbe Bëtsabe entšá jtsemnana jëftsasháchama, más tšabá yojtsemna canýe judío jtsemnana ca? ¿Base bobachtema chë más delicadentše tëtšená jtsemnana becá yojtsámana ca? <sup>2</sup> Aíñe, chca jtsemnana corente enduámana y nýetsca soyënguiñe; natsana chjayana, Bëngbe Bëtsá, judiënga chabe palabra tojanabanýe, nýetscangbiama chamotsinýenama. <sup>3</sup> Y morna, ¿ndayá yochjopása nderado judiënguentše báseftanga ya ndoñe chca tmontsentšënëse? Y chë causa, ¿Bëngbe Bëtsánaca yochtsajbaná ntšamo tojašebuachenacá amana? <sup>4</sup> ¡Ndoñe, ndegombre ndoñe! Chca ndoñe cha queochatsma; tšëngaftanga šmondétatšëmbo Bëngbe Bëtsá sempre endbëtsama ndayá jamama tojašebuachenacá, masque nýetsca entšanga bosterënga chamotsomñe. Er Bëngbe Bëtsabe uabemana palabrenguiñe Bëngbe Bëtsabiama mëntšá endayana:

Aca ntšamo chacojayana ora, nýetscanga mochanjinye aca ntšamo ndegombre yomncá cnétsamama; y chacojtsenëuyaná ora, sempre cochanjínýanýiye acbe contra tmojtsoyebuambnángbioye, chënga ndoñe tšabá montsamama ca.

<sup>5</sup> Pero bënga ndoñe tšabe soye montsama ca báseftanga tmojayana ora, Bëngbe Bëtsá sempre tšabá inétsamama entšanga más tšabá jinýama tmojtsobenëse, ¿ntšamo bënga mochjayana? ¿Bënga imojtsobena jayanana Bëngbe Bëtsá ndoñe tšabá tonjama ca, bëngbiama castigo chaotsemna ca cha tojayana ora? (Morna atše sëntsoyebuambná ntšamo entšanga jóyebuambayama monduamancá.) <sup>6</sup> ¡Ndoñe, ndegombre ndoñe! Ndoñe quemuátobena chca jayanama. Bëngbe Bëtsá nýets tempo ntšamo ndegombre yomncá ndoñe tontsamëse, ndegombre cha ndoñe nanjobenaye jayanama nýetsca quem luarentša entšangbiama, ntšamo tmojamcá tšabá o ndoñe tšabá bëtsemnana.

<sup>7</sup> Nderado nda tojayana: “Atše ndaye bacna soye stjama y ndoñe ntšamo ndegombre yomncá tojtsemna, y chë soye tojoservé Bëngbe Bëtsá puerte uamaná y bëtšá yomnama jinýanýiyama, y Bëngbe Bëtsá sempre ntšamo ndegombre yomncá tojtsamama jinýama entšanga tmojtsobenëse, ¿ndáyeca Bëngbe Bëtsá cabá iuichamo ntšamo atše tijamcá ndoñe tšabá yontsemna ca y atše canýe bacna soye amá stsemna ca?” <sup>8</sup> Y chcase, ndánaca mëntšá nanjátayana: “Ntšamo ndoñe tšabá yondmëncá mochjama, chca, entšanga chámuiñe Bëngbe Bëtsá puerte tšabia yomnama ca.” Ndegombre, atše mal jaquédama báseftanga tmojayana atše chca stsabuatambá ca; Bëngbe Bëtsá chca abuatambayënga echanjácastigaye, ntšamo castigánënga jtsemnana imomerecencá.

#### Ntšamo entšá tojtsamama, Bëngbe Bëtsabe bominýiñe ndocná tšabia ntsemnana

<sup>9</sup> Y asna, ¿Bëngbe Bëtsá bënga judiënga ínýengbiama más tšabá šonýa? ¡Ndoñe, ndegombre ndoñe! Atše ya sënjinýinýe judiënga y ndoñe judiëngnaca, chë bacna soyënga jamama juabnéngaca mandánënga imomnana. <sup>10</sup> Er Bëngbe Bëtsabe uabemana palabrenguiñe mëntšá endayana:

Ntšamo entšá tojtsamama, ndocná Bëngbe Bëtsabe bominýiñe tšabia quenátsmëna.

¡Ndoñe, ndegombre ndoñe, ni mo canýa chca quenátsmëna!

<sup>11</sup> Ndocná quenátsmëna ntšamo ndegombre yomncá chabotsosertánama;

¡Ndocná quenátsmëna nda chaotseboše Bëngbe Bëtsáftaca jtsemnana!

<sup>12</sup> Nýetscanga ndoñe tšabe benache tmojishache y chiñe montsajna.

Chënga nýetscanga Bëngbe Bëtsabe bominýiñe tondayama quemátoserverna.

Ndocná quenátsmëna ntšamo tšabá yomncá chaot-samama, ¡ni canýa ndoñe!

<sup>13</sup> Ntšamo tmojtsichamcá puerte bëtš bacna soye jtsemnana, mo canýe obanabe cuevëshe atëfjnëshe puerte bacá tojtsonguëtšecá.

Chënga tmojtsoyebuambná soyëngaca ínýengbioye jtsaíngñayana.

Chë tmojtsichamo soyéngaca puerte bacna soye ínÿengbiama jtsamana, mo canÿe mëtšcuaye tbojt-seftëtše orcá, chë veneno canÿe entšábioye jóbana.

<sup>14</sup> Chënga, nÿets tempo ínÿengbiama podescá jtsichá-muana, y sempre jtsóyebuambnayana chë ínÿenga ntšámnaca jáborlama.

<sup>15</sup> Sempre jtseprontánana ínÿengbioye ntšámnaca jáborlama y jobáyama.

<sup>16</sup> Chënga sempre jtsiyenana ínÿenga chamotsesufrí-nama jtsamése, y nÿe ntšámnaca jtsaborlánana.

<sup>17</sup> Chënga ndocna te tondaye ntjamana nÿetscanga natjémbana chamotsiyenama;

<sup>18</sup> Chënga ndoñe ntsiyenana Bëngbe Bëtsabiama jtse-juabnayése, cha chë más bëtšá nÿetscangbiama yomna ca —chiñe endayana.

<sup>19</sup> Er bënga mondétatšëmbo, lempe ntšamo leyíñe iuabemancá, chë leyéngaca mandánënga imoyenëng-biama yomna. Chcasna, chë ley endmëna, Bëngbe Bëtsabe delante ndocná chaondobená jayanama, cha ndoñe tšabá tonjama, chama ndoñe yonjátatšëmbo causa ca; y endmëna jinÿanÿiyama, ntšamo tmojamcá tšabá o ndoñe tšabá bëtsemnana Bëngbe Bëtsá nÿetscangbiama yochjayana ora, nÿetscanga yojtsam-na chabe delante jayanama, ndáyeca ntšamo tšabá yomncá ndoñe tmonjama ca. <sup>20</sup> Er, Bëngbe Bëtsá ndoñe queochatsma ndocná chabe bominÿiñe tšabia chaotsemna, ntšamo leyíñe yomandancá cha tojama-ma; chë ley bëngbiama jamana, nÿe bënga bacna soye tmojamama chamotsetatšëmbuama.

#### Ntšamo Bëngbe Bëtsá inama entšanga chabe bominÿiñe tšábënga chamotsemnana

<sup>21</sup> Pero mora, Bëngbe Bëtsá tonjinÿanÿé ntšamo cha inama entšanga tšábënga chabe bominÿiñe chamotsemnana; y Bëngbe Bëtsá ndoñe ntjamana canÿa chabe bominÿiñe tšabia chaotsemnana, ntšamo ibomncá cha tojtsamama, ntšamo chë leyënguiñe y mandënguiñe yomncá. Pero masque mora chca, Bëngbe Bëtsá tonjinÿanÿé, Moisesbe leyíñe y Bëngbe Bëtsabe juabna oyebuambnayëngbe librëšangañe yopodena jinÿenana chca yochtsemnana. <sup>22</sup> Bëngbe Bëtsá jamana entšanga chabe bominÿiñe tšábënga chamotsemnana, chënga Jesucristbeñe tmojt-sošbuáchemá. Bëngbe Bëtsá nÿetscanga Crístbeñe os-buáchiyëngbiama chca jamana, y chabiama nÿetscanga cachcá monduámána; <sup>23</sup> er nÿetscanga bacna soye tmojama, y chë causa, ndocna entšá tonjobená jashjáchana ndocna bacna soye ndbomná jtsemnana y puerte bëtšá jtsemnana, ntšamo Bëngbe Bëtsá to-janjuabocá entšanga chamotsemnana. <sup>24</sup> Pero Bëngbe Bëtsá chëngbiama corente tšabe juabna bóm-nayeca, mo ndayá cuafjatšatacá, cha jamana chënga chabe bominÿiñe tšábënga chamotsemnana. Bëngbe Bëtsá chca tojanma, Cristo Jesúsbeñe, entšanga at-sebácanënga chamotsemnana y ya ndoñe más bacna soyënga jamama juabnéngaca mandánënga cha-mondëtsemnana cha tojanma ora. <sup>25</sup> Bëngbe Bëtsá cha tbojanábuayana, chabe buiñe juabuáshanëse y

jóbanëse, cha chaotsemna ndábeyeca Bëngbe Bëtsá entšanga bacna soyëngama jáperdonama; Jesucrist-beñe jtsošbuáchiyëse entšanga jobenayana per-donánënga jtsemnana. Bëngbe Bëtsá chca tojanma, jinÿanÿiyama cha inétsama entšanga tšábënga chabe bominÿiñe chamotsemnana, chë entšanga bacna soyënga tmojanmama chë tempo ntjatonÿaycá, er cha chë tempo corente uantado chëngaftaca yojtsemna y chëngbe bacna soyëngama ndoñe yonjánacastigaye. <sup>26</sup> Cha lempe chca tojanma, jinÿanÿiyama cha sempre ntšamo ndegombre yomncá inétsamama, y nÿetscanga Jesucristbeñe ošbuáchiyënga chabe bominÿiñe tšábënga chamotsemnana inétsamama.

<sup>27</sup> Chcáyeca, entšá ndoñe ntsobenana tondayama ntsenábotamnayana. Chca endmëna, er Bëngbe Bëtsá tšabia chabe bominÿiñe jabemana, ndoñe ntšamo ley-iñe tomandancá cha tojtsamama, sinó nÿe Jesucrist-beñe tojtsosbuáchemá. <sup>28</sup> Y chca jayanëse, mora bën-ga tšabá montsetatšëmbo, Bëngbe Bëtsá inétsama canÿe entšá tšabia chabe bominÿiñe chaotsemnana, nÿe Jesucristbeñe tojtsosbuáchemá, y ndoñe ntšamo leyíñe yomandancá cha tojtsamama.

<sup>29</sup> ¿O Bëngbe Bëtsá nÿe judiëngbe Bëtsá yomna? ¿Ndoñe judiëngbe Bëtsánaca cha ndoñe yondmëna? Aíñe, chëngbe Bëtsánaca cha endmëna; <sup>30</sup> er nÿe canÿe Bëtsá nÿetscangbiama endmëna, y cha echanja-ma chë más delicadentšë base bobachtëna tëtšënëng-ga imomnëngbiama y ndoñe chcangbiámnaca, chabe bominÿiñe tšábënga chamotsemnana, Jesucristbeñe tmojtsošbuáchemá. <sup>31</sup> Chcasna, Bëngbe Bëtsá jamana entšanga chabe bominÿiñe tšábënga chamotsemna-ma, Jesucristbeñe tmojtsošbuáchemá; ¿chca yojt-sayana chë ley nÿe tondayama yondoservena ca? ¡Ndoñe, ndegombre ndoñe! Inÿetšá, chca jamana chë ley más chaotsámanama.

#### Ntšamo Abrahánofraca tojanopasá

**4** Morna Abrahambiana mochjóyebuambaye, bëngbe tempsca bëtš taitá, y mochjinÿe ndayá to-jánatsjinÿe Bëngbe Bëtsábeñe ošbuáchiyana bom-nentšana. <sup>2</sup> Abraham chabe bominÿiñe tšabia chaotsemnana, ndayá cha tojanmama Bëngbe Bëtsá matëñjanmëse, cha matëñjanobená entšángbeñe ndayama jtsenábotamnayana, pero Bëngbe Bëtsabe delante ndoñe; <sup>3</sup> er Bëngbe Bëtsabe uabemana pal-abrënguiñe mëntšá endayana: “Abraham, Bëngbe Bët-sábeñe yojtsosbuáchiye, y chíyeca Bëngbe Bëtsá ton-jánayana cha chabe bominÿiñe tšabia yojamna ca.”

<sup>4</sup> Canÿe entšá trabajayá, crocénana josháchiñana ndayá tojamama, pero chë crocénana ndoñe nÿe tšetanana ntsemnana, sinó chana jtsemnana ntšamo cha tojtsomerecencá. <sup>5</sup> Er menójuabonga, nda tondaye tontsama Bëngbe Bëtsá cháuyanama cha chabe bominÿiñe tšabia yomna ca, pero aíñe tojtsosbuaché Bëngbe Bëtsábeñe, nda endbáyana chë bacna soye tmojamënga mora mo ndoñe chca cuafjamcá chamotsemna ca, chabiama Bëngbe Bëtsá echanjama chabe bominÿiñe tšabia chaotsemnana, chabe ošbuáchiya-

ma. <sup>6</sup> Rey David cachcá chabe librésañe tojánayana, chë ndabiama Bëngbe Bëtsá jayanana chabe bominiñiñe tšabia chaotsemna ca, masque chabiama chca cháuayanama tondaye tonjamëse. David chca entšabiama tojánayana, cha puerte echantsoyejuaye ca.

<sup>7</sup> Chabe librésañe mëntšá tojanábema:

¡Tša oyejuayënga jtsemnana chë Bëngbe Bëtsá chëngbe bacna soyënga tojáperdonanga, chë Bëngbe Bëtsá chëngbe bacna soyënga tojabuajuánanga!

<sup>8</sup> ¡Puerte oyejuayá jtsemnana chë Bëngbe Bëtsá mo ndoñe bacna soye cuafjama cuenta tbojtsonyá cha ca!

<sup>9</sup> ¿David tojánayana nye chë más delicadentse base bobachtema tëtšenënga imomnëngbiama oyejuayana yomna ca? Ndoñe; ndoñe chca mondmëñëngbiám-naca. Y muentse tmonjayana, Abraham Bëngbe Bëtsábeñe yojtsošbuachëyeca, Bëngbe Bëtsá tojánayana cha chabe bominiñiñe tšabia yojamna ca. <sup>10</sup> Y ¿ntseco chca tojanopasá? ¿Abraham ya chë más delicadentse base bobachtema tëtšená yojtsemna ora, o cabá ndoñe chca yontsemna ora? Ndegombre, Abraham cabá ndoñe chca tëtšená yontsemna ora. <sup>11</sup> Y cabá chentšana, Abraham base bobachtema chë más delicadentse tëtšená yojtsemna; y chca yojamna jinñanyiyama, Bëngbe Bëtsá tempo ya chabiama tojánayana cha chabe bominiñiñe tšabia yojamna ca, cha Bëngbe Bëtsábeñe yojtsošbuáchema. Lempe chca tojanopasá, jinñanyiyama Abraham mo taitacá yomna Bëngbe Bëtsábeñe imošbuachëngbiama, masque ndoñe base bobachtema chë más delicadentse tëtšenënga mondmëna. Y cachcá Bëngbe Bëtsá chë osbuáchiyëngbiama tojánayana, chënga chabe bominiñiñe tšábënga imomna ca. <sup>12</sup> Y Abrahámnaca endmëna mo chë taitacá, chë más delicadentse base bobachtema tëtšenënga imomnëngbiama, pero aíñe Bëngbe Bëtsábeñe corente jtsošbuáchiyëse imoyenëngbiama, cachcá ntšamo bëngbe bët taitá Abraham Bëngbe Bëtsábeñe yojtsošbuachëcá. Y cha cabá chë más delicadentse base bobachtema ntsetëtšëna ora, ya chca yojtsošbuáchiyë.

#### Jtsošbuáchiyëse, ntšamo Bëngbe Bëtsá tojašebuachenacá jóshjanguana

<sup>13</sup> Bëngbe Bëtsá tojanašebuachená Abrahambiana y chábentšana entšangbiama, quem luare chëngbiama yochjéftsemna ca. Y chca tojanašebuachená, ndoñe Abraham ntšamo leyiñe yomandancá betsobedecënama, sinó cha Bëngbe Bëtsábeñe yojtsošbuáchema, y chíyeca Bëngbe Bëtsá tojánayana cha chabe bominiñiñe tšabia yojamna ca. <sup>14</sup> Pero, ntšamo Bëngbe Bëtsá tojanašebuachenacá, bënga ntšamo chë leyiñe yomandancá tmojtsemngbiama yojtsemna ca tmojayanëse, Bëngbe Bëtsábeñe jtsošbuáchiyana tondayama nantsoservena, y ntšamo Bëngbe Bëtsá tojanašebuachenacá tondaye ntsámanana. <sup>15</sup> Chë ley juabocnana, Bëngbe Bëtsá puerte etonaná entšanga cháucastigama, chënga ntšamo chiñe iuayancá ndoñe tmontsamama; pero ndocna mandënga

tontsemnëse, ndocná ntsobenana chë ndoñe tontsayancá ndoñe ntjamana.

<sup>16</sup> Y chca, Bëngbe Bëtsá Abrahambioye tbojanšbuachená, cha yojtsošbuachëyeca, ntšamo Bëngbe Bëtsá tojanašebuachenacá, ndegombre chaotsemnana chë Bëngbe Bëtsábeñe imošbuáchema mo Abrahábentšana entšangcá imomnëngbiama; y Bëngbe Bëtsá chca tojanašebuachená, cha chëngbe tšabiama iuantjéñayeca. Chë mo Abrahábentšana entšangcá imomnëngbeñe, ndoñe quemnatsmëna nye chë ntšamo ley yomandacá imnétsamënga, sinó nyetscanga chë ntšamo Abraham tojanašbuachëcá Bëngbe Bëtsábeñe imošbuachëngnaca. Y Abraham nyetscanga bëngbiama, Bëngbe Bëtsábeñe osbuáchiyënga, mo taitacá endmëna. <sup>17</sup> Ntšamo Bëngbe Bëtsábeñe uabemana palabrënguiñe endayancá, Bëngbe Bëtsá Abrahambioye ibojtsošbuachëyeca: “Atšë sënjama aca ba luariñe entšangbiama atšbe bominiñiñe taitá chaotsemnana ca.” Chë ntšamo tojanašebuachenacá ndegombre tšabe soye endmëna, er Bëngbe Bëtsá chca Abrahambiana yojanjuabná; y Bëngbe Bëtsá endmëna ndábeñe Abraham yojtsošbuachë, y nda inétsama entšanga chámuatayenama, y nda inamánda y entšanga jobenayana jinñayama ndayá ndocna te tmonjaninýcá.

<sup>18</sup> Abraham Bëngbe Bëtsábeñe yojtsošbuáchiyë y yojtsošbuachëntšamo tbojanšbuachenacá chaotsemnana, masque entšabe juabniñe ndoñe chca ntjatsjuabnayanana; y chca, cabana cha tojánashjache jtsemnana “ba luariñe entšangbe taitá”, ntšamo Bëngbe Bëtsá tbojanianýcá: “Acbentšana entšanga tša mallajta mochántsemna, ndocná queochatobenaye jacúntana ca”. <sup>19</sup> Abraham yojanobatmanëntscuana, cha puerte chábeñe yojtsošbuachë, ntšamo tbojanšbuachenacá jóyëngacñama, masque Abraham yojtsošbuachëyë ya bëtsanánëjema yojtsemnana, er ya mo patse uata yojtsebmoma, y chabe shema, Sara, ndoñe yonjobena šësonga jtsabamnama. <sup>20</sup> Abraham ndocna te tonjanajbaná Bëngbe Bëtsábeñe ošbuáchiyana, y ni mo canye ndoñe yonjanjuaboye chë ntšamo Bëngbe Bëtsá tbojanšbuachenacá ndoñe joparëjana ca; sinó más corente chábeñe yojtsošbuachë, y chca Bëngbe Bëtsábioye ibojtsošbuachëyë, <sup>21</sup> er cha tšabá inatátšëmbo, ntšamo tbojanšbuachenacá jamama, ndegombre Bëngbe Bëtsá obená inamnama. <sup>22</sup> Chíyeca, Bëngbe Bëtsá tojánayana cha chabe bominiñiñe tšabia yojamna ca.

<sup>23</sup> Pero, chabe bominiñiñe tšabia yojamna ca Bëngbe Bëtsá tojánayana ora, ndoñe nye Abrahambiana chca ntsóyëbuambnayanana; <sup>24</sup> ndayá bëngbiám-naca, ndëmuanýëngbiama Bëngbe Bëtsá yochjayana chabe bominiñiñe tšábënga imomna ca, bënga Bëngbe Bëtsábeñe imošbuachëyeca; Bëngbe Bëtsá, nda tojanma Bëngbe Utabná Jesús cháuatayenama. <sup>25</sup> Bëngbe Bëtsá tojanalesenciá entšanga Jesús chamóbama, bënga bacna soyënga tmojanma causa, y Bëngbe Bëtsá tojanma cha cháuatayenama. Bëngbe Bëtsá chca tojan-

ma jobenayama, bēnga chabe bominiñi tšábenga jábiamama.

### Mora bēnga Bēngbe Bētsabe bominiñi tšábenga montsemna

**5** Er Bēngbe Bētsá tojama bēnga chabe bominiñi tšábenga chamotsemnama, bēnga chábeñe imošbuachéyeca; mora tempcá tšabá Bēngbe Bētsáftaca bēnga montsatsmēna, Bēngbe Utabná Jesucristbeyeca. <sup>2</sup> Bēnga Crístbeñe mondošbuáchema, cha tojama bēnga chamotsetatsēmbuama Bēngbe Bētsá tša tšabia yomnama, y Bēngbe Bētsábiocana tšabe soyēnga jtsebomnēse mora chamotsiyenama. Bēnga tša oyejuayēnga jésemnana, er Bēngbe Bētsábeñe jtsošbuáchiyēse mondobátmana cha puerte uámanēnga y bētsétsanga šochjábiamama, batšá ntšamo cachá yomncá. <sup>3</sup> Y ndoñe n̄ye chama bēnga oyejuayēnga jésemnana, ndayá bēnga tmojtseufrina y padecena soyēnguiñe tmojtšajna órnaca. Chca mondbama, er bēnga mondétatsēmbo bēnga tmojtseufrina orna, bēnga juatsjín̄yana ntšamo uantadēnga jtsemnama padecena soyēnguiñe tmojtsemna ora, Bēngbe Bētsábeñe jtsošbuáchiyēse. <sup>4</sup> Bēnga padecena soyēnguiñe tmojtsemna ora, más tšabá uantadēnga jtsemnama mondobénayeca, Bēngbe Bētsá oyejuayá bēngaftaca jtsemnana, padecena soyēnguentšana ndegombre tšabá tmojachnēngo ora. Bēngbe Bētsá oyejuayá bēngaftaca chaotsemnama bēnga tmojama ora, bēnga jtsobenana más jtsobátmanana, ntšamo šojašbuachenacá cha yochjamama. <sup>5</sup> Bēnga chca tmojt-sobátmanēse, ndocna te n̄ye bonamente quemochatobátmana, er Bēngbe Bētsá šojin̄yan̄yé tša bētscá cha šuababuán̄yeshanama. Bēngbe Bētsá chca tojama chē Uámana Espiritbeyeca, y cha endmēna nda Bēngbe Bētsá tbojanichmó bēngbe ainaniñe chaotsemnama jtsemándayama.

<sup>6</sup> Tempo bēnga tondaye chemuatanobená jamana Bēngbe Bētsabe bominiñi tšábenga jtsemnama, y chora Cristo tojanóbana bēnga chē bacna soyēnga tmojamēngbe tšabiamama, n̄ya chama tempo yojamna ora. <sup>7</sup> Ndoñe paselo quenátsmēna jajuaboyana, ndáye-ca can̄ya nantseprontana jóbanama can̄ya ntšamo chē leyiñe yomandancá jamama tojtsamanabiama; pero, can̄ya bētscá jtsababuán̄yeshanēse tšabe soyēnga in̄yēngbiama tojtsamabiama, nderádose chabiamama jóbanama cuantseprontana. <sup>8</sup> Pero Bēngbe Bētsá bēnga šojan̄yan̄yé tša šuababuán̄yeshanama, er bēnga cabá bacna soyēnga ntsamcá imojoyena ora, Cristo bēngbiama tojanóbana.

<sup>9</sup> Cristo, chabe buiñe juabuáshanēse bēngbiama tojanóbana yeca, Bēngbe Bētsá tojanma bēnga chabe bominiñi tšábenga jtsemnama. Y chca endmēnaye-ca, ndegombre Cristo šochanjátsebacaye, entšanga ndoñe tšabá tmonjama ca y castigo chēngbiama chaotsemna ca Bēngbe Bētsá chaojayana ora. <sup>10</sup> Bēnga tempo Bēngbe Bētsá imojanáya; pero cha tojanma bēnga cháftaca tempcá tšabá chamotsatsmēnama, chabe Uaquiñá tojanóbana yeca. Y mora, bēnga

natjēmbana cháftaca chamotsemnama ya tojama ora, ndegombre atsebácanēnga mochántsemna, chabe Uaquiñá ainá yómnyeca. <sup>11</sup> Y ndoñe n̄ye chca, ndayá bēnga cháftaca puerte oyejuayēnga chamotsemnám-naca Bēngbe Bētsá jamana, ndayá Bēngbe Utabná Jesucristo bēngbiama tojánmayeca. Y mora, chábeyeca Bēngbe Bētsá tojama bēnga cháftaca tempcá tšabá chamotsatsmēnama.

### Adán y Cristo

<sup>12</sup> Can̄ye entšá bacna soye tojanma causa, n̄yetsca entšanga bacna soyēnga amēnga tmojábocana; y cha tojanóbana, bacna soyēnga tojanma causa. Y chca, n̄yetsca entšanga entsamna jóbanama, er n̄yetscanga bacna soyēnga tmojama. <sup>13</sup> Bēngbe Bētsá Moisésbioye chē leyēnga cabá nduántšaboshjona ora, entšanga quem luarentše bacna soyēnga tmojanma. Pero ndocna ley tontsemna ora, Bēngbe Bētsá ndoñe ntjaton̄yayana entšanga bacna soyēnga tmojamama.

<sup>14</sup> N̄yetsca entšanga, Adánbentšana Moisésbentscoñe, n̄yetscanga yojánamna jóbanama, ntšamo cach Adán tojanmcá ndoñe tmonjanmēngnaca, ntšamo cha ndoñe chaondēmama Bēngbe Bētsá tbojanmandacá cha tojanma ora. Y Adánbeñe entšanga mondobena jin̄yama, ntšamo chē jabama ibojamná can̄ye soyēnguiñe yochtsanmēna.

<sup>15</sup> Pero ntšamo chē útata tbojanmcá ndoñe cachca soye quenátsmēna; er Bēngbe Bētsá entšangbe tšabiama jtsejuabnaye-se tšabe soyēnga chēngbiama tojanma ora, ndoñe yonjamna mo ntšamo Bēngbe Bētsá tbojanmandacá ndoñe chaondēmama Adán tojanma orcá. Tšēngaftanga šmondétatsēmbo, n̄ye can̄ye entšá can̄ye bacna soye tojanma causa, cha tojanma n̄yetsca entšanga jóbanama chaotsamnama, pero Bēngbe Bētsá entšangbe tšabiamama yojabuán̄yeca, más bēts soyēnga jamana, chē Adánbe bacna soye entšangbiama bacna soyēnga tojanmama. Chca, Bēngbe Bētsá tojanma ba entšanga bētscá tšabe soyēnga chamotse-bomnama; y chca tojama, n̄ye can̄ye entšá, Jesucristo, tšabe soyēnga tojánmayeca. <sup>16</sup> Chē ba entšanga bētscá tšabe soyēnga chamotse-bomnama Bēngbe Bētsá tojamentšana endóbocana soye, puerte in̄yetšá comna, chē entšá Adán, can̄ye bacna soye tojamentšana tojanóbocna soyama. Adán bacna soye tojanmentšana, Bēngbe Bētsá tojánayana chana bacna soye tojanma y castigo jtsebomnama ibojtsemna ca, y n̄yetsca entšangnaca chē causa; pero masque n̄yetscanga bacna soyēnga tmojama, Bēngbe Bētsá entšangbe tšabiamama ndoñe bēndētsebnatjēmbayeyeca, tojanma entšanga chabe bominiñi tšábenga chamotsemnama y chē bacna soyēngama castigánēnga ndoñe chamondétsemnama. <sup>17</sup> Ndegombre endmēna, can̄ye entšá bacna soye tojanma causa, n̄yetsca entšanga jóbanama yojtsamna. Pero puerte más, can̄ye entšá Jesucristo tojanma. Ndēmuan̄yēngbiama Bēngbe Bētsá tojama bētscá tšabe soyēnga chamotse-bomnama, ndēmuan̄yēngbiama Bēngbe Bētsá tojama chabe bominiñi tšábenga chamotsemnama, y

Bèngbe Bètsábíocana chca tmojóyèngacñènga, chèn-ga nyètscanga mochantsiyena bacna soyènga jtseyén-janayèse y nyètscata tescama mo bètsètsangcá; y chca echántsemna ndayá Cristo tojánmayeca.

<sup>18</sup> Y chca, ntšamo canye entšá, Adán, canye bacna soye tojanmama, Bèngbe Bètsá tojánayana nyètscanga bacna soye tmojanma y castigánènga chamotsemna ca; cachcá ntšamo canye entšá, Cristo, puerte tšabe soye tojánmayeca, Bèngbe Bètsá jayanana nyètscanga imojtsobena chabe bominyíñe tšábenga jtsemnama y chè nyètscata tescama yomna tšabe vida jtsebomnama ca. <sup>19</sup> Y ntšamo Bèngbe Bètsá tbojanmandacá ndoñe chaondémama canye entšá tojanma causa, nyètscata entšanga bacna soye amènga tmojanobiama; cachcá, ntšamo Bèngbe Bètsá tbojanmandacá canye entšá, Jesucristo, tojánmayeca, Bèngbe Bètsá tojanma bètscá entšanga chabe bominyíñe tšábenga chamotsemnama.

<sup>20</sup> Chè ley entšangbe cucuatšíñe tmojanáboshjona, jinñanyiyama ntšamo ndegombre yomna bacna soyènga jtsamana; pero entšanga más bacna soyènga imojtsama ora, Bèngbe Bètsá cabá más chèngbe tšabiama yojtsanjuabnaye y más tšabe soyènga chèngbiama yojtsama. <sup>21</sup> Chcasna, mora mochjayana, entšanga bacna soyèngaca puerte mandánènga imojamna, y chca, nyètscanga jóbanama yojamna ca. Pero mora, ya ndoñe chca quenátsmèna, er Bèngbe Bètsá tojama entšanga chabe bominyíñe tšábenga chamotsemnama, Bèngbe Utabná Jesucristbeyeca chè nyètscata tescama yomna tšabe vida chamotsebomnama; chíyeca mora bènga montsobena jtseyenama, Bèngbe Bètsá šojatšatá tšabe soyènga lempe bèngaftaca jtsemnèse.

#### Cristbeyeca bènga tšabe vida jtsebomnana

**6** Y asna, ¿ntšamo mochjayana? ¿Šojtsamna jtseyenana sempre bacna soyènga jtsamèse, chca, Bèngbe Bètsá šuababuányèshanama más chašotsinñanñama, cha más bacna soyènga bènga jt-saperdónayèse? <sup>2</sup> ;Ndoñe, ndegombre ndoñe! Tempo bènga monjaniyena bacna soyènga jamama juabnèngaca mandánènga, pero mora bènga montsobena jtseyenana chè juabnènga tondaye bèngbiocyte ntsamcá, y chca, bènga montsobena mo obanèngcá chè soyèngama jtsemnana; y as, ¿ndáyeca bènga muatjåt-sjuabnaye ntšamo ndoñe tšabá tontsemncá jatiyenana? <sup>3</sup> Er ndegombre tšèngaftanga šmondétatšèmbó, bènga uabáinènga tmojanoquedá ora, tmonjaninñanyé bènga Cristo Jesúseftaca cánýiñe mo canýacá bétsemnama; y bènga uabáinènga tmonjanoquedá ora, enjamna mo bènga cuafjobancá, ntšamo Cristo tojanobancá. <sup>4</sup> Bènga uabáinènga tmonjanoquedá ora, enjamna mo bèngnaca cháftaca cuafjobancá, y cháftaca uatabuantsanèngcá. Chca yojamna, bènga chamotsobenama mo tsèm entšangcá jtseyenama, ntšamo Crísoftaca tojanopasacá, cha cháuatayenama Bèngbe Bètsá tojanma ora, chabe puerte bèts obenánaca.

<sup>5</sup> Bènga Crísoftaca cánýiñe mo canýacá jtsemnèse, cha tojanóbana ora mo bèngnaca cháftaca cuafjobancá enjamnaye, ndegombre bènga cánýiñe mo canýacá cháftaca mochántsemna, bènga cachiñe vida nyètscata tescama chamotsatsbomnama Bèngbe Bètsá jtsamèse, ntšamo Cristo cháuatayenama cha tojanmá. <sup>6</sup> Y bènga mondétatšèmbó, chè ntšamo bèngbe vida enjamncá, bacna juabnèngaca mandánènga, Jesucristbeñe cabá ntsošbuáchiye ora, mora ya ndoñe chca yontsemnama; y chca entsemna mo chè tempsca vida chaóbanama cuafjamcá, Cristo tmojanrucificá ora. Chca yojamna, Bèngbe Bètsá jobenayama chè bacna soyènga jamama bèngbe juabnènga jtsepochócama; y chca, ya ndoñe más chè bacna soyèngaca mandánènga chamondétsemnama, mo nyètscata tempo nye ínñabiama oservenèngcá. <sup>7</sup> Er canye entšá tojóban ora, chè bacna soyènga chábioye ya ndoñe más ntsemándayana. <sup>8</sup> Er Cristo tojanóbana ora, mo bèngnaca cháftaca cuafjobancá endmè-nayeca, cháftaca jtseyenámna bènga montsošbuaché. <sup>9</sup> Bènga mondétatšèmbó Cristo cháuatayenama y ndocna te cha cachiñe jatóbanama Bèngbe Bètsá tojanmama; y ndocna obenana queochatsma cha cachiñe chauatóbanama. <sup>10</sup> Cha tojanóbana, y chè bacna soye jamama juabnènga ndocna te ntjobenayana chábioye jamándana, y ínñenga ndoñe imontsobena ntšamo cha jabórlana; y ntšamo mora cha yoyencá, Bèngbe Bètsá jtseervénama yomna. <sup>11</sup> Cachcá, tšèngaftanga cmontsamna jtsejuabnayanana, chè ya ndoñe más bacna soyèngaca mandánènga šmojtsemnama, pero vida šmobomna lempe jtsamèse Bèngbe Bètsá tšèngaftangaftaca oyejuayá chaotsemnama, Cristo Jesúseftaca cánýiñe mo canýacá jtsemnèse.

<sup>12</sup> Tšèngaftanga cmontsamna, chè bacna soyènga jamama ainanentše šmobomna juabnèngaca ndoñe más mandánènga ntsemnana, chca, tšèngaftanga ndoñe chašmondétsamama juabnèngaca nye cach tšèngaftanga, tšèngaftangbe cuerpiñe tšabá jtsomñama. <sup>13</sup> Tšèngaftanga ndoñe quecmátamna jalesenciana ndaye tšèngaftangbe cuerpentša soye, bacna soyènga jamama chaoservema. Chamna, tšèngaftanga cmontsamna Bèngbe Bètsá jauyanana, lempe ntšamo tšèngaftanga šmomncá, cha jaserviama chaotsemna ca, tšèngaftanga chè šmomna mo ya ndoñe más obanèngcá Bèngbe Bètsabiama, y tojanma tšabe vida chašmotsebomnama; y jauyanana nyètscata tšèngaftangbe cuerpentša soyèngna Bèngbe Bètsá jaserviama yojtsemna ca. <sup>14</sup> Ndoñe quecmátamna bacna soyèngaca mandánènga jtsemnana, er tšèngaftanga ndoñe quešmátiyena leyíñe iuayana soyèngaca mandánènga, y šmondoyena Bèngbe Bètsá tšèngaftangbiama tšabá jtsejuabnaye.

#### Ošbuachiyá obligációnaca jtsemnana ntšamo tšabá yomncá jamama

<sup>15</sup> Y asna, ¿bènga imojtsobena bacna soyènga jamana, chè leyíñe iuayana soyèngaca ndèmandánènga

imomnana, y Bëngbe Bëtsá bëngbiana tšabá jtse-juabnayëse bënga imoyenama? ;Ndoñe, ndegombre ndoñe! <sup>16</sup> Tšëngaftanga tšabá šmondétatšëmbo, ínÿabe cucuatšíñe mo nÿets tempo nÿe ínÿabiana oservenëngcá šmojoquedá ora, cha jtsojedecénama, ndegombre tšëngaftanga chë nduiñbiana nÿets tempo oservenënga jtsemnana. Chcasna, cachcá jtsemnana, chë tšëngaftanga šmojabocacá bacna soyëngaca mandánënga jtsemnana, y chca jtsemnana mo Bëngbe Bëtsabe bominiñe tšëngaftanga nÿetsca tescama obanënga cuaftsemncá, o Bëngbe Bëtsá jtsojedecénama, y chca, chabe bominiñe tšábënga jabocanana. <sup>17</sup> Pero šontsamna Bëngbe Bëtsá jt-satschuanayana, er tempo tšëngaftanga mo nÿe ínÿabiana oservenëngcá šmojamna, bacna soyënga jamama juabnéngaca mandánënga; pero mora nÿets ainánaca šmojoyeuná, ntšamo chë tcmojanabuatambá soyënguiñe šmojoyëngacñécá. <sup>18</sup> Bëngbe Bëtsá tšëngaftanga cmojatsebacá, bacna soyëngaca ndëmandánënga chašmotsemnana, y morna mo Bëngbe Bëtsabiana oservenëngcá šmojabocna, ntšamo tšabá yomncá jtsamama. <sup>19</sup> Muentše sënjoyebuambá ntšamo entšanga mondbetsichamcá, er tšëngaftanga ndoñe corente juabna quešmátsbomna toto palabrënga chacmósertama. Tempo, tšëngaftanga šmonjanamana jalesénciana, lempe ntšamo šmojamncá mandánënga jtsemnana, bacna soyënga shembásafata o boyabásafata jamama juabnéngaca, y nÿe ndaye bacna soyënga jamama juabnéngaca. Cachcá, mora tšëngaftanga cmontsamna jalesénciana tšëngaftanga chašmotsemnana juabnéngaca mandánënga tšabe soyënga jtsamama, chca, ndegombre Bëngbe Bëtsabe entšanga chašmotsemnana.

<sup>20</sup> Tšëngaftanga, cabá bacna soyënga jamama juabnéngaca mandánënga šmonjamna ora, tšëngaftanga ndoñe obligaciónaca quešmënjatšmëna ntšamo Bëngbe Bëtsabiana tšabá yomncá játamama.

<sup>21</sup> ¿Ndaye tšabe soye tšëngaftanga šmojosháchiñe chë tempo šmojánama soyënga amiñe? Tondaye; y mora chë soyëngama šmojtšëuatja. Chca soyënga tcojamentšana jóbocnana, entšá nÿetsca tescama castigáná chaotsemnana, mo Bëngbe Bëtsabe bominiñe nÿetsca tescama obaná cuaftsemncá. <sup>22</sup> Pero mora, ndoñe quešmátsmëna bacna soyënga jamama juabnéngaca mandánënga, y mora bëtscá šmojtšentšëna Bëngbe Bëtsá jtseyeunanana y jtsešervénana. Chca jtsamana, tšëngaftangbiana puerte tšabá entsemna, er chca, Bëngbe Bëtsabe entšanga šmochántsemna, y cabana, chë nÿetsca tescama yomna tšabe vida šmochántsebomna. <sup>23</sup> Bacna soyënga tcojtsamentšana jóbocnana entšá nÿetsca tescama castigáná chaotsemnana, mo Bëngbe Bëtsabe bominiñe nÿetsca tescama obanënga cuaftsemncá; pero, Bëngbe Bëtsá šojtsatšatná soyënguentšana, jóbocnana chë nÿetsca tescama yomna tšabe vida jtsebomnana, Cristo Jesús Bëngbe Utabnáftaca cánÿiñe mo canÿacá jtsemnëse.

### Chë bouamnátbentšana ndayá bëngbiana mochjuat-sjinÿe

**7** Jesucristbeyeca catsátanga, tšëngaftanga šmotátšëmbo ntšamo chë leyënga entšangbiana inétsemnana; tšëngaftanga šmotátšëmbo, ntšamo chë leyiñe tojtsayancá canÿe entšá chaotsamamna, nÿe chë entšá tojtsainëntscuana chábioye jtsemándayana. <sup>2</sup> Chcasna, canÿe bouamna shembása, ntšamo chë leyiñe endayancá bontsemna chabe boyáftaca jëftsemnana, chë boyá tuainëntscuana; pero chë boyá tojtsóbanëna, chë leyiñe endayana, chë shemna canÿa jtoquédana, chë boyabiana ndëmandaná ca. <sup>3</sup> Y chca, chë shema inÿe boyabásafata chabe boyábioye tbojaingñé, chë boyá cabá vida totsóbomñe ora, chë shemna jtsabáinana chabe boyábioye ínÿaftaca ingñayá ca. Pero chabe boyá tojtsóbanëse, chë leyiñe endayana chë shemna canÿa jtoquédana, chë boyabiana ndëmandaná ca, y cha jtsoberenana ínÿaftaca jtobouamayana; y chca tojama ora, boyábioye ínÿaftaca ingñayana ndoñe ntsemnana.

<sup>4</sup> Tšëngaftanga chë ošbuachiyëngaftácnaca cachcá endmëna; ya ndoñe más chë léyeca mandánënga quešmátsmëna, er Cristo tojanóbana ora šmojánbocna, mo chë soyëngama obanënga cuafjoquedangcá, ínÿabe entšanga jtsemnana, Crístbënga, ndabiana Bëngbe Bëtsá tojanma cháuatayenama; y chca jtsemnëse, bënga bëtscá soyënga ntšamo tšabá yomncá chamotsamama, Bëngbe Bëtsá jasérviana. <sup>5</sup> Bënga chë nÿe ntšamo cabënga imnabošcá monjanijena ora, chë ley enjanoservena bëngbe ainaniñe chamotsebomnana bacna soyënga jamama puerte bëts juabnénga, nÿe bënga tšabá jtsomñama. Ba bacna soyënga tmonjanma, y chë causa bënga šonjánamna nÿetsca tescama castigánënga jtsemnana, mo Bëngbe Bëtsabe bominiñe nÿetsca tescama obanënga cuaftsemncá. <sup>6</sup> Pero mora Bëngbe Bëtsá šojatsebacá chë léyeca ndëmandánënga chamotsemnana; chë ley tempo enjamna bëngbiana mo canÿe amëndayacá. Pero mora bënga chë leyama mo obanëngcá montsemna; chca, bënga ndoñe chamondëtsiyenama ntšamo tempo enjamncá, chë uabemana leyëngaca mandánënga, y aíñe tsmécá chamotsiyenama, ntšamo chë Uámana Espíritu iuamcá bënga vida chamotsebomnana.

### Bacna soye jamama juabna tcojtsebomnëse, chë ley jamana entšá bacna soye chaomama

**7** Báseftanga muanjayana cach ley bacna soye yomna ca; ndegombre, chë ley ndoñe chca quenátšmëna. Chë léyeca atše tšabá sëndétatšëmbo ndayá yomna bacna soye jamana. Atše ndocna te matijántatšëmbona ndayá yomna chë “ínÿabioye jt-sántšabošana”, “ínÿabioye ndoñe cattsantšaboše ca” chë leyiñe ndoñe matmëñjanábemëse. <sup>8</sup> Pero bacna soyënga jamama juabnénga atše bomna causa tonjan-

ma, atše puerte chaitsebošama chë ndoñe šonjamna jtsebošana soyënga; y chca chë juabnéngaca tonjanopasá, atše chë leyënguifne ndayá iuayanama jtsejuabnayëse. Er ndocna ley tondmëna ora, entšá ndoñe ntsetatšëmbuana ndayá yomna bacna soye jtsamana. <sup>9</sup> Canye tempo enjamna, chora atše sënjaniyena leyëngama ntsetatšëmbcá, pero ntšamo leyifne iuayancá sënjanabuátmana ora, ndayá jamama ndoñe yonjamnama, atše sënjanontšé chë bacna soyënga jamama juabnéngaca mandaná jtsemnama; <sup>10</sup> y chora atše sënjántatšëmbona, chë causa šojtsanmëna nyetsca tescama castiganá jtsemnama, mo Bëngbe Bëtsabe bominyifne nyetsca tescama obaná cuaftsemncá. Bëngbe Bëtsá chë mando tojanma, atše chë nyetsca tescama yomna tšabe vida jtsebomnama chayobenama, chë ley jtseyeunanëse; pero ndoñe chiyanobedecé causa, chë mando tonjanma atše chašotsemna nyetsca tescama castiganá jtsemnama. <sup>11</sup> Chë leyentša mandifne inye soyënga ndoñe šonjëtsemna jamama ca yojsayánayeca, chë bacna soyënga jamama juabnénga átšbeñe, šmonjaningñé bacna soyënga jamama; y chë mando bëtsemnama, chë bacna soyënga jamama juabnénga tmonjanma atše chašotsemna nyetsca tescama castiganá jtsemnama, mo Bëngbe Bëtsabe bominyifne nyetsca tescama obaná cuaftsemncá.

<sup>12</sup> Pero bënga mëntšá mochjayana: chë leyna tšabe soye endmëna, er Bëngbe Bëtsábiocana tojanóbocna, y chë mandéngnaca Bëngbe Bëtsábiocana tojanóbocna ca; chiñe endayana ndayá tšabá yomna jamana y chca tšabá jtsemnana. <sup>13</sup> Y asna, ¿quem tšabe soye tojanma atše chašotsemna nyetsca tescama castiganá jtsemnama, mo Bëngbe Bëtsabe bominyifne nyetsca tescama obaná cuaftsemncá? ¡Ndoñe, ndegombre ndoñe! Chë bacna soyënga jamama juabnénga atše bomna causa, chca átšeftaca tonjanopasá. Chë tšabá yomna sóyeca, chë bacna soyënga jamama juabnénga tmonjanma atše chašotsemna nyetsca tescama castiganá jtsemnama. Chca chë juabnéngaca tonjanopasá, entšanga jobenayama jtsetatšëmbuama ndayá yomna bacna soye jamana; y chë mando, bacna soye jamama ndoñe yondmëna ca jtsichámuana causa, nyetsca entšanga mondobena jinýana canye bacna soye, mo canye puerte bëts bacna soycá.

<sup>14</sup> Bënga mondétatšëmbo chë ley Bëngbe Bëtsabe ley yomnama, pero atšna nye canye entšá sëndmëna, canya nyets tempo nye bacna soyënga jamama juabnéngaca mandaná. <sup>15</sup> Ndegombre ndoñe quešnátësertana ntšamo sentsamcá, er ndoñe ntsamana ndayá jamama stsebošcá, pero aifne jtsamana ndayá jamama ndoñe šontsogustancá. <sup>16</sup> Pero chë atšbe ainaniñe stsejuabná ndoñe tšabá tontsemna soye stsamëse, ndayama leyifne iuayana ndoñe candmëna ntsamana ca, chca atše jtsinýanýayana chë ley ndegombre tšabe soye yomnama. <sup>17</sup> Chcasna, atše ya ndoñe ntsemnana chë chca tojtsamá, ndayá chë bacna soye jamama atšbe ainaniñe yomna juabnénga jtsamana atše chca jamama. <sup>18</sup> Atše sëndétatšëmbo, atšbe

ainaniñe tondaye yontsemna ntšamo tšabá yomncá atše jamama. Masque séntseboše ntšamo tšabá yomncá jamama, ndoñe quetsátobena chca jamama. <sup>19</sup> Atše ndoñe quetsátama chë tšabe soye ndayá jamama sëndbošcá, pero aifne séntsama chë bacna soye ndayá jamama ndoñe sëndbošcá. <sup>20</sup> Chë ndayá ndoñe jamama séntsebošcá stsamëse, chca jtsayanana, atše ya ndoñe stsemna chë chca yojtsamá, sinó chë bacna soye jamama atšbe ainaniñe yomna juabnénga chca yojtsama.

<sup>21</sup> Chca, atše tijátatšëmbona ndayá átšeftaca yojt-sopasánana; masque, ntšamo tšabá yomncá jamama stseboše, bacna juabnénga sempre jtsemándayana atšbe bacna soye chaimama. <sup>22</sup> Atšbe ainanoca puerte séntsoyejuá, Bëngbe Bëtsábiocana yóbocana mandëngama. <sup>23</sup> Pero atše sënjinýena inye soye átšeftaca yojtsopasánama; chë bacna soye jamama atšbe ainaniñe yomna juabnénga yojtsama atše ndoñe ntjamama ntšamo atšbe juabnoca yomna mo ndegombre soycá, mo chë bacna soyëngaca mandaná cuaftsemncá.

<sup>24</sup> ¡Tša lastema atšbiamá! Chë bacna soye jamama juabnénga átšbeñe entsemánda, y entsama atšbe chašotsemna nyetsca tescama castiganá jtsemnama, mo Bëngbe Bëtsabe bominyifne nyetsca tescama obaná cuaftsemncá. ¿Nda nanjobenaye chentšana atšbe jatsbocama? <sup>25</sup> Nye Bëngbe Bëtsá endmëna nda yobena atšbe jatsbocama, Bëngbe Utabná Jesucristbeyeca. Chábioye chama mochtsatschuanaye. Atšbe ainanoca atšbe aifne séntsejuabná chë ley puerte tšabe soye yomna ca, y jobedésama séntseboše; pero chë bacna soye jamama átšbeñe yomna juabnéngaca, atšbe bacna soyënga séntsama, ntšamo chë juabnénga šontsemmandacá.

#### Ntšamo Bëngbe Bëtsabe Espiritu yomandacá jtsiyenana

**8** Y chca, Bëngbe Bëtsá ndoñe ntjayanana, Cristo Jesúseftaca cánýifne mo canýacá imomnénga, chëngbe bacna soyëngama nyetsca tescama castigánënga jtsemnama yojsamna ca. <sup>2</sup> Er, chë Uámana Espiritoftaca mandánënga mondménayeca, Bëngbe Bëtsá šojatsebacá, bënga chë bacna soye jamama juabnéngaca mandánënga ndëtsemnama, y nyetsca tescama castigánënga ndëtsemnama, mo Bëngbe Bëtsabe bominyifne nyetsca tescama obanënga cuaftsemncá. Chë Uámana Espiritu jamana bënga ndegombre tšabe vida chamotsebomnama, cánýifne mo canýacá Cristo Jesúseftaca jtsemnëse. <sup>3</sup> Bëngbe Bëtsá tojanma ndayá Moisesbe ley ndoñe tonjanobenacá, er entšanga mondoyena nye ntšamo cachënga imobošcá, y nye cánýenga ndoñe ntsobenana jamana ntšamo tojtsamncá. Bëngbe Bëtsá tojánayana entšángbeñe bacna juabnéngbe mando jtsepochóca-ma ca, y chama chabe Uaquiñá tbojanichmó. Cha quem luaroye mo canye entšacá tojánabo, canye ainánaca, mo chë entšanga bacna soye amëngbe ainancá, pero ndocna te ni mo canye bacna soye ndoñe tonjëft-

sema; y tojánabo, chábeyeca entsanga bacna soyëngama perdonánënga chamotsemnama.

<sup>4</sup> Bëngbe Bëtsá chca tojanma, bënga chë mora oyenënga jtsamëse ntšamo chë Uámana Espíritu ainaniñe yomandacá y ndoñe nÿe ntšamo bënga entsanga tmojtsebošcá, chamobenama tšabá jamana ntšamo chë leyíñe yomandacá, ntšamo šojtsamncá.

<sup>5</sup> Chë nÿe cachënga tšabá jtsomñama cachëngbe juabnëngaca imoyenënga, nÿe sempre jésejuabnayanana bacna soyënga jtsamama, chca bacna juabnëngaca mandánënga; pero ntšamo chë Uámana Espíritu ainaniñe iuamëndacá oyenëngna, sempre jésejuabnayanana tšabe soyënga jamama, ntšamo chë Uámana Espíritu yobošcá. <sup>6</sup> Ntšamo chë nÿe cachá tšabá jtsomñama juabnëngaca mandaná oyenentšana jóbocnana entšá nÿetsca tescama castiganá chaotsemnama, mo Bëngbe Bëtsabe bominiñiñe nÿetsca tescama obaná cuaftsemncá; y ntšamo chë Uámana Espíritu tojtsemandacá oyenentšana jóbocnana chë nÿetsca tescama yomna tšabe vida jtsebomnama y ainaniñe tšabe ebionana. <sup>7</sup> Chë nÿets tempo oyenënga nÿe ntšamo tmojtsebošcá nÿe cachënga tšabá jtsomñama jtsejuabnayëse, Bëngbe Bëtsabe uayayënga jtsemnana, er chënga ndoñe ntsamana ntšamo cha tojtsamëndacá, y chca jamama ndoñe ntsoberenana; <sup>8</sup> y chca, chë nÿe chca bacna juabnëngaca oyenënga, ndoñe ntsoberenana jamana ntšamo Bëngbe Bëtsá tšabá tbojtsinýancá.

<sup>9</sup> Pero tšëngaftanga ndoñe quešmátiyena nÿe cach tšëngaftanga tšabá jtsomñama cach tšëngaftangbe juabnëngaca, sinó šmojtsiyena ntšamo chë Uámana Espíritu tšëngaftangbe ainaniñe cmamëndacá, er chë Uámana Espíritu sempre tšëngaftangbe ainaniñe iuétsemna. Nda ndoñe quem Cristbe Espíritu tondbomná, ndoñe Cristbia ntsemnana. <sup>10</sup> Pero Cristo sempre tšëngaftangbe ainanentše vida totsóbomñëse, masque tšëngaftangbe cuerpënga yochjopochóca, quem luarentše entsanga bacna soyënga jtsamana causa, tšëngaftangbe espíritu nÿets tempo vida echanjesóbomñe, er Bëngbe Bëtsá tojama tšëngaftanga chabe bominiñiñe tšábënga chašmotsemnama. <sup>11</sup> Y Bëngbe Bëtsabe Espíritu, Jesús cháuatayenama tojamabe Espíritu, sempre tšëngaftangbe ainaniñe tojtsemnëse, Bëngbe Bëtsá, chë Cristo cháuatayenama tojamá, echanjama chë tšëngaftangbe yochjóbona cuerpo, cachiñe vida chaotsatsbomnama. Cha chca echanjama chabe Espíritoftaca, y mua sempre tšëngaftangbe ainaniñe iuétsemna.

<sup>12</sup> Chcasna, Jesucristbeyeca catsátanga, šontsamna jtsiyenana ntšamo chë Uámana Espíritu ainaniñe šuamëndacá; ndoñe quešnátamna jtsiyenana nÿe bënga tšabá jtsomñama cabëngbe bacna juabnëngaca; <sup>13</sup> er nÿe bënga tšabá jtsomñama cabëngbe bacna juabnëngaca šmojtsiyenëse, castigánënga šmochántsemna, mo Bëngbe Bëtsabe bominiñiñe obanënga cuaftsemncá; pero Uámana Espíritbeyeca, chca juabnëngaca nÿetsca bacna soyënga jtsamana jt-

sajbanama šmojobenase, chë nÿetsca tescama yomna tšabe vida šmochántsebomna.

<sup>14</sup> Ntšamo chë Uámana Espíritu yomandacá tmojtsamëngna, Bëngbe Bëtsabe básënga jtsemnana. <sup>15</sup> Er Bëngbe Bëtsá ndoñe tonjama bënga ainaniñe canÿe espíritu chamotsebomnama, mo nÿe ínÿabiamana nÿets tempo oservenëngcá chašotsamëndama, y chca cha chaoma bënga cachiñe chamotsëuatjama; sinó chë Bëngbe Bëtsá tojama bënga chamotsebomnama Espíritu jamana bënga Bëngbe Bëtsabe básënga chamotsemnama, y chë Espíritu endama "Atšbe Taitáca" bënga Bëngbe Bëtsá chamotsechembuanama. <sup>16</sup> Y chë Uámana Espíritu y bëngbe espíritu canÿe ora jayanana bënga Bëngbe Bëtsabe básënga imomna ca. <sup>17</sup> Y Bëngbe Bëtsabe básënga mondménayeca, bëngnaca mochanjóyëngacñe ndayá cha chabe básënga jatšatayama tojašebuachenacá; bënga y Cristo canÿiñe chë soyënga mochanjóyëngacñe, er bënga inÿe soyënguiñe tmojasufrí cachcá ntšamo Cristo tojansufricá, Bëngbe Bëtsá uámanënga y bëtsétsanga chášuabiamama, ntšamo cach Cristo yomncá.

### Bëngbe Bëtsá bëtsétsanga y uámanënga šochjábiamana

<sup>18</sup> Atše ndegombre sëndétatšëmbo, ntšamo quem tempo bënga imosufrincá, puerte batšatema yomna chë bëngbe tšabiamana uámanana y buashinÿinyanana Bëngbe Bëtsá šochjínÿanÿiyama. <sup>19</sup> Lempe ntšamo Bëngbe Bëtsá tojamcá endmëna mo tša cuaftsobatmancá, chaobuache chë Bëngbe Bëtsá ntšamo chabe básënga imomnama jinÿanÿiyama ora. <sup>20</sup> Er lempe ntšamo Bëngbe Bëtsá tojamcá, mora ndoñe yontsoservena ntšamo chaotsemnama cha tojanjuabocá. Chca tojanopasá, ndoñe chë lempe ntšamo cha tojanmcá chca chaotsemnama tojánbošenayeca, ndayá cabá chë soyënga tojanmentšana, Adán bacna soye tojanmentšana, Bëngbe Bëtsá tojanjuabó ntšamo cha tojanmcá joserviama ndoñe ndayama ntšamo cha tempo tojanjuabocá. Pero lempe ntšamo Bëngbe Bëtsá tojanmcá entsemna mo cuaftsobatmancá canÿe te, ndëmua ora chë soyënga chaoservema cha yochjama jtsatšëmbe, ntšamo quem luare jobojátšama ora chama cha yojanjuabnacá; <sup>21</sup> Bëngbe Bëtsá canÿe te yochjama lempe ya ndoñe más chaondet-sopochocama. Y chora, ntšamo Bëngbe Bëtsá yochjamcá chabe básënga chamotsemnama, lempe ntšamo cha yojanjuabnacá, chabe uámanana y buashinÿinyanana jtsebomnama, cachcá yochjama lempe chë cha tojanma soyëngaca.

<sup>22</sup> Er bënga mondetatšëmbo lempe ntšamo Bëngbe Bëtsá tojanmcá mentscoñama yomna mo canÿe shembása šešona jtsebomnama ora tbojtsetšësa tojtsobësnacá; er lempe ntšamo cha tojanmcá entsemna mo tša cuaftsebošcá Bëngbe Bëtsá chaomama, chë soyënga chaoservema ndayama cha tempo tojanjuabocá. <sup>23</sup> Pero ndoñe nÿe chë lempe ntšamo Bëngbe Bëtsá tojanmcá yojtssemna mo chë shembasacá, sinó bëngnaca; y bënga ainaniñe mondbomna chë Uámana Espíritu, y chë soye endmëna ndayá nat-



sana bënga tmojanóyëngacñe, chë Bëngbe Bëtsá bëtsá soyënga šochjátšatayentšana; bënga bëngbe ainanoca tša jesobësnayana, bënga chabe básënga chamotsemnama Bëngbe Bëtsá chaomama mondobátmanëntscuana, y chca, Bëngbe Bëtsá chaoma bënga ndocna te ndopochócama cuerpënga chamotsebonnama. <sup>24</sup> Bënga, Bëngbe Bëtsábeñe jtsošbuáchiyëse monjobátmana ntšamo cha tojanayancá chaomama, y chíyeca cha bënga šojatsebacá; pero ndayama tmobatmancá, ya tojtséchnëjuana bënga tmojtsonyase, chora chama ya ndoñe ntjátobatmanëngana. Er ndocná jatobátmanana chë ndayá jinýama ya tojobenacá. <sup>25</sup> Pero ndayama bënga tmobatmancá, cabá ndoñe jinýama tmontsobena soye tojtsemnëse, bënga jtsamnana Bëngbe Bëtsábeñe jtsobátmanana, uantadënga jtsemnëse, ntšamo tojayancá Bëngbe Bëtsá chaomëntscuana.

<sup>26</sup> Uámana Espíritnaca bënga šochandbëtsëjabuachana, er bënga ainaniñe ndoñe corente ntsošbuáchiyana. Bënga ndoñe quemúatstatšëmbo Bëngbe Bëtsáftaca jencuëntana ntšamo ndegombre tšabá yomncá; pero cach Espíritu Bëngbe Bëtsábioye bëngbiama jtsotjanañana, mo chca ora chabe ainanoca tša cuaftsobësnacá; y ndayá chca ora tbojtsotjanañamna, bënga ndoñe ntjobenayana bëngbe palábraca chama jóyebuambayama. <sup>27</sup> Y Bëngbe Bëtsana, ntšamo entšanga ainanoca tmojtsebošcá yonýá, y ntšamo chë Espíritu jayanama tojtsebošcá yotátšëmbo, er chë Espíritu chabe entšangbiama ibotjanañe, ntšamo Bëngbe Bëtsá yobošcá.

### Bënga ayénjanayëngama más tmojábcana

<sup>28</sup> Y bënga mondétatšëmbo, Bëngbe Bëtsá nyetsca soyënguiñe inétsama cha imobobonshánëngbe tšabiama, ndëmuanyënga cha tojáchembo chabe entšanga chamotsemnama, ntšamo cha jamama yojanjuabnacá. <sup>29</sup> Jesucristbeñe imošbuachëngbiama, Bëngbe Bëtsá quem luare tojanma orscana yojanjuabná y chënga tojanabacacá chca chamotsemnama, y chë tempscana tojaninýnaná chënga chabe Uaquiñacá chamotsemnama; chca, chabe Uaquiñá chë bëtsá catšátangbeñe chë natsaná chaotsemnama. <sup>30</sup> Y chë Bëngbe Bëtsá chca tojánabacacangnaca, tojánachembo chabe entšanga chamotsemnama; chëngbiama tojanma chabe bominiñe tšábënga chamotsemnama, y chëngbiámna yochjama chabe uámanana y obenentšana chamotsebonnama.

<sup>31</sup> Y asna, ¿chë soyëngama ntšamo mochjayana? Co Bëngbe Bëtsá bëngaftaca tojtsemnëse, bënga jáyënjana ndocná queochatobenaye ca. <sup>32</sup> Cha tondaye tonjanma chabe Uaquiñá jasúfriama ndoñe chabondëtsemnama, sínó tojanalesenciá entšanga chamóba, nyetsca bëngbe tšabiama. Bëngbe Bëtsá chabe Uaquiñáftaca chca tojanmëse, ndegombre Bëngbe Bëtsá lempe šochanjátšataye. <sup>33</sup> ¿Nda nanjobenaye jayanama chë Bëngbe Bëtsá tojabacacanga bacna soyënga tmojama y castigánënga chamotsemna ca? Ndocná; er cach Bëngbe Bëtsá endmëna nda

tojayana bënga chabe bominiñe tšábënga imomna ca. <sup>34</sup> Y asna, ¿nda nanjobenaye jayanama bënga castigánënga jtsemnama šojtsamna ca? ¿Cristo Jesús cha yojtsemna? Ndoñe. Cristo, nda bëngbiama tojanóbana, pero cabá más, ndabiama Bëngbe Bëtsá tojanma cháuatayenama, y mora Bëngbe Bëtsábe catšbioica yojtsetbemana, jamándama y puerte bëtsá chentše jtsemnama; y choca, chánaca bëngbiama Bëngbe Bëtsábioye ibotjanañe. <sup>35</sup> ¿Ndayá nanjobenaye Crístbentšana, chë tša šondababuanýeshanábentšana bënga jtsajuánayana? ¿Padecena soyënguiñe jtsemnana, tša jtsetsetšana, bënga chamosufrima ínýënga tmojtsama ora, tondaye saná shëntsana ora, tondaye entšayá tmontsábomna ora, o resjo bëngbiama tojtsemna ora, o bënga jtsëbáyama ínýënga tmojtseboše ora? <sup>36</sup> Ntšamo Bëngbe Bëtsábe uabemana palabrënguifne endayancá, canýe entšá Bëngbe Bëtsábioye ibojayana ora:

Acbe causa entšanga cada te šontsëtsëtsná bënga jt-sëbáyama ca;  
entšanga bëngbioye nýe ntšámna jtsaborlánana;  
bëngaftaca jamana mo chë jobáyama oveshëngaftaca mondbetsamcá ca.

<sup>37</sup> Pero ndoñe; nyetsca chë soyënguentšana bëngna ayénjanayëngama más tmonjábcana, cha bënga šuababuányëshanayeca. <sup>38</sup> Er atše tšabá sëndétatšëmbo tondaye yondobena, bënga Bëngbe Bëtsábentšana, chë tša šondababuanýeshanábentšana jtsajuánayana: masque ainënga o obanënga tmojtsemna; ni angelënga, ni amëndayënga chca jamama quemátobena; ni chë mora yojtséchnëjuana soyënga, ni chë más chcoye yochjopása soyënga; ni ndocna obenana cach ndoñe; <sup>39</sup> ndocna quem luarentša tsabanóca soye, ni quem luarentša tajsoica soye; ni ndocna inýe soye ntšamo Bëngbe Bëtsá tojamcá, quenátobena chca bënga jtsajuánayama. ¡Ndocna soye quenátobena bënga Bëngbe Bëtsábentšana, chë bënga šondababuanýeshanábentšana jtsajuánayana, chë Cristo Jesús Bëngbe Utabnáftaca Bëngbe Bëtsá šojanýanyé bonshánentšana!

### Bëngbe Bëtsá Israeloca entšanga tojabacacá, uámanënga chamotsemnama

**9** Atše, Crísoftaca cánýiñe mo canýacá quetsomñëcana, ntšamo sentsichamcá ndegombre endmëna; atše ndoñe quetsátsbostero. Atšbe ainanoca juabnënga, Uámana Espíritbeyeca jtsemandánëse, chë šmonybëuyana tšabá o ndoñe tšabá tijamama, šmontsatsëtsná atše ndoñe stsebosterama. <sup>2</sup> Ndegombre, atše puerte ngménaca atšbe entšangbiama, chë Israeloquëngbiama séntsemna y atšbe ainana tša šontsetsetše, chënga Jesucristbeñe jtsošbuáchiyama ndoñe quemátsboše causa. <sup>3</sup> Tšabá tojtsemnëse, atše stjobenaye jtsebošana cach atše Bëngbe Bëtsábeyeca nyetsca tescama castiganá y Crístbentšana luaroca jtsemnama, atšbe entšanga, chë cach atšcá buifne bomna entšanga jujabuáchama. <sup>4</sup> Chënga mondmëna chë Israeloca entšanga, chë Bëngbe Bëtsábe bocacana

entšanga. Bëngbe Bëtsá chënga chabe basengcá tojånabiama y chë tša bëtsá y uamaná cha yomnama chënga tojaninÿanÿé. Bëngbe Bëtsá ba soye chënga tojanabuayená ndayá cha chëngbiama yojånboše y ndayá chëngbiama jamama, y chë ley chëngbe cucuatšifne tojanáboshjona. Chënga monjántatšëmbo ntšamo Bëngbe Bëtsábioye ndegombre jadórana, y chënga mondbomna chë Bëngbe Bëtsabe šbuachenánana: chënga cha játsebacana. <sup>5</sup> Chënga mondmëna chë bëngbe tempsca uámana bëts taitangbentšánënga, y Crístnaca mo canÿe entšacá, mo canÿe Israeloca entšangbentšacá tojånabo; y cha endmëna Bëngbe Bëtsá, nÿetsca soyënguiñe mandayá. Nÿetsca entšanga nÿets tempo cha chamotsatschuaná. Chca chaotsemna.

<sup>6</sup> Atše ndoñe quetsátichamo, ndayá jamama tojanašebuachenacá ndoñe Bëngbe Bëtsá tonjama ca; er, nÿetsca Israeloca entšangbentšënga ndoñe Bëngbe Bëtsabe ndegombre entšanga quemátsmëna. <sup>7</sup> Ni nÿetsca Abrahámbentšana entšanga, ndoñe chabe ndegombre básenga quemátsmëna; er Bëngbe Bëtsá Abrahámbioye tbojaniana: “Chë ácbentšana entšanga nÿe Isaácbentšana mochanjabo ca.” <sup>8</sup> Chca entsayana, bëngna ndoñe šontsamna jtsejuabnayana Abrahámbentšana nÿetsca entšangbiama mo Bëngbe Bëtsabe basengcá; inÿetšá, nÿe chë Bëngbe Bëtsá tbojanšbuachenáyeca Abraham yojånabamna básengbiama cocayé entsemna jtsejuabnayana, Abrahámbentšana ndegombre entšanga bëtsemnama. <sup>9</sup> Er mëntšá endmëna ntšamo Bëngbe Bëtsá tojånayana, Abrahámbioye tbojanšbuachená ora: “Camëntšá tempo entsba uata chanjésabo, y Sara canÿe šešona bochantsebomna ca.”

<sup>10</sup> Pero nÿe nÿetšá ndoñe quenátsmëna. Chë Rebecbe uta básatna canÿe taitá ibnabomna, bëngbe tempsca bëts taitá Isaac. <sup>11-12</sup> Bëngbe Bëtsá, Rebécbioye tbojaniana: “Acbe mayor uaquiñá, acbe ngomënche uaquiñábioye bochanjasérvia ca.” Cha chca tojånayana jinÿinÿiyama chë básatbentšana canÿa cha tbojánbocacama, Jacob, y ndoñe chë inÿe basa, Esaú, chca jamama tempo cha tojanjuabóyeca. Rebécbioye chca tbojaniana chë básata cabá ndonÿna ora, y ni canÿe basa cabá ndocna soye ndama ora. Y chca, ntšamo tojanopasacana, tojanopasá chë básatbentšana canÿa y ndoñe chë inÿa chca chaotsemnama Bëngbe Bëtsá tbojanábuayanayeca, y ndoñe ndayá chata tbojanmama. <sup>13</sup> Ntšamo Bëngbe Bëtsá chabe uabemana palabrënguiñe tojanayancá: “Jacob sënjánbobonshana, y Esaú sënjanáboyënja ca.”

<sup>14</sup> Y asna, ¿ntšamo mochjayana? ¿Bëngbe Bëtsá ndoñe cachcá nÿetscángaftaca endëtsemna ca? ¿Ndoñe, ndegombre ndoñe! <sup>15</sup> Er Bëngbe Bëtsá Moisésbioye tbojaniana:

Atše šochanjóngmia nda chaitsebošabiama, y nda chaitsebošá chanjalastéma ca. <sup>16</sup> Y chca, Bëngbe Bëtsá canÿe entšá jabocacayana, ndoñe ndayá chë entšá tojtsebošama o tojamama, ndayá Bëngbe Bëtsá tbojalastemama. <sup>17</sup> Er Bëngbe Bëtsabe uabem-

ana palabrënguiñe, Faraón chë Egiptoca réybioye cha tbojaniana: “Atše rey tcbonjábema, tša bëtscá atšbe obenana yomnama nÿetscanga ácebeñe chayinÿanÿema, y nÿets luarentša entšanga atšbiama chamotatšëmbonama ca.” <sup>18</sup> Y chca, Bëngbe Bëtsá jalastémamana nda tojtsebošábioye, y nda tojtsebošábioye jalesénciana chabiama nduauenaná chaotsomñama.

<sup>19</sup> Pero ndánaca tšëngaftanguentšá šuatjatjaye: “Bëngbe Bëtsá chca tojtsamëse, ¿ntšamo cha nantsobena jayanana canÿe entšá bacna soye tojama ca? ¿Nda nanjobenaye chë ndayá Bëngbe Bëtsá tojtsebošama corente contra jtsemnana?” <sup>20</sup> Pero, nÿe entšá quecotsemñecá, ¿ntšamo catjobenaye tša uamaná comna ca jtsejuabnayana, Bëngbe Bëtsá jatstjanayama ndáyeca canÿe soye chca yojtsama ca? ¿Chë pormana soye chë chca tojamábioye buanjauyana: “¿ndáyeca chca šcojama ca?” <sup>21</sup> Chë fshantse soyënga pormayá jtsoobenana canÿe fshantsentšana jamana, canÿe matbaja uámana tescama, y inÿajna cada te chaotsoservénama. Cachcá, Bëngbe Bëtsá jtsoobenana jamana ntšamo cha tojtsebošcá, ndayá cha tojama sóyeca.

<sup>22</sup> Bëngbe Bëtsá yojáboše jinÿanÿiyama entšángaftaca tbojánetnama, chëngbe bacna soyëngama; y yojáboše cha puerte obená yomnama jinÿanÿiyama. Chiye-ca, chënga tša yojanëuantana, chënga chë ndëmuanÿengbiama Bëngbe Bëtsá yochjánayana chëngbe bacna soyëngama castigánënga jtsemnama yojánamna ca, chë ndëmuanÿenga jtsapochócama Bëngbe Bëtsá yojtsanprontana. <sup>23</sup> Y chánaca yojáboše jinÿanÿiyama cha puerte uamaná y bëtšá yomnama. Cha tojama, bënga chë ndëmuanÿenga cha šojanalastemá, chabe obenantšana y uamanantšana chamotsebomnama; y cha tempo chca tojanjuabó bënga uámanënga y bëtšétsanga jábiama-ma. <sup>24</sup> Bënga mondmëna chë ndëmuanÿenga Bëngbe Bëtsá chama šojánachembo, ínÿengna judío entšanguentšana, y ínÿengna ndoñe judiëngbentšana. <sup>25</sup> Ntšamo chabe uabemana palabrënguiñe, Oséasbe librésañe Bëngbe Bëtsá tojanayancá:

Entšanga ndoñe átsbënga mondmënënga, chënga “atšbe entšanga ca” chantsébobuatma; y canÿe luarentša entšanga ndoñe sënjánababuanÿeshanënga, chëngna “atšbe bonshánënga ca” chantsébobuatma.

<sup>26</sup> Y cach luare ndayentše Bëngbe Bëtsá tojånayana: “Tšëngaftanga atšbe entšanga ndoñe quešmátsmëna ca”,

cachentše Bëngbe Bëtsá ainá chënga echanjáuyana “atšbe básenga ca”. <sup>27</sup> Israeloca entšangbiama, Isaías jabuachana tojånayana:

Masque Israeloca entšanga puerte banga chamotsemna, nÿa mo chë mar béjayoca chënÿañe cascajca, Bëngbe Bëtsá nÿe báseftanga chentšana echanjátsebacaye;

<sup>28</sup> er, ndoñe bën y Bëngbe Utabná canÿe y nÿetsca tescama echanjayana,

nÿets quem luarentša entsangbiamá ndayá chënga tmojamama tšabá o ndoñe tšabá bëtsemnama, y chëngaftaca echanjama ntšamo chaojayancá ca —cha tojánayana. <sup>29</sup> Ntšamo Isaías tojanayancá, Bëngbe Bëtsá Israeloca entsangftaca ntšamo jama-ma tojanoyebuambá ora:

Bëngbe Utabná, nÿets obenana bomná,  
 ínÿenga bënga jtsapochócama cha tojanalesenciá ora,  
 báseftanga bëngbe entsanguentsënga ainënga chamotsomñama ndoñe matënjanmëse,  
 bënga mora pochocánënga mamojtsemna, mo chë Sodoma y Gomorra pueblëngoca entsangcá ca,  
 cha nÿetscanga y nÿetsca tescama tojtsanapochó-caye ca.

### Israeloca entsanga y chë tšabe noticiënga

<sup>30</sup> Chcasna, mora mëntšá mochjayana: ndoñe judiënga tondaye monjánama Bëngbe Bëtsabe bominiÿiñe tšábenga jtsemnama, pero cha tojanma chënga chabe bominiÿiñe tšábenga chamotsemnama, chënga chábeñe imojtsošbuáchiyama. <sup>31</sup> Pero, Israeloca entsanga imojánboše Bëngbe Bëtsabe bominiÿiñe tšábenga jtsemnama, ntšamo chë leyiñe iuayancá jtsamëse; pero ndoñe chca tmonjanobená. <sup>32</sup> ¿Y ndáye-ca chca? Co chë Bëngbe Bëtsabe bominiÿiñe tšábenga jtsemnama, chábeñe jtsošbuáchiyëse, chënga tondaye monjánama causa chca, sinó chca jtsemnama imojánboše nÿe ntšamo leyiñe iuayancá jtsamëse. Y chca, chëngna Jesús tmojtsanaboté, ntšamo chë Bëngbe Bëtsabe uabemana palabrënguiñe chë tmojtsanabotengbiamá endayancá, chëngbiamá cha yomna mo chë ndëtšbé ndayiñe chënga jtsojestjamcá ca. <sup>33</sup> Bëngbe Bëtsabe uabemana palabrënguiñe cha chca tojánayana:

Šmochjinÿe, atše sënjama Jerusalenentše canÿa chaotsemna, y cha endmëna mo ndëtšbecá ndayentše chënga mochjojestje,

y canÿe peñëscá ndayëse yochjama chënga chamotsótsatsáma;

pero nda chábeñe tojtsošbuaché, ndocna te nÿe bonamente queochátobatmana ca.

**10** Jesucristbeyeca catšátanga, atše nÿets ainánaca séntseboše y Bëngbe Bëtsá séntseimpadana, cha Israeloca entsanga cháuatsebacama. <sup>2</sup> Atše séndë-tatšëmbo y séntsobena chëngbiamá jayanama, chënga puerte mondboše Bëngbe Bëtsá jaserviama, pero ntšamo chënga yojtšesertancá, ntšamo Bëngbe Bëtsá jaserviama yojtšamnamna, ndoñe quenátšmëna ntšamo ndegombre yomncá. <sup>3</sup> Chënga ndoñe tonjanësertá ntšamo Bëngbe Bëtsá inétsama entsanga chabe bominiÿiñe tšábenga chamotsemnama, y cachënga tmojánguango ntšamo jamëse jobenayama Bëngbe Bëtsabe bominiÿiñe tšábenga jtsemnama; pero ndoñe chca tmonjanobená, chë entsanga chabe bominiÿiñe tšábenga chamotsemnama ntšamo Bëngbe Bëtsá inetsamcá ainánaca ntjoÿëngacñëcá. <sup>4</sup> Er Cristo tojama entsanga ndoñe chamondëtsama

ntšamo leyiñe iuayancá, Bëngbe Bëtsabe bominiÿiñe tšábenga jtsemnama, chca, chënga chamobenama chabe bominiÿiñe tšábenga jtsemnama, Crístbeñe jtsošbuáchiyëse.

<sup>5</sup> Chë Bëngbe Bëtsabe bominiÿiñe tšábenga jtsemnama bošëngbiamá, ntšamo leyiñe iuayancá jtsamëse, Moisés mëntšá tojánayana, chëngbiamá tojanábema ora: “Nda tojtsama nÿetsca mandënga ntšamo leyënguiñe endayancá, tšabe vida echántsebomna, nÿets tempo chë leyëngaca mandaná ca.” <sup>6</sup> Mëntšá endmëna ntšamo Bëngbe Bëtsabe uabemana palabrënguiñe iuayana, entsanga chabe bominiÿiñe tšábenga chamotsemnama ntšamo cha inétsamama, Jesucristbeñe jtsošbuáchiyëse: “Ndoñe cattsetjanaye: ‘¿Nda celoye yochjátsjua ca?’ (chca endmëna ndayá Cristo quem luaroye chaotsmama); <sup>7</sup> o, ‘¿Chë obanënga imomna luaroye yochjátsma ca?’ (chca endmëna ndayá Cristo chë obanënga imomna luarentšana chaotjuama).” <sup>8</sup> Ntšamo Bëngbe Bëtsabe uabemana palabrënguiñe iuayancá mëntšá endmëna: “Tšëngaftanga paselo šmotsobena ntšamo Bëngbe Bëtsá tojabuayenacá jouenama, tšëngaftanga ya chama palabrëngaca šmojoyebuambá y tšëngaftangbe ainaniñe chama šmojtsejuabná.” Chë buayenánana endmëna ndayá bënga ftsabuayiynacá, y chiñe endayana Jesucristbeñe jtsošbuáchiyama šojtsamna ca. <sup>9</sup> Chë buayenana soyënguiñe endayana, Jesús ndegombre Bëngbe Utabná yomna ca aca tcojayanëse, y Jesucristo cháuatayenama Bëngbe Bëtsá tojanmama, nÿets ainánaca tcojtsošbuáchese, Bëngbe Bëtsá cmochjatsbocá ca. <sup>10</sup> Er ainanoca bënga Jesucristbeñe jtsošbuáchiyana y Bëngbe Bëtsá jamana cachabe bominiÿiñe tšábenga chamotsemnama; palabrëngaca bënga jinÿanyiyana ndegombre Jesucristbeñe imojtsošbuáchema, y Bëngbe Bëtsá bënga játsebacana.

<sup>11</sup> Er Bëngbe Bëtsabe uabemana palabrënguiñe mëntšá endayana: “Nda Bëngbe Bëtsábeñe tojtsošbuaché, ndocna te nÿe bonamente queochátobatmana ca.” <sup>12</sup> Judiënga y ndoñe judiënga atsebácanënga mondmëna cach sóyeca, er canÿe Utabná nÿetscangbe Utabná endmëna, y cha tmojtsotšëmbuanëngbiamá, cha bëtscá jtsamana. <sup>13</sup> Er Bëngbe Bëtsabe uabemana palabrënguiñe mëntšá endayana: “Ndánaca Bëngbe Utabná tbojtsotšëmbuanábioye, cha bochanjatsbocá ca.” <sup>14</sup> Pero, ¿ntšamo cha mochjótšëmbona, chábeñe ndoñe tmontsošbuáchese? ¿Y ntšamo chábeñe mochtsošbuáchiye, chabiamá jóyebuambayama ndoñe tmonjouenëse? ¿Y ntšamo chabiamá mochjouena, chabe buayenana soyënga chënga jáuyanama ndocná tontsemnëse? <sup>15</sup> ¿Y ntšamo chabe buayenánana mochtsabuátambaye, chëngbioye jíchamuama ndocná tontsemnëse? Ntšamo Bëngbe Bëtsabe uabemana palabrënguiñe endayancá: “¡Tša tšabá chë buayenánana abuátambayënga tmojáshjajna ora ca!”

<sup>16</sup> Pero nÿetscanga chë tšabe noticiënga ndoñe ntjoÿeunayana. Cach Isaías mëntšá tojánayana: “Utabná, ¿nda chë mondabuayiyná soyënguiñe yojt-

sošbuaché ca?" <sup>17</sup> Chcasna, chë tšabe noticiënga joudenëse, entšanga jobenayana Jesucristbeñe jt-sošbuáchiyana; y nda Cristbiamana tojtsabuayiyase, entšanga chabe buayenánana joudenana.

<sup>18</sup> Pero atše šcotjá: ¿ndegombre nandmëna judiënga chë buayenánana ndoñe tmonjanuena ca? ¡Aíñe, chënga aíñe tmonjanuena! Ntšamo Bëngbe Bëtsabe uabemana palabrenguiñe endayancá, chë Bëngbe Bëtsabe buayenana soyëngama oyebuambnayëngbiama:

Chëngbe oyebuambnayana nyets quem luariñe tojshjango,

y chëngbe palabrenga nyets luarënguentša entšangbenache tojuáshana ca.

<sup>19</sup> Pero cachiñe šcotjá: ¿Israeloca entšanga chë buayenánana ndoñe tonjanësertá ca? Natsana, Moisés mëntšá tojánayana, chë ndoñe judiënga Jesucristbeñe tojtsosbuaché ora, ntšamo chë judiënga mochtsanjuabnayama tojanoyebuambá ora:

Atše, Bëngbe Bëtsá, chanjama, ndayá chë ndoñe judiënga chamojashjache soyëngama tšëngaftanga chašmotsiyentšbuašama, chënga chë ndoñe monjamana mo tšëngaftangcá atšbe entšanga.

Atše chca chanjama chëngaftaca, chënga chë tempo Bëngbe Bëtsabe soyëngama ndoñe tonjanësertá ca.

<sup>20</sup> Isaíasnaca, Bëngbe Bëtsabiamana tojanoyebuambá ora, puerte añémoca tojánayana:

Chë atše ndoñe šmondënguanga, šmonjinyëna;

y chë atšbiamana ndoñe mondënoticiangbioye sënjenonjinyé ca. <sup>21</sup> Pero Israeloca entšangbiama mëntšá tojánayana:

Nyets tempo atše tša sënjánama, chënga átšeftaca tšabá tempcá chamotsatsmënama,

pero chënga ndoñe chemátanbošena joudenama, y atšbe contra monjëtsemna ca.

### Bëngbe Bëtsá, Israeloca entšangbiama tšabe juabna yobomnama tojinjanyé

**11** Y as mora šcotjá: ¿Bëngbe Bëtsá chabe entšanga tojtsanëbaté? ¡Ndoñe, ndegombre ndoñe! Cach atše canye Israelocá sëndmëna, Abrahám-bentšana entšá y Benjaminbe bëts pamillentšana entšá. <sup>2</sup> Bëngbe Bëtsá chabe entšanga ndoñe tonjubaté, chë tempscana tojánabacacanga. Tšëngaftanga šmondëtatšëmbo ntšamo Bëngbe Bëtsabe uabemana palabrenguiñe endayancá, Bëngbe Bëtsabe juabna oyebuambnayá Elías, Israeloca entšangbe contra Bëngbe Bëtsábioye cha ibojanatsëtsná ora: <sup>3</sup> "Bëngbe Utabná, acbe juabna oyebuambnayënga tmojtsëbaye y acbiamana pormana altarënga tmojtsepochojá; nye atše vídaca tijoquedá, y chënga montseboše átšnaca jóbama ca." <sup>4</sup> Y mëntšá Bëngbe Bëtsá tbojanjuá: "Atše canyëfta uaranga boyabásenga atšbiamana sënjacuedá, Baal ndoñe tmonjadoranga, ndayá entšanga tmojobopormá y imojtsejuabná canye dios yomna ca." <sup>5</sup> Mór-naca cachcá entsemna, judiënguentše báseftanga monduájamna Jesucristbeñe ošbuáchiyënga, ndëmuanyënga Bëngbe Bëtsá tojabacacá, cha chëngbiama tšabe juabna bómnyeca. <sup>6</sup> Bëngbe Bëtsá entšan-

ga jabacacayana chëngbiama tšabe juabna bómnyeca; y ndoñe chca ntjamana ndayá entšanga tmojamama. Er ndayá tmojamama Bëngbe Bëtsá entšanga tojabacacase, cha nanjinyanjiye cha chca inétsama, ndoñe nye chëngbiama tšabe juabna bómnyeca.

<sup>7</sup> ¿Y asna? Israeloca entšanga ndoñe chemátaninyëna ntšamo Bëngbe Bëtsabe bominjiñe tšábënga jtsemnana, pero chënguentšënga básefta bocacánëngna aíñe tmojanobená. Bëngbe Bëtsá tojanalesenciá chë inyënga Israeloquënguentšana chabe buayenana soyënga ainaniñe ndoñe chamondóyëngacñama; <sup>8</sup> ntšamo Bëngbe Bëtsabe uabemana palabrenguiñe endayancá: "Bëngbe Bëtsá tojama chënga chabe soyëngama jósertama ndoñe chamondëtsobënama, y mëntscóñama chënga ndoñe quemátobëna chabe soyëngama ni jinýana ni josértana, mo nduabínýënga o nduauenanënga cuaftsemnëngcá ca." <sup>9</sup> Davidnaca chëngbiama mëntšá tojánayana:

Mo chë entšanga canye fiestentše oboyejuayënga, chëngbe uayayëngbeyeca nye ndeolpe ishëchenëngcá,

y mo chë bayëngbiama uachmaniñe ishëchenëngcá, chënga mal chamopasama chaomama Bëngbe Bëtsá sëntseimpadana, mo nda ndëtšbeñe cuaftsojestjca.

Chca Bëngbe Bëtsá chaoma, chëngbe bacna soyëngama;

y cha cháuyana chënga puerte castigánënga jtsemnana yojsamna ca, bacna soyënga tmojama causa;

<sup>10</sup> Bëngbe Bëtsá chaoma ntšamo mochjapásama chënga ndoñe chamondobená jtsetatšëmbuana,

y chaoma puerte chamosufrima, nyets tempo pade-cena soyënguiñe jtsiyenëse ca —cha tojánayana.

### Bëngbe Bëtsá ndoñe judiënga tojatsebacá

<sup>11</sup> As mora šcotjá: ¿Israeloca entšanga Bëngbe Bëtsá ndoñe tmonjanoyeuná ora, cha tojánayana chënga nyetsca tescama castigánënga jtsemnana yojsamna ca, ndocna inye soye chëngbiama ntsemncá? ¿Chëngbiama yojamna mo chë ndëtšbeñe jojéstjiana y jtëtsbanama ndoñe más ntjobenayancá? ¡Ndoñe, ndegombre ndoñe! Chca ndoñe quenátsmëna. Chënga Bëngbe Bëtsá ndoñe chematanoyeuná causa, ndoñe judiënga tmonjántatšëmbona ndayá bëtsemnana Bëngbe Bëtsábeyeca atsbocaná jtsemnana; y chë causa, mora, judiënga, ndayá chë ndoñe judiënga Bëngbe Bëtsábentšana tmojoshachiñcá montsiyentšbuaše. <sup>12</sup> Judiënga bacna soyënga tmojanma causa, inye entšanga quem luarentše tmojobená ba tšabe soyënga jtsebomnama. Chë judiënga tmonjanorrebajá causa, chë ndoñe judiënga ba tšabe bendicionënga Bëngbe Bëtsábentšana tmojoshachiñe. Y chca, chë bëtscá judiënga Bëngbe Bëtsá jätsebacama, chënga atsebácanënga chamojtsemna ora, más bëtscá tšabe bendicionënga Bëngbe Bëtsábentšana nyetsca entšangbiama echántsemna.

<sup>13</sup> Ntšamo mora chanjayancá, tšëngaftanga ndoñe judiëngbiama entsemna. Bëngbe Bëtsá šojichmó chabe soyëngama chë ndoñe judiënga jábuayenama;

atše sěntsejuabná puerte uámana trabajo stsebmna ca. <sup>14</sup> Atše sěntsobátmana, quem trabájoca atše jobenayana jamama chě cach atšcá buiñe bomna entšanguentšěnga, ndayá chě ndoñe judiěnga Běngbe Bětsábentšana tmojoshachiñcá chamotsiyentšbuase, y chca, ndayá tijamama, Běngbe Bětsá chěnguentsana bāseftanga cháuatsebacama. <sup>15</sup> Er chě judiěnga Běngbe Bětsá tojšanēbaté ora, cha tojanma inñe entšanga quem luarentše cháftaca tempcá tšabá chamotsatsmēnana; y chěnga cha chamojoyeuná ora, corente tšabá echántsemna, nña chěnga mo obaněnga cuabmēncá y cuaftsatayanēngcá. <sup>16</sup> Nda canñe arn-inñentšana chě natsana tanděše Běngbe Bětsabiama joserviama yojtsemna ca tojyaněse, jtsemnana mo nñetsana chabiama cuaftsemncá. Canñe betiyiñša tbětjěnga Běngbe Bětsabiama yojtsemna ca canña tojyaněse, nñetsca chě betiyiñša buacuafjěngnaca Běngbe Bětsabiama jtsemnana.

<sup>17</sup> Chě judiěnguentše bāseftanga Jesucristbeñe ndoñe montsanošbuaché ora, tšěngaftanga chě ndoñe judiěnga šmonjanobená chábeñe jtsošbuáchiyana. Y chca, judiěnga monjamna mo canñe jena olivo betiyiñša entšanga tmojatětše buacuafjěngcá, y tšěngaftangna mo tjoca olivo betiyiñša buacuafjěnga, chě jena olivo betiyeshiñe jeněfjěngcá. Mora tšěngaftanga Běngbe Bětsábentšana cachca tšabe soyěnga chě judiěngaftaca šmontsebmna, mo chě jena buacuafjěnga y cachentša buacuafjěnga cach tbětjěntšana lempe cuaftsoyěngacañcá. <sup>18</sup> Ndoñe šmattsenábotamnaye, tšěngaftanga Běngbe Bětsabe tšabe soyěnga šmojtsebmnama, chě Jesucristbeñe ndoñe montsanošbuaché judiěngbiama yojamna soyěnga. Šmochtsejuabnaye, buacuafjěngna chě tbětjěngayeca vida jtsebmnnana, y ndoñe tbětjěnga chě buacuafjěngayeca; cachcá, tšěngaftanga nñe Běngbe Bětsábeyeca chě tšabe soyěnga šmojtsebmna.

<sup>19</sup> Pero tšěngaftanga šmuatjayana: “Aíñe, pero Běngbe Bětsá bāsefta judiěnga tojanēbaté, Jesucristbeñe ndoñe montsanošbuaché causa; chíyeca bēnga fsējanobená mo buacuafjěnga betiyiñe jeněfjěngcá chca tšabe bendicioněnga Běngbe Bětsábentšana jójyēngacñana ca.” <sup>20</sup> Ndegombre, chěnga Jesucristbeñe ndoñe montsanošbuaché causa, mo buacuetětšeněfjěngcá tmonjanoquedá, pero Jesucristbeñe šmojtsošbuáchema, tšěngaftanga šmojoquedá Běngbe Bětsábentšana tšabe bendicioněnga jtsoyěngacañcá. Chcasna, chama ndoñe šmattsenábotamnaye; más tšabana cuedado jtsebmnnana. <sup>21</sup> Er Běngbe Bětsá, chě Jesucristbeñe ndoñe montsanošbuaché judiěnga, ndoñe tonjanaperdoná, y chěnga chabe entšanga bětsemnamna, monjamna mo cach betiyiñša buacuafjěngcá; tšěngaftanga, chě mo betiyiñe jena buacuafjěngcá šmomnēnga, cha cach ndoñe quecmochátaperdonaye, chábeñe ošbuáchiyana šmojt-sajbanase.

<sup>22</sup> Bětscá šmochtsejuabnaye Běngbe Bětsá puerte tšabia yomnana, pero cha tšatjayá yomnámna š-

mochtsejuabnaye; tšatjayá endmēna chě bacna soyěnga tmojtsamēngaftaca, pero tšěngaftangaftacna puerte tšabia. Cha tšěngaftangaftaca chca echántsemna, tšěngaftanga chca chašmojtsomerecēntscuana; pero ndoñesna, Běngbe Bětsá echanjama tšěngaftāngnaca mo buacuetětšeněfjěngcá chašmoquedama, chě tšabe bendicioněnga Běngbe Bětsábentšana ntsoyěngacañcá. <sup>23</sup> Y ntšamo mora imojtsejuabnacá chě judiěnga tmojatrocá y tmojontšé Jesucristbeñe jtsošbuáchiyana, chěngnaca cachiñe chě tšabe bendicioněnga Běngbe Bětsábentšana mochanjójyēngacñe, y mochántsemna mo betiyiñe jena buacuafjěngcá, er Běngbe Bětsá becá obenana endbmna jamama ntšamo chě judiěnga tempo imojanbmncá cachiñe chamotsatsbmnnama. <sup>24</sup> Chcasna, más paselo jtsemnana canñe jena olivo betiyiñša buacuatětšeněfja cach betiyiñe jétsjena, y ndoñe, chě tjoca olivos betiyiñša buacuafja canñe jena olivos betiyiñe chaójuama jájena. Cachcá, más paselo jtsemnana chě Jesucristbeñe ndoñe montsošbuaché judiěngbiama, jóntšana jtošbuáchiyana y tšabe bendicioněnga Běngbe Bětsábentšana jójyēngacñana, tšěngaftanga ndoñe judiěnga chě tempo Běngbe Bětsá ndoñe šmonjanábuatmēngbiama.

### Běngbe Bětsá nñetscāngaftaca puerte tšabia endmēna

<sup>25</sup> Jesucristbeyeca catsátanga, atše sěntseboše tšěngaftanga chašmotsetátšēmbo chě tempo Běngbe Bětsá entšanga ndoñe tonjaninñanyé soyēngama. Atše sěntseboše tšěngaftanga quem soyēngama chašmotsetátšēmbo, chca, tšěngaftanga ndoñe judiěnga chě judiěngbiama más uámaněnga šmomna ca ndoñe chašmondětsejuabnama. Ndayá Běngbe Bětsá tempo entšanga ndoñe tonjaninñanyecá, quem soye endmēna: Běngbe Bětsá tojalesenciá, nñe baseftatescama banga Israeloquēnga Běngbe Bětsabe soyěnga ainaniñe ndoñe chamondójyēngacñama; pero chca echántsemna, chě ndoñe judiěnguentše atsebācanēnga jtsamnama imomnēnga, atsebācanēnga chamojtsemnēntscuana. <sup>26</sup> Chca chaojopasá ora, nñetsca Israelentša entšanga atsebācanēnga mochántsemna; ntšamo Běngbe Bětsabe uabemana palabrenguiñe endayancá:

Entšangbe atsebacayá Israelocana echanjabo, y echanjama nñetsca Jacóbēbentšana entšanga ndoñe más vida chamondětsebmna, bacna soyěnga jtsamēse ca.

<sup>27</sup> Y mēntšá endmēna ntšamo chěngbiama chjašebuchená:

chěnga játsebacana, chěngbe bacna soyēngama chajjaperdónaye ora ca —chiñe endayana.

<sup>28</sup> Chě tšabe noticiěnga tmojtsanaboté causa, judiěnga Běngbe Bětsabe uayayēnga mondmēna, chca, tšěngaftangbe tšabiama chaotsemnama. Pero Běngbe Bětsá tojánabacacayeca, chěngnaca Běngbe Bětsabe bonshānēnga mondmēna, er Běngbe Bětsá chěngbe tempsca uámana bēts taitanga chca tojanašebuchená. <sup>29</sup> Chca endmēna, er Běngbe Bětsá ndocna

te juabna ntjatrócana; nyetscanga chabe entšanga chamotsemnama tojáchembënga, nyets tempo cha echántsababuanýeshana, y echanjama chéngbeñe tšabe bendicionënga chaotsemnama. <sup>30</sup> Tšëngaftanga ndoñe judiënga tempo ndoñe šmonjánama ntšamo Bëngbe Bëtsá inabošcá; y mora, Bëngbe Bëtsá tcmojalastemá, judiënga Bëngbe Bëtsá ndoñe tmonjoye-uná causa. <sup>31</sup> Cachcá, Bëngbe Bëtsá tšëngaftanga tcmojalastemama, judiënga montsemna chë Bëngbe Bëtsá ndoñe montsobedecënënga, chca, Bëngbe Bëtsá chéngnaca cháualastemama. <sup>32</sup> Er Bëngbe Bëtsá tojnyányé, cha ndoñe ntjoyeunayama juabnéngaca nyetscanga mandánënga imomnama, chca, nyetscanga jálastemama cha jobenayama.

<sup>33</sup> ¡Ndegombre, Bëngbe Bëtsá nyetscangbiama puerte tšabia endmëna, puerte osertaná y puerte obishjáchá! Ndocná quenátobena ínýenga jábuayenama ndayá Bëngbe Bëtsá jamama inetsejuabnycá, y ndocná quenátobena corente josértana ntšamo cha inet-samcá. <sup>34</sup> Ntšamo Bëngbe Bëtsabe uabemana palabrënguiñe endayancá:

Ndocná quenátstatšëmbo ntšamo Bëngbe Bëtsá inetsejuabnycá;

ndocná quenátobena cha jábuayenama ndayá jamana ibomnama.

<sup>35</sup> Ndocná quenátobena ndayánaca cha natsana jshatšetayana, chë tbojatšetabiama ndebená cha jatsmënama,

y chë ndebënama ndayánaca jtoiyama chabotsemnama ca.

<sup>36</sup> Er lempe cha tojama, lempe cha iútabna, y lempe chabiama yomna. ¡Nyetscanga nyetsca tescama cha chamotsatschuaná! Chca chaotsemna.

#### Ntšamo jtsiyenëse Bëngbe Bëtsá jtseservénama

**12** Chcasna, Jesucristbeyeca catsátanga, Bëngbe Bëtsá bënga ba soye šojalastemáyeca, puerte cbontsaimpadana, tšëngaftanga Bëngbe Bëtsá chašmëyana tša šmojtseboše lempe jamana chábioye jadórana ca, Bëngbe Bëtsá jadórana mo ndayá cuafjobacá y cuafjuatšëmboncá, mo cabá ainá cuaft-somñcá. Šmochjauyana tšëngaftanga sempre šmocht-sentšena cha servénana y jtsamëse cha tšabá bën-gaftaca chaotsemnama. As, chca chašmojtsama ora, ndegombre oyejuayá Bëngbe Bëtsá šmochántsebi-amnaye. <sup>2</sup> Ndoñe šmattsiyena jtsamëse ntšamo chë nyë quem luarama enójuabnaye entšanga monduamancá, y šmochjaleséncia Bëngbe Bëtsá mo tsëm entšangcá chácmbiamama, tšëngaftangbe ainana y juabna mo tsëmcá chaomëse. Chca, tšëngaftanga š-mochanjobenaye jtsejuabnayana y šmochántsetatšëmbo ntšamo Bëngbe Bëtsá yobošcá: ndayá tšabá yomna, chë ndayá cha oyejuayá ibnabema, y ndayá ya ndoñe yondopodena más tšabá jtsemnama.

<sup>3</sup> Ndayá Bëngbe Bëtsá atšbiama tšabá jtsejuab-nayëse šojatšetama, nyetsca tšëngaftanga cbochjáuyana, ndocná cachabiama chaondëtsejuabná más uamaná yomna ca, nyë ntsachetšá jtsejóuab-

nayana ibomna nyetšá. Más tšabá, cada ona cachabia-ma tšabá chaotsenojuabná, y chca chaotsenojuabná ntšamo chabe ošbuáchiyana yomncá, chca, chë Bëngbe Bëtsá tbojatšetá ošbuáchiyana chabiama chaotsetrabájama. <sup>4</sup> Er, ntšamo bënga cada ona mondbomna canýe cuerpo y chë cuerpiñe ba soyënga jtsebomnana, y nyetsca soyënga ndoñe cach soyama cuerpiñe ntoservénana, <sup>5</sup> cachcá bënga ošbuáchiyënga, masque bëtscanga imomna, Crísoftaca cánýiñe mo canýacá mondmënayeca, bënga mondmëna mo chabe cuerpo cuaftsemncá, y cada ona cánýiñe mo canýacá nyetscángaftaca.

<sup>6</sup> Bëngbe Bëtsá tojama bënga cada ona chamotse-bomnama ndoñe cachca chabe tšetana obenana, ntšamo Bëngbe Bëtsá cada ona bëngbe tšabiama inajuabnycá. Y chabe juábnaca bënga jtsóyebuambnaya-ma jtsobenama Bëngbe Bëtsá tojamëse, chca mocht-sama ntsachetšá chabeñe bëngbe ošbuáchiyana yomncá. <sup>7</sup> Ošbuáchiyënga bëtscá jaserviama bënga chamotsobenama Bëngbe Bëtsá tojamëse, chca mochtsama. Tšabá jtsabuátambayama bënga chamot-sobenama Bëngbe Bëtsá tojamëse, chca mochtsama. <sup>8</sup> Inýenga jañëmuama bënga chamotsobenama Bëngbe Bëtsá tojamëse, chca šontsamna. Lempe ntšamo bënga tmobomncá inýengbiámncaca chaotsemnama bënga jamama chamotsobenama Bëngbe Bëtsá tojamëse, nyets ainánaca chca šontsamna. Améndayënga jtsemnama bënga chamotsobenama Bëngbe Bëtsá tojamëse, šontsamna bëtscá jamana tšabá jtsaméndayama. Inýenga jálastemama bënga chamotsobenama Bëngbe Bëtsá tojamëse, šontsamna oyejuayënga chca jamana.

#### Ntšamo bënga Jesucristbeñe ošbuáchiyënga jtsamana šojtsamna

<sup>9</sup> Inýa chašmojtsebobonshana ora, nyets ainánaca chca šmochtsama. Ndayá yomna ndoñe tšabe soye š-mochtsaboté y chentšana šmochtsojuánañe; šmocht-sentšena ntšamo tšabá yomncá jtsamama.

<sup>10</sup> Cmontsamna nyetscanga puerte jtsebobonshá-nana, Jesucristbeyeca catsátanga quetsomñecá, chë ínýenga bëngbiama más uamanënga imomna ca jtsejuabnayëse.

<sup>11</sup> Ndoñe oyënjayënga šmattsemna, ndayá bëtscá Bëngbe Utabnabiama šmochtsetrabájaye; ainaniñe corente añemo jtsebomnëse, Bëngbe Utabná sempre šmochtseservenana.

<sup>12</sup> Tšëngaftanga Bëngbe Bëtsábeñe jtsošbuáchiyëse, chabeñe šmobatmánayeca, puerte oyejuayënga š-mochtsemna; padecena soyënguiñe chašmojtsach-nëjuana ora, puerte uantadënga šmochtsemna, y sempre Bëngbe Bëtsáftaca šmochtsencuëntaye.

<sup>13</sup> Bëngbe Bëtsabe entšanga opresido bomnënga š-mochjújabuache, y šmochtseprontana tšëngaftangbe yebnentše posada ínýenga júyentšamiama.

<sup>14</sup> Bëngbe Bëtsá šmochtseimpadana, chë tšëngaftanga chašmosufrima amëngbiama tšabe bendicionënga cha chaotsamama; aiñe, cha šmochjaimpáda tšabe

bendicionënga chëngbiamama chaotsamama, bacna soyënga ndoñe.

<sup>15</sup> Oyejuayënga ínÿengaftaca šmochtsemna, chënga oyejuayënga chamojtsemna ora; ngménaca šmochtsemna, ínÿenga ngméniñe chamojtsemna ora.

<sup>16</sup> Šmochtsiyena nÿetscanga jtsenëyeunanëse. Nÿe cach tšëngaftanga uámanënga ndoñe šmattsenobi-amnaye, sinó chë nduámanënga imomnéngaftaca tšabá mándbomnënga šmochtsemna. Ndoñe šmattsejuabnaye yapa osertánënga šmomna ca.

<sup>17</sup> Inÿenga bacá chacmojtaborlana ora, ndoñe šmattsatëchënguaye; corente šmochtsentšena ntšamo nÿetsca entšangbiamama tšabá yomncá jtsamama. <sup>18</sup> Ntsachetšá šmojobenacá, lempe šmochtsama natjémbana nÿetsca entšángaftaca jtsiyenama. <sup>19</sup> Atšbe bonshánënga, ínÿenga bacá chacmojtaborlana ora, ndoñe šmatjama chënga chë causa chamot-sesufrínama, ndayá Bëngbe Bëtsá šmochjaleséncia chënga cháucastigama; er Bëngbe Bëtsabe uabemana palabrenguñe cha tojánayana: “Atše chanjama chënga chamosufrima, ínÿenga chamosufrima tmojama causa; y chënga chanjácastigaye, ínÿengbioye bacá tmojaborlá causa ca.” <sup>20</sup> Chca játamamna, mëntšá šmochjama, ntšamo cachánaca tojanayancá:

Acbe uayayá tbojtseshëntsane, saná cochjacaredáda,

y tbojtsajuendase, cochjuáfsiye.

Chca chacojamëse, cochanjama cha puerte chaotsëuatja ntšamo tcmojaborlama,

y ainana corente chabotsetšena, mo chebana iñbenga chabe bestšasiñe cuafjacjacá ca. <sup>21</sup> Ndoñe šmatjaleséncia, ntšamo ndoñe tšabá tontsemncá tšëngaftanga chacmayénjanama. Chamna, ntšamo tšabá yomncá jtsamëse, chë ndoñe tšabe soye šmochjayëjaná.

**13** Nÿetsca entšanga entsamna jtsamana ntšamo chë amëndayënga tmojtsamëndacá, er ndocná obenana ntsebomnana, Bëngbe Bëtsá ndoñe chca tbonjalesenciase, y nÿe Bëngbe Bëtsá tojama amëndayënga obenana chamotsebomnana. <sup>2</sup> Chca, chë amëndayëngbe contra tmojtsemnënga, ntšamo chaotsemnana Bëngbe Bëtsá tojayancá contra chënga jtsemnana; y chca contra tmojtsemnënga, castigánënga mochántsemna; <sup>3</sup> er ntšamo tšabá yomncá amënga, ndoñe quenátamna ndayama chë amëndayënga jatebéuatjana, nÿe chë bacna soye amëngna aíñe. Tšëngaftanga šmojtseboše jtsiyenama chë amëndayëngbioye ntjatebéuatjácá; chcasna, ntšamo tšabá yomncá šmochtsama, y chë amëndayëngna tšabe bomínÿeca mochantsonÿaye ntšamo chašmojtsamcá; <sup>4</sup> er chë amëndayëngna Bëngbe Bëtsabe trabajo amënga mondmëna, tšëngaftangbe tšabiamama. Pero bacna soyënga šmojtsamëсна, cmontsamna jtsiyenana chë amëndayënga jtsebéuatjësë, er chënga jacistígama obenana mondbomna, y chca mondbët-sama. Chënga, Bëngbe Bëtsabe mándoca jayanana chë bacna soye amënga ndoñe tšabá tmonjama ca, y jamana chënga chamosufrima. <sup>5</sup> Chíyeca, jtseytana

ntšamo chë amëndayënga tmojtsichamcá jtsamana, pero ndoñe nÿe chë castigo ndoñe chašmondëtse-bomnana, ndoñe chca šmontsama causa, sinó chë ainanentšá tšabe juabnënga ntšamo tbojtsëtsëtsnacá joyeunayama yómnyeca. <sup>6</sup> Cachca soyëngama, amëndayëngbiamama impuesto tšëngaftanga jtsatsquécj-nayana; er chë amëndayënga Bëngbe Bëtsabe oservénënga mondmëna, ntšamo chiñe jtsamama tojtsamncá corente tmojtsentšena ora.

<sup>7</sup> Chcasna, tšëngaftanga šmochjáyentšbuachiye ntšamo chënga jtsebomnana tojtsamncá. Chë crocénana entšanga ayëngacayëngbioye, ndaye impuést-naca šmochtëbuénaye; chëngna šmochtsarrespectana ntšamo yomncá, y chënga uámanënga chamotsemnana šmochtsejuabnaye.

<sup>8</sup> Crocénana inÿa jëtsëntšabuáchiyama chacmojt-samnëse, nÿe ntoyicá ndoñe šmatjoquéda, nÿets tempo ndebénënga; nÿe quem soye sempre šmochtsama: nÿetscanga šmochtsenbobonshana; er nda ndëmua entšábioye tbojtsebobonshana, ya tojama ntšamo leyiñe yomandancá. <sup>9</sup> Quem mandënga, “acbe shema ínÿaftaca ndoñe cattseíngñaye, inÿa ndoñe catjóba, ndoñe catjatbëba, inÿa tojtsebomna soye ndoñe nÿe acbiama cattseboše”, y chë inÿe mandënga leyiñe lempe quem mandiñe entsemna: “Ndëmua entšánaca cochtsebobonshana ntšamo cach aca cuenobobonshancá”. <sup>10</sup> Nda ndëmua entšábioye tbojtsebobonshana, chábioye ndoñe bacá ntjabórlana; chca, ndánaca jtsebobonshánëse, entšá jamana lempe ntšamo leyiñe yomandancá.

<sup>11</sup> Chë soyënga cmontsamna jtsamana, er bënga mondtatšëmbo ya chë uámana tempiñe imojtsiyenana, chë mocna ora šojtsamna prontánënga jtsemnana, mo ocnayentšana cuafjofšenangcá, Jesucristo jaserviama jtsentšëñëse. Chca cmontsamna jamana, er chë Bëngbe Bëtsá bënga játsebacama te, mora ya más bécoñe entsemna, ntšamo chë Jesucristbeñe jtsošbuáchiyama tmonjanontšé ora enjamnama. <sup>12</sup> Mora bënga mondoyena canÿe luarentšë bëtscá bacna soyëngaca y ngmenánaca, y chca jtsemnana mo bënga nÿets tempo ibetiñe cuaftsajncá. Pero ya entsobeco chë Bëngbe Bëtsá bënga játsebacama te, mo chë ibetiñe ya jtsopochócama y binÿniñe ya jontšamcá. Chíyeca mochtsajbaná bacna soyënga amana, y mochtsiyena tšabe soyënga jtsamëse, Satanás játsjama y jáyëñjanama bënga jtseprontánëse, mo canÿe soldado jenéuyanama y inÿa jayénjanama ba soyënga tojenocjacá. <sup>13</sup> Ntšamo šojtsamncá mochtsiyena, ntšamo entšanga ndaye tšabe sóynaca jamama monduamancá, ínÿengbiamama lempe chaotsinÿnëse. Chcasna, ndoñe quešnatamna yapa tmoyënga ntsemnana, ndoñe fiestënguenache ndoñe tšabe soyënga ntsamana, ndoñe bacna soye boyabása o shembásaf-taca ntsamana y jenomándama ntsoyencá chca soyënga ndoñe ntsamana, nÿetscanga ndoñe cachcá ntsejuabnayama ndoñe ntsamana y ndoñe ínÿenga yapa ntsíyentšbuašana. <sup>14</sup> Chca játamamna, šmochtsiyena jtsamëse ntšamo Bëngbe Utabná Jesucristo endbet-

samcá, y ndoñe nye šmatjésejuabnaye jtsamana nye cach tšengaftanga tšabá jtsomñama juabnéngaca, ndayá tšengaftanga chašmotsamama chë juabnënguñe tojtsemncá.

**Ndoñe šmattsóyebuambnaye inye ošbuáchiyëngbe  
contra**

**14** Chë Jesucristbeñe nye batsatema ošbuáchiyënga tšabá šmochjúbuaja, y chéngaftaca ndoñe šmattsenatsëtsnaye ndayá aíñe o ndoñe jamana yontsamnama. <sup>2</sup> Er básefta ošbuáchiyënga corente imotátšëmbo chënga nye ndayánaca jasama imobenama, pero chë Jesucristbeñe nye batsatema ošbuáchiyëngna, ndocna mëntšena ntseyayana, er chënga jtsejuabnayana aíñe jasana canye bacna soye nántsemna ca. <sup>3</sup> Chë nyetsca saná sayënga ndoñe chamondëtsejuabná chë inye soyënga ndoñe mondëtseyayëngbiama, chë causa chënga más batšá uámanënga imomna ca; y chë ndaye soyënga ndoñe mondëtseyayëngna, chë nyetsca saná sayëngbe contra ndoñe chamondëtsoyebuambná, er Bëngbe Bëtsá chënga tojúbuaja mo chabe entšangcá. <sup>4</sup> Tšengaftanga ndoñe quecmátamna chë ínÿabe oservená ndoñe tšabá tonjama ca jatichámuana. Cachabe nduiño jtsemnana nda yochjayana cha tšabá o ndoñe tšabá tonjamama. Y chë oservená jamana ntšamo tbojtsemncá, er Bëngbe Utabná obenana endbomna cha chca chaotsamama.

<sup>5</sup> Báseftanga mondmëna, chënga jtsejuabnayana canye te inye tescama más uámana te yomna ca; pero ínÿengna jtsejuabnayana cada te cachcá iuámana ca. Y entsemna ndayá cada ona corente tšabá chaotsetátšëmbo, ntšamo yojuabnacá ndáyeca chca ca. <sup>6</sup> Nda tojtsejuabná canye te inye tescama más uámana te yomna ca, chca jamana Bëngbe Utabnábiama jtenójuaboyama. Y nda nyetsca saná tojtsesá, chca jamana Bëngbe Utabnábiama jtenójuaboyama, er cha Bëngbe Bëtsábioye chë sanama jëtschuayana; y nda tojtsejuabná sananga yomna y ošbuáchiyënga chcana chamotsesama Bëngbe Bëtsá ndoñe yondboše ca, cha chë soyënga ndoñe ntjasana, Bëngbe Utabnabiama jtenójuaboyama, y chánaca Bëngbe Bëtsábioye chë sanama jëtschuayana.

<sup>7</sup> Bënga ošbuáchiyënguentshana ndocná ainá ntsemnana nye cachabiama, ni jóbanaña nye cachabiama. <sup>8</sup> Bënga tmojtšiyenëse, Bëngbe Utabnabiama jtsiyenana; y tmojóbanëсна, Bëngbe Utabnabiama jóbanaña. Chca, masque ainënga o obanënga, bënga Bëngbe Utabnábënga jtsemnana. <sup>9</sup> Chama Cristo tojanóbana y Bëngbe Bëtsá tojanma cha cháuatayenama, cha Bëngbe Utabná chaotsemnana, ainëngbeñe y chë ya tmojóbanëngbeñe chaotsemándama.

<sup>10</sup> As, ¿ndáyeca tšengaftanguentšë báseftanga, catšátangbe contra jtsóyebuambnayana, ndayá chënga tmojtsamama? ¿Y ndáyeca ínÿenga tšengaftanguentšë jtsichámuana, catšátanga ndoñe uámanënga montsemna ca, ndayá chënga tmojtsamama? Er nyetscanga šontsamna Bëngbe Bëtsabe delante jash-

janguana, ntšamo cada ona tojëftsemcá tšabá o ndoñe tšabá bëtsemnana cha cháuyanama. <sup>11</sup> Er Bëngbe Bëtsabe uabemana palabrenguñe Bëngbe Utabná mëntšá tojánayana:

Ndegombre atšë ainá sëndëtsomñe, y chíyeca atšë šcojurá,

nyetscanga atšbe delante mochanjoshëntsaméntšä atšë jadórama,

y nyetscanga šmochanjauyana, “ndegombre aca Bëngbe Bëtsá condmëna ca”. <sup>12</sup> Chcasna, cada ona bënga šontsamna Bëngbe Bëtsá jauyanana ntšamo tmojamama ndáyeca chca ca.

**Ndoñe šmatjama inye ošbuáchiyënga bacna be-  
nachiñe chamótsatšama**

<sup>13</sup> Chíyeca, ya ndoñe quešnátamna ínÿengbe contra jtsóyebuambnayana. Chca játamamna, šmochtsejuabnaye y yejuana šmochtsantješna ndocna te tondaye ntjamana, ndayá chaoma Jesucristbeyeca acbe catšäta, chaojuabó y bacna soyënga chaoma. <sup>14</sup> Atšë sëndëtatšëmbo, mo canÿa Bëngbe Utabnáftaca cánÿiñe mo canÿacá quetsomñecá, ndocna soye yondmëna, nye cachabe ponto chaotsemna ndoñe tšabe soye. Pero canÿe entšá tojtsejuabná ndayánaca ndoñe tšabe soye yondmëna ca, ni jasama, ni jabojuama, chabiama cocayé chë soye nyets tempo jëftsemnana ndoñe tšabe soye. <sup>15</sup> Tšengaftanga inÿa becá šmojtsatsëtsná, inÿe soyënga tšabá endmëna jasama ca, y cha tojtsejuabná, chca soyënga jasama ndoñe tšabá yondmëna ca, pero tšengaftanga tša šmojtsatsá causa, cha chca soyënga tojase, y chentšana tbojtsebiona puerte bacna soye tojamama, chca, tšengaftanga jtsinÿanÿnayana ndoñe šmondoyena jtsamëse chë ínÿenga jtsababuánÿeshanëse. Nÿe tšengaftanga inÿe soyënga šmétsesayama ndoñe šmatjaleséncia chë soye chaoma inÿa, ndabiama Cristo tojanóbana, chë ndoñe ndegombre benachiñe chaoquedama. <sup>16</sup> Ndoñe šmatjaleséncia ndayá tšengaftanga tšabá šmétsamama, ínÿenga ndoñe tšabá tšengaftangbiama chamótsóyebuambnana. Chca šmochanjobenaye, ntšamo šmojtsamcá jtsajbanase, ínÿenga ndoñe tšabá tmontsoyebuambná ora. <sup>17</sup> Bëngbe Bëtsabe amëndayana bëngbeñe ndoñe quenátsmëna inÿe soyënga aíñe jasana o inÿe soyënga ndoñe, canÿe soye aíñe jofšiyana o inÿe soye ndoñe. Pero chabe amëndayana bëngbeñe aíñe endmëna jtsamana soyënga ndayama Bëngbe Bëtsá tojayana aíñe tšabá jamama yomna ca, cháftaca tempcá tšabá jtsatsmënanana y ainaniñe oyejuayana jtse-bomnana; y Uámana Espiritbeyeca bënga jobenayana chca jamana. <sup>18</sup> Y nda Cristbioye chca tbojtseservena, jamana Bëngbe Bëtsá cháftaca oyejuayá chaotsemnana, y entšangbe bominiñe tšabia jtsemnana.

<sup>19</sup> Sempre šontsamna tšabe soyënga jtsamana y chë soyëngaca chaopodé jamana nyetscanga natjëmbana chamótsiyenama, y ndaye sóynaca šmochtsama, ndayá ínÿenga cháujabuache Jesucristbeñe corente jtsošbuáchiyama y ainaniñe bëtscá añemo jtsebomnana. <sup>20</sup> Tšengaftanga ndaye sanánaca jasama šmobé-



nayeca, ndoñe šmatjama chaotsopochocama ndayá Bëngbe Bëtsá ainaniñe tojamcá. Ndegombre, nyetsca sananga tšabá jasama endmëna; pero ndayá tšëngaftanga šmojasama, inya bacna benachiñe chaótsatšama šmojamëse, chë soye cocayé ndoñe tšabá ntsemnana. <sup>21</sup> Tšabá endmëna mëntšena ndoñe ntjasana, vínoye ndoñe ntjofšiyana o ndayánaca ndoñe ntjamana, pero chë soye aíñe tcojama ora, Jesucristbeyeca canye catšata chaojuaboma y bacna soye chao-mama tojoservese.

<sup>22</sup> Asna, ntšamo tšëngaftanga chë soyëngama ndegombre šmošbuachecá, nye Bëngbe Bëtsá y tšëngaftangaftaca chaotsemna. Canye entšá ndegombre oyejuayá jtsemnana, canye soye jamama tšabá yomna ca tojtsejuabnase, y chë soye tojamentšana, ndoñe tšabá chca yonjamna ca juabnënga ainaniñe ndoñe tontsebomnëse. <sup>23</sup> Pero canye entšá ndayá tojamentšana tojayana, bacna soye tojama ca chë ndayá tojasama o tojamama, as Bëngbe Bëtsánaca echanjayana cha ndoñe tšabá tonjama ca, er ntšamo tojamcá ndoñe tonjama chë soye aíñe tšabá yomnama jtsošbuáchiyëse; y ndayánaca chca ora tojtsamëse, chca jamana bacna soye jtsemnana.

#### Ntšamo ínÿengbiamá tšabá tojtsemncá mochtsama, ndoñe nye bëngbiamá

**15** Bënga, chë Jesucristbeñe corente ošbuáchiyënga, šontsamna chë nye batšatema ošbuáchiyënga juabuáchana, chënga bacna soyënga tmojtsama ora, nye batsá ošbuáchiyana bomna causa; y ndoñe nye jatsënguayana nye ndaye soyëngaca yopodena bënga tšabá jtsemnana. <sup>2</sup> Cada ona bënga šontsamna jamana ntšamo cach bëngcá Jesucristbeñe ošbuachiyabiamá tšabá tojtsemncá, y ndayá cha oyejuayá chaotsemnana tojama soye. Chca šontsamna, cha más bëtscá Jesucristbeñe chaotsošbuáchema, y ainaniñe más añemo chaotsebomnana. <sup>3</sup> Er Cristo, ntšamo tojanmcá cach ndoñe tonjanma nye cha oyejuayá jtsemnana. Inyetsá, cháftaca tojanopasá ntšamo Bëngbe Bëtsabe uabemana palabrenguiñe endayancá, mo Cristo Bëngbe Bëtsáftaca cuaftsoyebuambnacá: "Ntšamo entšanga montsichamcá aca joyenguanguama, atše šmontsatsëtsná ca." <sup>4</sup> Er lempe ntšamo tempo Bëngbe Bëtsabe uabemana palabrenguiñe tmojanabemcá, bënga jabuátambama endmëna. Ndayá bënga chiñe tmojuatsjínÿama, bënga jt-sobenana padecena soyënguiñe tmojtsachnëjuana ora uantadënga jtsemnana, y ainaniñe más añemo jtse-bomnana; y chíyeca bënga montsobena, chábeñe jtsošbuáchiyëse, chábeñe jobátmana, ntšamo tojanayancá chaomama. <sup>5</sup> Atše, Bëngbe Bëtsá sëntseimpadana, nda inétsama bënga padecena soyënguiñe uantadënga chamotsemnana, y nda inétsama bënga ainaniñe más añemo chamotsebomnana, cha chaoma nyetscanga canye juabna chašmotsebomnana, ntšamo Cristo Jesús yojanjuabnacá tšëngaftanga jtsejuabnayëse; <sup>6</sup> cha chca chaoma, nyetsca tšëngaftanga mo cánÿiñe cuaftsemncá, y mo nyetscanga canye ora

cuaftjayancá, Bëngbe Bëtsá, Bëngbe Utabná Jesucristbe Taitá, puerte bëtsá y uamaná yomnama chašmuinÿanÿema.

#### Chë ndoñe judiëngbiámnaca chë tšabe noticiënga jtsemnana

<sup>7</sup> Nyetscanga oyejuayënga šmochjenofja, ntšamo Crístnaca tšëngaftanga tcmojanëbuajcá, chca, entšanga chamuinÿanÿé Bëngbe Bëtsá puerte bëtsá y obená yomnama. <sup>8</sup> Atše sëntseboše ndayá jayanana, Cristo tojánabo judiënga jabáserviama ca, chca, jinÿanÿiyama Bëngbe Bëtsá sempre inétsamama ntšamo tojašebuachenacá; tojánabo ntšamo Bëngbe Bëtsá bëngbe tempsca uamana bëts taitanga tojanašebuachenacá chaocumplima; <sup>9</sup> y Bëngbe Bëtsá puerte bëtsá yomna ca chë ndoñe judiëngnaca chamuayanámnaca, cha chënga inétsalastemanama, ntšamo Bëngbe Bëtsabe uabemana palabrenguiñe endayancá, y chca tojanocumplí:

Chíyeca, atše chë ndoñe judiëngbeñe chaitsemna ora, aca cbochantsatschuanaye, Bëngbe Bëtsá; y jacántase chanjayana aca puerte bëtsá y uamaná comna ca. <sup>10</sup> Inyoca mëntšá endayana:

Puerte oyejuayënga chë ndoñe judiënga šmochtsemna, Bëngbe Bëtsabe bocacana entšangaftaca cánÿiñe ca. <sup>11</sup> Y inÿoca mëntšá endayana:

Bëngbe Utabná šmochtsatschuanaye tšëngaftanga ndoñe judiënga,

y cha šmochtsatschuanaye nyetsca tšëngaftanga nyets luarënguenache entšanga ca. <sup>12</sup> Y Isaíasnaca Bëngbe Bëtsabe uabemana palabrenguiñe mëntšá tojanábema:

Canya Isaíbe entšanguentšana echanjabo, y Bëngbe Bëtsá chábioye uamaná bochanjábema, nyets luarënguenache entšanga chaotsamëndama, y chënga chábeñe jtsošbuáchiyëse, chábeñe mochantsobátmana tšabe soyënga chëngbiamá chaotsamama ca.

<sup>13</sup> Atše, Bëngbe Bëtsá sëntseimpadana, nda inétsama bënga chábeñe chamotsobátmanama tšabe soyënga bëngbiamá chaomama, cha chaoma tšëngaftanga ainaniñe puerte oyejuayënga chašmotsemnana y ainaniñe tšabe ebionana chašmotsebomnana, chábeñe jtsošbuáchiyëse; y Bëngbe Bëtsá chca tšëngaftangbiamá chaoma, tšëngaftanga cada te más chábeñe chašmotsobátmanama, chë Uamana Espíritbe obenánaca.

<sup>14</sup> Jesucristbeyeca atšbe catšátanga, atše corente sëndëtatšëmbo tšëngaftanga puerte tšábenga šmomnana, ndayá cmamnama corente šmotatšëmbuama, y jtsenbuayinayama šmobenámnaca. <sup>15-16</sup> Quem tsbuanáchañe básefta soyëngama sënjuábema, ntšamo šmatjatsjuabnayama atše ntjatauatjicá; chca sënjama, básefta soyëngama chašmuatenójuaboma; y chca sëntsobena juabemana, er Bëngbe Bëtsá tojama atše chaitsebomna chë uamana trabajo, Cristo jtseservë-nana, chë ndoñe judiënga jtsëjabuáchanëse. Atše bachnëcá sëntsoservena, Cristo stseservena ora,

entšanga tšabe noticiëngama jtsabuayiynayëse; atše chca sëndama chë ndoñe judiënga Jesucristbeñe chamotsošbuáchema, y ndayánaca chamotsamama Bëngbe Bëtsá oyejuayá chéngaftaca chaotsemnama, mo chabiama canye uatšëmbonancá. Chcánaca atše sëndama, ndoñe judiënga ndegombre Bëngbe Bët-sábenga chamotsemnama, chë Uámana Espíritbeyeca.

<sup>17</sup> Chca, atše Cristo Jesúseftaca cányiñe mo canyáca quetsomñecá, ndegombre sentsobena jtsejuabnayana ntšamo Cristo jasérviamá atše sëndamcá, puerte uámana soye yomnama. <sup>18</sup> Atše añemo séntsebonna nye chë ndayá Cristo átšeftaca tojamama jóyebuambayama, ndoñe judiënga Bëngbe Bëtsá chamóyeunama. Chca tonjopasá, ndayá tijayanama y tijamama, <sup>19</sup> chë Bëngbe Bëtsabe obenana jinñanñiyama bëts soyëngama, chë chabe obenánaca tojopasá tšabe soyëngama, y chë Uámana Espiritu bëts obenánaca tojama soyëngama. Y chca, Jerusalenocana jabojátšase, nyetsca luarënguëjana Iliria luaróntscoñe, Cristbe tšabe noticiëngama nyets luarënguenache entšanga tijabuayená. <sup>20</sup> Atše sempre canye soye inyë soyëngama más sënjanboše, y enjamna chë tšabe noticiëngama jábuayenana, entšanga ndocna te Cristbiamá oyebuambnayana tmonjanuena luarënguenache; y chca sënjanma, atše ndoñe játamama inya tojanbojatsé trabajo, mo inyabe bojatsëna yebnentše jajuama cuafjatontsecá. <sup>21</sup> Ntšamo Bëngbe Bëtsabe uabemana palabrënguñe endayancá, chë tempo Cristbiamá ndoñe tmonjanuëngbiama:

Chë ndëmuanyënga tempo ndocná chabiama tonjanabuayená, chënga tšabá mochanjinye ntšamo cha yomnana;

y chë ndocna te chabiama tmonjouenënga, chabe soyëngama echanjósertaye ca.

#### Pablo yojanjuabná Roma bëts puebloye jama

<sup>22</sup> Y nya chë causa, atše ndoñe chiyjobená tšëngaftangbiöye jana tšëngaftanga jányama, masque ba soye tsjenojuabná choye jama. <sup>23</sup> Pero mora atšbe trabajo quem luarënguñe sënjapochocá y tempscana tšëngaftanga jányama tša sëndánbošeyeca, <sup>24</sup> séntsejuabná mora aíñe chjobenaye choye jama, tšëngaftanga jautsëtsayama, chëjana chajachnëngo ora, España luaroye chaitsá ora. Y baseftayté tšëngaftangaftaca chjëftsemna, cbochjányama tšëngaftangaftaca oyejuayá; chentšana Diosmanda šmochjuájabuache, y lempe ntšamo chašojtsajabotcá šmochjátšetaye jobenayama Españoloye ayana jtétóntsama. <sup>25</sup> Morna Jerusalenoye chanjá, choca entšanga Bëngbe Bët-sábenga imomnënga jaujabuáchama; <sup>26</sup> er Jesucristbeñe ošbuáchiyënga Macedonia y Acaya luarentšënga, tmonjajuabó tšabá yojtsemna crocénana jájuabana chë Jerusalenoca entšanga, Bëngbe Bët-sábenga imomnënga y ndbomnëjémënga imomnënga jujabuáchama; y oyejuayënga chca tmonjama.

<sup>27</sup> Cachënga chca tmonjajuabó, y chca jamana tšabá endmëna, er judiënga tmonjanma, chë Bëngbe Bët-sábocana tmojanóyëngacñe soyënga ndoñe judiën-

gnaca chamotsebonnama; chíyeca ndoñe judiënga entsamna chë Jerusalenoca judiënga ošbuáchiyënga jujabuáchana, ndaye soyënga jatsatayëse, chënga vida jtsebonnama chamotsobenama. <sup>28</sup> Y chca, quem trabajo chajapochocá ora, y chë ndoñe judiënga ošbuáchiyënga lempe tmojátbanana chajjáftsayentšbuachiye ora, chanjontsé Españoloye jama, y tšëngaftangbiajana chanjachnëngo tšëngaftanga jáftsanñyama, tšëngaftangaftaca baseftayté jëftsemnama. <sup>29</sup> Atše corente séntsetatšëmbo tšëngaftangbiöye chajjá ora, chjášhjangó y chjama tšëngaftanga bëtscá tšabe bendicionënga Crístbentšana chašmotsebonnama, tondaye chacmondëtsabuáshebenëntscuana.

<sup>30</sup> Jesucristbeyeca catšátanga, Bëngbe Utabná Jesucristbeñe ošbuáchiyënga quetsomñecá, y bënga bonshánana chamotsebonnama chë Uámana Espiritu inétsamayeca, tšëngaftanga cbontsämpadana, bëtscá chašmotsentšëna Bëngbe Bëtsá nyets ainánaca jtseimpadánama, ntšamo atše sëndbetseimpadancá, cha atše chašotsinñenama. <sup>31</sup> Cha šmochtseimpadana chë Judea luaroca ndošbuáchiyënga ndocá chašmondëborlama, y chë Jerusalemocquënga Bëngbe Bët-sábenga, tšabá chamóyëngacñama ndayá chënga jujabuáchama chajjáftsayentšbuachiye ora. <sup>32</sup> Y chentšana, y Bëngbe Bëtsá chca chaojábosenëse, atše chayobená bëtscá oyejuayá tšëngaftangbioca jashjangana tšëngaftanga jányama, y tšëngaftangaftaca chaitsemna ora, batsá jóchnama chayobená. <sup>33</sup> Atše, Bëngbe Bëtsá séntseimpadana, nda inétsama bënga ainaniñe tšabe ebionana chamotsebonnama, nyetsca tšëngaftangaftaca chaotsemnama. Chca chaotsemna.

#### Ubuátmënga jacheuayama

**16** Atše séntseboše tšëngaftanga jáuyanana Febe, Jesucristbeyeca bëngbe uabena, canye tšabe entšá endmënama; cha chë Cencrea puebloca enefjuana ošbuáchiyënga endújabuachana. <sup>2</sup> Tšabá cha šmochjofja, mo canya Bëngbe Utabnábia quetsomñecá, ntšamo Bëngbe Bëtsabe entšanga entsamncá inyëngaftaca jenofjana. Šmochjuájabuache ntšamo tbojtsajabotcá, er cha banga tonjújabuache; átšbioynaca.

<sup>3</sup> Atšbe cuenta Prisca y Aquila šmochjácheuaye, chë átšeftaca tbonjatrabajata, Cristo Jesusbiamá ošervéniñe. <sup>4</sup> Jobanámna bonjanprontana, atše jatsbocama, ndoñe chašmondóbama. Atše chama chata sentsatacheuaná; y ndoñe nye atše, sinó nyets luarenache enefjuana ndoñe judiënga ošbuáchiyëngnaca chca. <sup>5</sup> Chë ošbuáchiyënga, chë Bëngbe Bëtsá jëtschuayama chatbe yebnentše jënefnama imuanéngnaca, šmochjácheuaye. Atšbe bonshana Epeneto šmochjachuaye; cha endmëna chë natsaná Asia luaroca Jesucristbeñe jtsošbuáchiyama. <sup>6</sup> María šmochjachuaye; cha tšëngaftangbeñe bëtscá tojatrabajá. <sup>7</sup> Chë cach atšcá judeocata Andrónico y Junias šmochjácheuaye. Chata canye ora átšeftaca cárceloye bonjanëtámëna, y Jesucristbe ichmónëngbiama chata puerte uámanata bonjamna, y atšbiamá más natsana tbojanontsé Jesucristbeñe jtsošbuáchiyama.

<sup>8</sup> Ampliato šmochjachuaye, atšbe bonshaná, er atšcá cha Běngbe Utabnáftaca cánŷiñe mo canŷacá bondmēna. <sup>9</sup> Urbano šmochjachuaye, chě bēngaftaca Cristbiamá oservēniñe trabajayá; y atšbe bonshana Estáquisnaca šmochjachuaye. <sup>10</sup> Apeles šmochjachuaye; cha ba soye tonjinŷanŷé Jesucristbeñe puerte yošbuáchema; y Aristóbulbe yebnentšēngnaca šmochjácheuaye. <sup>11</sup> Chě cach atšcá judeocá Herodión šmochjachuaye, y chě Narcisbe pamillentsana Běngbe Utabnábeñe ošbuachiyēngnaca. <sup>12</sup> Trifena y Trifosa šmochjácheuaye; chata Běngbe Utabnabiamá puerte bondētrabája; y bēngbe bonshaná Pérsidnaca šmochjachuaye; cha bētscá endētrabája, Běngbe Utabnabiamá oservēniñe. <sup>13</sup> Rufo, chě Běngbe Utabnabiamá uámana trabajayá, šmochjachuaye, y chabe mamánaca; cha mo atšbe mamacá endmēna. <sup>14</sup> Asíncrito, Flegonte, Hermes, Patrobas y Hermas šmochjácheuaye, y chě ínŷenga Jesucristbeñe ošbuáchiyēnga chēngaftaca imnénutanangnaca. <sup>15</sup> Filólogo y Julia, Nereo y chabe uabena, Olimpas y nŷetsca Běngbe Bētsabe entšanga chēngaftaca imnénutanangnaca šmochjácheuaye.

<sup>16</sup> Nŷetscanga mo Jesucristbeyeca catšatangcá šmochjenchuaye, jtenámochēse, ntšamo cach tšēngaftangbe pamillanga puerte bonshanánaca šmondetsacheuanaycá. Nŷets luarenache enefjuana Crístbeñe ošbuáchiyēnga cmontsacheuaná.

<sup>17</sup> Jesucristbeyeca catšátanga, atše cbontsaimpadana tšabá šmochjuáfšna y cuedado šmochtsebomna chě cánŷenga ínŷengaftaca contra chamotsemnama y ínŷenga Jesucristbeñe ošbuáchiyana chamotsajbanama imnētsamēngbiamá; chēngna, chě tšēngaftanga ndaye šmojóyēngacñe buatēmbana soyēngama contra jtsóyebuambnayana. <sup>18</sup> Er chca amēnga, ndoñe ntsentšénana Cristo Běngbe Utabná jtseservénana, sinó jtsamana ndayá cachēnga tmojtsebošcá, nŷe cachēngbe cuerpama tšabá tojtsemncá; y tšabe y botamana palabrēngaca chě paselo jáingñama yomna entšanga jáingñana, chēngbe ainaniñe chēngcá chamotsejuabnama. <sup>19</sup> Nŷetsca entšanga tmojouena, chě Běngbe Bētsabe soyēngama ntšamo ínŷenga tcmojabuatambacá, tšēngaftanga corente šmnétsayauanama, y chíyeca atše puerte oyejuayá tšēngaftangaftaca sēntsemna. Atše sēntseboše, tšēngaftanga tšabá chašmotsetátšēmbo jtsamana ntšamo tšabá yomncá, y ntšamo bacna soyēnga jamamna chašmotsemna mo ndoñe cuaftsetatšēmbcá. <sup>20</sup> Y Běngbe Bētsá, nda inétsama bēnga ainaniñe tšabe ebionana

chamotsebomnama, ndoñe bēn y echanjama tšēngaftanga Satanás chašmoyēñjanama, mo cha tšēngaftangbe cucuatšīñe cuafjaboshjoncá. Atše sēntseimpadana Běngbe Utabná Jesús, chaoma tšabe bendicionēnga tšēngaftangbeñe chaotsemnama.

<sup>21</sup> Timoteo, chě átšeftaca trabajayá, tšēngaftanga cmontsacheuaná; y Lucio, Jasón y Sosípater, cach atšcá Judeoquēnga, chēngnaca tšēngaftanga cmontsacheuaná.

<sup>22</sup> Atšnaca Tercio, chě Páblēbe cuenta quem tsbuanácha uabiamnayá, tšēngaftanga cbontsacheuaná, tšēngaftanga y átšnaca Běngbe Utabnáftaca cánŷiñe mo canŷacá quetsomñecá.

<sup>23</sup> Gayo cmontsacheuaná; atše Pablo chabe yebnentše posada sēntsebomna, y cha enduamana nŷetsca chě muentša ošbuáchiyēnga tšabá júbuajana. Erasto, chě quem pueblentša crocénana bojanŷá, tšēngaftanga cmontsacheuaná, y Jesucristbeyeca bēngbe catšata Cuártēnaca.

<sup>24</sup> Atše, Běngbe Utabná Jesucristo sēntseimpadana, cha chaoma tšēngaftangbeñe tšabe bendicionēnga chaotsemnama. Chca chaotsemna.

#### Quem tsbuanácha juapochócama, Pablo Běngbe Bētsábioye tbojtanchuá

<sup>25</sup> Bēnga sempre mochtsinŷanŷnaye Běngbe Bētsá puerte uamaná yomnama. Cha endobena jamama tšēngaftanga puerte chašmotsošbuáchema; y chca, cha echanjama ntšamo chě bēnga fsēndabuayiyná tšabe noticiēnguiñe yomncá, ntšamo chě Jesucristbe buayenana soyēnga yomncá, y ntšamo chě Běngbe Bētsá šojinŷanŷé ndegombre soyēnga yomncá. Nŷets tempo méntscoñama, Běngbe Bētsá chě soyēnga entšanga ndoñe tonjinŷanŷé, y chě causa chēnga chě soye ndoñe ntsetatšēmbuana. <sup>26</sup> Pero morna, ntšamo Běngbe Bētsabe juabna oyebuambnayēnga tmojanabemcá, tojama bētscá entšanga chě ndegombre soyēngama chamotsetatšēmbuama; Běngbe Bētsá, chě nŷets tempo vida bomná, tojanmandá entšanga nŷets luarēnguenache chě ndegombre soyēngama chamotsetatšēmbuama, chēnga chábeñe chamotsošbuáchema y ntšamo cha yobošcá chamotsamama.

<sup>27</sup> Nŷe canŷe Běngbe Bētsá endmēna, y cha nŷets osertánana endbomna. ¡Nŷetscanga chamotsinŷanŷná cha puerte bētsá y uamaná yomnama, ndayá Jesucristo tojanmama! Chca chaotsemna.

# 1 Corintios

## Pablo chënga jacheuayama

**1** Atše Pablo, ndábioye Bëngbe Bëtsá tbojanchembo Jesucristbe ichmoná jtsemnama, Bëngbe Bëtsá chca yojánbošeyeca, cánýiñe chë Jesucristbeyeca catšata Sósteneseftaca, <sup>2</sup> quem tsbuanácha sentsabi-  
amná tšëngaftanga chë Corinto bëts puebloca Jesucristbeñe ošbuáchiyëngbiama; ndëmuanýenga Cristo Jesúsfeftaca Bëngbe Bëtsá tojábiama chabe entšanga nýe chábioye oservénënga, ndëmuanýenga Bëngbe Bëtsá tojáchembo chabe entšanga chašmotsemnama, chë nýe quem luarama enójuabnaye entšanguentšana luarénënga, Bëngbe Utabná Jesucristbioye tmojtšëmbonëngaftaca, Jesucristo nda yomna Bëngbe Utabná y chëngbe Utabná. <sup>3</sup> Atše sentsaimpadana Bëngbe Bëtsá Bëngbe Taitá y Bëngbe Utabná Jesucristo, chaboma tšëngaftangbeñe tšabe bendicionënga chaotsemnama, y tšëngaftangbe ainaniñe tšabe ebionana chašmotsebonnama.

## Bëngbe Bëtsá Jesucristbeyeca tojama tšëngaftanga ba tšabe bendicionënga chašmotsebonnama

<sup>4</sup> Bëngbe Bëtsá tšëngaftangbiama sempre sëndbëtsatschuanaye, er tšëngaftanga cánýiñe mo canýacá Cristo Jesúsfeftaca šmómnyayeca, Bëngbe Bëtsá tšëngaftangbeñe tojajuabó, tšëngaftangbe tšabiama. <sup>5</sup> Chca Crístoftaca šmómnyayeca, Bëngbe Bëtsá tojama tšëngaftanga chašmotsebonnama chábensana nýetsca tšabe soyënga, tšëngaftanga obenana chašmotsebonnama cha jamëse, Bëngbe Bëtsabe soyëngama jóyebuambayama y chë soyëngama chacmésertama. <sup>6</sup> Chca, ntšamo cbonjanabuayiyacá mo Jesucristbe ndegombre soyëngcá, tšëngaftangnaca ínýëngbioye tšabá šmojinýanýé ndegombre soyënga bëtsemnama, chë ntšamo jtsiyenama. <sup>7</sup> Y chca, Bëngbe Bëtsá chabe entšanga inétsatšatnaye tšabe soyënguentsana tondaye quemochatabuáshebena, Bëngbe Utabná Jesucristo quem luarentše yochtonýna tescama Bëngbe Bëtsábeñe jtsošbuáchiyëse chašmojtšobátmanëntscuana. <sup>8</sup> Cha echanjama tšëngaftanga chábeñe corente chašmotsošbuáchemama y ainaniñe bëts añemo chašmotsebonnama, ndayá tšëngaftangaftaca jamama cha jojuabnacá chaojapochocantscuana; chca, chë Bëngbe Utabná Jesucristo nýetsca entšangbiama tšabá o ndoñe tšabá tmonjamama yochjayana te, ndocná chaondobená jayanana tšëngaftanga ndoñe tšabá šmonjama ca. <sup>9</sup> Bëngbe Bëtsá nýets tempo jtsamana ntšamo

tojašebuachenacá, y cha endmëna nda tcmojá-nachembo cánýiñe mo canýacá chašmotsemnama chabe Uaquiñá Jesucristoftaca, Bëngbe Utabná.

## Choca ošbuachiyëngbeñe nýetscanga ndoñe cachcá montsanjuabná

<sup>10</sup> Jesucristbeyeca atšbe catšátanga, tša cbontsaimpadana, chë ndayá Bëngbe Utabná Jesucristo nýetsca bëngbiama yomnama, tšëngaftanga nýetscanga cachcá chašmotsejuabnama, y tšëngaftangbeñe ndoñe más báseftanga canýe soye y ínýenga inýe soye chamuatsjuabná. Y aíñe šmochtsiyena mo canýacá, nýetscanga cachcá jtsejuabnaye y cachcá jamama jtsebošëse. <sup>11</sup> Jesucristbeyeca atšbe catšátanga, atšbe chca sënjayana, er Cloebe yebnentšënga šmonjabëunaye, tšëngaftangbeñe šmojtšenpenzentserama. <sup>12</sup> Ntšamo sentsichamcá entsemna ndayá tšëngaftangbentše báseftanga šmojtšichamo: “Atše Páblëbe ustóná sëndmëna ca”; ínýengna imojtsichamo: “Atšna Apólosbe ustóná sëndmëna ca”; ínýengna: “Atšna Pédrëbe ustóná sëndmëna ca”, y ínýengna: “Atšna Cristbe ustóná sëndmëna ca” imojtsichamo. <sup>13</sup> Chca šmojtšamama, jtšóbocanana mo cada básefta ošbuáchiyënga canýe Cristo tmojtšebomncá. ¿Pablo yojamna nda tmojancrucificá tšëngaftangbe tšabiama? ¿O tšëngaftanga uabáinënga šmomna, atšbe jótšëmbonëse, tšëngaftanga atšbe ústonënga bëtsemnama? <sup>14</sup> ¡Bëngbe Bëtsá sëndbëtsatschuanaye atšbe ndocná tšëngaftanguentsá tijanábayama; nýe Crispo y Gábioye aíñe! <sup>15</sup> Chca, ndocná quenátobena jayanana, atšbe jótšëmbonëse uabainá cha tojanoquedá ca, mo atšbeñe ošbuáchiyënga cuaftsemncá. <sup>16</sup> Estéfanabe pamillentsëngnaca sënjanëbaye, pero ndoñe quetsatabouínýna inýa tijanábayama. <sup>17</sup> Er Cristo ndoñe chešnatanichmó ínýenga jubáyama, ndayá chë chabe tšabe noticiëngama entšanga jábuayenama. Ndoñe chešnatanichmó chë soyënga jayanama, corente osertana entšangbe soyënga jtsichámëse; chca, entšanga Crístbeñe chamotsošbuáchemama, ndoñe chë atšbe osertánanentšana palabrengama, sinó nýe chë buayenánama, Cristo cruzoca bëngbiama tojanóbanama.

## Crístbeñe yomna Bëngbe Bëtsabe obenana y osertánana

<sup>18</sup> Quem buayenánana, Cristo entšangbiama cruzoca tojanóbanama, chë pochocánënga jtsemnama tmojtšajnëngbioye jtsinýanana mo ndoñe corente juabna bomnëngbe soyacá; pero bëngbiama, chë Bëngbe Bët-

sá nÿetsca tescama šochjátsebacangbiamna, quem buayenánana jtsinÿanÿayana Bëngbe Bëtsabe obe-nana. <sup>19</sup> Ntšamo Bëngbe Bëtsá chabe uabemana pal-abrënguiñe tojanayancá:

Atše chanjama chë tša osertánëngbe osertánana ton-dayama chaondëtsoservénama;

y chanjama chë ba soyëngama osertánëngbe osertá-nana tondayama chaondëtsámanama.

<sup>20</sup> ¿Ntsachetšá yojsámama chë tša osertaná y chë puerte uatsjinÿená tbojayana soyënga? ¿Ntsachetšá yojsámama chë tša tšabá chë soyëngama juabnayá, morscá, y ínÿengaftaca enatsétsnaye ora chëngbe ayënjanayá tojayana soyënga? Ndegombre Bëngbe Bëtsá tojinÿanÿé, chë quem luarentša bëts osertánana tmojayana soyënga tondaye yonduámanama.

<sup>21</sup> Bëngbe Bëtsá, nÿets osertánana bomná quet-somñecá y puerte tšabá jtsejuabnayëse, ndoñe ton-janaleenciá quem luarentšënga tšá osertánënga tmojánayana soyëngama. Chamna, cha tšabá tbo-janínÿnana chábeñe ošbuáchiyënga játsebacana chë bënga fsëndabuayiná soyëngama, masque ínÿeng-bioyna mo ndoñe corente juabna bomnabe soycá jtsinÿanana.

<sup>22</sup> Judiënga tša jtsebošana y Bëngbe Bëtsábioye jtsot-janañana bëts soyënga chaomama, chabe obenana jinÿanÿiyama; y ndoñe judiëngna tša jtsenguayana chë puerte osertánëngbe soyënga jtsetatšëmbuama.

<sup>23</sup> Pero bëngna Cristbiamna entšanga fsëndabuayiná, chë ínÿenga tmojanrucificabiamna. Quem buayená-nana chë judiënga ndoñe tšabá ntjéuénanana. Y ndoñe judiënga mondbétsejuabnaye chca yomna mo canÿe ndoñe corente juabna bomnabe soycá ca;

<sup>24</sup> pero bëngbiamna, nÿetscanga Bëngbe Bëtsá chabe entšanga chamotsemnama šojáchembëngbiamna, masque judiënga o ndoñe judiënga, Cristbeñe endmë-na nÿets Bëngbe Bëtsabe obenana y osertánana; <sup>25</sup> er ndayá Bëngbe Bëtsá tojanmcá, Cristo cruzoca chaóbanama jalesénciase, banga jtsinÿanana mo canÿe ndoñe corente juabna bomnabe soycá, pero ndegombre endmëna canÿe puerte más osertaná toja-ma soye, lempe ntšamo entšanga imotatšëmbuama. Y ndayá cha tojamcá masque bángbioye jtsinÿanana mo canÿe tondaye obenabe soycá, ndegombre chë soye jtsinÿanÿayana Bëngbe Bëtsá puerte más obenana yobomnama, nÿets obenana ntšamo entšanga imobomnama. <sup>26</sup> Jesucristbeyeca atšbe catšátanga, š-mochtsejuabnaye ntšamo yojamnama, Bëngbe Bëtsá chabe entšanga chašmotsemnama tcmojánachembo ora. Tšëngaftangbentše nÿe báseftanga tša osertánënga šmojamna, ntšamo chë osertánana bomnënga imomnama entšanga mondbetsejuabnacyá; y báseftanga šmojamna becá mando atšetanënga o uámana pamillentsënga. <sup>27</sup> Pero Bëngbe Bëtsá, quem luarentše ndoñe tša osertánënga tojanabacacá, chca, cha jama-ma chë quem luarentša soyëngama tša osertánënga chamotsëuatjama; y cha, quem luarentše ndobenënga tojanabacacá, chca, chë obenana bomnënga chamot-

sëuatjama. <sup>28</sup> Bëngbe Bëtsá quem luarentšana tojan-bocacá ndayá tondaye yonduamancá y ndayá ínÿenga imuabotencá; tojanbocacá ndayá tondaye yonduamancá, chca, ndayá quem luarentše tša iuamancá ton-daye chaondëtsámanama. <sup>29</sup> Y chca, Bëngbe Bëtsabe delante ndocná quenátobena jayanana tša bëtsá cha yomna ca. <sup>30</sup> Bëngbe Bëtsá tojama bënga Cristoftaca cánÿiñe mo canÿacá jtsemnëse chamotsiyenama, y chábeyeca tojama bënga chamóyëngacñama chabe osertánana bomna soyënga; chábeyeca tojama bënga tšábënga chabe bomínÿiñe chamotsemnama, chabe entšanga jtsemnama chamobenama, puerte tšábënga cach Bëngbe Bëtsacá, y atsebácanënga chamotsem-nama. <sup>31</sup> Y chca, ntšamo Bëngbe Bëtsabe uabemana palabrënguiñe endayancá: “Nda tojtseboše jayanama cha canÿe uamaná yomna ca, chamna más tšabá cha bontsemna jayanama Bëngbe Utabná puerte uamaná yomna ca.”

### Ntšamo Pablo Cristo crucificanábiamna chënga to-janabuayená

**2** Pero, Jesucristbeyeca atšbe catšátanga, Bëngbe Bëtsabe ndegombre soyëngama tšëngaftanga jábuayenama sënjána ora, chca sënjanma ndoñe chë uámanëngbe palabrëngaca, ni chë tša osertánëngbe palabrëngaca. <sup>2</sup> Y tšëngaftangftaca sënjamna ora, ndoñe quetstétseboše nÿe ndayíñnaca jatsjuab-nayana, ndayá nÿe Jesucristbeñe, nda bëngbe tšabiamna tmojanrucificá. <sup>3</sup> Atše tšëngaftangbeñe sënjamna, mo canÿa ba soyënga jamama ndobenacá, y mo canÿa puerte auatjacá y tbojtsengmëmnacá, chabe trabajo jamama ndoñe jobenayama juabnaye causa. <sup>4</sup> Ntšamo cbonjanëtsëtsná y cbonjanabuayinacá atše sën-janoyebuambá ndoñe chë tša osertánëngbe palabrëngaca, tšëngaftanga jáyënjanama chiñe chašmot-sošbuáchema; pero aíñe tcbonjanayënjaná, Bëngbe Bëtsabe Espiritu y chabe obenana tšëngaftanga jinÿanÿiyëse, <sup>5</sup> chca, tšëngaftanga Bëngbe Bëtsábeñe chašmotsošbuáchema, ndoñe nÿe entšangbe osertánana, sinó Bëngbe Bëtsabe obenanama.

### Uámana Espíritbeyeca, Bëngbe Bëtsá jamana entšan-ga cha chamotsábuatmama

<sup>6</sup> Pero, chë ya tmojashjáchënga Bëngbe Bëtsábeñe puerte jtsošbuáchiyama y chabe soyëngama corente jtsosertánama, chëngbeñe bënga fchandóyebuam-baye becá osertánana bomna soyënga. Pero ndoñe quenátsmëna quem luarentša entšanga quem tempo mondbétsichamo soyënga, ni mora quem luarentše amëndayëngbe soyënga, ndëmuanÿenga ndoñe bën y ndocna obenana bomnënga mochanjëftsoquëda. <sup>7</sup> Y aíñe, chë bënga fsëndoyebuambná osertánana bomna soyënga endmëna chë Bëngbe Bëtsá quem luarentša entšángbioye baytentscuana ndoñe tonjaninÿanÿé soyënga, y chca, entšanga baytentscuana chë soyënga ndoñe tmonjanábuatmana. Cha yojanjuabná chë soyënga chca yochtsanmënama, quem luare cabá cha

ndëma ora, y yojanjuabná, chë soyëngaca bënga mochtsanobena puerte bëtsétsanga y uámanënga jtsemnana, cháftaca chë nyetsca tescama yomna tšabe vida jtsebomnama. <sup>8</sup> Quem Bëngbe Bëtsabe puerte osertánana bomna soyënga endmëna canye soye ndayá quem luarentša amëndayënga ndoñe ntsësertánana, er chënga aíñe matënjancrucificá, Bëngbe Utabnábiye chënga ndoñe matmënjancrucificá, Bëngbe Utabná nda puerte bëtsá y uamaná yomna. <sup>9</sup> Bëngbe Bëtsabe uabemana palabrënguiñe quem Bëngbe Bëtsabe puerte osertánana bomna soyëngama mëntšá endayana:

Cha imobobonshánëngbiama Bëngbe Bëtsá tojaprontá soyënga,

ndocná tonjinye, ni tonjouena y ni mo tonjajuabó ca.

<sup>10</sup> Pero Bëngbe Bëtsá quem soyënga chabe Espíritoftaca bënga šojanyányé, er chë Espiritu lempe jtsetatšëmbuana, chë Bëngbe Bëtsabe soyëngama puerte totcá josértama yomna soyëngámna.

<sup>11</sup> Entšángbeñe ndocná quenátobena jtsetatšëmbuana ndayá entšabe ainaniñe tomnama, sinó nye chë entšabe espíritu, chë chábeñe yomná. Cachcá, nye Bëngbe Bëtsabe Espiritu jtsetatšëmbuana ndayá Bëngbe Bëtsá tojuabnacá. <sup>12</sup> Y bëngna, Bëngbe Bëtsábicocana Espiritu tmojóyëngacñe, ndoñe canye quem luarentša espíritu, chca, bënga chašósertama chë Bëngbe Bëtsá tojama bënga chamotsebomna soyëngama, bëngbe tšabiama cha jtsejuabnayëse.

<sup>13</sup> Bënga chë soyëngama fsëndoyebuambná, ndoñe chë quem luarentša entšángbentšana tifjuatsjinye osertánana bomna palabrëngaca, sinó chë Bëngbe Bëtsabe Espiritu šojabuatambá palabrëngaca. Chca, Bëngbe Bëtsábicocana soyëngama bënga fsëndabuayiná, Bëngbe Bëtsabe Espiritbentšana yóbocana palabrëngaca, chë Uámana Espiritu ainaniñe imobomnéngbioye.

<sup>14</sup> Bëngbe Bëtsabe Espiritu ndoñe tondbomná, chabe ainaniñe ndoñe ntjóyëngacñana chë Bëngbe Bëtsabe Espiritbocana yóbocana soyënga, er chë entšabiama chë soyënga jtsemnana mo canye ndoñe corente juabna bomnabe soyëngcá, y chabosertama cach ndoñe ntsobenana. Chca endmëna, er entsá jobenayana quem soyëngama jtsetatšëmbuama y josértama, nye chabe ainaniñe chë Uámana Espiritu tbojtsájabuachanëse. <sup>15</sup> Pero nda aíñe chë Espiritu tbojtsebomna jtsoobenana nyetsca soyënga tšabá jinýama chabosertama, y ndocná chë Espiritu ndoñe tbondbomná ntsobenana josértana ntšamo chë Espiritu bomná yomnama. <sup>16</sup> Er Bëngbe Bëtsabe uabemana palabrënguiñe mëntšá endayana: “Ndocná quenátabuata Bëngbe Utabnabe juabna, chábioye jabahtëmbama chaotsobenama ca.” Pero bënga, chë ošbuáchiyënga, mondobena jajuaboyana ntšamo Cristo yojuabnacá.

**Jatrabájama enutanánënga Bëngbe Bëtsá jasérviamá**

**3** Pero, Jesucristbeyeca atšbe catsátanga, atše ndoñe chiyatanobená jóyebuambayama, mo tšën-

gaftanga chë Uámana Espíritoftaca mandánënga šmojatsmëncá, sinó nye cachënga tšabá jtsomñama juabnënga bomna entšángbioycá, mo basetemëngbioycá, Cristbe soyëngama josértama ndobenënga. <sup>2</sup> Mo canye bebmácá, chabe basetëmbioye nye létšiyë jafšiyana y paselo jabmuánama sananga, chë básetema chcana jasama cabá ndoñe ntsobenana causa, cachcá, atše cbonjanabuatambá Bëngbe Bëtsabiama nye chë más paselo josértama soyëngama, y ndoñe inye soyënga más totcá josértama soyënga, er tšëngaftanga ndoñe quešmënjatobena chca soyëngama josértana. Y ni mora, tšëngaftanga quešmátobena Bëngbe Bëtsabe soyëngama josértana, chë josértama más totcá yomna soyëngama; <sup>3</sup> er tšëngaftanga cabá šmojtsama, nye ntšamo cach tšëngaftanga tšabá jtsomñama tšëngaftangbe juabnënga yomncá. Y tšëngaftanga inyëngaftaca cabá yapa šmojtsenántšaboše y nye inyëngbioye jayëñjanama soyënga šmojtsamëntscuana, tšëngaftanga šmojtsama nye ntšamo cach tšëngaftanga tšabá jtsomñama tšëngaftangbe juabnënga yomncá, y chca, tšëngaftanga šmojtsiyëna mo chë nye quem luarama enójuabnaye entšángcá. <sup>4</sup> Er canya: “Atšë Páblëbe ustoná sëndmëna ca”, y inýana: “Atšë Apólosbe ustoná sëndmëna ca” tojayana ora, chca jt samana mo chë nye quem luarama enójuabnaye entšángcá.

<sup>5</sup> Tšëngaftanga chca šmojamama, atšë šontsemna tšëngaftanga játjayana: ¿Ndayá Apolos yomna? ¿Ndayá Pablo? Chatna co nye Bëngbe Bëtsábioye oservénata bondmëna, ndátbeyeca tšëngaftanga Jesucristbeñe šmojtsošbuaché, y bëndata cada ona fsënjamá chë Bëngbe Bëtsá šojanyányé trabajo. <sup>6</sup> Atšna, mo nda jajañe jénaye cuafjuatbontsacá, tšëngaftangbeñe sënjanbojatsé chë trabajo, Bëngbe Bëtsabe soyëngama jábuayenama; y Apolos, mo nda chë jajañe matënguiñe béjaye cuaftsebuešcñacá, enjantrabája cach atšë sënjanbojatsé chiñe; pero Bëngbe Bëtsá, ntšamo matatëmënga chauájuaama endbetsamcá, tojama banga tšëngaftanguentšë Jesucristbeñe chamotsošbuáchema. <sup>7</sup> Ntšamo, chë jená y chë matënguiñe béjaye buešcñayá ndoñe yapa ntsámanana chiñe shajuanënga chaóbocnama, nye Bëngbe Bëtsá aíñe, cachcá, nda Bëngbe Bëtsabiama entšanga jábuayenama trabajo tojabojatsé y nda chentšana tojášhango cach trabajuiñe jóntšama, ndoñe ntjamana entšanga Jesucristbeñe chamotsošbuáchema; nye Bëngbe Bëtsá chca jamana. <sup>8</sup> Chë jená y chë matiñe béjaye buešcñayá cach trabajuiñe jtsentšëñana, y chatna mo trabajyatcá jtsámanana; y cada ona juacánana ntšamo chabe trabajo tomncá.

<sup>9</sup> Bëndata fsëndmëna trabájayata Bëngbe Bëtsabiama oservëniñe, y tšëngaftanga šmondmëna mo Bëngbe Bëtsabe jajañcá, ndayentšë cha yojtseboše tšabe jaja saná chaóbocnama, y šmondmëna mo chë cha yojtsejebuana bëts yebncá. <sup>10</sup> Er Bëngbe Bëtsá atšbe tšabiama jtsejuabnayëse, chë trabajo šojabonyé, y atše mo canye puerte tšabe jebuanacá, canye yebna ndayañe chaotsécuatjonama tojapormacá, sënjanbo-

jatsé chë trabajo, Bëngbe Bëtsabe soyëngama tšëngaftangbeñe jábuayenama. Chentsana inya, mo chë inye yebna jebuaná tojabojatsé jajebuama chiñe más jatsjebuama nda tojatontšecá, cach atše sënjanbojatsé trabajuiñe tojanontšé. Pero cada ona botamana chaot-santješna ntšamo chë trabajo yojtsamama. <sup>11</sup> Mo chë cánýabentsana inye trabajayacá, ndoñe ntšobenana chë yebna jajebuama tojanbojatsé cha chë yebna chaotséuatjonama tojanpormañe inye soye cachcá chaoservema jatspórmana, cachcá, ndocná chaondétsabatambá inye soyënga, nye ntšamo Jesucristbe soyënga yomncá aíñe, chë ntšamo atše nat-sana sënjanabuatambacá. <sup>12</sup> Chë Jesucristbiana más uámana soyënga buatëmbayá jtsemnana mo chë castellano, midio y inye uámana soyëngaca yebna jebuanacá; y chë Jesucristbiana nye nduámama soyënga buatëmbayana mo chë niñebenga, butsjésha y tšehenjéshca yebna jebuanacá. <sup>13</sup> Y Cristo chaojés-abo te, Bëngbe Bëtsá echanjínýanýiye ntšamo cada cánýabe trabajo yomnama. Cha chë te íñeshca chca echanjínýanýiye, y chë íñeshca, Bëngbe Bëtsá echan-jinýe y echanjínýanýiye ndaye trabajo cada ona toja-mama. <sup>14</sup> Ntšamo cada cánýabe trabajo yojtsámanama jtsetatšëmbuama Bëngbe Bëtsá chaojinýe ora, cha chabe trabajo aíñe yojtsámama ca queojayanése, chë tšabe trabajayá Bëngbe Bëtsábicocana canye uacanana soye echanjójyëngacñe, er cha jtsemnana mo canye entšacá, nda canye yebna tojtsejebuana jtsejuinýama ndoñe paselo tondmëna soyëngaca. <sup>15</sup> Pero chë te cánýabe trabajo nye batšá yojtsámanama Bëngbe Bëtsá íñeshca chaojinýanýese, chora chabe trabajo echántsemna mo chë jtsejuinýama paselo tomna soyëngaca jebuanabe soyëngcá, chentsana nyets yeb-na jtsejuinýana. Chë jebuaná jtsachana, pero chabe trabajo lempe jobuétsana. Cachcá, chë Bëngbe Bëtsabiana trabajo tojtsamá, nye batšá oservena tra-bajo, cha echanjobenaye atsbočaná jtsemnana, masque lempe ntšamo tojamcá tondaye queochaiso-quéda.

<sup>16</sup> ¿O tšëngaftanga ndoñe šmondétatšëmbo nyetscanga cánýiñe Jesucristbeñe ošbuachiyëngcá, mo chë Bëngbe Bëtsabe bëts yebncá šmomnama, y tšëngaftanguentše Bëngbe Bëtsabe Espiritu yomna-ma? <sup>17</sup> Nderado nda tojama, tšëngaftanga nyetscanga cánýiñe Jesucristbeñe ošbuachiyëngcá jtsemnana chaotsopochocama, Bëngbe Bëtsá chábioye bochantsepochóca, er chë Jesucristbeñe oš-buachiyëngcá cánýiñe imomnënga, jtsemnana mo chë Bëngbe Bëtsabe bëts yebncá, chabe entšanga nye chábioye jaserviama; y tšëngaftanga chca šmondmë-na.

<sup>18</sup> Ndocná cachá chaondétsenoíngña. Nderado nda tšëngaftanguentšá tojtsejuabná cha tša osertaná yomna ca, ntšamo quem luarentša entšanga mond-bétsejuabnaye ntšamo canye puerta osertaná inét-semnana, cha bontsemna jóbemama mo canya ndabi-ama quem luarentša entšanga chamuayana cha corente juabna ndbomná yomna ca, chca, ndegombre

corente osertaná jtsemnana chaobenama. <sup>19</sup> Er chë quem luarentša entšanga tša osertánënga imotátšëm-bo soyënga, Bëngbe Bëtsabe bominiñe yomna mo chë corente juabna ndbomnabe soycá. Bëngbe Bëtsabe uabemana palabrënguñe mëntšá endayana: “Bëngbe Bëtsá chë tša osertánënga jáyëñjanana, ndayá cachënga ínýenga jáingñama tša osertánáca tmojtsama soyëngaca ca.” <sup>20</sup> Y mëntšánaca endayana: “Bëngbe Utabná endétatšëmbo chë tša osertánëngbe juabnënga tondayama yondoservënama ca.” <sup>21</sup> Chiyeca, ndocná chaondétsichamo corente uamaná yomna ca, ndaye entšabe ustoná tomnama, er lempe ntšamo šmobomncá, Cristbeñe ošbuachiyënga bétsemnana, tšëngaftangbe tšabiana endmëna, y nyetscanga chë tcmojujabuachëngnaca cachcá. <sup>22</sup> Lempe tšëngaftangbe soye endétsomñe: ndayá Páblëbeyeca yomncá, Apólosbeyeca, Pédrëbeyeca, ndayá quem lu-arentše yomncá, ndayá yomncá ainá tcojtsemna ora, tcojóbana ora, ndayá mora yomncá y chë más chcoye yochtsemncánaca. <sup>23</sup> Y tšëngaftanga Cristbenga š-mondmëna, y Cristna Bëngbe Bëtsábía.

#### Jesucristbe ichmónëngbe trabajo

**4** Entšanga entsamna bëngbiana jtsejuabnayana bënga fstsemna Cristbe uajabuáchanënga y Bëngbe Bëtsabe soyëngama jtsabuátambayama tra-bajo bomnënga, chë Bëngbe Bëtsá baytentscuana entšángbioye ndoñe tonjaninýanýé, pero mora aíñe tojinýanýé soyënga jtsabuátambayama trabajo bom-nënga. <sup>2</sup> Chca, nda canye trabajo tojtsebojanýabi-amna, chabe mandayá jtsobátmanana cha aíñe tšabe palabra bomná chaotsemnana. <sup>3</sup> Atšbe bariëna, ton-daye quenatámama, ntšamo tijamcá šmojinýe y ndoñe tšabá tijama ca šmojayanése, o inye entšanga cachcá tmojayanése mo canye tribunaliñcá. Ni cach atše ndoñe chca quetsátama, jtsetatšëmbuana ntšamo at-šbe trabajuama tijayancá ndegombre tayojtsemnana. <sup>4</sup> Atšbe ainaniñe ndocna juabna quetsátsbomna atše chašuyanama bacna soye tijama ca, pero chca ndoñe quenátayana, ndegombre Bëngbe Bëtsabe delante ndocna bacna soye ndbomná atše stsemna ca. Er Bëngbe Utabná endmëna nda atšbe trabajo yonýa y nda ndegombre yobena jayanama atše tšabá o ndoñe tšabá tijamama. <sup>5</sup> Chiyeca, tšëngaftanga ndoñe quecmátamna jinýana y jayanana ínýenga ndoñe tšabá tmonjama ca, chë nya chama tempo cabá ndóshjanguëntscuana, Bëngbe Utabná chama chao-jésabo ora. Cha chaojésabo ora, puerta tšabá echan-jínýanýiye chë iytëmcá yomna soyëngama, mo ibetiñe cuaftsemncá, y botamana echanjínýanýiye, mo binýniñcá, ndayá jamama nye chëngbe ainanoca entšanga tmojajuabocá. Y chora Bëngbe Bëtsá cada entšabiana echanjayana tšabe soyënga, ntšamo tbojt-somerecencá.

<sup>6</sup> Jesucristbeyeca atšbe catsátanga, chë soyëngama tšabá jábuayenamna, atše sënjama ntšamo Apolos y atše tifjatrabájama botamana chašminýama, y chca sënjama tšëngaftangbe tšabiana, ntšamo bëndata tif-

jamentšana chašmuatsjínýama jtsiyenana nýe ntšamo Bèngbe Bètsabe uabemana palabrenguine iuayancá, y ndocná tšèngaftanguentšá canýe entšabíama chaot-senábótamnaye, y ínýabíama ndoñe tšabá chauátoyebuambnama. <sup>7</sup> Er, ¿nda chë ínýengbíama más uámanènga tšèngaftanga cmojtsabíamná? ¿Y ndayá šmobomna, Bèngbe Bètsá ndoñe tcmónjatsatá soye? Y tšèngaftanga chca chašmotsebmomna cha tojanmèse, ¿ndáyeca šmojtsenabotamná mo Bèngbe Bètsabe tšetana soyènga ndoñe tontsemncá, y nýe cach tšèngaftangbeyeca šmojonýencá?

<sup>8</sup> Tšèngaftanga šmojtsejuabná ya lempe ntšamo cmèjabotcá Bèngbe Bètsábíocana šmojtsebmomna ca, y lempe ntšamo jtsebošama šmojtsobencánaca ca. Mo reyènga cuaftsemnèngcá cmojtsabiona, béngbentšana tondaye ntšèjabotcá. Malaye tšèngaftanga mo reyèngcá šmojtsemna, Crístoftaca cánýiñe jtsemándayèse; chca, béngnaca tšèngaftangaftaca jtsemnama, cánýiñe jtsemándayèse. <sup>9</sup> Atše šontsinýana, bènga chë Crístbe íchmónènga Bèngbe Bètsá šojábíama mo chë nýetscangbíama más nduamanèngcá, mo chë jóbanama yojtsamna entšangcá. Nýetscanga chë Bèngbe Bètsá tojábíamènga béngbioye jtsénýayana mo ndoñe cachca entšanga fstsemncá; angelènga y entšángnaca cachcá béngaftaca montsama. <sup>10</sup> Bènga, Crístbíama oservena causa, quem luarentša entšangbíama fsèntsinýna mo corente juabna ndbomnèngcá; chë cuenta, tšèngaftanga šmojtsejuabná Crístbe soyèngama corente osertánènga šmomna ca. Bènga fsèndmèna chë entšangbe bominiñe ndocna obenana ndbomnènga; y tšèngaftangna šmojtsejuabná puerte obenana bomnènga šmomna ca. Tšèngaftangbioye ínýenga puerte uámanènga y bètsétsanga jtsabíamnayana, pero chènga béngbioye jtsébuayènjana. <sup>11</sup> Y méntscoñama, bènga šontsabuashebebiana saná, ndayá jofšiyama y entšayá. Entšanga béngbioye bacá jtsaborlánana, y tondaye yebna queftsátsbmomna. <sup>12</sup> Y bènga puerte jabuache fsèndètrabája cach béngbe cucuatšèngaca. Entšanga šojóyanguango ora, Bèngbe Bètsá fchandbétseimpadana cha chaoma chènga tšabe bendicionènga chamotsebmomna. Bènga chamosufrima ínýenga tmojtsama ora, bènga chë soye fchandbétsoyoyaye. <sup>13</sup> Inýenga béngbíama bacá tmojtsoyebuambná ora, jtsababuánýeshanèse fsènduamana jtèjuana. Quem luarentša entšangbe bominiñe bènga jtsemnana chë puerte nduámanènga, mo chë quem luarentša basurèshèngcá, chë quem luarentša entšanga tondayama ndoservénènga, mo chë quem luarentša tsengacá; y chca endmèna méntscoñama.

<sup>14</sup> Quem soyènga ndoñe quecbatèbuabíamná tšèngaftanga chašmotsèuatjama, sinó ndayá jábuayenama mo cach atšbe basèngbioycá, atšbe bonshánènga.

<sup>15</sup> Er masque tšèngaftanga mallajta abuátambayènga chašmotsóbomñe, jacúntama ntjobenaycá, Crístbíama chacmotsabuátambama, ndoñe banga quešmátambama tšèngaftangbíama mo taitangcá, Crísto Jesúsbeñe jtsošbuáchiyama tcmójanéjabuachama. Nýe atše

sèndmèna mo taitacá tšèngaftangbíama, mo osbuachiyèngcá, er atše natsana tcbonjanabuayená chë tšabe noticiènga Jesucristbíama, y tšèngaftanga chiñe šmontsanošbuaché. <sup>16</sup> Chíyecna, cbontsaimpadana ntšamo atše tijamcá chašmotsamama.

<sup>17</sup> Chama Timoteo tšèngaftangbioye sèntsichamná, atšbe bonshaná, canýe aíñe tšabe palabra bomná; Bèngbe Utabnábeñe tojanošbuachéyeca, atše Crístbíama sènjambuayíyná ora, mo atšbe uaquiñacánaca cha endmèna, ntšamo chabe ošbuáchiyana yomnama. Cha echanjama tšèngaftanga chašmuatenójuaboma ntšamo atše tšèngaftangbeñe tsjoyenama, Crístbeñe ošbuachiyacá, ndayama atše nýets tempo osbuáchiyènga sèndbetsabuatambaycá nýets luare osbuáchiyènga enefjuanenache. <sup>18</sup> Tšèngaftanguentše báseftanga ya šmojatsjuabná puerte uámanènga šmojtsemna ca, er šmojtsejuabná atše stsauatja tšèngaftangbioye jama jányama ca. <sup>19</sup> Pero Bèngbe Bètsá chašojalesenciase, sèntsobátmana betscó tšèngaftangbioye jama jányama. As chjinye ntsache obenana imobomna chë Bèngbe Bètsabe entšangcá jtsiyenama tša uámanènga imomna ca juabnayènga, y ndoñe nýe ntšamo jayanama imobencá. <sup>20</sup> Er Bèngbe Bètsá canýe ošbuachiyabe ainaniñe tojtsemánda ora, chca jtsinýnana ndoñe nýe ntšamo tojtsichámuama, ndayá Bèngbe Bètsabe obenana chábeñe tojtsemnama. <sup>21</sup> ¿Tšèngaftanga ndayá más šmattseboše: atše chayá tšèngaftangbioye jaucácanama, o chayá tšèngaftangbioye jányama puerte bonshanánaca y ntsetšatjaycá tšèngaftanga jauyanama?

**Ndayá cuanjama canýe boyabása shembásaftaca bacna soye amáftaca**

**5** Ndegombre nýets luariñe entsótatšèmbó tšèngaftanguentše yojtsemna canýa, shembásaftaca bacna soye amá, y ntšamo cha yojtsamcá puerte bacna soye yojtsemna; ni chë Bèngbe Bètsábíoye nduabuátmènga chca ntsamana: canýe entšá cachabe mamnáftaca bacna soye yojtsama. <sup>2</sup> Y tšèngaftanga cabá šmojatsjuabná corente tšábènga šmomna ca, masque chca tšèngaftangbeñe yojtsopasánèse. Tšèngaftanga cmontsamna puerte ngménaca jtsemnana, tša uabouana soye cha yojtsama causa. Canýe entšá chca tojamáftacna, tšèngaftanga cmontsamna jamana cha ndoñe más tšèngaftangaftaca chaondenútanama mo ošbuachiyacá. <sup>3</sup> Y atšna, masque tšèngaftangaftaca choca ndoñe quetsátsmèna, atšbe juabna choca tšèngaftangaftaca entsemna; y chca atšbe espíritoca séntsemnayeca, Bèngbe Utabná šojèftsanatšetá mándoca, sènjajuabó y séntsetatšèmbó ntšamo tšèngaftanga cmojtsamnana, chë entšá chca tojamáftaca. <sup>4</sup> Tšèngaftanga chašmojénefjna ora, chentše atšbe espíritoca tšèngaftangaftaca atše chántsemna, y atšbe espíritu chentše echántsemna Bèngbe Utabná Jesúsbe obenánaca. <sup>5</sup> Y chora tšèngaftanga cmontsamna jamándana chë entšá ya ndoñe más tšèngaftangaftaca mo ošbuachiyacá chaondenútanama, mo Satanasbe cucuatšíñe cha cuafjaboshjoncá, chca, chë quem



entšá nÿe cachá tšabá jtsomñama juabnënga chaot-sopochocama, y chca, Bëngbe Utabná cachiñe chao-jésabo ora, chabe espíritu atsbocaná chaotsemnama.

<sup>6</sup> Tšëngaftanga šmojtsejuabná puerte tšábënga y uá-manënga šmomna ca, pero šmojtseleséncia canÿa tšëngaftanguentše chca chaotsamama. Chca ndoñe tšabá quenátsmëna. Tšëngaftanga ya šmondétatšëmbo, ntšamo chë nÿe batšá levadura endbama, nÿets arninÿá chauábochema; cachcá, tšëngaftanguentše canÿa tša bacna soye chca tojama ora, nÿetscangbiama ndoñe tšabe soyënga jóbocnana. <sup>7</sup> Chíyeca, tšëngaftanga cmontsamna, chca uabouana bacna soye tojamá jtabocnana, cha ya ndoñe más tšëngaftangaftaca mo ošbuachiyacá chaondenútanama; y chora tšëngaftanga šmochántsemna mo tsëm arninÿacá, ndocna levadúraca, chë bacna juabnéngaca ya ndëmandánënga šmojtsemmayeca. Ndegombre tšëngaftanga chca š-mondmëna, er Bëngbe Bëtsá tojama tšëngaftanga tsëm vida chašmotsebmnama. Bashco fiesta ora, oveshá tmojanóba, Israeloca entšanga perdonánënga chamotsemnama. Cachcá Cristo, mo chë oveshacá, tojanóbana bacna soyënguentshana bënga játsebacama. <sup>8</sup> Ntšamo chë judiënga chë fiesta ora mondbamcá, nÿets levadura ojamnana cachcá jonÿayana, cachcá, bënga šontsamna jtsajbanana oyenana bacna soyënga ínÿengbiama jamama jtsebošëse, y ndaye bacna soye jtsamëse, ntšamo tempo imojanamcá. Ntšamo chë judiënga chë fiestiñe nÿe levadúraca ndëpormana tandëse mondbetsesaycá, cachcá, bënga šontsamna jtsiyenana nÿetsca soyënga ainaniñe ndocna bacna juábna jtsamëse, y ndegombre yomncá jtsóye-buambnayëse y jtsamëse.

<sup>9</sup> Chë inÿe atšbe tsbuanáchañe tcbonjáuyana, chë boyabása o shembásaftaca bacna soye amëngaftaca tondayama chašmondëtsencuénta ca. <sup>10</sup> Y chca ndoñe quetstétseboše jáuyanana nÿa tondayama chašmondëtsoyebuambná nÿetsca chë quem luarentšënga boyabása o shembásaftaca bacna soye amëngaftaca, chë nÿe cachëngbiama bëtscá soyënga jtsebmnama tša bošëngaftaca y atbëbanëngaftaca, y chë cachëngbe pormana soyënga diosënga yomnama jtsejuabnayëse adoraýëngaftaca ca; er nÿa chca jamamna, tšëngaftanga cmattsamna quem luarentšana jéftsebo-canana. <sup>11</sup> Ntšamo chora sënjanayancá endmëna ndayá tondayama ntsencuéntayana, chë Crístbeñe osbuachiyá yomna ca tojayanáftaca, y boyabása o shembásaftaca bacna soye tojtsama, o nda nÿe cachabiama bëtscá soyënga jtsebmnama tša tojtseboše, o chë cachabe pormana soyënga diosënga yomnama jtsejuabnayëse tojtsadorana, o yapa tojtsayatsená, o yapa tojtsetmó, o tojtsatbëbana. Chca entšangftacna, ni mo šmuatjótbema chëngaftaca cánÿiñe jasama.

<sup>12-13</sup> Atšbe ndoñe quešnátsmëna jayanana chë ndošbuachiyënga, chë bëngaftaca ndoñe mondbënutananga, aíñe o ndoñe tšabá tmonjamama. Bëngbe Bëtsá echántsemna nda chëngbiama yochjayana ntšamo tmojamcá tšabá o ndoñe tšabá bëtsemnama, tšëngaftanga ndoñe. Ndegombre nÿe chë os-

buachiyënga tšëngaftangaftaca imnënutanangbiama cmontsamna chca jayanana. Chcasna, šmochjama ntšamo Bëngbe Bëtsabe uabemana palabrenguiñe endayancá: "Tšëngaftanga cmontsamna, chca bacna soye amá tšëngaftangbentšana jtabocnana ca."

### Ošbuachiyënga jendemándama tojtsemna ora

<sup>6</sup> Canÿe tšëngaftanguentša ošbuachiyá inÿe osbuachiyabiama canÿe demanda tojtsebmna ora, ¿cha nanjá chë ndošbuachiyënga mandadëngbioye chë soye chamojandmanama? ¿Ndáyeca chca nanjama, y ndoñe chë Bëngbe Bëtsabe entšangbioye nanjá chabe demanda chamouenama? <sup>2</sup> Tšëngaftanga ndegombre šmondétatšëmbo, Bëngbe Bëtsabe entšanga mochjayanama quem luarentša entšangbiama tšabá o ndoñe tšabá tmonjamama. Y chënga quem luarentša entšangbiama chca jayanama tmojtsobenëse, ¿ndoñe montsobena más base soyëngama chca jayanama? <sup>3</sup> Tšëngaftanga ndegombre šmondétatšëmbo chë angelëngbiámna tšabá o ndoñe tšabá tmonjamama bënga mochjayanama. Chcasna, bënga más jtsobenana chë quem luarentše jéftsiyenama soyëngama chca játayanana. <sup>4</sup> Y chcase, tšëngaftangbeñe chca demandënga chë quem luarentše jéftsiyenama soyëngama tojtsemna ora, ¿ndáyeca šmatjátëbuayana chë osbuachiyëngbiama tondaye tmontsámama entšanga, chë soyënga chamojandmanama? <sup>5</sup> Chca sënjayana tšëngaftanga chašmotsëuatjama: ¿O tšëngaftanguentše ni mo canÿa yondmëna corente oser-taná, ošbuachiyëngbeñe demandënga chaojandmanama? <sup>6</sup> Pero ndoñe chca: ošbuachiyëngbeñe demandënga tojtsemna ora, mandadëngbioye jana chë soyënga chamojandmanama. Y chca jamana ndošbuachiyënga mandadëngaftaca.

<sup>7</sup> Y tšëngaftangbeñe nÿe demandënga jájandmanama tojtsemna ora, tšëngaftangbiama ya canÿe puerte bacna soye jtsemnana. ¿Ndáyeca ndoñe šmattsóboyaye ínÿënga bacá cmojtsaborlana ora? ¿Ndáyeca ndoñe cachcá šmatjonÿaye ínÿënga cmojtsabiatbëbana ora? <sup>8</sup> Pero cach tšëngaftangaftacna inÿetšá copasana, ínÿëngbioye bacá jtsaborlánana y jtsabiatbëbanana, y tšëngaftangcá Crístbeñe ošbuachiyëngbioynaca.

<sup>9</sup> ¿Tšëngaftanga ndoñe šmondétatšëmbo, chë bacna soye amënga Bëngbe Bëtsabe amëndayoye ndoñe mochanjá mashënguama? Ndoñe matenoíngñana. Ni chë boyabása o shembásaftaca bacna soye amënga, ni chë cachëngbe pormana soyënga diosënga yomna ca jtsejuabnayëse adoraýënga, ni cachëngbe boyá o shema ínÿaftaca íngñayënga, ni chë boyabásënga mo shembasengcá jtsinÿnama bošënga, ni chë boyabásënga inÿe boyabásëngaftaca bacna soye amënga, <sup>10</sup> ni chë atbëbanënga, ni chë nÿe cachëngbiama bëtscá soyënga jtsebmnama tša bošënga, ni chë tša tmoyënga, ni chë uayátsenayënga, ni chë ínÿëngbiama bacna soye jtsamëse imnëtsatbëbanënga, chënga nÿetscanga ndoñe quemochatobenaye Bëngbe Bëtsabe amëndayoye jamashjnama. <sup>11</sup> Y tempo básef-

tanga tšëngaftanguentšënga chca šmojamna, pero Bëngbe Bëtsá tšëngaftangbe bacna soyëngama tcmo-japerdoná, y chca entsemna mo bebënénga cuaftsemncá; cha tojama tšëngaftanga chabe entšanga chašmotsemnama, nÿe cha chašmotseservénama, y tojama tšëngaftanga mo tšabengcá chabe bominÿiñe chašmotsemnama. Lempe chca Bëngbe Bëtsá, tojama ndayá Bëngbe Utabná Jesucristo tojanmama y ndayá Bëngbe Bëtsabe Espíritu tojamama.

### Bëngbe cuerpo chaotsemna Bëngbe Utabná jtseservénama

<sup>12</sup> Mondbétsichamo: "Atšbiama entselesenciana ndayánaca jamama, ndayama Bëngbe Bëtsá ndocá tonjayana ca." Pero básefta soyënga jtsamana ndoñe atšbe tšabiama ntsemnana. "Atšbiama entselesenciana ndayánaca jamama ca", pero ndoñe quichatslesencia ndaye sóyecnaca nÿets tempo mandaná jatsmënana. <sup>13</sup> Mëntšánaca mondbétsichamo: "Saná uafsbiamá y uafsbíá saná chaóyëngacñama ca." Pero Bëngbe Bëtsá canÿe te echanjama chë uta soye chaotsopochocama. Bëngbe Bëtsá entšabiama cuerpo ndoñe tonjanma, boyabása o shembásaftaca bacna soye cha chaotsamama, sinó chë cuérpoca Bëngbe Utabná bënga chamoservema, y Bëngbe Utabná bëngbiama tšabe bendicionënga chaotsamama. <sup>14</sup> Y Bëngbe Bëtsá, nda tojama Bëngbe Utabná cháuatayenama, bëngbiámnaca chabe obenánaca echanjama chámuatayenama.

<sup>15</sup> ¿Tšëngaftanga ndoñe šmondétatšëmbo, Crístoftaca cánÿiñe mo canÿacá šmomnama yomna mo tšëngaftangbe cuerpo chabe cuerpentša soye cuaftsemncá? Tšëngaftangbe cuerpo Crístbioye jaserviama endmënayeca, tšëngaftangbe cuerpo jtsemnana mo Cristbe cuerpentša soycá. ¿Ntšamo atšbe chjátobena atšbe cuérpoca, chë ndayá yomna mo Cristbe cuerpentša soycá, canÿe bacna vida bomna shembásaftaca bacna soye jamana, y chca atšbe cuerpo jabemana mo chë shembásabe cuerpentša soye cuaftsemncá? ¡Ndoñe, ndegombre ndoñe! <sup>16</sup> ¿O tšëngaftanga ndoñe šmondétatšëmbo, canÿe entšá canÿe bacna vida bomna shembásaftaca tbojéninÿena ora, chë útata jóbemana mo canÿacá? Er Bëngbe Bëtsabe uabemana palabrenÿiñe boyabása y shembása tbojéninÿenama mëntšá endayana: "Chë útata mo canÿacá bochántsema ca." <sup>17</sup> Pero canÿe entšá Bëngbe Utabnáftaca cánÿiñe mo canÿacá tojtsemna ora, jtsemnana mo chë útata cach canÿe espíritu tbojtsebomncá.

<sup>18</sup> Nÿa ndocna te canÿe boyabása o shembásaftaca bacna soyënga šmattsama. Nderado ndaye inÿe bacna sóynaca nda tojama ora, sempre jamana ndayánaca chabe cuerpentšana shjoye; pero boyabása o shembásaftaca bacna soye jamamna, lempe jamana nÿe cachabe cuérpoca, y chë causa, chca jamëse, cachabe cuerpama más bacna soyënga jtsamana. <sup>19</sup> ¿Tšëngaftanga ndoñe šmondétatšëmbo tšëngaftangbe cuerpo yomna mo canÿe yebncá Uámana Espíritbiama, cha tšëngaftangbe ainaniñe chaotsiyenama

Bëngbe Bëtsá tojánmayeca? Ndegombre tšëngaftangbe cuerpo ndoñe tšëngaftangbe soye quenátsmëna, sinó Bëngbe Bëtsabe soye. <sup>20</sup> Chca endmëna, er Cristo bënga játsebacama tojanóbana ora, yojamna mo cha bëtscá cuaftjopagacá tšëngaftanga Bëngbe Bëtsábenga chašmotsemnama. Chíyeca, chë tšëngaftangbe cuerpëngaca chašmojtsama soyëngaca šmochtsinÿanÿnaye Bëngbe Bëtsá puerte uamaná y bëtsá bëtsemnama.

### Jobouamayama jábuayenama

<sup>7</sup> Mora chanjóyebuambaye ndayá tšëngaftanga átšbioye šmojuábobemama. Ndegombre, canÿe boyabásabiama más tšabá endmëna ndoñe chaondobouamá. <sup>2</sup> Pero choca banga boyabása o shembásaftaca bacna soye amënga imojtsemna causa, tšabá entsemna cada boyabása chabe shema chabotsóbomñe, y cada shembása chabe boyá. <sup>3</sup> Boyábioye bontsemna jamana chabe shembiamá lempe ntšamo jamama ibomncá, boyá bëtsemnama; y chabe shëmnaca cachcá chabe boyabiama chaoma. <sup>4</sup> Chë shembe cuerpo ndoñe nÿe cha cánÿabiama ntsemnana, sinó chabe boyabiámnaca. Cachcá, chë boyabe cuerpo ndoñe nÿe cha cánÿabiama ntsemnana, sinó chabe shembíámnaca. <sup>5</sup> Ni boyá, ni shema ndoñe chabondëtsejuabná jtsenbiátšbuana. Aíñe chca copodena, pero nÿe chë útata chca básefta tescama tbojenóyeunase, Bëngbe Bëtsáftaca jencuëntama jtsentšënama. Pero chentšana chë útata entsamna cachiñe cánÿiñe jtëtsmënana, chca, Satanás ndoñe chaondobená jamama bacna soye chaócochënguama, cachënga jenomándama ndoñe tmontsobena causa.

<sup>6</sup> Atše chca séntsichamo, tšëngaftanga jábuayenama, ndayá jamama šmojtselesenciana, y chca ndoñe chašmondëtsamama jamëndama. <sup>7</sup> Y atšbe bariëna, atšbe juabna entsemna malaye nÿetscanga chë soyënguiñe mo atšcá šmattsemna. Pero Bëngbe Bëtsá cada ona obenana tbojatšetá tšabe soyënga jamama, Crístbeñe ošbuáchiyënga jujabuáchama, inÿyenga canÿe soyama, inÿyengna inÿe soyama.

<sup>8</sup> Chë cabá ndbouamnënga y viudanga séntsëtsët-sná, chëngbiama tšabá yojtsemna ntjobouamaycá joquédana, atšcá. <sup>9</sup> Pero chca jtsemnama cachënga jenomándama ndoñe tmontsobenëse, chënga entsamna jtsóbouamayana, er más tšabá endmëna jtsóbouamayana, y ndoñe nÿe boyabásabiama o shembásabiama tša nÿets tempo jésejuabnayana.

<sup>10</sup> Pero chë bouamnënga séntsamënda shema chabe boyábioye ndoñe cachcá chabondetsonÿá. Chca ndoñe nÿe atše quetsatamënda, ndayá cach Bëngbe Utabná. <sup>11</sup> Pero, shema cachcá chabe boyábioye tbojesonÿase, cha bontsemna ntjobouamaycá jtsomñana o chabe boyáftaca cachiñe jtenútanana. Y cachcá, chë boyá ndoñe quebnátsmëna chabe shema cachcá jesonÿayana.

<sup>12</sup> Chë inÿyenga chjáuyana, atšbe juabncá y ndoñe Bëngbe Utabnabe soycá, nderado canÿe ošbuachiyá tbojtsebomna canÿe shema Crístbeñe ndošbuachiyá,

pero chë shema tojtseboše cháftaca joquédana jtsiyenama, cha chë shémbioye ndoñe cachcá chabondetsonyá. <sup>13</sup> Nderado canye ošbuachiyá tbojtsebošma canye boyá Crístbeñe ndošbuachiyá, pero chë boyá tojtseboše cháftaca joquédana jtsiyenama, chë shema ndoñe chaondëtsejuabná cha cachcá jesonýayana.

<sup>14</sup> Er Bëngbe Bëtsá tojama, canye shembása osbuachiyá chabe entśá chaotsemnana, nye chábioye chabotseservénama, y chca, chánaca jtsejuabnayana chë shembásabe boyá Crístbeñe ndošbuáchiyabiama mo chabiama oservena entśacá, cha chëngbeñe mo canye pamillécá jatrabájama tojtseboše ora; y cachcá, chë boyá ošbuachiyábeyeca Bëngbe Bëtsá jtsejuabnayana chabe shema Crístbeñe ndošbuáchiyabiama mo chabiama oservena entśacá, cha chëngbeñe mo canye pamillécá jatrabájama tojtseboše ora. Er chca ndoñe tontsemnëse, chë básenga muántsemna ndošbuachiyatbe básenga, Bëngbe Bëtsáftaca tondaye ndbomnënga. Ndoñe chca yondmënyeyeca, canya o nyets uta bëtsétsatbe ošbuáchiyama, Bëngbe Bëtsá jtsejuabnayana chë básengbiama mo chabe entśangcá. <sup>15</sup> Pero chë boyá o shema Crístbeñe ndošbuachiyá cachcá jtsenónýayama tša tojtsebošëse, chca chaboma. Chora, chë ošbuachiyá ndoñe ntso-tocánana chë ínÿaftaca cachiñe jtëtenútanama, er Bëngbe Bëtsá tcmojáchembo natjëmbana chašmot-siyenama. <sup>16</sup> Chca šmochjama, er aca shema žntšamo cattsetátšëmbo, tacuatjobenaye acbe boyá jayénjanana Crístbeñe chaotsošbuáchema, y chca, atsbo-caná chaotsemnana? o aca boyá žntšamo cattsetátšëmbo, tacuatjobenaye acbe shema jayénjanana Crístbeñe chaotsošbuáchema, y chca, atsbo-caná chaotsemnana?

<sup>17</sup> Masque ntšamnaca, cada ona chaotsiyena jtsamëse ntšamo chë Bëngbe Utabná tbojatšetá obenana yomncá, cada ona ndayá jamama Bëngbe Bëtsá tbojachembcá. Chca atše nyets luare ošbuáchiyënga enefjuanenache sëndbëtsamëndaye. <sup>18</sup> Nderado Bëngbe Bëtsá cánÿabioye tbojachembo, y cha ínÿengbeyeca chë más delicadentše base bobachtema tëtšená tojtsemna, ntšamo chë judiënga monduamancá, cha ndoñe chaondëtse nobiamná mo ndoñe judío cuafjatsmëncá; y nderado Bëngbe Bëtsá cánÿabioye tbojachembo, y cha ndoñe chca tëtšená tontsemnëse, cha ndoñe chaondëtsejuabná tëtšená jatsmënana, ntšamo chë judiënga monduamancá. <sup>19</sup> Er ndayá iuámana, ndoñe quenátsmëna chca tëtšená jtsemnana o ndoñe, ndayá ntšamo Bëngbe Bëtsá yomandacá jtsamana. <sup>20</sup> Cada ona bontsemna jtsiyëñana, ntšamo yojoyencá, chabe entśá chaotsemnana Bëngbe Bëtsá tbojanchembo ora. <sup>21</sup> Bëngbe Bëtsá tcmojanchembo ora, nyets tempo ínÿabiama oservená cojamnëse, chama ndoñe cattsenócochinÿena. Pero nderado tojtsemna ntšamose jashjáchama ndoñe más chca ntsemnana, cach acbiama jatrabájama, as chca cochjama. <sup>22</sup> Er chë nye ínÿabiama nyets tempo oservená yojamná, Bëngbe Bëtsá chabe entśá chaotsemnana tbojanchembo ora, cha mora ošbuachiyacá, jtsemnana

canya ya ndoñe más bacna soyënga jamama juabnëngaca mandaná, sinó Bëngbe Utabnabiama oservená. Cachcá, chë nye cachabiama trabajayá yojamná, Bëngbe Bëtsá tbojanchembo ora, mora cha nyets tempo Crístbe oservená jtsemnana. <sup>23</sup> Cristo bëngbiama tojanóbana ora, yojamna mo cha bëtscá cuafjopagacá, bënga Bëngbe Bëtsabe entśanga chamotsemnana. Ndoñe šmatjaleséncia nye entśangbe juabnëngaca nyets tempo mandánënga chašmotsemnana, y Bëngbe Bëtsabiama chacmotsebnëtjomba. <sup>24</sup> Chcasna, Jesucristbeyeca atšbe catsátanga, cada ona bontsemna Bëngbe Bëtsáftaca jtsiyëñana, ntšamo yojoyencá Bëngbe Bëtsá tbojanchembo ora.

<sup>25</sup> Y chë ndëbouamna shembásengbiama, chënga aíñe o ndoñe yontsamna jobouamayamna, atše chama ndoñe Bëngbe Utabnabe canye mando quetsátsbomna, pero chanjayana ntšamo atše tsjuabnacá. Bëngbe Bëtsá atšbe tšabiama tojanjuabóyeca, entśanga montsobena jtsejuabnayana aíñe tšabe palabra bomná chiñe atše tsmënama. <sup>26</sup> Atše šontsinÿana, entśá ibojtsemna jtsomñana nye ntšamo mora yotsomñicá, er bënga mora montsiyena puerte padecena soyënguiñe. <sup>27</sup> Shema tcbomnëse, ndoñe cachcá catjëftsonyaye; y ndoñe tcbomnëse, ndoñe catjátsënguaye. <sup>28</sup> Tcojobouamase, bacna soye ndoñe quecátama; y nderado canye tobiaše tojobouamase, cach bacna soye ndoñe quenátama. Pero chë tmojt-sobouamangna padecena soyënguiñe mochanjoyena quem luarentše chamojéftsemnëntscuana, y atše séntseboše chënga jujabuáchama chca jatiyenama ndoñe chaondëtsamnana.

<sup>29</sup> Jesucristbeyeca atšbe catsátanga, ntšamo séntseboše jayanamna mëntśá entsemna: Cristo quem luaro ye yochjésabo orscama ya nye batśá entsájamna. Chiyeca, morskana y nyets tempo más chcoye, chë bouamnënga entsamna jtsiyenana mo ndoñe bouamnënga tmontsemncá, o mëntśá, entsamna jtsentšënanana Bëngbe Bëtsabe soyënguiñe, y ndoñe nye chë bouamná bëtsemnana tbojtsemna soyënguiñe.

<sup>30</sup> Cachcá, chë puerte ngmëncá tša ošachiñe imonënga, entsamna jtsiyenana mo ndoñe chca tmontsemncá; y chë puerte oyejuayënga, chamotsiyena mo ndoñe chca tmontsemncá; chë soyënga buamayënga chamotsiyena mo tondaye chëngbe soye tontsemncá. <sup>31</sup> Chë quem luarentša soyëngaca jtsiyenama imojtsentšënénga entsamna jtsiyenana mo ndoñe chca tmontsamcá, er quem luare ntšamo bënga mora monduabuatmcá, pronto echanjochnëngo.

<sup>32</sup> Atše séntseboše tšëngaftanga ndoñe chašmondët-senocochinÿenama. Canye entśá ndoñe bouamná tontsemna ora, jtsobenana jtsentšënanana Bëngbe Utabnabe soyëngama jtsejuabnayama, y ntšamo oyejuayá cha jabemama; <sup>33</sup> pero chë bouamná nyets tempo jtsenócochinÿenana quem luarentša soyëngama, jtsiyenama, y ntšamo chabe shema oyejuayá jtsebošma; <sup>34</sup> y chca, cha uta soyiñe canye ora jtsentšënanana. Chë ndëbouamna shembása y chë tobiaše bontsobena jtsentšënanana Bëngbe Utabnabe soyënguiñe sem-

pre jtsejuabnayama. Chënga mondobena jtsentšë-nana Bëngbe Bëtsá jaséviama, ndayá chëngbe cuér-poca y chëngbe espíritoca tmojamama. Pero inyetšá, chë bouamna shembásana, nyets tempo jesenó-cochinýenana quem luarentše vida jtsebomnama soyëngama, y ntšamo chabe boyá oyejuayá jtsebom-nama.

<sup>35</sup> Atše chca cbontsëtsësná tšëngaftangbe tšabiama, y ndoñe jamëndama ba soyënga jamama ndoñe cháš-mondëtsobenama, ndayá ntšamo tšabá yomncá cháš-motsiyenama, y nye Bëngbe Utabná jtseservénama chášmotsentšënama.

<sup>36</sup> Nderado nda tojtsejuabná chabe uatsëtsnaye to-biášeftaca jtsobouamayama ibojtsemna ca, chca jama-ma chë tobiaše ya bëtsá tojtsemnayeca, y chca jama-ma tša tšabá yojtsemna ca tojtsejuabnase, cha bontsemna jamana ntšamo tojtsebošcá. Chaot-sobouamá. Chca tojama ora bacna soye ndoñe ntsamana. <sup>37</sup> Pero nderado inýa, tondaye obligació-naca tontsemna y lempe ntšamo tojtsebošcá cha tojt-sobena jamama, cha tšabá tojajuabó y chabe ainaniñe corente tojtsetátšëmbo, ndoñe ntsobouamayana tšabá yomna ca, cha tšabá chca jtsamana. <sup>38</sup> Chcasna, chë tobiášeftaca tojtsobouamá chana, canýe tšabe soye jamana; pero chë ndoñe cháftaca tonjobouamá chana, canýe más tšabe soye jamana.

<sup>39</sup> Chë shembása bouamná jtsotocánana chabe boyáftaca sempre jëftsienana, chë boyá vida tojtse-bomnëntscuana; pero chë boyá tojóbanëse, cha jt-sobenana cachiñe jtobouamayana, nda cha tojtse-bošáftaca, pero chca chaoma mo canýa Bëngbe Utab-náftaca cánýiñe mo canýacá quetsomñecá. <sup>40</sup> Pero at-še jayanamna, cha más oyejuayá nántsemna ndoñe tontóbouamase; y sëntsejuabná, átsnaca tsbomna chë Bëngbe Bëtsabe Espiritu chašotsebuayiynama.

#### Uátšëmbona saná entšangbe pormana soyëngama

**8** Mora chanjóyebuambaye ndayá tšëngaftanga at-še šmojatjama, ndayá jtsesayama, chë tempo ínýenga cachëngbe pormana soyënga, diosënga yomna ca jtsejuabnayëse jadórama tmojanátšëmbona soyëngama. Bënga mondëtatšëmbo bënga nyetscan-ga osertánënga imomnama. Canýa tbojtsosertana ora, cha nderado nanjájuaboje, chca bëtsemnama puerte uamaná cha yojtsemna ca, pero canýa, ínýenga to-jtsababuánýeshana ora, cha jtsobenana chënga becá jujabuáchana. <sup>2</sup> Nderado nda tojtsejuabná ndegombre canýe soye yotátšëmbo ca, cabá ndoñe yontsetátšëm-bo ndayá jtsetátšëmbuama ibojtsemncá. <sup>3</sup> Pero ndera-do nda Bëngbe Bëtsábioje tbojtsebobonshana, Bëngbe Bëtsá chábioje jtsabuatmana mo chabe entšacá.

<sup>4</sup> Y chë tempo ínýenga cachëngbe pormana soyënga, diosënga yomna ca jtsejuabnayëse jadórama uátšëm-bona soyëngamna, atše šcuayana: bënga corente mondëtatšëmbo chë chënga imnétsadorana soyënga, diosënga yomna ca jtsejuabnayëse, ndegombre ndoñe dios quemátšmëna y nye canýa Bëngbe Bëtsá

endmëna. <sup>5</sup> Pero masque celoca y quem luarentše chamomna entšangbiama “diosënga ca” uabáinënga (ntšamo ndegombre endmëncá, banga quem luar-entša tsbanánoca obenánaca mondmëna, entšangbia-ma diosënga ca ubuátmënga, y banga bëts mándoca entšangbiama “utabnënga ca” uabáinënga), <sup>6</sup> bënga chë ošbuáchiyëngbiama nye canýa Bëngbe Bëtsá endmëna, Bëngbe Taitá, ndábentšana nyetsca soyën-ga yóbocana, y nye nda jtseservénama bënga imoye-na. Y nye canýe Utabnánaca endmëna, Jesucristo, ndábeyeca nyetsca soyënga yomna, y cach béngnaca imomna.

<sup>7</sup> Pero nyetsca ošbuáchiyënga ndoñe chca quemát-statšëmbo. Básefta entšanga, Crístbeñe cabá ntsošbuáchiye ora, imojanamana ndaye sanánaca ju-atšëmbonana, chë chënga imojanjuabná diosënga yo-jamna ca soyënga jadórama; chënga, chca uatšëmbo-nana tmojtsesá ora, jtsejuabnayana chca uatšëmbo-nana bëtsemnama, y ainaniñe juabnënga jtsebom-nana ndoñe tšabá tmonjamama, chana tmojase causa. Chënga, ndayá tempo imojánamama, ndoñe quemá-tobena tšëngaftangcá jtsejuabnayana, chcana jasana bacna soye ndoñe yondmëna ca. <sup>8</sup> Ndegombre, ndayá bënga tmojtsesacá ndoñe ntjamana bënga Bëngbe Bëtsábioje más chamuatobéconama. Bënga Bëngbe Bëtsabe bominyiñe ndoñe quemochátšmëna más tšábënga aíñe tmojtsesama; ni ndoñe chcanga, ndoñe tmontsesá causa.

<sup>9</sup> Pero cuedado šmochtsebomna, ndayá jamana yolesenciánama tšëngaftanga corente tšabá šmotat-šëmbuama, ndayánaca jatsmana, y chca causa ínýen-ga, chë soyënguiñe más batšá ošbuáchiyënga y os-ertánënga, ntšamo tšëngaftanga šmojtsamcá chamu-atšmama, y chentšana, chëngbe ainaniñe juabnënga chamotsebomna y chëngbioje chaotsëtsësná ndoñe tšabá tmonjama ca. <sup>10</sup> Er, aca chë soyëngama tatšëm-buá, nderado tcojót'bema jasama canýe luarentše, canýe soye ndayama entšanga dios yomna ca jtse-juabnayëse adórayentše, y canýe Crístbeñe os-buachiyá tojtsebomna ainaniñe juabnënga ndoñe tšabá tonjamama, chca tojájeyeca, aquëcá chë soyëngama ndoñe yondëtatšëmbo causa, y cha ndera-do chentše cojtsesama tcmojinýëse, chë soye nanjobe-naye chábioynaca jañémuana chë saná jasana, chë tempo chë soyëngama tmojanátšëmbona saná. <sup>11</sup> Y chca aca, chë soyëngama ntšamo betatšëmbuama tcojamama, catjama chë Jesucristbeyeca acbe catšata, chë ndoñe corente ošbuachiyá, y ndoñe aquëcá chë soyëngama corente tatšëmbuá, cha pochocaná chaot-semnama, er chabe ainantšë echántsemna juab-nënga canýe bacna soye tojamama, chë saná to-jasama. Chca nderado cánýabioje catjama, ndabiama Cristo tojanóbana, cha jatsbocama. <sup>12</sup> Jesucristbeyeca acbe catšatbiama chca bacna soye tcojama ora, chca causa cha canýe soye tojama, ndayama chabe juab-nënga ainaniñe chabotsatsëtsná ndoñe chca chaondëtsama ca; y chca, chentšana tša tojesejuabná cha canýe bacna soye tojamama, acna canýe bacna

soye jamana, ndoñe nÿe chë catsatbiama, ndayá cach Cristbiámnaca. <sup>13</sup> Chiyeca, nderado ndayá atše stsesama, atše tsjama Jesucristbeyeca atšbe catsata chaoma canÿe soye y chca jamama chabiama canÿe bacna soye tojtsemnëse, más tšabá nántsemna ndocna te chë soye atše ntjasana, chca, atše ndoñe jatsma cha canÿe bacna soyiñe chaótsatsama.

### Jesucristbe ichmónëngbe derecho

**9** Ndegombre endmëna, atše ndayánaca jamana stselesenciánama y Moisesbe leyéngaca ndoñe más mandaná séntsemnama. Cach ndegombre endmëna, atše canÿe Jesucristbe ichmoná tsmënama y Jesús Bëngbe Utabná tijinyama; y cach tšëngaftanga mora ošbuáchiyënga jtsemnëse, šmondmëna ndayá tojóbcna Bëngbe Utabnabiama atšbe trabajuentsana. <sup>2</sup> Masque inÿenga atšbiama ndoñe quemat-sjuabná atše canÿe Jesucristbe ichmoná tsmëna ca, tšëngaftangbiama aíñe chca endmëna; er tšëngaftanga Crístbeñe ošbuáchiyënga šmondmënama y Bëngbe Utabnáftaca cánÿiñe mo canÿacá šmondmënama, puerte tšabá šmontsinÿanÿná atše Jesucristbe canÿe ichmoná tsmënama.

<sup>3</sup> Mëntšá chanjayana chë atše ndoñe tšabá tijama ca imojtsichámëngbiama: <sup>4</sup> Ndegombre bënga nÿets derecho fsëndëtsóbomñe jtsobatmanama tšëngaftangbentsana, chë tcojujabuáchëngbentsana, bëngbe trabajuama saná o ndayá jofšiyama chašcuacaredadama. <sup>5</sup> Y béngnaca derecho fsëndëtsóbomñe canÿe shema ošbuachiyá jtsebmoma y béngaftaca cha jëftsbešama inÿe luaroye fstsajna ora, ntšamo chë Jesucristbe inÿe ichmónënga, Bëngbe Utabnabe catsátanga y Pédrënaca mondbetsamcá. <sup>6</sup> ¿O nÿe Bernabé y atše šojtsëtocana cabëndatbe cucuátšeca jatrabájana vida jtsebmoma, y ndoñe derecho fsëntsebmoma ošbuáchiyënga chašotsacuédana, Bëngbe Bëtsabiama trabájayama? <sup>7</sup> ¿Ndëmua mo canÿe soldadcá tojtsoservená, ndayá tbojtsájabotama cachá nantsatopagana, vida jtsebmoma? Ndocná canÿe jajañe uvas betiyënga ntjájena, chentša uvasëšangá ndoñe ntjuasama. Ndocná oveshënga ntsanÿenana, chë tojabuatëba létšiyentšana ndoñe ntjofšiyama. <sup>8</sup> Ntšamo atše muentše séntsihamcá ndoñe nÿe entsangbe juabna quenátsmëna; y Moisesbe leyíñnaca cachcá endayana, <sup>9</sup> er chabe leyiñe mëntšá endayana: “Aca canÿe toróftaca shajuana tmojtsatbaná luariñe chacojtsetrabája ora, ndoñe catjuanguëtšenaye ca.” Y chca ndoñe quenátayana Bëngbe Bëtsá nÿe toronga inétsanÿena ca, <sup>10</sup> sinó inÿe más bëts soye; chca endayana ndayá ndegombre bënga, chë Bëngbe Bëtsabiama soyëngama abuayinyaiñe trabájayënga cha šnetsanÿena ca. Chca tmojanábema bëngbiama, er chë fshantse arayá y chë meshënga atbanayá, entsamna chca jamana jtsobatmanëse, chë tmojåtabe shajuanentsana batšá jójyëngacñama. <sup>11</sup> Y chca, bënga chë tšabe noticiëngama tcojóbuaenase, y chca, Bëngbe Bëtsábicana tšabe bendicionënga chašmotsebmoma bënga tifjama, ndoñe yapa

tanandátsmëna tšëngaftanga jótjañana, chë šmobomna soyënguentsana bënga jëftsiyenama chašcuatšatama. <sup>12</sup> Inÿenga derecho tmojtsebmoma tšëngaftanga jótjañana chë šmobomnentsana chašmuacaredadama, tšëngaftangbeñe chëngbe trabajuama, as bënga más derecho fstsebmoma chca jamama.

Pero bënga tondaye checbatamëndá, bënga chë derecho bëtsebmoma. Chca játamamna, bënga lempe fsëntsoboyá, chca, bënga tondaye ntjátamama, y chë causa entsanga ndoñe chašondëtsayaunana, bënga chë tšabe noticiënga fstsabuayiná ora. <sup>13</sup> Tšëngaftanga šmondëtatšëmbo, Bëngbe Bëtsabe bëts yebnoca trabájayënga Bëngbe Bëtsabiama oservëniñe, mondbójyëngacñe chënga jasama, ndayá entsanga Bëngbe Bëtsá jadórama chabe bëts yebnoye tmojijyëbo sananguentsana. Y chë Bëngbe Bëtsá jadórama soyënga amënga, altaroca, chë juatšëmbonama luarëntše, chënga jasana ndayá chentše tmojútšëmbona soyënguentsana. <sup>14</sup> Cachcá, Bëngbe Bëtsá tojamandá, chë tšabe noticiënga abuayinyayëngna, vida jtsebmoma lempe ntšamo tojtsëjbotcá chamójyëngacñe ca, chë tšabe noticiënga abuayinyayama. <sup>15</sup> Pero atše ndocna te chiyaisemandá inÿenga chca chašmotse-cuedánama, atše chë tšabe noticiënga abuayinyayá bëtsemnama chca derecho tsbómnyeyeca, y cach ndoñe mora quem soye quecbatëbuabiamná, tšëngaftanga ndayánaca atše chašmuatšetama. Atšbiama más tšabá nántsemna jóbana, y ndoñe ntjalesënciana inÿa chaoma atše cach atšbiama oyejuayá ndoñe ntjátsmënama, inÿengbentsana soyënga stjójyëngacñe causa.

<sup>16</sup> Atše ndoñe quetsatsjuabná atše canÿe bëts soye stsama ca, chë tšabe noticiënga stsabuayinyama, er atše obligaciónaca séntsemna chca jtsamama, Bëngbe Bëtsá chama šojanchémboyeca. ¡Tša lastemcá atšbiama nántsemna, chë tšabe noticiënga ndoñe séntsbabuayinyase! <sup>17</sup> Chiyeca, atše chë tšabe noticiënga stsabuayiná nÿe atše chca jamama stsebóšeyeca, atšbe uacanana soye ya stsebmoma; pero atše chca stjama, y ndoñe tontsemna nÿe atše chca jamama stsebóšeyeca, masque chca, atše stsama, ndayá jtsamama Bëngbe Bëtsá šojanbonÿecá. <sup>18</sup> Y chca, atšbe uacanana soye endmëna atše oyejuayá jtsemnana chë tšabe noticiënga abuayinyayama, ošbuachiyëngbentsana atše vida jtsebmoma tondaye ntjatoyëngacñecá; chca, atše tondaye quetsátama chë tšabe noticiënga abuayinyayama tsbmoma deréchoca, chë atšbe trabajuentsana vida jtsebmoma.

<sup>19</sup> Atše, masque ndocna entsábeyeca nÿets tempo mandaná quetsátsmëna, puerte nduamaná sënjóbe-ma, mo canÿa nÿets tempo inÿabeyeca mandanacá, nÿetscanga jaserviama, chca, atše chca jtsamëse, jobenayama becá entsanga, ntšamo tojopodecá, jayëñjanama Crístbeñe chamotsošbuáchema. <sup>20</sup> Chë judiëngbiama atše sënjama chaitsiyena mo chëngcá jtsamëse y jtsejuabnayëse, chca, atše jobenayama chënga jáyëñjanama Crístbeñe chamotsošbuáchema. Y chë Moisesbe léyeca mandánënga imoyenëngbi-

amna, atše chëngcá sënjobema, masque ndegombre chë Moisesbe léyeca mandaná ndoñe quetsátiyena; chca sëndbama chënga jáyëñjanama Crístbeñe chamotsošbuáchema. <sup>21</sup> Pero chë Moisesbe léyeca ndëmandánënga oyenëngbiamna, atše chëngcá sënjobema, chënga jáyëñjanama Crístbeñe chamotsošbuáchema, masque ndegombre endmëna, atše šontsemna jamana ntšamo Bëngbe Bëtsá šomandacá y ntšamo Cristo šomandacá. <sup>22</sup> Chë nÿe batšatema osbuáchiyëngbiamna y Bëngbe Bëtsabe soyëngama nÿe batšatema osertánëngbiamna, atše sënjama chaitsiyena mo chëngcá jtsamëse y jtsejuabnaye, chca, atše jobenayama jamama chënga sempre Crístbeñe chamotsošbuáchema. Y lempe chca, chë atše jamana ntšamo nÿetscanga imomncá atše chaitsemnama, endmëna atše jobenayama báseftanga jáyëñjanama Crístbeñe chamotsošbuáchema.

<sup>23</sup> Atše lempe chca sëndama, bëtscá entsanga chë tšabe noticiënguiñe chamotsošbuáchema, y chca, atše atsbocaná chaitsemnama y chëngcá atše chayóyëngacñama, chë atsebácanënga Bëngbe Bëtsá yochjatsataye tšabe soyënga.

<sup>24</sup> Tšëngaftanga šmondëtatšëmbo, canÿe luaroye jashjanguama entsanga tmojótjajo orna, banga jotjajuana, pero nÿe canÿa chë uacanana soye jóyëngacñana. Chcasna, mo chë uacanana soye jóyëngacñama tmojótjajëngcá, tšëngaftanga cmontsamna jtsiyenana, chë Bëngbe Bëtsábiocana uacanana soye josháchiñama. <sup>25</sup> Nÿetscanga chë tmojótjajënga ínÿenga jáyëñjanama, chënga jopróntana nÿetsca soyënguiñe jtseñomándayëse, chca, canÿe uacanana soye, tsbuanachëngaca uapormana coronésha juayëngacñama; y chësha betesco jtsanctana. Pero bënga ndoñe; bënga mondoyena Crístbiamna soyënga jtsamëse, Bëngbe Bëtsábiocana ba tšabe soyënga mo uacanancá jóyëngacñama, y chë soyënga nÿetsca tescama bënga mochanjëftsebmoma. <sup>26</sup> Y atšna, atšbe bariëna sëndëntšena Bëngbe Bëtsá jtseservénama, ndoñe mo canÿa ínÿëngbioye jáyëñjanama tojotjajuacá, chë ndëmoye jashjanguama yomnama ntsetatšëmbcá; y cach ndoñe mo nda tojtsepeliá orcá, chora, cha nÿe ínÿoye chabe buacuatsënga tojtsëtšana y chë ínÿabe cuerpoye ndoñe. <sup>27</sup> Mo canÿe tšabe peliyacá, chabe cuerpo játsetšenana y chca chë cuerpo corente jtsemándayana, atše ndoñe quetsatsleséncia chë atše tšabá jtsomñama atšbe ainanentša juabnënga chašotsemándama; y chca, Crístbioye jtseservënëse chamotsiyenama ínÿëngbioye stjabuayená chentsana, Bëngbe Bëtsá chašotsaboté chabe uacanana soye josháchiñama, cha ndoñe tšabá tijaservé causa.

**Cach entsangbe pormana soyënga ndoñe chamondëtsadoránama jábuayenama**

**10** Jesucristbeyeca atšbe catšátanga, atše séntseboše tšëngaftanga chašmotsetátšëmbo bëngbe tempsca bëtš taitanga judiënga, chënga nÿetscanga Bëngbe Bëtsá canÿe jantšëtésheca benache yojaninÿanÿná, y chënga nÿetscanga, chë Buángana ca

uabaina mar bejayëjana tmojánachnëjna, chiñe mo bojojuiñe cuaftsomñcá. <sup>2</sup> Chë jantšëtésheca Moisés imojanëstonama, y chë mar bejayëjana tmojánama, chënga tmojanóbema Moisesbe ústonënga. <sup>3</sup> Chënga nÿetscanga tmojanse cachca saná, chë Bëngbe Bëtsá celocana tojanichmó saná; <sup>4</sup> y nÿetscanga tmojanofšé chë Bëngbe Bëtsá tojanma chë peñëšentšana chaóbozna béjaye. Cristo chëngaftaca yojtsemna jt-sanÿenama chënga imojtsajnëntscuana, y ntšamo chë peñëšentše chëngaftaca tojanopasacá, yojaninÿanÿná Cristo chënga yojtsanÿenama. <sup>5</sup> Masque chca, banga chënguentšënga ntšamo tmojanmama Bëngbe Bëtsá ndoñe yontsoyejuaye; y chë causa, Bëngbe Bëtsá tojanma chënga chamóbanama chë entsanga ndoyenentše.

<sup>6</sup> Lempe chca tojanopasá bënga jinÿanÿiyama y jábuayenama ntšamo inopása entsanga bacna soyënga jamama tmojtseboše ora, bënga chca jamana ndoñe chamondëtsebošama. <sup>7</sup> Chiyeca, tšëngaftanga ndoñe šmattsadorana entsangbe pormana soyënga, ndayama ínÿenga jtsejuabnayana diosënga yomna ca, ntšamo báseftanga israeloquënga tmojanmcá. Ntšamo Bëngbe Bëtsabe uabemana palabrenguiñe chëngbiamna endayancá, chënga canÿe ternerá castelánoca tmojanpormá ora, mo dios cuaftsemncá jadórama: "Entsanga tmojanotbiamna jasama y jatmuauma, y chentsana tmojantsbaná joboyejuauma ca". <sup>8</sup> Boyabása o shembásaftaca bacna soyënga ndoñe šmattsama, ntšamo báseftanga chënguentšënga tmojanmcá, y chë causa, nÿe canÿe te, uta bnëtsana y unga uaranga entsanga tmojanóbana <sup>9</sup> Bacna soyënga ndoñe šmattsama, jinÿama buetatescama Bëngbe Utabná uantado yochjëftsemnama y ndoñe šochanjacastígayama. Báseftanga chënguentšënga chca tmojanma, y chë causa tmojanóbana mëtscuayëngaca ftëtšëngënga. <sup>10</sup> Bëngbe Bëtsabe contra ndoñe šmattsóyebuambnaye, ntšamo báseftanga chënguentšënga tmojanmcá, y chë causa, chë ángel obanayá tojanma chënga chamóbanama.

<sup>11</sup> Lempe chca bëngbe tempsca bëtš taitangaftaca tojanopasá, bënga jinÿanÿiyama ntšamo jtsiyenana šojtsamnama, y Moisés, Bëngbe Bëtsabe uabemana palabrenguiñe chca tojëftsanboshjona bënga jabuátambama, bënga, chë Jesucristo yochjésabo orscama ya batšatema yojtsájamna ora oyenëngbiamna. <sup>12</sup> Chcasna, nda tojtsejuabná Bëngbe Utabnabiamna tšabá yojtsama ca y bacna soyënga ndocna te yochanjama ca, cuedado chaotsebmoma, bacna soyënga amiñe ndoñe chaondótsatšama. <sup>13</sup> Ndocna entsá jatócochënguana bacna soyënga jamama, ntšamo tempo ínÿenga ndoñe tonjanocochëngcá cachca bacna soyëngama, pero tšëngaftanga corente šmondëtatšëmbo Bëngbe Bëtsá sempre cmochtséjabuachanama chë padecena soyënguiñe, y cha ndoñe yochanjalesénciamna bacna soyënga jamama chacmócochënguama, tšëngaftanga chca soyënga jamama jtsóboyayama obenana ntsebmomncá; pero chë padecena soyënguiñe chašmojtsemna ora, cha cmochanjínÿanÿiye ntšamo chë bacna

soyënga ora tšabá jabocanama, y chca, jtsóboyayama chašmotsobenama.

<sup>14</sup> Chíyeca, atšbe bonshánënga, ndocna te š-mattsadorana cach entšangbe pormana soyënga, ndayama ínÿenga jtsejuabnayana diosënga yomna ca. <sup>15</sup> Atše sëntsoyebuambná mo tšëngaftanga corente osertánënga cuaftsemncá. Cach tšëngaftanga š-mochjenójuaboye y šmochjayana, ntšamo cbojtsëtsëtsnacá aíñe o ndoñe tšabá bétsemnana. <sup>16</sup> Ntšamo Jesús chë coptema vinoyama Bëngbe Bëtsábíoye tbojtanchuacá, béngnaca cachcá Bëngbe Bëtsá chama fsëndbëtsatschuanaye. Bënga chca tmojama ora, ndegombre, jtsinÿanÿayana bënga Crísoftaca cánÿiñe mo canÿacá imomnama, chabe buiñe juabuáshanëse bëngbiama tojanóbanayeca. Y chë mondbajataye tandëse tmojase ora, jtsinÿanÿayana bënga Crísoftaca cánÿiñe mo canÿacá imomnama, cha bëngbiama tojanóbanayeca. <sup>17</sup> Bënga ošbuáchiyënga masque banga mondmëna, chca orna nyetscanga cach tandësentšana bënga jasana, y chíyeca bënga jtsemnana mo canÿacá, mo Cristbe cuerpcá.

<sup>18</sup> Tšëngaftanga šmochtsejuabnaye ndayá chë Israe-locaba bachnanga monduamanama: chënga chë altaroca tmojóba y tmojuátšëmbona bayënguentsana jasana, y chca chënga chora jtsinÿanÿayana chënga cánÿiñe mo canÿacá imojtsemnama Bëngbe Bëtsáftaca, chë chca tmojtsadoranáftaca. <sup>19</sup> Y chca, atše ndoñe quetsátsboše jayanama chë entšangbe pormana soyënga mo diosënga cuaftsemncá, uámana soyënga diosënga yomna ca jtsejuabnayëse jadórama uátšëmbona saná inÿe sanama más iuámana ca. <sup>20</sup> Pero aíñe, entšanga cach entšangbe pormana soyëngama mo diosënga cuaftsemncá, chca tmojuátšëmbona ora, ndegombre chënga Satanás y chabe uajabuachanëngbioye jtsadoránana, y ndoñe Bëngbe Bëtsábíoye. Y atše ndoñe quetsátsboše, tšëngaftanga chca uatšëmbonana šmojasama, cánÿiñe mo canÿacá chë bayëjëngaftaca chašmotsemnana. <sup>21</sup> Tšëngaftanga ndoñe quešmátobena chë vínoye coptémentšana jofšiyana, ntšamo chë ošbuáchiyënga bétsemnana mondbetsamcá, y chentšana chë cach entšangbe pormana soyënga, mo diosënga cuaftsemncá jadórama vínoye coptémentšanënaca. Chca šmojama ora jtsemnana mo chë diablëngaftaca cuaftsesangcá. Y cach ndoñe quešmátobena vínoye jofšiyana y tandëse jasana, ntšamo ošbuáchiyënga bétsemnana mondbetsamcá, y chentšana cach entšangbe pormana soyënga mo diosënga cuaftsemncá jadórama fiestentša sanánaca jasana, y chca chë bayëjëngbioye jtsadoránana.

<sup>22</sup> Bënga chca tmojtsamama, bënga mochanjama Bëngbe Utabná puerte etonaná béngaftaca chaotsemnana, er chë bayëjëngaftaca bënga chca jtsamana. ¿O imojtsejuabná bënga chabiama más obenana bomnënga imomna ca?

### Lempe šmochjama Bëngbe Bëtsá puerte bëtsá y uamaná yomnama jinÿanÿiyama

<sup>23</sup> Mondbëtsichamo: “Entselesenciana ndayánaca jamana, ndayama Bëngbe Bëtsá ndocá tonjayana ca”, pero básefta soyënga atše stjama ora ndoñe nyetscangbe tšabiama ntsemnana. “Entselesenciana ndayánaca jamama ca”, pero nyetsca soyënga ntšamo bënga tmojamcá, ošbuachiyëngbiyoye ndoñe ntjujabuáchana Jesucristbeñe más chamotsošbuáchema, y ainaniñe más añemo chamotsebomnama. <sup>24</sup> Ndocná chaondëtsama lempe ntšamo tojobenacá nye cachabe tšabiama, ndayá más chaotsama chë ínÿengbe tšabiama.

<sup>25</sup> Lempe mercadoca tmojtsena soyënguentsana š-mochjase, ntjatstjanaycá chë mëntšëna aíñe o ndoñe tmonjuátšëmbona chë cach entšangbe pormana soyënga, mo diosënga cuaftsemncá jadórama ca. Ndoñe chca šmattsetjanaye, ntšamo tšëngaftangbe ainaniñe juabnënga šmojtsebomnama; <sup>26</sup> er ntšamo Bëngbe Bëtsabe uabemana palabrenguiñe endayancá: “Quem luare Bëngbe Utabnabe soye endmëna, y lempe ntšamo chiñe yomncánaca ca.”

<sup>27</sup> Nderado canÿe ndošbuachiyá tcmojúbuaja chábio- ca jasama, y tšëngaftanga choye jama tša šmojtsebošëse, lempe ntšamo cha chacmojonanjacá šmochjase, ndayentsana chë saná tojóbocnama ndocá ntjatstjanaycá, ntšamo tšëngaftangbe ainaniñe juabnënga šmojtsebomnama. <sup>28</sup> Pero nderado nda tcmojáuyana: “Quem mëntšëna cach entšangbe pormana soyënga mo diosëngcá jadórama tmonjanátšëmbona ca”, as ndoñe chana šmatjase, er canÿa chca tcmojáuyana, y ainantšë šmojtsebomna juabnënga, chë chca jama- ma ndoñe tšabá bétsemnana. <sup>29</sup> Atše sëntsoyebuambná ndayá chë chca tcmojauyanabe ainaniñe juabnëngama, chë soye jasana ndoñe tšabá yondmënama, ndoñe chë tšëngaftangbe ainantšë juabnëngama.

Pero tšëngaftanga šmatjatjaye: “¿Ndáyeca atše šojtsemna jayanana ndayá atše stsobena jamama, os- buachiyá bétsemnana, ntšamo chë ínÿabe ainaniñe juabna yobomnama ca?” <sup>30</sup> Y atše chë ndayá stsesama Bëngbe Bëtsá tijëtschuase, ¿ndáyeca inÿa šochjauyana atše ndoñe tšabá tijama ca, chë soye tijasama, chë ndayama Bëngbe Bëtsá tijëtschuá ca?” <sup>31</sup> Masque ntšámnaca, cachcá, chašmojtsesá, o chašmojtsofšëšná, o ndaye inÿe soye chašmojtsama, ndayama Bëngbe Bëtsá ndocá tonjayana, lempe šmochtsama Bëngbe Bëtsá puerte bëtsá y uamaná yomnama jtsinÿanÿayama. <sup>32</sup> Tondaye šmatjama ndayá chaobená jamana, ínÿenga Cristo chamotsábotema. Ndoñe chca šmatjama, ni judiëngbiama, ni ndoñe judiëngbiama, ni chë Bëngbe Bëtsábeñe os- buachiyëngcá enefjuanëngbiama. <sup>33</sup> Šmochtsama ntšamo atše sëndëntšencá, nyetscanga nyetsca soyëngu- iñe oyejuayënga jtsabamnama, lempe ntšamo stjobenacá jtsamëse, ndoñe nye atšbe tšabiama, ndayá masna chë ínÿengbe tšabiama, chënga chamot-

sobenama chëngbe bacna soyënguentshana atsebá-canënga jtsemnama.

**11** Tšëngaftanga šmochtsiyena ntšamo atše sëndamcá jtsamëse, cach ntšamo atše sëndoyencá, ntšamo Cristo inetsamcá jtsamëse.

**Ntšamo yomna shembásenga tšabá jtsemnama, osbuachiyëngcá tmojénefjna ora**

<sup>2</sup> Atše séntseboše tšëngaftanga jáuyanana tšabá šmojama ca, tšëngaftanga nyetsca soyënguiñe atšbiama šmnétsenojuabnama, y tšëngaftanga šmojtsabuá-tambama y šmojtsamama ntšamo tcbonjanabatambacá, cachcá ntšamo atše sënjëftsanboshjoncá. <sup>3</sup> Pero atše séntseboše tšëngaftanga chacmësertá: nda nyetsca entsanga iuaménda cha, Cristo endmëna; y nda shémbioye ibománda cha, boyá endmëna; y nda Crístbioye ibománda chana, Bëngbe Bëtsá endmëna. <sup>4</sup> Nderado canye boyabása chabe bestšaše tojtsenátsbotse, inye ošbuáchiyëngaftaca cányiñe Bëngbe Bëtsáftaca tbojtsencuénta ora o Bëngbe Bëtsabe juabna tojtsoyebuambná ora, cha jamana cachá chaotsëuatjama, chabe bestšášeca chca tojama causa. <sup>5</sup> Pero nderado canye shembása chabe bestšaše ndoñe tontsenátsbotse, inye ošbuáchiyëngaftaca cányiñe Bëngbe Bëtsáftaca tbojtsencuénta ora o Bëngbe Bëtsabe juabna tojtsoyebuambná ora, cha jamana chama cachá chaotsëuatjama; jtsëuatjana mo cha lempe jshetëtšená cuaftsemncá. <sup>6</sup> Er, nderado canye shembása ndocna te tontseboše chabe bestšaše jtsenátsbotsana, chabiamá más tšabá nántsemna lempe chaotsenójshetëtše. Pero tojtsejuabná utsbotjená o chca lempe jshetëtšená jtsemnama cha yochtsëuatja ca, as chabe bestšaše chaotsenátsbotse. <sup>7</sup> Boyabása ndoñe quebnátsmëna chabe bestšaše jtsenátsbotsana, er Bëngbe Bëtsá tojanma ntšamo cachá yomncá cha chaotsemnama, y chë boyabása chca jtsemnëse, jtsinýanýayana Bëngbe Bëtsá chabe mandayá yomnama. Pero ntšamo chë shembása yomncá, jtsinýanýayana chë boyabása chabe mandayá yomnama; <sup>8</sup> er Bëngbe Bëtsá, boyabása ndoñe tbonjanma shembásabentšana, ndayá shembása boyabásabentšana. <sup>9</sup> Y Bëngbe Bëtsá, boyabása ndoñe tbonjanma shembásabeyeca, ndayá shembása boyabásabeyeca. <sup>10</sup> Chíyeca, y chca jamama angelënga tšabá jtsinýanánayeca, shembása jtsemnana chabe bestšaše chaotsenátsbotsama, chca, chaotsinýnama inya chábeñe yomándama. <sup>11</sup> Pero, Bëngbe Utabnábeñe ošbuachiyëngcá jtsiyenamna, boyabásenga y shembásenga cachcá jtseytëtanana. <sup>12</sup> Er masque Bëngbe Bëtsá, shembása boyabásabentšana tbojanma, mora, shembásabentšana boyabása jóbocnana; y lempe Bëngbe Bëtsábíocana endóbocana.

<sup>13</sup> Cach tšëngaftanga, yejuana chama šmochtsejuabnaye y šmochjayana tšabá o ndoñe tšabá yontsemna, canye shembásabiamá Bëngbe Bëtsáftaca jencuëntana, bestšaše ntsenatsbotscá. <sup>14</sup> Ntšamo entsanga sempre mondbetsejuabnycá, ndayá tšabá bëtsemnama, béngbioye jtsabuátambayana, boyabása bën

stjënésha chabuájuama tojalesenciase, cha jamana cachá chama chaotsëuatjama. <sup>15</sup> Pero shembásabiamna, chë bën stjënésha jtsinýanýayana chabe botamanana y uámanana, er Bëngbe Bëtsá tojanma shembása bën stjënésha chaotsábomnama, chca, cha chaotsebomna ndáyeca chabe bestšaše jtsenátsbot-sama. <sup>16</sup> Masque ntšámnaca, ndánaca tojtseboše quem soyama más jatóyebuambayama, cha bontsemna jtsetatšëmbuana, ni bënga, ni Bëngbe Bëtsábeñe ošbuachiyëngcá enefjuanënga queftsatsleséncia chca ndoñe chaondëtsemnama.

**Bëngbe Utabnabiamá jtenójuaboyama jasama ora, chënga ndoñe tšabá imonjánama**

<sup>17</sup> Mora cbochanjaménda soyënguiñe atše ndoñe quetsátobena tšëngaftanga jáuyanana tšabá šmojama ca, er tšëngaftanga Crístbeñe ošbuachiyëngcá šmojénefjna ora, Bëngbe Bëtsá jadórama, atše šontsinýana chë soye yojtsoserverna tšëngaftanga más bacá chašmotsemnama, y ndoñe tšëngaftangbe tšabiama. <sup>18</sup> Natsana cbochjáuyana, atše sënjouena tšëngaftanga ošbuachiyëngcá šmojénefjna ora, báseftanga canye soye imnétsējuabnaye y ínýengna inýetšá ca, y atše séntsejuabná batšana ndegombre chca yojtsemna ca. <sup>19</sup> Ndegombre jtseytana tšëngaftangbeñe chamotsemna báseftanga canye soye juabnyënga y ínýengna inýetšá, chca, nyetscanga chamotsetatšëmbuama ndëmuanýenga imojtsemna chë Bëngbe Bëtsá tojayana chënga tšabá tmojama ca. <sup>20</sup> Tšëngaftanga tandëse jasama y vínoye jofšiyama šmojénefjna ora, ntšamo bënga fsënduamancá, Bëngbe Utabná bëngbiamá tojanóbanama jtenójuaboyama, ndayá chora tšëngaftanga šmnetsamcá, ndoñe quenátsmëna ntšamo ndegombre cmojtsamncá, chë Bëngbe Utabnabiamá jtenójuaboyama jasama ora; <sup>21</sup> er chë jasama tojobuache ora, cada ona inóntša jasama ndayá tojijëbcá, y ndoñe ntjatobátmanana nyetscanga ndayánaca jasama chamotsebomnëntscuana; báseftanga shéntseca joquédana, y ínýengna tša jëftsesana y jofšiyana jëftsótmenantscuana. <sup>22</sup> ¿Tšëngaftanga ndoñe yebna šmondobomna ndayentše jasama y jofšiyama? ¿Ndáyeca tšëngaftanga šmojtsejuabná chë imnénefjna ošbuáchiyënga nduámanënga imomna ca, y šmojama chë chentše tmojtsemnënga, tondaye ndobomnënga, chamotsëuatjama? ¿Tšëngaftanga šmojtsejuabná atše cbochjáuyana tšabá šmojama ca, chë Bëngbe Utabnabiamá jasama ora chca šmojamama? ¡Ndegombre ndoñe!

**Bëngbe Utabnabiamá jtenójuaboyama saná**

<sup>23</sup> Er atše cach Bëngbe Utabnáabentšana ntšamo cbontsabuatëmbacá sënjanóyëngacñe: Bëngbe Utabná cach uayayëngbe cucuatsiñe tmojánboshjona ibeta, tandëse tojanca, <sup>24</sup> Bëngbe Bëtsábioye tbojtanchuá chentšana, tojanjatá y tojánayana: “Quem tandëse atšbe cuerpo entsemna; tšëngaftangbe tšabiama chanjóbana. Ntšamo mora montsamcá šmocht-



sama, atšbiamá jtenójuaboyama ca.”<sup>25</sup> Cachcá, chë saná tmojansentšana, coptema tojanaca y tojánayana: “Quem coptema vínoye atšbe buiñe entsemna. Atšbe buiñe echanjuábuashana tšëngaftanga chašmotsetatšëmbuama, ntšamo Bëngbe Bëtsá entšanga tojanašebuachenacá pronto yochtsemnana. Cada vínoye chašmojtsofšëšná ora, chca šmochjama atšbiamá jtenójuaboyama ca.”<sup>26</sup> Er tšëngaftanga cada quemëntša tandëše chašmojtšesá ora y quem coptementšaycá chašmojtsofšëšná ora, Bëngbe Utabná chaojésabëntscuana tšëngaftanga šmochántšinýanýnaye cha entšangbiamá tojanóbanama.

### Ntšamo yomna jamana, Bëngbe Utabnabiamá jtenójuaboyama jasama ora

<sup>27</sup> Chcasna, Bëngbe Utabnabiamá jtenójuaboyama jasama ora, ndánaca tandëšentšana tojase y coptémentšana tojofšë, ndoñe chë ntšamo chaotsemnana Bëngbe Utabná yojanjuabnacá, chabiamá Bëngbe Bëtsá jayanana cha puerte bacna soye tojama ca. Chë entšá chca tojama ora, cha jtsinýanýnayana, Bëngbe Utabnabe cuerpo y buiñe chabiamá tondaye yonduámanama.<sup>28</sup> Chiyeca, entsemna cada ona corente chauenojuabó jtsetatšëmbuama aíñe o ndoñe yontseprontana chca jasama y jofšiyama, cabá ndëse y ndofšë ora.<sup>29</sup> Er nderado nda tojase y tojofšë, chë Bëngbe Utabnabiamá jtenójuaboyama jasama ora, cach Bëngbe Utabnabe cuerpo yomnama ntjajuaboycá, cha chë sóyeca jamana Bëngbe Bëtsá chabotsecastigama.<sup>30</sup> Chiyeca, banga tšëngaftanguentšënga šoquënga šmojtsemna, ínýenga añemo ndbomnënga, y ínýengna ndoñe nýe báseftanga tmojóbana.<sup>31</sup> Pero bënga corente tmojajuabó jtsetatšëmbuama aíñe o ndoñe montseprontana ntšamo šuamncá jasama y jofšiyama, cabá ndëse y ndofšë ora; chca, Bëngbe Bëtsá ndoñe buántsemna bënga játaçastigana, ntšamo tšabá yomncá ndoñe tmonjase causa.<sup>32</sup> Pero, Bëngbe Utabná castígoca chca šojabuayená ora, jtsemnana bënga más tšabá jtsamama chamuatsjínýama, y chca, bayté chentšana, Bëngbe Bëtsá ndoñe chabondëtsemna játayanana bënga šojtsamna nýetsca tescama castigánënga jtsemnana ca, cánýiñe chë nýe quem luarama enójuabnaye entšangaftaca.

<sup>33</sup> Chca, Jesucristbeyeca atšbe catšátanga, tšëngaftanga chë Bëngbe Utabnabiamá saná jasama chašmojénefjna ora, cánýiñe nýetscanga šmochjabojátša.<sup>34</sup> Y nderado nda tbojtseshëntsana, cachabe yebnoca chauétsese, chca, Bëngbe Bëtsá ndoñe chabondëtsemna tšëngaftanga jácaçastigana chora ndoñe tšabá šmonjama causa. Chë ínýe soyëngama ndayama tšëngaftanga šmonjatjá, chamna chanjamánda tšëngaftanga jánýama chajjá ora.

### Bëngbe Bëtsabe tšetana obenana, tšabe soyënga jamama

**12** Jesucristbeyeca atšbe catšátanga, atše séntseboše tšëngaftanga chašmotsetatšëmbo Bëngbe

Bëtsabe tšetana obenanama tšabe soyënga jamama, Crístbeñe ošbuáchiyënga jujabuáchama.

<sup>2</sup> Tšëngaftanga šmondétatšëmbo, tšëngaftanga Crístbeñe ndošbuáchiyënga šmonjamna ora, ínýenga cmonjanabuatambá soyënga, y chora tšëngaftanga šmonjamna ínýabeyeca uasjanëngcá, cach entšangbe pormana soyënga mo diosënga cuaftsemncá jadórana; y chë soyëngna ni mo jóyebuambayama ntsobenana.<sup>3</sup> Chiyeca, atše mora séntseboše tšëngaftanga chašmotsetatšëmbo, ndocná ntsobenana jayanana: “Jesús ndoñe chë Cristo quenátsmëna, ni Bëngbe Utabná ca”, chë Bëngbe Bëtsabe Espíritbe obenánaca cha tojtsóyebuambnase. Y cach ndocná ntsobenana jayanana: “Jesús Bëngbe Utabná endmëna ca”, chë Bëngbe Bëtsabe Espíritbe obenánaca cha ndoñe tontsóyebuambnase.

<sup>4</sup> Espiritu jamana bënga ndoñe chamondëtsebomnana cachca tšetana obenana tšabe soyënga jamama, pero lempe jobayana cach canýe Espiritbeyeca.<sup>5</sup> Bënga, Bëngbe Bëtsá mondëserveda, nýetsca soyënguiñe jtsetrabájayëse, pero cach Utabná nýets chë trabajënga šojabanýe.<sup>6</sup> Nýetsca soyënga Bëngbe Bëtsabe obenánaca fsëndbëtsama, pero cach Bëngbe Bëtsá endmëna nda inétsama bënga chë soyënga jamama obenana chamotsebomnana.<sup>7</sup> Bëngbe Bëtsá inétsama cada ošbuachiyá chaotsebomnana canýe tšetana obenana tšabe soyënga jamama, y chë soye jtsinýanýnayana Bëngbe Bëtsabe Espiritu chabe ainaniñe yomnama; y chë tšetana obenana jtsemnana nýetscangbe tšabiamá.<sup>8</sup> Bëngbe Bëtsá, Espiritbeyeca, canýa obenana jatštayana puerte osertanánaca chaóyebuambama, y ínýana obenana cach Espiritbeyeca ndayámncá corente jtsetatšëmbëse chaóyebuambama; <sup>9</sup> ínýana cach Espiritbeyeca, obenana Crístbeñe puerte chaotsošbuáchema, y ínýabiamna, cach nýe canýe Espiritbeyeca, obenana jatštayana šoquënga jáshnama; <sup>10</sup> ínýana, obenana tšabe soyënga Bëngbe Bëtsabe obenánaca jamama, y ínýana, obenana Bëngbe Bëtsabe juabna jóyebuambayama. Inýana, obenana corente jajuaboyama y jtsetatšëmbuama ntšamo tmojayancá Bëngbe Bëtsabe Espiritbeyeca o bacna espiritëngbeyeca tojtsemnana, y ínýana, obenana chë tempo ndmabiyáñnaca chaóyebuambama, y ínýana, obenana josértama ntšamo chë ndaye biyáñnaca jóyebuambayama obenana bomná tojtsichamcá, y ínýengna chama jábuayenama.<sup>11</sup> Pero cach Espiritu, chë nýe canýe Espiritu lempe chca jamana, ntšamo tšabá bëtsemnana cha tojtsejuabnacá cada entšábioye jatštayëse.

### Nýetsca ošbuáchiyënga cánýiñe, mo Crístbe cuerpcá jtsemnana

<sup>12</sup> Cuerpo nýe canýe soye endmëna y chë cuerpna ba soyënga jtsebomnana; masque chë cuerpo ba soyënga jtsebomnana, nýe canýe cuerpo jtsemnana. Bëngaftácnaca cachcá. Bënga banga mondmëna nýetscanga Crístbeñe ošbuáchiyënga, pero Crístbeyeca, bënga cánýiñe mo canýacá jtsemnana.<sup>13</sup> Er bënga

nÿetscanga, judiënga o ndoñe judiënga, nÿe ínÿabia-  
ma nÿets tempo oservénënga o cachëngbiama trabá-  
jayënga šojanëbaye, Crístoftaca cánÿiñe mo canÿacá,  
jtsemnama mo chabe cuerpcá, y chca yomna cach Es-  
píritbeyeca; y Bëngbe Bëtsá tojama cach Espíritu  
nÿetscangbe ainanoye cháumashënguama, bënga jt-  
samëndayama.

<sup>14</sup> Cachcá, canÿe cuerpo ndoñe nÿe canÿe soye ntse-  
bomnana, ndayá ba soyënga. <sup>15</sup> Nderado shecuatše to-  
jayana: “Cucuatše ndoñe quetsásmëna causa, atše  
cuerpentša soye ndoñe quetsásmëna ca”. Chca to-  
jayanamna, shecuatše mo chë cuerpentša soye ndoñe  
cuaftsemncá ndoñe ntjátsmënana. <sup>16</sup> Nderado  
matscuaše tojayana: “Bominÿe ndoñe quetsásmëna  
causa, atše cuerpentša soye ndoñe quetsásmëna ca”.  
Chca tojayanamna, matscuaše chë cuerpentša soye  
ndoñe cuaftsemncá ndoñe ntjátsmënana. <sup>17</sup> Nÿets  
cuerpo bominÿe tojtsemnëse, bënga ndoñe  
muantsobena jouenama. Y nÿets cuerpo matscuaše  
tojtsemnëse, bënga ndoñe muanjobenaye jonguétset-  
šiyana. <sup>18</sup> Pero ndegombre endmëna, Bëngbe Bëtsá  
nÿetsca soye cuerpentše tojancjá ndayentše cha toján-  
bošenentše. <sup>19</sup> Nÿetsca cuerpentša soyënga nÿe canÿe  
soye tojtsemnëse, ndoñe canÿe cuerpo nántsemna.  
<sup>20</sup> Pero ndegombre endmëna, masque ba soyënga  
cuerpentše yomna, nÿe canÿe cuerpo jtsemnana.

<sup>21</sup> Bominÿe quenátobena cucuatše jauyanana:  
“Ndoñe quecásiyta ca”; y cachcá, bestšaše quenátobe-  
na shecuatše jauyanana: “Ndoñe quecásiyta ca”. <sup>22</sup> In-  
ÿetšá, chë cuerpentša soyënga, chë tojtsinÿana mo  
obenana ndbomna y nduámana soyëngcá, jtsemnana  
chë cuerpama más iyta soyënga. <sup>23</sup> Chë cuerpentša  
soyëngama, ndayama bënga tmojtsejuabná más  
nduámana soyënga yomna ca, bënga jamana más  
chaotsámanama, chiñe entsáyaca jtichëtjëse. Y chë  
cuerpentša soyënga, ndayama bënga jtsëuatjana  
ínÿenga chamotsonÿama, bënga jamana ínÿenga  
ndoñe chamondëtsonÿama, chiñe entsáyaca  
jtichëtjëse. <sup>24</sup> Pero chë cuerpentša soyëngaca, chë  
nÿetscanga jtsonÿayana y botamana jinÿama jtsem-  
nana soyëngacna, ndoñe ntseytana chca játamana.  
Bëngbe Bëtsá cuerpo tojama, ntšamo bënga chamot-  
samama chentša más nduámana soyënga, más chaot-  
sámanama, ntšamo chë soyënga bënga tmojtsinÿena-  
ma. <sup>25</sup> Cha chca tojanma, cuerpentša nÿetsca soyënga  
chë cuerpama trabajo cánÿiñe chamotsamama, y  
chca, cada soye chaotsama trabajo chë cuerpentša  
nÿetsca soyëngbe tšabiama. <sup>26</sup> Nderado canÿe cuer-  
pentša soyama bacna soye tojopasá, chora nÿetsca  
chë cuerpentša soyëngámna chca ndoñe tšabe soye  
jtsebínÿana; pero canÿe cuerpentša soyama tcojama  
más uámana soye chaotsemnama o ndaye tšabe soye  
tojopasase, chora nÿetsca chë cuerpentša soyëngám-  
naca chca tšabe soye jtsebínÿana.

<sup>27</sup> Cachcá, tšëngaftanga Crístbeñe ošbuáchiyënga,  
cháftaca cánÿiñe mo canÿacá jtsemnëse, mo chabe  
cuerpcá jtsemnana, y cada ona tšëngaftanguentšá mo  
chë cuerpentša soyëngcá, jtsemnana mo chabe cuer-

pentša soyëngcá. <sup>28</sup> Ntšamo Bëngbe Bëtsá cuerpentše  
soyënga tojancjá ndayentše inabošcá, cachcá, os-  
buachiyëngcá enefjuanëngbeñe Bëngbe Bëtsá to-  
jubuáyana, natsana báseftanga mo Jesucristbe ich-  
monëngcá, chorna Bëngbe Bëtsabe juabna oye-  
buambnayënga, chorna Bëngbe Bëtsabiama abuá-  
tambayënga, chorna chë bëts soyënga Bëngbe  
Bëtsabe obenánaca jamama obenana bomnënga, chë  
šoquënga jáshnama obenana bomnënga, chë ínÿeng-  
bioye puerte ujabuáchanënga, chë inÿe ošbuachiyëng-  
bioye amëndayënga, y chë nÿetsca biyañe jtsóye-  
buambnayama obenana bomnënga, tempo  
ndmabiyañe. <sup>29</sup> Ndegombre, ošbuachiyëngcá ene-  
fjuanëngbeñe nÿetscanga ndoñe Jesucristbe ich-  
mónënga ntsemnana, nÿetscanga ndoñe Bëngbe  
Bëtsabe juabna oyebuambnayënga, nÿetscanga  
ndoñe abuátambayënga, nÿetscanga ndoñe Bëngbe  
Bëtsabe obenana bomnënga, bëts soyënga jamama.  
<sup>30</sup> Nÿetscanga ndoñe šoquënga jáshnama obenana  
bomnënga; nÿetscanga ndoñe nÿetsca biyañe jtsóye-  
buambnayama obenana bomnënga, tempo  
ndmabiyañe; ni nÿetscanga ndoñe obenana bomnën-  
ga quemátsmëna, chë tempo ndmabiyañe nÿetsca  
biyañe jtsóyebuambnayama obenana bomnënga  
ntšamo tmojtsichamcá josértama y ínÿengbioye  
chama jtsabuayinayama. <sup>31</sup> Pero tšëngaftangna  
puerte šmochtseboše, lempe ntšamo chašmojobenacá  
šmochjama, chë Bëngbe Bëtsabe más uámana tšetana  
obenana jëftsashjáchama.

### Bonshánana jtsebomnana

Y inÿe soye más, atše cbochanjínÿanÿiye ntšamo š-  
mojtsobena cabá más tšabá jtsiyenana, Bëngbe Bëtsá  
jtseservénëse.

**13** Nderado atše stjóyebuambaye entšangbe  
biyañe y angelëngbe biyañe, pero ínÿengbioye  
ndoñe sentsababuánÿeshanëse, atše stsemna canÿa  
tondayama uamaná, mo nÿe canÿe metalëshe tojtse-  
nancá, o mo nÿe canÿe platillëshcá ndoñe tšabá  
tontsenanëshe. <sup>2</sup> Y atše obenana stsebomna Bëngbe  
Bëtsabe juabna jóyebuambayama y nÿetsca soyënga-  
ma, y chë Bëngbe Bëtsá tempo entšanga ndoñe ton-  
janinÿanÿé soyënga šojtsësertana, y Bëngbe Bëtsabe  
nÿetsca soyëngama stsetátšëmbo, y Crístbeñe puerte  
stjesošbuáchiye, chca betsošbuáchema nÿa mo chë  
tjashënga chamobonjoma jamama, pero ínÿenga  
ndoñe sentsababuánÿeshanësna, atše tondaye  
sëntsemna. <sup>3</sup> Y atše lempe ntšamo stsebomncá nd-  
bomnjëmënga stséjåtaye, y ínÿengbioye stjenontréga  
atšbe cuerpo chamojuinÿema, pero ínÿengbioye  
ndoñe sentsababuánÿeshanëse, atše ndocna uámana  
soye ntjashjáchana.

<sup>4</sup> Canÿe entšá ínÿenga ababuanÿeshaná, uantado jt-  
semnana masque padecena soyënguiñe tmojtsemna  
órna, y ínÿengaftaca tšabe ainánaca mando jtse-  
bomnana. Inÿenga ababuanÿeshaná ndoñe ntsántša-  
bošana ntšamo inÿa tojatsbomncá, ni ntsenábotam-  
nayana, ni cachá chë ínÿengbiama más uamaná

ntjáténobiamnayana; <sup>5</sup> ndoñe bacá mandbomná ínÿengaftaca ntsemnana, ni nÿets tempo ntsebošana y lempe jtsamana nÿe chabiana tšabe soye jónÿenama; cha nÿe ndayámna ndoñe ntjetnana, ntšamo ínÿenga tmojaborlá ora jtsaperdónayana. <sup>6</sup> Inÿenga ababuanÿeshaná ndoñe ntjóyejuayana chë ndoñe tšabá yondmëna soyëngama; chë ndegombre yomna soyëngamna aíñe. <sup>7</sup> Inÿenga ababuanÿeshaná, ainaniñe añemo jtsebomnana nÿetsca padecena soyënguiñe, lempe ntšamo más tšabá yomna soyënguiñe jtsosbuáchiyana, nÿetsca más tšabá yomna soyëngama jtsobátmanana, y jtsóboyayana nÿetsca toto soyënga.

<sup>8</sup> Bonshánana nÿetsca tescama jëftsemnana. Canÿe te echántsemna, chora chë Uámana Espíritu ndoñe más queochátama entšanga Bëngbe Bëtsabe juabna chamotsóyeuambnana, ni chë ndocna te ndmabiyañe chamotsóyeuambnana, ni chë puerte jtsetatšëmbëse jóyeuambayama obenana chamotsebomnana; <sup>9</sup> er ntšamo mora bënga imotatšëmbcá y Bëngbe Bëtsabe juábnaca jóyeuambayëse tmojayana soyënga, nÿe batšatema bëngbioye jtsinÿanÿayana Bëngbe Bëtsabe soyëngama, ndoñe lempe; <sup>10</sup> pero Jesucristo chaojésabo ora, y chaojama bënga chamotsemna lempe ntšamo Bëngbe Bëtsá bëngbiama yojanjuabnacá, quem soyënga, chë nÿe batšatema bëngbioye jtsinÿanÿayana Bëngbe Bëtsabe soyëngama, ya ndoñe más queochátbinÿana.

<sup>11</sup> Atše básiatema ora, sënjanoyebuambná, sënjanjuabná, y soyëngama tšabá jtsetatšëmbuamna sënjanjuabná mo canÿe basetemcá; pero bëtsá sënjanóbema orna, sentsanajbaná lempe amana mo canÿe basetemcá. <sup>12</sup> Cachcá, mora bënga quem luarentše nÿe batšatema Bëngbe Bëtsabe soyëngama jtsetatšëmbuana, mo canÿe espejuiñe tmojtsonÿacá, pero ndoñe nÿa corente tšabá. Pero canÿe te bënga mochántsetatšëmbo lempe nÿetsca soyëngama, bënga Bëngbe Bëtsabe delante chamojtsemna ora. Mora atše sëntsetatšëmbo nÿe batšatema Bëngbe Bëtsabe soyëngama, pero chora lempe chanjuábuatmana, ntšamo Bëngbe Bëtsá corente šuabuatmcá.

<sup>13</sup> Pero morna, Bëngbe Bëtsabeñe jtsosbuáchiyana, chábeñe jtsobátmanana, y chábioye y ínÿengbioye jtsababuánÿeshanana, chë soyëngna nÿetsca tescama jëftsemnana; pero chentsana chë más uámana soye endmëna ínÿenga jtsababuánÿeshanana.

#### Ndmabiyañe obenana Bëngbe Bëtsabe tšetánana

**14** Bëtsá šmochtsama nÿetscanga jtsababuánÿeshanëse chašmotsiyenama, y puerte šmochtseboše jtsebomnana chë Bëngbe Bëtsabe tšetana obenana tšabe soyënga jamama; pero chentsana masna, chë Bëngbe Bëtsabe juabna jóyeuambayama obenana. <sup>2</sup> Er chë tempo ndmabiyañe mora jóyeuambayama obenana bomná, Bëngbe Bëtsábioye jtsatsët-snayana y ndoñe entšángbioye, er ndegombre entšanguentše ntšamo cha tojtsoyeuambnacá ndocna ntjosértana; chana chabe espíritoftaca jtsóye-

buambnayana y ndoñe nÿe chabe juábnaca, chë tempo Bëngbe Bëtsá ndocna entšábioye tbonjaninÿinÿe soyëngama. <sup>3</sup> Pero chë Bëngbe Bëtsabe juabna oyeuambnayana entšanga jtsëtsët-snayana, chënga más chamotsošbuáchema y ainaniñe añemo chamotsebomnana, Bëngbe Bëtsabe soyëngama jábuayenama, y jamama padecena soyënguiñe tmojtsemna órnaca añemo chamotsebomnana. <sup>4</sup> Chë tempo ndmabiyañe mora jóyeuambayama obenana bomná, jtsamana nÿe cha más jtsosbuáchiyama y ainaniñe añemo jtsebomnana; pero chë Bëngbe Bëtsabe juabna oyeuambnayana jtsamana chë ošbuachiyëngcá enefjuanënga chca soyënga chamotsebomnana.

<sup>5</sup> Atše sëntseboše nÿetsca tšëngaftanga chë tempo ndoñe šmonjanbiyañe mora jóyeuambayama obenana chašmotsebomnana, pero chama atše más sëntseboše tšëngaftanga chë Bëngbe Bëtsabe juábnaca soyënga chašmotsóyeuambnana. Chë Bëngbe Bëtsabe juábnaca soyënga oyeuambnayá más uamaná jtsemnana chë inÿe biyañe oyeuambnayabiamna; chca ndoñe nántsemna, ntšamo canÿe biyañe tojayancá chë biyañe oyeuambnayá tbojtsësertánëse y chë ošbuachiyëngcá enefjuanënga tojábuayenase, y chca, chë soyënga tmojouenama, chënga chamotsobena más jtsosbuáchiyama y añemo jtsebomnana.

<sup>6</sup> Y mora, Jesucristbeyeca atšbe catšátanga, atše nderado tchojábuache y nÿe inÿe biyañe tchojáuyanëse, ¿chca ntšamo chatjúabuache? Atše jtsobenana jujabuáchana, nÿe ntšamo chë biyañe tijayancá átšnaca šojtsësertánëse, y ndayá Bëngbe Bëtsá šojinÿinÿecá entšanga jábuayenama stjobenase, chë Bëngbe Bëtsá tojama atše jtsetatšëmbuama soye, chë Bëngbe Bëtsabe juábnaca stsoyeuambná soye o chë tšëngaftanga jabuátambama cha yoboše soye.

<sup>7</sup> Entšanga monduamana ndayánaca juéanana, mo flautëfja o arpa, vida ndbomna soyënga; cada sóyeca inÿetšá juéanama ndoñe tontsopodénëse, ndocná nantsobena jtsetatšëmbuama ndayá canÿa chë soyëngaca yojtséanama. <sup>8</sup> Y nderado nda trompetëfjua tojuátëta ora, soldadënga japéliama chamoprontama, chë uajatëtaná inÿetšá, nÿa chama ndoñe tonjuá-jatëtëse, ndocná buanjósëta y jempéliama ndoñe nanjoprónta. <sup>9</sup> Tšëngaftangaftácnaca cachcá jtsopasánana. Inÿenga paselo josértama jobenaycnana tšëngaftanga ndoñe šmonjóyeuambase, ndocná queochátstatšëmbo ntšamo šmojtšichamcá. Nántsemna mo nÿe cánÿenga cuaftsoyeuambnacá. <sup>10</sup> Atše sëntsejuabná, ndegombre quem luarentše ba inÿe biyañe entšanga imnëtsoyeuambnayana, y ndaye biyáñnaca tmojoyebuambá ora, sempre jtsemnana ínÿenga ntšamo chënga tmojtšichamcá osertánënga. <sup>11</sup> Pero ntšamo inÿa chabe biyañe šojauyancá atše ndoñe šontsësertánëse, atše stsemna canÿe chabiana ndosertana biyañe oyeuambnayá, y chánaca cachcá atšbiama. <sup>12</sup> Chcasna, chë Uámana Espíritu šondinÿanÿná obenana jtsebomnana tšëngaftanga puerte šmobóseyeca, lempe ntšamo šmojobenacá šmochtsama chca tšetana obenana jóyëngacñama, chë os-

buáchiyënga más jtsošbuáchiyama y añemo jtsebomnana inétsama obenana.

<sup>13</sup> Chiyëca, chë tempo ndmabiyañe mora jóyebuambayama obenana tojtsebomná, Bëngbe Bëtsá chabotseimpadana, cha chaoma ntšamo chë inye biyañe tojayancá chabosertama y ošbuáchiyënga jábuayenama obenana chaotsebomnana. <sup>14</sup> Pero atše Bëngbe Bëtsáftaca stjencuénta, chë ndmabiyañe jóyebuambayama cha obenana šojanatšetacá jtsóyebuambnayëse, atšbe espíritu cháftaca nantsóyebuambnayë, pero atšbe juabna ndoñe ntsetatšëmbuana ntšamo chë espíritu tojtsoyebuambnacá. <sup>15</sup> Y asna, ¿ntšamo atše chtsemana? Bëngbe Bëtsáftaca chanjencuénta atšbe espírituca, pero ntšamo stsihámuaama jtsejuabnáyësnaca. Bëngbe Bëtsá jëtschuayama chanjavërsia atšbe espírituca, pero chca chanjama chíñnaca jtsejuabnáyëse. <sup>16</sup> Nderado aca Bëngbe Bëtsá cojtsatschuaná nye espírituca, y canya quem Bëngbe Bëtsabe tšetana obenanama ndosertaná tcmojóyeunase, cha ndoñe ntsoobenana jayanana “chca chaotsemna ca”, cach aquëcá cha yojtsejuabnama jinjinyiyama, er ntšamo cojtsichamcá cha ndoñe ntsësertánana. <sup>17</sup> Aca jtsoobenana chca puerte tšabá Bëngbe Bëtsá jëtschuayana, pero ntšamo tcojtsamcá ndoñe ntjamana inya ndaye tšabe soye chaotsebomnana. <sup>18</sup> Atše, Bëngbe Bëtsá sëntsatschuaná inye biyañe jóyebuambayama tšëngaftangbiama más tsoobenama; <sup>19</sup> pero Crístbeñe ošbuáchiyëngcá tmojénefjna ora, atše más sëndbëtseboše nye mo shachna palabratémnaca jóyebuambayana, chënga aíñe catafjosertacá, chca, inyënga jabuátambama, y ndoñe bnétsana uaranga palabrenja jatóyebuambnayana inye biyañe, chënga chaósertama ndoñe tontsopodénëse.

<sup>20</sup> Jesucristbeyeca atšbe catsátanga, šmochtsajbaná basetemëngcá juabnayana. Mo šësonatemëngcá šmochtsemna, bacna soyënga jamama ntsetatšëmbcá; pero mo bëtsetsangcá tšabá šmochtsejuabnaye.

<sup>21</sup> Bëngbe Bëtsabe uabemana palabrenjuiñe, Bëngbe Utabná mëntšá tojánayana:

Atše quem entsángbioye chanjáuyana, inyënga inye luarëngocana ashjajnëngaftaca, chëngbiama canye ndosertana biyañe oyeubuambnayënga; y chanjáuyana ndayá chëngbe biyañe chamojtsichamo soyëngaca;

pero ni chca, chënga ndoñe quešmochatóyeunaye ca.

<sup>22</sup> Chcasna, inye biyañe jóyebuambayama obenana jtsebomnana endmëna, Bëngbe Bëtsá ndayánaca chë chábeñe ndošbuachiyëngbioye jinjanyiyama, y chábeñe ošbuachiyëngbioyna ndoñe. Pero, Bëngbe Bëtsabe juabna jóyebuambayama obenana jtsebomnana endmëna, Bëngbe Bëtsá ndayánaca chábeñe ošbuachiyëngbioye jinjanyiyama, y chábeñe ndošbuachiyëngbioyna ndoñe. <sup>23</sup> Er tšëngaftanga nyetscanga ošbuachiyëngcá šmojénefjna ora, nyetscanga ba biyañe šmojtsoyebuambná, y choye tojámashëngo canya chca Bëngbe Bëtsabe tšetana obenanama ndosertaná o chábeñe ndošbuachiyá, cha nanjájuaboje tšëngaftanga opënga šmojtsóbema ca.

<sup>24</sup> Pero nyetscanga tmojtsichamo, Bëngbe Bëtsabe juábnaca jtsóyebuambnayëse, y choye tojámashëngo canya Bëngbe Bëtsábeñe ndošbuachiyá o canya chca Bëngbe Bëtsabe tšetana obenanama ndosertaná, ntšamo chašmojtsichamcá cha bochanjosérta; y chë soye cha bochanjayëñjaná cha bacna soyënga tojama, y ndayá cha tojamiñe corente echántsejuabnaye, ntšamo nyetscanga tmojtsichámuaama. <sup>25</sup> Y Bëngbe Bëtsá chábioye bochanjinjinyiye ntšamo cha ainaniñe tojajuabó y tojabošencá, ndayá ndocnábioye tbojinjinyëcá, y cha echanjoshëntsamentšiyë Bëngbe Bëtsá jadórama, y tšëngaftangbe delante echanjayana Bëngbe Bëtsá ndegombre tšëngaftangbeñe yojtsemnaca.

#### Ošbuachiyëngcá šmojénefjna ora, ntšamo tšabá yomncá lempe šmochtsama

<sup>26</sup> Chcasna, Jesucristbeyeca atšbe catsátanga, šmojénefjna ora, cada ona ndayánaca jtsebomnana nyetscangbiama: inyënga jtsobenana javërsiama, Bëngbe Bëtsá jëtschuayama, inyënga jtsobenana jabuátambana o jábuayenama ndayá Bëngbe Bëtsá tojinjanyëcá, o tempo ndmabiyañe chora jtsóyebuambnayana, o entsanga jábuayenana ntšamo inya inye biyañe tojayancá. Pero lempe šmochjama, ošbuáchiyënga más chamotsošbuáchema y más añemo chamotsebomnana Crísto jaserviama. <sup>27</sup> Nderado inye biyañe jóyebuambayama tojtsemnëse, útata o nya másese únganga chca chamoyebuambá, y canyánya; y jtseytana ndánaca ntšamo tmojtsichamcá chabosertá y nyetscanga chama chauabuayená. <sup>28</sup> Y chca chabosertama y nyetscanga jábuayenama ošbuachiyëngbeñe ndocná tontsemnëse, as ošbuachiyëngcá chamojénefjna ora chë chca oyeubuambnayá bontsemna ndoñe chca biyañe ntsóyebuambnayana, sinó nye canya tojtsemna ora cha jtsobenana chca Bëngbe Bëtsáftaca jencuéntana. <sup>29</sup> Utata o únganga entsamna jayanana soyënga, Bëngbe Bëtsabe juábnaca jtsóyebuambnayëse; y chë inyënga jtsamnana botamana jajuaboyana y jayanana ntšamo chënga tmojayancá aíñe o ndoñe Bëngbe Bëtsábiocana tajojtsóbocanama. <sup>30</sup> Pero canya Bëngbe Bëtsabe juabna tojtsóyebuambnantscuana, inya chentše ouenana tbemanábioye Bëngbe Bëtsá tbojinjinyë ndayánaca yojtsebomna jayanama, as chë natsana oyeubuambnayá iytëca chaóbema, y chabolesenciá chë inya chaóyebuambama. <sup>31</sup> Chca, nyetscanga, canyánya jtsobenana jayanana soyënga, Bëngbe Bëtsabe juábnaca jtsóyebuambnayëse, nyetscanga chamuatsjinyama y nyetscanga añemo jatšatayama. <sup>32</sup> Chë Bëngbe Bëtsabe juabna oyeubuambnayá endobena jtsemándayana ntšamo tojtsichamcá, cha cachabe espírituca tojtsoyebuambná ora; <sup>33</sup> er Bëngbe Bëtsá endmëna nda inétsama bënga natjëmbana chamotsiyenama, y ndoñe chë bënga nyetscanga cachcá ndoñe chamondëtsejuabnana, y nye ntšamo cada ona tojtsebošcá chaotsamama.

Ntšamo nyets luarënguenache, chë ošbuáchiyënga, chë Bëngbe Bëtsabe entšanga mondbénéfjna luarënguenache endbetsemncá, <sup>34</sup> tšëngaftangbéntš-naca, shembásenga entsamna iyteca jobiamëngana, ošbuachiyëngcá šmojënéfjna ora, er ndoñe quenát-slesenciana chënga chora chamuátoyebuambnama, y aíñe chënga entsamna chëngbe boyanga jtsayau-nanana, ntšamo Moisesbe leyíñe endayancá. <sup>35</sup> Chënga ndayánaca jtsetatšëmbuama tmojtsebošëse, cachëngbe boyángbioye yebnoca chamotjanga; er ndoñe corente tšabá ntsemnana canye shembása jt-sóyebuambnayana tšëngaftanga ošbuachiyëngcá š-mojënéfjna ora.

<sup>36</sup> ¿Tšëngaftanga šmojtsjuabná, Bëngbe Bëtsabe tšabe noticiënga tšëngaftangbeñe tojanobojsé ca, o nye tšëngaftanga chë soyënga šmojanóyëngacñe ca? Ndegombre ndoñe chca; chíyeca tšëngaftanga nye cányënga ndoñe ntsoberana jayanama ndayá jamama cmojtsamnama. <sup>37</sup> Nda tojtsejuabná cha Bëngbe Bëtsabe juabna oyeambuambná yomna ca, o chabe ainaniñe chë Espiritu jtsemándayama yojtsebomna ca, cha bontsemna tšabá jtsetatšëmbuana, ntšamo Bëngbe Utabná šojamandacá atše stsabiarnama. <sup>38</sup> Pero cha ndoñe chca tontsetátšëmbo y chca ndoñe yondmëna ca tojayanëse, ndayá cha tojayancá ndoñe šmatjóyëngacñe.

<sup>39</sup> Chcasna, Jesucristbeyeca atšbe catšátanga, puerte šmochtseboše Bëngbe Bëtsabe juábnaca soyënga jt-sóyebuambnayama obenana jtsebomnama, y ndoñe šmattsama chë tempo ndmabiyañe ín'yënga ndoñe chamondëtsóyebuambnama; <sup>40</sup> pero lempe šmochjama ntšamo jamama yomncá, y ndoñe nye ntšamo ca-da ona tojatsjuabnacá.

### Cristo tojtanayenama

**15** Morna, Jesucristbeyeca atšbe catšátanga, atše séntseboše tšëngaftanga chašmuatenójuaboma atše tcbonjanabuayená tšabe noticiënguiñe, ndayá tšëngaftanga šmonjanóyëngacñe, chë ndáyeca tšëngaftanga Jesucristbeñe šmojtsošbuaché y cha jt-seservënëse šmojtsiyena. <sup>2</sup> Chca šmobómnyeyeca, tšëngaftanga atsebácanënga šmojtsemna, pero tšëngaftanga sempre chiñe šmojtsošbuachese, ntšamo cbonjanabuayinacá; chca ndoñesna, nye ndoñe corente tšabá ntjajuaboycá chë buayenana soyënguiñe šmojtsanošbuaché.

<sup>3</sup> Er atše tšëngaftangbeñe sënjëfisanboshjona, Bëngbe Bëtsábocana atše tjanóyëngacñe más uámana buatëmbana soyënga. Atše tcbonjabuatambá: Cristo tojanóbana bënga bacna soyënga tmojamama, ntšamo Bëngbe Bëtsabe uabemana palabrenguiñe chabe juabna oyeambuambnyënga chama tmojanayancá; <sup>4</sup> chë Cristo tmojanatbontsá y unga tianoye cha cháuatayenama Bëngbe Bëtsá tojanmama, ntšamo Bëngbe Bëtsabe uabemana palabrenguiñe chabe juabna oyeambuambnyënga chama tmojanayancá; <sup>5</sup> chë Pédrëbioye tbojánëbëbocnama, y chentšana chë bnëtsana útata ca uabobáinëngbioy-

naca. <sup>6</sup> Chentšana mo shachna patsama más chábeñe ošbuáchiyënga tojánëbëbuacna, chënga cán'yentšë imojtsemna ora; chënguentšanga banga cabá vida imotsóbomñe, masque báseftanga ya tmojóbana.

<sup>7</sup> Chentšana Santiágbioye tbojánëbëbocna, y chentšana nyetsca chabe ichmónëngbioye.

<sup>8</sup> Y chentšana átšnaca šonjánëbëbocna. Mo canye šešona cabá shbená tojonýnacá, Cristo chabe ichmoná šonjábema, chë tempo chama jopróntama ntsebomncá, ndayëntscuana ín'yënga cha tojanabuatambá. <sup>9</sup> Er atše sëndmëna chë más batšá uamaná Jesucristbe ichmónëngbeñe; y ni mercedo taitsatobuajoñe "chabe ichmoná ca" chašmotsábobuatmama, er atše tša sën-jánama Jesucristbeñe ošbuáchiyënga chamotsesufrí-nama. <sup>10</sup> Pero Bëngbe Bëtsá atšbe tšabiama yojanjuabná, y chíyeca atše mora tsmëna ntšamo sëndmëncá, y chabe tšabe juábnaca atšbiama jtsamana, ndoñe nye bonamente quenátsmëna. Er atše más sënjatrabajá, chë inye Jesucristbe ichmónëngbiama; pero ndegombre atše ndoñe nye canya chca chiyatsma, sinó masna Bëngbe Bëtsá chë trabajo tojama, tšabe juabna atšbiama jtsebomnëse. <sup>11</sup> Ndayá más yojtsámana ndoñe quenátsmëna, atše o chënga, Jesucristbe soyëngama abuyayinayíñe más tojatrabajá, sinó ndayá chë soyënga bëngbe buayenana soye yojtsemna, y tšëngaftanga chiñe šmojtsošbuaché.

### Chë obanënga cachiñe vida mochtsatsbomnama

<sup>12</sup> Pero bëngbe buayenana soye endmëna, Bëngbe Bëtsá tojanma Cristo cháuatayenama; as ¿ndáyeca básefta tšëngaftanga šmnëtsichamo Bëngbe Bëtsá ndoñe yochanjama chë mora obanënga chámu-atayenama ca? <sup>13</sup> Pero chca tojtsemna, chë obanënga ndoñe mochántayenasna, Cristo cach ndoñe tontanayena; <sup>14</sup> y Cristo ndoñe matenjésayenëse, bënga nye bonamente chabiama ftsabuayiná, y tšëngaftanga nye bonamente chábeñe šmojtsošbuaché. <sup>15</sup> Y canye más bëts soye: chca tojtsemnëse, bënga muanjábocna mo chë Bëngbe Bëtsabiama soyënga tmojinýe ca ichamëngcá, pero ndoñe ndegombre chca tontsemna; er bënga fsëndbëtsichamo, Cristo cháuatayenama Bëngbe Bëtsá tojanma ca. Pero chë obanënga ndoñe mochántayenasna, Bëngbe Bëtsá ndoñe tonjanma Cristo cháuatayenama. <sup>16</sup> Pero chë obanënga ndoñe mochántayenasna, Cristo cach ndoñe tontanayena. <sup>17</sup> Y Cristo cháuatayenama Bëngbe Bëtsá ndoñe matënjänmëse, tšëngaftanga nye tondayama chábeñe šmojtsošbuaché; tšëngaftanga chë bacna soyëngama cabá ndoñe perdonánënga šmontsemna. <sup>18</sup> Y chca, chë tmojanóbanënga, Crístbeñe ošbuáchiyënga, chënga cach ndoñe chëngbe bacna soyënguentšana atsebácanënga quemochátsmëna, sinó nyetsca tescama castigánënga. <sup>19</sup> Bënga tmojtsobátmana Cristo bëngbiama tšabe soyënga chaotsamama, pero chca nye quem luarentšë bënga vida tmojtsebomnëntscuana, as bënga nyetscangbiama más muantsomerecena, nyetscanga bëngbiama chaotsangménama.

<sup>20</sup> Pero chca ndoñe ndegombre quenátsmëna, er ndegombre Bëngbe Bëtsá tojanma Cristo cháuatayenama. Mo chë uanatsena shajuancá, jtsinñanñayana más shajuangëna chentšana yochjóbcnana, cachcá, Cristo tojtana ora, cha tojaninñanñé Bëngbe Bëtsá yochjanma ínñenga chábeñe osbuáchiyënga chámuatayenama vida chamotsatsbomnama. <sup>21</sup> Chca, ndayá canñe entśá, Adán, tojanmama, nyetscanga jóbanama yojtsamna, cachcá, ntśamo inñe entśá, Cristo, tojanmama, Bëngbe Bëtsá yochjama entśanga chámuatayenama. <sup>22</sup> Er ntśamo, Adánbentšana entśanga bëtsemnayeca jóbanama jtsamnana, cachcá, Crístbeñe osbuáchiyënga bëtsemnayeca, Bëngbe Bëtsá jamana chë nyetsca tescama yomna tšabe vida chënga chamotsebomnama. <sup>23</sup> Pero Bëngbe Bëtsá jamana cada ona cháuatayenama nña chama tempo tojtsemna ora. Natsana Cristo, y chentšana, Cristo cachiñe quem luaroye chaojésabo ora, nyetscanga chë Crístbe entśanga imomñënga. <sup>24</sup> Y chentšana, Bëngbe Bëtsá chë Taitábioye, Cristo chabe améndayana chabojantšabuaché ora, nyetsca mandadënga, mando y obenana bomñënga corente jtsayénjanayëse. <sup>25</sup> Er Cristo bontsemna ínñenga mo reycá jtsaméndayana, chabe uayayënga chabe cucuatšife chamoquedama Bëngbe Bëtsá tojamëntscuana. <sup>26</sup> Canñe uayayá inétsama entśanga jóbanama; pero Cristo último echanjama chabe obenana pronto chaotsochocama. <sup>27</sup> Er ntśamo Bëngbe Bëtsabe uabemana palabrënguiñe endayancá: “Bëngbe Bëtsá tojama Cristo nyetsca soyënguiñe chaotsemándama ca.” Pero “tojama Cristo nyetsca soyënguiñe chaotsemándama ca” tojayana ora, jtsopodénana puerte tšabá jinñama, chca ndoñe yontsayana, Bëngbe Bëtsá Crístbeyeca mandaná yojtsemna ca; Bëngbe Bëtsá nda tojanma Cristo nyetsca soyënguiñe chaotsemándama. <sup>28</sup> Y Cristo nyetsca soyënguiñe chaojtsemánda ora, cach Cristo, chë Uaquiñá, echántsemna Bëngbe Bëtsábeyeca mandaná, Bëngbe Bëtsá chë Cristo nyetsca soyënguiñe chaotsemándama tojanmá. Y chca, Bëngbe Bëtsá lempe echántsemna, lempe ntśamo quem luarentše yobínñiñe.

<sup>29</sup> Inñetśánaca, báseftanga cachiñe uabáinënga imojtsemna, chë osbuáchiyënga nduabáinënga obanënga cuenta. Chca chënga jamana mo chë obanënga uabáinënga chamotsemnama cuafjamcá. Chë obanënga chámuatayenama ndoñe tontsemnëse, ¿ndáyeca entśanga chëngbe cuenta muantenábaye? <sup>30</sup> Obanënga chámuatayenama Bëngbe Bëtsá ndoñe tonjamëse, ¿ndáyeca bënga muántseprontana nyets tempo resjuiñe jtsajnama, Crístbiama oservena causa? <sup>31</sup> Atśbiama cada te resjo endmëna jóbanama. Jesucrístbeyeca atśbe catsátanga, atśe séntsiçhamo, chca ndegombre yómnayeca, atśe oyejuayá stsemna ca, mo Cristo Jesús Bëngbe Utabnabe canñe oservenacá, tšëngaftanga chábeñe šmojtsošbuáchema. <sup>32</sup> Mo canñya tšátjaye bayëngaca tojtsentsjaná orcá, atśbiama puerte resjo enjamna jóbanama, Efeso puebloca; pero nñe chë entśanga mondbëtsejuabnaye jëft-

sashjáçhama soyënga jtsebošëse chca matsjamnëse, ¿ndaye tšabe soye matëñjanóbocna, chca atśbiama resjo jóbanama enjamna ora? Obanënga ndoñe mochántayenëсна, mochtsama ntśamo entśanga jayanana monduamancá: “¡Mochjase y mochjofšiyë, nderado yëfse muatjóbaná ca!”

<sup>33</sup> Ndoñe matenoíngñana. Ntśamo canñya tojanayancá: “Nderado nda bacna amiguëngaftaca tojtseñutaná, cha jtsajbanana chë tšabe soyënga, ntśamo jtsamëse yojoyena.” <sup>34</sup> Tšabá šmochtenójuaboje, y juabna ndbomnacá ndoñe; y šmochtsajbaná bacna soyënga amana, chë obanënga ndoñe mochántayena ca juabnaye causa, er báseftanga tšëngaftanguentše Bëngbe Bëtsabe soyënga ndoñe quešmatábuatma. Atśe chca séntsiçhamo tšëngaftanga chašmotsëuatjama.

### Ntśamo chë obanënga mochtayena

<sup>35</sup> Pero nderado nda nanjatjaye: “¿Ntśamo chë obanënga mochtayena ca? ¿Mocna cuerpo mochtsebomna ca?” <sup>36</sup> ¡Juabna ndbomna entśá! Ndayá tcojajé orna, jtseytana chë jénaye chaóbanama, chë matatema vida chaotsebomnama. <sup>37</sup> Ndayá tcojajecá ndoñe ntsemnana chë juábocnana matatema, ndayá nñe chë meshe, trigo meshe o ndaye mata méshnaca jtsemnana. <sup>38</sup> Pero Bëngbe Bëtsá jamana chë jénayentšana mata chauábocnana, ntśamo jamama cha tojajuabocá; y cha jamana cada jénayentšana canñe mata chauábocnana, ntśamo chë jénayentšana chauábocnana tojtsemncá. <sup>39</sup> Nyetsca cuerpënga ndoñe cachcá ntsemnana. Entśanga canñe cuerpo mondbomna, bayënga inñe cuerpo, shloftšënga inñe cuerpo, y beongna inñe cuerpo. <sup>40</sup> Chë celoca vida bomñënga inñetśá jtsinñnana, y chë quem luarentše vida bomñëngna inñetśá. Pero chë buashinñinñanana y botamanana ntśamo celoca vida bomñënga jtsinñnancá, ndoñe cachcá ntsemnana chë quem luarentše vida bomñëngbe botamanancá. <sup>41</sup> Cachcá, shinñe ndoñe quenátsbomna cachca buashinñinñana juashconcá, ni estrellëngcá; y estrellënguentše cach ndoñe cachcá ntsebuashinñinñanana.

<sup>42</sup> Cachcá, chë obanënga chámuatayenama Bëngbe Bëtsá chaojama ora chamojtsebomna cuerpo, ndoñe queochátsmëna cachcá ntśamo quem luarentše imojaniyena ora imojëftsebomna cuerpo. Ntśamo chë jénaye tcojuatbontśa ora chiye jóbanana, cachcá, quem luarentše bënga mondbomna cuerpo jóbanana, ínñenga juatbontśana y jtsopochócana; pero bënga chámuatayenama Bëngbe Bëtsá chaojama ora, bënga tsëm cuerpo mochántatsbomna y ndocna te queochatopochóca. <sup>43</sup> Chë óbana cuerpo tmojuatbontśa ora, chë cuerpo tondaye ntsámanana; pero chë obanënga chámuatayenama Bëngbe Bëtsá chaojama ora, chë tsëm cuerpo puerte echántsebuashinñinñana y echantsámana. Bënga quem luarentše imoyenëntscuana imobomna cuerpo, nñe batśá obenana jtsebomnana; pero chë Bëngbe Bëtsá šochjatšataye tsëm cuerpo, puerte obenana bomna cuerpo echántsemna. <sup>44</sup> Quem luarentše imobomna cuerpo

endmëna cam luarentše vida chaotsebomnama; pero bënga chámuatayenama chaojama ora, chë bënga mochtsebomna tsëm cuerpo, puerte chë Espíritbeyeca echántsemandana. Canÿe cuerpo quem luarentše vida chaotsebomnama yómnyeyeca, canÿe cuerpënaca, jtsemnana celoca vida chaotsebomnama.

<sup>45</sup> Chca Bëngbe Bëtsabe uabemana palabrenguiñe endayana: “Bëngbe Bëtsá, chë natsana entsá tbojanma chaotsainama ca.” Adánbentsana nyetsca entsanga jabocanana, pero Crístbeyeca, Bëngbe Bëtsá tojama banga mo tsmëma entsangcá chamotsemnana; chca, Cristo jtsemnana mo chë ústonoye Adancá; pero Cristna canÿe espíritu endmëna, y chë espíritu jamana entsanga chë nyetsca tescama yomna tšabe vida chamotsebomnama. <sup>46</sup> Pero chë celoca nyetsca tescama vida jtsebomnama cuerpna ndoñe natsana ntjóbcnana, ndayá chë quem luarentše vida jtsebomnama cuerpo; chentsana chë celoca vida jtsebomnama cuerpo. <sup>47</sup> Bëngbe Bëtsá, chë natsana entsá tbojanma fshántseca, y chca, cha fshantsentsana tojánbocna; Cristna, mo entsángbentsana chë natsaná tsmacá bemanacá, celocana tojánbocna. <sup>48</sup> Adánbentsana, chë natsana entsá, chë fshántseca tmojanmábentsana tmojábcnënga, ntšamo cha yojamncá jtsemnana. Cachcá, chë mo tsmëmangcá tojábiámëngna, Cristcá jtsemnana; Cristo nda celocana tojánabo.

<sup>49</sup> Ntšamo bënga jtsinÿnana chë Bëngbe Bëtsá fshántseca tbojánbema entsacá, cachcá béngnaca mochtsinÿna ntšamo chë celocá yomnacá.

<sup>50</sup> Jesucrístbeyeca atšbe catsátanga, atšbe cbochjáuyana, ñye quem luarentše vida jtsebomnama cuerpëngaca, bënga ndoñe ntsobenana Bëngbe Bëtsabe amëndayoye jamashënguana; ni ndayá yochjopochóca soye, ntsobenana ndayá ndoñe yochanjopochóca soye jtsebomnana. <sup>51</sup> Šmochjouena, atšbe canÿe soye cbochanjáuyana, y chë soye Bëngbe Bëtsá entsanga tempo ndoñe tonjaninÿanyé: Bënga ošbuáchiyënga nyetscanga ndoñe quemochatóbana, pero Bëngbe Bëtsá šochanjátrocaye mo tsmëmangcá. <sup>52</sup> Ñye betscó, mo tcojofshetá y cachora tcojtafšnacá, quem luare ya jopochócama ora, canÿe ángel trompetéjua chaojuátetá ora, er chora trompetéjua echanjuénana, Bëngbe Bëtsá echanjama obanënga chámuatayenama, nyetsca tescama vida jtsebomnama; y bënga, chë ainënga mochtsemnëngna, cha šochanjátrocaye mo tsmëmangcá jtsemnana; <sup>53</sup> er jtseytana Bëngbe Bëtsá chaotrocá chë béngbeñe jopochócama yomna soye, ndocna te yochanjopochóca soyiñe; y ndayá béngbeñe yochjóbana soye, ndocna te yochanjóbana soyiñe. <sup>54</sup> Bëngbe Bëtsá chca bénggaftaca chaojama ora, chë cha jatrócana ndayá béngbeñe yochjopochocacá, ndocna te yochanjopochóca soyiñe, y ndayá béngbeñe yochjobancá, ndocna te yochanjóbana soyiñe, chora echanjochnëngo ntšamo Bëngbe Bëtsabe uabemana palabrenguiñe chama endayancá:

Bëngbe Bëtsá tojayëñaná chë entsanga chamóbana ma endbétsama obenana;

entsanga ndoñe más quemochatóbana ca.

<sup>55</sup> ¡Mora entsanga chamuatóbana chaotsama obenana ya ndoñe quenátsmëna;

Bëngbe Bëtsá chë obenana nyetsca tescama tojayëñaná ca! <sup>56</sup> Entšanga bacna soyënga tmojama causa, obenana endmëna entsanga jóbana chaotsamnama. Ndayá leyiñe iuayanama, entsá jtsetatšëmbuana ndayá yomna bacna soyënga jamana, y chca tátšëmbo causa, chca bacna soyënga jamama juabnéngaca mandaná jtsemnana, y cabana, jóbana jtsemnana. <sup>57</sup> ¡Pero Bëngbe Bëtsá mochtsatschuanaye, bënga mo ayëñanayëngcá cha šojábiamama, er ya ndoñe šontsamna chca jtsemnana, chë Bëngbe Utabná Jesucrísto bëngbiama tojanma sóyeca!

<sup>58</sup> Chíyeca, Jesucrístbeyeca atšbe catsátanga, atšbe bonshánënga, Jesucrístbeñe sempre puerte šmochtsošbuáchiye y ndocna te šmatjalesencia ndocná ni tondaye chaotsama chábeñe ošbuáchiyana chašmot-sajbanama. Sempre šmochtsentsëna bëtscá jtsamana Bëngbe Utabnabiama trabájayiñe, er tšëngaftanga šmondétatšëmbo, Bëngbe Utabnabiama trabájayiñe ndayá šmojamcá, ndocna te ñye bonamente ntsemnana.

#### Jerusalenoca ošbuáchiyëngbiama crocenánama

**16** Mora chanjóyebuambaye chë Jerusalenoca Bëngbe Bëtsabe entsanga ndbomnejëmëngbiama tšëngaftanga šmochjuíchmua crocenánama. Atšbe sëntseboše tšëngaftanga chca chašmoma ntšamo chë Galacia luaroca ošbuachiyëngcá enefjuanenache chama atšbe sënjanabuayenacá. <sup>2</sup> Cada tmengo, cmontsamna batšá crocénana jaluárana ntšamo chë semaniñe šmojonÿencá, y šmochtsejuabaye; chca atšbe choye chajjá ora, ndoñe chacmondétsamna quem uajabótama chora crocénana játatbanayana. <sup>3</sup> Y atšbe choye chajjáshjango ora, Jerusalenoye chjichamuá chë tšëngaftanga mo tšabengcá šmojubuáyana entsanga, chë Jerusalenoca ošbuachiyëngbiaye tšëngaftangbe crocénana chámuyentšbuachema, y tsbuanachangá chanjúyentšbuachiye ndayá imojtsamama chënga jábuayenama. <sup>4</sup> Y nderado, átšnacá chëngaftaca jama tšabá tojtsemnëse, chënga átšeftaca chamua.

#### Ntšamo Pablo yojanjuabná chë luarëngoye jama

<sup>5</sup> Atšbe sëntsejuabná tšëngaftangbiaye jama jautsëtsayama, Macedonia luarëjana chajachnëngüentsana, chentsa ošbuáchiyënga jaftsanyëse, er atšbe sëntsejuabná natsana Macedonia luaroye jéftsana. <sup>6</sup> Nderado baseftaytë tšëngaftangbeñe chašúetsejetana, o nderádose nyets uaftena tempo; as tšëngaftanga inÿe luaroye játama chašmuájabuachama, ndëmoye jama chašojtsemnoye. <sup>7</sup> Atšbe ndoñe quetsátsboše ñye betscó tšëngaftanga jáftsanyana, er atšbe sëntsobátmana más bayté tšëngaftangbeñe jaftsemnana, Bëngbe Utabná chca šojalesenciase. <sup>8</sup> Pero Efesoca šochanjajétana Pentecostés fiesta chaojbuáchëntscuana. <sup>9</sup> Er Bëngbe Bëtsá tojama atšbe

jobenayama muentše chë tšabe noticiëngama banga jábuayenama, y chíyeca banga Crístbeñe montsošbuaché; pero bángnaca atšbe contra montsemna.

<sup>10</sup> Timoteo tšëngaftangbioye chaojase, yejuana š-mochtsantješna cha tondayama chaondëtsauatjama, tšëngaftangbeñe tojtsemnëntscuana, er cha Bëngbe Utabnabiama endëtrabája, ntšamo atše sëndamcá.

<sup>11</sup> Chcasna, ndocná chábioye chabondëtsáboyënja. Bëtscá šmochjama cha natjëmbana átšbioye chau-atábama, er atše cha sëntsobátmana, chë ínÿenga muentše Crístbeñe ošbuáchiyëngaftaca.

<sup>12</sup> Y Jesucrístbeyeca bëngbe catšata Apólosna, atše bëtscá cha sënjaimpadá, chë Jesucrístbeyeca catšátanga tšëngaftanga jányama mochjángaftaca chaotsama, pero cha ndoñe chenátsbošena choye mora jama. Cha choye caochjá, chaojobená ora ca.

### Pablo chënga jtadióšoftanama

<sup>13</sup> Sempre šmochtsenocuedana chë Bëngbe Utabná ndoñe chašmondëtseservenama tojtsama soyëngama. Nÿets tempo, Crístbeñe y chabe soyënguífñnaca š-mochtsošbuáchiye. Ainaniñe puerte añemo šmochtsebomna, y bëtscá šmochtsama Bëngbe Bëtsabe obenánaca. <sup>14</sup> Y nÿetsca soyënga ntšamo chašmojtsamcá, bonshanánaca šmochtsama.

<sup>15</sup> Jesucrístbeyeca atšbe catšátanga, tšëngaftanga š-mondëtatšëmbo, Estéfanos y chabe pamíllanga chë natsanënga monjamnama Jesucrístbeñe jt-sošbuáchiyama, Acaya luaroca, y bëtscá imojtsentšena Bëngbe Utabnabiama jtsetrabájayana, chabe entšanga jtsëjabuáchanëse. <sup>16</sup> Atše cbaimpadá, tšëngaftanga

lempe šmochtsama ntšamo cmojtsamëndacá, chca entšanga mo tšëngaftangbe uanatsanëngcá, y ntšamo nÿetsca chë ínÿenga mo bëngcá quemuiñe uajabuáchanëse trabájayënga cmojtsamëndacá.

<sup>17</sup> Atše tša oyejuayá sëntsemna tšëngaftangbe pueblentšana Estéfanos, Fortunato y Acaico moye tmojáshjajnama, er atše sëntsobena oyejuayá chëngaftaca jtsemnana, tšëngaftangaftaca choca jtsemnana cabá ndoñe sëntsobenëntscuana. <sup>18</sup> Er chënga átšbioye tmonjabo y tšëngaftangbiama šmonjauyana, y chca chënga tmonjama, atše y tšëngaftanga natjëmbana ainánaca chamotsomñama. Chënga šmochtsëtabna mo puerte uámana entšangcá.

<sup>19</sup> Asia luaroca ošbuachiyëngcá enefjuanënga cmontsacheuaná. Aquila y Prisca y chatbe yebnentše mondbëtsenefjuana ošbuáchiyënga cmontsacheuaná, Bëngbe Utabnábeñe ošbuachiyëngcá, tšëngaftangcá bëtsemnayeca. <sup>20</sup> Muentša ošbuáchiyënga nÿetscanga cmontsacheuaná. Nÿetscanga šmochjenchuaye mo Jesucrístbeyeca catšatangcá, jtenámochëse, ntšamo cach tšëngaftangbe pamíllanga puerte bonshanánaca šmondbëtsacheuanaycá.

<sup>21</sup> Quem palabrënga tšëngaftanga jacheuayama cach atšbe cucuátšeca sëntsabiamná.

<sup>22</sup> Nderado nda Bëngbe Utabnábioye ndoñe tbontsebobonshana, Bëngbe Bëtsá nÿetsca tescama chabocastigá. ¡Bëngbe Utabná cachiñe cochjésabo!

<sup>23</sup> Atše, Bëngbe Bëtsá sëntseimpadana, Bëngbe Utabná Jesús chaoma tšëngaftangbeñe tšabe bendicionënga chaotsemnama. <sup>24</sup> Atše, nÿetsca tšëngaftanga cbondábabuanÿeshana, canÿa mo tšëngaftangcá, Cristo Jesúseftaca cánÿiñe mo canÿacá jtsemnëse.



## 2 Corintios

### Jacheuayama

**1** Atše Pablo, Jesucristbe canye ichmoná, Bèngbe Bètsá atše chca jtsemnama yojánbošeyeca, Jesucristbeyeca bèngbe catšata Timotéoftaca quem ts-buanácha sèntsabiamná, Corinto puebloca Bèngbe Bètsábeñe ošbuachiyèngcá enefjuanèngbiama, y nyets Acaya luarentše Bèngbe Bètsabe nyetsca entšangbiámnaca. <sup>2</sup> Atše sèntseimpadana Bèngbe Bètsá Bèngbe Taitá y Bèngbe Utabná Jesucristo, chaboma tšèngaftangbeñe tšabe bendicionènga chaotsemnama y ainaniñe tšabe ebionana chašmotsebonnama.

### Ntšamo Pablo tojansufrí

<sup>3</sup> Bènga mochtsatschuanaye Bèngbe Bètsá, chë Bèngbe Utabná Jesucristbe Taitá, bèngbe Taitá, chë bèngbiama lastemado yomná, y ndaye padecena soyènguiñe tmojtsemna ora, bènga šondbetsañemuayá. <sup>4</sup> Cha bènga jtsañèmuayana padecena soyènguiñe tmojtsemna ora, chca, bènga chamotsobenama chë tmojtseufrinènga jañèmuayama, ntšamo Bèngbe Bètsá šojujabuachcá chènga jujabuáchese. <sup>5</sup> Er ntšamo Cristo tojansufricá, bènga tša fsèndèsufrina chabiama oservèniñe; cachcá, Cristbeyécnaca Bèngbe Bètsá jamana bènga puerte añemo ainaniñe fchaitsebonnama. <sup>6</sup> Er bènga tmojtseufrinèse, jtsemnana bènga jobenayama tšèngaftanga jañèmuayama chë šmojtseufrina ora, y atsebácanènga chašmotsebonnama, Bèngbe Bètsabe soyèngama jouenese. Chë padecena soyènguiñe tmojtsemna ora Bèngbe Bètsá šojáñemose, jtsemnana bènga fchayobenama tšèngaftanga jañèmuayama, padecena soyènguiñe šmojtsemna ora. Chca, bènga jobenayana tšèngaftanga jujabuáchana, Bèngbe Bètsábeñe chašmotsobátmanama, chábeñe jtsošbuáchiyèse, y lempe jtsóboyayama, ntšamo bènga fsènjusufricá šmojtseufrina ora. <sup>7</sup> Bènga sempre fsèndobátmana y tšabá fsèndétatšèmbo chë padecena soyènguentšana tšabá šmochjábocanama, er bènga fsèndétatšèmbo, chë ntšamo bènga fsènjusufricá tšèngaftanga šmojasufrima; y cachcá, Bèngbe Bètsá yochjama tšèngaftanga ainaniñe puerte añemo chašmotsebonnama, ntšamo bènga fchaitsebonnama cha tojamcá.

<sup>8</sup> Jesucristbeyeca atšbe catšátanga, bènga fsèntseboše tšèngaftanga chašmotsetátšèmbo ntšamo bènga Asia luaroca tša fsènjansufrinama. Bènga puerte padecena soyènguiñe fsènjaniyena, nya ndoñe más jauantacá, chentšana vídaca jabocanama ntjatobat-

mancá. <sup>9</sup> Bènga šontsanénana mo jóbanama cuaftsamncá. Pero chë soye tonjanoservé, bènga jtsošbuáchiyama Bèngbe Bètsábeñe, nda inétsama obanènga chámuatayenama, y ndoñe cabéngbeñe ntsošbuáchiyana. <sup>10</sup> Cha šojatsebacá bènga jóbanama puerte resjo enjamntšana, y cachcá šochjátsebacye bèngbiama cachiñe cachcá tša resjuiñe chamojtsemna ora. Bènga puerte chábeñe fsèndobátmana, puerte padecena soyènguiñe bènga chamojtsemna ora, cha cachiñe šochjátsebacama. <sup>11</sup> Tšèngaftangnaca cmontsamna bènga jujabuáchana, bèngbiama Bèngbe Bètsá jaimpádase; chca, ba entšanga Bèngbe Bètsá mochanjètschuaye, er cha tojama bènga chábentšana tšabe bendicionènga fchayóyèngacñama, cha jamèse ntšamo chènga bèngbiama tmojanimpadacá.

### Ndáyeca Pablo Corinto puebloye ndoñe tonjána

<sup>12</sup> Canye soye endmèna ndayá oyejuayènga šojtsabiamná: bènga bèngbe ainanentša juabnéngaca jtsetatšèmbuana puerte tšabá jtsamèse fstsiyena ca, ntšamo chë Bèngbe Bètsabe entšanga endbetsamncá, nyetsca quem luarentša entšangbeñe, y más tšèngaftangbeñe, y bènga jtsetatšèmbuana ntšamo tšabá tifjamcá nyets ainánaca tifjamama. Bènga tondaye chibiatsma quem luarentša entšangbe osertanánaca, ndayá Bèngbe Bètsá tša tšabia béngaftaca bétsemnayeca, šojújabuache chca chamotsiyenama. <sup>13</sup> Er ntšamo fsèntsabiamnamna ndoñe queftsátsoše, ntšamo tšèngaftanga šmojtšalía y cmojtsèsertánentšana inyetšá játayanana, y sèntsobátmana puerte tšabá lempe chacmósertama. <sup>14</sup> Mora ndayá atše stsamama ndoñe lempe quecmátèsertana. Pero atše sèntseboše tšèngaftanga chama corente chacmósertama; chca, Bèngbe Utabná quem luaroye chaojésabo ora, tšèngaftanga bèngbiama oyejuayènga chašmotsebonnama, ntšamo béngnaca tšèngaftangbiama oyejuayènga fchantsemncá.

<sup>15</sup> Chca ndegombre yomnama atše sèndétatšèmboyecá, atše sènjanjuabná tšèngaftangbioye jshétsana jányama, y chca, chë tšabe soye tšèngaftangbiama uta soye jamana, tšèngaftangbioye uta soye jányèse. <sup>16</sup> Atše sènjanjuabná tšèngaftanga jshaftsanyana, Macedonioye ayiñe chëjana matijánachnèngo ora; y chentšana, ya camoye ataboye ora, tšèngaftanga cachiñe jáftsanyana. Chca, tšèngaftanga mašmènjanošená atše juajabuáchana Judea luaroye játama. <sup>17</sup> Atše chca jamama tsjanjuabná ora, ¿chca tijanma

ndoñe corente tšabá ntjenajuaboycá? ¿Tšëngaftanga šmatjájuaboye, ntšamo nÿe quem luarama enójuabnaye entšanga monduamancá, cachora canÿe soyama “aíñe” y “ndoñe ca” jayanëse, atše ndayánaca jamama snétsejuabnaye ca?

<sup>18</sup> Canÿe soye ndegombre endmëna: Bëngbe Bëtsá sempre endbama ntšamo tojayancá, y chca puerte ndegombre endmënayeca, atše ndayánaca chjama ca stjayana ora, chca ndoñe questsbatayana chentšana atšbe juabna jatstrócama, mo canÿa cachora canÿe soyama “aíñe” y “ndoñe ca” cuafjatichamcá. <sup>19</sup> Er Cristo Jesús, Bëngbe Bëtsabe Uaquiñá, ndabiama Silvano, Timoteo y atše tšëngaftangbeñe fsënjanabuayiná, ndoñe ntsejuabnayana canÿe soye jamama y chentšana jatsjuabnayana inÿetšá jatsmama, mo canÿe entšá cachora canÿe soyama “aíñe” y “ndoñe ca” cuafjatichamcá, ndayá chana nÿets tempo ntšamo tojtsejuabnacá jayanana y jamana ntšamo ndegombre yomncá, chentšana ntjatstrocyá. <sup>20</sup> Er ndayá cha tojamiñe, lempe ntšamo Bëngbe Bëtsá tojašebuachenacá jocúmpliana, mo chë lempe ntšamo Bëngbe Bëtsá tojášebuachenama cha “aíñe ca” cuafstichamcá. Chíyeca, Bëngbe Bëtsá bënga tmojt-satschuaná ora, Cristo Jesúsbeyeca bënga jayanana “chca chaotsemna ca”. <sup>21</sup> Pero Bëngbe Bëtsá endmëna nda inétsama bënga y tšëngaftanga puerte Crístbeñe chamotsošbuáchema, cháftaca cánÿiñe mo canÿyacá jtsemnëse; y Bëngbe Bëtsánaca endmëna nda bënga šojabacacá chabe entšanga chamotsemnama. <sup>22</sup> Cha tojama chë Uámana Espíritu bëngbe ainaniñe cháumashënguama jtsemándayama, y chë soye jtsinÿanÿayana bënga Bëngbe Bëtsabe entšanga imomnana. Y bëngbe ainaniñe chë Espíritu imobómnyayeca, bënga corente jtsetatšëmbuana bënga mochjójyëngacñama lempe ntšamo Bëngbe Bëtsá bënga jatsatayama šojášebuachenacá.

<sup>23</sup> Bëngbe Bëtsá entsonÿá atše ndegombre stsichámuama. Atše Corinto pueblöy cabá ndoñe chiyjá, er atše ndoñe quetsátsboše tšëngaftanga jašëchnana, chë bacna soyënga šmojamama, tchojaucácanëse.

<sup>24</sup> Bënga ndoñe queftsátsboše tšëngaftanga jamëndana ndayiñe cmojtsamna jtsošbuáchiyana; er tša šmojtsošbuachéyeca, ndoñe quešmochatajbaná Crístbeñe jtsošbuáchiyana. Bëngbe fsëntseboše ndayá tšëngaftanga jujabuáchana, corente oyejuayënga chašmotsemnana.

**2** Chíyeca atše ndoñe chiyjá jautsëtsayama, er atše sënjanjuabó y sënjanéniyana choye ndoñe jama ca, bacna soyënga šmojtsanmama jábuayenama, y chca, ngménënga játabiamana, ntšamo chanÿe sënjamcá. <sup>2</sup> Tšëngaftanga ngménaca chašmotsemnana atše stjamëse, ¿nda yochjama atše oyejuayá chaitsemnana, sinó nÿe tšëngaftanga, chë atše ngménënga tijábiamënga? <sup>3</sup> Chíyeca tcbonjanëbuábiamama chë ntšamo šmojualiacá, chca, atše choye stjáshjango ora, tšëngaftanga átšbioyë ndoñe ngmená chašmondébe-mama. Chca játamamna, tšëngaftangbiama más tšabá endmëna oyejuayá atše chašmobema. Atše tšabá sën-

jántatšëmbo ndayá átšbioyë oyejuayá šojabemcá, tšëngaftangnaca chca mašmënjánbošena y oyejuayënga chë soye matcmënjánabiama. Chíyeca atše ndoñe chiyataná, nÿetscanga oyejuayënga jtsemnana ndoñe quenjatopodena ora. <sup>4</sup> Pero chë tsbuanácha tcbonjanëbuábiamama ora, atše corente šonjanongmé y ainana šonjántsetšena chca jabuache soyënga tšëngaftanga jubuábiamama, y chca jamama shëchbuýnaca sënjanoperdé. Pero atše ndoñe checbá-tanëbuabiama atše jatsmama tšëngaftanga puerte ngménaca chašmotsemnana, ndayá chašmotsetatšëmbuama atše tša cbababuánÿeshanama.

### Perdón chë bacna soye amabiama

<sup>5</sup> Y mora, chë tšëngaftangbeñe puerte ngménana chaotsemnana tojama boyabásabiamna, cha átšbioyë ndoñe ngmená chešnátsbema, ntsachetšá tšëngaftanga tcmojabiamcá, ínÿengbioyë ínÿengbiama más. Chca séntsichamo, er atše ndoñe quetsátsboše jayanama ntsachetšá tojamama cha más bacna soye tojama ca. <sup>6</sup> Banga tšëngaftanguentšënga ntšamo šmojamcá, chë entšabiama ya bëts castigo entsemna. Nÿe nÿetšá ponto. <sup>7</sup> Chamna, ndayá mora cmojtsamna jamamna entsemna, cha jtseperdónana y jañëmuana, chca, ndocna tšabe soye jamama ndobená ndoñe chaondëtsemnana, chë castiguama puerte ngménaca bëtsemna causa. <sup>8</sup> Chíyeca, tšëngaftanga cbaimpadá cachiñe tšabá chašminÿinÿé chábioyë corente šmobobonshánama. <sup>9</sup> Tempo ya chama tcbonjanëbuábiamama, atše jinÿama tšëngaftanga aíñe o ndoñe šmontsanprontánama, lempe ntšamo tcbonjanamëndacá jamama. <sup>10</sup> Chcasna, ndánaca ndayánaca tšëngaftanga chašmojaperdoná ora, átšnacá cha chantseperdóna. Y atše cha chantseperdóna, ndayá japerdónama ndegombre tojtsemnëse. Y chca chanjama tšëngaftangbe tšabiama y Crístbe delante. <sup>11</sup> Atše tšëngaftangcá, quem entšábioyë šcoperdoná chë bëngbiama tojama bacna soye; chca, Satanás ndoñe chaondobenama bënga jáingñama, er bënga mondë-tatšëmbo cha inëtseboše ndaye bacna soye entšá chaotsamama.

### Ndayeca Pablo ndoñe natjëmbana Troas puebloca tontsanoquedañe

<sup>12</sup> Atše Troas puebloca sënjánashjango ora, Crístbe tšabe noticiënga jábuayenama, atše sënjáninÿe Bëngbe Utabná tojanma chentše banga chë buayenana soye chamouenama y chëngbe ainaniñe chana chamóyëngacñama. <sup>13</sup> Masque chca enjamna, atše ndoñe quetstétsobena natjëmbana ainana jtse-bomnana, er atše sënjanjuabná Jesucristbeyeca bëngbe catsata Tito chentše jinÿenana, pero ndoñe chca. Chíyeca, Troas pueblentša entšanga sëntanadiošoftaná, y Macedonia luaroye sënjána.

### Crísoftaca cánýiñe mo canýacá jtsemnëse, bënga mo ayëñjanayëngcá jtsemnana

<sup>14</sup> Atše Bëngbe Bëtsábioye sëndbëtsatschuanaye, bënga bacna soyënga jamama juabnënga cha tojanëýñjanama, tempo šojanaménda juabnënga; y chë mora bënga Crísoftaca cánýiñe mo canýacá jtsemnëse, nyëts tempo cha šnetsënachayama, mo canýe ayëñjanayacá, y chë nyëts luarenache entsanga Cristbiana soyënga chamotsábuatmama bëngaftaca cha yojsamama, mo nda canýe botamana uanguëtše soye nyëts luarënguenache chauáshanama cuaftsamcá.

<sup>15</sup> Er chë incienso tojtsejuínýinýana ora, entsábioye tšabá juanguëtšenana; cachcá Cristbe tšabe noticiënga fstsabuayiná ora, Bëngbe Bëtsabiana bënga jtsemnana chë ndëmuanyënga tmojtsama cha oyejuayá chaotsemnana. Incienso tcojtsejuinýná ora, nyëtscángbioye juanguëtšenana. Cachcá, Bëngbe Bëtsabe palabra fstsoyebuambná ora nyëtscanga jouenana, Cristo yojsatsebacanga y chë pochocánënga jtsemnana imojtsajnëngnaca. <sup>16</sup> Chë pochocánënga jtsemnana imojtsajnëngna, pochocánënga mochanjábocana, er ntšamo bënga fsëndabuayinacá y tmojouencá chënga tmojtsaboté; y chca, chëngbiama chë tšabe noticiënga jtsemnana mo canýe obanabe uanguëtšancá. Pero chë Cristo yochjátsebacangna, tšabe noticiënga tmojóyëngacñeyeca, mochanjobenaye tšabe vida nyëts tempo jtsebomnana; y chca, chëngbiama chë tšabe noticiënga jtsemnana mo canýe puerte botamana uanguëtšancá. Y asna, ¿nda obenana yojtsebomna chë tšabe noticiënga jábuayenama trabajo jtsamama? <sup>17</sup> Bënga chë tšabe noticiënga ndoñe queftsatabuayiná, ntšamo ba entsanga imojtsamcá, mo nye batšá uámana soyënga cuaftsemncá, y ndayánaca juácanama, mo nda ndaye nduámana soyënga cuaftsencá. Banga chca mondana; bënga ndoñe. Bënga, Crísoftaca cánýiñe mo canýacá jtsemnëse, fsëndabuayiná mo Bëngbe Bëtsabe delante cuaftsemnëngcá, ndegombre nye ntšamo tšabá yomncá nyëts ainánaca jtsebošëse, y mo Bëngbe Bëtsabe ichmonëngcá.

#### Chë Bëngbe Bëtsabe tsëm tratama buayenana soye

**3** Chca bëngbiama fstsjayana ora, tsëngaftanga cmojtsinýana ¿bënga cachiñe tiftëtontsé cabënga bëtšétsanga enobiamnayana? ¿O bënga šojtsamna, mo inýengcá, tsëngaftanga juyentšbuáchiyana o juátjañana tsbuanachangá, bënga tšabá fstsamama chéchangaca jinýanyiyama? <sup>2</sup> Bënga bëngbe ainaniñe puerte tšabá fsëndétatšëmbo, nyëtsca entsanga, ntšamo tsëngaftanga jtsamëse šmoyencá tmojinýe ora, tsëngaftanga jtsinýanýnayanana bënga ndegombre ntšamo tšabá yomncá fstsamama. Chca, tsëngaftanga jtsemnana mo canýe tsbuanachacá, nyëtscanga jtsabuatmana y jtsobenana jualfana, bënga tšabá fstsamama. <sup>3</sup> Nyëtscanga tšabá mondétatšëmbo Cristo tojanma tsëngaftanga chábeñe chašmot-

sošbuáchema, y bëngaftaca cha chca tojanmámna. Chca, tsëngaftanga šmondmëna mo Cristbe canýe tsbuanachacá, ndayécha quem luarentša entsángbioye tojuyentšbuaché bëngaftaca. Tsëngaftanga ndoñe chešmatanobená Crístbeñe ošbuáchiyënga jtsemnana entsangbe trabájoca, er Crístbeñe šmonjanošbuaché chë Bëngbe Bëtsá Ainabe Espíritbeyeca; y chca, tsëngaftanga šmondmëna mo canýe tsbuanácha cháftaca uabemanëchacá, y ndoñe mo entsángbeyeca uabemana tsbuanachacá. Bëngbe Bëtsá chë mandënga ndëtšbé tablëbenguiñe tojanábema, entsanga chamotsobedecénama, pero tsëngaftangna Cristbe buayenana soye tsëngaftangbe ainaniñe šmojóyëngacñe.

<sup>4</sup> Crístbeyeca Bëngbe Bëtsábeñe jtsošbuáchiyëse, bënga corente fsëndétatšëmbo chca ndegombre bëtsemnana. <sup>5</sup> Ndoñe quenátsmëna, nye bënga cánýënga quem trabajo jamama fstsobena y játayanana bëngbe soye chë trabajo yojtsemna ca, er bënga jtsobenana chca jamama, nye Bëngbe Bëtsabe ujabuáchenanaca; <sup>6</sup> er cha tojama bënga fchayobenama quem trabajo jamama, chë entsanga jábuayenana Bëngbe Bëtsá chabe entsángbioye tojanašebuachená soyëngama, ndayá Cristo tojanma sóyeca, mo canýe tsëm tratcá, Bëngbe Bëtsá y chabe entsángaftaca. Quem soye ndoñe quenátsmëna mo chë Bëngbe Bëtsá tempo Israeloca entsángbioye léyeca tojanašebuachená soyëngcá. Inýetšá; entsanga mondana Bëngbe Bëtsabe tsëm trato, Uámana Espíritbeyeca. Chë natsana trato, chë uabemana ley, ntšamo chiñe iuabemancá ndoñe tconjama causa, entsá jóbanama jtsemnana; pero Cristbe tšabe noticiënga, chë tsëm trato, entsanga ainaniñe tmojóyëngacñe ora, chë Uámana Espiritu jamana, chë nyëtsca tescama yomna tšabe vida chënga chamotsebomnana.

<sup>7</sup> Quem Moisesbe ley, chë ndoñe tmonjobedecema entsanga jóbanama jtsamnana, ndëtšbé tablëbenguiñe letrëngaca tmojanábema, y Bëngbe Bëtsá Moisésbioye tbojanantšabuaché ora, cha tša buashinýinýaniñe tojánabo. Chë causa entsanga ndoñe imontsobena ni mo jinýana Moisesbe jubiá, er tša ibojtsanjuebëbuashinýinýana, Bëngbe Bëtsáftaca tbojánencuententšana tojtanabo ora. Pero betesco tojanéjbana chë jubiá chca buashinýinýanana. Chë ley, chë natsana trato, Bëngbe Bëtsá tojanayentšbuaché ora, tša buashinýinýanánaca cha tojanmëse; <sup>8</sup> ndegombre, más bën y uámana tempo entsemna chë Bëngbe Bëtsá bënga šojanašebuachená tsëm soyënga yojsama ora, chë Uámana Espiritu bëngbe ainaniñe cháuamashënguama Bëngbe Bëtsá tojama ora. <sup>9</sup> Bëngbe Bëtsá chë ley tojanayentšbuaché ora, chë ndáyeca entsanga jóbanama yojánamna, ntšamo chiñe betsayancá ndoñe tmonjama causa, chora cha chca tojanma puerte chabe buashinýinýanana jinýanýiyëse; ndegombre más bën y uámana tempo entsemna chë mocna ora Bëngbe Bëtsá yojsama entsanga chabe bominýiñe tšábënga chamotsemnana. <sup>10</sup> Er chë Bëngbe Bëtsá ley tojanayentšbuaché ora

tojaninÿanÿé buashinÿinÿanana, mora jtsinÿnana mo ya tondaye cuabndëtsemncá, chë Bëngbe Bëtsá entšangbiama tsëm soyënga tojtsamama tcojtsonÿá ora, chë tša buashinÿinÿanana yojtsemna ora. <sup>11</sup> Er chë leyama tempo, chë ya jochnënguama tempo entsemna ora, Bëngbe Bëtsá chabe buashinÿinÿanana y uámanana tojinÿanÿese; ndegombre chë Bëngbe Bëtsá tsëm soyënga entšangbiama jamama ora, chë ndocna te yochanjochnëngo tempo ora, Bëngbe Bëtsá más chabe buashinÿinÿanana y uámanana echántsinyanÿnaye.

<sup>12</sup> Y chca, Bëngbe Bëtsá chca bëts soyënga yochjamama fsëndobatmánayeca, bënga fsëntsobena jóyebuambayama, nyetsca soyëngama jayanëse, tondayama ntjatauatjácá. <sup>13</sup> Y chca, bënga ndoñe Moisescá queftsátama, chë chabe jubiá chaobuashinÿinÿenama Bëngbe Bëtsá tojanma ora, canÿe entšëjuaca yojtsenamochécjua; cha chca tojanma, chë Israeloca entšanga ndoñe chamondobená jinÿyama chë jubiá buashinÿinÿanana ya yojtsëchnëjuana ora. <sup>14</sup> Pero Bëngbe Bëtsá tojanma chënga ndoñe chaondósertama ntšamo Moisesbiajana cha tojanayancá. Y cabá quem tempo, ntšamo Bëngbe Bëtsá Moisésbioye tbojanšbuachenacá chëngbiama jamama, Israeloca entšanga tmojtsalía ora, ndoñe ntsësertánana Bëngbe Bëtsabe ndegombre soyënga, mo chëngbiama iytemena soyënga cuaftsemncá, mo chë Moisés yojtsenamochécjua entšëjuacá. Y chca endmëna, er nÿe Crístoftaca cánÿiñe mo canÿacá jtsemnëse, chënga jt-sobenana chë soyëngama jósertana, y iytemencá ya ndoñe ntsemnana. <sup>15</sup> Y méntscoñama, Moisesbe libréšangá chënga tmojtsalía ora, ndoñe ntsësertánana Bëngbe Bëtsabe ndegombre soyëngama, ntšamo chiñe tojtsayancá jamama ndoñe montseboše causa. <sup>16</sup> Pero canÿe entsá chë Bëngbe Utabnabe benache tojshache ora, cha jt-sobenana chë soyëngama josértana. <sup>17</sup> Y Bëngbe Utabná y Espíritu canÿa bondmëna, y Bëngbe Bëtsabe Espíritu tojtsemnentše, chë bacna soyënga jamama juabnënga, ni chë ley ndoñe ntsemándayana. <sup>18</sup> Moisés chabe jubiañe Bëngbe Bëtsabe buashinÿinÿanana y uámanana tojaninÿanÿé, y chíyeca, canÿe entšëjuaca yojtsenamochécjua, chca, chënga ndoñe chamondinÿyama. Pero bënga osbuáchiyënga nyetscanga jtsinÿanÿayana Bëngbe Utabnabe buashinÿinÿanana y uámanana, mo canÿe espejo canÿe soye tojtsinÿanÿnacá, y ndoñe queftsátsoše ntšámnaca jamëse chë soye jatsëytamianana. Cha bëngaftaca yojtsama cada te más chë ntšamo cha yomncá bënga chamotsemnana, cada te más bëtsët-sanga chë ntšamo cha yomncá jtsemnëse. Chca endmëna ntšamo Bëngbe Utabná yojtsama; y Bëngbe Utabná y Espíritu canÿa bondmëna.

**4** Y chca, Bëngbe Bëtsá bëngbiama lastemado yómnayeca, quem trabajo šojabanÿé, jtsabuayiyayama chë Crístoftaca tojašebuachená soyënga; y chíyeca bënga ndocna te ntjájbanana ainaniñe añemo bomnana. <sup>2</sup> Bënga fsëntsaboté chë ínÿyenga iytemencá imnëtsama soyënga, chë ínÿyenga tmojinÿe ora chama

jtsëuatjana, y chë ínÿyenga entšanga jáingñama imnëtsama soyëngnaca, y Bëngbe Bëtsabe buayenana soye ndoñe queftsatstróca ndoñe ndegombre soyëngaca. Chamna, bënga sempre nÿe chë ntšamo ndegombre yomncá fsëndbëtsoyebuambnaye, mo Bëngbe Bëtsabe delante cuaftsemnëngcá jtsamëse; y chca, bënga fsëndbëtsama cada entšabe ainanentša juabnënga chamuayanama, bënga ndegombre soyënga fstsoyebuambná ca. <sup>3</sup> Y nderado bënga chë tšabe noticiënga fstsabuayiná ora, báseftanga chë soyënga chaósertama ndoñe tontsopodënëse, nÿe chë pochocánënga jtsemnana tmojtsajnëngbiama chca jtsemnana. <sup>4</sup> Chëngbiama, chë Crístbeñe ndošbuáchiyëngbiama, chë quem luarentše mora mandayá, Satanás, tojama chë buayenana soye ndoñe chaondëtsësertánama; chca, chënga ndoñe chamondinÿyama chë tšabe noticiënguentšana puerta bëts y tšabe soyënga, chë Cristo puerta bëtsá y obená yomnana ínÿanÿnaye soyënga, nda nyetsca soyënguiñe Bëngbe Bëtsacá yomna. <sup>5</sup> Bënga ndoñe nÿe cabëngbe soyama queftsatabuayiná, ndayá Jesucristbiama mo Bëngbe Utabnacá. Bënga bëngbiama fsëndbáyana mo oservenëngcá fstmëna ca, tšëngaftanga jujabuáchama; y chca fsëndbëtsama Jesús jaserviama. <sup>6</sup> Er Bëngbe Bëtsá, nda quem luare jobojátšama ora tojanmandá binÿiñe ibetentšana chaóboconama, chánaca tojama bënga ainaniñe tšabá chabe soyëngama chaótsësertánama, chca bënga fchayobená juabuátmanana chë Bëngbe Bëtsabe uámanana y obenanentšana inétsobocana osertánana, ndayá Crístbeñe bënga mondonÿá.

#### Bënga fsëndoyena Crístbeñe jtsošbuáchiyëse

<sup>7</sup> Pero chë puerta tšabe y bëts soye, chë Crístbe buayenana soye, bënga mondbomna cuerpiñe, bëngbe ainaniñe; y chë cuerpënga jtsemnana nÿe mo matbajëngcá, ndoñe yapa obenana ntsebomnana, chca, jinÿanÿiyama tša bëts obenana Bëngbe Bëtsábíocana yóbocanama, y ndoñe bëngbentšana. <sup>8</sup> Y chca, bënga nyetsca padecena soyënguiñe vida fsëndbomna, pero ndoñe queftsátsmëna ndobenënga chë padecena soyënguentšana tšabá jabocanama; ndoñe queftsátstatšëmbo ndayá jamama šojtsamna, pero ndoñe queftsátsmëna nt-sobencá jtsobátmanama quem padecena soyënguentšana tšabá jabocnama. <sup>9</sup> Inÿyenga montsama bënga puerta fchaisufrima, pero Bëngbe Bëtsá ndoñe nÿe cachcá šontsabashejuana; mo nda ínÿabioye cuafjutsëncá tmojtsentsjaná ora, ya jóbama jtseprontánana, uayayënga bënga jtsëbáyama imojtsejuabnangbe cucuatšíñe fsëntsemna, pero cabá ndoñe ntjobáyana. <sup>10</sup> Inÿyenga sempre jtsamana bënga bëngbe cuerpiñe puerta fchaisufrima, y jobanámnaca resjo jtsemnana, ntšamo Jesúseftaca tmojanmcá, cha chaosufrima y chaóbanama. Chca bëngaftaca endopasana, chca, ínÿyenga chamobená jinÿyama Jesús bëngbeñe vida yobomnana. <sup>11</sup> Er bënga vida fchabomnëntscuana, sempre puerta resjo bëngbiama jëjtsemnana jóbana, Jesúsbioye servena causa; y

chca endmëna, ínÿenga chamobená jinÿama Jesús vida yobomnama bëngbe cuerpiñe, chë canÿe te yochjopochóca cuerpo. <sup>12</sup> Y chca, bënga tša fsëndësuf-rina y jobanámnaca resjo endmëna; y tšëngaftanga tšabe noticiënga šmojóyëngacñayeca, Bëngbe Bëtsá tojama chë nÿetsca tescama yomna tšabe vida chašmotsebonnama.

<sup>13</sup> Bëngbe Bëtsabe uabemana palabrenguiñe en-dayana: “Atše sentsanošbuaché y chíyeca sënjanoyebuambá ca.” Bënga cachca ošbuáchiyana fsëndbomna chë chca tojanayanacá, y chíyeca bëngnaca Bëngbe Bëtsábeñe fsëntsošbuaché y chabiama fsëntsoyebuambná. <sup>14</sup> Er bënga fsëndétatšëmbo, Bëngbe Bëtsá, nda tojanma Bëngbe Utabná Jesús cháuatayenama, chánaca yochjama bënga Crístoftaca cánÿiñe mo canÿacá jtsemnëse, bënga chámuatayenama, y tšëngaftangaftaca cánÿiñe cha yochtsemnoye šochjúshejango. <sup>15</sup> Lempe ntšamo bënga fstsama y fstsufriñcá tšëngaftangbe tšabiama endmëna; chca, más becá entšanga chábeñe chamojtsošbuaché ora, ba tšabe bendicionënga Bëngbe Bëtsá entšangbiamá jtsamëse, más becá entšangnaca chábioye chamotsatschuaná, ndayá chëngbiamá cha yochjamama; y lempe chca, Bëngbe Bëtsá puerte uamaná y obená yomnama nÿetsca entšanga chamotsichámuama.

<sup>16</sup> Chíyeca bënga ndoñe ntjájbana aianiniñe añemo bomnana. Masque quem luarentša bëngbe cuerpo cada te jtsopochócyana, Bëngbe Bëtsá jamana chë bëngbentšana nÿets tempo vida yochtsebonna soye, cada te más obenana chaotsebonnama; y chca, bënga jtsemnana mo tsmëma entšangcá. <sup>17</sup> Ntšamo bënga mora fsëndësufriñcá endmëna nÿe quem luarentše vida tmojtsebonnëntscuana, y chca, chë soye jtsemnana mo canÿe nduámana soycá; pero ntšamo bënga fsëndësufriñcá josérviana bënga jtsebonnama chë Bëngbe Bëtsá šochjatsataye puerte bëts uámanana y obenana, cháftaca nÿets tempo vida jtsebonnama, chë ndayá yomna nÿetsca soyëngama más bëts y uámana soye. <sup>18</sup> Er bënga nÿe chë tojtsopodena jinÿama soyënguiñe ndoñe nÿets tempo queftsatsjuabná, ndayá chë ndoñe yondopodena jinÿama soyënguiñe; er chë bënga imobena jinÿama soyënga ndoñe nÿetsca tescama ntsemnana; pero chë bënga ndoñe mondobena jinÿama soyënga cocayé nÿetsca tescama jtsemnana.

**5** Bënga mora mondbomna canÿe cuerpo quem luarentše vida jtsebonnama. Quem cuerpo yomna mo chë jtsatsjacama yopodena yebncá, cánÿentše ndoñe nÿets tempo ntjëftsemnana. Bënga mondetatšëmbo, quem cuerpo canÿe te tojtsopochocase, Bëngbe Bëtsá yochjama bënga tsmëma cuerpënga chamotsatsbonnama, celoca nÿetsca tescama vida jtsebonnama, Bëngbe Bëtsabe pormana cuerpënga y ndoñe entšangbe pormana cuerpënga. <sup>2</sup> Chíyeca, bënga quem luarentše chca vida tmojtsebonnëntscuana, yapa tmojtsesufriñca causa, bënga tša jtsebošana betesco Bëngbe Bëtsá celoye chašúyambama, y bënga nÿets tempo celoca jtsiyenama tsëm cuerpo jtsebon-

nama cha chaomama; <sup>3</sup> chca, Cristo yochjésabo ora, bënga chë tsëm cuerpoca chamotsemnama, y ndoñe nÿe espíritu ndocna cuerpoca. <sup>4</sup> Bënga quem cuerpiñe, chë quem luarentše vida jtsebonnama cuerpiñe chamojtsiyenëntscuana, yapa padecena soyënguiñe sufrina causa, bënga jabuache mochanjáshachna; chca echántsemna ndoñe nÿe chë espíritu ndocna cuerpoca jtsemnama bënga imojtsebóšeyeca, ndayá masna, bënga chë tsëm cuerpo chamotsebonnama Bëngbe Bëtsá chaomama imojtsebóšeyeca. Bënga fsëntseboše chë bëngbeñe jopochócamá yomna soye Bëngbe Bëtsá lempe chaotrocama, chca, bënga chamotsobenama celoca nÿetsca tescama vida jtsebonnama. <sup>5</sup> Y Bëngbe Bëtsá endmëna nda tojama bënga chamotseprontánama chë tsëm cuerpo jtsebonnama, y nda tojama Espíritu bëngbe aianiniñe cháuamashënguama, chca bëngbioye jinÿanÿiyama, bënga ndegombre mochjóyëngacñe ndayá Bëngbe Bëtsá tojašebuachenacá.

<sup>6</sup> Y chca, bënga sempre aianiniñe bëts añemo fchandbëtsebonna. Bënga fsëndétatšëmbo, quem cuerpiñe cabá vida bënga mochjëftsebonnëntscuana, bënga ndoñe mochántsemna Bëngbe Utabná yojtsemnentše. <sup>7</sup> Er mora bënga fsëndoyena jtsamëse, ntšamo Crístbeñe bënga imošbuachecá, y ndoñe nÿe ndayá jinÿama tmojtsobenama. <sup>8</sup> Bëngbe fsëntsemna aianiniñe bëts añémoca, y más fsëntseboše jájbana quem cuerpiñe vida jtsebonnana, jama Bëngbe Utabnáftaca nÿetsca tescama vida jtsebonnama. <sup>9</sup> Chíyeca bënga bëtscá fsëndëntšena Bëngbe Utabná sempre oyejuayá jabemama, masque bënga quem luarentše quem cuerpoca tmojtsiyena, o ya ndoñe. <sup>10</sup> Er nÿetscanga šontsamna jashjanguana Crístbe puestoca tribunalentše, cada ona ntšamo yomerecencá chaóyëngacñama, ntšamo tšabá o ndoñe tšabá quem luarentše chabe cuerpiñe vida yojëftsebonnëntscuana tojëftsemcá.

#### Jábuayenama ntšamo Bëngbe Bëtsá inama entšanga tempcá tšabá cháftaca chamotsatsmënama

<sup>11</sup> Chcasna, Bëngbe Utabná nÿetscangbiamá chë más bëtsá yomnama jtsejuabnayëse, bënga bëtscá fsëndama entšanga jáyëñjanama, bënga tšabá ftsamama chamotsejuabnama. Pero Bëngbe Bëtsá ya endétatšëmbo ntšamo bënga ftsmënama, y atše sëntsobátmana tšëngaftángnaca chca tšabá chašmotsetátšëmbo, tšëngaftangbe aianentša juabnéngaca, chë bëngbiamá aíñe ca cmojtsëtsëtsná juabnénga. <sup>12</sup> Bënga ndoñe cachiñe cabëngbiamá queftsatoyebuambná; chca fsëntsihamo ndayá tšëngaftanga oyejuayënga bëngbiamá chašmotsemnama, chca, tšëngaftanga jojuama chašmobenama, chë uámana soyënga tmojtsebiámánangbioye ndayá entšanga canÿe entšábeñe tmojtsonÿacá y ndoñe chca chë entšabe aianiniñe tomna soyëngaca. <sup>13</sup> Er bënga mo chë ndoñe corente juabna ndobomnéngcá ftsamëse, ntšamo báseftanga mondbetsichamcá, jtsemnana Bëngbe Bëtsá jasérviamá; y bënga corente juabna

bomnëngcá fstsamëse, jtsemnana tsëngaftangbe tsabiama. <sup>14</sup> Bënga chca fsëndmëna, Cristo sòndábabuanÿeshanayeca, y chë soye endama bënga nÿe cha fchaiteservënama, er bënga fsëndenojuabná y puerte tsábá fsëndétatšëmbo, canÿa, Cristo, nÿetscangbiama tojanóbanama; y cha nÿetscangbiama tojanóbanayeca, endmëna mo cha tojanóbana ora, nÿetscanga cháftaca cuafjobancá. <sup>15</sup> Y Cristo nÿetscangbiama tojanóbana, chë quem luarentše vida bomnënga ndoñe más nÿe cachëngbiama chamondëtsiyenama, sinó chabiama, nda chëngbiama tojanóbana y tojtanayena. <sup>16</sup> Chiyeca, bënga ya ndoñe ndocnabiama queftsatsjuabná ntšamo entšanga quem luarentše jtsejuabnayama monduamancá; masque ndegombre bënga chca Cristbiama fsënjanjuabná, mora ya ndoñe chca chabiama queftsatsjuabná. <sup>17</sup> Chcasna, nderado nda Crísoftaca cánÿiñe mo canÿacá tojtsemna, Bëngbe Bëtsá tojama cha mo canÿe tsëm entšacá chaotsemnama. Ntšamo chë Crístbiome cabá nduabuátmana ora cha yojamncá, mora ya ndoñe quenátsmëna. Morna cha jtsejuabnayana y jtsamana inÿe soyënga y tsëm soyënga.

<sup>18</sup> Bëngbe Bëtsá endmëna nda chca inétsama, entšanga mo tsëm entšangcá jábiama; y cha Crísoftaca tojama bënga tempcá tsábá cháftaca chamotsatsmënama. Y cha bënga canÿe trabajo sònjanabanyé, bënga entšanga jábuayenama, Bëngbe Bëtsá inétsama entšanga tempcá tsábá cháftaca chamotsatsmënama, y entšanga jujabuáchama chca chamotsemnama. <sup>19</sup> O mëntšá, Cristo tojanma sóyeca Bëngbe Bëtsá yojtsama entšanga chamotsobenama tempcá tsábá cháftaca jtsatsmënama, y chca, chënga chamotsobena chëngbe bacna soyëngama perdónënga jtsemnama, y chë soyëngama nÿetsca tescama castigánënga jtsemnama ndoñe chaondëtsamnama. Y bënga sònjanabanyé chë trabajo, entšanga jtsabuayinayama ntšamo Bëngbe Bëtsá inama entšanga tempcá tsábá cháftaca chamotsatsmënama. <sup>20</sup> Y chca, bënga jtsemnana Cristbe cuenta oyebuambnayënga y amënga, mo cach Bëngbe Bëtsá bëngaftaca cmojtsaimpadancá. Cristbe cuenta cbaimpadá, bëtscá šmochtsentšëna Bëngbe Bëtsáftaca tempcá tsábá jtsatsmënama. <sup>21</sup> Cristo ndocna bacna soye tonjanma, pero bëngbe bacna soyënga jabuajuánamna, Bëngbe Bëtsá cháftaca tojanma mo cha canÿe bacna soyënga amá cuaftsemncá, chca, bënga Crísoftaca cánÿiñe mo canÿacá jtsemnëse, Bëngbe Bëtsabe bominiñe tsábënga jtsemnama chamotsobenama.

**6** Chcáyeca, bënga Bëngbe Bëtsáftaca cánÿiñe trabájayënga quetsomñecana, cbontsaimpadana ndoñe nÿe bonamente chašmondóyëngacñe chë Bëngbe Bëtsá yojtsama soyënga, tsëngaftangbiama tsabe juabna jtsebomnëse. <sup>2</sup> Er Bëngbe Bëtsá chabe uabemana palabrënguiñe mëntšá tojánayana:

Chë tsabe soye jamama tsábá sònjaninÿana ora, atše tcbonjanoyeuná;

chë ácbiome jatsbocama te, tcbonjanájabuache ca.Šmochjinÿe. Mora entsemna chë mocna ora Bëngbe

Bëtsá tsábá ibojtsinÿana tsabe soye jamama; mora entsemna chë mocna ora Bëngbe Bëtsá yojtseboše aca jatsbocama.

<sup>3</sup> Bënga ndocna bacna soye queftsátama, ndayá chaoma entšanga chë tsabe noticiënga chamot-sábotema, chca, ndocná podesca chaondëtsóye-buambnama bëngbe trabajuama, Cristbiama. <sup>4</sup> Inÿetšá, bëngna nÿetsca soyënguiñe fsënjaninÿana mo Bëngbe Bëtsabe oservenëngcá; Bëngbe Bëtsábeñe obatmancá puerte uantadënga jtsemnëse, fstsuf-rina ora; puerte padecena soyënguiñe bëtsemna causa, ndayá jamama ndoñe fsëntsetatšëmbo ora; y ainaniñe puerte ngmëna fstsemna ora; <sup>5</sup> inÿyënga šojtsatsetšená ora; cárceloye šojautame ora; entšanga bëngbe contra tmojtsebouénana ora; jabuache trabájayinÿe puerte uamëntšayënga fstsemna ora; bayté ntsamanacá fstsemna ora; y jasama tondaye fsëntsebomna ora. <sup>6</sup> Bëngnaca fsëntsinÿanÿná Bëngbe Bëtsabe oservenënga fstsmënama, puerte tsabe vídaca, ndocna bacna soye ntjamcá jtsiyenëse; Bëngbe Bëtsabe soyëngama corente jtsetatšëmbëse; inÿyënga ntšamo šojáborlaye ora puerte uantadënga jtsemnëse; inÿyëngbiome puerte bonshanánaca jtsënÿayëse; Uámana Espiritu bëngbe ainaniñe jtsebomnëse; y ndegombre nÿets ainánaca nÿetscanga jtsababuánÿeshanëse; <sup>7</sup> ntšamo Bëngbe Bëtsabiama ndegombre yomncá jtsabuayinayëse; Bëngbe Bëtsabe obenánaca ba soyënga jtsamëse; y mo chë soldadëngcá, uayayënga jáyënjana y chëngbiama jenéuyanama soyënga jtsebomnana, chë Satanásbiome jayénjanama y chabiama jenéuyanama ndayá Bëngbe Bëtsá šojatšatacá jtsebomnëse; y Bëngbe Bëtsá chca tojama, er cha tojama bënga chabe bominiñe tsábënga chamotsemnama. <sup>8</sup> Bënga fsëntsinÿanÿná Bëngbe Bëtsabe oservenënga fstsmënama, inÿyënga bëngbiama tsabe soyënga tmojtsejuabná ora y bënga nduámanënga jtsemnama chënga tmojtsama ora; inÿyënga tsabe soyënga bëngbiama tmojtsoyëbuambná ora y chënga bëngbiama podesca tmojtsichamo ora; bënga áingñayënga fstsmëna ca báseftanga tmojtsejuabná ora, pero bënga ntšamo ndegombre yomncá jtsóyëbuambnayëse. <sup>9</sup> Mo nduamanëngcá bënga entšangbeñe jtsënÿayana, pero banga corente tsábá bënga sòndëubuatma; bëngbiama sempre resjo endmëna jóbana, pero šmochjinÿe, bënga sempre vídaca chentšana jatóbocañana; bënga juatsjínÿama jobenayama, Bëngbe Bëtsábeyeca castigánënga fchandbëtsemna, pero nÿa jóbana ndoñe. <sup>10</sup> Masque ngmënga fstsemna, ainaniñe sempre oyejuayënga fchandbëtsemna; masque ndobomnëngcá, pero fchandbëtsemna banga Bëngbe Bëtsábiocana bëtscá chamotsebomnama; quem luarentša soyënga tondaye queftsátsbomna, pero Bëngbe Bëtsabe entšanga quetsomñecana, ndegombre lempe fsëndëtsóbomne.

<sup>11</sup> Tsëngaftangbiama, Corintoca entšanga, lempe fsënjayana, tondaye ntjaitëmcá; nÿets ainánaca, corente cbondábabuanÿeshana. <sup>12</sup> Bënga puerte cbondábabuanÿeshana, pero tsëngaftangna ndoñe

yapa queščátababuanÿeshana. <sup>13</sup> Atše cbontsaim-padana, mo canÿe taitá chabe básenga cuaftsaim-padancá, atše puerte chašmotsebobonshánama, er atše corente cbondábabuanÿeshana.

### Bënga mondmëna mo Bëngbe Bëtsabe bëts yebncá

<sup>14</sup> Crístbeñe ndošbuáchiyëngaftaca ndoñe šmatjenu-taná ndayánaca jamama, er chca, chëngaftaca š-matjábocana mo chë jaárama uacnata ndoñe cachénchechata tbontsemncá. Ndegombre, chë tšabe soyënga amá y Bëngbe Bëtsabe bominiñe tšabia mëná, nÿa tondayama cachcá ntsejuabnayana, chë Bëngbe Bëtsá tojamandacá ndoñe tontsamacá y bacna soyënga amacá. Ndegombre, chë entšangbe juabna binÿnayáftaca vida bomná, nÿa tondaye ntsebomnana chë nÿe mo ibetiñcá juabnayáftaca. <sup>15</sup> Crísto y Satanás, Belial cánaca uabainá, ndocna te tondayama cachcá ntsejuabnayana; y cachcá copasana, Crístbeñe ošbuachiyá y chábeñe ndošbuachiyáftaca. <sup>16</sup> Ndocna soyiñe cachcá ntsemnana, Bëngbe Bëtsabe bëts yebna, chë nÿe canÿe Bëngbe Bëtsábioye jadórama yebna, y chë entšangbe pormana soyënga, mo diosënga cuaftsemncá jtsadoránana soyënga; chca endmëna, er bënga, nÿetscanga cánÿiñe Jesucrístebeñe osbuachiyëngcá, mondmëna mo Bëngbe Bëtsá Ainabe bëts yebncá, ntšamo Bëngbe Bëtsá chabe uabemana palabrenguiñe chabe entšangbiama tojanayancá:

Chëngbeñe vida chántsebomna y chëngbenache chántšana;

atše chëngbe Bëtsá chántsemna y chëngna atšbe entšanga ca.

<sup>17</sup> Chíyeca mëntsánaca Bëngbe Utabná chabe entšanga tojanéyana:

“Chë bacna soye amëngbentšana šmochjésebocana, y chëngbentšana šmochtsojuánañe;

tondaye šmattsebana, ni šmattsama ndayá Bëngbe Bëtsabe entšangbiama ndoñe tšabá tontsemncá.

As cbochanjúbuaja,

<sup>18</sup> y chántsemna mo canÿe taitacá tšëngaftangbiama, y tšëngaftangna mo atšbe uaquiñënga y bembiangcá.

Chca séntsiçhamo atše, tšëngaftangbe Utabná, nÿets obenana bomná ca” —chiñe enduábemana.

**7** Chcasna, atšbe bonshánënga, chca endmëna ntšamo Bëngbe Bëtsá šojašebuachenacá. Chíyeca šontsamna, Bëngbe Bëtsabe delante nÿetsca soyënguiñe tšábënga jtsemnana, bëngbe cuerpama o espíritu biama bacna soye ndoñe más ntsamcá; y Bëngbe Bëtsá nÿetscangbiama más uamaná yomna ca mondëjuabnýeca, lempe ntšamo tmojobenacá mochtsiyena mo chabe entšangcá, nÿetsca soyënguiñe puerte tšábënga jtsemnëse.

### Ntšamo chë Corintoca entšanga juabna tmojantrocá

<sup>2</sup> Bëngbiama šmochtsenójuabnaye tšëngaftangbe ainaniñe puerte bonshanánaca. Bënga ndocnabiama bacna soye chibiatsma, ndocnabiama chibiatsma más

bacna entšá chaotsemnana, y ndocnábioye chibiatsingñé. <sup>3</sup> Atše chca ndoñe quetsátichamo, ndoñe tšabá šmonjama ca tšëngaftangbiama jayanama, er ntšamo ya tcbonjuayancá, atše tšëngaftangbiama sempre ainaniñe puerte bonshanánaca sëndbëtsenojuabnaye; y chca, mo átšeftaca canÿiñcá šmochántsemna, masque chayóbana o cabá vida chaitsó bomñëse. <sup>4</sup> Atše puerte tšabá sëndétatšëmbo, ntšamo tšabá yomncá šmochtsamama; y tšëngaftangbiama puerte oyejuayá séntsemna. Lempe ntšamo tsësufriñcá tsiyënama, atšbe ainaniñe bëts añemo sëndëtsó bomñe y corente séntsoyejuá.

<sup>5</sup> Macedonia luaroye fsënjánashjajna orscana, ndoñe luare queftsátse bomna jóchnama, sinó nÿetsca soyënguiñe fsëndëpaderena: chë bëngbe buayenana soyama contra tmojtsemnëngaftaca jabuachana enatsët-snayëse, y bëngbe ainaniñe jtsauatjëse. <sup>6</sup> Pero Bëngbe Bëtsá, chë yapa añemo ndbomnëngbioye endbetsañe muayá, tojanma bënga ainaniñe más añemo fchaitsebomnana, Tito moye tonjánashjango ora. <sup>7</sup> Y cha tonjánabo ora, bënga ndoñe más añemo quefstëtsebomna nÿe cha tojánashjanguama, sinó tšëngaftanga š-mojanájabuachama y ainaniñe añemo chaotsebomnana šmojanmama. Cha šonjanéyana tšëngaftanga tša šmojánboše bënga jányama ca, y šonjanacuntá ntšamo tšëngaftanga ngménaca šmojamna, atšbiama ndoñe tšabá šmonjanma causa, y ntšamo tšëngaftangbiama atšbe tšabiana puerte iuámanana; y quem chabe noticiëngaca, cabá más séntsoyejuá.

<sup>8</sup> Er masque tšëngaftanga tša ngménaca šmojamna chë tcbonjanëbuábiamana tsbuanáchama, mora ndoñe quetsatsjuabná más tšabá yojamna chca ndoñe jatëbuabiamana ca; masque tempo atše chca sënjanjuabná, er atše séntsetatšëmbo chë tsbuanácha básëfta tescama ngménënga tcmojánabiama, <sup>9</sup> mora atše puerte oyejuayá séntsemna, ndoñe tšëngaftanga ngménënga šmojamnana, ndayá chë šmojánbomna ngménana tojanmama tšëngaftanga chašmuenójuaboma ndoñe tšabá šmontsamama, y chca amana chašmotsajbanama, tšëngaftangbe juabnënga jatrócase. Chca enjamna, er tšëngaftanga ngménana šmojánbomna ntšamo Bëngbe Bëtsá inabošcá; chíyeca, bënga ndocna bacna soye tšëngaftangbiama chibiatsma.

<sup>10</sup> Ntšamo Bëngbe Bëtsá tojtsebošcá ngménana bomnëntšana, jóbocnana chë bacna soyënga tcojamama jenójuaboyana y juabnënga jatrócana; y juabna jatrócana entšábioye juanatsana atsbočaná chaotsemnana, y cha ndocna te ntjatsjuabnayana más tšabá yojamna ndoñe chca ntjatstrócana ca. Pero ntšamo chë nÿe quem luarama enójuabnaye entšanga mondbetsebomncá ngménana bomnëntšana, ndoñe ntjóbocnana juabna jatrócana; chentšana jóbocnana nÿe nÿetsca tescama castiganá jtsemnana, mo nÿetsca tescama cuafjobancá. <sup>11</sup> Šmochjinÿe ndayá tojóbocna, ntšamo Bëngbe Bëtsá inabošcá ngménana bomnëntšana: tojanma chë šmojanma soyiñe puerte chašmuenójuaboma; y ntšamo jájandmanana bëtscá chašmonguanguama; tojanma tšëngaftanga chacmetona-

ma chë bacna soye tojanmáftaca; y castigánënga jtsemnama jtsauatjámna. Chentsana, tsëngaftanga tša šmojtsanboše atše jinýama; y šmojtsanprontana lempe jamama chca bacna soye ndoñe más chaondëtsemnama y chca tojanmábioye jacastigama. Nyetsca chë soyënguiñe tsëngaftanga šmonjinýanýe chca bacna soye ndoñe šmonjanmama; y chca, mora tondaye quenátsmëna tsëngaftanga castigo jtsebmomnama chacmotsamnama. <sup>12</sup> Y chca, atše chë tsbuanácha tcbonjanébuábiamama ora, ndoñe checbátanébuábiamama chë puerte bacna soye tojanmábeyeca, ni chë bacna soye tojanoyëngacñábeyeca; ndayá tsëngaftanga, mo Bëngbe Bëtsabe delante cuaftsemnëngcá, chë šmojanma soyiñe bëtscá chašmuenójuaboma, y chca, cha chašminýanýe tsëngaftanga bëngbe tsábiamama puerte šmenójuabnama. <sup>13</sup> Chíyeca bënga más añemo ainaniñe fsëntsebmoma.

Pero ntsachetšá añemo fstsbmomnama, masna puerte oyejuayënga fsëntsemna, er bënga fsënjinye Tito tša oyejuayá, er chabe ainaniñe lempe natjëmbana yojtsemna nyetsca tsëngaftangbiama. <sup>14</sup> Tito tsëngaftanga jányama cabá nda ora, atše cha sënjanianyana tsëngaftanga šmochjanóyeunaye chë atše tcbonjanébuaja palabra ca; y tsëngaftanga ndoñe chešmatsma atše chaitsëuatjama chca tijánayanama. Inýetšá, lempe ntšamo tbojauyancá ndegombre endmëna; cachcá, ntšamo bënga Títbioye fsënjaniyancá ndegombre entsemna, chë tsëngaftangbiama fstsóyejuama. <sup>15</sup> Y mora Tito más cmontsababuányeshana, ntšamo cha tcmojanamëndacá ndayá tsëngaftanga šmojanmama, y ntšamo puerte respétoca y mo uamaná cuaftsemncá chabiamama jtsejuabnyëse šmojanofjama tojtenojuabó ora. <sup>16</sup> Atše puerte oyejuayá sëntsemna, er atše sëndétatšëmbo tsëngaftanga ntšamo tsábá yomncá nyetsca soyënguiñe šmochtsamama.

### Chënga jañémuayama, inyë ošbuachiyëngbioye nyets ainánaca jujabuáchama

**8** Y mora, Jesucristbeyeca catsátanga, bënga fsëntseboše tsëngaftanga chašmotsetátšëmbo ntšamo Bëngbe Bëtsá bëtscá tsabe bendicionënga tojama Macedonia luarentše ošbuachiyëngcá enefjuanëngbiama. <sup>2</sup> Chënga puerte tmojasufrí, y chora chca, chënga tmojinýanýe becá imošbuáchema y tša imoyejuama; y masque puerte ndbomnëjëmënga, chënga nyets ainánaca bëtscá tmojanacaredadó Jerusalenentša ošbuachiyënga ndbomnëjëmëngbiama. <sup>3</sup> Atše sëndétatšëmbo y sëntsobena jayanama chënga ndegombre tmojatšatá ntšamo tmojobenacá, y ntsachetšá imobenentšana cabá más, chënga chca imobóseyeca. <sup>4</sup> Tša šonjánaimpadana chëngbioye jálesenciamama ndayánaca jamama, Jerusalenoca ošbuachiyëngbioye jujabuáchama. <sup>5</sup> Bënga ftsjanobatmanama cabá más chënga tmonjanma; natsana, chënga Bëngbe Utabná tmojanianyana lempe ntšamo cha tojtsebošcá chënga jamama imojtseboše ca, y chentsana bëngaftácnaca cachcá tmonjanma; y lempe enjamna ntšamo Bëngbe Bëtsá inabošcá. <sup>6</sup> Ndayá

Macedonioca ošbuachiyënga tmojanmama bënga añemo fsënjanyëngacñeyeca, bënga Tito fsënjaimpadá chë tsabe trabajo chaopochocama, chë tsëngaftangbeñe crocénana játbanana, Jerusalenoca ošbuachiyënga jujabuáchama, ndayá cha jamama tojanbojatšecá. <sup>7</sup> Y morna, ntšamo tsëngaftanga nyetsca soyënguiñe tša šmomncá —puerte ošbuachiyënga, becá obenënga Bëngbe Bëtsabe soyëngama jóyebuambayama, puerte osertánënga Bëngbe Bëtsabe soyëngama, corente juabnyënga bëtscá jamama Cristo jaserviama y bëngbioye corente ababuányeshanënga —cachcá, mórncaca bëtscá šmochjama quem trabajuiñe chë ošbuachiyënga ndbomnëjëmëngbiama, tsëngaftangbe bonshánana ntsinýanýayëse.

<sup>8</sup> Chca ndoñe quecbatëtsëtsná mo canýe mandcá; atše sëntseboše ndayá nyë tsëngaftanga jáuyanana ntšamo ínýenga bëtscá tmojatrabajá chë ndbomnëjëmëngbiama, tsëngaftangnaca cachcá chašmot-samama; y chca, chašminýanýema chë tsëngaftanga šmobomna bonshánana ndegombre bëtsemnama. <sup>9</sup> Er tsëngaftanga šmondétatšëmbo ntšamo Bëngbe Utabná Jesucristo puerte tsabe soyënga bëngbiama tojamama, bëngbioye puerte jtsababuányeshanëse. Celoca, cha cabá quem luaroye ndabo ora, cha bëtscá inabomna; pero tsëngaftanga ababuányeshanayeca, mo canýe puerte nduamanacá tojanóbema. Y mora, Cristo mo canýe nduamanacá tojobemayeca, Bëngbe Bëtsá puerte tsabe soyënga šojatšatá.

<sup>10</sup> Tsëngaftangbe tsábiamama mëntšá cbabuayená, ntšamo quem soyiñe šmochjamama. Chë inyë uata tsëngaftanga šmonjanbojatsé, ndoñe nyë chë ndbomnëjëmëngbiama jacjayama, ndayá chca jamama jtsebošámna. <sup>11</sup> Morna, chë ndbomnëjëmëngbiama trabajo šmochjapochóca; chca, ntšamo tsëngaftanga becá šmonjanprontana y jujabuáchama tša šmonjanbošcá, mórncaca cachcá chašmomama chë trabajo japochócama, ntšamo šmojobenacá jacjayëse. <sup>12</sup> Er canýe entšá, jatštayama ndegombre tojtsebošëse, ndayá cha tojatštacá Bëngbe Bëtsábioye oyejuayá jabemana, ntšamo cha tojtsobencá, y ndoñe ntšamo cha ndoñe tontsobencá.

<sup>13</sup> Ndoñe quenátsmëna, tsëngaftanga puerte ujabótënga chašmoquedá, ínýengbioye atšatnaye causa, chënga ndoñe yapa ujabótënga chamondëtsemnama. <sup>14</sup> Atše sëntsichamo ndayá nyetscanga chamotsenajabuachana, chca tojtséjaboto ora ca. Mora, chë bëtscá šmobomnentsana šmontsobena chënga jujabuáchana, ndayá tojtsabuáshebencá jatšatayëse; y inyë orna, chënga entsamna tsëngaftanga jujabuáchana chë cmojtsabuáshebena soyëngaca. Chca, nyetscanga jóyëngacñana ndayá tojtséjaboto ora. <sup>15</sup> Ntšamo Bëngbe Bëtsabe uabemana palabrënguiñe endayancá:

Chë tša bomnábioye ndoñe chebatanójama;  
y chë nyë batšá bomnábioye, ndoñe quebënjatanbuáshbena ca.



### Tito y chabe enutenga

<sup>16</sup> Bëngbe Bëtsá šcuatschuá, tšëngaftanga jtsanÿena-ma Tito ainaniñe juabnënga chaotsebomnama cha tojanmama, cachcá ntšamo bënga fsëndbomncá. <sup>17</sup> Er tšëngaftangbioye chaotsama bënga fsënjanimpadá ora, cha oyejuayá añe ca tonjánayana choye jama; y chabiamana puerte enduámana tšëngaftangbe tšabiana; chíyeca mora echanjá tšëngaftanga jányama, chca jamama cachá yobóseyeca.

<sup>18</sup> Títoftaca, canÿa Jesucristbeyeca bëngbe catsata fsëntsichamná; chabiamana puerte tšabá ošbuachiyëngcá enefjuanëngbenache mondoyebuambná, chabe trabajuama chë tšabe noticiënga abuyiyayama. <sup>19</sup> Y ndoñe ñe chë soye, sinó quem luarentse ošbuachiyëngcá enefjuanënga cha tmonjuábuayana bëngaftaca Jerusalenoye jama, y jujabuáchama chë ndbomñejëmëngbiama trabajuiñe; chë trabajo endmëna bonshánana jinÿanÿiyama; chca fsëntsama, Bëngbe Utabná jtsatschuanayama y jinÿanÿiyama bënga chca jujabuáchama tša fstsbošama. <sup>20</sup> Títoftaca cha fsëntsichamná, chca, ndocná chaondétsichamo bënga ndoñe tšabá tifjama ca, ntšamo játbanama cmojtsamniñe, chë becá juabónana játbanama, ndbomñejëmënga jujabuáchama; <sup>21</sup> er bënga fsëndama lempe ntšamo fstsobencá, ndoñe ñe ntšamo Bëngbe Bëtsabe bominiñe tšabá yomncá jamama, ndayá ntšamo entsangbe bominiñe tšabá yomncánaca.

<sup>22</sup> Chátaftaca inÿa Jesucristbeyeca bëngbe catsátnaca fsëntsichamná; cha bënga ba soyiñe šonjinÿanÿé cha yojtseboše bëtscá jamama, Cristo jaserviama, y mora más, er cha puerte bëtscá entsejuabná tšëngaftanga puerte tšabá šmochjamama. <sup>23</sup> Y Titbiamna, cha quem trabajuiñe atšbe enutá endmëna, y atscá tšëngaftangbiama endëtrabája; y chë inÿata Jesucristbeyeca bëngbe catsatati biamna, chata bontsemna quemuentša ošbuachiyëngcá enefjuanëngbe ichmónata, chëngbiama chabóyebuambama; y chë bontsama sóyecna, chata Crístbioye corente jtsatschuanayana. <sup>24</sup> Chíyeca, chëngbioca ošbuachiyëngcá enefjuanënga chca chamotsetatšëmbuama, chë ichmona boyabásëngbioye šmochjinÿanÿiye tšëngaftanga ndegombre chënga šmojtsababuánÿeshanama, y bënga razón fstsobomnama tšëngaftangbiama oyejuayënga jtsemnama.

### Chë inÿe ošbuáchiyëngbiama crocénana játbanama

**9** Chë Jerusalenoca Bëngbe Bëtsabe entsangbiama crocénana játbanamna ndoñe quenátsiyta tšëngaftangbioye jatëbuabiamnayama, <sup>2</sup> er atše ndegombre séntsetatšëmbó tšëngaftanga tša šmojtseboše chca jujabuáchama. Macedonioca entsanga puerte oyejuayá sempre sëndbëtsëtsësnaye, Acaya luaroquënga chë inÿe uatscana quem trabajuiñe jujabuáchama šmoprontánama; y chë jujabuáchama tšëngaftangbe bëtscá juabnënga tmojama banga quem luarentsënga bëtscá añemo chamotsebomna-

ma, chëngnaca chë trabajo jamama. <sup>3</sup> Pero Jesucristbeyeca quem catsátanga sëntsichamná, ntšamo bënga oyejuayënga tifjayancá tšëngaftanga chašmot-samama, chë tšëngaftanga quem trabajuiñe bëtscá šmochjama ca; chca, ntšamo tijanayancá ndoñe ñe bonamente chaondétsëmnama, y ntšamo sënjanayancá tšëngaftanga chašmotseprontánama; <sup>4</sup> er nderado báseftanga Macedonioquënga átšeftaca tmojá y choca ndëprontánënga tcmojánÿena chë ndbomñejëmëngbiama ujabuáchenanaca, chë soye nanjama bënga fchaitšëuatjama, er ba soye fsënjayana bënga ndegombre fstsëtatšëmbó tšëngaftanga prontánënga šmochtsemna ca; y ndegombre, tšëngaftangbiama cabá más ouatjca nántsemna. <sup>5</sup> Chíyeca, tšabá šonjuínÿnana Jesucristbeyeca quem catsátanga jáim-padana chënga atšbe natsana chamotsama tšëngaftanga jányama, y chacmëjabuachama chë juabónana játbanama, ndayá tšëngaftanga tempo šmonjanašebuachenacá. Chca, atše choca chajáshjango ora, tšëngaftangbe juabónana chaotseprontana. Chca, tšëngaftanga šmochanjínÿanÿiye ndbomñejëmëngbiama šmojacjá, chca jamama tša šmobóseyeca, y ndoñe ñe batsatema jatšatayama y tšëngaftangbiama bëtscá jobuájuama šmojtseboše.

<sup>6</sup> Quemuiñe šmochtsenójuabnaye: Nda ñe batsá tojajé, cach batsá chentsána josháchiñana; y nda bëtscá tojajé, cach bëtscá chentsána josháchiñana. <sup>7</sup> Cada ona bontsemna jajájuana ntšamo chabe ainaniñe tojajuabocá; ndoñe ngmëna o ñe inÿenga chca jamama tmojtsemándayeca. Chca chaotsemna, er nda oyejuayá tojajajóbioye, Bëngbe Bëtsá jtsebobonshánana. <sup>8</sup> Bëngbe Bëtsá endobena jamana chábentšana nyetsca tšabe bendicionënga y bëtscá soyënga tšëngaftanga chašmotsebomnama; chca, ntšamo nyetsca soyënguiñe cmojtsëjbotcá sempre chašmotsóbomñama, y cabá más bëtscá chašmotsebomnama, nyetsca tšabe obrënguiñe inÿenga chašmëjabuachama. <sup>9</sup> Bëngbe Bëtsabe uabemana palabrenguiñe, mëntšá endayana chë bëtscá tojacjabiama:

Cha nyets ainánaca ndbomñejëmënga bëtscá jatšatayana;

y chë tšabe soyënga ntšamo cha tojtsamcá nyets tempo jëftsemnana. <sup>10</sup> Bëngbe Bëtsá, nda endbama chaotsemna jénaye jájema y sananga jasama, cmochanjátšataye lempe ntšamo cmojtsëjbotcá, y echanjama, tšëngaftanga cabá más tšabe soyënga chašmotsamama. <sup>11</sup> Bëngbe Bëtsá echanjama tšëngaftanga nyetsca tšabe soyënga chašmotsebomnama, chca, tšëngaftanga nyets ainánaca puerte inÿengbioye chašmatšatama, y bëngbeyeca, chë mochjójyënga Bëngbe Bëtsá chamotsatschuanama; <sup>12</sup> er chë ujabuáchenana Bëngbe Bëtsabe entsanga tcojatsatá ora, ndoñe ñe ndayá tojtsëjbotcá jatšatayana, ndayá chënga Bëngbe Bëtsá chamotsatschuanámna jamana. <sup>13</sup> Chënga Bëngbe Bëtsá mochántatschuanaye, er chë ujabuáchenanaca chëngbioye jinÿanÿiyana, ntšamo Cristbe tšabe noticiënguiñe iuayancá tšëngaftanga šmobedecénama, y ntšamo

tšëngaftanga tšabá jamëse, nyëts ainánaca bëtscá soyënga chënga y nyëtscanga šmojátšatama. <sup>14</sup> Y chënga tša mochántseboše tšëngaftanga jányama y tšëngaftangbiama Bëngbe Bëtšá mochántseimpadana, er cha bëtscá tšabe soyënga tšëngaftangbiama tojama. <sup>15</sup> Bëngbe Bëtšá šcuatschuá ndayá cha šojátšatama, canye puerte uámana soye, ndocná jobenayana tšabá jayanama ntšamo chë soye bëtsemnana!

### Ntšamo Pablo tojánayana ínÿenga chabe contra imojtsichamo ora

**10** Y mora, atše Pablo, cbochanjáimpada, tšëngaftangbioye puerte bonshanánaca jtsënyayëse, y tšëngaftangbiama tšabá jamama jtseprontánëse, ntšamo cach Cristo endbetsamcá. Báseftanga tšëngaftangbioquënga imojtsichamo atše puerte nduamáná tsenóbema atše tšëngaftangaftaca stsemna ora, pero corente añemo bomná tsenóbema jabuache soyënga jayanama tšëngaftangbentsána bënoca stsemna ora ca. <sup>2</sup> Tšëngaftanga cbontsaimpadana, tšëngaftanga jányama chajjá ora, atše ndoñe chašondëtsemna puerte añemo bomná jtsemnana, jabuache soyënga tšëngaftanga jáuyanama, ndoñe ntšamo atše puerte tšabá sëntsetatšëmbcá ndayá báseftangaftaca jamama šojtsotocana, chë ndëmuanÿenga imojtsejuabná, nÿe bënga tšabá jtsomñama juabnëngaca bënga fstsiyena ca. <sup>3</sup> Ndegombre bënga quem luarentše fsëndoyena, pero ndoñe queftatšepelia Cristbiama, ntšamo quem luarentša entsãnga monduamancá; <sup>4</sup> er chë ndaye sóyeca bënga Cristbe soyëngama fsëndépelia, ndoñe quenátsmëna mo chë ndaye sóyeca chë nÿe quem luarama enójuabnaye entsãnga japéliama monduamancá, ntšamo nÿe chënga tšabá jtsomñama juabnënga yomncá. Inÿetšá, chë ndaye soyëngaca bënga fsëndépelia, Bëngbe Bëtšá jtsinÿanana puerte obenana bomna soyënga yomna ca; y endmëna chë Satanás tojtsemánda soyënga jayëjanama, puerte jabuache soyënga jayëjanama. Mo nda canye uayayábioye jtsepochochancá, chë Bëngbe Bëtšabe osertánana ndoñe yonduámana ca jinÿanÿiyama soyënga ichámëngbiama, <sup>5</sup> y Bëngbe Bëtšabe osertánana jtsabotema juabnënga bomnëngbiama, bënga fsëndama ntšamo chënga tmojtsichamcá tondaye chaondëtšamanama. Y chë japéliama fsëndbomna soyëngaca, bënga fsëndbëtsama chca juabnayana chamotsajbanama, y chamotsobena ntšamo Cristo yomandacá jtsamana. <sup>6</sup> Bënga fsëntseprontana chë Cristbiama nduauenanënga jácastigama, lempe ntšamo Cristo cmojtsamëndacá tšëngaftanga chašmojtsama ora.

<sup>7</sup> Tšëngaftanga ndayánaca jtsinÿayana nÿe ntšamo tbojtsabinÿnëcá. Nderado nda becá tojtsejuabná Cristbia yomna ca, cha bontsemna jtsejuabnayana bëngnaca Cristbenga ftsmënama, ntšamo cha yomncá. <sup>8</sup> Er atše masque tša sëndbëtsoyebuambnaye chë Bëngbe Utabná šojatšatá mandama, chë ndáyecaca bënga jamama tšëngaftanga puerte chašmotsošbuáchemo y ainaniñe bëtš añemo chašmotsebom-

nama, y ndoñe tšëngaftanga ntjapochócama, chama atše ndoñe quetsátëuatja. <sup>9</sup> Atše ndoñe quetsátšboše tšëngaftanga chacmotsinÿana, tšëngaftanga jaútat-jayama atše stseboše ca, ndayá atšbe tsbuanáchangañe tijuábemama. <sup>10</sup> Er báseftanga mëntšá atšbiama imojtsichamo: “Chabe tsbuanáchangañe cha šontsamënda bëtscá soyënga jamama, y tša obenacá cha jtsóyebuambnayana; pero cha bëngaftaca tojtsemna ora, cha jtsóyebuambnayana mo canye ndocna obenana ndbomnacá, y ntšamo tojtsichamcá tondaye ntsámanana ca.” <sup>11</sup> Chca entsãnga entsamna jtsetatšëmbuana, ntšamo bënga fstsichamcá, tsbuanachangá juichmuase, tšëngaftangaftaca cabá ndoñe fsëntsemna ora, tšëngaftangaftaca fchaitsemna órnaca, bënga chca fchjamama.

<sup>12</sup> Ndegombre bënga ndoñe tša añemo queftatšatšabomna jayanama nyëtšá uámanënga ftsmëna ca, mo chë cachënga jtsenábotamnyana uamanëngcá. Chënga jtsejuabnayana y jtsichámuana tšábënga imomna ca, nÿe ntšamo cachëngbeñe ínÿenga imomna jtsinÿayëse; y chca tmojtsama ora, chënga juabna ndbomnënga jtsemnana. <sup>13</sup> Bënga ndoñe yapa quifchatóyebuambaye cabëngbiama, chca, tša tšábënga bënga imomna ca jtsenábotamnyama; fchanjóyebuambaye ndayá chë bënga tifjama tšabe trabajuama, ndayá Bëngbe Bëtšá šojabanÿecá, y chíñnaca entsemna ntšamo tšëngaftangbeñe Corintoca tifjamcá.

<sup>14</sup> Chíyecaca, bënga ndoñe queftatoyebuambná chë bënga ndoñe derecho fsëntsebomnama, ntšamo ndegombre nántsemna bënga tempo tšëngaftangaftaca ndoñe mafsenjamnëse; er bënga chë natsanënga fsenjamna tšëngaftangbioye jama, Cristbiama tšabe noticiënga jábuayenama. <sup>15</sup> Y ndoñe quifchatóyebuambaye tša tšabá bëngbe trabajo yomna ca, chë ndayama ndoñe šontsamna chca jatichámuana, chë trabajo ndoñe bëngbe soye, sinó ínÿengbe soye yómnyayeca. Chamna, bënga fsëntsobátmana tšëngaftanga Cristbeñe más chašmotsošbuáchemo, y chca chaojtsemna ora, bënga fchayobená ba luariñe entsãnga jábuayenana, ntšamo tšëngaftangbeñe fsëntsamcá.

<sup>16</sup> Chca, fsëntsobátmana bënga jobenayama tšabe noticiëngama jábuayenama, chë tšëngaftangbentsána más chcoye imoyena entsãngbioye; chca, bënga ndoñe yapa quifchatóyebuambaye ínÿengbe trabajuama, Cristbe soyënga jábuayenama, mo chë soye bëngbe trabajo cuafjatsmëncá.

<sup>17</sup> Ntšamo Bëngbe Bëtšabe uabemana palabrenñe endayancá: “Nda tojtseboše jayanama cha canye uámana entsá yomna ca, más tšabá cha cháuyana Bëngbe Utabná puerte uamaná endmëna ca.” <sup>18</sup> Er Bëngbe Bëtšá jayanana canye entsá ndegombre tšabá tojama ca, ndoñe nÿe cachá tojtsenábotamnyama, ndayá Bëngbe Bëtšá chca ndegombre tojama ca Bëngbe Bëtšá tojtsejuabnabiama.

### Pablo y chë ndoñe ndegombre ichmónënga

**11** Malaye atše šmëntjéuánta, atše básefta soyënga mo canye opá tojtsoyebuambnacá

stsicháměntscuana, cach atše stsenabotamná ora. Masque ntšámnaca šmochtsěuánta. <sup>2</sup> Běngbe Bětsábeyeca atše tša cbondábabuanjěshana y cbondánjěna, tšěngaftanga nje cha chašmotsěstonama y ndoñe ínjenbiyoye. Er atše Cristo sěnjašbuachená tšěngaftanga sempre cha šmochtsěstonama, y sěntseboše, cha quem luaroye yochjėsabo ora, chábioye tšěngaftanga júshejanguana, mo nje chábioye sempre ustoněngcá, ntšamo canje taitá chabe bembe ndocna boyabása nduabuatomá nje canje boyabásaftaca chaóbuamama jushjanguancá. <sup>3</sup> Mětšcuaye Evábioye tbojaningñé, y cha tbojanínjěnana puerte osertanabe soyěnga cuaftsatsětsnacá, pero ndegombre ndoñe chca yonjamna. Atše sěntsauatja nderado cachcá ínjenca tšěngaftangaftaca muanjama y tšěngaftangbe juabna chašmotrocá, y chca, tšěngaftanga chašmotsajbaná sempre jtsejuabnayana nje Cristo njetsca soyěnguiñe jtseservénama. <sup>4</sup> Atše chama sěntsauatja, er ndánaca jashjanguana y Jesusbiam tojtsabuayiná, mo cha inje entšá cuaftsemncá, ndoñe ntšamo bēnga Jesusbiam fsěndabuayinacá, y tojtsama tšěngaftanga chašmobená canje espírítu jtsebomnana, pero ndoñe ntšamo chē Běngbe Bětsá tojama tšěngaftangbe ainaniñe cháuamashěnguama espírítá, chē Uámana Espírítu, tšěngaftanga tšabá cha jtsěuántana. Y atše sěntsauatja, tšěngaftangbe ainaniñe inje buayenana chašmóyěngacñama ndánaca tojtsamama, ndoñe cachcá chē tšabe noticiēnga ntšamo ya bēngbentsana šmonjouencá, y chora tšěngaftanga chábioye becá tšabá jtšěuántana. <sup>5</sup> Pero atše sěntsejuabná tondayiñe más batšá uamaná tsměna ca, chē Jesucristbe puerte uámana ichmónēnga imomna ca juabnayēngbiama. <sup>6</sup> Atše ndoñe sěnjuatsjinje ntšamo corente tšabá entšāngaftaca jóyebuambayama; pero atše puerte tšabá sěndětatsěmbo ntšamo stsichámuama. Bēnga puerte tšabá njetsca soyěnguiñe tšěngaftanga tcbonjanjanyé, ndegombre chca osertánana ftsbomnama. <sup>7</sup> ¿O atše ndoñe tšabá sěnjama, tšabe noticiēnga cbonjanabuayiná ora, tšěngaftangbentsana atšbiam tondaye ntjotjañcá, nduamanacá jenóbemese; chca, tšěngaftanga puerte uámanēnga chašmotsemnama Běngbe Bětsá chaomama? <sup>8</sup> Mo ínjenache osbuachiyěngcá enefjuanēnga crocénana cuafjabaquécá, crocénana sěnjanyōyěngacñe chē osbuachiyěngbentsana, tšěngaftanga jujabuáchama jobenayama. <sup>9</sup> Y tšěngaftangaftaca sěnjamna ora y ndayánaca šojanájaboto ora, atše ndoñe checbátantjañe atšbe opresidama, chca, tšěngaftangbiama totcá ndoñe chaondětsemnama; er chē Jesucristbeyeca catšátanga Macedoniocana tmonjánashjajnēnga, šmonjanatšetá ntšamo šojanbuashbencá. Chca, atše sěnjama, atšbe causa tšěngaftangbiama totcá ndoñe chaondětsemnama; y sempre chca chántsama. <sup>10</sup> Serto, Cristbe ndegombre soyěnga atšbe ainaniñe sěntsebomna; chíyeca, atše corente sěntsetatsěmbo ndocná Acaya luarentše yochjama atše chayajbaná puerte oyejuayá jtsóyebuambayama, chē tšabe noticiēnga

stsabuayiná ora; y chca chanjama atšbe opresidama chašmoyema ínjenca ntsamncá. <sup>11</sup> ¿Y ndáyeca chca stsama? ¿Yojtsemna ndoñe cbondábabuanjěshana causa? Ndoñe. Běngbe Bětsá endětatsěmbo tša cbondábabuanjěshanama.

<sup>12</sup> Pero atše sempre chántsama ntšamo sěndamcá, chca, chē ínjenca, chē Jesucristbe puerte uámana ichmónēnga imomna ca juabnayēnga ndoñe chamondětsebomna ndáyeca jatenábotamnyama, ntšamo bēnga fstsamcá chēnga imojtsetrabája ca. <sup>13</sup> Er chēnga ndoñe quemátsmēna Jesucristbe ndegombre ichmónēnga, mondmēna chē ínjenca jáingñama imotrabájanga, y mondama entšanga chaotsinjanama chēnga mo Jesucristbe ndegombre ichmónēnga cuaftsemncá. <sup>14</sup> Y chama ndoñe šmatjenjaná, er cach Satanásnaca endbetsama mo canje buashinjinjāna angelcá jtsinjanama; <sup>15</sup> chíyeca, ndoñe muatjenjaná, chabe oservenēngnaca tmojtsamama mo tšabe entšāngcá jtsinjanama. Pero chēnga mochanjopochóca, ntšamo tmojtsomerecencá, ndayá tmojamama.

#### Ntšamo Pablo tojansufrí, Cristbe ichmoná bětsemna causa

<sup>16</sup> Cachiñe cbochtětéyana: ndocná chaondětsejuabná atše opá stsemna ca, cach atše stsenabotamná ora; pero chca šmojtsejuabnase, mo canje opabioycá šmochtsěuánta, chca, átšnaca jtsenábotamnyama jobenayama. <sup>17</sup> Chca jayanese, ndoñe quenátsmēna ntšamo Běngbe Utabná endbetsamcá, ndayá canje opá inetsamcá; atše tšabá jtsetatsěmbese ndegombre stsebomna ndáyeca jobenayama jtsenábotamnyana. <sup>18</sup> Banga mondmēna, cachēnga jtsenábotamnyana ndayá quem luarentše chēnga tmojamama, as átšnaca chantsenábotamnaye. <sup>19</sup> Tšěngaftanga chē tša osertánēnga, oyejuayēnga opéngbiyoye jtsěuantánana. <sup>20</sup> Atše sěndětatsěmbo tšěngaftanga chē opéngbiyoye šmnetsěuantánama, er tšěngaftanga šmondbetsěuantana chē njets tempo tšěngaftanga mo chēngbe oservenēngcá tcmojtsamēndayēnga, o chē tšěngaftanga bētscá tcmojtsabacanga, o tcmojtsaíngñanga, o chē uámanēnga tmojtsenobiamnanga tšěngaftanga mo nduamanēngcá jtsamēndayama, o chē tcmojtsajuebiantšetayēnga.

<sup>21</sup> Atše chca sěntsichamo masque sěntsěuatja chca jayanama. Bēnga fsěnjamna corente obenana ndbomnēnga, ntšamo tšěngaftanga bēngbiama šmojayancá, tšěngaftangaftaca chca jamama.

Injenca, chē tšěngaftangbeñe imotrabájanga, ndayama jtsenábotamnyama tmojtsebomnēse, puerte uámana ichmónēnga imomna ca jtsichámese, átšnaca añemo sěntsebomna chama jtsenábotamnyama; chca stjayana ora, mo canje opá tojtsoyebuambnacá sěntsoyebuambná. <sup>22</sup> Chēnga jtsenábotamnyana hebreunga imomnama. Atšnaca hebreo sěndmēna. Chēnga jtsenábotamnyana Israeloquēnga imomnama. Atšnaca Israelocá sěndmēna. Chēnga jtsenábotamnyana Abrahámbentsana entšanga imomnama. Atšnaca Abrahámbentsana entšá sěnd-

mëna. <sup>23</sup> Chënga jtsichámuana Cristo imoservena ca. Atše chëngbiama cabá más tšabe oservená sëndmëna. Chca stjajana ora, mo canye opá tojtsoyebuambnacá sëntsoyebuambná. Atše chëngbiama más tijatrabajá, más šmojutame, más šmojatsetsená y ba soye atšbiama resjo endmëna jóbanama. <sup>24</sup> Shachna soye judiënga šmonjantsetsená chë unga bnëtsana y esconëfta soye jasachënjëse, ntšamo chënga jacastígana monduamancá. <sup>25</sup> Unga soye niñëbéngaca šmonjanëtšanganja, y ndëtšbéngaca canye šmonjanatëchënganja. Unga soye chë atše sënjánenjaquena barco tontsannenatjëmbe, y chca ora, canye šonjanotocá, chë mar béjayoca tsachocana bënoca canye ibeta jëftsebobínynana y canye te jëftsejéstanana. <sup>26</sup> Atše becá sënjánana, y chca atšbiama resjo enjamna bëts fshajayënguiñe y uacucuatšënga chašmuebiatbëbama; resjo cach atšbe entšángbentše, judiënga y ndoñe judiëngbentše; resjo bëts públënguentsë, entšanga ndoyenentše y mar béjayoca. Atšbiámncá resjo enjamna chë Jesucristbeyeca atšbiama catšátanga imomna ca jtsichámuana, pero ndegombre chca ndoñe mondmëñëngbeñe.

<sup>27</sup> Atše bëtscá tijatrabajá empás uamëntšnyá joquédantscuana; ba soye tijachnëngo ibeta ntsamanacá y ba soye tijachnëngo shëntseca y uajuendayá; ba soye ndayá jasama ntsebmncá; tijasufri sësnama y tondaye entšayama.

<sup>28</sup> Quem soyëngama y inye ndoñe chiyátayana soyëngama más, atše cada te natjëmbana ainánaca ndoñe queschbatmëna, er ndoñe quetsátstatšëmbo ntšamo nyetsca ošbuachiyëngcá enefjuanënga imojtsiyenana. <sup>29</sup> Ndánaca tšabe soye jamama tondaye añemo tontsebmna ora, atše chabiamá šochandbóngmia, mo átšnacá cach tondaye añémoca cuabndëtsemncá. Nderado ínÿenga tmojama ndánaca bacna soyiñe chaótsatsama, atše ndegombre puerte ngmënaca chandbétsesufrina. <sup>30</sup> Nderado nÿa tojátyta atše ndayama jatenábotamnyama, as chë atše tondaye obenana ndbomná tsmënama ínÿanÿnaye soyëngama chtsenábotamnaye. <sup>31</sup> Bëngbe Bëtsá y Bëngbe Utabná Jesucristbe Taitá, ndábioye nyetscanga nyetsca tesca ma jtsatschuanayama entsamna, cha endétatšëmbo atše ndegombre stschámuama chë sëntsoyebuambná soyënguiñe. <sup>32</sup> Atše Damasco bëts puebloca sënjamna ora, chë rey Aretasbe uabuáyana mandado tojanmandá chë puebloye amashjuaniñe soldadënga chamotsebojanÿama, atše chašmishachama chëjana stsebocana ora; <sup>33</sup> pero básefta enutënga, canye sbarëcuiñe šmontsanëtšjango chë pueblentsá shéconana tapiëšiñe canye atëfjnëjana, y chca atše sënjanobená chëngbe cucuatšëntšana jótšbocana.

**Ndayá Pablo mo otjenayoquécá tojáninÿe y ndayá Satanás tojanma, Pablo chaosufrima**

**12** Atše šontsemna más jtsenábotamnyana, masque chca tcojamentšana ndocna tšabe soye ntjóbochna. Mora chanjóyebuambaye, chë mo otjenayoquécá sënjinÿe Bëngbe Bëtsabe soyëngama y Bëngbe Utabná šojinÿinÿé soyëngama. <sup>2</sup> Atše canye

entšá sënduábuatma, cha Crísoftaca cánÿiñe mo canÿacá endmëna y nda bnëtsana canta uata entsemna, Bëngbe Bëtsá tbojanánatse, chë celoca más tšabanánoye, Bëngbe Bëtsá yomnoye. Atše ndoñe quetsátstatšëmbo Bëngbe Bëtsá cha tbojanánatse chabe cuérpoca o ñye chabe espiritiñe. ¡Ñye Bëngbe Bëtsá chama yotátšëmbo! <sup>34</sup> Atše sëndétatšëmbo Bëngbe Bëtsá chë entšábioye celoye tbojanánatsama, nyetscanga oyejuayënga imomnoye (atše ndoñe quetsátstatšëmbo Bëngbe Bëtsá tbojanánatse chabe cuérpoca o ñye chabe espiritiñe; ñye Bëngbe Bëtsá chama yotátšëmbo), y chentše cha tojanuena palabrënga, ndocná bontsemna jayanama palabrënga, chë ndayama entšangbiama ndoñe yontselesenciana jatichámuana. <sup>5</sup> Atše chë entšá sëndmëna. Canye entšá ndáf-taca chca tojopasabiamá, tšabá nántsemna chama jtsenábotamnyana; pero cach atšbiama jtsenábotamnyana ndoñe tšabá ntsemnana, ndayá ñye chë atše mo obenana ndbomnacá tsmënama ínÿinÿnaye soyëngama chantsenábotamnaye. <sup>6</sup> Y nderado jtsenábotamnyama atše stseboše, chca ora atše ndoñe stsama mo canye opá tojtsoyebuambnacá, er ntšamo ndegombre yomncá atše stschamo. Pero chca ndoñe quetsátama, chca, ndocná chaondëtsejuabná ntšamo atšbiama tbojtsinÿanama o ntšamo atšbiama cha tojouenama atše más tsmëna ca. <sup>7</sup> Chiyëca, tša uamaná tsjamna ca atše ntjátyjuabnyama, atše chë Bëngbe Bëtsá tša bëts soyënga tbojaninÿinÿé entšá bëtsemnayëca, Bëngbe Bëtsá tojanma atše chaitsebmna ndáyëca puerte chaisufrima, mo canye bëts uchmašëfja atšbe cuerpiñe tojtsashacuancá, mo Satanasbe ichmona soycá, atše chaisufrima chaomama. <sup>8</sup> Unga soye Bëngbe Utabná sënjaimpadá chca sufrínana chaotsebojuánama; <sup>9</sup> pero Bëngbe Utabná šonjuayana: “Ñye atšbe bonshánana endmëna lempe ntšamo cmojtsajabotcá; nyetscanga atšbe obenana más tšabá jinÿana, chë obenana ndbomna entšángbeñe atšbe obenana stjínÿanÿiye ora ca.” Chcasna, atše puerte oyejuayá chanjóyebuambaye chë atše mo obenana ndbomnacá tsmënama ínÿinÿnaye soyëngama, Cristbe obenana átšbeñe sempre chaotsomñama. <sup>10</sup> Chiyëca, Cristo jaserviama, oyejuayá chandbëtsemna atše mo obenana ndbomnacá stsemna ora, ínÿenga šmojtsoyenguá ora, puerte padecena soyënga causa ndayá jamama ndoñe sëntsetatšëmbo ora, atše puerte chaisufrima ínÿenga tmojtsama ora y puerte tšëtšëna ainánaca stsemna ora; er chca soyënguiñe stsemna ora, mo canya obenana ndbomnacá, chora Bëngbe Bëtsá jamana atše ainaniñe bëts añemo chaitsebmnama.

**Nderado ndayá Corintoca ošbuáchiyënga muanjama Pablo yojánauatja**

<sup>11</sup> Atše chca chë soyëngama sëntsenabotamná ora sënjoyebuambá mo canye opá tojtsoyebuambnacá, pero ndegombre tšëngaftanga šmonjama atše chca chaimama. Er tšëngaftanga šmondmëna ndëmuanÿenga yojtsamna atšbiama puerte tšabá jtsichá-

muana, atše chca jtsenábotamnyama ndoñe chašondétsemnama. Ndegombre, atše tondayiñe más batšá uamaná quetsásmèna, chë Jesucristbe puerte uámana ichmónènga imomna ca juabnyèngbiama, masque atše šontsebiona mo atše tondaye cuaft-samancá. <sup>12</sup> Canya Jesucristbe ndegombre ichmoná bétsemnama inñinñayeye soyènga, tšèngangbeñe tonjanopasá atše choca sènjamna ora. Chca, chë Bèngbe Bètsabe obenana inñinñayeye soyènga y chë tšabe soyènga ntšamo chora tonjanopasacá, puerte tšabá jtsinñanayana atše canye ndegombre ichmoná tsmènama; y atše chca sènjamna, padecena soyènguiñe puerte uantado jtsemnèse. <sup>13</sup> ¿Ndayá tšèngangtanga ndoñe cachcá šmonjanóyèngacñe chë inye luarenache ošbuachiyèngcá enefjuanèngbiama? Canye soye aifne, er tšèngangtangiye tondaye ntjotjañcá, atše ndoñe chiyatslesenciá tšèngangtanga atšbe opresidama chašmuájabuachama, ntšamo inye ošbuachiyènga aifne sènjalesenciá. Šmochtseperdóna chca bacna soye tšèngangtangiama tijamama.

<sup>14</sup> Atše ya séntseprontana, móracna unga soyama jama tšèngangtanga jányama, y mora atše cach ndoñe quebochataimpáda atšbe opresidama chašmuatájabuachama. Atše ndoñe quetsátsboše chë tšèngangtanga šmobomna soye jatsbomnana, ndayá puerte séntseboše tšèngangtanga Cristo sempre chašmot-seservénama. Atše chca jamama séntseboše, er atše tšèngangtangiama mo canye taitacá, Crístbeñe šmontsanošbuachéyeca, atše chabiama tcbonjanabuayená ora; séntsejuabná chë taitanga inétsamna crocénana jájubana básenga jtsanñenama, y ndoñe básenga chë taitangbiama. <sup>15</sup> Y atše corente oyejuayá lempe ntšamo tsbomncá chanjátšataye, y atše jopochócantscuanènaca, tšèngangtange tšabiama. Atše cada te más cbojtsababuánñeshanèse, ¿tšèngangtanga más batšá atše šmochtsebobonshana?

<sup>16</sup> Ndoñe; tšèngangtanga tšabá šmondétatšèmba, atše uajabotá sènjamna ora, atše tondaye tcbonjanótjañama. Masque chca, báseftanga imojtsichamo ntšamo inñenga ndayíñnaca jáingñama atše tšátšèmba ca, chéngbentšana crocénana josháchiñama; y atše catijama, inñenga jáingñase, nye ntšamo atše tsbošcá chamotsamama ca. <sup>17</sup> ¿O nderado atše tcbajaingñé, canya chë tšèngangtangiye sènjichamó chentšáftaca? <sup>18</sup> Tito sènjanimpadá tšèngangtanga jányama chaotsama, y cháftaca sènjnichmó chë inya bèngcá Crístbeyeca bèngbe catšata. ¿Nderado Tito tcmojaingñé? ¿Ndoñe ndegombre yondmèna, Tito y atše cachcá fstjuabná y fstsoše y cachca soyènga jtsamèse fstsiyena? Ndegombre chca endmèna.

<sup>19</sup> Nderado tšèngangtanga šmojtsjuabná bènga jenéuyanama chca cbojtsètsètná ca; pero ndoñe chca quenátsmèna. Inyetšá, bènga Crísoftaca cánñiñe mo canyacá entsangcá, Bèngbe Bètsabe delante fsèntsoyebuambná, y lempe ntšamo tijayancá, Jesucristbeyeca atšbe bonshana catšátanga, tšèngangtange tšabiama tijayana, Crístbeñe corente chašmotsošbuáchema y ainaniñe bèts añemo chašmotse-

bomnama. <sup>20</sup> Er atše séntsauatja, atše jányama chajjá ora, ndoñe chacbondánñena ntšamo tsbošcá, y tšèngangtanga atše ndoñe chašmondínñena ntšamo šmojtsebošcá. Séntsauatja nderado bacna soyènga šmattsama: jtsenpenzentserana, inñengangtanga yapa jtsenántšabošana, ndayánaca rábiaca jtsamana, nye tšèngangtangiama tšabe soyènga jtsebomnama jtsebošana, inñengbiama podesca ichámuana, uayátse-nayènga jtsemnana, inñengbiama cachènga más uámanènga jtsenobiamnyana, y nyetscanga ndoñe cachcá ntsejuabnyana. Chca chacbojánñenèse, tšèngangtanga ndoñe quešmochátsbošana jóyèngacñana ntšamo tšèngangtanga jucácanama atše šochtsemncá. <sup>21</sup> Atše séntsauatja, cachiñe jányama chajjá ora, atšbe Bètsá chaoma atše chaitsèuatja chca šmojtsamama, y chašotsemna puerte ngmèncá jošachnama ba tšèngangtangiama, ndèmuanyènga ya bayté bacna soyènga imojtsama y chca juabnyana ndoñe tmonjatrocá, y ndoñe tmonjabaná chë bacna soyènga boyabása o shembásoftaca jtsamana juabnyana, y chca soyènga jtsamana y nyetsca bacna soyènga jtsamana, jenomándama ntsoyèncá.

#### Inye soyèngama jábuayenama y jádiošoftama

**13** Móracna ya unga soyama tšèngangtanga jányama chanjá. Atše chajjáshjango ora, tojtseytèse chanjayana ntšamo báseftanga tmojamcá tšabá o ndoñe tšabá bétsemnana. Nda bacna soye ntšamo Moisesbe leyíñe endèmandancá tojama ora, atše chanjayana cha ndoñe tšabá tonjama ca; pero útata o únganga tmojtsemnèse, chènga chamuayanama cha ndegombre chca tojamama. <sup>2</sup> Atše tempo sènjabuayená, chë tšèngangtanguentšènga bacna soye tmojánamènga y chë inñenga, atše šojtsanmèna jácastigana, chca soyènga amana ndoñe tmonjájbananga. Mora, tšèngangtanguentšènga bènoca séntsemna ora, cachiñe cachcá cbètètabuayená, ntšamo sènjanamcá chë tšèngangtanguentšènga uta soyama sènjamna ora: atše cachiñe jányama chajjase, ndoñe quichatslesencia bacna soyènga chašmotsamama y chama ntjacastigacá jatabáshejuanana. <sup>3</sup> Atše chca chanjama, er tšèngangtanga šmontsenguá ndayánaca tšabá chacminñanñema Cristo atšbiajana yoyebuambnama. Cristo ndoñe quenátsmèna mo canya obenana ndbomnacá, ntšamo tšèngangtanguentšènga cha tojamama; ndayá chabe bèts obenana tšèngangtanguentšènga bètscá jtsinñanñayana. <sup>4</sup> Er cha tmojanrucificá mo canya obenana ndbomnacá; pero mora, Bèngbe Bètsá puerte obená bèsómñeyeca, cha tojtayena. Cachcá bèngnaca, cháftaca cánñiñe mo canyacá jtsemnèse, mo obenana ndbomnèngcá jtsemnana; pero cháftaca mochantsiyena, Bèngbe Bètsá puerte obená bèsómñeyeca, tšèngangtanga jtsaservénama.

<sup>5</sup> Tšèngangtanga cada ona šmochjshénojuaboje, tšabá jtsetatšèmbuama mocna entsanga bétsemnana, jtsetatšèmbuama aifne o ndoñe sempre Crístbeñe puerte tašmuetsošbuáchema. Šmochjshénojuaboje chca šmošbuáchema ntšamo šmojtsemnana y tšabá inñen-

ga šmochjínŷanŷiye. ¿Ndoñe šmondétatšẽmbo Jesucristo tšẽngaftangbe ainaniñe yoyenama? Ndóñesna, tšẽngaftanga ndegombre ndoñe Crístbeñe os-`buáchiyẽnga šmontsemna. <sup>6</sup> Pero atše sentsobátmana tšẽngaftanga ndegombre chašmotsejuabnama bẽnga Jesucristbe ndegombre ichmónẽnga ftsmẽnama. <sup>7</sup> Y Bẽngbe Bẽtsá fséntseimpadana bacna soye ndoñe chašmondétsamama, ndoñe chẽ Jesucristbe ndegombre ichmónẽnga ftsmẽnama tšẽngaftanga jinŷanŷiyama, ndayá ntšamo tšabá yomncá chašmotsamama. Nŷetscanga chca tmojtsemẽse, nántsinŷna mo Crístbe ndegombre ichmónẽnga bẽnga ndoñe cuabndmẽncá, er chca ndoñe tašuatátẽjaboto jinŷanŷiyana ntšamo bẽnga bẽngbe mándoca ftsmẽnama mo ichmonẽngcá, tšẽngaftanga jábuayenama. Pero chẽ soye tondayana šattsentšamna, <sup>8</sup> er bẽnga queftsátobena tondaye jamana Bẽngbe Bẽtsabe ndegombre soyẽngama contra; nŷe ntšamo çabe ndegombre soyẽnga yomncá aíñe. <sup>9</sup> Bẽnga fséntseboše ntšamo tšabá yomncá tšẽngaftanga chašmotsamama, er bẽnga oyejuayẽnga fchandbétsemna, bẽnga mo chẽ obenana ndbomnẽngcá fstsemna ora, bẽngbe mando jácastigama ntjatinŷanŷnayscá, y tšẽngaftanga ainaniñe bẽts añemoca šmojtsemna ora y puerte tšabá šmojtsemománda ora. Bẽnga Bẽngbe Bẽtsá fchandbétseimpadana, chca bacna soyẽnga amana jtsajbanase, chašmobená jtsemnana nŷetsca soyẽnguiñe tšábenga, y lempe ntšamo tšẽngaftanga chašmotsemnama Bẽngbe Bẽtsá yobošcá. <sup>10</sup> Quem tsbuanácha

cbontsẽbuabiamná tšẽngaftangaftaca cabá ndoñe séntsemna ora; chca, atše choye chajjá ora ndoñe chašondétsemna jabuache jucácanana, mo canŷa puerte mandayacá, ntšamo Bẽngbe Utabná šojanbẽmcá, tšẽngaftanga jujabuáchama chábeñe corente chašmotsošbuáchema y ainaniñe bẽts añemo chašmotsebomnama, y ndoñe tšẽngaftanga jatapochócamama.

<sup>11</sup> Morna, Jesucrístbeyeca atšbe catšátanga, tšabá chašmotsomñe, šmochtsajbaná chca bacna soyẽnga amana y šmochtsemna lempe ntšamo Bẽngbe Bẽtsá yobošcá. Šmochjouena ntšamo tçbonjabuayenacá, nŷetscanga cachcá šmochtsejuabnaye, nŷetscángaftaca natjẽmbana šmochtsiyena, y Bẽngbe Bẽtsá, chẽ cmondababuanŷeshaná y tšẽngaftangbe ainaniñe tšabe ebionana chašmotsebomnama endamá, tšẽngaftangaftaca echántsemna. <sup>12</sup> Nŷetscanga šmochjenchuaye mo Jesucrístbeyeca catšatancá, jtenámochẽse, ntšamo cach tšẽngaftangbe pamíllanga puerte bonshanánaca šmondetsacheuanayscá. <sup>13</sup> Nŷetsca quem luaroca ošbuáchiyẽnga cmontsacheuaná.

<sup>14</sup> Atše, Bẽngbe Bẽtsá séntseimpadana, Bẽngbe Utabná Jesucristo chaoma, nŷetsca tšẽngaftangbeñe tšabe bendicionẽnga chaotsemnama. Bẽngbe Bẽtsabe bonshánana sempre chašmotsóbomñe, y Uámana Espíritu sempre chašmotsóbomñe, y chẽ Uámana Espíritoftaca cánŷiñe mo canŷacá chašmotsomñe.

# Gálatas

**Pablo Galacia luaroca ošbuáchiyënga jacheuayama**

**1** <sup>1-2</sup> Atše Pablo, quem tsbuanácha séntsabiamná Jesucristbeñe ošbuáchiyëngbiama, chë Galacia luaroca ošbuachiyëngcá enefjuanëngbiama. Jesucristo y Bëngbe Bëtsá, chë Taitá, nda tojanma Jesucristo cháuatayenama, chata šmonjanchembo chatbe ichmoná jtsemnama. Ndocna entšá chešnátanabuayana atše Cristbe ichmoná jtsemnama; ni Jesucristo, ni Bëngbe Bëtsá ndocna entšá tbonjanichmó atše chatbe ichmonacá jabuábuayanama. Atše y chë ínÿenga Jesucristbeñe ošbuáchiyënga átšeftaca montsemnënga, tšëngaftanga cbontsacheuaná. <sup>3</sup> Atše séntseimpadana Bëngbe Bëtsá Bëngbe Taitá y Bëngbe Utabná Jesucristo, chaboma tšabe bendicionënga tšëngaftangbeñe chaotsemnama, y chaboma tšëngaftangbe ainaniñe tšabe ebionana chašmotsebomnama. <sup>4</sup> Cristo chabe derecho vida jtsobomñama cachcá tojanonÿá y tojanóbana, bëngbe bacna soyënguentsana játebacama, y bënga chamotsobena jtsiyenama ndoñe ntšamo quem tempo entšanga imoyencá, puerte bacna soyënga imojtsama ora. Cristo tojanóbana ora, tojanma ntšamo Bëngbe Bëtsá, Bëngbe Taitá endmëná yojanbošcá. <sup>5</sup> Nÿetscanga nÿetsca tescama Bëngbe Bëtsá chamotsatschuaná. Chca chaotsemna.

**Nÿe canÿe ndegombre buayenana soyënga Cristbiamna endmëna**

<sup>6</sup> Atšbe ainanoca inÿetšá šontsebiona, er nda nanjouena, tšëngaftanga nÿe baseftayshinÿe y ya juabna šmojatstrocá y Bëngbe Bëtsá stëtšoye šmojtsequedá, nda tšëngaftanga tcmojáchembo chabe entšanga chašmotsemnama. Cha chca tojanma Crístbeyeca, er mua puerte tšabia tšëngaftangaftaca enjamna. Tšëngaftanga Bëngbe Bëtsá stëtšoye šmojtsequedá, ínÿengbe buayenana soye jouenama, y chë ínÿenga jtsichámuana chë buayenana soyënga chë tšabe noticiënga canmëna ca. <sup>7</sup> Ndegombre, ndoñe quenátsmëna inÿe ndegombre buayenánana. Ntšamo entsopasancá mëntšá entsemna: báseftanga montsama tšëngaftanga ndoñe natjëmbana ainánaca chašmotsiyenama, y becá montsama chë Cristbiamna tšabe noticiënguentsë, ba ndegombre soyënga jtsejuánama, inÿe soyënga jacjayama. <sup>8</sup> Nderado bënga o canÿe celoca ángel soyënga cmojtsabuayiná, y ndoñe tontsemna mo chë tšabe noticiënga bënga tempo tcbonjanabuayenacá, as chë chca tojtsamabiama ¡Bëngbe Bëtsá chaoma infernoca becá chaosufrima! <sup>9</sup> Tempo

ya chca sënjánayana; mora cachiñe šcutëtayana: Nderado nda soyënga cmojtsabuayiná, y ndoñe tontsemna mo chë tšabe noticiënga, ntšamo tempo šmonjanoyëngacñëcá, ¡Bëngbe Bëtsá chabiama chaoma infernoca puerte chaosufrima!

<sup>10</sup> Atše chca stjajana ora, ¿tšëngaftanga cmojtsinÿana atše soyënga stsama entšanga oyejuayënga átšeftaca chamotsemnama? Ndoñe chca quenátsmëna. Atše séndboše ndayá Bëngbe Bëtsá átšeftaca oyejuayá chaotsemnama. Entšanga oyejuayënga chamotsemnama, atše cabá soyënga stsamëse, atše ya ndoñe Cristbe canÿe oservená stsemna.

**Ntšamo Bëngbe Bëtsá Páblëbioye tbojanchembo, Jesucristbe ichmoná jtsemnama**

<sup>11</sup> Atše séntseboše tšëngaftanga, Jesucristbeyeca atšbe catšátanga, chašmotsetátšëmbo chë tšabe noticiënga ntšamo sëndabuayinacá quem luarentša entšangbe juabnentsana ndoñe yondóbocanama.

<sup>12</sup> Ndocna entšá chë tšabe noticiënga chešnatanbuayená, ni chešnatanbuatëmbá, ndayá cach Jesucristo šonjaninÿinÿé.

<sup>13</sup> Tšëngaftanga šmojátatšëmbona ntšamo atše tempo tsjanamana jtsiyenana, ntšamo judiënga Bëngbe Bëtsá mondadorancá atše cha sënjanadorana ora, ntšamo atše becá tsjánamama chë ošbuachiyëngcá enefjuanënga puerte chamosufrima, y ntšamo atše becá tsjánamama ndocná Jesucristbeñe chaondëtsošbuáchema. <sup>14</sup> Atše inÿe judiënga cach atšcá uata bomnëngbiama más sënjánama Bëngbe Bëtsá adórayiñe, ntšamo judiënga cha jadórama monduamancá, y atše nÿets añémoca tša sënjantšena jtsama ntšamo bëngbe bëts taitanga básenga jabuátambama monjanamancá. <sup>15</sup> Pero Bëngbe Bëtsá atšbe tšabiama yojanjuabná, y chíyeca, atše cabá ndonÿna ora, canÿe bëts soyama cha šojanbocacá. <sup>16</sup> Y cha tojánbošena ora, šonjaninÿinÿé ntšamo ndegombre chabe Uaquiñá yomnana, y šonjanchembo. Cha chca tojanma, atše chë tšabe noticiënga ndoñe judiëngbeñe chayábuayenama. Y atše ndocnábioye chiyataná ndayá jamama šojtsanmënama chašobuayenama; <sup>17</sup> y Jerusalenoye cach ndoñe chiyataná chë atšbiama más natsana Jesucristbe ichmónënga imojamnéngaftaca jencuëntama. Chamna, cachora Arabia uabaina luaroye séntsanoye, y chentšana Damasco bëts puebloye sëntaná.

<sup>18</sup> Jesucristbeñe jtsošbuáchiyama sënjanóntša orscana, unga uatëse Jerusalenoye sënjána Pédroftaca

jencuéntama, y cháftaca nÿe uta semana sënjéftsemana. <sup>19</sup> Y ndocna chë Jesucristbe inÿe ichmónënga chiyáisananÿe; nÿe Santiago aíñe, Bëngbe Utabnabe catšata. <sup>20</sup> Bëngbe Bëtsá šontsonÿá, ntšamo tšëngaftanga cbontsëtsësnacá ndegombre bétsemnama.

<sup>21</sup> Jerusalenocana sënjéftsanbocnentšana, Siria y Cilia luarëngoye sënjána. <sup>22</sup> Pero chë tempo, chë Jesucristbeñe ošbuáchiyënga Judea luariñe bomínÿeca ndoñe quešmënjatanábuatma. <sup>23</sup> Nÿe ínÿengbioye imojtsayaunana: “Nda tempo bënga puerte chamot-sesufrínama enjanamá, mora entšanga entsabuayiná, Jesucristbeñe jtsošbuáchiyama caojtsamna ca. Y tempo cha tša enjánboše jamama entšanga Jesucristbeñe ndoñe chamondëtsošbuáchemaca” —chënga imojtsichamo. <sup>24</sup> Y entšanga Bëngbe Bëtsá imojtsatschuanaye, ndayá cha atšbiajana tojanmama.

### Chë inÿe ichmónënga tmojánayana Pablo aíñe tšabá yojtsama ca

**2** Jerusalenoye sënjána orscana bnétsana canta uatëse, cachiñe choye sënjesaná. Bernabé šonjantjëmbambá, y Tito bëndátaftaca fsënjéftsanbetše. <sup>2</sup> Choye sënjána, choye jama šojamnama Bëngbe Bëtsá šonjaninÿanÿeyeca. Atše nÿe chë Jesucristbeñe ošbuáchiyëngbiama uámanënga imojamnéngaftaca sënjanencuentá, ínÿengaftaca ndoñe; y chë tšabe noticiëngama chë ndoñe judiëngbeñe sëndabuayinama chënga sënjanacuntá. Chca sënjanma atše jtsetatšëmbuama, ntšamo tijanma y sënjéftsamcá ndoñe nÿe bonamente yonjamnama. <sup>3</sup> Pero chënga tmonjánayana atše aíñe tšabá tijanma ca, y Tito, chë átšeftaca enjamná, masque Grecia luarocá enjamna, chënga ndoñe chematanmandá base bobachtema chë más delicadentše tëtšená chaotsemnama, ntšamo judiënga monduamancá, Bëngbe Bëtsábënga imomnama chaotsinÿnama. <sup>4</sup> Chca tonjanopasá, masque ínÿënga monjánboše Tito base bobachtema chë más delicadentše tëtšená chaotsemnama. Chënga tmonjánayana bëngcá Jesucristbeñe ošbuáchiyënga imojamna ca, pero ndoñe chca quemënjatšmëna. Chënga chë Jesucristbeñe ošbuáchiyëngaftaca tmojanenutaná, ndayá yojtsanopasánama chë ošbuáchiyënga ntsetatšëmbcá, mo chë ošbuáchiyëngbiama bacna soyënga jamama cuafseitëmena cuenta. Chënga tmojánabo jtsetatšëmbuama ntšamo Jesucristo bënga atsebácanënga šojánabiamama, chë judiëngbe leyëngaca ndëmandánënga, cháftaca cánÿiñe mo canÿacá jtsemnëse. Chënga chca tmojanma, er chënga imojtsanboše jamana, bënga chë judiëngbe leyëngaca nÿets tempo mandánënga chamotsiyenama. <sup>5</sup> Pero bënga ndocna ora fchiyátanayana aíñe ca chë ntšamo chënga monjánichamo bënga šojánamna jamama soyëngama, er bënga becá fsënjánboše tšëngaftanga nÿets tempo Jesucristbe ndegombre tšabe noticiënga chašmotsóbomñama.

<sup>6</sup> Pero chë ndëmuanÿëngbiama entšanga monjánichamo chë uánatsanënga imojamna ca (ndayá chënga tempo imojamna atšbiama ndoñe quenatámana; Bëngbe Bëtsabiama nÿetscanga cachcá mon-

duámana), chëngna tondaye chešmatanbuayená, ntšamo tempo tijanmama inÿetšá chaimama. <sup>7</sup> Masna, chënga tmonjántatšëmbona, Bëngbe Bëtsá chë tšabe noticiënga ndoñe judiënga jábuayenama trabajo atše jamama šojanëntšabuáchema, ntšamo judiënga jábuayenama cachcá Pédrëbioye tbojanëntšabuachecá. <sup>8</sup> Er Bëngbe Bëtsá atše chabe ichmoná šonjánbema, ndoñe judiënga chabiama jábuayenama, ntšamo cachá Pédrëbioye chabe ichmoná tbojanbemcá, judiënga chabiama jábuayenama.

<sup>9</sup> Santiago, Pedro y Juan, chë ošbuachiyënguentša uánatsanënga, atše canÿe bëts trabajo chaitsebomnama Bëngbe Bëtsá tojanmama tmonjántatšëmbona ora, cucuatše šontanatšataye atše y Bernabébioye, jinÿinÿiyama chënga šojanënbuajama mo cachëngbe trabajo amatcá. Y fsënjanenoyeuná bëndata jama, masna ndoñe judiënga jtsabuayinayama trabajo jamama, y chëngna judiëngbeñe. <sup>10</sup> Chënga nÿe šonjanaimpádaye chë ošbuáchiyënga ndbomnëjëmënga Jerusalenoquëngbiama jtsenójuabnayama; y atše bëtscá séntsama chënga jujabuáchama.

### Pablo Antioquioca Pédrëbiama tojánayana cha ndoñe tšabá tojanma ca

<sup>11</sup> Pero Pedro Antioquía bëts puebløye tonjánabo ora, chabe delante sënjánayana cha ndoñe tšabá tonjanma ca, er ntšamo enjanamcá ndoñe tšabá quenjatšmëna. <sup>12</sup> Mëntšá tonjanopasá: Santiago básefta entšanga Antioquoye tojanichmó, pero chënga cabá choca ndáshajna ora, Pedro yojanamana chë ndoñe judiënga ošbuáchiyëngaftaca jtsesayana. Pero chë entšanga tmojánashajnentšana, Pedro tojtsanajbaná chëngaftaca sayana y encuéntayana. Cha chca tojanma, ntšamo chë ndoñe judiënga ošbuáchiyënga, chë base bobachtema chë más delicadentše tëtšenënga jtsemnama yojánamna ca tmojánayanënga, chabiama muanjájuaboyama yojtsauatja causa. <sup>13</sup> Chë inÿe judiënga ošbuachiyëngnaca tmojanontšë amana cachcá ntšamo Pedro yojtsamcá, jtsamëse ntšamo chënga imojántatšëmbo chca jamama ndoñe yonjanamncá. Y Bernabënaca, ntšamo chënga imojtsamcá jtsonÿayëse, chëngcá yojtsama, jtsamëse ntšamo cha yojántatšëmbo chca jamama ndoñe ibonjamncá. <sup>14</sup> Chënga ndoñe quemënjátaniyena jtsamëse ntšamo yojanamncá, ntšamo chë Jesucristbe tšabe noticiënguentša ndegombre soyënga endmëncá. Chca sënjáninÿe ora, Pédrëbioye nÿetsca ošbuáchiyëngbe delante sënjaninÿe: “Aca canÿe judío, mo ndoñe judío bendmëncá cojtsiyena, y ndoñe ntšamo chë judiënga jamama monduamancá; chcasna, ¿ntšamo catjobenaye jamana chë ndoñe judiënga ošbuáchiyënga mo chë judiëngcá chamotsiyenama ca?”

### Bëngbe Bëtsá judiënga y ndoñe judiënga játsebacana, Jesucristbeñe tmojtsošbuáchema

<sup>15</sup> Bënga judiënga fsëndmëna, bëngbe bëtsëtsanga judiënga monjámnayeca, y ntšamo judiënga chë



ndoñe judiëngbiöye mondubobuatmcá, chë “bacna soye amënga ca”, ndoñe queftsátsmëna. <sup>16</sup> Y bënga mondëtatšëmbo, canyë entšá Jesucristbeñe tojtsošbuáchema, Bëngbe Bëtsá jamana cha chabe bominiñiñe tšabia chaotsemnama, y Bëngbe Bëtsá ndoñe chca ntjamana, ntšamo chë judiëngbe leyënguiñe jamama yomna ca iuayancá chë entšá tojamama. Y bëngnaca Jesucristbeñe imojtsošbuaché, Bëngbe Bëtsá chaomama bënga chabe bominiñiñe tšábenga chamotsemnama, pero ndoñe ntšamo chë judiëngbe leyënguiñe jamama yomna ca iuayancá bënga tmojamama. Er Bëngbe Bëtsá ndocna ora ntjamana canyë entšá chabe bominiñiñe tšabia chaotsemnama, ntšamo chë judiëngbe leyënguiñe iuayancá jamama ibomna ca cha tojamama.

<sup>17</sup> Pero, bënga bëtsá mondënguá, Bëngbe Bëtsá chaomama bënga chabe bominiñiñe tšábenga chamotsemnama, bënga Crísoftaca cányiñe mo canyáca jtsemnëse, chábeñe imošbuáchema. Chca mondošbuaché, bënga chë bacna soyëngama perdonánënga chamotsemnama. Pero inyë entšanga jt-sichámuana bënga bacna soyënga amënga imomna ca, ntšamo chë Moisesbe leyiñe iuayancá ndoñe montsama causa. ¿Y chca, Cristo bacna soye amënga šuabiamná ca nántsayana? ¡Ndoñe, ndegombre ndoñe! <sup>18</sup> Atše, ntšamo Bëngbe Bëtsá šojaninñiyecá, chë šojtsemna jájbanama soyënga, cachiñe jajuaboyama y jamama stëtonťese, mo chë Moisesbe ley jt-socumplínana perdonánënga jtsemnama, atše stsemna mo nda ndayá cachá tojtsembema y cachiñe tojtëtsjebuanacá; y ndegombre, atše stsemna canya ntšamo ndoñe tšabá yondmëncá amá. <sup>19</sup> Chë judiëngbe leyëngaca atše sëndëtatšëmbo, ntšamo chë leyënguiñe iuayancá stsamëse, Bëngbe Bëtsá ndoñe yochanjama atše chabe bominiñiñe tšabia chaitsemnama; y chca, atše jtsemnana mo obanacá chë castígoca, er chë leyentša mandënga stsamëse, ndoñe quetsátobena atsbocaná jtsemnama. Chë léyeca ndoñe más mandaná ntsemnama jtsebošëse, atše cachá chë ley sënjanonýá, Jesucristbeñe jtsošbuáchiyama; y chca, atše chaitsobena jtseyenana Bëngbe Bëtsá jt-seservëñe. Atše Crísoftaca cányiñe mo canyáca sëndmënyeca, Cristo cruciñe tojanóbana ora enjamna mo átsnaca cuafjobancá; <sup>20</sup> y mora entsemna mo nyë atše ya ndoñe cuafjtseyencá, Cristo becá vida atšbe ainaniñe entsebómnyeca. Y ntšamo mora atše vida sëntsebomncá, entsemna atše chë Bëngbe Bëtsabe Uaquiñábeñe betsošbuáchiyama, nda šojánbobonshana, y chabe derecho vida jtsošbuáchiyama cachá tojanonýá y atšbe tšabiamna tojanóbana. <sup>21</sup> Atše ndoñe quetsatábotena ntšamo Bëngbe Bëtsá entšangbe tšabiamna juabna yobomncá. Nderado Bëngbe Bëtsá tojama canyë entšá chabe bominiñiñe tšabia chaotsemnama, ntšamo chë leyiñe jamama yomna ca iuayancá cha tojtsemnama, as Cristo nyë tondayama matëñjanóbana.

### Ley jtsošbedecënëse o Jesucristbeñe jtsošbuáchiyëse

**3** ¡Tšëngaftanga Galacientša entsanga, yapa ndenójuabnyënga! Entsemna mo nda tcmojtsabocjuanacá, tšëngaftangbe juabna tojtsetrocá. Ndoñe quešnátësertana ntšamo chca nanjopása, er cach atše botamana cbonjanabuayiná, Jesucristo cruciñe tojanóbana. <sup>2</sup> Atše sëntseboše nyë canyë soye atše chašmëyana: ¿Uámana Espiritu tšëngaftangbe ainaniñe tojanamashëngo jtsemándayama, tšëngaftanga ntšamo chë leyiñe jamama yomna ca iuayancá šmojamama, o tšëngaftanga chë tšabe noticiënga šmojanuena y chiñe šmojtsošbuáchema? <sup>3</sup> ¿Ndáyeca tša ndenójuabnyënga šmomna? Bëngbe Bëtsabe Espiritbeyeca tšëngaftanga šmonjanontšë mo tsmëma entsangcá jtsemnana. ¿Y mora šmojtseboše tšëngaftangbe vidënga jachnënguama nyë entsangbe juabnéngaca jtseyenëse? <sup>4</sup> ¿Nyetsca soyënga ndayëjana tšëngaftanga šmojachñëjna, tondayama tonjoservé? Ndegombre chca ndoñe taiuatmëna. <sup>5</sup> Bëngbe Bëtsá, chë Uámana Espiritu tšëngaftangbe ainaniñe cháuamashënguama tojanma ora, y tšëngaftangbeñe bëts soyënga chaopasama tojama ora, ¿ndáyeca chca nanjama? ¿Tšëngaftanga ntšamo chë leyiñe jamama yomna ca iuayancá šmojtsemnama, o tšëngaftanga Jesucristbe tšabe noticiënga šmojanuena y chiñe šmojtsošbuáchema?

<sup>6</sup> Menójuabonga ntšamo Abraham tojanpasama. Bëngbe Bëtsabe uabemana palabrënguiñe mëntšá endayana: “Cha Bëngbe Bëtsábeñe yojtsošbuáchiye, y chíyeca Bëngbe Bëtsá tonjánayana cha chabe bominiñiñe tšabia yojamna ca.” <sup>7</sup> Chíyeca tšëngaftanga cmontsamna jtsetatšëmbuana, Bëngbe Bëtsábeñe ošbuáchiyënga mondmëna mo Abrahámbentšana entsangcá, cachá ošbuáchiyana bëtsebomnama, chë chámbentšana ndegombre entsangbiama más.

<sup>8</sup> Bëngbe Bëtsabe uabemana palabrënguiñe endopodena jualíama, Bëngbe Bëtsá yochjanma chë ndoñe judiënga chabe bominiñiñe tšábenga chamotsemnama, chábeñe tmojtsošbuáchema ca. Y Bëngbe Bëtsabe uabemana palabrënguiñe, cabá chca ndëma ora, Bëngbe Bëtsá Abrahámbiöye quem tšabe noticiënga tbojanbuayená: “Acbeyeca, atše chanjama nyetsca quem luarentša entsanga tšabe bendicionënga chamotsebomnama ca.” <sup>9</sup> Bëngbe Bëtsá tojanma Abraham ba tšabe bendicionënga chaotsebomnama, cha chábeñe yojtsošbuáchema. Chca, Bëngbe Bëtsá, chábeñe ošbuáchiyëngbiámna ba tšabe soyënga jamana, cachá ntšamo Abrahambiamna tšabe soyënga tojanmcá.

<sup>10</sup> Chë Bëngbe Bëtsá chabe bominiñiñe tšábenga yochjábiamna ca juabnyënga, ntšamo leyiñe jamama yomna ca iuayancá lempe tmojtsošbedecënema, chënga nyets tempo jtseyenana jtsetatšëmbëse Bëngbe Bëtsá nyetsca tescama chënga yochjácastigayama. Er Bëngbe Bëtsabe uabemana palabrënguiñe mëntšá endayana: “Bëngbe Bëtsá jayanana nyetsca tescama castigo chaotsebomna ca, nda nyets tempo ndoñe

tontsama nyetsca mandënga ntšamo chë leyënguifne iuabemancá ca.”<sup>11</sup> Ndegombre, puerte tšabá entsinÿinÿena, Bëngbe Bëtsá ndoñe yochanjama ndocná chabe bominÿiñe tšabia chaotsemnama, ntšamo chë leyifne jamama ibomna ca iuayancá tojt-sobedecënëse. Chca ndegombre endmëna, er Bëngbe Bëtsabe uabemana palabrënguifne mëntšá endayana: “Nÿe ndabiama Bëngbe Bëtsá tojama chabe bominÿiñe tšabia chaotsemnama, cha Bëngbe Bëtsábeñe betsošbuáchema, cha ndegombre chë nyetsca tescama yomna tšabe vida echántsebmoma ca.”<sup>12</sup> Jtsamana ntšamo chë leyënguifne jamama yomna ca iuayancá, ndoñe quenátsmëna mo Bëngbe Bëtsábeñe cuaftsošbuachecá. Ntšamo Bëngbe Bëtsabe uabemana palabrënguifne endayancá: “Nda tojtsama nyetsca mandënga ntšamo chë leyënguifne endayancá, tšabe vida echántsebmoma, nyets tempo chë leyëngaca mandaná ca.”

<sup>13</sup> Pero, Cristo jóbanama ibojamna ca tmojánayana, y cha bëngbe causa chca chamomama chënga tojanalesénciayeyeca, Cristo tojama bënga nyetsca tescama castigánënga ndoñe chamondëtsemnama, ntšamo chë leyifne iuayancá ndoñe tmontsama causa. Ntšamo Bëngbe Bëtsabe uabemana palabrënguifne endayancá: “Nyetsca tescama castigo chaotsebmoma, nda canÿe niñëšifne tmojajonÿá chaóbanama cha ca.”<sup>14</sup> Chca tojopasá, Bëngbe Bëtsá chaomama, chë tšabe bendicionënga ntšamo cha Abrahámbioye tbojanšbuachenacá, ndoñe judiëngnaca chamotsebmoma, Cristo Jesús beyeca; y Jesucristbeñe ošbuachiyánaca, Bëngbe Bëtsá chaomama chë Uámana Espiritu bëngbe ainaniñe cháumashëngo jtsemándayama, ntšamo Bëngbe Bëtsá tojanašebuachenacá.

#### Ndocna ley quenátobena Bëngbe Bëtsabe šbuachenana soye jatrócama

<sup>15</sup> Jesucristbeyeca catšátanga, chë ndayá sentsichamcá endmëna ntšamo nyets tempo entšangbeñe endbetsopasancá. Uta entšata tbojenoyeuná canÿe trato jënbemama, y ntšamo tbojenšbuachenacá chaotsinÿinama chatbe uabaina tsbuanáchañe tbojuábemëse, ndocná inÿa más ntsobenana jayanana ntšamo tbojentratacá ndoñe yontsoserverna ca; y inÿe soyënga chiñe jacjayama cach ndoñe.<sup>16</sup> Chcasna, Bëngbe Bëtsá ba soye Abrahámbioye tbojanšbuachená puerte tšabe bendicionënga chabiama jamama, y chabe entšanguentšana canÿabiámnaca. Y Bëngbe Bëtsabe uabemana palabrënguifne ndoñe quenátayana: “chabe entšanguentšëngbiámnaca ca”, mo Bëngbe Bëtsá ba entšangbiama cuaftsichamcá; sinó mëntšá endayana: “acbe entšanguentšana canÿabiama ca”. Y chca entsayana, nÿe canÿe entšá ca; y cha endmëna Cristo.<sup>17</sup> Atše ndayá mëntšá cbontsëtsëtsná: Natsana, Bëngbe Bëtsá Abrahánoftaca canÿe trato tojánbema, y tbojanianá “aifne ca”, ntšamo tbojanšbuachenacá jamama. Chentšana canta patse y unga bnëtsana uatëse, Bëngbe Bëtsá Moisesbe cucuatšifne chë leyënga tbojanántšaboshjona; chíyeca, chë leyënga ndoñe

ntsobenana jamana chë Bëngbe Bëtsá Abrahánoftaca tojánbema trato ndoñe chaondëtsooserverna, ni jamana ndayá Bëngbe Bëtsá tojanšbuachenacá ndoñe chaondëtsooserverna.<sup>18</sup> Er ndayá Bëngbe Bëtsá chabe entšanga tojatšatacá, tojtsemna chënga ntšamo chë leyifne jamama yomna ca iuayancá tmojtsamama, chca, chë tšetana soyënga ya ndoñe nantsóbocana ndayá Bëngbe Bëtsá jamama tojanašebuáchenantšana. Pero ba tšabe bendicionënga Abrahambiana jamama, Bëngbe Bëtsá tbojanšbuachenáyeca, Bëngbe Bëtsá chë soyënga Abrahambiana tojanma.

<sup>19</sup> Asna, ¿ndayama chë Moisesbe ley nantsoserverna? Bëngbe Bëtsá chë leyënga tojanáboshjona, ba tšabe soyënga jamama Abrahámbioye tbojanšbuachenantšana baytese. Bëngbe Bëtsá yojanjuabná chë ley chaoservé entšanga jinÿanÿiyama ndayá tšabá o ndoñe tšabá jamama bëtsemnama, chë Abrahámbentšana Uámana Entšá jashjanguëntscuana, ndabiama Bëngbe Bëtsá Abrahámbioye tbojanšbuachená ba tšabe bendicionënga jamama. Bëngbe Bëtsá angelëngaftaca chë ley Moisesbe cucuatšifne tbojanántšaboshjona, y chë entšá Moisés enjamna chë oyeubambayá Bëngbe Bëtsáftaca y entšangtaftaca.<sup>20</sup> Uta entšata canÿe trato jënbemama, jtseytana inÿe entšá chë uta entšataftaca chaóyeubambama; pero Bëngbe Bëtsá Abrahámbioye ba tšabe soyënga jamama tbojanšbuachená ora, nÿe canÿa chca tojanma, y ndoñe bonjanájoboto inÿa chabiama Abrahánoftaca chaóyeubambama.

#### Ndayama chë ley yomna

<sup>21</sup> ¿Chca nántsayana, ntšamo Moisesbe leyifne iuayancá, chë Bëngbe Bëtsá tojanšbuachená soyëngama contra yomna ca? ¡Ndoñe, ndegombre ndoñe! Bëngbe Bëtsá entšangbe cucuatšifne canÿe ley tojanáboshjona, y chë ley tojtsobena jamana entšanga ndegombre tšabe vida chamotsebmoma, as Bëngbe Bëtsá nanjama entšanga chabe bominÿiñe tšábenga chamotsemnama, ntšamo chë leyifne jamama yomna ca iuayancá tmojtsamama.<sup>22</sup> Pero Bëngbe Bëtsabe uabemana palabrënguifne endayana, nyetsca quem luarentšá entšanga cachëngbe bacna soyënga jamama juabnéngaca mandánënga imomna ca, chca, Jesucristbeñe ošbuáchiyënga chamobenama ndayá Bëngbe Bëtsá tojašbuachenacá jóyëngacñama. Y chënga, Jesucristbeñe imojtsošbuáchema imojtsebmoma ndayá Bëngbe Bëtsá tojanašebuachenacá.

<sup>23</sup> Jesucristbeñe jtsošbuáchiyama entšanga chamobenama tempo joshjanguëntscuana, bënga monjamna corente mandánënga chë léyeca, y chca enjamna mo presënga cuaftsemncá, cárceloca utámenënga. Chë ley chca enjamna, ntšamo entšanga Jesucristbeñe muanjobenaye jtsošbuáchiyama Bëngbe Bëtsá jinÿanÿiyama tempo joshjanguëntscuana.

<sup>24</sup> Cristo jabama tempo tonjanoshjanguëntscuana, chë ley bëngbiama enjamna mo canÿe pamillentšá oservernacá, cha jtsamana chentšá básenga chamotsamama

ntšamo tšabá tojtsemncá. Chè ley chca yojamna, bēnga Crístbeñe jtsošbuáchiyama chamobenama, y chca, Bēngbe Bētsá chaoma bēnga chabe bominiñe tšábenga chamotsemnana. <sup>25</sup> Pero Jesucristbeñe jtsošbuáchiyama bēnga chamotsobenama mora ya tonjoshjangoyeca, chē ley ya ndoñe más quenátsmēna mo canye entšacá, ndayá tšabá yomncá bēnga chamotsamama cuaftsamcá. <sup>26</sup> Cristo Jesúsbeñe šmojtsošbuáchemá, nyetsca tšēngaftanga šmojobená Bēngbe Bētsabe básenga jtsemnana, Cristo Jesúsfeftaca cányiñe mo canyáca jtsemnēse. <sup>27</sup> Tšēngaftanga tcmōnjanēbaye, y chca, Crísoftaca cányiñe mo canyáca šmontsemna. Y mora šmojobená mo cach Crístcá jtsemnana. <sup>28</sup> Chiyeca, ndayá Bēngbe Bētsá tojamama, judiēnga y ndoñe judiēnga cachcanga mondmēna; nyets tempo nye ínñabiama oservēnēnga y chē nye cachēngbiama trabájayēnga cachcanga, y boyabásēnga y shembásēngnaca. Nyetsca tšēngaftanga mo canyáca šmondmēna, Cristo Jesúsfeftaca cányiñe mo canyáca jtsemnēse. <sup>29</sup> Tšēngaftanga Crístbe entšanga šmondmēnayeca, šmontsemna mo Abrahámbeñšana entšanga cuaftsemncá; y chca, ntšamo Bēngbe Bētsá Abrahámbye tbojašbuachenacá, tšēngaftanga šmochanjóyēngacñe.

**4** Atšnaca séntseboše jayanama, chē uaquiñá nda yochjóyēngacñe ntšamo tbojtsotocancá, ntšamo chabe taitá jatšetayama tbojašbuachenacá, cha cabá mo canye basacá tojtsemnēntscuana, ndocna derecho chē soyēnguiñe ntsebmōnana; y chca, cha jtsemnana mo canya nyets tempo nye ínñabiama oservenacá, masque lempe ntšamo chabe taitá tbojašbuachenacá chē uaquiñabiama tojtsemna. <sup>2</sup> Chē uaquiñá tojtso bóchantscuana, entšanga jtsemnana ndēmuanñēnga ntšamo cha tbojtsajabotcá jtsoinayana, y ínñēnga jtsejuabnayana ndayá chē taitabe soyēngaca jamama, chē uaquiñá otocana soyēngaca. Y chca jtsemnana, chē taitá tojayana tempēntscuana. <sup>3</sup> Mo cachcá cuaftsemncá, bēnga chē ndegombre soyēngama cabá ndosértaye ora, bēngnaca mandánēnga monjamna mo nyets tempo nye ínñabiama oservenēngcá, quem luarentše imománda espíritēngaca. <sup>4</sup> Pero Bēngbe Bētsá chabe Uaquiñá quem luaroye tbojanichmó, nya chama tempo tojanóshjango ora; cha mo nyetsca entšangcá, canye shembásabentšana tojanonñá, y yojoyena jtsamēse ntšamo judiēngbe leyíñe jamama ibojamna ca yojanayancá jtsamēse. <sup>5</sup> Quem luaroye chca tojánabo bēnga jabátsebacama, y chamotsobenama Bēngbe Bētsabe basēngcá jtsemnana, bēnga chē tempo šonjánamna chē ley jtsobedecēnana. <sup>6</sup> Y chca, tšēngaftanga ya chabe básēnga šmojtsemnana jinñanyiyama, Bēngbe Bētsá chabe Uaquiñabe Espiritu tbojanichmó, nyetscangbe ainaniñe cháumashēnguama, y chē Espiritu endama bēnga Bēngbe Bētsá chamochembo, “Atšbe Taita ca”. <sup>7</sup> Mēntšá, cada ona tšēngaftanguentšá ya ndoñe quenátsmēna mo chē nyets tempo nye ínñabiama oservenēngcá, quem luarentše imománda espíritēngaca mandánēnga, y añe Bēngbe Bētsabe basa tojoquedá. Y chabe basa tojo-

quedáyeca, lempe ntšamo Bēngbe Bētsá chabe básēnga jatšetayama tojašbuachenacá cha echanjóyēngacñe.

### Pablo, Galicia luaroquēngbiama ngménaca yojtsanjuabnaye

<sup>8</sup> Tempo, Bēngbe Bētsá ndoñe šmonjanábuatma ora, tšēngaftanga šmojamna mo nyets tempo nye ínñabiama oservenēngcá, ndoñe ndegombre diosēnga mondmēna espíritēngaca mandánēnga. <sup>9</sup> Pero mora, Bēngbe Bētsábioye šmontsábuatma ora, o tšabá jayanama, Bēngbe Bētsá cmojtsēbuatma ora, ¿ntšá moyeca tšēngaftanga cachiñe chē quem luarentše imománda espíritēnga šmojtsayaunana? Chēnga ndocna obenana quemátSBomna, y nduámanēnga mondmēna. ¿Ndayeca tšēngaftanga šmojtseboše cachiñe jtsemnana mo chē nyets tempo nye ínñabiama oservenēngcá, chē espíritēngaca mandánēnga? <sup>10</sup> Tšēngaftanga tša jtsejuabnayana diēnguiñe, shinñēnguiñe, canye uatentša tempēnguiñe y uatēnguiñe, mo uámana tempēngcá Bēngbe Bētsá tšabá jadórama, y chama bēts fiestēnga jtsebmōnana. <sup>11</sup> Atšē corente šontsēngmena, nderado atšbe trabajo tšēngaftangbeñe tondayama tonjoservé.

<sup>12</sup> Jesucristbeyeca atšbe catsátanga, bētsacá cbontsaimpadana, šmochtsiyena jtsamēse ntšamo atšē sēndamcá, er átšnaca sēnjóbema ntšamo tšēngaftanga ndoñe judiēnga šmondmēncá. Tšēngaftanga ndocna bacna soye atšē chešatsborlá. <sup>13</sup> Tšēngaftanga šmondétatšēmo, atšē sēnjanobená chē natsana soya ma tšēngaftanga chē tšabe noticiēnga jábuayenama, canye šocana šonjanontšáshjango causa. <sup>14</sup> Atšē canye šocana sēnjánbomna causa, tšēngaftangbiama ndoñe paselo quenjatsmēna tšēngaftangbeñe atšē jofjana; pero masque chca, tšēngaftanga ndoñe chešmatanaboté, ni quešmatanáboyēnja; masna, tšēngaftangbeñe tšabá šmonjanofja; šmonjanofja mo canye ángel Bēngbe Bētsabe ichmoná šmojofjá, o cach Jesucristbioycá. <sup>15</sup> Ndayá chora tšēngaftangtaftaca enjanopasancá, puerte oyejuayēnga tcmōnjánabiama. ¿Y mora ndayá tojopasá? Ndegombre, atšē sēndétatšēmo y séntsobena jayanama, tšēngaftanga ndaye sóynaca atšbiama mašmēnjanmama. Chē más uámana šmōjánbomna soyēnga atšbe cucuatšíñe mašmēnjánboshjona, y nya mo chē bominiñēngnaca masmēnjánenobuchjatsēca atšē jatšetayama. <sup>16</sup> Y morna, ¿ntšamo ndegombre yomncá cbojtsētsētsnana, atšbiama šmojtsejuabná mo tšēngaftangbe uayayá cuaftsemncá ca?

<sup>17</sup> Chē ndoñe ndegombre soyēnga buátēmbayēnga montsinñinñá mo tšēngaftangbiama ndegombre tšabá chašmotsiyenama cuaftsebošcá, pero chca ndoñe quenátsmēna; ndayá jamama imojtsebošcá, tšēngaftangbiama ndoñe tšabá quenátsmēna. Chēnga montseboše atšbe contra y atšbe buátēmbana soyēngama contra chašmotsemnana, chentšana tšēngaftanga chēngaftaca jtsemnana chašmotsebošama y chēnga chašmotsababuáñyēshanama. <sup>18</sup> Puerte tšabá

endmëna atše y ínÿenga chafstseboše tšëngaftangaftaca amiguënga jtsemnama, canÿe tšabe soye jamama tojtsemnëse; y sempre chca chauëtsemna, tšabiama tojtsemnëse, y ndoñe nÿe atše chentše tšëngaftangaftaca stsemna ora. <sup>19</sup> Tšëngaftanga, chë atšbiama mo atšbe basengcá šmondmënënga, Jesucristbeñe chašmošbuáchema tcbonjanëjabuáheyeca; atše cachiñe séntsesufrina tšëngaftangbe causa, ntšamo canÿe šešona jtsebomnama ora canÿe shembása jtseusufrinancá; y atše chca chanjëtsesentina, ntšamo Cristo endmëncá tšëngaftangbe vidiñe ndegombre chaojtsebínÿëntscuana. <sup>20</sup> Malaye atše, mora tšëngaftangaftaca stsemna, atše jobenayama jinÿanÿiyama, cach tšëngaftanga jáuyanëse, ntšamo ndegombre atše tšëngaftangbiama tsésentínana. Atše tša šontsecöhëngmena tšëngaftangbiama.

### Ntšamo Agar y Sáraftaca tojanopasá

<sup>21</sup> Canÿe soye šmochjauyana, tšëngaftanga chë Moisesbe léyeca mandánënga jtsemnama šmojtsebošënga. ¿Ntšamo chë leyíñe endayancá tacmojtšésertana? <sup>22</sup> Chiñe endayana, Abraham uta uaquiñata yojánabamna ca; cánÿana Agárbeñe, canÿa chabe shembiamanÿets tempo oservená; y chë ínÿana, cachabe shémbeñe, Sara, y mua ndocnabiama nÿets tempo oservená yonjamna. <sup>23</sup> Chë chabe shembiamanÿets tempo oservenabe šešona, tojanonÿná nÿe Abraham y Agar chca chaotsemnama tbojánbošenayeca; y cachabe shembe šešona tojanonÿná, Bëngbe Bëtsá chë soye jamama Abrahámbyoye tbojánšbuachenáyeca.

<sup>24</sup> Ntšamo Agar y Sara, y chatbe šešónataftaca tojanopasacá, bënga canÿe uámana soye šontsabuatambá. Ndayá chë uta shembásataftaca tojanopasacá, uta trato entsinÿinÿná: chë shembása Agar, chë nÿets tempo nÿe ínÿabiama oservená yojamná, entsinÿinÿná chë trato Bëngbe Bëtsá y Israeloca entšángaftaca, chë Moisésoftaca Bëngbe Bëtsá leyënga entšangbe cucuatšíñe tojanáboshjona ora. Agar básenga yojtšabamna ora, chëngnaca tmojanonÿná nÿe ínÿabiama nÿets tempo oservenënga jtsemnama, y chë tratentša leyíñe soyëngaca mandánënga jtsemnama tmojtsebošëngnaca jtsemnana mo nÿe ínÿabiama nÿets tempo oservenëngcá. <sup>25</sup> Ndayá Agáraftaca tojanopasacá entsinÿinÿná chë Sináí batsjoca tmojánbema trato, Arabia luaroca; y chë morsca bëts pueblo Jerusalénënaca entsinÿinÿná, er chentša entšanga montsemna chë leyëngaca mandánënga. Ntšamo Agar y chabe básenga nÿe ínÿabiama nÿets tempo oservenënga monjamncá, Jerusalenentša entšángnaca cachcá chëngcá mondmëna, chë leyëngaca nÿets tempo mandánënga bëtsemnayeca. <sup>26</sup> Ndayá Sáraftaca tojanopasacá, chë nÿe cachabiama trabájaye shembása, entsinÿinÿná chë trato, chë tšabe bendicionënga Abrahambiamama jamama chábyoye tbojánšbuachená ora. Chánaca entsinÿinÿná chë Bëngbe Bëtsabe bëts pueblo celoca, Jerusalén ca uabaina pueblo, er chë chentše mochjoyénananga, mora ndoñe quemuátiye-

na chë leyëngaca mandánënga. Chë Crístbeñe osbuáchiyënga mondmëna chë celoca bëts pueblo Jerusalenentše joyénanama, y chca, ndegombre chënga mondmëna celocama entšanga. <sup>27</sup> Chë celoca Jerusalén endmëna chë ndegombre bëts pueblo chë Jesucristbeñe osbuáchiyëngbiama, y chca endmëna mo canÿe shembása šešonga ndabamná y aíñe chaotsabamnama Bëngbe Bëtsá cuafjamcá. Quem luarentša Jerusalén endmëna chë uámana luare chë léyeca mandánënga imomnëngbiama, y chca endmëna mo canÿe shembása aíñe boyaftaquëcá, er Bëngbe Bëtsabe uabemana palabrenÿguíñe chë shembásatbiama mëntšá endayana:

Shembása šešonga ndabamná, y ndocna te tsetšanënga ndbomná šešona jtsebomnama, moyeuá y moyó oyejuayá cojtsemnama.

Chca moma, er aca, chë shembása chabe boyabiama utšená, chë shembása boyá bomnabiama más básenga cochántsabamna ca.

<sup>28</sup> Chcasna, Jesucristbeyeca atšbe catsátanga, ntšamo Isaac Abrahambe uaquiñá tojanobemcá, Bëngbe Bëtsá chca Abrahámbyoye tbojánšbuachenáyeca; cachcá, tšëngaftángnaca šmojobená Bëngbe Bëtsabe básenga jtsemnama, Bëngbe Bëtsá chca tojánšbuachenáyeca. <sup>29</sup> Ntšamo chë tempo tojanopasacá, chë Isaac chaosufrima Ismael tojanmá (Ismael, Abrahambe uaquiñá Agárbeñe, chë nÿe chata chca tbojánbošenayeca onÿnaná; Isaac, chë Bëngbe Bëtsabe Espíritbeyeca onÿnaná), mórncaca cachcá entsopasana: chë ndoñe ndegombre soyënga buátëmbayënga judiënga montsama bënga chamosufrima, ntšamo Isaac chaosufrima Ismael yojanamcá. <sup>30</sup> Pero, ¿ndayá Bëngbe Bëtsabe uabemana palabrenÿguíñe Abrahambe básatbiama iuayana? Mëntšá endayana: "Moma, chë nÿets tempo nÿe ínÿabiama oservená y chabe basa acbe yebnentšana chábuaisebocnama, er chë nÿets tempo nÿe ínÿabiama oservenabe šešona ndoñe quenátobena chabe taitabe soyënga jtsebomnama. Nÿe chë propio shembe šešona aíñe, er chë shemna ndoñe nÿe ínÿabiama nÿets tempo oservená quenátsmëna." <sup>31</sup> Chcasna, Jesucristbeyeca atšbe catsátanga, bënga ndoñe quemuátsmëna mo canÿa nÿe ínÿabiama nÿets tempo oservenabe básenga cuaftsemncá, er mora ya ndoñe más quemuátsmëna chë léyeca nÿets tempo mandánënga. Y aíñe montsemna mo canÿe shema ndoñe nÿe ínÿabiama nÿets tempo oservenabe básenga cuaftsemncá, er Bëngbe Bëtsabe básenga bënga mondmëna.

### Cristo bënga šojatsebacá

**5** Cristo bënga šojatsebacá, ndoñe más mo chë nÿets tempo nÿe ínÿabiama oservenëngcá chamondëtsiyenama, chë léyeca mandánënga. Nÿa šmochtsentšëna nÿets tempo chca atsebácanënga chašmoquedama, y ndoñe šmatjaleséncia tšëngaftanga cachiñe chë léyeca mandánënga ínÿenga chácmbiamama.

<sup>2</sup> Tšabá šmochjouena. Atše Pablo cbéyana: Nderado tšëngaftanga ndoñe judiënga, šmojalesenciá ínÿënga chë tšëngaftangbe más delicadentše base bobachtema chamotëtšama, ntšamo judiënga mond-uamancá, asna, ndayá Cristo tšëngaftangbiama tojan-mcá tondayama nantsoservena. <sup>3</sup> Ndëmuanyë entšánaca, nda tojalesenciá ínÿënga chabe más delicadentše base bobachtema chamotëtšama, cachiñe cha šcobuayená: Mora aca cmontsemna nÿetsca chë judiëngbe leyentša mandënga jtsobedecénana. <sup>4</sup> Ndëmuanyënga tšëngaftangbentšana šmojtsenguá, Bëngbe Bëtsabe bominiñe tšábënga jtsemnama, ntšamo leyine jamama yomna ca iuayancá jtsamëse, tšëngaftanga chca šmojtsamama, šmojama Crístoftaca cánÿiñe mo canÿacá ndoñe chašmondëtsemnama; Bëngbe Bëtsábentšanënaca šmojtsoularé, y chca, šmontsinÿanÿná tšëngaftanga ndoñe šmontseboše, Bëngbe Bëtsá tšëngaftangbe tšabiama jtsejuabnayeše, chácmatsebancana. <sup>5</sup> Pero bënga, Bëngbe Bëtsábeñe jtsošbuáchiyëse, mondobátmana cha yochjama bënga chabe bominiñe tšábënga nÿets tempo chamotsemnama. Y bënga chca mondobátmana, Jesucristbeñe ošbuáchiyana bómnyeyeca, y chë ošbuáchiyana chë Uámana Espíritubiajana bëngbioye endobá. <sup>6</sup> Er Crístoftaca cánÿiñe mo canÿacá tmojtsemna ora, aíñe base bobachtema tëtšenënga tmojtsemna o ndoñe, tondaye ntsámanana; ndayá puerte enduámana endmëna chë Jesucristbeñe bënga mondbomna ošbuáchiyana, y chca bëtsebomnamna bënga montsinÿanÿná ínÿënga jtsababuánÿeshanëse.

<sup>7</sup> Tšëngaftanga tšabá šmonjánama, chë jtseyenana ntšamo Bëngbe Bëtsabe ndegombre soyënga yomncá jtsamëse. Y mora, ¿nda tojama tšëngaftanga chašmot-sajbanama chë Bëngbe Bëtsabe ndegombre soyënga jtsuenanama? <sup>8</sup> Ndegombre, Bëngbe Bëtsá ndoñe quenátsmëna, er cha tšëngaftanga tcmojáchembo chabe entšanga chašmotsemnama. <sup>9</sup> Ntšamo entšanga mondëntšayanacá: “Nÿe base levadura jamana nÿetsana chauabochama ca”; cachcá, tšëngaftanga chë judiëngbe básefta leyëngaca mandánënga jtsemnama šmojabojátšese, šmuatjábocna nÿetsca leyëngaca mandánënga. <sup>10</sup> Bënga Bëngbe Utabnáftaca cánÿiñe mo canÿacá bëtsemnayeyeca, atše corente séntsetatšëmbo, ntšamo atšbe juabna yomncá tšëngaftangnaca cachcá šmochtsejuabnayama; y átšnaca corente séntsetatšëmbo Bëngbe Bëtsá puerte bochjacastíga, nda tšëngaftanga natjémbana ainánaca ndoñe chašmondëtsiyenama tojtsamábioye, masque ndánaca cha chaotsomñe.

<sup>11</sup> Y atšbiama chanjayana, Jesucristbeyeca atšbe catšátanga, Jesucristbeñe ošbuáchiyënga base bobachtema chëngbe más delicadentše tëtšenënga chamotsemnama entšanga cabá stsbuayiyenase, entšanga ya ndoñe muantsama atše chaitsesufrínama. Atše chca stsamëse, Cristo cruciñe tojanóbanama ntšamo iuayancá entšanga stsbuayiyiná ora, chënga ya ndoñe átšeftaca nanjósentiyaye. <sup>12</sup> Pero chë natjém-

bana ainánaca ndoñe chašmondëtsiyenama imojtsamëngna, imalaye cachënga muanjenocbóna!

<sup>13</sup> Pero tšëngaftanga, Jesucristbeyeca atšbe catšátanga, Bëngbe Bëtsá tcmojáchembo chë judiëngbe léyeyca ndëmandánënga chašmotsemnama. Pero chca bëtsemnama, mora ndoñe šmatjátjuabnaye šmojtsobena jalesenciána, nÿe tšëngaftangbe cuerpënga tšabá chamotsemnama juabnéngaca mandánënga jatiyenama. Chamna, tšëngaftanga šmuenbobonshánayeyca, nÿetscanga šmochtsenájabuachana. <sup>14</sup> Er ntšamo Moisesbe leyentša nÿetsca mandënguiñe endayancá, nÿe canÿe mandíñe lempe chca entsayana. Y chë mando endmëna: “Ndëmua entšánaca cochtsebobonshana ntšamo cach aca cuenobobonshancá.” <sup>15</sup> Pero ínÿënga chamotsesufrínama jtsamëse tšëngaftanga šmojtsiyenëse, mo tšátjaye bayënga tmojtsenashantsná y tmojtsenobanacá, cuedado šmochtsebomna. Ndóñese, nÿetscanga šmatjánenpochocaye.

### Ntšamo chë Bëngbe Bëtsabe Espíritbeyeca vida jtsebomnama

<sup>16</sup> Chíyeyca cbochjáuyana: Nÿets tempo šmochtsiyena ntšamo chë Uámana Espiritu cmojtsamëndacá, y chca, tšëngaftanga ndoñe quešmochátama soyënga, nÿe cach tšëngaftanga tšabá jtsomñama juabnéngaca.

<sup>17</sup> Er ndayá bënga, nÿe entšangbe juábnaca jamama mondbošcá, jtsemnana ndayá chë Uámana Espiritu bënga chamomama yobošcá contra; y ndayá chë Uámana Espiritu bënga chamomama yobošcá, jtsemnana ndayá bënga, nÿe entšangbe juábnaca jamama imobošcá contra. Chca endmënyeyeca, ntšamo chë Uámana Espiritu chašmomama yobošcá šmojtsamëse, ndoñe quešmátobena jamana, ndayá cach tšëngaftanga, nÿe entšangbe juábnaca jamama šmojtsabošcá.

<sup>18</sup> Tšëngaftanga, ntšamo chë Uámana Espiritu cmojtsamëndacá šmojtsamëse, ndoñe quecmátamna ntšamo chë leyine iuayancá játamama.

<sup>19</sup> Ntšamo entšanga, nÿe entšangbe juábnaca tmojtsamcá, nÿetscanga paselo jtsonÿayana: chënga bacna soye boyabása o shembásaftaca jtsamana, nÿe chca soyëngama jësejuabnayana, y ndoñe ntsoobenana cachënga jenomándama, chca soyënga jtsamëse. <sup>20</sup> Ba uabouana soyënga jtsamana, diosënga yomna ca tmojtsejuabná soyënga jadórana, jtsencjuanayana, ínÿëngaftaca jtšenáyayana, nÿetscanga ndoñe cachcá chamondëtsejuabnama jtsamana, ínÿëngaftaca yapa jtšenántšabošana, soyënga nÿe rábiaca jtsamana, ínÿëngaftaca tša jesenaleganana, y cánÿënga ínÿëngaftaca contra chamotsemnama jtsamana. <sup>21</sup> Nÿe jtsebošana ntšamo inÿa tojatashjachcá jtsebomnama, yapa tmoyënga jtsemnana, fiestënguiñe ndoñe tšabe soyënga jtsamana, y inÿe soyëngnaca mo chë soyëngcá jtsamana. Y mora atše cbabuayená, cach ntšamo tempo sënjanmcá: chca soyënga jtsamëse oyenënga, Bëngbe Bëtsabe amëndayoca ndoñe luare quemochátsbomna.

<sup>22</sup> Pero, Uámana Espiritu ainaniñe tojtsemánda ora, quem soyënga chentšana jóbocnana: nÿetscanga

jtsababuányeshanana, jtsóyejuayana, natjémbana ínÿengaftaca jtsiyenana, puerte uantado nÿetsca padecéniñe jtsemnana, nÿetscanga corente bonshanánaca jtsénÿayana, tšabe ainana jtsebomnana, y nÿétscañe tšabe palabra bomnënga jtsemnana, <sup>23</sup> jtsejuabnayana chë ínÿenga mo chabiamá más uámanënga cuaftsemncá, y cachá nÿetsca soyënguiñe jenomándama jtsobenana. Y ndocna ley quenátsmëna, chca soyënga tmojtsama entšangbiama contra cháuyanama. <sup>24</sup> Jesucristbenga imomnënga tmojama, chënga chë nÿe entšangbe juabnëngaca mandánënga ndoñe ntsemnama; ya ndoñe más, chë nÿe cachënga tšabá jtsomñama bacna juabnëngaca mandánënga quemátsmëna, y chë nÿe cachëngbiama soyënga jamama bëtscá juabnëngaca cach ndoñe. <sup>25</sup> Bënga ndegombre tšabe vida chamotsebomnama Uámana Espíritu yojtsámayeca, bënga mochtsiyena jtsamëse lempe ntšamo Uámana Espíritu šojtsamëndacá. <sup>26</sup> Ndoñe šmattsenábotamnaye, uámanënga jatenobi-amnayëse, ndoñe soyënga mattsama ínÿenga bën-gaftaca chaoséntiayama, y ndoñe nÿe mochjátsboše ntšamo inÿa tojatashjachcá jatsbomnama.

#### Nÿetscanga šmochtsenájabuachana

**6** Jesucristbeyeca atšbe catšátanga, nderado ndánaca bacna soye tojamama šmojinÿe, tšëngaftangbentše ntšamo chë Bëngbe Bëtsabe Espíritu tojtsemandacá tmojtsamënga cmontsamna cha juajabuáchana, chë ndoñe tšabe soye amana chaot-sajbanama; pero chca šmochjama becá bonshanánaca jtsonÿayëse. Cuedado šmochtsebomna, er ndoñese, tšëngaftángnaca cmatjócochëngo cachcá soye jama-ma. <sup>2</sup> Chë soyënguiñe chašmojtsepadecena ora, š-mochtsenájabuachana, mo chë uauta uasmanëshangá šmojtsëyambá ora, juyambama šmojtsena-jabuachancá. Y chca chašmojtsama ora, ntšamo Cristo tojanmandacá šmochantsocumplina.

<sup>3</sup> Nderado nda tojtsejuabná, cha canÿe uámana entšá yomna ca, pero ndoñe chca cha tondmënëse, cachá jtsenoingñayana. <sup>4</sup> Cada ona chauenojuabó, ntšamo tojamcá tšabá o ndoñe tšabá bëtsemnama. Ntšamo tojamcá tšabá tojtsemnëse, chca tojamama oyejuayá chaotsemna; pero cha ndoñe quebnátsmëna jayanana ntšamo tojamcá tšabá yojtsemna ca, chë ndayá ínÿenga tmojamama más tšabá yojtsemna ca jatichámëse. <sup>5</sup> Er cada ona bontsemna jtsenójuab-nayana, jtsetatšëmbuama ntšamo tojamcá tšabá o ndoñe tšabá bëtsemnama.

<sup>6</sup> Nda Bëngbe Bëtsabe soyëngama tojtsatsjendá, cha bontsemna chabe buatëmbayáftaca nÿetsca tšabe soyënga jenájatayana.

<sup>7</sup> Ndoñe matenoingñana; ndoñe šmattsejuabnaye tšëngaftanga šmojtsobena ntšamo Bëngbe Bëtsá tojamandacá ndoñe ntjamana, castigo ntjoyëngacñëcá, er ndocná quenátobena Bëngbe Bëtsá jáingñana. Ntšamo entšanga mondëntsáyancá: “Ndayá tcojajé y cachcá josháchiñana ca.” <sup>8</sup> Mo nda ndoñe tšabe fshantsiñe tojajecá, tšabe shajuana ndoñe

ntjoshachiñana, cachcá, nda tojtsiyena nÿe cachá tšabá jtsomñama bacna juabnëngaca, cha echan-jábocna jabuache castiganá nÿetsca tescama. Pero mo nda uaba fshantsiñe tojajecá, tšabe shajuana josháchiñana, cachcá nda tojtsiyena ntšamo chë Uámana Espíritu tojtsemandacá jtsamëse, chë nÿetsca tescama yomna tšabe vida echántsebomna. <sup>9</sup> Chcasna, ndoñe chašondëmantšé tšabe soye jtsamama; er masque šojtsëmantšnasna, pero chë tšabe soyënga jtsamama ndoñe tmonjajbanase, canÿe bëts te echan-jóshjango, bënga bëtscá tšabe soyënga josháchiñama, mo tša tšabe shajuanënga tmojashaquécá. <sup>10</sup> Chiyeca, tmojtsobena ora, nÿetscangbiama tšabe soyënga mochjama, pero masna chë Jesucristbeñe os-buáchiyana bómnyeca, bëngcá Bëngbe Bëtsabe básenga imomnëngbiama.

#### Quem tsbuanácha juapochócama cach Pablo tojanábema

<sup>11</sup> ¡Šmochjinÿe, tša bëts letrëngaca cach atšbe cucuátšeca mora cbontsëbuabiamná!

<sup>12</sup> Ndëmuanyënga imojtseboše, tšëngaftanga chë ndoñe judiënga jamëndama tšëngaftangbe más delicadentše base bobachtema tëtšëñënga chašmotsemnama, ntšamo judiënga monduamancá, chënga chca jtsamana nÿe chë judiëngaftaca tšabá joquédama. Y chca jtsamëndayana, chënga chamosufrima ínÿenga chamotsamama ndoñe mondbóseyeca; er judiënga muanjama chënga chamosufrima, Cristo cruzoca jóbanana entšangbiama puerte iuámana ca chënga tmojtsabuayiynase. <sup>13</sup> Pero ni mo chë más delicadentše base bobachtema tëtšëñënga imomnënga, ndoñe quemátama lempe ntšamo chë leyíñe iuayancá. Pero chënga jtsebošana tšëngaftanga chca tëtšëñënga chašmotsemna, chënga jtsenábotamnayama jobenayama, ínÿenga base bobachtema chacmatëtšama tšëngaftanga šmojalesenciama. <sup>14</sup> Atšeftacna ndocna te chca chaondopasá. Atše nÿets tempo y becá chanjëftsóyebuambnaye ndayá atšbiama Bëngbe Utabná Jesucristo tojanmama, cha cruzoca tojanóbana ora; er ndayá choca tojanma sóyeca, atšbiama tondaye quenatámana ntšamo entšanga quem luarentše imojuabnacá y chëngbiama puerte iuámana; y ndayá atšbiama puerte iuámana, entšangbiama tondaye quenatámana; y chë causa, atše chëngbiama mo obanacá sëndmëna. <sup>15</sup> Chë más delicadentše base bobachtema aíñe tëtšëná o ndoñe, tondaye quenatámana. Ndayá puerte iuámana endmëna, Bëngbe Bëtsá mo tsmëma entšangcá bënga šojábiana, Uámana Espíritu bëngbe ainaniñe jtsemándayëse. <sup>16</sup> Chë quem buatëmbana sóyeca jtsamëse šmoyenëngbiama, atše, Bëngbe Bëtsá séntseimpadana, cha chaoma tšëngaftangbe ainana natjémbana chašmotsebomnama y becá chacmotsalastemánama; y ndoñe nÿe chëngbiama chca quetsatsimpadana, ndayá nÿetscanga Bëngbe Bëtsabe entšanga imomnëngbiámna.

<sup>17</sup> Y mora, nÿe canÿe soye cbochjáuyana: morscana ndocná chaondëtsama atše jasúfriama chašotsemna-

ma; er atšbe cuerpiñe endëtinÿna ntšamo atše tija-sufrí, Jesusbe oserverná bétsemnama.

<sup>18</sup>Jesucristbeyeca atšbe catsátanga, atše séntseim-padana Bëngbe Utabná Jesucristo chaoma tšabe ben-

dicionënga tšëngaftangbeñe chaotsemnama. Chca chaotsemna.

# Efesios

## Jacheuayama

**1** Atše Pablo, Jesucristbe ichmoná Bëngbe Bëtsá chca yobóseyeca, quem tsbuanácha séntsabi-amná Efeso puebloca Bëngbe Bëtsabe entšanga y Cristo Jesúsbeñe ošbuáchiyënga imomnëngbiama. **2** Atše séntseimpadana Bëngbe Bëtsá Bëngbe Taitá y Bëngbe Utabná Jesucristo, chaboma tšëngaftangbeñe tšabe bendicionënga chaotsemnama, y chata chaboma tšëngaftangbe ainaniñe tšabe ebionana chašmotsebmoma.

**Crísoftaca cánjiñe mo canyáca jtsemnëse, bënga mochántsebmoma nyetsca tšabe soyënga, ntšamo celoca yobinýncá**

**3** Bëngbe Bëtsá y Bëngbe Utabná Jesucristbe Taitábioye mochjëtschuaye, er bënga Crísoftaca cánjiñe mo canyáca mondménayeca, Bëngbe Bëtsá tojama bënga nyetsca tšabe soyënga chamotsebmoma, ntšamo celoca yobinýncá. **4** Bëngbe Bëtsá bënga šojanabacacá Crísoftaca cánjiñe mo canyáca chamotsebmoma, cabá quem luare cha ndama orscana, bënga chabe delante chamotsebmoma chabe entšanga, bacna soyëngama perdonánënga y chabe oservénënga, y bënga ainaniñe bacna soye ndbomnënga imomna ca cha cháuyanama. **5** Bëngbe Bëtsá šuababuánýeshanayeca, tempo cha tojanjuabó y tojånbošena bënga mo cachabe basengcá jábiamama, chë Jesucristo yochjanma sóyeca. **6** Chýyeca bënga Bëngbe Bëtsábioye sempre jtsatschuanayana, cha bëngbe tšabiama juabna yobómnyayeca, ndayá chabe Bonshana Uaquiñáftaca bëngbe tšabiama cha tojama. **7** Bëngbe Bëtsá puerte bonshanánaca bëngbe tšabiama bëtscá yojuabnýyeca, cha bëngbe bacna soyëngama šojtsaperdoná y šojatsebacá, er Jesús bëngbiama tojanóbana, chabe buiñe juabuáshanëse. **8** Bëngbe Bëtsá tojama bënga nyets osertánana y becá juabna chamotsebmoma, cha becá bonshanánaca bëngbe tšabiama juabna yobómnyayeca, **9** y tojama bënga chamotsetatšëmbuama ndayá jamama cha yobošcá, ndayá cachá tempscana yojanjuabná jamama, pero entšanga chca ndoñe tonjaninýanýé. Ndayá jamama Bëngbe Bëtsá tempo yojanjuabnacá, ndayá cha tojama bënga chamotsetatšëmbuama, cachá yojanjuabná chca jamama. **10** Ndayá jamama Bëngbe Bëtsá yojuabnacá, lempe echanjochnëngo nýa chama tempo chaojóshjango ora, y quem Bëngbe Bëtsabe juabna endmëna jamana, lempe ntšamo cha tojamcá celoca y

quem luarentše, Cristo chamotsebmoma nyetsca chë soyënguiñe mo chë mandayacá.

**11** Bëngbe Bëtsá sempre jamana nyetsca soyënga ntšamo tojtsejuabnacá y tojtsebošcá. Y Bëngbe Bëtsá bënga šojabacacá, ntšamo cabá chca ndama ora yojanjuabnacá; chca, bënga Crísoftaca cánjiñe mo canyáca jtsemnëse, bënga chamóyëngacñama ndayá Bëngbe Bëtsá chabe entšanga jatšatayama tojašëbuachená, mo chëngbe otocana soyacá. **12** Y Bëngbe Bëtsá chca tojama, bënga chë Crístbeñe natsana imojtsanošbuachenga, cha bënga šochjánatsebacama, tšabe soyënga jtsamëse chamotsiyenama, chca, chë inýe entšanga Bëngbe Bëtsabe obenanama cha chamotsatschuanama. **13** Y tšëngaftángnaca, chë ndegombre buayenánana šmojanuena ora, chë Bëngbe Bëtsá bënga játsebacama buayenánana, y Crístbeñe šmojtsanošbuaché ora, Bëngbe Bëtsá tojanma tšëngaftanga Crísoftaca cánjiñe mo canyáca chašmotsebmoma y tcmojanainýnaná tšëngaftanga chabe entšanga bëtsemnama. Bëngbe Bëtsá chca tojanma, Uámana Espíritu tšëngaftangbe ainaniñe cháumashënguama tojanma ora, ntšamo tempo cha tojanašëbuachenacá. **14** Bënga chë Uámana Espíritu bëngbe ainaniñe mondbómnyayeca, corente mondé-tatšëmbo ndayá Bëngbe Bëtsá chabe entšanga tojašëbuachenacá bënga mochjóyëngacñama. Uámana Espíritbeyeca bënga montsobena chca puerte tšabá jtsetatšëmbuama, chë Bëngbe Bëtsá chabe entšanga nyetsca tescama játsebacama y ntšamo tojašëbuachenacá jatšatayama tempo chaóshjanguëntscuana; y lempe ntšamo cha bëngbiama inétsamama, nyetscanga cha mochántatschuanaye, cha bëtsá y obená bëtsemnama.

**Pablo Bëngbe Bëtsábioye tbojanimpadá, ošbuáchiyënga osertánana chamotsebmoma.**

**15-16** Chcáyeca, atšna, Bëngbe Bëtsá tšëngaftangbiama steimpadana ora, sempre cha sëndbëtsatschuanaye, er atše sënjåtatsëmbona ntšamo tšëngaftanga Bëngbe Utabná Jesúsbeñe tša šmojtsošbuáchemá, y ntšamo tšëngaftanga nyetsca chë Bëngbe Bëtsábënga imomnënga šmababuánýeshanama. **17** Bëngbe Bëtsá, Bëngbe Utabná Jesucristbe Taitá, nda corente iuámana, séntseimpadana cha chaoma Uámana Espíritu chacmëjabuachama, corente osertánënga chašmotsebmoma, y chacminýanýé nda Bëngbe Bëtsá yomnana, chca, más tšabá cha chašmotsábuatmama. **18** Atše, Bëngbe Bëtsá séntseimpadana, cha chaoma



tšëngaftanga Bëngbe Bëtsabe soyënguiñe corente osertánana chašmotsebomnama, tšëngaftanga chašmotsetatšëmbuama, ndayá Bëngbe Bëtsábeñe jtsošbuáchiyëse tšëngaftanga šmojtsobatmancá cha cmochjátšatayama. Bëngbe Bëtsá tcmojáchembo chábeñe chca chašmotsobátmanama. Atše cha séntseimpadana, chaoma tšëngaftágnaca chašmotsetátšëmbo tša bëtscá y bëtš soyënga yomna ndayá chabe entšanga cha tojašebuachenacá; <sup>19</sup> y chašmotsetátšëmbo tša bëtš soye y ndocna te ntjéftšopochócama chabe obenana yomnama, chë ndayá bëngbe ainaniñe tšabe soyënga yojtsama, bënga chë Crístbeñe ošbuachiyëngbeñe. Cach quem puerte bëtš obenana endmëna, <sup>20</sup> ndáyeca Bëngbe Bëtsá tojanma Cristo cháuatayenama, y chabe catšbioica celoca tbojtantbema chaotsemándama. <sup>21</sup> Choca Cristo nyetsca soyënguiñe yojtsemándama, y más bëtscá obenana y mando yojtsebmoma nyetsca mándayëngbiama, chë mando y obenana bomnëngbiama, y cha yomna más uamaná y bëtscá nyetsca chë entšangbiama mo bëtšëtšangcá utabnëngbiama, chëngbe uabaina respétoca jtsichámëse. Cristo puerte bëtscá endmëna lempe ntšamo quem luarentše yobínñyama y Cristo yochjésabentšana yochtsebinñánmaca. <sup>22</sup> Bëngbe Bëtsá tojama Cristo nyetsca soyënguiñe chaotsemándama, y tbojanábuayana nyetsca soyënguiñe chaotsemándama, chábeñe ošbuáchiyëngbe tšabiama. <sup>23</sup> Cha endmëna nyetsca chábeñe ošbuáchiyëngbe mandayá, y chënga mondmëna mo cachabe cuerpo cuaftsemncá. Chëngbe ainaniñe cha endoyena y nyetsca luarënguífñacá, y lempe cha endëmándama.

#### Atsebácanënga mondmëna, Bëngbe Bëtsá šuababuánñeshanayeca

**2** Tempo tšëngaftanga Bëngbe Bëtsabiama mo obanëngcá šmonjamna, er tšëngaftanga šmonjaniyena, ntšamo Bëngbe Bëtsá yomandacá ntsamcá, y bëtscá bacna soyënga šmojánama. <sup>2</sup> Chca, tšëngaftanga šmonjánama mo chë nñe quem luarama enójuabnayënga monduamancá, y šmonjanëyeunana Satanás, chë bacna espíritënga obenana bomnënga y quem luarentša tsbanánoca imomnëngbe amëndayá, chë Bëngbe Bëtsábioye ndëyeunanëngbe ainaniñe yomándama espíritu. <sup>3</sup> Tempo bënga nyetscanga fsënjaniyena ntšamo tšëngaftanga šmonjaniyencá. Bënga soyënga fsënjánama, nñe ntšamo ftsjanbošcá nñe bëngbe cuerpëngbe tšabiama, y nñe ntšamo bëngbe juabna enjamncá bacna soyënga jamama. Bënga fsënjaniyena soyënga jtsamëse mo chë Bëngbe Bëtsábioye nduabuatma entšanga mondbetsamcá; chë causa bënga fsënjanomerecena jtsebomnana chë Bëngbe Bëtsabe uabouana castigo, cachcá chë Bëngbe Bëtsábioye nduabuatmëngcá. <sup>4</sup> Pero Bëngbe Bëtsá sempre tša lastemado entšangbiama endmëna y sempre corente bënga šondábabuanñeshana; <sup>5</sup> y chíyeca, bënga cabá mo obanëngcá chabiama fsënjamna ora, bacna soyënga fsënjánama causa, chora cha tojanma bënga tšabe vida chamotsebomnama y Crístoftaca

cányiñe mo canýacá chamotsemnama. Bëngbe Bëtsá tšëngaftangbe tšabiama juabna bómnyeyeca, bacna soyënguentšana tcmojatsebacá. <sup>6</sup> Bënga Jesucrístoftaca cányíñe mo canýacá bëtsemnayeyeca, Cristo Jesús cháuatayenama Bëngbe Bëtsá tojanma ora y celoca tbojtantbema ora, enjamna mo bëngnaca chámuatayenama Bëngbe Bëtsá cuafjamcá y Cristo Jesúseftaca celoca cuaftatbiamcá. <sup>7</sup> Chca enjamna, Bëngbe Bëtsá entšanga cháuinñanñeyema nñetsca joshjanguama tempënguiñe, ntšamo cha bëngbe tšabiama bëtscá juabna bëtsebomnama, cha Cristo Jesúseftaca bëngbioye tšabe juábncá šojánanñe ora. <sup>8</sup> Er Bëngbe Bëtsá tšëngaftangbiama tšabe juabna yojánbomnayeyeca, tcmojatsebacá, Jesucrístbeñe šmojtsanošbuáchema; pero atsebácanënga šmondmëna, ndoñe cach tšëngaftanga ndayá šmojánmayeyeca, ndayá atsbocaná jtsemnana endmëna Bëngbe Bëtsabe canye tšetana soye. <sup>9</sup> Atsebácanënga šmondmëna, ndoñe cach tšëngaftanga ndayá šmojánmayeyeca; chíyeca ndocná quenátobena jtšenábotamnyana atsbocaná yojtsemnama. <sup>10</sup> Bëngbe Bëtsá šojtabiama ntšamo bënga mondmëncá, y Cristo Jesúseftaca cányíñe mo canýacá bëtsemnayeyeca, Bëngbe Bëtsá mo tsmëma entšangcá cuaftatsmëncá šojtabiama, tšabe soyënga jtsamëse jtsiyenama. Y ndayá bënga tšabá mondamcá, Bëngbe Bëtsá tempo tojanprontá bënga chamotsamama.

#### Crístbeyeca tempcá tšabá Bëngbe Bëtsáftaca jtsatsmënana

<sup>11</sup> Tšëngaftanga ndoñe judiënga, ndëmuanñyenga judiënga cmondubuatma “chë más delicadentše base bobachtema ndëtëtšënënga ca”, chëngcá uinñyanánënga ndoñe šmondmënama; chënga cachënga jtšenábobuatmana “chë más delicadentše base bobachtema tëtšënënga ca”, y cachëngbe cuerpënguiñe chca jtsamana. Mëntšá, tšëngaftanga chë ndoñe judiënga, <sup>12</sup> šmochjenójuaboye ntšamo tempo šmonjamnama, Crístbeñe cabá ndošbuáchiye ora. Chora, tšëngaftanga Cristo ndoñe šmonjánbomna, Israeloca entšangbiama stëtšoye šmonjanquedana, y ndoñe šmonjantátšëmbo lempe ntšamo Bëngbe Bëtsá chabe entšanga tojanašebuachenacá. Tšëngaftanga quem luarentše šmonjaniyena ndocnábeñe ntsobatmancá y Bëngbe Bëtsá ntsabuatmncá. <sup>13</sup> Pero mora tšëngaftanga Cristo Jesúseftaca cányíñe mo canýacá šmontsemnama, chë tempo Bëngbe Bëtsá ndoñe šmonjanábuatmënga, y cha tojama chábioye chašmotsábuatmama; y chca yomna, er Jesús, chabe buiñe juabuáshanëse, tšëngaftangbiama tojanóbana. <sup>14</sup> Cach Cristo yojtsama bënga tempcá tšabá Bëngbe Bëtsáftaca chamotsemnama. Cha tojama judiënga y ndoñe judiënga nyetscanga mo cachca entšangcá chamotsemnama, mo nda canye tapiëse tojtsendbemcá, chë ndayéšeca canye luarentša entšanga tmojtsenjáta, chënga enáyaye causa. <sup>15</sup> Cristo chënga mo cachca entšangcá tojábiamna, judiëngbe leyënga y mandënga ndocna obenana chamondëtsebomnama jamëse. Chca tojama, cha jóbane, chë útoica entšanga mo nñe canye

tsmëma entsangcá jábiamama, cháftaca cánýiñe mo canýacá jtsemnëse. Cha chca tojanma chënga nyetscanga tšabá chamotsiyenama; <sup>16</sup> y Cristo cruciñe tojanóbanayeca, cha tojanma chë útoica entsanga enáyayana chamotsajbanama, y tojanma chë útoica entsanga mo canýe entsangcá chamotsemnana, chënga tempcá tšabá Bëngbe Bëtsáftaca chamot-satsmënana.

<sup>17</sup> Cristo quem luaroye tojánabo tšabe noticiënga jabábuayenama, tempcá tšabá Bëngbe Bëtsáftaca jt-satsmënana. Cha quem tšabe noticiënga to-janabuayená tšëngaftanga chë ndoñe judiëngbioye, chë Bëngbe Bëtsá ndoñe šmonjanábuatmënga, y chë judiëngbioynaca, chë Bëngbe Bëtsá imojanábuatmënga. <sup>18</sup> Er chábeyeca, canýányënga y ínýënga montsobena chë Taitábioye jobéconana, er bënga nyetscanga cachca Espíritu Bëngbe ainaniñe mondbomna, chë Uámana Espíritu. <sup>19</sup> Chýyeca tšëngaftanga, Bëngbe Bëtsabe entsanguentšë ndoñe quešmátsmëna mo inýe luarocana ashjainëngcá, y ni mo cachëngbe yebnentšë ndoyenëngcá, tondayama derecho ndbomnënga. Inýetšá endmëna; tšëngaftanga derecho šmond-bomna cachcá ntšamo Bëngbe Bëtsabe entsanga mondbomncá, y Bëngbe Bëtsabe básënga šmondmëna. <sup>20</sup> Jesucristo y chabe entsanga mondmëna mo canýe jebna yebncá. Jesucristbe ichmónënga y chë Bëngbe Bëtsabe juabna oyebuambnayënga mondmëna mo chë ndëtšbënga ndayiñe chë yebna tojtsëcutjoncá; tšëngaftanga ošbuáchiyënga šmondmëna chë jebna yebnentšá soyëngcá, y cach Jesucristo mo chë más uámana luarentšë uashacuana ndëtšbecá. <sup>21</sup> Quem más uámana luarentšë uashacuana ndëtšbeñe, nyetsca chë bëtš yebnentšá soyënga jtsëcutjonana, y tsbanánoye más tmojatsjebëse, chë bëtš yebnentšë tsëm jebna sóynaca chiñe jtsëcutjonana. Cachcá Cristo, mo chë más uámana luarentšë uashacuana ndëtšbecá, jtsamana nyetsca chábeñe ošbuáchiyënga cháftaca cánýiñe mo canýacá chamotsemnana, y ínýëngnaca cachcá chamotsemnana. Y nyetsca ošbuáchiyënga Crísoftaca cánýiñe mo canýacá tmojtsemna ora, chënga jtsemnana mo Bëngbe Utabnabiama canýe bëtš yebna jebncá, chábioye jtsatschuanayama. <sup>22</sup> Y tšëngaftanga Efesoca ošbuachiyëngbiámnaca Cristo entsama, chë inýe chábeñe ošbuáchiyëngaftaca mo canýe entsangcá chašmotsemnana. Y chë Uámana Espíritu bëngbe ainaniñe yojtšiyénayeca, bënga nyetscanga cánýiñe mondmëna, mo canýe bëtš yebncá ndayentšë Bëngbe Bëtsá yoyena.

**Pablo Jesucristbe trabajo yojanbonýëna, chë ndoñe judiëngbeñe jamama**

**3** Chca, atšë Pablo utamená séntsemna, Cristo Jesusbiamama soyënga entsanga abuayiyenayeca causa, tšëngaftanga chë ndoñe judiëngbe tšabiama. <sup>2</sup> Er tšëngaftanga ya cmontsamna jtsetatšëmbuama, Bëngbe Bëtsá tšëngaftangbe tšabiama juabna yobomnana; y chca, chë trabajo atšë šojabonyé, tšën-

gaftangbe tšabiama jamama. <sup>3</sup> Tšëngaftangnaca cmontsamna jtsetatšëmbuama ndayá Bëngbe Bëtsá šojinýinýë, ntšamo cha jamama tempo tojanjuabocá, pero entsanga chca ndoñe tonjaninýanýë, y chë soya-ma ya batšatema tcbonjubuábiama. <sup>4</sup> Chašmojualiá ora, šmochanjátatšëmbona Cristbe soyënga šosertánama, chë tempo ndocná yonjanábuatma soyënga, <sup>5</sup> chë tempo Bëngbe Bëtsá ndocnábioye tbonjaninýinýë soyënga; pero mora cha tojinýanýë, Jesucristbe ichmónënga nýe Bëngbe Bëtsabiama oservénëngbioye y Bëngbe Bëtsabe juabna oyebuambnayëngbioye; y cha chca tojama chabe Uámana Espíritoftaca. <sup>6</sup> Ndayá tempo Bëngbe Bëtsá ndoñe tonjaninýanýecá mëntšá endmëna: chë ndoñe judiënga Jesucristbe tšabe noticiënguiñe chamojtsošbuaché ora, cachcá ntšamo chë judiënga ošbuáchiyënga Bëngbe Bëtsábocana mochjoshachiñcá, chëngnaca chábocana mo otocancá chë soye mochanjóyëngacñe. Chënga mo cach judiënga ošbuachiyëngcá, Cristo mondbomna mo chëngbe mandayacá. Y chca Cristo endmëna mo bestšašcá y chënga nyetscanga mondmëna mo cachabe cuerpentšá soyëngcá. Chë ndoñe judiënga ošbuáchiyënga mochanjóyëngacñe lempe ntšamo Bëngbe Bëtsá chë judiënga ošbuáchiyënga tojašëbuachenacá. Chca echántsemna chë ndoñe judiëngaftaca, chënga Cristo Jesúsëftaca cánýiñe mo canýacá bëtsemnayeca.

<sup>7</sup> Masque ndoñe šonjanomerecena, mo ndayá cuafjatšetacá, Bëngbe Bëtsá šonjanábuayana cha jt-seservénama, tšabe noticiënga entsanga jtsabuayiyenayëse; y cha átšëftaca chca tojanma chabe obenánaca. <sup>8</sup> Atšë nyetsca chë Bëngbe Bëtsabe entsanguentšë sëndmëna chë más nduamaná; pero Bëngbe Bëtsá bëtš pavor šontsebema, šonjalesenciá chë Cristbe bëtšcá tšabe soyënga chë ndoñe judiënga jábuayenama. Chë Cristbe soyënga tša bëtšcá endmëna, y chca, quenátopodena chë soyënguentšana lempe jtsabuatmana. <sup>9</sup> Y chë trabajo šonjabonyé jama, nyetscanga botamana jinýama chamotsobenama ndayá Bëngbe Bëtsá yochjama, ndayá cachá, chë nyetsca soyënga tojamá, tempscana yojanjuabnacá. Méntsoñama Bëngbe Bëtsá chë soye ndocnábioye tbonjinýinýë, pero mora aíñe. <sup>10</sup> Chca, Crísteñe ošbuachiyëngbeyeca, mora chë celoca mándayënga y obenana bomnënga, chamobená juabuátmanana nyets osertánana ntšamo Bëngbe Bëtsá yobomncá. <sup>11</sup> Bëngbe Bëtsá chca tojama, ntšamo cachá yojanjuabnacá nyetsca tescama jamama, y chca cha tojama Jesucristoftaca, Bëngbe Utabná. <sup>12</sup> Bënga Crísoftaca cánýiñe mo canýacá mondmëna, y chábeñe mondošbuachéyeca, bënga montsobena Bëngbe Bëtsábioye jobéconama tondayama ntjatauajcá, y corente jtsetatšëmbëse cha ndoñe chašondubatema. <sup>13</sup> Chýyeca atšë cbontsaimpadana ndoñe chašmondët-sajbaná ainaniñe añemo bomnana, atšë séntsesufrina causa, er chë tšëngaftangbe tšabiama tsësufrinentšana, tšëngaftangbiama tšabe soyënga endóbocana.

### Cristbe bonshánana

<sup>14-15</sup> Y chca, Bëngbe Bëtsá, chë Taitá, ndábentšana nyetsca pamillanga celoca y quem luarentše uabaina imóyëngacañe, chabe delante joshaméntšase, <sup>16</sup> séntseimpadana, chabe bëtská uámana bomnánaca chaoma, tšëngaftanga ainaniñe obenana y bëts añemo chašmotsebomnama, chabe Espíritbeyeca, <sup>17</sup> y tšëngaftanga Crístbeñe jtsošbuáchiyëse, mua tšëngaftangbe ainaniñe chaotsiyenama. Bëngbe Bëtsánaca séntseimpadana, cha y ínÿenga nyets ainánaca jtsababuánÿeshanëse, <sup>18</sup> tšëngaftanga y nyetsca Bëngbe Bëtsabe entšángnaca tšëngaftangaftaca, chašmotsobena josértama Cristbe bonshánana bëngbiama tša bëtská yomnama. Nderado nda tojontsé chabe bonshánana jatšëmbonana mo canÿe soye cuaftsemncá, cha ndocna te nanjobenaye jtsetatšëmbuana tëntšoye ndayéntscooca yomna y nÿanëjoye ndayéntscooca, jashenoye ndayéntscoñe y tsbanánoye ndayéntscoñe yomna. <sup>19</sup> Atše séntseimpadana tšëngaftanga chašmobená chë bonshánana juabuátmanana (chë bonshánana puerte bëtská endmëna causa, bënga ndocna te quemochatobenaye josértama ntšamo chë soye lempe yomnana). Pero séntseboše, tšëngaftangbe ainaniñe nÿe Bëngbe Bëtsabe soyënga chaotsemna y tšëngaftanga chašmotsiyena jtsamëse, ntšamo tšëngaftanga chašmotsamama Bëngbe Bëtsá yojuabnacá.

<sup>20</sup> Y mora, nyetscanga Bëngbe Bëtsá chamotsatschuaná. Cha obenana yobomna ntšamo bënga tmojtsojtjanañe o tmojtsejuabnama más soyënga jamama, chabe puerte bëts obenánaca; y chë obenana bëngbe ainaniñe yojtsemánada y yojtsama bënga ainaniñe sempre ošbuáchiyana chamotsebomnama. <sup>21</sup> ¡Entšanga Bëngbe Bëtsá chamotsatschuaná nyets tempo y nyetsca tescama, ndayá Crístbeñe ošbuáchiyënga tmojtsamama y cach Cristo tojamám-naca! Chca chaotsemna.

### Uámana Espíritbeyeca bënga cánÿiñe mo canÿacá jtsemnana

**4** As, atše chë cárceloye utamená, Bëngbe Utabnabiama trabájaye causa, tšëngaftanga cbontsaimpadana, ndëmuanÿenga Bëngbe Bëtsá tcmojáchembo chabe entšanga chašmotsemnama, sempre chašmotsiyena mo chë entšangcá ndëmuanÿenga Bëngbe Bëtsá cach soyama tojánachembo y chca imomerecena. <sup>2</sup> Cada ona chamotsenoyuabná mo chë ínÿenga chabiamá más uámanënga tmojtsemncá, y nyetscángbioye puerte bonshanánaca šmochtsobátmana, y bëtská bonshánana jtsebomnëse šmochtsenëuantana; <sup>3</sup> sempre šmochtsejuabnaye y šmochtsentšena tšëngaftanga nyets tempo cánÿiñe mo canÿacá chašmotsemnama, nyetsca tšëngaftanga natjëmbana jtsemnëse. Y tšëngaftanga šmontsobena cánÿiñe mo canÿacá jtsemnana chë Uámana Espíritbeyeca. <sup>4</sup> Bënga Jesucristbeñe ošbuáchiyënga bëtsemnayeca mondmëna mo

cach cuerpentšëngcá, chë Cristbe cuerpo, y cachca Espíritu bënga nyetscanga ainaniñe mondbomna. Bëngbe Bëtsá šojáchembo, bënga chábeñe jtsošbuáchiyëse, nyetscanga cachcá šochjátšatayama chamotsobátmanama. <sup>5</sup> Bënga nyetscanga cach Utabná mondbomna, cachca ošbuáchiyana Jesucristbeñe mondbomna, y bënga nyetscanga uabáinënga mondmëna chca betsošbuáchiyama. <sup>6</sup> Bënga ošbuáchiyënga nyetscangbiama cach Bëngbe Bëtsá y Taitá endmëna. Cha bëngbe amëndayá endmëna, chabe obenana nyetscángbeñe jtsinÿnana, y nyetsca bëngbe ainaniñe chabe Espíritu endmëna.

<sup>7</sup> Pero bënga, cada ona tšetana obenana tojóyëngacñe, tšabe soyënga jamama, ntšamo Cristo jatšatayama tojanbošencá, chábeñe ošbuáchiyënga jujabuáchama. <sup>8</sup> Chíyeca, Bëngbe Bëtsabe uabemana palabrenguiñe Jesucristbiama mëntšá endayana: Cha celoye tontantsjuá, y cháftaca tonjanéyamba nyetsca chabe uayayënga, chë tojánayëñjananga, y chabe entšángbioye obenana tonjanatšatá, tšabe soyënga jamama ca.

<sup>9</sup> ¿Y ndayá yojtsayana chë “cha tontantsjuá ca”? Chca entsayana co Cristo natsana, quem luaroye tojánastjango ca. <sup>10</sup> Y Cristo, chë tojanastjanguá, cachá endmëna nda celoca chë más tsbanánoye tojtantsjuá; chca, canÿe ora nyetscañe cha chaotsemnama. <sup>11</sup> Y cachá, chë tšabe soyënga jamama obenana tojanatšatá ora, tojanma chábeñe ošbuáchiyënguëntše chamotsemna ínÿengna chabe ichmónënga, ínÿengna Bëngbe Bëtsabe juabna oyebuambnayënga, ínÿengna tšabe noticiënga Cristbiama abuayiyayënga, y ínÿengna ošbuáchiyënga anÿenënga y Bëngbe Bëtsabe soyëngama abuátambayënga. <sup>12</sup> Cristo tojanabacacangna chabe entšángbioye mochjanëjabuache, cha tojanabanÿé trabajo chënga chamotsamama, y nyetsca ošbuáchiyënga, chë nyetscanga cánÿiñe mondmëna mo Cristbe cuerpcá, cada te más ošbuáchiyana y bonshánana chamotsebomnama, <sup>13</sup> bënga nyetscanga chamobenantscuana cachca ošbuáchiyana Jesucristbeñe jtsebomnama, y Bëngbe Bëtsabe Uaquiñabiama nyetscanga lempe cachcá jtsetatšëmbuama. Chca, bënga mochanjashjache jtsemnama lempe ntšamo Cristo yomncá, mo bëtsétsanga bëtská juabna bomnëngcá, <sup>14</sup> y ndoñe nÿe mo basengcá, Bëngbe Bëtsabe soyëngama jtsetatšëmbuama. Chë soyënguiñe ya ndoñe más nÿe mo basengcá quemochátsmëna, ndëmuanÿenga paselo jáingñama yomna. Mo canÿe barquëshá nÿe ndaye bínÿiacnaca tojtsëyambancá, básefta entšanga nÿe ndaye buatëmbana soye tmojatuencá jatsyeunanana; bënga ndoñe chca quemochátsmëna, ya ndoñe más bëngbe juabna quemochatstróca, nÿe ndaye tmojatuena tsëm sóyeca, ínÿengbioye áingñayënga. Chënga becá montsetatšëmbo ntšamo entšanga jáingñana, y montseboše chë montsabuatambá bostero soyënga bënga jtseyeunanama. <sup>15</sup> Chamna, chë Bëngbe Bëtsabe ndegombre soyëngama bonshanánaca jtsóyebuambnayëse, šontsamna jashjáchana jtsemnama lempe ntšamo Cristo yomncá.

Cha bēngbe amēndayá endmēna, cachcá ntšamo bestšaše chē cuerpentša soyēnga jtsemandayancá. <sup>16</sup> Mo canye bestšašcá, chēše jamana nyetsca chē cuerpentša soyēnga ndayentše chamuenefjnama y chiñe jobónjuama chamotsobenama, chē cuerpo saná chaotsebomnama jtsamēse, chca, nyets cuerpo tšabá chaóbochema, cachcá Cristo, chē nyetsca osbuáchiyēngbe amēndayá, chabe obenánaca jamana chēnga cada te más ošbuáchiyana y bonshánana chamotsebomnama. Cada cuerpentša soye tojtsama ntšamo chē soye chaotsamama tomncá, as nyets cuerpo tšabá jobóchana; cachcá, ošbuáchiyēnguentše cada ona tojtsama ntšamo jamama tbojtsemncá, as nyetsca ošbuáchiyēnga cada te más ošbuáchiyana mochántsebomna, puerte jtsenbobonshánese.

### **Cristoftaca cányiñe mo canyáca jtsemnēse tsēm vida šmochtsebomna**

<sup>17</sup> Mēntšá entsemna ntšamo cbontsētsēsnacá, y Bēngbe Utabná endmēna nda tojama atše mando chaitsebomnama tšēngaftanga chca jáuyanama: Ndoñe más šmattsiyena bacna soyēnga jtsamēse, mo chē Bēngbe Bētsábioye nduabuátmēnga mondbetsamcá; chēnga jtsiyenana jtsamēse ntšamo cachēngbe ndoservena juabnēnga tojtsamēndacá. <sup>18</sup> Chēngbe juabnoca obenana mondbomna nyē ndoñe ndegombre soyēngama josértama. Chēnga ndoñe quemátsbomna chē Bēngbe Bētsábicana yóbocana tšabe vida, er chēnga ndoñe quematslesénica chē Bēngbe Bētsabe soyēnga chēngbe ainaniñe chaómashēnguama; y chca endmēna, er chēnga tmojajuabó y tmojama chē Bēngbe Bētsabe buayenana soye chēngbe ainaniñe tondaye chaondómashēnguama. <sup>19</sup> Chēnga bacna soyēnga tmojtsama ora, tondayama ntsenócochinēnana; chēnga nyets tempo jēsentsénana nyetsca bacna soyēnga amana, y chca jtsamana tondayama ntjatenujuabnycá.

<sup>20</sup> Pero chca ndoñe quenjatsmēna ntšamo tšēngaftanga Cristbe soyēngama šmojanatsjinjē y ntšamo chábioye šmojanabuatmancá. <sup>21</sup> Ndegombre tšēngaftanga chabiama šmojanuena y ínñyēnga tmojanabuatambá mo chábeñe ošbuachiyēngcá y ntšamo chē ndegombre soyēnga Jesucristbeñe endbinñcá. <sup>22</sup> Chcasna, ntšamo tšēngaftanga šmojanjuabná, šmojanentina y šmojanamcá Jesucristbeñe cabá ndošbuachená ora, mora lempe stētšoye šmochjaquéda; ntšamo tempo tšēngaftanga šmojanjuabná, šmojanentina y šmojanamcá, canye ondbiamnaye juabnentšana yojóbocana, tšēngaftanga bacna soyēngama juabnēngaca mandánēnga jtsemnēse, y chē juabnēnga tšēngaftangbioye cmojánaingñaye. <sup>23</sup> Tšēngaftanga cmontsamna tšēngaftangbe juabniñe tsēm y tšabe juabnēnga jtsebomnana. <sup>24</sup> Tšēngaftanga cmontsamna jashjáchana mo tsmēma entšangcá jtsemnana, y chē ntšamo tempo šmojanamcá mora ndoñe cachcá chašmondétsamama. Chca, tšēngaftanga šmochanjashjache jtsemnana ntšamo Bēngbe Bētsá yomncá. Bēngbe Bētsá chca tsmēma entšangcá tcmojábiana,

tšēngaftanga chašmotsiyenama jtsamēse Bēngbe Bētsabe bominñiñe tšabá yomna soyēnga y chábioye jadórama soyēnga, chē ndegombre soyēnguentšana óbocana soyēnga.

<sup>25</sup> Chcasna, ya ndoñe más šmattsebostero, ndayá cada ona cháuyana ndegombre soyēnga cachacá Jesucristbeñe ošbuachiyáftaca, er nyetscanga cányiñe mondmēna mo nyē canye entšangcá. <sup>26</sup> Nderado chacmojetēna, tcmojetēna causa ndaye bacna soye ndoñe šmatjama. Pero ndoñe šmatjalesénica bēnama chacmetēna y ndoñe nyets te chacmondetēna. <sup>27</sup> Ndoñe šmatjalesénica Satanás ndayánaca tšēngaftangaftaca chaomama.

<sup>28</sup> Chē yojanatbēbaná chauajbaná atbēbanama y jatrabájama chaontsé; cachabe cucuátšeca tšabe trabajo chaotsóboma, chca, ndayánaca cha chaotsebomnama chē ujabótēnga jatšatayama.

<sup>29</sup> Bacna palabrenga ndoñe šmattsichamo, pero aiñe tšabe palabrenga y nya chorsca ujabótama palabrenga, chē nyē entšangbioye jujabuáchama más Cristcá chamotsemnana, chēnga Bēngbe Bētsábicana tšabe bendicionēnga chamóyēngacñama, chē ndayá chašmojtsētsēsná sóyeca. <sup>30</sup> Ndoñe šmattsama soyēnga, Bēngbe Bētsabe Uámana Espíritu chabongmema. Bēngbe Bētsá tojama Uámana Espíritu tšēngaftangbe ainaniñe cháumashēnguama, y chca, tcmojanainñyaná chabe entšanga bētsemnayeca, chē yochjóshjango tescama, Bēngbe Bētsá chabe entšanga nyetsca tescama yochjatsebacaye orscama.

<sup>31</sup> Inyēngbiama bacna juabnēnga ainaniñe ndoñe chašmondétsebomna, etonánēnga ndoñe chašmondétsemna, ni ínñyēngaftaca ndoñe chacmondetēna. Inyēngbioye ndoñe chašmondétsabuachembuana, ínñyēngbioye ndoñe šmatjoyánguango y ndaye bacna sóynaca ndoñe šmattsama. <sup>32</sup> Nyetscángaftaca tšábēnga šmochtsemna, nyetscanga šmochtsenlastemana y šmochjenperdóna, ntšamo Bēngbe Bētsá, Cristbeyeca tcmojaperdonacá.

### **Ntšamo yomna Bēngbe Bētsabe básēnga chamotsiyenama**

**5** Tšēngaftanga, Bēngbe Bētsabe bonshana básēnga quetsomñecá, nya šmochtsentšena cachacá jtsemnana. <sup>2</sup> Šmochtsiyena nyetsca soyēnga bonshanánaca jtsamēse, ntšamo Cristo šojanababuanñeshancá; chca, cha chabe derecho vida jtsobomñama cachcá tojanonýá y bēngbiama tojanóbana. Y ntšamo Cristo tojanmncá, yojamna Bēngbe Bētsábioye jētschuayama, y chabe bominñiñe tša tšabá yojtsemna, mo ndaye ora Bēngbe Bētsá oyejuayá jóyēngacñana ndayá tcojóbá y altaroca tcojajuinñese, y chē soye botamana jtsonguētšiyana.

<sup>3</sup> Tšēngaftanga, Bēngbe Bētsábēnga šmomnēnga, ndoñe quecmátamna shembása o boyabásaftaca bacna soyēnga jtsamana, ni chca játamama jtsejuabnayanana y jtsebošana, y chē nyē yapa jēsebošana más soyēnga ínñyēngbiama jtsebomnama cach ndoñe. Ni chē soyēngama ndoñe šmattsóyebuambnaye. <sup>4</sup> Bacna

soye ndoñe šmattsóyebuambnaye, ni corente ntjeno-juaboycá, ni nýe ntšámnaca bacna soye jenbotatšëmbonana cach ndoñe, er chë soyënga tšëngaftangbiama ndoñe tšabá ntsemnana. Chca játamamna, más tšabá, Bëngbe Bëtsá šmochtsatschuanaye. <sup>5</sup> Er tšëngaftanga ya šmondétatšëmbo, ndocna chë shembása o boyabásaftaca bacna soye amá, ndocna chë nýe chabe bacna juabnëngaca soyënga jtsamama oyená, o chë nýe más soyënga ínýengbiama jtsebomnana bošá y amá (chca jtsayanana chabiama más iuámana soyënga jtsebomnana, Bëngbe Bëtsábioye jatsbobonshánama), chca amënguentšana ndocná tondaye queochatóyëngacñe ndayá Bëngbe Bëtsá chabe entšángbioye jatšatayama tojašebuachenantšana, Cristo y Bëngbe Bëtsabe amëndayoca. <sup>6</sup> Ndocná chacmondaingñe ndoñe ndegombre tondmëna palabréngaca, bacna soyënga chašmotsamama, er chë causa chë uabouana castigo echanjobaye, ndáyeca Bëngbe Bëtsá chábioye ndëyeunanënga yochjácastigaye.

<sup>7</sup> Chiyeca, chca amëngbe soyënga tondaye šmattsama.

<sup>8</sup> Tempo tšëngaftanga šmojaniena bacna juabnënga jtsebomñe y bacna soyënga jtsamëse, mo ibetiñe cuaftsiyecá, pero mora Bëngbe Utabnáftaca cánýiñe mo canýacá bëtsemnayeca, chabe soyënga š-montsetátšëmbo y sempre šmondétsemna cháftaca, chë entšangbe juabnënga binýnayáftaca. Šmochtsiyena jtsamëse mo chë binýnayabe entšangcá. <sup>9</sup> Chë binýnayábeyeca entšanga tšabe soyënga jtsamana, chë Bëngbe Bëtsabe bominiñe tšabá yomna soyënga, y ndegombre soyëngnaca. <sup>10</sup> Nýa šmochtsentšena soyënga jamama, Bëngbe Bëtsá oyejuayá chaotsemnana. <sup>11</sup> Chë mo ibetiñe cuaftsiyecá oyenëngbe bacna soyënga tondayama ntsoservénana, y tšëngaftanga chca ndoñe šmattsama. Chamna, chëngbioye š-mochjínýanýiye chënga ndoñe tšabá tmonjamama.

<sup>12</sup> Ndegombre, nýe chë ndayá chënga mo iytemencá tmojamama jóyebuambayama ya cuantsëuatja; <sup>13</sup> pero nýetsca soyënga binýniñe tmojacá ora jtsopodénana tšabá jinýama ntšamo ndegombre tomncá. Cachcá, ntšamo entšanga tmojamcá chë binýnayá chaojinýanyé ora, echantsopodena jtsotatšëmbuama ntšamo chë soyënga yomnana; <sup>14</sup> er ndayánaca binýniñe tojtsinýinýena, jtsopodénana jinýama ntšamo ndegombre chë soye tomncá. Cachcá, ntšamo entšanga iytemencá tmojtsamcá chë binýnayá chaojinýanyé ora, chënga mochántsetatšëmbo bacna soyënga imojtsamama. Chiyeca mëntšá jtsichámuana:

Botamana cochjájuaboye, aca ndoñe quecátobena jenomándana, mo canýa cuaftsomañcá;  
chë bacna soyënga ama causa, Bëngbe Bëtsabe bominiñe mo obanëngcá imomnënguentšana šmochtsojuánañe,  
y Cristo acbe juabnënga echantsebínýnaye ca.

<sup>15</sup> Chcasna, šmochtsantješna ntšamo tšabá yomncá jtsamëse chašmotsiyenama. Ndoñe šmattsiyena jtsamëse, mo chë Bëngbe Bëtsabe soyëngama ndosertanëngcá, pero aiñe chë chca soyëngama osertanëngcá. <sup>16</sup> Lempe ntšamo chašmojobenacá nýets

tempo tšabe soyënga šmochtsama, er quem tempo entšanga yapa bacna soyënga montsama. <sup>17</sup> Ntjeno-juaboycá ndoñe šmattsama, mo chë ndosertanëngcá. Pero aiñe bëtscá šmochtsentšena ndayá Bëngbe Utabná jamama yobošcá chacmósertama. <sup>18</sup> Ndoñe šmattsótmenaye, er chë soye entšábioye juanatsana jenomándama ndoñe chaondëtsoobenama; chamna, š-mochjama Uámana Espiritu sempre y bëtscá tšëngaftangbe ainaniñe chaotsemándama. <sup>19</sup> Šmochjenatšëtsaye Salmos librëšañe enduábemana cantënga jacántase, Jesucristbe soyëngama cantëngaca y chë Bëngbe Bëtsabe Espiritu inétsama tšëngaftanga chašmotsobena jacántama soyëngaca; chca, nýets ainánaca Bëngbe Utabnabiama šmochjacántaye y cha š-mochtsatschuanaye. <sup>20</sup> Nýets tempo y lempe ntšamo cha tojamama Bëngbe Bëtsá chë Taitá šmochtsatschuanaye, Bëngbe Utabná Jesucristbiajana.

**Ntšamo yomna canýe yebnentšënga chamotsemnana**

<sup>21</sup> Nýetscanga šmochtsenëyeunana, tšëngaftanga Crístbioye puerte šmorrespetánayeca.

<sup>22</sup> Shémanga, šmochtsetátšëmbo tšëngaftangbe boyanga chë yebnentša mándayënga imomnana; y nýets tempo chca šmochtsama, Bëngbe Utabná chašmotsobedecénama. <sup>23</sup> Er boyá endmëna shembe mandayá y inýená, ntšamo Cristo chë ošbuáchiyëngbe mandayá y inýená endmëncá. Cha chënga tojatsebacá y mora cha chënga entsamënda, mo chë bestšaše nýets cuerpo jtsemandayancá; <sup>24</sup> y chca, ntšamo chë ošbuáchiyënga, Cristo chëngbe amëndayá yomnana imotatšëmbcá y chca jtsamana, cachcá, chë shemágnaca entsamna jtsemnana nýetsca soyënguñe chëngbe boyángaftaca.

<sup>25</sup> Boyanga, tšëngaftangbe shémanga š-mochtsababuánýeshana, ntšamo Cristo chábeñe osbuáchiyënga yojanababuanýeshancá, y chca, chabe derecho vida jtsobomñama cachcá tojanonýa y chëngbiama tojanóbana. <sup>26</sup> Chca tojanma, chënga chabe entšanga y puerte tšábënga jábiamama; y chënga tmojánenabaye ora, tmojaninýanyé Bëngbe Bëtsá chëngbe bacna soyënga tojánabuajuanama, y chabe delante tšábënga chamotsemnana cha tojanmama. Cha chca tojanma, er chënga chábeñe imojtsanošbuaché, chabiama buayenana soyënga tmojanuena ora. <sup>27</sup> Cha chca lempe tojanma, chë ošbuáchiyënga japróntayama corente tšábënga y uámanënga cachabiama chamotsemnana, ndocna bacna soye ndobomnënga, ni ndocna entšá chaondobená jayanama chënga imomna chë ndoñe tšabá tmonjamënga ca, ni ndocna inýe cachca sóyeca. <sup>28</sup> Ntšamo canýe boyá cachabe cuerpo endbetsebobonshancá, cachcá cha bontsemna chabe shëmbioye jtsebobonshánana. Nda chabe shëmbioye tbojtsebobonshana, cachábioye jtsebobonshánana, er chata cánýiñe jtsemnana mo nýe canýe entšá cuenta. <sup>29</sup> Er ndocná cachabe cuerpo jtsáboyënjana, ndayá saná janguangoñana y jtsinýenana, ntšamo Cristo bënga chë ošbuáchiyëngaftaca endbetsamcá; <sup>30</sup> er bënga nýetscanga cánýiñe mond-

mëna mo chabe cuerpo cuaftsemncá, y bënga mo chabe cuerpentša soyënga cuaftsemncá. <sup>31</sup> Ntšamo Bëngbe Bëtsabe uabemana palabrengüiñe endayancá: “Chíyeca, boyabása chabe taitá y chabe mamá echanjésabashejuana chabe shémaftaca jenútanama, y chë útata mo canýacá bochántsemna ca.” <sup>32</sup> Chë soyënga josértama puerte totcá comna, pero atše šcuayana, chë soye entsoyebuambná ntšamo Cristo chábeñe ošbuáchiyëngaftaca yomnama. <sup>33</sup> Pero morna, tšëngaftanga cada ona cachabe shémbioye chabotsebobonshana, ntšamo cachá iuenobobonshancá, y shema boyábioye ndoñe stëtšoye chabondëquedá.

**6** Básenga, Bëngbe Utabnáftaca cánýiñe mo canýacá bëtsemnayeca, tšëngaftangbe bëtset-sangbioye šmochtsayaunana, er chca jamana tšabá endmëna. <sup>2</sup> Moisesbe leyíñe canýe mando endmëna, y chentše endmëna chë Bëngbe Bëtsabe natsana mando, ndayentše cha tojašbuachená tšabe bendicionënga jamama: “Acbe taitá y acbe mamá ndoñe stëtšoye catjéftsaquédaye, <sup>3</sup> tšabe vida chacuetsobomñama y quem luarentše bayté chacuetsiyenama.”

<sup>4</sup> Taitanga, ndoñe šmattsama tšëngaftangbe básenga chautënama; más tšabana, chënga š-mochtsabéchaye jtsabuátambayëse y jucácanëse, ntšamo Bëngbe Utabná endbetsabuatambaycá.

<sup>5</sup> Tšëngaftanga, chë nyets tempo nye ínýabiama oservënënga, tšëngaftangbe nduiñënga šmochtsayaunana; chca šmochtsama puerte respétoca, bëtscá cuedádoca y nyets ainaniñe tšabe juabnéngaca, mo cach Crístbioye cuaftseservencá. <sup>6</sup> Y chca chë nduiñëngbioye šmochtsaservena, ndoñe nye chënga chacmojtsénýa ora, mo nda nye entšangbe delante tšabá joquédama cuaftsebošcá, ndayá Crístbe oservenëngcá, chënga nyets ainánaca jtsamana ntšamo Bëngbe Bëtsá tojtsebošcá. <sup>7</sup> Nyetsca trabajotémënga šmochtsama nyets tšëngaftangbe añémoca, mo Bëngbe Utabnabiama cuaftsetrabajacá, y ndoñe nye entšangbiama. <sup>8</sup> Er tšëngaftanga ya šmondétatšëmbo, cada ona, nyets tempo nye ínýabiama trabajayá o nye cachabiama trabajayá tomna, ntšamo tšabe soyënga tojamcá Bëngbe Utabnábiocana yochjójyëngacñe.

<sup>9</sup> Y tšëngaftanga, ndëmuanýengbiama ínýenga nyets tempo imoservena, cachcá tšabá chëngaftaca šmochjamna, tondayama ntsaútatjnyëse. Šmochtsenójuabnaye, Bëngbe Utabná chë celoca endmëná, tšëngaftanga y chëngbe mandayá yomnama, y chabiama nyetscanga cachcá monduámana.

### Ndayá Bëngbe Bëtsá entšanga tojatsatá Satanasbiama jenéuyanama

<sup>10</sup> Y morna, Bëngbe Utabnáftaca cánýiñe mo canýacá jtsemnëse, ainaniñe bëtš añemo šmochtsenomna, chë Bëngbe Utabnabe bëtš obenanentšana óbocana añemo. <sup>11</sup> Mo canýe soldadcá, ba soyënga jtochëtjuana chë tmojtsentsjananga ora uayayëngbiama jenéuyanama, tšëngaftangnaca cachcá, nyetsca chë Bëngbe Bëtsá cmojatšatá soyëngaca šmochtse-

prontana jenéuyanama, tšëngaftanga jáingñama Satanás ntšámnaca tojtsama ora, ndoñe chacmondáyënanama. <sup>12</sup> Er bënga ndoñe quemuatenojuerzana cach quem luarentša entšangaftaca jenéýënanama, ndayá bacna espíritënga mando bomnéngaftaca; bacna espíritënga obenana bomnéngaftaca; y quem luarentša entšanga, chë bacna juabna bomna causa y Bëngbe Bëtsabe soyënga nduabuatma causa, mo ibetiñe cuaftsoyencá oyena entšangbioye amëndaye espíritëngaftaca; y chë tsbanánoca luarëngüiñe imomna y bacna soyënga chaotsebínýnama ama espíritëngaftacnaca. <sup>13</sup> Chíyeca, lempe ntšamo Bëngbe Bëtsá cmojatšatacá šmochjójyëngacñe y chë soyënga jtsamëse š-mochtsiyena jtseprontánama, mo canýe soldado jenéuyanama y jáyënanama bëtscá soyënga tojtochëtjácá. Chca šmochjama, chë uayayá Satanás tšëngaftangbioye jáingñama chaojtsama ora ndoñe chacmondáyënanama, y jenéuyanama lempe jtsamëse, chašmobená cha jayënanama.

<sup>14</sup> Mo canýe soldadcá, jabuache jtsanayana y cochaca canýe morocho soye jenácochjatsana jtsevalentiana y ndoñe chamondëyënanama, tšëngaftangnaca cachcá, ntšamo ndegombre yomncá jtsamëse šmochtsiyena, mo chë jabuache cuaftsnacá, y chë Bëngbe Bëtsabe bominiñe tšabá yomna soyënga jtsamëse, mo chë morocho soye cochaca cuafjenacochjatscá, chca, Satanás tšëngaftangaftaca tondaye chaondobená jama. <sup>15</sup> Mo canýe soldadcá jtoshecochëtjuana betscó jobónjuama jtseprontánama, tšëngaftangnaca cachcá, Bëngbe Bëtsabe obenánaca sempre šmochtsenprontana jtsabuayiyayama ntšamo Bëngbe Bëtsá inétsama entšanga tempcá tšabá cháftaca chamotsatsmënama. <sup>16</sup> Canýe soldado escudo jtsebomnana chë uayayabe uajuinýinýana flechëjuangá chabe cuerpiñe ndoñe chaonduámashënguama. Cachcá, tšëngaftanga cmontsamna Jesucristbeñe puerte jtsošbuáchiyana, mo escudo cuaftsebomncá, chca, chë bacna soyënga mandayá Satanás tšëngaftangaftaca tondaye chaondobená jamama, tšëngaftangbe osbuáchiyana jabuajuánama cha tojtsama ora. <sup>17</sup> Mo chë soldadcá, canýe morocho buchtsanëse tojtabuchëtšëse chabe bestšaše jenéuyanama, tšëngaftangnaca cachcá, sempre šmochjésejuabnaye Bëngbe Bëtsá cmojätsebacama, y chë juabna cmochanjújabuache, mo canýe morocho buchtsanëse cuaftsabuchëtšancá. Mo canýe soldadcá, chë uayayábioye jayënanana, chabe espadéjaca japéliase, cachcá tšëngaftanga, Bëngbe Bëtsabe palabra šmochtsóyebuambnaye Satanás jayënanama. Uámana Espiritu jtsamana, tšëngaftanga Bëngbe Bëtsabe palabra chašmotsebomnana. <sup>18</sup> Nyets tempo chë Uámana Espiritbe uajabuáchenanaca Bëngbe Bëtsáftaca šmochtsencuëntaye, lempe ntšamo Bëngbe Bëtsáftaca jencuëntama yomncá y chábioye jtseimpadánëse. Yejuana šmochtsenójuabnaye ntšamo šmojtsichámuama, Bëngbe Bëtsáftaca chašmojtsencuënta ora, y chca šmochjama Bëngbe Bëtsábeñe sempre jtsobátmanëse, y Jesucrist-

beñe ošbuáchiyëngbiana nÿetscangbiana cha š-mochtseimpadana.

<sup>19</sup> Atšbiámnaca Bëngbe Bëtsá šmochtseimpadana, atše jóyebuambayama chajontsé ora, cha chë buayenana soye chašúyanama; y atše chayobená ton-dayama ntjatauatjca jóyebuambayana, y chca, entšanga chayinÿanÿé Jesucristbiana tšabe noticiënga, ndayá chënga tempo ndoñe monjántatšëmbo.

<sup>20</sup> Bëngbe Bëtsá šojichmó mo canÿa chabe cuenta oye-buambayacá, chë buayenánama entšangbeñe jóyebuambayama, y chca bétsamama, mora atše utamená séntsemna. Atšbiana Bëngbe Bëtsá šmochtseimpadana, atše chayobenama Cristbe buayenánama ton-dayama ntjatauatjca jóyebuambayana, ntšamo atše jamama šojtsemncá.

#### Pablo chënga jtadiósoftanama

<sup>21</sup> Tíquico, Jesucristbeyeca bëngbe bonshana catšata y canÿe entšá tšabe palabra bomná, Bëngbe Utabnabe

trabajo jamama oservéniñe, ntšamo atše stsemnama y ndayá stsamama tšëngaftanga chašmotsetatšëmbuama, lempe cmochanjácuntaye. <sup>22</sup> Chama cha tšëngaftangbioye sënjichmó, ntšamo muentše fstsemnama chacméyanama, y tšëngaftanga ainaniñe añemo chašmotsebomnama chaomama.

<sup>23</sup> Atše séntseimpadana Bëngbe Bëtsá chë Taitá y Bëngbe Utabná Jesucristo, chaboma chë Jesucristbeyeca catšátangbe ainaniñe tšabe ebionana chašmotsebomnama, y Bëngbe Bëtsábioye y ínÿengbioye puerte chašmotsababuánÿeshanama, Jesucristbeñe tšëngaftangbe ošbuachiyánaca; <sup>24</sup> y chaboma, chë Bëngbe Utabná Jesucristbioye bëts bonshanánaca imobobonshanëngbeñe tšabe bendicionënga chaotsemnama, canÿe ndocná yondobena jatrócama bonshanánaca.

# Filipeneses

## Jacheuayama

**1** Pablo y Timoteo, Jesucristbiamna oservénata, quem tsbuanácha fséntsabiamná Filipos bēts puebloca Bēngbe Bētsabe entsānga imomnēnga, y Jesucristoftaca cánŷiñe mo canŷacá imomnēngbiamna. Fséntsabiamná nŷetsca chē Jesucristbeñe osbuáchiyēngbiamna, nŷetsca chentša uanatsanéngaftaca y chē inŷe ošbuáchiyēnga ujabuáchaniñe trabajyéngaftaca. <sup>2</sup> Atše séntseimpadana Bēngbe Bētsá Bēngbe Taitá y Bēngbe Utabná Jesucristo, chaboma tšēngaftangbeñe tšabe bendicionēnga chaotsemnana, y chaboma tšēngaftanga ainaniñe tšabe ebionana chašmotsebomnana.

### Pablo Bēngbe Bētsábioye tbojtanchuá ošbuáchiyēngbiamna

<sup>3</sup> Cada tšēngaftangbiamna stenojuabó ora, Bēngbe Bētsá tšēngaftangbiamna sēndbētsatschuanaye; <sup>4</sup> y Bēngbe Bētsá tšēngaftangbe tšabiamna stseimpadana ora, atše corente oyejuayá chca sēndbētsama, <sup>5</sup> ntšamo tšēngaftanga atše šmojuájabuachama, tšabe noticiēnga Jesucristbiamna entsānga abuayinayañe, tšēngaftanga Jesucristbeñe jtsošbuáchiyama šmonjanbojatšé orscana y méntscōñama. <sup>6</sup> Atše corente séntsetatšēmbō, Bēngbe Bētsá tojanbojatšé tšēngaftangbe ainaniñe tšabe soyēnga jtsamama, y más tšabe soyēnga yochtsamama. Y chca yochtsama, lempe ntšamo tšēngaftangbiamna cha yojtsejuabnacá chaochnēnguēntscuana, y chca, Cristo Jesús yochjésabēntscuana. <sup>7</sup> Atše tšēngaftangbiamna sempre ainaniñe sēndbētsenojuabnaye, chíyeca atšbiamna puerte tšabá entsemna chca tšēngaftangbiamna jtsejuabnayana. Tšēngaftanga nŷetscanga atše šmonjuájabuache jamama chē Bēngbe Bētsá tša tšabia bētsemnayeca šonjanēntšabuaché trabajo. Atše chē Bēngbe Bētsabe trabajo sēndbomna jamama, mora séntsētámēna ora o natjēmbana shjoca stsana ora, nŷetscāngbioye tšabá inŷinŷayañe chē tšabe noticiēnga ndegombre soyēnga bētsemnana, y bētscá amiñe entsānga chē soyēnguiñe corente chamotsošbuáchema. <sup>8</sup> Bēngbe Bētsá yotátšēmbō ntšamo séntschamcá ndegombre bētsemnana. Atše tša séntseboše tšēngaftanga jáñyama y cbontsababuanŷeshana cachcá ntšamo Cristo Jesús atše šondbobonshancá. <sup>9</sup> Atše, Bēngbe Bētsá séntseimpadana tšēngaftanga cada te más cha chašmotsebobonshánama y chē inŷyēngbioynaca, chca, osertá-

nana chašmotsebomnana ndayá chē ndegombre soye bētsemnana jtsetatšēmbuama, y chašmotsetátšēmbō ndayá tšabá o ndayá ndoñe tšabá tondmēnana; <sup>10</sup> y chca, chašmotsobena sempre jabocacayama chē puerte tšabá yojtsemna jamama soye. Chca, Cristo yochjésabo ora, tšēngaftanga puerte tšabe vida šmochántsebomna, bacna soyēngaca ndēmandánēnga; y tondaye quešmochátama, chora chē entsānga chca ndoñe tšabá quenátsmēna ca chamuátichamua-ma. <sup>11</sup> Y lempe ntšamo chašmojtsamcá ndegombre tšabá echántsemna, y nŷe Jesucristo endobena jamama entsānga chca chamotsamama. Nŷetsca chē tšabe soyēnga echántsemna, Bēngbe Bētsá puerte bētsá y uamaná bētsemnana jinŷanŷiyama.

### Atšbe vida endmēna Cristo jtse servénama

<sup>12</sup> Jesucristbeyeca atšbe catšátanga, atše séntseboše tšēngaftanga chašmotsetátšēmbō, ntšamo atše tijapasama, más bētscá entsānga Jesucristbiamna tšabe noticiēnguiñe chamotsošbuáchema tojoservema.

<sup>13</sup> Chca, nŷetsca chē romanēngbe mandadbe bēts yebna bojanŷá soldadēnga y chē inŷe entsānga quem luarentše montsetátšēmbō atše utamená stsemna, atše Cristbiamna tstrabája causa. <sup>14</sup> Atše utamená séntsemnayeca, ošbuáchiyēnguēntšana banga ainaniñe más añemo montsebomna, y chíyeca chēnga Bēngbe Bētsabe palabra más y más añémoca y tondayama ntjatauátjá entsāngbioye montsabuyayná.

<sup>15</sup> Ndegombre entsemna, báseftanga Cristbiamna entsāngbioye imojtsabuayayná, pero chēngna nŷe ntšamo tijashjachcá šmojtsántšabošama chca, y chēnga imojtseboše, bētscá jtsamēse, atše chayotjáyana-ma; chíyeca chca imojtsama. Pero inŷyēngna, entsāngbioye montsabuyayná tšabe soyēnga inŷyēngbiamna jamama ndegombre imojtsebóšeyeca. <sup>16</sup> Mēnga chca montsama, atše šmondobonshánayeca y Bēngbe Bētsá chē trabajo šojanēntšabuáchema mondétatšēmboyeca, Jesucristbiamna tšabe noticiēnga ndegombre bētsemnana entsānga jtsinŷanŷayana; <sup>17</sup> pero chē inŷyēngna chca imojtsama, ndoñe tšabe soyēnga inŷyēngbiamna imojtsebóšeyeca, ndoñe chēnga chē inŷyēngbiamna tšabe soyēnga imojtsebóšeyeca. Chēnga Jesucristbiamna imojtsoyebuambná nŷe entsānga chēnga chamotsarrespetánama, y nŷe cachēngbiamna tšabe soyēnga jtsebomnana imojtsebóšeyeca. Chēnga jtsejuabnayana mochjobenaye jamama atše más chašot-sengmēnana ca, muentše utamená chjēftsemnēntscuana, chēnga entsāngbioye chca tmojtsabu-



atambá ora. <sup>18</sup> Pero ¿ndayase chë soye atšbiamá? Masque ntšámnaca, tšabe soyënga ínÿengbiamá tmojtseboše o ndoñe, Cristbiamá montsoyebuambná, y Cristbiamá chënga montsoyebuambnama atše oyejuayá séntsemna.

Y cabá más chanjóyejuaye, <sup>19</sup> er atše séntsetatšëmbo quem utámenentšana atše chjésebocnama. Atše séntsetatšëmbo muentšana chjésebocnama, tšëngaftanga Bëngbe Bëtsá šmoimpadánayeca y Jesucristbe Uámana Espíritu šuajabuachánayeca. <sup>20</sup> Atše corente jtsošbuáchiyëse Bëngbe Bëtsábeñe sëndobátmana, atše ndocna te tondaye chanjéftsema y chama chjaisëuatjama, pero aíñe nyetscangbe delante becá añémoca chayoyebuambá, y nyets tempo pero más mora, lempe ntšamo stsamama y stschámuama, atše chaima entšanga chaminÿanÿema Cristo puerte bëtsá y uamaná bëtsemnama, y chca chántsama masque ainá o obaná chaitsemnëse. <sup>21</sup> Chca entsemna, er atše vida Cristo jtseservénama endmëna, y nderado atše chajóbanëse, nyetscanga puerte bëts soye mochanjéftšashjache. <sup>22</sup> Pero atše ainá stsemnëse, chanjobenaye más uámana trabajo Cristbiamá jéftsemama. Chíyeca, atše ndoñe corente quetsátstatšëmbo ntšamo mora jobuáyanana, ainá jtsemnama o ndoñe. <sup>23</sup> Ndegombre mora puerte šontsëtëmnana ntšamo jobuáyanana: atše tša sëndboše ndoñe más quem luarentše ntjéftsemnana, Crísoftaca jtsatsmënama, y ndegombre chca atšbiamá puerte tšabá nántsemna; <sup>24</sup> pero, ínÿoicana tšëngaftangbiamá šontsemna ainá jéftsemnana. <sup>25</sup> Atše corente séntsetatšëmbo chca ndegombre yochtsemnama, y chíyeca séntsetatšëmbo atše cabá ainá chjéftsemnama, tšëngaftanga jujabuáchama más Jesucristbeñe chašmotsošbuáchema, y chíñe bëtscá oyejuayana chašmotsebomnama. <sup>26</sup> Chca, atše tšëngaftanga jutsëtsayama choye chajá ora, chašmobená inÿe soyama más Cristo Jesús jëtschuayama.

<sup>27</sup> Morna, chë más uámana soye entsemna, tšëngaftanga chašmotsama ntšamo jtsiyenama ntšamo chë Cristbiamá tšabe noticiënguiñe endayancá. Y mëntšá, cachcá, jutsëtsayama chajá o ndoñe, atše chántsetatšëmbo tšëngaftanga Jesucristbeñe osbuáchiyama ndoñe šmontsajbanama, y aíñe becá osbuáchiyana chábeñe šmotsobomñama; nyetscanga cachcá šmojtsejuabnáyeca y nyetscanga cach soye šmojtsebošeyeca, cánÿiñe nyetscanga enutanánënga jtseñojuerzánëse, ndocná chë tšabe noticiënguiñe tšëngaftanga šmobomna ošbuáchiyana chacmondábuaJuanama. <sup>28</sup> Tšëngaftangbe uayayëngbiamá tondayama šmattsauatja, sempre bëtscá añemo šmochtsebomna. Chca tšëngaftanga šmochanjínÿanÿiye chënga pochocánënga mochtsemnama, y tšëngaftangna atsebácanënga šmochtsemnama. Y chë soye Bëngbe Bëtsá tšëngaftangbiamá echántsama, Crístbeñe šmošbuachéyeca. <sup>29</sup> Chca echanjopása, er Bëngbe Bëtsá tšëngaftangaftaca puerte tšabia endmëna, Cristbiamá oservénënga Bëngbe Bëtsá tcmojábiamá, pero ndoñe nÿe chábeñe chašmotsošbuáchema, ndayá

chabiamá chašmosufrímnaca. <sup>30</sup> Tšëngaftanga y atše cachca soyama montsenojuerzana. Tšëngaftanga ya šmonjinÿe ntšamo atše sënjánenojuerzana, entšanga jinÿanÿiyama chë tšabe noticiënga ndegombre soyënga bëtsemnama. Y mora, tšëngaftanga noticiënga šmochanjóyëngacñe ntšamo atše cach soyama cachcá stsamama.

### Ndoñe uámanënga šmattsenobiamnaye, ntšamo Cristo ndoñe tonjanmcá

**2** Tšëngaftanga, Crísoftaca cánÿiñe mo canÿacá jtsemnëse, ainaniñe bëtscá añemo šmontsebomna. Cristo cmondábabuanÿeshana, y chë soye tšëngaftanga cmontsëjabuachana nyetsca trabajënguentšana tšabá jabocanama. Y tšëngaftanga Cristbe Espíritoftaca cánÿiñe mo canÿacá šmontsemna; tšëngaftanga nyetscanga šmondënbobonshana y nyetscangbiamá jóngmiamá šmondumana. <sup>2</sup> Tšëngaftanga lempe chca šmobómnyayeca, atše corente oyejuayá šmochjábema, er tšëngaftanga nyetscanga cachcá cánÿiñe šmondëjuabná, cachcá nyetscanga šmondënbobonshana, nyetscanga mo canÿe ainancá šmondobomna, y nyetscanga cachca soye šmondboše. <sup>3</sup> Tondaye šmattsama nÿe ínÿenga chë sóyeca chamotjáyanama, o nÿe tšëngaftanga tša bëts soyënga amënga šmomna ca entšanga chamotsejuabnama; pero ndoñe yapa uámanënga šmojtsemna ca šmochtsejuabnaye, y cada ona chaotsejuabná chë ínÿenga bëngbiamá más uámanënga imomnama. <sup>4</sup> Y ndocná tondaye chaondétsama, nÿe chabiamá tšabe soyënga jónÿenama, sinó ndayánaca chaotsama nyetscangbiámnaca tšabe soyënga jónÿenama.

<sup>5</sup> Tšëngaftanga cmontsamna jtsemnana ntšamo cach Cristo Jesús yojanjuabná y yojanamcá:

<sup>6</sup> Cha nyets tempo yomna cach Bëngbe Bëtsacá y uamaná cach Bëngbe Bëtsacá, pero masque chca, ndocna te yonjanjuabná: “Atše séntseboše nyetsca entšanga nyets tempo atše chašmotserrespetana, ntšamo atšbe Taitá Bëngbe Bëtsá mondërrespetancá ca.”

<sup>7</sup> Pero cha mo nduamanacá tonjanóbema, nyetsca chabe bomna soyënga jéftseboshjonëse, y ndegombre, mo canÿe oservenacá tojanóbema. Cha canÿe entšacá tojanonÿná, y entšanga canÿe ndegombre entšacá tmojáninÿe.

<sup>8</sup> Cachá tojanlesenciá nduamaná jtsemnama, y sempre Bëngbe Bëtsábioye ibnayeunana, y jobanámnaca, cruciñe jóbánëse.

<sup>9</sup> Ndayá cha tonjanmama, Bëngbe Bëtsá, chë celoca más uámana luare tbojaninÿinÿé y chë más uámana uabaina, chë más bëtsetsangbe uabainënguentša uabaina tbojabuajo;

<sup>10</sup> y chca, celoca imomnënga, y quem luarentše y fshantse jashenoye imomnëngnaca nyetscanga chamóshamentšema,

Jesúsbioye jëtschuayama, chabe uámana uabaina jayanëse;

<sup>11</sup> y chca, nÿetscanga chamuayana Jesucristo chëngbe Utabná yomna ca, chca, Bëngbe Bëtsá chë Taitá nÿetscanga chamot-satschuanama.

### Cristbeñe ošbuáchiyënga entsamna mo buash-inÿinÿana estrellëngcá jtsemnana

<sup>12</sup> Chcasna, atšbe bonshana catsátanga, ntšamo atše tšëngaftangftaca sënjamna ora, atše sempre šmon-janëyeunancá, mora más šmochtsatëñeyeunana, mora atše tšëngaftangbiama bënoca stsemna ora. Bëtsët-sanga ntjatenobiamnacyá y Bëngbe Bëtsá jtserrespetánëse šmochtsama soyënga, chca, tšëngaftangbe tšabe videntše, Jesucristbeñe ošbuáchiyënga quetsomñecá, tondaye chacmondëtsabuáshebenama; <sup>13</sup> er Bëngbe Bëtsá nÿets tempo tšëngaftangbe ainaniñe in-étsama tšëngaftanga ndayánaca chašmotsebošama y chašmotsamama, ntšamo cha yojuabná y yobošcá chaotsemnana.

<sup>14</sup> Ndayánaca jamama chacmojtšéjaboto ora, chë soye šmochjama, chca jamama yapa totcá comna ca ntjatichamcá y inÿengaftaca jabuachana ntjatenatsët-snacyá. <sup>15</sup> Chca cmontsamna, chca, tšëngaftanga šmojt sama soyënguiñe ndocná ndocna bacna soye chaondinÿenama, y puerte tšabe vida chašmotsebonnama. Bëngbe Bëtsabe puerte tšabe basengcá š-mochtsiyena, tšëngaftanga chë šmojtsemnënga canÿe luarentše puerte bacna entsángbeñe y sempre bëtscá bacna soyënga jtsamana uamanéngbeñe. Chíyecna, tšëngaftanga šmochtsiyena puerte tšabe soyënga jtsamëse, y chca tšëngaftanga šmochántsemna mo canÿe ibetiñe luarentše buashinÿinÿana estrellëngcá. <sup>16</sup> Chë tšabe soyëngaca entsángbioye chauinÿanÿé ntšamo muanjobenaye tšabe vida jtsebonnama. Chca chašmojamëse, Cristo cachiñe yochjésabo ora, atše chant sobena tšëngaftangbeyeca puerte oyejuayá jtsemnana, er ntšamo chašmojamcá echanjínÿanÿiye atše ndoñe nÿe bonamente jabuache tijatrabajá. Chca atše chántsemna mo nda bëtscá tojoprontá, y chentšana inÿengaftaca tojótjajo ora, chëngbioye tojt-sayëñjanacá. <sup>17</sup> Mo chë altaroca canÿe bachna buiñe tojuabuashanacá, Bëngbe Bëtsá jëtschuayama tmojó-ba ovesháftaca, cachcá nderado echántsemna atšbe buiñe, atše šmojóbase, chca, Bëngbe Bëtsábioye oyejuayá jabemama. Tšëngaftanga bëtscá šmojalemošná, Cristbeñe tša šmošbuachéyeca, y tšëngaftangbe ošbuachiyánëna endmëna Bëngbe Bëtsábioye oyejuayá jabemama. Chë uta soye echántsemna mo chë buiñe y chë oveshacá, Bëngbe Bëtsábioye oyejuayá jabemama. Atše chca stjobanëse, puerte oyejuayá stsemna, y stjama tšëngaftangnaca cachcá chašmot-sóyejuama. <sup>18</sup> Chca, tšëngaftanga cmontsamna oyejuayënga jtsemnana, y šmochjama átšnacá oyejuayá tšëngaftangftaca chaitsemnana.

### Timoteo y Epafrodito

<sup>19</sup> Atše becá ošbuachiyánaca Bëngbe Utabná Jesús-beñe jtsobátmanëse, sëntsejuabná pronto chjobenaye Timoteo tšëngaftangbioye jíchmuama, tšëngaftangbiama chašuabocuéntama, y chca, atše más añemo chaitatsatbomnama. <sup>20</sup> Er nÿe cha endmëna canÿa cach atšcá ainaniñe juabnayá, y cha ndegombre puerte entseboše tšëngaftanga tšabá chašmuetsiyenama; <sup>21</sup> chë inÿengna nÿetscanga nÿe cachëngbe tšabiamna ndayánaca jamama jtsejuabnayana, y tondaye ntsebošana Jesucristbiama jamama. <sup>22</sup> Pero cach tšëngaftanga ya šmondëtatšëmbo, ntšamo Timoteo chë padecena soyënguentšana tšabá tonjët sobocñama, y ntšamo Timoteo y atše, mo canÿe uaquiñá chabe taitábioye cuafstajabuachancá, cánÿiñe fsënjantrabája, más bëtscá entsanga chë tšabe noticiënga chamóyëngacñama. <sup>23</sup> Chcasna, atše sëntsobátmana cha jíchmuana, ntšamo átšeftaca jopásama chaitsetátšëmbo y cachora; <sup>24</sup> pero bëtscá ošbuachiyánaca sëntsobatmanayeca, sëntsejuabná, Bëngbe Utabná chašojtáboc-nëse, pronto átšnacá chjobenaye choye jama.

<sup>25</sup> Atše sëntsejuabná yojtsemna, Jesucristbeyeca bëngbe catsáta Epafrodít naca choye jíchmuana, nda átšeftaca cánÿiñe endëtrabája y chë tšabe noticiënga ndegombre soyënga bëtsemnana jinÿanÿiyama ende-nojuerzana, nda tšëngaftanga šmojanichmó atše chašuabëuájabuachama. <sup>26</sup> Cha chanjíchmu; cha puerte entseboše tšëngaftanga jányama, y yapa ngménaca entsemna, cha šocá enjamna šmojátatšëmbonama. <sup>27</sup> Y ndegombre cha šocá enjamna, y enjët sinÿna mo jtsobanamcá; pero Bëngbe Bëtsá tbonjalastemá, y ndoñe nÿe chábioye sinó átšbioynaca, atše ndoñe más ngmenanënga chayátsbomnama, ntšamo mora sëntsebonnama. <sup>28</sup> Chíyeca atše más sëntseboše cha pronto jíchmuana, as tšëngaftanga cha chašmojtinÿe ora, puerte oyejuayënga chašmotsemnana, y atše ndoñe yapa chašondëtsengmenama. <sup>29</sup> Šmochjofja nÿets oyejuayánaca, Bëngbe Utabnábeyeca catsátanga quetsomñecá; y nÿets tempo chacá amëngbioye mo bëtsetsangcá šmochtsétabna, <sup>30</sup> er batšatema más y matënjët sobana, Cristbiama trabajaiñe uajabuachaniñe. Cha chë trabajo tonjanma atše juajabuáchama, ntšamo cach tšëngaftanga ndoñe chešmatanobenacá, atše juajabuáchama.

### Ndayá Pablëbiama ndegombre corente yojanámana

**3** Y morna, atšbe catsátanga, ndayá Bëngbe Utabná tojamama móyejuanga. Ndoñe bacá quešnatámana, ntšamo chë inÿe tsbuanáchañe tcbon-janëbuabiamcá cachcá cachiñe jtëtëyanama; y chë soye bëtscá cmochanjújabuache ndoñe resjuiñe chašmondëtsemnana. <sup>2</sup> Cuedado šmochtsebonna chë ndoñe tšabe entsangbiama, mo quešëngcá imomnënga, chë puerte bacna soyënga mondbët samënga, y entsangbe más delicadentše base bobachtema jatëtšana uamanënga; <sup>3</sup> er bënga mondmëna y ndoñe

ínÿenga, chë ndegombre uinÿnanánana bomnënga, bënga Bëngbe Bëtsabe entsanguentsënga bëtsemnama, bënga chë Uámana Espíritbe uajabuáchenanaca Bëngbe Bëtsá mondadoránama, bënga chë Cristo Jesúseftaca cánÿiñe mo canÿacá bëtsemnama mond-bëtsoyejuama, y bënga chë ntšamo ínÿenga monduamancá bëngbe cuerpiñe jamama tondayama yon-doservénama mondbëtsejuabnayama.

<sup>4</sup> Masque atše razón sëndëtsóbomñe, ndayá atšbe cuerpiñe tmojamcá ndegombre iuámanama jtsejuabnayama; nderado nda tojtsejuabná razón yojtsebomna chë soyënga yoservena ca jtsejuabnayama, ndegombre atše chabiama más razón chama stsóbomñe.

<sup>5</sup> Sënjanonÿná y posufta tianoye base bobachtema chë más delicadentše šmojtantëtše; atšbe nÿets uta bëtset-sata Israeloca entsanguentsáta bonjamna, y atšna Benjamibe bëtš pamillentsá sëndmëna; atšbe temp-sca bëtš taitanga nÿetscanga hebreunga imnamna. Atšna fariseo sënjamna. Atše sënjánama, lempe ntšamo judiëngbe leyënguñe endayancá, ndayá jamama šojanmëncá. <sup>6</sup> Atše tša sënjánboše Bëngbe Bëtsá jt-seservénama, chíyeca Jesúsbeñe ošbuáchiyënga bëtscá sënjanécamena; y ndayá canÿe entsá ibnëtsemna jtsamama, Bëngbe Bëtsabe bominiñe tšabia jtsemnama, judiëngbe ley jtsocumplínëse, chama ndocná tondaye quenjatsbomna jayanama, atše ndoñe tšabá sentsanama ca.

<sup>7</sup> Pero lempe chca ntšamo atše sënjamnama y ndayá sënjánamama, puerte sënjanjuabná atšbiama puerte yojanámana ca; pero mora, Cristo atšbe ainaniñe tonjámashëngoyeca, chë soyënga atšbiama ya ndoñe quenatámana. <sup>8</sup> Y cabá más, tondaye atšbiama quenatámana, chë bëtš soye jtsonÿayëse, Cristo Jesús, Bëngbe Utabná jtsabuatmana. Chábeyeca, lempe chë nÿe quem luarentša soyënga sënjëseboshjona, y lempe chë soyënga atšbiama tondayama quenátoservena; y chca entsemna, chë bëtš soye jëftsashjáchama, Cristo jtsabuatmama, <sup>9</sup> y cháftaca cánÿiñe mo canÿacá jtsemnama. Atše ya ndoñe quetsatsnguá Bëngbe Bëtsabe bominiñe tšabia jtsemnama, nÿe ntšamo atše tijamama chë judiëngbe ley jtsocumplínëse, pero Crístbeñe jtsošbuáchiyëse aíñe; Bëngbe Bëtsá entsama atše chabe bominiñe tšabia chaitsemnama, atšbe bacna soyëngama jtseperdónase, y lempe chca entsemna atše Crístbeñe sëndošbuachéyeca. <sup>10</sup> Atše sëntseboše ndayá cha jtsabuatmana, chë obanënguentsána tojtayanenama cha tojaninÿanÿë obenana atše chaitsebomnama, atše cháftaca cánÿiñe mo canÿacá chaitsemna ora; y ntšamo bënga játsebocama ora cach Cristo tojansufricá, átsnaca cachcá chaisufrima. Y cha tojanóbana orcá atše chaitsemnama; <sup>11</sup> y ntšámnaca, atše jëftsashjáchama Bëngbe Bëtsá chaoma atše chaitayenama.

**Yejuana jtsentsénëse, Bëngbe Bëtsábiocana uacanánana josháchiñama**

<sup>12</sup> Pero atše ndoñe quetsátichamo lempe chca ya tijashjache ca, o atše ndocna bacna soye ndamá y

puerte tšabia Bëngbe Bëtsabe bominiñe stsemna ca, pero sempre natsanoye sentsá, mo nda canÿe luaroye jashjanguama cuaftsëchamancá; y puerte jtsošbuáchiyëse sentsóbátmana atše chjobenaye jtsemnama, chë ndayama Cristo šojanchembo, er Cristo Jesús ya tonjama atše chabiama chaitsemnama. <sup>13</sup> Atšbe catsátanga, atše ndoñe quetsátichamo chca ya tijashjache ca. Pero chama canÿe soye sentsama: chë tempo atše sënjánbomna y sënjánama soyënga, mora lempe stëtsoye sënjaquedá, y bëtscá sentsama jobenayama chë jashjanguama yojtsemnoye jashjanguama, <sup>14</sup> chë ndëmoca yojtsemna jashjanguama luaroye jobenayama jashjanguama, mo nda canÿe luaroye jashjanguama ndayánaca juácanama bëtscá jenujérase cuaftsëchamancá. Cachcá, átsnaca sentsá chë Bëngbe Bëtsá šojtsachembuana uacanánana josháchiñama, Cristo Jesúsbeyeca; y chë uacanánana entsemna chë nÿetsca tescama yomna tšabe vida jtsebomnana.

<sup>15</sup> Chca bënga šontsamna jtsejuabnayana, chë Jesucrístbeñe puerte ošbuáchiyana y nÿets tempo cha ústonënga; y nderado tšëngaftanga ndayífnaca inÿetšá šmojatsjuabná ora, Bëngbe Bëtsá chë sóynaca tšabá cmochanjínÿanÿiye. <sup>16</sup> Pero morna šontsamna jtsiyenana ntšamo méntscoñama Bëngbe Bëtsabe soyëngama šojosertacá.

<sup>17</sup> Jesucrístbeyeca catsátanga, ntšamo atše sëndmëncá tšëngaftanga šmochtsemna, y chë ntšamo jt-siyenama tcbonjaninÿanÿecá imojtsiyenëngbiyoye šmochtsénÿaye. <sup>18</sup> Ntšamo cbochanjauyancá, ya ba soye tcbonjáuyana y mora cachiñe chca chanjayana, pero chca jayanamna atše puerte ngménaca sëndbëtsemna. Banga mondmëna, y chënga ntšamo vida imojtsebomnama montsinÿinÿná, lempe ntšamo Cristo chë cruciñe jóbaniñe bëngbiama iuayancá contra chënga imojtsemnama, <sup>19</sup> y chëngbiyoye nÿetsca tescama infiernoca mochántsapochocaye. Chëngbiama chë más uámana soye yojtsemna jtsamana ntšamo cachënga tmojtsebošcá, nÿe cachëngbe cuerpiñe tšabá jtsomñama. Chënga nÿa mo bëtš soye cuafjamcá jtsemnana chë soyënga tmojtsama ora, pero ndegombre chënga entsamna cach soyëngama jtsëuatjama; y chënga sempre jësejuabnayana chë nÿe quem luarama enójuabnayëngbe soyëngama. <sup>20</sup> Chë cuenta bëngna, ndegombre celocama entsanga mondmëna, y mora montsobátmana, chë luarocana chauabo bëngbe atsebacayá, Bëngbe Utabná Jesucristo. <sup>21</sup> Cha bëngbe cuerpënga, chë pronto jopochócama cuerpënga echanjátrocaye, jtsemnama mo chabe cuerpcá, chë obanënguentsána tojtayenabe cuerpcá; y cha chca echanjama, cha puerte obenana lempe jtsemándayama bómnyeyeca.

**Bëngbe Utabnáftaca cánÿiñe mo canÿacá jtsemnëse oyejuayana jtsebomnana**

**4** Chcasna, Jesucrístbeyeca atšbe catsátanga, Bëngbe Utabnábeñe ošbuáchiyana ntjajbanacá, y puerte chábeñe jtsošbuáchiyëse, cháftaca cánÿiñe mo

canýacá šmochtsemna. Corente cbondábabuanýeshana y tša séntseboše tšēngaftanga jányama. Tšēngaftangbeyeca atše puerte oyejuayá séntsemna, y atše corente sēndbétsoyejuaye tšēngaftangbiamá ínýēngbioye jáuyanama.

<sup>2</sup> Evodia séntseimpadana y Síntiquenaca, chata chabuatenóyeunama, mo Bēngbe Utabnábeñe osbuachiyata quetsomñecá. <sup>3</sup> Y ácnaca, nda puerte tšabá átšeftaca tconjatrabajá, cbontseimpadana chama chē shembásata chacújabuachama, er chata bētská átšeftaca tbonjatrabajá tšabe noticiēnga entšanga abuayinyañiñe. Clemente y inýe entšanga átšeftaca tmonjatrabajá cach soye amiñe. Nýetsca chēngbe uabaina entšábemana chē librésañe, ndayentše yojsábemana chē tšabe vida mochjónýenēngbe entšangbe uabaina.

<sup>4</sup> Sempre oyejuayēnga šmochtsemna, Bēngbe Utabnáftaca cánýiñe mo canýacá jtsemnēse, y cachiñe šcutétayana: ¡Móyejuanga! <sup>5</sup> Nýetscanga chamotsetátšēmo, tšēngaftanga tšabe juabna bomnēnga šmomonama. Bēngbe Utabná jésabama tempo ya entsobeco.

<sup>6</sup> Tondayama šmattsenócochinýena, pero cada Bēngbe Bētsáftaca chašmojsencuēnta ora, ndayá cmojtšējabotama cha šmochjaimpáda. Y chca chašmojsama ora, chánaca šochtsatschuanaye. <sup>7</sup> Chca, Bēngbe Bētsá echanjama chē chabe ainaniñe tšabe ebionana tšēngaftanga chašmotsebonnama; chē tšabe ebionana puerte bētská endmēna, y bēnga entšanga quetsomñecá ndoñe ntsobenana chama jósertana; y chca tšabe ebionánaca, tšēngaftangbe juabnēnguiñe y ainaniñe tondayama quešmocháteno-cochinýena, er tšēngaftanga cánýiñe mo canýacá Cristo Jesúsēftaca šmondmēna.

#### Lempe ntšamo tšabá yomncá soyēngama jtsejuabnayanana

<sup>8</sup> Cabana, atšbe catsátanga, lempe ntšamo ndegombre yomncá soyēnguiñe šmochtsejuabnaye, lempe chē respeto yomerecēniñe, nýetsca soyēnguiñe entšangbe bominyiñe tšabá yomniñe, nýets tempo corente tšabá yomniñe, nýetsca soyēnga entšanga yogusetániñe, y lempe chē ndayama entšanga tmojtsejuabná tša iuámana ca soyēnguiñe. Lempe chē tšabá yomna soyēnguiñe y jtsatschuanayama yomna soyēnguiñe šmochtsejuabnaye.

<sup>9</sup> Sempre šmochtsama chē átšbentšana šmojuábouinýe soyēnga, chē atšbiajana šmojóyēngacñe soyēnga, chē atše šmojoyeuná soyēnga y ntšamo šmojinýcá atše jtsamana. Chca šmochtsama y Bēngbe Bētsá, chē bēnga ainaniñe tšabe ebionana chamotsebonnama amá, tšēngaftangaftaca echántsemna.

#### Pablo tojtanacheuá tmojanájabuachama

<sup>10</sup> Atše corente sēndoyejuá Bēngbe Utabnáftaca cánýiñe mo canýacá tsmēnama, er tšēngaftanga ba ishinýe chentšana, cachiñe šmojatobená atše jatinyinýiyana ntsachetšá atšbe tšabiana tšēngaftangbiamá iuámanana. Chca, atše ndoñe quetsátichamo tšēn-

gaftanga atšbiamá cmojtsanebnétjomba ca, ndayá ntšamo tšēngaftanga tšabá šmojuabnacá atše jinýinýiyama ndoñe yonjanopodena ca. <sup>11</sup> Atše chca, ndoñe quetsátichamo uajabotá stsemna ca, er atše sēnjuatsjinýe sempre oyejuayá jēftsemnana, nýe ndaye soyiñe masque batšatēmnaca stsebonnēse.

<sup>12</sup> Atše sēndétatšēmo ntšamo yomna jtsiyenana chē vida jtsebonnama uajaboto soyēnga tojtsashbenēse, y ntšamo yomna jtsiyenana chē tcuajabótama más bētská jtsebonnēse. Atše tijuatsjinýe oyejuayá jtsemnana masque nýe ndaye soyēnguiñnaca stsemna ora, jasama bētská stsebonna ora o masque nýe shēntseca jtsemnana šojtsemna ora, atše jtsiyenama bētská soyēnga stsebonnēse o masque ndoñnaca. <sup>13</sup> Atše lempe chca sēndobena, atše obenana jtsebonnama Cristo endbētsamayeca. <sup>14</sup> Masque chcasna, tšēngaftanga tšabá šmonjama, atše padecena soyēnguiñe sēnjamna ora atše juajabuáchana.

<sup>15</sup> Tšēngaftanga, chē Filipos puebloca Jesucristbeñe ošbuáchiyēnga, corente šmondétatšēmo, Macedonia luarentšana sēnjéftsanbozna ora, nýe tšēngaftanga atše šmonjanájabuachama; inýe ošbuáchiyēnga ndoñe. Chora enjamna atšbe bojatšena tempo tšēngaftangbe luarentše chē tšabe noticiēnga entšanga abuayinyañiñe; y nýe tšēngaftanga atše šmonjanájabuache. <sup>16</sup> Ba soye atše Tesalónica puebloca sēnjamna ora, y chašmuájabuachama šonjanájaboto ora, tšēngaftanga atšbe opresidēngama crocēnana šmonjanafja. <sup>17</sup> Chca ndoñe quenátayana atše tsjuabná nýe tšēngaftangbentšana ndayánaca jóyēngacñama ca; chē sóyeca atše séntseboše ndayá tšēngaftanga más tšabe soyēnga chašmotsamama, Bēngbe Bētsá tšēngaftangbiamá más chaotsóyejuama. <sup>18</sup> Er atše ya lempe sēnjóyēngacñe, y chē šjuajabótama cabá más séntsebonna. Atše chē ntšamo šjuajabotcá lempe séntsebonna, chē tšēngaftanga Epafrodítóftaca šmonjanichmó soyēngaca. Ndayá atše šmojanichmocá, Bēngbe Bētsabe bominyiñe puerte tšabá entsemna, mo juatšēmonama ndayá tcojóba y altaroca tcojajuinýe y botamana tojtsonguētšecá, chora cha oyejuayá chca jóyēngacñana. <sup>19</sup> Atšbe Bētsá, chabe bētská uámana y bēts bomnánaca, echanjama tšēngaftanga lempe ntšamo cmējabotcá Cristo Jesusbiajana chašmóyēngacñama. <sup>20</sup> Entšanga nýets tempo chamotsinýanýná Bēngbe Bētsá y Bēngbe Taitá puerte uamaná bētsemnana. Chca chaotsemna.

#### Chēnga jtadiósoftanama

<sup>21</sup> Atšbe cuenta, nýetscanga chē Jesucristbeyeca Bēngbe Bētsábenga imomnēnga šmochjácheuaye. Atšeftaca montsemna Jesucristbeyeca catsátangnaca cmontsacheuaná. <sup>22</sup> Nýetscanga chē muentše Bēngbe Bētsábenga imomnēnga, y más chē romanēngbe mandadbe bēts yebnoca oyenēnga, cmontsacheuaná.

<sup>23</sup> Atše séntseimpadana Bēngbe Utabná Jesucristo, chaoma tšēngaftangbeñe tšabe bendicionēnga chaotsemnana.

# Colosenses

## Jacheuayama

**1** Atše Pablo, Jesucristbe ichmoná Bèngbe Bètsá chca yobóseyeca, y Jesucristbeyeca bèngbe catšata Timotéoftaca, <sup>2</sup> quem tsbuanácha séntsabiamná chë Colosas pueblaca Bèngbe Bètsábenga imomnèngbiana. Tšèngaftanga bèngcá Jesucristbeñe osbuáchiyènga šmondmèna, y chca, Jesucristbeyeca bèngbe catšátanga. Atše séntseimpadana Bèngbe Bètsá Bèngbe Taitá, chaoma tšabe bendicionènga tšèngaftangbeñe chaotsemnama, y chaoma tšèngaftangbe ainaniñe tšabe ebionana chašmotsebonnama.

### Pablo, Bèngbe Bètsábioye tbojanimpadá Colosas pueblaca ošbuáchiyèngbiana

<sup>3</sup> Bèngbe Bètsá, Bèngbe Utabná Jesucristbe Taitá tšèngaftangbiana fstseimpadana ora, cha sempre fchandbètsatschuanaye, <sup>4</sup> er bènga fsenjátatšèmbona ntšamo tšèngaftanga Cristo Jesúsbeñe tša šmojtsošbuáchema, y ntšamo tšèngaftanga nyetscanga chë Bèngbe Bètsábenga imomnènga šmababuányeshanama. <sup>5</sup> Natsanama, chë ndegombre buayenánama, chë tšabe noticiènga, tšèngaftanga tcmojanabuatambá ora, tšèngaftanga botamana šmojanuena ntšamo chë buayenániñe bejtsayancá, chë tšèngaftanga šmojt-sobena tšabe soyama jobátmana, Bèngbe Bètsábeñe jtsošbuáchiyèse. Chë šmotsobatmana soye entsama tšèngaftanga Jesucristbeñe puerte chašmotsošbuáchema y nyetscanga chašmotsababuányeshanama. Bèngbe Bètsá celoca enduaquécjná chë tšèngaftanga šmojtsobatmana tšabe soye. <sup>6</sup> Chë tšèngaftanga tcmojanabuayená tšabe noticiènga más bètscá entsanga montsuenana; y chca, nyets quem luarentše entsanga montsiyena más tšabe soyènga jtsamèse. Chca entsemna ntšamo tšèngaftangbentše tojopasacá, chë natsana te chë tšèngaftanga Bèngbe Bètsabe tšabiánama šmojanuena orscana, y ntšamo Bèngbe Bètsá puerte bonshanánaca y tšabiánaca béngbioye šuanýenama ndegombre cmojanosérta orscana. <sup>7</sup> Y chca Epafras tšèngaftanga tcmojanabuatambá, Bèngbe Bètsabe bonshánama y tšabiánama. Epafras endmèna canýa béngaftaca Cristbiana oservená, y cha bènga fsèndbobonshana; cha Cristbiana endètrabája bèngbe cuenta tšèngaftangbentše. <sup>8</sup> Cha šonjáuyana ntšamo chë Uámana Espíritu yojtsama, nyetscanga Jesucristbeñe ošbuáchiyèngbioye chašmotsababuányeshanama.

<sup>9</sup> Lempe ntšamo tšèngaftangaftaca tojopasama, chë natsana te tšèngaftangbiana fsènjauena orscana y méntsoñama, Bèngbe Bètsá sempre tšèngaftangbiana fchandbètseimpadana, cháftaca fstsencuénta ora. Bèngbe Bètsá fsèndèimpadana, chabe Espíritu chaoma tšèngaftanga chašmotsobena jtsetatšèmbuana y jtsosertánana, chca, ntšamo Bèngbe Bètsá yobošcá chašmotsamama, tšèngaftanga tšabá chašmotsetatšèmbuama. <sup>10</sup> Y chca, tšèngaftanga šmochantsobena jtsiyenana jtsamèse ntšamo Bèngbe Utabná yobošcá, y sempre šmochántsama ntšamo chabiana tšabá yomncá. Ntšamo tšèngaftanga chašmojtsiyencá tšabe soyènga jtsamèse, chentšana nyetsca tšabe soyènga echanjóbcna, y tšèngaftanga más tšabá Bèngbe Bètsá šmochantsábuatma. <sup>11</sup> Atše, Bèngbe Bètsá séntseimpadana, chabe puerte bètscá obenánaca cha chaoma tšèngaftangbe ainaniñe bèts añemo chašmotsebonnama; y chca, tšèngaftanga chë padecena soyènguiñe chašmojtsemna ora, puerte uantadènga chašmotsemnama, y ainaniñe añémoca Bèngbe Bètsábeñe becá chašmotsobátmanama. <sup>12</sup> Y puerte oyejuayènga Bèngbe Taitá šmochántsatschuanaye, nda iuama bènga chamotsobena ntšamo cha chabe entsanga jatšatayama tojašebuachenacá jtsebonnama. Tšèngaftanga šmochanjóyèngacñe ntšamo cmojtsètocancá celoca, chë corente buashinýinýana luar-entše. <sup>13</sup> Bèngbe Bètsá bènga šojatsebacá, Satanás, chë ibetiñe luarentša mandayabe cucuatšentšana, y tojama chë chabe bonshana Uaquiñabe améndayana bèngbe ainaniñe chamotsebonnama; <sup>14</sup> chábeyeca Bèngbe Bètsá Satanásbe cucuatšentšana šojatsebacá; o mèntšá, chábeyeca Bèngbe Bètsá bèngbe bacna soyènga šojtsaperdoná.

### Cristo tojanóbanayeca, entsanga Bèngbe Bètsáftaca tšabá jtsatsmènana

<sup>15</sup> Cristo tmonjáninýe ora, bènga tmojántatšèmbona ntšamo Bèngbe Bètsá yomnana; entsanga imojobena cha jinýama, pero Bèngbe Bètsábioye ndoñe. Cha, chë Bèngbe Bètsabe Uaquiñá, ya natsana yojtsemna lempe chë Bèngbe Bètsá tojanma soyèngama; y cha lempe chë soyèngama más uamaná endmèna. <sup>16</sup> Chábeyeca Bèngbe Bètsá tojama lempe ntšamo celoca y quem luarentše yobinýncá, lempe ntšamo chë entsanga imobena o ndoñe mondobena jinýama soyènga, y chë espíritèngnaca chë imobena ínýèngbioye jtsaméndayana y obenana imobomna. Bèngbe Bètsá, chábeyeca y chabiana tojama, lempe ntšamo

quem luarentše yobinýncá. <sup>17</sup> Bëngbe Bëtsá cabá nyetsca soyënga ndama ora, Cristo ya yojtsemna; y chábeyeca mora yomna, lempe ntšamo quem luar-entše chaotsemnama yojamncá. <sup>18</sup> Cha endmëna nda nyetscanga Bëngbe Utabnábeñe ošbuáchiyënga iuaménda, ntšamo chë bestšaše nyetsca chë cuer-pentša soyënga jtsemandayancá. Cha endmëna nda iuama ošbuáchiyënga tsëm tšabe vida chamotsebom-nama, y cha endmëna chë Bëngbe Bëtsabe más bëts Uaquiñá. Bëngbe Bëtsá tojanma, chë cachiñe ainënga mochtsatsmënguentsana, cha chë natsaná chaot-semnama; nye cha canya chë más uámana luare chaotsebomnama, nyetscañe chaotsemándayama. <sup>19</sup> Er Bëngbe Bëtsá yojanjuabná cachabiana tšabá yojamna, lempe ntšamo cha yomncá, chabe Uaquiñábeñna chaotsemnama, <sup>20</sup> y Bëngbe Bëtsá tojánbošena, Crístbeyeca nyetsca soyënga quem luar-entše y celoca, cháftaca tempcá tšabá chaotsatsmëna-ma. Bëngbe Bëtsá chë soye tojanma, chabe Uaquiñá cruciñe tojanóbana ora y chabe buiñe tojanábuashana ora; y chca, Bëngbe Bëtsá tojanma nyetsca soyënga quem luarentše y celoca, cháftaca tempcá tšabá chaotsatsmënama.

<sup>21</sup> Tempo, tšëngaftanga Bëngbe Bëtsá stëtšoye šmojanquedá y chábioye uayayënga šmojamna, bacna soyënga šmojanjuabná y šmojánama causa; <sup>22</sup> pero mora chabe Uaquiñáftaca, cha mo canye entšacá jóbaneše, Bëngbe Bëtsá tojama tšëngaftanga tempcá tšabá cháftaca chašmotsatsmënama; y chca tojama, tšëngaftanga chabe delante nyets tempo chašmotsemnama; chora tšëngaftanga, chabe entšanga, ainaniñe ndocna bacna soye ndbomnënga chašmotsemnama, y ndocná chaodayana ntšamo šmojamcá ndoñe tšabá yontsemna ca. <sup>23</sup> Pero tšëngaftanga cmontsamna chë bëtscá ošbuáchiyana šmondobomnana nyets tempo jtsebomnana, Bëngbe Utabnábeñe jtsošbuáchiyama ndocna te ntjajbanacá. Nyets tempo chë tšabe noticiënguifne šmochtošbuáchiye, y ndoñe šmatjaleséncia ndocná tšëngaftangbe ošbuáchiyana chaotrocama; y nye chca puerte jtsošbuáchiyëse Bëngbe Bëtsábeñe šmochtsobátmana, ntšamo tšëngaftanga šmojanmcá, Jesucristbiana buayenánama šmojanuena ora. Chë buayenánana endmëna ntšamo ba entšanga nyetsca quem luarentša entšangbioye tmojabuayenacá, y atšbe trabajo endmëna cach tšabe noticiëngama entšanga jtsabuayiyayana.

#### Pablo, ošbuáchiyënga jasérviana trabajo tmojan-bonyé

<sup>24</sup> Atšë corente sënjesoyejuá mora tšëngaftangbiana jasúfriama stsobenama. Ba entšanga entsamna jasúfriana Cristo jasérviana, y atšë sëntsesufrina ntšamo Cristo tojansufricá, mora atšë jtsesufrinëse chabe cuenta, ntšamo jasúfriama yomncá. Y ntšamo sëntsesufrincá entsemna Crístbeñe ošbuáchiyëngbe tšabiana, chë chabe cuerpcá imomnënga, chënga Crístbenga bëtsemnama. <sup>25</sup> Bëngbe Bëtsá atšë šojábe-ma chë Jesucristbeñe ošbuáchiyëngbe canye

ujabuachaná. Cachá chë trabajuama šojanábuayana, chca jamëse, tšëngaftangbe tšabiana chaotsemnama. Chë trabajo endmëna, lempe ntšamo cha tojayancá entšanga jábuayenana. <sup>26</sup> Bëngbe Bëtsá nyetsca entšanga ndoñe tonjanalesenciá, quem luare jobojátšama orscana y nyets tempo chë buayenánama chamotsetatšëmbuama; pero mora, chábënga imomnënga chë soye cha tojinýanyé. <sup>27</sup> Bëngbe Bëtsá yoboše, chabe entšanga imomnënga chamotsábuatma ndayá tempo chënga ndoñe tonjaninýanyecá; y yoboše chë ndoñe judiënga jinýanyiyama tša bëts y tšabe soye yomna chë ndegombre buayenánana, ndayá tempo ínýënga ndoñe tonjaninýanyecá. Chë tempo ndoñe yonjanótatšëmbo buayenánana entsemna, Cristo tšëngaftangbe ainaniñe yojtsiyena, y chábeñe puerte jtsošbuáchiyëse šmojtsoyena jtsobatmanana, Bëngbe Bëtsá puerte bëtšétsanga y uámanënga hácmabiamama, batšá ntšamo cachá yomncá. <sup>28</sup> Bënga nyetscángbioye Jesucristbiana fchandbëtsabuayiyayë; fchandbëtsétsétsnaye ndayá chënga ndoñe yontsamna jtsamana, y fsëndbëtsabu-atambaye nyets osertánanaca ndayá chënga aifne yojtsamna jtsamana, y chca, nyetscángbioye Bëngbe Bëtsabe delante junatsama, puerte ošbuáchiyënga y osertánënga Bëngbe Bëtsabe soyënguifne, chënga Crítoftaca cánýiñe mo canýacá jtsemnëse. <sup>29</sup> Chca chaotsemnama, atšë bëtscá sëndëtrabája; y chca séntsama, chë Cristo yojtsama atšë chaitsebomnama bëts obenánaca.

**2** Atšë sëntseboše tšëngaftanga chašmotsetatšëmbo, Bëngbe Bëtsá becá tsimpadánama, tšëngaftangbioye jujabuáchama, chë Laodicea puebloquënga Jesucristbeñe ošbuáchiyënga y nyetscanga chë ndocna te atšë šmonjinýe ošbuáchiyëngnaca. <sup>2</sup> Atšë chca sëndama, tšëngaftanga y chënga ainaniñe bëts añemo chašmotsebomnama, y cánýiñe mo canýacá chašmotsemanama, nyetscanga jtsenbobonshánëse. Chca, nyets osertánana tšëngaftanga chašmotsebomnama, y chë tempo Bëngbe Bëtsá entšanga ndoñe tonjaninýanyé buayenánama chašmotsetatšëmbuama, y chë buayenánana Crístbe soye entsemna. <sup>3</sup> Mo canye bëtscá bomnana iytémëna soycá pero mora ya uínýenana, cachcá Crístbeñe entsemna nyets osertánana y obenana Bëngbe Bëtsá jtsabuutmama. Chë soye tempo Bëngbe Bëtsá entšanga ndoñe tonjaninýanyé, pero mora Cristo yojtsama bënga chë uámana soyënga chamotsebomnama. <sup>4</sup> Atšë chca séntsichamo, botamana palabrëngaca ndocná chacmondáingñema. <sup>5</sup> Er masque choca tšëngaftangaftaca atšë ndoñe quetsátsmëna, atšbe ainana aifne choca tšëngaftangaftaca entsemna; y atšë puerte sëntsoyejuá tšëngaftanga šmatenýeunanama y nyets tempo Bëngbe Bëtsábeñe šmojtsošbuáchema.

#### Crítoftaca cánýiñe mo canýacá jtsemnëse, entšanga ndegombre tšabe vida jtsebomnana

<sup>6</sup> Tšëngaftanga Jesucristbeñe ošbuáchiyënga šmojanóbiana ora, šmojanayana: "Cristo Jesús, Bëngbe

Utabná entsemna ca". Chcasna, tšëngaftanga cmontsamna jtsiyenana soyënga jtsamëse mo chë cháftaca cánýiñe mo canýacá tojtsemnacá. <sup>7</sup> Chca š-montsobena jamana, cháftaca cánýiñe mo canýacá nýets tempo jtsemnëse. Šmochtsiyena jtsamëse ntšamo cha tojabuatëmbacá y cada te más chca. Cabá más šmochtsošbuáchiye chë Cristbiana buayenana soyëngama, ntšamo tcmojabuatambacá; y Bëngbe Bëtsá sempre šmochtsatschuanaye.

<sup>8</sup> Cuedado šmochtsebomna, ndoñe šmatjaleséncia ndocná chaondétsamama tšëngaftanga jtsajbanama Crístbeñe ošbuáchiyana jtsebomnana. Chca entšanga montseboše juabnëngaca tšëngaftanga jáingñama, nýe básefta entšangbe juabnënga y tondayama ndoservena juabnënga. Chë juabnënga jtsóbocanana ntšamo bëts taitanga básengbioye mondbetsabuá-tambayentsana y chë espírituengbentsana, ndë-muanýengbiana entšanga jtsejuabnayanana chënga nýetsca soyënguiñe imománda ca; pero Crístbentsana chë juabnënga ndoñe ntsóbocanana.

<sup>9</sup> Cristo endmëna cachcá ntšamo Bëngbe Bëtsá yomncá, masque mo canýe entšacá quem luarentše yojëftsiyena; <sup>10</sup> y Bëngbe Bëtsá tojama tšëngaftanga ndegombre tšabe vida chašmotsebomnana, Crístoftaca cánýiñe mo canýacá bëtsemnayeca; y Cristo, nýetsca chë mándayënga y obenana bomnëngbiana más uamaná endmëna. <sup>11</sup> Tšëngaftanga Crístoftaca cánýiñe mo canýacá bëtsemnayeca, mo uiný-nananëngcá šmontsemna, tšëngaftanga Bëngbe Bëtsabe entšanga šmomnana. Quem uinýnanánana ndoñe quenátsmëna mo chë más delicadentše base bobachtema tmojatëtšcá, cach entšangbeyeca ntšamo judiënga monduamancá, pero aíñe entsemna cach Cristo nda tcmojauinýnaná; y chë uinýnanánana entsemna, tšëngaftangbe ainanentsana Cristo bacna juabnënga jabuajuánayana. <sup>12</sup> Tšëngaftanga šmojánenabaye ora, enjamna mo ntšamo cach Cristo tmojanatbontsacá tšëngaftanga utebuantsánënga cuaftsemncá, er tšëngaftanga šmojanajbaná jtsamana chë tempo šmojánama bacna soyënga; y ntšamo Cristo cháuatayenama Bëngbe Bëtsá tojamcá, cachcá, tšëngaftanga šmojánenabaye ora, enjamna mo tšëngaftanga chašmatayenama Bëngbe Bëtsá cuafjamcá, er mora tšëngaftanga mo tsmëma entšangcá šmondoyena. Chca tojanopasá, Bëngbe Bëtsá obená bëtsemnana tšëngaftanga šmojtsošbuáchema, y chë obenana tojama Cristo cháuatayenama.

<sup>13</sup> Inýe tempo tšëngaftanga Bëngbe Bëtsabiana mo obanëngcá šmojamna, yapa bacna soyënga jtsamama šmojanamana causa y uinýnanánënga mo Bëngbe Bëtsabe entšangcá ndoñe šmonjámnyeca, pero aíñe šmojanamana bacna soyënga jtsamana nýe ntšamo šmojanbošcá. Morna Bëngbe Bëtsá tojama tšëngaftanga tšabe vida chašmotsebomnana, Crístoftaca cánýiñe mo canýacá jtsemnëse, y Bëngbe Bëtsá bëngbe nýetsca bacna soyënga šojtsaperdoná. <sup>14</sup> Mo nda ba ndebénënga tojtsabamna y chama tsbuanachangá tojtsamna y chiñe tojtsayana chënga

obligaciónaca imojtsemna chë ndebénana pronto jto-bocana ca, pero chë entšá chëchangá tojtsandbiama chë entšanga cha ndoñe más chamondétsendebëna-ma, Bëngbe Bëtsá cachcá tojama, bacna soyëngama bënga šojtsaperdoná ora. Jesús bëngbe bacna soyëngama cruciñe tojanóbana ora, enjamna mo Bëngbe Bëtsá bëngbe ndebénana tojtsanpochocá cuenta. <sup>15</sup> Jesucristo cruciñe tojanóbanayeca, Bëngbe Bëtsá tojanayëñaná Satanás y chabe bacna espírituenga obenana bomnënga y ínýengbioye amëndayënga; y nýetsca entšangbe delante tojaninýanýé cha chënga jtsamëndayama yobenama, mo canýe reycá chë ínýenga tojayëñaná ora, chabe entšanggaftaca natsana jt-sayana y chë ayëñanánëngna ústonoye.

### Ainaniñe becá jtsebošana chë ošbuáchiyëngbiana ce- loca yomna soyënga

<sup>16</sup> Ndoñe caso šmattsabiamnaye, ndoñe tšabá š-montsama ca ínýenga tšëngaftangbiana tmojt-sichamo ora, ndayá tšëngaftanga šmëtseseye o šmët-sofšëšnayama, o ndayá aíñe o ndoñe šmondbétsama-ma Bëngbe Bëtsá jadórama fiestënga ora o shbojueta fiesta ora, o jóchnama tese. <sup>17</sup> Bayté entsemna, Bëngbe Bëtsá entšangbe cucuatšíñe chë mandënga tojánboshjona, chë soyëngama bënga jabuátambama. Chë mandëngaca Bëngbe Bëtsá yojaninýanýnaye ndayá más chcoye jopásama; entšangbioye yojaninýanýnaye ndayá Cristo yochjanmama. <sup>18</sup> Báseftanga mondmëna y chënga mo nduamanëngcá entšangbeñe jtsebínýnana, pero tsoye cachënga corente uá-manënga jtsenobiamnayana y angelënga jt-sadórayana, mo Bëngbe Bëtsá cuaftsemncá. Ndoñe caso šmattsabiamnaye, tšëngaftanga ndoñe tšabá š-montsama ca chënga tmojtsichamo ora, ntšamo chënga tmojtsichamcá tšëngaftanga ndoñe šmontsá-mayeca. Chënga jtsichámuana bëts soyënga mo otjenayoquécá tmojinýe ca, y nýe cachënga puerte jt-senábotamnayana, pero chca chamotsamama razón ndoñe quemátsbomna, er nýe ntšamo inýe entšanga imnetsejuabnaycá chëngnaca cachcá jtsejuabnayanana. <sup>19</sup> Chënga Jesucristoftaca cánýiñe ndoñe tmonjo-  
quedanga, y Cristo endmëna chë nýetsca os-  
buáchiyëngbe amëndayá, mo chë bestšaše nýets cuer-  
po jtsemandayancá. Canýe cuerpiñe chë bestšaše jt-  
samana nýets cuerpo chaóbochema, ntšamo Bëngbe  
Bëtsá tojtsebošcá, chë cuerpo ndayá jasama chaotse-  
bomnana jtsamëse, y nýetsca chë cuerpentša soyën-  
ga chamenefjanama jtsamëse. Cachcá, Cristo jt-  
samana nýetsca ošbuáchiyënga cánýiñe mo canýacá  
cháftaca chamotsemnana, y cada te más tšabá cha  
chašmotsábuatmama.

<sup>20</sup> Cristo tojanóbana ora enjamna mo tšëngaftán-  
gnaca cuafjobancá, y Bëngbe Bëtsá tšëngaftanga  
cmojatsebacá chë quem luarentše imománda es-  
pírituengbe cucuatšëntsana. As, ¿tšëngaftanga ndáyeca  
šmojtseyena jtsamëse mo chë nýe quem luarama eno-  
juabnayëngcá? ¿Ndáyeca tšëngaftanga cabá šmobe-  
decena chca mandënga, mo: <sup>21</sup> "Chë soye ndoñe mats-

banana, chca soye ndoñe catjase, o chë soye acbe cucuátšeca ndoñe catjaca ca"? <sup>22</sup> Lempe chë mandënga, chë ndayá canya ndoñe bontsemna jamana, nye soyëngama jtsayanana, y tempo tojochnëngo ora, chë soyënga jtsopochócana y chora tondaye ntsámanana. Chë mandënga jtsemnana nye ntšamo entšanga mondbetsamcá y ínÿengbioye mondbetsabuatabaycá. <sup>23</sup> Ndegombre, ba entšanga jtsejuabnayana chë mandënga tmojamëngbiama, puerte osertanánaca chca tmojama ca, pero ndegombre chca ndoñe quenátšmëna; er chënga jtsichámuana, ntšamo Bëngbe Bëtsá jadórama yomncá imojtsabuatabá ca, jtsabuátambayana entšá cabnmëna uamaná ndoñe ntsenobiamnayana ca, y jabuache cachabe cuérpoca jtsamana ca. Pero chë mandënga tondaye ntsámanana, er chë mandënga entšangbe ainanentšana ndoñe ntjajuánana chë bacna soyënga jtsamama juabnënga.

**3** Cristo cháuatayenama Bëngbe Bëtsá tojanma ora, enjamna mo tšëngaftángnaca Crístbeñe osbuáchiyënga, chašmatayenama cha cuafjamcá. Chiyeca, tšëngaftangbe ainaniñe puerte šmochtseboše ndayá Bëngbe Bëtsá celoca tšëngaftangbiama yobomncá; y choca, Cristo uámana puestentše endëtbemana, Bëngbe Bëtsabe catsbioica. Y šmochtsinÿinÿnaye chca šmojtsebošama, ntšamo jtsamëse mora šmojtseyenama. <sup>2</sup> Tšëngaftanga nyets tempo chë celoca soyëngama šmochtsejuabnaye, ndoñe chë nye quem luarentše yomna soyëngama. <sup>3</sup> Tšëngaftanga Crísoftaca cánÿiñe mo canyáca jtsemnëse, jtsemnana mo tšëngaftanga ya cuafjobancá, er mora ya ndoñe quešmátiyena tempcá jtsamëse. Cristo, Bëngbe Bëtsáftaca cánÿiñe mo canyáca endmëna, y Cristo endmëna nda mora tšëngaftangbe vida yojtšinÿena. <sup>4</sup> Ndegombre, Cristo endmëna nda endama tšëngaftanga tšabe vida chašmotsebonnama; y quem luarentše cha cachiñe chaojtonÿná ora, tšëngaftángnaca chentše cháftaca šmochántsemna, y chora ntšamo Cristo corente uamaná y bëtsá yomnama Bëngbe Bëtsá yochjinÿanÿiyicá, tšëngaftangbiámncaca echanjínÿanÿiye más bëtsëtšanga y uámanënga šmojtsemnama.

### Tempca vida y morsca vida

<sup>5</sup> Tšëngaftanga, ntšamo chë nye quem luarama enójuabnayënga mondbetsebošcá bošana lempe šmochtsajbaná. Ndocná chaondëtseboše ndaye bacna soye boyabása o shembásaftaca jtsamana, ni chca soyënguiñe ndoñe chaondëtsejuabná; ndoñe chaondëtseyena nye ínÿengbiama bacna juabnënga jtsebonnëse, y ndoñe chaondëtseboše nye bëtscá soyënga ínÿengbiama más jtsebonnama, er chca jtsamana jtsayanana, chabiamá más yojtšamána soyënga jtsebonnama, Bëngbe Bëtsá jatsbobonshánama. <sup>6</sup> Er entšanga mondmëna y chënga chca soyënga jtsamama jtsebošana, y Bëngbe Bëtsá ndoñe ntseyenanana. Chca entšángaftaca Bëngbe Bëtsá puerte bochanjetna, y echanjamánda chë uabouana castigo chëngbeñe chaotsemnama. <sup>7</sup> Y tempo, tšëngaftanga š-

mojanienyena jtsamëse, sempre nye chca bacna juabnëngaca, <sup>8</sup> pero mora tšëngaftanga cmontsamna lempe quem soyënga stëtsoye jaquédana: ínÿengaftaca jetnana, ínÿengaftaca rábiaca jtsemnana, ínÿabioye ntšamo jáborlama jtsebošana, ínÿengbioye joyánguanguana, y ndoñe tšabe palabrënga jtsóyebuambnayana. <sup>9</sup> Ndoñe šmattsenbuambnaye, er ntšamo tempo šmojamncá mora tšëngaftanga ya ndoñe cachcá quešmátšmëna, y mora ndoñe quešmátiyena jtsamëse ntšamo tempo šmojanamcá. <sup>10</sup> Y mora tšëngaftanga šmojashjache jtsemnama mo tsmëma entšangcá, y ntšamo tempo šmojanamcá ndoñe cachcá quešmátama. Bëngbe Bëtsá chca tsmëma entšangcá tcmojábiama; y cha nyets tempo yojtšama, tšëngaftanga cada te más ntšamo cha yomncá chašmotsemnama, chca, corente tšabá cha chašmuábuatmanama. <sup>11</sup> Chiyeca, ndayá Bëngbe Bëtsá tojanama, ndoñe judiënga y judiënga cachcanga mondmëna; chë más delicadentše base bobachtema tëtšëngënga ndoñe más uámanënga quemátšmëna chë ndoñe chca mondmëngbiama; chë inÿe luarëngocana áshjajñënga, bën tjoye oyenënga, chë nye ínÿabiamá nyets tempo oservënënga y chë cachëngbiama trabájayënga, nyetscanga cachcanga mondmëna. Chë nye ndayá iuámana endmëna Crístbeñe jtsošbuáchiyana y nyetsca ošbuáchiyëngbe ainaniñe cha yojtsemna jtsemándayama.

<sup>12</sup> Tšëngaftanga Bëngbe Bëtsábënga šmondmëna. Cha cmondábabuanÿeshana y tcmojabacacá chabe entšanga chašmotsemnama; chiyeca, tšëngaftanga cmontsamna ínÿenga jtsinÿanÿinayana nyetscangbiama jóngmiamá šmuamanama, tšabe juabna ínÿengbiama sempre šmnëtsebonnama, cada ona chë ínÿenga chabiamá más uámanënga cuaftsemncá imnëtsejuabnayama, nyetscanga puerte bonshanánaca šmnëtšënyayama, y nyetsca padecena soyënguiñe corente uantadënga šmomnama. <sup>13</sup> Nyetscanga šmochtsenëuantana y šmochjenperdóna, nderado ntšamo nda ínÿabioye tbojaborlá y chama cha tbojtsatsëtšná ora. Ntšamo Bëngbe Bëtsá tšëngaftanga tcmojaperdonacá, tšëngaftángnaca cachcá ínÿenga šmochjáperdonaye. <sup>14</sup> Lempe chë soyëngama más enduámana nyetscanga jtsenbobonshánana. Nyetscanga šmojtsebonshánëse, tšëngaftanga šmochantsobena sempre lempe chë inÿe soyënga corente tšabá jtsamana, ntšamo ndegombre chë soyënga jamama yomncá. <sup>15</sup> Cristo endama tšëngaftangbe ainaniñe tšabe ebionana chašmotsebonnama. Chë tšëngaftangbe ainaniñe tšabe ebionánaca šmochtsiyena nyetscanga natjëmbana, Jesucristbeñe ošbuáchiyënga quetsomñecá. Bëngbe Bëtsá tcmojáchembo tšëngaftanga nyetscanga cánÿiñe mo canÿe cuerpcá chašmotsemnama, y chca, natjëmbana chašmotsiyenama. Bëngbe Bëtsá sempre šmochtsatschuanaye.

<sup>16</sup> Chë Cristbe puerte tšabe buayenana soyënga tšëngaftangbe ainaniñe nyets tempo šmochtsambaye. Nyets osertanánaca šmochtsenbuátëmbaye y šmocht-



senbuayiyenaye. Nÿets ainánaca šmochjacánta chë Salmos librésañe uabemana cantënga, chë Jesucristbe soyëngama cantënga, y chë Bëngbe Bëtsabe Espíritu iuama tšëngaftanga chašmotsobena jacántama soyënga; chca šmochjama Bëngbe Bëtsá jëtschuayama. <sup>17</sup> Y lempe ntšamo chašmojtsama o chašmotsichamcá, Bëngbe Utabná Jesúsbeñe ošbuáchiyënga quetsomñecá chca šmochjama, sempre Bëngbe Bëtsá Bëngbe Taitábioye, chábeyeca jtsatschuanayëse.

#### Ntšamo ínÿengaftaca jtsiyenama

<sup>18</sup> Shémanga, šmochtsetátšëmbo tšëngaftangbe boyanga chë yebnentša mándayënga imomnama, y nÿets tempo chca jtsejuabnayëse šmochtsiyena, er tšëngaftanga Bëngbe Utabnábeñe ošbuáchiyënga quetsomñecá, chca cmontsamna. <sup>19</sup> Boyanga, tšëngaftangbe shémanga sempre šmochtsababuánÿeshana, y podesca palabréngaca ndoñe šmattsëtsësnaye.

<sup>20</sup> Básenga, tšëngaftangbe bëtsétsanga nÿetscañe šmochtsayaunana; chca šmojtsamëse, Bëngbe Bëtsá oyejuayá echántsemna. <sup>21</sup> Taitanga, ndoñe šmattsama tšëngaftangbe básenga chautënama, ainaniñe tondaye añémoca chënga ndoñe chamondëtsatsmënama.

<sup>22</sup> Tšëngaftanga chë nÿets tempo nÿe ínÿabiamana oservënënga, tšëngaftangbe nduiñënga nÿetscañe šmochtsayaunana, y ndoñe nÿe chënga tcmojtsënyä ora, mo nda nÿe entšangbe delante tšabá joquédama tojtsebošacá, ndayá chënga šmochtsayaunana nÿets ainaniñe ndegombre tšabe juabnéngaca, er tšëngaftanga Bëngbe Utabnabiamana corente respeto šmondobomna. <sup>23</sup> Lempe ntšamo chašmojtsamcá, nÿets tšëngaftangbe añémoca šmochtsama, mo Bëngbe Utabná ndegombre cuaftseservencá, y ndoñe nÿe entšangbiocá. <sup>24</sup> Tšëngaftanga ya šmondëtatšëmbo, ntšamo cha chabe entšanga tojašebuachenacá mo uacanancá, Bëngbe Utabná tšëngaftanga cmochjášatayama. Er Cristo, chë Utabná, endmëna ndábenga tšëngaftanga šmomnana, y cha šmondëserveda.

<sup>25</sup> Pero chë ndoñe tšabe soyënga tontsamábioye, Bëngbe Bëtsá bochanjacastíga, ntšamo chë entšá bacna soyënga tojamcá, er Bëngbe Bëtsabiamana nÿetscanga cachcá monduámama.

**4** Y tšëngaftanga, ndëmuanyëngbiamana ínÿenga nÿets tempo imoservena, nÿetsca soyënguñe tšabá šmochtsama, y nÿetscangbiamana cachcá šmochtsamna, chë nÿets tempo nÿe tšëngaftangbiamana oservënëngaftaca, er tšëngaftanga šmondëtatšëmbo celoca canÿa endmëna, ndabiamana tšëngaftangnaca oservënënga šmondmëna.

#### Ošbuáchiyënga jábuayenama

<sup>2</sup> Nÿets tempo Bëngbe Bëtsáftaca šmochtsencuëntaye, ntšamo šmojtsichámuama botamana jtsejuabnayëse y Bëngbe Bëtsá jtsatschuanayëse. <sup>3</sup> Bëngbe Bëtsáftaca cha šmojtsencuënta ora, bëngbiámna

chašmochtseimpadana, cha chaoma bënga fchayobenama Bëngbe Bëtsabe palabra Cristbiamana entšanga jábuayenama, chë buayenana soye ndayama tempo entšanga ndoñe monjántatšëmbo. Atše chë buayenana soye entšanga abuátambaye causa, mora cárceloye sentsëtámëna. <sup>4</sup> Chcasna, Bëngbe Bëtsá atšbiamana šmochtseimpadana, atše chayobenama chë buayenana soyënga entšanga jabuátambama, y chë soye atše chaima chënga corente tšabá catafjosertaycá, er atše šontsemna chca jamana.

<sup>5</sup> Šmochtsiyena nÿetsca soyënga osertánaca jtsamëse chë Jesucristbeñe ndošbuáchiyëngaftaca, y chca, nÿets tempo ínÿenga šmochtsinÿanÿnaye tšëngaftanga Jesucristbeñe ošbuáchiyënga bëtsemnama. <sup>6</sup> Inÿengaftaca chašmojtsencuënta ora, šmochtsama ntšamo šmojtsoyebuambnacá chëngbiamana tšabá chaotsemnama, y soyënga šmochtsichamo nÿetscanga oyejuayana chamotsebomnama; y šmochtsetátšëmbo ntšamo cmojtsamna cada cánÿabioye jojuana.

#### Jtadióšoftanama

<sup>7</sup> Jesucristbeyeca bëngbe bonshana catsata Tíquico, canÿe trabajayá tšabe palabra bomná y Bëngbe Utabnabiamana bëngaftaca oservená, tšëngaftangbioye notiçiënga echanjuamba ndayá átšeftaca tojopasama.

<sup>8</sup> Chiyeca cha tšëngaftangbioye sentsichamná, chca, tšëngaftanga chašmotsetatšëmbuama ndayá bëngaftaca yojtsoapasana, y cha chacmañëmuayama.

<sup>9</sup> Cháftaca Onésimo echanjá, Jesucristbeyeca bëngbe bonshana catsata; cha canÿe tšabe palabra bomná endmëna, nda tšëngaftangbiocana tonjánabo. Chata tšëngaftanga cmochanjácuntaye lempe ntšamo muiñe yojtsoapasancá.

<sup>10</sup> Aristarco, muentše átšeftaca cárceloye utamená, cmontsachewaná. Y Marcos, Bernabebe primo, chánaca cmontsachewaná. Tšëngaftanga ya buayenánënga šmontsemna ndayá jamama cmojtsamnana, Marcos tšabá jofjama, cha tšëngaftanga jautsëtsayama tojase. <sup>11</sup> Jesús, chë Justo cánaca uabainá, chánaca cmontsachewaná. Quem pueblentša nÿetsca judiënga ošbuáchiyënguentshana, nÿe chë unga átšeftaca mondëtrabája, Bëngbe Bëtsabe amëndayana entšangbioye chaóshjanguama, y chënga mondama atše ainaniñe bëts añemo chaitsebomnama. <sup>12</sup> Epáfrasnaca cmontsachewaná, inÿe tšëngaftangbiocá y cha Cristo Jesusbiamana jatrabájama endoservena. Cha nÿets tempo tšëngaftangbiamana Bëngbe Bëtsábioye tša bochandbëtseimpadana, tšëngaftanga Bëngbe Utabnábeñe ošbuáchiyana ndocna te chašmondájbanama, y nÿets tempo chašmotsiyena lempe jtsamëse, ntšamo chë Jesucristbeñe corente ošbuáchiyënga jtsiyenana yojtsumncá; y chca, tšëngaftanga corente šmochántsetatšëmbo ntšamo šmojtsamcá ndegombre yomna ntšamo Bëngbe Bëtsá yobošcá. <sup>13</sup> Cach atše sënjinÿe y sentsobena jayanama ntšamo cha jabuache yotrabájama, tšëngaftanga jujabuáchama, chë Laodicea puebloquënga y Hierápolis puebloca oyenën-

gnaca. <sup>14</sup> Lucas, bēngbe bonshana ashnayá, cmontsacheuaná; y Démasnaca.

<sup>15</sup> Chē Laodiceoca Jesucrístbeyeca catsátanga bēngbe cuenta šmochjácheuaye. Ninfábioynaca š-mochjachuaye, y nŷetsca ošbuáchiyēnga chē Bēngbe Bētsá jētschuayama chabe yebnentše jénefjnama imuamanēngnaca. <sup>16</sup> Quem tsbuanácha chašmojualiá chentšana, Laodiceoca ošbuachiyēngbioye š-mochjuíchmua, chócnaca mēcha chamualiamá; y tšēngaftángnaca šmochjualiá chē Laodiceoca os-

buachiyēngbioye tmonjanichmó tsbuanácha, chēcha tšēngaftangbioye chaojuáshjango ora.

<sup>17</sup> Arquipo šmochjauyana yejuana chaotsantješna chē Bēngbe Bētsá tbojabonŷé trabajo sempre tšabá chaotsocumplínama.

<sup>18</sup> Atše Pablo, nŷe quem palabrēnga tšēngaftanga jacheuayama cach atšbe cucuátšeca sēntsabiamná. Š-mochtsenójuabnaye atše utamená stsemnama. Atše, Bēngbe Bētsá sēntseimpadana, cha chaoma tšabe bendicionēnga tšēngaftangbeñe chaotsemnama.

# 1 Tesalonicenses

## Jacheuayama

**1** Atše Pablo, Silvano y Timotéoftaca, quem ts-buanácha sentsabiamná tšëngaftangbiama, chë Tesalónica bëts puebloca Jesucristbeñe ošbuáchiyëngbiama, tšëngaftanga chë Bëngbe Bëtsá chë Taitá y Bëngbe Utabná Jesucristoftaca cánÿiñe mo canÿacá š-momnënga. Atše sëntseimpadana Bëngbe Bëtsá, chaoma tšabe bendicionënga tšëngaftangbeñe chaotsemnama, y tšëngaftanga ainaniñe tšabe ebionana chašmotsebmnama.

**Pablo Bëngbe Bëtsábioye tbojtanchuá chë Tesalónica pueblentša entsangbe ošbuáchiyama**

**2** Bënga sempre Bëngbe Bëtsá fsëndëtschuaná tšëngaftangbiama, y bënga cháftaca ftsencuénta ora, tšëngaftangbiama fchandbétseimpadana. **3** Bënga, Bëngbe Bëtsá chë Taitáftaca ftsencuénta ora, fsëndbétsenojuabnaye ntšamo tšëngaftanga šmotrabájama, Jesucristbeñe ošbuáchiyana šmobómnayeca; ntšamo tšëngaftanga tša ínÿenga šmëjabuáchana, Jesucristo šmobobonshánayeca; y ntšamo tšëngaftanga, ndocna te ntjajbanacá, jtsošbuáchiyëse Bëngbe Utabná Jesucristbeñe šmobátmanama. **4** Jesucristbeyeca catsátanga, bënga fsëndétatšëmbo Bëngbe Bëtsá cmababuánÿeshanama, y cha tcmojábacacama chábenga chašmotsemnama. **5** Bënga chë tšabe notiçiënga Jesucristbiama tcbonjanabuayená ora, ndoñe ñye bënga jóyebuambayëse chca quenjatsmëna, ndayá chë Uámana Espíritbe obenanácnaca, y bënga corente jtsejuabnayëse chë buayenánana ndegombre soye bétsemnama. Tšëngaftanga corente šmondétatšëmbo ntšamo bënga ftsjamna tšëngaftangaftaca fsënjamna ora, tšabe soyënga tšëngaftangbiama nguayíñe.

**6** Chora, ntšamo bënga fsënjanamcá y ntšamo Bëngbe Utabná enjaniyencá, tšëngaftanga šmonjanontsé amana; y chë buayenánana šmonjanóyëngacñe chë Uámana Espiritu tcmojanatšatá oyejuayánaca, masque ínÿenga tmojamna tšëngaftanga puerte chašmosufrima. **7** Mëntsá, tšëngaftanga uánatsanënga šmonjanobiama ntšamo ndegombre jtšiyenama, ñyetsca Macedonia y Acaya luarentša Jesucristbeñe ošbuáchiyëngbiama. **8** Tšëngaftanga šmojoyebuambá Bëngbe Utabná Jesucristbe palabrama. Mora, ndoñe ñye Macedonia y Acaya luarentše entsanga chama quemátstatšëmbo —ñyets luarenache entságnaca montsetátšëmbo ntšamo tšëngaftanga Bëngbe Bët-

sábeñe šmojtsošbuáchema —y chca, bënga tondaye más quešnátëjaboto tšëngaftangbiama jatichámua-ma. **9** Cach entsanga montsoyebuambná chë bënga tcbonjánabuache ora tša tšabá tšëngaftanga šcojanébuajama. Chëngnaca montsichamo ntšamo tšëngaftanga šmojtšajbaná chë šmojanjuabná diosënga yojamna soyënga adórayana y šmojanontsé chë tšabe benache jtishachama, y chë Bëngbe Bëtsá ndegombrá y ainá jaserviama, **10** y chca, chabe Uaquiñá Jesús jobátmama; mua celocana echanjésabo; chabiama Bëngbe Bëtsá tojanma obanënguentsana cháuatayenama, y cha šochanjátsebacaye chë uabouana castigüentsana, Bëngbe Bëtsá entsangbe bacna soyëngama chëngbiama yobomnentšana.

**Ntšamo Pablo yojantrabája Tesalónica puebloca**

**2** Cach tšëngaftanga, Jesucristbeyeca catsátanga, šmondétatšëmbo bënga tcbonjánabuache ora ndoñe ñye bonamente quenjatsmënama. **2** Tšëngaftanga šmondétatšëmbo, bënga cabá tšëngaftangbiaye nda ora, Filiposoca šonjanëyánguango y bacá šonjánaborlama; y masque tšëngaftangbioca bëngbe contra entsanga monjamna, Bëngbe Bëtsá tonjanma bënga fchayobená chë tšabe notiçiënga bëtsca añémoca jabuátambama. **3** Er bënga entsangbiaye bostero soyënga ndoñe queftsatanabuayíyná, tšëngaftangbiama bacna soyënga ndoñe queftsátanboše, y entsanga jáingñama ndoñe queftsatanoyebuambná. **4** Bëngna inÿetšá; Bëngbe Bëtsá yojanjuabná bënga chabe trabajo jamama obenënga ftsjamna ca, y chca, šonjanëbuáyana chabe tšabe notiçiënga entsanga jabuátambama, y chca bënga fsëndoyebuambná; chíyeca bënga ndoñe ñye entsangbe bominiñe tšabá chaotsinÿinama queftsátama, ndayá ñye Bëngbe Bëtsabiama, nda chë ndayá bëngbe ainaniñe yomnama yotátšëmbo. **5** Ntšamo tšëngaftanga corente šmondétatšëmbcá, bënga ndocna te tšëngaftangbiama tšabe soyënga tifjánayana, tšëngaftanga béngaftaca oyejuayënga chašmotsemnama; y ntšamo tšëngaftanga tcbonjanëtsëtsnacá ndoñe quenjatsmëna ñye tšëngaftangbentsana ba soyënga bëngbiama josháchiñama. Bëngbe Bëtsá chama yotátšëmbo. **6** Ndocna te bënga queftsatsnguá entsanga más uamanëngcá bënga chašotsabiamnama, ni tšëngaftangbentsana, ni ínÿengbentsana.

**7** Masque bënga, Cristbe ichmónënga bétsemnama, matifjanobená tšëngaftanga ñye sempre jtšamëndayana, bënga ndoñe chca chibiátanma; bënga

corente jtsababuányeshanése cbonjánanyena, ntšamo canye mamá chabe básenga jtsabéhayana y corente bonshanánaca jtsanyenana. <sup>8</sup> Tša cbonjánababuanýeshanayeca, bēnga ndoñe nye chē Bēngbe Bētsabe tšabe noticiēnga checbēnjatanabuayená, tšēngaftanga chiñe chašmotsošbuáchema ntšamo bēnga fsēndošbuachecá, ndayá bēngbe vidēnga jáshbiamnaca fsēnjanprontana tšēngaftangbe tšabiama. ¡Tša cbondábabuanýeshana! <sup>9</sup> Jesucristbeyeca bēngbe catšátanga, tšēngaftanga šmenabouínýna ntšamo bēnga bētsá y jabuache fsēnjantrabajama, Bēngbe Bētsabe tšabe noticiēnga abuayiynayiñe y bēngbe vida onguayiñe, chca, tšēngaftanga ndoñe chacmondēt-samna bēngbe uajabótama bēnga jatatsatnayama.

<sup>10</sup> Cach tšēngaftanga šmondétatsēmbo y Bēngbe Bētsánaca, ntšamo bēnga ftsjamna tšēngaftanga chē ošbuáchiyēngaftaca fsēnjamna ora; fsēnjaniyena ntšamo Bēngbe Bētsá tšabá tbojtsinýancá, nyetscán-gaftaca fsēnjánama ntšamo jamama šojanamncá, y ndocná quenátobena jatichámuana ntšamo fsēnjanamcá ndoñe tšabá yonjamna ca. <sup>11-12</sup> Tšēngaftanga šmondétatsēmbo, bēnga bētsá jóyebuambayése cada ona tšēngaftanguentsá cbonjanéjabuachanama y cbonjánáñemuama, ntšamo canye taitá chabe básengaftaca endbetsamcá. Bēnga bētsá cbonjanétsēsna ntšamo Bēngbe Bētsá tšabá tbojtsinýancá chašmot-siyenama; y Bēngbe Bētsá cmontsēbuájajana chabe améndayoye jamashēnguama y chabe obenana y buashinýinýanana jinýama.

<sup>13</sup> Bēnga, Bēngbe Bētsabe tšabe soyēnga cbonjanabuayiyná ora, ntšamo tcbonjanéyancá tšēngaftanga šmonjanuena y šmontsanošbuaché mo Bēngbe Bētsábicana buayenanancá, y ndoñe nye entšangbe oyebuambnayanancá. Y ndegombre Bēngbe Bētsabe buayenánana endmēna, y chē palábraca, tšēngaftanga chē chábeñe ošbuachiyēngbeñe Bēngbe Bētsá bētsá soyēnga yojtsama. Chama sempre Bēngbe Bētsá fsēndētschuaná. <sup>14</sup> Jesucristbeyeca catšátanga, cach tšēngaftangbe luarentša entšanga cmonjanēcama ora y šmonjansufrina, šmonjanpasá ntšamo chē Judeoca Bēngbe Bētsábeñe ošbuachiyēngcá enefjuanēnga tmonjanpasacá, y chēngna Cristo Jesusbe entšanga mondēmna. Chēnga tmonjansufrí cach luar-entša entšanga, chē judiēnga, chēngbioye monjanēcama ora. <sup>15</sup> Chē judiēngbe bēts taitanga, Bēngbe Bētsabe juabna oyebuambnayēngbioye tmojtsanēbaye, y ntšamo chēngbe bēts taitanga tmojanm-cá, chēngnaca Bēngbe Utabná Jesúsbioye tmojanóba, y chēnga mondama bēnga chaftsesufrínama. Chēnga ndoñe tšábēnga Bēngbe Bētsabe bominýiñe quemátsmēna, y nyetsca entšangbe contra montsemna. <sup>16</sup> Chē ndoñe judiēngbioye, Bēngbe Bētsá cháuat-sebacama jábuayenama fstseboše ora, chē judiēnga bētsá jtsamana bēnga ndoñe fchandobenama chca jamama. Judiēnga nyets tempo bacna soyēnga monjánama; pero chē entšanga jábuayenama bēnga ndoñe fchandobenama jtsamana, entsemna chē último bacna soye ntšamo chē judiēnga jamama imojtsobencá,

más ya ndoñe; y mora, cabana, Bēngbe Bētsá ya puerta chēngaftaca tbojetna y echanjácastigaye.

### Pablo tša yojánboše, Tesalónica puebloca entšanga jánýama

<sup>17</sup> Jesucristbeyeca catšátanga, bēnga tšēngaftangbentšana baseftayté jēftsebocnama šonjanotocá ora, masque ndoñe choca tšēngaftangaftaca queftsjátanmēna, sempre tšēngaftangbiama fsēnjanenojuabná, y tša fsēnjánboše tšēngaftangbioye jtésana jautsētsayama. <sup>18</sup> Bēnga fsēnjánboše tšēngaftangbioye jésana; chíyeca cach atše Pablo, ba soye sēnjanóshenguēnja jobenayama choye jésama, pero Satanás yojantrabája bēnga ndoñe fchandobenama chca jamama. <sup>19</sup> Atše séntsanboše tšēngaftanga jautsētsayama, er tšēngaftangbeyeca Bēngbe Utabná Jesusbe delante, cha yochjésabo ora, ntšamo tšēngaftanga šmoyenama, bēnga puerta jtsošbuáchiyése fchantsobátmana, corente oyejuayēnga fchtsemnana y más bētsēsanga fchtsemnana. <sup>20</sup> Añe, ndegombre, ntšamo tšēngaftanga šmoyenama, bēnga bētsá añémoca ntšamo tšēngaftangbeñe tifjamama fsēndbétsoyebuambnaye, y tša oyejuayēnga fsēntsemna.

**3** Chíyeca ya ndoñe chibiatanobená más jatobátmanana tšēngaftanga jautsētsayama; as fsēnjanjuabó nye bēndata Atenas bēts pueblentše joquédana, <sup>2</sup> y jíchmuana Jesucristbeyeca bēngbe catšata Timoteo, chē bēngaftaca trabajayá, Bēngbe Bētsábioye oservéniñe, tšabe noticiēnga Cristbiama entšanga abuayiynayiñe. Fsēnjanichmó chacmañēmuayama y chaotsamama tšēngaftanga Jesucristbeñe más chašmotsošbuáchema; <sup>3</sup> y chca, ndocná Jesucristbeñe osbuáchiyana chaondájbana, masque tšēngaftanga Jesúsbeñe ošbuáchiyēnga bētsemnana, ínýenga imojtsama chašmotsesufrínama. Er cach tšēngaftanga šmondétatsēmbo bēnga šojtsamna chca quem luar-entše jēftsepapadecénana. <sup>4</sup> Y cabá tšēngaftangaftaca fsēnjēftsemna ora, tcbonjanéyana bēnga šojánamna jasúfriana; y ndegombre chca tonjopasá, ntšamo tšēngaftanga ya šmondétatsēmbcá. <sup>5</sup> As y chē tšēngaftangbiama jtsetatšēmbuama más jatobátmanana ndoñe quetstétsobenayeca, sēnjanjuabó šojētsemna Timoteo jíchmuana. Sēnjanichmó atše jtsetatšēmbuama añe bētsá o ndoñe tšēngaftangbe ošbuáchiyana Jesucristbeñe tayoamnama, er atše yapa sēnjanjuabná nderado Satanás tojanma tšēngaftanga bacna soyēnga chašmotsamama, y chca, bēngbe trabajo tondayama chaondētsoservénama.

<sup>6</sup> Pero mora, Timoteo tšēngaftangbiocana tontashjango y tonjúshjango noticiēnga, y bēnga chama oyejuayēnga fsēntsemna, ntšamo tšēngaftanga bētsá Jesucristbeñe šmojtsošbuáchema y nyetscanga šmenbobonshánama. Cha šonjacuntá ntšamo tšēngaftanga corente oyejuayēnga bēngbiama šmuatenojuabnama, y ntšamo tšēngaftanga tša šmojtseboše bēnga jánýama, cachcá ntšamo bēnga tšēngaftanga jánýama tša fsēntsebošcá. <sup>7</sup> Quem sóyeca, Jesucristbeyeca catšátanga, y mora chē bēnga nyetsca chē padecena soyēn-

ga fstsebmorna ora y ínÿenga bënga jasúfriama imojt-sama ora, bëts añemo fséntsebmorna, ntšamo tšëngaftanga tša Jesucristbeñe šmojtsošbuáchema jtsetatšëmbëse. <sup>8</sup> Jtsetatšëmbuana tšëngaftanga sempre puerte tšabá Bëngbe Utabnáftaca šmoyenama, entsama bënga más añémoca chaftsiyenama. <sup>9</sup> Mora fchantsobena Bëngbe Bëtsá jtsatschuanayana tšëngaftangbiamana, y chë tšëngaftangbeyeca chabe delante bënga oyejuayana ftsbomnámnaca. <sup>10</sup> Cada te, bnëtë y ibeta, tša Bëngbe Bëtsá fsëndétseimpadana jobenayama tšëngaftanga jautsëtsayama chašualesenciama, Bëngbe Bëtsabe palabra tšabá chašmoberedema, chë buayenánana ntšamo yojtsashbencá jabuátambama.

<sup>11</sup> Bënga, Bëngbe Bëtsá fséntseimpadana, cachá y Bëngbe Utabná Jesús, chašújabuache bënga fchayobena tšëngaftangbioyama jautsëtsayama. <sup>12</sup> Y Bëngbe Utabná chaoma más bëtsá chašmotsenbobonshánama, y cachá corente nyetscángaftaca, ntšamo bënga cbondabuanÿeshancá. <sup>13</sup> Chca, tšëngaftangbe ainaniñe bëtsá añemo šmochántsebmorna; y Bëngbe Utabná Jesús cachábengaftaca chaojésabo ora, Bëngbe Bëtsá Bëngbe Taitabe delante ndocná chaondayana, ntšamo tšëngaftanga šmojamcá ndoñe tšabá yontsemna ca, er tšëngaftanga šmondmëna Bëngbe Bëtsábënga, ñye cha jtseservénama.

#### Ntšamo jtsiyenama, Bëngbe Bëtsá oyejuayá chaotsemnama

**4** Y mora inÿe palabra šmochjatspaséncia. Jesucristbeyeca bëngbe catsátanga, tšëngaftanga béngbentšana šmonjanatsjinÿe ntšamo jtsiyenana cmojánamna, ntšamo Bëngbe Bëtsábioye oyejuayá jabemama yomncá, y ndegombre chca tšëngaftanga šmondoyena. Y mora Bëngbe Utabná Jesusbe cuenta, cbontsaimpadana y becá cbontsëtsëtsná más chca chašmotsamama.

<sup>2</sup> Tšëngaftanga šmondétatšëmbo ndayá tifjánayana ntšamo tšëngaftanga chašmotsiyenama, y chca fsëñjanma Bëngbe Utabná Jesús chca jamama šonjanamëndáyeca. <sup>3</sup> Bëngbe Bëtsá endboše tšëngaftanga chašmotsiyenama mo Bëngbe Bëtsabengcá, ndocná bacna soyënga boyabása o shembásaftaca chaondétsamama, <sup>4</sup> y nyetscanga chamotsobena ntšamo canÿe shema jonguanguana, chë ntšamo canÿa Bëngbe Bëtsábia yomná jamama ibomncá, y ntšamo entšangbe bominiñe tšabá yomncá, <sup>5</sup> y ndoñe chabondónguango ñye cháftaca bacna soyënga chëngbe cuérpoca jamama, ntšamo chë Bëngbe Bëtsábioye nduabuátmënga mondbetsamcá. <sup>6</sup> Chë palabriñe ndocná chabe catsátbioye chabondëingñé, chë catsátbe shémaftaca bacna soye jamëse, er chca amëngbioye Bëngbe Utabná corente echanjácastigaye. Chiyeca bënga ya bëtsá chama tcbonjabuayená. <sup>7</sup> Er Bëngbe Bëtsá ndoñe šonjánachembo bacna soyënga boyabása o shembásaftaca jtsamama, ndayá ntšamo tšabá yomncá jtsamama, ntšamo chabe entšanga mondbetsamcá. <sup>8</sup> Mëntšá, nda quem bu-

atëmbana soyënga tojtsábotena, cha ndoñe ñye entšanga jtsébátenana, ndayá Bëngbe Bëtsábioye, nda tšëngaftangbe ainaniñe Uámana Espiritu cháua-mashënguama tojama.

<sup>9</sup> Atšë ndoñe quešnátsmëna juabuábiamana ntšamo cmojtsamna ínÿenga Jesucristbeñe ošbuáchiyënga jtsababuánÿeshanama, er cach Bëngbe Bëtsá tcbonjabuatambá nyetscanga chašmotsenbobonshánama. <sup>10</sup> Y ndegombre, tšëngaftanga chca šmondama nyetsca Macedonia luarentšë Jesucristbeñe ošbuáchiyëngaftaca. Pero cbontsaimpadana, Jesucristbeñe catsátanga, más chca chašmotsamama.

<sup>11</sup> Nÿa sempre quem soyënguñe šmochtsentšëna: natjëmbana jtsiyenana, ínÿengbe soyënguñe ndoñe ntsontremeténana, y ndoñe ntjatobátmanana ñye ínÿenga tšëngaftangbiamana chamotsetrabájama, ntšamo tcbonjanëyancá tšëngaftangaftaca fsëñjamna ora; <sup>12</sup> chca šmochtsama, chë ínÿenga Jesucristbeñe ndošbuáchiyënga chacmotsarrespetánama, y ndocnábeñe ntjatobatmancá šmochantsobena jtsiyenana.

#### Bëngbe Utabná quem luaroye yochjésabo ora

<sup>13</sup> Bëngbe catsátanga, bënga fséntseboše tšëngaftanga ndegombre chašmotsetatšëmbo ntšamo chë obanëngaftaca yochjopásama, y chca, tšëngaftanga ndoñe ngmenánaca chašmondëtsemnama, mo chë inÿengcá, chë tcojóbanentšana ndoñe yontsemna jtayenama ca juabnayëngcá. <sup>14</sup> Bënga fsëndošbuaché Jesús tojanóbana y tojtanayenama, y cachá bënga fsëndošbuaché chë tmojóbanënga y Jesúsbeñe tmojtsošbuáchese, Bëngbe Bëtsá chëngbiamana yochjama chë nyetsca tescama yomna tšabe vida Jesucristoftaca chamotsebmornama, y quem luaroye cháftaca chamuátábama.

<sup>15</sup> Chë soyama bënga cbontsëtsëtsná ntšamo cach Bëngbe Utabná tojëftsanabuatambacá: Bëngbe Utabná chaojésabo ora, chë ošbuáchiyënga chë te cabá ainënga chamojtsemnënga, chábioye ndoñe quemochátinÿena tsbanánoca, más natsana chë ya obanënga chë te mochtayenëngbiamana. <sup>16</sup> Er entšanga mochanjouena canÿe mando juayebuáchenana, chë angelëngbe amëndayabe oyebuambnayana y chë Bëngbe Bëtsabe trompetéfjua juajatëtámnaca, y chora cach Bëngbe Utabná celocana echanjástjango. Y chë tmojóbanënga, Crístbeñe imojanošbuachenga, natsana mochantayena; <sup>17</sup> chentšana, chë ainënga chamojtsemnënga chëngaftaca canÿiñe Bëngbe Bëtsá šochanjúyamba, Bëngbe Utabná yochtsemnoca jashjanguama, chë celoca jantsetëshënga endmënoca; as chentšana nyetsca tescama cháftaca bënga mochantsemna. <sup>18</sup> Quem palabrëngaca nyetscanga ndoñe más ngmënanana ainaniñe chašmondëtsebmorna.

**5** Jesucristbeyeca catsátanga, ndoñe quenátsiyta atšë jubuábiamana mocna ora chë soyënga yochjopásama. <sup>2</sup> Cach tšëngaftanga corente šmondëtatšëmbo, Bëngbe Utabná yochjésabo chama ndocná chaondëtsejuabná ora, mo canÿe atbëbanacá jashjanguana ibeta ndocná chama tonjatsjuabná ora.

<sup>3</sup> Entšanga chamojajana: “Lempe tšabá endětsomñe y tondayama quešnátamna játauatjana ca”, chora ñe ndeolpe chě entšangbiama tša jasúfriama echanjóshjango, mo canye shembása šešona jtsebomnama ora ñe ndeolpe jasúfriama jontšancá; y ndegombre, entšanga chca jasúfriama quemochatotsbocá. <sup>4</sup> Pero tšengaftanga catsátanga, ndoñe quešmátiyena mo ibetiñcá, bacna soyenga jtsejuabnayese y jtsamese; y chca, Běngbe Utabná chaojésabo ora, tšengaftanga ndoñe auatjanánenga quešmochátsmēna, mo ndábioye canye atbēbaná tbojotbá ora, chábioye cuaftsauatjanacá. <sup>5</sup> Nyetsca tšengaftanga šmondmēna entšangbe juabna binýnayabe básenga, y mo binýniñcá šmondoyena. Běnga ndoñe chě ibetiñe mandayabe básenga quemuátsmēna, y mo ibetiñcá ndoñe quemuátiyena; <sup>6</sup> chíyeca bēnga ndoñe quešnátamna jtsemnana mo chě cachēngbe cuerpo jenómán-dama ndobenēngcá, chě mo cuaftsemangcá oyenēnga. Pero aiñe šontsamna mo chě fšnēngcá jtsiyenana, bēngbe cuerpo jtsemándayese y nyets tempo jtseprontánese. <sup>7</sup> Ibeta ora entšanga jtsemangana, y cach ibeta tojtsemna ora entšanga jotmenangana; <sup>8</sup> pero bēnga, chě binýnentsēngna, šontsamna sempre bēngbe cuerpo jtsemándayana. Šontsamna Běngbe Bětsábeñe jtsošbuáchiyana y cha jtsebobonshánana, chě uayaná Satanasbiama jenéuyanama y cha jayénjanama, mo canye soldadcá, canye morocho soye cochaca jenácochjatsana jtsevalentiamana y ndoñe chamondēyénjanama. Y chě castigüentšana Běngbe Bětsá šochjátsebacamnaca puerte jtsošbuáchiyese jtsobátmanana; y chca, bēnga mochántsemna mo canye soldadcá, cha canye casquēse juabuchětsana jenéuyanama. <sup>9</sup> Er Běngbe Bětsá ndoñe šonjáchembo bēnga chašotsamnana chě nyetsca tescama castigo jtsebomnama. Ndayá Běngbe Bětsá šojabacacá, Běngbe Utabná Jesucristbeyeca bēnga chamótsbocama. <sup>10</sup> Cha bēngbiama tojanóbana, bēnga cháftaca cánýiñe jtsiyenama chamotsobenama, masque ainēnga o obanēnga chamojtsemñese, cha chaojésabo ora. <sup>11</sup> Chíyeca, nyetscanga šmochtsenañemuaye y šmochtsenájabuachana más jtsošbuáchiyama, ntšamo tšengaftanga mora ya šmontsamcá.

### Pablo choca ošbuáchiyēnga jábuayenama

<sup>12</sup> Jesucristbeyeca catsátanga, cbontsaimpadana chašmotsarrespetana chě Běngbe Bětsabiama tšengaftangbeñe trabajayēngbioye, y chě Běngbe Utabná tšengaftanguentše tojábacacanga uánatsanēnga chamotsemnana y ntšamo jtsiyenama cmojtsamnama chácmabuayenama. <sup>13</sup> Cmontsamna chēnga jtsarrespetánana y jtsababuánýeshanana, ndaye trabajo

chēnga imojtsamama. Natjēmbana nyetscángaftaca šmochtsiyena.

<sup>14</sup> Quem soyēnga chašmotsamámncana cbontsaimpadana: jatrabájama ndoñe tmontsebošēngbioye šmochjucácana, añemo ndbomnéngbioye šmochjáñemuaye, bētscá ošbuáchiyana ndbomnéngbioye šmochjújabuache, y uantadēnga nyetscángaftaca šmochtsemna.

<sup>15</sup> Cuedado šmochtsebomna, nderado nda bacna soye tbojaborlase, ndocná ndoñe cachcá chabondětachnēnguama. Masna, ñe šmochtsentšena nyets tempo tšabe soyēnga jtsamama cach tšengaftanguentšengaftaca y nyetsca entšangaftácna.

<sup>16</sup> Nyets tempo oyejuayēnga chašmotsemna. <sup>17</sup> Sempre Běngbe Bětsáftaca šmochtsencuēntaye. <sup>18</sup> Nyetsca soyēnguiñe Běngbe Bětsá šmochtsatschuanaye; er chca entsemna ndayá cha yojtseboše, bēnga Cristo Jesúsbeñe ošbuachiyēngcá chamotsamama.

<sup>19</sup> Ndoñe šmattsama ntšamo chě Uámana Espiritu tšengaftangbeñe yojtsamcá chaotsopochocama.

<sup>20</sup> Ndoñe šmattsábotena chě Běngbe Bětsabe juabna oyebuambnayēngbe buayenana soye. <sup>21</sup> Yejuana šmochjájuabo ye y šmochjayana, chě Běngbe Bětsabe juabna oyebuambnayá yomna ca tojtsichamuabe buayánama ndegombre Běngbe Bětsábiocana tayóbocanama, y chentša tšabe soyēnga šmochjobuajo y siempre chca šmochtsama. <sup>22</sup> Nyetsca bacna soyēnguentšana šmochtsojuánañe.

<sup>23</sup> Cach Běngbe Bětsá, chě bēngbe ainaniñe tšabe ebionana chamotsebomnama endamá, nyetsca soyiñe tšábenga chacá chacmabiama, y nyets tšengaftangbe espíritu, ainana y cuerpo chaotsinyena, Běngbe Utabná Jesucristo chaojésabo orscama; y chora, ntšamo tšengaftanga šmojamama bacna soyēnga yojtsemna ca ndocná chaondayanama. <sup>24</sup> Nda tcmojúbuaja chábenga chašmotsemnana, cha siempre jtsamana ntšamo tojayancá, y lempe cha echanjama.

### Inye rueguēnga chēngbiama y jtadióšoftanama

<sup>25</sup> Jesucristbeyeca catsátanga, Diosmanda, bēngbiámncana Běngbe Bětsá šmochtseimpadana.

<sup>26</sup> Nyetscángbioye mo Jesucristbeyeca catsatangcá šmochjácheuaye, jtenámochese, ntšamo cach tšengaftangbe pamíllanga puerte bonshanánaca šmondětsacheuanaycá.

<sup>27</sup> Cbontsamēnda quem tsbuanácha nyetsca Jesucristbeñe ošbuáchiyēnga chašmēbuáliama, y chca séntsama, Běngbe Utabná chca jamama šojanmandáyeca.

<sup>28</sup> Atše séntseimpadana Běngbe Utabná Jesucristo, chaoma tšabe bendicionēnga tšengaftangbeñe chaotsemnana.

## 2 Tesalonicenses

### Jacheuayama

**1** Atše Pablo, Silvano y Timotéoftaca, quem ts-buanácha sentsabiamná tsëngaftangbiamá, chë Tesalónica bëts puebloca Jesucristbeñe ošbuáchiyëngbiamá, tsëngaftanga Bëngbe Bëtsá chë Taitá y Bëngbe Utabná Jesucristoftaca cánýiñe mo canýacá šmognënga. <sup>2</sup> Atše sëntseimpadana Bëngbe Bëtsá, chaoma tsšabe bendicionënga tsëngaftangbeñe chaotsemnama, y tsëngaftangbe ainaniñe tsšabe ebionana chašmotsebomnama.

### Cristo chaojésabo ora, ntšamo entšanga tmojamama Bëngbe Bëtsá echanjayana

<sup>3</sup> Jesucristbeyeca bëngbe catsátanga, šontsamna nyets tempo Bëngbe Bëtsá tsëngaftangbiamá jtsatschuanayana, ntšamo tsëngaftangbiamá jamama šojtsëtocancá, er tsëngaftanga cada te más os-buáchiyana šmontsebomna, y ntšamo tsëngaftanga nyetscanga šmojtsebobonshana, tempscama más yojtsemna. <sup>4</sup> Tsëngaftangbe ošbuáchiyama y bonshánama, bënga nyets tempo oyejuayënga fchandbëtsemna, chë ínÿenache Bëngbe Bëtsábeñe os-buáchiyëngcá enefjuanëngbeñe tsëngaftangbiamá jóyebuambayama. Bënga fchandbëtsoyebuambnaye ntšamo tsëngaftanga inÿetsá ntjatsjuabnycá Jesucristo šmëstonama, y ntšamo tsëngaftanga chábeñe tša šmošbuachémnaca, masque ínÿenga tša cmécamena y chašmosufrima bëtscá imojtsama, tsëngaftanga Jesucristbeñe ošbuáchiyënga bëtsemnama. <sup>5</sup> Tsëngaftanga chca Cristo šmëstonayeca, corente entsinÿinÿena Bëngbe Bëtsá nyetsca soyënguiñe tsábá amá yomnama, y entšanga ntšamo tmojamama tsábá o ndoñe tsábá bëtsemnama jayanama ora, cha chca echanjayana ntšamo entšanga tmojtsomerecencá. Y chca entsayana tsëngaftanga aíñe merecido šmot-sobuájoñe chabe amëndayoye jamashënguama ca; y mora, tsëngaftanga choye jobenayama jashjanguama šmojtsamama, ínÿenga imojtsama chašmotsesufrinama.

<sup>6</sup> Bëngbe Bëtsá echanjama ntšamo jamama ibomncá; echanjama chë tsëngaftanga chašmosufrima imojtsamënga bëtscá chamosufrima; <sup>7</sup> y echanjama tsëngaftanga y bënga chë mondësuftrinëngbiamá, ndoñe más chamondëtseufrinama. Cha quem soyënga echanjama, Bëngbe Utabná celoca chaojábobocna ora. Cha chabe puerte obenana bomna angelëngaftaca echanjabo, y chora bëtscá iñetšënga echántsemna.

<sup>8</sup> Cha echanjabo chë Bëngbe Bëtsábioye jtsabuatmama ndoñe montsebošënga jabácastigayama, y chë tsšabe noticiënga Bëngbe Utabná Jesusbiamá ndoñe montsuenanëngbioynaca. <sup>9</sup> Chënga Bëngbe Bëtsá echanjácastigaye, nyetsca tescama jtsapochócace; y Bëngbe Utabná bentšana bënoca mochantsemnënga, y ndocna te quemochatobenaye jinÿama Bëngbe Utabná tša bëtsá y obená bëtsemnama. <sup>10</sup> Quem puerte uámana te, Bëngbe Utabná chaojésabo ora, nyetsca chabe entšanga, nyetsca chábeñe os-buáchiyënga cha mochántsebuchuanaye y mochántsechamo: “¡Tša obená cha yomna ca!” Y tsëngaftanga chëngaftaca šmochántsemna, er tsëngaftanga šmontsanošbuaché bënga ndegombre fsënjántatšëmbo soyënguiñe, chë bënga tcbonjanabuayená soyënguiñe.

<sup>11</sup> Chiyeca, chca chaotsemnama, nyets tempo Bëngbe Bëtsábioye tsëngaftangbiamá fsëndëim-padana merecido bomnënga chácmabiamama, chë vida chašmotsebomnama, ndayama cha tcmójúbuaja, y chabe obenánaca bëtscá chaoma tsëngaftanga chašmobená nyetsca tsšabe soyënga ntšamo šmojtsejuabnacá jamama, y chašmobená jamama ndaye soyënga ntšamo šmojtsamcá, Jesucristbeñe šmojtsošbuáchema. <sup>12</sup> Chca jtsamëse, tsëngaftanga šmochanjínÿanÿiye Bëngbe Utabná puerte bëtsá y uamaná bëtsemnama, y cha echanjama tsëngaftanga más uamanënga chašmotsebomna. Chca echanjopása, er Bëngbe Bëtsá y Bëngbe Utabná Jesucristo tsëngaftangbiamá tsšabe juabna ibobomna.

### Chë Bëngbe Bëtsabe contra yomná

**2** <sup>12</sup> Mora atše sëntseboše Bëngbe Utabná Jesucristo jésabama orscama jáuyanama, chë bënga cháftaca tsbanánoca jteninÿenama ora. Básefta entšanga imojtsichamo chë bëts uámana te, chë Bëngbe Utabná jésabama te, ya tojóshjango ca; pero cbontsaimpadana, Jesucristbeyeca catsátanga, bëtscá šmochtsentsëna chënga ndoñe chamondobená jamana tsëngaftanga inÿetsá juabna tsëngaftangbe ainaniñe chašmátsbomnama. Ndoñe šmatjóyeunaye nderado nda mëntšá chacmojtsëtsësná ora: “Canÿe Bëngbe Bëtsabe juabna oyebuambnaya šonjáuyana chë Bëngbe Bëtsabe uámana te ya tojóshjango ca” o “canÿa chca šonjabuayená ca” o “Páblëbiocana ts-buanácha fsënjushache y chiñe entsayana chë te ya tojóshjango ca”. <sup>3</sup> Bëtscá šmochtsentsëna ndocná tondayeca chacmondáingñema. Er chë Bëngbe Utabn-

abe uámana te cabá ndóshjango ora, mallajta entšanga Bëngbe Bëtsabe améndayama contra mochántsemna, y chë Bëngbe Bëtsabe contra yomná echanjábocna. Y cha entsemna nda ibojtsemna infier-noca pochocaná jtsemnama. <sup>4</sup> Cha Bëngbe Bëtsabe contra echanjóyebuambaye, chë ndëmuanýengbiama y ndaye soyëngama entšanga imojuabná diosënga imomnama contra echanjóyebuambaye. Chentšana cha echanjayana chëngbiama más obená yomna ca. Y Bëngbe Bëtsabe bëts yebnóynaca cha echanjá-mashëngo, choca echanjót'bema y entšanga echantsëtsësnaye ndegombre cha Bëngbe Bëtsá yojtsemna ca.

<sup>5</sup> ¿Chë soyama tšëngaftanga ndoñe šmonden-abouínýna? Atše cabá tšëngaftangaftaca sënjamna ora, chama sënjanoyebuambná. <sup>6</sup> Y tšëngaftanga šmondétatšëmbo, nda mora yojtsama chë Bëngbe Bëtsabe contra yomná ndoñe chaondonýnama, cabá chë tempo chca jopásama ndóshjango ora. <sup>7</sup> Mora ya mallajta entšanga puerte bacna soyënga tmojontšë amana, ndoñe ntšamo Bëngbe Bëtsá tojayancá chënga jamama yojtsamna ca, y bënga chë soyënga josértama ndoñe quemuátobena, ndayá nýe Bëngbe Bëtsá chca šojinýanýese; pero ntšamo tcbonjauyancá chë Bëngbe Bëtsabe contra yomnabiamna ndoñe queochatëchnëngo, nýa nda chë soyënga ndoñe chaondëtsemnama yojtsamábioye Bëngbe Bëtsá chabojtsejuaná ora aíñe. <sup>8</sup> Chora chë Bëngbe Bëtsabe contra yomná echanjábocna; pero Bëngbe Utabná yochjésabo ora, echanjángouo y echanjama cha chaóbanama; y tša buashinýinýanánaca y obenánaca echanjábocnama, chábioye bochantsepochóca. <sup>9</sup> Chë Bëngbe Bëtsabe contra yomná, Satanasbe obenánaca echanjabo, y entšanga bëts obenana echanjínýanýiye, y chë bëts soyëngaca entšanga ingñénënga mochántsemna. <sup>10</sup> Cha ba bacna soyënga echanjama ntšamo Bëngbe Bëtsá ndoñe yondbošcá, chca, ba entšángbioye nýetsca soyënguiñe jáingñama. Y chënga ndegombre pochocánënga mochántsemna; Bëngbe Bëtsá chca echanjama, chënga chë ndegombre soyënga Jesucristbiama chëngbe ainaniñe ndoñe tmonjanóyëngacñe causa, y chë soyëngama mo uámana soyëngcá ndoñe tmonjanjuabó causa, chca, atsebácanënga jtsemnama. <sup>11</sup> Chca causa, Bëngbe Bëtsá entseleséncia entšanga ingñénënga chamotsemnama, y chë ndoñe ndegombre soyënguiñe chamotsošbuáchema. <sup>12</sup> Bëngbe Bëtsá chca echanjama, nýetscanga chë ndegombre soyënguiñe Jesucristbiama ndoñe tmontsošbuáchenga, chë bacna soyënga amama oyejuayënga tmojtsemnënga, chë nýetsca tescama castigo chamotsebomnama jayanama.

### Bëngbe Bëtsá šojabacacá atsebácanënga jtsemnama

<sup>13</sup> Pero bënga šontsamna nýets tempo Bëngbe Bëtsá jtsatschuanayana tšëngaftangbiama, Jesucristbeyeca catšátanga, Bëngbe Utabnabe bonshánënga. Bënga, Bëngbe Bëtsá fsëndëtschuaná cha quem luare cabá ndobojátša ora, atsebácanënga chašmotsemnama tc-

mojánabacacama. Bëngbe Bëtsá tcmojatsebacá er chë Uámana Espíritu Bëngbe Bëtsabe entšanga tcmojábiamna, y tšëngaftanga chë ndegombre soyënguiñe šmojtsošbuaché. <sup>14</sup> Chë tšabe noticiënga bënga cbondábuaiynayeca, Bëngbe Bëtsá tcmojúbuaja chábenga chašmotsemnama. Cha tcmojúbuaja Bëngbe Utabná Jesucristbe obenana y buashinýinýanánëncaca chašmotsebomnama.

<sup>15</sup> Chcasna, ndocna te šmattsajbaná ošbuáchiyana chë ndegombre soyënguiñe ntšamo tcbonjabuatambacá, cach tšëngaftangbeñe jóyebuambayëse y tsbuanácha jubuábiamëse, y ndocna te inýetšá šmatjät-sjuabnaye. <sup>16</sup> Bëngbe Bëtsá puerte tšabia endmë-nayeca, cha šuababuánýeshana y tojama bënga sempre añemo ainaniñe chamotsebomnama y chë mochjóyëngacñe tšabe soyëngama corente jtsošbuáchiyëse chamotsobátmanama. Chábioye y Bëngbe Utabná Jesucristbioye fsëntseimpadana, <sup>17</sup> chata chaboma tšëngaftanga bëtscá añemo ainaniñe chašmotsebomnama, y tšëngaftanga nýets tempo chašmotsobena ntšamo tšabá yomncá jtsichámuama y jtsamama.

### Bëngbiama Bëngbe Bëtsá šmochtseimpadana

**3** Y morna, Jesucristbeyeca bëngbe catšátanga, Diosmanda bëngbiama Bëngbe Bëtsá šmochtseimpadana, nýetsca luarenache más ba entšanga chamotsobenama Bëngbe Bëtsabe buayenánana jouenama, y chënga chë soye chamóyëngacñama, y puerte chamotserrespetánama, ntšamo tšëngaftanga šmonjanmca. <sup>2</sup> Bëngbe Bëtsánaca šmochtseimpadana cha chašotsëbuáuyayama, y chë puerte bacna entšanga ndoñe chamondobenama jamama bënga fchaisufrima, er nýetscanga ndoñe quemochatošbuáchiye chë fsëndbuaiyná palabriñe. <sup>3</sup> Pero Bëngbe Utabná sempre jtsamana ntšamo tojayancá, y cha echanjama tšëngaftanga más chábeñe chašmotsošbuáchema, y ndoñe nýe cachcá quec-maténýa chë bacna soyënga mandayá nýe ntšámncaca ndoñe chacmondáborlama. <sup>4</sup> Y Bëngbe Utabná entsama bënga ndegombre ainaniñe fchaitsejuabnama, ntšamo bënga tcboganamëndacá mora šmojt-samama y cachcá sempre šmochtsamámncaca. <sup>5</sup> Bënga, Bëngbe Bëtsá fsëntseimpadana, Bëngbe Utabná benache chacmanýanýé bonshánana jtsebomnama ntšamo Bëngbe Bëtsá endbomncá, y chašmojtseuf-rina ora, corente añemo chašmotsebomnama, ntšamo Cristo tojansufrí ora yojanbomncá.

### Nýetscanga entsamna jtsetrabájayama

<sup>6</sup> Jesucristbeyeca catšátanga, Bëngbe Utabná Jesucristbe mándoca cbontsamënda, ndëmua Jesucristbeñe ošbuachiyá jatrabájama ndoñe tontseboše y ndoñe tontsiyena ntšamo bënga tcbonjabuatambacá, cháftaca ndoñe šmattsóyebuambnaye. <sup>7</sup> Cach tšëngaftanga tšabá šmondétatšëmbo ntšamo cmojtsamna jtsiyenana, ntšamo bënga fsënjoyencá: bënga tšën-



gaftangbeñe fsënjanijena ora, nÿe ntjatrabajacá oyënjayënga ndoñe queftsjatsmëna, <sup>8</sup> ni ndocnabe saná chibiáísese, tondaye ntabuenaycá. Inÿetšá enjamna; cada te bnëtë y ibeta jabuache fsënjantrabája, chca, tšëngaftanga ndoñe chacmondétsamnama bëngbe uajabótama bënga jatatšatnayama. <sup>9</sup> Y ndegombre, bënga derecho fsënjánbomna tšëngaftanga jamëndadama chašcújabuachama; pero masque chca, bënga jabuache fsënjantrabája tšëngaftanga chašmotsetatšëmbuama ntšamo yomna jtsiyenama, y chca chašmotsamama. <sup>10</sup> Bënga tšëngaftangaftaca fsënjamna ora, mëntšá tcbonjanamëndá: Nda ndoñe tontseboše jatrabájama, cha cach ndoñe chaondétsesá. <sup>11</sup> Chca fsëntsichamo, er bënga fsënjátatšëmbona, báseftanga tšëngaftanguentšënga imojtsiyena tondaye ntsamcá, pero tša chë ínÿengbe soyënguiñe jtsontremetënese. <sup>12</sup> Chca oyena entšángbioye fsëntsabuayiyiná y fsëntsamëndá Bëngbe Utabná Jesucristbe mándoca, natjémbana cachëngbe vida onguayiyiñe chamotsotrabáña.

<sup>13</sup> Jesucristbeyeca catšátanga, ndoñe chacmondëumantšé tšabe soyënga amana. <sup>14</sup> Nderado nda ntšamo

quem tsbuanáchañe fsënjayancá ndoñe tontsuenana, šmochjarrepára nda cha yojtsemna y cháftaca ndoñe šmattsencuëntaye, chca, cha chaotséuatjama. <sup>15</sup> Mo canÿe uayayacá ndoñe šmattsonÿaye; šmochjabuayená mo canÿe catšatcá, chca ndoñe chaondétsamama.

### Jtadióšoftanama

<sup>16</sup> Bëngbe Utabná fséntseimpadana, cha, chë entšanga tšabe ebionana ainaniñe chamotsebomna iuamá, chaoma tšëngaftanga nÿets tempo y nÿetsca tescama chca chašmotsebomnama. Bëngbe Utabná tšëngaftangaftaca chaotsemna.

<sup>17</sup> Nÿe quem palabrenga tšëngaftanga jacheuayama cach atšbe cucuátšeca sentsabiamná. Atše chca sëndbauapochóca atšbe tsbuanachangá juabemama; ntšamo muentše entsabemancá entsinÿinÿiná quem tsbuanácha atšbiácha iuamnama.

<sup>18</sup> Atše, Bëngbe Bëtsá séntseimpadana, Bëngbe Utabná Jesucristo chaoma tšabe bendicionënga tšëngaftangbeñe chaotsemnama.

# 1 Timoteo

## Jachuayama

**1** Atše Pablo, Jesucristbe ichmoná sëndmëna. Bëngbe Bëtsá bëngbe atsebacayá endmëna y Bëngbe Utabná Jesucristo endmëna ndábeñe bënga, puerte jtsošbuáchiyëse mondobátmana ba soyënga bëngbiama cha yochjamama. Atše Jesucristbe ichmoná sëndmëna, er chata tbojanmandá atše chca jtsemnama. <sup>2</sup> Timoteo, atše quem tsbuanácha cbontsabobiamná. Atše Bëngbe Bëtsabe soyëngama entšanga sënjanabuayiyiná ora, aca Jesucristbeñe tconjanošbuaché, y chca, aca mo atšbe ndegombre uaquiñacá tconjanóbema. Atše sëntseimpadana, Bëngbe Bëtsá Bëngbe Taitá, y Cristo Jesús Bëngbe Utabná, chaboma aca tšabe bendicionënga chacotsebomnama, chata chacmolastemama y ainaniñe tšabiána ebionana chacotsebomnama.

### Pablo chë ndoñe ndegombre soyënga abuátambayëngbiama chënga tojanabuayená

<sup>3</sup> Ntšamo chë Macedonia luaroye chocana sënjëftsanbocna ora tcbonjanimpadacá, mora cachiñe cbochtësimpáda. Efeso puebloca cochjoquéda, básefta entšanga chácuamëndama chë ndoñe ndegombre soyënga ndoñe chamondëtsabatambama, <sup>4</sup> ni nyets tempo ndoñe nye chamondetsejuabná anteungbe cuentëngama, ni chë ba uabemana uabáinënga chë tempsca bëts taitangbiama. Er nye chca yapa jesejuabnayanentšana, jóbocnana nye ínÿengaftaca jabuachana enatsëtsnayıñe, y chca chëngbioyë tondayama ntjujabuáchana ntšamo Bëngbe Bëtsá jama ma yojuabnacá chaósertama. Chë soyna nye chábeñe jtsošbuáchiyëse jobenayana josértana.

<sup>5</sup> Chca mando entsemna nyetscanga chamotsenbobonshánama, y chë bonshánana endóbocana nda chabe ainanentše ndocna bacna soyënga tondbomná bentšana, ntšamo tojtsamcá tšabá yojtsemna ca ainaniñe tojtsejuabná y tojtsetatšëmbuábentšana, y Jesucristbeñe ndegombre ošbuachiyábentšana.

<sup>6</sup> Báseftanga tmojtsajbaná chca jtsemnana y inÿe soyëngama tmojontšë juabnayana; chíyeca chënga mora imojtsentšena nye ndayámnaca ndoservena soyëngama enatsëtsnayana. <sup>7</sup> Chënga jtsebošana Bëngbe Bëtsabe ley abuátambayënga jtsemnama, pero chënga ndoñe yontsósertana ni ntšamo imojtsabatambacá, ni mo ndayánaca ntšamo chënga tmojtsichamcá, mo chë soyënga ndegombre cuaftsemncá.

<sup>8</sup> Pero bënga mondëtatšëmbo chë leyënga tšabá yomnama; tšabá endmëna, chë ndayama chë leyënga tmojuamcá entšá chë leyëngaca tojtsamëse. <sup>9</sup> Bëngnaca mondëtatšëmbo, chë leyënga ndoñe tmonjuama chë nyetsca soyënguiñe tšabá amëngbiama. Chë leyënga tmonjuama quemëntša entšanga jácastigama: ntšamo leyënguiñe ndoñe tontselesenciancá amënga y ntšamo Bëngbe Bëtsá yobošcá ndámënga, chë Bëngbe Bëtsá ndoñe imondadoránënga y bacna soye amënga, Bëngbe Bëtsá ndoñe mondërrespetánënga y Jesucristbeñe jtsošbuáchiyana y Bëngbe Bëtsá jtsadoránana tondaye yondoservena ca juabnayënga, cachabe taitá o mamá obánayënga y ndëmuanÿënga imomna entšanga obánayënga, <sup>10</sup> boyabásaftaca o shembásaftaca bacna soye amënga y boyabásënga cach boyabásëngaftaca bacna soye amënga, entšanga enënga nye ínÿabiama nyets tempo chamotseservënama, bosterënga y chë nye bonamente Bëngbe Bëtsabiama júrayënga; chca entsayana, chë leyënga yomna jácastigama nyetscanga ndëmuanÿënga ndoñe tmonsama ntšamo chë ndegombre buatëmbana soyënguiñe iuayancá. <sup>11</sup> Ntšamo muentše chë leyëngama tijayancá, entsebuatëmbana chë Bëngbe Bëtsábiocana puerte tšabe noticiënguiñe, chë ndegombre buatëmbana soye; Bëngbe Bëtsá, chë corente bendición bomná, šonjichmó chë buayenánana entšanga jabuátambama.

### Pablo Bëngbe Bëtsábioyë tbojtanchuá, tbojanlastemama

<sup>12</sup> Atše, Bëngbe Utabná Jesucristo sëndëtschuaná, er cha tojanjuabó, ntšamo cha šojanmandacá jobedësama atše tsjëtseprontanama, y chíyeca šojanábuayana atše chabiama chaitrabajama; y cha endmëna nda inétsama atše obenana chaitsebomnama chë trabajo jamama. <sup>13</sup> Cha chca átšëftaca tonjanma, masque tempo atše chabe contra ba soyënga sënjanichamo, chabe ústonënga sënjanécamena, y chabiama tondaye respeto ntsebomncá sënjanenobuena. Pero Bëngbe Bëtsá šonjanlastemá, er atše, Jesucristbeñe ošbuachiyá cabá ndoñe quetsjátanmëna, y chca, atše ndoñe quetsjátantatšëmbo ndayá tsjánamama.

<sup>14</sup> Y chca, Bëngbe Utabná ba tšabe bendicionënga atšbiama tonjanma, y chábeñe ošbuachiyá šonjábema, y tonjanma atše cha chaitsebobonshánama y ínÿengbioynaca. Cha chca bëngbiama tojama, bënga cánÿiñe mo canÿacá Cristo Jesúsëftaca bëtsemnayëca.

<sup>15</sup> Ntšamo chanjayancá ndoñe n̄ye bostero soye quenátsmēna, y n̄yetscanga entsamna chca ndegombre bétsemnama jtsejuabnayama: Cristo Jesús quem luaroye tonjánabo, bacna soye amēnga jabátsebaca-ma, y chē bacna soye amēnguentšē atšē chē más bēts bacna soye amá sēndmēna. <sup>16</sup> Chiyeca, Bēngbe Bētsá šonjanlastemá, jin̄yan̄iyama cha puete uantado entšangaftaca yomnama. Y chē soye ín̄yengbioye tojanin̄yan̄yé, chē n̄yetsca tescama yomna tšabe vida jtsebomnama, chē chábeñe mochtsanošbuachéngbioye; chca tonjanin̄yan̄yé cachá átšeftaca uantado jtsemnēse, atšē n̄yetscangbiama chē más bēts bacna soye amá jtsemnēse. <sup>17</sup> ¡Entšanga n̄yets tempo chamotsin̄yan̄ná, chē Utabná n̄yets tempo mandayá y puete bētsá y obená yomnama! Cha endmēna chē ndocna te echanjēftsobaná, chē entšanga ndoñe ntobenanana jin̄yamá y chē n̄ye can̄ye Bēngbe Bētsá yomná. Chca chaotsemna.

<sup>18-19</sup> Timoteo, aca mo atšbe uaquiñacá condmēna. Atšē tcbonjaimpadá, ntšamo tcbonjauyancá entšanga chacúyanama, ntšamo báseftanga Bēngbe Bētsabe juabna oyebuambnayēnga acbiama tmojanayancá, y chiñe jtsejuabnayēse chē Jesucristbe soyēngama chacopeliá y n̄yets tempo chca chacotsama, Jesucristbeñe puete jtsošbuáchiyēse, y lempe ntšamo tcojtsamama tšabá yojtsemnama ainaniñe jtsetatšēmbēse. Báseftanga, chēnga ndoñe tšabá imonjétsama ca chē ainanoca juabnēnga tmojanayana ora, chē soye ndoñe tmonjanuena y chē causa, Jesucristbe soyēnguiñe ošbuáchiyana tmojtsanajbananga y tmojanontsé in̄ye buatēmbana soyēnguiñe jtsošbuáchiyana. <sup>20</sup> Chca tonjopasá Himeneo y Alejandroftaca, y atšē sēnjalesenciá Satanás chaoma chata chabosufrima; y chca, chata chabuatsjin̄ye Bēngbe Bētsabiama ndoñe bacá ntsóye-buambnayana.

### Pablo tojanabuayená ntšamo Bēngbe Bētsá jtsadorá-nama

**2** N̄yetsca soyama más cbontsaimpadana ndayá chē Jesucristbeñe ošbuáchiyēnga Bēngbe Bētsáftaca chamojtsencuēnta ora, n̄yetsca soyēngama ntšamo tojtsējabotcá cha chamotseimpadana, n̄yetsca entšangbiama, y cha sempre chamotsatschuaná. <sup>2</sup> Entsemna, n̄yetscangbe tšabiama Bēngbe Bētsá jtseimpadánama, pero masna quem luarentša reyēngbiama y in̄ye mándayēngbiama, chca, n̄yetscanga puete natjēmbana jtsiyenama chamuetsobenama, y n̄yetsca soyēnguiñe tšabá jtsamēse, Bēngbe Bētsá jtsatschuanayama, y entšangbe juabniñe tšabá chamotsemnama. <sup>3</sup> Chca jtsamana tšabá endmēna, y Bēngbe Bētsá, bēngbe Atsebacayá, chama jtsóyejuayana; <sup>4</sup> y chca jtsóyejuayana, er cha endboše n̄yetsca entšanga atsebácanēnga chamotsemnama y chē ndegombre buayenánana chamotsábuatmama. <sup>5</sup> Chca n̄yetsca entšangbiama endmēna, er n̄ye can̄ye Bēngbe Bētsá n̄yetscangbiama endmēna, y n̄ye can̄ya endmēna nda yobena jamama entšanga tempcá tšabá Bēngbe Bētsáftaca chamotsemnama; cha endmēna Jesucristo,

cach entšá. <sup>6</sup> Er Jesucristo, mo can̄ya ín̄yenga játsebaca-ma cuaftopagacá, chabe derecho vida jtsobomñama cachcá tojanon̄yá y tojanóbana, chca, n̄yetsca entšanga chamotsobenama atsebácanēnga jtsemnama. Chē soye cha tonjanin̄yan̄yé, n̄ya chama tempo yojtsemna ora, chē Bēngbe Bētsá n̄yetsca entšanga atsebácanēnga chamotsemnama yobošama. <sup>7</sup> Bēngbe Bētsá chca n̄yetsca entšangbiama yobóseyeca, Jesucristo šonjanábuayana chabe ichmoná jtsemnama, chabe soyēnga entšanga jtsabuayiynayama; ndegombre soye sēntsoyebuambná, ndoñe quetsátsbostero. Šonjanmandá chē ndegombre buayenánana chē ndoñe judiēngbioye jabuátambama, y chēnga entsamna chiñe jtsošbuáchiyana.

<sup>8</sup> Ntšamo sēnjayancá, atšē sēntseboše n̄yetsca chē Jesucristbeñe ošbuáchiyēngcá enefjuana luarēnguenache, boyabásenga Bēngbe Bētsáftaca chamotsencuēnta, y chora celoye, Bēngbe Bētsábioye cucuatšē chamatsbaná; pero chamna, ainaniñe bacna soyēnga ntsebomncá, ín̄yengaftaca ntjatenjayanaycá, y ín̄yengaftaca jabuachana ntjatenatsētsnaycá chēnga chamotsemna.

<sup>9</sup> Y atšē sēntseboše shembásenga entšayangá chamuatíchéjtjo, mo chē tšabe shembásenga mondbetsichétjoncá, ndoñe n̄ye entšanga chamotsēbuáuatjama y ntšamo tmojtsichétjonama chēngna uámanēnga imomna ca entšanga chamotsejuabnama. Ndoñe quenátamna jtsenóbotamnayana, n̄ya mo chca chquēcnēnga jtsemnēse, ni castellano soyēngaca o uámana fjantse ndētšbēngaca, o yapa uámana entšayangaca, chca, n̄ye entšanga jin̄yama tšabá jtsemnama. <sup>10</sup> Pero aíñe mo chē Bēngbe Bētsá adóraye shembásenga mondbetsamcá jtsamēse, chē tšabe soyēnga jtsamana.

<sup>11</sup> Nderado nda tojtsabuatambá ora, shembása bontsemna jtsatsjēndayana, chca ora tondaye ntjatichamcá, y chentša mándayēnga chaotsayaunana. <sup>12</sup> Atšē ndoñe quichatslesencia, can̄ye shembása boyabásenga chaotsabuatambá, ni chaotsamēnda. Can̄ye boyabása tojtsabuatambá o tojtsamēnda ora, shembása ndocá chaondétsichamo. <sup>13</sup> Chca chaotsemna, er Bēngbe Bētsá natsana Adán tbojanpormá, y chentšana Eva; <sup>14</sup> y er Satanás Adánbioye ndoñe tbonjaningñé, ndayá chē shémbioye; y chca tbojaningñé ora, chē shema tojanma ntšamo Bēngbe Bētsá ndoñe tbonjanlesenciácá. <sup>15</sup> Pero shembása atsbocaná echántsemna, básenga quem luaroye endbaúshejanguyeca, pero chamna, aíñe n̄yets tempo Bēngbe Bētsábeñe tojtsóšbuáchese, n̄yetscanga tojtsababuán̄yeshanēse, cachá n̄yetsca soyēnguiñe jenomándama tojtsobenēse, y n̄yets tempo tšabe soyēnga tojtsamēse, ntšamo Bēngbe Bētsabe entšanga mondbetsamcá.

### Ntšamo ibojtsemna chē ošbuáchiyēngcá enefjuanéngbeñe mandayá

**3** Mēntšá ndegombre endmēna: nderado nda tojtseboše can̄ye trabajo jtsebomnama, cán̄yentšē ošbuáchiyēngcá enefjuanentšē chē in̄ye ošbuáchiyēn-

ga jtsaméndayama, cha ndegombre yojtseboše canye puerte tšabe trabajo. <sup>2</sup> Chiyeca, chë ošbuachiyëngcá enefjuanëngbe mandayá bontsemna jtsiyenana ba tšabe soyënga jtsamëse, chca, cha ndoñe tšabá yontsama ca ndocná chaondétsichamuama. Y mëntšánaca cha bontsemna jtsemnama: nye canye shembásabe boyá; ntšamo jtsiyenama tšabá juabnaya chaotsemna, cachá nyetsca soyënguiñe jenomándama chaotsobena, y chaotsetátšëmbo ndayá ibomna tšabá jtsamana; chaotseprontana chabe yebnentše posada entšanga júyentšamiamama, y chaotsobena botamana abuatambayá jtsemnama. <sup>3</sup> Ndoñe yapa tmoýá o penzentero chaondétsemna; pero chaotsemna tšabá mandbomná, entšanga natjémbana chamotsiyenama bošá, y ndoñe chaondétsejuabná nye crocénana jésembomnama. <sup>4</sup> Chaotsetátšëmbo ntšamo nyetsca chabe yebnentša entšanga botamana jtsaméndayama, y chaoma chabe básenga chë ntšamo cha tojayancá chamotsamama, ndocna te stëtsoye chamondéquadama; <sup>5</sup> er, nda cachabe yebnentša entšanga ndoñe tontsobena jtsaméndayama, chca, ntšamo nantsobena chë ošbuachiyëngcá enefjuanënga jtsanýenama? <sup>6</sup> Cha ndoñe chaondétsemna cabá mora cuenta Jesucristbeñe ošbuachiyá; aíñe chca chë ošbuachiyëngcá enefjuanëngbe mandayá tojtsemnëse, nderado nye cachá uámana entšá nantsenobiamnaye, y ntšamo Bëngbe Bëtsá Satanásbioye tbonjancastigacá, chca bétsemnama, cach soyama Bëngbe Bëtsá chë entšábioye buanjacastíga. <sup>7</sup> Chánaca bontsemna jtsiyenana jtsamëse, y chca chaojtsama ora, chë Jesucristbeñe ndošbuachiyënga tšabá chabiamama chamotsichamo. Chë entšá ndoñe chca tontsamëse, chënga chabiamama mochanjayana ndoñe tšabá yontsama ca, y Satanás echanjama cha chabócochëngo bacna soyënga jamama.

#### Ntšamo ibojtsemna chë ošbuachiyëngcá enefjuanënga ujabuachaná

<sup>8</sup> Cachcá, chë mándayëngbe uajabuáchanënga mëntšá entsamna: uámana entšangcá nyetscanga chamotsétabna, uta palabra ndbomnënga; ndoñe yapa vínoye chamondétsetmó, y ndoñe chamondétseboše nye paselo becá crocénana jtsebomnama. <sup>9</sup> Chënga entsamna ndegombre jtsošbuachiyana chë Bëngbe Bëtsá tojinýanýé soyënguiñe, chë ndayiñe bënga mondošbuaché, chëngbe ainaniñe inýetšá juabnënga ntjatsbomncá. <sup>10</sup> Natsana, chëngbiamama botamana šmochjshauarrepára jtsetatšëmbuama chënga aíñe o ndoñe montsobena mo chë ošbuachiyëngbeñe mándayëngbe uajabuachanëngcá joséviama. Chënga nyetsca soyënguiñe tšabá tmojtsemnëse, šmochjálesenciaye chiñe chamoservema. <sup>11</sup> Cachcá, chë shémanga mëntšá entsamna: nyetscangbiamama mo uámana entšangcá utabnënga, ndoñe uayátsenayënga, cachënga nyetsca soyënguiñe jenomándama obenënga, y nyetscañe tšabe palabra bomnënga. <sup>12</sup> Canye uajabuachaná chaotsemna nye canye shembásabe boyá, y chaotsetátšëmbo ntšamo chabe básenga y nyetsca

chabe yebnentša oyenënga jtsaméndayana. <sup>13</sup> Chë uajabuáchanënga tšabá chiñe tmoservënëse, canye uámana puesto mochanjashjache, y chënga mochantsobena bëts añémoca jtsóyebuambnayama ntšamo Cristo Jesúsbeñe tmošbuáchemama.

#### Ndayá Bëngbe Bëtsá bënga šojinýanýecá, canye bëts buatëmbana soye endmëna

<sup>14</sup> Atše sëntsobátmana pronto chjobenaye jama aca jauatsëtsayama; pero chca cbontsabobiamná, <sup>15</sup> nderado atše betesco jama ndoñe sënjobenase, chacotsetatšëmbuama ntšamo canya ibojtsemna nyetsca chë Bëngbe Bëtsábënga imomnéngaftaca. Chënga mond-mëna chë Jesucristbeñe ošbuachiyënga, chë Bëngbe Bëtsá Ainabe básënga. Chënga chë Bëngbe Bëtsabe ndegombre soyënga mondbomna chë más uámana puestoca quem luarentše, y tša mondëntšena chama ínýengbioye jáyënjana. <sup>16</sup> Nya ndegombre endmëna, Bëngbe Bëtsá soyënga šojinýanýé, y chë soyëngaca bënga montsobena jtsiyenana, chë Bëngbe Bëtsabe entšanga imomnéngcá; chë soyënga bëngbiamama ndegombre bëts buatëmbana soye endmëna, y chë buatëmbana soye mëntšá endmëna:

Cristo quem luarentše cach entšacá entšángbioye tojábëmbuacna.

Chë Uámana Espiritu tonjinýanýé cha nyetsca soyënguiñe tšabá amá yomnama.

Angelënga cha tmojáninýe, y chabiamama ba luarënguentša entšángbioye tmojanabuayená.

Ba entšanga quem luarentše chábeñe montsanošbuaché, y Bëngbe Bëtsá celoye tbontanatsbaná, cha puerte bëtsá y obená yomnama jinýanýiyëse.

#### Báseftanga chë tšabe benachentšana mochtsojuánañe

**4** Uámana Espiritu, nyetscanga catafjosertaycá tojayana, quem luare jopochócama tempo chaojtsobeco ora, básefta entšanga camochtsajbaná ošbuachiyana chë ndayiñe bënga Jesucristbiamama mondošbuaché soyënguiñe ca. Chëngna, espíritënga entšanga áingñayënga mochántsayauana, y chë ndoñe ndegombre soyënga chë bacna bayëjënga entšángbioye mochtسابuátambaye soyënguiñnaca. <sup>2</sup> Chca buatëmbana soye jtsóbocanana chë bacna entšanga ntšamo ndegombre tmojuabnacá ndinýinýnayëngbentsana y chë bosterëngbentsana. Chënga chca bacna soye tmojtsama ora, ainanoca ndoñe ntsejuabnayanama, ntšamo tmojamcá ndoñe tšabá yontsemna ca, er yapa bacna soyënga tmojama causa, chënga nye chca chëngbe ainaniñe jésejuabnayanama. <sup>3</sup> Quem entšanga ndoñe ntjaleséciana ínýënga chamotsobouamama, y jtsemándayana básefta sananga entšanga ndoñe chamondétsesama. Ntšamo chënga chiñe tmojtsebuatëmbacá ndoñe ndegombre soye ntsemnana, er Bëngbe Bëtsá chë sananga tojanama, Jesucristbeñe ošbuachiyënga y chë ndegombre soyënga

uabuátmenga chamóyëngacñama, Bëngbe Bëtsábioye chama jtsatschuanayëse. <sup>4</sup> Er lempe ntšamo Bëngbe Bëtsá entsanga chamosama tojamcá tšabá entsemna. Ndoñe queñátamna ndaye saná jtsaboténana, bënga chë saná tmojuáyëngacñe ora, Bëngbe Bëtsá chama tmojëtshuase; <sup>5</sup> er chca saná Bëngbe Bëtsábioye tšabá jtsinñana, cachá chca tojayánayeca, y bënga chë sanama cha mondbatschuayama.

### Jesucristbiama trabájayiñe canye tšabe oservená

<sup>6</sup> Aca, chë soyënga ošbuachiyëngbioye chacojtsabuátambase, aca Jesucristbiama trabájayiñe canye tšabe oservená cochántsemna. Y mo nda bëtscá añemo jtsebomnama botamana tojtsesacá, cachcá, ácnaca puerte ošbuáchiyana y ainaniñe bëts añemo cochántsebomna; chca echántsemna, chë bënga mondošbuaché buayenana soye aca icuatsjendá y icoye-unánayeca, y ntšamo chë tšabe buatëmbana soyënguiñe endayancá sempre icuámayeca.

<sup>7</sup> Pero ndoñe nye quem luarentša entsangbe cuentënga y ndoservena cuentënga cattsuenana. Ba soyënga cochjama aca bëts añemo ainaniñe chacotsebomnama, mo nda bëts añemo jtsebomnama cachabe cuérpoca ba soyënga cuaftsamcá, ntšamo Bëngbe Bëtsá jadórama yomncá jtsiyenama jtsamëse; <sup>8</sup> cachabe cuérpoca ba soyënga jamana más añemo jtsebomnama, aíñe batšatema endoservena; pero jtsiyenana Bëngbe Bëtsábioye jadórama yomncá jtsamëse, puerte enduámana y juajabuáchana nyetsca soyënga tšabá chaotsemnama; chca jtsamana puerte tšabá endmëna cachabe vidama quem luarentše, y chë inye vidócnaca. <sup>9</sup> Ntšamo tijayancá ndegombre entsemna, y nyetscanga entsamna jtsejuabnayana chca ndegombre bëtsemnama. <sup>10</sup> Y chë soyama bënga puerte mondëtrabája y mondësufrina, er chë Bëngbe Bëtsá Ainábeñe puerte mondošbuachéyeca, bënga mondobátmana cha yochjama soyënga bëngbe tšabiama. Cha endmëna chë nyetsca entsangbe atsebacyá, pero ndegombre masna, chábeñe ošbuáchiyëngbe atsebacyá cha endmëna.

<sup>11</sup> Ntšamo quem soyëngama tcbonjauyancá entsanga cochtsamëndaye y cochtsabuátambaye. <sup>12</sup> Ndoñe catjaleséncia, aca bobontse comnama, ndánaca chacmotsáboyënjama. Pero aíñe bëtscá cochtsama, chënga puerte chacmotserrespetánama, chca jtsamëse icoyenama jtsonñayëse, cachcá chamotsamama: botamana jtsóyebuambnayëse, nyets tempo tšabe soyënga jtsamëse, nyetscanga jtsababuánñeshanëse, Bëngbe Bëtsábeñe corente jtsošbuáchiyëse, y puerte tšabia jtsemnëse, ainaniñe ndocna bacna soye ndobomná. <sup>13</sup> Atše choca chaijashjanguëntscuana, cochtsentšena chë Bëngbe Bëtsabe uabemana palabrënga entsángbeñe jtsaláyama, y chënga jtsabuátambayama y jtsabuayinayama. <sup>14</sup> Acbioye Bëngbe Bëtsá obenana tcmojanatšetá tšabe soyënga jamama chacotsobenama, ošbuáchiyënga jujabuáchama. Bëngbe Bëtsabe juabna oyeambuambnayënga acbiama tmojanoyebuambá ora, y chë ošbuachiyënguentša bët-

sëjëmenga chëngbe cucuatšënga ábeñe tmonjancjá y Bëngbe Bëtsá acbiama tmonjanimpadá ora, chca tšेतana obenana tcojanóyëngacñe. Chë soye sempre cochtsinñena.

<sup>15</sup> As, aca cmontsemna sempre jtsamana chë soyënga ntšamo tcbonjauyancá. Cochtsentšena chë soyënga tšabá jtsamama, chca, entsanga chamobená jinñama, aca cada te más tšabá lempe cojtsamama. <sup>16</sup> Botamana cochtsantješna, aca chë tšabe soyënga jtsamëse cojtsiyenama, y chë tšabe buatëmbana soye inñyënga cojtsabuátambama. Cada te chca cochtsama, y chca, cach aca cochanjenájabuache atsbocaná jtsemnama y chë ácbioye ouenanëngnaca játsebacama.

### Ntšamo Timoteo ibojtsemna chë inye ošbuáchiyëngaftaca jtsemnana

**5** Bëtsëjëmenga ndoñe catjucácana; chca játamanna, cochjábuayenaye, chënga mo cach acbe taitá cuaftsemncá; y chë bobontséngaftaca cochjama, mo chënga acbe catšátanga cuaftsemncá. <sup>2</sup> Chë bët-sanana shembásëngaftaca tšabá cochtsemna, chënga mo cach acbe mamá cuaftsemncá; y chë tobiašëngaftaca cochjama, chënga mo acbe uabënganga cuaftsemncá; chëngaftaca cmontsemna puerte tšabia jtsemnana, chëngbiama ndocna bacna juabnënga ainaniñe ntsebomncá.

### Ošbuáchiyëngbenache viudanga tmojtsemna ora

<sup>3</sup> Chë ndegombre viudanga, chë ndocná mondbomna chaujabuachama, chënga cochtsarrespetana y cochtséjabuachana. <sup>4</sup> Pero canye viudá nderado básenga o nietënga tuabamna, chënga entsamna natsana jshauatsjinñana ndayá chënga chamotsamama Bëngbe Bëtsá yobošcá, cachëngbe pamíllanga chamotsarrespetánama, chëngbioye jtsanñenëse, y chëngbe bëtsëtsangaftaca tšabá chamotsama, ntšamo chënga chëngaftaca tmojanmncá, er chca jtsamama, Bëngbe Bëtsá jtsóyejuayana. <sup>5</sup> Chë ndegombre viudá, chë juajabuáchama ndocná tbondbomná, Bëngbe Bëtsábeñe jtsošbuáchiyëse, cha bochjuájabuachama jtsobátmanana, y nyets tempo jtseimpadánana, bnëté y ibeta, cha chabuájabuachama. <sup>6</sup> Pero canye viudá, nye quem luarentša entsángaftaca oyejuayá jtsemnama soyënga tojtsamëse, cha masque ainá tojtsemna, Bëngbe Bëtsabe bominñiñe mo canye obanacá jtsemnana, er chábioye ndoñe ntseservënana. <sup>7</sup> Lempe chë soyënga chamotsamama ošbuáchiyënga cochtsamëndaye, chca, ndocná ndocna bacna soye chëngbiama jatichámuama chaondëtsebomnama. <sup>8</sup> Er, nda cachabe entsanga y más, cachabe pamíllanga ndoñe tontsacuedana, cha chca jtsinñinñayana chë buatëmbana soyënga, ndayiñe bënga mondošbuaché, ndegombre soyënga ndoñe yondmëna ca yojtsejuabnama, y cha chë ndoñe ošbuáchiyëngbiama más bacna entsá jtsemnana.

<sup>9</sup> Chë jujabuáchama viudanga imuábemana lístañe, chaotsábemana chë viudá chñënguana bnëtsana

uatama más yobomná, y nÿe canÿe boyá ibnabomná. <sup>10</sup> Entšanga cha chamotsábuatma mo canÿe tšabe soyënga amacá: chabe básenga botamana tojabëché, áshjajnënga chabe yebnentšë posada júyentšamiamia prontaná, Bëngbe Bëtsabe entšanga imomnënga tojushecjabebé, chë imosufrínënga tojújabuache; jayanana, nda sempre nÿetsca tšabe soyënga jamama yontšëná.

<sup>11</sup> Pero chë lístañe, chë viudanga chnénguana bnët-sana uata cabá ndbomnënga ndoñe catjúbiamia; er chë chëfta uata ndbomnënga, yapa nÿe cachënga tšabá jtsemnama juabnënga jtsebomnana y soyënga jtsamana. Chcase, chënga Jesucristbioye ya ndoñe ntseervénana, y chora jtsebošana cachiñe jtëtóbouamayama; <sup>12</sup> y chca, ínÿenga chëngbiamia mochanjayana ndoñe tšabá montsama ca, chënga chë ntšamo tempo Bëngbe Bëtsá tmojanšbuachenacá chënga ndoñe tmonjamama. <sup>13</sup> Y cabá más, tondaye ntsamcá tmojtsemna ora, chënga juabouinÿana oyënjayënga jtsemnama, y yebnënguenache jtsanama; y ndoñe nÿe oyënjayënga, sinó oinÿanëngnaca, ínÿengbe soyënguiñe jtseyentšbëtsjuanëse, y ndoñe yontsemna jayanama soyënga jtsichámëse. <sup>14</sup> Chiyeca, atšë séntseboše, chë viudanga cabá tobiašënga chamuatobouamá, básenga chamotsabamna, y chamotsobena cachëngbe yebnënguenache jtsemándayana; y tondaye chamondëtsama, chca, béngbioye uayayënga chamuayana, chënga chca ndoñe tšabá montsama ca. <sup>15</sup> Atšë chca séntsichamo, er básefta viudanga cabá tobiašënga tmojtsajbaná Jesucristo obedecénana, y tmojontsé Satanás joyeunayana.

<sup>16</sup> Canÿe shembása, Jesucristbeñe ošbuachiyá, nderado chabe pamílangbeñe viudanga tojtsabamna, cha bontsemna chënga juabuáchana, chca, chë ošbuachiyëngcá enefjuanënga ndoñe chaondëtsamna chëngbiamia játantješnana; chca, chë ošbuachiyënga mochanjobenaye chë ndegombre viudanga, chë chaújabuachama ndocná mondbomnéngbioye juabuáchama.

#### Ntšamo cuantsemna chë ošbuachiyëngbeñe amëndayëngaftaca

<sup>17</sup> Chë bëtsëjemënga, tšabá chë ošbuachiyëngcá enefjuanënga tmamëndangna, jtsomerecénana entšanga más chamotsarrespetánama, chca trabajo bétsamama, y más, chë sempre entšanga jtsabuayiyayama y jtsabuátambayama imontšënéngbioye. <sup>18</sup> Er Bëngbe Bëtsabe uabemana palabrenguiñe endayana, mëntšá: “Aca canÿe toróftaca shajuana tmojtsatbaná luariñe chacojtsetrabája ora, ndoñe catjuanguëtse-naye ca”; ínÿoca: “Chë trabajayá merecido jtsebuájonana juacánama ca”. Chiyeca, chë bëtsëjemëngcá amëndayënga jtsomerecénana entšanga chamotsarrespetánama.

<sup>19</sup> Nderado nda tcmojáuyana canÿe bëtsëjemama bacna soye tojama ca; pero útata o unga entšanga más ndoñe tmontsemna, chca tojamama tmojinÿe, y chë

bëtsëjemama mal quedayá ndegombre soye yojtsichamo ca ndoñe tmonjayana, ndoñe catjóyeunaye.

#### Inÿe soyëngama jábuayenama

<sup>20</sup> Chë bëtsëjemënga nÿe bacna soyënga tmojtsamënga, nÿetsca entšangbe delante cochjucácana, chca nÿetscanga uatjana chamuishache, bacna soye amama castigo mochtsebomnama.

<sup>21</sup> Atšë cbontsemánda, Bëngbe Bëtsabe delante, Jesucristo y Bëngbe Bëtsabe bocacana angelëngbe delante, chë mandënga chacotsamama; pero ndoñe catjayana canÿe bëtsëjemama tšabá o ndoñe tšabá tonjama ca, cabá ndoñe lempe botamana ndabonÿe ora, ni canÿe entšá ínÿengbiamia más tšabá ntjatabacacnacá. <sup>22</sup> Ndocnabe bestšašife cucuatšënga catjajáju, Bëngbe Bëtsábioye chabiamia jaimpádama, jinÿinÿiyama cha mo canÿe bëtsëjemama amëndayacá joserviama yojtsobenama, nÿe betesco, juabuáyanama botamana ntjenojuaboycá. Pero nÿe ntjenojuaboycá chca tcojamëse, y cha canÿe bacna soye amá tomnësa, ácnaca cochántsemna mo chabe bacna soyënga cuafjamcá. Cochtsantješna ndocna bacna soyënga ainaniñe chacondëtsebomnama.

<sup>23</sup> Aca ba soye uafsbiaca condbëtsešoca causa, ndoñe más nÿe ena búyeshe cattseftmana, sinó base viñoynaca.

<sup>24</sup> Entšanga mondobena tšabá jinÿana, básefta entšangbe bacna soyënga, cabá chë soyëngama chëngbioye botamana ntjájayey ora; pero ínÿengbe bacna soyëngama, nÿe tcojájayentsana entšanga chama jtsetatšëmbuana. <sup>25</sup> Cachcá, báseftanga entšangbe delante tšabe soyënga jtsamana, y cachora chë soyëngama jtsotatšëmbuana; y ínÿengna iytëncá tšabe soyënga jamana, pero masque chca, ndaytë-naca chë tmojanma tšabe soyëngama ínÿenga mochanjätatšëmbona.

**6** Chë nÿets tempo nÿe ínÿabiamia oservénënga entsamna, chëngbe nduiñëngbiamia jtsejuabnayanana, chënga uámana entšanga imomnama y nÿets respeto jtsebomnama imomerecénama. Chca entsamna, Bëngbe Bëtsabe Uabainama y chabe soyëngama, ndayiñe bënga mondošbuaché y entšanga mondbëtsabuatambaye, ínÿenga podescan doñe chamondëtsóyebuambnana. <sup>2</sup> Y chë imobomna Jesucristbeñe ošbuachiyënga nduiñënga, chëngbioye nÿe batšá ndoñe chamondëtsarrespetana, er chënga Jesucristbeyeca chëngbe catšátanga mondmëna, y entsamna más tšabá jtsaservénana, er chëngbe trabajuentša tšabe soyënga imóyëngacañe, Jesucristbeñe ošbuachiyënga mondmëna, y Bëngbe Bëtsabe bonshánënga.

#### Jtsiyenana Bëngbe Bëtsá jadórama soyënga jtsamëse, endmëna chë ndegombre bomnana

Quem soyënga cmontsamna entšanga jtsabuátambayana, y becá jtsëtsëtsnayana chca chacmóyaunama: <sup>3</sup> Nderado nda inÿe soyënga tojtsabuatambá, y

ntšamo bēnga mondējuabnacá, chē Bēngbe Utabná Jesucristbiama ndegombre buatēmbana soyama, ni chē buatēmbánana ntšamo jtsiyenama Bēngbe Bēt-sábioye jadórana yomna soyēnga jtsamēse, ndoñe cachcá bēngcá tontsejuabnase, <sup>4</sup> cha n̄ye cachá puerte uámana entšá yojtsenobiamná, y tondaye ndosertaná yojtsemna. Cha tša jtsogustánana ba soyēngama y palabréngama jabuachana jtsenatsētsnayana, y cha n̄ye chama vida jésebomnana. Cha chca yomna causa, n̄ye jtsebošana chē in̄ya tojashjache soyēnga jtsebomnana, n̄yetscanga ndoñe cachcá chamondētsejuabnana jtsamana, ín̄yēngbioye joyánguanguama jtsebošana, bacna soyēnga ndoñe ndegombre soyēnga ín̄yēngbiama jtsejuabnayana, <sup>5</sup> y ín̄yēngaftaca n̄ye sempre jtsenpenzéntsiayana, er chēngbe juabniñe n̄ye bacna soyēnga jtsebomnana, chē ndegombre soyēnga quematábuatma, y jtsejuabnayana chē soyēnga Bēngbe Bētśá jadórana jtsamana, n̄ye más soyēnga jōyēngacñama yoserverna ca. <sup>6</sup> Ndegombre can̄ye entšá bētścá tšabiana jēftsashjáchana, cha tojtsiyena Bēngbe Bētśábioye jadórana soyēnga jtsamēse, y sempre oyejuayá n̄ye chē tojtsebomna soyēngaca tojtsemnēse. <sup>7</sup> Er bēnga tmojanon̄ná ora, quem luar-entšana cach tondaye quemochatobenaye jēftsocñama. <sup>8</sup> As, bēnga ndayá jasama y ndayá jtichētjuama tmojtsebomnēse, chē soyēngaca oyejuayēnga mochtsemna. <sup>9</sup> Pero chē bomnēnga jtsemnama tmojtsebošēnga, bacna soyēnga jamama tojócochēnga ora, ndoñe ntsemorochana y pronto chiñe jotsatšana, mo bayá uachmaniñe cuafjotsatšcá, chē entšanga Satanabe cucuatšīñe ndeolpe jotsatšana; chora chēnga jtsamana soyēnga mo chē juabna ndbomnēngcá, y chē cachēngbiama ndoñe tšabe soyēnga tmojt-samēngbe juabnēngaca. Y mo chē uámbemana barco, bētś b́uyeshe asentoye tojtsenatjēmbcá, cachcá, chē bacna juabnēnga bomnana, chēngbioye mochántsapochocaye y n̄yetsca tescama mochántscastigaye. <sup>10</sup> Crocénana jtsebomnana yapa jtsebošana, jamana entšabe ainanentšana n̄yetsca bacna juabnēnga y soyēnga chaóbocnama; y básefta entšanga, crocénana jtsebomnana yapa jtsebošana causa, tmojtsajbaná ošbuáchiyana chē Bēngbe Bētśabe soyēnguiñe, chē bēnga mondošbuaché soyēnguiñe, y chca cachēngbiama tmojama puerte chamosufrima y bētś ngménana jtsebomnana.

**Chē tšabe soyama jtsenojuerzánama, ošbuáchiyana sempre chaotsemnama**

<sup>11</sup> Pero aca, Bēngbe Bētśabiama oservená, chca benachentšana cochtsojuánañe. N̄ya cochtsentšana, chē Bēngbe Bētśabe bominiñe tšabá yomncá jtsamama, chē ndayá Bēngbe Bētśá jadórana yomncá jtsamama, Jesucristbeñe puerte jtsošbuáchiyama, n̄yetscanga jtsababuán̄yeshanama, Bēngbe Bētśabeñe jtsobátmanēse puerte uantado padecena soyēnguiñe jtsemnama, y corente jtsababuán̄yeshanēse n̄yetscanga chacotsēnyayama. <sup>12</sup> Chē tšabe soyama, ošbuáchiyana

joboguianama cochtsenojuerzana. Chē n̄yetsca tescama yomna tšabe vida cochjashjache; chama Bēngbe Bētśá tcmojanchembo y bētścá entšangbe delante tconjánayana tšabe soyēnga Jesucristbiama, ndayiñe aca icošbuaché. <sup>13</sup> Y mora, Bēngbe Bētśabe delante, nda endbama lempe ntšamo quem luarentše yobin̄ncá vida chaotsebomnana, y Jesucristbe delante, ntšamo cachabiama ndegombre bemncá Poncio Pilatbe delante lempe tojanayaná, chatbe delante cbontsemánda, <sup>14</sup> lempe cochjama ntšamo tcbonjauyancá, ndocna soye chacmondētśashbe jamama, y cochtsiyena, ntšamo ndocná tondaye chaondētsebomna jayanama aca bacna soye tcojama ca. Y chca cochtsama Bēngbe Utabná Jesucristo quem luaroye yochjésabēntscuana. <sup>15</sup> Y n̄ya chē soyama chē tempo chaojshjango ora, Bēngbe Bētśá chca echanjín̄yan̄yiye, er cha endmēna chē corente bendición bomná y chē n̄ye can̄ye Mandado. Cha n̄yetsca reyēngbiama, chē más uámana Rey, y n̄yetsca amēndayēngbiama, chē más uámana Utabná. <sup>16</sup> N̄ye cha ndoñe bondmēna ndocna te ntjóbanana, y cha can̄ye bētś buashin̄yinyana luarentše endoyena y choye ndocná yondobena jobéconana. Cha ndocná tbonjin̄ye y ndocná yondobena jin̄yana. ¡Entšanga n̄yets tempo chamotsin̄yan̄ná cha puerte bētśá y obená bētsemnama! Chca chaotsemna.

<sup>17</sup> Chē quem luarentša soyēngaca bomnēnga imomnēnga, cochjámēndaye enábotamnayēnga ndoñe chamondētsemnama, ni lempe tšabá yochjóboconama, bētścá soyēnga bētsebomnana ndoñe chamondēt-sobátmana, er chē tcbomnana soyēngama ndoñe ntsótatšēmbuana ndayēntscóñama chca mochtsebomnana; pero aíñe, Bēngbe Bētśabeñe jtsošbuáchiyēse, chēnga chábeñe chamotsobátmana. Cha endmēna chē sempre bētścá soyēnga šnetsatšatnayá; y chca, cha jamana bēnga chamotsobena n̄yetsca chē soyēngaca oyejuayēnga jtsemnama. <sup>18</sup> Ntšamo tšabá yomncá chēnga chamotsama, ba tšabe soyēnga chamotsama, y sempre tšabe ainánaca chamotseprontana entšanga ba soyēnga jatšatayama, y ndaye tmobomna soye entšangaftaca jenájatayama. <sup>19</sup> Mo nda bētścá shajuana tojtsábuajo y jtsetatšēmbuana yochtsebomna más chcoye jasama, cachcá, quem bomnēnga ba tšabe soyēnga tmojtsamēse, mochántsetatšēmbo chēnga bētścá tšabe bendiciónēnga más chcoye mochtsebomnana. Y chēnga chē soyēnga tmojtsamēse, chēnga chē ndegombre vida, chē n̄yetsca tescama yomna tšabe vida mochanjēftsashjache.

**In̄ye soye Timotéobioye tbojanbon̄yé**

<sup>20</sup> Timoteo, ndayá Bēngbe Bētśá tcmojabon̄yecá, botamana cochtsin̄yena. Entšanga n̄ye quem luarentša soyēngama encuéntayana, ndoñe cattsuenana, ni chē ndoserverna soyēngama jabuachana enatsētsnayana, chē ndayama entšanga jtsichámuana becá osertánanentšana chca yóbocana ca, pero ndegombre chca ndoñe ntsemnana. <sup>21</sup> Atše chca séntsihamo, er básef-

tanga chca osertánana imobomna ca ichámënga, Jesu-  
crístbeñe ošbuáchiyana y chë bënga mondošbuaché  
soyënguiñe ošbuáchiyana tmojtsajbaná.

Atše, Bëngbe Bëtsá séntseimpadana, ácbeñe tšabe  
bendicionënga chaotsemnama.



## 2 Timoteo

### Jachuayama

**1** Atše Pablo, Jesucristbe ichmoná sēndmēna, Bēngbe Bētsá chca yobóšeyeca. Jesucristo šonjichmó entšanga jábuayenama Bēngbe Bētsabe šbuachenánama, ntšamo cha inétsamama entšanga chē n̄yetsca tescama yomna tšabe vida chamotsebomnama; y chca vida montsebomna Cristo Jesúseftaca cán̄yíñe mo can̄yacá bétsemnayeca. <sup>2</sup> Atše quem tsbuanácha cbontsabobiamná, acbiama Timoteo, aca mo atšbe bonshana uaquiñacá, Crístbeñe condošbuachema. Atše séntseimpadana, Bēngbe Bētsá, Bēngbe Taitá, y Jesucristo, Bēngbe Utabná, chaboma ácebeñe tšabe bendicionēnga chaotsemnama, chata ácbioye chacmolastemama, y acbe ainaniñe tšabe ebionana chacotsebomnama.

### Ndoñe ntsēuatjana entšángbeñe Jesucristbiana jóyebuambayama

<sup>3</sup> Sempre Bēngbe Bētsáftaca stsencuēnta ora, acbiama sēndbētsenojuabnaye, y acbiama sēndbēt-satschuanaye bnētē y ibeta; y Bēngbe Bētsá endmēna nda atše sēndēservena, ainánaca jtsejuabnaye y jtsetatšēmbēse, ntšamo atše stsamcá tšabá bétsemnama, cachcá ntšamo atšbe bēts taitanga tmojanmcá. <sup>4</sup> Atše sēndbētētenojuaboje ntšamo aca, chocana atše séntanabo ora shēchbuiye tconjanoperdema, y chíyeca atše tša séntseboše aca jtétin̄yama, atše puerte oyejuayá chaitsemnama. <sup>5</sup> Bēngbe Bētsá acbiama sēndbatschuaye, er atše sēndbátenojuaboje aca Jesucristbeñe ndegombre ošbuáchiyana condbomnama. Natsana, acbe bēts mamá Loida, y chentšana acbe mamá Eunice chábeñe bontsanošbuáchiye, y ácnaca cachcá tcojamama atše puerte sēndétatšēmbō. <sup>6</sup> Chíyeca sempre cochtsantješna quem uámana soyama: Mo nda can̄ye shin̄yañe tojtsajuin̄yín̄nacá, chentše sempre chaotsoiñama, cachcá aca, chē Bēngbe Bētsá tcmojatšetá obenana tšabe soyēnga jamama, sempre cochtsin̄yena. Chē obenana aca conjanóyēngacñe, atšbe cucuatšēnga acbe bestšašíñe sēnjanjajó y Bēngbe Bētsá acbiama sēnjanimpadá ora. <sup>7</sup> Er Bēngbe Bētsá tonjama bēngbe ainaniñe Uámana Espiritu chaotsemándama, uatjana ndoñe ntsebomnama, ndayá obenana bēnga chamotsebomnama, bonshánana Bēngbe Bētsabiama y n̄yetscangbiama chamotsebomnama, y cabēnga jenomándama chamotsobenama. <sup>8</sup> Chíyeca, ndoñe cattsēuatja entšanga jáuyanama, ntšamo tcojin̄ye y cojtsetatšēm-

bcá Bēngbe Utabnabiama ndegombre bétsemnama; ni atšbiana ndoñe cattsēuatja, atše cárceloye sēndutámenama, chabiama oservena causa. Chamna, chē Bēngbe Bētsá cmochanjátšetaye obenánaca, sempre cochtseprontana jasúfriama, átšeftaca y ín̄yengaftaca, entšanga tšabe noticiēnga abuyayin̄yaye causa.

<sup>9</sup> Bēngbe Bētsá endmēna nda bēnga šojatsebácá, y šojáchembo jtsiyenama mo chábenga imomnēngcá jt-samēse. Y cha chca tojama, ndoñe nderado bēnga ndaye tšabe soye tmojamama, ndayá cachá chca chaotsemnama inabóšeyeca y bēngbe tšabiama juabna bómnayeca. Cha chca inajuabnaye, cabá quem luare ndmēna orscana; y chca jamama Bēngbe Bētsá inajuabnaye, chē ndayá Cristo Jesús bēngbiama jamama sóyeca. <sup>10</sup> Y mora, Bēngbe Atsebacayá Jesucristo tojáboyeca, Bēngbe Bētsá šojin̄yan̄yé cha bēngbe tšabiama juabna yobomnama. Jesucristo tonjama, entšanga n̄yetsca tescama obanēnga ndoñe chamondétsemnama, y tonjama bēnga chamotsetatšēmbuama, chē tšabe noticiēnga chabiama jouenēse y joyeunayēse, bēnga chē n̄yetsca tescama yomna tšabe vida mochjábomnama, ndoñe n̄ye jopochócama cuerpēnguiñe.

<sup>11</sup> Bēngbe Bētsá šojanábuayana tšabe noticiēnga entšanga jábuayenama, Jesucristbe ichmoná jtsemnama y entšanga jabuátambama. <sup>12</sup> Chē causa, atše mora cárceloca quem soyēnga séntsesufrina; pero chama atše ndoñe quetsátēuatja, er atše sēndétatšēmbō ndábeñe atše stsošbuáchemá, y corente sēndétatšēmbō cha yobena jtsin̄yenana ndayá šojabon̄yecá, chē ndaytē cha yochjésabēntscuana.

<sup>13</sup> N̄yets tempo, chē ndegombre buayenánana, ndayá átšbentšana tconjanuencá, entšanga cochtsabuayin̄yaye, entšanga jtsin̄yan̄yan̄yēse aca Jesucristbeñe icošbuáchemá, y Bēngbe Bētsá y n̄yetscanga icuababuán̄yeshanama, y chca yomna aca Cristo Jesúseftaca cán̄yíñe mo can̄yacá bétsemnayeca. <sup>14</sup> Chē Uámana Espiritu, chē bēngbe ainaniñe endoyenabe uajabuáchenanaca, ntšamo Bēngbe Bētsá tcmojabon̄yecá siempre cochtsin̄yena.

<sup>15</sup> Ntšamo ya condétatšēmbcá, n̄yetsca ošbuáchiyēnga Asia luaroquēnga cachcá šmonjeson̄yá, y chentše bontsemna Figelo y Hermógenes. <sup>16</sup> Pero Bēngbe Utabná Onesiforbe pamíllanga chaotsalastemana, er cha ba soye šonjanañemó, y atše cárceloye utámenama cha ndoñe quenjatēuatja. <sup>17</sup> Masna, Romoye tojabánashjango ora, cha botamana šojánguango y šonjáníyena. <sup>18</sup> Bēngbe Utabná lastemado cháftaca chaotsemna, ntšamo n̄yetscanga tmojamcá tšabá o

ndoñe tšabá yontsemnama cha yochjayana ora. Aca corente condétatšëmbo ntsachetšá Onesíforo Efeso puebloca šonjanéjabuachama.

### Jesucristbiamá canye tšabe soldado

**2** Y aca, atšbe uaquiñá, chë Cristo Jesús acbiama tšabe juabna yobomnentšana, bëtscá añemo ainaniñe cochtsebomna. <sup>2</sup> Ntšamo ba entšangbe delante šconjoyeunacá, cach buayenánana, boyabásenga nyétscañe tšabe palabra bomnënga cochjábanyiye, y chamotsobena ínÿenga cachcá jabuátambama.

<sup>3</sup> Aca, chë bënga fséndbomna padecena soyëngama jasúfriama chacmojtsemna ora, Jesucristbe soyëngama entšanga abuayiynaye causa, ainaniñe bëtš añemo cochtsebomna, mo canye tšabe soldadca, cha chabe mándayabiama jasúfriana. <sup>4</sup> Ndocna soldado ntjá-tanana shjoca soyënguifne vida jtsebomnama o crocé-nana juacánama. Soldado chca jtsamana, chabe mandayá, chca chaotsemnama tbojabocacá cha, oyejuayá chaotsemnama. <sup>5</sup> Y canye travisiayá, ínÿenga jáyë-janama, canye soye juacánama; pero ntšamo chë uacanána jocñama tomncá ndoñe tonjatravisiase, cha chë soye ndoñe ntjosháchiñama. Cachcá, acbe trabajo cochjama ntšamo cmojtsemncá. <sup>6</sup> Chë jajañe trabajayá derecho jtsebomnana chë natsaná jtsemnama, chë tmojatbaná sananguentšana ndayánaca jtsebomnama. Acaftaca cachcá echanjopása, chë trabajo tšabá chacojamëse. <sup>7</sup> Chë cbontsatsëtšnañe cochtsenójuabnaye, y Bëngbe Utabná echanjama lempe chacmóser-tama.

<sup>8</sup> Sempre cochtsenójuabnaye Jesucristbiamá, ndabiama Bëngbe Bëtšá tojanma cháuatayenama y enjamna canya rey Davidbentšana entšá, ntšamo atše chabiamá sëndabuayiyná tšabe noticiënguifne endmëncá.

<sup>9</sup> Chca abuayiynaye causa, atše séntsesufrina, nya cadenëjuangácnaca utsbuaná, mo canye bëtš bacna soye ochjajnayacá. Pero masque atše chca séntsemna, chë Bëngbe Bëtšabe soyëngama buayenánana ínÿenga entšángbioye montsabuatambá. <sup>10</sup> Chiyeca atše nyetsca padecena soyëngaca sëndëtšóboyana, Bëngbe Bëtšabe bocacánëngbe tšabiama, chëngnaca atsebácanënga chamotsemnama, Crístbeñe jtsošbuáchiyëse; y Cristo Jesús bëtšëtšanga cháuabiamama, y cháftaca nyetsca tescama chamotsiyenama.

<sup>11</sup> Mëntšá ndegombre endmëna:

Cristo Jesús tojanóbana ora, enjamna mo béngnaca cuafjobancá, er bënga tmontsajbaná oyenana ntšamo tempo monjaniiyencá y Jesucristbeñe montsošbuaché; y chca, béngnaca cháftaca mochantsiyena;

<sup>12</sup> bënga chë padecena soyëngaca tmojtšesufrina ora, tmojtsemorochëse, béngnaca Jesucristoftaca mochántsemandaye.

Bënga tmojayana, cha ndoñe monduabuatma ca, as cha bëngbiámnaca cachcá echanjayana;

<sup>13</sup> bënga chábeñe ndoñe tmontsošbuáchese, masque chca, cha cabá echanjama ntšamo tbojašebuachenacá,

er cha lempe jamana, ntšamo sempre iuetsemncá jtsinÿanÿnayëse.

### Canye trabajayá, ndáftaca Bëngbe Bëtšá jtsóyejuayana

<sup>14</sup> Chë tcbonjauyana soyëngama, cochjama chë entšanga chamotsenójuabnama, y Bëngbe Bëtšabe delante cochjábuaenaye chënga ndoñe yontsamna nye palabrengama jabuachana enatsëtšnayana; er chca, ndocna tšabe soye ntjamana, y chca tmojtšesat-sëtšná ora, jamana chë soye ouenanënga más batšá chamotsošbuáchema, y jubuáchana chëngbe tšabe juabnënga jtsondbiamama. <sup>15</sup> Lempe ntšamo icobencá cochtsama, aca chacotsemnama mo canye entšá ndabiama Bëngbe Bëtšá cháuyana nyetsca soyënguifne tšabá amá yomna ca; aca chacotsemnama mo canye trabajayacá, nda tondaye tontsebomna ndayama jatëuatjama; y chacotsemnama chë ndegombre buayenánana corente tšabá buatëmbayá. <sup>16</sup> Entšanga nye quem luarentša soyëngama, ndoservena palabrënga tmojtšencuënta ora, chë soye ndoñe cattsunana; er chë soye jamana entšanga puerta inÿetšá chamobocanama, ntšamo Bëngbe Bëtšá ndoñe yondmëncá, inÿetšá jtsejuabnayëse y jtsamëse. <sup>17</sup> Chëngbe buatëmbana soyëngaca puerta bacá ínÿengbioye jáborlana, nya mo canye uabouana šocana chamotsebomnama cuafjamcá. Chca buatëmbayënguentšë Himeneo y Fileto bontsemna. <sup>18</sup> Chata chë ndegombre benachentšana tbojtsojuánañe, y ibojtsichamo chë obanënga chámuatayenama Bëngbe Bëtšá ya catënjamaca, y Jesús chaojésabo ora, nyetscanga chámuatayenama Bëngbe Bëtšá ndoñe yochanjama ca. Chë causa, chata bontsama básefta entšanga chë ntšamo Jesucristbeñe imojanošbuachecá, mora ya ndoñe chamondëtsošbuáchema. <sup>19</sup> Pero Bëngbe Bëtšabe ndegombre buayenánana nyets tempo cachcá endesomñe, y ndocná quenátobena chë soye jatrócama. Chca endmëna mo chë ndëtšbenga ndayiñe canye bëtš yebna tojebncá, ndayiñe mëntšá yojtšábemana: “Bëngbe Utabná endëubuatma chë chábenga imomnënga”, y “Nyetscanga chë Bëngbe Utabná benga imomnënga ca tmojtšichámënga, chamuajbaná nyetsca bacna soyënga amana ca”.

<sup>20</sup> Canye uámana entšabe yebnentšë, tsafjoca soyënga ndoñe nye castellano o midio soyënga ntsemnana, ndayá niñëse y fshantse soyëngnaca; chë natsana soyënga uámana tescama jtsebuájonana, pero chë inÿe soyëngna, nye nyets tempo chauetsoservënama.

<sup>21</sup> Chca endmëna chë Jesucristbeñe imojtsošbuachëngbeñe, ndoñe nyetscanga tmontsajbaná bacna soyënga juabnayana y amana, ni chë chca tmojtšama entšángbentšana ndoñe tmontsojuaná. Pero, chca jtsojuánañama tojtsebošá, echántsemna canya Bëngbe Utabnabiama tšabe trabajayá; y chca, mo chë tsafjoca castellano y midio soyëngcá, canye uámana trabajuiñe echanjosérvia, y cha sempre echántseprontana ndaye tšabe soye jamama.

<sup>22</sup> Chiyeca, ntšamo básefta bobontsënga bacna soyënga jamama mondbošcá, ndoñe cattsama; pero

aíñe cochtsiyena ntšamo Bèngbe Bètsabe bominiñe tšabá yomncá jtsamése, Jesucristbeñe puerte cochtsošbuáchiye, Bèngbe Bètsá y ínÿenga cochtsababuánÿeshana y nyetscángaftaca natjémbana cochtsomñe, chë chaújabuachama Bèngbe Utabná mondbetsotšëmbuanéngaftaca cánÿiñe, ndocna bacna soye ainaniñe ntsebomncá. <sup>23</sup> Ndoservena soyèngama palabrènga y ndosertánentšana óbocana soyèngama ndoñe cattsuenana; aca corente condétatšëmbo chë soyènguentšana entšanga nÿe jabuachana enatsëtsnayañe jabocanana. <sup>24</sup> Pero chë Bèngbe Utabnabiamana oservená ndoñe quebnátsmèna ínÿengaftaca jabuachana ntsenatsëtsnayana; chamna, cha bontsemna jtsababuánÿeshanése nyetscanga jtsénÿayana, jtsemnana tšabe buatèmbayá y ínÿengaftaca uantadá. <sup>25</sup> Cha bontsemna, chë chabe contra y chabe buayenámana contra imomnènga, chë ndegombre soyènga jabuátambama, pero ndoñe ntjatenabotamnaycá. Chca bontsemna, nderado Bèngbe Bètsá nanjama chca juabnayana chamotrocama, y chca, chènga chë ndegombre soyèngama chamotsetatšëmbuama; <sup>26</sup> chènga botamana chamuatsjuaboma, y Bèngbe Bètsá, Satanasbe cucuatšënguentšana cháuatsebacama. Satanás chènga tojanètabá ntšamo cha tojtsebošcá jamama, mo bayènga canÿe uachmaniñcá.

**Ntšamo entšanga mochtsemna, Cristo jésabama chaojtsobeco ora**

**3** Pero aca cmontsemna jtsetatšëmbuana, Cristo jésabama tempo chaojtsobeco ora, entšanga echántsamna puerte padecena soyènguiñe jtsiyenana. <sup>2</sup> Chca echántsemna, er entšanga, cada ona nÿe cachabe tšabiamana echanjésenuabnaye, crocénana jtsebomnana tša mochántseboše, mochántsemna enábotamnayènga y ínÿengbioye mo nduamanèngcá mochantsénÿaye. Bèngbe Bètsabiamana y ínÿengbiama bacá mochantsóyebuambnaye, chèngbe bètsétsangbioye ndoñe quemochátayaunana, ni chèngbiama tšabe soyènga tmojtsaméngbioye quemochtètacheuanaye, y Bèngbe Bètsabiamana y chabe soyèngama ndoñe respeto quemochátsbomna, <sup>3</sup> ni cachèngbe pamíllangbioye quemochátababuanÿeshana, mochántseboše ndoñe natjémbana jtsiyenama, uayátseayènga mochántsemna, cachènga jenomándama ndoñe quemochátobena, mo ainana ndbomnèngcá mochántsemna, y nyetsca tšabe soyènga uaboténènga. <sup>4</sup> Chènga, uayayèngbe cucuatšíñe entšanga ayentšbáshejuanènga mochántsemna, mochántsama soyènga tondayama ntjatsrreparánese, y cachènga uámana entšangcá mochántsenobiamnaye; chènga Bèngbe Bètsá jatsbobonshana cuenta, cachèngbe cuerpiñe tšabá jtsomñama soyènga mochántseboše. <sup>5</sup> Inÿenga echantsinÿana mo ndegombre Bèngbe Bètsá adórayènga chènga cuaftsemncá, pero chë mochántsama soyèngaca mochanjínÿanÿiye, Bèngbe Bètsá obená bétsemnana chènga ndoñe mondošbuáchemana.

Nÿa tondayama chéngaftaca cattsencuéntaye. <sup>6</sup> Chènguentšë báseftanga mondmèna, y chèngna botamana palabrèngaca yebnènguenache jamashjnana, y chenache, chë paselo yomna jáingñama shembásenga jtsaíngñayana, chèngbe buatèmbana soyènguiñe chamotsošbuáchemana. Chë shembásenga bètscá bacna soyènga tmojama, y chë causa ndoñe corente natjémbana montsiyena, y ba ndoñe tšabe soyènga imojtsama nÿe cachènga tšabá jtsemnana, ntšamo tmojtsebošcá. <sup>7</sup> Chènga nyets tempo nÿe ndaye tsëm soye jatóntšana jatatsjínÿana, pero ndocna te ntjobenayana Bèngbe Bètsabe ndegombre soyènga josértama. <sup>8</sup> Ntšamo Janes y Jambres Moisesbe contra ibojamncá, cachcá, chë ínÿenga jáingñama abuátambayènga nyetsca ndegombre soyèngama contra jtsemnana. Chë entšanga chèngbe juabniñe nÿe bacna soyènga jtsebomnana, y Bèngbe Bètsá chènga tojtsëbaté, chènga chë ndegombre soyènguiñe ndoñe ntsošbuáchiyana causa. <sup>9</sup> Pero chènga ndoñe quemochatobenaye bètscá entšanga jáyèñjanama, er nyetsca entšanga mochanjátatšëmbona chènga nÿe bacna soyènga juabnayènga imomnana, mo chë Israeloca entšanga tmojantatšëmboncá Janes y Jambres nÿe chca juabnayata bétsemnana.

**Inÿe soye Timotéobioye tbojanbonÿé**

<sup>10</sup> Pero acna, puerte tšabá condétatšëmbo ntšamo atšë tijabuatambacá, ntšamo jtsamése atšë tsiyena, ndayá jamama tsjuabná, ntšamo atšë Jesucristbeñe puerte tsošbuaché, ntšamo ínÿengaftaca uantado tsmèna; ntšamo atšë, Bèngbe Bètsá y ínÿengbioye tsababuánÿeshana; ntšamo atšë, Bèngbe Bètsábeñe jtsobátmanèse, <sup>11</sup> ínÿenga šmonjanacmena ora; y sènjansufrina ora, padecena soyènguiñe bèts añemo tsjánbomna. Acnaca condétatšëmbo ntšamo atšë chama Antioquía, Iconio y Listra bèts pueblèngoca tsjansufrínama. Pero masque entšanga tša šmonjanacmena, atšë lempe sènjánauantana, Bèngbe Bètsábeñe jtsobátmanèse, y cada ora, Bèngbe Utabná chéngbentšana šonjanatsbocá. <sup>12</sup> Ndegombre endmèna, nyetscanga chë Bèngbe Bètsá jadórama soyènga jtsamése jtsiyenama bošènga, y Cristo Jesúséftaca cánÿiñe mo canÿacá imomnènga, puerte mochanjasúfria, chca bétsemnana, chènga chamosufrima ínÿenga chamojtsama ora; <sup>13</sup> pero chë bacna entšanga y chë ínÿenga áingñayènga, cada te más bacna entšanga mochántsemna, más bacna soyènga jtsamése; chènga ínÿengbioye mochántsaingñaye, pero cachèngnaca ingñénènga mochántsemna.

<sup>14</sup> Pero aca, nyets tempo cochtsejuabnaye y cochtsama lempe ntšamo tcojuatsjinÿcá, chë ndegombre soyèngcá cojtsošbuácheñe, er aca tšabá condèubuatma chë tcmojanbuatèmbanga; <sup>15</sup> y aca, cabá básetema conjamna orscana, chë Bèngbe Bètsabe uabemana palabrèngama condétatšëmbo, chë ndaye sóyeca aca contsobena juatsjínÿana, Bèngbe Bètsá chacmatsbocama, Cristo Jesúsbeñe jtsošbuáchiyèse. <sup>16</sup> Bèngbe Bètsá, Uámana Espiritbeyeca tonjama, lempe ntšamo

Bëngbe Bëtsabe uabemana palabrënguiñe yobinýncá entšanga chamuábemama. Chë uabemana palabra endoservena, bëngbioye chë ndegombre soyënga jabuátambama; nderado ndaye soye ndoñe tšabá tmonjamama bënga chamotsetatšëmbuama, jinýanyiyama ntšamo más tšabá chë soyënga muanjobenaye jamama; y bëngbioye jabuátambama ntšamo jtsiyenama chë Bëngbe Bëtsabe bominiñe tšabá yomna soyënga jtsamëse; <sup>17</sup> chca, canye entšá Bëngbe Bëtsabiama oservená y obená chaotsemnama, tšabá chaotsetatšëmbo y sempre chaotseprontana nyetsca tšabe soyënga jtsamama.

**4** Bëngbe Bëtsabe delante y Cristo Jesús, nda echanjabo mo reycá jabomándama y jabáyanama chë ainëngbiama y chë ya mochjóbanëngbiama, ntšamo chëngbe vidënguiñe tmojëftsemcá tšabá o ndoñe tšabá bëtsemnama, chatbe delante cbomandá, <sup>2</sup> Bëngbe Bëtsabe palabra entšanga chacotsabuayinayama; sempre chca jamama cochtseprontana, masque entšanga aïñe o ndoñe jouenama tmojtsebošëse. Cochjama, ínÿenga bacna soyënga tmojtsamama chamotsetatšëmbo, chca tmojtsamama cochjucácana y cochjábuayenaye ndayá jamama yojtsamnana. Sempre chca cochtsabuátambaye, chca ora puerta uantado jtsemnëse. <sup>3</sup> Chca cochtsama, er canye tempo echanjóshjango y chora entšanga chë ndegombre buatëmbana soye ndoñe quemochátuenana; chamna, nye chë último tsëm soyënga jtsetatšëmbuama boše causa, ba abuátambayënga mochanjuánguango, y chënga mochántichamo soyënga nye ntšamo cach entšanga jouenama tmojtsebošcá. <sup>4</sup> Chënga chë ndegombre soyënga ndoñe quemochátuenana, y nye ndaye cuentënga mochántseyunana. <sup>5</sup> Pero aca, sempre botamana cochtsejuabnaye; chë padecena soyëngama chacojtsesufrina ora, añemo cochtsebomna; chë Jesucristbiama tšabe noticiënga entšanga abuayinayabe trabajo cochtsama; y nÿa cochtsentšena ndayá Bëngbe Bëtsá tcmojabonyecá tšabá jtsamama.

<sup>6</sup> Er mo Bëngbe Bëtsábioye jëtschuayama, canye bayá obanáftaca tcojabuešcja vínoye jtsopochocancá, cachcá atšbe vídnaca ya jopochócama entsemna. Atše jóbana bécóñe entsemna; chanjóbana ora echántsemna Bëngbe Bëtsá oyejuayá chaotsemnama. <sup>7</sup> Cristo Jesusbe soyëngama corente sënjenojuerzá. Mo canye travisiayacá, chë jashjanguama yomna luaroye ya tojashjangcá, átšnaca ya, ntšamo Bëngbe Bëtsá yobošcá atše jtsamëse, atšbe trabajo ya tijapochocá. Atše nyets tempo Jesucristbeñe sëndošbuaché. <sup>8</sup> Chcasna, atšbiama canye uacanana soye echántsemna, er Bëngbe Bëtsá tojama atše chabe bominiñe tšabia chaitsemnama. Bëngbe Utabná endmëna chë ndegombre tšabá ichamuá entšanga aïñe o ndoñe tšabá tmonjamama, y cha chë uacanana soye šochántatšetaye, entšanga ntšamo tmojamama cha chaojabáyana ora. Pero cha nye atše ndoñe chë uacanana soye

quešochtétatšetaye, ndayá nyetscángbioye chca, ndëmuanÿenga puerta imoboše cha cachiñe cháuesabama, cha imobobonshánayeca.

### Inÿe soyënga Timoteobiama

<sup>9</sup> Lempe ntšamo tcojobenacá cochjama betesco jabama atše jabínÿama; <sup>10</sup> er Demas, cha yapa nye quem luarentša entšangbe soyënga bošá enjamna, cha cachcá šonjesonÿá y Tesalónica puebloye tojtsoñe. Crescente Galacia luaroye tonjá y Tito Dalmacia luaroye. <sup>11</sup> Nÿe Lucas, chë šmonjaná-jabuachanënguentšana, mora átšeftaca entsemna. Marcos cochjafstsenguango y ácaftaca cochjëftsbetše, er cha atšbe trabajuama puerta oservená endmëna. <sup>12</sup> Tíquico, Efesoye sënjichmó. <sup>13</sup> Chacojabo ora, uabonjanía šochjesacñe, atše Troas bëts puebloca, Carpbe yebnoca tijésaboshjona; chë librëšangánaca, pero chë uámana uabemana tsbuanachangá ndoñe chacmondétsebnatjëmbo.

<sup>14</sup> Alejandro, chë cobre soyënga pormayá, puerta bacá šonjaborlá. Bëngbe Utabná bochanjacastíga, ntšamo atše šojaborlama. <sup>15</sup> Chabiama cuedado cochtsebomna; cha tojobenase ntšámna cmatjabórla, er cha chë bënga mondabuayiná soyëngama contra entsemna.

<sup>16</sup> Chë natsana soyama, mándayëngbe delante šonjanotocá jenéuyanama ora, atše ndocná chešnátabuache; nyetscanga cachcá šmonjésonÿaye. Pero atše sëntsobátmana, Bëngbe Bëtsá chama chënga chaotsaperdoná. <sup>17</sup> Pero Bëngbe Utabná aïñe šonjaná-jabuache y tonjanma atše bëts añemo jtsebomnama, y chcase, atše sënjanobená Jesucristbiama nyetsca chabe tšabe noticiënga entšanga jábuayenama, y chë luarentša ndoñe judiënga tmonjanobená chë soye jouenama. Mëntšá, Bëngbe Utabná canye uabouana resjuentšana šonjanatsbocá, mo canye león jtsosañámentšana ndábioye cuafjatsbocacá, <sup>18</sup> y Bëngbe Utabná šochanjatsbocá, bacna soye ndocná chašondëborlama; y siempre jtsinÿenëse, cloye, chë ndayentše cha yománda luaroye šochanjesbetše. ¡Nyetscanga nyetsca tescama cha chamotsatschuaná! Chca chaotsemna.

### Pablo Timotéobioye jadióšoftanama

<sup>19</sup> Atšbe cuenta cochjácheuaye Prisca y Aquila, y Onesíforbe pamílnaca. <sup>20</sup> Erasto, Corinto puebloca tontsoquedañe, y Trófimo Mileto puebloca šocá sënjëftseboshjona. <sup>21</sup> Lempe cochjama, uaftena tempo chaondóshjango ora moye jabama. Acnaca cmontsechuaná Eubulo, Pudente, Lino, Claudia y nyetscanga muentše Jesucristbeñe ošbuáchiyënga.

<sup>22</sup> Atše sëntseimpadana, Bëngbe Utabná Jesucristo ácaftaca chaotsemna, y Bëngbe Bëtsá tšëngaftangbeñe tšabe bendicionënga chaotsemnama chaoma.

# Tito

## Jachuayama

**1** Atše Pablo, Bëngbe Bëtsabe oservená sëndmëna y Jesucristbe ichmoná entsãnga jábuayenama, chë Bëngbe Bëtsá chabe entsãnga chamotsemnama tojábacacanga, Jesucristbeñe chamotsošbuáchema y chë ndegombre soyëngama chamotsetatšëmbuama; chë soyënga endmëna ntšamo bënga, Bëngbe Bëtsabe básenga bëtsemnama, mondoyena jtsamëse. <sup>2</sup> Lempe chca sëndama, er Bëngbe Bëtsábeñe jtsošbuáchiyëse, atše sentsobátmana chë nyetsca tesca ma yomna tšabe vida jtsebomnama. Bëngbe Bëtsá, chë ndocna te obosterayá, quem luare cabá ndmëna orscana tojanašebuachená entsãnga chca vida jtsebomnama; <sup>3</sup> y nãa chama tempo tojóshjango ora, chë entsãnga jábuayenama, soyëngaca Bëngbe Bëtsá chabe palabra šojinãyanýé, ndayá Jesucristo entsãngbiama yochjanmama; y chca jábuayenama atše palabra šmonjabonyé, Bëngbe Bëtsá, bëngbe Atsebacyabe mándoca. <sup>4</sup> Tito, quem tsbuanácha cbontsabobiamná. Atše Jesucristbe soyëngama entsãnga sënjanabuayiná ora, aca chábeñe contsanošbuaché y nyets útata cachca ošbuáchiyana Jesucristbeñe bondbomna, y chca, aca mo atšbe ndegombre uaquiñacá condmëna. Atše sëntseimpadana, Bëngbe Bëtsá Bëngbe Taitá y Jesucristo Bëngbe Atsebacyá, ácbëñe tšabe bendicionënga chaotsemnama chata chaboma, y chaboma aca ainaniñe tšabe ebionana chacotsebomnama.

## Titbe trabajo Creta luaroca

<sup>5</sup> Atše Creta luaroca tcbonjéftsanboshjona, ntšamo chentše jamama enjetsashbencá chacomama, y nyetsca pueblënguenache chë ošbuachiyëngcá enefjuanëngbeñe bëtsëjemëngcá amëndayënga jtsemnama chacubuáyanama, ntšamo tcbonjftsemmandacá. <sup>6</sup> Canãa bëtsëjemama uabuayaná mëntšá bontsemna: chaotsiyena ntšamo chabiamana ndocná chaondët-sichamo ndoñe tšabá yontsama ca; nãe canãe shembásabe boyá; chabe básengna, Jesucristbeñe ošbuáchiyënga chamotsemna, y chamotsiyena, ntšamo ndocná chaodayana chënga nãe jenomándama ntšobencá y nãe ntšamo tmojtsebošcá imojtsiyena ca, o chënga chëngbe bëtsëtsanga o mándayënga ndoñe montsayaunana ca. <sup>7</sup> Er cánãentše ošbuachiyëngcá enefjuanëngbe mandayá, Bëngbe Bëtsabe trabajo jamama tmojabonyéyeca, cha bontsemna jtsiyenana, ntšamo ndocná chaodayana cha ndoñe tšabá

yontsama ca; ntjajuaboycá, nãe ntšamo cha tojtsebošcá ndoñe chaondëtsama; ndoñe chaondëtseyena nãe rábiaca jtsemnama; ndoñe chaondëtsetmó; penzentsero ndoñe chaondëtsemna; y ndoñe chaondëtseboše nãe paselo becá crocénana jtsebomnama. <sup>8</sup> Pero chabe yebnentše posada entsãnga júyentsamiama sempre chaotseprontana, tšabe soyënga chaotsebínynama sempre chaotsentšëna, botamana juabnayá chaotsemna, ntšamo Bëngbe Bëtsabe bominiñe tšabá yomncá chaotsiyena, nyets tempo Bëngbe Bëtsábioye chabotsadorana, y cachá nyetsca soyënguñe jenomándama chaotsobena. <sup>9</sup> Cha bontsemna nyets tempo jtsošbuáchiyana y jtsobedecénana chë ndegombre buayenana soye, ntšamo tmojabuatëmbacá, chca, chë ndegombre buatëmbana soyëngaca ínãyënga añemo chaotsatšatnama, y chë soyama contra tmojtsemnënga jáyëñjanama, ndoñe tšabá montsamama.

<sup>10</sup> Cha chca bontsemna, banga nãe ndëmandánënga jtsiyenama bošënga mondmëna causa, y chënga mondmëna, nãe ndaye ndoservena soyëngama yapa oyebuambnayënga y ínãyënga áingñayënga, y chcanga más mondmëna chë nyetsca ošbuáchiyënga base bobachtema chë más delicadentše tëtšëñënga jtsemnama yojsamna ca mondbëtsichamënguentše. <sup>11</sup> Y entseyta chëngbioye jtayáchetana, er chënga jamana ba pamíllanguentše nyetscanga Jesucristbeñe ošbuáchiyana chamotsajbanama. Chënga chca mondbëtsama, chë ndoñe yontsamna jtsabuátambayama soyënga jtsabuátambayëse, nãe paselo crocénana jongánama.

<sup>12</sup> Enjamna canãa, ndabiamana entsãnga jtsichámuana cach Creta luarentša diosëngbiama oyebuambnayá canjamna ca, y cha cachabe luarentša oyenëngbiama mëntšá tonjánayana: “Creta luarentše oyenënga, nyets tempo bosterënga mondmëna, ainana ndbomnënga y oyëñjayënga nãe becá jasama bošënga ca.” <sup>13</sup> Y chca ndegombre cha tonjánayana; chíyeca chënga jabuache cochjucácana, chca, chënga Jesucristbeñe chamotsošbuáchema y chamotsobedecena chë buatëmbana soyënga, chë ndayiñe bënga mondošbuaché; <sup>14</sup> y cach judiëngbe cuentënga ndoñe chaondëtsuenana, ni chë ndegombre soyënga uabotenëngbe mandënga.

<sup>15</sup> Chë ainaniñe bacna juabnënga ndbomnënga y chca juabnëngaca ndëmandánënga, nyetsca soyëngama jtsejuabnayanana mo ndegombre tšabe soyënga cuaftsemncá; pero chë bacna soyëngaca mandánënga y Jesucristbeñe ndošbuáchiyënga, nãe ndayámnaca jtsejuabnayanana mo bacna soye cuaftsemncá. Chca

entsemna, er chëngbe juabnoca nÿe ena bacna soyënga jásebomnana, y ndaye bacna soye tmojama ora, chëngbe ainaniñe juabnënga ndoñe ntsebomnana, bacna soye tmojamama chaúyanama. <sup>16</sup> Chënga jtsichámuana Bëngbe Bëtsá imuábuatma ca, pero ntšamo tmojtsama soyëngaca jtsinÿinÿayana chca ndoñe ndegombre yondmënana. Chënga Bëngbe Bëtsabe bominiñe puerte bacna entšanga mondmëna, y ntšamo cha tomandacá ndoñe ntsamana; chë causa chënga ndoñe ntsobenana ndaye tšabe soye jamama.

### Soyënga ntšamo chë ndegombre buatëmbánana endmëncá

**2** Ntšamo chacojtsoyebuambnacá sempre chaotsemna ntšamo chë ndegombre buatëmbánana endmëncá. <sup>2</sup> Cochjayana chë bëtsëjëmëngna chamotsemna cachënga nÿetsca soyënguiñe jenomándama obenënga, nÿetscangbiama mo uámana entšangcá utabnënga, ntšamo jtsiyenama tšabá juabnayënga, nÿets tempo chë ndegombre soyënguiñe chamotsošbuaché, Bëngbe Bëtsá y nÿetscanga chamotsababuánÿeshana, y padecena soyënguiñe puerte uantadënga chamotsemna.

<sup>3</sup> Cachcá, chë bëtsanana shembásenga chamotsiyena mo Bëngbe Bëtsábioye adorayëngcá, uayátse-nayënga ndoñe chamondëtsemna, ni tmoyënga. Entsamna chamotsiyena tšabe soyënga jtsamëse; <sup>4</sup> chë tobiasënga chamotsinÿanÿná y chamotsabuatambá ntšamo chëngbe boyanga y básenga jtsababuánÿeshanana, <sup>5</sup> ntšamo cachënga jenomándama jtsobenana, ainaniñe ndocna bacna soye ntsebomnana, yebnentša soyënga jtsamama jtsentšénana, nÿetscángaftaca tšábenga jtsemnana, cachëngbe boyángbioye jtsayaunanana, chca, ndocná chaondët-sobena Bëngbe Bëtsabe palabrama bacá jatóye-buambnayana, ntšamo chë tobiasënga tmojamama.

<sup>6</sup> Cachcá, chë bobontsënga añemo cochtsatsatnaye cachënga jenomándama chamotsobenama, <sup>7</sup> y chënga cochjínÿanÿiye ntšamo yomna jtsiyenana, cach aca nÿetsca soyënguiñe tšabá jtsamëse. Chca chacojtsabuatambá ora, nÿe chë ndegombre buayenánana cochtsabuátambaye y corente respétoca chca cochtsama, <sup>8</sup> chë ndegombre soyënga jtsóyebuambnayëse; chca, ndocná chaondobená jayanana aca ndoñe tšabá tconjayana ca, y chca, chë acbe contra ichámënga chamotséuatja, er ndocna bacna soye quemochatobenaye bëngbiama jayanama.

<sup>9</sup> Chë nÿets tempo nÿe ínÿabiama oservénënga cochjábuayenaye, chëngbe nduiñëngbioye chamotsobedecénama, soyënga chamotsama chënga chamotsóyejuama, y yajuatsanënga ndoñe chamondëtsemnama. <sup>10</sup> Ndoñe chamondëtsatbëbana, pero añe nÿetscañe tšabe palabra bomnënga chamotsemna. Chënga chca entsamna, chca, ínÿenga chámuinÿe y chamojuabó tša botamana chë buatëmbana soyënga, Bëngbe Bëtsá bëngbe Atsebacayabiama yomna ca.

<sup>11</sup> Er Bëngbe Bëtsá bënga šonjinÿanÿé cha bëngbe tšabiama juabnënga yobomnama, y chca, cha tojama nÿetsca entšanga chamotsobena atsebacánënga jtsamnama. <sup>12</sup> Chë Bëngbe Bëtsabe juabna bëngbe tšabiama, šontsabuatambá jtsajbanama oyenana soyënga jtsamëse mo chë Bëngbe Bëtsá ndoñe mondadoranëngcá, quem luarentša bacna soyënga bošana jtsajbanama; y ntšamo mora quem luarentše jtsiyenámnaca šontsabuatambá, cabënga jenomándama jtsobenëse, ntšamo Bëngbe Bëtsabe bominiñe tšabá yomncá y cha jadórama soyënga jtsamëse. <sup>13</sup> Y chca jtsamëse, y Bëngbe Bëtsábeñe ošbuachiyánaca jtsiyenëse, jtsobátmanana chë puerte oyejuayana jtse-bomnama te, Bëngbe Bëtsá obená y Atsebacayá Jesucristo, buashinÿinÿaniñe y canÿe corente uamanacá yochjésabo ora. <sup>14</sup> Cha chabe derecho vida jtsobomñiama cachcá tojanonÿá y bëngbiama tojanóbana, chë ntšamo Bëngbe Bëtsá bemandacá ndoñe yondmëncá jtsamëse oyenentsana bënga játsebacama, ainaniñe ndocna bacna soye ndbomnënga jábiamama, bënga chábenga chamotsemnama, sempre prontánënga ntšamo tšabá yomncá jtsamama.

<sup>15</sup> Chca cmontsemna jtsabuátambayana, chënga becá añemo jtsatsatnayëse, y jtsinÿanÿayëse chënga bacna soye tmojamama, chë nÿets condbomna mándoca jucacánëse. Ndoñe catjaleséncia ndocná chaondayana aca mando ndoñe condbomna ca.

### Ndayá Jesucristbeñe ošbuachiyënga yojsamna jama

**3** Cochtsama chënga chamuatenójuaboma chë mandadënga y inÿe mándayënga chamotsayau-nanama, chamotsobedecénama, y tšabá yomncá jamama sempre chamotseprontánama. <sup>2</sup> Ndocnabiama ndocna bacna soye chamondëtsoyebuambná, penzentserënga ndoñe chamondëtsemna, ndayá nÿetscángaftaca natjémbana jtsiyenama bošënga, tšabá mándbomnënga, nÿetscanga tšabe ainánaca imojtsénÿyama entšanga jtsinÿanÿayëse.

<sup>3</sup> Er béngnaca tempo monjamna Bëngbe Bëtsabe soyëngama ndosertánënga, ntšamo Bëngbe Bëtsá endëmandacá ndoñe quemjatanama, ingñëngna y mandánënga monjamna nÿetsca bacna soyënga jama-ma juabnëngaca y nÿe quem luarentše tšabá jtsemnama juabnëngaca. Bënga monjaniyena nÿe bacna soyënguiñe juabnaye, ínÿenga uantšaboše. Inÿenga bënga šonjanébuayënja y bënga nÿetscanga monjanenáboyënja. <sup>4</sup> Pero Bëngbe Bëtsá, bëngbe Atsebacayá, bëngbe tšabiama juabna yobómnyeyca y tša šuababuánÿeshanama šonjaninÿanÿé ora, <sup>5</sup> cha šonjanatsebacá, pero ndoñe nderado bënga ndaye tšabe soye tmojanmama, ndayá cha bëngbiama tbojanong-méyeca. Cha šonjanatsebacá, bëngbe bacna soyënga jabuajuánase, y chë Uámana Espiritu jujabuáchëse, bënga mo tsmëma entšangcá chamotsemnama, ntšamo tempo yojamncá ntjatsjuabnaycá y ntjatamcá. <sup>6</sup> Bëngbe Atsebacayá Jesucristbeyeca, Bëngbe Bëtsá tojanma Uámana Espiritu bëngbe ainaniñe nÿets tem-

po chaotsemándama y bēnga chašotséjabuachanama, <sup>7</sup> chca bēnga, Bēngbe Bētsá bacna soyēngama šojaperdónanga y bēngbe tšabiama juabna bómnyeca tojyana chabe bominyiñe tšábenga imomnēnga, chamotsobena cha yobomna soyēnguentsana bēnga mo ndayá cuaftsétocancá jýyēngacñama, y chca, chábeñe jtsošbuáchiyēse, chē nyetsca tescama yomna tšabe vida chamotsobátmanama.

<sup>8</sup> Chca, lempe ntšamo tijayancá n̄ya ndegombre endmēna, y atše séntseboše chē soyēngama bētsá chacotsabuatambá, chca, chē Bēngbe Bētsábeñe tmošbuachenga chamotsentšena chē tšabe soyēnga jtsamama. Chē buatēmbánana puerte tšabá endmēna y nyetscangbiama bētsá endoservena. <sup>9</sup> Inyēnga n̄ye ndoservena soyēngama jabuachana tmojtsenatsétsná ora, y anteungbe cuentēngama chamojtsoyebuambná ora, ndoñe cattstremetena; ndoñe cattsama cach tšēngaftanga ndoñe tšabá jtsenēyeunanamcá, y judiēngbe leyēngama ndoñe ín̄yēngaftaca cattsenpéli-aye. Chca jtsamana tondayama ntoservénana, y n̄ye bonamente chca jtsamana.

<sup>10</sup> Nderado nda tojtsama entšanga ndoñe cachcá nyetscanga chamondētsejuabnama y chamotsenpéliama, can̄ye o uta soye cochjabuayená ndoñe tšabá tonjamama; pero cha ndoñe tcmonejóyunase, chentšana cháftaca ndoñe más cattsóyebuambnaye. <sup>11</sup> Chca cochjama, er aca cochanjátatsēmbona can̄ya chca tojtsamná, chabe juabna tojatrocá bacna soyēnga jtse-

juabnayama. Chē soye y chē in̄ye bacna soyēnga ntšamo cha tojtsamcá, jtsin̄yan̄ynayana cha ibojtsemana castiganá chama jtsemnama.

### In̄ye soyēnga Titbiama

<sup>12</sup> Atše, Artemas o Tíquico ácbioye chajjichmó y choca chaojáshjango ora, ndayánaca cochjama Nicópolis puebloye aca jama atše jin̄yama, er atše sēnjajuabó chentše chē uaftenēntscuana jēftsemnana.

<sup>13</sup> Lempe ntšamo chacojobenacá, cochjuájabuache chē ín̄yēnga obuauyayá Zenas, y Apólosnaca; lempe ntšamo chata ibojtsējabotcá cochjátšataye, ín̄yoye jama jatóntšama chamobenama y benachējana tondaye chaondētsabuáshebenama. <sup>14</sup> Atše séntseboše, bēngbe entšanga, chē bēngcá Jesucristbeñe osbuáchiyēnga, chamotsentšena chē tšabe soyēnga jtsamama y chē puerte ujabótēnga jtsējabuáchanama, chca, chēnga tondayama ndoservena vidēnga ndoñe chamondētsebomnama.

### Pablo Títbioye jadiósoftanama

<sup>15</sup> Nyetscanga chē átšeftaca montsemnēngnaca cmontsechuaná. Atšbe cuenta cochjácheuaye nyetscanga chē bēnga imuababuan̄yeshanēngbioye, cach bēngcá Jesucristbeñe ošbuáchiyana bómnyeca. Atše, Bēngbe Bētsá séntseimpadana, cha chaoma ácbēñe tšabe bendicionēnga chaotsemnama.

# Filemón

## Jachuayama

**1** Atše Pablo, mora utamená Cristo Jesusbiamá oservena causa, quem tsbuanácha sentsabiamná, Jesucristbeyeca bēngbe catšata Timotéoftaca, acbiamá Filemón, bēngbe bonshaná y nda bēngaftaca condētrabája Jesucristo jaserviama. <sup>2</sup> Atše sēntsacheuaná, Jesucristbeyeca bēngbe uabena Apia y Arquípnaca, nda bēngaftaca cánýiñe Jesucristbe soyēngama endenjuerzana; y nyetsca ošbuachiyēngnaca, ndēmuanýenga imuamana acbe yebnentše jénefnama Bēngbe Bētsá jētschuayama. <sup>3</sup> Atše sēntseimpadana Bēngbe Bētsá Bēngbe Taitá y Bēngbe Utabná Jesucristo, chata chaboma tšabe bendicionēnga tšēngaftangbeñe chaotsemnama, y chaboma tšēngaftangbe ainaniñe tšabe ebionana chašmotsebonnama.

## Filemonbe bonshánana y ošbuáchiyana

<sup>4</sup> Bēngbe Bētsáftaca stsencuénta ora, acbiamá sēndbētsenojuabnaye, y sempre acbiamá Bēngbe Bētsá sēndbētsatschuanaye, <sup>5</sup> er atše sēnjátatšēmbona ntšamo aca nyetsca chē Bēngbe Bētsábenga imomnēnga icuababuánýeshanama, y ntšamo aca Bēngbe Utabná Jesúsbeñe tša icošbuáchema. <sup>6</sup> Bēnga, Jesucristbeñe ošbuáchiyēnga quetsomñecá, ácaftaca mo canýacá fsēndmēna. Chca endmēnayeca atše Bēngbe Bētsá sēntseimpadana, tšēngaftanga chašmobená más botamana josértana nyetsca chē Bēngbe Bētsábiocana tmojóyēngacñe tšabe bendicionēnga, bēnga Cristo Jesúsēftaca cánýiñe mo canýacá bētsemnayeca. <sup>7</sup> Jesucristbeyeca atšbe bonshana catšata, aca chē Jesucristbeñe ošbuáchiyēnga tša condábabuanyeshanama, atše corente oyejuayá sēntsemna y bētsañemo sēntsebonna. Y aca tcojama, nyetscanga chē Bēngbe Bētsábenga imomnēnga chēngbe ainaniñe ngmēnaca ndoñe chamondētsemnama, chēnga jujabuáchese.

## Pablo, Filemónbioye Onésimbiamá tbojanimpadá

<sup>8</sup> Y chca, atše Cristbe ichmoná quetsomñecá sēntsobena, aca nye jamándana ntšamo yomná chacotsamama, pero atše chca ndoñe quichatsma. <sup>9</sup> Y cbondbobonshánayeca, chca játamamna, aca cbochanjaimpáda. Atše Pablo, Jesucristbe cuenta ichmoná jóyebuambayama y mora utamená, chabiamá oservena causa, <sup>10</sup> canýe ruego cbochanjábema, Onésimo chacuájabuachama. Atše utamená tsmēnēntscuana, Jesucristbe soyēngama cha sēnjan-

buayiyná. Cha Crístbeñe tonjanošbuachéyeca, cha mo atšbe uaquiñacá tonjanóbema.

<sup>11</sup> Tempo, cha ácbioye tondayama quecmēnjátanservena, pero mora cha becá entsámama, acbiamá y atšbiamá. <sup>12</sup> Mora ácbioye sēntsatchamná, y atše sempre chabiamá sēndbētsenojuabnaye y sēndbobonshana. <sup>13</sup> Atšbiamá puerte tšabá manmēna cha átšēftaca matēnjoquedase, acbe cuenta atše chašoserve-ma, cárceloye utamená sēntsemnēntscuana, chē tšabe noticiēnga entsānga abuaiynaye causa. <sup>14</sup> Pero atše ndoñe chiyatsma cha chaoquedama atše chašué-juabuachama, er atše ndoñe quetsátsboše aca obligaciōnaca chacotsemnama, atše juajabuáchama ndayánaca chacomama; y sēntseboše aca ndayánaca chacoma, cach aca chca jamama puerte tcojtsebošese. Chcasna, tondaye quichatsma, chē soye chca chaotsemnama aca cabá ndocá ntjayancá. <sup>15</sup> Atše sēntsejuabná nderado Onésimo ácbentšana básefta tescama tojanoluaré, mora ácaftaca nyets tempo jtsatsmēnama ca, <sup>16</sup> y ndoñe nye acbiamá mo nyets tempo canýe oservenacá, ndayá chama más uamanacá, mo Jesucristbeyeca canýe bonshana catšatcá. Atše puerte Onésimo sēndbobonshana, y acna cmontsemna más cha jtsebobonshánana, er cha mora ndoñe quenátsmēna canýa nye acbiamá nyets tempo oservená, ndayá Bēngbe Utabnábeyeca canýe catšata, ntšamo cach aca condmēncá.

<sup>17</sup> Chca, aca atšbiamá condējuabná mo ácaftaca cánýiñe Bēngbe Utabnabiamá trabajayacá; chíyecna cmontsemna cha jtofjana, mo atše šcojofjá. <sup>18</sup> Nderado ntšamo cha tcmojoborlá o ndayánaca tcmondebena, atše chama cbochjētsēntšabuachiye. <sup>19</sup> Atše Pablo, cach atšbe cucuátšeca quem soye sēntsabiamná. Atše chama cbochanjētsēntšabuachiye. Ndegombre, ndoñe quenátsiyta atše chacbēyana becá šcondebena ca, ntšamo atsbocaná jtsemnama atše tbojánbuayenama. <sup>20</sup> Chcasna, Jesucristbeyeca atšbe catšata, Bēngbe Utabnáftaca cánýiñe mo canýacá quetsomñecá, Diosmanda chē pavor šcochtsebema. Diosmanda cochjama atšbe ainana ngmēnaca ndoñe chaondētsemnama.

<sup>21</sup> Atše chca cbontsabobiamná, er atše tšabá sēndētatšēmba, ntšamo cbontseimpadancá cochjamama, y cabá más chama cochjatsmama. <sup>22</sup> Y mora inye soye, Diosmanda posada šcochjaboprónta, atše jányama chajábocna orscama, er atše puerte jtsošbuáchiyese Bēngbe Bētsábeñe sēndobátmana, cha tšēngaftangbiamá yochjama lempe ntšamo atšbiamá chašmojt-



jañcá, y chca, cha šochjaleséncia atše tšëngaftang-  
bioye jésama.

**Pablo Filemónbioye jadiošoftanama**

<sup>23</sup> Epafra, muentše átšeftaca cárceloye utamená,  
Cristo Jesusbiam entšanga abuyiynaye causa, chá-

naca cmontsechuaná. <sup>24</sup> Y Marcos, Aristarco, Demas y  
Lucas, chë béngaftaca mondëtrabájanga Cristo  
jaséviama, chëgnaca cmontsechuaná.

<sup>25</sup> Atše séntseimpadana Bëngbe Utabná Jesucristo,  
chaoma tšabe bendicionënga tšëngaftangbeñe chaot-  
semnama.

# Hebreos

## Bëngbe Bëtsá béngaftaca tojoyebuambá, chabe Uaquiñáftaca

**1** Tempo, Bëngbe Bëtsá ba soye y ba soyéngaca bëngbe bëts taitángbioye tojanéyana, chë chabe juabna oyebuambnayéngaftaca. <sup>2</sup> Pero quem tempo béngaftaca tojoyebuambá, chabe Uaquiñá jíchmuase, bëngbioye cha chašúyanama. Bëngbe Bëtsá tojama, lempe ntšamo chabe soye yomncá, chabe Uaquiñabiama chaotsemnana, y chábeyeca Bëngbe Bëtsá quem luare y nyetsca inye luarénga tojama. <sup>3</sup> Cha endinýanýná Bëngbe Bëtsabe corente buashinýinýanana y uámanana, y cha endmëna cach Bëngbe Bëtsacá, y chábeñe bënga mondobena jinýama ntšamo Bëngbe Bëtsá yomncá. Chabe bëts obenánaca endútabna lempe ntšamo quem luarentše yobinýncá; cha tojayana y chca jtsemnana. Cha tojanóbana bëngbe bacna soyénga jabuajuánama, y chentšana Bëngbe Bëtsá tojaninýanyé cha puerte bëtsá y uamaná bëtsemnana, celoca játbemëse, Bëngbe Bëtsabe catšbioica, nyetscanga jtsaméndayama.

## Bëngbe Bëtsabe Uaquiñá chë angelëngbiana más bëtsá yomna

<sup>4</sup> Y chca, Bëngbe Bëtsá tbojánbema chë angelëngbiana más uamaná y obená, er Bëngbe Bëtsá tbojanbuajó canýe más uámana uabaina y chë angelëngbiana canýe más uámana trabajo tbojanbonýé. <sup>5</sup> Ndegombre chca endmëna, er Bëngbe Bëtsá ndocna te ndocna ángelbioye mëntšá tbonjaniyana, ntšamo chabe Uaquiñábioye tbojaniancá:

Aca atšbe Uaquiñá condmëna.

Mënté entšanga sënjinýanyé aca atšbe Uaquiñá comnama ca. Ni ndocna angelbiana mëntšá tojánayana, ntšamo chabe Uaquiñabiama tojanayancá:

Atše canýe taitá chabiama chántsemna, y cha canýe Uaquiñá atšbiana ca. <sup>6</sup> Quem Bëngbe Bëtsabe Uaquiñá endmëna nyetscangbiana más uamaná. Chca Bëngbe Bëtsá tojánayana, chabe natsana Uaquiñá quem luaroye cháúashjanguama cha tojanma ora:

Bëngbe Bëtsabe nyetsca angelénga cha chamotsatschuaná ca. <sup>7</sup> Y chabe angelëngbiana, mëntšá tojánayana:

Atše sëndama atšbe angelénga, chë atšbe buayinayénga, mo binýiëngcá chamotsemnana, y chënga, atšbe oservénënga, mo iñëjéngcá ca. <sup>8</sup> Pero chabe Uaquiñabiama Bëngbe Bëtsá tojánayana:

Utabná, acbe améndayana nyetsca tescama echántsemna, y aca nyetsca soyënguifë condbëtsemmandaye, ntšamo tšabá yomncá jtsamëse.

<sup>9</sup> Aca icontšëna ntšamo tšabá yomncá nyetsca soyënguifë jtsamama, y sempre chca jtsamama tša icoboše, pero nýa tondayama cmondogustana bacna soyénga jtsamana, chë ndayá Bëngbe Bëtsá ndoñe yondboše soye;

chíyeca Bëngbe Bëtsá tcmojabocacá, y tojama aca puerte oyejuayá chacotsemnana, chë inýengbiana más oyejuayá ca —Bëngbe Bëtsá tojánayana. <sup>10</sup> Bëngbe Bëtsá mëntšánaca chabiama tojánayana:

Utabná, quem luare jobojátšama ora, aca quem luare tconjanma,

y lempe chë celoca yomna soyéngnaca.

<sup>11</sup> Lempe chë soyénga nyets tempo ndoñe queochátsmëna;

aca nyetsca tescama cochántsemna.

Lempe chë soyénga echanjopochóca, mo tojuatanguaná entšayacá.

<sup>12</sup> Aca chë luarénga cochanjátrocaye, mo tsmëcá cuafjabiamcá.

Chca, chë luaréngaca cochanjama, mo entšayá tcojenëjonëtse y tcojenotrocacá.

Pero aca nyets tempo cach aca cochandesomñe, y nyets tempo vida cochandesóbomñe ca —cha tojánayana. <sup>13</sup> Bëngbe Bëtsá ndocna te ndocna ángelbioye mëntšá tbonjaniyana, ntšamo chabe Uaquiñábioye tbojaniancá:

Atšbe catšbioica cochtsetbemana, acbe uayayénga acbe cucuatšifë chamoquedama atšbe obenánaca chjamëntscuana ca. <sup>14</sup> Ndegombre, nyetsca angelénga espíriténga mondmëna Bëngbe Bëtsá jasérviana, ndëmuanýénga cha tojanichamó bënga jabújabuachama, chë atsebácanënga mochtsemnëngbe tšabiama.

## Canýe bëts soye endmëna atsebácanënga jtsemnana

**2** Chíyeca, bënga šontsamna sempre Bëngbe Bëtsabe soyénga jtsuenanana, chë bënga tmonjouena soyénga, chë tšabe benachentšana ndoñe chamondojuánama. <sup>2</sup> Ndayá Bëngbe Bëtsá tempo angeléngaca entšanga tojanamëndacá, canýe ndegombre soye endmëna, y entšanga entsamna chca jtsobedecénana; y chë bacna soye tmojanmënga y ntšamo Bëngbe Bëtsá tojanmandacá ndoñe tmonjanmënga

castigo tojanatšatá, chca tmojanma causa; y chca, <sup>3</sup> bēnga chca bacna soyēnga tmojtsamēse, ¿ntšamo mochjobenaye jtsejuabnayana Bēngbe Bētsá chama ndoñe šochanjacastígaye ca? Ndegombre cha chca echanjama, bēnga chábeñe ndoñe tmontsošbuáchese, chē bēts soye jēftsashjáchama, atsebácanēnga jtsemnama. Bēngbe Utabná chē natsaná yojtsemna nda entšanga tojanabuayená Bēngbe Bētsá entšanga yochjánatsebacama; y ínŷenga bēnga šonjanabuayená cachcá ntšamo chábioye tmojanoyeunacá. <sup>4</sup> Y Bēngbe Bētsánaca tonjaninŷanŷé, ndayá chēnga tmojanabuayenacá ndegombre bētsemnama, chabe obenana jinŷanŷiyama soyēngaca, entšanga chamenjnaná soyēngaca, bēts soyēngaca, y entšanga chē Uámana Espiritu ainaniñe chamotsebomnama cha jtsamēse. Chca jamēse, cada ona chaotsobena jamama ntšamo Bēngbe Bētsá yobošcá.

### Bēngbe Bētsá tojanma Jesucristo entšangcá chaotsemnama

<sup>5</sup> Bēngbe Bētsá angelēnga ndoñe tonjubuáyana chamotsemándama ndayá quem luarentše yochtsemiñe, lempe mo tsmécá chaotsemnama Bēngbe Bētsá chaojama ora, chē ndayama mora bēnga montsoyebuambná. <sup>6</sup> Chamna, ínŷoca Bēngbe Bētsabe uabemana palabreñguiñe mēntšá endayana, ntšamo chábioye canŷa tbojaniancá tojánayana:

Entšanga ndoñe yapa uámanēnga quemátsmēna, as ¿ndáyeca tša chēngbeñe cuanjésejuabnaye?

Chēnga entšanga mondmēna. ¿Ndáyeca tša chēnga cuanjésanŷena?

<sup>7</sup> Aca tcojama entšá puerte uamaná chaotsemnama, y chē angelēngna nŷe batšatema chabiamá más uámanēnga mondmēna.

Aca tcojama cha puerte uamaná y respeto merecido bomná chaotsemnama,

<sup>8</sup> y cha chaotsemándama nŷetsca chē inŷe soyēnguiñe, chē quem luarentše aca tcojamiñe —chiñe canŷa tojánayana. Entšá lempe chaotsemándama Bēngbe Bētsá tojanma ora, tondaye tonjánboshjona entšáftaca ndēmandana soye ca. Pero mēntsoñama ndoñe nŷa chca quemēntinŷe, chē entšá lempe ntšamo quem luarentše yomncá jtsemándayana.

<sup>9</sup> Pero bēnga mondetátšēmo y corente mondonŷá Jesús aínne chca tojanmama. Bēngbe Bētsá tojanma cha nduamaná chaotsemnama, mo canŷe entšacá, baseftayté chē angelēngbiamá más batšá uamaná. Bēngbe Bētsá, entšangbe tšabiamá jtsejuabnayēse, yojánboše Jesús chaóbanama, corente jasúfriase; Bēngbe Bētsá yojánboše cha chca chaomama, nŷets luarentša entšangbe tšabiamá. Y Jesús ya chca tojánmayeca, Bēngbe Bētsá ya tojinŷanŷé cha puerte bētsá y uamaná bētsemnama.

<sup>10</sup> Nŷetsca soyēnga yobinŷna Bēngbe Bētsabiamá y chábeyeca. Tšabá enjamna, Bēngbe Bētsá jamana Jesucristo chaotsemnama lempe ntšamo entšanga tmojtsajabotcá, nda chēngbe bacna soyēnguentšana cháuatsebacama. Bēngbe Bētsá chca tojanma, Jesús,

chē entšanga atsebácanēnga jtsemnama unachayá, chaosufrima jamēse, chca, ba entšanga celoca, mo chabe basengcá, cháftaca bētsétsanga chamotsemnama. <sup>11</sup> Er Bēngbe Bētsá cach Taitá nŷetscangbiamá endmēna: Jesús, chē entšanga Bēngbe Bētsábenga chamotsemnama iuamabiamá, y chē entšanga chca chamojtsemnēngbiámna. Chíyeca Jesús, Bēngbe Bētsabe Uaquiñá, ndoñe ntséuatjana chēngbioye catšátanga ca jtsachembuanama. <sup>12</sup> Bēngbe Bētsabe uabemana palabreñguiñe Bēngbe Bētsábioye cha mēntšá tbojanianca:

Atšbe uabentsēngbeñe acbiamá chanjóyebuambaye, y jacántase cbochanjētschuaye, ácbioye adórayēnguentše ca. <sup>13</sup> Y mēntšanaca cha Bēngbe Bētsabiamá tojánayana:

Atše atšbe Bētsábeñe chantsošbuáchiye ca. Y más chcoye mēntšá tojánayana:

Muentše Bēngbe Bētsabe básengaftaca séntsemna, chē atšbe cucuatšínne tojábashesjuanēnga, atše jtsanŷenama ca.

<sup>14</sup> Quem Bēngbe Bētsabe básenga nŷetsca entšangcá mondmēnayeca, Jesúsna canŷe entšá chēngcá tojanóbema. Cha chca tojanma, jóbanēse, chē entšanga jóbanama chaotsamnama obenana bomná Satanás, jayénjanama. <sup>15</sup> Y chca, cha tojama chē jóbanama y ndayá chentšana yochjopásama autjēnga ndoñe chamondétsauatjama; chēnga nŷets tempo corente ngménaca imnoyena, jóbanama auatja causa. <sup>16</sup> Er ndegombre, cha ndoñe tonjánabo chē angelēnga jabújabuachama, ndayá chē Abrahámbentšana entšangbioye. <sup>17</sup> Y chama cha ibojamna jtsemnana nŷetsca soyēnguiñe cachcá mo chabe uabentsēngcá, chē entšanga, chca, jobenayama jtsemnama chēngbiamá mo bachnangbe canŷe más uámana amēndayacá, Bēngbe Bētsá jtseimpadánama chēngbioye chēngbe bacna soyēngama cháuaperdonama, puerte lastemado mēná y sempre ntšamo Bēngbe Bētsá tbojauyancá amá. Chca, cha jóbanēse jamama entšanga chamobenama perdonánēnga jtsemnama, y chca, jobenayama Bēngbe Bētsáftaca tšabá tempcá jtsemnēngama. <sup>18</sup> Y mora cha entsobena, ndēmuanŷenga bacna soye jamama tojócochenguēnga jujabuáchana; cha chca entsobena, er cachánaca tojansufrí, cha bacna soye chaomama Satanás tša yojtsentšena ora.

### Cristo Moisesbiamá más uamaná endmēna

**3** Chíyeca, Jesucristbeyeca catšátanga, Bēngbe Bētsábenga, ndēmuanŷenga Bēngbe Bētsá tojáchembo chabe entšanga chamotsemnama, corente Jesucristbeñe šmochjésejuabnaye. Cha endmēna nda Bēngbe Bētsá bēngbioye tbojanichmó, y nda bēngbiamá yomna mo chē más uámana bachnangbe amēndayacá, Bēngbe Bētsábioye jtseimpadánama bacna soyēngama chašotsaperdonama. Cha chca endmēna chē bēnga mondošbuaché soyēnguiñe y chē mondbáyana ndegombre yomna ca soyēnguiñe. <sup>2</sup> Er Jesús nŷets tempo tojanma ndayá chaotsamama Bēngbe

Bëtsá tbojaniancá, Bëngbe Bëtsá, nda tbojanábuayana chca chaoservema, cachcá ntšamo Moisés tojanma ntšamo Bëngbe Bëtsá tbojanmandacá, chabe entšángbiöye cháuaservema. <sup>3</sup> Canÿe yebna jebuaná chë yebnama más uamaná jtsemnana; cachcá Jesús, nda inétsama entšanga Bëngbe Bëtsábenga chamotsemnama, más jtsomerecénana Bëngbe Bëtsá cha puerte bëtsá y uamaná bëtsemnama cháuinÿanyëma, nÿe ntšamo Moisés, canÿa Bëngbe Bëtsabe entšanguentšá yojanomerecénama. <sup>4</sup> Ndëmanÿe yébnëna canÿe jebuaná jtsebmomna, pero Bëngbe Bëtsá endmëna nda tojanma lempe ntšamo yobinÿncá. <sup>5</sup> Moisés yojtsama ndayá chaotsamama Bëngbe Bëtsá tbojanmandacá, tšabe oserve-nacá nÿetsca Bëngbe Bëtsabe entšángbeñe, y yojam-nan canÿa corente tatšëmbuá ndayá más chcoye yochjanopásama, ndayá Bëngbe Bëtsá yochjánayanama. <sup>6</sup> Pero Cristo, ndayá Bëngbe Bëtsá tobošcá jamana, chë Bëngbe Bëtsabe entšángbeñe Uaquiñacá jtsemándayëse, ntšamo canÿe uaquiñá jtsemándayana ndayá nÿetsca chabe pamillanga tmojtsamiñe; cha, chë Uaquiñacá y chënga chë Bëngbe Bëtsabe pamillentsëngcá. Bënga chë pamillentša entšanga jtsemnana, bënga chë ndayá tmošbuáchema bëts añémoca sempre tmojtsóyebuambnase, y sempre Bëngbe Bëtsá tšabe soyënga bëngbiama yochjamama tmojtsobátmanëse, y bënga chca jtsebmomnama puerte oyejuayënga tmojtsemnëse.

### Chë jóchnama uámana luare Bëngbe Bëtsabe entšángbiama

<sup>7</sup> Chcasna, ntšamo chë Uámana Espíritu Bëngbe Bëtsabe uabemana palabrënguifne tojanayancá:

Mënté tšëngaftanga ndayá Bëngbe Bëtsá tojtsichamcá šmojouenëse,

<sup>8</sup> ndoñe šmattsama, Bëngbe Bëtsabe buayenana soyënga tšëngaftangbe ainaniñe ndoñe chaondómashënguama,

mo chë entšanga ndoyena luaroca Moisésoftaca imojtsemnëngcá, Bëngbe Bëtsabe contra nÿetsca soyënguifne imojtsemna.

Chënga bëtscá bacna soyënga tmojanma, mo ndayá cuaftsamcá jinÿama ntsachetšá más muanjobenaye jamana y Bëngbe Bëtsá cabá uantado chëngaftaca tayojtsemnama.

<sup>9</sup> Bëngbe Bëtsá tojánayana: “Chentše, tšëngaftangbe bëts taitanga bëtscá monjánama jinÿama ndayéntscoñe atše uantado chëngaftaca tsjamnama; chca chënga tmonjanma, masque canta bnétsana uatëntscuana chënga chentše tmonjáninÿe chë atše sënjánama bëts soyënga.

<sup>10</sup> Chíyeca, atše chorsca entšángaftaca šonjánetna y sënjánayana:

‘Tšëngaftanga mora átšeftaca ndoñe quešmátajna, mo chë otšenënga tmojtsemnëngcá,

y ndoñe šmonjábošena jtsiyenana ntšamo atše tsošcá jtsamëse.’

<sup>11</sup> Chíyeca, atše chëngaftaca etonaná sënjánayana, mo nda cuafjajuracá,

chënga ndocna te mochjéftsashjache chë átšeftaca jóchnama uámana luaroye jashjanguama ca” —cha tojánayana.

<sup>12</sup> Jesucrístbeyeca catsátanga, yejuana šmochtsantješna ndocná tšëngaftanguentšá chaondëtsebmomna canÿe ainana bëtscá bacna juabnëngaca, y chë causa chaotsemna Bëngbe Bëtsábeñe ndošbuachiyá, y Bëngbe Bëtsábentšana, chë sempre iuetsemnábentšana chaotsojuánañe. <sup>13</sup> Chamna, nÿetscanga añemo šmochtsatenatšetnaye cada te, chë bënga imobena Bëngbe Bëtsá joyeunayama tempo imoyenëntscuana, chë Bëngbe Bëtsabe uabemana palabrënguifne “mënté ca” uabaina tempo. Chca cmontsamna, ndocná tšëngaftanguentšá chaondët-samama, Bëngbe Bëtsabe buayenana soyënga ainaniñe ndoñe más chaondómashënguama, bacna soyënga jamama juabnëngaca ingñená. <sup>14</sup> Er, ndayá Jesús chabe amëndayoca yobomntšana bënga chamóyëngacñamna, bënga šontsamna sempre ainaniñe corente jtsetatšëmbuana Jesusbe soyënga ndegombre soyënga bëtsemnama, ntšamo bënga chábeñe jtsošbuáchiyama tmonjanontsé ora monjanamcá.

<sup>15</sup> Ntšamo Bëngbe Bëtsabe uabemana palabrënguifne endayancá:

Mënté tšëngaftanga ntšamo Bëngbe Bëtsá tojtsichamcá šmojouenëse,

ndoñe šmattsama, Bëngbe Bëtsabe buayenana soyënga ainaniñe ndoñe chaondómashënguama,

mo chë entšanga ndoyena luaroca Moisésoftaca imojtsemnëngcá, Bëngbe Bëtsabe contra nÿetsca soyënguifne imojtsemna ca. <sup>16</sup> ¿Y ndëmanÿënga imojamna,

chë Bëngbe Bëtsá tojanëyancá tmojanuenentšana, nÿetsca soyënguifne chabe contra imojtsanmëna? Co chë Moisésbeyeca Egiptocana tmojánbocanënga. <sup>17</sup> ¿Y ndëmanÿëngaftaca Bëngbe Bëtsá etonaná canta bnétsana uatëntscuana yojtsemna? Co chë bacna soyënga tmojanmëngaftaca, ndëmanÿënga entšanga ndoyena luaroca tmojanóbana y chëngbe cuerpo chentše tojanoquedá. <sup>18</sup> ¿Y ndëmanÿënga tojanéyana, mo nda cuafjajuracá, chënga ndocna te mochjéftsashjache chë cháftaca jóchnama uámana luaroye jashjanguama ca? Co chë ndëmanÿënga ntšamo cha tojanmandacá ndoñe tmonjanmënga. <sup>19</sup> Y ndegombre, bënga montsobena jinÿama chënga ndoñe tmonjéftsashjache chë cháftaca jóchnama uámana luaroye jashjanguama, Bëngbe Bëtsábeñe ndoñe imontsošbuaché causa.

**4** Chíyeca, bënga chë Bëngbe Bëtsáftaca jóchnama uámana luare jashjáchama cabá imobenëntscuana, ntšamo cha šojanašebuachenacá cachcá méntscóñama iuetsemna, puerte cuedado mochtsebmomna, nderado ndánaca tšëngaftanguentšá ndoñe nanjobenaye chca jashjáchama. <sup>2</sup> Er bëngnaca chë tšabe noticiënga tmonjouena, cachcá chë Bëngbe Bëtsabe buayenana soyënga chëngbe ainaniñe ndoñe

chaondómashënguama tmojanmëngcá; pero chënga chë buayenana soyënga tmojanuena ora, ndocna tšabe soye chëngbeñe tonjanopasá, er chca tmojanuena ora, chë palabrënguifne ndoñe montsanošbuachë.

<sup>3</sup> Pero bënga, chë Jesucristbeñe tmojošbuachengna, mochanjobenaye chë jóchnama uámana luaroye jashjanguama, chë ndayama Bëngbe Bëtsá tojánayana, chë tempo chábioye chca tmojtsanábotengbiama cha mëntšá tojánayana ora:

Chíyeca, atše chëngaftaca etonaná, sënjánayana monda cuafjajuracá,

ndegombre chënga ndoñe mochjéftsashjache chë jóchnama uámana luaroye jashjanguama ca. Pero cha chabe trabajo tojanpochocá, quem luare tojanma ora; <sup>4</sup> er Bëngbe Bëtsabe uabemana palabrënguifne cányentše mëntšá endayana, chë cányésfta tianoye ndayá cha tojanmama:

Bëngbe Bëtsá nyetsca trabajëngama tonjanochná chë cányésfta tianoye ca. <sup>5</sup> Y cachentše Bëngbe Bëtsabe uabemana palabrënguifne endayana, chë tempo chábioye chca tmojtsanábotengbiama:

Chënga ndocna te quemocháisashjache chë átšeftaca jóchnama uámana luaroye jashjanguama ca.

<sup>6</sup> Chë entšanga monjamna chë natsanënga chë tšabe noticiënga jouenama, pero chë Bëngbe Bëtsáftaca jóchnama uámana luare ndoñe tmonjéftsashjache, ntšamo cha inabošcá chënga ndoñe tmonjanma causa. Chcasna, cabá ndegombre endëtsomñe báseftanga, chë Bëngbe Bëtsá tojánayana soyënguifne tmojtsošbuáchengna, mochjéftsashjache chë Bëngbe Bëtsáftaca jóchnama uámana luaroye jashjanguama.

<sup>7</sup> Chë entšanga ndoyena luaroca, Bëngbe Bëtsá entšanga tojánachembo chë cháftaca jóchnama uámana luaroye chámumashjnama, y chentšana ba uatëse cha cachiñe canye tempo tojuinýnaná, chora entšanga chamobenama chë cháftaca jóchnama uámana luaroye jashjajnama, chë cha “mënté ca” tojanabaye tempo. Cha chca tojanma Davidbiajana jóyebuambayëse, David Bëngbe Bëtsabe uabemana palabrënguifne mëntšá tojánayana ora:

Mënté tšëngaftanga, ndayá Bëngbe Bëtsá tojtsichamcá šmojouenëse,

ndoñe šmattsama, Bëngbe Bëtsabe buayenana soyënga ainaniñe ndoñe chaondómashënguama ca.

<sup>8</sup> Josué, Israeloca entšanga Canaán fshantsëngoye yojtsënachaye ora, chë Bëngbe Bëtsáftaca jóchnama uámana luare jtsebomnama cha choca matëñjanmëse, Bëngbe Bëtsá bayté chentšana, David yojëftsiyena ora, inye tempuama ndoñe matëñjanoyebuambá, chë ndaye ora entšanga muanjobenaye chë cháftaca jóchnama uámana luare jashjáchama. <sup>9</sup> Y chca, cabá endmëna canye uámana luare ndayentše Bëngbe Bëtsabe entšanga mochjobenaye cháftaca jóchnama, ntšamo Bëngbe Bëtsá tojanochnacá, chë quem luare jamama nyetsca trabajënga tojanpochocá ora; <sup>10</sup> er nda tojashjache chë Bëngbe Bëtsáftaca jóchnama uámana luaroye jashjanguama, cha jóchnana chë Bëngbe Bëtsá tbojanmandá jamama trabajëngama, ntšamo Bëngbe

Bëtsá tojanochnacá, chë quem luare jamama nyetsca trabajënga tojanpochocá ora. <sup>11</sup> Chíyeca, šontsamna lempe ntšamo tmojobenacá jamana chë jóchnama uámana luare jéftsashjáchama, ntšamo chë Bëngbe Bëtsábioye ndoñe tmonjanoyeunangcá ndocná chaondëtsamama, y chë causa chënga chë soye ndoñe tmonjéftsashjache.

<sup>12</sup> Er Bëngbe Bëtsabe palabra endmëna mo canye aina soycá, nyets tempo entšangbioye ndayánaca jtsabuátambayana, y bëtscá jamana corente obenánaca, y ndocna te nye bonamente chë palabra jóyebuambayana. Mo chë nyets utoicajana más efsana espadëjaquécá, jobenayana puerte jashenoye jatëtsana canye cuerpo tcojatëtse ora, cachcá y cabá puerte más Bëngbe Bëtsabe palábraca, cha bënga jinýanýiyana ntšamo bënga nye bëngbe ainaniñe tmojtsejuabná y tmojtsebošcá, y chë ndocnábioye tmonjinýinýe sóynaca; y chë palábraca cha endobena jáuyanana ntšamo bënga tmojajuabó y tmojabošencá aifne o ndoñe tšabá bëtsemnana. <sup>13</sup> Ntšamo Bëngbe Bëtsá tojamentšana tondaye quenátopodena chabiamia iytëmenana jtsemnana. Bëngbe Bëtsá lempe bominye iuetsequëcñá, y nyetsca soyëngama y nyetscangbiama lempe yotátšëmbo; Bëngbe Bëtsá, ndábioye šojtsamna sempre jojuana ndáyeca canye soye chca tmojamama.

#### Jesús endmëna chë más uámana bachnangbe bëtš amëndayá

<sup>14</sup> Jesús, Bëngbe Bëtsabe Uaquiñá celoye tojá-mashëngo, y mora cha endmëna nda chabe delante sempre bëngbiama ibuëtseimpadana, mo chë bachnangbe canye más uámana amëndayacá. Chíyeca, bënga šontsamna sempre chábeñe jtsošbuáchiyana, ntšamo bëngbe ndegombre ošbuáchiyana yomncá, chë ndayama bënga nyetsca entšangbeñe tmojayana.

<sup>15</sup> Er chë bëngbiama impadaná, mo bachnangbe canye más uámana bëngbe amëndayacá, Jesús, yobena bëngbiama jóngmiana, bënga inye ora ndoñe yapa obenana tmontsebomna ora, tšabe soye o ndaye sóynaca jamama. Chca endmëna, er Satanás tša yojtsentšena Jesúsbioye ba juabnënga chabotsontšáshjajuanama, jayëñjanama bacna soye chaomama, nyetsca juabnënga ntšamo béngnaca mondbetsebomncá, pero Jesús ndocna te ndocna bacna soye tonjéftsema. <sup>16</sup> As, ndauatjcá Bëngbe Bëtsá mochjótšëmbona, mo chábioye cuaftsobecocnangcá; cha canye uámana tbemaniñe yojtsetbemana canye bëtš reycá; chca mochjama, bënga chášualastemama, y bëngbiama tšabe juabná jtsebomnëse, chašújabuachama bënga chca chašojtséjaboto ora.

**5** Ndëmuanye bachnangbe más uámana amëndayánaca jtsemnana entšanguentšana bocacaná, y uabuayaná chëngbe cuenta Bëngbe Bëtsá jasérviamá, chábioye juatšëmbonama y bayënga jobáyama Bëngbe Bëtsá jëtschuayama, chca, Bëngbe Bëtsá chë bacna soyënga entšanga tmojamama cháuaperdona. <sup>2</sup> Chë bachna jtsoobenana jóngmiana, chë bacna

soyënga amëngbiana chama ntsetatšëmbcá, y chë bacna soyënga jamama ingñënënga imomnënga, mo otšenëngcá imomnëngbiana, er cachánaca inye ora ndoñe yapa obenana ntsebomnana, chë bacna soyënga jamama juabnëngama jtocochbuáchama. <sup>3</sup> Y chíyeca cha jtsemnana bayënga jobáyama Bëngbe Bëtsá juatšëmbonama, ndoñe nye entsángbioye bacna soyëngama cháuperdonama, ndayá chábioye chaboperdonámnaca. <sup>4</sup> Ndocná quenátobena cachá quem uámana trabajo jentšetayana, bachnangbe más uámana amëndayá jtsemnana; cha jtsemnana, Bëngbe Bëtsábeyeca uabuayaná chca uámana trabajo jamama, ntšamo ndegombre Aarónoftaca tempo cha tojanmcá. <sup>5</sup> Cachcá, Cristo ndoñe cachá tonjanábuayana jtsemnana chë Bëngbe Bëtsabe delante sempre bëngbiana impadaná, mo bachnangbe canye más uámana amëndayá, ndayá Bëngbe Bëtsá tbojanábuayana chë uámana trabajo jtsebomnana. Cha endmëna nda Jesúsbioye mëntšá tbojanianya:

Aca atšbe Uaquiñá condmëna.

Mënté entsanga sënjinýanýé aca atšbe Uaquiñá comnama ca. <sup>6</sup> Y inýocnaca, Bëngbe Bëtsabe uabemana palabrenguiñe mëntšá tbojanianya:

Aca nyetsca tescama canye bachna condmëna, canye bëts bachna ntšamo Melquisedec yojamncá ca.

<sup>7</sup> Jesús quem luarentše yojéftsiyenëntscuana, cha juayebuáchëse y shëchbuíyeca Bëngbe Bëtsáftaca ibnéncuentaye y ibnaimpadana, cha chë jobanámentšana jatsbocama yojanobená; y Jesús ntšamo Bëngbe Bëtsá yojanbošcá tojánmayeca y tša respeto chabiana bómnayeca, chábioye tbojanoyeuná. <sup>8</sup> Chca, Cristo masque Bëngbe Bëtsabe Uaquiñá inamna, jasúfriase tojanábouinye ntšamo jamana ndayá Bëngbe Bëtsá tojtsebošcá. <sup>9</sup> Chca, Bëngbe Bëtsá chábioye tbojánbema lempe ntšamo entsanga tmojt-sajabotcá, nda chëngbe bacna soyëngama cháuatsebacama; chentšana cha, Cristo, tojanma lempe ntšamo yojaniycá, nyetscanga chë entsanga chábioye imojányeyuanënga chamotsobenama nyetsca tescama atsebácanënga jtsemnana; <sup>10</sup> y Bëngbe Bëtsá tbojanábuayana, chë chabe delante sempre bëngbiana impadaná, mo bachnangbe canye más uámana amëndayacá chaotsemnana, canye bëts bachna ntšamo Melquisedec yojamncá.

### Resjo endmëna, ošbuáchiyana jtsajbanana

<sup>11</sup> Bëtscá entsemna quem palabrama jóyebuambayama, pero chë soyënga jayanama ntšamo tšëngaftanga catafjosertaycá, ndoñe paselo quenátsmëna, er tšëngaftangna nýa uenana Bëngbe Bëtsabe soyëngama jósertana. <sup>12</sup> Tšëngaftanga ya bayté Jesucristbe soyëngama šmotátšëmboyeca, tšëngaftanga cmontsamna ya jtsobenana inýëngbioye chë soyënga jtsabuátambayana; pero tšëngaftanga cmontsëjaboto ndánaca Bëngbe Bëtsabe soyëngama cachiñe chacmëtëtabuayená, chë jtsošbuáchiyama šmojontšé ora natsana jshauatsjínýana soyëngama. Y chca, tšëngaftanga šmojobiana mo šësonatemëngcá, jtsëjabó-

tana létšiyë jofšiyana y ndoñe jobenayana jasana chë jabmuánama ndoñe paselo tontsemna soyënga. <sup>13</sup> Chë nyetsca soyënguiñe ntšamo tšabá yomncá jtsamama buatëmbana soyënga ndoñe tontsabuatmá cha, jtsemnana mo canye šësonatemcá, nda vida jtsebomnana nye létšiyë jtseftmanëse. <sup>14</sup> Pero chë tmojtsobena jajuaboyana y jtsetatšëmbuana ndayá tšabá yomna o ndayá ndoñe tšabá jamama, chca jtsamëse tmoyenamna, chënga jtsemnana mo bëtsëtsangcá, ndëmuanýenga ndayánaca jasana, chë ndoñe paselo jabmuánama soyëngnaca.

**6** Chcasna, bënga šontsamna jtsajbanana nye jësebošana jtsatsjëndayana Cristbe buatëmbana soyënga, chë bënga chábeñe jtsošbuáchiyama tmojanontšé ora tmojanatsjinýe soyënga, y šontsamna jtsatsjëndayana chabiana nyetsca soyënga, más totcá josértama yomna soyënga. Chca, bënga mochántsemna mo chë bëtsëtsangcá, ndayánaca jtsesayana. Ndoñe más nye chë natsana buatëmbana soyëngama mattsatsjëndaye, mo chë ndayá yomna bacna soyënga jtsamana y chë bënga ndoñe vida ntsebomnana ju-natsana soyënga amana jtsajbanana, y chë tšabe benache jtishachana; o ntšamo Bëngbe Bëtsábeñe jtsošbuáchiyana; <sup>2</sup> chë juabáyana ndayá yomna; chë inýabe bestšasiñe cucuatšënga jacjayana Bëngbe Bëtsábioye chabiana jaimpádama; chë obanënga jtayenama Bëngbe Bëtsá yochjamama; y mocna ora ntšamo entsanga tmojamama Bëngbe Bëtsá yochjayanama, chënga chë nyetsca tescama yomna tšabe vida chamotsebomnana o nyetsca tescama castigánënga chamotsemnana. <sup>3</sup> Y bënga chca fchanjama, chë más totcá yomna josértama soyënga jtsabuátambayana, Bëngbe Bëtsá chca chašojálesenciase.

<sup>4</sup> Ndëmuanýenga, canye ya chë Bëngbe Bëtsabe ndegombre soyënga tmojanóyëngacñe, y chë Bëngbe Bëtsabe ba tšabe soyëngnaca, chábënga bëtsemnana, y chë Uámana Espíritu chëngbe ainaniñe chaotsemándama imobomna, <sup>5</sup> y chë Bëngbe Bëtsá ntšamo tojašebuachenacá sempre inétsamama tmojinýe, y ndëmuanýenga tmojáninýe Cristo jtsamana bëts soyënga chabe bëts obenánaca, chë ndaye obenánaca cha puerta bëts soyënga yochjama cha quem luaroye yochjésabo ora, <sup>6</sup> chënga Jesucristbeñe ošbuáchiyana lempe tmojtsajbanase, tondaye quenátsmëna ndayá jamama cachiñe Bëngbe Bëtsábioye jtobéconama; er Bëngbe Bëtsabe Uaquiñá chca stëtšoye jaquédana, y jtsemnana mo Bëngbe Bëtsabe Uaquiñábioye cachiñe chënga tmojtsecrucificacá, y entsanga cachiñe cha chamotsáboyejuanama chënga cuafjamcá. <sup>7</sup> Š-mochjinýe: fshantse jamana chë ba uaftënënga chiñe chaómashënguama, y chë chiñe trabájayëngbiana bëtscá jaja sananga tojóbcnëse, Bëngbe Bëtsá jamana, chë fshantsentšana bëtscá tšabe soyënga entsangbiana chaotsebínýnama. <sup>8</sup> Pero nye uchmašëshangá y matënga uchmëfjangaca chiñe tojuábocnëse, chë fshantse tondaye ntsámanana; y nderado Bëngbe Bëtsá nanjama chiñe ndocna tšabe mata chaonduábocnana, y cabana, entsanga chiñe

mochantsashaniña. Cachcá, chë ošbuáchiyana tmojt-sajbananga castigánënga mochántsemna.

### Bëngbe Bëtsábeñe sempre chamotsobátmanama y ainaniñe bëtscá añemo chamotsebomnama

<sup>9</sup> Pero masque chca montsoyebuambná, atšbe bonshánënga, bënga tšabá fsëndétatšëmbo tšëngaftangbeñe chë más tšabe soyënga echántsemna, chë atsbo-caná jtsemnama tojtsá cha yobomna soyënga. <sup>10</sup> Er Bëngbe Bëtsá sempre ntšamo tšabá yomncá nyetsca soyënguiñe jtsamana, cha ndegombre echántsejubnaye ndayá tšëngaftanga šmojamama, y chë chabiamá šmojinýinyé bonshánama, chabe entšángbioye jt-sëjabuáchanëse, ntšamo mórnaca šmojtsama. <sup>11</sup> Pero bënga fséntseboše, cada ona tšëngaftanguentšá, nyets tempo y Jesús chaojésabëntscuana chaotsinyánýná corente yoboše chca jtsamama, Bëngbe Bëtsábeñe chca jtsošbuáchiyëse, chábeñe sempre chašmotsobátmanama, tšëngaftangbe tšabiamá cha chaomama. <sup>12</sup> Ndoñe queftsátsošoše tšëngaftanga oyënjayënga chašmotsobiamá chë Bëngbe Bëtsá tcmojabanýé trabajo jtsamama, ndayá Jesucristbeñe ošbuáchiyana bomnëngcá y padecena soyënguiñe uantado mënëngcá šmochtsama. Chca, chënga mochanjýyëngacñe ndayá Bëngbe Bëtsá jatsatayama tojašebuachenacá, chabe entšanga bëtsemnama.

<sup>13</sup> Bëngbe Bëtsá Abrahámbioye tbojanšbuachená ora, chca tbojaníyana cachabe uabaina jayanëse, er inýa chabiamá más uamaná ndoñe yontsemna ndabiamá jajúrama, ntšamo tbojanšbuachenacá ndegombre chaotsemnama; <sup>14</sup> cha mëntšá tbojanšbuachená: “Aíñe, atše chanjama aca bëtscá tšabe bendicionënga chacotsebomnama, y chanjama acbentša pamillentsana mallajta entšanga chamotsemnama ca.” <sup>15</sup> Y chca, Abraham Bëngbe Bëtsábeñe jtsošbuáchiyëse, puerte uantadiñe yojanobátmana ntšamo tbojanšbuachenacá Bëngbe Bëtsá yochjanmama, y pronto chca tojanóyëngacñe.

<sup>16</sup> Entšanga tmojajurá ora, chca jamana chëngbiama canýe puerte más uamanabe uabaina jayanëse, y chca chëngbiama más uamanabiama tmojajurá ora, jt-sayanana ntšamo tmojašbuachenacá pronto mochjamama, y chcasna, chama ya ndoñe más ntjatenátsët-snayana. <sup>17</sup> Y chca, Bëngbe Bëtsá tojánbošena botamana jinýanýiyana, ntšamo cha tojanašebuachenacá mochjanoyëngacñëngbioye, ntšamo tojanašebuachenacá cha ndegombre yochjanmama, y ndocna te chë ntšamo jamama yojanjuabnacá yochjantrócamá. Chíyeca, botamana tojaninýanýé cha chca yochjanmana, cachabiamá jajúrase, chë ntšamo tojanašebuachenacá yochjanmama ndegombre bëtsemnama. <sup>18</sup> Bëngbe Bëtsábeñe šbuachenana soye y chama jinýanýiyama ntšamo tojanayancá, ntšamo tojanašebuachenacá ndegombre yochjamnama, chë uta soye ndocná ntsobenaná jatrócamá; y chca tojayana ora, ndoñe ntsopodénana Bëngbe Bëtsá chaobená jobostérama. Y chca, chë uta soyama, bënga bëtscá añemo ainaniñe jýyëngacñana, bënga chë Bëngbe Bët-

sábioye tmojobéconanga, cha chásuatsebacama y chašotsanýenama, mo canýe bëts resjuentšana tmojtsachetëngcá, ntšamo chentšana atsebácanënga jtsemnama cuaftsenguacá. Bëngbe Bëtsá šojáuyana bënga imojtsobena chábeñe jtsobátmanama ca, y bëts añémoca chábeñe jtsošbuáchiyëse, cha yejuana šocht-sanýenama mondobátmana. <sup>19</sup> Mo ntšamo chë bëjaye asentoca cuedádoca tcojajajo anclama, chë barcuíñe enjaquenënga tšabá jtsetatšëmbuana chë barco ndoñe yochántssashatiyynama, cachcá bëngnaca, Bëngbe Bëtsábeñe imobátmanama, montsobena ainanoca jtsetatšëmbuana lempe tšabá yotsomñama. Bënga Jesucristbeñe mondobátmana, y Bëngbe Bëtsá yojtsemnoye celoca cha tojámashëngo y chabe delante entsemna mo chë bachnangbe más uámana amëndayacá. Chana jamashënguana chë Bëngbe Bëtsábeñe bëts yebnoca, “chë más uámana ca” uabaina luaroye, entšëjua ujonýana stëtšoica, Bëngbe Bëtsábeñe delante jtsemnama, <sup>20</sup> ndayentšë Jesús celoca, Bëngbe Bëtsábeñe delante tojámashëngo bëngbe tšabiamá soyënga jamama, bëngnaca chamobenama chabe delante jamashënguama; chca, Jesús tojanóbema chë bachnangbe más uámana amëndayá nyetsca tesca-ma, canýe bëts bachna ntšamo Melquisedec yojamncá.

### Jesús, canýe bëts bachna ntšamo Melquisedec yojamncá

**7** Quem Melquisedec yojamna Salem puebloca rey y bachna chë celoca Bëngbe Bëtsabiamá; Bëngbe Bëtsá, chë nyetscangbiama más uamaná. Abraham chë reyënga y chëngbe soldadëngaftaca imojentsjaná y tojanayëñjaná chentšana yojtsatabó ora, Melquisedec tojánbocna cha jajébenguama, y chora Bëngbe Bëtsábioye tbojanimpadá, Abraham bëtscá tšabe bendicionënga chaotsebomnama chaomama. <sup>2</sup> Chora Abraham chábioye tbojanatšetá, chë reyëngaftaca imojentsjaná ora, lempe tojanosháchiñentšana, bnétsanentšana canýe soye. Chë palabra Melquisedec endayana “nyetsca soyënguiñe tšabá ama rey ca”; y chánaca yojamna Salem puebloca rey, y chca endayana “nyetscanga natjëmbana chamotsiyenama ama rey ca”. <sup>3</sup> Chabe pamillangbiama tondaye quenatótatšëmbo; chca cha endmëna mo ni taitá ni mamá ndoñe endbomnacá, ni bëts taitanga. Tondaye quenatótatšëmbo ntseco tojanonýnama, ni ntseco tojanóbanama; chca, inýe soyënguiñe cha yojamna mo Bëngbe Bëtsábeñe Uaquiñacá, y endmëna mo nyetsca tesca-ma bachna cuaftsemncá.

<sup>4</sup> Y mora, šmochjábuaboye tša uamaná Melquisedec inamnama, er bëngbe tempsca uámana bëts taitá Abraham chábioye tbojanatšetá, chë reyëngaftaca imojentsjaná ora lempe tojanosháchiñentšana bnétsanentšana canýe soye. <sup>5</sup> Ntšamo Moisesbe leyíñe endëmandacá, chë bachnangbe más uámana amëndayá Leví, Aarónëñaca ca uabainabe pamillentsana tmomna bachnanga, jtsamnana chë Israeloca entšángbioye nyetsca chë tmobomna soyënguentsana bnétsa-

nantšana canye soye jtsayengacayana; y chca jtsam-nana masque chë entsanga cachëngbe pamillentsënga tmomna y Abrahambentsana pamillentsëgnaca. <sup>6</sup> Pero Melquisedec, masque Aaronbe pamillentsá ndoñe yonjamna, Abraham, chë ntšamo Bëngbe Bëtsá tbojanšbuachenacá tojanóyengacñabentsana, cha tojanóyengacñe nyetsca soyënguentšana bnëtsanentsana canye soye, y Bëngbe Bëtsábioye tbojanimpadá, Abraham bëtsá tšabe bendicionënga chaotsebomnama chaomama. <sup>7</sup> Y ndocná quenátobena jayanama ndoñe ndegombre yondmëna ca, chë Bëngbe Bëtsábioye impadaná ínÿabiamna tšabe soyënga chaomama, más uamaná inëtsemna chë chca tojóyengacñabiamna, inÿa chabiamna Bëngbe Bëtsábioye tbojaimpadá ora. <sup>8</sup> Quem tempo, bachnanga mochjóbánënga, entsángbioye jtsayengacayana nyetsca chë tmobomna soyënguentšana bnëtsanentsana canye soye, pero chë Bëngbe Bëtsabe uabemana palabra, Melquisedecbiamna endoyebuambná cha mo canya cabá ainá totsomñcá. <sup>9</sup> Y bënga montsobena jayanama, Abraham Melquisedécbioye chë nyetsca soyënguentšana bnëtsanentsana canye soye tbojanoyé ora, yojamna mo Leví, chë nyetscángbioye nyetsca soyënguentšana bnëtsanentsana canye soye ayëngacayá, Melquisedécbioye chca cuaftopagacá; <sup>10</sup> er cha Abrahambe pamillentsá inamna. Melquisedec yojtsabó ora y chábioye chë lempe tojanosháchiñentsana bnëtsanentsana canye soye Abraham tbojanatšetá ora, yojamna mo nyetscanga, chë Abrahambentsana entsanga más chcoye mocht-saniyenënga, chëngnaca chë bnëtsanentsana canye soye cuafjajajocá, masque Abraham chca tojanma ora, Leví y chë Abrahambentsana inÿe entsanga cabá ndoñe tmonjanonÿná.

<sup>11</sup> Israeloca entsanga Moisesbe ley tmojanáyëngaca, chë bëts taitá Levibe pamillentsënga bachnanga imojamnénga Bëngbe Bëtsá imojtseservena ora, y chënga monjamna Aarónbentsana entsanga. Ntšamo chë ley-iñe yomandancá imojánamënga perdonánënga jtsemnama y Bëngbe Bëtsabe bominiñiñe tšábënga jtsemnama quem bachnanga jamama matmëñjanobenase, ndoñe manjanëyta Bëngbe Bëtsá inÿe bachna chabuatschembuama, nda ndoñe yonjamna mo chë bëts bachna Aaroncá, ndayá ntšamo chë bëts bachna Melquisedec yojamncá. <sup>12</sup> Er, canye bachnanga Bëngbe Bëtsábioye jtseservënama tmojajbaná y inÿe bachnanga chábioye jaserviama tmojatontsé ora, jtseytana chë natsana bachnanga imojanoservena ora mándaye leyëngnaca jtsetrócama. <sup>13</sup> Bëngbe Utabná, ndabiamna quem soyënga jtsóyebuambnayana, ndoñe Aaronbe pamillentsá quenjatsmëna, ndayá inÿe pamillentsá, y quem pamillentsá entsanga ndocna te bachnangcá Bëngbe Bëtsá tmonjanservé, chë altar ndirichiñe Bëngbe Bëtsabe bëts yebnoca. <sup>14</sup> Er nyetscanga mondétatsëmbo Bëngbe Utabná Judabe pamillentsana bëtsemnama, y chë pamíllama Moisés ndocá tonjánayana, Bëngbe Bëtsá mo bachnangcá chënga jtseservënama.

<sup>15</sup> Y ntšamo tmojayancá montsobena más tšabá josértana, er chë tsëm bachna Cristo yojamna canya mo Melquisedec yojamncá. <sup>16</sup> Cha bachna yojamna, ndoñe chë bachnanga chabe pamillentsana jabocanama yojánamnama canye ley tojánayanayeca, ndayá nyetsca tescama jëftsiyenama cha inobénayeca. <sup>17</sup> Er mëntšá endmëna, ndayá Bëngbe Bëtsá chabiamna tojánayana:

Aca bachna nyetsca tescama condmëna, canye bëts bachna ntšamo Melquisedec yojamncá ca. <sup>18</sup> Cha tojánabo ora, Bëngbe Bëtsá tojanma chë nda bachna jtsemnama y ntšamo joserviama mandënga chaotso pochocama, er chë mandënga ndoñe ntjobenayana entsanga jujabuáchama atsebácanënga jtsemnama, y chca, chëngbiamna ndoñe bëtscá yonjanoservena. <sup>19</sup> Er Moisesbe léyeca, entsanga ndoñe tmonjanobená Bëngbe Bëtsabe bominiñiñe tšábënga jtsemnama, pero mora chama canye corente más uamana soye montsebomna: Jesucrístbeñe jtsošbuáchiyëse, chábeñe montsobátmana Bëngbe Bëtsáftaca tšábënga chášubiamama, y chca, Bëngbe Bëtsábioye bënga jtobëconama.

<sup>20</sup> Y Bëngbe Bëtsá lempe chca tojanma, cachabiamna jajúrase, lempe ntšamo cha tojanayancá ndegombre chaotsemnama. Chë inÿe bachnanga, chë Aaronbe pamillentsëngbioye tmojanëbuáyana ora, Bëngbe Bëtsá ndoñe chca tonjánayana, <sup>21</sup> pero mo bachnëcá chaoservema Bëngbe Utabnábioye tbojanábuayana ora aíñe; cach Bëngbe Bëtsabiamna jajúrase, Bëngbe Utabná canye bachna yochtsemna ca tojánayana. Ntšamo Bëngbe Bëtsabe uabemana palabrënguiñe endayancá:

Bëngbe Utabná Bëngbe Bëtsá, Jesucrístbioye tbojanianayana, cachabiamna jajúrase, ntšamo tojanayancá ndegombre chaotsemnama, y juabna ndoñe ntjatrócama:

“Aca bachna nyetsca tescama condmëna ca.”

<sup>22</sup> Bëngbe Bëtsá chca tojánayanama, Jesúsbeyeca bënga corente mondétatsëmbo, ndayá Bëngbe Bëtsá bëngbiamna jamama tojanašebuachenacá, chë Jesúsbioye bëngbe bachna chaotsemnama juabuáyanana, más tšabá yojtsemna chë ndayá tempo cha chabe entsangbiamna tojanašebuachená soyama. <sup>23</sup> Chë inÿe bachnanga banga imojamna, er ndocná yonjanobena Bëngbe Bëtsábioye nyetsca tescama chca jtseservënama; cada ona básipta uatëngama tojëftsanoservé, tojanóbana y ínÿabioye chë trabajo jatontšabuáchana.

<sup>24</sup> Pero Jesús ndocna te ntjobanámayecna, cha mo bachnëcá Bëngbe Bëtsábioye nyetsca tescama bochjëftseservena, y ndocna te chabe trabajo ínÿabioye bochanjëftsinÿinÿiye, chë inÿa cachcá jtsamama chauatontšema. <sup>25</sup> Chíyeca, cha yobena nyetsca tescama játsebacana ndëmuanÿënga chábeyeca Bëngbe Bëtsábioye tmojobeconá, er nyetsca tescama cha echanjëftsiyena Bëngbe Bëtsábioye chëngbiamna jtseimpadánama.

<sup>26</sup> Chcasna, Jesús ndegombre endmëna lempe ntšamo bënga imuajabotcá nda Bëngbe Bëtsábioye



bëngbiamu chabotseimpadánama, mo chë bëngbe bachnangbe más uámana amëndayacá. Cha sempre uamaná endmëna, ndocna te ni mo canÿe juabna ínÿabe contra yonjábomna, ainaniñe ndocna bacna juabna yonjábomna, chë bacna soyënga amënguentshana luaroca mëná, y Bëngbe Bëtsá tojanma celoca más bëtsá y obená nÿetscangbiamu cha chaotsemnama. <sup>27</sup> Cha ndoñe bonjanájaboto canÿe te y inÿe te bayënga jtsebánayana, Bëngbe Bëtsá chabe bacna soyëngama chaboperdonama y chë bacna soyënga entsanga tmojanmámnaca, mo chë inÿe bachnangbe más uámana amëndayënga mondbetsamcá, cachëngbiamu y chë judiëngbiámnaca. Cha tojanma lempe ntšamo yojaniytcá canÿe soye y nÿetsca tescama, entsanga bacna soyënga tmojanmama perdonánënga chamotsemnama. Cha chca tojanma, chabe derecho vida jtsobomñama cachcá tojanonÿná ora; y tojanóbana entsanga chamotsobenama perdonánënga jtsemnama. <sup>28</sup> Ntšamo Moisesbe leyíñe yojanmandacá, chëngbiamu mo chë bachnangbe más uámana amëndayëngcá tmojanëbuáyana entsanga inÿe ora bacna soye amënga; pero Bëngbe Bëtsá cabá chë ley entsangbe cucuatšíñe tojanáboshjonentshana baytese, cha chabe Uaquiñábioye chë bachnangbe más uámana amëndayacá tbojanábuayana, cachabiamu jajúrase, ntšamo tojanayancá ndegombre chaotsemnama. Bëngbe Bëtsá tojanma chë Uaquiñá chaotsemnama lempe ntšamo entsanga tmojtsajabotcá, nda cháuatsebacama, ndocna te bacna soye ndamá, ni ainaniñe bacna juabnënga ndbomná.

#### Cristo, nda jóbanëse tojanma entsanga Bëngbe Bëtsáftaca mo canÿacá chamotsemnama

**8** Chë más uámana soye ndayama bënga montsichamo, chë Cristo mo bachnëcá yomnama montsoyebuambná ora, entsemna: Bënga chábeñe imojtsebomna canÿa nÿetsca tescama Bëngbe Bëtsabe delante bëngbiamu impadaná, mo chë bëngbe bachnangbe más uámana amëndayacá, Bëngbe Bëtsabe catšbioica yojtsetbemana jtsemándayama, y Bëngbe Bëtsá chë más uámana tbemanentšë. <sup>2</sup> Chë inÿe bachnanga Bëngbe Bëtsabe bëts yebnentšë tmojánamashjna chë “más uámana ca” uabaina luaroye, Bëngbe Bëtsabe delante jtsemnama; pero chë luare celoca ndayentšë nÿets tempo Cristo mo chë bachnangbe más uámana amëndayacá yoservena, entsanga ndoñe chca tmonjanpormá, ndayá Bëngbe Bëtsá.

<sup>3</sup> Nÿetscanga chë bachnangbe más uámana amëndayënga tmojanëbuáyana, entsangbiamu soyënga y tmojóba bayënga Bëngbe Bëtsábioye juatšëmbonama, chëngbe bacna soyëngama perdonánënga chamotsemnama; chíyeca, jtseytana Jesucristo ndayánaca chaotsebomnama, Bëngbe Bëtsábioye juatšëmbonama. <sup>4</sup> Cha quem luarentšë tojtsetrabájase, cha ni mo bachna ndoñe nántsemna, er muentšë ba bachnanga mondmëna, y chënga ba soyënga jamana Bëngbe Bëtsábioye jëtschuayama, ntšamo jamama

Moisesbe leyíñe yomandancá. Y chca, ndoñe nantseyta cha chca chauatoservénama. <sup>5</sup> Chë inÿe bachnanga imobomna luarënga Bëngbe Bëtsá jadórama, y ndaye soyëngaca chënga Bëngbe Bëtsá imoservena, ndoñe cachcá yontsemna chë ndayentšë Jesucristo celoca yoservena luarcá, ni ntšamo cha yoservencá; nÿe batšatema bëngbioye šuinÿanÿná ntšamo chë celoca luare yomnama, ndayentšë Cristo mo bachnëcá yoservena. Y bënga mondetatšëmbo quem luarentšë chë soyënga chca yomnama, er chë Bëngbe Bëtsábioye jadórama yebna, chë jatsjacama opodena yebna Moisés japórmama ora, Bëngbe Bëtsá mëntšá tbojanianyana: “Cuedado cochtsebomna chë atšbiamu yebniñe nÿetsca soyënga jamama, ntšamo tbonjaninÿinÿecá chacomama, chë tjoca bonjamna ora ca.” <sup>6</sup> Pero bëngbe bachnangbe más uámana amëndayá Cristo, tojashjache canÿe más bëts trabajo jtsebomnama, ntšamo chë inÿe bachnanga imobomna trabajuama; cachcá, ndayá Bëngbe Bëtsá tojayancá Crístoftaca bëngbiamu jamama, bënga tempcá tšabá Bëngbe Bëtsáftaca jtsemnama jtsamëse, puerte más tšabá endmëna, chë ndayá tempo chabe entsangbiamu jamama tojanašebuachená soyama. Ntšamo mora cha tojayancá puerte más tšabá entsemna, er tojašebuachená más tšabe soyënga bëngbiamu jamama.

<sup>7</sup> Chë Bëngbe Bëtsá natsana tojanašebuachená soyëngaca matënjnopodé entsanga chamotsamama ntšamo yojanamncá, ntšamo tojanašebuachenacá jóyëngacñama, as ndoñe manjanëyta Bëngbe Bëtsá cachiñe canÿe trato chauátšbemama entsangbiamu.

<sup>8</sup> Pero Bëngbe Bëtsá tojáninÿe ntšamo yojanamncá entsanga ndoñe tmonjanmama, ntšamo cha tojanašebuachenacá jóyëngacñama, y Bëngbe Utabná Bëngbe Bëtsá chëngbiamu mëntšá tojánayana:

Canÿe tempo echanjóshjango, y chora Israel y Judabe pamillentša entsangbiamu básefta soyënga jamama chanjašebuachená,  
chënga átšeftaca tempcá tšabá jtsemnama chamotsobenama.

<sup>9</sup> Chë chanjašebuachená soye ndoñe queochásmëna cachcá ntšamo chë chëngbe bëts taitanga sënjanašebuachená soye enjamncá,  
atšë chënga sënjanënatse ora, Egipto luarocana sënjesanëbuacna ora;

pero chëngna, ntšamo jamama enjanamncá, chë sënjanašebuachená soye jóyëngacñama ndoñe chemátanma causa,  
atšë cachcá chënga sënjesanënyaye ca, Bëngbe Utabná tojánayana.

<sup>10</sup> Chë Israeloca entsangbiamu ndayá jamama canÿe tempo chentšana chanjašebuachená soye, mëntšá entsemna ca, Bëngbe Utabná tojánayana:  
Atšë chanjama chë chëngbe juabniñe chaitsemánda soyama chënga chamotsejuabnama,  
y chamotseboše jtsamana ndayá chëngbe ainaniñe chaitsemánda soye.

Atšë chëngbe Bëtsá chántsemna, y chënga atšbe entsanga.

<sup>11</sup> Chë tempo ndoñe queochátsiyta cánýenga ínýenga chamotsabuátambama,

cachabe luariñe oyenábioye o cachabe pamillentša entšábioye, atše chë chëngbe Utabná chašmotsábuatmama.

Ndoñe queochátséyta, er nyetscanga uámanënga y nduámanënga,

corente tšabá atšbe šmochantsábuatma.

<sup>12</sup> Chënga chanjálástemaye y chëngbe bacna soyëngama chanjáperdonaye,

y ndocna te más chë bacna soyënga chënga tmojamama quichátsjuabnaye ca —cha tojánayana.

<sup>13</sup> Bëngbe Bëtsá, chë entšangbiama mora jamama tojáše buachenama tojtsichamo ora, chca jtsemnana, er cha tojama chë tempo entšangbiama jamama tojanaše buachená soye, mora ya ndoñe chaondët-soservénama; ndayá mo tanguá soycá tojtsemna y ya ndoñe tontsoservena, chë soyna nýe batšatema más y ya jtsopochócana.

### Bëngbe Bëtsá jadórama muentša luare y chë celoca luare

<sup>9</sup> Y morna, ndayá Bëngbe Bëtsá tojanaše buachenama y tojanmandá soyama, mandënga yojamna ntšamo cha jtsadoránama, y nýa chabiama pormana yebnentše quem luarentše. <sup>2</sup> Chíyeca, Bëngbe Bëtsá tojanmandá chaotsemna canýe jatsjaca ma opodena yebna chábioye jadórama, mëntša: Chë natsana tsañe quem Bëngbe Bëtsabiama yebnentše inauabaina “chë uámana luare ca”; chentše inamna chë canýsëfta quinýenëfjuangá castellano candel-erëšiñe, y canýe mesésha ndayiñe yojacjana chë luarentše Bëngbe Bëtsá bétsemnana inýinýnaye tandëšënga.

<sup>3</sup> Inýe ujonýana entšéjua chentšana, inýe luare inamna; inauabaina “chë más uámana luare ca”. <sup>4</sup> Chentše inamna chë castellano altar, inciense jajuinýiyama, y chë cajontema nyetsiñe castellanoca pormánëtema. Quem cajontema yojaninýanýná ntšamo Bëngbe Bëtsá tojanaše buachenacá, chë Israeloca entšanga chabe uámana entšanga yochjánabiamama, y inauabaina “Bëngbe Bëtsabe šbuachenana soye inýinýnaye cajontema ca”; y chë tsoye quem soyënga inabomna: canýe castellano jarrëtema, maná ca uabaina tandëšëca, chë Bëngbe Bëtsá tojanma celocana chabe entšangbiama chaótsatšama saná; Aaronbe varëfja, chë tojanantšëfjonëfja; y chë ndëtšbé tablëbenga ndayiñe Bëngbe Bëtsá tojanábema chë bnëtsana uámana mandënga. <sup>5</sup> Chë cajontema juatsboca imnamna chë juatëngmiáša uabomnënga, mo angelëngcá, “querubinënga ca” uabáinënga, y chënga imojaninýanýná chë Bëngbe Bëtsabe buashinýinýanana chéntšnaca bétsemnana. Chënga, chë juatëngmiášhangaca chë cajontémentša nyets ústonëtema imojanëtsbotsana; chë ústonëtema inauabaina “entšanga bacna soyënga tmojamama Bëngbe Bëtsá perdonaye luare ca”, er chentše, chë cajontema juatsboca chë bachnangbe más uámana amëndayá jtsamanana buiñe jabuësc-

jana, chë Bëngbe Bëtsábioye cha ibnaimpadana te, entšanga cháuperdonama. Pero mora ndoñe quenát-siyta chë soyëngama lempe jatóyebuambnayama.

<sup>6</sup> Lempe chca tmojanprontantšana, chë bachnanga sempre chë natsana luaroye imojánamashjuana, jama ma ntšamo Bëngbe Bëtsá tojanamëndacá, chábioye jadórama. <sup>7</sup> Pero nýe chë bachnangbe más uámana amëndayá yojobena chë inýe luaroye jamashënguana, y nýe canýe cada uata. Choye jamashënguama orna, cha ibojamna bayëngbe buiñe juabuyambana, Bëngbe Bëtsábioye juatšëmbonama, chca, chë bachnangbe más uámana amëndayá tojanma bacna soyënga Bëngbe Bëtsá chaboperdonama, y chë ntsetatšëmbcá entšanga tmojanma bacna soyëngnaca. <sup>8</sup> Chca, chë Uámana Espiritu jamana bënga chašósertama, chë natsana luare cabá tojtsemnëntscuana y chë bachnanga cabá chë soyënga chentše tmojtsamëntscuana, nyetscanga cabá ndoñe tmonjanobená chë inýe luaroye jamashjnama, chë “más uámana luaroye”. <sup>9</sup> Chë soyëngaca jtsopodénana bëngbioye jinýanýiyana, chë tempo, chë Bëngbe Bëtsábioye jadórama yebnentše entšanga uta luare imojábomna ora, ndoñe yonjopodena Bëngbe Bëtsabe delante nyetscanga jatsmë-nana, mo chë bachnangbe más uámana amëndayacá. Y chë soyëngnaca jtsayanana, chë Bëngbe Bëtsabiama uátšëmbona soyëngaca y bachnanga tmojanóba bayëngaca, ndoñe tonjanopodé jamana canýa Bëngbe Bëtsábioye adorayá, Bëngbe Bëtsáftaca tempcá tšabá chaotsatsmënama y Bëngbe Bëtsá chabe bacna soyëngama tbojaperdonama ainaniñe corente chaot-setatšëmbuama. <sup>10</sup> Chënga, chë uátšëmbona soyëngaca y tmojanóba bayëngaca tmojanma nýe ntšamo Moisesbe leyíñe yojanayancá, ndayá chíñe yojanlesenciancá, ndayá jasama o jofšiyama, y chë cuerpo jabebiana mo tšabe entšangcá Bëngbe Bëtsabe delante jtsatsmënama; nyetsca mandënga nýe cuerpa-ma, pero ainanama tondaye ntjamana. Pero chë entšanga chca yojánamna jtsamana, nýe Bëngbe Bëtsá inýe soyënga, más tšabe soyënga jamama tojaman-dantscuana, chë tsëm trato tojábema ora.

<sup>11</sup> Pero Cristo ya tojánabo, y cha yomna chë Bëngbe Bëtsabe delante bëngbiama impadaná mo chë bëngbe bachnangbe más uámana amëndayacá, chca, bëngbiama chaotsemnana chë tšabe soyënga ntšamo mochjoyëngacñëcá. Chë luare celoca ndayentše cha Bëngbe Bëtsabe delante mo bachnëcá yotrabája, puerte tšabe luare yomna, y chentše cha, ndoñe chë quem luarentše bachnanga imomnëngcá, cha yobena jamana lempe ntšamo Bëngbe Bëtsá entšangbiama jamama inajuabnycá. Chë luare ndoñe entšangbe cucuátšëca yondëpormana, y chca jtsayanana, quem luarentša soye ndoñe yondmëna ca. <sup>12</sup> Cha, canýe y nyetsca tescama chë luaroye Bëngbe Bëtsabe delante tojánamashëngo ora, cha ndoñe chivo o ternerbe buiñe tonjanabuyamba, ntšamo chë inýe bachnanga imojuamancá; ndayá jóbaniñe, chabe buiñe juabuáshanëse, cha tojanma entšanga atsebácanënga jtsemnana chamotsobenama; y chca tojanmëse, cha

tojanobená chë luaroye Bëngbe Bëtsabe delante jamashënguama. Y Cristo chca choye tojanamashënguëse, tojanma bënga chë nyetsca tescama yomna tšabe vida jtsebomnama chamotsobenama.

<sup>13</sup> Ndëmuanyënga ndayámna chë leyama tmojanuquedá mo chë Bëngbe Bëtsabe delante ndoñe tšabengcá, chë bachnanga imojuamana chëngbiyoye toronga y chivëngbe buiñe jabuéscacjana, y chë al-taroca tcojajuinyë ternerabe jatinýá chëngbiyoye jatbótotana, chca, chënga jábiamama Bëngbe Bëtsabe delante mo tšabengcá. Chca tmojamentšana, chë bachnanga tmojánayana chënga imojtsobena chë ínëngaftaca jabama, Bëngbe Bëtsá jadórama, y cachiñe mo tšabengcá Bëngbe Bëtsabe delante imojtsatsmëna ca.

<sup>14</sup> Ndayá bachnanga tmojanmcá yojanámana entšanga cachiñe mo tšabengcá Bëngbe Bëtsabe delante imojtsatsmëna ca jayanama; y chca, chë ínëngaftaca Bëngbe Bëtsábioye jadórama tmojanobenase, jntsa-chetšá más yojtsámana Cristbe buiñe, ndëmuanyeyey tojanábuashana bëngbiama cha tojanóbana ora! Chë nyets tempo vida bomná Espíritbe obenánaca, Cristo, chabe derecho vida jtsobomñama cachcá tojanonýá y bëngbiama tojanóbana. Cha, chë ndocna bacna soye ndbomná, tojanóbana ora yojamna mo canýe bayá tondaye ndbemaná chë bachnanga cuafjobacá juatšëmbonama, entšangbe bacna soyëngama; cachcá Cristo, chë ndocna bacna soye ndbomná, bëngbe bacna soyëngama jáperdonama tojanóbana. Bëngbiama tojanóbanayeca, Cristo yobena jamama bënga ainaniñe corente tšabá chamotsetátšëmbo, bacna soyënga bënga tmojamama, chë ndoñe vida jtsebomnama bënga junatsana soyënga, chama bënga perdonánënga imojtsemnama, y chca, bënga montsobena jtsiyenana, Bëngbe Bëtsá, chë ndegombre ainá yomná, jtseservënëse.

<sup>15</sup> Chiyeca, Cristo jóbanëse tojama entšanga Bëngbe Bëtsáftaca cánýiñe mo canýacá chamotsemnama, ntšamo Bëngbe Bëtsabe tsëm trato yomncá; y chca cha tojama, Bëngbe Bëtsá chabe entšanga chamotsemnama tojáchembënga perdonánënga chamotsemnama, chë Bëngbe Bëtsabe tempsca tratentša ley jtsocumplínama inamna ora imojoyenëntscuana bacna soyënga tmojanmama; y chëngnaca chamotsobenama chë nyetsca tescama mochtsebomna soyënga jóyëngacñama, ntšamo Bëngbe Bëtsá chabe entšanga tojanašebuachenacá.

<sup>16</sup> Ntšamo canýe testamentiñe tojtsayanacá chaopasamna, jtseytana chaotsótatšëmbo chë chca jamama tojašbuachená cha tojóbanama. <sup>17</sup> Canýe testamento tondaye ntšamanana, chë chca jamama tojašbuachená cha cabá ainá totsomñëntscuana; nýa cha tojóbanana orna aiñe. <sup>18</sup> Chiyeca chë Bëngbe Bëtsabe natsana trato, entšangbeñe tojanobojetšé, chora tmojanóba bayëngbe buiñe jabuéscjese.

<sup>19</sup> Moisés chë leyentša nyetsca mandënga nyetsca entšanga tojánabuayenantšana, tojanca buángana boboshëshe y hisopo betiyentša buacuafja, chë ternerënga y chivëngbe buiñe býyeshëca enajuabnyëiñe tojan-

fchecuacuá, y chora chë leyënga librëšañe tojanbuëscacja, y nyetsca entšangbeñnaca. <sup>20</sup> Y mëntšá tojánayana: “Quem buiñe entsinýinýná, ntšamo Bëngbe Bëtsá tojamandacá ndegombre yochtsemnama, y tšëngaftangbiama puerte yochtsámanama ca.”

<sup>21</sup> Moisésnaca buiñe tojanbuëscacja chë jatsjacama opodena yebniñe, y lempe chentša soyënguiñe, chë ndaye soyënga Bëngbe Bëtsábioye jadórama yojanoservena. <sup>22</sup> Er ntšamo leyiñe iuayancá, yojtsemnana nýa mo nyetsca soyënguiñe buiñe jabuéscacjana, Bëngbe Bëtsábioye jadórama tšabá chaoservema; y buiñe ndoñe tonjuábuashanësa, ndoñe ntsopodënanana entšanga bacna soyëngama perdonánënga chamotsemnama.

### Cristo jasúfriase y jóbanëse, tojanma entšanga bacna soyëngama perdonánënga chamotsemnama

<sup>23</sup> Chiyeca jtseytana chë Bëngbe Bëtsábioye quem luarentše jadórama soyënga, chë bachnanga chamoma, Bëngbe Bëtsábioye jadórama tšabá chaoservema, chë Bëngbe Bëtsábioye jëtschuayama tmojóba bayëngbe buiñeca. Chë soyënga batšatema jtsinýanýayana ntšamo chë celoca luare yomnana Bëngbe Bëtsabe delante, ndayentše Jesús yoservena. Lempe ntšamo chë Bëngbe Bëtsábioye jadórama luarentše yomncá, chabe delante celoca, Jesucristo tojanma, chábioye jadórama tšabá chaoservema; pero chca tojanma más uámana soyënga jamëse, chë tmojóba bayëngaca bachnanga quem luarentše imnétsama soyëngama.

<sup>24</sup> Er Cristo ndoñe tonjánamashëngo canýe luarentše Bëngbe Bëtsá jadórama nýe entšangbe pormánentše, ndaye luare nýe batšatema jtsinýanýayana ntšamo chë celoca luare Bëngbe Bëtsabe delante chábioye jadórama yomnana; ndayá cach celoye tojánamashëngo, Bëngbe Bëtsabe delante luaroye, bëngbiama jtseimpadánama. <sup>25</sup> Chë bachnangbe más uámana amëndayana chë “más uámana luaroye” jamashënguana canýe cada uata, bayëngbe buiñeca, ndoñe cachabe buiñeca, chca, ndayánaca jamama entšanga bacna soyënga tmojamama perdonánënga chamotsemnama. Pero Cristo chë luaroye celoca ndoñe tonjánamashëngo, chentšana jtësebocnama, y chabe buiñe juabuáshanëse cachiñe jatóbanama, y ba soye cachcá chauëtsemnama. <sup>26</sup> Chca tojtsemnëse, Cristbiama manjanmëna jasúfriana y jóbanana ba soye, chë Bëngbe Bëtsá quem luare tojanma orscana. Pero ntšamo tojopasacá entsemna, mora chë quem luare jopochócama tempo yojtsobeco ora, Cristo canýe y nyetsca tescama tojenonýinýe quem luarentša entšanga bacna soyënga jabuajuánama, chëngbiama jóbanëse, mo entšangbe bacna soyëngama canýe tmojóba bayá, Bëngbe Bëtsábioye uatšëmbonacá.

<sup>27</sup> Cachcá, ntšamo nyetsca entšanga jtsamnana nýe canýe jóbanama, y chentšana Bëngbe Bëtsá chëngbiama jayanana chë imojéftsiyenëntscuana ntšamo tmojanmcá tšabá o ndoñe tšabá bëtsemnama, y chëngaftaca jamana ntšamo chora tojajuabocá, <sup>28</sup> cachcá, Crístnaca, nýe canýe chabe derecho vida jtsobomña-

ma cachcá tojanonýá, chabe buíñe juabuáshanése jóbanama, ba entšanga bacna soyëngama jáperdonama; y chentšana cachiñe yochjésabo, ndoñe bacna soyëngama entšanga jabáperdonama, ndayá chë cha cháuesabama tša tmobátmanënga jabátsebacama.

**10** Chë Moisesbe leyentša mandënga, ntšamo chë bachnanga yojánamnama Bëngbe Bëtsá jadórama tmojóba bayëngaca y inýe soyëngaca, ndoñe ntsinýanýnáyana lempe chë Bëngbe Bëtsá chabe entšanga jatšatayana puerte tšabe soyënga, pero aíñe batšatema jtsinýanýnáyana ntšamo chë soyënga yochtsemnama. Chíyeca chë mandënga, chë uátšëmbona soyëngaca y Bëngbe Bëtsábioye jadórama tmojóba bayëngaca, ndocna te ntjopódiana jamana chë Bëngbe Bëtsábioye jobéconama tmojtsebošënga, chca soyënga tmojtsamama cada uata nyets tempo, chënga ainaniñe corente chamotsetatšëmbuama chëngbe bacna soyëngama nyetsca tescama perdonánënga imojtsemnama. <sup>2</sup> Er ndayá tcojtsamama Bëngbe Bëtsabiama uátšëmbona soyëngaca y chábioye jëtschuayama tmojóba bayëngaca, entšanga Bëngbe Bëtsábioye adórayënga, chabe delante tšábënga jtsemnama matmëñjanobenase, chënga chë bacna soyënga tmojanmama ainaniñe ngmënaca ya ndoñe mamëñjëtsemna, y matmëñsanajbaná soyënga amana chë tmojóba bayëngaca. <sup>3</sup> Pero juatšëmbonama entšanga bayënga tmojóba ora, josérviana entšanga bacna soyënga tmojamama cada uata chamuatenójuaboma; <sup>4</sup> er chë toronga y chivënga tmojóbanëngbe buíñeca ndoñe ntsopodénana entšangbioye bacna soyënga jabuajuánama.

<sup>5</sup> Chíyeca, Cristo quem luaroye tojánabo ora, Bëngbe Bëtsábioye mëntšá tbojanianyana:

Ndoñe tconjábošena entšanga chacmátšëmbona soyënga, ni tmojobaye bayënga, pero aíñe tcojama atše canýe entšacá chaitsemnama.

<sup>6</sup> Ndoñe tšabá quecmátinýana chë tmojóba y tmojuainýé bayënga, entšanga bacna soyëngama chacotsaperdonama.

<sup>7</sup> As atše Bëngbe Bëtsá sënjanianyana: “Bëngbe Bëtsá, muentše séntsemna,

ntšamo aca icobošcá atše chaimama, ntšamo acbe uabemana palabrenguiñe atšbiama endayancá, chë ndayá atše chjanmama ca.” <sup>8</sup> Natsana, Cristo tojánayana, Bëngbe Bëtsá ndoñe tonjánbošena, ni tšabá tbonjanínýnana entšanga chamuátšëmbona soyënga, ni Bëngbe Bëtsábioye jëtschuayama tmojóba bayënga, ni tmojóba ni tmojuainýé bayënga, entšanga bacna soyëngama cha chaotsaperdonama ca, masque chënga chë Bëngbe Bëtsábioye jadórama soyëngaca jamana, ntšamo leyiñe iuayancá ndayá chënga jamama yojtsamna. <sup>9</sup> Y chentšana, Cristo Bëngbe Bëtsábioye tbojátaniyana: “Muentše sënjabo, chë ntšamo aca icobošcá atše chaimama ca.” Chca, Cristo tojinýanýé chë jtsamana soyënga tmojóba bayëngaca, tondaye yonduámana entšanga bacna soyënga jabuajuánama, y entšangbe bacna soyëngama jóbanése tojaninýanýé chë ntšamo Bëngbe Bëtsá

yobošcá jtsamana, más iuámana chë inýe soyënga játamama. <sup>10</sup> Bëngbe Bëtsá tojama, bënga chabe entšanga y chabe delante tšábënga chamotsemnama, ntšamo Bëngbe Bëtsá yobošcá Jesucristo tojánmayeca, chabe derecho vida jtsobomñama cachcá jonýayëse y entšangbe bacna soyëngama jóbanése, canýe y nyetsca tescama.

<sup>11</sup> Judiëngbe nyetsca bachnanga nyets tempo ba soye altarentša natsanoica Bëngbe Bëtsá jtseservénana, y ba soye cachcá jtsamana tmojóba bayëngaca, pero chë soyëngaca ndocna te ntjopódiana entšanga bacna soyënga jabuajuánama. <sup>12</sup> Pero Jesucristo entšangbe bacna soyëngama tojanóbana ora, yojamna mo canýe tmojóba bayacá, Bëngbe Bëtsá entšanga bacna soyëngama cháuperdonama; nýe canýe y nyetsca tescama chca tojanma, y chentšana Bëngbe Bëtsabe catšbioica tojtanoítbema, canýe uámana puenttše, jtsemándayama. <sup>13</sup> Chentše cha yobátmana, Bëngbe Bëtsá chabe obenánaca Cristbe uayayënga chabe cucuatšifne chamoquedama yochjamëntscuana.

<sup>14</sup> Er nýe canýe, entšangbe bacna soyëngama cruzoca jóbanése, Jesucristo lempe tojama, entšanga chë Bëngbe Bëtsábënga jtsemnama chëmbonënga, chabe delante nyetsca tescama tšabëngcá chamotsemnama. <sup>15</sup> Y Uámana Espíritnaca, Bëngbe Bëtsabe uabenana palabrenguiñe šontsinýanýná chca ndegombre bëtsemnama, mëntšá tojánayana ora:

<sup>16</sup> Ndayá entšangbiama chjama, canýe tempo chentšana chanjašebuachená soye mëntšá entsemna ca, Bëngbe Utabná tojánayana:

Atše chanjama chënga chamotseboše jtsamana ndayá chëngbe ainaniñe chaitsemánda soye, y chamotsejuabnama chë chëngbe juabniñe chaitsemánda soyama ca. <sup>17</sup> Y chentšana mëntšá tojánayana:

Ndocna te más quichátsjuabnaye chënga bacna soyënga tmojamama, y ntšamo atše stsebošcá contra soyënga chënga tmojamama ca. <sup>18</sup> Chcasna, Bëngbe Bëtsá nyetsca tescama entšanga bacna soyëngama tojaperdoná ora, ya ndoñe ntjátsiytana inýe soyënga más játamama, mo bayënga cuafjobaycá, entšanga bacna soyëngama perdonánënga chamotsemnama.

### Šontsamna Bëngbe Bëtsábioye jtobéconana

<sup>19</sup> Y chca, Jesucristbeyeca catsátanga, Jesusbe buíñe tojanábuashanama y bëngbiama tojanóbana, chábeñe jtsošbuáchiyëse, bënga montsobena, tondayama ntjatauatjca Bëngbe Bëtsabe delante jamashënguama. <sup>20</sup> Bënga montsobena jamashënguama chë tsëm benachëjana, Cristo bëngbiama tojamëjana; cha nda inétsama chë nyetsca tescama yomna tšabe vida chamotsebonnama. Mo chë quem luarentše chë bachnangbe más uámana amëndayacá, chë ujonýana entšëjuajana jamashënguana chë “más uámana ca” uabaina luaroye, Bëngbe Bëtsabe delante jtsemnama, cachcá, Cristo bëngbe bacna soyëngama mo entšacá tojanóbanyeca, bëngnaca montsobena

Bëngbe Bëtsabe delante luaroye jamashënguama.

<sup>21</sup> Bënga mondbomna canÿe bëts bachnangbe más uámana amëndayá, Bëngbe Bëtsabe entšángbeñe jtsemándayama, y cha endmëna Jesús. <sup>22</sup> Chíyeca, Bëngbe Bëtsá jasérvia ndegombre ainaniñe corente jtsebošëse, y chábeñe puerte jtsošbuáchiyëse, šontsamna Bëngbe Bëtsábioye jobéconana. Ntšamo chë bachnángbioye buíñeca tmojanabuešcá, Bëngbe Bëtsabe delante tšabengcá chamotsemnama cha jasérvia, cachcá, Cristbe buíñe juabuáshanëse y bëngbiana jóbanëse, bënga ainaniñe corente montsetátšëmbo Bëngbe Bëtsá nyetsca tescama bëngbe bacna soyëngama šojtsaperdonama. Y bënga bëjeyeca uabainëngnaca mondmëna; chíyeca bënga jtsoyobena Bëngbe Bëtsábioye chca jobéconana.

<sup>23</sup> Bënga šontsamna nyets tempo Bëngbe Bëtsábeñe puerte jtsošbuáchiyana, y ndocna te nye ndayámna jítajbanana entšángbeñe ichámuana, chë Bëngbe Bëtsábeñe jtsošbuáchiyëse bënga imobatmana soyënga cha yochjamama, er chë soyënga šojašebuachená cha, sempre jamana ntšamo tojancá. <sup>24</sup> Bënga šontsamna janguanguana ntšamo muatjobenaye añemo jenatšetayana, nyetscanga jtsenbobonshánana, y ntšamo tšabá yomncá jtsamana; <sup>25</sup> pero ndoñe quešnátna jítajbanana, Bëngbe Bëtsábioye jadórama enefjuanana mo Cristbeñe ošbuáchiyënga quetsomñecá, ntšamo báseftanga imojtsamcá. Chamna, nyetscanga añemo mochtsenatšetnaye Cristo nyets tempo jtsešervénama, y más mora, chë ndayá imojtsonyama, Bëngbe Utabná yochjésabama ya yojtsobecuama montsetátšëmbo ora.

<sup>26</sup> Er chë ndegombre soyëngama tšabá tmojátatšëmbontšana y chë soyënga tmojoyeuná chentšana, bacna soyënga jtsamëse tmojtsiyena, nye chca jama tmojtseboše causa, muattsaboté ndayá Cristo bëngbiana tojanmcá, bëngbe bacna soyëngama cha tojanóbana ora, y ya tondaye nántsemna ntšamo Bëngbe Bëtsá bënga jtsaperdonama. <sup>27</sup> Y chca, ndayá bënga muattsobena jobátmana soye nántsemna nye chë Bëngbe Bëtsábocana castigo, chë ndayama šojtsamna uatjana jtsebomnana; y nye jobátmana chë tempo, ndaye ora Bëngbe Bëtsá puerte etonaná chabe uayayënga bëtscá íñesheca yochtsapochócaye.

<sup>28</sup> Ndánaca chë Moisesbe leyama tojayana tondaye yondoalena ca, y útata o únganga chca tmojouena y aíñe cha chca tojayana ca chënga tmojanenëse, jtsemnana chë entšábioye jtsóbana, tondaye ntjalastemacá.

<sup>29</sup> Canÿa, nyets ainánaca Bëngbe Bëtsabe Uaquiñábioye tbojtsaboté; y tojayana Cristbe buíñe, chë ndémuanÿeye tojanábuashana bëngbiana tojanóbana ora, tondaye yonduámana ca, ndayá nye ndaye entšabe buíñcá ca, chë buíñe chë ndémuanÿeye šojtsinÿanÿná ndayá Bëngbe Bëtsá tbojašebuachenacá bëngbiana jamama, y ndáyeca Bëngbe Bëtsá chabe entšanga šojábiana, cha jasérvia; chë entšá Uámana Espíritbioye tbojóyenguango, nda inét-sama bënga tšabe soyënga chamotsebomnama; y canÿa chca amá, çtšëngaftanga ndoñe šmontsejuabná

cha ibojtsomerecena Bëngbe Bëtsábocana canÿe puerte más uabouana castigo, chë Moisesbe leyama tondaye yondoalena ca tojyanabiama? <sup>30</sup> Bënga nyetscanga mondétatšëmbo Bëngbe Bëtsá mëntšá tojányanama: “Atše chanjama chënga chamosufrima, ínÿenga chamosufrima tmojama causa; y chënga chanjácastigaye, ínÿengbioye bacá tmojaborlá causa ca.” Y mëntšánaca tojánayana: “Bëngbe Utabná chabe entšangbiana echanjayana ntšamo tmojëftsemcá tšabá o ndoñe tšabá bëtsemnama, y chëngaftaca echanjama ntšamo chora chaojajuabocá ca.” <sup>31</sup> ¡Tša uabouana, Bëngbe Bëtsá chë nyets tempo ainabe cuatšíñe joquédana, castiganá jtsemnama!

<sup>32</sup> Pero ntšamo tempo yojamnama šmochtsenójuabnaye, chë ndegombre soyënga Jesucristbiana cabá chora šmonjanábuatmana ora, y chora tša jenojuérvana cmonjanotocá padecena soyënguiñe, y chë causa tša šmojansufrí. <sup>33</sup> Báseftanga tšëngaftanguentsëngbioye entšangbe delante tcmojanoyánguango, y ínÿenga tmojanma puerte chašmotsešufrínama; y ínÿenga tšëngaftanguentsënga chca imojansufrinëngaftaca šmojanama, chënga jujabuáchama. <sup>34</sup> Tšëngaftanga šmojánalastemana chë chënguentsënga cárceloye imojanétámenënga; y oyejuayënga šmojanlesenciá ntšamo šmojanbomncá ínÿenga chacmotsabacama, er tšëngaftanga šmojátatšëmbona Bëngbe Bëtsábocana más tšabe soyënga šmojtsebomnama, chë nyetsca tescama šmochtssebomna soyënga. <sup>35</sup> Chcasna, ndoñe šmatjajbaná ainaniñe bëtscá añemo jtsebomnana, ni Bëngbe Bëtsábeñe sempre jtsobátmanana; er chca šmobatmánayeca, Bëngbe Bëtsá echanjama tšëngaftanga bëtscá uacanana soyënga chábiocana chašmotsebomnama. <sup>36</sup> Tšëngaftanga cmontsamna corente uantadënga jtsemnana, padecëniñe chašmojtsachñëjuana ora, chca, ntšamo Bëngbe Bëtsá yobošcá tšëngaftanga chašmot-samama, y ndayá Bëngbe Bëtsá tojanašebuachenacá chašmóyëngacñama. <sup>37</sup> Er Bëngbe Bëtsabe uabemana palabrënguiñe cha mëntšá tojánayana:

Betsco, ndoñe bën, y chë jabama ibomná echanjabo. Ndoñe bën quebochatóbema.

<sup>38</sup> Nÿe chë ndabiama atše chaijama atšbe bominÿiñe tšabia chaotsemnama, átšbeñe cha betsošbuáchema, cha ndegombre chë nyetsca tescama yomna tšabe vida echántsebomna; pero uatjana causa, átšbeñe ošbuáchiyana tojt-sajbanase, atše cháftaca ndoñe quichátoyejuaye ca —cha tojánayana. <sup>39</sup> Pero bënga ndoñe quemátmëna chë uatjana causa Bëngbe Bëtsábeñe ošbuáchiyana tmojtsajbananga, y chca, nyetsca tescama pochocánënga jtsemnama imojtsajnënga; pero aíñe mondmëna chë Bëngbe Bëtsábeñe ndegombre ošbuáchiyënga, y chca, chë atsebácanënga jtsemnama mochjashjáchënga.

**Bëngbe Bëtsábeñe ošbuáchiyana jtsebomnana**

**11** Ošbuáchiyana jtsebomnana endmëna corente jtsetatšëmbuana, ndayá tmojtsobatmancá nde-

gombre chca yochjopásama; endmëna ainaniñe corente jtsetatšëmbuana, ndayá bënga mora ndoñe tmontsonyáca ndegombre chca yomnama. <sup>2</sup> Bëngbe Bëtsá tojánayana bëngbe bëts taitanga tšabá imojána ma ca, chënga chábeñe imojtsošbuachéyeca.

<sup>3</sup> Bënga, Bëngbe Bëtsábeñe mondošbuachéyeca, mondëtatšëmbo cha quem luare y nyëtsca luarënga tojanmama, chca chaotsemnama cha tojanmandá ora; chcasna, chë ndayá mora bënga jinýama imobencá, cha tojanma bënga ndoñe mondobena jinýama soyënguentšana.

<sup>4</sup> Abel Bëngbe Bëtsábeñe yojanošbuachéyeca, oveshatëmënga chábioye tbojanátšëmbona, y chë soye Bëngbe Bëtsabiama más tšabá yojtsemna, chë ndayá Caín, chabe catšata, Bëngbe Bëtsá jëtschuayama tbojanátšëmbonama. Chíyeca, Bëngbe Bëtsá tojánayana Abel chabe bominiñe tšabia yojtsemna ca, ndayá Abel chábioye jëtschuayama tojanmá oyejuayá tojanóyëngacñeyeca. Ntšamo Abel Bëngbe Bëtsábeñe yojanošbuachecá, masque cha ya obaná yojtsemna, chë soye cabá bënga šontsabuatambá.

<sup>5</sup> Enoc Bëngbe Bëtsábeñe puere yojanošbuachéyeca, Bëngbe Bëtsá celoye tbojesanbëtsëñe, ntjobancá. Chentšana ndocná tonjanobená cha jtsinýenana, Bëngbe Bëtsá tbojesanbëtsëñe causa. Y Bëngbe Bëtsabe uabemana palabreñguñe endayana, Bëngbe Bëtsá Enócaftaca oyejuayá canjamna ca, ntšamo jtsamëse vojyoyenama, y chentšana celoye tbojtsanám-bañe. <sup>6</sup> Pero Bëngbe Bëtsábeñe ntsošbuachiyá, ndoñe quenátopodena cha oyejuayá bëngaftaca jabemama, er chábioye jobéconamna, entšá jtsemnana jtsošbuáchiyana cha ndegombre bëtsemnama, y cha inétsamama chë cha jtsabuatmama tša tmobošëngbiama bëtská tšabe soyënga chamotsebomnama, mo chábiocana uacanana soyëngcá.

<sup>7</sup> Bëngbe Bëtsá Noébioye tbojanbuayená uabouana soyënga yochjanopásama, cachora ndopodena jinýama soyënga, y cha Bëngbe Bëtsábeñe yojanošbuachéyeca, tojanma ntšamo Bëngbe Bëtsá tbojanmandacá y barquëshá tojanapormá chabe pamíllanga játsebacama. Cha chca tojanma ora, osbuáchiyana bómnyayeca, cha tojaninýanyé entšanga tša bacna soyënga tmojanmama y chë causa castigánënga jtsemnama yojtsamnama. Chabe osbuachiyanámna Noé tojánashjache Bëngbe Bëtsabe bominiñe tšabia jtsemnama, y chca entšá jashjáchana, nyë Bëngbe Bëtsábeñe jtsošbuáchiyëse.

<sup>8</sup> Bëngbe Bëtsá Abrahámioye tbojanchembo, inye luaroye cháuama; Abraham Bëngbe Bëtsábeñe yojanošbuachéyeca, tojanma ntšamo Bëngbe Bëtsá tbojanmandacá, y tojánbocna chë luaroye jama, chë Bëngbe Bëtsá tbojanšbuachená jatsetayama luaroye, masque Abraham ndoñe yontsetatšëmbo ndëmoye yochjánama. <sup>9</sup> Bëngbe Bëtsábeñe yojanošbuachéyeca, yojobena mo inye luarocana ashjangonacá jtsiyenana, cachabe luarentše ndoyená, chë Bëngbe Bëtsá tbojanšbuachená luarentše. Entšëjuaca pormana tambënguiñe vojyoyena, cachcá ntšamo chë chábentšana

básenga Isaac y Jacob ibojëftsiyencá; y chátnaca Abrahamcá ibojanobátmana jýëngacñama ntšamo Bëngbe Bëtsá Abrahámioye tbojanšbuachenacá. <sup>10</sup> Er Abraham corente uantadá yojanobátmana chë canye luaroye celoca jamashënguama tempo; chë luare inamna canye bëts pueblo, puere tšabe ucuatjoniñe pormana pueblo, canye luare chë ndayentšama Bëngbe Bëtsá tojanjuabó ntšamo chaotsemnama, y cachabe pormana luare inamna.

<sup>11</sup> Sara, Bëngbe Bëtsábeñe yojanošbuachéyeca, Bëngbe Bëtsá tojanma cha canye šëšona chabotsebomnama, masque chora ya bëtsanánëjema yojtsemna, šëšona jtsëbomnama. Bëngbe Bëtsá chca tojanma, er Sara corente yojanjuabná, cha chë canye šëšona yochtsanbomnama tbojanšbuachená cha, nyëts tempo ntšamo tojayancá amá yojamna ca. <sup>12</sup> Y chca, quem entšá Abraham, chë šëšona jtsabamnama ya ndobenábentšana, ba básenga tmojanóyñá, tša malajta mo chë celoca estrellëngcá, y tša chëftanga mo chë mar béjayoca chënyañentša cascajca, ndocná jacúntama ntjobenayana.

<sup>13</sup> Nyëtsca quem entšanga imojëftsiyena jtsamëse ntšamo chëngbe ošbuáchiyana yojamncá, y chca tmojanóbana, masque cabá ndoñe tmonjanóyëngacñe chë Bëngbe Bëtsá tojanašebuachená soyënga. Pero chëngbe ošbuáchiyánama corente imojtsetatšëmbo, Bëngbe Bëtsá chentšana baytese ntšamo tojanašebuachenacá yochjánatšatayama y chë soyënga ndegombre yochtsemnama, y chama oyejuayënga chënga imojtsemna. Chënga tmojánayana quem luarentše chënga imojyoyena mo cachëngbe luarentše ndoyenëngcá, y quem luarëjana mo nyë achnëjuanëngcá ca. <sup>14</sup> Y chca tmojtsichámëngna, puere jtsinýanýayana chënga tša imojtseboše inye luaroca joyénanama, canye luare cachëngbiama.

<sup>15</sup> Chënga nyë chë ndayentšana tmojëftsanbocna luarama manjánjuabnase, matmënanobená tšabá cachoye jesshéconama. <sup>16</sup> Pero chëngna canye más tšabe luare imnaboše, canye luare celoca. Chíyeca Bëngbe Bëtsá ndoñe yonjanëuatja, chëngbe Bëtsá ca chënga chamotsechëmbuanama, er celoca canye bëts luaroye, mo canye bëts pueblécá chëngbiama tojanprontá.

<sup>17</sup> Bëngbe Bëtsá Abrahámioye jinýama, ndegombre aíñe o ndoñe Bëngbe Bëtsábeñe tayojtsanošbuachema, tbojanmandá chabe uaqiñá Isaac chabuánatse jóbama, chábioye jëtschuayama, ntšamo Abraham chë tojóba bayëngaftaca jamama yojanamancá. Cha Bëngbe Bëtsábeñe yojanošbuachéyeca, yojtseprontana chë nyë canye uaqiñá ibnabomná jóbama, Bëngbe Bëtsábioye jëtschuayama, masque Bëngbe Bëtsá mëntšá tbojanšbuachená: <sup>18</sup> "Chë ácbentšana entšanga nyë Isaacbiajana mochanjabo ca." <sup>19</sup> Abraham corente yojanjuabná y yojátatšëmbo, Bëngbe Bëtsá ndegombre obenana bomná bëtsemnama, chë obanënga chámuatayenama jamama. Chíyeca, Bëngbe Bëtsá Abrahámioye tbojtsanauyaná Isaac jóbama ora, yojamna mo Abraham obanënguentšana

chábioye cuaftoyëngacñecá. Y chca, ntšamo Isaácaftaca tojanopasacá, batsá yojtsinýanýnaye ntšamo Jesucrísoftaca yochjanopasacá.

<sup>20</sup> Isaac Bëngbe Bëtsábeñe yojanošbuachéyeca, Bëngbe Bëtsábioye tbojanimpadá chabe uaquiñátbiamma, Jacob y Esaú, bëtscá tšabe bendicionënga chabotsebomnama, chë joshjanguama tempënga ora.

<sup>21</sup> Jacob Bëngbe Bëtsábeñe yojanošbuachéyeca, ya jóbana ora, tbojanimpadá cada ona chë Josebe básengbiamma, Bëngbe Bëtsá chaoma bëtscá tšabe bendicionënga chamotsebomnama. Cha chca tojanma, jotsejbénase Bëngbe Bëtsábioye jadórama, y chabe jatjonëfjiñe tsbanánoca jojuáchase.

<sup>22</sup> José Bëngbe Bëtsábeñe yojanošbuachéyeca, ya jóbana ora, tojánayana más chcoye chë Israeloca entšanga Egiptó luarentšana mochjéftsanbocna ca, y tojéftsanmandá ndayá jamana chabe óbana cuérpoca.

<sup>23</sup> Moisesbe bëtsetsata Bëngbe Bëtsábeñe ibojanošbuachéyeca, cha tojanonýná ora, unga shinýentscuana cha tmojtsaniytëme, er chata tbojáninýe cha canýe botamana básetema bétsemnama, y ndoñe tbonjanëuatjaná chë reybe mandama, chë nyetsca judiëngbe basetëmënga boyabásetëmënga jt-sébáyana.

<sup>24</sup> Moisés Bëngbe Bëtsábeñe yojanošbuachéyeca, ya bëtscá yojtsemna ora, ndoñe tonjánbošena chë Egiptoca reybe bembëbe uaquiñacá chamotsábuaatmama.

<sup>25</sup> Chamna, tojánbošena cha jasúfriama ínýenga chamotsamama, cánýiñe chë Bëngbe Bëtsabe entšangaftaca, y ndoñe nýe baseftayté tšabá jatsmënana, bacna soyënga jtsamëse, ntšamo cachá tojtsejuabnacá, nýe cachá tšabá jtsomñama. <sup>26</sup> Chamna, cha yojanjuabná, chë padecena soyënguiñe jasúfriana ntšamo Cristo tojansufricá, más tšabá yojamna chë Egiptoca uámama soyëngama, er cha Bëngbe Bëtsábeñe jtsošbuáchiyëse chábeñe yojanobátmana, ba tšabe soyënga mo canýe uacanana soycá cha ibochjanatšetayama.

<sup>27</sup> Bëngbe Bëtsábeñe yojanošbuachéyeca, Moisés Egiptocana tojéftsanbocna, chë luarentša rey cháftaca chábuetnama ntjatauatjca. Cha ainaniñe nyets tempo añemo yojtsebomna, y chca yojáninýna mo chë ndocná jinýama tondobenacá, Bëngbe Bëtsábioye cuaftsonýacá. <sup>28</sup> Bëngbe Bëtsábeñe yojanošbuachéyeca, ntšamo Bëngbe Bëtsá tbojanmandacá, Moisés chë judiënga tojanabuayená Bashco fiesta jamama, y chë Israeloca entšangaftaca yebnëngoye amashjuaniñe buíñeca tojanbuéščacja, chca, chë ángel obanayá, chë Israeloca pamíllangbeñe Egiptoca chë mayor uaquiñënga ndocá chaondámama.

<sup>29</sup> Moisés y Israeloca entšanga Bëngbe Bëtsábeñe imojanošbuachéyeca, chë “Buángana ca” uabaina mar bejayëjana tmojánenachnëngo, mo chiñe bojojo fshantse cuaftsomñcá; chentšana, chë Egiptoca entšanga cachcá jamama tmojánbošena ora, nyetscanga chiyiñe tojtsanatajo.

<sup>30</sup> Israeloca entšanga Bëngbe Bëtsábeñe imojanošbuachéyeca, chë Jericó bëtspueblentša tapiëshë-

ga shëconana canýsëfta tentscuama chënga imojánajnentšana, chëšënga yojtsáshajaye.

<sup>31</sup> Rahab, chë pueblentša bacna vida bomna shembása, Bëngbe Bëtsábeñe yojanošbuachéyeca, ndoñe tonjánóbana chë ínýengaftaca, chë bëtspueblentše oyenënga, chë ntšamo Bëngbe Bëtsá tojanmandacá ndoñe tmonjanmënga; y ndoñe tonjánóbana, er chë Israeloca entšanguentšana ichmónënga tšabá tojanëbuaja, chë jarrepárama tmojánanga ntšámose chë luarentše oyenënga jáyëñjanama jobenayama.

<sup>32</sup> Atše sentsobena bangbiamma más jóyebuambayama, Bëngbe Bëtsábeñe ošbuáchiyëngbiamma, pero luare šattsëshbe chchangbiamma jóyebuambayama, mo Gedeoncá, Barac, Sansón, Jefté, David, Samuel y Bëngbe Bëtsabe juabna oyebuambayëngcá. <sup>33</sup> Chënga Bëngbe Bëtsábeñe imojanošbuachéyeca ínýengbe mandadëngbe entšangbioye tmojanayëñjaná, bëtscá imojánama nyetsca entšangaftaca ntšamo tšabá yomncá jtsamama y nyetscanga cachcá chamotsámanama, ndayá Bëngbe Bëtsá chënga tojanašbuachenacá tmojanoyëngacñe; y Bëngbe Bëtsá tojanma chënga leóngaca imojtsemna ora, chënga chamuatenáyebengoma, chentšana báseftangbioye ndocá chamondámama. <sup>34</sup> Ošbuáchiyana bómnyeyeca, Bëngbe Bëtsá tojanma lempe chaotsefsanama, chëngbioye íñeshiñe tmojanacjá ora, chënga ndocá chamondëpasama; tmojanotsbocá espadéjaca jobanámentšana; ya tondaye añemo bëntsebomna ora, Bëngbe Bëtsá tojanma bëtspobenana y puerte añemo chamotsebomnama; tmojánashjache bëtspobenana jtsebomnama ínýenga jáyëñjanama, chëngaftaca imojtsentsjaná ora; y tmojanobená inýe mandadënga y chëngbe soldadënga jáyëñjanama, chamotsachetama jamëse. <sup>35</sup> Ošbuáchiyana bómnyeyeca, básefta shembásënga chëngbe óbana pamíllangbioye cachiñe ainënga tmojtananýe, chënga ainënga chamotsatsmënama Bëngbe Bëtsá tojanma ora.

Ošbuáchiyana bómnyeyeca, ínýenga tmojanma básefta ošbuáchiyënga, puerte chamosufrima, y jobanámnaca; er chënga más tmojánbošena jashjáchana chë nyetsca tescama yomna tšabe vida jtsebomnana, y ndoñe nýe chë jótsbocana batsatema más vida jtsebomnama. <sup>36</sup> Ošbuáchiyana bómnyeyeca, ínýenga corente tmojansufrí, ínýenga chëngbioye tmojanoyánguango ora y tmojanatsetšená ora; y ínýenga tmojansufrí y cárceloye cadenëjuangaca utámenënga joquédamnaca. <sup>37</sup> Inýengbioye ndëtšbëngaca tmojtsanatëchënganja, serruchëshaca tmojtsanëjácacaye, espadéjaca tmojtsanëbaye. Inýenga imojánajna cánýentšana ínýecnoye nýe oveshá y chivëbe bobáchecha uichëtjonënga, ujabótënga, ainana tsetšanënga, y ínýengbeyeca mocá borlánënga. <sup>38</sup> Chë nýe quem luarama enójuabnayënga ndoñe monjanomerecena chënga méngaftaca jtsiyenama, chënga chë vida imojábomna cánýentšana ínýecnoye aniñe, entšanga ndoyena luarënguenache, tjañenache, fshantsiñe atëbëfjniñe y cuevëshënguiñe.

<sup>39</sup> Nÿetsca quem entsanga, ndëmuanyengbiamamuentše tmonjoyebuambá, Bëngbe Bëtsá tšabá chëngbiamam tojánayana, ošbuáchiyanam imojánbomnaca; pero ni canya chënguentšá tonjanóyëngacñe, ndayá Bëngbe Bëtsá chëngbe entsanga jatšatayama tojanašebuachenacá, nÿetsca tescamam jtsebomnana. <sup>40</sup> Bëngbe Bëtsá, béngbeñe jtsejuabnaye, tojanjuabó canye más tšabe soye bëngbiamam jamama, chca, Bëngbe Bëtsá canye ora jamama, bënga nÿetscangam, chëngam y bënga chamotsemnana lempe ntšamam Bëngbe Bëtsá yobošcá, ntšamam Bëngbe Bëtsá tojanašebuachenacá jóyëngacñe.

### Bënga mochtsejuabnaye ndayá Jesús tojanmama

**12** Chíyeca, bënga mochtsejuabnaye ba entsangbiamam, chë bëngbiamam más natsanam imojaniyëngam, ndëmuanyëngam puertem tšabá bëngam jtšinyanayanam ntšamam ndegombrem yomnanam Bëngbe Bëtsábeñem ošbuáchiyanam jtsebomnana, mo chëngam ndayá bëngam tmojtsamamam cuaftsonyangcá. Chcasnam, mo chë tmochamanëngcá, ínÿëngaftacam jenëyëñjanamam, chë jashjanguamam tojtsemnam luaroyem natsanam jashjanguamam, chëngam jotjajuamnam, chë chorscamam nduaservenam entsáyam jtšenátsejcanam, y lempe ndayá tojtsamam más uenamam chamotjajuamam soyëngnacam jtšenójacanam; béngnacam cachcá, ndoñem matjalesënciam bëngam Crístbioyem ndoñem tšabá ndët-soservënamam, ni chë bacnam soyëngam jamamam juabnëngam, chë béngbioyem paselom jáyëñjanamam juabnëngam cachcá chamotsamamam. Chamnam, šontsamnam sempre Bëngbe Bëtsá jtse-servënamam, puertem uantadëngam jtsemnësem masque padecenam soyënguiñem tmoyenam, bëngam chamobenám chë trabajom jamamam, chë ndayamam Bëngbe Bëtsá šojáchembo. <sup>2</sup> Jesusbiamam mochtsejuabnayem, nda šuebëñatsanam bëngam ošbuáchiyanam chamotse-bomnana, y šuinyananá ntšamam nÿets tempo nÿetscam soyënguiñem Bëngbe Bëtsábeñem jtsošbuáchiyanam. Cham chë cruzocam jóbanamam sufrínanam lempe tojanoboyám, er cham yojanobátmanam chë chentšanam yochtsanbomnam bëts oyejuayánamam; y yojanjuabná, chë más bacám uamanam entsangcám jóbananam, chabiamam ndoñem canyem uámanam soye yonjamnam ca; y chentšanam chë uámanam puestentšem tojtanótbemam, Bëngbe Bëtsabem catšbioicam, jtsemándayamam.

<sup>3</sup> Chíyeca, šmochtsejuabnaye ntšamam Jesús Bëngbe Bëtsábeñem jtso-bátmanësem, puertem uantadom yojamnamam, chë bacnam soye amëngam corentem chabem contra imojtsemnam ora. Chcam chábemñem šmochtsejuabnaye, tšëngaftangam Crístbiamam oservëniñem ndoñem chacmondëumantšënam, ni ainaniñem añemom jtsebomnana ndoñem chašmondájbanamam. <sup>4</sup> Tšëngaftangam padecenam soyënguiñem šmojachnëngom, entsangam bacnam soyëngam imojtsamam causam, pero mëntscoñamam ndoñem cmontsamnam jóbanamam, Crístbem soyëngamam enojuerzániñem; <sup>5</sup> y tcmojtsëbnëtjombam ndayá Bëngbe Bëtsá tšëngaftangbioyem, chabem básengam quetsomñëcám tcmojábuayenamam. Chë Bëngbe Bëtsabem uabemamam palabrënguiñem mëntšám endayanam:

Atšbem uaqiñám, Bëngbe Utabná acam jábuayenamam tojtsebošem ora, acam jasúfriamem y padecenam soyëngam jauántasem,

chcam ndoñem catjátsjuabnayem chiñem mom canyem nduámamam soye cuaftsemncám;

y cham chacmojuácacanam ora, ndoñem cattšajbanám ainaniñem añemom jtsebomnana.

<sup>6</sup> Er Bëngbe Utabná jábuayenamam nda cham tbobobonshanábioyem,

y jacastíganam chë mom chabem uaqiñacám tbojofjábioyem cam —chiñem endayanam. <sup>7</sup> Padecenam soyënguiñem chašmtojtsesufrinam ora, šmochtsejuabnayem chë soye yojtsemnam tšëngaftangbioyem jábuayenamam, y chcam, Bëngbe Bëtsá tšëngaftangaftacam jtšamamam mom chabem básengam quetsomñëcám. ¿Nderadom nántsemnam canyem uaqiñám, y

chábioyem chabem taitám ndocnam tem buanjuácacanam, más tšabám chaotsamamam? <sup>8</sup> Nderadom Bëngbe Bëtsá tšëngaftangam ndoñem tcmojjabuayená, ntšamom nÿetscam chabem básengaftacam cham endbetsamcám, as tšëngaftangam ndoñem ntsemnanam ndegombrem chabem básengam. <sup>9</sup> Y bëngam básengam monjamnam ora, bëngbem bëtsétsangam quem luarentšem monjanamamam bëngam jácastigamam, y bëngam chëngbioyem ndoñem stëtsoyem ntjaquédanam. Y moram, bëngam más šontsamnam, jtso-bedecënamam y más bëts respetom jtsebomnana celocam Bëngbe Taitabiamam, nda tojamam entsangam espíritom chamotsebomnana, y chcam, bëngam tšabem vida chamotsebomnana. <sup>10</sup> Bëngbem bëtsétsangam quem luarentšem, nÿem báseftam tescamam, bëngam jëftsabuayinayanam, y chcam jamamam chëngam tšabám tojtšinyanam ora; pero Bëngbe Bëtsá bëngam šojtsabuayinám ora, sempre chcam jtšamamam bëngbem tšabiamam, bëngam chabem entsangam jábiamamam, cachacám puertem tšábengam, ntšamom cham nÿets tempom yomncám.

<sup>11</sup> Sempre bëngam ndayem castigom tmojtse-bomnam ora, chcam bëngam chamam ndoñem oyejuayëngam ntsemnana, pero aíñem cochtsetšëñanëngam. Pero bëngam chë castigüentšanam tmojuatsjinÿem ndayá Bëngbe Bëtsá chë sóyem cam tbojtsabuayinacám, as chentšanam jóbocnamam natjëmbanam oyenamam, nÿetscam soyënguiñem ntšamom tšabám yomncám jtšamësem.

### Bëngbe Bëtsábioyem jtšabotemam, entsangbiamam ndoñem tšabám ntsemnana.

<sup>12</sup> Mom nda puertem uamëntšnayacám, jatrabájamam tondayem añemom ntjtse-bomncám, tsátšënam buacuatsšëngacam y puertem uamëntšënam ntsamiasšëngacam, tšëngaftangbentšem báseftangam yam uamëntšnayëngam šmojtsemnam Bëngbe Utabnabiamam trabájajiñem, y ainaniñem ndoñem añemom šmontse-bomnam. Cachiñem bëtsañemom šmochtishachem, y Bëngbe Bëtsabem obenanam cachiñem šmochtsatsbomnam. <sup>13</sup> Mom chë canyem benachem tšabám y nderichom chaotsemnana tmojtsamëngcám, chcam, chë coshetëngam chiñem jamam chamotsobenamam y más tšabám jtšatanamam chamuatatsjínÿamam, y chë benachentšanam ndoñem chamondëtse-bocanamam; cachcám tšëngaftangam, chë bëtscám ošbuáchiyanam y Crístom jaservi-amam corentem añemom šmobomnëngam, chë nÿem batšatënam osbuáchiyanam y chcam jatrabájamam nÿem tondayem añemom



ndbomnënga šmochjújabuache; chë soye šmochjama, ntšamo Cristo tšabá jaserviama yomncá jinýanýiyëse, y ntjalesenciaca ndocna soye chaotsama chë tšabe be-nachentšana tšëngaftanga chašmotsojuánañama.

<sup>14</sup> Lempe ntšamo chašmojobenacá šmochjama nyetscángaftaca natjémbana jtsiyenama, y ntšamo Bëngbe Bëtsabe entšanga mondbetsamcá jtsamëse chašmotsiyenama, cha jtseservénëse; er chca ntjamcá, canya ndoñe ntsoobenana Bëngbe Utabnábioye jinýama. <sup>15</sup> Yejuana šmochtsantješna, ndocná Crístbeñe os-buáchiyana chaondëtsajbanama, y chca, chë Bëngbe Bëtsá chabe entšángbioye yochjatsataye tšabe soyënga chënga ndoñe chamondashjache. Šmochtsantješna, tšëngaftanguentšë ndocná chaondëtsemna, mo canye untja tbëtëjca, chë chcaja sayëngbioye jáso-cayana, nda chaotsama, ínýenga natjémbana ainana ndoñe chamondëtsebonnama y bacna soyënga jtsamëse chamotsiyenama. <sup>16</sup> Yejuana šmochtsantješna ndocná tšëngaftanguentšë shembása o boyabásaftaca bacna soye amá chaondëtsemnama, ni canya ndabiamana Bëngbe Bëtsabe soyënga tondaye chaondëtsámana. Esaú chca tojanma, chë lempe yochjanash-jachcá, mayor uaquiñá bëtsemnama, chabe uabentsábioye canye šcena sanama tbojtaname ora. <sup>17</sup> Y tšëngaftanga šmondëtatšëmbo, chca tojanopasá chentšana, Esaú tojánbošena chabe taitá Bëngbe Bëtsábioye chaboimpadama, chabiamana tšabe bendicionënga chaomama, chë mayor uaquiñá bëtsemnama yojanobena jtsebonnama soyënga; pero chora chabe taitá ndoñe tbonjanoyeuná, er masque Esaú chora juabna tojantrócá, cha ndoñe tonjanobená ntšamo yojtsopasancá jëtsjandmanana. Masque cha tša tojánbošena, shëchbuiyeca chabe taitábioye jaimpádase, ya ndoñe yontsopodena ntšamo tojanopasacá jëtsjandmanana.

<sup>18</sup> Tšëngaftanga ndoñe chešmatobeconá, mo chë entšanga Israeloca Sinaí ca uabaina tjoye tmojanobeconacá, ndayá chënga imojobena jabojuama, y íñesheca yojtsángbototjuana, tondaye binýniñe luare, tša ibetiñe y puerte jabuache binýiëngaca; <sup>19</sup> ni chešmatuena chëngcá, canye trompetéjua uajatëtanana, ni Bëngbe Bëtsabe oyebuambnayana. Chë oyebuambnayana tmojanuenënga, imojtseimpadana ndoñe más chëngbioye chaondëtsóyeuambnama. <sup>20</sup> Chca tmojanma, jauántama ndoñe tmonjanobená causa, ntšamo Bëngbe Bëtsá tojanamëndacá: “Nda quem tjoca chaojoyená, masque canye bayá chaotsomñe, entsemna chana ndëtšbëngaca chamotsatëchënjanga jtsóbama ca.” <sup>21</sup> Ndegombre, ntšamo tmojaninýcá tša uabouana yojtsemna, cach Moisésnaca mëntšá tojanayana: “Tša šontsengmëmná auatjananá séntsemna causa ca.”

<sup>22</sup> Pero tšëngaftanga Bëngbe Bëtsábioye šmojobeconá, y chca endmëna mo tšëngaftanga canye Sión ca uabaina tjoye celoca cuafjobeconacá, chë Bëngbe Bëtsá nyets tempo vida bomnabe bëtš puebioye, mo celoca Jerusalén cuenta; y ba uaranga angelëngbioye šmojobeconá, cánýiñe oyejuayënga enefjuanënga imojt-

semnéngbioye, Bëngbe Bëtsá jtsatschuanayama.

<sup>23</sup> Endmëna mo tšëngaftanga chë Bëngbe Bëtsabe entšángbioye cuafjobeconacá, chentšë enefjuanënga mo Bëngbe Bëtsabe basengcá, chënga ndayá chë Taitá tojašebuachenacá jýëngacñama, ndëmuanýënga Bëngbe Bëtsá chabe libréšañe tojúbiamana. Tšëngaftanga šmojobeconá Bëngbe Bëtsábioye, ntšamo nyetsca entšanga tmojamcá tšabá o ndoñe tšabá bëtsemnama yochjayanábioye. Endmëna mo tšëngaftanga cuafjobeconacá, chë entšanga mora ya obanënga y ntšamo tšabá yomncá jtsamëse imojëtsiyenëngbe espiritëngbioye, chë entšanga ndëmuanýëngbiamana Bëngbe Bëtsá tojanma chamotsemnama lempe ntšamo chabe entšángbiamana yojanjuabnacá, chca, cháftaca sempre vida jëftsebonnama. <sup>24</sup> Tšëngaftanga Jesúsbioye šmojobeconá, chë jóbane, entšanga Bëngbe Bëtsáftaca mo canýacá chamotsemnama tojanmá, ntšamo Bëngbe Bëtsabe tsëm trato yojamncá; y endmëna mo chë bëngbiamana cha tojanóbana ora tojanábuashana buiñoye tšëngaftanga cuafjobeconacá; chca tojanábuashana, bëngbioye Bëngbe Bëtsabe delante mo tšabengcá jábiamama, mo ntšamo entšángbeñe buiñe jabuéscacajama chë bachnanga imojuamancá. Caín chabe catšata Abélbioye tbojanóba ora, yojamna mo chë Abelbe uabuáshanana buiñe Bëngbe Bëtsábioye cuafseimpadancá, chë bacna soyama castigo chaotsemnama; pero Jesucristbe buiñe ndoñe chca ntsamana, ndayá chiyeca bënga más tšabe soyënga jashjáchana; Jesusbe buiñeca, bënga montsobena atsebácanënga jtsemnama.

<sup>25</sup> Cuedado šmochtsebonna, bëngbioye tojtsoye-buambná ora cha joyeunayama. Chë Israeloca entšanga ndoñe tmonjánbošena Bëngbe Bëtsá joyeunayama, chë Sinaí tjoca quem luarentšë tojanabuayená ora; chëngbioye cha tojanacastigá. Y mora más, Bëngbe Bëtsá, chë celocana bënga abuayiyayá, ndoñe cachcá ndëcastigánënga quešochátabashejuana, ntšamo cha šojtsëtsëtnacá ndoñe tmontseyeunanëse. <sup>26</sup> Bëngbe Bëtsá Sinaí tjoca chë entšángbioye tojanoyebuambá ora, chabe oyebuambnayánaca tojanma quem luare chauangmëmanama, pero mora cha chabe uabemana palabrénguiñe tojašebuachená: “Atšë cachiñe chanjatsma chauangmëmanama, ndoñe nyë quem luare, sinó celócnaca ca.” <sup>27</sup> Bëngbe Bëtsá “cachiñe ca” tojanayana ora, chë sóyeca yojtsichamo, chë ndayté lempe chaongmëmanama cha cachiñe yochjama ora, chë quem luarentšë tmojama soyënga y chë jatrócama yopodena soyënga yochtsejuána ca, chca, nyë chë nyetsca tescama yomna soyënga y ndoñe jatrócama soyënga chaoquedama. <sup>28</sup> Chcasna, Bëngbe Bëtsabe amëndayoca, chë cha yochjama bënga chamuamashënguama luare, yomna cachcá nyetsca tescama y ndocna te ntjotrócana. Bëngbe Bëtsá chama mochjëtschuaye, y ntšamo cha tšabá tbojtsinýancá mochtsadorana, chabiamana bëtš respeto jtsebonnëse, y nyetscangbiamana más bëtšá cha yomnama jtsejuabnayëse. <sup>29</sup> Er Bëngbe Bëtsá puerte etonaná chë chabiamana nduauenanënga jabuache echanjácastigaye, y

chca, cha jtsemnana mo canye íñeshe lempe jtse-pochocamcá.

### Ntšamo jtsiyenama, Bëngbe Bëtsá oyejuayá béngaftaca chaotsemnana

**13** Sempre nyetscanga šmochtsenbobonshana, Jesucristbeyeca catsátanga quetsomñecá. <sup>2</sup> Sempre tšabá chë tšëngaftangbe yebnoye inye luarëngocana tmojáshjajnënga šmochjúbuaja, er chca jamëse, ntsetatsëmbcá báseftangna angelënga chëngbe yebnentše tmojanébuaja.

<sup>3</sup> Chë utámenëngbiama sempre šmochtsenójuabnaye, mo tšëngaftángnaca chëngaftaca utámenënga cuaftsemncá. Chë ínÿënga tmojtsama chamot-sesufrinëngbiama šmochtsenójuabnaye, er tšëngaftángnaca nderado cachcá šmatjatspása.

<sup>4</sup> Boyabása y shembása tbojanobouamá ora, ntšamo tbojanenšbuachenacá nyetscanga chamotserre-spetana; y chë útata chabotsama nÿe ndayá y nÿe ntšamo Bëngbe Bëtsá bouamnábioye tojanamëndacá, er Bëngbe Bëtsá echanjácastigaye chë shembása o boyabásaftaca bacna soye amënga, y chë shema o boyábioye ínÿaftaca ingñayéngnaca.

<sup>5</sup> Ndoñe šmattsiyena jtsejuabnayëse nÿe mallajta crocénana jëftsebomnana. Nÿe chë šmobomna soyéngaca oyejuayënga šmochtsomñe, er Bëngbe Bëtsá tojánayana: "Ndocna te cachcá quechochatonÿaye, ni canÿa quechocháiseboshjona ca." <sup>6</sup> Y chca, bënga montsobena corente añémoca jayanama:

Bëngbe Utabná endmëna nda atše šonduájabuachana; tondayama quichátauatja.

¿Ndayá canÿe entšá nanjobenaye átšeftaca jamama ca?

<sup>7</sup> Tšëngaftangbe amëndayëngbiama, chë Bëngbe Bëtsabe buayenana soyënga tcmojábuatambangbiama, sempre šmochtsenójuabnaye. Sempre šmochtsenójuabnaye chë ntšamo chënga imojaniyentšana tojanóbocna tšabe soyëngama, y šmochtsiyena jtsamëse ntšamo chënga imojanamcá, Jesucristbeñe osbuáchiyënga bëtsemnana.

<sup>8</sup> Jesucristo cachá nyets tempo iuétsemna, tempo, mora y nyetsca tescama. <sup>9</sup> Ndoñe šmatjaleséncia ínÿënga chamotsamama tšëngaftanga chë benachentšana chašmotsojuánañama, ndayá chënga tmojtsabuátambama, y chë Cristo tojánabuatambama contra soyéngaca. Más tšabá endmëna bënga ainaniñe añemo jtsebomnana, Bëngbe Bëtsá tšabe juabna bëngbiama yobómnayeca, y ndoñe chë sanama, chë ndayá aíñe o ndoñe šontsamna jtsesayana soyëngama mandënga tcojtsamëse. Chca mandënga ndocna te chë Israeloca entšangbiama tempo tonjanoservé.

<sup>10</sup> Bënga chë Jesucristbeñe mondošbuáchenga, canÿe soye mondbomna mo chë Bëngbe Bëtsábioye jëtschuayama altaroca juinÿena soycá, bacna soyëngama perdonánënga jtsemnana. Bënga mondbomna chë Jesucristo bëngbiama tojanma soye, cruzoca tojanóbana ora, bëngbe bacna soyëngama; y chë nÿe

tmojóba bayëngaca soyënga tmojtsama bachnanga ndoñe ntsebomnana, chë Cristo tojanóbana ora, ndayá tojanmentšana tojanóbocna tšabe soyënga. <sup>11</sup> Er chë judiëngbe más uámana bachnangbe amëndayá, chë tmojóba bayëngbe buiñe chë "más uámana ca" uabaina luaroye juabuyambana, Bëngbe Bëtsá entšangbe bacna soyëngama cháuperdonama, y chë bayëngbe cuerpënga jtsejuinÿiyana entšanga tmoyena luarentšana chaboca. <sup>12</sup> Cachcá, Jesúsnaca tojan-sufrí y tojanóbana bëts pueblentšana chaboca, chabe buiñe tojanábuashana ora jóbanëse, entšanga Bëngbe Bëtsábënga chamotsemnana, y chabe delante mo tšabëngcá chamotsemnana. <sup>13</sup> Chíyeca bënga šontsamna Jesúsbioye jobéconana, nda entšanga tmojtsanaboté y bëts pueblentšana chaboca tojanóbana. Cha mochjuasto, y ntšamo cha tojansufricá béngnaca mochjasúfria. <sup>14</sup> Er quem luarentše bënga ndoñe quemátsbomna canÿe bëts pueblo bëngbiama, nyets tempo chausomñe bëts pueblo, ndayá bënga tša mondboše y puerte mondobátmana bënga joyénanama chë celoca yochtsemna Bëngbe Bëtsabe bëts pueblentše. <sup>15</sup> Chíyeca, šontsamna sempre Bëngbe Bëtsábioye jtsatschuanayana, Jesucristbiajana. Bëngbe Bëtsá chca tmojtsadorana ora, jtsemnana mo chábioye jëtschuayama canÿe soye cuafjuatsëmboncá. Chcasna, jtsóyebuambnayëse cha mochtsadorana. <sup>16</sup> Sempre ntšamo tšabá yomncá šmochtsama, y chë šmobomncá inÿëngbiámncaca chaotsemna. Chca šmochtsama, er chca tcojama ora, Bëngbe Bëtsá oyejuayá jtsejuabnayana chca chabiama tcojama ca, y jtsinÿnana bënga Bëngbe Bëtsá imojtsatschuanama, ndayá cha tojamama.

<sup>17</sup> Sempre šmochtsama ntšamo chë tšëngaftanga osbuáchiyëngcá enefjuanëngbeñe amëndayënga tmojayancá, y siempre šmochtsiyena jtsamëse nÿe ntšamo chënga tmojtsebošcá. Chënga sempre tšëngaftangbioye jtsanÿenana, tšëngaftangbe tšabiama, ntšamo cmojánanÿenama Bëngbe Bëtsábioye jojuama yojtsamnama chënga jtsetatsëmbëse. Jtsayaunanëse, šmochjama chënga chëngbe trabajo oyejuayánaca y ndoñe ngmëncaca chamotsamama, er ndoñe chca šmonjamëse, chë trabajo tšëngaftangbe tšabiama ndoñe nántsemna.

<sup>18</sup> Bëngbe Bëtsá bëngbiama šmochtseimpadana, er bënga ainaniñe corente fsëndétatšëmbo tšabá tifjamama, y tša fsëntseboše jtsiyenana ntšamo tšabá yomncá lempe jtsamëse. <sup>19</sup> Tšëngaftanga bëtscá cbontsaimpadana, Bëngbe Bëtsá chašmoimpadama, atše chašolesenciama tšëngaftangaftaca cachiñe jtsatsmënama.

### Bëngbe Bëtsábioye chëngbiama jaimpádama y chënga jacheuayama

<sup>20</sup> Atše, Bëngbe Bëtsá sëntseimpadana, cha chë nda endbétsama bënga natjëmbana chamotsiyenama, y nda tojanma Bëngbe Utabná Jesús cháuatayenama, nda bënga šondánÿena mo oveshëngbe tšabe abua-jëñÿacá; y Bëngbe Bëtsá chca tojanma, Jesús, chabe

buiñe juabuáshanése tojanóbanayeca, chca, entšanga jinŷanŷiyama ndegombre bétsemnama ntšamo Bëngbe Bëtsá chabe entšangbiama tojanašebuachenacá nŷetsca tescama jamama.<sup>21</sup> Cha séntseimpadana chaoma tšëngaftanga chašmotsebomnama nŷetsca tšabe soyënga ntšamo cmojtsëjabotcá, chca, lempe ntšamo cha yobošcá tšëngaftanga chašmotsamama; y cha Jesucrístoftaca chaboma bëngaftaca ntšamo cha tšabá tbojtsinŷancá. ¡Nŷetscanga nŷetsca tescama Cristo chamotsatschuaná! Chca chaotsemna.

<sup>22</sup> Jesucrístbeyeca catšátanga, tšëngaftanga cbontsaimpadana, jábuayenama ntšamo tcbonjauyancá, puerte uantádoca tšabá chašmóyëngacñama, er nŷe

básefta palabrëngaca chama tcbonjubuábiamama.<sup>23</sup> Atše séntseboše tšëngaftanga chašmotsetátšëmbo, Timoteo Jesucrístbeyeca bëngbe catšata, ya ndoñe utamená yontsemnama, y cha betesco átšbioye chaotjabëse, átšeftaca chanjéftsbetše tšëngaftanga jánŷama chaijá ora.

<sup>24</sup> Tšëngaftanga ošbuachiyëngbeñe nŷetsca amëndayënga šmochjácheuaye, y nŷetsca Bëngbe Bëtsabe entšángnaca choca. Chë Italia luaroquënga osbuáchiyënga tšëngaftanga cmontsacheuaná.

<sup>25</sup> Atše, Bëngbe Bëtsá séntseimpadana, cha chaoma tšabe bendicionënga tšëngaftangbeñe chaotsemnama.

# Santiago

## Jacheuayama

**1** Atše Santiago, Bëngbe Bëtsá y Bëngbe Utabná Jesucristbe canye oservená, tsëngaftanga cbontsëbuabiamná, tsëngaftanga chë bnëtsana uta Israeloca bëts pamíllangbioye nyets luarëjana ujquëshenënga. Atše cbontsacheuaná.

## Chë Bëngbe Bëtsábiocana osertánana

**2** Jesucristbeyeca atšbe catšátanga, tsëngaftanga ndaye padecena soyënguiñe chašmojtseyena ora, chiñe šmochjájua boye mo chca tsëngaftangbe tsabiamma cuaftsemncá y šmochjóyejuaye; **3** er tsëngaftanga šmondétatsëmbo, chcañe chašmojtšajna ora, šmochtsetátšëmbo cach tsëngaftanga Jesucristbeñe puerte šmošbuaché o ndoñe. Chca ora bëts ošbuáchiyana chašmojtsebo mnëse, šmochanjobenaye, Bëngbe Bëtsábeñe jtsobátmanëse añémoca jtsemnana, masque padecena soyënguiñe chašmotsomñëse. **4** Pero chca chašmojtsemnëse, šmochtsentšena jashjáchama ntšamo canye entšá Bëngbe Bëtsabe soyëngama corente osertaná yomncá chašmotsemnana, ntšamo Bëngbe Bëtsá yobošcá chašmotsiyenama, chiñe ni mo canye soye jamama chacmondétsabuashebenëse.

**5** Nderado nda tsëngaftanguentsana ndoñe tontsobena corente osertánana jtsebo mnama, cha bontsemna Bëngbe Bëtsá jaimpádana cha chaoma aíñe chana jtsebo mnama, y Bëngbe Bëtsá chana bochanjátsetaye; er Bëngbe Bëtsá nyetscanga bëtscá endbëtsatšatnaye y ndocnábioye jatáboyënjana. **6** Pero cha bontsemna, Bëngbe Bëtsábeñe puerte jtsošbuáchiyëse chama cha jaimpádana, y cha nderado ndoñe bochanjóyeunayama ntjatatëmnancá. Nda mëntšá tojtsamëse, inye ora aíñe Bëngbe Bëtsábeñe cuaftsošbuachecá y inye ora ndoñe, cha entsemna mo canye olëshcá, mar béjayoca binýia nye cátatoye jtsambayana. **7** Chca ama entšá ndoñe chaondëtsejuabná, Bëngbe Utabná bentšana ndayánaca jatóyëngacñama. **8** Cha jtsemnana canye entšá, mora canye soye juabnayá, pero chentšana inyetšá jatójuabnañana. Chca, cha jtseyenana nyetsca soyëngama uta soye jtsejuabnayëse, y chca cha ndoñe ntso benana tondaye puerte tsabá jamama.

**9** Chë Jesucristbeñe ošbuachiyá, ndbomñëjema y ndoñe yapa uámana entšá tomná, corente oyejuayá chaotsemna, er Bëngbe Bëtsabe bominiñe cha canye uámana entšá jtsemnana; **10** y chë bomnánaca puerte oyejuayá chaotsemna, Bëngbe Bëtsá chábioye nduá-

mana entšá chabojábema ora, er mo chë shacuaniñe uantšefjushacá, cha ndoñe nyets tempo quem luar-entše ntjëtseyenana. **11** Shinýe tojábocna y becá tojójënýana ora, chë shácuana jtsebuashana, chë uantšefjúsha jtsátsatšana y chabe uabótamanana ya ndoñe más ntsebinýnana. Cachcá chë bomná, echanjó bana nye cachabiamma más becá crocénana onguayíñe chaotsemna ora.

## Bacna soye ocochënguentšana tsabá jabocnana

**12** Oyejuayá chaotsemna chë entšá chë padecena soyënguentšana tsabá tojëtšbocná, cabá Jesucristbeñe ošbuachiyá; chama Bëngbe Bëtsá chabiamma oyejuayá echántsemna y echanjama chë nyetsca tescama yomna tsabe vida cha chaotsebo mnama, mo uacananancá chabe ošbuáchiyama. Chë soye Bëngbe Bëtsá tojašebuachená nyetscanga cha imobobonshánëngbioye. **13** Nderado nda bacna soye jamama tbojócochëngo, ndoñe chaondëtsejuabná Bëngbe Bëtsá chca cháftaca yojtsama ca; er Bëngbe Bëtsá ndocna te bacna soye jamama jócochënguana, y cha ndoñe ntsamana inýenga bacna soye jamama chaócochënguama. **14** Inyetšá endmëna, canya bacna soye jamama jócochënguana, bacna juabnënga tojtsebo mnana ora; cha chiñe nye jésejuabnayana y chë soye jtsasjayana cha chca jamama. **15** Nda yapa bacna soyënga tojtseboše, cabana cha pronto chë bacna soye jamana; y nda sempre bacna soyënga tojtsama, chama Bëngbe Bëtsá nyetsca tescama bochanjacastíga.

**16** Atšbe bonshana catšátanga, ndoñe matenoíngñana, jtsejuabnayëse Bëngbe Bëtsá yojtsama tsëngaftanga bacna soyënga chašmotsamama ca. **17** Nyetsca tsabe soyënga y chë puerte tsabe soyënga tsbanánocana endobá, Bëngbe Bëtsá chë Taitábiocana. Y cha chë shinýe, juashconca, y nyetsca chë celoca yobuashinýinýana soyënga tojamá, nyets tempo nye cachá iuesomñe y ndoñe inya ntjätsmënana.

**18** Cachá jamama tojánbošenayeca, bënga chábenga šojánabiamma, bënga chabe ndegombre palabrënga jouenëse. Cha chca tojama, lempe ntšamo Bëngbe Bëtsá quem luarentše tojamentsana, bënga chë natšanënga chábenga chamotsemnana.

## Ntšamo ndegombre yomna Bëngbe Bëtsábioye tsabá jadórama

**19** Atšbe bonshana catšátanga, quem soyama šmochtsenójuabnaye: nyetsca tsëngaftanga cmontsamna sempre jtseprontánana jouenama; pero

jóyebuambayamna jobátmana y ínÿengaftaca jetnám-naca. <sup>20</sup> Inÿaftaca tbojetna ora, canÿe entšá ndoñe ntsamana ntšamo Bëngbe Bëtsá yobošcá, chë nÿetsca soyënguiñe tšabá jtsamana. <sup>21</sup> Chcasna, šmocht-sajbaná bacna soyënga jtsamëse oyenana, y amana nÿetsca soyënga ndoñe ntšamo Bëngbe Bëtsá yoman-dacá; y chë Bëngbe Bëtsá tojama tšëngaftangbe ainaniñe chaómashënguama buayenánana, nt-jatosoberbnaycá šmochjójëngacñe. Chë buayenánana chašmojóyeunase, echanjopódia tšëngaftanga atsebá-canënga jtsemnana.

<sup>22</sup> Ndoñe quecmátamna nÿe chë Bëngbe Bëtsabe buayenánana jouenana, ndayá ntšamo cha tojayancá aíñe jtsamana; ndoñe chca šmontsamëse, cach tšëngaftanga šmontsenoíngña. <sup>23</sup> Nda nÿe chë buayenánana tojouena, pero betso tbojtsebnatjëmbe y ndoñe tontsama ntšamo chíñe tojtsayancá, cha jtsemnana mo canÿe entšá chabe jubíá espejuiñe tojtsenonÿacá: <sup>24</sup> chana cachá jtsenonÿayana, pero chë espejo tojabuertaná ora, jtsebnatjëmbe ntšamo cha bétsemnana. <sup>25</sup> Pero nda ntšamo tojouencá ndoñe tbonjebnatjëmbe, y sempre tojtsejuabná chë entšanga játsebacama Bëngbe Bëtsabe puerte tšabe mando chabosertama, y tojtsiyena ntšamo chë mandënguentše endayancá, lempe ntšamo chë entšá chaojtsamiñe oyejuayá Bëngbe Bëtsá bochanjábema.

<sup>26</sup> Nderado nda tojtsejuabná Bëngbe Bëtsábioye ibo-jtsadorana ca y chë Bëngbe Bëtsábioye adorayá ntšamo ibomncá cha yojtsama ca, pero ndoñe tontsobena bacna soye oyebuambnayana jtsajbanana, cachá yojtsenoíngña, y nÿetsca soyënga ntšamo tojtsamcá Bëngbe Bëtsá jadórama, chabiamana tondaye ntsámanana. <sup>27</sup> Bëngbe Bëtsá chë Taitabe bominiñe, chë puerte tšabe y ndegombre soyënga, ndayá entšá ibojtsemna jamana endmëna: chë uajchonga y viudanga corente ngmënënga tmojtsemna ora jujabuáchana, y ndoñe bacna soyënga játamana, mo chë nÿe quem luarama enójuabnayënga mondbetsamcá.

### Nÿetscanga tšabá jtsatenonÿayëngana

**2** Tšëngaftanga, Jesucristbeyeca atšbe catšátanga, šmondošbuaché Bëngbe Utabná Jesucristo, chë puerte bëtsá y uamanábeñe; chíyeca tšëngaftanga cmontsamna nÿetsca entšanga cachcá jtsatenonÿayëngana. <sup>2-3</sup> Nderado tšëngaftanga cánÿentše šmojénefjna, y chora canÿe bomna entšá tojášhango castellano ntšabuchétjonëfjangaca y uámana entšayéjuangaca bopormaná, cha botamana šmojúmashëngo y mëntšá šmojauyana: “Moca quëfseroca mabesótbema ca”. Pero cachca ora, canÿe nd-bomnëjema tojášhango uandocuenta entšayá uichëtjoná, y cha šmojauyana: “Acna choca tsanana cochtsemna o chafjoca mótbema ca”. <sup>4</sup> Chca tšëngaftanga ya šmontsama cach tšëngaftanguentše báseftanga más uámanënga ínÿengbiama chamotsemnana, y chca šmojtsama, ana bacna juabnënga šmojtsebomna causa.

<sup>5</sup> Atšbe bonshana catšátanga, quem soye š-mochjouena: Bëngbe Bëtsá quem luarentše ndbomnënga imomnënga tojabacacá, chënga canÿe puerte uámana soye chamotsebomnana, Jesucristbeñe puerte chamotsošbuáchema; y mo otocana soycá Bëngbe Bëtsabe amëndayama chamosháchiñama. Cha imobobonshánëngbioye chë soye jatšatayama tojajëbuachená; <sup>6</sup> pero tšëngaftanga chë cuenta, mo ndoñe cach tšëngaftangcá entšanga bendmëncá chëngbioye jtsënyayana. Ndegombre, chë bomnënga mondmëna chë nÿe sempre cmondbëtsamëndayënga y chë sjojonana chë pueblentša mandadëngbioye cmondbáunatsënga. <sup>7</sup> Y cach bomnëngnaca mondmëna chë Cristbiamana podësca oyebuambnayënga, ndábenga tšëngaftanga šmondmëna, y chabe uabaina tšëngaftangbiama puerte enduámana.

<sup>8</sup> Bëngbe Bëtsabe uabemana palabrenguiñe mëntšá endayana: “Ndëmua entšánaca cochtsebobonshana ntšamo cach aca cuenobobonshancá ca.” Tšëngaftanga ntšamo chë Bëngbe Utabnabe mandíñe endayancá ndegombre šmojtsamëse, tšabá šmochántsama.

<sup>9</sup> Pero tšëngaftanga ndoñe cachcá šmontsenonÿase, chcana bacna soye jtsamana y šmojama ntšamo Bëngbe Bëtsabe leyënguiñe ndoñe yondëlesenciancá. <sup>10</sup> Y mora, canÿe entšá nÿetsca chë leyentša mandënga tojtsobedecena, pero ndoñe tontsama ntšamo nÿe mo canÿe mando ntšamo iuayancá, cha Bëngbe Bëtsabiamana jtsemnana canÿa ntšamo nÿetsca chë leyentša mandënguiñe ndoñe yondëlesenciancá amá. <sup>11</sup> Cach Bëngbe Bëtsá, chë “acbe shema o boyábioye ínÿaftaca ndoñe cattseíngñaye ca” tojanayaná, cachá mëntšánaca tojánayana, “ínÿabioye ndoñe catjóba ca”. Chca, nda cachabe shëmbioye ínÿaftaca ndoñe tbonjaingñé, pero aíñe ínÿabioye tbojóba, chca, Bëngbe Bëtsabiamana cha jtsemnana canÿa nÿetsca chë leyentša mandënga ndocumpliná.

<sup>12</sup> Tšëngaftanga cmontsamna jtsóyebuambnayana y jtsamana ndayá Cristo šojanamëndacá, atsebacana entšangcá, er Bëngbe Bëtsá echanjayana ntšamo tmojamcá aíñe o ndoñe tšabá bétsemnana. <sup>13</sup> Er chë ínÿengbiama ndoñe ngmënana bomnëngbiama, Bëngbe Bëtsá ntjongmiacá echanjayana ntšamo tmojamcá aíñe o ndoñe tšabá bétsemnana; pero chë ínÿengbiama aíñe ngmënana bomnëngbiama, ntšamo tmojamcá aíñe o ndoñe tšabá bétsemnana Bëngbe Bëtsá chaojayana ora, chënga tšabá chentšana mochanjábocana.

### Chë ndegombre ošbuáchiyana, soyëngaca jinÿanÿiyana

<sup>14</sup> Atšbe catšátanga, ¿ndayama cánÿabioye buanjosérvia jayanana aíñe Jesucristbeñe sëntsošbuaché ca, pero cha ínÿengbiama tšabe soyënga ndoñe tontsama, y chca, ntšamo cha tojtsamcá ndoñe tontsinÿanÿná cha Jesucristbeñe yošbuáchema? Ndegombre, cha nÿe chca tojtsichámëse, ndoñe ntsopodë-nana cha atsbočaná chaotsemnana. <sup>15</sup> Nderado canÿe boyabása o shembása ošbuachiyá entšayá tbo-

jtsabuáshbena y saná chë te jasámnaca tbojtsebuáshbena, <sup>16</sup> y canya tšëngaftanguentšá tbojauyana: “Diošoftá, sësnama ndoñe chacondétsepapadecena y becá chacuatoshachá ca”, pero chca chaotsemnama chábioye tondaye tbonjatšetase, ¿ndayama nantsoserverena chca jayanana? <sup>17</sup> Cachcá, nda tojayana Jesucristbeñe yošbuaché ca, pero ndocna tšabe soyënga tontsama, chë ošbuáchiyana bomnama jinñanñiyama, nñe chca ošbuáchiyana jtsebomnana tondayama ntsoservénana.

<sup>18</sup> Pero nderado ndánaca mëntšá echanjayana: “Aca Jesucristbeñe icošbuaché, pero atšna inñengbiama tšabe soyënga séntsama ca.” Chora atše stjojuá: “Šminñinñyé ntšamo canya nantsobena Jesucristbeñe jtsošbuáchiyana, chca chaotsinñyama tondaye ntsamcá, y chora, ndayá tijamama atšbe ošbuáchiyana cbochjinñinñiyeye ca.” <sup>19</sup> Aca condošbuaché nñe canye Bëngbe Bëtsá yomnama y chca tšabá contsama; pero chë bacna bayëjéngnaca chiñe jtsošbuáchiyana, y chë causa chënga uatjana jtsebomnana y jtsangmëm-nayana. <sup>20</sup> Ndoñe obëjema cattsemna; ndegombre cbochanjinñinñiyeye nderado nda Jesucristbeñe tojtsošbuaché, pero tondaye tontsama chca chaotsinñyama, chabe ošbuáchiyana tondayama ntsoservénana. <sup>21</sup> Bëngbe Bëtsá tojánayana chabe bominiñiñe Abraham, bëngbe tempsca bëts taitá, tšabia yojamna ca; chca tojánayana, er Bëngbe Bëtsá tbojanmandá ora, yojtseprontana chabe uaquiñá altariñe jóbama, cach Bëngbe Bëtsábioye jëtschuayama. <sup>22</sup> Aca contsobena Abrahámbeñe jinñyama, cha Bëngbe Bëtsábeñe yojanošbuáchema, y soyënga yojánama chca chaotsinñyama; y ndayá cha tojanmama entsinñinñyena, cha ndegombre puerte bëtscá yojanošbuáchema. <sup>23</sup> Chca tojanopasá ntšamo Bëngbe Bëtsabe uabemana palabrënguñe endayancá, mëntšá: “Abraham Bëngbe Bëtsábeñe yojtsošbuáchiye, y chama Bëngbe Bëtsá tojánayana chabe bominiñiñe cha tšabia yojamna ca.” Y Abraham entsanabaina Bëngbe Bëtsabe amigo ca.

<sup>24</sup> Y tšëngaftanga šmontsetátšëmbo, Bëngbe Bëtsá ináyana canye entšá chabe bominiñiñe tšabia yomna ca, chë entšá ndayá tojtsamama, chabe ošbuáchiyana chaotsinñyama, y ndoñe nñe ošbuáchiyana tojtsebomnana. <sup>25</sup> Cachcá tojanopasá Rahab, chë bacna vida bomna shembásaftaca; Bëngbe Bëtsá tojánayana chabe bominiñiñe cha tšabia yojamna ca, er cha canye tšabe soye tojanma. Cha chë noticia uambaye judiënga posada tojanéyentšame, y chentšana tojanëjabuache inñe benachëjana chamuáisebocanama, chë pueblentša soldadëngbiama chamotsachetama.

<sup>26</sup> Lempe básefta palabrënguñe jayanamna mëntšá entsemna: ntšamo canye cuerpo, espíritu ndbomna cuerpo, pronto jóbana, cachcá chë ošbuáchiyana, ndocna soyëngaca tontsemna, chca chaotsinñyama, tondayama ntsoservénana.

**Bichtájaca tšabá jóyebuambayama endmëna**

**3** Jesucristbeyeca atšbe catsátanga, ndoñe yapa buátëmbayënga tšëngaftangbeñe chamondët-

semna; er tšëngaftanga ya šmondétatšëmbo, bënga, chë entšanga abuátambayëngbiama, chë castigo más bëtscá yochtsemnama, Bëngbe Bëtsá ndoñe tmonjóyeunase, ntšamo entšanga tmojamama aiñe o ndoñe tšabá bëtsemnama cha chaojayana ora. <sup>2</sup> Bënga nñetscanga nñetsca bacna soyënga mondbëtsama. Nderado nda oyebuambnayañe ni mo canye bacna soye tonjama, chë entšá puerte tšabia jtsemnana, ntšamo Bëngbe Bëtsá yobošcá jtsiyenëse, y cha yojtsobena cachá sempre jtsemándayama.

<sup>3</sup> Chë couayëngbiyeye freno tmojuayashbé ora, ntšamo bënga tmojtsebošcá chënga mochántsama, y bënga cachora jtsobenana ntšamo nñets chëngbe cuérpoca tmojtsamcá jtsemándayana, y ndoñe nñe chëngbe bestšaše. <sup>4</sup> Barquëshamnaca š-mochjenójuaboye. Masque tša bëtsëtsacuemëngá y tša jabuache binñiënga chë barco jtsëjuatsëntšayana, chë uamanëjayënga chë barco juyambana ndayëjana tmojtsebošcá, y chca, nñe canye base soyetëmaca, timón ca uabainëtëmaca. <sup>5</sup> Cachcá, chë bichtaja cuerpiñe canye base soyetëma endmëna, pero chë bichtájaca entšanga jtšenábotamnyana bëts soyënga tmojamama. Šmochjouena, canye base iñeshe jtsobenana canye bëts tjañe juangbotjuama. <sup>6</sup> Y chë bichtaja endmëna mo canye iñeshcá, mo canye luare ndayentše puerte bacna soyënga tobinñncá. Chë bichtaja jtsobenana bëngbe cuerpentše puerte bacna soyënga bëngbiama jamama. Mo canye iñeshe becá tojtsebdibamnacá, chë bichtájaca tcojtsichamo ndoñe tšabe soye, jtsobenana bacna soyënga bëngbiama jamama nñets tempo quem luarentšë tmuetsiyenëntscuana; y mo nda ndayá tojtsangbotjuacá, Satanás jtsobenana chë bichtaja jtsemándayana, bacna soyënga chaot-samama.

<sup>7</sup> Entšá endobena jtsamëndayana nñetsca tjoica bayënga, shloftšënga, osjojnayënga y buyeshiñe oye-na bayënga; y ndegombre mora entsamënda; <sup>8</sup> pero ndocná tonjobená chë bichtaja jtsemándayana, chca, bacna soyënga amana chaotsajbanama. Chë bichtaja jtsamana bëtscá bacna soyënga cada te chauëtsebinñyama, y mo canye mëtscuaycá veneno jtsebomnana jóbama, chë bichtájaca cachcá endmëna. <sup>9</sup> Bichtájaca bënga puerte tšabá Bëngbe Bëtsá y Taitabiama jt-sichámuana, y cach bichtájaca bënga puerte bacá entšangbiama mondbëtsichamo, masque Bëngbe Bëtsá cachacá enoparecëngë chënga tojábiamama. <sup>10</sup> Cach uayášentšana jtsóbocanana Bëngbe Bëtsabiama tšabe palabrënga y entšangbiama bacna palabrënga. Jesucristbeyeca atšbe catsátanga, chca ndoñe chaondëtsemna. <sup>11</sup> Canye bëjaye obocanentšana ndoñe ntšopodénana tšabe búyeshe chaóbocnana y cachentšana untja búyeshnaca. <sup>12</sup> Ntšamo canye higo betiyentšana ndoñe ntšopodénana olivosëšënga jashacama, y canye uvas betiyentšana ndoñe ntšopodénana higuëbenga jashacama, cachcá, atšbe catsátanga, tamona búyeshentšana ndoñe ntšopodénana tšabe búyeshe chaóbocnana.

### Bëngbe Bëtsábiocana óbocana osertánana

<sup>13</sup> Nderado tsëngaftanguentše tojtsemna canye puerte tatsëmbuá y osertaná, cha bontsemna, chca yomnama entsanga jinyaníyana, tsabe soyënga amana jtsiyenëse y chë ntjatosoberbnaycá tojama soyëngaca; y cha chca jamana, puerte osertaná bëtsemnama. <sup>14</sup> Pero tsëngaftangbe ainaniñe yapa ínÿabioye šmojtšántšaboše y nye ínÿenga chamotjáyanama soyënga šmojtsama, as ndoñe šmattsenábotamnaye osertánënga y tsábënga šmomnama, er ndegombre Bëngbe Bëtsabe osertánana tsëngaftanga ndoñe šmontsebmoma. <sup>15</sup> Er chca osertánana, Bëngbe Bëtsábiocana ndoñe ntsóbocanana, ndayá nye quem luarama enójuabnayëngbentsana, nye entsangbe juabnentsana, y canye bacna bayéjbentsana. <sup>16</sup> Ndayentše entsanga yapa tmojtšenántšaboše, y nye ínÿenga chamotjáyanama soyënga tmojtsama, chentše tondayama quemochátenëyuanana y nyetsca bacna soyënga mochántsama.

<sup>17</sup> Pero chë Bëngbe Bëtsábiocana óbocana osertánana bomnënga, nyetsca soyamna, natsana puerte tsabe vídaca jtsiyenana, bacna soyëngaca ndëmandánënga; y chënga jtsemnana chë ínÿenga ndoñe chamondétsentsjanama amënga, tsábënga y sempre jtseprontánana ínÿenga joyaunayama. Y cach quemënga jtsemnana ínÿengbiama ngménana bomnënga, sempre tsabe soyënga jtsamana, cachcá nyetsca entsángbioye jtsénÿayana, y ntšamo ndegombre tojtsemncá jtsichámuana y jtsamana. <sup>18</sup> Ntšamo canye jená, botamana shajuana jtsebmoma tsabe jénaye jájena, cachcá, sempre natjémbana jtsiyenama bošëngna, natjémbana ínÿengaftaca jtsiyenana, chca, nyetsca entsanga chamotsamama ntšamo Bëngbe Bëtsabe bominiñe tsábá yomncá.

### Šmochtsiyena Bëngbe Bëtsá tsëngaftangbeñe jtsemándayëse

**4** ¿Ndayentsana chë tsëngaftanga jtsentsjanayama y jtsenpenzëntsiayama yóbocana? Endóbocana chë tsëngaftangbe bacna juabnënguentsana, nye cach tsëngaftanga tsábá jtsomñama; y chë soyënga tsëngaftangbe ainaniñe sempre chë tsabe juabnëngama contra jésemnana. <sup>2</sup> Tsëngaftanga ndayánaca jtsebmoma šmojtseboše, pero chca jtsebmoma ndoñe šmontsobena, as jtseprontánana ínÿengbioye jtsëbáyama. Inÿa ntšamo tobomncá tsëngaftanga tša jtsántšabošana, y chë soye jashjáchama ndoñe šmontsobena ora, ínÿengaftaca jentjáyanangana y jtsenpenzëntsiayana. Ntšamo šmojtsebošcá ndoñe ntjobenayana jtsebmoma, Bëngbe Bëtsá chama ndoñe šmondbotjañe causa; <sup>3</sup> y chë soye šmojtjañe ora, tsëngaftanga ndoñe ntjójyëngacñana, ndoñe botamana chë soye šmondbotjañe causa, er tsëngaftanga chë soye jtsebošana nye chaoservema oyejuayënga bacna soyënguifne jtsomñama.

<sup>4</sup> ¡Tsëngaftanga, Bëngbe Bëtsá bobonshánana šmojt-sajbananga! ¿Ndoñe šmondétatsëmbo, chë jtsebošana nye quem luarama enójuabnayëngbe amigo jtsemnama y nye quem luarentša soyënga jtsebmoma, chca, canye entsá Bëngbe Bëtsabe uayayá jtsemnana? Ndánaca tojajuabó nye quem luarama enójuabnayëngbe amigo jtsemnama, chca, canye Bëngbe Bëtsábioye uayayá jóbemana. <sup>5</sup> Ndoñe nye bonamente Bëngbe Bëtsabe uabemana palabrenguifne mëntšá endayana: “Chë Bëngbe Bëtsá tbojanichmó bëngbe ainaniñe chaotsiyenama Uámana Espiritu, puerte entseboše nye Bëngbe Bëtsá canya bëngbe amëndayá chaotsemnama ca.” <sup>6</sup> Pero Bëngbe Bëtsá, bëngbe tsabiama jtsejuabnayëse bënga jtsëjabuáchanana, chíyeca Bëngbe Bëtsabe uabemana palabrenguifne mëntšá endayana:

Bëngbe Bëtsá chë nye cachënga uámanënga tmojt-senobiamnangbe contra entsemna, y chë ndoñe uámanënga montsenobiamnangbiama, Bëngbe Bëtsá más tsabe juabna entsebmoma ca.

<sup>7</sup> Asna, tsëngaftanga šmochtseprontana nye Bëngbe Bëtsá chacmotsamëndama; ntšamo Satanás tcmojt-samëndacá ndoñe šmattsama, y cha cachora tsëngaftangbentsana echantsachá. <sup>8</sup> Bëngbe Bëtsábioye šmochtoconá, y cha echanjama tsëngaftanga ntšamo cha yomnama chacmotsësertánama. Tsëngaftanga bacna soye amënga, cach tsëngaftangbe cucuatšëngaca tsabe soyënga šmochtsama, bacna soyënga ndoñe. Tsëngaftanga chë inÿe ora jtsejuabnayana Bëngbe Bëtsá jtsebobonshánama, y inÿe orna, nye quem luarentša soyënga jtsebmoma, šmochtsajbaná bacna soyënga jamama bošana, chca, nye tsabe juabnënga tsëngaftangbe ainaniñe chašmotsebmoma. <sup>9</sup> Tsëngaftangbe bacna soyëngama ngménaca šmochtsemna, šmochjenóbošachna y cochtsetšenánënga šmochjójyebuambaye. Jatenbiajuayamna, šmochjenóbošachna; y joyejuayëngamna, ngménaca šmochtsemna. <sup>10</sup> Bëngbe Bëtsabe delante bëtsétsanga ndoñe šmattsenobiamnaye, y cha más uámanënga cmochanjábiamna.

### Inÿengbiama ndoñe ntsichámuana ndoñe tsábá tmonjama ca

<sup>11</sup> Jesucristbeyeca catsátanga, ínÿengbiama bacna soyënga ndoñe šmattsóyebuambaye. Nda cachabe catsatbiama bacna soye tojtsichamo o tojayana ntšamo cha tojamcá ndoñe tsábá yontsemna ca, cha chora chë leyentša mandënga ndoñe ntsocumplínana y jtsichámuana chë leyentša mandënga tondayama yontsoservenana ca. Y chë leyama chca tcojtsichámëse, cach ley jocúmplia cuenta, contsobiamná canye ichamuá chë ley aíñe o ndoñe yondoservénama, y chca ndoñe quecmátsmëna jtsamana. <sup>12</sup> Chë ley tojuapormá cha nye canya endmëna, Bëngbe Bëtsá, y cachá endmëna ntšamo entsanga tmojamcá aíñe o ndoñe tsábá bëtsemnama ichamuá, y cachánaca entsobena entsanga játsebacama o nyetsca tescama

jácastigama. Y acna, ¿ndase cmëna ndëmua entšabiámnaca jobenayama jatichámuama ntšamo tojamcá aíñe o ndoñe tšabá bétsemnama?

**Ndayá yëfse yochjatëchnënguama ndoñe ntsótatšëmbuana**

<sup>13</sup> Y mora quem soye šmochjouena, tšëngaftanga chë šmondbétsichamo: “Mënté o yëfse quemoye o chë inye bëts puebloye fchanjanga, y chentše canye uata fchanjéftsemna ba soyënguñe trabájayíñe, y ndegombre becá fchanjónyena ca.” <sup>14</sup> ¡Pero ni mo ndayá yëfse tšëngaftangaftaca yochjochnënguama ndoñe quešmátstatšëmbo! Tšëngaftanga ndoñe quešmátstatšëmbo ndayëntscuana vida šmochjéftsebmna, y chca, tšëngaftanga šmondmëna mo canye jantšetëshcá, chëshe mora jónynana y nye ndeolpe jatenatjëmbana. Tšëngaftangaftaca cachcá echanjopása. <sup>15</sup> Tšëngaftanga mëntšá cmontsamna jayanama: “Bëngbe Bëtsá quešojalesenciase, ainënga fchántsemna y quem soye o chë soye fchanjama ca.” <sup>16</sup> Pero chë cuenta, tšëngaftanga bëts soyënga šmochjamama sempre jtsenábotamnyana, ndayá tšëngaftanga chašmomama Bëngbe Bëtsá yochjalesenciaca ntsetatšëmbcá; y chca jtsamana ndoñe tšabá quenátsmëna. <sup>17</sup> Nda tojtsoyena ntšamo tšabá yomncá jamama, pero ndoñe chca tonjama, cha canye bacna soye jtsamana.

**Chë bomnënga jábuayenama**

**5** ¡Quem soye šmochjouena, tšëngaftanga chë bomnënga! ¡Chë tšëngaftanga šmochtsesufrínama šmochjenóbošachna y uatjananënga šmochtseyoye! <sup>2</sup> Tšëngaftangbe bomnana buajónana janguánana entsemna, tondayama quenátoserverna, y chë entšayëjuangá mejëjonga montsasá. <sup>3</sup> Tšëngaftangbe castellano y midio tojtsegušheshe; y chë ngúsheshna echántsinýinýnaye tšëngaftanga chë crocenánaca ndoñe šmonjanmama ntšamo ínýenga jujabuáchama yojamncá; chë causa, nyetsca tescama cmochántsapochocaye, ntšamo chë íñeshe canye soye endbetsepochocacá. Tšëngaftanga quem tempo bomnana šmojtsejuabá, y mora quem luare jopochócama ya entsobeco. <sup>4</sup> Tšëngaftanga chë tšëngaftangbe fshantsënguñe tmojtsetrabajanga ndoñe šmontanëbuénaye, y mora šmochjouena, chënga chama cmontsachembuanama. Bëngbe Utabná nyets obenana bomná, chë trabajayëngbe chembuanana ya tojouena. <sup>5</sup> Quem luarentše tšëngaftanga šmondoyena ba botamana soyëngaca y nye ntšamo cach tšëngaftanga šmobošcá jtsamëse. Ntšamo canye uacná jóbana, minýicá tojtsemna ora, cachcá tšëngaftangbiama entsobeco chë te, ndaye ora Bëngbe Bëtsá echanjama castigánënga chašmotsemnama, er puerte bacna soyënga šmojama. ¡Chë castigo jtsébínynama tempo ya entsobeco! <sup>6</sup> Tšëngaftanga, chë puerte tšabá amëngbiama šmojayana jóbana yojtsamna ca y š-

mojtšëbaye, chca ndoñe chaondëtsemnama chënga ndocá jamama ntsobencá.

**Chë uantado jtsemnana y chë Bëngbe Bëtsáftaca jencuëntama ora**

<sup>7</sup> Pero tšëngaftanga, catšátanga, uantádoca šmochjobátma Bëngbe Utabná yochjésabo orscama. Chë jajañe trabajayá tojtsoyátmana bëtscá tšabe shaJuanënga jobuátbanama, jtsotocánana natsana uantádoca jobátmana chë jajañama uaftena tempo chaóshjanguama. <sup>8</sup> Tšëngaftangnaca uantadënga šmochtssemna, y tšëngaftangbe ainaniñe añemo chaotsemna, er Bëngbe Utabná mëntescana ndoñe bën y moye echanjésabo.

<sup>9</sup> Jesucristbeyeca catšátanga, ntšamo ínýenga tmojt-samama ndoñe nye šmattsoquejana, Bëngbe Bëtsá tšëngaftangbiama ndoñe chaodayanama, ntšamo šmojóyebuambama ndoñe tšabá šmonjama ca. Y nda yochjayana ntšamo entšanga tmojamcá aíñe o ndoñe tšabá bétsemnama, ya entsebecóna. <sup>10</sup> Atšbe catšátanga, chë tempsquënga Bëngbe Bëtsabe juabna oye-buambnyënga, ndëmuanyënga entšanga tmonjanabuayená Bëngbe Utabná jótšëmbonëse, chënga bëngbiyoe šonjéftsaninýanýiye ntšamo tmojan-sufrima, ntšamo šojtsamna uantadënga jtsemnana tmojtseufrina ora; y chca tšëngaftanga cmontsamna jtsamana. <sup>11</sup> Bënga chëngbiama fsëndbétsejuabnaye oyejuayënga imojamna ca, chë tmojansufrí ora Bëngbe Bëtsábeñe imojanobátmana ainaniñe añemo jtsebomnëse. Tšëngaftanga šmojouena ntšamo Job ainaniñe añémoca Bëngbe Bëtsábeñe yojanobátmana, puerte padecena soyënguñe yojasufrina ora; y šmondétatšëmbo ntšamo Bëngbe Bëtsá cabana chábioye tbojancuedama, y chca yojamna Bëngbe Utabná entšangbiama puerte ngmená yómnyeca.

<sup>12</sup> Pero masna, atšbe catšátanga, ndayá jamama chašmojašbuachená ora, chca ndoñe šmatjama jajúrase ni celocama, ni quem luarama, ni ndocna inye soyama. Tšëngaftanga aíñe ca jayanama šmojtsebošëse, nye aíñe ca šmochjayana, y ndoñe casna nye ndoñe; chca, Bëngbe Bëtsá ndoñe chaodayana ndoñe tšabá šmonjama ca júraye causa.

<sup>13</sup> Nderado nda tšëngaftanguentšá puerte ngménaca tojtsemna, cha bontsemna Bëngbe Bëtsá chama jaimpádama. Y nderado nda oyejuayá tojtsemna, cha bontsemna jacántana Bëngbe Bëtsá jëtschuayama.

<sup>14</sup> Nderado nda šocá tojtsemna, cha bontsemna chentša ošbuachiyëngcá enefjuanëngbeñe bëtsëjemëngcá amëndayënga jáchembuana, chënga Bëngbe Bëtsá chabiama chamoimpadama, y Bëngbe Utabná jótšëmbonëse aceitiye chamuanëtjuama. <sup>15</sup> Y tšëngaftanga, puerte jtsošbuachiyëse Bëngbe Bëtsá chašmojaimpadá ora, chë šocá salud echántinýena, y Bëngbe Utabná echanjama cha tšabá cachiñe chaot-satsmënama; y nderado cha bacna soyënga tojamëse, Bëngbe Bëtsá bochantseperdóna. <sup>16</sup> Chíyecna, chë bacna soyënga šmojt-samama šmochjobuambaye, y Bëngbe Bëtsá nyetscangbiama šmochtseimpadana,



chca, tšabá mo shnanëngcá chašmotsemnama. Canya ndabiamá Bëngbe Bëtsá tojayana chabe bominyiñe tšabia yomna ca, cháftaca tbojencuentá ora, chánaca ba tšabe soyënga jóyëngacñana, y jobenayana bëts soyënga jamama. <sup>17</sup> Bëngbe Bëtsabe juabna oye-buambnayá Elías, mo cach bëngcá canye entšá inama, y puerte jtsošbuáchiyëse ndoñe chaonduaftema Bëngbe Bëtsábioye tbojanimpadá ora, quem luariñe mo unga uata y tséntsane ndoñe tonjanafté.

<sup>18</sup> Chentšana, Bëngbe Bëtsábioye cachiñe tbojtanim-

padá ora, quem luariñe tojanafté y cachiñe chë jajañe-nache bëtscá saná yojsatsbinýna.

<sup>19</sup> Atšbe catšátanga, nderado nda tšëngaftanguentšá tojtsajbaná chë ndegombre soyënga jtsamana, pero inya chábioye tbojuájabuache cachiñe chë tšabe benache cháuatishachama, <sup>20</sup> tšëngaftanga šmochtsetát-šëmbo, ndánaca chë bacna soye amábioye tbojuájabuache chabe ndoñe tšabe videntšana cháuissebocnama, cha chë nyetsca tescama castigüentšana chábioye jatsbocana, y jamana ba bacna soyëngama cha perdonaná chaotsemnama.

# 1 San Pedro

## Jacheuayama

**1** Atše Pedro, Jesucristbe ichmoná, quem ts-buanácha sentsabiamná chë cachëngbe luarentše ndoñe mondoyenëngbiama, chë Ponto, Galacia, Capadocia, Asia y Bitinia luarënguenache ujquëshenënga imoyenëngbiama. <sup>2</sup> Sentsabiamná chë Bëngbe Bëtsá Bëngbe Taitá tojánabacacangbiama, ntšamo cachá jamama yojanjuabnacá y ntšamo jopásama yojantatšëmbcá, cabá chca ndochnëngo ora; Uámana Espíritbeyeca, Bëngbe Bëtsá tojama tšëngaftanga chabe entšanga chašmotsemnama, Jesucristo chašmotseye-unanama y Bëngbe Bëtsabe delante tšabá chašmot-satsmënama, bacna soyënga abujuanënga. Y Bëngbe Bëtsá chca tojanma, Jesucristbe buiñe juabuáshanëse, cha tojanóbanayeca. Atše bëtscá séntseimpadana Bëngbe Bëtsá, chaoma tšabe bendicionënga tšëngaftangbeñe chaotsemnama, y chaoma tšëngaftangbe ainaniñe tšabe ebionana chašmotsebmoma.

### Bëngbe Bëtsábeñe jtsošbuáchiyëse vida jtsebmomana, atsebácanënga jtsemnama

<sup>3</sup> Bëngbe Bëtsá y Bëngbe Utabná Jesucristbe Taitábioye matschuanga; cha puerte lastemado ínëngaftaca yómnyeyeca, tojanma bënga tsëm juábnaca vida chamotsebmomana, bëngbioye bacna soyënga jabujuanëse, Jesucristo cháuatayenama tonjánmayeca. Chiyeca bënga montsobena chábeñe jtsobátmanana sempre y nyetsca tescama, ndayá cha šochjátšatayama. <sup>4</sup> Ndayá bënga šochjátšataycá ndoñe quenátsmëna jëftso pochócama opodena soyënga, ndayá nyets tempo tšabe soyënga. Y bënga mondobátmana jýëngacñama ndayá Bëngbe Bëtsá chabe entšanga jatšatayama tojašebuachenacá, ndayá celoca bëngbiama cha yojtsinýena. <sup>5</sup> Chë soyënga tšëngaftangbiama entsemna, Bëngbe Bëtsábeñe šmošbuáchemá; cha chabe obenánaca cmondánýena, tšëngaftanga jätsebacama. Cha chca jamama ya tojaprontá y echanjínýanýiye, Cristo jésabama tempo chaojóshjango ora.

<sup>6</sup> Chiyeca tšëngaftanga tša oyejuayënga šmojtsemna, masque nderado jtseytana inýe ora, nyetsca padeceña soyënguiñe jasúfriase chašmuachnënguama.

<sup>7</sup> Mo chë castellanama jtsetatšëmbuama aíñe o ndoñe tšabe castellano tomnama iñiñe fjuchnëngcá, padeceña soyënguiñe tšabá chašmojachnënguse, Bëngbe Bëtsá echanjínýanýiye tšëngaftanga ndegombre taiš-

mošbuáchemá. Chë castellano pronto endbet-sopochóca, masque chca, chana puerte endbetsámana. Y tšëngaftangbe ošbuáchiyana chë castellanama puerte más enduámana. Tšëngaftanga padeceña soyënguentšana bëtš ošbuachiyánaca chašmojáboc-nëse, Jesucristo chaojésabo ora, entšanga mochanjinýe tšëngaftanga šmojtsomereceña chacmotsat-acheuanama, más bëtšétsanga y obenënga chácmabi-amama y uámanëngnaca.

<sup>8</sup> Tšëngaftanga Jesucristo šmondobonshana, y chábioye ndoñe chešmataninýe; masque mora cha ndoñe quešmatonýá, tšëngaftanga chábeñe šmontsošbuaché, y šmontsebmoma canýe puerte tšabe oyejuayana, y ntsachetšá chana yomnana ndoñe quešmatobena jayanama, tša bëtscá causa. <sup>9</sup> Chca oyejuayana tšëngaftanga šmontsebmoma, er ndayá tšëngaftanga jtsošbuáchiyëse šmobatmancá, ya šmojtsosháchichana, chë Bëngbe Bëtsá tšëngaftanga jtsatsebacayana.

<sup>10</sup> Bëngbe Bëtsabe juabna oyebuambnyënga ya imojanatsjendá y imojanguá jtsetatšëmbuama, ntšamo Bëngbe Bëtsá entšanga jätsebacama, y tmojanoyebuambá ndayá Bëngbe Bëtsá tšëngaftanga jatšatayama, tšëngaftangbiama tšabe juabna cha yobómnayeca. <sup>11</sup> Chëngbe ainaniñe yojtsemna Cristbe espíritu, y ntšamo tojanëyancá, cabá chca ndochnëngo ora, yojamna Cristo jasúfriama y ntšamo chentšana Bëngbe Bëtsá chábioye puerte bëtšá bochjábemama, Bëngbe Bëtsabe juabna oyebuambnyënga imojanjuabná y imojanatsjendá jtsetatšëmbuama chë soyënga yochjanopása ora, ndaye tempo y ntšamo chë tempo yochtsemnama. <sup>12</sup> Pero tempo Bëngbe Bëtsá chëngbioye tojaninýanýé, chca jtsamana ndoñe cachëngbe tšabiama yonjamnama, ndayá chca jtsamana yojamna tšëngaftangbe tšabiama. Chënga tmojanoyebuambá, ntšamo chë tšabe noticiënga oyebuambnyënga tšëngaftanga tcmojauyancá. Y chca tcmojáuyana chë Uámana Espíritbe obenánaca, nda Bëngbe Bëtsá celocana tbojichmó. Chë soyënga endmëna ndayá chë angelënga muantseboše tšabá jinýama, chënga chaósertama.

### Bëngbe Bëtsá entšanga jtsachembuanana chabe entšangcá chamotsiyenama

<sup>13</sup> Chiyeca, botamana jtsejuabnyëse tšabá jatrabájama, y cach tšëngaftanga jenomándama jtsobenëse, yejuana šmochtsobátmana, Bëngbe Bëtsá soyënga cmochjátšatayama tšëngaftangbe tšabiama jtsejuab-

nayëse, Jesucristo quem luaroye yochjésabo ora.  
<sup>14</sup> Tšëngaftanga Bëngbe Bëtsabe básenga uauenanënga quetsomñecá, ndoñe šmattsiyena ntšamo cach tšëngaftangbe bacna juabnënga yomncá nÿe tšabá jt-somñama, ntšamo Bëngbe Bëtsábioye cabá nduabu-atma ora šmonjanbomncá. <sup>15</sup> Chamna, šmochtsiyena mo chë Bëngbe Bëtsabe entšangcá, puerte tšabe entšangcá jtsamëse, er Bëngbe Bëtsá, nda tcmo-jáchembo chca chašmotsemnama, sempre uamaná endmëna. <sup>16</sup> Er Bëngbe Bëtsabe uabemana palabrënguïñe mëntšá endayana: “Tšëngaftanga Bëngbe Bëtsábeñe uámanënga šmochtsemna, er atše uamaná sëndmëna ca.”

<sup>17</sup> Tšëngaftanga Bëngbe Bëtsábioye šmondbuyana “Taita ca”, šmondbótsëmbona ora. Bëngbe Bëtsabiam nÿetscanga cachcá mondmëna. Chíyeca, ntšamo nÿetscanga tmojamama tšabá o ndoñe tšabá yontsemna ca cha yochjayana ora, cha chca echanjama nÿe ntšamo chënga tmojamcá jtsonÿayëse. “Taita ca” chábioye šmondbuyánayeca, quem luarentše šmochtsiyenëntscuana sempre šmochtsejuabnaye cha nÿetscangbiam más bëtsá yomnama, chë šmojtsama sóyeca chca jtsinÿanÿayëse. <sup>18</sup> Tšëngaftanga šmondé-tatšëmbo, Jesucristo, mo nda ínÿengbioye játsebacama crocénana cuafjëtšajocá, tonjanóbana tšëngaftanga játsebacama, chë nÿetsca soyënga nÿe bonamente jtsamëse oyenentšana, ntšamo jtšiyenama tšëngaftangbe bëts taitángbentšana šmojanatsjinÿcá. Cristo ndoñe checmatanatsebacá, yopodena jt-sopochócama soyënga jëtšájuaese, mo crocénana o castellancá, <sup>19</sup> ndayá cachá jóbanëse, chabe uámana buiñe juabuáshanëse. Cristo chë ndocna bacna soye ndbomná, tonjanóbana ora enjamna mo canÿe oveshatemcá, tondaye ndbemaná, ni tsengana ndbomná, Bëngbe Bëtsábioye jëtšchuayama altaroca obaná. <sup>20</sup> Chama Bëngbe Bëtsá Crístbeñe tojanjuabó y tbojanábuayana, cabá quem luare ndëtsemna ora; pero quem tempo, Cristo entšángbeñe tonjábocna tšëngaftangbe tšabiam. <sup>21</sup> Crístbeyeca, tšëngaftanga šmondošbuaché Bëngbe Bëtsábeñe, nda tonjanma Cristo cháuatayenama y puerte uamaná tbonjánbema. Mëntšá, ndábeñe tšëngaftanga šmošbuaché y šmobátmana, Bëngbe Bëtsábeñe endmëna.

<sup>22</sup> Tšëngaftanga šmojama ndocna bacna soyënga ainaniñe ntsebonnama, Jesucristbeyeca catsátangbioye ndegombre jtsababuánÿeshanama, er tšëngaftanga ntšamo ndegombre yomncá jtsamëse, Bëngbe Bëtsá šmoyeunana. Chcasna, sempre nÿets ainánaca nÿetscanga šmochtsenbobonshana.

<sup>23</sup> Bëngbe Bëtsá tojama tšëngaftanga tsëm vida chašmotsebonnama; pero tšëngaftanga tsëm vida šmontsebonna, ndoñe nÿe quem luarentša entšanga ndayá tmojamama, sinó ndayá Bëngbe Bëtsá chë ndocna te jobanamá tojamama. Cha chca tojama cachabe palábraca, ndayá endoyebuambná ntšamo entšanga muantsobena tšabe vida jtsebonnama y chë palabra ndocna te queochaisopochóca. <sup>24</sup> Ntšamo

Bëngbe Bëtsabe uabemana palabrënguïñe endayancá:

Nÿetsca entšanga mondmëna mo shacuancá, y chënga imobomna tšabe soyënga, endmëna mo chë shacuanentša uantšefjushangacá.

Chë shácuana jtsanctana y chë uantšefjushangá jt-satquécjanana; entšanga cachcá, nÿets tempo quem luarentše ndoñe quemochátiyena;

<sup>25</sup> pero Bëngbe Bëtsabe palabra nÿets tempo echanjesomñe ca —chiñe endayana. Y chë palabra endmëna chë Jesucristbe tšabe noticiënga, chë buayenánana ntšamo ínÿenga tcmojabuayenacá.

**2** Chcáyecna, nÿetsca tescama šmochtsajbaná nÿetsca bacna soyënga amana, ínÿengbioye áingñayana, bacna entšanga chë ntšamo ndegombre šmojuabnacá ndinÿinÿayënga ntsemnana, ínÿengbioye untšabošana, y ínÿengbiam uayátsenayana.

<sup>2</sup> Mo cabá mora onÿnana šešoncá, tša jtsebošana chabe mamabe létšiyee, cachcá tšëngaftanga cmontsamna puerte jtsebošana nÿets tempo Bëngbe Bëtsabe soyënga jtsebonnama, chë soyëngaca Jesucristbeñe corente chašmotsošbuáchema, y chca, atsebácánënga chašmotsemnama; <sup>3</sup> ntšamo Bëngbe Bëtsabe uabemana palabrënguïñe endayancá: “Tšëngaftanga šmojátatšëmbona Bëngbe Utabná puerte tšabia nÿetscángaftaca yomnama ca.”

#### Cristo, chë mo aina ndëtšbecá endmëná

<sup>4</sup> Bëngbe Utabnábioye šmochtobeconá, nda endmëna mo canÿe aina ndëtšbecá, ndëmuanÿëse tojtsama entšanga tšabe vida chamotsebonnama. Báseftanga cha tmojtsaboté, mo ntšamo chë ndëtšbéngaca canÿe yebna tmojtsejebuana ora, luaroca tmojtsejajó ndëtšbecá; pero Bëngbe Bëtsá chábioye tbojuábuayana, y chabe bominiñe cha puerte uamaná endmëna.

<sup>5</sup> Chábioye šmochtobeconá, tšëngaftanga chë tšabe vida šmojóyëngacñënga, cánÿiñe mo aina ndëtšbéngcá, Bëngbe Bëtsabiam jajejuama canÿe yebnentšama chašmotsemnama; mo Bëngbe Bëtsabiam bachnangcá chašmotsemnama, nÿe Bëngbe Bëtsábioye jt-seservénama jtšentšëñëse, chábioye jtšatschuanayama. Ntšamo Bëngbe Bëtsábioye jtšeservénama šmojt-samcá, chábioye tšabá jtsinÿanana, ndayá Jesucristo tojanmama. <sup>6</sup> Chca ndegombre endmëna, er Bëngbe Bëtsabe uabemana palabrënguïñe, Bëngbe Bëtsá Jesucristbiam mëntšá tojánayana:

Šmochjinÿe, atše sënjama Jerusalenentše canÿa chaotsemna,

y cha endmëna mo chë canÿe yebna jajejuámentše chë más bëts uashacuanëšentše jajona ndëtšbecá.

Cha atšbe Uabuayaná endmëna, y atšbiam puerte enduámama.

Nda chábeñe tojtsošbuaché, ndocna te nÿe bonamente chábeñe queochátobatmana ca.

<sup>7</sup> Tšëngaftanga, chábeñe ošbuáchiÿëngbiam, nda endmëna mo chë yebna jajejuámentše más bëts uashacuanëšentše jajona ndëtšbecá, cha puerte en-

duamana; pero chábeñe ndošbuáchiyëngbiamna, entsopasana ntšamo Bëngbe Bëtsabe uabemana palabrënguñe Cristbiamna endayancá:

Chë yebna jebuanënga tmontsanaboté ndëtšbé, mora chë más bëts uashacuanëšëntše entsejájona ca. <sup>8</sup> Inyoca, Bëngbe Bëtsabe uabemana palabrënguñe mëntšánaca chabiamna endayana:

Cha endmëna mo ndëtšbé ndayentše jtsojestjijamcá; y mo peñëšcá yomna chënga chamotsótsatsáma ca. Chënga Jesucristo jtsabotena, chabe buayenánana ndoñe ntjoyeunaycá; Bëngbe Bëtsá cabá chca ndopása ora tojanjuabó chca chaotsemnama.

<sup>9</sup> Pero tšëngaftanga šmondmëna Bëngbe Bëtsábeyeca bocacánënga, y mo canye rey tmojtteserverna bachnangcá, y šmondmëna Bëngbe Bëtsabe entšanga nye chabiamna jtsetrabájayama, y chë nye Bëngbe Bët-sábenga šmognënga. Y chca endmëna, tšëngaftanga chë bëts soyënga ntšamo Bëngbe Bëtsá tojamcá chašmotsabuayinama. Cha endmëna nda tcmojáchembo chašmotsajbanama oyenana mo ndoñe binýniñcá jtsejuabnayëse y jtsamëse, cháftaca jtsemnama chašmot-sobenama, chë tšëngaftangbe juabnënga puerte biný-nayáftaca. <sup>10</sup> Tempo tšëngaftanga ni mo cánýentša entšangcá ndoñe quešmënjatšmëna, nye ujquëshenënga; pero mora, Bëngbe Bëtsabe entšanga šmontsemna; tempo šmonjamna entšanga ndocná tonjánalastemanga, pero mora, Bëngbe Bëtsá aíñe lastemado tšëngaftangaftaca entsemna.

#### Bëngbe Bëtsá jtseservënama jtsiyenana

<sup>11</sup> Atšbe bonshánënga, ndayentše tšëngaftangbe ndegombre luare yomna, celoca endmëna, y muentše quem luarentše, tšëngaftanga šmondmëna mo ínýoicana ashjajnëngcá, y mo canye luarëjana nye achnëjuanëngcá, cach tšëngaftangbe luaroye átayiñe. Chíyeca cbontsaimpadana, ndoñe chašmondétsama soyënga ntšamo chë šmobomna bacna juabnënga tomncá, ainaniñe bacna soyënga bomna causa; chca juabnënga ainaniñe jtsepenzëntsiayana, chentše jtsemándayama y Uámana Espíritu ndoñe chaondëtsemándama. <sup>12</sup> Chë Bëngbe Bëtsábioye nduabat-mëngbeñe sempre šmochtsiyena tšabá jtsamëse; chca chënga, masque mora tšëngaftangbe contra imojt-soyebuambná, tšëngaftanga mo bacá uamana entšanga cuaftsemnëngcá, chë tšabe soyënga ntšamo tšëngaftanga šmojtšamcá chamuinýama, y chca, Bëngbe Bëtsá chëngbioye chaojenonýinýe te, chábioye chënga chamotsatschuanama.

<sup>13</sup> Bëngbe Bëtsá šmoyeunanama, nyetsca entšanga mando bomnëngbioye šmochtsobedecena; chë Romoca bëts mandádbioye, cha chë quem luarentša más uámana puesto jtsemándayama endbómnyeca; <sup>14</sup> y chë tšëngaftangbeñe mandadëngbióynaca, ndëmuanýenga cha jíchamuana chë bacna soyënga amënga jácastigama, y chë tšabe soyënga amëngbia-ma tšabá imojtsama ca chamuayanama. <sup>15</sup> Chë mando bomnëngbioye šmochtsobedecena, er Bëngbe Bëtsá endboše tšëngaftanga tšabe soyënga chašmotsama-

ma, chca, chë ndosertánënga chë tšëngaftangbiamna podesca ichámënga, ntšamo ndegombre yomncá ntsetatšëmbcá, tondaye chamondëtsebomna tšëngaftangbe contra jayanama.

<sup>16</sup> Šmochtsiyena tšabá jtsamëse, mo chë ya ndoñe más bacna soyëngaca y bacna juabnëngaca ndëmandanëngcá; pero chca šmojtsemnama ndoñe šmattsejuabnaye nye ndaye bacna soye jamama šmojtso-benaca, y nye chca šmochjátama. Más tšabá endmëna jt-siyenana, mo chë Bëngbe Bëtsá imoservenëngcá.

<sup>17</sup> Nyetscangbiamna respeto šmochtsebomna, chë Jesucristbeyeca catšátangbioye šmochtsababuánýeshana, sempre šmochtsiyena Bëngbe Bëtsabiamna jtsejuab-nayëse cha chë más bëtsá yomnama, y chë Romoca bëts mandado šmochtseserrespetana.

#### Cristo chabe entšanga tojinýanýe ntšamo yomna jasúfriana

<sup>18</sup> Tšëngaftanga, chë nyets tempo ínýabiamna canye yebnentše oservëngënga, tšëngaftangbe nduiñëngbioye šmochtsayaunana, puerte respeto chëngbiamna jtsebomnëse; y ndoñe nye chë tšábengbioye y nye tšabá mandbomnëngbioye, ndayá chë bacá mandbomnëngbioynaca. <sup>19</sup> Nderado nda, ntšamo Bëngbe Bëtsá yobošcá jamama bošama, tojoboyá chabe nduiño cha chaosufrima tojtsama ora, masque chama jasúfriama ndoñe tbondmëna, chca jamëse, Bëngbe Bëtsá corente tšabá jtsinýanana. <sup>20</sup> Er nderado tcmojt-sacastigá ndaye bacna soye šmojama causa, y chora tša uantadënga chiñe šmojachnëngo, chë soye ndoñe yapa ntsámanana. Pero tšabe soyënga šmojtšama y chë causa šmojtšesufrina, y tša uantadënga chiñe šmojachnëngo, chë soye cocayé Bëngbe Bëtsá corente tšabá jtsinýanana. <sup>21</sup> Chca cmontsamna, er Bëngbe Bëtsá tcmojánachembo tšabe soyënga jamama y chca jasúfriama; chca ndegombre endmëna, er Cristo tšëngaftangbiamna tonjansufrí, y chca cha tcmonjan-inýanýe, ntšamo jamama cmojtsamna, tšëngaftanga chca chašmotsamama. <sup>22</sup> Cristo ndocna te ndocna bacna soye chenáisea, ni ndocnábioye chebnaisëngñé. <sup>23</sup> Chábioye tmojtsoyenguá ora, chëngbioye ndoñe ntëyánguanguana. Cha chaosufrima tmonjanma ora, cha ndocá ntjatëtsëtsnayana jaútatjayama, ndayá Bëngbe Bëtsábeñe jtošbuáchiyëse, chábeñe yojanobátmana. Bëngbe Bëtsá ntšamo nyetscanga tmojamama tšabá o ndoñe tšabá yonjamna ca yochjayana ora, chca echanjama nye ntšamo chënga tmojamcá jtsonýayëse. <sup>24</sup> Cristo cruciñe tonjanóbana ora, cha tonjansufrí chë castigo, chë bëngbe bacna soyëngama cach bënga šojánama jasúfriama castigo, bënga chë bacna soyënga jamama juabnëngaca ndoñe más mandánënga chamondëtsemnama, y bënga ntšamo Bëngbe Bëtsabe bominiñe tšabá yomncá jtsamëse chamotsiyenama. Er Crístbioye chënga tmonjanlisiá chaóbanama y tonjansufrí jobanëntscuana, y chca, bënga šonjanatsebacá. <sup>25</sup> Er tšëngaftanga, tempo Bëngbe Bëtsábentšana bënoca šmonjamna, mo ótšë-na oveshëngcá; pero mora Cristbe benache šmo-

jtishache, y cha cmontsanýena, mo oveshëngbe canýe abuajënyácá, y cha entsantješna tšëngaftanga tšabá chašmotsemnana.

### Ntšamo iuamna chë bouamnëngbioye jtsiyenana

**3** Cachcá mo chë oservenëngcá, tšëngaftángnaca shémanga, tšëngaftangbe boyángbioye šmocht-sayaunana, chca, chë Bëngbe Bëtsabe buayenana soyënguiñe ndošbuáchiye boyángbioye chašmobená jáyëñjanama, Jesucristbeñe chamotsošbuáchema, ntšamo tšëngaftanga šmojttsiyenama. Ndoñe queochátsiyta chë buayenánama chënga jatëtsët-snayana, <sup>2</sup> er chënga mochanjinýe tšëngaftanga šmojttsiyena, Bëngbe Bëtsá nyetscangbiana más bëtsá yomnama sempre jtsejuabnyëse, y ntšamo šmojt-samcá chca yojtsinýinýayeca. <sup>3</sup> Cach tšëngaftangbiana ndoñe mëntšá šmattsejuabnyaye: “Entšanga atše botamaná tsmëna ca chamotsejuabnyaye atše nýa mo chca chantenochquëca, chantenóbotamaye ba castellano soyëngaca o ba uámana entšayangá chantichëtjoca”; <sup>4</sup> ndayá chca chaotsemna, ntšamo tšëngaftanga chë Uámana Espiritbeyeca mandánënga jtsemnëse ainaniñe šmojuabnyaye, cmëbionama y šmobošama; ndocna te ndopochócaye botamanana jtsebmomnana, ainaniñe nýe cach tšëngaftanga uámanënga jenobiamama juabnënga ntsebmomncá, pero aiñe ainaniñe tšabe ebionana jtsebmomnëse. Chë soyënga Bëngbe Bëtsabe bominiñe puerte enduámana. <sup>5</sup> Tempo chca, chë puerte tšabe shembásenga, chë Bëngbe Bëtsabe bocacanënguentšënga, imojanamana jtenóbotamayana; chënga Bëngbe Bëtsábeñe imojtsanošbuaché y chábeñe imojanobátmana, y nyetscanga chëngbe boyángbioye imojánayaunana. <sup>6</sup> Chca yojamna Sara, Abrahámioye ibnayeunana y chábioye “Taita ca” ibojanábobuatma. Tšëngaftanga Sarabe be-mbiangcá jtsemnana, tšabe soyënga šmojtsamëse, y tondayama uatjana šmontsebmomnëse.

<sup>7</sup> Cachcá, tšëngaftanga boyanga, cada ona cachabe shémaftaca chaotsiyena, tšabá jtseñeyeanëse, y cha respeto buajoná chaotsemnana jtsamëse; pero chca, ndoñe nýe cha acbiana más batšá obenana bomná bëtsemnana, ndayá Bëngbe Bëtsá chabiana tšabe juabna yobómnyayeca, ntšamo cach aca tšabe vida tcmojašbuachenacá chábioynaca tbojašbuáchenama. Chca šmochtsama, Bëngbe Bëtsáftaca jencuéntama totcá chaondëtsemnana.

### Chë tšabe soyënga amama jasúfriama yojtsamnënga

<sup>8</sup> Y morna, nyetsca tšëngaftanga cachcá šmochtsejuabnyaye, inýenga šmochtsalastemana, chë Jesucristbeyeca catsátangbioye šmochtsababuányëshana, inýengbiana chacmóngmiaye, y cada ona chaotsejuabná chë inýenga chabiana más uámanënga imomna ca. <sup>9</sup> Inýenga tšëngaftangbiana ntšamo tcmojaborlá ora, ndoñe šmattéchenanguaye; ni chacmojtšëyan-guá ora, chëngbioye ndoñe šmattoyánguango. Chca játamama cuentna, Bëngbe Bëtsá šmochjaimpáda,

chëngbeñe tšabe bendicionënga chaotsemnana cha chaomama, er Bëngbe Bëtsá tcmojáchembo chca chašmotsamama, y Bëngbe Bëtsábíocana tšabe bendicionënga chašmoháchiñama. <sup>10</sup> Ntšamo Bëngbe Bëtsabe uabemana palabrënguiñe endayancá:

Nda toboše tšabe vida jëftsebmomnana y puerte oye-juayá tempënga jtsebmomnana, yejuana chaotseñejuabná bacna soyëngama ndoñe chaondëtsoyebuambnana, y ndoñe chaondëtseboosterama.

<sup>11</sup> Bacna soyënguentšana chaotsojuánañe y tšabe soyënga chaotsama,

natjëmbana nyetscángaftaca jtsiyenama chaotseboše, y chca chaotsemnana sempre chaotseñtšëna.

<sup>12</sup> Chca bontsemna jamana, er Bëngbe Utabná, chabe bominiñe tšabe soyënga amëngbioye jtsanýenana, chëngbiana sempre jtsantjeñëse;

y siempre chëngbioye jtsayaunanana, chábioye ndayámnaca tmojtsotjanañe ora;

pero chë bacna soyënga jamana uamanëngbe contra cha jtsemnana ca —chiñe endayana.

<sup>13</sup> ¿Nda nanjobenaye tšëngaftangbiana bacna soyënga jamama, tšëngaftanga chë tšabe soyënga jamama siempre šmojtsentšëñëse? <sup>14</sup> Pero masque tšëngaftanga cmojtsamna jasúfriama tšabe soyënga šmojtsamama, Bëngbe Bëtsá chama tšabe soyënga cmochántatšataye. Chë tšëngaftanga chašmosufrima amëngbiana ndoñe matauatjëngana, ni ainana tsetšëñánënga ndoñe matsmëñëngana, <sup>15</sup> ndayá ainaniñe siempre šmochtsejuabnyaye Cristbiana mo Bëngbe Utabnacá y chabiana respeto šmochtsebmomna; y siempre šmochtseprontana jojuama ndëmuanýenga tcmojtsatjaná ndáyeca tšëngaftanga Bëngbe Bëtsábeñe jtsošbuáchiyëse, chabiana ainaniñe šmobátmanama.

<sup>16</sup> Pero chca šmochjama tšabe ainánaca jtsëñýayëse y Bëngbe Bëtsabiana respeto jtsebmomnëse. Šmochtsiyena tšabá jtsamëse, y chama ainaniñe ndoñe chašmondëtsebmomna juabnënga y chamuayana chca ndegombre ndoñe tšabá šmontsama ca, chca, inýenga tšëngaftangbiana podësca chamojtsoyebuambná ora, tšëngaftanga Crístbeñe ošbuáchiyënga quetsomñëcá tšabe soyënga šmojtsamama, chënga chamotsëuatja chca tmojtsóyebuambnana.

<sup>17</sup> Más tšabá endmëna jasúfriana tšabe soyënga tcojamama, nderado Bëngbe Bëtsá chca chaotsemnana tojtsebošëse, y ndoñe chë jasúfriana ndaye bacna soye tcojamama. <sup>18</sup> Er Cristo nýe canýe tonjanóbana bënga bacna soyëngama jáperdonama; chë nyetsca soyënguiñe tšabá amá, chë Bëngbe Bëtsabe bominiñe ndoñe tšabá yondmëna soyënga amëngbiana, tšëngaftanga Bëngbe Bëtsáftaca chašmotsatsmënama. Entšacá, Cristo tonjanóbana, pero Bëngbe Bëtsá tonjanma, cha cachiñe vida chabe espiritiñe chaotsebmomnana. <sup>19</sup> Pero Cristo cháuatayenama Bëngbe Bëtsá cabá ndëma ora, chabe espiritiñe cha tojána chë ndoñe tšabe entšanga imonjamnëngbe espíritënga utámenënga imojamnoye, chëngbiana castigo tojtsebmomnëntscuana; y cha tojanayëñjanama chënga to-

janabuayená. <sup>20</sup> Quem espíritenga bayté entsemna, Bëngbe Bëtsábioye ndoñe monjánëyeunana, Noebe yojëftsiyena ora, chë bacna soyënga amënga chca amama chamotsajbanama y tšabe benache chámuatishachama Bëngbe Bëtsá bën yojanobátmana ora, barquëshu canduapormantscuana. Chentsana chë barquëshuñe báseftanga tmojanotsbocá, posufta entšanga, búyeshe juatsbuacá chë barquëshu yojtsámnyeca. <sup>21</sup> Chë chënga chamótsbocama tojanëjabuache béjaye, enjamna mo chë mora jenábayama buyeshcá, chca, atsebácanënga bënga chamotsemnama. Pero tmojenábaye ora, bënga atsebácanënga jtsemnana, ndoñe chë cuerpentša tsengá tmojt-senóbolimpiama, ndayá bëngbe ainaniñe ndocna bacna juabnënga ntsebomnama Bëngbe Bëtsá tmojtseim-padánama; y bënga atsebácanënga mondmëna, Jesucristo cháuatayenama Bëngbe Bëtsá tojánmayeca. <sup>22</sup> Cristo celoye tojtantsjuá y Bëngbe Bëtsabe catšbioica yomna jamándama. Cha endmëna chë amëndayá angelëngbiama y espíritenga mando y obenana bomnëngbiama.

#### Entšanga entsamna jtsiyenana ntšamo Bëngbe Bëtsá yobošcá

**4** Chcasna, ntšamo Cristo tojansufricá, chabe cuerpiñe mo entsacá jätsetsenëse, tšëngaftangnaca cmontsamna jtseprontánana chca jasúfriama. Er chë Crístbeñe ošbuachiyá nda chabe cuerpiñe tojasufrí, chë bacna soyënga amentšana tojtsojuánañe, <sup>2</sup> chca, chabe vidiñe, morscana y jobanëntscuana, jëftsiyenama ntšamo Bëngbe Bëtsá yobošcá, y ndoñe nye entšangbe bacna juabnëngaca, nye quem luarentše tšabá jëftsemnama. <sup>3</sup> Tempo, bayté enjamna, ndayëntscuana tšëngaftanga šmonjánama soyënga, mo chë Bëngbe Bëtsábioye nduabuátmënga mondbetsamcá; nya ndoñe más. Chë tempo, tšëngaftanga šmonjaniyena nyetsca bacna soyënga jtsamëse, jenomándama ntsebencá; tšëngaftanga šmonjánama soyënga nye ntšamo šmojanbošcá, nye tšëngaftanga tšabá jtsomñama; šmonjanamana jotmenangana y ba fiestënga jtsebomnana, y chora chë ófjanënga tša jtsetmoyana y tša jtseyoyana, y ba uabouana soyënga šmonjanamana jtsamana chë diosënga yojamna ca šmojanjuabná soyënga jadórama. <sup>4</sup> Morna, chë Bëngbe Bëtsábioye nduabuátmënga montsenjnaná, tšëngaftanga ya ndoñe más bacna soyënga jtsamëse šmojtsiyenama, ntšamo tempo šmonjaniyena, ntšamo chënga jtsamëse mondoyena, jenomándama ntsebencá; y chë causa, chënga bacna soyënga tšëngaftangbiama jtsóyebuambnayana. <sup>5</sup> Pero chënga echanjótocaye jayanama ndáyeca chca tmojamama, chë entšangbiama, chë ainënga y chë ya mochjóbänëngbiama, ntšamo tmojamama, añe o ndoñe tšabá bëtsemnama jayanama entseprontanabe delante. <sup>6</sup> Chiyeca, Crístbeñe ošbuáchiyënga, chë mora obanënga imojtsemnënga, ainënga monjamna ora, inyënga chë tšabe noticiëngama chëngbiyoye monjanabuayiyiná, chënga chamobenama chë nyetsca

tescama yomna tšabe vida chëngbe espíroftaca jtsebomnama, ntšamo Bëngbe Bëtsá yobomncá; masque mora quem luarentše, chëngbe cuerpo tojóbanana, er Bëngbe Bëtsá tojayana nyetsca entšanga yojtsamna jóbana ca.

<sup>7</sup> Ndoñe bayté y nyetsca soyënga echanjopochóca. Chiyeca, tšëngaftanga cmontsamna botamana jtsejuabnayana y jenomándama jtsobenana, Bëngbe Bëtsáftaca jencuëntama chašmotsobenama. <sup>8</sup> Nyetsca soyëngama, masna, sempre nyetscanga puerte šmochtsenbobonshana, er nda inyënga puerte tojtsababuanyëshaná, sempre jtseprontánana inyënga jáperdonama, chëngbiama bacna soyënga tmojamama. <sup>9</sup> Nyetscanga šmochtsamana tšëngaftangbe yebniñe jenofjana, chca jamama totcá yojtsemna ntjatichamcá. <sup>10</sup> Nyetsca tšëngaftanga Bëngbe Bëtsá tcmojatšatá obenana tšabe soyënga jamama; chca, chë obenánaca cmontsamna jtsamana soyënga chë inyëngbe tšabiama, chë Bëngbe Bëtsá cmojatšatá nyets obenánaca inyëngbiyoye jujabuáchama, nyets tempo tšabe soyënga jtsamëse. <sup>11</sup> Nda tojtsabuayiyiná, Bëngbe Bëtsabe palabra chaotsabuayiyiná mo Bëngbe Bëtsá chabijana cuaftsoyebuambnacá; nda inyënga tojtsaserverna, chca chaotsama chë Bëngbe Bëtsá yojtsama cha chaotsebomnama obenánaca. Nyetsca soyënga ntšamo šmojtsamcá chaotsinyanáná Bëngbe Bëtsá puerte uamaná y obená bëtsemnama, Jesucristbeyeca. Chca šmochtsama, er Bëngbe Bëtsá puerte uamaná endmëna y obenana endbomna nyets tempo y nyetsca tescama. Chca chaotsemna.

#### Puerte tšabá endmëna, Crístbeñe tcošbuáchema, jasúfriama tbojtsemnëse

<sup>12</sup> Atšbe bonshana entšanga, ndoñe šmattsenjnanaye padecena soyënguiñe šmojtseufrínama; chiñe jtsinynana ntsachetšá ošbuáchiyana šmobomnama. Chca ora ndoñe šmattsejuabnaye, tšëngaftanga ndoñe cmondamna chca soyiñe jtsachnëjuanana ca; <sup>13</sup> chamna, šmochjóyejuaye chë ntšamo Cristo tojansufricá šmojtseufrina ora, chca, Cristo corente obenánaca y uamanacá entšangbeñe chaojtonýna te, tšëngaftanga puerte chašmotsóyejuama. <sup>14</sup> Puerte šmochtsóyejuaye, nderado nda tcmojoyánguango Crístbiama bëtsoservernayeca, er Bëngbe Bëtsabe Espíritu, chë corente bëtšá endmëná, sempre tšëngaftangbe ainaniñe iuëtsemna. <sup>15</sup> Tšëngaftanguentše ndocná chabondëtsemna jasúfriama inya óbanaye causa, atbëbanama, bacna soyënga inyëngbiama amama, o inyëngbe soyënguiñe ontremetënama. <sup>16</sup> Pero Crístbe ustoná tomnama tojasufrí, chama ndoñe chaondët-sëuatja; chamna, Bëngbe Bëtsábioye chabotsatschuaná, cha Crístbe ustoná bëtsemnama.

<sup>17</sup> Er chë tempo ya tojobuache, Bëngbe Bëtsá jayanama, cach Crístbeñe ošbuáchiyëngbiama, chabe entšangbiama, tšabá o ndoñe tšabá tmonjamama. Cha chca bëngbiama jayanama tojontšese, chë chabe palabra ndobedecenëngaftaca yochjanopasacá puerte uabouana echántsemna, cha chëngbiama chca chao-

jayana ora. <sup>18</sup> Y chca, chë Bëngbe Bëtsabe bominiñiñe tšabá amabiamana ndoñe paselo atsbocaná jtsemnana tontsemnëse, ¿ntšamo yochjopása chë Bëngbe Bëtsábioye ndoñe adórayënga y chë bacna soye améngaftaca? <sup>19</sup> Chcasna, chë imosufrínëngaftaca Bëngbe Bëtsá chca yobóseyeca, entsamna chë tšabe soyënga jtsamana y Bëngbe Bëtsabe cucuatšíñe chëngbe espíritu chamoboshjona cha chaotsinñenama, er cha chënga tojánabiama, y nyetsca soyënguiñe tšabe palabra bomná cha endmëna.

### Cristbeñe ošbuáchiyënga jábuayenama

**5** Y mora, chë tšëngaftangbentše ošbuachiyëngcá enefjuanéngbeñe bëtšëjemëngcá améndayënga chanjabuayená, atše cach tšëngaftangcá bëtšëjema, canya ntšamo Cristo tonjansufricá tonjaninyá y chama inyënga tonjanéyana, y canya ndábioye cach tšëngaftangcá Bëngbe Bëtsá bochjábema más uámana y bëtšá, Cristo entšángbeñe chaojtonyñá ora; tšëngaftanga cbabuayená. <sup>2</sup> Ošbuáchiyënga šmochtsanñena; chënga chašotsanñenama Bëngbe Bëtsá chca tcmojábiamana. Chca, chentša ošbuachiyëngbeñe šmochtsama ntšamo canye tšabe abujénya chabe oveshëngaftaca endbetsamcá. Bëngbe Bëtsabe trabajo ndoñe šmattsama, nye cmojtsétocanama, ndayá chca jama šmojtsebóseyeca. Chca ndoñe šmatjama nye paselo crocénana juacánama, ndayá inyëngbioye jubuáchama tša šmobóseyeca. <sup>3</sup> Chë cmojtsamna jtsanñenama ošbuáchiyënga ndoñe nye bëtscá šmattsaméndaye, mo chëngbe nduiñënga cuafjatsmënéngcá, ndayá ntšamo tšëngaftanga šmojtsiyenama, chënga šmochjinyanñiye ntšamo yojtsamna jtsiyenana. <sup>4</sup> Chca, chë bënga nyetscanga, mo chë tšabe abujényacá šuanñená, quem luaroye yochjésabo ora, mo canye uabuashinñinñana coronésha ndocna te tontsandbemëshacá, tšëngaftanga canye bëtš uacaná soye šmochanjóyëngacñe, y chë soye endmëna nyetsca tescama; Bëngbe Bëtsá uámanënga y bëtšétsanga cmochanjábiamana, cháftaca nyets tempo oyejuayënga jtsemnëse.

<sup>5</sup> Cachcá, tšëngaftanga chë bobontséngnaca cbabuayená, sempre šmochtsejuabnaye chë bëtšëjemënga tšëngaftangbe améndayënga imomnana, y chca šmochtsama. Cada ona tšëngaftanguentšá bontsemna jtsejuabnayana chë inyënga tšëngaftangbiamana más uámanënga cuaftsemncá, inyëngbioye šmojtsaserverna ora; er ntšamo Bëngbe Bëtsabe uabemana palabrënguiñe endayancá:

Bëngbe Bëtsá chë nye cachënga uámanënga tmojtse nobiamnangbe contra entsemna, y chë ndoñe uámanënga montsenobiamnangbiamna, Bëngbe Bëtsá más tšabe juabna entse bomna ca. <sup>6</sup> Sempre šmochtsejuabnaye Bëngbe Bëtsá chë

más bëtšá nyetscangbiamana yomnana, y nyets mando y obenana bomná yomnana, y chabe delante ndoñe uámanënga šmattsenobiamnaye, cha más uámanënga chácmbiamama, chama chë tempo chaojobuache ora. <sup>7</sup> Nyetsca soyënga ndayama šmuenócochinñenama Bëngbe Bëtsabe cucuatšíñe šmochjáboshjona, er cha tšëngaftanga yejuana cmondánñena.

<sup>8</sup> Cach tšëngaftanga jenomándama chašmotsobena y sempre šmochtseprontana, er tšëngaftangbe uayayá Satanás, mo canye león tojtsejató, nda jtsósañama tojtsana orcá, chë diablo, sempre jtsebošana jamama, tšëngaftanga Jesucristbeñe ošbuáchiyana chašmot-sajbanama. <sup>9</sup> Puerte šmochtomorócha, Jesucristbeñe bëtscá jtsóšbuáchiyëse, chë uayayá tondaye chaondobená tšëngaftangaftaca jamama, cach tšëngaftangcá Jesucristbeñe ošbuáchiyënga nyets luarënguenache cachcá jasúfriama yojtsamnama jtsetatšëmbëse. <sup>10</sup> Pero tšëngaftanga baseftayté chašmojasufrí chentšana, Bëngbe Bëtsá cmochanjábiamana nyetsca soyënguiñe puerte tšábënga, puerte chašmotsemorochama, bëtscá ošbuáchiyana y bonshánana bomnënga jtsemnëse, y ainaniñe corente añemo bomnënga chašmotsemnana; Bëngbe Bëtsá, chë bëngbiamana tšabe juabna bomná, bënga nyetsca tšabe soyënga šonjatsatá, y nda bënga šojáchembo nyetsca tescama bëtšétsanga jtsemnana, chca echanjama.

<sup>11</sup> Cha nyets obenana nyets tempo y nyetsca tescama chaotse bomna. Chca chaotsemna.

### Jtadióšoftanama

<sup>12</sup> Silvano, ndabiamana sëndëjuabná atšbiamana canye tšabe palabra bomná Jesucristbeyeca catšata yomnana, cháftaca quem base tsbuanácha tcbonjubuábiamana. Atše séntseboše tšëngaftanga añemo jatšatayana y jáuyanana, ndegombre ntšamo tcbonjubuabiamcá yojtsoyebuambná ntšamo Bëngbe Bëtsá tšabe bendicionënga cmatšatnama. Chiyëca, sempre šmochjéftsiyena jtsamëse ntšamo chabe tšabe juabna tšëngaftangbiamana yomncá.

<sup>13</sup> Ošbuáchiyënga muentše átšeftaca montsemnënga cmontsacheuaná. Chënga quem bëtš pueblentše mondoyena bacá uamana entšángaftaca, mo chë tempo, Babilonia bëtš puebloca imojoyena entšangcá, pero Bëngbe Bëtsá muentša ošbuáchiyënga tojabacacá cach tšëngaftangbioycá. Marcos, chë atšbiamana mo uaqiñacá endmëná, chánaca cmontsacheuaná.

<sup>14</sup> Nyetscanga Jesucristbeyeca catšatangcá šmochjenchuaye, jtenámochëse tša šmojtse nobonshánama.

Atše, Bëngbe Bëtsá séntseimpadana cha chaoma tšëngaftanga chë Jesucristoftaca cánñiñe mo canyacá šmomnënga, nyetscanga ainaniñe tšabe ebionana chašmotse bomnana.

## 2 San Pedro

### Jacheuayama

**1** Atše Simón Pedro, Jesucristbe oservená y chabe ichmoná, quem tsbuanácha sentsabiamná tšēngaftangbiama, ndēmuanŷenga šmojashjache jtsebomnama canŷe ošbuáchiyana Jesucristbeñe, cach bēngbe ošbuachiyancá uámanana, er Bēngbe Bētsá y Atsebacyá Jesucristo, jtsebošana ndánaca y nŷetscanga chábeñe chamotsošbuáchema. <sup>2</sup> Atše sēntseimpadana, tšēngaftanga Bēngbe Bētsabiamana y Bēngbe Utabná Jesusbiama cada te más jtsetatšēmbēse, Bēngbe Bētsá chaoma tšabe bendicionēnga tšēngaftangbeñe chaotsemnama y chaoma tšēngaftanga ainaniñe tšabe ebionana chašmotsebomnama.

### Chē Jesucristbeñe ošbuáchiyēngbe tšabe soyēnga

<sup>3</sup> Bēngbe Bētsá chabe obenánaca tojama bēnga chamobená jtsebomnama, lempe ntšamo tmojtšējabotcá tšabe vida jtsebomnama y jtсийenama, Bēngbe Bētsá jadórana soyēnga jtsamēse. Cha chca tojama bēnga chábioye chamotsábuatmama tojanma ora. Cha bēnga šojáchembo, cachá obená y uamaná bētsemnama y bēts soyēnga jamēse, chabe entšanga chamotsemnama. <sup>4</sup> Chca, Bēngbe Bētsá šojatsatá ntšamo bēnga jatšatayama tojanašebuachenacá, bēts y uámana soyēnga, chca, quem luarentša bacna soyēnguentšana chašmotsojuánañama. Chē bacna soyēnga quem luarentše jtsebínŷnana, entšanga nŷe cachēngbe bacna juabnéngaca jtсийenama yapa boše causa. Chánaca chē tšabe soyēnga šojatsatá, tšēngaftanga cháftaca cánŷiñe mo canŷacá chašmotsemnama, cachacá jtsemnama jashjáchése. <sup>5</sup> Chca, ndoñe quenátsmēna nŷe Jesucristbeñe ošbuáchiyana jtsebomnana; chiñe šmochjenobuáshjache, bētsá tšabe soyēnga jtsamēse; chora bētsá šmochtsama Bēngbe Bētsabe soyēngama chacmotsésertánama; <sup>6</sup> chora bētsá šmochtsama cach tšēngaftanga jenomándama chašmotsobenama; y chca, tšēngaftanga masque padecena soyēnguiñe chašmojtšachnējuana, ainaniñe puerte añemo jtsebomnēse, puerte uantadēnga chašmotsemnama; y chentšana bētsá šmochtsama, tšēngaftanga Bēngbe Bētsá šmojtsadoránama jinŷanŷiyama; y <sup>7</sup> chca, nŷetsca tšēngaftanga ošbuáchiyēnga chašmotsenbobonshana; y chca, nŷetsca entšanga chašmotsababuánŷeshana.

<sup>8</sup> Tšēngaftanga lempe chē soyēnga šmojtsebomna, y bētsá chca šmojtsamēse, šmochantsiyena becá oservena soyēnga jtsamēse, y chentšana puerte tšabe

soyēnga echantsóbocana, corente tšabá Bēngbe Utabná Jesucristo chašmotsábuatmama. <sup>9</sup> Pero nda quem soyēnga ndoñe tontsama, Bēngbe Bētsabe soyēngama ndoñe ntosertánana; y chca, cha mo canŷe jtaná o nduabinŷnacá jtsemnana; cha tbojtsebnatjēmba Bēngbe Bētsá chabe tempsca bacna soyēnga tbojtsebojuánama, y Bēngbe Bētsabe delante cachiñe tšabá chaotsatsmēnama tojamama. <sup>10</sup> Chíyeca, Jesucristbeyeca atšbe catšátanga, nŷa šmochtsentšena chca tšabe soyēnga jtsamama, y chca, corente tšabá šmochanjátatšēmbona, Bēngbe Bētsá chabe entšanga chašmotsemnama tcmojáchembuama y tcmojábacacama; y chca jtsamēse, Jesucristbeñe ošbuáchiyana ndocna te quešmochatajbaná. <sup>11</sup> Chca, Bēngbe Bētsá oyejuayá tšēngaftangbiama echanjama, Bēngbe Utabná y Atsebacyá Jesucristbe amēndayoye jamashēngua ndegombre chašmobenama.

<sup>12</sup> Chcáyecna, atše sēntsejuabná tšēngaftangbioye sempre chē soyēngama jtsabuayiyayana, masque chē soyēngama ya šmotátšēmba, y tša šmojtsošbuaché Bēngbe Bētsabe ndegombre soyēnguiñe y chca šmojtsiyena, chē mora šmojtsetátšēmba soyēnguiñe. <sup>13</sup> Sēntsejuabná, chajjēftsainēntscuana tšabá yojtsemna jamana, ainaniñe bētsá añemo chašmotsebomnama chē soyēnga jtsamama, ntšamo tijayancá jtsabuayiyayēse. <sup>14</sup> Atše sēntsetatšēmba, ndoñe baytese y atšbe ainana Bēngbe Bētsábioye yochtá, ntšamo Bēngbe Utabná Jesucristo šonjēftsabuayenacá; <sup>15</sup> pero bētsá chanjēftsema, atše chajjóbana chentšánēnaca tšēngaftanga nŷets tempo chē soyēngama chašmotsenójuabnama.

### Cristo corente uamaná y obená yojamnama tmojáninŷe ora

<sup>16</sup> Bēngbe Utabnabe obenanama y cha yochjésabama ntšamo tcbonjanabuatambacá, ndoñe quenjatsmēna entšangbe osertanánaca pormana cuentēngaca, er cach bēnga botamana fsēnjáninŷe chabe uámanana y obenana. <sup>17</sup> Bēngbe Bētsá chē Taitá, Jesucristo puerte obenana bomná bētsemnama y cha corente bētsá y uamaná bētsemnama tonjaninŷinŷe ora, bēnga fsēnjáninŷe. Chca fsēnjáninŷe Bēngbe Bētsá, chē puerte uámana y bētsábíocana oyebuambnayanana Jesúsbioye mēntšá tbonjanianya ora: “Mua atšbe bonshana Uaquiñá endmēna, atše chabiamana sēntsoyejuá ca.” <sup>18</sup> Cach bēnga chē oyebuambnayanana fsēnjanuena, chē celocana tonjanóbocnana, er bēnga Bēngbe Utabnáftaca fsēnjanmēna, chē uámana tjoca.



<sup>19</sup> Chë sóyeca bënga fsëntsobena corente jtsetatšëmbuana, ntšamo chë Bëngbe Bëtsabe juabna oye-buambnayënga tmojanayancá ndegombre bëtsemnama, y tšëngaftanga tšabá šmochántsama, ntšamo chënga tmojanayancá šmojtseyeunanëse. Chca, chëngbe palabrëngaca entsopodena Bëngbe Bëtsabe soyëngama tšëngaftanga jinÿanÿiyana, y echántsemna mo canÿe uajuinÿanësha canÿe ibetiñe luarentše tojtsebinyñacá. Chë soyënga šmochtsuenana Jesucristo yochjésabëntscuana; chora, cha nyetsca soyënga cmochanjinÿanÿiye, mo tšëngaftangbiama canÿe tsëm te cuafjabinÿncá, y chë jabinÿnama ora bínÿnaye estrella tojábocna tšëngaftanga jabuabinÿnamcá.

<sup>20</sup> Pero natsana chacmësertá, ndocna palabra Bëngbe Bëtsabe uabemana palabrënguiñe tojayana canÿe soye yochjopása ca, cabá chca ndopása ora, nÿe cach Bëngbe Bëtsabe juabna oyebuambnayëngbe juabnentšana tojanóbocnama; <sup>21</sup> er Bëngbe Bëtsabe juabna oyebuambnayënga ndoñe monjanoyebuambná nÿe chënga chca jamama imnabóšeyeca, ndayá Bëngbe Bëtsabe cuenta tmojanoyebuambá, chë Uámana Espiritu chënga chca chamóyebuambama tojánmayeca.

#### Chë ndoñe ndegombre soyënga buátëmbayënga

**2** Chë Bëngbe Bëtsabe juabna oyebuambnayëngbe tempo, Israeloca entšángbeñe baseftángnaca imojamna, ndëmuanyënga imojichamo chënga ndegombre chca juabna oyebuambnayënga imojamna ca, pero ndegombre ndoñe chcanga imonjamna; cachcá, tšëngaftangbeñe abuatambayënga mochántsemna, y chënga ndoñe ndegombre soyënga mochántsabuatambaye, pero ndegombre soyëngaca cánÿiñe, chca, chënga chca imojtsabuátambama entšanga ndoñe chamondétatšëmbonama. Chë buátëmbana soyënga echanjama, entšanga ndoñe ndegombre soyënga y bacna soyënga chamotsamama. Ntšamo chënga mochántsama y mochántsabuatambaye soyëngaca, mochántsama Jesucristo ndoñe chëngbe Utabná chaondëtsemnama, cha nda chënga tojatsebacá, mo nda ínÿenga játsebacama crocénana cuafjëtsajajocá. Y chca, nÿe ndeolpe, chë Bëngbe Bëtsábocana uabouana castigo nyetsca tescama mochántsebomna. <sup>2</sup> Banga chëngbioye mochantsésetona, nyetscna bacna soye, jenomándama ntsobencá jtsamëse; y chëngbe causa, ínÿenga ndoñe tšabá quemochátoyebuambnaye chë tšabe benachama, chë ndegombre soyëngaca benache jtishachama. <sup>3</sup> Chënga bëtscá crocénana jtsebomnama yapa mochántseboše causa, ba bostero soyëngaca cmochántsaingñaye; pero Bëngbe Bëtsá tempo chëngbiama tojánayana, ndoñe tšabá imojtsamama y chëngbiama castigo nyetsca tescama chaotsemnámna.

<sup>4</sup> Bëngbe Bëtsá chë bacna soyënga tmojanma angelëngbioye ndoñe tonjanaperdoná, ndayá infernoye tojtsanatsatše y puerte ibetiñe tojtsanabáshejuana, chë uabouana tboca chamoquedama, Bëngbe Bëtsá chëngbiama nyetsca tescama castigo chamotsebom-

nama yochjayana orscama. <sup>5</sup> Y cach ndoñe quem luar-entša entšángbioye tonjanaperdoná Noé yojëftsiyena ora, y chënga jácastigama aíñe tojanma chë uabouana uaftena chëngbeñe chaotsemnama, chë nduauenana y bacna entšanga jtsapochócama. Chentšana, nÿe Noébioye, tbojanatsbocá, nda entšanga yojanabuayiná ntšamo jtsiyenana, Bëngbe Bëtsabe bominÿiñe tšabá yomncá jtsamëse; cha y inÿe canÿsëftangnaca tojanatsebacá. <sup>6</sup> Bayté entsemna, Bëngbe Bëtsánaca tojánayana chë Sodoma y Gomorra bëtspublentša entšanga, yapa bacna entšanga imojamna, bëtscastigo jtsebomnama yojánamnama; y íñesheca tojtsanapochocá, chë pueblënga y chentša entšanga jatinyá jtsabiamëntscuana. Y chë sóyeca Bëngbe Bëtsá tojaninÿanÿé ntšamo bacna entšángaftaca yochjama, chë chentšana mochtsiyena bacna entšangbiama. <sup>7</sup> Pero Bëngbe Bëtsá Lótbioye tbojanatsbocá, chë bëtspueblënga pochócaoyentšana. Cha yojamna Bëngbe Bëtsabe bominÿiñe tšabá amá, y ntšamo chë luarentša entšanga imojaniyenama, nyetscna bacna soye jtsamëse, jenomándama ntsobencá, cha puerte ngménana inabomna. <sup>8</sup> Er quem tšabe entšá, chëngbeñe oyená, chë entšanga imojtsama bacna soyënga cada te yojanonÿaye y yojanuenana ora, puerte chabe tšabe ainaniñe inasuf-rina.

<sup>9</sup> Chca, Bëngbe Utabná endobena chë Bëngbe Bëtsábioye adórayënga játsebacana padecena soyënguentšana y bacna soyënga jamama juabnënguentšana, y chë bacna soyënga jamama uamanëngna castigánënga jtsabamnama, chë ntšamo chënga imojaniyenëntscuana imojanamcá ndoñe tšabá yonjamna ca Bëngbe Bëtsá yochjayana tescama, y chënga nyetsca tescama chë bëtscastigo chamotsebomnama jamándama. <sup>10</sup> Chca ndegombre endmëna, y más chë ndëmuanyënga nÿe cachëngbe cuerpëngama bacna juabnéngaca jtsamëse imoyenëngbiama, chënga chë Bëngbe Utabnabe mando jtsaboténana. Chënga bacá buátëmbayënga mondmëna y jtsebošana nÿe ntšamo cachënga tmojtsejuabnacá chaotsemnama, y ndoñe ntsauatjana chë espíritënga obenana bomnëngbiama puerte bacna soyënga jtsóyebuambnayama. <sup>11</sup> Chamna chë angelënga, masque más añemo y obenana bomnënga mondmëna, ndoñe jenñëmuana chë espíritënga obenana bomnëngbiama chca jayanama, chëngbiama ndoñe tšabe soyënga jtsóyebuambnayëse, Bëngbe Utabnabe delante.

<sup>12</sup> Pero chë buátëmbayënga, chë cachënga ndoñe tontsésertana soyëngama puerte bacá jtsóyebuambnayana, y chca, chënga mondmëna mo tja bayëngcá, soyënga tšabá josértama juabna ndbomnënga; chënga jtsiyenana nÿe ntšamo tojtsebiona y tmojtsebošcá, y chënga jónÿnana, chámuashebuayama y chamëbáyama. Chë buátëmbayënga mo chë bayëngcá mochántsapochocaye. <sup>13</sup> Chënga mochanjasúfria, ínÿenga chamosufrima tmojama causa. Chëngbe oyejuayana endmëna nÿe chora chënga tšabá jtsemnana soyënga. Tšëngaftangaftaca cánÿiñe

mo ošbuachiyëngcá tmojtsešá ora, tšëngaftangbiamama ouatjácá jtsemnana y chëngbe causa, ínÿënga tšëngaftangbiamama podësca mochántsiichamo, er chënga chentšë oyejuayënga jtsemnana, nÿë chënga tšabá jtsemnana jtsamëse; y chënga tšëngaftangbeñe jtsemnana, tšëngaftangbioye jtsaíngñase.

<sup>14</sup> Chënga ndoñe ntsobenana canÿë shembása jinÿana, cháftaca bacna soye jamama ntsebošcá, y sempre jtsenguayana ntšamo bacna soye jamama. Chënga chë Jesucristbeñe nÿë batšá ošbuáchiyana bomnënga jtsaíngñayana, y sempre jtsentšénana nÿë más soyënga jésebošama y jésebomnana, ínÿënga tmobomnana más soyënga jashjáchama; chënga montsemna pochocánënga jtsemnana. <sup>15</sup> Chënga chë tšabe benachentšana tmojtsojuánañe, y mora mo otšëngcá montsemna. Chca chënga imojtsiyena jtsamëse, mo chë Bëngbe Bëtsabe juabna oyebuambnayá Balaamcá, cha ndoñe tšabá tonjanma orcá; Balaam Beorbe uaquiñá. Cha yapa inaboše bëtscá crocënanana juácanama ínÿëngbiamama bacna soyënga jtsamëse; <sup>16</sup> y Bëngbe Bëtsá, chábioye chabe bacna soyëngama tbojanácacana, cachabe asno chábioye chabuatsëtsama jamëse; y chca, ndoñe tbonjanlesenciá jama chë ndocna juábnaca soye jamama.

<sup>17</sup> Entšanga jtsobátmanana chënga bëtscá tšabe soyënga chamotsamama, pero chë tmojtsama soyënga tondayama ntoservénana, y chca, chënga jtsemnana mo búyeshë obocantšë tojtsebuashjá; y chënga mora canÿë soye jtsejuabnayana y chentšana inÿetšá; chca chënga jtsemnana mo jantsetëshënga bëtš bínÿiaca bonjnëshëngcá. Chëngbiamama Bëngbe Bëtsá tojayana castigo chamotsebomnana, chë más ibetoca, tondaye binÿiñe luarentšë. <sup>18</sup> Chënga ba botamana palabrëngaca jtsenábotamnayana, pero tondayama ntoservénana; y chë cabá mora Jesucristbeñe tmojtsošbuachëngbioye jtsaíngñayama, chënga ntšamo chëngbe enutënga Bëngbe Bëtsábioye nduabúatmënga imoyencá jtsiyenama imojtsajbananga. Chë buátëmbayënga chë soye jtsamama, chëngbioye jáyëñanase, nÿë cachënga tšabá jtsomñama bacna juabnéngaca soyënga chamotsamama, cachënga jenomándama ntobencá. <sup>19</sup> Chë abuátambayënga jašëbuachenana tšabe vida jónÿenama, nÿë ntšamo chënga tmojtsebošcá jtsejuabnayëse y jtsamëse; pero cachënga mondoyena cachëngbe bacna juabnéngaca mandánënga, y chca, chënga montsajna pochocánënga jtsemnana, er ndaye entšánaca mandaná jtsemnana, chë nÿets tempo tobëdecena sóyeca. <sup>20</sup> Er ndëmuanyënga, Bëngbe Utabná y Atsebacayá Jesucristo tmojtsábuatmama, tmojtsajbaná oyenana mo chë nÿë quem luarama enójuabnaye entšangcá, nÿetsca bacna soye amana y tša bacna juabnénga ainaniñe bomnana, pero mora cachiñe chë soyënguiñe tmojtésajna, y cachiñe mandánënga tmojtsemna chë bacna juabnéngaca, chënga mora más bacá tempscama jaboacanana. <sup>21</sup> Chëngbiamama más tšabá manjamna ndoñe ntjobenayana jtsetatšëmbuana ntšamo Bëngbe Bëtsabe bominiñe tšabá yomncá inétsamama, chë

soye jatabuátmanana y chentšana játajbanana chë buatëmbana soyënga y chë abuayiyayëngaftaca chëngbioye Bëngbe Bëtsá tojanoyé mandënga jtsobëdecënanana. <sup>22</sup> Pero chëngaftaca tojopasá ntšamo entšanga mondëntšayancá chca ndegombre bëtsemnana: “Chë queše chabe ashconánana tojtsemnoye jesshëconana ca” y “chë cotšë cabá chora bebená, ngüichetšoye jana jetsójanduouoyama ca”.

### Jesucristo quem luaroye jésabama ora

**3** Jesucristbeyeca atšbe bonshana catsátanga, móraca ya uta soyama cbontsëbuabiamná. Quem uta tsbuanáchaca atšë sënjábosëna jamama tšëngaftangbe juabna nÿë ena tšabe soyëngaca chaotsemnana, y chca chaotsemnamna atšë jtsabuayiyayëse chë tcmojanabuatambá soyëngama. <sup>2</sup> Atšë sëntseboše tšëngaftanga chašmotsenojuabná, ntšamo chë inÿë tempënga ora, chë nÿë Bëngbe Bëtsábioye jtsoservénëse, chabe juabna oyebuambnayënga tmojánayanama, y chë Bëngbe Utabná y Atsebacayabe buatëmbana soyëngama y mandëngama, ndayá chabe ichmónëngaftaca tšëngaftanga šmojanóyëngacñe.

<sup>3</sup> Pero masna quem soye chacmotsésertana: Jesucristo quem luaroye jésabama tempo chaojtsobeco ora, mochántsemna entšanga y chënga mochantsiyëna nÿë cachënga tšabá jtsomñama bacna juabnéngaca, y cmochantsëbuayajuana, chë Cristo yochjésabama šmošbuáchema. <sup>4</sup> Chënga mëntšá mochántsiichamo: “Cristo tcmojanašëbuachená quem luaroye jésabama. ¿Ndegombre chca? Chcase, ¿ndayentšë cha yojtsemna? Bëngbe bëtšëtsanga, ndëmuanyëngbioye cha tojanašëbuachená quem luaroye jésabama, ya tmonjóbana, y quem luarentšë lempe cachcá endesomñe, ntšamo quem luare tojanobojatšë orscana enjamncá ca.” <sup>5</sup> Chë entšanga ndoñe ntsebošana jtsejuabnayana ya bayté yojtsemna, Bëngbe Bëtsá tojanmandá y chca tojanma celoca y quem luare chaotsemnana. Cha quem luare tojanma búyeshentšana y búyeshëca; <sup>6</sup> y cach búyeshëcnaca, chë uabouana uaftenentša béjayëca, ya bayté yojtsemna, cha lempe quem luarentšë yojanbinÿncá tojtsanpochocá. <sup>7</sup> Pero chë mora entsemna celoca y quem luare, cach Bëngbe Bëtsabe mándoca, ndoñe quenátópodena chamotseepochocama, chë Bëngbe Bëtsá jayanama chábioye ndoñe mondadoránënga ntšamo tmojamcá ndoñe tšabá yonjamnama, y chë bacna soyënga tmojamama nÿetsca tescama castigo chamotsebomnana jamándama tempo candóshjanguëntscuana. Chora Bëngbe Bëtsá, celoca y quem luare iñeshëca echantsepochoá.

<sup>8</sup> Pero, atšbe bonshánënga, canÿë soye endmëna y chë soye ndoñe chacmondëbnëtjomba: Bëngbe Utabnabe juabnama, canÿë te endmëna mo canÿë uaranga uatcá, y canÿë uaranga uata mo canÿë tecá. <sup>9</sup> Ndoñe quenátsmëna, ntšamo báseftanga jtsejuabnayana, ntšamo tojašëbuachenacá cha ndoñe betesco yochanja ca, chë cha quem luaroye jésabama, ndayá chana puerte uantado tšëngaftangaftaca comna; er cha jtse-

bošana ndocná nÿetsca tescama castigo chaondétse-bomnama, ndayá nÿetscanga bacna soyënga amana jtsajbanase, Bëngbe Bëtsabe tšabe benache chamuashjáchama.

<sup>10</sup> Pero Bëngbe Utabná echanjésabo ndocná chama chaondétsejuabná ora, mo canÿe atbëbanacá jashjanguana, ndocná chama tontsejuabná ora. Chora celoca echanjopochóca, canÿe jabuache shauenanána, y quem luare ndaye soyënguentšana yomnana íñeshca echántsefjatëjo, y ndayá Bëngbe Bëtsá y entšanga quem luarentše tmojamcá, lempe echántsejuinÿe.

<sup>11</sup> Lempe chca japochócama entsémnyeyca, ndegombre tšëngaftanga cmontsamna jtsiyenana ntšamo chë Bëngbe Bëtsabe entšanga jtsiyenana entsamncá, y nÿets tempo jtsamëse chë Bëngbe Bëtsábioye jtsatschuanayama yomna soyënga, <sup>12</sup> tšëngaftanga chë Jesucristo quem luaroye jésabama chaóshjanguama š-mojtsobátmanëntscuana; y nÿa šmochtsentšena cha más betsko cháuesabama. Chë te íñeshca celoca echántsejuinÿe, y ndaye soyënguentšana quem luare yomnana cach íñeshca echántsefjatëjo. <sup>13</sup> Pero bënga mondobátmana ntšamo cha šojašebuachenacá: canÿe tsëm luare, mo canÿe tsëm celoca y tsëm fshantscá, y chentše nÿetscanga mochantsiyena ntšamo Bëngbe Bëtsabe bominÿiñe tšabá yomncá jtsamëse.

<sup>14</sup> Chíyeca, atšbe bonshánënga, chë soyënga chaotsemnama šmojtsobatmanëntscuana, nÿa chiñe šmochtsentšena, chca, cha yochjésabo ora, chacmanÿena oyeniñe tšabá Bëngbe Bëtsáftaca jtsatsmënëse, ínÿengaftaca natjëmbana jtsiyenëse; chacmanÿena ainaniñe ndocna bacna soye ndobomnënga, y puerte tšabá jtsamëse oyeniñe; chca, ndocná chaondobená jayanama tšëngaftanga ndaye bacna soye šmojama ca. <sup>15</sup> Quem soye šmochtsejuabnaye: Bëngbe Atseba-

cayá ndoñe yapa betsko tonjésabësna, chca jtsemnana cha puerte uantado nÿetscángaftaca yómnyeyca; chca cha yomna, ba entšanga chë bacna soyënga amana chámajbanama y chabe benache chámuatishachama y chca, atsebácanënga chamotsemnama. Cach quem soyëngámna, Jesucristbeyeca bëngbe bonshana catšata Pablo tcmonjanëbuábiama, chë Bëngbe Bëtsá tojanma cha chaotsebomnama osertanána. <sup>16</sup> Chë soyëngama, Pablo nÿetsca chabe tsbuanáchangañe tonjanoyebuambá. Chëchangañe endmëna soyënga totcá josértama; y chë soyëngama, chë Bëngbe Bëtsabe soyëngama ndoñe tmonjuatsjínÿënga, y chë mora canÿe soye jtsejuabnayana y chentšana ínÿetšá juabnayënga, jtsejuabnayana y ínÿengbioye jtsabuayinyayana ndoñe ndegombre yondmëna ca. Y cachcá jtsamana ínÿe soyëngaca, Bëngbe Bëtsabe uabemana palabrënguiñe. Chca chënga montsajna pochocánënga jtsemnama.

<sup>17</sup> Chíyeca, atšbe bonshánënga, tšëngaftanga chë ya šmojtsetátšëmbo chë ndoñe ndegombre soyënga abuátambayënga mochtsemnama, yejuana šmochtsantješna; chca, chë Bëngbe Bëtsá ntšamo yomandacá ndobedecenëngbe soyëngaca ínÿënga jáingñama, tšëngaftanga ndoñe chašmondétsemna mo uambanëngcá, ndoñe chašmondétsajbanama jtsebomnana chë Bëngbe Bëtsabe soyënga ntšamo šmojashjachcá. <sup>18</sup> Pero atšna, Bëngbe Utabná y Atsebacayá Jesucristo séntseimpadana, tšëngaftanga chašmotsiyena jtsamëse, chë chábentšana šmojóyëngacñe ba soyënga ntšamo tomnama jtsejuabnayëse, y chaoma tšëngaftanga cada te más tšabá cha chašmotsábuatmama. ¡Nÿetscanga cha chamotsatschuaná, mora y nÿetsca tescama! Chca chaotsemna.

# 1 San Juan

**Cristo, chë nyetsca tescama yomna tšabe vida entšanga chamotsebomnama amá**

**1** Bënga cbontsëbuabiamná chë Bëngbe Bëtsá ndabiajana inétsoyebuambnabiama, chë nyetsca tescama yomna tšabe vida entšanga chamotsebomnama iuamabiama, chë Bëngbe Bëtsá cabá quem luare ndëma orscana ya yojamnabiama. Bëngbe matscuašéngaca chabe oyebeambnayana fsënjouena y bëngbe bomínýeca cha tonjama soyënga fsënjinye. Aíñe bënga cha fsënjinye y bëngbe cucuátšeca fsënjábojajo. <sup>2</sup> Cha bëngbentše tonjanonýná y fsënjáninye; chíyeca bënga chabiama cbontsëtsëtsná y cbontsabuyayná, nda sempre vida yobomna y nda chë nyetsca tescama yomna tšabe vida entšanga chamotsebomnama iuama. Chaña, chë Taitá Bëngbe Bëtsáftaca inamna, pero mora bëngbioye šojinýanyé. <sup>3</sup> Bënga tšëngaftanga cbontsabuyayná ntšamo tifjinye y tifjouencá, tšëngaftanga cánýiñe mo canýacá bëngaftaca chašmotsemnama. Bënga cánýiñe mo canýacá fsëndmëna chë Taitá Bëngbe Bëtsáftaca y chabe uaquiñá Jesucristoftaca. <sup>4</sup> Bënga quem soyënga tšëngaftanga cbontsëbuabiamná, bëngbe oyejuayana corente bëtscá chaotsemnama.

**Bëngbe Bëtsá endmëna chë entšangbiama binýnayá**

<sup>5</sup> Mëntšá entsemna ntšamo Jesucristbentšana tifjouencá y chca tšëngaftanga cbontsabuyayná: Bëngbe Bëtsábeñe lempe binýniñe, lempe tšabá endmëna, y chábeñe tondaye ndoñe chca quenátsmëna. <sup>6</sup> Bënga tmojtsichamo cháftaca cánýiñe mo canýacá fsëntsemna ca, pero cabá ndoñe Bëngbe Bëtsabe cucuátšinye, chë binýniñe tmontsemna, y chca, bacna soye juabnyënga y amënga tmojtsiyena, asna, bënga mojtsebostero y ndoñe montsama ntšamo ndegombre yomncá. <sup>7</sup> Pero bënga chë binýniñe tmojtsiyena, tšabe soye juabnyënga y amënga ntšamo Bëngbe Bëtsá iuamcá, as nyetscanga cánýiñe mo canýacá mochántsemna, y chabe uaquiñá Jesucristbe uabuáshanana buíñeca, Bëngbe Bëtsá bëngbe bacna soyënga sempre šochántsabujuanaye, y echanjama bënga chabe delante tšabá chamotsatsmënama.

<sup>8</sup> Bënga bacna soyënga ndoñe queftsátsbomna ca tmojtsichámëse, chca cabënga jtsenoíngñayana y ainaniñe chë ndegombre soyënga ndoñe tmonjýëngacñe; <sup>9</sup> pero bënga ndegombre bacna soye amënga fsëndmëna ca, Bëngbe Bëtsá tmojuayanëse, cha bënga šochanjínýanyíye cachá chë ntšamo šojiytsaše-

buachecá amá y nyetsca soyënguiñe tšabá amá yomnama; y chca, nyetsca bëngbe bacna soyënga šochanjáperdonaye y nyetsca bacna soyënga šochanjábuajuanaye. <sup>10</sup> Bënga tmojtsichamo, bacna soyënga ndoñe chibiatsma ca, chca bënga muattsichamo mo Bëngbe Bëtsá canýe bostero cuaftsemncá, y ntšamo Bëngbe Bëtsá bënga šojauyancá ainaniñe ndoñe tmonjýëngacñe.

**Cristo, bëngbe obuauyayá**

**2** Tšëngaftanga mo atšbe basengcá, er atše tcbonjanéjabuache Jesucristbe tšabe noticiënguiñe chašmotsošbuáchemá, quem soyënga cbontsëbuabiamná bacna soyënga ndoñe chašmondétsamama. Pero ndánaca Crístbeñe ošbuachiyënguentšá bacna soye tojamëse, bënga canýe obuauyayá Bëngbe Bëtsabe delante montsebomna, y cha endmëna Jesucristo, chë nyetsca soyënguiñe tšabá amá. <sup>2</sup> Jesucristo tonjanóbana ndoñe nye Bëngbe Bëtsá bënga chášuaperdonama bëngbe bacna soyëngama, ndayá quem luarentša nyetsca entšángnaca chëngbe bacna soyëngama cháuaperdonama.

<sup>3</sup> Bënga ntšamo Bëngbe Bëtsá šojtsamëndacá tmojtsamëse, ndegombre mochántsetatšëmbo bënga cha imuábuatmama. <sup>4</sup> Pero nda tojayana: "Atše Bëngbe Bëtsá sënduábuatma ca", pero ndoñe tontsama ntšamo Bëngbe Bëtsá ibumëndacá, cha canýe bostero jtsemnana y ainaniñe chë Bëngbe Bëtsabe ndegombre soyënga ndoñe tonjýëngacñe. <sup>5</sup> Pero nda ntšamo Bëngbe Bëtsá ibumëndacá tojtsama, jtsinýanýayana chabe ainaniñe Bëngbe Bëtsabiama corente bonshánana yomnama, y chca, mochántsetatšëmbo bënga sempre cánýiñe mo canýacá cháftaca imomnama. <sup>6</sup> Nda tojtsichamo Bëngbe Bëtsáftaca cánýiñe mo canýacá yojtssemna ca, bontsemna jtsiyenana soyënga jtsamëse ntšamo Jesucristo yojétsiyencá.

**Canýe tsëm mando**

<sup>7</sup> Atšbe bonshana entšanga, ntšamo mora cbontsëbuabiamnacá, ndoñe canýe tsëm mando quenátsmëna, pero aíñe canýe tempsca mando; entsemna cach tšëngaftanga Cristbe ústonënga šmonjanobiama ora šmonjanóyëngacñe mando. Quem tempsca mando entsemna ntšamo tšëngaftanga bëngbentšana šmonjouencá. <sup>8</sup> Pero masque chca endmëne, quem cbontsëbuabiamná soye tšëngaftangbiama echántsemna mo canýe tsëm mandcá. Cristo

enjéftsiyena ntšamo quem Bëngbe Bëtsabe mando ndegombre yomncá y tšëngaftángnaca cachcá šmon-doyena, er chë bacna juabnënga jtsebomnëse mo ibetiñcá jtsiyenana tempo ya echanjochnëngo, y chë entšangbe juabna ndegombre binÿnayá ya entse-buashinÿinÿana.

<sup>9</sup> Nda tojayana chë binÿnayáftaca yojtsemna ca, pero cha chabe catšátbioye tbojtsáboyënja, cha cabá tempcá, bacna juabnënga jtsebomnëse yojtsiyena, mo ibetiñcá. <sup>10</sup> Nda chabe catšátbioye tbojtsebobonshana, cha chë binÿnayáftaca jtsiyenana, y tondaye queochátsmëna cha bacna soye chaotsamama. <sup>11</sup> Pero nda chabe catšátbioye tbojtsáboyënja, cha bacna juabnënga jtsebomnëse jtsiyenana, mo canÿa ibetiñe oye-nacá. Cha ndoñe ntsetatšëmbuana chë ndayá tojama-ntšamo chentšana yochjopása, er chë bacna juabnënga jtsebomnëse jtsiyenana chábioye ndoñe nt-jalesénciana ntšamo tšabá yomncá chaotsamama.

<sup>12</sup> Básenga, atše cbontsëbuabiamná Bëngbe Bëtsá tšëngaftangbe bacna soyënga tcmojáperdonama, ndayá Jesús tojanma sóyeca. <sup>13</sup> Taitanga, tšëngaftanga cbontsëbuabiamná, er tšëngaftanga ya šmonjuábuatmana chë quem luare jobojátšama orscana ya inamná. Tšëngaftanga bobontsëgnaca cbontsëbuabiamná, er tšëngaftanga ya chë nyetsca bacna soyënga mandayá Satanás šmonjayënjaná.

<sup>14</sup> Básenga, tšëngaftanga tcbonjubuábiamna, er tšëngaftanga chë Taitá ya šmonjuábuatmana. Taitanga, tšëngaftanga tcbonjubuábiamna, er tšëngaftanga ya šmonjuábuatmana chë quem luare jobojátšama orscana ya inamná. Bobontsënga, tšëngaftángnaca tcbonjubuábiamna, er tšëngaftanga bëtscá añemo ainaniñe šmambá, y Bëngbe Bëtsabe palabrama sempre tšëngaftangbe ainaniñe šmondëjuabná, y chë nyetsca bacna soyënga mandayá šmonjayënjaná.

<sup>15</sup> Ndoñe matsbošana oyejuayënga jtsemnana nÿe quem luarentša soyëngaca, ni nÿe chë soyënga jtsebomnana. Nda yapa tojtseboše quem luarentša bacna soyënga jtsebomnana, cha ndoñe chë Taitábioye bondbobonshana. <sup>16</sup> Er chë nÿe quem luarama enójuabnayënga mëntšá juabnënga mondbomna: yapa jtsebošana jtsebomnana ntšamo chë ainaniñe bacna juabnënga bomnënga mondbetsebošcá; yapa jtsebošana nÿe ndayá tmojatinÿe soye; y yapa jtsenábotamnayana chë tmobomna soyëngama. Chë juabnënga Bëngbe Bëtsábocana ndoñe ntsóbocanana, ndayá nÿe chë quem luarama enójuabnayëngbentsana.

<sup>17</sup> Pero quem luare echanjopochóca y nyetsca chentša soyënga, chë entšanga bacna juabnëngaca yapa imo-boše jtsebomnana soyëgnaca. Pero nda ntšamo Bëngbe Bëtsá yobošcá tojtsama, cha chë nyetsca tescama yomna tšabe vida echántsebomna.

### Chë Cristbe contra yomná

<sup>18</sup> Básenga, quem luare jopochóca tempo ya entsobeco. Ntšamo tšëngaftanga šmonjouencá, quem tempo echanjabo chë Cristbe contra yomná. Pero morna banga Cristbe contra imomnënga tmonjábocana.

Chca bënga montsetátšëmbo chë quem luare jopochóca tempo ya yojtsobecuama. <sup>19</sup> Chënga cach bëngbentsana tmonjábocana. Pero chënga Jesucristbeñe ndoñe tmonjanošbuachená ntšamo bënga mondošbuachecá, er chënga ntšamo bënga montsošbuachecá mamojtsošbuachese, cach bëngaftaca matmënjoquedanga. Pero chca tonjopasá, ndegombre jtsotatšëmbuama ntšamo bënga Jesucristbeñe mondošbuachecá, chënga nyetscanga ndoñe mondošbuáchema.

<sup>20</sup> Pero Cristo, chë Uamaná, tšëngaftanga tcmonjabacacá, y cha tonjama chë Uámana Espiritu tšëngaftangbe ainaniñe cháumashënguama; y nyetsca tšëngaftanga chë ndegombre soyënga šmondëtatšëmbo. <sup>21</sup> Atše cbontsëbuabiamná, ndoñe chë ndegombre soyëngama ndoñe šmondëtatšëmbuama, ndayá añe šmotatšëmbuama; er tšëngaftanga šmondëtatšëmbo chë ndegombre soyënga y ndoñe ndegombre soyënga cánÿiñe jtsemnana ndoñe yondopodénama. <sup>22</sup> Nda tojayana Jesús chë Bëngbe Bëtsabe Uámana Uabuayaná, chë Cristo ndoñe yondmëna ca, chana jtsebošterana. Cha jtsemnana chë Cristbe contra yomná, nda iuichamo Cristo Bëngbe Bëtsabe Uaquiñá ndoñe yondmëna ca, y chca, cha Bëngbe Bëtsabiama ndoñe ntsejuabnayana cha chë Taitá bëtsemnana. <sup>23</sup> Nda tojtsichamo Cristo Bëngbe Bëtsabe Uaquiñá ndoñe yondmëna ca, cha chë Taitáftaca cánÿiñe mo canÿacá ndoñe ntsemnana. Pero nda entšángbeñe tojayana, Cristo añe Bëngbe Bëtsabe Uaquiñá endmëna ca, chana añe chë Taitáftaca cánÿiñe mo canÿacá jtsemnana.

<sup>24</sup> Tšëngaftanga, chë Cristbe ústonënga šmojanóbiama orscana šmojanuena soye, tšëngaftangbe ainaniñe šmochtsambaye. Chca chašmojtsamëse, tšëngaftanga chë Uaquiñá y chë Taitáftaca cánÿiñe mo canÿacá šmochántsemna. <sup>25</sup> Y quem soye entsemna ntšamo Cristo šojéftsašebuachená: chë nyetsca tescama yomna tšabe vida jtsebomnana.

<sup>26</sup> Atše chca cbontsëbuabiamná, chë tšëngaftanga jáingñayama imojtsebošëngbiama chašmotsetatšëmbuama. <sup>27</sup> Pero Cristo tcmojanabacacá ora, Uámana Espiritu šmojanóyëngacñe, y mora tšëngaftangbe ainaniñe Uámana Espiritu šmontsebomna, y ndoñe quenátsiyta ndocná más chacmotsabuátambama, er chë Uámana Espiritu lempe cmontsabuatambá; y cha endabuatambá ndegombre soyënga, y bostero soyënga ndoñe. Mëntšá, ntšamo chë Uámana Espiritu tcmojabuatambacá jtsiyenëse, Crístoftaca cánÿiñe mo canÿacá šmochtsemna.

<sup>28</sup> Y mora básenga, Crístoftaca cánÿiñe mo canÿacá šmochtsemna, chca, cha chaojabáisebocna ora, chábeñe jtsošbuáchiyëse, bënga añémoca chamotsemnana y ndoñe chamondëtsëuatjama, bënga chabe delante chamojtsemna ora. <sup>29</sup> Tšëngaftanga šmontsetátšëmbo Jesucristo nyetsca soyënguiñe tšabá amá yomnana. Chcasna, cmontsamna jtsetatšëmbuana, nyetscanga ntšamo Bëngbe Bëtsá yobošcá tmojtsamëngna, Bëngbe Bëtsabe básenga imomnana.

### Cristbeñe ošbuáchiyënga, Bëngbe Bëtsabe básenga

**3** Menójuabonga, ntsachetsá Bëngbe Bëtsá chë Taitá šondábabuanÿeshanama. Chabe bonshánana tša bëtscá endménayeca, bënga šondëubuabu-atma chabe básenga ca, y ndegombre bënga chca mondmëna. Chë causa chë nÿe quem luarama enójuabnayënga ndoñe quenátësertana ntšamo bënga imomnama, er chënga cha ndoñe tmonjanábuatmana. <sup>2</sup> Atšbe bonshana entšanga, mora bënga ya Bëngbe Bëtsabe básenga montsemna. Y masque cabá ndoñe quemúatstatšëmbo ntšamo más chcoye bënga mochjamnama, aíñe mondétatšëmbo, Jesucristo chaojabáisebocna ora bënga cachacá mochsemnama, er bënga mochanjobenaye jinÿama ntšamo cha ndegombre yomncá. <sup>3</sup> Y nda chca chábeñe puerte jtsošbuáchiyëse tojtsobátmana, bacna soyënga amana jtsajbanana, más tšabia jtsemnama, ntšamo cach Cristo yomncá, lempe tšabia y bacna soye ndbomná.

<sup>4</sup> Pero nda bacna soye tojama, chana ntšamo Bëngbe Bëtsá tojëftsemandacá jtsaboténana; er bacna soye jamana endmëna, jtsabotena ntšamo Bëngbe Bëtsá tojëftsemandacá. <sup>5</sup> Tšëngaftanga ya šmondétatšëmbo Jesucristo quem luaroye tojánabo bëngbe bacna soyënga jabétsabuajuanama, y cha ni mo canÿe bacna soye ndoñe yondbomnama. <sup>6</sup> Chcasna, nda cánÿiñe mo canÿacá cháftaca nÿets tempo tojtsemna, ndoñe ntsiyenana bacna soyënga jtsamëse. Pero nda tojtsiyena bacna soyënga jtsamëse, Jesucristbiamana ndoñe tbonjosertá y ndoñe yondétatšëmbo ntšamo cha bëtsemnama. <sup>7</sup> Atšbe básenga, ndocná chacmondaingñé: nda nÿetsca soyënguiñe tšabá tojtsama, cha canÿe tšabá mándbomna entšá jtsemnana, ntšamo Jesucristo yomncá; <sup>8</sup> pero nda tojtsiyena bacna soyënga jtsamëse, chabe ainaniñe Satanás jtsemándayana, er Satanás quem luare jobojátšama orscana bacna soyënga iuétsama. Bëngbe Bëtsabe Uaquiñá nÿa quem soyama tojabo: chë Satanásbe soyënga jabétseepochocama.

<sup>9</sup> Ndocná Bëngbe Bëtsabe uaquiñá tojtsemná jtsiyenana bacna soyënga jtsamëse, er cha jtsebomnana chë Bëngbe Bëtsá tbojuántšame tšabe vida, y Bëngbe Bëtsá chabe Taitá endmëna. Chíyeca cha ndoñe ntsiyenana bacna soyënga jtsamëse. <sup>10</sup> Corente jtsotatšëmbuana ndëmuanÿënga Bëngbe Bëtsabe básenga imomnama y ndëmuanÿënga Satanásbe básenga; ndëmuanÿëngnaca ntšamo tšabá yomncá ndoñe tmontsama o chabe catšata ndoñe tmontsebobonshana, ndoñe ntsemnana Bëngbe Bëtsabe básenga.

### Nÿetscanga jtsebomnánana

<sup>11</sup> Quem buayenana entsemna ntšamo tšëngaftanga šmojanuena, tšëngaftanga Cristbe ústonënga šmonjanobiama orscana: nÿetscanga šontsamna jtsebomnánana. <sup>12</sup> Ndoñe Caincá muatjama. Chabe ainaniñe Satanás yojamánda, y chíyeca, chabe uabentsábioye tbojtsanóba. ¿Y ndáyeca tbojtsanóba?

Cha ndoñe tšabá yonjánama; chabe uabentsana aíñe; chíyeca tbojtsanóba.

<sup>13</sup> Jesucristbeyeca atšbe catšátanga, ndoñe šmattsenjanaye chë nÿe quem luarama enójuabnayënga cmojtsébuayënjama. <sup>14</sup> Bënga mondétatšëmbo, bënga tempo monjaniyena chë nÿe quem luarama enójuabnayënga mondoyencá, y chca, Bëngbe Bëtsabiamana mo obanëngcá monjamna, er bënga monjaniyena ntšamo Bëngbe Bëtsá ndoñe yondëmandacá. Pero Bëngbe Bëtsá tonjama mora bënga tsëm vida chamotsebomnama, y chca, mo ndegombre ainëngcá montsemna. Chca mondétatšëmbo, er bënga bëngbe catšátangbioye mondábabuanÿeshana. Nda chabe catšátbioye ndoñe tbonsebomnana, cha cabá mo obanacá jttsiyenana. <sup>15</sup> Nda cachabe catšátbioye tbojtsáboyëña, cha jtsemnana mo entšanga obanayacá. Y tšëngaftanga šmondétatšëmbo entšanga obanayá ndoñe ntsoberenana jtsiyenana, chë nÿetsca tescama yomna tšabe vida chabe ainaniñe jtsebomnëse.

<sup>16</sup> Ndayá chë jtsebomnánana bëtsemnama mëntšá montsetatšëmbo: Jesucristo chabe derecho vida jtsebomñama cachcá tojanonÿá y bëngbiamana tojanóbana; cachcá bënga šontsamna jtsemnama, sempre jtseprontánana chë Jesucristbeyeca bëngbe catšátangbiamana jóbanama. <sup>17</sup> Canÿa bomnana tojtsebomna y catšátbioye uajabotá tbojtsionÿá, pero chabiamana ndoñe tbonjongmé y ndoñe tbonjuájabuache, cha ndoñe ntsoberenana Bëngbe Bëtsabiamana ainaniñe bonshánana jtsebomnana. <sup>18</sup> Atšbe básenga, ndoñe quešnátamna nÿe bëngbe catšátanga imuababuánÿeshana ca jatichámuana, y nÿe chë bonshánama jatoyebuambnayana; pero ndegombre šontsamna ndayánaca jamana, chca, jinÿanÿiyama, bënga ndegombre ínÿengbiamana imuababuánÿeshanama.

### Bëngbe Bëtsabe delante natjémbana ainánaca entšanga

<sup>19</sup> Chcase bënga mochántsetatšëmbo, ntšamo chë Bëngbe Bëtsabe ndegombre soyënga yomncá bënga imojtsamama. Y bënga ndoñe quemochátenocochinÿena, Bëngbe Bëtsábioica jtsemnama mercedo ndoñe mondbuájona ca tmojtsejuabná ora; y bëngbe ainana natjémbana Bëngbe Bëtsabe delante echántsemna. <sup>20</sup> Bënga chca bëngbe ainaniñe tmojtsejuabná ora, bënga montsobena natjémbana ainana jtsebomnana, er Bëngbe Bëtsá corente jtsotatšëmbñana ntšamo bëngbe ainana yomnana, y cha lempe yotátšëmbo. <sup>21</sup> Atšbe bonshana entšanga, bënga ndoñe bacna soye tmonjama ca bëngbe ainaniñe tmojtsejuabnase, jtsoberenana añémoca jtsemnana y tondayama ntsuatjácá Bëngbe Bëtsabe delante jtsemnana. <sup>22</sup> Y cha lempe ntšamo chamojotjañcá šochanjátšataye, er bënga montsama ntšamo Bëngbe Bëtsá ibuamandacá y ndayá chabe bominiñe tšabá yomncá. <sup>23</sup> Y chabe mando endmëna: bënga chabe Uaquiñá Jesucristbeñe jtsošbuáchiyana, y bënga nÿetscanga jtsebomnánana ntšamo Jesús šojëftsamëndacá. <sup>24</sup> Ntšamo Bëngbe Bëtsá tojëftsemandacá

amënga, Bëngbe Bëtsáftaca cánýiñe mo canýacá jtsemnana, y cha sempre chëngaftaca cánýiñe mo canýacá echanjéftsemna. Y quem sóyeca bënga montsobena jtsetatsëmbuana cha bëngaftaca iuétsemnama: Uámana Espíritu bëngbe ainaniñe cháua-mashënguama cha tojama.

#### Chë Bëngbe Bëtsabe Espíritu y chë Cristbe uayayabe espíritu

**4** Atšbe bonshana entsãnga, nyetscanga chë Bëngbe Bëtsabe juábnaca imoyebuambná ca ichámëngbioye ndoñe šmattsayaunana; botamana š-mochjuarrepára corente jtsetatsëmbuama chënga aíñe o ndoñe chë Bëngbe Bëtsabe juábnaca imóye-buambnama. Quem tempo banga Bëngbe Bëtsabe ndoñe ndegombre juabna oyebuambnayënga quem luarëjana mondajna. Chë causa tsëngaftanga cmontsamna botamana chëngbiamu juarrepáranu. <sup>2</sup> Chë Bëngbe Bëtsabe Espíritu ndegombre imobom-nëngbiamu tsëngaftanga mëntšá šmontsobena jtsetatsëmbuana: nda tojayana Jesucristo quem luaroye aíñe entsacá tojánabo ca, cha ndegombre chë Bëngbe Bëtsabe Espíritu yojtsebomna. <sup>3</sup> Pero nda ndoñe chca Jesucristbiama tonjayana, cha Bëngbe Bëtsabe Espíritu ndoñe yontsebomna; inýetšá, chana chë Cristbe contra yomnabe espíritu yojtsebomna. Tsëngaftanga šmojouena chë espíritu yochjabama; pero ndegombre cha ya quem luarentše entsemna.

<sup>4</sup> Atšbe básenga, tsëngaftanga Bëngbe Bëtsábenga šmondmëna y ndoñe šmonjalesenciá chë Bëngbe Bëtsabe ndoñe ndegombre juabna oyebuambnayënga tsëngaftangbioye chacmaingñema, er chë nyets tempo tsëngaftangbe ainaniñe vida endbomná, chë nyë quem luarama enójuabnayëngbe ainaniñe mán-dayabiamu más obená endmëna. <sup>5</sup> Chë Bëngbe Bëtsabe ndoñe ndegombre juabna oyebuamb-nayëngna chë nyë quem luarama enójuab-nayënguentšana mondmëna, chíyeca chënga nyë quem luarentša soyëngama jtsóyebuambnayana, y chë nyë quem luarama enójuabnayënga chënga jtsayaunanana. <sup>6</sup> Pero bënga Bëngbe Bëtsábenga mondmëna. Nda Bëngbe Bëtsábioye tbojtsabuatma, bëngbioye jtsayaunanana; pero nda Bëngbe Bëtsábioye ndoñe tbontsabuatma, cha bënga ndoñe ntsayaunanana. Chiñe bënga montsobena jtsetatsëmbuana nda chë ndegombre soyënga jóyebuambayama ama espíritu yobomnabiamu, y nda chë inýengbioye jáingñama ama espíritu yobomnabiámna.

#### Chë bonshánana Bëngbe Bëtsábocana yóbocana

<sup>7</sup> Atšbe bonshana entsãnga, chë bonshánana Bëngbe Bëtsábocana endóbocana; chcase, bënga šontsamna nyetscanga jtsenbobonshánana. Nda Bëngbe Bëtsábioye y chë inýe entsãngbioye tojtsababuánýeshana, cha Bëngbe Bëtsabe uaquiñá jtsemnana y Bëngbe Bëtsábioye jtsabuatmana. <sup>8</sup> Nda ndoñe chca tontsebobonshana, cha Bëngbe Bëtsábioye

sábioye ndoñe ntsábuatmana, er Bëngbe Bëtsá bonshánana nyetsca soyënga jamana. <sup>9</sup> Bëngbe Bëtsá šonjinýanýe bënga šuababuánýeshanana, cha chë nyë canýe Uaquiñá ibobomná quem luaroye jíchmuase; cha tbojanichmó, bënga chábeyeca chë nyetsca tesca-ma yomna tsabe vida chamotsebomnama. <sup>10</sup> Bëngbe Bëtsabe bonshánana mëntšá endmëna: ndoñe quenátsmëna bënga Bëngbe Bëtsá imobobonshánayeca, ndayá cha bënga šojánababuanýeshanayeca, y chabe Uaquiñá tbojanichmó, cha jóbanyë, bënga bëngbe bacna soyëngama perdonánënga chamotsemnama.

<sup>11</sup> Atšbe bonshana entsãnga, Bëngbe Bëtsá chca šuababuánýeshana; chcasna, bëngnaca šontsamna nyetscanga jtsenbobonshánana. <sup>12</sup> Ndocná ndocna te Bëngbe Bëtsábioye tbojinýe. Bënga nyetscanga tmojtsenbobonshánë, Bëngbe Bëtsá nyets tempo bëngaftaca echántsemna, y chabe bonshánana puerte bëtscá bëngbeñe echántsemna. <sup>13</sup> Bënga mëntšá montsobena ndegombre jtsetatsëmbuana bënga Bëngbe Bëtsáftaca imomnama y cha bëngaftaca: cha tonjanmu chabe Espíritu bëngbe ainaniñe cháua-mashënguama. <sup>14</sup> Y cach bënga fsënjinyë y entsãnga fsëntsëtsëtsná, chë Taitá chabe Uaquiñá tbojichmoma, quem luarentša entsãnga jabátsebacama. <sup>15</sup> Ndánaca tojayana Jesús Bëngbe Bëtsabe Uaquiñá yomna ca, cha Bëngbe Bëtsáftaca cánýiñe echántsemna y Bëngbe Bëtsánaca sempre cháftaca cánýiñe mo canýacá.

<sup>16</sup> Chcase bënga montsetatsëmbu y montsošbuaché ndegombre Bëngbe Bëtsá bënga šuababuánýeshanama. Bëngbe Bëtsá nyetsca soyënga bonshánana jamana y nda Bëngbe Bëtsá y chë inýe entsãnga sempre tojtsababuánýeshana, cha Bëngbe Bëtsáftaca cánýiñe mo canýacá jtsemnana y Bëngbe Bëtsánaca sempre cháftaca cánýiñe mo canýacá. <sup>17</sup> Chca, Bëngbe Bëtsabe bonshánana puerte bëtscá bëngbeñe echántsemna, bënga bëts añémoca y tondayama ntsauatjá chamotsemnama, chë tsabá o ndoñe tsabá tmonjamama entsãngbiamu jayanamu Cristo yochjésabo orscama; er bënga Jesucristoftaca cánýiñe mo canýacá jtsemnë, quem luarentše mondmëna ntsámo Jesucristo endmëncá. <sup>18</sup> Nda Bëngbe Bëtsá y chë inýe entsãnga tojtsababuánýeshana, tondayama ntsauatjana; bënga corente tmojtssebobonshana ora, ndoñe ntsopodë-nana uatjana jtsebomnana. Canýe entsá tojtsauatja ora, jtsemnana mo chabe castigo ya cuafjoboatšecá. Chca, nda uatjana tojtsebomna, Bëngbe Bëtsábioye y chë inýe entsãnga cha ndoñe corente yondábabuanýeshana, ntsámo Bëngbe Bëtsá bënga šuababuanýeshancá.

<sup>19</sup> Natsana Bëngbe Bëtsá šojánababuanýeshana, y chíyeca bënga, cha y chë inýe entsãnga imuababuánýeshana. <sup>20</sup> Nda tojayana: "Atšë Bëngbe Bëtsábioye sëndbobonshana ca", pero cachca ora cachabe catšátbioye tbojtsáboyënja, cha canýe bos-tero jtsemnana. Canýa aíñe jtsobenana chabe catšata jinýama; y cha chë catšátbioye ndoñe tbontsebobon-

shana, ndegombre cha Bëngbe Bëtsábioye ndoñe bondbobonshana, ndábioye jinýama ndoñe ntsobenanana. <sup>21</sup> Y bënga quem mando chábenshana tmonjanóyëngacñe: nda Bëngbe Bëtsábioye tbojtsebobonshana, cachabe catsátbioynaca chabotsebobonshana ca.

**Chë Jesucristbeñe ošbuachiyá endobena Satanásbe soyënga jayëñjanana**

**5** Nda tojtsošbuaché Jesús chë Uámana Uabuayaná, chë Cristo yomnama, cha Bëngbe Bëtsabe uaquiñá jtsemnana; y nda canýe taitábioye tbojtsebobonshana, chë taitabe uaquiñábioynaca cha jtsebobonshánana. <sup>2</sup> Bënga Bëngbe Bëtsá tmojtsebobonshana y ntšamo cha tojtsemandacá tmojt-samëse, bënga ndegombre mochántsetatsëmbo, chë Bëngbe Bëtsabe basengbioynaca bënga imuababuányëshanama. <sup>3</sup> Bënga Bëngbe Bëtsábioye imobobonshánama quem soyiñe jtsinýnana: bënga ntšamo Bëngbe Bëtsá tomandacá tmojtsamëse. Y ndayá Bëngbe Bëtsá yomandacá ndoñe yapa totcá quenátsmëna bënga chamotsamama. <sup>4</sup> Nda Bëngbe Bëtsabe uaquiñá tomna, chana jáyëñjanana quem luarentša entsanga y soyënga ntšamo Satanás yomandacá. Quem luarentša entsanga y soyënga ntšamo Satanás yomandacá, Crístbeñe bënga imošbuachéyeca montsobena bënga jayëñjanana. <sup>5</sup> Nýe nda, Jesús Bëngbe Bëtsabe Uaquiñá yomnama tojtsošbuaché, cha jtsobenana chë entsanga y soyënga ntšamo Satanás yomandacá jayëñjanana; ndocná más.

**Bëngbe Bëtsá tojinýanyé ntšamo chabe Uaquiñabiama ndegombre yomncá**

<sup>6</sup> Cach Jesucristo endmëna nda quem luaroye tojánabo y mëntšá tojanenonýinýe: býyesheca cha tmojanabaye ora, y buiñe juabuáshanëse cha tonjanóbana ora. Cha ndoñe tonjanenonýinýe nýe býyesheca, ndayá býyesheca y buiñeca. Cach Uámana Espíritu entsobena jayanana chca ndegombre bëtsemnama Jesusbiamana, er chë Espíritu endmëna chë sempre ndegombre oyebuambnayá. <sup>7</sup> Endmëna unga soyënga, ndayá iuinýanýná ntšamo ndegombre yomncá Jesusbiamana: <sup>8</sup> Espíritu, býyeshe y buiñe; y chë unga soyënga lempe cachcá Jesusbiamana jtsinýanýnayanana. <sup>9</sup> Bënga mondbëtsejuabnaye, ndayá entsanga tmojinýe ca tmojtsichámuama mo ndegombre cuaftsemncá, pero ndayá Bëngbe Bëtsá tojtsichamcá chë ndegombre soye jtsemnana y puerte jtsámanana, er chë ndegombre soye ntšamo cha tojtsichamcá, endmëna ndayá chabe Uaquiñabiama iuichamcá. <sup>10</sup> Nda Bëngbe Bëtsabe Uaquiñábeñe tojtsošbuaché, cha chca nýets tempo chabe ainaniñe jtsejuabnayanana; nda Bëngbe Bëtsábeñe ndoñe tontsošbuaché, cha chca jtsamana mo Bëngbe Bëtsá canýe bostero cuaftsemncá, er chë Bëngbe Bëtsá chabe Uaquiñabiama tojayana soyama cha jtsejuabnayanana ndoñe ndegombre yontsemna ca. <sup>11</sup> Ntšamo Bëngbe Bëtsá chabe Uaquiñabiama to-

jayancá mëntšá entsemna: Bëngbe Bëtsá bëngbiamana tojama chë nýetsca tescama yomna tšabe vida chamotsebomnama; y quem vida chabe Uaquiñábeñe entsemna. <sup>12</sup> Nda Bëngbe Bëtsabe Uaquiñáftaca cánýiñe mo canýacá tojtsemna, cha chë tšabe vídnaca jtsebomnana; pero nda chë Bëngbe Bëtsabe Uaquiñáftaca cánýiñe mo canýacá ndoñe tontsemna, cha chë nýetsca tescama yomna tšabe vida ndoñe ntsebomnana ca.

**Inýe soyëngama jábuayenama y jtadiósoftanama**

<sup>13</sup> Tšëngaftanga, chë Bëngbe Bëtsabe Uaquiñábeñe šmošbuachéngbioye quem soyënga cbontsëbuabi-amná, ndegombre chašmotsetatsëmbo chë nýetsca tescama yomna tšabe vida šmojtsebomnama.

<sup>14</sup> Bënga bëts añémoca y ndauatjá Bëngbe Bëtsabe delante mondmëna, er bënga mondetatsëmbo, nderado ntšamo chaotsemnana cha tojtsebošcá bënga tmojtjañe ora, cha bënga šnétsayaunanama. <sup>15</sup> Nderado ndayá chca Bëngbe Bëtsábioye tmojtsotjanañe ora, cha bënga joyaunayana; bënga mondetatsëmbo chca ndegombre yomnama, y chca, bëngnaca montsetatsëmbo, ndayánaca chábioye bënga chamotjotjañcá cha šochjátatayama.

<sup>16</sup> Nda cachabe catsátbioye tbojinýe canýe bacna soye tojtsamama, pero chë bacna soye tojamentšana cha perdonaná jtsemnana cabá tojtsopodénëse, chábioye bontsemna Bëngbe Bëtsá jaimpádana, y chca, Bëngbe Bëtsá echanjama chë catsata chë nýetsca tescama yomna tšabe vida chaotsebomnama, cha chca tojamentšana perdonaná jtsemnana cabá tojtsopodénëse. Pero canýe bacna soye endmëna, y chca tojamama canýa ndoñe ntsobenana perdonaná jtsemnana, y chca, cha jabocnana canýa nýetsca tescama castiganá chaotsemnana, y atše ndoñe quetsátichamo chë bacna soyama yojtsemna Bëngbe Bëtsá jtseimpadánana chaboperdonama ca. <sup>17</sup> Nda tojtsama ntšamo Bëngbe Bëtsá ndoñe yondëmandacá, cha bacna soye jtsamana; pero nýetsca bacna soyënga ntšamo canýa tojtsamcá, ndoñe ntjamana cha ndëperdonaná chaotsemnana.

<sup>18</sup> Bënga mondetatsëmbo, nda Bëngbe Bëtsábioye mo taitacá tbojtsebomna, cha ndoñe ntsiyenana bacna soyënga jtsamëse, er chë Bëngbe Bëtsábentshana Onýnaná chábioye jtsinýenana, y Satanás, chë nýetsca bacna soyënga amëndayá, tondaye ntsobenana chábioye jabórlana. <sup>19</sup> Bënga mondetatsëmbo, bënga chë Crístbeñe ošbuachiyënga Bëngbe Bëtsábengana imomnama, y chë quem luarentša inýe entsanga Satanásbe cucuatšifñe imomnama. <sup>20</sup> Bëngnaca mondetatsëmbo Bëngbe Bëtsabe Uaquiñá tojabama, y cha iuama bënga osertánana chamotsebomnama, chë ndegombre Bëngbe Bëtsá yomná jtsabuatomama. Bënga chë ndegombráftaca cánýiñe mo canýacá mondmëna, bënga chabe Uaquiñáftaca cánýiñe bëtsemnayeca. Cha chë ndegombre Bëngbe Bëtsá endmëna, y nda chë nýetsca tescama yomna tšabe vida entsanga chamotsebomnama iuamá. <sup>21</sup> Atšbe básenga, ndoñe š-



mattsadorana cach entšangbe pormana soyënga, chë  
ndayama ínÿenga mondbétsejuabnaye diosënga  
yomna ca.

## 2 San Juan

### Jtsiyenana ndegombre soyéngaca y nyetscanga jtsenbobonshánëse

**1** Atše chë bëtsëjema, quem tsbuanácha sentsabi-amná, chë uámana mamá, chë Bëngbe Bëtsabe bocacaná y chabe basengbiámna, ndëmuanýenga atše ndegombre sëndábabuanýeshana. Y ndoñe nýe atše chënga quetsátababuanýeshana, ndayá nyetscanga chë Bëngbe Bëtsabe ndegombre soyënga uabuátmëngna. <sup>2</sup> Atše cbontsababuanýeshana, chë ndegombre soyënga bëngbe ainaniñe mondbóm-nayeca, y chë soyënga bëngbe ainaniñe sempre echántsemna.

<sup>3</sup> Atše sëntseimpadana Bëngbe Bëtsá chë Taitá, y Jesucristo chë Taitabe Uaquiñá, chaboma tsëngaftangbeñe tsabe bendicionënga chaotsemnana, chata tsëngaftangbioye chácmalastemama, y chaboma tsëngaftangbe ainaniñe tsabe ebionana chašmotsebmoma. Quem soyënga, bënga chë ndegombre soyënga uabuátmënga y nyetscanga mondenbobonshánëngaftaca echántsemna.

<sup>4</sup> Puerte sënjoyejuá, er atše acbe básenguëntse báseftanga sënjánýena chë ndegombre soyënga ntšamo Bëngbe Bëtsá chë Taitá šojamëndacá jtsamëse. <sup>5</sup> Y mora, uámana mamá, cbontseimpadana Diosmanda nyetscanga chamotsenbobonshana. Chë cbontsëbuabiamná soye ndoñe canýe tsëm mando quenátsmëna, ndayá cach Cristbe ústonënga tmonjanobiama ora tmonjanóyëngacñe mando. <sup>6</sup> Bënga, Bëngbe Bëtsá y chë inýe entsanga imababuanýeshanama jtsinýnana, bënga ntšamo Bëngbe Bëtsá tojamandacá jtsamëse tmojtsiyenama. Y chabe mando, ntšamo Cristbe ústonënga šmonjanobiama ora šmonjanuencá, mëntsá endmëna: jtsiyenana Bëngbe Bëtsá y chë inýe entsanga jtsababuánýeshanëse.

### Chë entsángbioye áingñayënga

<sup>7</sup> Quem luarëjana banga entsángbioye áingñayënga mondajna, y chënga jtsejuabnana Jesucristo quem luaroye ndoñe mo canýe ndegombre entsacá tonján-abo ca. Nda chca tojtsejuabná, cha jtsemnana chë aingñayá y Cristbe contra yomná. <sup>8</sup> Chëngbiama cuedado šmochtsebmoma. Ndoñe chcase, tsëngaftanga ndoñe quešmochátsbmoma chë Cristbiama cach tsëngaftangbe trabajuentsana tojóbcna soyënga, y ndoñe quešmochatosháchiñe lempe ntšamo Bëngbe Bëtsá tsëngaftangbioye jatšatayama yojtsebošcá.

<sup>9</sup> Ndánaca chë Cristo tojanabuatambá soyëngama inýe soyënga tojatabuambá, cha ndoñe Bëngbe Bëtsáftaca cánýiñe mo canýacá ntsemnana; pero nda sempre ntšamo Cristo tojanbuatëmbacá tojtsabuambá, cha aíñe chë Taitáftaca y chabe Uaquiñáftaca cánýiñe mo canýacá jtsemnana. <sup>10</sup> Ndánaca tsëngaftangbioye tojá jabuátambama, pero ndoñe ndayá Cristo tojanabuatambacá tojtsebuátëmbase, cha ndoñe šmatjofja, ni mo šmatjachuaye. <sup>11</sup> Er nda chábioye tbojachuase, chábioye jtsajabuáchanana chë bacna soye chaomama.

### Jtadióšoftanama

<sup>12</sup> Atše ba soyënga sëntsebmoma tsëngaftanga jáuyanama, pero ndoñe quetsátsboše tsbuanáchañe jubuábiamama. Atše sëntsejuabná aíñe chjobenaye tsëngaftangbioye jama, jobenayama nyetscángaftaca jencuëntama, chca, bëngbe oyejuayana puerte bëtsacá chaotsemnana.

<sup>13</sup> Crístbeyeca acbe quenata, chë Bëngbe Bëtsabe bocacaná, chabe básenga cmontsacheuaná.

## 3 San Juan

### Juan Gaybiana puerte tšabá tojanoyebuambá

**1** Atše chë bëtšëjema, quem tsbuanácha atšbe bonshana amigo Gaybiana sentsabiamná. Chábioye atše ndegombre séndbobonshana.  
<sup>2</sup> Atšbe bonshaná y Crístbeyeca atšbe catšata, Bëngbe Bëtsá séntseimpadana aca tšabia nyetsca soyënguiñe chacotsemnama y salud bomnánaca. Atše séntsetatšëmbo aca ainaniñe tšabá cotsomñama, Bëngbe Bëtsabiana bëtscá tšabe juabnënga chentše jtsebomnëse. <sup>3</sup> Er báseftanga Jesucristbeñe os-`buáchiyënga átšbioye tmonjabo y šmonjacuentá ntšamo aca chë ndegombre soyënga yomncá icuama- ma, aca chë ndegombre soyënga jtsamëse icoyenama. Chíyeca atše bëtscá séntsoyejuá. <sup>4</sup> Tondaye jamana at- še nyetšá oyejuayá chaitsemnama, ndayá nye joue- nana chë atšbe basengcá imoquedánënga ntšamo chë ndegombre soyënga yomncá jtsamëse imoyenama.  
<sup>5</sup> Atšbe bonshaná, aca contsama ntšamo Jesucristo tonjanbuatëmbacá, aca chë ínÿyenga Jesucristbeñe os-`buáchiyënga jujabuáchama ndayánaca tcojama ora, y masna, chë ínÿe luaroquëngocana ashjajnëngbiama ndayánaca tcojtsama ora. <sup>6</sup> Chë átšbioye tmonjabënga tmonjoyebuambá, chë Jesucristbeñe ošbuáchiyënga quem luarentše mondbenenefjnëngbe delante, aca tša chënga icuababuánÿeshanama. Diosmanda, ntšamo tojtsëjabotcá chënga cochjújabuache, chca, chënga chamobená tšabá ínÿe luarëngoye játama. Chënga mondmëna Bëngbe Bëtsabiana trabájayën- ga; chcasna, chëngaftaca cochjama ntšamo chënga chama merecido imobuajoncá. <sup>7</sup> Chca cochjama, er chënga chëngbe pueblënguentsana tmojëftsebocana Jesucristbe soyëngama entsángbioye jábuayenama, y chënga chama tondaye crocénana quematóyënga- cañe chë Jesucristbeñe ndošbuáchiyëngbe cucuat- šentšana. <sup>8</sup> Chíyeca bënga šontsamna chëngbiama jt- santješnana y jtsëjabuáchanana, chca, bënga chamobená cánÿiñe chëngaftaca jatrabájana, entsáng- bioye chë ndegombre soyëngama jábuayenama, ndayá chënga mondama.

### Diótrefes ndoñe tšabá tonjanma; Demetrio aíñe

<sup>9</sup> Atše canÿe tsbuanácha chë Jesucristbeñe os-`buáchiyënga chentše mondbenenefjnëngbioye sën- jubuábiana, pero Diótrefes ndoñe yontsuenana ntšamo atše sentsichamcá, er cha yojtseboše chë ínÿyëngbioye nye jtsamëndayana. <sup>10</sup> Chíyeca atše choye chajjá ora, ndayá cha yojtsamama chanjauácacana. Cha sempre bacá yojtsoínÿana y uayátsenaye soyënga bëngbe contra yojtsichamo. Y chë soye chábioye ndoñe bontsobastana; chana chë Jesucristbeñe os-`buáchiyënga chabe pueblöye tmojáshjajnënga ndoñe ntjúbuajana, y chënga júbuajama tmojtsebošëngbioye ndoñe yontsalesenciana chca chamomama, y chë Je- sucristbeñe ošbuáchiyënga bëtsemnama imnétsene- fjuana luarentšana yojtsatëbuacana.  
<sup>11</sup> Atšbe bonshaná, ndoñe cattsama chë ndoñe tšabá yontsamacá, ndayá chë tšabe soyënga tmojtsamëngcá cochtsama. Nda ntšamo tšabá yomncá tojtsama, cha Bëngbe Bëtsábia jtsemnama; pero nda ndoñe chca tontsama, cha cabá ndoñe yondétatšëmbo ntšamo Bëngbe Bëtsá yomnama.  
<sup>12</sup> Jesucristbeñe ošbuáchiyënga nyetscanga tšabe soyënga Demetriëbiana montsichamo, y Jesucristbe ndegombre soyënga entsinÿna ntšamo cha soyënga yojtsiyenama. Béngnaca chabiana tšabá fsëntsichamo, y aca condétatšëmbo ntšamo bënga fsëntsichamcá, ndegombre yomnama.

### Jadiósoftanama

<sup>13</sup> Atše ba soyënga séntsebomna aca jauyanama, pero ndoñe quetsátsboše tsbuanáchañe juábobem- ana. <sup>14</sup> Atše séntsejuabná betscó chjobenaye ácbioye jama jauatsëtsayama y jobenayana ácaftaca jencuén- tama.  
<sup>15</sup> Puerte tšabe ebionana ainaniñe chacotsebomna. Quem luarentša amiguënga cmontsechuaná. Dios- manda, bëngbe amiguëngbioye choca cada ona cochjácheuaye.

# San Judas

## Jacheuayama

<sup>1</sup> Atše Judas, Jesucristbe oservená y Santiagbe catšata, quem tsbuanácha sentsabiamná, ndémuanýengbioye Běngbe Bětsá, chě Taitá chabe entšanga chamotsemnama tojáchembo, chabe bonsháněnga, y ndémuanýenga Jesucristo endányena.

<sup>2</sup> Atše, Běngbe Bětsá sěntseimpadana, cha puerte lastemado tšěngaftangaftaca chaotsemnama, cha chaoma tšěngaftanga ainaniñe tšabe ebionana chašmotsebomnama, y chaoma tšěngaftanga cada te más Běngbe Bětsábioye y ínýengbioye chašmotsababuányeshanama.

### Chě ndoñe ndegombre soyěnga buátěmbayěnga

<sup>3</sup> Atšbe bonsháněnga, atše tša sěndboše tšěngaftanga jubuábiamama, ntšamo Jesucristo běngbe bacna soyěnguentšana šojátsebacama, tšěngaftangbioye y běngbioynaca; pero atše sěntsejuabná atše šojtsemna tšěngaftanga jubuábiamana, jáimpadama bětsáčašmotsama Jesucristbe soyěngama, chě mondošbuaché soyěngama jenujuéřzama, ndoñe chaondopochocama. Chě soyěnga Běngbe Bětsá chabe entšanga canýe tojatsatá, y nyetsca tescama. <sup>4</sup> Er tšěngaftanga ntšamo ínýenga imomnama ntjatatsěmboncá, básefta entšanga tšěngaftangaftaca tmojenutaná. Chěnga mondměna Běngbe Bětsá ndoñe adórayěnga, y chě buátěmbana soyěnga tmojtsetrocá. Běngbe Bětsá běngbe tšabiamana juabna yobómnyayeca, chěnga jtsichámuana tšěngaftanga šmojtsobena nyetsca bacna soyěnga jtsaměse jtsiyenana, jenomándama ntsobencá ca; y chca, chěnga montseboše jinýanýiyama, Jesucristo ndoñe běngbe canýe Nduiño y Běngbe Utabná chěngbiama yondměna ca. Y bayté, Běngbe Bětsabe uabemana palabrěnguiñe tmojanábema, chě chca aměngna jtsamnana nyetsca tescama castigáněnga jtsemnama ca.

<sup>5</sup> Masque tšěngaftanga lempe quem soyama ya šmondětatsěmbo, atše sěntseboše jamama tšěngaftanga chašmotsenujuabná, Běngbe Utabná, Israeloca entšanga Egiptoquěngbe cucuatšěntšana tojanatsebacá chentšana, cachá chě Israeloquěnguentše chábeñe ndošbuachiyěnga tojánapochocama; <sup>6</sup> y cachcá chě angelěngbiámnaca, ndémuanýenga ndoñe tmonjanoquedá chě tmojanóyěngacñe mándoca, pero aíñe chěngbe luarěnga cachcá imojěftsonýaye. Chě causa, Běngbe Bětsá tojanmandá cadenějuangaca nyetsca tescama chamoquedama, chě más ibetiñe,

tondaye binýniñe luarentše, chěnga bacna soyěnga tmojanmama nyetsca tescama castigáněnga jtsemnama yojtsamna ca, cha jayanama tescama. <sup>7</sup> Y chě Sodoma y Gomorra, y chě béconana pueblěnguentše entšangbiámnaca; chěngnaca cach angelěngcá ndoñe tšabá monjánama, y nyetsca bacna soyěnga imojánama boyabása o shembásaftaca, y ínýengaftaca y bayěngaftácnaca. Chíyeca chěnga tmonjansufrí chě íñesheca castigo nyetsca tescama, y chca, nyetsca entšangbioye tmojaninýanýé, ndayá yochjopása chě chca Běngbe Bětsábioye ndoñe tbontsobedecenáftaca.

<sup>8</sup> Cachcá, chě ndoñe ndegombre soyěnga buátěmbayěngnaca chě mo otjenayoquécá tmojáninýe soyěngama jtsichámuana, y chě causa cachěngbe cuerpěngama bacna soyěnga jtsamana, chě mando bomněngbioye jtsěbátenana, y chě espíritěnga obenana bomněngbiama ndoñe tšabá ntsichámuana, mo chěngbioye cuafjoyanguangcá. <sup>9</sup> Pero ni mo chě angelěngbe mandayá Miguel quem buátěmbayěngcá tojanma. Cha chě diábloftaca ibojentsjaná ora, Moisesbe cuerpama cháftaca jabuachana ibojanenatsětsnaye ora, ndoñe tonjanenñemó jayanama chě diablěbiama podesca soyěnga, jóyenguanguse, ndayá nýe měntšá ibojauyana: "Běngbe Utabná chacmácacana ca."

<sup>10</sup> Pero quem buátěmbayěngna, chě ndoñe tontsěsertana soyěngama podesca jtsichámuana, y ntšamo tojtsebionama y tmojtsebošama, nýe mo bayěngcá, chě soyěngama tšabá josértama juabna ndbomněnga, ndayá chentšana tmojtsěsertancá jtsaměse, jamana chěnga nyetsca tescama castigáněnga jtsemnama chamotsajnama.

<sup>11</sup> ¡Tša lastema quem buátěmbayěngbiama! Er chěnga ndoñe tšabá tmojanma, mo Caincá; cha tojanaboté ntšamo Běngbe Bětsá inětsama bacna soyěnga japerdónama, y cabana chabe catšátbioye tbojanóba. Chěnga crocénana juácanama, mo Balaam yojanamcá, Běngbe Bětsabe tšabe benachentšana tmojtsojuánañe, bacna soyěnga jamama. Chěnga chě aměndayěngcá Běngbe Bětsá tojanabacacángbioye ndoñe ntsayaunanana, ntšamo Coré, Moisés y Aarónbioye joyaunayama ndoñe tonjanbošencá; y chě causa chěnga pochocáněnga mochántsemna, ntšamo Coré pochocaná chaotsemnama Běngbe Bětsá tojanmcá.

<sup>12</sup> Chěngna tšěngaftangbiama jtsemnana mo canýe ndětsenga luarentše canýe běts tsengacá, tšěngaftangaftaca tmojenutaná ora, cánýiñe jasama mo Jesucristbeñe ošbuachiyěngcá. Chěnga chca jtsemnana, er chca fiestěnguiñe chěnga oyejuayěnga jtsemnana, nýe

chënga tšabá jtsomñama soyënga jtsamëse, y chënga chama ndoñe ntsëuatjana. Chënga nÿe cachëngbiama jtsantješnana, ínÿengbiama ndoñe. Chënga tša jtsašebuachiyana, pero chëngbe buatëmbana soyënga ínÿengbiama tondayama ntsoservénana; y chca, chënga jtsemnana mo chë tša jënÿá ora jantšetëshëngcá, tondaye ntjuaftena, bínÿiaca ochñëjuanëshënga; y mo betiyeshënga jashtsnëshënga y buashanëshëngcá, chë jashacama tojtsemna ora tondaye shajuana causa. <sup>13</sup> Chënga nÿets tempo bacna soyënga jtsamana cachëngbe bacna juabnéngaca, y chë bacna soyënga ntšamo tmojtsamcá jtsinÿanÿnayana chënga chë bacna juabnénga imobomnama. Chca, chënga jtsemnana mo mar béjayoca oleshëngcá, chentšana es-pumushënga bëtscá tsenguëshëca jtsóbocanana. Y cabana, chënga jtsemnana mo estrellëngcá chëtemëngbe benachentšana tmojtsebocna, y chentšana jtsefsanana. Bëngbe Bëtsá tojamandá, chë buátëmbayënga ntšamo tmojamamna, chë más ibetoca, tondaye binÿiñe luarentše nÿetsca tescama chënga chamoquedama.

<sup>14</sup> Adánbentšana chnénguana pamillo entšanga tmojánachñëjna chentšana Enoc tojánashjango. Chánaca Bëngbe Bëtsabe juabna tojanoyebuambá chë bacna buátëmbayëngbiama, mëntšá tojánayana ora: “Š-mochjinÿe, Bëngbe Utabná echanjabo bëtscá uaranga angelëngaftaca, <sup>15</sup> nÿetsca entšangbiama jabáyana ntšamo tmojamcá tšabá o ndoñe tšabá bëtsemnana; y cha echanjamánda chë Bëngbe Bëtsábioye ndoñe adórayënga nÿetsca tescama castigánënga chamotsemnana, tša bacna soyënga chabe contra tmojamama, y bacna soyënga chabe contra tmojayanama, chënga, chë puerta bacna soyënga amënga ca” —tojánayana. <sup>16</sup> Chënga mondmëna chë tšabe soyëngama nÿets tempo podesca ichámënga, y ndocna te tondáyeca oyejuayënga ntsemnana. Chënga jtsiyenana bacna soyënga jtsamëse nÿe cachënga tšabá jtsomñama, y puerta botamana palabrenga jtsichámua-na uámanënga jtsenobiamnayëse, y tšabe soyënga ínÿengbioye jtsëtsënayana, chënga tšabá joquédama y chëngbentšana ndayánaca josháchiñama.

#### Ošbuáchiyënga jábuayenama

<sup>17</sup> Pero tšëngaftanga, atšbe bonshánëngna, šmocht-senójuabnaye ndayá chë Bëngbe Utabná Jesucristbe ichmónënga tcmojanéyanama, mëntšá: <sup>18</sup> “Jesucristo

quem luare jésabama tempo chaojtsobeco ora, mochántsemna entšanga, y chënga mochantsiyena jtsamëse nÿe cachënga tšabá jtsomñama bacna juabnéngaca, y tšëngaftanga cmochantsébuayajuana ca.”

<sup>19</sup> Chënga mondmëna chë ošbuáchiyënguentše nÿetscanga ndoñe cachcá chamondëtsejuabnama amënga; chënga mondoyena jtsamëse cachëngbe bacna juabnéngaca y ndoñe quemátsbomna Uámana Espíritu, chëngbe ainaniñe chaotsemándama.

<sup>20</sup> Pero tšëngaftanga, atšbe bonshánënga, nÿets tempo, cada te más Jesucristbeñe ošbuáchiyana š-mochtsebomna, chë Bëngbe Bëtsábocana endóbo-cana ošbuáchiyana, y Bëngbe Bëtsáftaca šmochjen-cuénta, ntšamo Uámana Espíritu tcmojsamëndacá.

<sup>21</sup> Yejuana šmochtsantješna tšëngaftanga nÿets tempo chašmotsiyenama, Bëngbe Bëtsá cmababuánÿeshana-ma jtsejuabnayëse, y šmochtsobátmana chë tempo ndaye ora Bëngbe Utabná Jesucristo, tšëngaftanga jtsalastemánëse, yochjama tšëngaftanga chë nÿetsca tescama yomna tšabe vida chašmotsebomnama.

<sup>22</sup> Chë inÿe ora aíñe y inÿe ora ndoñe Jesucristbeñe ošbuáchiyana bomnénga šmochtsalastemana.

<sup>23</sup> Bëtscá šmochtsama, báseftanga chë uabouana castigüentšana atsebácanënga chamotsemnana, mo chënga íñeshentšana cuaftëbuacancá. Inÿengbiama chacmotsangmena, pero cuedado šmochtsebomna, chënga chašmojtsëjabuachana ora, ntšamo chënga bacna soyënga tmojtsamcá ndoñe chašmondëtsama-ma; y chë bacna soyënga ntšamo chënga tmojtsiyena jtsamëse, chëngbe bacna juabnéngaca, nÿa tondaye chacmondëtsogusetana.

#### Judas, Bëngbe Bëtsá jëtschuayama

<sup>24-25</sup> Chë nÿe canÿe Bëngbe Bëtsá, bëngbe Atsebacyá obenana endbomna tšëngaftanga jtsanÿenama, chca, tondaye chaondëma tšëngaftanga Jesucristbeñe ošbuáchiyana chašmotsajbanama; y obenana endbomna tšëngaftanga ainaniñe ndocna bacna soye nd-bomnénga chašmotsemnana y puerta oyejuayënga cachabe delante chašmotsemnana, cha canÿe puerta uamaná y obená bëtsemnana chaojinÿanÿé ora. Bëngbe Utabná Jesucristbeyeca, nÿetscanga Bëngbe Bëtsá chamotsatschuaná; y cha puerta bëtscá chauesomñe, nÿets obenana bomná y nÿets mando bomná, nÿets tempscana, tempo, mora y nÿetsca tescama. Chca chaotsemna.

# Apocalipsis

## Ndayá quem librésañe yomna

**1** Quemuentse entsábemana ndayá Bëngbe Bëtsá Jesucristbioye tbojaninÿinÿé, chë Bëngbe Bëtsabe oservénënga cha cháuinÿanÿema, ndayá jopásama yojtsobecuama chënga chamotsetatsëmbuama. Jesucristo chama chabe ángel tbojichmó, chë soyëngama atše, Juan, chë Jesucristbe oservenábioye chašuinÿinÿema. <sup>2</sup> Y atše sënjayana lempe ntšamo ndegombre yomncá lempe chë tijinÿe soyëngama, chë Bëngbe Bëtsabe buayenana soyëngama y chë Jesucristo šonjanianana ndegombre bëtsemna soyëngama. <sup>3</sup> Oyejuayá nda tojtsalía, y oyejuayënga ndë-muanÿenga botamana tmojtsuenana quem yochjopása soyëngama, chë muentse entsabemancá ndegombre tmojóyeunanga, er chca jopasa tempo entsobeco.

## Asia luaroca ošbuachiyëngcá enefjuanënga jacheuayama

<sup>4</sup> Atše Juan, sentsabiamná chë Asia luaroca canÿsëftañe ošbuachiyëngcá enefjuanëngbiama. Atše, Bëngbe Bëtsá séntseimpadana, tšabe bendicionënga chábiocana chašmosháchiñe y ainaniñe puerte tšabe ebionana chašmotsebomna, Bëngbe Bëtsábentšana, chë canÿsëfta espíritëngbentšana y Jesucristbentšana. Bëngbe Bëtsá, chë mora endmëná, enjamná y sempre echantsemná; chë canÿsëfta espíritënga, chabe uámana puesto natsanoica mondmënënga; <sup>56</sup> y Jesucristo, chë ntšamo Bëngbe Bëtsabiama yotatsëmbcá ndegombre oyebuambnayá, chë natsaná ndabiama Bëngbe Bëtsá tojama obanënguentsana cháuatayenama, y nÿetsca quem luarentša mandadëngbe amëndayá. Cristo šondábabuanÿeshana y bëngbe bacna soyënguentsana šojatsebacá, cha tonjanóbanayeca, chabe buiñe juabuáshanëse. Cha tojama bënga chamotsobena cháftaca jtsemándayana y uámanënga chamotsemnama, y Bëngbe Bëtsá chabe Taitá mo bachnangcá chamotseservënama. ¡Nÿetscanga nÿets tempo chamotsinÿanÿná Cristo puerte bëtsá y uamaná bëtsemnama y obenana nÿetsca tescama yobomnama! Chca chaotsemna.

<sup>7</sup> Mouenënga. Cristo jantsetëshënguiñe echanjésabo. Chábioye nÿetscanga mochanjinÿe, chë tmonjanrucificágnaca; y quem luarentša nÿetsca entsanga puerte ngmé-naca mochántsemna y mochantsošachna chábeyeca.

Ndegombre, chca chaotsemna.

<sup>8</sup> “Atše sëndmëna chë nÿetsca soyënga bojatšayá y pochocayá ca,” Bëngbe Utabná Bëngbe Bëtsá tojajana. Cha chë sempre endmëná, enjamná, nÿets tempo echantsemná, chë nÿets obenana bomná.

## Juan mo otjenayoquëcá Cristbiama tojáninÿe

<sup>9</sup> Atše Juan, Jesucristbeyeca tšëngaftangbe catšata, cháftaca cánÿiñe mo canÿacá bëtsemnama, cach tšëngaftangcá sëndëpadecena, tšëngaftangcá chanjéft-sashjache Bëngbe Bëtsabe amëndayoye jamashënguama, y tšëngaftangcá Bëngbe Bëtsábeñe jtsobátmanëse, uantado sëndmëna chë padecena soyënguiñe. Bëngbe Bëtsabe palabra sënjanabuayinÿama y Jesusbiama ntšamo ndegombre endmëncá sënjanóyebuambnama, atše šmonjetsanëtšena mar béjayoca canÿe fshantsentše, Patmos ca uabáinoca. <sup>10</sup> Y tonjanopasá, canÿe tmengo, chë ošbuachiyënga Bëngbe Utabnábioye cánÿiñe jëtschuayama te, atše sënjanouquedá chë Uámana Espíritbeyeca corente mandaná, mo otjenayoquëcá soyënga sënjëtsonÿaye, y atšbe stëtšoica canÿe jabuache oyebuambnayana sënjanuena, mo canÿe trompetéfjua cuafjuajatëtcá; <sup>11</sup> mëntšá šontsanatsëtsná: “Canÿe librésañe mábema lempe ntšamo contsonÿacá y cochjuichmua chë Asia luaroca canÿsëftañe ošbuachiyëngcá enefjuanëngbioye: Efeso, Esmirna, Pérgamo, Tiatira, Sardis, Filadelfia y Laodiceoquëngbioye ca.”

<sup>12</sup> Sënjanobuértana jinÿama nda chca šojtsanatsëtsná, y chca sënjanma ora, sënjaninÿe canÿsëfta castellano candelëšënga; <sup>13</sup> y chë canÿsëfta castellano candelëšënguiñe tsëntsaca canÿa sënjaninÿe, mo entsacá inÿná, canÿe bën entsayá uichëtjoná, y cochóntscoca canÿe tëntša castellano uasnanëjaca.

<sup>14</sup> Chabe stjënashana uafjantsësha, puerte uafjantsësha mo canÿe oveshabe boboshëshacá, y chabe fšnëbënga mo iñeshcá enjëtšinÿa. <sup>15</sup> Chabe shecuatšënga enjëtsebuashinÿinÿana mo bronscá, ndaybé natsana iñëjana tcojuchnëngo enabé chaotsemnama y chentšana entsëjuaca becá tcojajojó corente chaotsebuashinÿinÿanama; y chabe oyebuambnayana jabuache enjëtšenana mo bëtscá béjaye cuaftsebuachquëcjancá. <sup>16</sup> Chabe catšbioica cucuatšëñe enjët-satbëna canÿsëfta estrellënga, y chabe uayoicana enjëtsohocana canÿe espadëja, nÿets utoicajana puerte efsánëja, y chabe jubíá tša enjëtsebuashinÿinÿana, mo chë shinÿe corente, lempe ntšamo tojobenacá tojtsebuashinÿinÿana orcá.

<sup>17</sup> Cha sënjaninÿe ora, chabe shecuatšentše mo obanacá sënjánshajaye. Pero cha, chabe catšbioica cucuatše átšbeñe jajájuase, šonjaniyana: “Ndoñe matauatjana; atše sëndmëna chë nyetsca soyënga bojatšayá y pochocayá, <sup>18</sup> chë sempre vida bomná. Atše obaná sënjamna, pero mora nyetsca tescama vida sëntse-bomna. Atše obenana sëndbomna, y chë obenánaca entšangbiöye ndoñe quenátamna infernoca nyetsca tescama castigánënga jtsemnana, mo nyets tempo cuaftsobancá. <sup>19</sup> Ntšamo tconjinÿcá mábema, chë quem tempo endmëna soyëngama y chë más chcoye echántsemna soyëngama. <sup>20</sup> Mëntšá endmëna chë atšbe catšbioica cucuatšifne tconjinÿe canÿsëfta estrellëngaca y chë canÿsëfta castellano candelerëšëngaca: chë canÿsëfta estrellënga montsinÿinÿná chë canÿsëftañe ošbuachiyëngcá enefjuanëngbeñe chamotsemándama uámana ichmónënga, y chë canÿsëfta candelerëšëngaca chë canÿsëftañe ošbuachiyëngcá enefjuanënga.”

### Efesoca ošbuachiyëngcá enefjuanënga jábuayenama

**2** Mëntšánaca cha šonjaniyana:  
 “Mëntšá mabobema chë Efesoca ošbuachiyëngcá enefjuanëngbeñe chaotsemándama uámana ichmonábioye:  
 Mëntšá entsichamo chë chabe catšbioica cucuatšifne canÿsëfta estrellënga entsatbëná y chë canÿsëfta castellano candelerëšënga luarëjana entsaná: <sup>2</sup> Atše lempe sëndétatšëmbo ntšamo tšëngaftanga šmoyenana; atše corente sëndétatšëmbo tšëngaftanga jabuache šmotrabájama, y ntšamo tšëngaftanga Bëngbe Bëtsábeñe jtsobátmanëse šmnétsauantana padecena soyënguiñe šmojtsemna ora. Y átšnaca sëndétatšëmbo tšëngaftanga ndoñe šmontsobena jtšëuantánana ntšamo bacna entšanga tmojtsamcá. Atšnaca sëndétatšëmbo tšëngaftanga yejuana šmojarrepará y becá šmojenojuabó jinÿyama chë Jesucristbe ichmónënga imomna ca tmojtsichamëngbiama; pero ndegombre chënga ndoñe chca quemátsmëna; y chca šmojámayeca, tšëngaftanga mora šmontsetátšëmbo chënga bosterënga imomnama. <sup>3</sup> Padecena soyënguiñe becá šmojoboyá y chca ora, Bëngbe Bëtsábeñe šmobátmana. Chë soyënguiñe šmojasufrí, tšëngaftanga atše šmoservënama; y tšëngaftanga chca šmondëserveda, ainaniñe añemo jtsebomnama ntjabanacá.  
<sup>4</sup> Pero canÿe soye sëntse-bomna tšëngaftangbe contra jayanama: Tšëngaftanga mora ya ndoñe cachca bonshánana quešmátsbomna ni atšbiama ni nyetsca entšangbiama, ntšamo átšbeñe jtsošbuáchiyama šmonjanbojatšé orcá. <sup>5</sup> Menójuabonga ntšamo chë tempo šmonjانبobonshanama, juabnayana motrocanga y cachiñe šmochtsama ntšamo chë átšbeñe jtsošbuáchiyama šmonjanbojatšé orcá. Ndoñe chcase, atše tšëngaftangbiöye chanjá jabuache jetsacastígama, jtšapochócantscuana, mo chë tšëngaftangbe cuenta entsemna candelerëše chabe puestentšana cuaftsejuanacá. Chca chanjama, tšëngaftanga juab-

nayana ndoñe chašmonjatrocace. <sup>6</sup> Pero tšëngaftangbe pavor quem tšabe soye šmontse-bomna: Tšëngaftanga šmonduábotena lempe ntšamo chë nicolaíta ca uabaina entšanga tmojtsamcá, ndayá átšnaca sënduábotena.

<sup>7</sup> Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtsëtsëtnacá. Chë padecena soyënguentšana tšabá chamojábocana mo ayëñanayëngcá, chëngbiama chanjama chë nyetsca tescama yomna tšabe vida chamotse-bomnama, y chca chënga mochántsemna mo chë nyetsca tescama yomna tšabe vida jtsebomnama betiyeshentšana cuaftsesacá, chë entšanga sempre oyejuayënga mondbetsemnoca ca” —cha šonjaniyana.

### Esmirnoca ošbuachiyëngcá enefjuanënga jábuayenama

<sup>8</sup> Mëntšánaca cha šonjaniyana: “Esmirna bëts pueblentše ošbuachiyëngcá enefjuanëngbeñe chaotsemándama uámana ichmonábioynaca mëntšá mabobema:

Mëntšá entsichamo chë nyetsca soyënga bojatšayá y pochocayá, chë tonjanobaná y ndabiama Bëngbe Bëtsá tonjama cháuatayenama: <sup>9</sup> Atše sëndétatšëmbo tšëngaftanga tša jabuache šmojasufrima y ndbomnëjëmënga šmomnama, pero ndegombre Bëngbe Bëtsábocana bëtscá tšabe soyënga šmondët-sóbomñe. Y sëndétatšëmbo tša bacá tšëngaftangbiama mondoyebuambná chë judiënga imomna ca ichámënga, pero ndoñe ntsamana mo chë Bëngbe Bëtsabe bocacana entšangcá; chca, chënga mondmëna mo Satanasbe entšangcá, nÿe chábioye jtšeservëñe y jtšatschuanayëse.

<sup>10</sup> Ndoñe matauatjëngana chë ndoñe yapa bën y tšëngaftanga šmochjasufrima, er Satanas echanjama tšëngaftanguentšënga báseftanga cárceloye inÿyenga chacmëtámia, jinÿyama ntsachetšá Crístbeñe ošbuáchiyana šmobomnama, padecena soyënguiñe šmojtsemna ora; y entsamna baseftayté jasúfriana. Sempre bëtscá ošbuáchiyana, y ainaniñe bëts añemo šmochtse-bomna, masque jobanámnaca chacmotsamna, Crístbiama trabájaye causa. Chca chašmojtsamëse, atše chanjama tšëngaftanga chašmotse-bomnama mo canÿe uacanana soycá, chë nyetsca tescama yomna tšabe vida.

<sup>11</sup> Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtsëtsëtnacá. Chë padecena soyënguentšana tšabá chamojábocana mo ayëñanayëngcá, ndegombre chënga ndoñe queochátamna játauatjana nyetsca tescama castigánënga jatsmënama ca” —cha šonjaniyana.

### Pérgamoca ošbuachiyëngcá enefjuanënga jábuayenama

<sup>12</sup> Mëntsánaca cha šonjaniyana: “Pérgamo bëts pueblentše ošbuachiyëngcá enefjuanëngbeñe chaotsemándama uámana ichmonábioynaca mëntsá mabobema:

Mëntsá entsichamo chë nyets utoicajana puerte efšana espadéja entsatbëná: <sup>13</sup> Atše sëndétatšëmbo ntšamo yomna tšëngaftangbe oyenentše, canye luare ndayentše Satanás entšángbioye puerte iuamënda. Masque chca, tšëngaftanga sempre nye atše šmondét-seservena, y ndocna te chešmáisayana átšbeñe ndoñe šmondošbuaché ca, ni mo Antipas, chë canye nyets tempo atšbe ustoná y atšbiamana ndegombre oye-buambnayá, ínÿenga tmonjanóba ora. Y lempe chca tojopasá tšëngaftangbe pueblentše, ndayentše Satanás bëtská entsana.

<sup>14</sup> Pero básefta soyënga séntsebmoma tšëngaftangbe contra jayanama: Chentše tšëngaftangbeñe báseftanga montsemna, soyënga montsabuatambá ntšamo bayté entsemna Balaam enjanabuatambacá. Cha rey Balácbioye tbojanbuayená ntšamo jamana Israeloca entšángbioye jáingñama, chënga chë ntšamo ndoñe tšabá yomncá chamotsamama; y chca, Balac tojanma chë ínÿenga diosënga yojamna ca imojanajuabná soyënga jadórama uátšëmbona saná chë Israeloca entšanga chamosama, y shembása o boyabásaftaca bacna soyënga chamotsamama. <sup>15</sup> Chéntšnaca ínÿenga montsemna, y chëngna chë nicolaitëngbe buatëmbana soyënguiñe mondošbuaché, y chca buatëmbana soyënga ndoñe tšabá quenátsmëna. <sup>16</sup> Šmochtsejuabnaye ntšamo šmojtsamama, chëngbioye tšëngaftangbeñe šmojtsëuantana ora, y chca jtsamana šmochjajbaná; er ndóñese, atše betscó tšëngaftangbioye chanjá, y chë chca buatëmbana soyënguiñe ošbuáchiyana ndoñe tmonjajbanángaftaca chanjéntsja chë atšbe uayoicana endóbocana espadéjaca.

<sup>17</sup> Chë jouenama tmojtsobenënga, chamouena ndayá Espiritu chë ndayenache ošbuachiyëngcá enefjuanënga yojtsëtsëtnacá. Chë padecena soyënguentšana tšabá chamojábocana mo ayëñjanayëngcá, chëngbioye maná chanjátšataye chamosama, chë celoca tandëše, ndayá Bëngbe Bëtsá tempo entšángbioye ndoñe tonjinÿanÿé; y canye fjantse ndëtšëtëma chanjáyentšbuachiye, chënga oyejuayënga šmojábemama. Chiñe canye tsëm uabaina echantsábemana; ndocná chë uabaina quenátatuatma, ndayá nye chë chamojýëngacñënga ca” —cha šonjaniyana.

### Tiatiroca ošbuachiyëngcá enefjuanënga jábuayenama

<sup>18</sup> Mëntsánaca cha šonjaniyana: “Tiatira bëts puebloca ošbuachiyëngcá enefjuanëngbeñe chaotsemándama uámana ichmonábioynaca mëntsá mabobema: Mëntsá entsichamo Bëngbe Bëtsabe Uaquiñá, chë mo iñeshcá uafšná y mo entšëjuaca jojona puerte chaotsebuashinÿinÿanama bronze shecuatšënga bomná:

<sup>19</sup> Atše sëndétatšëmbo ntšamo tšëngaftanga šmoyenama; sëndétatšëmbo ntsachetšá tšëngaftanga Bëngbe Bëtsábioye y nyetscángbioye šmababuánÿeshanama, ntšamo tšëngaftanga Bëngbe Bëtsábeñe puerte šmošbuáchemana, ntšamo chábioye šmoservënama, ntšamo tšëngaftanga ínÿenga šmojujabuache y ntšamo Bëngbe Bëtsábeñe jtsobátmanëse becá šmojoboyá padecena soyënguiñe; y séntsetatšëmbo mora más bëtská tšabe soyënga šmojtsama, ntšamo tšëngaftanga átšbeñe jtsošbuáchiyama šmonjanbojatšë orscama.

<sup>20</sup> Pero canye soye séntsebmoma tšëngaftangbe contra jayanama: Tšëngaftangbeñe šmondëuantana chë shembása, mo chë bacna reiná Jezabelcá endmënábioye. Chë shembása entsichamo Bëngbe Bëtsabe juabna oyebuambnayá canmëna ca; pero chabe buatëmbana soyëngaca atšbe oservënga entsaíngña, shembása o boyabásaftaca bacna soyënga chënga chamotsamama, y chë ínÿenga diosënga yojamna ca imojanajuabná soyënga jadórama uátšëmbona saná chamosama. <sup>21</sup> Cha sënjuená atše chjacastíga ca, chca juabnayana ndoñe tonjatrocasa, y canye boyabásaftaca bacna soyënga amana ndoñe tontsajbanase. Cha jacastígama batšá sënjobatma, nderado chca amana nanjatróca, pero ndoñe chenátšbošena. <sup>22</sup> Mora atše chanjama bëts šocana cha chaboshachama, y chë cháftaca bacna soye tmojamënga, juabnayana ndoñe tmonjatrocá y chca jtsamana ndoñe tmontsajbanase, chëngbiamana chanjama puerte chamosufrima; <sup>23</sup> y chë shembásabe básënga chantsëbaye. Chca, nyetsquénache ošbuachiyëngcá enefjuanënga mochántsetatšëmbo, ndayá entšanga juabniñe y ainaniñe tmojuabnacá atše tsuábuatmama; y cada ona tšëngaftanguentšá, chca bacna soye cháftaca tojamá, ntšamo ibojtsomerecencá chanjacastíga.

<sup>24</sup> Pero tšëngaftangbentše, ínÿenga Tiatira pueblentše šmojtsëmñënga, chë shembásabe buatëmbana soyënguiñe ndoñe šmontsošbuachënga, y chë ínÿenga imuábuatma Satanasbe soyënga, chë ndoñe paselo josértama soyënga ndoñe šmonjuabuátmanënga, tšëngaftanga ndoñe quebochatamënda inÿe más toto soye chašmotsamama. <sup>25</sup> Pero nye sempre šmochtsama ntšamo mora šmojtsamcá, y šmochtsiyena ntšamo chë Bëngbe Bëtsábiocana šmojóyëngacñe soyënga yomncá, atše quem luaroye jesabámëntscuana.

<sup>26</sup> Chë padecena soyënguentšana tšabá chamojábocana mo ayëñjanayëngcá y ntšamo atše sëndëmandacá chamojtsamënga, chë quem luarentše ya ndoñe más vida jesebomnámëntscuana, atšbe obenana chanjátšataye nyetsca mándayëngbentša entšángbeñe jtsemándayama, <sup>27</sup> ntšamo atšbe Taitá chabe obenana šojatšetacá; y chënga entšángbioye puerte obenánaca mochántsamëndaye, mo canye hierro varëfjaquëcá, y chëngbe contra chamojtsëmñëngbioye mochántsapochocaye, mo nye matbajënga tmojtsëtsjanjancá. <sup>28</sup> Y chë jabínÿinama ora bínÿnaye estréllnaca chanjátšataye.



<sup>29</sup> Chè jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtsëtsëtsnacá ca” —cha šonjaniyana.

### Sardisoca ošbuachiyëngcá enefjuanënga jábuayenama

**3** Mëntšánaca cha šonjaniyana: “Sardis bëts pueblentše ošbuachiyëngcá enefjuanëngbeñe chaotsemándama uámana ichmonábioynaca mëntšá mabobema:

Mëntšá entsichamo chë Bëngbe Bëtsabe canýsëfta espíritënga y chë canýsëfta estrellënga bomná: Atše lempe sëndétatšëmbo ntšamo tšëngaftanga šmoyenama; atše sëndétatšëmbo tšëngaftangbiama ínýenga tša jtsichámuana Bëngbe Bëtsá jasérviamu bëtscá šmojtsama ca, pero ndegombre tšëngaftanga nýe batšatema šmontsama, y chca, chabiamu mo obanëngcá šmondmëna. <sup>2</sup> Botamana šmochjenóbobonýe y más šmochtsama chë Bëngbe Bëtsá jasérviamu cabá šmondama básefta soyënga. Ndoñe yapa quenatájamna chë tšabe soyëngnaca chašmotsajbanama, er atše sënjinýe chë Bëngbe Bëtsábioye jasérviamu ntšamo jtsamëse šmoyencá, atšbe Bëtsabiamu ndoñe yapa tšabá quenátšmëna. <sup>3</sup> Asna, šmochtsenójuabnaye ndayá Bëngbe Bëtsábioyana šmojóyëngacñama, y chabiamu šmojouena soyënguifñaca. Ntšamo chë soyënga yomncá šmochtsiyena, juabnayana šmochjatróca y šmochjontša bëtscá jtsamama Bëngbe Bëtsá jasérviamu. Ndoñe tšabá cach tšëngaftanga chašmonjenójuabose y juabnayana ndoñe chašmonjatrocasa, nýe ndeolpe chanjá tšëngaftangbioye, mo canýe atbëbanacá, chabiamu ndocná tontsejuabná ora, y ndegombre tšëngaftanga ndoñe quešmochátstatšëmbo mocna ora atše tšëngaftangbioye chjama.

<sup>4</sup> Masque chca, Sardisentše tšëngaftangbeñe básefta entšanga mondmëna, chënga ndoñe chematajbaná oyenana tšabe soyënga jtsamëse, bacna soyënga játamama. Chëngna átšeftaca mochántsa jna uafjantsëjuangá uichétjonënga, chënga chca merecido montsebuajónayeca. <sup>5</sup> Chë padecena soyënguentšana tšabá chamojábocana mo ayënjanyëngcá, chca uafjantsëjuangá uichétjonënga mochántsemna, y chëngbe uabaina ndoñe quichatsjuána chë tšabe vida mochónýenëngbe uabaina enduábemana libréšentšana, ndayá atše, Bëngbe Bëtsabe delante y chabe angelëngbe delante, chënga atšbe entšanga imomna ca chanjayana.

<sup>6</sup> Chè jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtsëtsëtsnacá ca” —cha šonjaniyana.

### Filadelfioca ošbuachiyëngcá enefjuanënga jábuayenama

<sup>7</sup> Mëntšánaca cha šonjaniyana: “Filadelfia bëts puebloca ošbuachiyëngcá enefjuanëngbeñe chaotsemándama uámana ichmonábioynaca mëntšá mabobema:

Mëntšá entsichamo chë uamaná y ndegombre oye-buambnayá, chë jtsemándayama puerte obenana bomná, ntšamo Rey David enjanbomncá, chë nda ndayá chaotsemnama tojamandá ora, ndocná ntsoberenana jamama chca ndoñe chaondëtsemnama, y ndayá ndoñe chaondëtsemnama tojamandá ora, ndocná ntsoberenana jamama aíñe chaotsemnama: <sup>8</sup> Atše lempe sëndétatšëmbo ntšamo tšëngaftanga šmoyenama. Minýënga, atše sënjama tšëngaftanga bëtscá tšabe soyënga chašmotsebobomna, y ndocná quenátobena jamama chca ndoñe chaondëtsemnama; y chca entsemna mo atše tšëngaftangbiama canýe bëšáša cuafjatëfjca, y chëša jtatámiamu ndocná quenátobena. Atše sëndétatšëmbo tšëngaftanga batšatema obenana šmobomna, pero šmojouena ntšamo jtsamama tcbonjauyancá, y ndocna te chešmátayana atšbe entšanga ndoñe šmondmëna ca. <sup>9</sup> Atše chanjama, chë mo Satanasbe entšangcá imonënga, nýe chábioye jtseservënëse y jtsatschuanayëse, chë judiënga imomna ca ichámënga, pero chë Bëngbe Bëtsabe bocana entšangcá ndámënga y bosterënga, chënga tšëngaftangbioye chamua y tšëngaftangbe delante chamoshamentšé, tšëngaftangbiama respeto jinýanyiyama, y chca, chënga chamotsetátšëmbo atše sempre ctababuányeshanama. <sup>10</sup> Atše tcbonjanamëndá, Bëngbe Bëtsabeñe jtsobátmanëse, lempe chašmotsoboyá padecena soyënguifñe, y tšëngaftanga chca šmonjama. Chíyeca, atše puerte tšabá chochántsanýena, chë quem luarentše oyenënga nyetscanga jasúfriama y padecena soyënguifñe jtsemnama chaojtsemna ora, Bëngbe Bëtsabeñe aíñe o ndoñe mondošbuáchema jinýanyiyama.

<sup>11</sup> Cachiñe quem luaroye betesco chanjésabo. Sempre šmochtsama ntšamo mora šmondamcá, y Bëngbe Bëtsábioyana šmojóyëngacñe soyënga šmochtsinýena; chca ndocná chaondobená ndayá jamana, y chë sóyeca chaoma tšëngaftanga ndoñe chašmondóyëngacñe ndayá Bëngbe Bëtsá chë chábioye jtseservënama ndoñe tmontsajbanángbioye yochjatsataycá, chëngbe uacanana soye. <sup>12</sup> Chë padecena soyënguentšana tšabá chamojábocana mo ayënjanyëngcá, chëngbiama atše chanjama sempre Bëngbe Bëtsabe delante chamuesomñama, y chca, chënga mochántsemna mo chë Bëngbe Bëtsabe bëts yebnentša ucuatjoniñcá; ndocna te Bëngbe Bëtsábentšana quemocháisebocana; y chëngbeñe atšbe Bëtsabe uabaina chanjuábema y atšbe Bëtsabe bëts pueblentša uabaina, chë tsëm pueblo Jerusalén, chë celocana yobá pueblo, Bëngbe Bëtsábioyana. Y chëngbeñnaca chanjuábema atšbe tsëm uabaina. Lempe chca chanjama jinýanyiyama chënga Bëngbe Bëtsábenga mochtsemnama.

<sup>13</sup> Chè jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtsëtsëtsnacá ca” —cha šonjaniyana.

### Laodiceoca ošbuachiyëngcá enefjuanënga jábuayenama

<sup>14</sup> Mëntsánaca cha šonjaniyana: “Laodicea bëts puebloca ošbuachiyëngcá enefjuanëngbeñe chaotsemándama uámana ichmonábioynaca mëntsá mabobema:

Mëntsá entsichamo chë sempre Ndegombrá endmëná, chë Bëngbe Bëtsabe soyëngama ndegombre oyebuambnayá, y chë ndábeyeca Bëngbe Bëtsá quem luare tojanmá: <sup>15</sup> Atše lempe sëndétatsëmbo ntšamo šmoyenama. Atše sëntsetatsëmbo tšëngaftanga ndoñe yapa šmontseboše Bëngbe Bëtsá jasérvia, pero Bëngbe Bëtsabe buayenana soyënga ndoñe lempe šmontsaboté. Y chca, nye batšatema šmojtseboše Bëngbe Bëtsá jasérvia; chca, tšëngaftanga šmontsemna mo tibiye buyeshcá, ni ntšniñiye, ni shécbaniye. ¡Atše sëntseboše tšëngaftanga chašmotsemna mo ntšniñiye o shécbaniye buyeshcá, tšabá jtsamëse o tondaye! <sup>16</sup> Chca, tšëngaftanga tibiye buyeshcá šmondmëna, y ndoñe quešmátsboše bëtscá jamama, pero Bëngbe Bëtsabe soyënga ndoñe lempe šmontsaboté. Chíyeca atše sëntsejuabná jtsébatena, mo nda tibiye búyeshe tojëtšbuashëtjácá, chcaye ndoñe bondogustana causa.

<sup>17</sup> Er tšëngaftanga jtsichámuana bomnënga šmomnaca, puerte tšabá šmojábocana y tondaye cmontsabúáshebena ca, pero ndoñe quešmátstatšëmbo Bëngbe Bëtsabe soyënga bëtscá cmojtsabuáshebena. Chca, tšëngaftanga šmontsemna nya ndoñe tšabá, inyënga ngmënanana chacmotsabamna, mo ndbomnëjemëngcá, mo jtanëngcá, Bëngbe Bëtsabe soyëngama ntosertancá, y mo enašëngcá, bëtscá Bëngbe Bëtsabe soyënga ntsebomncá. <sup>18</sup> Chíyeca cbabuayená, átšbentšana chašmuatsjinýe chë Bëngbe Bëtsabe soyënga y uámana soyënga, mo chë ena castellano jabemama, inëjana fjëchnënguëse castellano átšbiye šmojtsontšabuamnañcá. Tšëngaftanga Bëngbe Bëtsabe delante mo enašëngcá šmondmëna, er cha endonýa chë ba bacna soyënga ntšamo tšëngaftanga šmojtsamcá. Šmochjaleséncia atše chacbéjabuache tšëngaftanga Bëngbe Bëtsabe bominiñe tšábënga chašmotsemnama, mo juichëtjuama uafjantse entšayá átšbiye šmojtsantšabuamnañcá. Chca šmochjama, tšëngaftanga Bëngbe Bëtsabe delante ndoñe chašmondëtsëuatjama. Šmochjaleséncia atše chacbéjabuache tšëngaftanga Bëngbe Bëtsabe soyëngama chacmósertama, mo tšëngaftanga bominye šocanama shnana átšbiye šmojtsontšabuamnañcá. Chca šmochjama, Bëngbe Bëtsabe soyëngama puerte tšabá chacmósertama.

<sup>19</sup> Atše chë sëndábabuanýeshanënga sëndbaucácana y sëndbábuayenaye. Chíyeca, lempe ntšamo šmojobenacá šmochtsama Bëngbe Bëtsá jasérvia, y juabnayana šmochjatróca, y nyets tempo puerte šmochseboše Bëngbe Bëtsá jtseservénana. <sup>20</sup> Nderado canýe tšabe amigo yebnoye tojabo y tojachembo, tšëngaftanga šmojouenëse y bëšáša šmojebiatëfjëse, cha

jamashënguana, y cánýiñe cháftaca joyejuayana y jasana. Cachcá, atše entsanga sentsachembuana chašmolesenciá chëngbe ainaniñe jtsiyenama. Nderado nda šojóyeunase, atše chanjámashëngo chabe ainaniñe jtsiyenama, y nyets tempo cháftaca cánýiñe mo canýacá chanjëftsemna.

<sup>21</sup> Chë padecena soyënguentšana tšabá chamojábocana mo ayëñjanayëngcá, atše chanjama chënga puerte bëtsétsanga chamotsemnama ntšamo atše sëndmëncá, y átšëftaca chamótbemama, atšbe uámana tbemanentše jtsemándayama, ntšamo atše atšbe uayayëngbiye sënjayëñjanacá, y atšbe Taitáftaca chabe uámana tbemanentše tijotbemcá.

<sup>22</sup> Chë jouenama tmojtsobenënga, chamouena ndayá Espiritu chë ndayenache ošbuachiyëngcá enefjuanënga yojtsëtsësnacá” —cha šonjaniyana.

### Chë Ainënga Bëngbe Utabnabe uámana tbemanentšatsana imojtsechuanaye

**4** Chentšana mo otjenayoquëcá sënjáninýe. Sënjanrepará y sënjáninýe celoca canýe bëšáša enjëtsetëfjna, y chë natsana sënjanuena oyebuambnayana, chë enjamna mo canýe trompetëfjua cuafjuatëtécá, mëntsá šonjëtsatsaye: “Moye másëngo, atše cbochanjinýinýiye ntšamo más chcoye yochjopasacá ca.”

<sup>2</sup> Cachora, chë Uámana Espiritbeyeca, mo atšbe ainana celoca cuaftsemncá atše sënjanoquedá, y sënjáninýe celoca enjëtsemna canýe reybe uámana puesto, y chentše canýa enjëtsetbemana. <sup>3</sup> Chentše enjëtsetbemaná enjamna, puerte tëshinýná mo jaspe ndëtšbecá, puerte buanganá mo cornalina ndëtšbecá, y chë uámana puesto shéconana canýe tsëfcuácuatjo enjamna, y enjëtsebuashinýinýana mo canýe esmeralda ndëtšbecá. <sup>4</sup> Chë reybe uámana puesto juachajana, inýe uta bnëtsana y canta puesto sënjáninýe, y chiñe uta bnëtsana y canta bëtsëjëmënga amëndayënga monjëtsetbiamana, uafjantsëjuangá uichëtjonënga, y castellano coronëshangá monjëtšabestšajona. <sup>5</sup> Chë uámana puententšana enjëtšobocana tcuinýejënga, becá shauenanana y juesasanana; y chë uámana tbemaniñentša natsanoicna, canýsëfta uajuinýanëshana enjëtšangbototjuana; chë uajuinýanëshangá entsayana chë Bëngbe Bëtsabe canýsëfta espiritënga. <sup>6</sup> Y chë uámana puententšana natsanoica enjëtsemna mo canýe mar bejaycá, tëshinýniye mo canýe cristal ca uabaina ndëtšbecá.

Chë luariñe tsëntsaca, chë uámana puesto enjëtsemnentše y chë shëconánëjana monjëtsemna canta Ainënga, nyëtsañe fšnëbëngaca, natsanoica y stëtšoica. <sup>7</sup> Chë natsana Ainá enjamna mo canýe leoncá, chë inýe Ainá mo canýe toroščá, chë inýe Ainá enjãnbomna mo canýe entšabe jubiacá, y chë inýe Ainá mo canýe águila tojtsongüëfjñacá. <sup>8</sup> Chë canta Ainënga, cada ona chnénguana juatëngmiáša enjanábomna, y tsoicajana y shjoicajana nyëtsañe fšnëbënga monjãnbomna. Y chënga nyets tempo, ntjochnacá mëntsá monjánichamo:

¡Uamaná, Uamaná, Uamaná, Bèngbe Utabná,  
Bèngbe Bètsá nyets obenana bomná,  
nda enjamná, endmèná y sempre echanjëftsemná ca!

<sup>9-10</sup> Chca chë Ainènga Bèngbe Bètsá bètsá tmon-  
tanchuá, Bèngbe Bètsá chë uámana puestentše tbe-  
maná, chë nyets tempo y nyetsca tescama oyená.  
Chènga puete respeto chabiamá monjëtssebomna y  
bètsá tmontanchuá. Cada ora chènga chca tmonjan-  
ma ora, chë uta bnètsana y canta bètsèjémènga  
améndayènga, chë uámana puestentše tbemanabe  
shecuatšentše joshamentšiyana y chábioye jtsatschua-  
nayana, chë coronèshangá chë natsanoica jutšanana,  
y mèntšá jtsichámuana:

<sup>11</sup> Aca nyets mercedo condètsobuájoñe, Bèngbe  
Utabná y Bèngbe Bètsá,  
entšanga chamotsinýanýnama, aca puete bètsá  
comnama, y chamotsichamo aca nyets respeto bua-  
joná comna, y nyets obenana bomná comna ca,  
er aca nyetsca soyènga tcojama;  
aca icnabóšeyeca chë soyènga yojtsemna y aca chca  
tcojanma ca.

### Chë uabemana uándmanana tsbuanácha y chë Oveshatema

**5** Chë uámana puestentše enjetsetbemanabe cat-  
šbioica cucuatšiñe canýe uándmanana ts-  
buanáchanaca sènjáninýe, y nyètsañe enjëtsabemana  
tsoicajana y shjoicajana, y canýsèfta tsengájaše sellén-  
gaca enjëtsajandmanana. <sup>2</sup> Y canýe ángel puete obe-  
nana bomná sènjáninýe, y cha mèntšá enjë-  
sayebuache: “¿Nda mercedo yobuájona, quem uánd-  
manana tsbuanácha jutéftjonama y chë sellènga jutsé-  
cama ca?”

<sup>3</sup> Pero, ni celoca, ni quem luarentše, ni quem luar-  
entša jashenoye, ndocná quenjatsmèna obenánaca  
chë uándmanana tsbuanácha jutéftjonama, ni juinýa-  
ma. <sup>4</sup> Y atše puete sènjánenobošachna, er ndocná  
ntjónýnana mercedo buajoná chë uándmanana ts-  
buanácha chautéftjonama, ni chauinýama. <sup>5</sup> Pero canýa  
chë bètsèjémènguentšá šonjanijana: “Ndoñe más  
matenóbošachena; mouena, chë Judabe pamillentsá,  
León ca uabobainá, mando y obenana bétsebomna-  
ma, chë rey Davídbentšana Entšá, tonjayèñaná; cha  
entsobena chë uándmanana tsbuanácha jutéftjonama,  
y chë canýsèfta sellènga jutsécama ca.”

<sup>6</sup> Chora sènjáninýe, chë uámana puesto y chë canta  
Ainènga y chë bètsèjémèngbe tsèntsaca, canýe Oves-  
shatema tsanana, pero enjëtsinýna mo cuafstobacá.  
Chë Oveshatema enjánbomna canýsèfta tsètjonèše y  
canýsèfta fšnèbé. Chë canýsèfta fšnèbé monjan-  
inýinýná chë Bèngbe Bètsabe canýsèfta espíritènga,  
chë Bèngbe Bètsá nyets quem luarèjana tojánicha-  
monga. <sup>7</sup> Chë Oveshatema tonjanobeconá y chë uánd-  
manana tsbuanácha tonjanaca, chë uámana pue-  
tentše tbemanabe catšbioica cucuatšentsana; <sup>8</sup> y  
chabe cucuatšiñe tonjanaca ora, chë canta Ainènga y  
chë uta bnètsana y canta bètsèjémènga améndayènga  
chë Oveshatembe shecuatšentše tmon-

janoshamentšé. Nyetscanga monjëtsètbèna arpangá y  
castellano copbenga jútjena inciensiýeca; chë copben-  
ga inciensiýeca enjamna chë Bèngbe Bètsabe entšan-  
ga tmojayana palabrènga, cháftaca jencuéntama ora.

<sup>9</sup> Y quem tsèm canto montsancántaye:

Aca mercedo condètsobuájoñe, chë uándmanana ts-  
buanácha chacuacama y chë sellènga chacutsécama;  
er acbe buiñe juabuáshanèše tconjanóbana, y chca  
enjamna mo crocénana cuafjëtsajocá, Bèngbe  
Bètsabiamá chamotsemnama,  
entšanga nyetsca cachca buiñe bomnènguentšana,  
nyetsca biyana bomnènguentšana, nyetsca canýe  
entšanguentšana, y nyetsca mándayèngbentša  
entšanguentšana.

<sup>10</sup> Aca tcojama chènga chamotsobena ácaftaca jt-  
semándayama  
y uámanènga chamotsemnama, Bèngbe Bètsábioye  
mo bachnangá chamotseservénama,  
y quem luarentše chènga montsemánda ca —chènga  
monjëtsseversiyaye.

<sup>11</sup> Y chca sènjétsonýaye ora, mallajta angelèngbe  
oyebuambnayana sènjanuena, y chènga monjëtssemna  
chë uámana puestentše, chë Ainènga y chë bèt-  
sèjémènga améndayèngbe shéconana. Nyetsá bètsá  
angelènga monjëtssemna, corente mallajta; <sup>12</sup> y chènga  
mèntšá monjëtsayebuache:

¡Chë Oveshatema cuafjobacá endmèná,  
mercedo endètsobuájoñe, nyets obenana, nyets  
bomnana,  
nyets osertánana y nyets añemo chaotsebomnama,  
y entšanga chabiamá chamotsichamo cha nyets re-  
speto buajoná yomna ca,  
y chamotsinýanýnama cha puete bètsá y uamaná  
yomnama,  
y nyetscanga chamotsatschuanama ca! —chènga  
monjëtsayebuache.

<sup>13</sup> Y sènjanuena, lempe ntšamo Bèngbe Bètsá tojan-  
mcá aina soyènga, celoca, quem luarentše, quem luar-  
entša jashenoye y chë mar béjayoca, chéngnaca  
mèntšá monjëtsichamo:

¡Chë uámana puestentše tbemanábioye y chë Oves-  
shatema nyetscanga nyets tempo y nyetsca tescama  
chamótsatacheuanaye  
y chamotsichamo chata puete uámanata y nyets re-  
speto buajonata ibomna ca,  
y chamotsinýanýná chata puete bètsétsata y obenata  
bétsemnama ca!

<sup>14</sup> Y chë canta Ainèngna monjëtsichamo: “Chca  
chaotsemna ca.” Y chë bètsèjémènga améndayèngna  
tmonjanoshamentšé y chábioye monjëtsatacheua-  
naye.

### Chë Oveshatema chë canýsèfta sellènga tonjanètsécá

**6** Chentšana más sènjáninýe; chë Oveshatema chë  
canýsèftentsana natsana sello tonjanètsécá ora,  
sènjanuena canýa chë canta Ainènguentšana puete  
jabuache, mo cuafjajuesascá, mèntšá enjëtsichamo:  
“¡Mabo ca!” <sup>2</sup> Sèñjanrrepará y sèñjáninýe canýe fjantse

couaye, y chábeñe enjetsenjaquená canye arquëja enjétsatbëna. Chábioye canye coronésha tmonjaníyé, y mo canye ayëñjanayacá tonjétsanbocna, y cabá más jatsyëñjanámna.

<sup>3</sup> Chë Oveshatema chë inye sello tonjanëtsécá ora, sënjanuena chë inya chë canta Ainënguentšana mëntšá enjétsichamo: “¡Mabo ca!” <sup>4</sup> Y inye couaye tonjánbocna, canye buanganá; y chë enjetsenjaquená obenana tonjanóyëngacñe jamama chë fshantsentša natjëmbana vida chaotsopochocama, entšanga chamotsenóbama; y canye bëts espadëja tmonjanoyé.

<sup>5</sup> Chë Oveshatema chë inye sello tonjanëtsécá ora, sënjanuena chë inya chë canta Ainënguentšana mëntšá enjétsichamo: “¡Mabo ca!” Sënjanontješé y canye ftsenga couaye sënjaninýe, y chë enjetsenjaquená canye romanésha enjétsëtbëna. <sup>6</sup> Y chë canta Ainëngbeñe canye oyebuambnayana mëntšá sënjanuena: “Nýe canye kilo trigo canye tesca trabajuama, y unga kilo cebadá canye tesca trabajuama; pero chë aceitiye y chë vínoyna ndoñe cattsepochoçaye ca.”

<sup>7</sup> Chë Oveshatema chë inye sello tonjanëtsécá ora, chë ústonoca Ainá enjétsichamo: “¡Mabo ca!” <sup>8</sup> Sënjanontješé y canye shatsësiye couaye sënjaninýe; chë enjetsenjaquená Obanana ca enjanabaina, y stëtšoica bonjétsëstona canya, Obanënga imomna luare ca uabainá; y chátbioye obenana tmonjanatšatá cãntañentšana cãnyentše quem luarentše jtsepochoçama, chentša entšanga jtsapochócase, entšanga tmojt-sentsjanama, bëts shëntsánëngaca, šocanëngaca y quem luarentša tsátjaye bayëngaca.

<sup>9</sup> Chë inye sello tonjanëtsécá ora, sënjaninýe chë altarentša tajsoye chë tmojanóbanëngbe espíritënga, chë Bëngbe Bëtsabe palabra entšanga abuayiyayama tmojanóbanënga. <sup>10</sup> Chora chënga tmonjanontšé tša uayebuáchana: “Uamaná y ntšamo tojašebuachenacá lempe amá bëngbe Nduiño, çntseco quem luarentša entšangbiama cochjayana ndoñe tšabá tmonjamama, y chë bëngbioye obanayama cochjácastigaye ca?” <sup>11</sup> Chentšana nyetscángbioye uafjantse entšayá tmonjaníyé y tmonjanéyana batsatema más chamobatmá ca, chë cachëngcá Crístbeyeca catšátanga y oservénënga, chë cachëngcá mochjanóbanënga, nyetscanga choca chamojtsemnëntscuana.

<sup>12</sup> Y más sënjaninýe; chë inye sello cha tonjanëtsécá ora, jabuache fshantse tontsanangmémana; shinýe tontsanftsénganga, mo chë obaná tojtsemnama juichëtjuama entšayacá, y nyets juashcona mo buiñcá enjétsinýna, <sup>13</sup> y estrellatémënga celocana fshantsoye tontsantquécjana, mo canye higo betiye jabuache bínýiaca tojtseshatíyeyna ora, chë nguëfshna higuëbenga cuafjatquécjancá. <sup>14</sup> Y celoca luare tontsananatjëmbe mo canye tsbuanácha cuafjuandmanacá, y nyetsca tjañe y béjayoca fshantsënga, chë ndayentše enjamnentšana tontsanojuaná; <sup>15</sup> y nyetscanga, fshantsoca reyënga, uámanënga, soldadëngbe amëndayënga, bomnënga, obenana bomnënga, y nyetscanga chë nyets tempo nýe inýabiama oservénënga y chë

cachëngbiama trabájayëngnaca, chë cuevëshënguiñe y bëts ndëtšbenguenache tjañe tmontsanóitana; <sup>16</sup> y chë tjañëngoye y chë ndëtšbengoye montsanichamo: “¡Bëngbioye šmotsëtebuantsá y šmotsaitame, chë uámana puestentše tbemanabe bominyëntšana, y chë Oveshatembe uabouana castigo, cha bëngaftaca tbojetnama, bëngbeñe ndoñe chaondëtsemnama! <sup>17</sup> Er chë uachuana te chabe castigo jtsebínýnama te tojshjango; y mora çnda nanjobenaye chë sóyeca ndoñe chamondëtsepochoçama ca?” —chënga montsanichamo.

### Chë Bëngbe Bëtsábioye oservénënga chë uabouana castigüentšana mochántsatsebacana

**7** Chca tonjanopasá chentšana, canta angelënga sënjananye, monjétsatsana chë quem luarentša canta opochóçayenache; chënga ndoñe quemënjatanlesencia chë canta binýiënga jtsebínýnama, ndoñe chaondëtsebinýiyayama, ni fshantsentše, ni mar béjayoca, ni ndocna betiyeshënguiñe. <sup>2</sup> Inye ángelnaca sënjaninýe, shinýe bocana luaroicana enjetsabó, y chë Bëngbe Bëtsá Ainabe sello enjétsiyëboye. Chë ángelna chë inye canta angelëngbioye, ndëmuanýëngbioye obenana tmojanatšatá chë fshantsentše y mar béjayoca lempe jtsepochoçama, chëngbioye jabuache tonjánabachembo: <sup>3</sup> “¡Tondaye šmatjapochóca, ni fshantsoca, ni mar béjayoca, ni betiyeshënguiñe, chë Bëngbe Bëtsabiama oservénëngbioye chë sëlloca juentsaca fchayauínýnanantscuana, ndoñe chamondëtsepochoçama ca!”

<sup>4</sup> Y sënjanuena buétanga chë sëlloca tmojánauinýnanayama: canye patse, canta bnétsana y canta uaranga entšanga uinýnanánënga nyetsca Israeloquentša bëts pamillanguentšana.

<sup>5</sup> Judabe pamillëntšana, bnétsana uta uaranga uinýnanánënga;

Rubenbe pamillëntšana, bnétsana uta uaranga;

Gadbe pamillëntšana, bnétsana uta uaranga;

<sup>6</sup> Aserbe pamillëntšana, bnétsana uta uaranga;

Neftalibe pamillëntšana, bnétsana uta uaranga;

Manasesbe pamillëntšana, bnétsana uta uaranga;

<sup>7</sup> Simeonbe pamillëntšana, bnétsana uta uaranga;

Levibe pamillëntšana, bnétsana uta uaranga;

Isacarbe pamillëntšana, bnétsana uta uaranga;

<sup>8</sup> Zabulonbe pamillëntšana, bnétsana uta uaranga;

Josebe pamillëntšana, bnétsana uta uaranga;

y Benjaminbe pamillëntšana, bnétsana uta uaranga entšanga.

### Chë mallajta entšanga uafjantsëjuangá uichëtjonënga

<sup>9</sup> Chentšana, sënjanrrepará y mallajta entšanga sënjananye, ndocná quentaisobenaye jacúntana, nyetsca mándayënguentšana, nyetsca cachca buiñe bomnënguentšana, nyetsca canye entšanguentšana, y nyetsca biyana bomnënguentšana; chënga monjétsatsana chë uámana puesto chë Oveshatembe natsanentše, uafjantsëjuangá uichëtjonënga y ramëshangá

monjétsébëna. <sup>10</sup> Nÿetscanga tša monjétsaye buache: ¡Bënga atsebacyana endobá, Bëngbe Bëtsá, chë uámana puestentše entsetbemanábentšana, y chë Oveshatémbentšana ca! <sup>11</sup> Y nÿetsca angelënga, chë uámana puesto y chë bëtséjémënga améndayënga y chë canta ainëngbe shéconana monjétsatsanënga, chë uámana puestentša natsanoica tmonjanoshamentšé, fshantsóntscoñe jotsejbénase, y Bëngbe Bëtsá tmonjanadorá, <sup>12</sup> mëntšá jayanëse: ¡Chca chaotsemna!

Bëngbe Bëtsábioye nÿets tempo y nÿetsca tescama chamotsadorana

y nÿets ainánaca cha chamotsatschuaná.

Entšanga chamotsinÿanÿná cha puerta bëtsá y uamaná bëtsemnama;

cha endmëna nÿets osertánana bomná, y nÿets respeto buajoná, y nÿets obenana y añemo bomná.

¡Chca chaotsemna ca! —chënga monjétsichamo.

<sup>13</sup> Chentšana, canÿa chë bëtséjemënguentshá tonjanoyebuambá y šonjantjá: “¿Ndëmuanÿënga imomna chë uafjantsëjuangá uichëtjonënga, y ndémocana tmojabo ca?”

<sup>14</sup> “Taita, aca chëngbiama cotátšëmbo ca” —atše sënjanjuá.

Y cha šonjaniana: “Chënga montsemna chë jabuache ngmenënguentshana tšabá tmojabocanënga; chë Oveshatema chëngbiama tojóbana y chëngbe bacna soyëngama perdonánënga montsemna; chëngbe uichëtjonëjuangá tmojtsaboshabé y chë Oveshatembe buíñeca tmojtabofjantsé.

<sup>15</sup> Chíyeca chënga chë Bëngbe Bëtsabe uámana puestentša natsanoica montsemna, y chábioye nÿets tempo chabe delante mondëserve-na,

y chë uámana puestentše entsetbemaná, chëngbenache jtsemnëse, chënga echántsanyëna, mo cuafjutsebotscá.

<sup>16</sup> Ya ndoñe más shëntsana, ni uajuendayana quemochátsbomna; shinÿama, ni yapa jënÿama ya ndoñe más quemochátssufrina;

<sup>17</sup> er chë Oveshatema, chë uámana puestentša natsana tsëntsaca entsemná,

chëngbioye mo oveshëngcá echantsabuajénÿa, y echanjunatse bójaye vida bomniye yóbocana luaroye,

y Bëngbe Bëtsá echanjama ya ndoñe más ngmënanana chamondëtsebomnama ca” —cha šonjanjuá.

### Chë ústonoca sello

**8** Chë Oveshatema chë uándmanana tsbuanáchañe chë ústonoca sello tonjanëtsécá ora, celoca ndocá quentétsënëna mo tsëntsa hora nÿetsá.

<sup>2</sup> Chora sënjananÿe chë canÿsëfta angelënga, chë Bëngbe Bëtsabe delante monjétsatsanënga; chëngbioye canÿsëfta trompetëfjuangá tmonjanianÿe.

<sup>3</sup> Chentšana inÿe ángel tonjánashjango, canÿe castellano matbëtémaca incienso jajuinÿiyama, y altar nat-

sanoica tonjantsá; chábioye bëtscá incienso tmonjanoyé chaojuinÿema chë castellano altaroca, chë uámana tbemana natsanoica enjëtsemnoca. Chë ángel incienso tonjanjuinÿé Bëngbe Utabná jëtschuayama, cánÿiñe nÿetsca chë Bëngbe Bëtsabe entšanga tmojoyebuambá palabréngaca, cháftaca jencuéntama ora. <sup>4</sup> Y chë incienso juinÿentša ngona, chë ángelbe cucuatšentšana Bëngbe Bëtsabe delante tonjanótsjua, cánÿiñe chë Bëngbe Bëtsabe entšanga cháftaca jencuéntama palabréngaca. <sup>5</sup> Chentšana chë ángel chë incienso jajuinÿiyama matbëtëma tonjanca, chë altar-entša chebánbengaca tonjanajutjé, y quem luaroye tonjanëtsana. Chora enjëtsemna tša juesasanana, corente shauenanana, bëtscá tcuinÿënga, y quem luaré tontsanangmëmana.

### Chë trompetëfjuangá

<sup>6</sup> Chora chë canÿsëfta angelënga, chë canÿsëfta trompetëfjua uabomnënga, tmonjanoprontá chëfjuangá juajatëtama.

<sup>7</sup> Chë natsana ángel chabe trompetëfjua tonjanájatëto, y quem luaroye tmonjanëtsana bëntstá y íñeshe, cánÿiñe buíñeca. Ungañentšana cánÿentše quem luar-entše tontsanjuinÿe, úngañentšana cánÿentše betiyeshënguifne y nÿetsca nguëfshna shacuanënguifnaca.

<sup>8</sup> Chë inÿe ángel chabe trompetëfjua tonjanájatëto, y chora chë mar bójayoye tmonjanëtsana canÿe soye mo canÿe bëts tjañe tojtsangbototjuancá, y chë mar bójayiñe úngañentšana cánÿentše buíñe tontsanóbema. <sup>9</sup> Chë mar bójayiñe vida imobomnéngbeñe úngañentšana cánÿentše tontsanopochocá, y chë barquënguëntšnaca úngañentšana cánÿentše.

<sup>10</sup> Chentšana chë inÿe ángel chabe trompetëfjua tonjanájatëto, y canÿe bëts estrella, mo canÿe uajuinÿanëshacá enjëtangbototjuana, celocana tonjanótsatše chë úngañentšana cánÿentše bójayënguifne, y bójaye óbocanenache. <sup>11</sup> Chë estrella enjanabaina Untjana ca; y chë úngañentšana cánÿentše buyeshënguifne untjiye tontsanóbema, y chë untja búyeshe causa ba entšanga tmonjanóbana.

<sup>12</sup> Chë inÿe ángel chabe trompetëfjua tonjanájatëto, y chora tontsanóndbema chë úngañentšana cánÿentše shinÿiñe, y chë úngañentšana cánÿentše juashconiñe y chë estrellënguifnaca. Chca, nÿetsca chentša úngañentšana cánÿentše ibetiñe tonjanoquedá, y chë causa ndoñe quemëntëtsebinÿnaye posufta horëntscuana, bnëté canta hora y ibeta canta hora.

<sup>13</sup> Chentšana, sënjanrrepará y sënjanuena canÿe águila, tsbanánoca celoca enjetsongüefjná, jabuache mëntšá enjétsichamo: “¡Tša lastema, tša lastema, tša lastema quem luarentša entšangbiama, chë inÿe trompetëfjuangá chë inÿe unga angelënga chamojuá-jatëto ora ca!”

**9** Chentšana chë inÿe ángel chabe trompetëfjua tonjanájatëto, y sënjaninÿe canÿe ángel quem luaroye jastjanguana y enjëtšinÿa mo canÿe estrella ce-

locana quem luaroye cuaftsotsatsancá; y moye tonjánashjango ora, tmonjanoyé chë uabouana tboca atëfj-nentša llavëfja. <sup>2</sup> Chë uabouana tboca atëfj-nentše tonjánatëfjo, y chentšana becá ngona tonjanótsjua, mo bëts hornentša ngoncá; y chë uabouana tboye atëfj-nentše ngona causa shinÿe tontsanibétata y nÿets ce-loca ena ngona enjëtsemna. <sup>3</sup> Chë ngonentšana ba tšátjaye chapulinga tmonjánbocana, y nÿets quem fshantsëjana tmonjanáshana; y chëngbioye obenana tmonjanatšatá, chánaca jándbemama, mo chë juetjua-ma alacranëngbe obenancá. <sup>4</sup> Chëngbioye tmon-janamëndá tondaye ntjándbemana chë shacuanënguiñe, ni ndocna nguëfshna matënguiñe, ni ndocna betiyeshiñe; nÿe chë juentsaca chë Bëngbe Bëtsabe sélloca nduinÿananana entšangna añe. <sup>5</sup> Pero ndoñe chematanalesenciá entšangbioye jobáyana, ndayá nÿe jamama chënga shachna shinÿentscuana tsetšanana chamotsebonnama; y chë chënga monjánama chamotsebonnama tsetšanana enjamna mo canÿe alacranbe uetjoniñcá.

<sup>6</sup> Chca tempo chaojtsemna ora, entšanga mochántseguaye ntšamo jtsóbanama, chë tsetšanënga jauántama ndoñe quemochátobena causa, pero ndoñe quemochátinÿena ntšamo jamëse jt-sóbanama; y masque tša mochántseboše jóbana, chora chëngaftaca ndoñe chca queochatopása, mo jóbana ndoñe tmontsobencá.

<sup>7</sup> Chë tšátjaye chapulinga monjétsinÿna mo couayëngcá prontánënga jama entšangaftaca jéntsja-ma; chëngbe bestšašniñe monjanábomna mo castel-lano coronëshangacá, y chëngbe jubiá enjamna mo entšabe jubiácá. <sup>8</sup> Stjënashë monjánbomna mo shembásabe stjënashacá, y chëngbe juatsašënga mo leonbe juatsašëngcá. <sup>9</sup> Chëngbe cuerpënga jenéuyanama cochaca monjánbomna morocho soyënga, mo hierro soyëngcá, y chëngbe juatëngmiashangá tmojtsabonjná ora, chë shauenanana bëtscá enjamna, mo ba cochëshangá couayënga cuaftsasjojnacá, chë inÿengaftaca jéntsja-ma tmojëftsátjajo ora tojtseshaue-nancá. <sup>10</sup> Chënga monjanábomna mo alacranbe uascuatšëjuacá, ba uetotjéjfangaca, y chë uascuatšëjuaca obenana monjánbomna shachna shinÿentscuana entšanga mal chamotsepasama. <sup>11</sup> Chë tšátjaye chapulinga canÿe amëndayá monjánbomna, chë uabouana tboca mándaye ángel; hebreo biyañna cha uabainá Abadón ca y grieguiñna Apolión o pochocayá ca.

<sup>12</sup> Chë natsana pochócayana ya tocjochnëngo, pero más chcoye cabá inÿe uta soye más pochócayana cachcá echántsemna.

<sup>13</sup> Chentšana chë inÿe ángel chabe trompetéjua tonjánatëto, y canÿe oyebuambnayana sënjanuena, chë Bëngbe Bëtsabe delante enjëtsemna castellano altar-entša juatsboica lado sibienache obocanentšana enjët-sobocana. <sup>14</sup> Y chë oyebuambnayana, chë trompetéjua tonjánatëto y enjëtsetbëna ángelbioye tbonjanianyana: “Chë canta angelënga chë Eufrates bëts fshájaye tsachoca utsbuanënga mëjafjoná ca.” <sup>15</sup> Y chë canta angelënga tmonjanëjafjoná; y nÿa chë ora, chë

te, chë shinÿe y chë uatama chëngbioye tmojanapron-tá, chë quem luarentša entšangbeñe úngañentšana cánÿentšënga jtsébáyama. <sup>16</sup> Atše sënjanuena buétan-ga imojamna chë angelëngaftaca tmojána soldadënga, couayënguiñe: uta patse millonënga ca.

<sup>17</sup> Mëntšá sënjananÿe mo otjenayoquécá chë couayënga y chë chëngbeñe enjaquenënga: Chë enjaquenënga monjánbomna morocho soyënga cochaca, jenéuyanama, y chë soye buanganana enjáninÿna, mo iñcá, y fchendana mo chë uámana ndëtšbé jac-intcá y tsëšiyana inÿnana mo azufrcá; y chë couayënga monjánbomna mo leonbe bestšašcá, y chëngbe uayoicana enjëtsohocana iñe, ngona y azufrana. <sup>18</sup> Y chë úngañentšana cánÿentše entšanga tmonjanóbana quem unga uabouana pochócaye soyëngaca, chë couayëngbe uayoicana enjëtsohocanana: iñe, ngona y azufrana. <sup>19</sup> Er chëngbe obenana entšanga japochóca-ma monjánbomna uayáshañe y uascuatšëjuañe; er chëngbe uascuatšëjuca enjuamna mo mëtscuayëngcá, bestšašëngaca, y chëjuanga causa entšanga mal montsanpásaye.

<sup>20</sup> Pero chë inÿe entšanga, chë uabouana pochócaye soyëngaca ndoñe tmonjanopochocanga, juabna ndoñe chematantrócá, y ndoñe chematanajbaná amana chë bacna soyënga ntšamo monjanamcá; ndoñe chematanajbaná adórayana chë bacna bayëjën-ga, ni chë mo diosënga cuaftsemncá jtsejuabnayëse imojánadorana castellano soyënga, midio soyënga, bronce soyënga, ndëtšbé y niñëbé soyënga; y chca soyënga ndoñe quemënjatobena ni jinÿama, ni jouenama, ni jtsanama. <sup>21</sup> Juabna ndoñe chematantrócá y ndoñe chematanajbaná entšanga obanayana, encjuanayana, bacna soyënga boyabása o shembásaftaca jtsamëse oyenana, ni atbëbanana.

#### Chë ángel base uándmanana tsbuanáchaca

**10** Chentšana sënjaninÿe inÿe ángel, puerta obenana bomná; celocana enjëtstajjuana, y chabe shéconana canÿe jantsetëshe enjëtsemna; chabe bestšaše tatsëtsacá canÿe tsëfcuácuatjo. Chabe jubiá shinÿcá enjëtsebuashinÿinÿana, y chabe shecuatšënga mo úcuatjona niñëbenga cuaftsoiñcá. <sup>2</sup> Chabe cucuatšëniñe enjëtsetbëna canÿe base uándmanana y utëfjna tsbuanáchaca. Chabe catšbioica shecuatšëca chë mar béjayoca tonjantsá, y chë uañicuayóicatšecna, quem fshantsentše. <sup>3</sup> Y jabuache tonjanoyó, mo canÿe león cuaftseyocá; y tonjanoyó ora, canÿsëfta juesasanentša jabuache shauenanana sënjanuena. <sup>4</sup> Chë canÿsëfta juesasana chca tmonjanoyebuambá ora, atše sënjanoprontá ntšamo chënga tmonjanayancá juabema-ma; pero canÿe oyebuambnayana celocana sënjanuena, mëntšá sonjëtatsaye: “Nÿe aca cochtsójuabnañe ntšamo chë canÿsëfta juesasana tmonjayancá, ndocnábioye catjauyana, y chë soye ndoñe catjuábema ca.”

<sup>5</sup> Chora chë ángel, chë mar béjayoca y quem fshantsentše atsaná sënjaninÿá, chabe catšbioica cucuatše celoye tonjanatsbaná, <sup>6</sup> y tonjanjurá Bëngbe Bëtsabiana, chë nÿets tempo y nÿetsca tescama oyen-

abiama, chë celoca, quem luare, chë mar béjaye, y lempe chë luarënguine yobinýncá tojanmabiama. Tonjánayana: “Ya ndoñe más quemochatobatma; mora Bëngbe Bëtsá echanjama ntšamo tojašebuachenacá, <sup>7</sup> er chë tempo chaojóshjango, chë ústonoye ángel chabe trompetéjua juajatëtama chaojontsé ora, chora ya echanjochnëngo ntšamo Bëngbe Bëtsá jamama yojuabnacá; chë soye nyetsca entšángbioye cha ndoñe chenatinýanýe, ntšamo tempo cha chabe oservénëngbioye, chë chabe juabna oyebuambnayëngbioye tojanbuayenacá ca” —cha tonjánayana.

<sup>8</sup> Chë atše sënjanuena oyebuambnayana celocana enjétsobocanana, cachiñe šonjanatsëtsá y šonjaniyana: “Motsa y mauaca chë mar béjayoca y quem luarentše ángel entsemnabe catšbioica cucuatšife base uándmanana y utëfjna tsbuanácha ca.”

<sup>9</sup> As atše chë ángelbioye sënjána; chë base uándmanana tsbuanácha chašuíyema sënjaniyana, y cha šonjanjuá: “Quemécha, motsásañe. Acbe uayoye uamešquénëcha mo tjouangbe meloycá echántsamna, pero acbe uafsbioyna puerte uauntjécha echantsábema ca.”

<sup>10</sup> As chë base uándmanana tsbuanácha chë ángelbe cucuatšentsána sënjanaca, y sentsanásañe; y atšbe uayoye meloycá enjétsamna, pero sënjanabmuaná y atšbe uafsbioyna puerte uauntjécha tontsanábema.

<sup>11</sup> Chora šmonjaniyana: “Aca cmontsemna cachiñe jtétabuayenana, ntšamo Bëngbe Bëtsá tojayancá chë ntšamo yochjopásama, ba canye luarentša entšángaftaca, ba mándayëngbentša entšángaftaca, ba biyana bomna entsanguentséngaftaca y quem luarentša reyëngaftaca ca.”

### Chë útata Bëngbe Bëtsabe juabna oyebuambnayata

**11** Chentšana canye medídaye niñëfja šmonjanoyé, mo jatšëmbonëfjácá, y šmonjaniyana: “Motsa y Bëngbe Bëtsabe bëts yebna y chentša altar cochjamedída, y cochjácuntaye bueta entsanga chentše Bëngbe Bëtsábioye imojtsadorana. <sup>2</sup> Pero chë Bëngbe Bëtsabe yebnentše más shjoica luarna cachcá cochjonýaye, ndoñe catjamedída, er chiñe chë ndoñe judiëngbiama endmëna; y chënga, chë uámana ca uabaina bëts pueblama, canta bnëtsana y uta shinýentscuana soyënga mochántsama chiñe jtse-pochócama, mo cuaftsebotajncá. <sup>3</sup> Pero atše, útata atšbiama tatšëmbuata y oyebuambnayata chanjichamuá atšbe cuenta entšángbioye jábuayenama, canye uaranga y uta patse y chnénguana bnëtsana tentscuana. Chatna uajojësha entšayangá uichëtjona-ta bochantsemna, chca, ngmena bomnama jinýanýiyama ca” —chata tbonjánayana.

<sup>4</sup> Quem útata atšbiama tatšëmbuata y oyebuambnayata bontsinýinyena chë uta olivos betíyeca y chë uta candelerëšeca, ntšamo Bëngbe Bëtsá, chë quem luarentše mandayabe delante endmëncá. <sup>5</sup> Nderado nda tojtseboše chatbiama bacna soye jamama, ndoñe quentatobenaye ntšámnaca jáborlana, er uayoicana ñeshe nanjóbcna y chë uayayëngbioye nantsapochó-

caye; nderado nda tojábošena chatbiama bacna soye jamama, cachcá cha buántsemna jóbanama. <sup>6</sup> Chë útata obenana bondbomna celoca jtsachtama, ndoñe chaonduaftema, entšángbioye Bëngbe Bëtsabiama chabojsabuayiná tese; obenana béjayënga buiñe jtsebiama, y jamama quem luarentše chaotsóndbemama, nyetsca pochócaye soyëngaca, bueta sóynaca ntšamo chata tbojtsebošcá.

<sup>7</sup> Pero ntšamo Bëngbe Bëtsabiama ibotatsëmbcá entšángbioye jábuayenama chata chabojapochocá ora, chë uabouana bayá, chë corente bëts tboicana chaojabocná, chátbioye echántatsjaye, echantsayënjána y echantsëbaye. <sup>8</sup> Y chatbe óbana cuerpo, chë corente bëts pueblentsa tsáshenañe echanjoquéda, chë chatbe Utabná tmojanrucificá luarentše, y chë bëts pueblo inýetšá juabáyamna nántsemna mo chë Sodoma y Egiptó luaroycá. Chentše endmëna mo chë bëts pueblënga Sodoma y Egiptcá, er chentše chë entsanga yapa bacna soyënga jtsamana. <sup>9</sup> Y unga y tsëntsa tentscuana, chë obanatbe cuerpo mochantsonýaye, nyetsca canye luarentša entsanga, nyetsca cachca buiñe bomna entsanga, ba biyana bomna entsanguentsána y ba mándayëngbentša entsanga; ndoñe quenátslesenciana chata jutabuantsama. <sup>10</sup> Chata bochjóbanama, quem luarentše oyenënga mochanjóyejuaye; tša oyejuayënga mochántsemnama, ndayánaca mochanjénatsëtaye, er ntšamo chë Bëngbe Bëtsabe juabna oyebuambnayata tbojanayancá, tojanma quem luarentše oyenënga puerte chamosufrima.

<sup>11</sup> Pero chë unga y tsëntsa te tonjanochnëngo ora, Bëngbe Bëtsá tonjanma chë obanata chábuatayenama; chentšana tbontantsata, y chë monjétsantješnënga tša uatjana tonjanëbuache. <sup>12</sup> Chora canye jabuache oyebuambnayana tbonjanuena, celocana mëntšá enjétsëtsnaye: “Moye mašënguata ca.” Y chatna canye jantsetëshiñe tbonjántsjua, y chatbe uayayënga chca monjétsónýaye. <sup>13</sup> Cachora quem fshantse jabuache tontsanangmëmmana, y chë bëts pueblentše bnëtsanentsána cánýentše tontsanáshajaye, y canýsëfta uaranga entsanga tmonjanóbana. Chë ainënga tmonjanoquedanga, tša auatjanánënga, chë celoca Bëngbe Bëtsábioye montsanadorana.

<sup>14</sup> ¡Chë inye uabouana soye quem luare japochócama, mora tocjochnëngo, pero betesco chë ústonoye uabouana pochócaye soye echanjóshjango!

### Chë ústonoye ángelbe trompetéjua

<sup>15</sup> Chë ústonoye ángel chabe trompetéjua tonjanajatëto ora, celoca tša monjétsayebuache, mëntšá monjétsichamo:

Ora tocjobuache, Bëngbe Utabná y chabe Uámana Uabuayaná Jesucristbe amëndayana quem luarentše chaotsemnama, y chë amëndayana echántsemna nyets tempo y nyetsca tescama ca. <sup>16</sup> Y chë uta bnëtsana y canta bët-sëjëmënga amëndayënga, chë chëngbe uámana puestiñe Bëngbe Bëtsabe delante monjétsëtbia-

manënga, tmonjanoshamentšé, fshantsóntscoñe jot-sejbénase, y Bëngbe Bëtsá tmonjanadorá, <sup>17</sup> mëntšá jayanëse:

Bëngbe Utabná, Bëngbe Bëtsá nyets obenana bomná,  
aca chë mora cha condmëná y chë tempo cha con-jamná cbontsatschuaná,  
er nÿa mora acbe bëts obenánaca soyënga cochjama,  
acbe amëndayana jóntšama.

<sup>18</sup> Ba luarentša entsanga ácaftaca tmonjanotšat-jayená;  
pero chëngaftaca cmojetnama chë uabouana castigo jtsebinÿnama te tocjóshjango,  
chë tempo tmojanóbanëngbiama jayanama tšabá o ndoñe tšabá tmonjëftsemama.

Tonjóshjango chë hora, uacanánana jtatšatayama chë acbiama oservënéngbioye,  
chë acbe juabna oyebuambnayëngbioye, chë acbe entsángbioye,  
y chë acbe uabaina nyetscangbiama más bëts uabainana yomnama juabnayëngbioye,  
uámanënga y nduámanënga;  
y chë tempo tonjóshjango, quem luare pochocayënga jtsapochócayama ca —chënga tmonjánayana.

<sup>19</sup> Chora, Bëngbe Bëtsabe bëts yebna celoca tonjantëfjo, y choye enjëtsebinÿna chë cajontema,  
ndayëtema yojaninÿanÿná ntšamo Bëngbe Bëtsá chabe entsángbioye tojanašebuachenacá; y chora enjëtsemna tciinÿënga, tša shauenanana, juesasanana, quem fshantse tontsanangmémana y bëtská bëntstá tonjantquécjana.

### Chë shembása y chë uabouana bayá

**12** Chentšana, canÿe bëts soye celoca tonjanonÿná entsanga canÿe soye jinÿanÿiyama: canÿe shembása, shinÿe mo chabe uichëtjoniaca, juashcona chabe shecuatšentša tajsoye, y chabe bestšašifne canÿe coronésha bnëtsana uta estrellëngaca. <sup>2</sup> Chë shembása ngomamaná enjëtsemna, y chë šëšona jónÿnama yojëtsobecuama jabuache enjëtseyoye, chë šëšona jónÿnama cha puerte jasúfriama ibojamna causa. <sup>3</sup> Y chora inÿe bëts soye celoca tonjanonÿná, entsanga inÿe soye jinÿanÿiyama: canÿe uabouana dragón buanganá, canÿsëfta bestšašëngaca y bnëtsana tsëtjonëšëngaca y chë bestšašënguiñe enjanábomna canÿsëfta coronëshangá. <sup>4</sup> Chabe uascuatšëjuaca úngañentšana cánÿentšë chë estrellatémënga celocana tontsansjojó, y quem fshantsoye chëtëmënga tontsanëtšana. Y chë dragón chë šëšona jtsebomnama shembásabe delantë tonjantsá, chë šëšonatëmbioye jtsósañama, cha tojonÿná ora. <sup>5</sup> Chora chë shembása canÿe šëšona boyabásetema bontsanbomna, nda nyets luarenache entsángbioye yochtsamëndaye mo canÿe hierro varëfjaquécá. Pero chë šëšona chábentšana tmontsanjuaná y Bëngbe Bëtsábioye, chabe uámana puestoye tmontsanámbañe. <sup>6</sup> Chë shembásana entsanga ndoyena luaroye tontsanachá, Bëngbe Bëtsá canÿe luare ibojabopróna choye, chentšë saná chamo-

caredadoma, canÿe uaranga y uta patse y chnënguana bnëtsana tentscuana.

<sup>7</sup> Chentšana celoca canÿe entsjanayana enjëtsemna: Miguel, chë angelëngbe amëndayá, y chabe angelënga chë dragónaftaca monjëtsentsjanaye. Chë dragón y chabe angelënga monjëtsatsjanaye, <sup>8</sup> pero ndoñe chematanobená jáyëñanama, y chëngbiama ya ndoñe más luare celoca quentëtsemna. <sup>9</sup> Chcase, chë uabouana dragón chocana tmontanábocna, chë temp-sca mëtšcuaye, chë Diablo y Satanás ca uabainá, y chë bëtská entsángbioye aingñayá; quem fshantsoye cha tmontsantsatšë, y chë cha yojanamënda angelëngnaca.

<sup>10</sup> Chora canÿe jabuache oyebuambnayana celoca sënjanuena, mëntšá enjëtsichamo:

Chë Bëngbe Bëtsá entsanga játsebacama tempo ya tonjóshjango.

Mora Bëngbe Bëtsá echanjínÿanÿiye chabe obenana y mándayana,  
y chabe Uámana Uabuayaná Jesucristbe obenana jtsemándayama;

er chë Cristbe delante bëngbe catšátanga mal aque-dayá ya tmontábocna,  
nda nyets tempo Bëngbe Bëtsabe delante mal en-janaquedayá.

<sup>11</sup> Bëngbe catšátanga cha tmonjayëñaná,  
er Cristo, chë mo tmojóba Oveshatemcá, Bëngbe Bët-sá bacna soyëngama entsanga cháuperdonama,  
tonjanóbana, chabe buiñe juabuáshanëse,  
y chë ndegombre soyëngama chënga monjanóye-buambnáyeca;  
er chëngbe vida chëngbiama ndoñe quenjatámana;  
Jesucristo jasérviamá jóbana chënga monjan-prontana.

<sup>12</sup> ¡Chcasna, celoca corente oyejuayana chaotsemna,  
y tsëngaftanga chë choca oyenëngbeñnaca!  
¡Pero tša lastema chë fshantsoca y mar béjayoca oyenëngbiama,

er chë diablo tsëngaftangbioye tonjástjango, corente tsätjayá,

er cha entsetátšëmbo ya nÿe batšá yojtšábojamna chë chábioye mochjacastígama ca! —enjëtsichamo.

<sup>13</sup> Chë dragón quem fshantsoye tmojtsantsatšama tonjáninÿe ora, chë šëšona boyabásetema tbonjanësh-jango shembásabioye tbontsanacmé. <sup>14</sup> Pero uta ju-atëngmiásha, chë bëts aguilbeshá, chë shembás-abioye tmonjaninÿe, chabiama tmojanprontá luaroye chaongüefjoma, entsanga ndoyena luaroca, chë dragónbentšana bënoca; y chentšë enjamna chë shembásabioye saná chamuájuatšëma, unga y tsëntsa uatëntscuana. <sup>15</sup> Chora chë dragón, chabe uayoicana bëts béjaye tonjanbuashëtjo chë shembásabe stët-šoica, chaobuama y chabotsambama; <sup>16</sup> pero quem fshantse chë shembásabioye tbonjanájabuache, er chë fshantse mo uayašacá tonjantëfjo, y chë dragonbe uayoicana béjaye obocniye tontsanobmuánañe. <sup>17</sup> Y chë dragón chë shembásabioye tondaye jamana chen-atanobená causa, corente cacháftaca tbonjánëtna, y



tonjána chë ínÿenga, chë shembásabe basengcá mondmënenga játsjayama, ntšamo Bëngbe Bëtsá yomandacá imobedecénenga, y ntšamo Jesucristo tonjanabuayená ndegombre soyéngaca sempre imoyenenga. <sup>18</sup> Y chë dragón chë mar béjaye tsachañe tonjantsá.

**Chë dragón tonjanma, chë mar béjayoca uabouana bayá chabe obenana chaotsebomnama**

**13** Chentšana atše sënjáninÿe, canÿe uabouana bayá chë mar bejayoicana tonjánbocna; enjánbomna canÿsëfta bestšašënga y bnëtsana tsëtjonëšënga, y chëšënguiñe bnëtsana coronëšhangá, y chë bestšašënguiñe bañe enjétsabemana Bëngbe Bëtsabiamana contra oyebuambnaye uabaina. <sup>2</sup> Chë uabouana bayá sënjaninÿá enjamna mo canÿe leopardcá, mo osbe shecuášangaca, y chë uayáshana mo leonbeshacá. Chora chë dragón tonjanma chë uabouana bayá chaotsebomnama chabe obenana, y chabe uámana puesto jtsemándayama, y chabe bëts mando. <sup>3</sup> Canÿe chabe bestšašënguentše enjétsinÿna mo jóbanama tëtšeniñcá; pero chentše tbontanóbema; y chora quem luarentša nÿetsca entšanga ojanánënga monjésemna, y chë uabouana bayábioye montsanëyuanana. <sup>4</sup> Y chë dragón montsanadorana, chë uabouana bayábioye obenana tbojánatšetama; y chë uabouana bayábioynaca montsanadorana, mëntšá jayanëse: “Ndocná obenana quenátsbomna quem uabouana bayacá, y ndocná quenátobena chábioye jayénjanama ca.”

<sup>5</sup> Chë uabouana bayábioye tbonjanlesenciá corente podesca Bëngbe Bëtsabiamana chaotsóyebuambnama, y obenana tbonjanatšetá, canta bnëtsana y uta shinÿentscuana chaotsemándama. <sup>6</sup> Y podesca Bëngbe Bëtsabiamana tonjánayana, soyënga chabe contra, chabe bëts yebnama y chë celoca oyenëngbe contra. <sup>7</sup> Chábioynaca tbonjanlesenciá chë Bëngbe Bëtsábënga imomnënga játsjayama, jáyënjantscuana; y obenana tbonjanatšetá chaotsemándama nÿetsca cachca buiñe bomna entšángbeñe, nÿetsca canÿe entšángbeñe, nÿetsca biyañe bomnëngbeñe, y nÿetsca mándayëngbentša entšángbeñe. <sup>8</sup> Chë uabouana bayá nÿetsca quem luarentša entšanga mochántadorana. Chë entšanga mondmëna ndëmuanÿengbe uabaina ndoñe yontsábemana, chë Bëngbe Bëtsábioye jëtschuayama mo canÿe oveshatemcá, tojanóbanabe librëšañe. Bëngbe Bëtsá quem luare cabá ndëma ora, quem librëšañe tojanábema nÿetscanga chë tšabe vida mochjónÿenëngbe uabaina.

<sup>9</sup> Chë jouenama obenënga, chamouena.

<sup>10</sup> Chë cárceloye jama ibomná, cárceloye bochanjotóca jama;

chë espadéjaca jobanamá, espadéjaca echanjóbaná.

Chíyeca quem luarentše entseyta, chë Bëngbe Bëtsábënga imomnënga padecena soyënguiñe tmojtsemna ora, puerte uantadënga jtsemnana y Bëngbe Bëtsábë

sábëñe jtsošbuáchiyana, mo chë Bëngbe Bëtsabe entšangcá.

<sup>11</sup> Chentšana inÿe uabouana bayá sënjáninÿe, quem fshantsentšana enjëtsebocana; uta tsëtjonëše mo oveshabešcá enjánbomna, pero mo canÿe dragoncá, mo canÿa Satanásbeyeca mandanacá enjëtsoyebuambnaye. <sup>12</sup> Y enjánama soyënga chë natsana uabouana bayabe nÿets obenánaca, chabe delante. Chë fshantsentša bayá tonjanma nÿetsca luarentše oyenënga chamotsadoránama chë natsana uabouana bayábioye, chë jóbanama tëtšeniñe tbontanobemá.

<sup>13</sup> Cha ba bëts soyëngnaca enjánama chabe obenana entšanga jinÿanÿiyama, entšangbe delante jamana iñe celocana fshantsoye chaótsatšamnaca. <sup>14</sup> Y cha tbonjanlesenciá chaoma chabe obenana jinÿanÿiyama chë natsana uabouana bayabe delante. Chë soyëngaca entšanga tonjanaíngñé, y quem luarentša entšanga tonjanëyana canÿe soye chamopormá, y chë soye cháotsinÿna mo chë natsana uabouana bayacá, chë espadéjaca tëtšená enjamná, y chora tšabá enjëtatsmëná. <sup>15</sup> Y chë inÿe uabouana bayábioye tmonjanlesenciá obenana chaotsebomnama jamama, chë natsana uabouana bayábioye jadórama entšanga tmonjanma soye vida chaotsebomnama, y chë soye jóyebuambayama chaotsobenámna, y jamama chë chábioye ndoñe tmonsadoránënga chamóbanama.

<sup>16</sup> Y tonjanma, nÿetscángbioye, básënga y bëtsétsangca, bomnënga y ndbomnënga, cachëngbiama trabajayënga y nÿe inÿabiamana nÿets tempo oservénënga, catšbioica cucuatšifne o juentsaca chamuínÿnanama.

<sup>17</sup> Y ndocná quenjátanobena ni jiyama, ni jobuámiñama, chë uinÿnanánana ndoñe tontsebomnëse; chë uabouana bayabe uabaina o chë chabe uabainama yomna número.

<sup>18</sup> Chë número jinÿenamna bëtscá osertánana jtseytana. Chë becá osertánana bomná cháuinÿena ntšamo chë uabouana bayabe número iuayancá, er canÿe entšabe número endmëna. Chë número endmëna chë chnënguana patse y chnënguana bnëtsana y chnënguana.

**Chë canÿe patse y canta bnëtsana y canta uaranga entšangbe canto**

**14** Y más sëntsanonÿá. Sënjáninÿe, chë Oveshatema, enjétsatsjabna Sión ca uabaina tjoça, y cháftaca monjésemna canÿe patse y canta bnëtsana y canta uaranga entšanga, y chëngbe juentsaca enjétsabemana chë Oveshatembe y chabe Taitabe uabaina. <sup>2</sup> Chora sënjanuena celocana canÿe shaueananana, mo bëtscá béjayënga y bëts juesasana shaueananancá; y chë shaueananana enjamna mo chë arpësha uenanayënga chëngbe arpëšhangá tmojtsabuastocá. <sup>3</sup> Chënga canÿe tsëm canto montsancánta Bëngbe Bëtsabe delante, chë chabe uámana puesto y chë cháftaca canta Ainënga y chë bëtsëjëmënga amëndayëngbe natsanentše. Y ndocná quenjátanobena chë canto juatsjínÿana, nÿe chë canÿe patse y canta bnëtsana y canta uaranga quem luarentšëngbentšana

atsebácanēngna aíñe. <sup>4</sup> Chēnga monjanmēna chē shembásoftaca ndocna bacna soye tmonjanmēnga, er chēnga imojanenománda chca bacna soyēnga ndoñe ntsamama; chē Oveshatema ndēmoye tojtsá y chēngnaca choye jtséstonana. Chēnga imojamna chē natsanēnga chē quem luarentša entsānguentše atsebácanēnga jtsemnama, y chēnga atsebácanēnga imojtsemna Bēngbe Bētsá y chē Oveshatema jtsaservēnama. <sup>5</sup> Chēnga ndocna te tmonjanobosteró; ndocná quenátobena jayanama chēnga bacna soye tmojanma ca.

#### Ntšamo chē unga angelēnga tmojánayana

<sup>6</sup> Chentšana inye ángel sēnjáninye, tsbanánoca celējana enjétsongüefjnaye. Cha enjábomna canye nyets tempscama oserverna buayenana soye, entsāngbioye jáuyanama, nyets quem luarentše oyenēnga, nyetsca mándayēngbentša entsānga, nyetsca cachca buiñe bomna entsānga, nyetsca biyañe bomnéngbeñe y nyetsca canye entsāngbiama. <sup>7</sup> Y jabuache mēntšá enjétsichamo: “¡Bēngbe Bētsabiama šmochjajúaboyme cha nyetscangbiama chē más uamaná endmēnama, y cha šmochtsatschuanaye, er ya tonjóshjango chē tempo ntšamo entsānga tmojamama tšabá o ndoñe tšabá bétsemnama cha cháuyanama! ¡Chē celoca y quem luare, chē mar béjaye y nyetsca chē fshantsentšana óbocana béjayēnga tojamá šmochtsadorana ca!”

<sup>8</sup> Chábentšana inye ángel mēntšá enjétsichamo: “¡Ya bēts castigo, ya bēts castigo chē Babilonia bēts pueblaca entsāngbeñe echántsemna!, ndēmuanyēnga tmojinýané ntšamo puerte bacna soyēnga shembása o boyabásoftaca jtsamama y inye corente bacna soyēngnaca, y chentšana nyets quem luarentša entsānga mo cach Babilonioquēngcá tmojama. Chē causa, Bēngbe Bētsá echanjama chēngbiámnaca chabe uabouana castigo chaotsemnama ca.”

<sup>9</sup> Chē útatbentšana inye ángel jabuache mēntšá enjétsichamo: “Nderado nda chē uabouana bayábioye y chē chábioye jadórana pormana soye tojtsadorana, y tojalesenciá chabe uinýananana soye juentsaca o cucuatšiñe chamojajoma, <sup>10</sup> chánaca bontsemna, chē Bēngbe Bētsabe uabouana castigo jasúfriana. Entšanga puerte bacna soye tmojamama, Bēngbe Bētsá puerte tbojetna, y chē causa echanjama chē castigo chēngbeñe chaotsemnama. Y chē uámana angelēnga y chē Oveshatembe delante, chē bayá adorayábioye puerte mochanjatssetšená, íñeshe y azúfrecá. <sup>11</sup> Chca chamojtsesufrina ora, becá ngona echantsóbocana, y chē ngona nyets tempo chca echantsótsjuaye; y chēnga, chē uabouana bayá y chábioye jadórana pormana soye adórayēnga, y chabe uinýananana soye bomnéngbiama, ndocna te chē tsetšanana queochatējbana ca” —cha enjétsichamo.

<sup>12</sup> Chíyeca quem luarentše entseyta, chē Bēngbe Bētsabe mandēnga obedecēngna y Jesúsbeñe puerte ošbuáchiyana bomnénga, chē Bēngbe Bētsabe entsānga, padecena soyēnguifñe tmojtsemna ora, puerte uantana jtsemnana.

<sup>13</sup> Chentšana canye oyebuambnayana celocana sēnjanuena, mēntšá šonjétsatsaye: “Mēntšá mábema: ‘Tša oyejuayēnga mochántsemna chē mēntescana mochjóbanēnga, Bēngbe Utabnáftaca cánýiñe mo canýacá jtsomñēse ca.’”

“Aíñe ca” —chē Uamana Espiritu tonjayana—, “chēnga ya ndoñe más queochátamna jatrabájana, ni jasúfriana, er chēnga tmojama tšabe soyēnga Jesús jaserviama, y chē soyēngama chēnga tšabe bendicionēnga mo uacanancá celoca mochanjóyēngacñe ca.”

#### Ndayá chē angelēnga quem luarentše tmojanatbaná

<sup>14</sup> Chora más sēnjáninye; sēnjáninye canye fjantse jantsetēshe, y chēshiñe canya enjétssetbemana. Cha enjamna mo canye entsacá; chabe bestsasiñe enjanábomna canye castellano coronésha, y cucuatšiñe canye puerte efšana mētštá enjétsatbēna.

<sup>15</sup> Chentšana, chē celoca Bēngbe Bētsabe bēts yebnentšana inye ángel tonjánbocna, y jabuache bonjétsatsaye chē jantsetēshiñe tbemanábioye: “¡Acbe mētštaca machbonja y shajuanēnga matbaná, er chē játbanama tempo ya tonjóshjango; chē quem luarentša shajuana ya tonjaboche ca!” <sup>16</sup> Y chē jantsetēshiñe enjantbemaná chabe mētštaca quem luariñe tonjánachbonja, y nyets quem luarentše atbanániñe tonjanoquedá.

<sup>17</sup> Chentšana inye ángel chē celoca Bēngbe Bētsabe bēts yebnentšana tonjánbocna; chánaca canye puerte efšana mētštaca. <sup>18</sup> Y chē altarentšana inye ángel tonjánbocna, chē mando bomná íñesheca castigo entsāngbiama jamama; y chē puerte efšana mētštá bomna ángelbioye jabuache tbonjaníyana: “¡Acbe mētštaca machbonja y chē fshantsoca nyetsca uvas betiyeshēnguentša uvasēsangá mátabe, er ya uabochenēsangá entsamna ca!” <sup>19</sup> Y chē ángelna chabe mētštaca quem luariñe tonjánachbonja, y nyetsca quem luarentša uvasēsangá tonjanátabe, y lempe chē juantsétetjama luaroye tonjanētšana. Chē soye entsinýinýná ntšamo yochtsemnana Bēngbe Bētsabe uabouana castigo. <sup>20</sup> Chē uvasēsangana, chē bēts pueblentšana chaboyme tmonjanantšétette, y chē luarentšana tša buiñe tonjanóbocna; tonjanojutjé couayēngbe uayashbenēshantscoñe y mo unga patse kilómetrēnga tonjanábuashana.

#### Chē angelēnga chē canýsēfta pochócaye soyéngaca

**15** Chentšana, inye bēts soye entsānga inye soya- ma jinýanýiyama, celoca sēnjáninye, canye puerte bēts soye: canýsēfta angelēnga canýsēfta pochócaye soyéngaca, chē ústonoye pochócaye soyēnga. Chē soyēnga chaojtsemnentšana ya ndoñe inye pochócaye soye yochántsemna, er chēntscóñe Bēngbe Bētsá yochjacástiga, lempe ntšamo cha jama- ma tojanjuabocá.

<sup>2</sup> Canye mar béjaynaca sēnjáninye, mo cristalcá enjétsinýna íñeca enájubniye; y chē béjaye juachaca

monjétsatsana chë tšabá tmojanbocnënga, y ni chë uabouana bayá, ni chë chábioye jadórama pormana soye ndoñe tmonjánadoranga, y chë uabouana bayabe uabainama yomna número chëngbeñe chaotsemnama ndoñe tmonjanlesencianga. Njëtscanga chënga monjétsabomna Bëngbe Bëtsá tojanëtsátá arpangá. <sup>3</sup> Chënga, canye canto monjétsacantaye ntšamo Moisés, chë Bëngbe Bëtsabe oservená tojancantacá, y ntšamo chë Oveshatema tojancantacá. Mëntšá monjétsacantaye:

Puerta bëts soyënga y tšabe soyënga entsemna lempe ntšamo aca tcojamcá,  
Bëngbe Utabná Bëngbe Bëtsá njëts obenana bomná;  
lempe ntšamo jtsamëse aca icoyena, acbe bominyiñe  
puerte tšabe y ndegombre soyënga yomna,  
njëts luarënguenache entšangbe Rey.

<sup>4</sup> Bëngbe Utabná, ¿nda nanjájuabo ye aca njëtscangbiana ndoñe más bëtsá condmëna ca,  
o ndoñe cmantsatschuanaye?  
Nye aca uamaná condmëna;  
njëtscá mándayëngbentšá entšanga ácbioye  
mochanjabo,  
ácbentše mochanjoshamentšiyë aca jadórama,  
er ntšamo tcojamcá lempe entšangbioye mora tcojinñanýé,  
y lempe ntšamo aca tcojamcá tšabá jtsemnana ca  
—monjétsacantaye.

<sup>5</sup> Chca chentšana sënjanontješë y sënjáninyë chë celoca Bëngbe Bëtsabe bëts yebna tonjantëfjo, chë Bëngbe Bëtsá Moisésbioye tbojaninyë leyënga uajajóntëse. <sup>6</sup> Y Bëngbe Bëtsabe bëts yebnentšana tmonjánbocna chë canýsëfta angelënga, chë canýsëfta pochóca ye soyënga uambayënga, uafjantse lino entšëjuangá uabuashinyinñanëjuangá uichëtjonënga, y tëntša castellano uasnanëjengaca cochóntscoñe. <sup>7</sup> Chentšana, canya chë canta Ainënguentšá chë canýsëfta angelëngbioye tonjanoyé canýsëfta castellano copbenga jútjena chë Bëngbe Bëtsabe uabouana castígoca; Bëngbe Bëtsá chë njëts tempo y njëtscá tescama vida bomná. <sup>8</sup> Chorna, chë Bëngbe Bëtsabe bëts yebna celoca becá ngónaca tonjanojutjé, y chë ngona enjétsobocana Bëngbe Bëtsábentšana, chabe buashinyinñanana y obenana jtsinñanñayëse; y Bëngbe Bëtsabe bëts yebnoye ndocná quenjátanobena jamashënguana, chë canýsëfta angelëngbe canýsëfta pochóca ye soyënga candochnënguëntscuana.

### Chë castígoca copbenga

**16** Chentšana, canye jabuache oyebuambnayana sënjanuena, chë celoca Bëngbe Bëtsabe bëts yebnentšana enjétsobocana, y chë canýsëfta angelëngbioye mëntšá enjétsëtsësnaye: “Motsajna y quem canýsëfta copbenga, chë Bëngbe Bëtsábocana endóbocana uabouana castígoca, fshantsoca šmochjabuashcja ca.”

<sup>2</sup> Chora chë natsana ángel tonjána y chabe copbé quem luaríñe tonjanbuashcja, y njëtscá entšanga chë

uabouana bayabe uinñanana soye bomnënga y chë chábioye jadórama pormana soye adórayëngbe cuerpiñe bañe bacna nguayanana tonjanóbocna, puerte tsetšënanana.

<sup>3</sup> Chentšana, chë inye ángel chabe copbé mar béjayoca tonjanbuashcja, y choca búyeshe buiñcá tontsanóbema, mo canye entšá obanabe buiñcá, y njëtscanga chë mar béjayoca vida bomnënga tmontsanóbana.

<sup>4</sup> Chora chë inye ángel chabe copbé béjayënguiñe y béjaye obocanënguiñe tonjanbuashcja, y buiñe tontsanobiana. <sup>5</sup> Chentšana sënjanuena, chë béjayënguiñe mando bomna ángel mëntšá enjétsichamo:

Aca njëtscá soyënguiñe tšabá amá condmëna,  
er aca tcojayana chë quem luarentša entšanga chca castigánënga chamotsemnama.

Bëngbe Bëtsá, Uamaná, mora chca condmëna y chca conjamna;

<sup>6</sup> er chënga tmonjama, chë acbe entšanga y acbe juabna oyebuambnayëngbe buiñe chauábuashanama, jtsëbáyëse;  
y mora tconjama chënga buiñe chamofšema.

Njëts mercedo imobuájona chca japásama ca —cha enjétsichamo.

<sup>7</sup> Altarocánënaca canye oyebuambnayana sënjanuena, mëntšá enjétsichamo: “Aíñe, Bëngbe Utabná, Bëngbe Bëtsá, njëts obenana bomná condmëna, y ntšamo entšanga contsacastigacá, ndegombre y tšabá entsemna ca.”

<sup>8</sup> Chentšana, chë inye ángel chabe copbé shinýiñe tonjanbuashcja; chë shinýe corente tontsanobonñaná y chíyeca entšangbioye íñesheca tontsanajuinýe. <sup>9</sup> Y njëtscanga uabouancá juinñënga tmonjanoquedá; pero chënga ndoñe chemátanbošena bacna soyënga amana jtsajbanana, ni Bëngbe Bëtsabe benache jtishachana, ni chábioye quemëntétsatschuanaye, más chabe contra ba soyënga montsanichamo; cha nda obenana yobomna chëngbioye chë pochóca ye soyënga jíchmuama, chënga chamosufrima.

<sup>10</sup> Chentšana chë inye ángel chabe copbé chë uabouana bayabe uámana puestiñe tonjanbuashcja, y njëts chabe amëndayíñe ibetiñe tonjanoquedá. Chë entšanga bichtaja montsanenójantsnaye, yapa tsetše causa; <sup>11</sup> pero ni chca, chë entšanga chematanajbaná bacna soyënga jtsamana, ndayá chë yapa tsetšama y chë chëngbe cuerpiñe bacna nguayanana causa, chë celoca Bëngbe Bëtsabe contra ba soyënga montsanichamo.

<sup>12</sup> Chentšana chë inye ángel chabe copbé chë bëts fshájaye Eufrates ca uabáiniñe tonjanbuashcja y chë béjaye tontsanbuashjo, japróntama chë shinýe bocanoica luarënguentšá reyënga y chëngbe soldadënga chëjana chámuachnëjnama.

<sup>13</sup> Atše sënjáninyë, chë dragonbe uayáshoicana, chë uabouana bayabe uayáshoicana y chë ndoñe ndegombre Bëngbe Bëtsabe juabna oyebuambnayabe uayoicana tmonjánbocna unga bacna espíritënga; mo sapošëngcá monjétsinñana. <sup>14</sup> Chënga monjamna

bayējēngbe espíritēnga; bēts soyēnga monjánama obenana jinñanyiyama, y montsanbocana nyēts luar-entša reyēnga jáchembuama, chē uámana te, ndayté Bēngbe Bētsá, chē nyēts obenana bomná yochjabo entšangbiama jabáyanama ntšamo chēnga tmojamama, chē te chēnga chabe contra chamotsetsjama.

<sup>15</sup> Bēngbe Utabná Jesucristo mēntšá tojayana: “Š-mochjinñe, atše nye ndeolpe chanjabo, mo canye at-bēbanacá, chabiama ndocná tontsejuabná ora; chíyeca oyejuayēnga mochántsemna atše jabama tmojtse-prontanēnga, mo nda tojtsefšna y chabe entšayá totsaboprontañacá, nye enašá ndoñe chaondētsemnama, y entšanga chca tmojinñe ora ndoñe chaondēt-sēuatjama ca.” <sup>16</sup> Y chē bacna espíritēngna chē reyēngbioye tmonjanēnatse canye luare, hebreuiñe Armagedón ca uabáinoye.

<sup>17</sup> Chentšana, chē ústonoye ángel chabe copbé quem luarentša tsbanánoca tonjanbuashcja, y chē celoca Bēngbe Bētsabe bēts yebnentša uámana pues-tentšana canye jabuache oyebuambnayana tonjanóbocna, mēntšá enjétsichamo: “¡Chē jopásama enjamna soye ya tojochñēngo ca!”

<sup>18</sup> Chora enjētsemna tcuinñēnga, shauenanana y jue-sasanana, y quem luariñe tontsanangmémama, yapa jabuache quem luare tontsanēbanjó causa; quem luar-entše entšanga imobinñya orscana, ndocna te nya chca quem luare tontsanēbanjó. <sup>19</sup> Chē puerte bēts pueblo úngañe tontsanojatá, y nyēts luarentša bēts pueblēnga tontsanáshajaye, y Bēngbe Bētsá tojanenujabó chē puerte bēts pueblama, Babilonia ca uabaina pueblama, chentša entšanga chē uabouana castigo chamotsebomnama, Bēngbe Bētsá tša tbojánetna causa, tša bacna soyēnga chentše tmojanmama. Y chca, chē chēngbe bēts pueblo úngañe tontsanojatá ora, cha chēnga tonjanacastigá. <sup>20</sup> Mar béjayoca nyētsca fshantsēnga y quem luarentša nyētsca tjañe tontsanenatjēmba. <sup>21</sup> Celocana bētsētsa bēntstbēnga entšángbeñe tonjantquécjama, chēbēnga canta bnētsana kilama más utbēnga; y entšanga Bēngbe Bētsabe contra ba soyēnga tmonjánayana, er chēnga tša montsansufrina chē bēts pochócaye bēntstá causa, y chē pochócaye bēntstá chēngbiama puerte jabuache castigo enjamnama.

### Chē puerte bacna vida bomna shembásabe castigo

**17** Canya chē canysēfta angelēnguentšá, chē canysēfta copbēnga monjanatbēnēnguentšá, tonjánabo y šonjaniyana: “Mabo; cbochanjinñinñiye ntšamo yochtsemna chē puerte bacna vida bomna shembásá, chē béjayēnguiñe entsetbemanabe castigo. <sup>2</sup> Quem luarentša mandadēnga cháftaca puerte bacna soyēnga tmojama, y quem luarentša oyenēnga puerte tmojóyejuanga chē cháftaca bacna soyēnga amama, mo chē bacna vida bomna shembásabe vínoyeca puerte cuafjotmenangcá ca.”

<sup>3</sup> Chentšana chē ángel, atše chē Uámana Espíritbeyeca corente mandaná jtsemnēse, šonjanánatse entšanga ndoyena luaroye. Choca sēnjáninñe canye shem-

bása, canye uabouana buángana bayábeñe enjaque-ná; chē bayabe cuerpiñe nyētsañe Bēngbe Bētsabiama puerte bacá oyebuambnaye uabaina enjétsabemana, y enjánbomna canysēfta bestšaše y bnētsana tsētjonēse. <sup>4</sup> Chē shembásá enjanichétjona uámana shbuenda uafjatsēnga y buángana entšayá, y entsanbotamana castellánoca, uámana botamana ndēt-šētémēngaca y pérlaca. Chabe cucuatšifne canye castellano copbé enjétsatbēna, jútjena puerte uaboyēnja soyēngaca, y chē boyabásēngaftaca cha tojanma puerte bacna soyēngaca. <sup>5</sup> Y chabe juentsaca canye uabaina enjétsabemana, ndoñe josérta soye, mēntšá: “Chē puerte bēts pueblo Babilonia, tša bacna entšanga chentše, mo chē puerte bacna vida bomna shembásēngbe bebmá cuaftsemncá; chentšana tonjanóbocna quem luarentša nyētsca puerte uaboyēnja soyēnga ca.” <sup>6</sup> Atše sēnjáninñe chē shembásá tēmiá, er cha tojanofšé chē Bēngbe Bētsábēnga imojamñēngbe buiñe, ndēmuanñēngbioye tmojanēbaye Jesusbiama oyebuambnaye causa.

Chca sēnjáninñe ora, tša sēnjanenjaná. <sup>7</sup> Chora chē ángel šonjaniyana: “¿Ndáyeca tcojenjaná ca? Atše cbochanjauyana ntšamo yojsayana chē shembásá y chē chábiyoye bontsambá uabouana bayá, chē canysēfta bestšaše bomná y bnētsana tsētjonēse; chē soye ndocná quenátststšēmba. <sup>8</sup> Chē tconjinñe uabouana bayá, tempo chca enjamna, pero mora ya ndoñe. Chē corente bēts tboicana cha echanjesetsjuá, pero lempe pochocaná jtsemnama chca echántsaye. Quem luar-entše oyenēnga, ndēmuanñēngbe uabaina quem luare jobojátsama orscana ndoñe yonduábemana, chē tšabe vida mochjónñēngbe uabaina iuábemana libréšañe, chēnga mochanjenjaná, chē bayá chē tempo enjaniyená y mora ya ndoñe, pero cachiñe yochjésabama chamojinñe ora.

<sup>9</sup> “Muentše canye soye entsemna chē chca josértama chamojobenangbiama: chē bayabe canysēfta bestšaše endmēna canysēfta tjañe ndayifne chē shembásá entsetbemana; chē bestšašēngnaca mondmēna canysēfta mandadēnga. <sup>10</sup> Chentšana, shachnēngbe amēndayana ya tonjochñēngo, canya mora entsetbemana jtsemndayama y chē inya cabá ndoñe tonjášjango. Y cha chaojášjango ora, ndoñe bēnama cha queochaisemánda. <sup>11</sup> Chē tempo enjaniyena uabouana bayá pero mora ya ndoñe, endmēna chē canysēfta mandadēnguentšana inye mandado, pero chánaca chē inye canysēftangcá endmēna y lempe pochocaná jtsemnama entsá.

<sup>12</sup> “Chē tconjinñe bnētsana tsētjonēse mondmēna bnētsana mandadēnga, jamēndama cabá ndoñe tmonjóyayēnga; pero básefta tescama cánñiñe chē uabouana bayáftaca, mando mo reyēngcá mochanjójyēngacñe. <sup>13</sup> Quem bnētsanēnga nyētscanga cachcá mochántsejuabnaye, y chē uabouana bayábiyoye chēngbe obenana y mando mochanjátsetaye. <sup>14</sup> Chē Oveshatembe contra mochántsestsjanaye; pero chē Oveshatema echantsayēnjaná, er chē Oveshatema endmēna nyētsca amēndayēngbiama chē más uá-

mana Utabná y nÿetsca reyëngbiama chë más uámana Rey. Chë bnétsana mandadënga cháftaca mochántsestsjanaye ora, cha chentše chabe entšán-gaftaca cánÿiñe echántsemna. Chënga mondmëna chë cha tojáchembo y tojubuáyanënga y chábeñe sempre ošbuáchiyënga ca” —cha šonjaniyana.

<sup>15</sup> Chë ángel mëntsánaca šonjaniyana: “Chë tconjinÿe béjayënga, ndayiñe chë bacna vida bomna shembása entsetbemana, mondmëna nÿetsca canÿe luarentša entšanga, enutanana entšanga, nÿetsca biyañe oye-buambnayënga y nÿetsca mándayëngbentša entšanga. <sup>16</sup> Y chë uabouana bayábeñe tcojinÿe bnétsana tsëtjonëše y chë uabouana bayá, chë bacna vida bomna shembásabiye mochantsáboyënja; enašá cachcá mochanjesonÿaye; chabe cuerpentša mëntsëna mochantsósañe y íñesheca mochántsejuinÿiye, chaopochocantscuana. <sup>17</sup> Bëngbe Bëtsá tojama chë bnétsanënga ainaniñe tša chamotseboše, ntšamo cha yobošcá chamotsamama. Chca, chënga mochanjenóyeunaye chëngbe mando chë uabouana bayábioye jantšabuáchiyana, ntšamo Bëngbe Bëtsá tojayancá chaojopasantscuana. <sup>18</sup> Chë tconjinÿe shembása chë puerte bëts pueblo endmëna, chë ndayentša mandadënga nÿets quem luarentša mandadëngbeñe mando mondbomna ca” —cha šonjaniyana.

### Babilonia japochócama

**18** Chentšana inÿe ángel sënjáninÿe, celocana enjétsastjajuana, puerte obenana bomná, y chabe buashinÿinÿanánaca nÿets quem luariñe entsanbinÿna. <sup>2</sup> Chë ángel jabuache mëntsá enjétsichamo:

¡Ya mochantsepochóca, ya mochantsepochóca chë uámana pueblo Babilonia!

¡Chentše tojtsóbema diablëngbe oyeniñe, nÿetsca bacna espíritëngbe oyeniñe, y ndoñe tšabe y uaboyënja shloftšëngbe oyeniñe!

<sup>3</sup> Er nÿetsca quem luariñe mándayëngbentša entšanga puerte bacna soyënga tmojama chentša entšangbe causa,

mo chë bacna vida bomna shembásaftaca bacna soyënga cuafjamcá,

mo puerte cuafjotmenangcá chë bacna vida bomna shembásabe vínoyeca.

Nÿetsca luarënguentša mandadënga puerte bacna soyënga tmojama,

mo chë shembásaftaca bacna soye cuafjamcá, y quem luarentša obuámnañënga y enënga, bomnënga tmojobiama chentša entšanga yapa crocénana nÿe ndayíñnaca ntsejuabnacyá gástaye causa ca —cha enjétsichamo.

<sup>4</sup> Chentšana, celocana inÿe oyebuambnayana sënjanuena, mëntsá enjétsichamo:

¡Chë bëts pueblentšana maisebocana!, tšëngaftanga chë atšbe entšanga šmomnënga,

chë chentša entšanga mondbétsama bacna soyënga ndoñe chašmondétsamama,

ni chë chëngbiye japochócama soyënga tšëngaftangbiama cach ndoñe chaondëtsemnama.

<sup>5</sup> Chënga tša bacna soyënga tmojama, tša bëtscá nÿa mo celóntsoñe cuafjotjyecá, y Bëngbe Bëtsá mora entsejuabná chënga tša puerte bacna soyënga tmojama causa, chë soyëngama jácastigama.

<sup>6</sup> Ntšamo chentša entšanga ínÿengbiama ndoñe tšabá tmonjamcá,

chë entšangbiámna cachcá chaotsemna; ntšamo tmojamama, cabá uta soye más cachca soye chëngbiama chaotsemna;

ntšamo chentša entšanga ínÿenga chamosufrima tmojamcá,

chëngnaca cachcá uta soye más chamosufrí.

<sup>7</sup> Chënga corente jtsenábotamnayana y yapa crocénana nÿe ndayíñnaca ntsejuabnacyá jtségástayana; chë causa, chënga entsamna puerte jasúfriama y becá tsetšanana jtsebomnama.

Er chëngbe ainaniñe mëntsá jtsejuabnayana:

“Muentše mo reyëngcá mondëtbiámana.

Viudacá ngmënaca ndoñe quemuátsmëna; tondayama quemochátssufrina ca.”

<sup>8</sup> Chíyeca, canÿe ora pochócaye soyënga chëngbiama echanjóshjango:

jóbanama šocanënga, puerte ngmënana y jabuache shëntsana,

íñesheca lempe chëngbeñe echántsejuinÿe;

er Bëngbe Bëtsá corente obenana bomná endmëna, Bëngbe Utabná chë chënga chca castigo chamotse-bomnama tojayaná ca —cha enjétsichamo.

<sup>9</sup> Quem luarentša mandadënga, chentša entšang-gaftaca puerte bacna soyënga tmojamënga, y chëng-gaftaca nÿe ndayíñnaca yapa crocénana, ntsejuabnacyá tmojagastanga, mochanjošachna y puerte ngmenánaca mochántsemna, chë bëts pueblo chaojtsangbototjuanentša ngona chamojinÿe ora. <sup>10</sup> Chentšana bënoca mochanjoquéda antješna, chë uabouana castiguama auatja causa, y chentša entšangbiama mochanjayana:

¡Tša lastema, tša lastema tšëngaftanga chë uámana bëts pueblo, Babilonientše oyenëngbiama, chë tša obenana binÿnentše!

Canÿe ora tšëngaftangbe castigo tojóshjango ca —mochántsechamo.

<sup>11</sup> Chë quem luarentša obuámnañënga y enëngnaca mochanjošachna y ngmenánaca mochántsemna chë pueblentša entšangbiama, er chora ya ndocná queochátsmëna chë chënga tmojúshjango soyënga chamobuámiñama: <sup>12</sup> tmojúshjango castellano soyënga, midio soyënga, uámana y botamana ndëtšbënga, perlënga, uámana lino y shbuenda uafjatsenga entšayá y sedéjua y uámana uabuángana entšayá; nÿetsca botamana uanguëtše betiyënga, marfíloca pormana soyënga, uámana niñëšëngaca pormana soyënga, bronce soyënga, hierro y marmol soyënga;

<sup>13</sup> bëtscá canela y inÿe botamana uanguëtše y tamna soyënga, botamana uanguëtše béjayënga, incienso y mirra; vínoye, aceitiye, uámana arninÿá, trigo; bayënga ndayánaca uasmëmnayënga, oveshënga, couayën-

ga, cochëshangá y entšanga nyets tempo nye ínÿabia-  
ma oservenéngnaca. <sup>14</sup> Y chë pueblentša entšangbia-  
ma mochanjayana:

¡Chë tša cmonjanogúsetana jtsebomnama soyënga,  
mora ya ndoñe quešmátsbomna;

chë uámana y buashinÿinÿana soyënga y tša bom-  
nana lempe šmojobuetše,  
y ndocna te más cachca soye quešmochátsbomna ca!

<sup>15</sup> Chë soyënga enënga, chë bëts pueblentša  
entšángbeyeca bomnënga tmojanobiamënga, bënoca  
mochanjoquéda antješna, chë bëts pueblentša  
entšangbiama tša bëts castiguama auatja causa;  
mochanjošachna, puerte ngmenánaca mochántsem-  
na. <sup>16</sup> Y mëntšá chentša entšangbiama mochanjayana:

¡Tša lastema, tša lastema tšëngaftanga chë uámana  
bëts pueblentše oyenëngbiama!

Chë enjáninÿna mo canÿe shembasacá, uámana lino  
entšéjua uichëtjoná,

uámana shbuenda uafjatsenga y uabuánga  
entšayá uichëtjoná,

botamananá castellánoca, perlënga y uámana bota-  
mana ndëtšbéngaca.

<sup>17</sup> ¡Y canÿe ora chabe tša bomnana lempe tojt-  
sopochocá ca! —mochanjayana.

Nyetsca chë barquënguentsha mándayënga, chentša  
entšanga inÿe luaroye ajnënga y chentša trabájayën-  
ga, y nyetscanga chë vida onguayiñe mar béjayoca tra-  
bájayëngnaca, chentšana bënoca mochanjoquéda an-  
tješna, <sup>18</sup> y chë bëts pueblo chaojtsangbototjuanentša  
ngona chamojinÿe ora, jabuache mochanjayana:

“¡Quem uámana bëts pueblécá ndocna inÿe pueblo  
cachcá quenátsmëna ca!” <sup>19</sup> Chca chamojinÿe ora, ng-  
ménama bestšašaiñe polvëshe mochántsenotboto, y  
mëntšá mochántseyona ošachiyënga y puerte cocht-  
setšenánënga:

¡Tša lastema, tša lastema tšëngaftanga chë uámana  
bëts pueblentše oyenëngbiama!

Chentša bomnánaca bomnënga tmojanobiam  
nyetscanga chë mar béjayoca barco bomnënga.

¡Canÿe ora lempe tojtsopochocá ca! —chënga  
mochántseyona.

Chora chë ángel tonjánayana:

<sup>20</sup> ¡Celoca oyenënga móyejuanga  
chë pueblo chca tojapasama;

y tšëngaftángnaca móyejuanga, Bëngbe Bëtsabe  
entšanga, Jesucristbe ichmónënga y Bëngbe Bëtsabe  
juabna oyebuambnayënga,

er chca jacastígase, Bëngbe Bëtsá tojama chënga  
chamosufrima,

ntšamo tšëngaftanga chašmosufrima chënga tmo-  
janmcá ca! —cha tonjánayana.

<sup>21</sup> Chentšana, canÿe ángel puerte obenana bomná,  
canÿe ndëtšbé tonjanatsbaná, mo canÿe bëts  
nantsnëbé ndëtšbecá, mar béjayoye tonjanashbuetše  
y mëntšá tonjánayana:

Mëntšá, nye ndeolpe y jabuache, Babilonia chë uá-  
mana bëts pueblo mochántsetsatše,  
y ndocna te más quem pueblo queochátsmëna.

<sup>22</sup> Chentše, ndocna te más quemochátuenana  
arpangá uabuástoyana, ni cantayana, flautëfjënga y  
trompetëfjuangá cach ndoñe;

ndocna te más quemochátsmëna obrerënga,  
ni chë nantsnëbeñe trabájayana quemochátuenana.

<sup>23</sup> Chentše, ndocna te más ndocna uajuinÿanësha  
queochátsbinÿnaye,

ni casamento fiestentša enbouenanana que-  
mochátuenana.

Er chë bëts pueblo chca mochantsepochoá,  
masque chentša obuámnañënga y enënga nyets  
quem luarentše chë más bomnënga monjamna,  
y chentša bocjuanánaca nyetsca luarënguentsha  
entšanga ingñëngë monjamna ca —cha tonjá-  
nayana.

<sup>24</sup> Bëngbe Bëtsá chca chë bëts pueblentše echanja-  
ma, er chentše tmojinÿena chë Bëngbe Bëtsabiam  
trabájaye causa tmojanóbanëngbe buiñe; chë chabe  
juabna oyebuambnayënga, chabe entšanga, y chë  
chábioye oservénama nyets quem luarentše tmojt-  
sëbayëngbe buiñe.

**19** Chentšana celoca sënjanuena mo mallajta  
entšanga cuaftsaye buachcá, mëntšá monjët-  
sichamo:

¡Bëngbe Utabná matschuanga!

Bëngbe Bëtsá endmëna nda chabe entšanga tojatse-  
bacá;

cha puerte uámanana, buashinÿinÿana y mando end-  
bomna,

<sup>2</sup> er ndayama cha tojayancá ndegombre jtsemnana,  
y ntšamo tšabá chama tojtsemncá.

Cha chë uachuana bacna vida bomna shembásabioye  
tbojacastigá.

Chë shembásabe puerte bacna soyënga causa,  
nyets luarentša entšángnaca bacna soyënga tmoja-  
ma.

Chábioye chca jacastígase,

Bëngbe Bëtsá tojama ntšamo jamama ibomerecencá,  
chábioye oservénënga chë shembásabeyeca tmo-  
jóbana causa ca —chënga monjëttsichamo.

<sup>3</sup> Y cachíñe mëntšá tmonjánayana:

¡Bëngbe Utabná matschuanga!

¡Chë bëts pueblo japochócama uangbototjuanentša  
ngona nyetsca tescama chca echanjótsjuaye ca!

<sup>4</sup> Y chora, chë uta bnëtsana y canta bëtsëjmënga  
amëndayënga y chë canta Ainënga tmon-  
janoshamentšé, y Bëngbe Bëtsá, chë uámana tbema-  
nentše enjëtsetbemanabioye tmonjanadorá, mëntšá  
jayanëse: “¡Chca chaotsemna! ¡Bëngbe Utabná  
matschuanga ca!” <sup>5</sup> Y chë uámana puestentšana canÿe  
oyebuambnayana tonjanóbocna, mëntšá:

Bëngbe Bëtsá matschuanga, nyetsca chabe os-  
ervénënga

y chë nyetscangbiama cha chë más uamaná yomna-  
ma juabnayënga,  
básenga y bëtsétsanga ca.

### Chë Oveshatembe casamento fiesta

<sup>6</sup> Y sënjanuena mo mallajta entsangbe oyebuambnayanacá, mo bëtscá béjaye cuafstobonjnacá y mo bëtš juesasanana shauenanancá; mëntšá monjétsichamo: ¡Bëngbe Utabná matschuanga!

Er Bëngbe Utabná, Bëngbe Bëtšá nyets obenana bomná tojontšé jamándana.

<sup>7</sup> Puerte móyejuanga y mochjínyanýiye Bëngbe Bëtšá puerte bëtšá y uamaná bétsemnama, er mora entsemna mo chë Oveshatembe casamento te cuafjoshjangcá;

chabe shema yochjabocná puerte tojtenobotamá;

<sup>8</sup> tmojalesenciá cha chauatíhëtjo uámana, nduatsenga uafjantse y uabuashinýinýana lino entsáyá.

Chë shema entsinýinýná chë Bëngbe Bëtšabe entsang;

y chë lino entsáyá jtsichétjonana entsinýinýná chënga lempe ntšamo tšabá yomncá jtsamëse imoyena ca —chënga monjétsichamo.

<sup>9</sup> Chentšana chë ángel šonjaniyana: “Mëntšá mábema: ‘Oyejuayënga chë Oveshatembe casamento fiesta ma ófjanënga ca.’ ” Y mëntšánaca šonjaniyana: “Chca, ndegombre Bëngbe Bëtšabe palabrënga endmëna ca.”

<sup>10</sup> As chabe shecuatšentšë sënjanoshamentšë cha jadórama, pero cha šonjaniyana: “Ndoñe, átšeftaca ndoñe chca mátamana, er atšë Bëngbe Bëtšabe canýe oservená sëndmëna, ntšamo aca condmëncá, y chë Crístbeyeca acbe catšátanga, ntšamo chabiana motatšëmbcá y chabe ndegombre palabrënga nyets tempo imabuayinýanga mondmëncá. Aca cmontsemna Bëngbe Bëtšá jadórama ca.”

Ndayá Jesús tojanma y tojanayancá, endama chë Bëngbe Bëtšabe juabna oyebuambnayënga chëngbe ainaniñe osertánana y añemo chamotsebomnama, chë soyëngama entsángbioye jábuayenama.

### Chë fjantse couayiñe enjaquená

<sup>11</sup> Chora sënjáninýe celoca atëfjniñe; canýe fjantse couaye enjëtsemna y chë chábeñe enjaquená enjanabaina “Ntšamo tojašebuachenacá amá” y “Ndegombre oyebuambnayá ca”, er ntšamo tšabá yomncá cha tojanjuabó y tojanma entsángaftaca; y chca chabe uayayëngaftaca monjánentsjanaye. <sup>12</sup> Chabe fšnëbënga mo iñeshcá enjáninýna, bestšasiñe ba uabuashinýinýana coronëshangá enjanábomna, y canýe uabaina chábeñe enjanábemana; nye cha chë uabaina yojanábuatma. <sup>13</sup> Cha enjanichétjona buñeñca unétjona entsáyá y chabe uabaina enjamna “Bëngbe Bëtšabe palabra ca”. <sup>14</sup> Y chabe ústonoye monjétsajna mallajta soldadënga celoquënga, nduatsenga uafjantse y uámana lino entsáyá uichétjonënga, fjantse couayënguiñe enjaquenënga. <sup>15</sup> Chë enjëtsebnatsanabe uayoicana enjanóbocana canýe puerte efšana espadëja, chë Bëngbe Bëtšabeñe ndošbuáchiyënga játatsetšama. Cha puerte obenánaca echántsamëndaye, mo

canýe hierro varëfjaquécá. Cha echanjama entsángaftaca mo nda uvasëšangá juantšëtëtjama tojtsabotajná ora cuafjamcá; y echanjama chënga chamotsebomnama chë puerte uabouana castigo, Bëngbe Bëtšá chë nyets obenana bomná tbojetna causa. <sup>16</sup> Chabe uabonjaníyañe y chabe mëntjoca canýe uabaina enjanábemana: “Nyetsca reyëngbiama chë más uámana Rey, y nyetsca amëndayëngbiama chë más uámana Utabná ca”.

<sup>17</sup> Chentšana canýe ángel sënjáninýe, shinýiñe enjëtšatsana, chë celoca tsbanánoca nyetsca monjanongüefjná shloftšënga jabuache mëntšá enjëtšëtšësnaye: “¡Mabënga, menefjna chë Bëngbe Bëtšá tojaprontá bëtš saná jasama; <sup>18</sup> chašmosama reyëngbe mëntšëna, soldadënga amëndayëngbe mëntšëna y valente entsangbe mëntšëna, couayënga y chëngbeñe enjaquenëngbe mëntšëna, y nyetsca entsangbe mëntšëna, cachëngbiama trabájayënga y nye ínýabiamá nyets tempo trabájayënga, básesenga y bëtšëtsangca ca!”

<sup>19</sup> Chora atšë sënjáninýe chë uabouana bayá y quem luarentšá reyënga chëngbe soldadëngaftaca tmojánenefjna, chë fjantse couayiñe enjaquená y chabe soldadëngaftaca jéntsjava. <sup>20</sup> Chë uabouana bayá tmonjanotbá, y cháftaca chë Bëngbe Bëtšabe ndoñe ndegombre juabna oyebuambnayá, chë bayabe delante ba bëtš soyënga tonjanmá obenana jinýanýiyama; y cha chë soyëngaca tojanaingñe chë uabouana bayabe uinýnanana soye chamuayentšajoma tmojanlesencianga, y chë chábioye jadórama pormana soye adórayënga. Y chë útatbioyna ainata tmontsanatmetšë chë íñeshca uafjajónayoye, chë azufre endëjuinýinýanentšë. <sup>21</sup> Chë ínýengbioyna tmontsanapochocá chë fjantse couayiñe enjaquenabe uayoicana enjanóbocana espadëjaca, y nyetsca shloftšënga chëngbe mëntšëñaca yapa tmontanoshachá.

### Chë uaranga uata

**20** Chentšana canýe ángel sënjáninýe celocana entsanastjajuana chë corente asentoye tboca llavéfyaca, y canýe bëtš cadenëjua entsanëtšbena. <sup>2</sup> Chë ángel tbontsantbá chë dragónbioye, chë tempsca mëtšcuaye, chë Diablo y Satanás endmëñá, y canýe uaranga uatama tbontsanbátsëca. <sup>3</sup> Chë corente asentoye tboye tbontsantsatšë, chentšë tbontsanëtame, y chentšë bësáša tsengájašëca tonjaninýnaná, ndotatšëmbcá jatëfjuama ndocná chaondobenama; y chca, chë dragón ndoñe chaondobená jabocnama entsanga jáingñama, chë uaranga uata candochnënguëntscuana; y chora, básefta tescama chë dragón mochanjëtšboshjona.

<sup>4</sup> Uámana puestënga sënjáninýe, y chiñe tmonjanotbiamá chë entsanga tšabá o ndoñe tšabá tmonjama jayanama obenana tmojanóyëngacñënga. Chë bestšáše jtsëstjanguëse tmojanóbanëngbe espíritëgnaca sënjánanýe. Chënga chca tmojanóbana, Jesús tojánayana soyënguiñe y chë Bëngbe Bëtšabe buayenana soyënguiñe sempre ošbuáchiye causa.

Chënga ndoñe tmonjanadorá ni chë uabouana bayá, ni chë chábioye jadórama pormana soye, y ndoñe tmonjanlesenciá chë bayabe uinýnanana soye juentsaca o cucuatšifne chamuayentšjajoma. Y sënjáninýe chëngna tmontanayena y Crísoftaca canýe uaranga uatama montsanmánda. <sup>5</sup> Chë entšanga mondmëna chë natsanënga jtayenama, pero chë tempo chë inýe obanënga ndoñe chemëntétanayena, ndayá nýe chë canýe uaranga uata chentšana. <sup>6</sup> ¡Oye-juayënga y Bëngbe Bëtsabe entšanga, chë tmojt-anayenënga chë obanënga chámuatayenama Bëngbe Bëtsá tojanma ora! Chënga ndoñe quenátamna chë nýetsca tescama castigo jtsebomnana, ndayá Bëngbe Bëtsá y Crístbioye mo bachnangcá chënga mochántseservena, y Crísoftaca chë uaranga uatama mochántsemandaye.

### Satanás japochócama

<sup>7</sup> Chë uaranga uata chaojochnëngo ora, Satanás chabe utámenocana mochanjétsboshjona; <sup>8</sup> y cha echanjábocna nýets luarentša entšangbioye, chë Bëngbe Bëtsabe soyëngama contra imomnéngbioye jáingñama, chë ntšamo Bëngbe Bëtsabe contra Gog y Magog tempo ibojamncá imomnénga. Satanás, chë entšanga echanjáchembo Bëngbe Bëtsabe contra jáentsjama, y tša chéftanga cha echanjáchembo, nýa mo chë mar béjaye chënyoca cascajca mochántsemna.

<sup>9</sup> Chënga nýetscanga nýets luarëjana mochanjátsjua, y chë Bëngbe Bëtsabe entšanga oyenentše y chabe bonshana entšangbe bëts pueblo shéconana mochanjotsaye. Pero celocana iñe echanjatquécjama y chë Bëngbe Bëtsabe contra imomnénga lempe echántsjainýe. <sup>10</sup> Y Satanás, chë aingñayá, mochántsatmetše chë íñeshe y azúfreca uafjajónayoye, ndayentše chë uabouana bayá y chë Bëngbe Bëtsabe ndoñe ndegombre juabna oyebuambnyá tmontsanatmetše. Chentše bëts castigo nýets tempo, bnëté y ibeta mochanjasufrina.

### Chë obanëngbiama tmonjánayana ntšamo chëngaftaca jamama yojtsemnana

<sup>11</sup> Chentšana sënjáninýe canýe bëts uámana fjantse puesto jamándama y nda chiñe enjetsetbemaná. Celoca y quem luare chabe delante lempe tonjanenatjëm-ba, y ndócnentše más chenatanobinýná. <sup>12</sup> Y chë obanënga sënjánanýe, bëtsétsanga y básesenga, chë uámana puestentša natsanoica monjétsatsana; y chë librëšangá tmonjanëtëfjo, y inýe librëšanaca, ndë-muanýenga nýetsca tescama tšabe vida mochjónýenëngbe uabaina uabemana librëša. Chë obanëngbiama tmonjánayana ntšamo chëngaftaca jamama yojtsemnana, cachënga vida imojábomna ora ntšamo tmojëftsema soyëngaca, ntšamo chë librëšangañe yojanabemancá. <sup>13</sup> Chë mar béjayoye tmojanóbanënga choicana tmontanbocna, y chë obanënga tmojanóquedanga luarënguentšana tmontanbocna, y cada cánýabiama tmonjánayana ntšamo cháftaca

jamama yojtsemnana, cachënga vida imojábomna ora ntšamo tmojëftsema soyëngaca. <sup>14</sup> Chentšana ya ndoñe más obenana quentésemna entšanga chamóbanama chaomama, mo chë obenana chë íñesheca uafjajónayoye cuaftsëtšencá; quem íñesheca uafjajónayoye endmëna chë nýetsca tescama castigo jtsebomnana luare; chë choca castigánënga jtsamnama yojtsamnëngbiama entsemna mo chënga cachiñe cuaftatobancá; <sup>15</sup> y ndëmuanýengbe uabaina chë tšabe vida mochjónýenëngbe uabaina iuábemana librëšañe ndoñe yonjanabemana, chë íñesheca uafjajónayoye tmontsanatmetše.

### Celoca tsmiñe y fshantse tsmiñe

**21** Chentšana atše sënjáninýe canýe celoca tsmiñe y canýe fshantse tsmiñe, ndoñe ntšamo tempo enjamncá, er chë tempo enjamna celoca y fshantse chora ya ndoñe quentésemna, y chë mar béjaye chora cach tondaye. <sup>2</sup> Sënjáninýe chë “uámana ca” uabaina bëts pueblo, chë tsëm bëts pueblo Jerusalén, Bëngbe Bëtsábocana celocana enjétsostjajuana, puerte botamaniñe, mo canýe shembása puerte botamanacá, chabe boyá jábocnabiama. <sup>3</sup> Y chora canýe jabuache oyebuambnyana Bëngbe Bëtsabe uámana puestentšana sënjanuena, mëntšá: “Mouena. Bëngbe Bëtsá entšangaftaca echántsemna y cha chëngbeñe echantsiyena. Chënga chabe entšanga mochántsemna, cach Bëngbe Bëtsá chëngaftaca echántsemna, y cha chëngbe Bëtsá echántsemna. <sup>4</sup> Cha echanjama chënga ndocna te más ngmënénga chamondésemnama, y ndoñe más chamondóbanama, ndoñe más chamondošachema, ni ngmënacá ndoñe chamondé-sóyebuambnyama y ndoñe más tsetšanana chamondétebomnana; er ntšamo chënga entšangcá fshantsoca tempo imojéftsiyena ora enjamncá, chora ya ndoñe chca queochátsmëna ca.”

<sup>5</sup> Chë uámana puestentše enjantbemaná šonjaniyana: “Atše lempe mo tsëm soyëngcá sëndbama ca.” Y mëntšánaca tonjánayana: “Chë soyënga mábema, er chë palabrënga endmëna ntšamo ndegombre yomncá, y nýetscanga mondobena chiñe corente jtsošbuáchiyana ca.”

<sup>6</sup> Chentšana šonjaniyana: “Lempe tonjochnëngo. Atše sëndmëna chë nýetsca soyënga bojatšayá y pochocayá, chë natsaná y chë ustonoyá. Mo nda tša uajuendayana tojtsebomná canýe béjaye fshantsiñe obocanentšana cuaftofšecá, cachcá nda tša tojtseboše atšbe soyënga jtsebomnana, atše chanjama cha chë soyënga chaotsebomnana, y chë nýetsca tescama yomna tšabe vídnaca, chca jtsebomnana chábioye tondaye ntsojtjañcá. <sup>7</sup> Nda nýetsca soyënguentšana tšabá chaojabocná mo ayëñjanayacá, lempe echanjójyëngacñe ntšamo atšbe entšangbioye jatšatayama tijašebuachenacá, y atše chabe Bëtsá chántsemna y cha atšbe uaquiñá. <sup>8</sup> Pero chë auatja causa Crístbioye ndoñe mondëservénënga, chábeñe ndošbuáchiyënga, chë bacna soyënga causa Bëngbe Bëtsabiama puerte uaboyëñjanënga imomnénga, chë inýengbioye obá-



mayënga, chë shembása o boyabásaftaca bacna soye amënga, chë bocjuana soyënga amënga, chë soyënga adórayënga diosënga yomna ca jtsejuabnayëse, y nyetscanga bosterënga imomnëngbiamna, chënga entsamna chë ñheshëca uafjónayoca jasúfriana, chë azufre yojuinýinýanentše. Chentše puerte castigánënga sempre mochanjéftsemna, mo uta soyama cuafjobancá ca.”

### Chë tsëm bëts pueblo Jerusalén

<sup>9</sup> Chentšana canya chë angelënguentsá, chë canýsëfta copbenga bomnënga jútjena chë canýsëfta ústonoye pochócaye soyëngaca, átšbioye tonjánabo y šonjaniana: “Mabo, cbochanjinýinýiye chë tojobouamá shembása, chë Oveshatembe shema ca.”

<sup>10</sup> Y atše chë Uámana Espíritoftaca corente mandaná jtsemnëse, chë ángel šonjanánatse canye bëts y tsbanana tjoye, y šonjaninýinýé chë tsëm bëts pueblo Jerusalén, chë “uámana ca” uabaina pueblo, celocana Bëngbe Bëtsábicocana enjétsostjajuana. <sup>11</sup> Chë bëts pueblo enjétsëbuashinýinýana Bëngbe Bëtsabe buashinýinýanánaca; enjétsëbuashinýinýana mo canye uámana botamana ndëtšbecá, mo jaspe ndëtšbecá, pero mo cristalcá tëshínýiniñe. <sup>12</sup> Chë bëts pueblo shëconana canye bëts y tsbanana tapiëse enjamna, chë tapiësiñe bnëtsana uta bëshashangá y cada bëshashentše canye ángel, y chë bëshashangañe enjanábemana chë Israeloca bnëtsana uta bëts pamílangbe uabaina. <sup>13</sup> Shinýe bocanoica unga bëshashangá, shinýe uenatjémbambanoica ungashá, tsjuanoica unga bëshashangá, y tsmanoica ungashá. <sup>14</sup> Chë tapiëse enjanécuatjona bnëtsana uta ndëtšbenguiñe, y chëbenguiñe enjanábemana Jesucristo chë Oveshatembe bnëtsana uta ichmónëngbe uabaina.

<sup>15</sup> Chë ángel átšëftaca oyebuambnayá canye castellano juinýnanëšëfja enjánatbëna jamedídama chë bëts pueblo, chentša bëshashangá y chentša tapiëse. <sup>16</sup> Chë bëts pueblo cach medida enjánbomna nyets cantoica, cach medida tëntsoye y nyanëjoye. Chë ángel chabe juinýnanëšëfjaca chë bëts pueblo tonjanmedidá: enjánbomna uta uaranga y uta patse kilómetrënga; tëntsoye, tsbanánoye y nyanëjoye cach medida enjánbomna. <sup>17</sup> Chentšana chë tapiëse tonjanmedidá, enjánbomna chnénguana bnëtsana y shachna metrënga; ntšamo entšanga chca soyënga jamedídama mondëtatšëmbcá chë ángel tonjanmedidá.

<sup>18</sup> Chë tapiëse enjanpormana jaspe ndëtšbeca, y chë bëts pueblo ena castellánoca, tša chca nya mo cristalcá tëshínýiniñe enjaninýna. <sup>19</sup> Chë ndëtšbenga ndayiñe chë tapiëse enjanécuatjona enjánbotamanana nyetsca uámana botamana ndëtšbéngaca: canyëbé jaspe ndëtšbeca, chë inyëbé zafiroca, chë inyëbé ágata ndëtšbeca, chë inyëbé esmeráldaca, <sup>20</sup> chë inyëbé ónice ndëtšbeca, chë inyëbé cornalina ndëtšbeca, chë inyëbé crisólito ndëtšbeca, chë inyëbé berilo ndëtšbeca, chë inyëbé topácioca, chë inyëbé crisoprasa ndëtšbeca, chë inyëbé jacíntoca y chë inyëbena amatista ndëtšbeca. <sup>21</sup> Chë bnëtsana uta bëshashangá enjuamna

bnëtsana uta perlënga; cada bëshasha nye canye pérlaca uapormanësha. Y chë más bëts tsáshenëjana enjamna ena castellánoca; mo cristalcá tëshínýiniñe enjaninýna.

<sup>22</sup> Chë bëts pueblentše ndocna Bëngbe Bëtsabe bëts yebna chiyátaninýe, er Bëngbe Utabná, chë Bëngbe Bëtsá nyets obenana bomná y chë Oveshatema chentše bonjamna, y chata nyetscangbiana chë bëts pueblentše ndayéntsñaca adoránata bonjétssemna.

<sup>23</sup> Chë bëts pueblentše ndoñe quenjatsiyta shinýe o juashcona chaotsebínýnaye, er Bëngbe Bëtsabe buashinýinýanana chentše enjétsëbinýnaye, y chë Oveshatembe buashinýinýanana mo uajuinýanëshacá enjamna chë bëts pueblama. <sup>24</sup> Chentša binýnayánaca, entšanga nyetsca mándayëngbentše mochantsiyena, y quem luarentša mandadënga chëngbe uámana y bëts soyënga chë bëts pueblöye mochanjiyëbo. <sup>25</sup> Chë bëts pueblentša bëshashangá ndocna te quemochtëtatame, y chentše ndocna ora ibeta queochátsmëna.

<sup>26</sup> Chë bëts pueblöye mochanjiyëbo chë nyetsca luarënguentsá entšangbe uámana y bëts soyënga, y chë nyetsca luarënguentsá entšangbeñe bëtsétsanga y uámanënga iuabiamná soyëngnaca. <sup>27</sup> Pero ndocna te queochátómashëngo ndayánaca, y chë soye chaot sama entšanga ndoñe tšábënga chamotsemnama Bëngbe Bëtsá jadórama; ni ndocná queochátamashëngo, Bëngbe Bëtsabiana nya tondayama ogustana soyënga amá o inýengbioye jáingñama soyënga amá. Choye mochanjámashjna nye chë ndëmuanýengbe uabaina yojtsábemana chë Oveshatembe libréšañe, chë nyetsca tescama tšabe vida mochlónýenëngbe uabaina uábënantse.

**22** Chë ángel šonjaninýinýé chë enjanobëjna béjaye vida bomniye. Chë býyeshe enjamna ndëtseguíye y tëshínýiniye mo cristalcá. Enjanóbocana chë Bëngbe Bëtsá y chë Oveshatembe uámana puesto-cana, <sup>2</sup> y chë más bëts tsashená tsëntsajana enjanobëjna. Chë fshajayentsá catoica lado enjanójuajna betiyeshënga chë nyetsca tescama yomna tšabe vida jtsebomnama, canye uatiñe bnëtsana uta soye jashájonana, canye cada shinýe; chë betiyeshentša tsbuanáchënga josérviana nyetsca mándayëngbentša entšanga jáshnama. <sup>3</sup> Choca ndocna soye queochátsmëna chë ndayama Bëngbe Bëtsá tojayana ndoñe tšabá yondmëna ca, y ndaye bacna soye japásama chaotsemna soye. Chë Bëngbe Bëtsá y chë Oveshatembe uámana puesto chë bëts pueblentše echántsemna, y chatbe oservénënga mochántsadórana. <sup>4</sup> Chënga mochanjinýe Bëngbe Bëtsabe jubíá, y chabe uabaina chëngbe juentsaca mochantsambaye. <sup>5</sup> Chentše ndocna ora ibeta queochátsmëna, y chentša oyenënga ndoñe queochátëjamoto canye uajuinýanësha o shinýe chaotsebínýnaye, er Bëngbe Bëtsá Bëngbe Utabnabe buashinýinýanana chëngbiana echantsebínýnaye, y chënga mochántsemna mo reyëngcá uámanënga, y Bëngbe Bëtsáftaca nyetsca tescama mochántsemandaye.

### Jesucristo jésabama entsobeco

<sup>6</sup> Chentšana chë ángel šonjaniyana: “Quem palabren-ga endmëna ntšamo ndegombre yomncá, y nÿetscanga mondobena chiñe corente jtsošbuáchiyana. Bëngbe Utabná, cach Bëngbe Bëtsá, nda endbama chabe juabna oyebuambnayënga, chëngbe ainaniñe osertánana y añemo chamotsebomnama jóyebuambayama, chabe ángel tbojichmó chabe oservénëngbioye jinÿanÿiyama ndayá betscó yojtsemna jopásama ca.”

<sup>7</sup> Chora Jesús tonjánayana: “Mouena. ¡Atse cachiñe betscó chanjésabo! Oyejuayá nda quem buayenana soyënga, ntšamo ndegombre jopásama, chë Bëngbe Bëtsabe juábnaca oyebuambana soye tojoyeuná, chë ndayama quem librëšañe entsábemana ca.”

<sup>8</sup> Atse Juan, chë soyënga sënjanuena y sënjáninÿe. Y chca sënjanuena y sënjaninÿentsána, chë chca šonjaninÿinÿé ángelbe delante atse sënjanoshamentšé, cha jadórama. <sup>9</sup> Pero cha šonjaniyana: “Ndoñe, átšeftaca ndoñe chca mátamana, er atse canÿe Bëngbe Bëtsabe oservená sëndmëna, ntšamo aca condmëncá, y ntšamo chë Crístbeyeca acbe catsátanga, chë Bëngbe Bëtsabe juabna oyebuambnayënga y nÿetscanga chë ndayá quem librëšañe endayanama tmojóyeunanga mondmëncá. Aca cmontsemna Bëngbe Bëtsá jadórama ca.”

<sup>10</sup> Chora mëntšánaca šonjaniyana: “Ndoñe mo iytemencá catjáboshjona ndayá quem librëšañe entsabemancá, chë ndegombre jochnënguama soyënga, er chca jopásama chë tempo ya entsobeco. <sup>11</sup> Cachcá monÿá chë bacna entšá bacna soyënga chaotsama; chë puerte bacna soyënguiñe jtsiyenama bošá, cachca soyënga chaotsama; pero chë tšábiana ntšamo tšabá yomncá chaotsama, y chë Bëngbe Bëtsabe entšá, nÿets tempo nÿets ainánaca chábioye chabotseserve-na ca” —cha šonjaniyana.

<sup>12</sup> Chora Jesús cachiñe tonjánayana: “Mouena. Atse quem luaroye betscó chanjésabo, y átšeftaca chanjijëbo chë uacanana soye, y cada ona tšëngaftanguentšábioye chanjoyiye ndayá tojamama ntšamo tbojtsomerecencá. <sup>13</sup> Atse sëndmëna chë nÿetsca soyënga bojatsáyá y pochocayá, chë natsaná y ustonoyá, chë ndábeyeca y ndabiama lempe yomna ca” —šonjaniyana.

<sup>14</sup> Oyejuayënga chë bacna soyëngama perdonánënga imojtsemnënga, mo chënga chëngbe entšáyá bota-

mana cuaftsaboshabecá. Chca chënga mochantsobena chë nÿetsca tescama yomna tšabe vida jtsebomnama uacanánana jashjáchama, mo chë nÿetsca tescama yomna tšabe vida jtsebomnama betiyeshentsána cuaftsesacá, y mochanjobenaye chë tsëm bëts puebloye bëshásajana tšabá jamashjnana. <sup>15</sup> Pero ndoñe quemochatobenaye jamashjnana chë ba ndoñe tšabe juabnënga ainaniñe bomnënga, chë bocjuanënga, chë shembása o boyabásaftaca bacna soye amënga, chë ínÿenga obánayënga, chë soyënga adórayënga diosënga yomna ca jtsejuabnayëse, y nÿetscanga chë bostero soyënga ogusetánënga y chca jtsamëse oyenënga.

<sup>16</sup> Chora Jesús cachiñe tonjánayana: “Atse Jesús, atšbe ángel tijichmó chë ntšamo atse sëntsejuabnacá ndayenache ošbuachiyëngcá enefjuanëngbioye lempe chámabuayenama. Atse sëndmëna chë Rey Davidbentsána Entšá. Atse sëndmëna mo chë bínÿanoye puerte bínÿnaye estrellcá ca.”

<sup>17</sup> Chë Uámana Espiritu y chë Oveshatembe shema bondbëtsichamo: “¡Mabo ca!” Y nda chca chaojouená cháuyana: “¡Mabo ca!” Y mo nda tša uajuendayana tojtsebomna, tojabo y bëtscá bójaye cuaifjofšecá, cachcá nda tša tojtseboše Jesusbe soyënga jtsebomnama, chábioye chaobeconá y cha echanjama chë soyënga cha chaotsebomnama y chë nÿetsca tescama yomna tšabe vídnaca, chca jtsebomnama tondaye ntsotjañcá.

<sup>18</sup> Nÿetscanga ntšamo quem librëšañe entsabemancá, chë ndegombre echanjopásama chamojouenëngbioye šcuabuayená. Nderado nda chë soyëngama más chaojaboté, Bëngbe Bëtsá echanjama cha chaosufrí chë quem librëšañe entsábemana pochócaye soyënga. <sup>19</sup> Y nderado nda ntšamo quem librëšañe entsabemancá, chë ndegombre echanjopásama soyënguiñe ndayánaca tojajuaná, Bëngbe Bëtsá chábioye bochantsebojuána ntšamo chabiana yomncá chë nÿetsca tescama yomna tšabe vida jtsebomnama betiyeshentsána y chë tsëm bëts pueblentsána, chë ndayama quem librëšañe entsábemana.

<sup>20</sup> Quem soyënga oyebuambnayá, chë lempe ndegombre echantsemnama tonjayaná, atse, Jesús sentsichamo: “Aíñe, betscó chanjésabo ca.”

Chca chaotsemna. ¡Cochjabo, Bëngbe Utabná Jesús!

<sup>21</sup> Bëngbe Utabná Jesús chaoma tšabe bendicionënga tšëngaftangbeñe chaotsemnama.